


Yù bilin ni Namarò nga meyannung kâ Apu Kesu

Kiristu: Yù bagu nga tarátu ni Namarò sù ira nga

mangikatalà kâ Apu Kesu Kiristu



New Testament in Atta, Pamplona

# **Yù bilin ni Namarò nga meyannung kâ Apu Kesu Kiristu: Yù bagu nga tarátu ni Namarò sù ira nga mangikatalà kâ Apu Kesu Kiristu New Testament in Atta, Pamplona**

copyright © 1996 Wycliffe Bible Translators, Inc.

Language: Pamplona Atta (Atta, Pamplona)

Translation by: Wycliffe Bible Translators, Inc.

## **Copyright Information**

© 1996, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

## **The New Testament**

in Atta, Pamplona

© 1996, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

---

2014-08-06

PDF generated using Haiola and XeLaTeX on 18 Apr 2025 from source files dated 29 Jan 2022  
b48ec929-782f-5e43-b9b5-5ce8e5d5989a

## Contents

Mattiu . . . . .	1
Markus . . . . .	59
Lukas . . . . .	93
Kuan . . . . .	151
Kingnguá . . . . .	193
Roma . . . . .	245
1 Korinto . . . . .	272
2 Korinto . . . . .	299
Galasia . . . . .	316
Epeso . . . . .	326
Pilippay . . . . .	336
Kolosi . . . . .	343
1 Tessalonika . . . . .	350
2 Tessalonika . . . . .	356
1 Timotio . . . . .	359
2 Timotio . . . . .	367
Titò . . . . .	373
Pilemon . . . . .	377
Kebru . . . . .	379
Ime . . . . .	400
1 Eduru . . . . .	407
2 Eduru . . . . .	415
1 Kuan . . . . .	420
2 Kuan . . . . .	427
3 Kuan . . . . .	429
Jud . . . . .	431
Nepalappâ . . . . .	434

## Yù Napiá nga Dámak nga Meyannung kâ Apu Kesu Kiristu nga Initúrâ ni Mattiu

*Yù Meyannung sù Initúrâ ni Mattiu*

Si Mattiu yù Kudio nga mangngágán gapay ta Libi (Mattiu 9:9; Markus 2:14), nga inagálán ni Apu Kesu ta umay makituddu kuna. Á mebiláng si Mattiu sù ira mapulu duá nga kábulun ni Apu Kesu nga sinudduán na ta tallu ragun.

Á ipalappâ ni Mattiu ta si Apu Kesu yù Patul nga iddagán nayù ira Kudio ta áddè ngaw gári. Nelistá saw yù ira naggaká kâ Apu Kesu, nga namegapu kâ Kákay Abrakam ta áddè kâ Kusè nga atáwa ni Maria nga yená ni Apu Kesu. Á yáyù nga mepasingan ta si Apu Kesu yù ginaká ni Patul Dabid, nga makáwayyá nga mammaguray, megapu sù panullà ni Namaro kuna.

Á mepasingan gapay ta si Apu Kesu yù mesturu. Á ipakánnámmu na yù ipakuá ni Namaro sù ira tatole na, áんな yù aru nga napiá nga initabbá ni Namaro sù ira nga mangikatalà kuna. Á aijan gapay yù ituddu na nga "Kapiánán nayù Itaddán ni Namaro" (22:37-38). Á maporián sù libru yù kinagi na nittam nga abbúnat tam ta "Yù Panullà ni Apu Kesu nittam, ta Mangipakánnámmu ittam kuna" (28:18-20).

*Yù Mayán na yawe Napiá nga Dámak*

Yù ira Naggaká kâ Apu Kesu (1:1-2:23)

Yù Pangilayalayâ ni Kuan, nga Minánnigù (3:1-12)

Yù Pakirigú ni Apu Kesu kâ Kuan (3:13-17)

Yù Pamarubá ni Satanas kâ Apu Kesu (4:1-11)

Yù Pangituddu ni Apu Kesu ta Keggá na ta Galilia (4:12-18:35)

Yù Pangilayalayâ ni Apu Kesu ta Keggá na ta Puddul (5:1-7:18)

Yù Áddasal nga Inituddu ni Apu Kesu (6:9-13)

Yù Meyannung sù Pammagure ni Namaro (13:1-52)

Yù Páno ni Apu Kesu ta Galilia nga Umay ta Jerusalem (19:1-20:34)

Yù Pangikeká ra kâ Apu Kesu áんな Pamapáte ra kuna (21:1-27:66)

Yù Pagáddekan na yawe Ággaw áんな yù Dattál nayù Pammagure ni Namaro (24:1-25:46)

Yù Paginnanole ni Apu Kesu, nga Matolay (28:1-20)

*Yù ira Naggaká kâ Apu Kesu*

*Lukas 3:23-38*

<sup>1</sup> Yawe yù naketúratán nayù ira naggaká kâ Apu Kesu Kiristu. Neyanâ si Apu Kesu sù ira ginaká ni Patul Dabid. Á neyanâ si Patul Dabid sù ira ginaká ni Kákay Abrakam.

<sup>2</sup> Danniau yù ira nelistá nga namegapu kâ Kákay Abrakam.

Á si Abrakam yù ammò ni Isak, á yù apù ni Abrakam si Akup, á yù ira ápù na ta siku si Juda áんな yù ira wáwwagi ni Juda.

<sup>3</sup> Á yù ira ápù ni Abrakam ta dulung di Peres kâ Sera nga ánâ ni Juda, á si Tamar yù innò da. Á yù apù ni Abrakam ta tumang si Esron.

Á si Esron yù ammò ni Ram.

<sup>4</sup> Á yù apù ni Esron si Amminadab, á yù apù na ta siku si Nassion, á yù apù na ta dulung si Salmun.

<sup>5</sup> Á si Salmun yù ammò ni Boas, áんな yù innò ni Boas si Rakab\*.

Á si Boas yù ammò ni Obed, áんな yù innò ni Obed si Lus†. Á yù apù ni Boas si Jesse, nga anâ ni Obed.

<sup>6</sup> Á yù apù ni Boas ta siku si Patul Dabid, nga anâ ni Jesse.

Á si Patul Dabid yù ammò ni Solomon. Á yù innò ni Solomon yù babay nga atáwa na ngawi Uraya.

<sup>7</sup> Á yù apù ni Patul Dabid si Robowam, á yù apù na ta siku si Abiya, á yù apù na ta dulung si Asa.

<sup>8</sup> Á yù apù ni Patul Dabid ta tumang si Josapat.

Á si Josapat yù ammò ni Joram. Á yù apù ni Josapat si Ussiya.

\* <sup>1:5</sup> Á ari Kudio si Rakab. Aggina yù ngaw babay nga taga Jeriku nga nangabbák sù ira duá nga lálláki nga jinok ni Josiwa, ta tullung ira ta ili na Jeriku nga umay massísim. † <sup>1:5</sup> Ari Kudio gapay si Lus. Aggina yù bálu nga taga Moab, nga nepulù sù katugágán na ta panoli ra ta lugár na Juda.

9 Á yù apù ni Josapat ta siku si Jotam, á yù apù na ta dulung si Akas, á yù apù na ta tumang si Esakiya.

10 Á si Esakiya yù ammò ni Manasse, á yù apù ni Esakiya si Amos, á yù apù na ta siku si Josiya.

11 Á si Josiya yù ammò di Jekoniya ánnna yù ira wáwwagi na. Danniaw yù ira ginaká ni Abrakam nga nelistá ta áddè ta pangappù nayù patul na Babilonia nira ánnna yù pamaggagakká na nira nga iniyángé na ta Babilonia, tapè aripanan na ira.

12 Á ta keggá nayù ira Kudio ta Babilonia áddè ta keyanâ ni Apu Kesu Kiristu, danniaw yù ira nelistá nga naggaká kuna.

Si Jekoniya yù ammò ni Salatiel, á yù apù ni Jekoniya si Sirubbabel.

13 Á yù apù ni Jekoniya ta siku si Abiud, yù apù na ta dulung si Eliakim, á yù apù na ta tumang si Asor.

14 Á si Asor yù ammò ni Sadok, á yù apù ni Asor si Akim. Á yù apù na ta siku si Eliud.

15 Á yù apù na ta dulung si Eleyasar, á yù apù na ta tumang si Mattan. Á anâ ni Mattan si Akup.

16 Si Akup yù ammò ni Kusè. Á yù atáwa ni Kusè si Maria, nga innò ni Apu Kesu, nga mangngágan ta Kiristu, nga Mangiyígù ánnna Mammaguray.

17 Á yáyù nga mapulu appâ yù gaká nayù ira naggapu kâ Kákay Abrakam áddè kâ Patul Dabid. Á mapulu appâ yù gaká ra gapay nayù ira naggapu kâ Patul Dabid áddè ta pangiyángé na patul sù ira Kudio ta gián na nga Babilonia. Á kunnian gapay, mapulu appâ yù ira gaká ra áddè ta pamegapu nayù ira Kudio nga naggián ta Babilonia áddè ta keyanâ nayù Mangiyígù.

*Yù Keyanâ ni Apu Kesu Kiristu*

*Lukas 2:1-7*

18 Á kunniauw yù kesimmu nayù keyanâ ni Apu Kesu Kiristu. Netarátu si Maria nga meyatáwa kâ Kusè. Ngam lage ra magatáwa, nánnámmuán ni Maria ta mabussikin negapu sù pakapangnguá nayù Mangilin nga Ikararuá ni Namarò.

19 Á pakánnámmu ni Kusè ta mabussì yù katarátu na, á gapu ta napiá nga laláki si Kusè, nga mangikállà ánnna arán na ikáyâ ta mepasiráná si Maria, yáyù nga ninonò na ta igúngé na nga awán ta makánnámmu.

20 Á ta pannonorón na paga ni Kusè karannian, á nakakaturuk, á nattatagenà. Á pattatagenà na, aijjan nappasingan kuna yù daroban ni Namarò. Á kinagi na kuna, “Kusè, sikaw nga ginaká ni Dabid, ari ka mabbábáng nga mangatáwa kâ Maria, ta mabussì lápay sù pakapangnguá nayù Mangilin nga Ikararuá.

21 Á iyanâ na sangaw yù laláki, nga ingágán naw ta Kesu, gapu ta aggina yù mangiyígù sù ira tatole na, tapè ari ira mapagikáru sù liwiliwâ da,” kun nayù daroban ni Namarò kâ Kusè.

22 Á nesimmu ngámin danniaw tapè matuppál yù bilin ni Namarò nga inipeyubobuk na sù ngaw ábbilinán na, nga kunniauw:

23 “Ginnán naw yù kagiak ku nikayu. Mabussi sangaw yù magingánay nga narenu, á iyanâ na sangaw yù laláki nga ingágán naw ta Imanuel.”<sup>‡</sup>

Á yá kebalinán nayù ngágán na, aijjan si Namarò nittam.

24 Á kalukák ni Kusè, kinuruk na yù kinagi nayù daroban ni Namarò, á inâ na si Maria ta bale na.

25 Ngam arán na bulubugá siniggek si Maria áddè sù paganâ na ta laláki, nga ningágán ni Kusè ta Kesu.

## 2

*Yù Pakimore nayù ira Álliuk nga taga Lalassangán*

1 Á sù pammagure ni Patul Erodo ta Judiya, neyanâ si Apu Kesu sù ili na Betlekem, sù purubinsia na Judiya. Á ari kuruk nga nabayák nga nappasá yù keyanâ na, á minay ta ili na Jerusalem yù ira lálláki nga naggapu ta arayyu nga lugár ta lalassangán. Nasírik ira nga naggigóámmu sù ira bituan.

2 Á iniyabbú da sù ira tatolay nga taga Jerusalem, á kinagi ra, “Sisaw gián nayù abbing nga neyanâ gangù, nga mabbalin ta Patul nga mammaguray sù ira Kudio? Ta nasingam mi yù bituan na nga aijjan gangù ta lalassangán, á yáyù nga umay kami makimoray kuna,” kud da.

<sup>3</sup> Á pakarámak ni Patul Erodo karannian, kuruk nga nabbagal, á nepatalugáríng sù ira ngámin nga tatolay ta Jerusalem gapay, marakè talián nayù abbing si Patul Erodo nga mammaguray ta Judiya.

<sup>4</sup> Á gapu ta naburung si Patul Erodo, inipágál na yù ira ngámin nga kátannangán nga párí ánná yù ira mangituddu sù tunung da, á iniyabbú na nira, nga kun na, "Sogíán nayù nakeyanatán nayù mammaguray nga mangngágán ta Kiristu?"

<sup>5</sup> Á simibbál yù ira kátannangán, á kinagi ra kâ Patul, "Á tán nga ili na Betlekem sù purubinsia na Judiya, ta yáyù yù inipetúrâ ni Namarò sù ngaw ira ábbilinán na, nga kunniauw:

<sup>6</sup> 'Sikayu nga tatolay nga taga Betlekem, sù purubinsia na Judiya,  
mássiki nu baddì yù ili naw,  
meparámak sù ira ngámin nga mammaguray sù purubinsia na Judiya,  
gapu ta duttál sangaw nga maggapu sù ili na Betlekem  
yù mammaguray nga manaron sù ira tatolè nga Israel.' <sup>\*</sup>

<sup>7</sup> Á pakaginná ni Erodo karannian, inagálán na laguk yù ira álliuk nga naggapu ta lalassangán. Á inilímak na yù pakiubobuk na nira, á iniyabbú na nira nu káni yù lattuák nayù bituan. Á kinagi ra kuna.

<sup>8</sup> Á jinok na ira ta ili na Betlekem, á kinagi na nira, "En naw aleran ta napiá yù gián nayù abbing. Á sangaw nu málerán naw, iránuuk naw nikán, tapè ek ku gapay makimoray kuna," kun ni Erodo nira.

<sup>9</sup> Á pakaginná nayù ira álliuk sù kinagi nayù patul, nánav ira. Á pakalakalakák da ta dálan, nasingad da má yù bituan nga limittuák ta lalassangán. Á napolu yù bituan nira, á sinututtul da áddè ta pagginnà na sù aruk na gián nayù abbing.

<sup>10</sup> Á nerallà yù pagayáyâ da megapu sù bituan, nga nangituddu sù gián nayù abbing.

<sup>11</sup> Á simillung ira sù balay, á nasingad da yù abbing kâ Maria nga yená na. Á namalittúkak ira nga nakimoray sù abbing. Á binukatád da laguk yù kárgá ra, tapè ilawád da yù nanginá nga kukuá ra. Á iniyawâ da kuna yù buláwán ánná duá kaláse nga bábbanguk, nga insensu ánná mirrá.

<sup>12</sup> Á sù páno ra nga nanoli ta lugár da, tanakuán yù nallakarád da, gapu ta pinagimuguk ni Namarò ira megapu sù ipatatagenà na nira, ta ari ira manoli kâ Patul Erodo.

#### *Yù Pangitammang ni Kusè kári Maria ánná yù Anâ na*

<sup>13</sup> Á páno nayù ira álliuk nga taga lalassangán, á nattatagenà mágín si Kusè. Á nappasigan kuna yù daroban ni Namarò, á kinagi na kuna, "Arà! Gumikkáng ka, ta em mu itálaw yù ira masíná, ta iyángem ira ta lugár na Egipto. Á maggián kayu túrin áddè ta kagiak ku nikayu ta mónav kayu tán. Ta ipálek na sangaw ni Patul Erodo yù abbing, ta igagángé na nga ipapátagay," kun na kâ Kusè.

<sup>14</sup> Á dagarágâ nga giminiikkáng si Kusè ta yian nga gabi, á mónav ira, ta en na iniyángé ni Kusè yù masíná ta lugár na Egipto.

<sup>15</sup> Á naggián ira ta Egipto áddè ta pate ni Patul Erodo. Á yáyù nga natuppál yù ubobuk ni Namarò nga inipeyubobuk na ngaw sù ira ábbilinán na, ta kinagi na, "Agálák ku yù Anâ ku naga maggapu ta lugár na Egipto," kun na.

#### *Yù Pangipapáte ni Patul Erodo sù ira Baddì nga Ábbing*

<sup>16</sup> Á pakánnámuu ni Patul Erodo ta sinestémán nayù ira masírik nga lálláki, nga ari manoli nga mangiránuuk kuna, á nepallà yù pore na. Á jinok na yù ira umay mamapátag sù ira ngámin nga ábbing nga lálláki sù ili na Betlekem ánná yù ira bárriu na. Á pinapáte ra ngámin yù ira kapángngiyanâ ánná áddè ta duá yù dagud da, gapu ta pabbisítá ni Erodo sù ira masírik nga lálláki, nánnámmuán na ta duá ragunin yù nappasá áddè sù olu nga pakasingad da sù bituan.

<sup>17</sup> Á yáyù nga natuppálín laguk yù inipeyubobuk na ngaw ni Namarò kâ Jeremia nga ábbilinán na, sù keggá na ngaw ta dabbuno. Ta kinagi na,

<sup>18</sup> "Maginná nayù ira tatolay yù ira gíkulukuletán,  
nga nepallà yù daddam da,  
túrin sù lugár na Rama.

Maraddam yù ira ginaká ni Rakel,  
megapu sù pámmatay nayù ira ánâ da.  
Awán bulubugá ta ággayáyâ da,

\* 2:6 Mika 5:2

ta natayin yù ira ábbing.”<sup>†</sup>

*Yù Panoli di Kusè ta Nasaret*

<sup>19</sup> Á pappasá nayù pate ni Patul Erodo, á kapamiddúá na nga nappasingan yù daroban ni Namarò kâ Kusè túrin ta lugár na Egípto sù pattatagenà na.

<sup>20</sup> Á kinagi nayù daroban kâ Kusè, “Gumikkáng ka, á ilabbè min yù ira masíná sù lugár na Israel, ta natayin yù ira mangigagángay nga mampátagay sù abbing,” kun na.

<sup>21</sup> Á giminikkáng laguk si Kusè, á inipáno na yù ira masíná, ta nanoli ira sù lugár na Israel.

<sup>22</sup> Á labbè da ta lugár na Israel, narámak ni Kusè ta nammaguray ta lugár na Judiya si Arkelò, nga táli ni Patul Erodo nga yáma na. Á naganássing si Kusè nga manoli ta lugár na Judiya. Á pattatagenà na mángin ni Kusè, inipakánnámmu ni Namarò kuna ta umay ira sù purubinsia na Galilia.

<sup>23</sup> Á minay ira laguk ta Galilia, nga nakipaggián ta ili na Nasaret. Á yáyù nga natuppálín yù inipeyubobuk na ngaw ni Namarò sù ira ábbilinán na, nga kinagi ra, “Meparámak sangaw nga taga Nasaret.”

### 3

*Yù Pangilayalayâ ni Kuan nga Minánnigù*

*Markus 1:1-8; Lukas 3:1-18; Kuan 1:19-28*

<sup>1</sup> Á pappasá na aru nga dagun, jmittál si Kuan nga Minánnigù, nga mangilayalayâ sù kalállamatán sù purubinsia na Judiya. Á aru yù ira tatolay nga minay ta kalállamatán, tapè ginniginnád da yù kagian na.

<sup>2</sup> Á kinagi ni Kuan nira, “Maraddam kayu sù liwâ naw, á mabbabáwi kayu laguk sù naráké nga akka-akkuán naw, tapè dán nga naparán kayin, ta duttálín yù pammagure ni Namarò sù ira tatolay ta dabbuno,” kun na.

<sup>3</sup> Á si Kuan, aggina yù kinagi na ngaw ni Isaya, nga ábbilinán ni Namarò, nga kun na, “Ajjan yù makkatakatal ta kalállamatán.

Yaw ikatakátol na: ‘Umayin si Apu! Paránan naw yù dálan na.

Tunungan naw yù pallakarán na.’ ”\*

<sup>4</sup> Á nabbarawási si Kuan ta gámì nga napadday ta duddù na kamel,<sup>†</sup> nga kun na barawási na pobare. Á nabbarakà ta tabbì na ayám. Á yá ipakkatole na yù durun ánná issi.

<sup>5</sup> Á aru yù ira minay kâ Kuan tapè maginná ra yù ituddu na. Naggagapu ira ta ili na Jerusalem ánná ngámin nga purubinsia na Judiya ánná ngámin nga babálay nga aranni sù danum na Jordan.

<sup>6</sup> Á nabbabáwi ira ta liwiliwâ ta tapè pakomán ni Namarò ira. Á pakkagi ra ta pabbabáwi ra, jinigù ira na Kuan ta danum na Jordan.

<sup>7</sup> Á gapu ta aru yù ira nga minay kâ Kuan tapè makirigù ira kuna, á aru gapay yù ira Parisio ánná yù ira Sadusio nga minay kuna. Aggira yù naggigiámmu ta rilisiód da. Á pakasingan ni Kuan nira, kinagi na nira,

“Sikayu nga ginaká na iráw, ngattá ta kagian naw ta melilli kayu sù pamagikáru ni Namarò megapu sù karigù naw? Ari!

<sup>8</sup> Likuránán naw laguk yù liwiliwâ naw, á akka-akkuán naw yù napiá, tapè mepasingan ta kukurugán nga nabbabáwi kayu.

<sup>9</sup> Á arán naw gapay kagian ta makalillì kayu sù pamagikáru ni Namarò gapu ta ginaká na kayu ni Kákay Abrakam. Ta ikállà na galâ ni Namarò yù ira nga mangruk kuna, nga ginaká ni Kákay Abrakam. Á awayyá ni Namarò gemma nga pabbalinan ta gáká ni Kákay Abrakam yawe ira batu ta dabbun, tapè tuppálán na yù ngaw initabbá na kâ Abrakam.

<sup>10</sup> Á yaw keyarigán nayù pamagikáru ni Namarò yù wátay nga megangngà ta gamù na káyu. Á kunnay ta dán nga naparán yù wátay nga áttukák ta káyu, dán nga naparán gapay yù pamagikáru ni Namarò. Á ngámin ira nga kun na káyu nga ari napiá yù ábbungá ra, matukák ira nga matuggi.”

<sup>11</sup> Á inupù ni Kuan yù magubobuk, á kinagi na, “Nu makirigù kayu nikán, nga pakasinganán ta pabbabáwi naw ta liwâ naw, á danum lâ yù irigù ku nikayu. Ngam aijan sangaw yù umay, nga dakal yù pakáwayyá na ánné nikán. Á aringà mepángngà nga maggawing ta sapátù na. Á dumá yù ánnigù na, ta isipà na yù ira mangruk kuna sù

† 2:18 Jeremia 31:15      \* 3:3 Isaya 40:3      † 3:4 Yù kamel yù masikan nga ayám nga kun na nuáng onu kabáyu. Á sináppukul yù barâ na kamel. Á maggián ira ta namagá nga lugár.

Mangilin nga Ikararuá na, nga kun na irigù na nira. Á kun na api yù irigù na sù ira áppè piípa, ta ari ira melillì sù pangukum na.

12 Á sangaw nu lubbè, isinná na yù ira manguruk kuna sù ira ari manguruk, nga kun na tolay nga massâ ta aggì. Unnuran na yù aggì, nga pakappián na sangaw sù ággubbuán na. Ngam tuggian na sangaw yù attá sù api nga ari bulubugá máddà." Yáyù inilayalayá ni Kuan, nga Minánnigù.

*Yù Karigù ni Apu Kesu*

*Markus 1:9-11; Lukas 3:21-22*

13 Á minay si Apu Kesu kâ Kuan ta dappâ na Jordan, nga naggapu ta purubinsia na Galilia, tapè makirigù kuna.

14 Á gapu ta mappasirán si Kuan, á kinagi na kâ Apu Kesu, "Apu, sikán nakuan yù mawák nga makirigù nikaw, ngam ngattá, ta umay ka makirigù nikán?" kun ni Kuan.

15 Á kinagi ni Apu Kesu, "Paguráyám mu, ta napiá nu palurotat ta ngámin yù ipakuá ni Namarò nitta," kun na. Á yáyù nga inanugù ni Kuan, á jinigù na.

16 Á kabalin ni Apu Kesu nga nakirigù kuna, á giminon nga naggapu sù danum. Á dagarágâ nabbuk yù lángi, á nasingan na yù Ikararuá ni Namarò, nga kun na lummun nga minay naddappá kuna.

17 Á nappáginná yù ngárál ni Namarò nga naggapu ta lángi, á kinagi na, "Yawe yù Anâ ku nga iddukak ku, á ayatánà megapu kuna."

## 4

*Yù Pamarubá ni Satanas kâ Apu Kesu*

*Markus 1:12-13; Lukas 4:1-13*

1 Á gon ni Apu Kesu nga naggapu ta danum, iniyángé nayù Ikararuá ni Namarò ta kalállamatán, tapè parubán ni Satanas nga liwatan.

2 Á ari nakkákán si Apu Kesu ta appápatalu nga ággaw, á nepallà yù bisin na.

3 Á jimikkì kuna si Satanas, á kinagi na kuna, "Nu kuruk ta sikaw yù Anâ ni Namarò, arake! Pabbalinam mè laguk ta kanan yawe ira batu," kun na.

4 Á simibbák si Apu Kesu, á kinagi na, "Ajjan yù inipetúrâ ni Namarò nga kinagi na, 'Ari lâ kanan yù ákkatolayán na tolay, nu ari gapay yù ngámin nga ubobuk ni Namarò,' " \* kun na.

5 Á tabbák ni Apu Kesu kâ Satanas, iniyángé na laguk ni Satanas sù ili na Jerusalem, á inipotun na sù kátannangán nayù bubbungán nayù karakalán nga kapilliá, nga mangilin nga bale ni Namarò.

6 Á kinagi ni Satanas kâ Apu Kesu, "Nu kuruk nga Anâ naka ni Namarò, makkassú ka ngè laguk, ta ajjan yù netúrâ nga kunniauw:

'Ipataron naka ni Namarò sù ira daroban na,  
á tangngalád da ka, tapè ari ka mabigarán, mássiki yù takkim,' "†  
kun ni Satanas.

7 Á simibbák si Apu Kesu, á kinagi na kâ Satanas, "Wan á, ngam ajjan gapay yù netúrâ,  
'Arám mu paraparubán si Namarò nga Yápum.' "‡

8 Á inipángé na laguk má ni Satanas si Apu Kesu sù kátannangán nga puddul, á inipasingan na yù ira ngámin nga páppatulán, ánná ngámin nga nakástá nga kukuá nayù ira mammagú-ray nira.

9 Á kinagi na, "Iyawâ ku sangaw nikaw ngámin danniaw, nu mama littukak ka nga makimoray nikán," kun ni Satanas.

10 Á simibbák si Apu Kesu, á kinagi na, "Mánaw ken, Satanas! Ta ajjan yù inipetúrâ ni Namarò nga kunniauw,  
'Pakimorayám mu lâ si Namarò nga Yápum.'

Aggina lâ yù passeriámu!" "§

11 Á gapu ta pinapáno ni Apu Kesu, á nánaw laguk si Satanas. Á limittuák laguk yù ira daroban ni Namarò, nga minay kâ Apu Kesu tapè abbágad da.

*Yù Pamegapu ni Apu Kesu nga Mangituddu*

*Markus 1:14-15; Lukas 4:14-15*

12 Á pakarámak ni Apu Kesu ta nebáluk si Kuan nga Minánnigù, nanoli ta Galilia.

\* 4:4 Deuteronomio 8:3    † 4:6 Salmo 91:11-12    ‡ 4:7 Deuteronomio 6:16    § 4:10 Deuteronomio 6:13

<sup>13</sup> Á ari nga naggián ta ili na Nasaret, nga jinakalán na, ngam minay naggián ta ili na Kapernium nga aranni ta bebay na Galilia, ta dabbun na Sabulon ánnna Neptali.

<sup>14</sup> Á yáyù nga natuppál yù initúrâ na ngaw ni Isaya, nga ábbilinán ni Namarò, nga kunniaw:

<sup>15</sup> “Túrin sù dabbun na Sabulon ánnna yù dabbun na Neptali,

á túrin ta aruk na bebay ánnna ta dammáng na danum na Jordan,  
ajan yù purubinsia na Galilia, nga lugár nayú ira tatolay nga ari Kudio.

<sup>16</sup> Á yù ira tatolay nga maggián tán, kun na nakallà yù nonò da, ta arád da ammu si Apu.

Ngam manawagán yù nonò da sangaw nu umay yù mamannawák nira, ta ipakánnámmu na nira yù bilin ni Namarò.

Nesinná ira ngaw kâ Namarò nga kun na natay.

Ngam sangaw nu maginná ra yù bilin ni Namarò, pannawagan ni Namarò yù nonò da.”\*

<sup>17</sup> Á natuppál yane ubobuk ni Namarò, ta yáyù pamegapu ni Apu Kesu nga mangilayalayâ sù ubobuk ni Namarò. Á kinagi na, “Mabbabáwi kayu sù liwâ naw, á likuránán nawin yù ággangnguá naw. Ta duttálín yù pammagure ni Namarò ta dabbuno.”

*Yù Pagágál ni Apu Kesu sù ira Olu nga Tudduán na*

*Markus 1:16-20; Lukas 5:1-11*

<sup>18</sup> Á pallakalakák ni Apu Kesu ta aggik na bebay na Galilia, nasingan na yù ira duá nga mawwagi, di Simon, nga mangngágán gapay ta Eduru, ánnna si Andares, nga mattabatubukul, ta yáyù ángngalluád da.

<sup>19</sup> Á kinagi ni Apu Kesu nira, “Tuttulan nawà. Á abbágát takayu, tapè kunnay ta aru nga sirá yù malâ naw kunangan, aru sangaw gapay yù ira tatolay nga ipálâ ku nikayu, nga patutulan naw nikán, tapè mesipà ira sù pammagure ni Namarò,” kun na nira.

<sup>20</sup> Á dagarágâ nga nánawád da yù ira tabukul da, á siminuttul ira kuna.

<sup>21</sup> Á pallakalakák di Apu Kesu paga ta aggik na bebay, nasingan na má yù duá paga nga mawwagi, di Ime kâ Kuan, nga anâ ni Sebedo. Ajjan ira nga mepulupulù kâ yáma ra, nga nagitubang ta barange ra nga mappoli ta tabukul da. Á pakasingan ni Apu Kesu nira, inagálán na ira gapay.

<sup>22</sup> Á dagarágâ nga nánawád da si Sebedo nga ammò da sù barange ra, á siminuttul ira kâ Apu Kesu gapay.

*Yù Pangituddu ni Apu Kesu ánnna yù Pamammapiá na sù ira Máttakì*

*Lukas 6:17-19*

<sup>23</sup> Á kabalín na nagágál ni Apu Kesu sù ira appâ nga kábulun na, pinassiár da yù tangapáddabbunán na Galilia, tapè maddagâ si Apu Kesu nga mangituddu sù ira tatolay ta ngámin nga kapilliá ra. Á inilayalayâ na yù napiá nga dámak nga meyannung sù pammagure ni Namarò ánnna pinammapiá na yù ngámin nga máttakì ánnna yù ira tatolay nga makkakerumá yù tulágad da.

<sup>24</sup> Á yáyù nga neparámak si Apu Kesu sù tangapáddabbunán na Siria, á iniyánge nayú ira tatolay ngámin nga máttakì, ánnna yù ira nga makkakerumá yù tulágad da, ánnna yù ira maganánutú baggi ra, á yù ira gapay nga nagumagán na anitu, yù ira minábballiák, ánnna yù ira ari makaguyu baggi ra. Á pinammapiá na ira ngámin.

<sup>25</sup> Á yáyù nga nagaru yù ira tatolay nga siminuttul kuna nga naggapu ta lugár na Galilia ánnna yù ira dakal nga iili na Dikapulis ánnna Jerusalem, ánnna yù purubinsia na Judiya, áddè ta dammáng na Jordan.

## 5

*Yù Pangituddu ni Apu Kesu sù Keggá na ta Puddul*

*Lukas 6:20-23*

<sup>1</sup> Á pakasingan ni Apu Kesu sù ira magaru nga tatolay, giminon ta puddul, á nagitubang. Á jimikkì kuna yù ira tudduán na.

<sup>2</sup> Á inituddu na nira, á kinagi na:

<sup>3</sup> “Mapagayáyâ yù ira manukkalak, nga ammu ra ta nakaliwâ ira nga ari makatuppál sù ngámin nga ipakuá ni Namarò nira, ta ikatalà da si Namarò ta mangabbák nira.

Mammapiá yù ággiád da sangaw, ta aggira yù mesipà sù pammagurayán ni Namarò ta lángì.

<sup>4</sup> Mapagayáyâ yù ira maraddam.

Mammapiá yù ággiád da sangaw, ta bannabannáyán na ira ni Namarò.

<sup>5</sup> Mapagayáyâ yù ira tumulù.

Mammapiá sangaw yù áaggiád da, gapu ta iyawâ na sangaw ni Namarò nira yù ngámin nga napiá nga initabbâ na.

<sup>6</sup> Mapagayáyâ yù ira makkaragâ nga manuppál sù ipakuá ni Namarò nira, nga kunnay ta mabisinín nga maláppà nga magalek ta kanan na.

Mammapiá sangaw yù áaggiád da gapu ta pakáppagan na sangaw ni Namarò ira.

<sup>7</sup> Mapagayáyâ yù ira mangikállâ sù ira kábulud da.

Mammapiá sangaw yù áaggiád da gapu ta ikállâ na sangaw ni Namarò ira.

<sup>8</sup> Mapagayáyâ yù ira nga pareku nga matunung yù nonò da.

Mammapiá sangaw yù áaggiád da, ta aggira sangaw yù makasingan kâ Namarò.

<sup>9</sup> Mapagayáyâ yù ira mamakkakápi sù ira maddamá.

Mammapiá yù áaggiád da, ta aggira ibiláng ni Namarò ta ánâ na.

<sup>10</sup> Mapagayáyâ yù ira nga marigirigâ gapu ta panguruk da kâ Namarò.

Mammapiá sangaw yù áaggiád da, ta aggira yù mesipâ sù pammagurayán ni Namarò ta lángi.

<sup>11</sup> “Á sikayu, mapagayáyâ kayu nu uyu-uyawad da kayu nayù ira tatolay ánnâ jigirigádat da kayu ánnâ paraparáketad da kayu gapu ta pangikatalâ naw nikán, ta mammapiá sangaw yù ággíán naw.

<sup>12</sup> Ta kunnian gapay yù panigirigâ nayù ira ngaw tatolay sù ira ngaw ábbilinán ni Namarò. Magayáyâ kayu laguk, mássiki nu marigirigâ kayu, ta aru yù napiá nga bálâ naw nga pinakappián ni Namarò ta lángi, nga málâ naw sangaw nu lubbè kayu tán.”

#### *Yù Keyarigán nayù ira nga Manguruk kâ Apu Kesu*

*Markus 9:50; Lukas 14:34-35*

<sup>13</sup> Á itidduu na paga ni Apu Kesu, á kinagi na, “Sikayu nga manguruk nikán, yá keyarigán naw yù asin. Ta napiá ánnâ nasingngâ yù kanat tam nu ajan yù asin kuna. Á sikayu nga manguruk nikán, nekiruk kayu sù ira tatolay nga ari manguruk, tapè itidduu naw nira yù napiá, á máwayyá ra laguk nga mabbáli nakuan ta napiá gapay. Ngam nu mallállágìn yù asin, awánin ta paggák na. Á kengá lâ, ta awán ta serbi na, nu ari lâ nga metabbâ nga meguppuguppé sangaw.

<sup>14</sup> Á yù ili nga napatáddak ta puddul, ari gemma metuttù. Kunnian gapay yù keyarigán naw. Ta sikayu nga manguruk nikán yù kun na nawák, á manawagán yù nonò nayù ira tatolay megapu sù itidduu naw nira.

<sup>15</sup> Á awán ta tolay nga mamaggatang ta isingan, nu ikáyâ na sangaw ituttù sù unak na palanggána. Ngam paggatangan na yù isingan nga ipotun na gemma sù ággianán na, tapè manawagán yù ira ngámin nga tatolay nga ajian ta balay.

<sup>16</sup> Á kunnian gapay yù keyarigán naw. Arán naw ilímak yù ángnguruk naw kâ Namarò. Á tuppálan naw yù ipakuá na nikayu, tapè masingan nayù ira tatolay yù napiá nga akka-akkuán naw ánnâ dayáwad da si Namarò nga Yáma naw ta lángi.”

#### *Yù Pangitduu ni Apu Kesu nga Meyannung sù Tunung ni Moyses*

<sup>17</sup> Á kinagi ni Apu Kesu, “Arán naw kagian ta umayâ manguli sù tunung ni Moyses ánnâ yù itidduu nayù ira ngaw ábbilinán. Arák ku patalián yù kinagi ra nu arák ku galâ tuppálan yù ngámin nga kinagi ra.

<sup>18</sup> Á kuruk yù kagiak ku nikayu, nga ari mapatalián yù tunung ni Moyses áddè ta pagáddékán nayù lángi ánnâ dabbuno. Ta ari bulubugá mapangarian yù tunung, mássiki lâ nu baddì, áddè ta matuppál ngámin.

<sup>19</sup> Á yáyù gapu na nga yù tolay nga malliwâ ta baddì sù tunung, ánnâ itidduu na sù ira kábulun na tapè malliwâ ira gapay, aggina yù kagukábán sù pammagurayán ni Namarò ta lángi. Ngam yù tolay nga manuppál sù tunung ni Namarò, ánnâ itidduu na sù ira kábulun na tapè tuppálad da gapay, aggina yù meparáyaw sù pammagurayán ni Namarò ta lángi.

<sup>20</sup> Á yáyù laguk nga kagiak ku nikayu, nu ari napiá yù ánnuppál naw sù ipakuá ni Namarò ánnè sù ánnuppál nayù ira Parisio ánnâ yù ira mangituddu sù tunung, ari kayu gemma mesipâ sù pammagurayán ni Namarò ta lángi.”

#### *Yù Pangitduu ni Apu Kesu nga Meyannung sù Mapporay*

<sup>21</sup> Á kinagi ni Apu Kesu, “Ammu naw gemma yù netuddu gári sù ira ngaw tatolay, nga ‘Ari kayu mamapátay, ta gaputad da sangaw yù tolay nga mamapátay, á ikeká ra.’”

<sup>22</sup> Ngam sikán, yawe yù kagiak ku nikayu. Pasikkálan naw yù akka-akkuán naw. Ta yù tolay nga mapporay sù kábulun na, ipagápù da sangaw sù ira pulis. Á yù tolay nga manguyaw sù kábulun na, ikeká ra sangaw sù arubáng nayù ira kues. Á yù tolay nga pakkakagián na yù kábulun na, mapagikáru sangaw ta impiernu.

<sup>23</sup> Á yáyù nga tabarangat takayu, ta nu umay kayu sù mangilin nga bale ni Namarò, nga makimoray kuna, ánnna manonò naw ta ajjan yù kabbulun naw nga nataki yù nonò na nikayu,

<sup>24</sup> á mapolu kayu bì nga umay makipakomá sù kabbulun naw. Á kabalin naw makkakápakomá, manoli kayu laguk nga makimoray kâ Namarò sù bale na.

*Makipakomá ittam sù ira Mapporay nittam*

*Lukas 12:58-59*

<sup>25</sup> “Á ta ángngarigán nu ajjan yù mangikeká nikayu, á mapolu kayu bì nga makipakomá kuna, maraké ipagápù na kayu nga ipeyángay ta kues, á ipaparesu na kayu sù ira pulis.

<sup>26</sup> Ta kuruk yù kagiak ku nikayu, nga maggián kayu ta ábbalurán ta áddè ta arán naw mekáru yù ngámin.

*Yù Netuddu nga Meyannung sù ira Mangarallaw*

<sup>27</sup> “Á ammu naw gemma yawe nakagi, nga ‘Ari kayu mangarallaw.’

<sup>28</sup> Ngam sikán, yawe yù kagiak ku nikayu, ta nu inni-innan na tolay yù babay ánnna nonopan na yù pakkarakagá na nga makiruruk kuna, nakaliwákin kâ Namarò megapu sù nonò na.

*Yù Meyannung sù Kelilli na Tolay sù Pakaliwatán na*

*Markus 9:47*

<sup>29</sup> “Á nu mapaliwâ kayu sangaw megapu sù jiwanán nga matá naw, baddulan naw laguk nga itabbà naw. Ta napiá yù kesipà naw sangaw kâ Namarò ta lángi, mássiki nu nakúráng yù baggi naw ta táddynga matá na, ánnè sù ketabbà nayù ngámin nga baggi naw sù impiernu.

<sup>30</sup> Á nu mapaliwâ kayu sangaw megapu sù jiwanán nga límá naw, gappulan naw laguk nga itabbà naw, gapu ta napiá yù kesipà naw sangaw kâ Namarò ta lángi, mássiki nu nakúráng yù baggi naw ta táddynga límá na, ánnè sù dattál nayù ngámin nga baggi naw sù impiernu.

*Yù Netuddu nga Meyannung sù ira Maggúngay*

*Markus 19:9; Markus 10:4, 11-12; Lukas 16:18*

<sup>31</sup> “Á nakagi ngaw gapay ta nu ajjan yù laláki nga mangigúngay sù atáwa na, á iyawâ na laguk yù túrá na nga pakasinganán ta paggúnge ra.

<sup>32</sup> Ngam sikán, yawe yù kagiak ku nikayu, ta makaliwâ yù laláki nu igúnge na yù atáwa na nga ari nakilaláki, gapu ta nu makiatáwa yù babay ta tanakuán, yáyù pakikarallo na megapu sù olu nga atáwa na. Á mangarallaw gapay yù laláki nga mangatáwa sù babay nga negúngay.

*Yù Netuddu nga Meyannung sù Mappagássingán*

<sup>33</sup> “Á naginná naw gapay yù kinagi ra góri sù ira ngaw olu nga tatolay, nga ‘Arán naw pallikuránán yù initabbá naw. Ngam tuppálan naw yù inipagássingán naw nga initabbá kâ Namarò.’

<sup>34</sup> Ngam sikán, kagiak ku nikayu ta ari kayu bulubugá mappagássingán. Á arán naw ikanâ yù gián ni Namarò ta lángi onu yù ággitubangán na,

<sup>35</sup> onu yù dabbuno, nga kun na pabbatayán na takki na, ánnna yù ili na Jerusalem, nga ili nayù kotunán nga Patul.

<sup>36</sup> Á arán naw ipappagássingán yù ulu naw, ta arán naw mapappuraw onu mapangngisi yù mássiki lâ tangalábák nga duddù naw.

<sup>37</sup> Napiá lâ nu kagian naw ‘Wan,’ nu uwan, onu ‘Ari,’ nu ari, ta naggapu kâ Satanás yù ilannà naw.

*Yù Netuddu nga Meyannung sù Mabbálà ta Narákè*

*Lukas 6:29-30*

<sup>38</sup> “Á naginná naw gapay yù nakagi góri, nga kud da, ‘Nu ajjan yù mamuling sù kabbulun na, á bulingan naw gapay. Onu ajjan yù manultù sù ngipan na kabbulun na, á tappulán naw gapay.’

<sup>39</sup> Ngam sikán, yawe yù kagiak ku nikayu. Arán naw bálatan yù ira nga mangngúá nikayu. Á ta ángngarigán nu ajjan yù mallappák sù jiwanán naw, ipalappák naw paga yù jímigi naw. Arán naw bálatan, mássiki nu palapalingngian na kayu ta lappák.

<sup>40</sup> Á nu ajjan yù mangikeká nikayu, tapé apan na yù barawási naw, á paguráyán naw nu apan na gapay yù latuk na barawási naw.

<sup>41</sup> Á nu ajjan yù mamuersá nga mappakáttu nikayu sù kárgá na ta tangakilometro, á pulutan naw nga mangáttu sù mekaruá nga kilometro gapay.

<sup>42</sup> Á nu ajjan yù makkiddaw nikayu, á iyawâ naw laguk yù kiddawan na.

*Yù Meyannung sù Pangiddù tam sù ira Malussaw nittam  
Lukas 6:27-28, 32-36*

<sup>43</sup> “Á naginná naw gemma yù nakagi, nga ‘iddukan naw yù ira kákkopun naw, áンna ikalusso naw yù ira malussaw nikayu.’

<sup>44</sup> Ngam sikán, kagiak ku nikayu ta iddukan naw yù ira malussaw nikayu áンna ipakimállà naw kâ Namarò yù ira nga manigirigâ nikayu.

<sup>45</sup> Tanu kunnian yù akkuán naw, ipasingan naw ta kuruk nga ánâ na kayu ni Namarò, nga Yáma naw ta lángi. Ta palassangan ni Namarò yù bilák megapu sù ngámin nga tatolay, mássiki yù ira nga narákè yù akkuád da áンna yù ira nga napiá yù akkuád da. Á iyawâ na gapay ni Namarò yù urán sù ira nga napiá yù akkuád da áンna yù ira nga mangnguá ta narákè.

<sup>46</sup> Á arán naw laguk kagian ta iddán na kayu ni Namarò sù bálà naw nu iddukan naw lâ yù ira mangiddù nikayu. Ta kunnian gapay yù akkuán nayù ira mináttuki ta buwì, nga massuít.

<sup>47</sup> Á napiá kayu panò ánnè sù ira tatolay nga ari manguruk kâ Namarò, nu paddulotan naw ta bale naw yù ira kábulun naw? Mássiki yù ira tatolay nga ari manguruk kâ Namarò, paddulotad da gapay yù ira kábulud da.

<sup>48</sup> Párigán naw laguk si Namarò nga Yáma naw ta lángi, tapè pareku lâ nga napiá yù akkuán naw, nga kunnay kuna.”

## 6

*Yù Netuddu nga Meyannung sù ira Mangikállà*

<sup>1</sup> Á pangituddu na paga ni Apu Kesu, kinagi na, “Magimuguk kayu, ta ari lâ yù paddáyo na tatolay yù gapu na nga tuppálan naw yù napiá. Ta nu tuppálan naw yù napiá nga akkuán naw ta arubáng nayù ira tatolay tapè dayawad da kayu, awán laguk bulubugá ta bálà naw nga naggapu kâ Namarò nga Yáma naw ta lángi.

<sup>2</sup> Á yáyù nu mallimù kayu sù ira pobare, arán naw párigán yù ira áppè pípiá, nga umay mallimù ta arubáng nayù ira tatolay sù paggagammungán áンna yù dálán, tapè mepasingan yù napiá nga akkuád da áンna meparáyaw ira sù ira tatolay. Ta kuruk yawe nga kagiak ku nikayu. Yù paddáyo nayù ira tatolay nira, yáyù laguk yù bálà da.

<sup>3</sup> Ngam sikayu, nu mallimù kayu, ilímak naw yù pallimù naw. Arán naw ipakánnámmu, mássiki nu kopun naw onu yù wagi naw.

<sup>4</sup> Á si Namarò nga Yáma naw, nga makasingan sù ngámin nga akka-akkuán naw, mássiki yù ilímak naw, aggina yù mabbalabálà nikayu.

*Yù Ituddu ni Apu Kesu nga Meyannung sù Ákkimállà tam  
Lukas 11:2-4*

<sup>5</sup> “Á nu makimállà kayu kâ Namarò, arán naw párigán yù ira áppè pípiá. Ta ikáyâ da umay makimállà, nga manáddak sù tangngá na kapilliá onu tangngá na dálán, tapè mepasingan ira sù ira tatolay. Á kuruk yù kagiak ku nikayu, nga nálâ den yù bálà da, nga paddáyo nayù ira tatolay nira.

<sup>6</sup> Ngam sikayu, nu makimállà kayu kâ Namarò, tullung kayu sù bale naw áンna ilitù naw yù puertá, tapè awán ta tolay nga makasingan nikayu. Á makimállà kayu laguk kâ Namarò nga Yáma naw nga ari masingan, nga aijan ta lángi. Ta masingan ni Namarò ngámin yù akkuán naw, mássiki nu ilímak naw, á aggina yù mabbalabálà nikayu.

<sup>7</sup> “Á sù pakimállà naw, arán naw patturutan yù ubobuk naw, nga kunnay sù ira nga ari manguruk kâ Namarò. Ta kagiad da ta ginnán na yù ipakimállà da megapu sù aru nga ubobuk da.

<sup>8</sup> Arán naw ira párigán, ta ammu ni Namarò nga Yáma naw yù máwák naw lage naw makkiddaw kuna.

<sup>9</sup> Á yáyù nga kunniaw laguk yù ákkimállà naw:  
‘Ammò mi nga aijan ta lángi, parè lâ ta meparáyaw yù ngágam mu sù ira ngámin nga tatolay.

<sup>10</sup> Á parè lâ ta mabì nga duttál yù pammagurem save dabbuno,  
tapè mapatuppál yù urem saw dabbuno nga kunnay sù katuppál na ta lángi.

<sup>11</sup> Á iyawâ mu nikami yù kanam mi ta ággawo.

<sup>12</sup> Á pakomák kami sù ira liwiliwâ mi,  
nga kunnay sù pamakomá mi sù ira nakaliwâ nikami.

<sup>13</sup> Á arák kami pángayan sù ira mangituddu ta narákè,  
á illillì kami kâ Satanás nga maddok nira.”

<sup>14</sup> “Ta nu pakomán naw yù ira nakaliwâ nikayu, á pakomán na kayu gapay sangaw nayù Yáma naw ta lángì.

<sup>15</sup> Ngam nu arán naw pakomán yù ira nakaliwâ nikayu, á arán na gapay sangaw pakomán nayù Yáma naw yù liwiliwâ naw.

*Yù Meyannung sù Mangilin nga Ággaw nga Arán na Tolay Pakkákán*

<sup>16</sup> “Á nu ngilinan naw yù ággaw nga arán naw pakkákán, arán naw párigán yù ira áppè pípiá, gapu ta áppè daddaddam ira lá, nga ari magámmuâ ánnna ari mattagetay, tapè masingan na tatolay ta ngilinan da yù ággaw. Á kuruk yù kagiak ku nikayu, nga nálâ den yù bála da, nga paddáyo nayù ira tatolay níra.

<sup>17</sup> Ngam sikayu, nu ngilinan naw yù arán naw pakkákán, magámmuâ kayu laguk ánnna mattagetay kayu,

<sup>18</sup> tapè awán ta makasingan sù pangilin naw sù ággaw, nu ari lá si Namarò nga Yáma naw ta lángi. Á yù Yáma naw nga makasingan sù inilímak naw, aggina yù mabbalabálà nikayu.”

*Sisaw Gián nayù Kukuá naw?*

*Lukas 12:33-34*

<sup>19</sup> Á kinagi na paga ni Apu Kesu, “Arán naw unnu-unmuran yù masserbi nikayu saw dabbuno, ta malogon gemma nga mararál megapu sù ulak ánnna ulolak onu masináyán, onu apan na sangaw nayù makkokó.

<sup>20</sup> Akkuán naw laguk yù napiá nga ipakuá ni Namarò nikayu, tapè pakappián na ta lángì yù aru nga ipagayáyâ naw nga iyawâ na sangaw nikayu nu lubbè kayu ta gián na. Ta awán bulubugá ta makatallung nga manarál onu makkokó sù kukuá naw ta lángi.

<sup>21</sup> Á nu yù gián ni Namarò ta lángì yù káríkuán naw, si Namarò gapay yù nononopan naw. Á nu yawe dabbuno yù paggianán nayù kukuá naw, arán naw si Namarò bulubugá manonò.”

*Meyárik ta Isingan yù Matá tam*

*Lukas 11:34-36*

<sup>22</sup> Á kinagi na má ni Apu Kesu, “Á yù matá na tolay, meyárik ta isingan na baggi na. Á nu napiá yù matá naw, napiá gapay yù akkuán naw, gapu ta manawák gapay yù nonò naw.

<sup>23</sup> Ngam nu jikkù yù matá naw, nakallà yù nonò naw, á awán ta napiá nga akkuán naw. Tanu kagian naw ta manawagán kayín, ngam naráké yù nonò naw, á kuruk nga nepallà laguk yù kallà na nonò naw.”

*Si Namarò yù Mangiyawâ ta Mawák tam*

*Lukas 16:13; 12:22-31*

<sup>24</sup> Á nagubobuk má si Apu Kesu, á kinagi na, “Á awán ta tolay nga makapasserbi sù duá nga yápu na, gapu ta ari naggittá yù ayâ na nira, ta ikalusso na ánnna iluddè na yù táddy, á iddukan na ánnna pakimorayán na yù táddy. Á kunnay gapay nikayu, ta ari kayu makapalurò kâ Namarò nu yá lá ikáyâ naw yù kuártu ánnna yù kegatángán na sawe dabbuno.

<sup>25</sup> “Á yáyù nga kagiak ku nikayu ta arán naw ipakkaburung yù áttole naw saw dabbuno, nga kanan naw ánnna inuman naw, onu yù gámì nga ipabbarawási naw. Ta nu iniyawâ ni Namarò nikayu yù baggi naw nga sinole na, arán na panò iyawâ gapay yù ngámin nga mawák naw nga kanan ánnna gámì?

<sup>26</sup> Á ta ángngarigán, nonopan naw yù ira mammánù. Ari ira mammulá, á ari ira maggaták ta pakappiád da sù ággubbúán. Ngam si Namarò nga Yáma naw nga aijan ta lángi, pakapakanan na yù ira mammánù. Á arán na kayu panò iddukan ni Namarò ánnè sù ira mammánù? Wan gemma!

<sup>27</sup> Á aijan panò nikayu yù mamakápaddu sù inángâ na ta mássiki lá tangoras megapu sù pannonónò na? Awán gemma ta awayyá na.

<sup>28</sup> “Á ngattá laguk, ta ipakkaburung naw yù gámì nga ipabbarawási naw? Á ta ángngarigán, nonopan naw yù ira lappáw sù kakáddapán, nu kunnasi yù áddakal da. Ari ira mattarabáku. Arád da ammu mappadday ta gámì.

<sup>29</sup> Ngam yawe yù kagiak ku nikayu. Binarawasián ni Namarò ira ta nakástá ánnè sù kakástán nga ipabbarawási ni Patul Solomon, nga yù ngaw maríku nga mammaguray.

<sup>30</sup> Á gapu ta barawasián ni Namarò ta nakástá yù ira lappáw nga aijan ta kakáddapán ta ággawo, ngam meruppáng ira sangaw nu ummá, á arán na kayu panò barawasián gapay? Wan, nepatalugáring nikayu. Ngattá panò ta arán naw ikatalà si Namarò?

<sup>31</sup> “Á yáyù nga ari kayu laguk mabburuburung nu sisaw pangápán naw ta kanan naw ánnna inuman naw onu gagámì naw.

<sup>32</sup> Ta si Namarò, nga Yáma naw ta lángì, ammu na gemma ta máwák naw ngámin danniaw. Á yù ira nga ari manguruk kuna, danniaw lá nga magannagannuk yù ala-alerad da.

<sup>33</sup> Ngam sikayu, fángngagan naw laguk ta olu yù meyannung sù pammagure ni Namarò, ánnna palurotan naw yù napiá nga ipakuá na nikayu, á aggina sangaw yù manángngák sù ngámin nga máwák naw.

<sup>34</sup> Á yáyù nga arán naw laguk ipakkaburung yù jigâ nga duttál sangaw nu ummá. Ngattá, ta lannapán naw yù ipakkaburung naw ta ággawo? Ta aijanin gemma yù jigâ naw ta ággawo. Á sangaw nu ummá lá yù pakononò naw sù jigâ nga duttálín nikayu sangaw nu ummá.”

## 7

*Arát tam Panunnután yù ira Kábulut tam*

*Lukas 6:37-38, 41-42*

<sup>1</sup> Á kinagi ni Apu Kesu, “Arán naw panunnután yù ira kábulun naw, tapè arán na kayu sangaw panunnután ni Namarò.

<sup>2</sup> Á ta kunnay ta pamanunnù naw sù ira kábulun naw, kunnian gapay yù ámmanunnù na sangaw ni Namarò nikayu. Á nu bilángan naw yù liwâ nayù ira kábulun naw, á kunnian gapay sangaw yù ábbilág ni Namarò sù liwâ naw.

<sup>3</sup> Á sikayu nga mappakagi sù kabbulun naw, á ngattá laguk ta ibúyá naw yù liwâ nayù wagi naw, nga baddì nga kunnay ta apuling nga aijan sù matá na, ngam arán naw matagenà yù liwâ naw nga kunnay ta malakay nga apuling nga aijan ta matá naw?

<sup>4</sup> Á kunnin yù pakári naw ta kun na apuling nga aijan sù matá nayù wagi naw, nu aijan gemma yù liwâ naw nga kun na apuling ta matá naw nga pinaguráyán naw?

<sup>5</sup> Áppè pípiá kayu! Irián naw bì nga olu yù liwâ nga kun na apuling nga aijan ta matá naw, tapè manawák yù ánninan naw, á máwayyá naw nga abbágán yù wagí naw, tapè mári yù liwâ na, nga kun na apuling nga aijan sù matá na.

<sup>6</sup> “Á arán naw ituddu yù napiá nga meyannung kâ Namarò sù ira manakì magginná, marakè akkuád da kayu, nga kunnay ta ítu nga maggabbuâ nga mangagâ. Arán naw ilayalayâ yù ubobuk ni Namarò sù ira mangipuerá sù ubobuk na, ta mangilin yù ubobuk ni Namarò. Á kunnay nakuan ta iwári naw yù nakástá nga dusáriu nga perlás ta arubáng nayù ira bábi, á iguppuguppé da lâ.”

*Yù ira Magáwák nga Makkiddaw, ánnna Magalek, ánnna Mattottò ta Puertá*

*Lukas 11:9-13*

<sup>7</sup> Á kinagi ni Apu Kesu, “Nu aijan yù máwák naw, makkiddaw kayu kâ Namarò, á iddán na kayu sangaw. Á magalek kayu, gapu ta ituddu na sangaw yù pakálerán naw. Á nu mattottò kayu ta puertá, mabukatán sangaw, tapè makatallung kayu.

<sup>8</sup> Ta meddán yù ira ngámin nga mangupù nga makkiddaw. Á makálek yù tolay nga magala-alek. Á mabukatán sangaw yù puertá megapu sù tolay nga mattottottò.

<sup>9</sup> “Á ta ángngarigán, egga panò nikayu yù yáma nga mangiyawâ ta batu sù anâ na nga makkiddaw ta kanan na?

<sup>10</sup> Á iddán na panò ta asisípi nu kiddawan na yù ikán na? Ari gemma.

<sup>11</sup> Á sikayu, mássiki nu naráké kayu, ammu naw mangiyawâ sù napiá sù ira ánâ naw. Á nepatalugáring sù Yáma naw nga aijan ta lángì, ta iyawâ na gemma yù napiá sù ira ngámin nga makkiddaw kuna.

<sup>12</sup> Á sikayu, akkuán naw laguk yù ngámin nga napiá nga ángngabbák naw sù ira ikáttolle naw nga kunnay sù ikáyâ naw nga akkuád da nakuan nikayu, ta yáyù gemma yù kebalinán nayù tunung ni Moyses ánnna yù inituddu nayù ira ngaw ábbilinán ni Namarò.”

*Yù Nasirì nga Áttallungán ánnna yù Aláwa nga Áttallungán*

*Lukas 13:24*

<sup>13</sup> Á kinagi ni Apu Kesu, “Á taddánát takayu ta tullung kayu sù nasirì nga áttallungán. Ta aláwa garè yù áttallungán ánnna yù dálan nga makáddè sù impiernu nga ari máddà yù api na, á aru garè yù ira mappángé tâ.

<sup>14</sup> Á marigâ yù ira mappángé sù pakkatolayán ni Namarò, gapu ta nasirì yù áttallungán sù dálan nga makáddè sù gián na, á baddì yù ira makálek kuna.”

*Yù Meyárik ta Káyu nga Mabbungá*

*Lukas 6:43-44*

<sup>15</sup> Á kinagi ni Apu Kesu, “Magimuguk kayu, tapè ari kayu melogò sù ira áppè ábbilinán. Ta umay ira nikayu mappásingan nga kunnay ta masippà nga karneru, ngam magigúbâ ira ta kun na ítu nga mabisin.

<sup>16</sup> Á tákkilalán naw ira megapu sù akka-akkuád da, nga kunnay ta panákkilalán naw ta káyu megapu sù bungá na. Egga panò sí nga mabbungá ta malobák? Egga panò kaddà nga mabbungá ta kapáya?

<sup>17</sup> Á nu napiá yù káyu, á napiá gapay yù bungá na. Á yù káyu nga ari napiá, nu mabbungá, á jikkù gapay yù bungá na.

<sup>18</sup> Á nu napiá yù káyu, ari mabbungá ta jikkù. Á nu jikkù yù káyu, ari mabbungá ta napiá.

<sup>19</sup> Á yù ira ngámin nga káyu nga ari napiá yù bungá ra, matukák ira nga meruppáng.

<sup>20</sup> Á ta kunnian matákkilalán naw yù ira ábbilinán nga áppè pípiá megapu sù akka-akkuád da.

*Yù ira Ari Mesipà kâ Namarò ta Lángì*

*Lukas 13:25-27*

<sup>21</sup> “Á yù ira nga makkagi ta ‘Apu, Apu,’ kud da nikán, ari ira ngámin mesipà sù pammagurayán ni Namarò ta lángì, ngam yù ira galâ nga mangupù nga manuppál sù ipakuá na nira nayù Yámà nga ajjan ta lángì.

<sup>22</sup> Á sangaw nu duttál yù ággaw nga pamanunnù ku, aru yù ira nga makkagi nikán ta ‘Apu, ari panò sikami yù ira pannakabaggim nga nangilayalayá? Á iniyusá mi yù ngágam mu ta pamapáno mi sù ira nattaliponak nga anitu ánnna namagaddátu kami ta aru megapu su ngágam mu,’ kud da nikán sangaw.

<sup>23</sup> Ngam sikán, kagiak ku laguk sangaw nira nga ‘Arát takayu bulubugá amma-ammu! Panawán nawà, sikayu nga mangnuá ta narákèl’ kuk ku sangaw nira.

*Yù ira Duá nga Nappatáddak*

*Lukas 6:47-49*

<sup>24</sup> “Á yáyù laguk nga kagiak ku nikayu ta yù ira tatolay nga magginná karannian nga ubobuk ku ánnna uputad da nga tuppálan yù kinagi, yá keyarigád da yù tolay nga ammu na yù napiá, nga nappatáddak ta kallang nga inikokkok na sù utun na dakal nga batu.

<sup>25</sup> Á ajjan yù nasikan nga urán, á nalítù yù dabbun. Á nabbaggiu ánnna nassikan yù paddák. Á ari natombá yù balay, gapu ta nepatáddak sù batu.

<sup>26</sup> Á yù ira tatolay nga makaginná karannian nga ubobuk ku, ngam arád da tuppálan yù kinagi, meyárik ira sù tolay nga ulapá, nga nappatáddak sù karagátán.

<sup>27</sup> Á ajjan yù nasikan nga urán, á nalítù yù dabben. Á nabbaggiu ánnna nassikan yù paddák. Á natombá yù bale na, nga mekákkassing yù keruppu na.”

<sup>28</sup> Á kabalin na nagubobuk ni Apu Kesu karannian, napállâ yù ira tatolay. Á nepallà yù kapállâ da,

<sup>29</sup> gapu ta makáawayyá yù ángngituddu na nga kunnay sù ángngituddu na mammaguray, nga ari kunnay sù ángngituddu nayù ira mesturu sù tunung.

## 8

*Yù Maggoggong*

*Markus 1:40-45; Lukas 5:12-16*

<sup>1</sup> Á kabalin ni Apu Kesu nga nangituddu, minutù sù puddul. Á jimináddán kuna yù magaru nga tatolay.

<sup>2</sup> Á ajjan yù tolay nga naggoggong nga jimikki kuna. Á namalittúkak ta arubáng na, á kinagi na, “Apu, ammu ta makáawayyá ka nga mamammapiá nikán nu ikáyâ mu,” kun na.

<sup>3</sup> Á sinonnâ ni Apu Kesu yù limá na, á sinámmì na yù tolay. Á kinagi na kuna, “Wan, ikáyâ ku. Mammapiá ka laguk,” kun na. Á dagarágâ nga nammapiá.

<sup>4</sup> Á gapu ta nammapiángin yù tolay, á kinagi ni Apu Kesu kuna, “Magimuguk ka, ta arám mu lábbì kagián yù pamammapiâ nikaw. Ngam e ka bì mappasingan nga dagarágâ sù pári, tapè bisítán naka. Á iyawâ mu laguk sù pári yù iyátáng na megapu nikaw, nga kunnay sù kinagi ni Moyses, tapè ipakánnámmum sù ira tatolay ta kuruk ngam nammapiá ken,” kun na.

*Yù Pangikatalà nayù Kapitán na Suddálu kâ Apu Kesu*

*Lukas 7:1-10*

<sup>5</sup> Á minay si Apu Kesu ta ili na Kapernium. Kalalabbè na tán, ajjan yù kapitán na suddálu nga taga Roma nga minay jiminápun kuna, tapè makkiddaw ta pangabbák na kuna.

6 “Apu,” kun nayù kapitán kâ Apu Kesu, “matakì yù abbing ku nga nagiddá túrin ta balè, nga kun na natay yù baggi na, á kuruk nga najjigâ yù abbing,” kun nayù kapitán.

7 “Á et ten, ta ek ku pammapián,” kun ni Apu Kesu kuna.

8 Á initabbák nayù kapitán, á kinagi na, “Apu, aringin máwák nga umay ka, ta mapasiránà nga mamaddulò nikaw sù balè. Á ammù gemma ta mássiki nu ari ka umay, ngam kagiam mu lâ ta mammapiá yù aripak ku, á mammapiángin.

9 Á mássiki sikán, ajjan yù maddok nikán, á ajjan gapay yù ira suddálu nga dobak ku. Á nu kagiak ku sù táddy, ‘E ka túrin,’ onu ‘E ka saw,’ á umay. Á nu kagiak ku sù aripak ku yù ikáyâ ku nga akkuán na, á dagarágâ nga akkuán na,” kun nayù kapitán.

10 Á pakaginná ni Apu Kesu sù initabbák nayù kapitán, napállâ sù ángngikatalà na kuna, á kinagi na sù ira dumaddáddán kuna, “Kuruk yù kagiak ku nikayu, nga awán ta nálek ku nga mangikatalà nikán, mássiki sù ira ngámin nga taga Israel, nga kunnay sù ángngikatalà na yawe kapitán nga taga Roma.

11 Á kagiak ku nikayu ta aru sangaw yù ira ari Kudio, nga maggapu ta makkakerumá nga lugár ta lalassangán ánnna lalammarán nga mesipà sù pappabbúyá ra ánnna pakkákád da ta pammagurayán ni Namarò ta lángì, kári Abrakam, kâ Isak, kâ Akup.

12 Ngam yù ira nga kagittâ nga ginaká ni Israel, nga mesipà nakuan sù pammagurayán ni Namarò ta lángì, ari ira sangaw mesipà. Ngam metabbà ira sangaw ta lawán sù gián nga nakallà, á gikulukuletán yù ira tatolay tán ánnna manggaranggaringngi ira,” kun ni Apu Kesu.

13 Á nullipay si Apu Kesu sù kapitán, á kinagi na kuna, “Mánaw ken nga lubbè laguk, ta mapalurokin yù inipakimállà mu, nga kunnay sù panguruk mu,” kun na. Á negiddán yù pammapiá nayù aripan na kapitán sù pagubobuk ni Apu Kesu.

#### *Aru yù Pinammapiá ni Apu Kesu*

*Markus 1:29-34; Lukas 4:38-41*

14 Á minay si Apu Kesu sù bale ni Eduru. Á ta labbè na, nasingan na yù babay nga katugángán ni Eduru, nga nagiddá nga makkulikuk.

15 Á sinangngalán ni Apu yù limá nayù babay nga matakì, á dagarágâ nammapiá. Á gimikkáng laguk, tapè passerbián na ira.

16 Á ta pajjibbà, iniyángé nayù ira tatolay kâ Apu Kesu yù ira aru nga nagunagán na anitu. Á pinapáno ni Apu yù ira anitu megapu sù pagubobuk na, á pinammpapiá na yù ira ngámin naga mättakí.

17 Yáyù kingnguá na tapè matuppál yù kinagi na ngaw ni Isaya, nga yù ngaw ábbilinán ni Namarò, nga kunniauw:

“Aggina lápay yù mamammapiá sù ngámin makkakerumá nga takì tam ánnna yù mangari ta ngámin nga makkakerumá nga tulágat tam.”\*

#### *Yù ira Manukkalak nga Tumuttul kâ Apu Kesu*

*Lukas 9:57-62*

18 Á pannarek na bilák ta táddy nga ággaw, ajjan di Apu Kesu ta aggik na bebay. Á pakasingan ni Apu sù magaru nga tatolay nga nallepuán kuna, á kinagi na sù ira sinudduán na, “Dumáki ittam,” kun na.

19 Á lage ra nánav, jímikkì kuna yù táddy nga minángngituddu ta tunung, á kinagi na kuna, “Apu, naparánà nga tumuttul nikaw ta ngámin nga angayám mu,” kun na.

20 Á simibbák si Apu Kesu, á kinagi na, “Napiá yù ággíán na basikaw ánné nikán, ta ajjan yù abbû na. Á yù ira mammánù, ajjan gapay yù umù da. Ngam awánà ta pagibannagán, sikán nga Kaká na ngámin na tatolay,” kun na.

21 Á yù táddy nga siminuttul kuna, ta pakaginná na karannian nga kinagi na, minay kuna, á kinagi na, “Apu, anugutam mu bi ta ek ku mapolu nga itanam yù ammò ku pángé ku tumuttul nikaw,” kun na.

22 Á kinagi ni Apu Kesu kuna, “Paguráyám mu. Ta yù ira nga ari manguruk nikán, meyárik ira ta natay. Á yáyù aggira yù mangitanam sù kagittâ ra. Á sikaw, tuttulam mà,” kun na.

#### *Pamagimammà ni Apu Kesu ta Paddák ánnna Danum*

*Markus 4:35-41; Lukas 8:22-25*

23 Á kabalin na yaw, nánav si Apu Kesu sù ira magaru, á minay nappittà sù barangay. Á nepulù kuna yù ira sinudduán na.

24 Á paddákì da, nagiddá si Apu Kesu nga nakakaturuk. Á ikáddagâ lâ nga nassikan yù paddák, á sinábbuetán na palung yù unak na barangay.

\* 8:17 Isaya 53:4

<sup>25</sup> Á naganássing yù ira sinudduán na, á ed da linukák, nga kud da, “Apu, iyígù mu ittam bì, ta awán ittamin!” kud da.

<sup>26</sup> “Á ngattá ta maganássing kayu?” kun ni Apu Kesu. “Anni ngillâ yù kakapi na ángngikatalà naw nikán!” kun na. Á gimikkáng laguk, á gimmá na yù paddák ánnna yù palung. Á dagarágâ nga nagimammà.

<sup>27</sup> Á nepallà yù assing nayù ira sinudduán na, á napállâ ira. Á kinagi ra, “Asinni yaw, nga anni panò yù katabole na! Ta mássiki nu paddák ánnna palung, á kurugad da yù kagian na nira!” kud da.

*Napammapiá yù ira Duá nga Tatolay nga Nagunagán na Anitu  
Markus 5:1-20; Lukas 8:26-39*

<sup>28</sup> Á jiminung di Apu Kesu laguk ta dammáng na bebay, ta dabbun na Gadara. Á aijan yù duá nga tolay nga nagunagán na anitu, nga naggián ta kuebá sù katanamán. Á makánnanássing ira megapu ta pore ra ánnna uyung da. Á yáyù nga awán ta makeyangngá nga mallakák ta dálan nga mattalebák tán. Á pakasingan nayù ira duá nga nagunagán kâ Apu Kesu, minay ira jiminápun kuna.

<sup>29</sup> Á dagarágâ nga nakkalli ira, nga kud da, “Ye, sikaw nga Anâ ni Namarò, anni yù akkuám mu nikami? Arák kami bì jigirigátan lage na ággaw nga natullà nga pamanunnù mu nikami!” kud da.

<sup>30</sup> Á gapu ta aijan yù aru nga bábi nga madduki ta kakáddapán nga aranni nira,

<sup>31</sup> á nakimállà yù ira anitu, á kud da kâ Apu Kesu, “Á nu papanáwak kami, anugutam mu laguk ta umay kami tullung táne ira bábi,” kud da.

<sup>32</sup> Á “Umay kayin!” kun ni Apu Kesu nira. Á dagarágâ nánaw ira laguk sù ira duá nga lálláki, á minay ira simillung sù ira aru nga bábi. Á nakkarerá ngámin yù ira bábi nga minutù nga nappángé ta danum, á nalaggabán ira, á natay ira ngámin.

<sup>33</sup> Á gapu ta kunnian yù nesimmu sù ira bábi, á nattálaw yù ira nga minánnaron ta bábi. Á nakkakarerá ira nga nanoli ta ili, á iniparámak da yù ngámin nga nesimmu sù ira bábi ánnna yù kapammapiá nayù ira duá nga lálláki nga nagunagán nayù ira anitu.

<sup>34</sup> Á yáyù nga minay yù ira ngámin nga magili nga jiminápun kâ Apu Kesu ta aggik na bebay, á nakimállà ira kuna ta panawán na lábbì yù giád da.

*Yù Pamammapiá ni Apu Kesu sù Tolay nga Natay yù Baggi na  
Markus 2:1-12; Lukas 5:17-26*

## 9

<sup>1</sup> Á gapu ta manakì yù ira tatolay kâ Apu Kesu, nappittà di Apu Kesu ta barangay, á nánaw ira nga nanoli ta dammáng, sù ili na.

<sup>2</sup> Á labbè da tán, minay kâ Apu Kesu yù ira tatolay, nga nangáttu sù kabbulud da nga nagiddá nga kun na natay yù baggi na. Á pakasingan ni Apu Kesu nira, nánnámmuán na ta aijan yù pangikatalà da kuna. Á yáyù nga kinagi na sù tolay nga nagiddá, “Anâ ku, pálpappawam mu yù nonò mu, ta napakomángin yù ira liwiliwâ mu,” kun na.

<sup>3</sup> Á aijan tán yù ira mangituddu ta tunung. Á pakaginná ra sù kinagi ni Apu sù tolay nga natay yù baggi na, kagiad da ta nonò da, “Narákè yian! Ngattá ta magubobuk yane tolay nga kun na aggina si Namarò!” kud da.

<sup>4</sup> Á ammu ni Apu Kesu yù ninononò da, á kinagi na nira, “Ngattá, ta nononopan naw yù narákè nikán?

<sup>5</sup> Anni panò yù ikáyâ naw nga kagiak ku nakuan sù tolay nga kun na natay yù baggi na? Ta mabbábág kayu megapu sù kinagi kuna nga, ‘Napakomángin yù ira liwiliwâ mu.’ Á nu kük ku lá, ‘Gumikkáng ka, apam mu yù dapam mu, á mallakák ka,’ manguruk kayu panò?

<sup>6</sup> Á yaw laguk yù akkuák kin, tapè kánnámmuán naw ta sikán nga Kaká na ngámin na tatolay yù makáwayyá saw dabbuno nga mamakomá ta liwiliwâ na tatolay,” kun na. Á nallipay laguk si Apu Kesu, á kinagi na sù tolay nga kun na natay yù baggi na, “Gumikkáng ka laguk, á akkatam mu yù ággidám mu, á mánaw ken nga manoli ta balem,” kun ni Apu Kesu kuna.

<sup>7</sup> Á kinuruk nayù tolay yù kinagi na, á giminikkáng, á nanoli ta bale na.

<sup>8</sup> Á pakasingan nayù ira magaru nga tatolay ta nammapiángin yù kabbulud da, napállâ ira, á nepallà yù assing da. Á nakimoray ira kâ Namarò gapu ta iniyawâ na ta tolay yù kunnian nga pakáwayyá na.

*Yù Pagágál ni Apu Kesu kâ Mattiu  
Markus 2:13-17; Lukas 5:27-32*

<sup>9</sup> Á nánaw si Apu Kesu laguk tán nga lugár. Á pakalakalakák na, nasingan na si Mattiu, nga mináttuki ta buwì, nga nagitubang sù áttarabakuán na. Á kinagi ni Apu kuna, “Tuttulam mà,” kun na. Á kinuruk ni Mattiu, á gimikkáng, á siminuttul kuna.

<sup>10</sup> Á minay laguk di Apu Kesu ta bale ni Mattiu, tapè mepakkákán ira. Á aru yù ira káruán nga mináttuki ta buwì ánnna yù ira káruán nga minálliwâ sù tunung da nga minay gapay nga mepakkákán kári Apu Kesu ánnna yù ira sinudduán na.

<sup>11</sup> Á ajjan gapay tán yù ira Parisio. Pakasingad da ta mepakkákán di Apu Kesu sù ira kábulud di Mattiu, kinagi ra sù ira sinudduán ni Apu, “Ngattá, ta mepakkákán yù mesturu naw sù ira mináttuki ta buwì ánnna yù ira káruán nga minálliwâ sù tunung tam?” kud da.

<sup>12</sup> Á pakaginná ni Apu Kesu sù iniyabbû da, simibák nga nagángngarigán, á kinagi na nira, “Ari yù ira nga napiá yù gawagawáyád da yù magáwák ta minángnguru, nu ari galâ yù ira máttaki.

<sup>13</sup> Á yáyù nga minayà saw dabbuno. Ta arák ku agálán yù ira nga makkagi ta napiá ira, nu ari galâ yù ira nga ammu ra ta ajjan yù liwâ da. Á sikayu, umay kayu laguk ánnna gigiámmuan naw yù kebalinán na yaw nga napiá nga bilin ni Namarò nga netúrâ nga kunniauw: “Yaw karagaták ku, ari yù pangiyátang na tolay nikán, nu ari galâ yù pangikállà da sù ira kábulud da.”\* A mássiki nu tuppálan naw yù tunung, awán ta serbi na nu awán ta pangikállà naw sù ira kábulun naw,” kun ni Apu Kesu.

*Yù Pangiyabbû da kâ Apu ta Meyannung sù Ággaw nga Arád da Pakkákán  
Markus 2:18-22; Lukas 5:33-39*

<sup>14</sup> Á kabalín na nakiubobuk ni Apu Kesu sù ira Parisio, minay kuna yù ira makituddu kâ Kuan nga Minánnigù. Á kinagi ra, “Ngilinam mi yù ággaw nga arám mi pakkákán, nga kunnay gapay sù ira Parisio. Ngam yù ira tudduám mu, anni má ta arád da ngilinan yù kustombare mi nga ari kumán?” kud da.

<sup>15</sup> Á nagángngarigán si Apu Kesu, á iniyárik na yù ira tudduán na sù ira makibodá. Á kinagi na, “Maraddam panò yù ira makibodá nu ajjan nira yù nobiu? Ari gemma! Ngam sangaw nu mepánaw yù nobiu nira, á yáyù sangaw yù pangiliid da sù ággaw nga arád da pakkákán,” kun na.

<sup>16</sup> Á nagángngarigán má si Apu Kesu nira, tapè ipakánnámu na ta ari metáddyay yù bagu nga ituddu na sù dán nga kustombare ra. Á kinagi na, “Awán gemma ta tolay nga magappíl ta bagu sù dán nga gáml, gapu ta nu mabábbalán sangaw, á kuddan yù bagu, á mappaná yù pisil nayù gáml.

<sup>17</sup> Á ta kunnian gapay, nu mappadday ira ta binaráyáng, awán ta tolay nga mangipay ta bagu nga tabbk na úbas sù dán nga ággianán na nga tabbì. Ta nu dán nga tabbì yù payyád da, á nataggâ garè nga mabi lá mabattâ sangaw, á metabbâ yù binaráyáng ánnna kengá lággapay yù naggianán na nga tabbì. Á yáyù nga ipe tam laguk yù bagu nga binaráyáng sù bagu nga ággianán na, tapè lumánnâ sangaw yù tabbi ánnna ari mabattâ, á mapakappián yù binaráyáng gapay.”

*Yù Abbing nga Babay nga Natay ánnna yù Babay nga Nataki  
Markus 5:21-43; Lukas 8:40-56*

<sup>18</sup> Á sù arán na paga kabalín ni Apu Kesu nga nagubobuk, jímikkí kuna yù Kudio nga makáwayyá nga mammaguray, nga namalittúkak sù arubáng na. Á kinagi na, “Ikállà mà bíkay, ta kapáppate na lá nayù aná ku nga magingáy! Em mu bì támmitan, tapè matolay,” kun na.

<sup>19</sup> Á pakaginná ni Apu Kesu, limikkâ nga nepulù sù mammaguray. Á nepulù nira gapay yù ira sinudduán na.

<sup>20</sup> Á ajjan gapay tán yù babay nga mapulu duá nga dagun yù papparaparága na. Á jímikkí ta likuk ni Apu Kesu, á siniggek na yù kiddanán nayù barawási na,

<sup>21</sup> gapu ta kinagi na ta nonò na, “Mássiki nu yù barawási na lá yù masiggek ku, mammapiángakin,” kun na.

<sup>22</sup> Á pakánnámu ni Apu Kesu ta ajjan yù naniggek kuna, nallipay, á nasingan na yù babay. Á kinagi na, “Pataggatam mu yù nonò mu, Anâ ku, ta nammapiá ken megapu sù pangikatalà mu nikán,” kun ni Apu. Á dagarágâ nammapiángin yù babay.

<sup>23</sup> Á pakáddè di Apu Kesu sù bale nayù mammaguray, nasingan ni Apu yù ira mináppalawatá ánnna yù ira aru nga mepadaddam nga matarabiángál.

\* 9:13 Oseyá 6:6

<sup>24</sup> Á kinagi na nira, "Mánaw kayin ngámin, ta ari natay yù abbing, nu ari lâ nakkaturuk," kun na. Á yáyù nga inipappagalà da si Apu Kesu.

<sup>25</sup> Á pamalawán ni Apu Kesu nira, simillung sù gián nayù magingánay, á singngalán na yù limá na. Á panangngal ni Apu Kesu sù limá na, gimikkáng nga nammapiángin.

<sup>26</sup> Á neparámak dannian sù ngámin nga ili ta lugár da.

#### *Yù Pamammapiá ni Apu Kesu sù ira Buling*

<sup>27</sup> Á kabalin ni Apu Kesu nga namammapiá sù magingánay, nánaw sù giád da. Á pakalakalakà na ta dálán, siminuttul yù duá nga lálláki nga buling, á inikatakatal da, "Ikállà kami, síkaw nga Ginaká ni Patul Dabid," kud da.

<sup>28</sup> Á manganánnuán, nakáddè di Apu Kesu sù pakipaggianád da. Á tallung ni Apu sù unak na balay, simillung gapay yù ira duá nga buling nga jimikkì kuna. Á iniyabbú ni Apu Kesu nira, "Kurugan naw panò nga makáwayyángà nga manuppál sù ipakimállà naw?" kun na. "Wan, Apu," kud da kuna.

<sup>29</sup> Á yáyù nga sinámmì ni Apu yù matá nayù ira buling, á kinagi na nira, "Mapalurò laguk nga kunnay sù pangikatalà naw nikán," kun na.

<sup>30</sup> Á pagubobuk ni Apu, dagarágâ nga nakasingan iren. Á sinaddánán ni Apu ira, nga kinagi na, "Arán naw bulubugá kagian yaw nga nesimmu nikayu," kun na.

<sup>31</sup> Ngam nánaw ira, á ed da iniparámak yù ngámin nga meyannung kâ Apu Kesu sù ira ngámin nga tatolay ta lugár da.

#### *Yù Pamammapiá ni Apu Kesu sù Umal*

<sup>32</sup> Á kapapáno nayù ira duá nga lálláki nga napammapiá, iniyángé nayù ira tatolay kâ Apu Kesu yù laláki nga umal megapu sù nattaliponak nga anitu.

<sup>33</sup> Á pinapáno ni Apu yù anitu kuna, á nagubobugin yù tolay. Á napállâ yù ira tatolay nga aijan tání, á nakkaká-ubobuk ira, á kinagi ra, "Awán bulubugá ta nakasingan paga ta kunniauw sù giát tam nga Israel!" kud da.

<sup>34</sup> Ngam yù ira Parisio, kinagi ra, "Si Satanas nga yápu nayù ira anitu yù paggaguán nayù pakáwayyá na nga mamapánaw sù ira anitu," kud da.

#### *Yù Pangikállà ni Apu Kesu sù ira Tatolay*

<sup>35</sup> Á minay si Apu Kesu sù ngámin nga ili áンna ngámin nga babálay, nga mangituddu sù ira tatolay ta iskuelá ra, áンna nangilayalayá sù napiá nga dámak nga meyannung sù pammagure ni Namarò. Á pinammapiá na yù ira tatolay sù ngámin nga takitad da áンna ngámin tua tulágad da.

<sup>36</sup> Á pakasingan na sù ira magaru nga tatolay, nerallà yù allà na sù ira ngámin, gapu ta nakállállà ira, negapu sù karigirigâ da, á kunnay ira ta karneru nga awán ta manaron nira.

<sup>37</sup> Á kinagi na laguk sù ira sinudduán na, "Aru yù ira tatolay nga ari manguruk, nga meyárik sù magaták. Ngam nakúráng yù ira umay maggaták.

<sup>38</sup> Makimállà kayu laguk nga makkiddaw sù makákkua sù ákkomanán, ta doban na bì yù ira umay maggaták sù ákkomanán na," kun na. Á yù ira maggaták yù keyarigán nayù ira mangituddu sù bilin ni Namarò, tapè mesipà kuna yù ira tatolay nga magginná.

## 10

#### *Yù Paddok ni Apu Kesu sù ira Mapulu duá nga Sinudduán na* *Markus 3:13-19; 6:7-13; Lukas 6:12-16; 9:1-6*

<sup>1</sup> Á kabalin na, inagálán na laguk ni Apu Kesu yù ira mapulu duá nga sinudduán na, á iniyawá na nira yù pakáwayyá ra nga mamapánaw ta anitu áンna yù pakáwayyá ra gapay nga mamammapiá ta tatolay sù ngámin nga takitad da áンna ngámin nga tulágad da.

<sup>2</sup> Á danniaw yù ngágan nayù ira mapulu duá nga tudduán na. Napolu di Simon nga mangngágan gapay ta Eduru áンna si Andares nga wagi na. Á di Ime kâ Kuan, nga mawwagi nga áñá ní Sebedo.

<sup>3</sup> Á di Pilippi kâ Bartolome, di Tomâ kâ Mattiu nga mináttuki ta buwì, á si Ime nga aná ni Alpio, áンna sí Tajjio.

<sup>4</sup> Á si Simon nga netádday sù ira Mengal, áンna si Kudas nga Iskariote, nga nangituddu kâ Apu Kesu sù ira minay naggápù kuna.

<sup>5</sup> Á danniaw nga mapulu duá yù jinok ni Apu Kesu, ta umay ira mangipakánnámu sù meyannung kuna. Á lage ra nánaw, kinagi ni Apu Kesu nira, "Ari kayu umay sù gián nayù ira tatolay nga ari Kudio, á ari kayu tallung sù ira ili na Samaria.

<sup>6</sup> Umay kayu galâ sù gián nayù ira kagittá tam nga ginaká ni Israel, ta kunnay ira ta náwáwan nga karneru.

<sup>7</sup> Á ta ngámin nga labbetán naw, yá ilayalayâ naw, 'Duttálín nikayu yù pammagure ni Namaro,' kun naw.

<sup>8</sup> Á iyawâ ku nikayu yù pakáwayyá naw, tapè pammapián naw yù ira máttakì, á paginanolayan naw yù ira nga natay, ánná pammapián naw yù ira naggoggong ánná nabbuni. Á papanáwan naw yù ira anitu. Á gapu ta arán naw gemma pinagán yù pakáwayyá naw nga iniyawâ ku nikayu, yáyù nga arán naw laguk ipapágà sù ira tatolay nga abbágán naw.

<sup>9</sup> Á nu mánaw kayu, arán naw ipulù yù kuártu. Mássiki nu sinsilliu, arán naw ibolsá.

<sup>10</sup> Á ari kayu gapay bulubugá mangárgá ta magamaguray, mássiki nu barawási onu sapátù onu taguk, ta mepongngá nga iyawâ da nikayu nayù ira abbágán naw yù ngámin nga máwák naw.

<sup>11</sup> Á nu lubbè kayu ta ili onu babálay, aleran naw yù napiá nga tolay nga magayáyâ nga mamaddulò nikayu, á makipaggián kayu kuna áddè ta páno naw tán nga lugár.

<sup>12</sup> Á tallung naw sù bale na, bindisionán naw yù ira nga maggián tán. Kagian naw nira, 'Mepagimammà kayu kâ Namaro,' kun naw.

<sup>13</sup> Á nu magayáyâ ira nga mamaddulò nikayu, á kuruk nga abbágán na ira ni Namaro megapu sù pamindision naw nira. Ngam nu manakì ira nga mangálliuk nikayu, arán na ira abbágán ni Namaro, nu ari sikayu galâ yù abbágán na.

<sup>14</sup> Á maguray lâ nga ili onu balay nga angayán naw, nu awán ta tolay nga mangálliuk nikayu sangaw onu manakì ira nga magginná sù ituddu naw, panawán naw ira laguk. Á pápparán naw yù káppu ta takki naw, nga panákkilalán ta panaki da.

<sup>15</sup> Á kuruk yawe nga kagiak ku nikayu. Sinuggi na ngaw ni Namaro yù ngaw ira ili na Sodoma ánná Gomorra gapu ta karáké nayù ira tatolay nga naggián nira. Á sangaw nu duttál yù ággaw nga pangukum ni Namaro, aláppaw yù ámmagikáru na sù ira tatolay nga taga Sodoma ánná taga Gomorra ánnè sù ámmagikáru na sù ira tatolay nga manakì nga magginná sù ituddu naw," kun ni Apu Kesu.

### *Yù Meyannung sù Jigâ nga Duttál Sangaw*

*Markus 13:9-13; Lukas 21:12-17*

<sup>16</sup> Á inupù ni Apu Kesu nga kinagi nira, "Tángngagan naw yaw nga kagiak ku nikayu. Dobat takayu, nga kun na nasippâ nga karneru, nga umay sù ira tatolay nga kun na simaron nga ítu, nga mapporay ánná makánnanássing. Magimuguk kayu laguk nga kun na iráw, ánná massippâ kayu gapay nga kun na kalapáti.

<sup>17</sup> Mappalán kayu, ta ajjan yù ira maggápù nikayu sangaw, á iyarubáng da kayu sù ira mamanunnù. Á palapaligatad da kayu ta arubáng nayù ira tatolay ta paggagammung da sù kapilliára.

<sup>18</sup> Á gapu ta panuttul naw nikán, iyángé ra kayu nayù ira malussaw ta arubáng nayù ira mammaguray, nga gubinador ánná patul. Á yáyù awayyá naw nga mangipakánnámmu sù napiá nga dámak nga meyannung nikán sù ira mammaguray ánná yù ira gapay nga ari Kudio.

<sup>19</sup> Á sangaw nu bisítád dakayu, arán naw laguk ikaburung nu anni yù kagian naw nira ánná kunnasi yù ággubobuk naw, ta mepakánnámmu ta nonò naw yù kagian naw nira.

<sup>20</sup> Ta ari sikayu nu ari galâ yù Ikararuá nayù Yáma naw ta lángì yù mamagubobuk nikayu," kun ni Apu Kesu.

<sup>21</sup> Á pagubobuk ni Apu Kesu, kinagi na gapay, "Á sangaw nu duttál yù ággaw nga jigâ, ipagápù nayù ira tatolay yù ira wáwwagi ra, nga ipapátag. Á kunnian gapay sangaw yù akkuán nayù ira yáma sù ira ánâ da. Á potuán nayù ira ábbing yù ira yáma ra ánná ipagápù da yù yáma ra sù ira mamapátay nira.

<sup>22</sup> Á sikayu nga manguruk nikán, ikalusso nakayu nayù ira tatolay gapu ta pangikatalà naw nikán. Ngam meyígù sangaw yù ira ngámin nga mangiyattam sù jigâ ánná mapasigaggà yù ángngikatalà da nikán ta áddè ta pagáddekan.

<sup>23</sup> Á nu jigirigátad da kayu sù táddy ngáili, mattálaw kayu laguk nga umay makiyígù ta tanakuán nga ili. Á kukurugán nga kuruk yù kagiak ku nikayu. Arán naw sangaw paga mabalínnga umay sù ira ngámin nga ili na Israel nga mangilayalayâ sù bilik ku pángè ku má lubbè ta dabbuno, sikán nga Kaká na ngámin na tatolay," kun ni Apu Kesu.

<sup>24</sup> Á kinagi ni Apu Kesu gapay nira, "Ari motun yù makituddu sù mesturu na. Á kunnay gapay sù aripan, ari motun sù yápu na.

<sup>25</sup> Á yáyù nga makáppak nakuan yù makituddu, nu mepaggittá sù mesturu na. Á kunnian gapay sù aripan, nu mepaggittá sù yápu na. Á nu pakkakagiád dangà, ánná ingágad dangà ta Belsebul nga patul na anitu, á kunnasi panò yù pakkakagi ra nikayu nga mesipà nikán!"

*Asinni yù Paganássingát tam?*

*Lukas 12:2-7*

<sup>26</sup> Á kinagi ni Apu Kesu, "Ari kayu laguk maganássing sù ira tatolay, ta awán ta ituttù da nga ari sangaw mepalappâ, á awán gapay ta ilímak da nga ari gapay sangaw mepakánnámmu.

<sup>27</sup> Á yù nelímak nga ipakánnámmù nikayu sangaw nu gabingin, yáyù ubobugan naw sù ira tatolay sangaw nu manawák. Á kunnian gapay sù meyanasâ ta talingá naw tapè awán ta tanakuán nga makaginná, yáyù ilayalayá naw nga kun na ajjan kayu ta utun na balay naga makkatakol, tape maginná nayù ira ngámin nga tatolay.

<sup>28</sup> Á ari kayu maganássing sù ira nga mampátyat baggi naw lâ, gapu ta arád da makuá yù ikararuá naw nga mannanáyun. Si Namarò galâ yù ikássing naw, ta aggina yù makáwayáyá naga mangnuá ta baggi na tolay ánná ikararuá na gapay sù mannanáyun nga api ta impiernu," kun na.

<sup>29</sup> Á ta meyannung sù ángngiddù ni Namarò, kinagi ni Apu Kesu, "Ari panò tádday lâ nga pirâ yù pagá na duá nga balli? Á mássiki nu kunnian, awán bulubugá ta mapannâ ta dabbun naga natay, mássiki lâ tádday nira, nu arán na anugutan nayù Yáma naw ta lángì.

<sup>30</sup> Á nu kunnian yù ángngiddù na nira, nepatalugáring nikayu, ta ammu na ngámin nga meyannung nikayu, mássiki yù biláng na duddù sù ulu naw nga katággítáddy.

<sup>31</sup> Á yáyù nga ari kayu maganássing, ta kuruk nga dakal yù ángngiddù ni Namarò nikayu ánné sù ángngiddù na ta aru nga balli," kun na.

*Yù ira Makatákkilála kâ Apu ánná yù ira Mappasirán*

<sup>32</sup> Á namappalán si Apu Kesu, á kinagi na, "Á yù ira nga makkagi ta pakiyápu ra nikán ta arubáng na tatolay, aggira gapay yù kagiak ku kâ Ammò ku ta lángì.

<sup>33</sup> Ngam yù ira mappasirán ta arubáng na tatolay megapu nikán, arák ku ira gapay tákkilalán ta arubáng ni Ammò ku ta lángì," kun na.

*Ari Mepagimammá yù ira Ari Manguruk sù ira Manguruk*

*Lukas 12:51-53; 14:26-27*

<sup>34</sup> Á kinagi ni Apu Kesu, "Arán naw laguk kagian ta yá iniyángè sawe dabbuno yù pamagimammá ku sù ira maddaráma. Ari kunnian yù iniyángè saw nu ari galâ yù ipaddaráma ra, ta ajjan garè yù ira nga ari manguruk nikán.

<sup>35</sup> Á gapu ta ari ira metáddy nikán, yáyù nga makikontarà yù abbing nga laláki sù yáma na, ánná yù abbing nga babay sù yená na, ánná yù manugáng nga babay sù katugángán na naga babay.

<sup>36</sup> Á yù ira kanakanáyun na tolay yù malussaw kuna.\*

<sup>37</sup> Á yù tolay nga nepallà yù ángngayá na sù yáma na onu yená na ánné sù ángngayá na nikán, ari mepángngà nga mepulù nikán. Á yù tolay nga nepallà yù ángngayá na sù aná na ánné sù ángngayá na nikán, ari nga mepángngà nga mepulù nikán.

<sup>38</sup> Á ari gapay mepángngà nga mepulù nikán yù tolay nga ari magiyangngà sù panigirigâ da kuna nayù ira ari nanguruk, mássiki áddè ta pate na megapu sù panguruk na nikán. Á yaw keyarigán na yù tolay nga ari mangáttu ta kurù na, nga ari tumuttul nikán.

<sup>39</sup> Á yù tolay nga mangiddù sù áttolle na sawe dabbuno, lonán na yù pangisipâ ku kuna ta áddè ta áddè. Ngam yù tolay nga lonán na yù áttolle na sawe dabbuno gapu ta panguruk na nikán, málawâ na sangaw yù mannanáyun nga áttolle na gapu ta mesipà nikán ta áddè ta áddè," kun ni Apu Kesu.

*Yù Pabbalabálà ni Namarò sù ira Masserbi kuna*

*Markus 9:41*

<sup>40</sup> Á kinagi na gapay ni Apu Kesu, "Á yù ira nga mamaddulò nikayu nga manguruk nikán, á kunnay ta síkán gapay yù paddulotad da. Á yù ira nga mamaddulò nikán, á kunnay ta paddulotad da gapay yù Yámâ nga naddok nikán.

<sup>41</sup> Á yù ira nga mamaddulò ta ábbilinák ku gapu ta síkán yù nangibilin kuna, á málawâ da gapay sangaw yù bálâ da nga kunnay sù pabbalabálà ni Namarò gapay sangaw sù ábbilinán na. Á kunnian gapay sù ira nga mamaddulò sù napiá nga tolay gapu ta tákkilalád da ta

\* 10:36 Mika 7:6

matunung megapu sù panguruk na nikán, málawâ da gapay sangaw yù bálâ da nga kunnay sù pabbalabálâ ni Namarò gapay sangaw sù matunung nga tolay nga manguruk nikán.

<sup>42</sup> Á yù tolay nga mangiyawâ ta mássiki lâ tangabásu nga danum sù tádday nga abbing nga makiaripan nikán, gapu ta mánnaámmuán na ta aggina yù manguruk nikán, á bálatan na sangaw ni Namarò gapay ta napiá,” kun ni Apu Kesu.

## 11

*Yù Initabbák ni Apu Kesu sù Iniyabbû ni Kuan*

*Lukas 7:18-23*

<sup>1</sup> Á kabalin ni Apu Kesu nabbilin sù ira mapulu duá nga sinullà na, nánaw nga minay sù ira kárúán nga ili nga aranni, tapè mangituddu ánna mangilayalayâ sù ira tatolay tán.

<sup>2</sup> Á ajjan si Kuan nga Minánnigù nga napukù sù ábbalurán. Á pakarámak ni Kuan sù kingngikingnguá ni Apu Kesu, jinok na yù ira sinudduán na nga umay sù gián ni Apu Kesu.

<sup>3</sup> Á yáyù nga ed da iyabbû kâ Apu Kesu, nga kud da, “Apu, sikaw panò yù iddagám mi nga duttál nga naggapu kâ Namarò, nga kunnay sù inilayalayâ ni Kuan? Onu iddagám mi nakuan yù tanakuán?” kud da kâ Apu Kesu.

<sup>4</sup> Á simibbák si Apu Kesu nira, á kinagi na, “Manoli kayu, ta en naw kagian kâ Kuan yù ngámin nga naginná naw ánna yù nasingan naw saw giák ku.

<sup>5</sup> Kagian naw kâ Kuan ta makasinganin yù ira buling. Makalakárin yù ira pilay. Nammapiángin yù ira naggoggong ánna yù ira nabbuni. Makaginnángin yù ira kitul. Á maginnanolay yù ira natay, ánna melayalayâ yù napiá nga dámak sù ira pobare.

<sup>6</sup> Á mapagayáyâ yù tolay nga ari mabbábâng ta meyannung nikán, ta mammapiá yù ággian na sangaw,” kun ni Apu Kesu.

*Yù Kinagi ni Apu nga Meyannung kâ Kuan nga Minánnigù*

*Lukas 7:24-35*

<sup>7</sup> Á sù páno nayù ira sinudduán ni Kuan, nakiubobuk si Apu Kesu sù ira magaru nga tatolay ta meyannung kâ Kuan. Á iniyabbû na nira, “Anni yù inikáyâ naw nga iningan sù ánge naw ngaw túrin ta kalállammatán? En naw panò iningan yù tolay nga ajjan yù nonò na nga kun na kaddà nga pagguyuguyuan na paddák? Ari gemma!

<sup>8</sup> Á anni laguk yù en naw iningan? En naw panò iningan yù tolay nga nabbstí ta nakástá? Ari gemma, ta maggián ta dakal nga bale na patul yù tolay nga nabbstí ta kunnian.

<sup>9</sup> Á anni laguk yù en naw iningan, nu ari galá yù ábbilinán ni Namarò! Wan! Á kuruk yù kagiak ku nikayu, ta si Kuan yù kátannangán nga ábbilinán nga awán bulubugá ta meyárik kuna.

<sup>10</sup> Ta aggina yù ubobugan ni Namarò sù dán nga netúrá nga kunniauw: ‘Yawe yù ábbilinák ku nga dobak ku ta mapolu ánnè nikaw, tapè paránan na yù dálán nga pallakarám mu sangaw.’\*

<sup>11</sup> Á kuruk yawe nga kagiak ku nikayu; awán ta tolay nga neyanâ sawe dabbuno nga makáwayyá ánné kâ Kuan nga Minánnigù. Ngam yù kagukábán nga tolay nga mesipà sù pammagure ni Namarò, aggina yù makáwayyá ánné kuna.

<sup>12</sup> Á áddè ngaw ta pamegapu na nga nangilayalayâ ni Kuan nga Minánnigù, ta áddè kunangan, makkarakâ yù ira magaru nga tatolay nga mesipà sù pammagure ni Namarò. Á yù ira nasikan nga mapattû, puersád da nakuan yù kesipà da sù pammagure ni Namarò.

<sup>13</sup> Á áddè ngaw ta áddè kunangan nepakánnámmu yù meyannung sù pammagure ni Namarò nga duttál ta dabbuno megapu ta yù pangilayalayâ da ngaw nayù ira ngámin nga ábbilinán ni Namarò ánna yù tunung ni Moyses, ánna yù pangilayalayâ na gapay ni Kuan nga Minánnigù.

<sup>14</sup> Á nu ikáyâ naw manguruk sù kinagi ra, si Kuan yù ngaw Elias nga kinagi ra nga duttál mangin.

<sup>15</sup> Sikayu nga makaginná, tángngagan naw laguk yù naginná naw,” kun ni Apu Kesu.

<sup>16</sup> Á kinagi na gapay ni Apu Kesu, “Kunnasi panò yù pangiyarigák ku nikayu nga ginakáni Israel ta ággawo? Ari kayu bulubugá makáppak, á yaw lâ ammu naw yù mamaliwâ. Kunnay kayu ta ábbing nga makkukkul ta dápun, nga áppè mabbodá ánna áppè magitanam. Á makkatakatal ira sù ira kábulud da, á kagiad da nira,

<sup>17</sup> Ngattá, ta naggássá kami, ngam manakì kayu mattála? Á nakkansion kami ta makarad-daddam, ngam manakì kayu gapay nga mepattatádday nikami nga matarabiángál?

\* **11:10** Malakia 3:1

<sup>18</sup> Á sikayu, kunnay kayu sù ira ábbing, ta ari kayu makáppak. Ta minay si Kuan ngam baddì lâ yù akkákán na ánnna ari bulubugá namissán. Ngam kagian naw ta nagunagán na anitu.

<sup>19</sup> Á sikán nga Kaká na ngámin na tatolay, minayá nepakkákán ánnna nepaginum sù ira tatolay. Á kagian naw laguk, ‘Ye, masingan naw yù tolay nga nabukátù ánnna minámmisssán, nga makikopun sù ira massuítì nga mináttuki ta buwì ánnna yù ira káruán nga minálliwâl’ Á awán ta awayyá mi kâ Kuan nga mamagayáyâ nikayu. Ngam mepasingan ta kuruk nga masírik nga naggapu kâ Namaro yù ituddu mi, megapu sú akka-akkúám mi ánnna yù ira manguruk nikami,” kun ni Apu Kesu.

*Yù Pamappalán ni Apu Kesu sù ira Ari Manguruk  
Lukas 10:13-15*

<sup>20</sup> Á kabalin ni Apu Kesu nakkagi karannian, pinegapuanán na nga pinappalán yù ira tatolay nga naggián sù tallu nga ili nga pangipasinganán na ngaw ta aru nga pinagaddátu na nga makapállâ. Ta mássiki nu nakasingan yù ira tatolay sù ira makapállâ nga pinagaddátu na sù ili ra, arâd da inbabáwi yù liwiliwâ da.

<sup>21</sup> Á kinagi na nira, “Kâbbi kayu lâ. Makállâlâ kayu sangaw, sikayu nga taga Korasin! Ánnna sikayu nga taga Betseda, makállâlâ kayu gapay! Ta nu inipasingak ku nakuan yù pagaddatuak ku nga makapállâ sù ira ngaw nakaliwâ nga taga Tiro ánnna taga Sidon, nga kunnay sù pinagaddátu nga inipasingak ku nikayu, nabbabáwi nakuan yù ngaw ira ngámin nga tatolay ta nabayágín, á inipasingad da nakuan yù pabbabáwi ra megapu sù pabbarawási ra ta bayon ánnna pagitubang da ta abu, nga kunnay sù kustombare ra.

<sup>22</sup> Á kagian naw ta sangaw nu ukuman ni Namarò ira, narámmâ yù pamagikáru na nira gapu ta kitárè yù kinggikingnguá ra. Ngam yawe yù kagiak ku nikayu, ta mappanà yù ággíán naw ánnne sù ággíád da nga taga Tiro ánnna taga Sidon sangaw nu duttál yù pangukum ni Namarò.

<sup>23</sup> Á sikayu gapay nga taga Kapernium, ikáyâ naw panò ta meparáyaw kayu ta lángì? Ngam ari mesímu, gapu ta yá labbetán naw sangaw garè yù api ta impiernu nga mannanáyun. Ta nu mepasingan nakuan sù ngaw ili na Sodoma yù makapállâ nga kunnay sù pinagaddátu ta gián naw, maggián lâ paga nakuan yù ili na Sodoma.

<sup>24</sup> Á kuruk yù kagiak ku nikayu, ta sangaw nu duttál yù pangukum ni Namarò ta tatolay, mappanà yù ággíán naw ánnne sù ággíád da nga taga Sodoma, nga neparámak megapu sù karákè da,” kun ni Apu Kesu.

*Yù Ággibannák nga Iywâni Apu Kesu  
Lukas 10:21-22*

<sup>25</sup> Á ta kabalin ni Apu Kesu namappalán sù ira tatolay, nakimállâ laguk sù Yáma na. Á kinagi na, “Ammò, dayáwat taka, nga Yápu na ngámin nga aijan ta lángi ánnna ngámin nga aijan ta dabbuno. Á dayáwat taka gapu ta inipakánnámmum yù kuruk nga bilim mu sù ira nga kun na abbing nga tumulù, ngam inilímak mu sù ira nga kagiad da ta nasírik ira ánnna naggizámmu.

<sup>26</sup> Wan gemma, Ammò, ta yáyù gemma yù ikáyâ mu,” kun na.

<sup>27</sup> Á kabalin na nakimállâ ni Apu Kesu kâ Yáma na, kinagi na sù ira tatolay, “Inikárgu nayù Yámà nikán yù ngámin nga aijan ta lángi ánnna dabbuno. Á awán ta makánnámmu nikán nga Anâ na nu ari galâ si Namarò nga Yámâ. Á kunnian gapay nga awán ta makánnámmu sù Yámâ, nu ari galâ sikán nga Anâ na ánnna yù ira gapay nga ikáyâ ku nga pangipakánnámmuán kuna.

<sup>28</sup> Á sikayu ngámin nga nabannák ánnna marigirigâ, e kayu nikán, ta pagibannagat takayu.

<sup>29</sup> Á tuppálan naw yù ipakuâ nikayu ánnna gigiámmuan naw yù ituddù nikayu. Ta sikán yù masíppâ nga minángngabbák nikayu. Á mepagimammâ kayu sangaw nikán.

<sup>30</sup> Ta malogon nga matuppál yù ipakuâ nikayu, ánnna pakálappawak ku yù jigâ naw,” kun ni Apu Kesu.

## 12

*Yù Meyannung sù Ággaw nga Pagibannák da  
Markus 2:23-28; Lukas 6:1-5*

<sup>1</sup> Á ta ággaw na Sabadu, nga pagibannák da, nallakalakák di Apu Kesu, nga nattalebák sù komán nga namulán ta tarigu. Á nabisin yù ira kábulun ni Apu Kesu nga makituddu kuna. Á yáyù nga inâ da yù nataggatán nga dáwa na tarigu, nga binussilád da ta kanad da.

<sup>2</sup> Á ajjan gapay tán yù ira Parisio, nga sigídá massísim. Á pakasingad da sù kingnguá nayù ira kábulun ni Apu, kinagi ra kâ Apu Kesu, "Masingam mu yù akka-akkuán nayù ira tudduám mu, ta potuád da yù tunung tam sù pamussil da ta tarígu ta ággawo nga pagibannák tam," kud da.

<sup>3</sup> Á kinagi ni Apu Kesu nira, "Arán naw panò binibbik yù dán nga netúrá nga meyannung sù kingnguá na ngaw ni Patul Dabid ta kabisid da ánná yù ira kábulun na?

<sup>4</sup> Simillung si Dabid sù bale ni Namarò, á inâ na yù pán nga neytáng kâ Namarò. Á yáyù kinád di Dabid ánná yù ira kábulun na, nga mekontará sù tunung tam, ta kagian nayù tunung ta awán ta makáwayyá nga kumán sù neytáng kâ Namarò nu ari lâ yù ira pári.\*

<sup>5</sup> Á arán naw panò binibbik yù tunung nga initúrá ni Moyses nga meyannung ta pakimore nayù ira pári kâ Namarò sù mangilin nga bale ni Namarò? Kinagi na ta kunnay ta makaliwatád da yù ággaw nga ággibannák da ta káda Sabadu, megapu sù passerbi ra kâ Namarò ta unak nayù mangilin nga bale na, ngam ari mebiláng ta liwâ da.

<sup>6</sup> Ginnán naw yawe nga kagiak ku nikayu. Ajjan saw yù kapiánán nga passerbián naw nakuan ánné sù mangilin nga bale ni Namarò.

<sup>7</sup> Binibbik naw gemma yaw, 'Yawe karagaták ku, nga ari yù pangiyátang naw nikán nu ari galâ yù pangikállà naw sù ira kábulun naw.' Á nu nánnámmuán naw nakuan yù kebalinán na, arán naw nakuan paliwanut yù ira awán ta liwâ da.

<sup>8</sup> Ta sikán lâ nga Kaká na ngámin na tatolay yù makáwayyá nga makkagi sù mepángngá nga akkuán naw ta Sabadu, nga ággibannák," kun ni Apu Kesu.

*Yù Tolay nga Nassesseng yù Tádday Limá na*

*Markus 3:1-6; Lukas 6:6-11*

<sup>9</sup> Á kabalin ni Apu Kesu nakiubobuk sù ira Parisio, nánaw nga minay sù iskuelá, nga ággagammungád da.

<sup>10</sup> Á ajjan tán yù tolay nga nassesseng yù tádday nga limá na. Á ajjan gapay yù ira káruruá nga malussaw kâ Apu Kesu, á sinissimmurád da gapu ta alerad da yù awayyá ra nga mangikeká kuna. Á yáyù nga iniyabbú da kuna, "Ari panò makaliwá yù tolay sù tunung nu pammapián na yù matakí ta ággaw na Sabadu?" kud da.

<sup>11</sup> Á kinagi ni Apu Kesu nira, "Á ta ánggarigán, nu ajian yù karneru naw nga napanná ta abbû ta ággaw na Sabadu, arán naw pano umay igon?

<sup>12</sup> Á nepatalugáring sù tolay, ta napanapiá gemma yù tolay ánné sù ayám! Á yáyù nga iyanugù nayù tunung yù napiá nga akkuán na tolay ta ággaw na ággibannák."

<sup>13</sup> Á kabalin ni Apu Kesu nanabbák karanniaw, nallipay laguk sù tolay nga nassesseng yù limá na, á kinagi na kuna, "Sonnatam mu yù limám," kun na. Á sinonná nayù tolay yù limá na, á nammapiángin nga kunnay sù tádday nga limá na.

<sup>14</sup> Ngam yù ira Parisio, pakasingad da ta nammapiá yù limá na, nánaw ira, á ed da nakkaká-ubobugan nu kunnasi yù ámmapáte ra kâ Apu Kesu.

*Si Apu Kesu yù Sinullà ni Namarò nga Masserbi kuna*

<sup>15</sup> Á gapu ta ammu ni Apu Kesu yù pangigagángé nayù ira Parisio kuna, nánaw sù lugár. Á aru yù ira tatolay nga dumaddáddán kuna, á pinammapiá na yù ira ngámin nga máttakì.

<sup>16</sup> Á kinagi na nira ta arád da bulubugá ipakánnámmu sù ira ta tolay,

<sup>17</sup> tapè matuppál yù kinagi ni Namarò nga inipeyubobuk na ngaw kâ Isaya, nga ábbilinán na, nga kunniauw:

<sup>18</sup> "Yawe yù piñili nga masserbi nikán.

Aggina yù iddi-iddukak ku ánná ayatánà kuna.

Á ipè kuna yù Ikararuá.

Á yáyù nga aggina yù mangilayalayá ta meyannung sù taddák ku ánná yù pamanunnù ku sù ira ngámin nga tatolay, mássiki yù ira nga ari Kudio.

<sup>19</sup> Ari makiramá onu makkalli.

Ari makalittang yù ággubobuk na ta kalsáda.

<sup>20</sup> Masippà, á kábbian na yù ira marigirigâ ánná yù ira máttakì, ánná abbágán na yù ira nga magiddi-iddak kuna,

áddè ta arán na pamaluro sù pamanunnù na nga matunung,

<sup>21</sup> ánná umay kuna yù ira ngámin makkakerumá nga tatolay, gapu ta matákkilalád da ta aggina yù iddanamád da."†

*Si Apu Kesu ánná si Belsebul*

*Markus 3:20-30; Lukas 11:14-23*

\* <sup>12:4</sup> 1 Samuel 21:1-6; Libitiko 24:9      † <sup>12:21</sup> Isaya 42:1-4

<sup>22</sup> Á kabalín na yaw, ajjan yù ira tatolay nga minay sù gián ni Apu Kesu, á iniyángé ra kuna yù laláki nga buling ánnna umal gapay gapu ta nagunagán na anitu. Á pinammapiá ni Apu Kesu, tapè makobobuk ánnna makasingan.

<sup>23</sup> Á napállá ngámin yù ira tatolay, á kinagi ra, "Yaw panò yù Ginaká ni Patul Dabid, nga kinagi nayù ira ábbilinán ni Namarò ta iddagát tam?" kud da.

<sup>24</sup> Ngam yù ira Parisio, ta pakaginná ra sù kinagi nayù ira tatolay, á kinagi ra, "Si Belsebul nga yápu nayù ira anitu yù mangabbák kuna, tapè papanáwan na ira," kud da.

<sup>25</sup> Á ammu ni Apu Kesu yù nonopan nayù ira Parisio, á kinagi na nira, "Nu maddaráma yù ira tatolay nga maggián sù páppatulán, mapatalián sangaw yù patul da ánnna massisinná yù ira tatole na. Á yù ira tangelián onu yù ira máttatáma ánnna mássisíná, nu ari nakástá yù áttatádér ra, mewarawarár ira.

<sup>26</sup> Á nu papanáwan ni Satanas yù ira pinatuttul na nga anitu, kontarán na yù páppatulán na lápay. Á kunnasi panò laguk yù ámmaláddá na sù pammagure na nira? Awánin gemma!

<sup>27</sup> Á nu kuruk nakuán yù kagian naw nga palawanak ku yù ira anitu megapu sù pakáwayyá ni Belsebul, á yù ira kábulun naw laguk, asinni panò yù paggaguán na pakáwayyá ra nga mamalawán ta anitu? Ari gemma naggapu ká Belsebul. Á gapu ta naggittá yù paggaguán na pakáwayyá mi ánnna yù ira kábulun naw, á yù ira kábulun naw sangaw yù mamanunnù nikayu.

<sup>28</sup> Á gapu ta yù Ikararuá ni Namarò yù paggaguán nayù pakáwayyá, mánnámmuán naw gapay laguk ta jímittálín nikayu yù pammagure ni Namarò," kun ni Apu Kesu sù ira Parisio.

<sup>29</sup> Á kun ni Apu Kesu paga, "Á ta ángngarigán, awán ta tullung nga magâ sù bale nayù masikan, nu arán na paga bináluk. Á kabalín na mamáluk, awayyá na apan yù ikáyá na nga kukuá na.

<sup>30</sup> Á yù tolay nga ari makipulù nikán, ikalusso nangà. Á kunnian gapay, yù tolay nga ari mangabbák nikán nga mangunnuk, mamawwarawarâ lállaguk sù ira tatolay nga unnurak ku nakuán.

<sup>31</sup> Á yáyù nga kagiak ku nikayu ta mapakomá ngámin yù makaliwâ ánnna magubobuk ta narákè, ngam ari mapakomá yù mamaráké sù Mangilin nga Ikararuá.

<sup>32</sup> Mapakomá yù magubobuk ta narákè nikán nga Kaká na ngámin na tatolay, ngam ari mapakomá yù magubobuk ta narákè sù Mangilin nga Ikararuá, mássiki kunangane nga ággaw, mássiki ta áddè noka nga ággaw nga duttál," kun ni Apu Kesu nira.

*Yù Keyarigán nayù Káyu ánnna yù Bungá na  
Lukas 6:43-45*

<sup>33</sup> Á kinagi na paga ni Apu Kesu, "Á ta ángngarigán, nu ajjan yù napiá nga káyu, napiá gapay yù bungá na. Á kunnian gapay, nu jikkù yù káyu, jikkù gapay yù bungá na, á ammu tam gemma mappíli ta káyu megapu sù bungá na.

<sup>34</sup> Sikayu yù kun na ánná na iráw, ta kitarákè ngámin yù ubobugan naw! Á yá lâ ubobugan na tolay yù ajjan ta nonò na.

<sup>35</sup> Yù napiá nga tolay, tuppálan na yù napiánga naggapu sù napiá nga nonò na. Á yù narákè nga tolay, kitarákè yù ággangnuá na ánnna ággubobuk na megapu sù narákè nga nonò na.

<sup>36</sup> Á yawe yù kagiak ku nikayu, ta sangaw nu duttál yù ággaw nga pangukum ni Namarò, á tabbagán nayù ira tatolay nga katággitádday yù inubobuk na nga awán ta serbi na.

<sup>37</sup> Ta mapakomá kayu onu mapagikáru kayu megapu sù inubobuk naw," kun ni Apu Kesu.

*Yù Pagiddak nayù ira Tatolay ta Pamagaddátu ni Apu Kesu  
Markus 8:11-12; Lukas 11:29-32*

<sup>38</sup> Á ajjan tán yù ira káruán nga Parisio ánnna yù ira mangituddu ta tunung. Á kinagi ra kâ Apu Kesu, "Mesturu," kud da, "ipasingam mu ngè nikami yù pagaddatuam mu, tapè matákkilálám mi nu kuruk nga sikaw yù iddagám mi nga naggapu kâ Namarò," kud da.

<sup>39</sup> Á, "Anni ngillá danniaw nga tatolay ta karanniaw nga ággaw, nga narákè, nga awán ta panguruk da kâ Namarò!" kun ni Apu Kesu. "Kiddaw kayu lâ kiddaw ta panákkilálán naw! Ngam awán ta mepasingan nikayu, nu ari lâ yù panákkilálán nga nepasingan ngaw megapu kâ Jona, nga ábbilinán ni Namarò.

<sup>40</sup> Ta naggián ngaw si Jona sù bitúká na dakal nga sirá ta tallu nga ággaw. Á kunnay kâ Jona ngaw, kunnian gapay sangaw nikán nga Kaká na ngámin na tatolay, ta maggiánà sangaw ta tallu nga ággaw sù unak na dabbun.

<sup>41</sup> Á sangaw nu duttál yù ággaw nga pangukum ni Namarò, manáddak yù ira ngaw tatolay nga taga Ninaba, nga mamaliwâ nikayu, gapu ta nabbabáwi ira ngaw ta liwilwâ da megapu sù pangilayalayâ ni Jona, á aijjanin yù minay saw nikayu nga makáwayyá ánnè kâ Jona.

<sup>42</sup> Á yù ngaw rena nga nammaguray túrin ta Abagátán, aggina gapay yù umay sangaw nu duttálín yù ággaw nga pangukum, nga mangikeká nikayu, gapu ta minay ngaw nga naggapu ta arayyu nga lugár, tapé en na ginnán yù sírik nga inituddu na ngaw ni Patul Solomon, á aijjanin yù minay saw nikayu nga makáwayyá ánnè kâ Solomon,” kun ni Apu Kesu.

*Yù Tolay nga Sinolián na Anitu*

*Lukas 11:24-26*

<sup>43</sup> Á kinagi ni Apu Kesu paga nira, “Á ta ángngarigán, nu aijjan yù anitu nga mallawán sù tolay nga nagunagán na, umay mappassapassiar ta namágá nga lugár, nga magalek ta pagibannagán na. Á sangaw nu awán ta málerán nayù anitu,

<sup>44</sup> á kun na lâ ta nonò na, ‘Toliak ku lápoy yù nánawák ku,’ kun na. Á labbè nayù anitu sù tolay, mález na nga kun na balay nga napakarenuánin, ta awán ta maggián tán.

<sup>45</sup> Á yáyù nga en na apatan yù pitu nga kábulun na nga anitu, nga narákè ánnè kuna, á tullung yù ira walu nga maggián ta tolay. Á nappanà laguk yù ággíán nayù tolay nga nagunagán na ngaw nayù tádday lâ. Á kunnian sangaw gapay yù mesimmu sù ira narákè nga tatolay kunangane nga ággaw,” kun ni Apu Kesu.

*Yù ira Wáwwagi ni Apu Kesu ánnà yù Yená na*

*Markus 3:31-35; Lukas 8:19-21*

<sup>46</sup> Á ta pakiubobuk ni Apu Kesu sù ira tatolay, limibbè yù yená na ánnà yù ira wáwwagi na. Á aijjan ira ta lawán nga magiddak, ta ikáyâ da makiubobuk kuna.

<sup>47</sup> Á yáyù nga aijjan yù minay nakkagi kâ Apu Kesu, á kinagi na, “Aijjan ta lawán di Yenám ánnà yù ira wáwwagim, á ikáyâ daka nga kobobuk,” kun na.

<sup>48</sup> Á simibák si Apu Kesu, á kinagi na kuna, “Asinni yù yenâ? Á asinni gapay yù ira wáwwagi?” kun na.

<sup>49</sup> Á sinonnâ na yù limá na ánnà inituddu na yù ira sinuddúan na nga aijjan tán, á kinagi na, “Masingam mu yawe ira, nga kunnay sù yenâ ánnà yù ira wáwwagi.

<sup>50</sup> Ta yù ira ngámin nga manguruk kâ Yámà nga aijjan ta lángì ánnà manuppál sù ipakuá na níra, aggira yù kun na wáwwagi nga lálláki ánnà bábbay ánnà kun na yenâ,” kun na.

## 13

*Yù Ángngarigán nga Meyannung sù Minámmulá ta Bini*

*Markus 4:1-9; Lukas 8:4-8*

<sup>1</sup> Á tán galâ nga ággaw, nánaw si Apu Kesu sù balay, á minay nagitubang ta aggik na bebay.

<sup>2</sup> Á kitáru yù ira tatolay nga nagarimummung kuna ta karagátán. Á yáyù nagali nga minay nagitubang si Apu Kesu sù barangay, á naggián yù ira tatolay, nga gitatáddágán ta aggik.

<sup>3</sup> Á pangituddu ni Apu Kesu níra, nagángngarigán sù aru nga inituddu na. Á kinagi na níra, “Aijjan yù minákkomán nga minay nangiわri ta bini sù ákkomanán na.

<sup>4</sup> Á pangiwâri na sù bini, negassi ta aggik na dálan yù baddì, á kinán na mammánù.

<sup>5</sup> Á aijjan gapay yù bini nga negassi ta kabatuán, nga nabì lâ nga nattubbu gapu ta baddì garè yù dabbun na.

<sup>6</sup> Á yáyù nga nabì lâ nalelay yù kapássungngì, á pattangngá na ággaw, dagarágâ nga nakatáng, gapu ta ari nakapapponak yù gamù na.

<sup>7</sup> Á aijjan yù bini nga negassi gapay ta kasisítán. Á gapu ta alistu yù áddakal nayù sî, ari nakarakal yù bini.

<sup>8</sup> Á yáyù káruán nga bini, nepay sù napiá nga dabbun. Á yáyù nga jiminakal ánnà nabbungá. Aijjan nga kustu yù bungá na, ánnà aijjan nga aru yù bungá na, ánnà yù káruán nga kitáru yù bungá na.

<sup>9</sup> Á sikayu nga makaginná, tángngagan naw laguk yù kagiak ku nikayu,” kun ni Apu Kesu.

*Yù Gapu nayù Pagángngarigán ni Apu Kesu sù Pangituddu na*

*Markus 4:10-12; Lukas 8:9-10*

<sup>10</sup> Á minay laguk yù ira sinuddúan ni Apu Kesu, á iniyabbû da, “Anni má ta magángngarigán ka nu tudduám mu yù ira tatolay?” kud da kuna.

<sup>11</sup> Á simibbák si Apu Kesu, á kinagi na nira, “Ari lâ aggira yù neddán, nu ari galâ sikayu yù neddán ta pakáwayyá naw nga makánnámmu sù ngaw nelímak nga meyannung sù pammagure ni Namaro ta lángì.

<sup>12</sup> Á yù tolay nga magginná ánná makánnámmu, malannapán sangaw yù nánnámmuán na. Ngam yù tolay nga ari magginná ta napiá, mári kuna sangaw mássiki yù baddi nga kagian na nga kánnámmuán na.

<sup>13</sup> Á yáyù nga iyarigák ku yù ituddù sù ira tatolay, gapu ta maggigimmúlák ira, ngam arád da matákkilalán yù kuruk, ánná maggiginá ira, ngam arád da magginná ánná arád da mánnaámmuán.

<sup>14</sup> Á yáyù nga megapu nira, matuppál yù kinagi na ngaw ni Isaya, nga ábbilinán ni Namaro. Kuniaw yù inipetúrá na ngaw ni Namaro kuna:

‘Ginná kayu lâ ginná, ngam arán naw mánnámmuán,  
ánná singan kayu lâ singan, ngam arán naw matákkilalán.

<sup>15</sup> Danniaw ira nga tatolay, lalang ira, ta arád da ikáyâ mannononò sù kuruk,  
á yáyù nga mabbáli mataggâ yù nonò da.

Kitakitul ira ánná inikimámà da yù matá ra,  
maraké masingad da, ánná magginná ra,  
ánná mánnámmuád da yù bilin nga meyannung nikán,  
á nu mabbabáli ira nakuan sù liwâ da,  
pakomák ku ira nakuan.\*

<sup>16</sup> “Ngam sikayu, napiá yù ággián naw, gapu ta matákkilalán naw yù masingan naw ánná mánnámmuán naw yù magginná naw.

<sup>17</sup> Á kuruk yù kagiak ku nikayu. Aru yù ira ngaw ábbilinán ni Namaro ánná yù ira ngaw napiá nga tatolay nga matunung, nga mayâ nga maningen karanniaw nga masingan naw kunangan, ngam arád da nasingan, ánná inikáyâ da nga magginná yù ngámin nga magginná naw kunangan, ngam arád da naginná,” kun ni Apu Kesu sù ira sinudduán na.

*Yù Keyarigán nayù Minámmulá ta Bini*

*Markus 4:13-20; Lukas 8:11-15*

<sup>18</sup> Á kinagi na paga nira ni Apu Kesu, “Ginnán naw laguk yù kebalinán nayù ángngarigák ku nga meyannung sù minángngiwári ta bini.

<sup>19</sup> Yaw yù kebalinán na bini nga natágâ ta aggik na dálan, yù tolay nga makaginná sù bilin nga meyannung sù pammagure ni Namaro, ngam arán na kánnámmuán. Á umay laguk si Satanas, á irián na yù bilin nga naginná nayù tolay.

<sup>20</sup> Á yù bini nga negassi ta kabatuán yù keyarigán nayù tolay nga dagarágâ nga magayáyâ nga mangalawâ sù bilin nga magginná na.

<sup>21</sup> Ngam kunnay ta bini nga ari makapaggamù ta kabatuán, ari mepatattam ta napiá yù bilin ni Namaro ta nonò nayù tolay, gapu ta inillíngá na, á yáyù nga ari napasigaggâ yù panguruk na. Á sangaw nu marigirigâ yù tolay megapu sù panguruk na kâ Namaro, mabì lá mallurá, ánná likuránán na yù panguruk na.

<sup>22</sup> Á yù bini nga natágâ sù kasisítán yù keyarigán nayù tolay nga makaginná sù ubobuk ni Namaro, ngam gapu ta burung na ta jigâ nga umay nakuan kuna ánná yù pakkaragâ na nga mangunnuk sù aru nga magannagannuk nga kukuá na, arán na tángngagan yù napiá nga ipakuá ni Namaro kuna. Á ta kunnay ta bini ta kasisítán nga ari makarakal ánná ari makapabbungá, kunnian gapay sù bilin ni Namaro, ta ari mepatattam ta nonò nayù tolay.

<sup>23</sup> Á yù kebalinán nayù bini nga newári sù napiá nga ákkomanán, yáyù yù tolay nga magginná sù bilin ni Namaro ánná kánnámmuán na. Á tángngagan na ta napiá, ánná kurugan na. Á tuppálán na yù napiá nga ipakuá ni Namaro kuna, nga kunnay ta aijan nga kustu yù bungá, ánná aijan nga aru yù bungá na, ánná yù káruán nga kitáru yù bungá na.”

*Yù Ángngarigán nga Meyannung ta Kaddà nga Nepattubbu ta Bini*

<sup>24</sup> Á aijan paga yù tádday nga ángngarigán nga inistoriá ni Apu Kesu sù ira tatolay. “Á meyárik yù pammagure ni Namaro sù tolay nga nangiwári sù napiá nga bini sù ákkomanán na.

<sup>25</sup> Á ta pakkaturuk da ngámin, minay yù kalusso na, á inimulá na yù kaddà sù komán nga nemulán na tarígu. Á kabalin na nangiwári sù komán, nánaw.

<sup>26</sup> Á nattubbu yù bini nga tarígu, á naddáwa. Á paddáwa nayù tarígu, nattubbu gapay yù kaddà.

27 Á yù ira aripan nayù makákkua sù ákkomanán, ed da kinagi sù yápu ra, ‘Apu, ari panò napiá yù biní nga nipemulám sù ákkomanám mu? Á anni má ta mattubbu gapay yù kaddà? Isaw panò paggapuán na?’ kud da.

28 ‘Á yaw inimulá nayù malussaw nikán,’ kun nayù yápu ra. Á kinagi ra kuna, ‘Apu, baddulam mi panò yù kaddà laguk?’

29 ‘Ari lábbi,’ kun na nira, ‘marakè mekanakanâ mabaddul gapay yù tarigu,’ kun na.

30 ‘Paguráyán naw lâ tapè mepaggigittá nga tulluá yù tarigu sù kaddà, áddè ta kagaták na. Á sangaw nu magaták, kagiak ku sù ira maggaták ta pololuad da nga baddulan yù kaddà, pángè da babbaran, tapè tuggiad da sangaw. Á kabalid da mamabbak sù kaddà, gatabad da laguk yù tarigu, tapè pakappiád da sù ággubbuák ku,’ kun na.’

*Yù Keyarigán nayù Kabadditán nga Bukal áんな yù Áppalappák ta Pán*

*Markus 4:30-34; Lukas 13:18-21*

31 Ajjan paga yù ángngarigán nga kinagi ni Apu Kesu nira. “Kunniaw yù keyarigán nayù pammagurayán ni Namarò áんな yù ira tatolay nga mesipà sù pammagure na. Kunniaw sù kabadditán nga bukal, nga inimulá na tolay sù ákkomanán na.

32 Á másiski nu kabadditán sù ngámin makkakerumá nga bukal, dumakal sangaw, nga mabbáli ta káyú, nga karakalán nayù ira ngámin nga mulá, á umay nga magumù yù ira mammán sù ira pangá na.”

33 Á nagángngarigán si Apu Kesu paga, á kinagi na nira, “Meyárik gapay yù pammagure ni Namarò sù áppalappák ta pán nga iná na babay nga inikiruk na sù arená áddè ta nekiruk ta napiá. Á limippák yù ngámin nga pán,” kun na.

34 Á ta pangituddu ni Apu Kesu sù ira magaru nga tatolay, nagángngarigán sù ngámin nga inituddu na. Awán bulubugá ta inubobuk na nira, nu arán na galá iniyángngarigán.

35 Á yáyù nga natuppál yù nakagi nayù ngaw ábbilinán ni Namarò, nga kunniaw: “Magángngarigánà lâ sangaw nu tudduák ku yù ira tatolay.

Á kagiak ku nira yù nelímak nga ari paga nánnámmuán áddè ngaw sù kaparò na dabbuno ta áddè kunangan.”<sup>†</sup>

*Ibukalán ni Apu Kesu yù Kebalinán nayù Kaddà*

36 Á kabinan na yaw, nánaw laguk si Apu Kesu nga minay simillung ta balay. Á jimikki kuna yù ira sinudduán na, á kinagi ra kuna, “Ibukalám mungè nikami yù ángngarigán nga meyannung sù kaddà ta ákkomanán,” kud da.

37 Á kinagi ni Apu Kesu nira, “Wan, á. Yù tolay nga nammulá sù napiá nga bukal, aggina yù keyarigák ku, nga Kaká na ngámin na tatolay.

38 Á meyárik ta ákkomanán yù dabbuno. Á yù napiá nga bukal nga nemulá sù ákkomanán, yáyù keyarigán nayù ira tatolay nga mesipà sù pammagure ni Namarò. Á yù kaddà yù keyarigán nayù ira makiyáma kâ Satanas, nga maddok sù ira narákè.

39 Á yù malussaw, nga nangiwári ta kaddà, aggina gemma si Satanas. Á yù ággo na kagaták nayù nemulá, yáyù keyarigán nayù pagáddekan na ággaw. Á yù ira maggaták yù keyarigán nayù ira daroban ni Namarò.

40 “Á kunnay ta mabaddul áんな matuggi yù kaddà, kunnian gapay yù mesimmu sangaw nu pagáddekan na ággaw.

41 Ta sangaw nu duttál yane ággaw, á sikán nga Kaká na ngámin na tatolay, dobak ku yù ira daroban nga umay mangukum sù ira ngámin nga tatolay nga mamalliwá sù ira kábulud da, áんな yù ira ngámin nga mangnuá ta narákè.

42 Á itabbà da ira ngámin ta gumaggaggáng nga api sù impiernu, á gikuletán ira áんな mangngarangngaringngì ira ta jígâ da.

43 Ngam yù ira tatole ni Namarò, mepaggián ira kâ Yáma ra sù pammagurayán na, á maddalingárang ira nga kunnay ta bilák. Á sikayu nga makaginná, tángngagan naw laguk yù kagiak ku nikayu,” kun ni Apu Kesu.

*Yù Tallu nga Ángngarigán nga Meyannung sù Pammagure ni Namarò*

44 Á nagángngarigán paga si Apu Kesu, á kinagi na, “Yù pammagure ni Namarò sù ira nga mesipà kuna, kunnay gapay sù aru nga pirâ nga nekokkok ta ákkomanán. Á nakesimmu yù tolay ta pirâ. Á pakálek na, nepallà yù pagayáyâ na. Á yáyù nga tábbunán na, á en na laguk iláku ngámin yù kukuá na, tapè manoli nga en na gatágan yù ákkomanán,” kun ni Apu.

<sup>45</sup> Á kinagi ni Apu Kesu paga, “Á kunniaw gapay yù keyarigán nayù pammagure ni Namarò. Ta aijan yù tolay nga minálláku, á en na aleran yù paddayan na ta dusáriu, nga nanginá yù katággítádday.

<sup>46</sup> Á pakálek na sù tádday nga kakástán, en na iniláku ngámin yù kukuá na tapè gatángan na yù kakástán,” kun na.

<sup>47</sup> Á kinagi na paga ni Apu Kesu, “Yawe gapay yù keyarigán nayù pammagure ni Namarò sù ira tatole na. Kunnay sù tabukul nga nipe ra ta bebay, tapè málâ da yù makkakerumá nga sirá.

<sup>48</sup> Á sangaw nu mapannu yù tabukul, igod da, á magitubang ira nga mamassisinná ta sira meyannung sù kaláse ra, tapè ipe ra sù lappi ra yù napiá ánná itabbà da yù jíkkù.

<sup>49</sup> Á kunnian gapay sangaw nu pagáddekkán na ággaw. Ta umay yù ira daroban tapè isinná ra yù ira naráké nga tatolay sù ira napiá nga tatole ni Namarò.

<sup>50</sup> Á itabbà da yù ira naráké sù gumaggággáng nga api ta impiernu. Á gikulukuletán ira ánná mangngarangngaringngi ira gapu ta jíga da.”

<sup>51</sup> Á kabalin na nagángngarigán ni Apu Kesu, iniyabbû na sù ira sinudduán na, “Nánnámmuán naw panò yù kebalinán na ngámin danniaw nga pagángngarigák ku?” kun na nira. “Ammán,” kud da kuna.

<sup>52</sup> Á kinagi ni Apu Kesu nira, “Á yù ira ngámin nga maggigiámmu sù tunung ni Namarò, nga manguruk sù netuddu, ánná mesipà ira sù pammagure ni Namarò, meyárik ira ta maríku, nga ammu na mangiyusá sù ngámin nga aruátan na, nga dán nga pinakappián na ta bale na, ánná yù bagu nga aruátan na gapay,” kun ni Apu Kesu.

*Yù Pangipuerá ra kâ Apu Kesu nayù ira Katangelián na  
Markus 6:1-6; Lukas 4:16-30*

<sup>53</sup> Á ta kabalin ni Apu Kesu nagángngarigán, nánaw laguk.

<sup>54</sup> Á nanoli ta ili na. Á minay sù iskuelá nga ággagummungád da, á inituddu na yù ira katangelián na. Á pangituddu na nira, napállá ira sù ituddu na. Á kinagi ra, “Sisaw panò nangápán na sù kasírik na ánná yù pakáwayyá na nga mamagaddátu?” kud da.

<sup>55</sup> “Ari panò nga aggina yù anâ nayù kalapinteru? Á si Maria gemma yù yená na, ánná yù ira wáwwagi na di Ime, kári Kusè, si Simon, ánná si Kudas.

<sup>56</sup> Á ari panò mepaggián saw nittam gapay ngámin yù ira wáwwagi na nga bábbay? Sisaw panò nagiskuelán na nga naggigiámmuán na ta ngámin karanniaw?” kud da.

<sup>57</sup> Á napporay ira kâ Apu Kesu. Á yáyù nga kinagi ni Apu Kesu nira, “Pakimorayád da yù ábbilinán ni Namarò ta ngámin nga lugár. Ngam yù ira katangelián na ánná kanakanáyun na, awán ta ákkimore ra kuna,” kun na.

<sup>58</sup> Á yáyù nga baddì lâ yù pinagaddátu na sù ili na, gapu ta awán ta ángnguruk da kuna.

## 14

*Yù Kaputul ni Kuan nga Minánnigù  
Markus 6:14-29; Lukas 9:7-9*

<sup>1</sup> Á tán nga ággaw, si Patul Erodo yù mammaguray ta Galilia. Á narámak nayù patul yù akka-akkuán ni Apu Kesu.

<sup>2</sup> Á yáyù nga kinagi na sù ira gádde na, “Yane meparámak, aggina si Kuan nga Minánnigù, nga nagínnanolayin. Yáyù gapu na nga makáwayyá nga mamagaddátu!” kun nayù patul.

<sup>3</sup> Yáyù kagian ni Patul Erodo gapu ta inipagápù na ngaw si Kuan, nga inipegálù na ánná inipapukù na, megapu kâ Erodia nga atáwa na. Ta inatáwa ni Patul Erodo si Erodia, nga atáwa ni Pilippi, nga urián nayù patul.

<sup>4</sup> Á nalussaw si Erodia kâ Kuan ngaw, megapu sù kinagi na sù patul nga atáwa na, nga “Mekontará ta tunung yù pangatáwam kâ Erodia, nga atáwa nayù uriám mu!” kun ni Kuan ngaw kâ Patul Erodo.

<sup>5</sup> Á yáyù nga inikáyâ na papatáyan ni Patul Erodo si Kuan, ngam naganássing sù ira Kudio gapu ta inibiláng da ta ábbilinán ni Namarò.

<sup>6</sup> Á jimittál yù panaddamád da ta keyanâ nayù patul. Á pappabbúyá ra, nattála yù magingánay, nga anâ ni Erodia, nga yù siúmán nayù patul, ta arubáng di patul ánná yù ira álliuk na. Á nepallà yù ayâ nayù patul nga naggíraw ta pattálá nayù abbing.

<sup>7</sup> Á yáyù nga nappagássingán nga nangitabbá yù patul ta iyawâ na kuna yù maguray lâ nga kiddawan na.

8 Á en na laguk nayù abbing nga iniyabbû kâ innò na nu anni yù kiddawan na. Á kinagi ni Erodia sù anâ na yù kagian na sù patul. Á kinagi nayù abbing sù patul, "Iyawâ mu nikán sawe yù ulu ni Kuan nga Minánnigù nga nepay ta ámmagonán," kun na.

9 Á pangikomá nayù magingánay sù ulu ni Kuan, nakalò yù daddam nayù patul. Ngam gapu sù pangipagássingán na sù arubáng nayù ira álliuk na, inibilin na ta matuppál yù kinagi nayù abbing.

10 Á dagarágâ nga pinutulád da si Kuan sù ábbalurán.

11 Á inituluk da yù ulu na nga nepay ta ámmagonán, nga iniyawâ da sù magingánay. Á iniyawâ na laguk kâ innò na.

12 Á yù ira sinudduán ni Kuan, pakaginná ra ta kunniaw, ed da inâ yù baggi na, ta initanam da. Á ed da laguk iniparamak kâ Apu Kesu.

*Yù Pamakán ni Apu Kesu sù ira Límáribu nga Tatolay*

*Markus 6:30-44; Lukas 9:10-17; Kuan 6:1-14*

13 Á ta pakarámak ni Apu Kesu sù nesimmu kâ Kuan, nattakay ta barangay nga nánaw, nga minay ta kalállamatán. Á pakarámak nayù ira tatolay sù páno ni Apu Kesu, nánawád da ngámin yù ira ili ra, á nappatalay ira nga jimináddán kuna.

14 Á pakáddè ni Apu Kesu ta aggik, minuták ta barangay, á giminon ta kannak, á nasingan na yù magaru nga tatolay. Á nepallà yù allà na nira, á pinammapíá na ngámin yù ira máttaki nira.

15 Á ta púgággin, minay kâ Apu Kesu yù ira sinudduán na. Á kinagi ra kuna, "Kalállamatán yawe giát tam, á mággè gabingin," kud da. "Papanáwam mu bi yù ira tatolay, tapè umay ira gumátiáng ta kanad da tukewà babálay," kud da.

16 Á kinagi ni Apu Kesu nira, "Ari máwák nga mánaw ira. Sikayu yù mamakán nira," kun na.

17 Á kinagi ra kuna, "Ajjan saw lillímá bullung nga pán áンna dudduruá lâ nga sirá," kud da kuna.

18 "Iyángé naw saw nikán," kun ni Apu Kesu nira.

19 Á pinagitubang na laguk yù ira tatolay, ta nakástá nga kakáddapán yù giát da. Á pakálâ ni Apu Kesu sù límá bullung nga pán áンna duá nga sirá, nattánguk ta lángì, á nabbalabálâ kâ Namarò sù kanan. Á giddigiddúá na yù pán, á iniyawâ na sù ira sinudduán na, tapè isinek da sù ira tatolay.

20 Á kinimán ira ngámin, á nabattuk ira. Á yù ira sinudduán na, ed da inunnuk yù bunára, á mapulu duá nga lappi yù nagunnurád da.

21 Á límá ribu nga lálláki yù kinimán, áンna yù ira bábbay áンna ábbing gapay.

*Mallakák si Apu Kesu ta Utun na Danum*

*Markus 6:45-52; Kuan 6:15-21*

22 Á gapu ta mággè gabingin, lage na pamalabbè ni Apu Kesu sù ira tatolay ta bale ra, pinatake na ta barangay yù ira sinudduán na, ta pinapolu na ira nga dumákkì ta dammáng.

23 Á pamapáno na sù ira tatolay, giminon nga maguroray ta puddul, tapè makimállâ sù Yáma na. Á pajjibbakin, ajjan paga si Apu Kesu nga maguroray tán.

24 Á keggá na paga ni Apu Kesu ta puddul nga makimállâ kâ Namarò, nakárayyungin yù barangay nga nattakayán nayù ira sinudduán na, nga nakáddè ta tangngá na bebay, nga mepappáttu ta palung, gapu ta arubangad da yù paddák.

25 Á ta maddaggunin mannawák, nallakalakák si Apu Kesu sù utun na danum, nga jimikkì sù barangay nga nattakayád da.

26 Á pakasingan nayù ira sinudduán na kuna nga mallakalakák ta utun na danum, nakkalli ira ta nepallà yù assing da, á "Ye! Annáni! Annáni!" kud da.

27 Ngam dagarágâ nga kinagi ni Apu Kesu nira, "Síkán yaw! Ari kayu maganássing," kun na.

28 Á pakkagi ni Apu karannian, "Apu," kun ni Eduru, "nu kuruk nga sikaw, agálám makè laguk ta mallakágâ sawe utun na danum nga umay nikaw tán," kun na.

29 Á kinagi ni Apu Kesu kuna, "Wan, umay ka saw," kun na. Á kinuruk na laguk ni Eduru, á gimitták ta barangay, á nallakák ta utun na danum nga minay kâ Apu Kesu.

30 Ngam pakasingan na ta dakal yù palung megapu sù paddák nga nasikan, naganássing. Á limimmak, á nakkalli nga kinagi na, "Apu, iyígù mà bíl" kun na.

31 Á dagarágâ nga singngalán ni Apu Kesu yù límá na, á ginápù na. "Anni ngillâ ta kabaddì na ángngikatalà mu nikán! Ngattá, ta mabbábáng ka?" kun ni Apu Kesu kuna.

<sup>32</sup> Á nappittà ira ta barangay, á dagarágâ nga nattukkâ yù paddák.

<sup>33</sup> Á yù ira nga ajjan sùbarangay, jináyo ra si Apu Kesu, á kinagi ra, “Apu, kuruk nga sikaw yù Anâ ni Namarò!” kud da.

*Yù Pamammapiá ni Apu Kesu sù ira Máttakì ta Purubinsia na Gennesaret  
Markus 6:53-56*

<sup>34</sup> Á pakáddè di Apu Kesu ta dammáng, naddung ira ta Gennesaret.

<sup>35</sup> Á yù ira tatolay nga taga Gennesaret, natákkilalád da si Apu Kesu. Á yáyù nga ed da iniparámak yù labbè na tán ta ngámin nga tatolay ta lugár da. Á iniyángé ra kuna yù ira ngámin nga máttakì.

<sup>36</sup> Á nakimi-imállà ira kuna ta anugutan na nga siggeran nayù ira máttakì yù kiddanán nayù barawási na. Á nammapiá ngámin yù ira nga naniggek kuna.

## 15

*Yù Ituddu nayù ngaw ira Naggaká sù ira Kudio  
Markus 7:1-13*

<sup>1</sup> Á ajjan yù ira Parisio áンna yù ira mesturu nga mangituddu ta tunung na Kudio, nga naggapu ta Jerusalem, á minay ira kâ Apu Kesu. Á iniyabbû da kuna,

<sup>2</sup> “Ngattá, ta arád da tuppálan nayù ira sinudduám mu yù kustombare nayù ira ngaw naggaká nittam? Nu kumán ira, arád da baggawán yù limá ra, nga nekontará gemma sù kustombare tam ngámin,” kud da.

<sup>3</sup> Á simibbák si Apu Kesu, á kinagi na nira, “Á sikayu, ngattá, ta giddang naw yù bilin ni Namarò, tapè tuppálan naw yù kustombare naw?

<sup>4</sup> Ta kinagi ni Namarò, ‘Makimoray kayu sù ira darakal naw áンna iddi-iddukan naw ira.’ Á kinagi na gapay, ‘Mapapátay laguk yù tolay nga mangiparaparákè sù yáma na áンna yená na.\*

<sup>5</sup> Ngam sikayu, kagian naw ta ángngarigán nu ajjan yù tolay nga makkagi kári ammò na kâ innò na ta awán ta awayyá na nga mangabbák nira gapu ta neyátang lâ kâ Namarò yù kukuá na nga ángngabbák na nira nakuan,

<sup>6</sup> á arán nen máwák nga abbágán yù ira darakal na. Á gapu ta kunnian yù ángngituddu naw, inuli naw yù ubobuk ni Namarò tapè tuttulan naw yù ággangngúá naw!

<sup>7</sup> Sikayu nga áppè pípiá! Kuruk nga nekanná nikayu yù imipetúrá na ngaw ni Namarò kâ Isaya, nga kunniauw:

<sup>8</sup> ‘Danniaw nga tatolay,’ kun ni Namarò, ‘dayáwad dangà megapu sù simù da,  
ngam arayyu yù nonò da nikán.

<sup>9</sup> Awán ta serbi nayù pakimore ra nikán,  
gapu ta ibiláng da ta bilin ni Namarò yù ituddu ra lápay,  
nga naggapu galâ ta nonò na tolay,’ kun ni Namarò.”†

*Yù Mamaddaping ta Tolay  
Markus 7:14-23*

<sup>10</sup> Á kabalin ni Apu Kesu nga nakkagi karannian, inagálán na yù ira tatolay, á kinagi na nira, “Ginnán naw yawe nga kagiak ku nikayu, tapè kuruk nga kánnámuán naw,” kun na.

<sup>11</sup> “Ari yù kanan nga itallung na tolay ta simù na yù mamaddaping ta tolay, nu ari galâ yù iniyubobuk na nga mallawán ta simù na yù paggapuán nayù karaping na. Yù pagubobuk na ta narákè nga naggapu ta nonò na, yawe yù mangari sù awayyá na nga makimoray kâ Namarò,” kun ni Apu Kesu.

<sup>12</sup> Á yáyù nga minay laguk kâ Apu Kesu yù ira sinudduán na, á kinagi ra kuna, “Apu, arám mu panò ammu ta natakitán yù nonò nayù ira Parisio ta pakaginná ra sù kinagim?”

<sup>13</sup> “Wan ay,” kun ni Apu Kesu. “A mabaddul sangaw gemma ngámin nga katággítáddyay nga mulá nga arán na inimulá nayù Yámà nga ajjan ta lángi.

<sup>14</sup> Paguráyán naw lâ yù ira buling nga mangering sù ira kagittá ra nga buling nga umay mappetuluk nira. Á nu ituddu na buling sù kabbulun na nga buling yù pallakarád da, mapanná ira duá sangaw ta abbû,” kun na.

<sup>15</sup> Á kinagi na laguk ni Eduru kuna, “Ibukalám mungè nikami yù kebalinán nayù ángngarigán nga kinagim nira,” kun na.

<sup>16</sup> Á kinagi ni Apu Kesu, “Arán naw panò lâ paga kánnámuán?

<sup>17</sup> Arán naw panò ammu ta maguray lâ nga kanan yù itallung na tolay ta simù na, umay galâ ta bituká na, á mallawán sangaw?

\* <sup>15:4</sup> Esodo 20:12; 21:17    † <sup>15:9</sup> Isaya 29:13

<sup>18</sup> Ngam ta pagubobuk na, yù mallawán ta simù na, yaw naggapu ta nonò na tolay, á yáyù yù mamaddaping ta tolay, ánnna mangari sù awayyá na nga makimoray kâ Namarò.

<sup>19</sup> Ta yù nonò na tolay yù paggatuán nayù narákè nga ággangnguá na nga mamapátay, mangarallaw ánnna makikarallaw, makkokò, á malladduk nga massistigu, ánnna mallilibâ.

<sup>20</sup> Danniaw yù mamaddaping ta tolay ánnna mangari ta awayyá na nga makimoray kâ Namarò. Ngam nu kumán nga ari mabaggawán yù limá na, ari yian yù mamaddaping ta tolay,” kun ni Apu Kesu.

*Yù Pangikatalà nayù Babay nga Ari Kudio*

*Markus 7:24-30*

<sup>21</sup> Á nánaw laguk si Apu Kesu tán nga lugár, nga minay ta lugár nayù ira ili na Tiro ánnna Sidon.

<sup>22</sup> Á ajjan tán yù babay nga taga Kenan, nga minay kâ Apu Kesu. Á inikatol na nga kinagi kâ Apu Kesu, “Ikállà maké, Apu, sikaw nga Ginaká ni Patul Dabid, ta narigirigá yù aná ku nga babay, nga nagunagán na anitu!” kun nayù babay.

<sup>23</sup> Ngam ari bulubugá simibbák si Apu Kesu. Á nakkallakalli yù babay nga jimináddán nira. Á yáyù nga jimmiki kâ Apu Kesu yù ira sinudduán na nga makikomá kuna, á kinagi ra, “Apu, papanáwam mu bì yù babay,” kud da kuna.

<sup>24</sup> Á gapu ta ari Kudio yù babay nga makkiddaw kâ Apu Kesu, kinagi ni Apu Kesu, “Jinok nangà nayù Yámà, tapè ek ku tudduán yù ira ginaká ni Israel, nga meyárik ta nagawáwan nga karneru.”

<sup>25</sup> Á pakkagi ni Apu Kesu karanniaw, namalittúkak yù babay sù arubáng na, á kinagi na, “Apu, abbágám mà bì,” kun na.

<sup>26</sup> Á simibbák si Apu Kesu, á kinagi na kuna, “Ari mepángngà nga mepamakán sù ítu yù mepamakán nakuan sù abbing.” Yáyù kinagi ni Apu, gapu ta ari Kudio yù babay nga makikomá kuna, á meyárik yù ira ari Kudio ta itu, nga ari mesipà sù ira Kudio, nga tatole ni Namarò.

<sup>27</sup> Á simibbák yù babay, á kinagi na, “Wan, Apu. Ngam yù ira ítu, kanad da yù buttá nga naggapu ta lamesá nayù yápu ra,” kun nayù babay kuna.

<sup>28</sup> Á kinagi na laguk ni Apu Kesu sù babay, “Tíyá, mapalurò laguk yù ikáyâ mu megapu sù napasigaggá nga ángngikatalà mu nikán.” Á dagarágá nga nammapiá yù aná nayù babay.

*Yù Pammapiá ni Apu Kesu sù Aru nga Tatolay*

<sup>29</sup> Á nánaw si Apu Kesu tán, nga nappatalay. Á nattalebák ta aggik na bebay na Galilia, á giminon sù puddul, á nagitubang tán.

<sup>30</sup> Á jimináddán kuna yù kitáru nga tatolay nga mangiyángay sù ira pilay, pukul ánnna nagappul, buling, umal, ánnna aru paga nga máttakì, nga inipe ra ta arubáng na. Á pinammapiá na ira ngámin.

<sup>31</sup> Á napállà yù ira tatolay ta pakasingad da ta nammapiángin ngámin yù ira máttakì nga mepulù nira, ta naginná ra nga makobobugin yù ira umal, á nasingad da yù ira pukul ánnna nagappul nga eggá ngin yù limá ra ánnna takki ra, ánnna makalakák yù ira pilay, ánnna makasinganin yù ira buling. Á jinaráyo ra si Namarò, nga pakimorayán nayù ira ginaká ni Israel.

*Yù Pammakán ni Apu Kesu ta Appátaribu nga Lálláki*

*Markus 8:1-10*

<sup>32</sup> Á gapu ta nabayák ira ta kakáddapán nga aranni ta bebay na Galilia, inagálán ni Apu Kesu yù ira sinudduán na nga umay kuna. Á kinagi na nira, “Nakalò yù allà ku sawe ira tatolay, ta tallu nga ággaw iren saw giák ku, á awánin ta kanad da. Á arák ku ikáyâ nga palabbetan ira, nga gibisibisinán, maraké makkakápi ira ánnna magaliwawwang nga matombá ta pallakák da ta dálan,” kun na.

<sup>33</sup> Á kinagi nayù ira sinudduán na kuna, “Sisaw yù pangápát tam ta ipamakát tam sawe ira kitáru nga tatolay saw kalállamatán?” kud da.

<sup>34</sup> Á kinagi ni Apu Kesu nira, “Pígíá bullung nga pán yù ajjan nikayu?” kun na. “Pitu bullung nga pán, ánnna ajjan baddì nga sirá gapay,” kud da kuna.

<sup>35</sup> Á yáyù nga pinagitubang na laguk ni Apu Kesu yù ira tatolay ta dabbun.

<sup>36</sup> Á iná na yù pitu bullung nga pán ánnna yù ira sirá. Á kabalin na nabbalabálà kâ Namarò, giddigidduá na ira, á iniyawá na sù ira sinudduán na. Á inisinek da sù ira tatolay.

<sup>37</sup> Á kininán ira ngámin áddè ta kabattuk da. Á pitu nga darakal nga lappi yù napannu sù buná ra, nga inunnuk nayù ira sinudduán na.

<sup>38</sup> Á appátaribu nga lálláki yù kiminán, áンna yù ira bábbay áンna ábbing paga.

<sup>39</sup> Á ta kabalid da kiminán nayù ira magaru, pinalabbè ni Apu Kesu ira ta giád da. Á nánaw gapay di Apu Kesu nga nattakay ta barangay, á minay ira ta lugár na Magadan.

## 16

*Kiddawan nayù ira Parisio yù Panákkilalád da*

*Markus 8:11-13; Lukas 12:54-56*

<sup>1</sup> Á minay kâ Apu Kesu yù ira Parisio áンna yù ira Sadusio gapay, ta nattatádday ira nga magalek sù awayyá ra nga manukuk kuna. Á yáyù nga kinagi ra kuna ta ipasingan na nira yù pamagaddátu na, nga panákkilalád da ta kuruk nga aijan kuna yù pakáwayyá na naga gapay kâ Namarò ta lángì.

<sup>2</sup> Á simibbák si Apu Kesu nira nga kun na, “Á ta lammak na bilák, nu masingan naw ta ujjojjin yù lángì, ammu naw ta mapiá támma yù tiempu sangaw nu ummá.

<sup>3</sup> Á ta alippánnawák nu masingan naw ta ujjojjin áンna maribbà yù lángì, ammu naw ta magurán onu mabbaggiú sangaw támma. Ammu naw manákkilála ta tiempu megapu sù lángì, ngam arán naw mánnámmuán yù kebalinán nayù panákkilalán ni Namarò nga mesimmu ta kágággaw!

<sup>4</sup> Anni ngillá kinarákè nayù ira tatolay karanniaw nga ággaw, nga awán ta ángnguruk da kâ Namarò! Alek kayu lâ alek ta panákkilalán nga makapállá, ngam awán ta mepasingan nikayu, nu ari galá yù kunnay sù napagaddátu nga nesimmu ngaw kâ Jona,”\* kun ni Apu Kesu nira. Á nánawán na ira.

*Pagimuguran ni Apu Kesu yù ira Sinudduán na*

*Markus 8:14-21*

<sup>5</sup> Á pakarákì di Apu Kesu ta dammáng na bebay, nanonò nayù ira sinudduán na ta náttamád da yù nabálun ta pán.

<sup>6</sup> Á kinagi ni Apu Kesu nira, “Magimuguk kayu áンna mappalán sù áppalappák ta pán nayù ira Parisio áンna Sadusio,” kun na nira.

<sup>7</sup> Á arád da kánnámmuán yù kinagi na nira. Á yáyù nga nakkaká-ubobuk ira sù kinagi na nira, “Yawe kinagi na nittam támma gapu ta awán ittam ta pán,” kud da.

<sup>8</sup> Á ammu ni Apu Kesu ta arád da nánnámmuán yù kebalinán nayù kinagi na, á yáyù nga kinagi na, “Aro, baddì garè yù ángngikatalà naw! Anni má ta ubu-ubobugan naw yù káwán na bálun naw nga pán?

<sup>9</sup> Arán naw paga kánnámmuán? Arán naw panò manonò yù límá bullung nga pán nga nepakán sù ira límáribu nga lálláki, áンna pígiá nga lappi yù nonnuk naw nga buná ra?

<sup>10</sup> Onu yù pitu nga bullung nga pán nga nepakán sù ira appátaribu nga lálláki, áンna pígiá lappi nga buná ra yù nonnuk naw gapay tán?

<sup>11</sup> Ngattá, ta arán naw paga kánnámmuán ta ari meyannung ta pán yù ubobugak ku nikayu? Mappalán kayu sù áppalappák ta pán nayù ira Parisio áンna Sadusio!” kun na.

<sup>12</sup> Á yáyù nga nánnámmuád da laguk ta ari gemma meyannung ta pán yù kinagi na nga palánad da, nu ari galá yù ituddu nayù ira Parisio áンna Sadusio.

*Matákkilalán ni Eduru yù Mangiyigù nga Mammaguray*

*Markus 8:27-30; Lukas 9:18-21*

<sup>13</sup> Á minay laguk di Apu Kesu áンna yù ira sinudduán na ta lugár nga aranni sù ili na Sesaria Pilippi. Á keggá ra tán, nakiubobuk si Apu Kesu sù ira sinudduán na, á iniyabbú na nira, “Anni, kanu, yù kagian na tatolay nga meyannung nikán? Sikán nga Kaká na ngámin nga tatolay, asinningá, kanu?” kun na.

<sup>14</sup> Á initabbák da kuna, “Ajjan yù ira makkagi ta sikaw kanu si Kuan nga Minánnigu,” kud da. “Á yù ira káruán kanu, kagiad da ta sikaw si Elias, nga yù ngaw ábbilinán ni Namarò. Á aijan paga yù ira nga makkagi ta sikaw kanu si Jeremia onu tádday sù ira ngaw ábbilinán ni Namaro,” kud da kuna.

<sup>15</sup> Á kinagi ni Apu Kesu nira, “Á sikayu. Asinningá ta ánninanaw?” kun na.

<sup>16</sup> Á simibbák si Simon Eduru, á kinagi na, “Sikaw si Kiristu, nga Aná nayù sigga-inángá nga Namarò, nga sinullá na nga umay mammaguray ta dabbuno,” kun na.

<sup>17</sup> Á kinagi na laguk ni Apu Kesu kuna, “Napiá yù ággiam mu, Simon, nga aná ni Jona! Ta ari tolay yù nangipakánnámmu nikaw sawe nga kinagim, nu ari galá yù Yámà nga aijan ta lángì.

<sup>18</sup> Á yáyù nga kagiak ku nikaw, ta ingágat taka laguk ta Eduru, nga batu yù kebalinán na, gapu ta kun na batu nga maláddá yù kinagim nga meyannung nikán, nga pangikatalakán nayù ira ngámin nga metáddy nikán. Á aggira nga metáddy nikán, meyárik ira ta kapilliá nga patáddagak ku. Á gapu ta pangikatalà da nikán, awán bulubugá ta makáppù nira, mássiki nu si Satanas ánná yù ira girakaráketán nga tumuttul kuna.

<sup>19</sup> Á ikatalà ku nikaw yù pakáwayyám nga mangilayalayá ta meyannung sù pammagure ni Namarò, nga kun na ánnúsi nga mangibuká sù pammagurayán na ta lángi. Á yù ngámin nga ipugik mu nga mangnguá sawe dabbuno, yáyù gapay mepugik ta lángi. Á ta kunnian gapay, ngámin yù anugutam mu nga mangnguá sawe dabbuno, yáyù gapay meyanugù ta lángi,” kun ni Apu.

<sup>20</sup> Á kabalín na nakkagi kâ Eduru karanniaw, pinappalán na laguk yù ira sinudduán na ta arád da ipárámak ta aggina si Kiristu nga Mammaguray nga sinullà ni Namarò.

*Ipalappâ ni Apu Kesu yù Duttál sangaw nga Jigâ na ánná Pate na  
Markus 8:31-33; Lukas 9:22*

<sup>21</sup> Á áddè tán nga ággaw, pinegapuanán ni Apu Kesu nga ipakánnámmu sù ira sinudduán na yù mesimmuán na sangaw. Á kinagi na nira, “Máwák nga umayà ta Jerusalem, tapè attamák ku yù panigirigâ da nikán nayù ira giriámán ánná yù ira kátannangán nga pári ánná yù ira mesturu nga mangituddu sù tunung. Á ipapáte rangà sangaw, ngam paginnanóloyan nangà ni Namarò sangaw nu mekatallu nga ággaw,” kun na.

<sup>22</sup> Á pakaginná ni Eduru sù kinagi ni Apu Kesu, inillili na, á kinagi na kuna, “Apu, pare bì ta ililli naka ni Namarò, tapè ari bulubugá mesimmu nikaw danniaw nga kinagim!” kun na.

<sup>23</sup> Ngam inarubáng ni Apu Kesu si Eduru ánná kinagi na kuna, “Arayyuám mà, ta iniyubobuk mu nikán yù ubobuk ni Satanas. Arám mà igaggak, ta tuppálak ku yù ipakuá ni Namarò nikán. Á ari naggapu kâ Namarò yù ánonnò mu, nu ari galâ negagángay nga ánonnónò na tolay,” kun na.

*Taddánán ni Apu Kesu yù ira Tumuttuttul kuna  
Markus 8:34-9:1; Lukas 9:23-27*

<sup>24</sup> Á kabalín na nakiubobuk kâ Eduru, kinagi ni Apu Kesu sù ira ngámin nga sinudduán na, “Yù tolay nga máyâ nga metáddy nikán, máwák na nga tumulù nikán. Áyaw lâ tuppálán na yù ipakuá kuna galâ, nga ari yù ikáyâ na, mássiki nu máwák nga attamán na lâ yù jígâ onu yù pate na megapu sù panguruk na nikán. Á ta kunnian iyabága na yù kurù na ánná tuttulan nangà.

<sup>25</sup> Ta yù tolay nga mangengá sù áaggián na, matay sangaw, á kengá lâ yù inángà na, gapu ta mesinná yù tolay kâ Namarò ta áddè ta áddè. Ngam yù tolay nga ari mangengá sù áaggián na, mássiki nu matay megapu sù panguruk na nikán, aijan kuna yù mannanáyun nga inángà, gapu ta mesipâ kâ Namarò ta áddè ta áddè.

<sup>26</sup> Á napiá panò yù áaggián na tolay, nu málâ na ngámin yù eggá ta dabbuno, ngam awán ta ákkiyápu na kâ Namarò? Ari gemma napiá, tanu awán ta ákkiyáma na kâ Namarò, mesinná kuna. Aijan panò yù awayyá na nga mappagá sù mannanáyun nga inángà? Awán gemma.

<sup>27</sup> Á duttál sangaw yù ággaw na panoli ta dabbuno, sikán, nga Kaká na ngámin na tatolay, nga maddalingárang ta karáyo nayù Yámà ánná áddalingárang na. Á mepulù nikán yù ira darobak ku. Á bálatak ku yù ngámin ira nga tatolay nga katágítáddy ta meyannung galâ sù kingngikingnguá na.

<sup>28</sup> Á kukurugán nga kuruk yù kagiak ku nikayu. Aijan ira saw nikayu nga ari sangaw paga matay áddè ta arád dangà masingan nga umay mammaguray sù ira tatolè, sikán nga Kaká na ngámin na tatolay,” kun ni Apu Kesu.

## 17

*Nanguli yù Baggi ni Apu Kesu  
Markus 9:2-13; Lukas 9:28-36*

<sup>1</sup> Á pappasá na annam nga ággaw, á inipulù ni Apu Kesu di Eduru ánná yù ira duá nga mawwagi, di Ime kâ Kuan. Á aggira lâ yù giminon sù puddul.

<sup>2</sup> Á labbè da ta utun na puddul, nanguli yù baggi ni Apu Kesu sù pakkaká-arubáng da, nga naddalingárang nga kunnay ta bilák. Á nerallà yù kapuro na barawásí na, nga makatulang nga kunnay ta pattangngá na ággaw.

<sup>3</sup> Á ikáddagâ lâ limittuák nira di Moyses kâ Elias, nga yù ira ngaw ábbilinán ni Namarò, nga makiubobuk kâ Apu Kesu.

<sup>4</sup> Á yáyù nga kinagi ni Eduru kâ Apu Kesu, “Apu, napiá ta ajjan ittam saw. Á nu ikáyâ mu, ipappadde takayu laguk ta tallu nga amíngán, nga ággítadde naw, sikayu kári Moyses kâ Elias,” kun na.

<sup>5</sup> Á ta pagubobuk na lâ paga ni Eduru, nalepuanán ira ta kunam nga makatulang. Á naginná ra yù ngárál nga naggapu sù kunam, á kinagi na, “Yawe yù Anâ ku nga iddukak ku. Á kuruk nga ayatána kuna. Magginná kayu laguk sù kagian na,” kun nayù ngárál.

<sup>6</sup> Á pakaginná nayù ira sinudduán ni Apu Kesu sù ngárál, napállâ ira. Á nallakak ira ta dabbun, gapu ta nerallà yù assing da.

<sup>7</sup> Á mináramni si Apu Kesu nira, á siniggek na ira, á kinagi na, “Gumikkáng kayu. Ari kayu maganássing” kun na nira.

<sup>8</sup> Á panánguk da kuna, awát ta tanakuán nga nasingad da nu ari lâ si Apu Kesu.

<sup>9</sup> Á minutù di Apu Kesu ta puddul. Á utù da, sinaddánán na ira ni Apu Kesu ta napiá, “Arán naw ubobugan yù nasingan naw ta puddul áddè ta aringà maginnanolay, sikán nga Kaká na ngámin na tatolay,” kun na.

<sup>10</sup> Á iniyabbû da kuna, “Á ngattá laguk, ta kagian nayù ira mangituddu sù tunung ta máwák nga mapolu bì nga duttál si Elias lage nayù Kiristu nga mammaguray?”\* kud da.

<sup>11</sup> Á initabbák ni Apu Kesu, “Wan, kuruk yian, ta mapolu nga umay si Elias, tapè paránan na ngámin.

<sup>12</sup> Á kuruk yawe nga kagiak ku nikayu. Minay ngin si Elias, ngam arád da garé natákkilalán. Á kingnguá ra lâ kuna yù inikákáyâ da. Á kunnian gapay sangaw yù akkuád da nikán, nga Kaká na ngámin na tatolay,” kun ni Apu Kesu nira.

<sup>13</sup> Á yáyù nga nánnámuún nayù ira sinudduán na ta si Kuan nga Minánnigù yù ubobugan na nira.

#### *Yù Pamapáno ni Apu Kesu ta Anitu sù Abbing nga Minábballiák*

<sup>14</sup> Á utù di Apu Kesu, ajjan yù magaru nga tatolay nga jíminápun nira. Á jimikkì kâ Apu Kesu yù táddy, nga namalittúkak ta arubáng na. Á nakimállâ kuna, á kinagi na,

<sup>15</sup> “Apu, ikállâ mu bì yù anâ ku nga laláki, ta minábballiák, á nepallâ yù jígâ na, ta sigídá mapannâ ta api onu danu.

<sup>16</sup> Á iniyángé sù ira sinudduám mu, ngam arád da mapammapiá,” kun na.

<sup>17</sup> Á simibbák si Apu Kesu, á kinagi na, “Aro! Anni yù katatole naw nga kitáttaggâ nonò naw! Ngattá, ta awán paga ta ángngikatalà naw kâ Namarò? Pígiá nga ággaw paga yù paggiák ku nikayu? Kunnasi panò yù ággiyattam ku nikayu áddè ta arán nawà ikatalà? Iyángé naw bi saw nikán yù abbing,” kun na.

<sup>18</sup> Á iniyángé ra yù abbing sù gián na. Á gimmá ni Apu Kesu yù nattaliponak, á nallawán sù abbing. Á dagarágâ nga nammapiá yù abbing.

<sup>19</sup> Á kabalín na yaw, nu awánin yù ira kárúan nga tatolay, minay lâ kâ Apu Kesu yù ira sinudduán na, á iniyabbû da kuna, “Á anni má ta arám mi mapalawán yù anitu?” kud da kuna.

<sup>20</sup> Á kinagi na nira, “Baddì lâ garé yù ángngikatalà naw kâ Namarò. Á kuruk yawe nga kagiak ku nikayu. Nu ajjan nakuan yù ángngikatalà naw nga kun na karakal na kabadditán nga bukal, makáwayyá kayu nga makkgagi ta magali yawe puddul, á magalì. Ta awán bulubugá ta arán naw makuá nu mangikatalà kayu kâ Namarò,” kun ni Apu Kesu.

<sup>21</sup> Ngam yù anitu nga kunnian, nu ikáyâ naw mapalawán, máwák nga ari kayu bi kumán, tapè tángngagan naw lâ yù pakimi-imállâ naw kâ Namarò.

#### *Piddúu ni Apu Kesu nga Kagian yù Pate na*

*Markus 9:30-32; Lukas 9:43b-45*

<sup>22</sup> Á ta keggá di Apu Kesu ánná yù ira sinudduán na ta Galilia, kinagi na nira, “Sangaw nu manganánnuán, gaputad dangà, á iyawâ dangà sù ira tatolay nga malussaw nikán.

<sup>23</sup> Á papatáyad dangà. Á nu mappásá yù tallu nga ággaw, maginnanolayà,” kun na. Á ta pakaginná nayù ira sinudduán na ta papatáyad da, nakalò yù daddam da.

#### *Mabbuwi di Apu Kesu sù ira Mattuki ta Bale ni Namarò*

<sup>24</sup> Á labbè di Apu Kesu ánná yù ira sinudduán na ta ili na Kapernium, jimikkì kâ Eduru yù ira mináttuki ta buwi sù bale ni Namarò. Á iniyabbû da kuna, “Mappagá panò yù mesturu naw sù buwi nayù mangilin nga kapilliá?” kud da.

\* 17:10 Malakia 4:5

<sup>25</sup> “Wanay,” kun ni Eduru nira. Á simillung laguk si Eduru sù balay nga pagginán ni Apu Kesu. Á tallung ni Eduru ta balay, lage na nagubobuk, kinagi ni Apu Kesu kuna, “Anni yù kagiam mu, Simon? Asinni yù ira mappagá ta buwì onu seddulá sù ira patul nga mammaguray ta dabbuno? Mabbuwì panò yù ira pamiliá ra? Onu yù ira káruán nga tatolay?” kun na kâ Eduru.

<sup>26</sup> Á kinagi ni Eduru, “Yù ira káruán nga tatolay,” kun na. “Wan,” kun ni Apu. “Á yáyù nga sittam nga pamiliá ni Namarò, arát tam máwák yù mappagá ta buwì sù bale na.

<sup>27</sup> Ngam arát tam akkuán yù ipappore ra. E ka laguk ta bebay nga mamannui. Á yù olu nga sirá nga málá mu, á ungingátam mu yù simù na, á masingam mu yù kuártu. Apam mu, ta makatò ta pabbuwì na duá. Á em mu laguk ipappagá ta buwì ta,” kun ni Apu kâ Eduru.

## 18

*Yù Ituddu ni Apu Kesu nga Meyannung sù Ággíán nayù Makáwayyá*

*Markus 9:33-37; Lukas 9:46-48*

<sup>1</sup> Á sangaw nu manganánnuán, minay kâ Apu Kesu yù ira sinudduán na, á iniyabbû da kuna, “Apu, asinni nikami yù kátannangán sù pammagurayán ni Namarò ta lángi?” kud da kuna.

<sup>2</sup> Á inagálán na laguk ni Apu Kesu yù baddì nga abbing, nga inipe na ta tangngá ra.

<sup>3</sup> Á kinagi na nira, “Innan naw yawe abbing. Kuruk yù kagiak ku nikayu, ari kayu bulubugá mesipà sù pammagurayán ni Namarò ta lángi nu aráu naw ulian yù nonò naw ta kunnay ta nonó na yawe abbing nga tumulù.

<sup>4</sup> Ta yù tolay nga tumulù ta kunnay sawe abbing, aggina yù kátannangán sù pammagurayán ni Namarò ta lángi.

<sup>5</sup> Á yù tolay nga manguruk nikán, nu iddukan na yù kunniaw nga abbing megapu sù panguruk na nikáin, sikán gapay yù iddukan na,” kun ni Apu.

*Yù Mesimmu sù Tolay nga Mangirudduák ta Malliwâ yù Kabbulun na*

*Markus 9:42-48; Lukas 17:1-2*

<sup>6</sup> Á nagubobuk paga si Apu Kesu, á kinagi na, “Yù tolay nga manudduák nga mamalliwâ sù tádday nga kunniauw nga abbing nga mangikatalà nikán, napiá nakuan nu gakkakád da ta batu nga ággilingán, á ed da itabbà ta bebay, tapè malaggabán nga ari maketuddu ta narákè sù ira ábbing.

<sup>7</sup> Á nakállállà yù ira tatolay ta dabbuno, ta aru yù ira mangituddu ta narákè, tapè makalíwâ yù ira kábulud da. Á negagángay gemma nga aijan yù ira manudduák sù ira kábulud da ta malliwâ ira. Ngam kábbi yù tolay nga mamalliwâ sù ira kábulun na, gapu ta narámmà sangaw yù pamagikáru ni Namarò kuna.

<sup>8</sup> Á ta ángngarigán nu yù limá naw onu takki naw yù paggapuán nayù pakaliwatán naw, á más napiá nu gappulan naw nakuan ánná itabbà naw, tapè arán naw mapiddúan yù malliwâ. Ta mássiki nu nagappul yù limá naw onu takki naw, á napiá lá nu mesipà kayu kâ Namarò sù pagginán na ta lángi, ánné sù keggá na duá nga limá naw onu duá nga takki naw, ngam metabbà kayu sangaw ta impiernu gapu ta arán naw likuránán yù liwâ naw.

<sup>9</sup> Á ta ángngarigán nu yù matá naw yù paggapuán nayù pakaliwatán naw, mabbabáwi kayu laguk, ánná arán naw pidduán yù malliwâ. Ta mássiki nu baddulan naw nakuan yù matá naw ánná itabbà naw, napiá lá nu táttádday lá yù matá naw, ánná mesipà kayu kâ Namarò ta lángi, ánné sù keggá na duá nga matá naw, nga ketabbatán naw sangaw ta impiernu.

*Yù Ángngarigán nga Meyannung sù Karneru nga Náwáwán*

*Lukas 15:3-7*

<sup>10</sup> “Magimuguk kayu laguk, tapè arán naw uyawan yù ira ábbing. Ta aijan yù ira daroban ni Namarò nga maggián ta lángi ta arubáng nayù Yámà, nga manaron sù ira ábbing nga katágítáddy.

<sup>11</sup> Á yáyù nga minayà sawe dabbuno, sikán nga Kaká na ngámin na tatolay, tapè iyígù ku yù ira tatolay nga náwáwán.

<sup>12</sup> Á anni laguk ta ure naw? Ta ángngarigán anni akkuán nayù tolay nga aijan magatù nga karneru na, nu náwáwán yù tádday níra? Arán na panò panawán yù ira siámapulu ta siám, nga magárák sù garek na puddul, tapè en na aleran yù tádday nga náwáwán? Wan, gemma.

<sup>13</sup> Á kuruk yù kagiak ku nikayu, ta sangaw nu náleránin, magayáyâ yù tolay megapu sù tádday, ánné sù ira siámapulu ta siám nga ari náwáwán.

<sup>14</sup> Á nu arán na ikáyâ na tolay ta máwwán yù ayám na, mássiki nu tádday lâ, á nepatalugáring kâ Yáma naw ta lángì. Ta arán na ikáyâ ta mesinná kuna yù mássiki lâ tádday sù ira ábbing.

*Nu Ajjan yù Kábulum mu nga Makaliwâ nikaw*

<sup>15</sup> “Á sikayu nga katággítáddy, nu ángngarigán ta makaliwâ nikaw yù kabbulum mu nga manguruk nikán, umay ka sù gián na, á sangaw nu dudduruá kayu lâ, kagiam mu kuna yù liwâ na. Á nu ginnán na yù kagiam mu, mapiángin yù áwwagi naw.

<sup>16</sup> Ngam nu arán na ka ginnán, á ipulù mu yù tádday onu duá nga kábulum mu, á pidduám mu umay makiubobuk kuna, tapè matuppál yù tunung nga netûrâ, nga máwák na yù duá onu tallu nga massistígu ta kuruk ngámin yù kagian naw.

<sup>17</sup> Á nu arán na ira ginnán gapay, kagiam mu sù ira ngámin nga kábulum mu nga manguruk nga nepattatáddy ta paggagammungán naw. Á nu panakitán na yù kagian nayù ira ngámin nga kábulum mu nga manguruk, ibilâng naw yian ta kunnay sù ira ari manguruk kâ Namarò ánnna yù ira kagittá na mináttuki ta buwi, nga mangilogò.

*Yù Pakáwayyá naw nga Makkagi ta Mepugik ánnna Meyanugù*

<sup>18</sup> “Á kuruk yaw nga kagiak ku nikayu, ta magamaguray lâ yù kagian naw nga mepugik nga akkuán na tolay ta dabbuno, yáyù gapay mepugik ta lángì. Á magamaguray lâ yù anugutan naw nga akkuán na tolay ta dabbuno, yáyù gapay meyanugù ta lángì.

<sup>19</sup> Á ajjan paga yù kagiak ku nikayu, ta nu ajjan duá nikayu nga metáddy ta nonò da nga meyannung sù ipakimállà da kâ Namarò, yáyù palurotan na sangaw nayù Yáma ta lángì megapu nira.

<sup>20</sup> Ta nu ajjan mássiki dudduruá lâ onu tallu nga maggagammung megapu sù pakiyápu ra nikán, ajjanà gapay ta tangngá ra.”

*Yù Mesimmu sù Tolay nga Manakì Mamakomá sù Kabbulun na*

<sup>21</sup> Á minay laguk si Eduru kâ Apu Kesu, á iniyabbû na, “Apu, ta ángngarigán, nu ajjan yù kabbuluk ku nga makaliwâ nikán, mamepígíá panò yù pamakomâ kuna? Mameppitu panò?” kun ni Eduru.

<sup>22</sup> Á simílbák si Apu Kesu, á kinagi na, “Ari lâ mameppitu yù pamakomám kuna, ngam mássiki mamepígíá yù pakaliwâ na nikaw, kunnian gapay yù pamakomám kuna,” kun ni Apu Kesu.

<sup>23</sup> Á yáyù nga nagángngarigán si Apu Kesu, á kinagi na, “Á kunniauw laguk yù keyarigán nayù pammagure ni Namarò ta lángì. Ajjan yù patul nga ikáyâ na pasikkálan yù nelistá nga gatù nayù ira tatole na.

<sup>24</sup> Á pamegapu na nga mattuki sù pagatù na, iniyánge ra ta arubáng na yù táddy nga jinibù yù gatù na.

<sup>25</sup> Á gapu ta awán bulubugá ta awayyá na nga mappagá, ipeláku nayù patul laguk ánnna yù atáwa na konsu yù ira ánâ na, ánnna yù ngámin nga kukuá ra, tapè mapagán yù gatù na.

<sup>26</sup> Á dagarágâ nga namalittúkak yù tolay ta arubáng nayù yápu na nga patul, nga nakimi-imállà kuna, ‘Apu, ikállà mà, á pagák ku sangaw ngámin yù gatù ku nikaw,’ kun na.

<sup>27</sup> Á nakalò yù allà nayù patul sù tole na, á pinakomá na ngámin yù gatù na, á pinalubbáng na yù tolay. Á pinapáno na, tapè lubbekin ta bale na.

<sup>28</sup> “Á ta páno nayù tolay sù bale nayù patul, nerapunán na yù kabbulun na nga nakagatù kuna ta baddì lâ. Nakúráng ta magatù yù gatù na kuna. Á ginápù na ánnna piddal na. ‘Pagám mu yù gatù mu nikán!’ kun na kuna.

<sup>29</sup> Á dagarágâ nga namalittúkak yù kabbulun na ta arubáng na nga nakicomá kuna, ‘Ikállà mà, ta pagák ku sangaw ngámin yù gatù ku nikaw,’ kun na kuna.

<sup>30</sup> Ngam nanakì, á en na laguk inipepukù áddè ta pakapagá na sù gatù na.

<sup>31</sup> “Á pakasingan nayù ira kábulum na sù kingnguá nayù tolay nga napakomá nen nayù patul ta gatù na, nerallà yù daddam da. Á ed da iniránu kù yápu ra.

<sup>32</sup> Á inipágál nayù patul yù tolay, á kinagi na kuna, ‘Anni yù narámak ku nga kingnguám! Anni ngillâ kinaráké mu! Pinakomá tako sù ngámin nga gatù mu nikán gapu ta nakimállà ka nikán.

<sup>33</sup> Ari panò napiá nu ikállà mu gapay nakuan yù kabbulum mu, nga kunnay sù pangikállà ku nikaw?’ kun nayù patul sù tolay.

<sup>34</sup> Á kitaporay yù patul, á inipebáluk na, tapè jigirigátad da áddè ta mapagán na ngámin yù gatù na.

35 “Á kunnian gapay sangaw yù akkuán ni Ammò ku ta lángì sù katággítáddyay nikayu nga ari mamakomá sù kabbulun na nga nakaliwâ kuna,” kun na.

## 19

*Yù Pangituddu ni Apu Kesu nga Meyannung sù Paggúnge nayù ira Magatáwa  
Markus 10:1-12; Lukas 16:18*

1 Á kabalín na nagubobuk ni Apu Kesu karanniaw, nánaw ta purubinsia na Galilia, nga minay sù lugár na Judiya ta dammáng na danum na Jordan.

2 Á jimináddán kuna yù ira magaru nga tatolay. Á pinammapiá ni Apu Kesu ngámin yù ira mättaki tán nga lugár.

3 Á jiminikki kâ Apu Kesu yù ira Parisio nga makiubobuk kuna, ta ikáyâ da nakuan nga tukubán nu kunnasi yù itabbák na sù iyabbû da. “Máyâ panò sù tunung na rilisiot tam nu igúnge na laláki yù atáwa na, maguray lâ yù kegapuánán na?” kud da kuna.

4 Á simibbák si Apu Kesu, á kinagi na, “Arán naw panò binibbik yù netúrâ sù dán nga libru, ta pinarò ni Namarò yù tolay nga laláki ánnna babay sù ngaw o-olu nga ággaw?

5 Á kinagi ni Namarò, “Yáyù gapu na nga panawán na laláki yù ira darakal na, tapè metádday sù atáwa na. Á mabbáli yù ira magatáwa nga kunnay ta táttaáddyay lâ yù baggi ra.”\*

6 Á gapu ta ari iren duá, nu ari lâ nga táttaáddyay, yáyù nga ari mánugù nga passinnán na tolay yù ira nga pinattádde ni Namarò,” kun ni Apu Kesu.

7 Á pakaginná nayù ira Parisio sù kinagi na, iniyabbû da laguk, “Á ngattá, ta initúrá ni Kákay Moyses yù tunung nga makkagi ta aijan yù awayyá na laláki nga igúngay yù atáwa na nu iyawâ na yù permá na nga pakasinganán ta paggúnge ra, lage na papanáwan yù atáwa na?” kud da.

8 Á kinagi ni Apu Kesu nira, “Nataggâ garè yù ulu naw, á yáyù nga inanugù ni Moyses ta igúnge naw yù atáwa naw. Ngam ari nga kunnian áddè ngaw sù ngaw o-olu nga ággaw.

9 Á yawe laguk yù kagiak ku nikayu. Yù tolay nga mangigúngay ta atáwa na, mássiki nu ari nga nakikarallaw yù babay, á nu mangatáwa yù laláki sangaw ta tanakuán nga babay, makaliwâ, ta mebiláng ta manganallaw,” kun ni Apu.

10 Á pakaginná nayù ira sinudduán ni Apu Kesu sawe nga kinagi na sù ira Parisio, kinagi ra kuna, “Á nu kunnian yù áaggián nayù magatáwa, napiángin lállaguk nu awán ta mangatáwa,” kud da.

11 Á simibbák si Apu Kesu, á kinagi na, “Arán na ngámin ira mágalán ni Namarò nga manuppál sawe netuddu, nu ari galâ yù ira pinassikan ni Namarò.

12 Ta nakkakerumá yù gapu na nga ari mangatáwa yù ira lálláki. Aijan yù ira nga nakeyanatád da yù ari mangatáwa. Á aijan yù ari mangatáwa gapu ta nakapun. Á aijan gapay yù mabbaluntáriu nga ari mangatáwa tapè tángngagan na yù pangipakánnámmu na ta meyannung sù pammagure ni Namarò. Á yù makatuppál sawe ituddù, tuttulan na laguk,” kun ni Apu.

*Yù Pagayáyâ ni Apu Kesu sù ira Ábbing  
Markus 10:13-16; Lukas 18:15-17*

13 Á aijan yù ira tatolay nga nangiyángay sù ira ábbing kâ Apu Kesu, tapè támmitan na ira ánnna ipakimállâ na ira kâ Namarò. Ngam gimmá ra ira nayù ira sinudduán ni Apu.

14 Á kinagi ni Apu Kesu, “Anugutan naw ta umay nikán yù ira ábbing. Arán naw ira gammán. Ta yù ira tatolay nga tumulù, nga mangikatalà nikán ta kunnay sawe ira ábbing, aggira yù mesipâ sù pammagure ni Namarò,” kun na.

15 Á inipotun na laguk yù limá na nira. Á kabalín na nanangngal nira, á nánawin.

*Yù Tolay nga Maríku*

16 Á aijan yù tolay nga minay kâ Apu Kesu, á kinagi na kâ Apu, “Mesturu, anni laguk yù napiá nga akkuák ku nakuan, tapè mepattolayà nga mesipâ kâ Namarò ta áddè ta áddé?” kun na.

17 Á simibbák si Apu Kesu, á kinagi na, “Ngattá, ta iyabbû mu nikán yù meyannung sù napiá? Si Namarò yù napiá, nga táttaáddyay lâ. Á nu ikáyâ mu nga mepattolay nga mesipâ kâ Namarò ta áddè ta áddé, kurugam mu yù ngámin nga tunung ni Namarò,” kun na.

18 “Á anni nga tunung?” kun nayù tolay kâ Apu. Initabbák ni Apu Kesu, “Ari ka mamapátay. Ari ka manganallaw. Ari ka makkokò. Ári ka malladduk nga massistigu.

\* 19:5 Genesis 1:27; 2:24

<sup>19</sup> Makimoray ka sù ira darakal mu, á iddukam mu yù ira kábulum mu ta kunnay ta pangiddú mu sù baggim,”<sup>†</sup> kun ni Apu.

<sup>20</sup> Á kinagi nayù tolay kuna, “Kurugak ku ngámin dannian. Á anni paga yù máwák ku nga akkuán?” kun na.

<sup>21</sup> Á kinagi na laguk ni Apu Kesu, “Nu ikáyâ mu nga palurotan yù kukurugán nga napiá, em mu iláku ngámin yù kukuám, á isinek mu yù pallakuám mu sù ira pobare nga marigirigâ, tapè ajjan yù tagikuám mu ánná yù napiá nga paggianám mu ta lángi. Á umay ka laguk mepulù nikán,” kun na.

<sup>22</sup> Á pakaginná nayù tolay sù kinagi ni Apu Kesu, nánaw nga nepallà yù daddam na, gapu ta aru yù kukuá na.

<sup>23</sup> Á pakasingen ni Apu Kesu sù páno nayù maríku, kinagi na sù ira sinudduán na, “Kuruk yù kagiak ku nikayu, ta marigâ garè nga tumulù yù mariku kâ Namarò tapè mesipà nakuan su pammagurayán ni Namarò.

<sup>24</sup> Á ta ángngarigán, yù kamel. Más malogon yù állabbû na kamel sù abbû na dágum, ánnè ta tumulù yù tolay nga maríku kâ Namarò, tapè mesipà sù pammagure na,” kun na.

<sup>25</sup> Á pakaginná nayù ira sinudduán na karannian, nepallà yù kapállâ da. Á kinagi ra, “Asinni laguk meyígú nga mesipà kâ Namarò?”

<sup>26</sup> Á iningan na ira ni Apu Kesu, á kinagi na, “Awán ta tolay nga makakuá karanniaw. Si Namarò lá yù makáwayyá ta ngámin, ta awán gemma ta áddè na pakáwayyá na,” kun na.

<sup>27</sup> Á yáyù nga nagubobuk si Eduru, á kinagi na, “Ye, sikami, nilikuránám mingin ngámin ánná siminuttul kami nikaw. Á anni laguk sangaw yù balabálâ mi?”

<sup>28</sup> Á kinagi ni Apu Kesu nira, “Kukurugán nga kuruk yù kagiak ku nikayu. Manguli si Namarò sawe dabbuno sangaw, á sikán, nga Kaká na ngámin na tatolay yù meparáyaw nga magitubang sù maddalingárang nga pagitubangán nayù patul nga mammaguray. Á sikayu nga mapulu duá nga siminuttul nikán, magitubang kayu gapay ta mapulu duá nga pagitubangán naw, nga mammaguray ánná mamanunnù sù ira ngámin nga Kudio, nga ginaká nayù ira mapulu duá nga ánná ni Israel.

<sup>29</sup> Á ngámin yù ira tatolay nga panawád da yù bale ra, onu yù wáwwagi ra, darakal da, ánná da, onu yù ákkomanád da megapu sù pangayâ da ánná panguruk da nikán, á aru yù bálâ da nga alawatad da sangaw, á meppatolay ira nga mesipà kâ Namarò ta áddè ta áddè.

<sup>30</sup> Ngam aru sù ira kátannangán kunangan, nga mapagukák sangaw. Á aru yù ira nagukák kunangan, nga kátannangán sangaw.”

## 20

### *Yù Meyannung sù Pabbalabálâ ni Namarò sù ira Tatole na*

<sup>1</sup> Á pagángngarigán ni Apu Kesu paga, kinagi na, “Á kunniae yù keyarigán nayù pammagurayán ni Namarò ta lángi. Ajjan yù tolay nga makákkua ta namulán ta úbas. Á naggammiá yù tolay nga minay magágál sù ira mangallu nga umay mattarabáku ta kobasán na.

<sup>2</sup> Á pagágál na nira, initarátu na ta táddanán na ira nga katággitádday sù negagángay ta tangággaw, á minay ira laguk nga mattarabáku sù kamulán na.

<sup>3</sup> “Á sangaw nu ággawin, minay yù tolay ta dápun, á nasingan na yù ira káruán nga lálláki nga awán ta pattarabakuád da.

<sup>4</sup> Á kinagi na nira, ‘E kayin mattarabáku gapay sù kobasák ku, ta iyawâ ku nikayu sangaw yù mepongngà nga táddán naw,’ kun na.

<sup>5</sup> Á minay ira laguk.

“Á manganánnuán, pattangngá na ággaw, minay galâ yù tolay ta dápun, á inagálán na yù ira nga ajjan tán. Á pannarek na bilák, kunnian galâ má kingnguá na, ta en na jinok yù ira nálek na ta umay ira mattarabáku.

<sup>6</sup> Á ta púgágín, minay má galâ yù tolay, á nasingan na yù ira nga lálláki paga tán, á iniyabbû na nira, ‘Ngattá, ta tangatangággaw kayu nga makiubobuk saw?’ kun na.

<sup>7</sup> Á initabbál da, ‘Awán garè ta pattarabakuám mi.’ Á kinagi na nira, ‘E kayu gapay laguk mattarabáku sù kobasák ku,’ kun na.

<sup>8</sup> “Á pajjibbâ, minay yù makákkua ta kobasán, á kinagi na sù pangikárguán na, ‘Agálám mu yù ira mangallu, á táddanám mu ira. Papoluam mu nga táddanán yù ira tatolay nga naporián, á paporianam mu nga táddanán yù ira napolu,’ kun na.

<sup>9</sup> Á ánge nayù ira mangallu nga naporíán, sináddanán na ira laguk nga katággitáddy sù negagángay ta tangággaw.

<sup>10</sup> Á ánge ra gapay nayù ira napolu, kagiad da ta malannapán támma yù táddád da. Ngam negittá galâ yù táddád da sù neyawâ sù ira naporíán.

<sup>11</sup> Á pakálawâ da sù táddád da, naddagaragim ira.

<sup>12</sup> Á kinagi ra sù makákkuá ta dabbun, ‘Ngattá, ta iniggítam yù táddád da sù táddám mi? Ta danniaw ira, táttáddy lâ nga oras yù pattyabáku ra. Ngam sikami, tangatangággaw kami nga nagiyangngá ta pátu na bilák! kud da.

<sup>13</sup> ‘Ey, kopun,’ kun nayù makákkuá sù kobasán sù tádday nira, ‘arát taka nilogò, á awán ta liwâ ku nikaw. Arát ta panò nattartuán nga táddanát taka sù mepángngá ta tangággaw?

<sup>14</sup> Apam mu laguk yawe táddám mu, á lubbè kangin ta balem. Ari panò napiá nu ikáyâ ku nga igittá yù itáddák ku sù naporíán ánná yù itáddák ku nikaw?

<sup>15</sup> Awán panò ta awayyâ nga maggástu sù kukuâ? Mamassil ka támma garè, gapu sù ángngikállâ ku!’ kun na.’

<sup>16</sup> Á inibalin na laguk nga kinagi ni Apu Kesu, ‘Á kunnian yù ággián nayù ira tatolay ta pammagurayán ni Namarò ta lángi. Ta mapolu nga mabálatán sangaw yù ira maporián nga mágalán kunangan. Á maporián nga mabálatán sangaw yù ira mapolu nga mágalán kunangan,’ kun na.

*Yù Pamillu ni Apu Kesu nga Makkagi ta Pate na Sangaw*

*Markus 10:32-34; Lukas 18:31-34*

<sup>17</sup> Á god di Apu Kesu ta ili na Jerusalem, inililli na yù ira mapulu duá nga sinudduán na sù ira kárúan nga tatolay. Á ta pallakalakák da ta dálán, nakiubobuk nira, á kinagi na,

<sup>18</sup> ‘Ginnán naw yawe kagiak ku. Guman ittam ta Jerusalem. Á labbè tam sangaw, gaputad dangà, sikán nga Kaká na ngámin na tatolay. Á ikeká rangà ta arubáng nayù ira kátannangán nga pári ánná yù ira mesturu nga mangituddu sù tunung. Á pagikaruad dangà sangaw ta patay.

<sup>19</sup> Á iyawâ dangà sangaw sù ira ari Kudio. Á uyoyungád dangà, á palapaligatad dangà. Á ipátâ dangà laguk sangaw ta kurù. Á sangaw sù mekatallu nga ággaw, maginnanolayà,’ kun ni Apu Kesu.

*Yù Kiniddo nayù Yená di Ime kâ Kuan*

*Markus 10:35-45*

<sup>20</sup> Á manganámuán, jímikkì kâ Apu Kesu yù atáwa ni Sebedo, nga nepappupulù sù ira ánná na, di Ime kâ Kuan. Á namalittúkak yù babay ta arubáng ni Apu Kesu, ta aijan yù ipakimállâ na.

<sup>21</sup> Á iniyabbû ni Apu Kesu kuna, ‘Anni yù ikáyâ mu?’ Á simibbák yù babay, ‘Apu, paré bì lâ nakuan tanu magitubang ka sangaw nga mammaguray sù páppatulám mu, á mepagitubang bì nakuan gapay nikaw yawe ira duá nga ánnâ ku, á passidduá nga bangádaka, nga táddy ta jiwanám mu ánná táddy ta jimigim,’ kun na.

<sup>22</sup> Á kinobobuk ni Apu yù ira sinudduán na, di Ime kâ Kuan, á kinagi na nira, ‘Arán naw garè ammu yù kiddawan naw. Tumulù kayu panò nga mepagiyattam sù panigirigá nayù ira tatolay, ta kunnay sù attamák ku sangaw?’ kun na. Á kinagi ra, ‘Wan, meyattam mi,’ kud da.

<sup>23</sup> Á kinagi ni Apu Kesu nira, ‘Kuruk nga attamán naw noka yù jigâ nga kunnay ta ággiyattam ku sangaw. Ngam awán ta awayyâ nga mappílì sù ira mepagitubang ta jiwanák ku ánná jimigí. Dannian nga pagitubangán yù naparán megapu sù ira nga pinili ni Ammóku,’ kun na nira.

<sup>24</sup> Á pakaginná nayù ira mapulu nga sinudduán ni Apu sù kiniddo nayù ira duá nga kábulud da kuna, nakujjâ yù mammang da laguk sù ira duá nga mawwagi.

<sup>25</sup> Á yáyù nga inagálán ni Apu Kesu yù ira sinudduán na, á kinagi na, ‘Ammu naw gemma yù kustombare nayù ira patul nga mammaguray, ta kitarok ira sù ira tatole ra. Á yù ira makáwayyá nga gádde ra, aripanad da yù ira tatolay.

<sup>26</sup> Ngam sikayu, arán naw ira párigán! Ari nga kunnian yù akkuán naw. Ta yù tolay nga mayâ nga mebiláng ta kotunán naw, tumulù laguk nga mabbaluntáriu nga masserbi nikayu.

<sup>27</sup> Á yù tolay nga mayâ nga mebiláng ta kátannangán naw, máwák na laguk nga mangabbák nikayu nga kun na aripan naw.

<sup>28</sup> Á yáyù yù kunnay gapay nikán, nga Kaká na ngámin na tatolay. Aringà minay nga passerbián na tatolay, ngam umayakin masserbi nira ánná metapilà nga magikáru sù liwâ

na aru nga tatolay, tapè makipakomá ira kâ Namarò áンna meyígù ira sù liwâ da," kun ni Apu Kesu.

*Yù Pamammapiá ni Apu Kesu sù ira Duá nga Buling  
Markus 10:46-52; Lukas 18:35-43*

<sup>29</sup> Á ta páno di Apu Kesu áンna yù ira sinudduán na ta ili na Jeriku, jimináddán kuna yù ira magaru.

<sup>30</sup> Á aijan yù duá nga buling nga nagitubang ta aggik na dálan. Á pakaginná ra ta nattalebá si Apu Kesu, pine ra nakkatol, "Apu, ikállà kami bì, sikaw nga ginaká ni Patul Dabid," kud da.

<sup>31</sup> Á napporayád da ira nayù ira tatolay. Á kinagi ra nira ta ari ira mattannuk. Ngam pine ra lâ nakkatakatal nga iniyássikad da, "Apu, ikállà kami bì, sikaw nga ginaká ni Patul Dabid!" kud da.

<sup>32</sup> Á pakaginná ni Apu Kesu, nagginná ta dálan, á inagálán na ira. Á iniyabbû na nira, "Anni yù ikáyâ naw nga akkuák ku megapu nikayu?" kun na.

<sup>33</sup> Á kinagi ra, "Apu, ikáyâ mi ta makasingan kamingin," kud da.

<sup>34</sup> Á nakalò yù allà ni Apu Kesu nira áンna siniggek na yù matá ra. Á dagarágâ nakasingan iren, á nepappupúlù ira kuna.

## 21

*Yù Ánge ni Apu Kesu ta Jerusalem  
Markus 11:1-11; Lukas 19:28-40; Kuan 12:12-19*

<sup>1</sup> Á ánge ra paga di Apu Kesu ta ili na Jerusalem, nakáranni ira ta babálay na Bepagi, ta garek na puddul na Olibo. Á pinapolu ni Apu Kesu yù duá nga sinudduán na.

<sup>2</sup> Á kinagi na nira, "Mapolu kayu lâ nga umay ta babálay," kun na. "Á labbè naw tán, dagarágâ masinan naw yù dongki\*" nga negálù áンna yù kigo na. Ubbarán naw ira laguk ta iyángé naw saw nikán.

<sup>3</sup> Á nu aijan yù mangiyabbû nikayu, kagian naw lâ kuna, 'Máwák na ira ni Apu,' kun naw, á iyanugù na nga dagarágâ nga apan naw ira," kun ni Apu Kesu nira.

<sup>4</sup> Á nesimmu danniaw tapè matuppál yù iniþeyubobuk na ngaw ni Namarò nga nabayák, sù ngaw ábbilinán na, nga kunnia:

<sup>5</sup> "Kagiam mu sù ira tatolay ta Jerusalem, 'Innan nawè. Umayin yù patul naw,  
nga tumulù, nga mattakay ta kígaw na dongki.

Ammán! Yù kígaw na dongki yù pattakayán na."†

<sup>6</sup> Á yáyù nga minay laguk yù ira duá nga sinudduán ni Apu Kesu, á sinuppál da yù kinagi na.

<sup>7</sup> Iniyángé ra yù ayám áンna yù kigo na. Á iniyullák da yù gámì da sù barâ nayù ayám, á nattakay si Apu Kesu kuna.

<sup>8</sup> Á aru yù ira tatolay nga nepappupúlù kuna, nga iniyullák da yù ira gagámì da sù dálan nga pallakarán na. Á yù ira káruán nga magaru, sippisippáng da yù pangapangá na káyu, nga iniyullák da gapay sù dálan.

<sup>9</sup> Á nagayáyâ nga Nagaragiák ngámin yù ira magaru nga napolu kâ Apu áンna yù ira naporián kuna gapay. Á inikatakatol da nga kinagi, "Dayáwat tam yù Patul tam, nga ginaká ni Patul Dabid! Mepagayáyâ kâ Namarò yù Patul nga jinok na ta umay mammaguray! Meparáyaw si Apu Namarò ta lángil!"‡ kud da.

<sup>10</sup> Á labbè ni Apu Kesu ta Jerusalem, napállâ yù ira ngámin nga tatolay sù ili. "Asinni yaw?" kud da ngámin.

<sup>11</sup> Á simibbák yù ira magaru nga nepulupulù kâ Apu Kesu, á kinagi ra, "Si Apu Kesu yaw, nga ábbilinán ni Namarò nga taga Nasaret sù purubinsia na Galilia," kud da.

*Yù Ánge ni Apu Kesu sù Dakal nga Bale ni Namarò ta Jerusalem  
Markus 11:15-19; Lukas 19:45-48; Kuan 2:13-22*

<sup>12</sup> Á pakatunù ni Apu Kesu ta Jerusalem, simillung sù karakalán nga kapilliá, nga mangilin nga bale ni Namarò, á pinaturiák na ngámin yù ira nga minálláku ta lárum nayù balay áンna yù ira nga gumugumátáng. Á binalabalittak na yù ira lamesá nayù ira minánnáli ta kuártu áンna yù ira ággitubangán nayù ira minálláku ta lummun.

\* 21:2 Yù dongki yù baddi nga kabáyu nga apaddu talingá na. † 21:5 Sakariá 9:9 ‡ 21:9 Salmo 118:26

<sup>13</sup> Á kinagi ni Apu Kesu nira, “Ajjan yù kinagi ni Namarò, nga netúrâ sù dán nga libru, nga kunniaw, ‘Mangngágan yù balè ta Balay nga Ákkimállatán na ngámin na tatolay.’ Ngam sikayu, pabbalinan naw ta patuttukán nayù ira minákkokò!”<sup>§</sup> kun na.

<sup>14</sup> Á minay laguk kâ Apu Kesu sù bale ni Namarò yù ira tatolay nga buling ánnna pilay, á pinammapiá na ira ngámin.

<sup>15</sup> Ngam yù ira kátannangán nga pári ánnna yù ira mesturu nga mangituddu sù tunung na rilisiod da, napporay ira nu nasingad da yù pinagaddátu ni Apu Kesu nga makapállâ. Á nepallà yù pore ra ta pakaginná ra sù paddáyo nayù ira ábbing tán, nga nakkatakatol, nga kud da, “Dayáwat tam yù ginaká ni Patul Dabid.”

<sup>16</sup> Á iniyabbû da laguk nayù ira pári kâ Apu Kesu, “Arám mu panò maginná yù kagian nayù ira ábbing?” kud da kuna. “Á wan,” kun ni Apu Kesu. “Maginnákay. Á arán naw panò binibik yaw nga netúrâ nga Ubobuk ni Namarò? Ajjan netúrâ nga kunniaw, ‘Yù ira ábbing, mássiki yù ira babaddì, netuddu nira yù makkagi sù mepángngà nga áddáyo ra kâ Apu.’ ”\*

<sup>17</sup> Á kabalin na nakkagi ni Apu Kesu karanniaw, nánawán na ira laguk, á nánaw ta ili nga minay nagammâ sù babálay na Bitania.

*Yù Káyu nga Ari Mabbungá*

*Markus 11:12-14, 20-24*

<sup>18</sup> Á ta pannawák, pattoli di Apu Kesu ta ili, á nabisinán.

<sup>19</sup> Á nasingan na yù káyu nga igò ta aggik na dálan, á jimikkì kuna, ta innan na nu ajian bungá na. Ngam awán bulubugá ta nasingan na nga bungá na, nu ari lâ dipúro don. Á kinagi na laguk sù káyu, “Ari ken bulubugá mabbungá!” Á dagarágâ nallelay ánnna nakkatáng yù káyu.

<sup>20</sup> Á yù ira sinudduán na, napállâ ira ta pakasingad da karanniaw. “Á ngattá, ta dagarágâ nga nakatáng yawe káyu?” kud da.

<sup>21</sup> Á simibbák si Apu Kesu, á kinagi na nira, “Kuruk yù kagiak ku nikayu. Nu kuruk nga mangikatalà kayu kâ Namarò, ánnna ari kayu bulubugá mabbábâng, makuá naw gapay sangaw yù kunnay sù kingnguá sawe káyu. Á ari lâ kunnian yù awayyá naw, ta nu kagian naw tâne puddul, ‘Magalì ka tán nga umay ta bebay,’ á makuá laguk.

<sup>22</sup> Á nu mangikatalà kayu kâ Namarò, maguray lâ yù kiddawan naw nga pakimállâ naw kuna, á mapalurò sangaw,” kun ni Apu Kesu.

*Yù Meyannung sù Paggapuán nayù Pakáwayyá ni Apu Kesu*

*Markus 11:27-33; Lukas 20:1-8*

<sup>23</sup> Á nanoli laguk si Apu Kesu sù dakal nga bale ni Namarò, tapè mangituddu sù ira tatolay. Á pangituddu na nira, minay kuna yù ira kátannangán nga pári ánnna yù ira karakalán nga Kudio, á iniyabbû da kuna, “Anni yù pakáwayyám nga mangnuá ta ngámin karanniaw nga akka-akkuám mu? Asinni yù nangiyawâ niikaw sù pakáwayyám?” kud da kuna.

<sup>24</sup> Á simibbák si Apu Kesu nira, á kinagi na, “Ajjan gapay bì yù iyabbû ku nikayu. Nu matabbák nawà, á kagiak ku gapay nikayu yù paggapuán nayù pakáwayyâ.

<sup>25</sup> Á yawe yù iyabbû ku. Isaw panò yù paggapuán nayù pakáwayyá ni Kuan nga Minánigù? Naggapu kâ Namarò, onu naggapu ta tolay?” kun na. Á naakkaká-abba-abbbû ira, “Anni yù itabbák tam? Nu kagiat tam ta naggapu kâ Namarò, á kun na sangaw nittam, ‘Á ngattá, ta ari kayu nanguruk kuna?’

<sup>26</sup> Á nu kagiat tam ta naggapu ta tolay, maganássing ittam sù ira tatolay, marakè akkuáda ittam. Ta aggira ngámin, ibíláng da ta kuruk nga ábbilinán ni Namarò si Kuan,” kud da.

<sup>27</sup> Á yáyù nga initabbák da kâ Apu Kesu, “Arám mi garè ammu,” kud da. Á kinagi ni Apu Kesu nira, “Á arák ku gapay laguk kagian nikayu yù paggapuán nayù pakáwayyâ nga mangnuá sù akka-akkuák ku,” kun na.

*Yù Ángngarigán nga Meyannung sù ira Duá nga Mawwagi*

<sup>28</sup> Á nagángngarigán si Apu Kesu laguk, á kinagi na, “Anni yù kagian naw ta ure naw nga meyannung karanniaw. Ajjan yù tolay nga yáma na duá nga ánâ na nga lálláki. Á minay sù kaká, á kinagi na kuna, ‘Anâ ku, e ka bì mattarabáku sù komán, kun na.

<sup>29</sup> ‘Molang ku,’ kun na anâ na kuna. Ngam sangaw, nabbabáwi sù initabbák na kâ ammò na, á minay galâ.

<sup>30</sup> Á minay yù yáma ra sù mekaruá nga anâ na, á kinagi na gapay kuna ta kunnay sù kinagi na sù kaká na. ‘Wan, Ammò. Umayá,’ kun nayù urián. Ngam ari minay.

<sup>31</sup> Asinni nira yù nanuppál sù kinagi nayù yáma ra?” kun ni Apu Kesu. Á kinagi ra, “Yù kaká ngay!” Á kinagi ni Apu Kesu nira, “Wan, á kuruk yawe nga kagiak ku nikayu nga karakalán, ta yù ira minálliwá nga kunnay sù ira minángngilogò nga mináttuki ta buwi ánná yù ira bábbay nga minákkarallaw, mapolu ira nga mesipà sù pammagurayán ni Namarò ánné nikayu.

<sup>32</sup> Ta si Kuan nga Minánnigù, minay nga mangituddu nikayu sù napiá ánná matunung nga tuttulan naw nakuan, tapè mabbalin ta napiá yù ággangnguá naw, ngam arán naw kinuruk. Ngam nanguruk kuna yù ira mináttuki ta buwi ánná yù ira bábbay nga minákkarallaw. Á mássiki nu nasingan naw yù pabbabáwi ra, ari kayu paga nabbabáwi tapè kurugan naw yù inituddu na,” kun ni Apu Kesu.

*Yù Ángngarigán nga Meyannung sù ira Karakalán nga Kudio  
Markus 12:1-12; Lukas 20:9-19*

<sup>33</sup> Á kinagi na laguk ni Apu Kesu nira, “Ginnán naw paga yù tádday nga ángngarigák ku. Ajjan yù tolay nga nammulá ta úbas sù ákkomanán na. Á inalitukán na yù kobasán, á pidde na gapay yù áppappatán ta úbas, tapè apan na yù tabbuk na. Á pidde na gapay yù attannáng nga balay, nga ájjipatán nayù magguárdiá sù kobasán. Á ta kabalín na nappadday, inikárgu na sù ira minánnaron, á nánaw nga minay ta arayyu nga lugár.

<sup>34</sup> “Á gapu ta jiminakal nga nabbungá yù úbas, á jiminittái yù pappusik da. Á jinok na laguk nayù makákkua ta kobasán yù ira aripan na sù ira manaron ta kobasán na, tapè málâ da yù balle na.

<sup>35</sup> Ngam ta labbè da ta kobasán, ginápù da ira nayù ira minánnaron. Á tádday yù pinalapalù da, á pinapáte ra yù mekaruá, ánná piñayáng da ta batu yù mekatallu.

<sup>36</sup> Á yáyù nga jinok na mángin nayù makákkua ta kobasán yù aru nga aripan na ánné sù ira olu nga minay. Ngam kingnguá ra má gapay ira nayù ira minánnaron ta kobasán.

<sup>37</sup> “Á yáyù nga ninonò nayù makákkua ta kobasán ta doban na laguk yù anâ na nga umay sù ira minánnaron, ta kagian na ta nonò na, ‘Yawe nga anâ ku yù kukurugán nga pakimorayád da,’ kun na.

<sup>38</sup> Ngam ta pakasingan nayù ira minánnaron sù anâ na, inigagángé ra, ta kagiad da, ‘Ye! Aggina yù makákkua ta kobasán sangaw nu matay yù yáma na. Arà! Et tamin, ta papatáyat tam tapè kukuá tam sangawin yù kobasán,’ kud da.

<sup>39</sup> Á ginápù da laguk, á inilawád da sù nálitukán nga kobasán, á pinapáte ra.

<sup>40</sup> “Á anni laguk yù akkuán nayù makákkua ta kobasán sù ira minánnaron sangaw nu umay sù kobasán na?” kun ni Apu Kesu nira.

<sup>41</sup> Á simibák ira kuna, á kinagi ra, “Ari bulubugá mabbábáng nga mamapátay sù ira narákè nga minánnaron, tapè ikárgu na yù kobasán na sangaw sù ira tanakuán nga minánnaron nga mangiyawâ kuna sù balle na sangaw nu mapusik,” kud da.

<sup>42</sup> Á kinagi ni Apu Kesu nira, “Uwan á! Á arán naw paga panò nabibbik yù dán nga netúrâ nga Ubobuk ni Namarò? Ajjan yù netúrâ nga kunniaw,

‘Yù tádday nga batu nga panakitán nayù ira mappadday ta balay, aggina galâ yù nabbáli ta ánnáddagán na balay.

Yaw yù kingnguá ni Apu Namarò, á nerallà yù kapállâ tam megapu kuna.”<sup>†</sup>

<sup>43</sup> Á yáyù nga kagiak ku nikayu,” kun ni Apu Kesu nira, “mássiki nu sikayu nga Kudio yù piñíli ni Namarò áddè ngaw, patalián na kayu sangaw. Ta gapu ta panakitán naw yù sinullá na nga mammaguray, ari kayu mesipà sù pammagure ni Namarò nu ari galâ yù ira tatolay nga magayáyá nga manuppál sù ipakuá na nira.

<sup>44</sup> Á ngámin ira nga kun na mesiddúkul sù batu, kunnay ira ta mapakkapakká. Á ngámin yù ira mapannátán nayù batu sangaw, marappi ira nga maburuburá,” kun ni Apu Kesu.

<sup>45</sup> Á pakaginná nayù ira kátannangán nga pári ánná yù ira Parisio sù ira ángngarigán ni Apu Kesu, nánnámmuád da ta aggira yù ubu-ubobugan na, nga meyárik sù ira nanakí sù makákkua ta kobasán ánná meyárik ira gapay sù ira nanakí sù batu nga nabbáli ta ánnáddagán na balay. Á yáyù nga mappaná yù pore ra.

<sup>46</sup> Á pinarubád da nakuan gaputan, ngam naganássing ira sù ira magaru nga tatolay, gapu ta kinuruk nayù ira tatolay ta ábbilinán ni Namarò si Apu Kesu.

<sup>†</sup> 21:42 Salmo 118:22-23

**22**

*Yù Ángngarigán nga Meyannung sù Bodá  
Lucas 14:15-24*

<sup>1</sup> Á nagángngarigán paga si Apu Kesu. Á kinagi na,

<sup>2</sup> “Á kunniaw yù keyarigán nayù ángngisipà ni Namarò ta tatolay sù pammagure na. Ajjan yù patul nga namarán ta bodá nayù anâ na nga laláki.

<sup>3</sup> Á kabalid da namarán, jinok nayù patul yù ira aripan na nga umay magágál sù ira tatolay nga inapà na. Ngam nanakì yù ira inapà na nga umay makibodá.

<sup>4</sup> Á yáyù nga jinok na laguk nayù patul yù ira tanakuán nga aripan na. Á kinagi na nira, ‘Kagian naw bì sù ira inapà ku ta umay lâ ira nga umay, ta dán nga naparán yù ipabbodá mi. Napártigun yù ira báka ánná yù ira matabâ nga kígaw, á naparánin ngámin yù máwâk tam,’ kun na.

<sup>5</sup> Ngam pinaguráyád da yù pangágál nayù patul nira, á inupù da yù akka-akkuád da. Ajjan yù ira nga minay ta ákkomanád da ánná yù ira minay nalláku.

<sup>6</sup> Á yù ira káruán, ginápù da yù ira káruán nga aripan nayù patul, á inipasapasiránád da ira, ánná pinapáte ra yù ira káruán.

<sup>7</sup> “Á pakarámak nayù patul karannian, nepallà yù pore na, á jinok na yù ira suddálu na, ta ed da papatáyan yù ira namapátay. Á sinuggi ra yù ili ra.

<sup>8</sup> Á kinagi na laguk nayù patul sù ira aripan na, ‘Dán nga naparánin ngámin yù ipabbodá, ngam ari mepánggá yù ira olu nga inagálák ku.

<sup>9</sup> E kayu ta dápun, á apatan naw nga umay makibodá yù ira ngámin nga masingan naw,’ kun na.

<sup>10</sup> Á minay laguk yù ira aripan nayù patul, á inagálád da ngámin yù ira narángnganád da ta dálan, nga tatolay nga napiá onu narákè. Á yáyù nga napannu yù bale nayù patul sù ira makibodá.

<sup>11</sup> “Á minay laguk yù patul nga nakiubobuk sù ira álliuk na, á nasingan na yù tádday nga ari nappabbisti ta ákkibodá.

<sup>12</sup> Á iniyabbû nayù patul kuna, ‘Kopuk ku, ngattá, ta simillung ka saw nga ari nappabbisti ta ákkibodá?’ kun nayù patul. Á ari nakatabbák yù tolay.

<sup>13</sup> Á kinagi na laguk nayù patul sù ira masserbi kuna, ‘Gaputan naw ta baluran naw, á ilappák naw ta lawán sù kakállatán, nga gián nayù ira gikulukuletán, nga mangngarangngaringngì megapu sù jigâ da.’ ”

<sup>14</sup> Á kinagi na laguk ni Apu Kesu, “Aru yù ira nga agálán ni Namarò nga tumuttul kuna, ngam baddi lâ yù ira napíli na nga mesipâ kuna.”

*Yù Pangiyabbû da ta Meyannung sù Pappagára ta Buwi sù Patul  
Markus 12:13-17; Lukas 20:20-26*

<sup>15</sup> Á ta kabalín na yaw, nánav laguk yù ira Parisio tán, á minay ira nakkaká-ubu-ubobuk nu kunnasi yù ánmukuk da kâ Apu Kesu ta meyannung sù ubobuk na.

<sup>16</sup> Á yáyù nga jinok da laguk kâ Apu Kesu yù ira kábulud da nga Parisio, nga nepappupúlù sù ira kábulun ni Patul Erodo. Á labbè da sù gián ni Apu Kesu, kinagi ra kuna, “Apu, ammu mi nga awán ta ángngilogò mu ánná kuruk yù ituddum nga bilin ni Namarò nga ípakuá na ta tatolay. Á awán ta irumurumám nga tatolay, gapu ta awán ta ikaburung mu nu anni yù kagiad da, mássiki nu makáwayyá ira.

<sup>17</sup> Kagiam mu bì laguk yù nonò mu nga meyannung karannia. Arán na panò ipugik nayù tunung tam yù pappagá tam ta buwi kâ Sisar, nga patul nga mammaguray ta Roma?” kud da.

<sup>18</sup> Ngam natagenà ni Apu Kesu yù narákè nga nonò da. Á yáyù nga kinagi na nira, “Sikayu, nga agippípiá! Ngattá, ta paraparubán nawâ nga tulkubán?

<sup>19</sup> Ipasingan naw bì nikán yù kuártu nga ipappagá naw ta buwi,” kun na. Á iniyawâ da kuna yù pirâ.

<sup>20</sup> Á iniyabbû ni Apu Kesu nira, “Asinni yù maká-alinu ánná makángngágan nga nemárka sawe pirâ?” kun na.

<sup>21</sup> “Si Patul Sisar,” kud da. Á kun na laguk ni Apu Kesu, “Á kukuá ni Patul Sisar laguk yù pirâ nga namárkan ta kágappâ nayù mammang na ánná yù ngágan na. Á yáyù nga pagán naw yù buwi nga meyannung sù pakáwayyá na. Á tuppálan naw gapay yù ipakuá ni Namarò nikayu, nga meyannung sù pakáwayyá na gapay,” kun ni Apu Kesu.

<sup>22</sup> Á pakaginná nayù ira kábulun ni Patul Erodo áンna yù ira Parisio sù kinagi ni Apu Kesu, nepallà yù kapállâ da sù kasírik nayù itabbák na. Á nánawád da.

*Yù Meyannung sù Paginnanole nayù ira Námmatay  
Markus 12:18-27; Lukas 20:27-40*

<sup>23</sup> Á tán nga ággaw galâ, minay gapay yù ira káruán nga Sadusio. Aggira yù makkagi ta ari maginnanolay yù ira námmatay. Á jiminikkì ira nga nagiyabbû kâ Apu Kesu.

<sup>24</sup> Á kinagi ra, "Mesturu, aijan yù neturâ nga inituddu na ngaw ni Moyses. 'Nu matay yù laláki nga natayán na yù atawa na nga awán ta anâ da, máwák nayù wagi nayù natay nga atawán na yù bálu, tapè maganâ ira, á mebiláng yù anâ da ta anâ nayù wagi na nga natay.'

<sup>25</sup> Á góri, aijan sawe giám mi yù ira pitu nga mawwawági nga lálláki. Á nangatáwa yù kaká, á natay nga awán ta anâ na. Á yáyù nga inatáwa nayù urián na yù bálu, nga asípák na.

<sup>26</sup> Á natay laguk yù mekarúá nga laláki gapay nga awán ta anâ na. Á kunnian gapay yù nesimmu sù mekatallu nga laláki áンna yù ira dumaddáddán nga wáwwagi na áddé sù mekapitu. Aggira ngámin, nattutubbátad da nga inatáwa yù babay nga bálu nayù kaká ra, á natay ngámin yù ira mawwawági nga awán ta anâ da.

<sup>27</sup> Á naporián nga natay gapay yù babay.

<sup>28</sup> Á yawe bì yù iyabbû mi nikaw. Noka nu duttál yù ággaw na paginnanolay nayù ira námmatay, asinii laguk sù ira ngaw pitu nga lálláki yù atáwa nayù babay? Nepatalugáring ta inatáwa ra ngámin nga pitu," kud da.

<sup>29</sup> Á simibbák si Apu Kesu nira, á kinagi na, "Nakaliwâ kayu ta pannononò naw, gapu ta arán naw garè mánnámmuán yù dán nga neturâ nga Ubobuk ni Namarò, áンna arán naw gapay mánnámmuán yù pakáwayyá ni Namarò.

<sup>30</sup> Sangaw nu maginnanolay yù ira námmatay, mapataliánin yù ággíán na tatolay, á kunnay ira sù ira daroban ni Namarò ta lángi, nga ari makiatáwa áンna mañgatáwa.

<sup>31</sup> Á ta meyannung sù paginnanolay nayù ira námmatay, arán naw paga panò nabibbik yù kinagi ni Namarò nikayu? Neturâ yaw nga kinagi na,

<sup>32</sup> "Sikán si Namarò, nga pakimorayád di Abrakam kári Isak kâ Akup," kun ni Namarò. Á si Namarò, ari gemma yù pakimorayán nayù ira námmatay, nu ari galâ yù pakimorayán nayù ira matolay,"\* kun ni Apu Kesu nira.

<sup>33</sup> Á ta pakaginná nayù ira magaru nga tatolay karannian nga kinagi ni Apu Kesu, napallâ ira sù pangituddu na. Ta nánnámmuád da ta mepattolay lá paga yù ira ngaw naggaká nira, di Abrakam kári Isak kâ Akup, másíki nu natay yù baggi ra ngaw nga nabayágín lage na nakkagi ni Namarò ta aggina yù pakimorayád da.

*Yù Kapoluán nayù ira Taddán ni Namarò nga Mawák na Tolay nga Tuppálan  
Markus 12:28-34; Lukas 10:25-28*

<sup>34</sup> Á pakaginná nayù ira Parisio ta ari nakatabbák yù ira Sadusio kâ Apu Kesu, naggagam-mung ira, á jiminikkì ira kuna.

<sup>35</sup> Á aijan nira yù abugádu nga makáwayyá ta meyannung sù tunung nayù rilisiód da. Nagiyabbû kâ Apu Kesu, ta parubán na tukubán, á kinagi na,

<sup>36</sup> "Mesturu, anni yù kapoluán nayù ira ngámin nga taddán ni Namarò nga máwák na tolay nga tuppálan?" kun na.

<sup>37</sup> Á kinagi ni Apu Kesu kuna, "Iddi-iddukam mu yù Yápum nga namarò nikaw megapu sù ngámin nga ayâ nayù putum, megapu sù ngámin nga urem, áンna megapu sù ngámin nga nonó mu."<sup>†</sup>

<sup>38</sup> Yane yù napolu nga tunung nga máwák na tolay nga tuppálan.

<sup>39</sup> Á negittá sù kapoluán yù mekarúá nga tunung ni Namarò, nga kunniaw: 'Iddi-iddukam mu yù ira ikáttolem gapay nga kunnay sù pangiddù mu sù baggim.'<sup>‡</sup>

<sup>40</sup> Á yawe ira duá nga tunung ni Namarò yù nabbatayán nayù ira ngámin nga tunung nga inikatalà ni Namarò kâ Moyses áンna yù ngámin nga inituddu nayù ira ábbilinán ni Namarò áddé ngaw."

*Yù Ángngiyabbû nayù Tolay nga Meyannung sù Mangiyígù nga Mangngágán ta Kiristu  
Markus 12:35-37; Lukas 20:41-44*

<sup>41</sup> Á gapu ta aijanin yù ira Parisio nga naggagammung, á lage ra nánaw, nagiyabbû si Apu Kesu nira, nga kun na,

42 “Anni laguk yù kagian naw nga meyannung sù Mangiyígù nga mangngágan ta Kiristu, nga umay mammaguray? Asinni yù naggaká kuna?” kun na. Á simibbák ira, á kinagi ra, “Aggina yù ginaká nayù ngaw Patul Dabid,” kud da.

43 Á iniyabbú na laguk ni Apu Kesu nira, “Á nu kuruk nga ginaká nayù ngaw Patul Dabid, ngattá laguk ta kinagi ni Patul Dabid ta aggina yù Yápu na? Ta yáyù inipeyubobuk na ngaw nayù Ikararuá ni Namarò kâ Dabid, nga kunniaiw:

44 “Si Apu Namarò, kinagi na sù Yápu: E ka bì magitubang ta jiwanák ku,

sù ággitubangán nayù meparáyaw, áddè ta arák ku appútan yù ira malussaw nikaw.”<sup>8</sup>

45 Á gapu ta pakkagi ni Dabid ta aggina yù Yápu na, ngattá laguk ta kagian naw ta ginaká na galâ ni Dabid?” kun ni Apu Kesu nira.

46 Á awán bulubugá ta makatabbák kâ Apu Kesu. Á yáyù nga namegapu tán nga ággaw, awán bulubugá ta makeyangngà nga magiyabbú kuna.

## 23

*Yù Pamappalán ni Apu Kesu nga Meyannung sù ira Parisio ánnna yù ira Mesturu nga Mangituddu ta Rilision*

*Markus 12:38-39; Lukas 11:43, 46; 20:45-46*

1 Á pagubu-ubobuk ni Apu Kesu sù ira magaru nga tatolay ánnna yù ira sinudduán na, kinagi na laguk,

2 “Yù ira mesturu nga mangituddu ta rilision ánnna yù ira Parisio, ajjan yù pakáwayyá ra naga ibukálán yù tunung ni Namarò nga inipetúrâ na kâ Moyse.

3 Á yáyù nga kurugan naw ánnna tuppálan naw laguk ngámin yù kagiad da nikayu. Ngam arán naw párigán yù akka-akuad da, ta arád da tuppálan yù ubu-ubobugad da.

4 Á aru yù ilanná da sù tunung nga ipakuá ra nikayu, nga narigâ nga mapalurò, nga kunnay ta narámmâ nga ipakáttu ra nikayu, ngam arád da kayu bulubugá abbágán nga mangáttu.

5 Á ngámin yù akka-akuad da, akkuad da ta arubáng na tatolay, tapè masingan nayù ira tatolay ánnna dayáwad da ira. Yáyù nga parakalad da yù ággianán nayù papel nga netúratán nayù Ubobuk ni Namarò, naga ibabbak da ta mukâ da ánnna labunagád da. Á pakápadduad da yù uge na barawási ra, naga ipappeddaráyo ra gapay.

6 Á nu umay ira makílalláng, onu maggagammung ira sù paggagammungád da, ikáyâ da magitubang sù kapiánán nga ággitubangán nayù tolay nga meparáyaw.

7 Á pappassíár da ta dápun, káyatád da yù pakimore nayù ira tatolay nira ánnna mangabbún nira ta Mesturu.

8 “Ngam sikayu, arán naw iyanugù nga abbúnad da kayu ta Mesturu nayù ira kábulun naw. Ta mawwawági kayu, á awán gemma ta mesturu naw nu ari sikán galâ nga táttáddy.

9 Á arán naw abbúnán ta Ammò yù ira kábulun naw sawe dabbuno, gapu ta táttáddy lâ yù Ammò naw nga si Namarò nga ajjan ta lángi.

10 Á arán naw iyanugù nga abbúnad da kayu ta Apu, gapu ta táttáddy lâ yù pakiyápuán naw, naga sikán nga si Kiristu nga naggapu kâ Namarò.

11 Á yù makáwayyá nga tolay nga kátannangán naw, mawák nga aggina yù masserbi nga mangabbák nikayu, naga kun na aripan naw.

12 Ta yù tolay nga mappeddaráyaw, aggina yù mepagukák sangaw nga mepasiránán. Á yù tolay nga tumulu nga gumukák, aggina yù mepotun sangaw nga meparáyaw.”

*Ipalappâ ni Apu Kesu yù Nonò nayù ira Áppè Pípiá, nga Mangituddu ta Rilision ánnna yù ira Parisio*

*Markus 12:40; Lukas 11:39-42, 44, 52; 20:47*

13 Á kinagi na paga ni Apu Kesu, “Magimuguk kayu, sikayu nga mesturu nga mangituddu ta rilision naw ánnna sikayu nga Parisio, naga áppa-áppè nga tumuttuttul kâ Namarò. Agíppípiá kayu! Anni ngillâ yù ámmagikáru ni Namarò sangaw nikayu! Nakaliwâ kayu ta pangituddu naw, megapu sù kotun na nonò naw. Ari kayu bulubugá nga mesipâ sù pammagure ni Namarò megapu sù narákè nga ággangnguá naw. Ari lâ yù panakì naw nga mesipâ, nu ari gapay ta ilogó naw yù ira tatolay nga makkaragâ nga mesipâ sù pammagure ni Namarò. Manakì kayu nga tumuttuttul kâ Namarò, á arán naw ira anugutan nga tumuttuttul kuna.

14 “Magimuguk kayu, sikayu nga mesturu nga mangituddu ta rilision ánnna sikayu nga Parisio. Napiá yù lawán naw, ngam narákè yù unak naw. Agíppípiá kayu! Ngattá, ta

lannapán naw yù ikáru naw kâ Namarò? Ngattá, ta darogatan naw yù ira bábbay nga bálu, tapè gubatan naw yù kukuá ra ánnna bale ra. Á kabayagan naw yù ákkimállà naw, tapè mepasingan sù ira tatolay ta napiá kayu, ngam áppè pípiá kayu lá. Yáyù nga mappaná sangaw yù ámmagikáru ni Namarò nikayu.

<sup>15</sup> “Magimuguk kayu, sikayu nga mesturu nga mangituddu ta rilision ánnna sikayu nga Parisio. Agippípiá kayu! Ngattá, ta dumáki kayu ta dammáng na bebay nga umay ta arayyu nga lugár, tapè aleran naw mássiki táttáday nga patuttulan naw. Á nu ajjan sangaw yù mapatuttul naw, yá lâ mepángngá nga labbetan na yù api ta impiernu nga ari máddà ta addè ta áddè, nepatalugáring ta naráke yù akka-akkuán na ánnne sù kingnguá naw.

<sup>16</sup> “Magimuguk kayu, sikayu nga kun na buling nga mangituddu ta dálán sù ira kábulun na nga buling. Ta pangituddu naw, á ngattá, ta kagian naw, ‘Nu ipappagássingán na tolay yù mangilin nga bale ni Namarò sù pangitabbá na, arán na máwák nga tuppálan yù initabbá na. Awán ta liwâ na nu arán na tuppálan yù initabbá na. Ngam nu yù buláwán nga ajjan ta lágum nayù mangilin nga bale ni Namarò yù ipappagássingán na, máwák nga tuppálan na yù initabbá na,’ kun naw.

<sup>17</sup> Kunnay ta buling kayu ánnna ulapá! Anni panò yù kangilinán? Mangilin panò nakuan yù buláwán nga ajjan ta bale ni Namarò nu ari lâ megapu sù kangilin nayù bale ni Namarò?

<sup>18</sup> Á ngattá ta kagian naw, ‘Nu ipappagássingán na tolay yù ángngiyátangán, arán na máwák nga tuppálan yù initabbá na, ta awán ta liwâ na nu arán na tuppálan. Ngam nu ipappagássingán na yù iyátáng na kâ Namarò nga ipotun na sù ángngiyátangán, á máwák nga tuppálan na yù initabbá na,’ kun naw.

<sup>19</sup> Ari panò kuruk nga kunnay kayu ta buling! Anni panò yù kangilinán? Mangilin panò yù iyátáng na tolay kâ Namarò, nu ari galâ megapu ta nepotun sù mangilin nga ángngiyátangán?

<sup>20</sup> Á yáyù nu ajjan yù itabbá na tolay kâ Namarò, á nu ipappagássingán na yù ángngiyátangán nga mangilin, mesipà gemma gapay yù ngámin nga meyátáng tán.

<sup>21</sup> Á kunnian gapay, nu ipappagássingán na tolay yù mangilin nga bale ni Namarò, mesipà gemma gapay sù pappagássingán na si Namarò nga maggián ta bale na.

<sup>22</sup> Á nu ipappagássingán na tolay yù lángì, nga pammagurayán ni Namarò, mesipà gemma gapay si Namarò nga mammaguray tán.

<sup>23</sup> “Magimuguk kayu, sikayu nga mesturu nga mangituddu ta rilision ánnna sikayu nga Parisio, ta pagikaruan na kayu sangaw ni Namarò. Agippípiá kayu! Ngattá, ta iyawâ naw kâ Namarò yùmekamapulu nga makkakerumá nga kiruk na atang nga inimulá naw, ngam arán naw tuppálan yù tunung nga kuruk nga máwák naw nga tuppálan. Ari matunung yù akka-akkuán naw. Awán ta ángngikállà naw sù ira kábulun naw. Á ari kayu mekatalà. Napiá yù pangiyawâ naw sùmekamapulu kâ Namarò, ngam máwák naw gapay nakuan nga ari lonán yù napiá nga akka-akkuán naw nga matunung ánnna yù ángngikállà naw sù ira kábulun naw ánnna yù panuppál naw sù pakáwayyá naw nga mekatalà nikayu.

<sup>24</sup> Meyárik kayu ta buling nga mangituddu ta dálán sù ira kábulun na nga buling. Tángngagan naw ta napiá yù káruánnga ituddu nayù tunung, ngam pinaguráyán naw yù kapiánán nga ituddu na nga máwák naw tuppálan. Meyárik kayu gapay ta mangalissi sù inuman na, tapè irián na yù ilà, ngam golpian na tallanan sangaw yù kamel!

<sup>25</sup> “Magimuguk kayu laguk, sikayu nga mesturu nga mangituddu sù rilision ánnna sikayu nga Parisio, ta pagikaruan na kayu sangaw ni Namarò. Agippípiá kayu! Ngattá, ta magugá kayu ta passuelu ánnna tariauw, tapè narenu yù lawán na. Ngam ari narenu yù ajjan ta unak naw, ta arán naw napakarenúan yù nonò naw. Mangilogó kayu ánnna mokkuk kayu nga ari makáppak!

<sup>26</sup> Sikayu nga Parisio, kunnay kayu ta buling! Papoluan naw nga pakarenuán bì yù naráke nga nonò naw, nga ari masingan, tapè mepasingan sangaw ta napiá gapay yù akka-akkuán naw.

<sup>27</sup> “Magimuguk kayu, sikayu nga mesturu nga mangituddu ta rilision naw ánnna sikayu nga Parisio, ta pagikaruan na kayu sangaw ni Namarò. Agippípiá kayu! Ta kunnay kayu ta tanam nga napappuraw ta píntá, nga nakástá yù lawán na, ngam ta unak aijjan yù tulutulág na natay ánnna narúnú nga nabuyù.

<sup>28</sup> Á kuruk nga karannian yù keyarigán naw, ta kunnay ta napiá ánnna matunung kayu ta ánnninganán na tatolay, ngam naráke yù unak naw, ta áppè pípiá kayu nga minálliwâ.”

*Yù Pangipakánnámu ni Apu Kesu sù Pamagikáru ni Namarò*

*Lukas 11:47-51*

<sup>29</sup> Á kinagi na paga ni Apu Kesu, “Magimuguk kayu, ta pagikaruan na sangaw ni Namarò nikayu, sikayu nga mesturu nga mangituddu ta rilision ánnna sikayu nga Parisio. Agippípiá

kayu, ta pakástán naw yù katanamán nayù ira ngaw ábbilinán ni Namarò ánná yù pantiong nayù ira ngaw napiá nga tatolay.

<sup>30</sup> Á kagian naw, ‘Nu ajjan kami lâ nakuan sù ngaw ággaw nayù ira naggaká nikami, ari kami nepattáddy sù ira minámmatay sù ira kábulud da nga ábbilinán ni Namarò,’ kun naw.

<sup>31</sup> Á megapu sù kagian naw, palappátan naw ta kuruk nga sikayu yù ginaká nayù ira ngaw namapátay sù ira ngaw ábbilinán ni Namarò.

<sup>32</sup> Ár! Balinan naw laguk yù narákè nga pinegapuanán nayù ngaw ira naggaká nikayu.

<sup>33</sup> Kunnay kayu ta ánná na iráw, ta naggigítta kayu sù ira ngaw naggaká nikayu, nga narákè yù nonò da ánná minángngilogó ira. Egga panò yù awayyá naw nga mattálaw, tape ari kayu mekanakaná sù pamagikáru ni Namarò ta impiernu? Ari kayu gemma makalillì kuna!

<sup>34</sup> Á yáyù nga dobak ku sangaw nikayu yù ira ábbilinán ni Namarò, yù ira masírik, ánná yù ira mesturu, ta ed da kayu nakuan tudduán. Á papatáyan naw sangaw yù ira káruán nira, á ipátá naw ta kurù yù ira káruán, á ajjan yù ira nga paligatan naw sangaw sù ira ággagammungán naw. Á ta pattálo ra, sissimmátan naw ira lâ, á jíjirigátan naw ira ta ngámin nga ili nga angayád da.

<sup>35</sup> Á yáyù nga mekanakaná kayu galâ sangaw sù pamagikáru ni Namarò sù ira namapátay sù ira ngámin nga napiá nga tatolay, nga namegapu ta áddè ngaw kâ Abel nga aná ni Lákay Adan, ta áddè kâ Sakariá, nga aná ni Barakiá, nga pinapáte naw sù lállátán nayù bale ni Namarò ánná yù ánnuggián ta meyátáng.

<sup>36</sup> Á kuruk yù kagiak ku nikayu, sikayu nga gakagaká ngawe, mekanakaná kayu sù pamagikáru ni Namarò, megapu sù pampáte nayù ira ngaw naggaká nikayu sù ngámin ira nga ábbilinán na.”

*Yù Pangiddú ni Apu Kesu sù ira taga Jerusalem*

*Lukas 13:34-35*

<sup>37</sup> Á kinagi na laguk ni Apu Kesu, “Sikayu nga taga Jerusalem! Nepallà yù daddam ku, ta arán nawà ginnán! Papatáyan naw yù ira ábbilinán ni Namarò ánná payangan naw ta batu yù ira nga jinok na nga manuddu nikayu! Á namepígíá yù inamma-ammung ku nakuan nikayu nga kunnay sù ángngammung na úpá sù píyà na, ngam manakí kayu!

<sup>38</sup> Á yáyù nga sikayu lállaguk maguray, ta nánawán na kayin, nga pinaguráyán ni Namarò.

<sup>39</sup> Á yaw kagiak ku nikayu. Arán nawà sangawin masingan ta áddè ta dattál na ággaw nga panoli, á tákkitilán nawà ánná kagian naw, ‘Dayáwat tam yù Umay nga pannakabaggi ni Apu Namarò nga mammaguray!’ ”\*

## 24

*Yù Pangipakánnámmu ni Apu Kesu sù Karabbâ na noka nayù Dakal nga Bale ni Namarò ta Jerusalem*

*Markus 13:1-2; Lukas 21:5-6*

<sup>1</sup> Á páno ni Apu Kesu sù mangilin nga kapilliá, nga bale ni Namarò, minay kuna yù ira sinuduúna na, ta ituddu ra kuna yù ira makkakerumá nga balay sù dakal nga kapilliá.

<sup>2</sup> Á simibbák si Apu Kesu nira, a kinagi na, “Innan nawè ngámin yawe ira nakástá nga balay kunangan, ta kukurugán nga kuruk yù kagiak ku nikayu, nga awán bulubugá ta dakal nga batu nga mabattáng sangaw sù gián na, mássiki lâ tádday, nga ari sangaw mewarawará, gapu ta marabbâ ngámin sangaw,” kun na.

*Yù Jigâ nga Duttál sangaw*

*Markus 13:3-13; Lukas 21:7-19*

<sup>3</sup> Á ta páno ni Apu Kesu ta Jerusalem, minay sù puddul na Olibo, á nagitubang tán. Á Jimíkki kâ Apu yù ira sinuduúna na, aggíra lâ, á kinagi ra kuna, “Apu, kagiam mungé bi nikami, nu káni yù kesimmu nayù ngámin nga kinagim gangù nikami? Á anni yù panákkitilám mi ta duttálín yù panolim ánná yù pagádekán na ággaw?” kud da kuna.

<sup>4</sup> Á kun ni Apu Kesu nira, “Magimuguk kayu tapè awán ta mangilogò nikayu, maraké mepakkáttuay kayu laguk sù panguruk naw nikán.

<sup>5</sup> Ta aru yù ira mattutubbâ nga umay, nga makkagi ta aggira yù MakKiristu. Á aru yù ira nga ilogò da sangaw, nga mepakkáttuay sù panuttlu da nikán.

<sup>6</sup> Á marámak naw sangaw yù ira makigerrá nga aranni nikayu ánná yù ira makigerrá gapay sangaw ta arayyu nga lugár. Ari kayu mabburung nu mamegapu danniaw, ta máwák nga mesimmu danniaw, ngam ari paga yaw yù pagádekán na dabbuno.

\* 23:39 Salmo 118:26

7 Ta makigerrá sangaw yù makkakerumá nga tatolay sù ngámin nga lugár da ánná páppatulád da. Á duttál sangaw yù bisin ta makkakerumá nga lugár, ánná lunik sù makkakerumá nga gián.

8 Ángámin danniaw yù pamegapu na jigâ nga kunnay sù pappasíká nayù maganâ.

9 Á sangaw nu mamegapu yù jigâ, ikalusso ra kayu nayù ira tatolay megapu sù panguruk naw nikán. Á gaputad da kayu laguk ánná ikeká ra kayu ta arubáng nayù ira makáwayyá, tapè jigirigátad da kayu ánná papatáyad da yù ira káruán nikayu.

10 Á aru yù ira nga pallikuránad da yù ángnguruk da nikán. Á makkakálussaw ira ánná makkakáránuk ira.

11 Á aru yù ira mattá-ábbilinán nga arán na jinok ni Namarò, á aru yù ira tatolay nga ilogò da, nga mekáttuay sù panuttul da nikán.

12 Á gapu ta yù pagaru na kinaráké nga akka-akkuán na tatolay, mallummin sangaw yù ayâ nayù ira aru nga tatolay.

13 Ngam yù ira nga makeyattam sù jigâ, nga napasigaggâ yù panguruk da nikán ta áddè ta pagáddekkán, meýlgù ira nga mepattolay kâ Namarò ta áddè ta áddè.

14 Á lage na pagáddekkán na ággaw, melayalayâ ta ngámin nga tatolay ta dabbuno yù napiá nga dámak nga meyannung sù pammagure ni Namarò. Á ta kabalin na yaw, duttálín laguk yù pagáddekkán na ággaw na dabbuno."

*Yù Meyannung sù Makálla-állirák nga Makánnanássing*

*Markus 13:14-23; Lukas 21:20-24*

15 Á kinagi na paga ni Apu Kesu, "Masingan naw sangaw yù makálla-állirák nga makánnanássing, nga mappassippíl nga manáddak sù mangilin nga gián nga arán na pakáwayyá nga panáddagán, nga kunnay sù kinagi na ngaw gári ni Daniel, nga yù ngaw ábbilinán ni Namarò.\* Á yù ira mabbibbik karanniaw, parè bì ta kánnámmuád da laguk yù kebalinán na.

16 Á nu masingan naw yaw sangaw, á sikayu nga maggián ta Judiya, máwák naw mattálaw sù gián naw nga umay ta puddul.

17 Á yù tolay nga ajjan ta námmuák na bale na, aringin laguk tullung sù unak na bale na nga mangâ ta kukuú na.

18 Á yù tolay nga ajjan ta ákkomanán, aringin laguk lubbè nga umay mangâ ta gámi na.

19 Bay! Kábbi, ta makállállà yù ira mabussì ánná yù ira mappasusu sangaw nu duttál dannian nga ággaw.

20 Á yáyù nga ipakimállà naw laguk kâ Namarò ta arimekanná yù pattálo naw ta ammián onu ta ággaw na ággibannák.

21 Ta yáyù nga duttálín yù nepallà nga jigâ paga ánné sù nesimmu ta áddè ngaw kaparò na dabbuno ta áddè kunangan, á mássiki ta áddè noka awán bulubugá ta kagittá na.

22 Á nu arán na pangarián ni Namarò yù ággaw na jigâ, awán nakuan ta tolay nga matolay ta dabbuno. Á yáyù nga pangarián na sangaw laguk ni Namarò danniaw nga ággaw megapu sù ira piníli na nga tatole na."

23 Á kinagi na paga ni Apu Kesu, "Á yáyù gapu na nga nu ajjan yù makkagi nikayu, 'Innan nawé, ajjanin saw yù Kiristu!' onu 'Ajjanin tuke!' nu kud da, arán naw kurugan.

24 Ta duttál sangaw yù ira nga áppè Kiristu ánná yù ira áppè ábbilinán ni Namarò, á ipasingad da sangaw yù pamagaddátu ra nga makapállâ, tapè ilogò da nakuan mássiki yù ira piníli ni Namarò, tapè mekáttuay ira nakuan sù panuttuttul da kâ Namarò.

25 Ginnán naw laguk ta napiá, ta kinagikin nikayu danniaw lage na mesimmu, tapè dán naga ammu naw ánná ari kayu melogó.

26 Á yáyù nga nu kagiad da nikayu, 'Ye, ajjanin si Kiristu tukewà sù puddul!' ari kayu gumon. Á nu kagiad da, 'Ajjan nga nattuttù sù lágum na balay!' arán naw kurugan.

27 Ta sangaw nu manolingà, sikánnga Kaká na ngámin na tatolay, mepasingan yù panolì nga kunnay sù kilâ nga mamannawák ta lángi áddè ta lalassangán ta áddè ta lalammarán.

28 Á ammu naw yù bunnakénga, 'Mássiki nu sisaw nga gián nayù natay, yáyù paggagam-mungán nayù ira gayáng,' kun na.

*Yù Panoli na sangaw ni Apu Kesu*

*Markus 13:24-27; Lukas 21:25-28*

29 Á kinagi na paga ni Apu Kesu, "Á sangaw nu mappasá danniaw nga jigirigâ, á dagarágâ nga makkallâ yù bilák ánná ari mannawák yù bulán. Á mappannâ yù ira bituan, á mewarawarâ ngámin yù ajjan ta lángi.

30 Á mappasingan laguk ta lángì yù panákkilalán sù panolì, sikán nga Kaká na ngámin na tatolay. Á ngámin makkakerumá nga tatolay ta dabbuno, makalò yù daddam da ánnna nerallà yù pábbo ra. Á masingad dangá nga umay nga naggapu ta utun nga mepulú ta kuman, sikán nga Kaká na ngámin na tatolay, nga makáwayyá ta ngámin ánnna maddalingárang megapu sù karáyò nga naggapu kâ Apu Namarò.

31 Á ajjan sangaw yù magamariung nga masikan. Á ta pagamariung na, dobak ku laguk yù ira darobak ku nga umay mangammung sù ira tatolay nga piníli ni Apu Namarò, aggira ngámin nga naggapu sù giád da ta ngámin nga lugár nga aranni ánnna arayyu, ta aruk na ammiánán, abagátán, lalassangán, ánnna lalammarán.

*Yù Keyarigán nayù Káyú nga Igò  
Markus 13:28-31; Lukas 21:29-33*

32 “Innan nawè yù káyú nga igò,” kun ni Apu Kesu. “Nu masingan naw ta mallugu yù pangá na, ammu nawin ta nappáságín yù ammián ánnna mangulingin yù tiempu.

33 Á kunnian gapay, nu masingan naw sangaw ta mesimmu danniaw nga kunnay sù kinagi nikayu, ammu naw ta kuruk nga mabíkin, á manolingá.

34 Á kuruk yù kagiak ku nikayu, nga mesimmu ngámin danniaw nga kinagi lage na matay ngámin yù ira tatolay nga matolay kunangan.

35 Á mássiki nu mapasá sangaw yù dabbuno ánnna ngámin yù ajjan ta lángì, ngam maggián lâ ta áddè ta áddè yù ngámin nga ubobuk ku, nga ari bulubugá moli.

*Awán ta Tolay nga Makánnámmu sù Ággaw ánnna Oras nga Panoli ni Apu Kesu Kiristu  
Markus 13:32-37; Lukas 17:26-36*

36 “Á ta meyannung ta dattál na ággaw onu oras nga panolì, awán bulubugá ta makánnámmu, nu ari galâ si Ammò. Ta mássiki yù ira daroban ni Apu Namarò nga maggián ta lángì, arád da ammu. Á sikán gapay nga Anâ na, arák ku ammu, gapu ta si Ammò lâ yù makánnámmu.

37 “Á ta kunnay sù kingngikingnguá nayù ira tatolay sù ngaw keggá ni Noe, kunnian gapay yù akka-akuán nayù ira tatolay sangaw nu ággaw nga panolì.

38 Ta yù ira ngaw tatolay ta keggá na ngaw ni Noe, awán ta assing da lage na nalítu yù ngámin nga dabbuno, á sinuttul da lâ yù negagángay nira nga nakakákán ánnna ámma-ámmínnum ánnna naggagáttáwa áddè ta tallung ni Noe sù dakal nga barangay.

39 Á arád da ninonò yù mesimmu nira áddè ta jiminakal yù danum ánnna nalítu yù dabbun, á neburuk ira ngámin nga nalaggabán. Á kunnian gapay yù mesimmu sangaw nu manolingá.

40 “Á yáyù nga sangaw nu manolingá, ta ángngarigán nu ajjan duá nga lálláki nga mattarabáku sù ákkomanád da, á málâ sangaw yù tádday, ánnna mabattáng yù kabbulun na.

41 Á nu ajjan duá nga bábbay nga mabbáyu, á málâ yù tádday, ánnna mabattáng yù kabbulun na.

42 Á yáyù nga magimuguk kayu laguk, ta arán naw gemma ammu yù ággaw nga labbè ku, sikán nga Yápu naw.

43 Á ta ángngarigán, nu ajjan yù makábbalay, á nu ammu na nakuan yù oras na ánge nayù minákkokó, á ari nakuan makkaturuk nu ari lâ magguárdiá, tapè ari makatallung yù minákkokó sù unak na bale na.

44 Yáyù nga kunnian gapay nikayu, magimuguk kayu laguk, tapè dán nga naparán kayu, ta sikán nga Kaká na ngámin na tatolay, umayà sangaw nu arán nawà iddanamán,” kun ni Apu Kesu.

*Yù ira Aripaŋ nga Mekatalà ánnna yù ira Aripaŋ nga Ari Mekatalà  
Lukas 12:41-48*

45 Á kinagi ni Apu Kesu, “Á ta ángngarigán, nu ajjan yù aripaŋ nga mekatalà ánnna masírik, aggina yù tullatan nayù yápu na nga manaron sù ira kábulun na nga aripaŋ, tapè aggina yù mangiyawâ nira ta kanad da sù negagángay nga pakkákád da.

46 Á napiá yù ággíán na yane aripaŋ nu maratang nayù yápu na nga kunnian yù akka-akuán na.

47 Kuruk yù kagiak ku nikayu, nga yane aripaŋ yù ikatalà na sangaw nga makkárgu ta ngámin nga kukuá na.

48 Á ta ángngarigán nu narákè yù aripaŋ, á kagian na ta nonò na ta megaggak támma nga mabayák paga yù labbè na yápu na.

49 Á yáyù nga palapalutan na laguk yù ira kábulun na nga aripaŋ. Á yá lâ tángngagan na yù makipakán ánnna makipappissán sù ira minággilleglaw.

50 Á ikáddagâ lâ sangaw nga lubbè yù yápu na sù ággaw nga arán na iddanamán, á makaddák yù aripan sù labbè na.

51 Á pakarámak na yápu na sù narákè nga kingnguá na, talamánan na laguk, á ipe na sù gián nayù ira agippiáp, tapè mekanakanâ sù ira gikulukuletán nga mangngarangngaringngì megapu sù jigâ da.”

## 25

*Yù Ángngarigán nga Meyannung sù ira Mapulu nga Mámmagingánay*

1 Á kinagi na paga ni Apu Kesu, “Á sangaw nu pagáddekan na ággaw, nu duttál yù pammagure ni Namarò ta dabbuno, kunniaw yù ággíán nayù ira tatolay ta dabbuno. Meyárik ira ta mapulu nga mámmagingánay nga inipulù da yù tulu ra, tapè ed da dapunan yù nobiu nga umay ta bodá.

2 Á loku yù límá ira nga mámmagingánay. Á límá gapay yù ira nasírik.

3 “Á yù ira límá nga magingánay nga loku, inipulù da gapay yù tulu ra, ngam arád da garè binálun yù mayán na tulu ra.

4 Ngam yù ira límá nga nasírik, inipulù da yù tulu ra, ánná binálud da gapay yù mayán na tulu ra, tapé ari ira sangaw mapunuán.

5 Á gapu ta nabayák nga ari limibbè yù nobiu, nakatummà nga nakakaturuk laguk yù ira ngámin nga mámmagingánay.

6 “Á tangngá na gabi, ajan yù nakkatol, á kinagi na, ‘Ajanin yù nobiu! Umay nigin! Arà! En nawin dapunan!’ kun na.

7 Á giminikkáng laguk yù ira mapulu nga mámmagingánay, á pinarád da yù ággisinganáda.

8 Á kinagi nayù ira loku nga mámmagingánay sù ira nasírik, ‘Iddán naw kami ngè sù bálun nayù tulu naw, ta máddakáni garè yù ira isingam mi!’ kud da.

9 ‘Ari!’ kun nayù ira nasírik nira. ‘Marakè ari makatò nittam ngámin. E kayu ngillâ gumátang ta mówák naw,’ kud da.

10 Á nánaw laguk yù ira loku nga mámmagingánay, tapè umay ira gumátang. Á sù kapállikud da, nattállabbè yù nobiu. Á yù ira mámmagingánay nga dán nga naparán ánná magiddi-iddak, nepulù ira sù nobiu nga simillung sù ábbodán, á naserrán yù puertá.

11 “Á manganánuán, limibbè yù ira loku nga mámmagingánay. Á naggián ira ta puertá nga nakkatol, nga kud da, ‘Apu, Apu, patallungan kami bì,’ kud da.

12 Á simibbák yù nobiu nira, á kinagi na nira, ‘Molangà, ta arát takayu amma-ammu,’ kun na.

13 Á yáyù nga kagiak ku nikayu nga mapparán kayu laguk, ta arán naw ammu yù ággaw ánná oras nga panoli!” kun ni Apu Kesu.

*Yù Ángngarigán nga Meyannung sù Ángngiyusá na Tatolay ta Kukuá ra*

*Lukas 19:11-27*

14 Á nagángngarigán si Apu Kesu paga, á kinagi na, “Á sangaw nu manolingà, kunniaw yù keyarigán nayù pammagure ni Namarò. Ajan yù maríku nga tolay nga maggagannuá nga umay ta arayyu nga lugár. Á kabalin na naggagannuá, inagálán na yù ira aripan na, á inikárgu na nira yù kukuá na.

15 Iniyawâ na yù límá ribu sù tádday nga aripan na. Á duá ribu yù iniyawâ na sù mekaruá. Á maribu yù iniyawâ na sù mekatallu, ta iniyawâ na sù ira katággitádday yù meyannung sù pakáwayyá na. Á kabalin na nangiyawâ nira, nánaw laguk.

16 “Á páno nayù yápu ra, á yù aripan na nga nangalawâ ta límá ribu, dagarágâ nga pinakkumersiu na ngámin yù iniyawâ nayù yápu na, á nakaganánsiá ta límá ribu.

17 Á kunnian gapay sù aripan na nga nangalawâ ta duá ribu, nakaganánsiá ta duá ribu.

18 Ngam yù aripan na nga nangalawâ ta maribu, en na inikokkok yù kuártu nayù yápu na, tapè awán ta makálek kuna.

19 “Á pappasá na aru nga ággaw, nanoli yù yápu nayù ira aripan, á inagálán na ira, tapè umay ira makikuentá kuna.

20 Á minay kuna yù neddán ta límá ribu, á kinagi na kuna, ‘Apu, límá ribu yù iniyawâ mu nikán. Á ajanin yawe mapulu ribu, gapu ta nakaganánsiágà ta lannà na nga límá ribu,’ kun na.

21 Á kinagi nayù yápu na kuna, ‘Napiá yù kingnguám. Kuruk nga napiá ka nga masserbi nikán, ta pangikatalakán ka! Á gapu ta mekatalà ka sù baddì nga inikárgu nikaw, aru

sangaw yù ikatalà ku nikaw. E ka saw laguk, ta mesipà ka nga mepagayáyâ nikán nga yápum! kun na.

22 Á kabalín na yaw, siminubbâ nga minay laguk sù yápu na yù mekaruá nga aripan na nga neddán na ta duá ribu. Á kinagi na, ‘Apu, aijan yù iniyawâ mu nikán nga duá ribu ánnâ yu lannâ na gapay nga duá ribu nga naganánsiâ’ kun na.

23 Á kinagi nayù yápu na gapay kuna, ‘Napiá yù kingnguám. Kuruk nga napiá ka nga masserbi nikán, ta pangikatalakán ka. Á gapu tamekatalà ka sù baddì nga inikárgù nikaw, aru sangaw yù ikatalà ku nikaw. Arà! E ka saw laguk, ta mesipà ka nga mepagayáyâ nikán nga yápum! kun na.

24 Á kabalín na yaw, minay laguk yù mekatallu nga aripan na nga neddán ta maribu, á kinagi na sù yápu na, ‘Apu, ammù gemma ta mapporay ka nga awán ta allà mu, ta apam mu yu bungá nayù arám mu inimulá ánnâ maggaták ka sù arám mu kinomán.

25 Á yáyù nga naganássingà, á inikokkok ku yù kuártum nga iniyawâ mu nikán. Itoli yawe ngin nga kukuám’, kun na.

26 Á kinagi nayù yápu na kuna, ‘Kitarákè ka nga aripan nga kitatalakák! Ngattá, ta kagiam mu ta mappusigà sù arák ku inimulá ánnâ maggatágâ sù arák ku kinomán?

27 Á nu kuruk nga ammum, ngattá, ta arám mu pinakappián ta bángku yù iniyawâ ku, tapè sangaw nu manolingà, á itolim laguk nakuan yù kuártu ánnâ yù anâ na?’

28 Á kinagi na laguk sù ira kárúan nga aripan na, ‘Apan naw yù kuártu nga aijan kuna, á iyawâ naw sù tádday nga aijan yù mapulu ribu kuna.

29 Ta yù tolay nga mekatalà, malannapán sangaw yù neyawâ kuna, tapè aru sangaw yù aijan kuna. Ngam yù tolay nga ari mekatalà, mári sangaw mássiki yù baddì nga neyawâ kuna.

30 Á yawe tolay nga awán ta serbi na, itabbà naw laguk ta lawán sù kakallatán. Yane yù gián nayù ira gikulukuletán nga mangngarangngaringngi megapu sù jigâ da.’”

### *Yù Pamanunnù ni Apu Kesu ta Tatolay sù Pagáddékán na Ággaw*

31 Á kinagi na paga ni Apu Kesu, “Sangaw nu manolingà nga mammaguray, sikán nga Kaká na ngámin na tatolay, aijan nga mepulù nikán yù ira ngámin nga daroban ni Namarò. Á magitubangà nga meparáyw sù ággitubangán nayù Mamanunnù.

32 Á meyarubáng nikán sangaw ngámin yù ira tatolay nga makkakerumá, nga naggapu ta ngámin nga lugár ta dabbuno. Á passinnák ku ira laguk ta duá nga sinná nga kunnay sù pamassinná nayù minánnaron sù ayám na nga karneru ánnâ kajjing.

33 Á yù ira tatolay nga napiá yù nonò da, aggira yù ipé ta jiwanák ku. Á ta jimigi yù pangipayák ku sù ira naráke yù nonò da.

34 Á kabalik ku sangaw mamassinná nira, sikán nga Patul nga mammaguray, kagiak ku sù ira aijan ta jiwanák ku, ‘Sikayu yù inikállà nayù Yámà. Umay kayu laguk mesipà sù pammagurayán na, nga dán ná iniparán na nikayu áddè ngaw ta kaparò na dabbuno.

35 Ta ammu naw mangikállà, á nu nabisinà ngaw ánnâ napangálà, pinakán nawà ánnâ pinenum nawà. Á nu minayà ngaw nikayu nga naggapu ta arayyu nga lugár, napiá yù ángngálliuk naw nikán, ta inilágum nawà.

36 Á sù ngaw awánà ta barawásí, á binarawasián nawà. Á nu natakikà ngaw, sinaronán nawà. Á sù kebáluk ku ngaw, en nawà sinullúnán,’ kuk ku sangaw nira.

37 Á iyabbù da laguk nikán nayù ira matunung nga aijan ta jiwanák ku, á kagiad da, ‘Apu, káni yù pakasingam mi ngaw nikaw nga mabisin ánnâ mapangál, á sikami yù namakán ánnâ namenum nikaw?

38 Á káni yù papassiar mu ngaw ta giám mi nga kun na álliuk nga naggapu ta arayyu nga lugár, á sikami yù nangálliuk nikaw? Á káni yù pakasingam mi ngaw nikaw nga nagilongán, á sikami yù namarawásí nikaw?

39 Á káni yù pakasingam mi ngaw nikaw, nga nataki ka ánnâ nebáluk, á sikami yù nanúllun nikaw? kud da sangaw.

40 Á sikán, nga Patul nga mammaguray, kagiak ku sangaw nira, ‘Kuruk yawe nga kagiak ku nikayu, ta mássiki nu táttádday lâ yù inikállà naw nga inabbágán, nga kagukábán nga tolay nga makituddu nikán, á nebiláng ta pangikállà naw nikán,’ kuk ku nira sangaw.

41 “Á kagiak ku sangaw laguk sù ira tatolay nga aijan ta jimigi, ‘Mánaw kayu nikán, sikayu nga pagikaruan ni Apu Namarò. Metabbà kayu sangaw sù api nga ari bulubugá máddà, nga dán nga neparán kári Satanás ánnâ yù ira daroban na.

42 Ta sù ngaw kabisik ku ánnâ kapangál ku, awán bulubugá ta iniyawâ naw nikán.

<sup>43</sup> Á ta pakiálliuk ku ngaw nikayu, arán nawà pinaddulò. Á ta pagilongák ku ngaw, arán nawà iniddán ta barawási. Á ta kataki ku ánnna kebáluk ku ngaw, arán nawà garè sinullúnán,’ kuk ku sangaw nira.

<sup>44</sup> Á iyabbú da sangaw gapay nikán, á kagiad da, ‘Apu, káni panò yù pakasingam mi ngaw nikaw nga nabisin ánnna napangál, nga nakiálliuk onu nagilongán, nga nataki ánnna nebáluk, ngam arám mi ka inikállà nga inabbágán?’ kud da nikán sangaw.

<sup>45</sup> Á kagiak ku nira sangaw laguk, ‘Kuruk yù kagiak ku nikayu, ta gapu ta panakitán naw nga abbágán yù tádday nga kagukábán nga tolay nga manguruk nikán, á nebiláng ta sikán yù nanakitán naw nga inikállà,’ kuk ku sangaw nira.

<sup>46</sup> Á yáyù nga danniay yù umay sangaw ta impiernu, nga api nga ari bulubugá máddà, á marigirigá ira ta áddè ta áddè. Ngam yù ira matunung, mepattolay ira nga mesipà kâ Namarò ta áddè ta áddè.”

## 26

*Yù Pangigagánge ra kâ Apu Kesu*

*Markus 14:1-2; Lukas 22:1-2; Kuan 11:45-53*

<sup>1</sup> Á kabalin ni Apu Kesu nga nagubobuk ta ngámin karanniaw, kinagi na sù ira sinudduán na,

<sup>2</sup> “Ammu naw gemma nga duá nga ággaw lákin pángè nayù piestá nga panaddamát tam ta pattalebák nayù daroban. Yúrin sangaw nga ággaw yù kepagápú ku, sikán nga Kaká na ngámin na tatolay, tapè mepáatakà ta kuru,” kun na nira.

<sup>3</sup> Á tán nga ággaw, ajjan yù ira kátannangán nga pári ánnna yù ira karakalán, nga naggagam-mung ta dakal nga bale nayù kotunán nga pári nga mangngágan ta Kayapas.

<sup>4</sup> Á inigagánge ra nu kunnasi yù paggápú da ánnna pamapáte ra kâ Apu Kesu nga awán bulubugá ta makánnámmu.

<sup>5</sup> Á naggittá yù nonò da nga nakagi, “Arát tam igiddán sù piestá, marakè akkuád da ittam nayù ira tatolay nga makipiestá,” kud da.

*Jinenuán nayù Babay yù Ulu ni Apu Kesu*

*Markus 14:3-9; Kuan 12:1-8*

<sup>6</sup> Á ta keggá di Apu Kesu ta Bitania, ajjan ira sù bale ni Simon nga yù ngaw naggoggong nga pinammapí na.

<sup>7</sup> Á ta pakkákád da, ajjan nga jimiikkì kâ Apu Kesu yù babay nga nanangngal ta nakástá nga boteliá nga napadday ta puraw nga batu nga alabaster. Á napannu ta nanginá nga denu nga bábbanguk. Á inibubbù nayù babay ngámin yù bábbanguk ta ulu ni Apu Kesu.

<sup>8</sup> Á pakasingan nayù ira sinudduán na sù kingnguá nayù babay, naporay ira. Á nakkaká-ubobuk ira, á kinagi ra, “Yes! Kengá lá yù bábbanguk!” kud da.

<sup>9</sup> “Aru nakuán yù kelakuán na, nga meyawá nakuán sù ira pobare,” kud da.

<sup>10</sup> Ngam ammu ni Apu Kesu yù ubobugad da, á kinagi na nira, “Ngattá, ta buruburionán naw yawe babay? Kuruk nga napiá yù kingnguá na nikán.

<sup>11</sup> Á yù ira pobare, meppagián ira nikayu ta áddè ta áddè. Ngam sikán, aringà nikayu meppagián ta áddè ta áddè.

<sup>12</sup> Á pangibubbù nayù babay sù bábbanguk ta ulù, pinarán na yù baggi ta ketanam ku sangaw.

<sup>13</sup> Á kuruk yù kagiak ku nikayu, nga mássiki sisaw nga gián sù ngámin nga dabbuno yù pangilayalayatán na tolay sù napiánga dámak, mepakánnámmu gapay yù kingnguá na yawe babay nikán, nga panaddamán na tatolay kuna.”

*Yù Pangitarátu ni Kudas sù ira Maggápù kâ Apu Kesu*

*Markus 14:10-11; Lukas 22:3-6*

<sup>14</sup> Á kabalin na yaw, nánaw yùmekamapulu duá nga sinudduán ni Apu Kesu, nga mangngágan ta Kudas Iskariote, á minay sù gián nayù ira kátannangán nga pári.

<sup>15</sup> Á iniyabbú na nira nga kun na, “Pígíá yù itáddán naw nikán, nu ituddù nikayu si Kesu?” Á pinagád da ta tallupulu nga pirâ nga pinaláta.

<sup>16</sup> Á yáyù nga pinegapuán ni Kudas nga nagala-alek ta awayyá na nga mangituddu kâ Apu Kesu, tapè magápù da.

*Yù Pangngilid di Apu Kesu sù Piestá nga Panaddamád da ta Pattalebák nayù Daroban*

*Markus 14:12-21; Lukas 22:7-14, 21-23; Kuan 13:21-30*

17 Á jmittál laguk yù olu nga ággaw nayù Piestá, nga pakkákán nayù ira Kudio sù pán nga awán ta állapparán na.\* Á minay kâ Apu Kesu yù ira sinudduán na, á iniyabbú da kuna, "Sisaw yù ikáyâ mu nga pangiparánám mi ta pamúgák tam sù piestá?" kud da.

18 Á kinagi na, "E kayu sù tádday nga tolay nga aijan tán nga ili na Jerusalem, á kagian naw kuna ta ipakagi nayù mesturu naw ta 'Duttál ngin yù ággò, á matayà sangaw. Umay kamingin laguk ta balem, sikán ánná yù ira sinudduák ku gapay, tapè kumán kami sù panaddamán sù pattalebák,' kun naw kuna."

19 Á yáyù nga sinuppál nayù ira sinudduán na yù inibilin na nira, á iniparád da yù pamúgák da ta piestá na panaddamán ta pattalebák nayù daroban.

20 Á ta pajibbà, nakkálalláng di Apu Kesu ánná yù ira mapulu duá nga sinudduán na.

21 Á ta pakkákád da, kinagi na nira, "Kuruk yù kagiak ku nikayu, nga aijan nikayu yù tádday nga mangituddu nikán sangaw," kun na.

22 Á pakaginná ra karanniw, nepallà yù daddam da, á kinagi ra nga katággítádday kuna, "Apu, ari sikán yù kagiám mu, unè?" kud da.

23 Á initabbák ni Apu Kesu, á kinagi na, "Aggina yù kagiddák ku nga nangisosaw ta pán sù nangisosawák ku.

24 Á sikán nga Kaká na ngámin na tatolay, matayà sangaw gemma, nga kunnay sù inipalappâ na ngaw ni Namarò sù dán nga netúrâ. Ngam kakábbí lâ yù tolay nga mangiránuk nikán. Napiá ngillâ nakuan nu ari neyanâ!" kun ni Apu Kesu.

25 Á si Kudas Iskariote, nga mangituddu sangaw kuna sù ira maggápù kuna, kinagi na, "Mesturu, sikán panò yù kagiám mu?" Á kinagi ni Apu Kesu kuna, "Asinni paga laguk dumá?" kun na.

*Yù Kaporianán nga Pamúgák di Apu Kesu*

*Markus 14:22-26; Lukas 22:14-20; 1 Korinto 11:23-25*

26 Á pakkákád da paga, inâ ni Apu Kesu yù pán, á nabbalabálâ kâ Namarò. Á kabalin na nabbalabálâ, giddigiddua na yù pán nga inisinek na sù ira sinudduán na ánná kinagi na nira, "Mangâ kayu ta kanan naw, ta baggi yaw," kun na.

27 Á kabalin na yian, inâ na laguk ni Apu Kesu yù inumad da, á nabbalabálâ kâ Namarò. Á kabalin na nabbalabálâ, iniyawâ na nira ánná kinagi na nira, "Sikayu ngámin, mattutubbâ kayu nga ámminum sawe.

28 Ta yawe yù dágà nga mamalláddá sù bagu nga tarátu ni Namarò, yù dágà nga mebubbù sangaw megapu ta aru nga tatolay, tapè mapakomá ira ta liwiliwâ da.

29 Á kagiak ku nikayu, aringakin ámminum sù naggapu sù tabbuk na úbas ta áddè noka nu meppattatádday ittam nga ámminum sù bagu, sangaw nu aijan ittam sù pammagurayán ni Ammò ku."

30 Á kabalin na yaw, nattatádday ira nga nakkansion sù áddáyo ra kâ Namarò. Á nánaw ira laguk nga minay ta puddul na Olibo.

*Yù Pangipalappâ ni Apu Kesu ta Panájí na sangaw ni Eduru kuna*

*Markus 14:27-31; Lukas 22:31-34; Kuan 13:36-38*

31 Á gapu ta pallakák di Apu Kesu nga umay ta puddul, kinagi na sù ira sinudduán na, "Sikayu ngámin, kunangane galâ nga gabi, táttájjián nawà, ta yáyù sangaw yù kapalurò nayù dán nga netúrâ nga Ubobuk ni Namarò, nga kunniauw: 'Papatáyak ku yù mináppárak, á mewarawarâ sangaw yù ira karneru na, gapu ta awán ta manaron nira.'"

32 Ngam sangaw nu maginnanolayà, oluát takayu túrin ta purubinsia na Galilia, á iddagát takayu tân."

33 Á sù pakkagi ni Apu Kesu nira ta táttájjiád da sangaw, kinagi ni Eduru kuna, "Ari sikán. Mássiki nu aggira ngámin nga kábuluk ku yù manájjí nikaw, ngam sikán, arát taka bulubugá nga tájjián," kun na.

34 Ngam kinagi na laguk ni Apu Kesu kuna, "Kuruk yù kagiak ku nikaw, ta sangaw nu gabi, lage na magittárrakkò yù manù, á kapamillum sangawin nga nakkagi ta arám mà ammu."

35 Ngam kinagi na paga ni Eduru kuna, "Mássiki nu matayà sangaw nga mekanâ nikaw, arák ku bulubugá ilímak ta ammu taká!" kun na. Á kunnian gapay yù kinagi nayù ira ngámin nga sinudduán na.

\* 26:17 Yane Piestá yù Panaddamán nayù ira Kudio sù pattalebák nayù daroban ni Namarò sù bale ra sù pakipaggiád da ta Egipto. Á pátiad da gapay yù kígaw nga karneru, nga kunnay sù kingnguá nayù ira ngaw naggaká nira, lage ra pinay yù dágá na ta utun ánná taging na puertá na bale ra, tapè mattalebák lâ yù daroban ni Namarò, ánná ari ira mekanakaná sù ira Egipto, sù pamapáte na ngaw nayù daroban sù ira kaká nga ánná da. † 26:31 Sakariá 13:7

*Yù Pakimállà ni Apu Kesu kâ Namarò ta Gián na Getsemani  
Markus 14:32-42; Lukas 22:39-46*

<sup>36</sup> Á kabalist da kiminán, nánav laguk di Apu Kesu ánná yù ira sinudduán na, á minay ira ta gián nga mangngágan ta Getsemani. Á kinagi ni Apu Kesu nira, “Magitubang kayu saw, ta ek ku bi tuke nga makimi-imállà,” kun na.

<sup>37</sup> Á inipulù na di Eduru ánná yù ira duá nga ánâ ni Sebedo. Á nakalò laguk yù daddam na ánná narámmà yù gáko na.

<sup>38</sup> Á kinagi na nira, “Mággekakin matay ta nepallà nga daddam ku! Maggián kayu bì saw nga mepatturá nikán,” kun na.

<sup>39</sup> Á kabalin ni Apu Kesu nakkagi nira, minárayyu nira ta baddì laguk, á namalittúkak nga nallakat ka dabbun, nga nakimállà, nga kinagi na, “Ammò ku, nu awayyá na, ilillì mà sù jígâ nga patayák ku. Ngam ari yù urè yù mapalurò, nu ari galâ yù urem,” kun na.

<sup>40</sup> Á kabalin na nakimállà, nanoli sù gián nayù ira tallu nga nepulù kuna, á naratang na ira nga nakkaturuk. Á kinagi na kâ Eduru, “Ngattá panò, ta arán naw awayyá nga mepatturá nikán ta mássiki lâ tangoras?

<sup>41</sup> Mattrá kayu laguk nga makimállà, tapè ari kayu mekáttuay sù ángnguruk naw. Ta mássiki nu dán nga naparán yù nonò na tolay nga manguruk, ngam makápi garè yù baggi na, ari ari mamalurò,” kun na.

<sup>42</sup> Á kabalin na nga nilukák ira, minárayyu si Apu Kesu má ta baddì nira, á pinidduán na nakimállà, á kinagi na, “Ammò ku, nu kuruk nga máwák ku, á parubák ku yawe jígâ, tapè mapalurò laguk ngámín yù ipakuám nikán,” kun na.

<sup>43</sup> Á nanoli má sù ira tallu, á naratang na ira nga gikakaturugán ira lâ paga, ta arád da megimmúlák.

<sup>44</sup> Á nánawán na ira má, á namillu nga minay nakimállà nga kunnian galâ sù inipakimállà na.

<sup>45</sup> Á ta kabalin na nakimállà ni Apu Kesu, nanoli laguk sù ira kábulun na. Á iniyabbú na nira, “Ngattá, ta makkaturuk ánná magibannák kayu lâ paga? Jimittálin yù oras nga keyalawâ ku sù ira minálliwâ, sükán nga Kaká na ngámín na tatolay.

<sup>46</sup> Gumikkáng kayu laguk. Et tamin! Innan nawé. Ajjanin yù umay mangituddu nikán,” kun na.

*Yù Paggápù da kâ Apu Kesu  
Markus 14:43-50; Lukas 22:47-53; Kuan 18:3-12*

<sup>47</sup> Á pagubobuk na paga ni Apu Kesu, limibbè si Kudas, nga mekamapulu duá sù ira sinudduán ni Apu Kesu. Á nepulupulù kâ Kudas yù magaru nga tatolay nga aru ármas da nga badáng ánná palù, nga jinok nayù ira kátannangán nga pári ánná yù ira karakalán na Kudio.

<sup>48</sup> Á lage ra umay, kinagi ni Kudas nira yù panákkilalád da kâ Apu Kesu. Ta kinagi na, “Yù tolay nga ummaták ku sangaw, aggina yù aleran naw. Á gaputan naw laguk,” kun na nira.

<sup>49</sup> Á yáyù nga dagarágâ nga jimikkì si Kudas kâ Apu Kesu. “Apu!” kun na kâ Apu Kesu, á inummatán na.

<sup>50</sup> Á kinagi ni Apu Kesu kuna, “Arà! Tuppálam mu yù sinalákkuruk mu,” kun na. Á jimikkì laguk kâ Apu Kesu yù ira nagármas, á ginápù da.

<sup>51</sup> Á gapu ta paggápù da kâ Apu Kesu, aijan yù tádday nga kabbulun na nga inásù na yù badáng na, á kittak na yù aripan nayù kotunán nga pári, á napingarán yù talingá na.

<sup>52</sup> Ngam kinagi ni Apu Kesu kuna, “Iyalák mu yù badáng mu, ta yù tolay nga mangiyusá ta badáng na mangngua ta tolay, aggina gapay yù matay ta badáng.

<sup>53</sup> Arám mu panò ammu ta aijan yù awayyâ nga makimállà ta abbágán nangà nayù Yámà, á dagarágâ nga doban na yù jinibiru ngaroban na nga umay mangiyigù nikán?

<sup>54</sup> Ngam nu kiddawak ku nakuan yù kunnian nga ángngabbák na nikán, ari garè mapatuppál yù dán nga inipetúrâ na ngaw.

<sup>55</sup> Á kinagi na laguk ni Apu Kesu sù ira magaru nga aijan tán, “Tulisánà panò, ta nattagibadáng ánná nattagipalù kayu nga umay maggápù nikán? Arán nawà ginápù sù ngaw pagitubang ku ta kággaggaw sù mangilin nga bale ni Namarò nga nangituddu nikayu.

<sup>56</sup> Ngam mesímmu ngámín danniaw tapè matuppál yù inipetúrâ na ngaw ni Namarò sù ira ngaw ábbilinán na,” kun ni Apu Kesu. Á yù ira ngámín nga sinudduán na, dagarágâ nga nattaláwad da laguk si Apu Kesu.

*Yù Pangikeká ra ánná Pangiyabbû da kâ Apu Kesu  
Markus 14:53-65; Lukas 22:54-55, 63-71; Kuan 18:13-14, 19-24*

<sup>57</sup> Á paggápù nayù ira nagármas kâ Apu Kesu, inipáno ra ta ed da ituluk sù bale ni Kayapas nga kotunán nayù ira pári. Á nepaggagammung tân yù ira mesturu nga mangituddu sù tunung áンna yù ira karakalán na Kudio.

<sup>58</sup> Á jimináddán si Eduru, ngam arayyu lâ nira. Á pakáddè da ta námmuák na bale nayù kotunán nayù ira pári, minay si Eduru gapay ta námmuák áンna nepagitubang sù ira magguárdiá, tapè mánnámmuán na yù kabalin na.

<sup>59</sup> Á yù ira kátannangán nga pári áンna yù ira giriámán nga Kudio, nagala-alek ira ta massistígu nga massirisiri ta ipappaliwâ da kâ Apu Kesu, tapè mapapáte ra.

<sup>60</sup> Á mássiki nu aru yù ira massirisiri ta pangikekâ ra kuna, awán ta nálerád da nga ipamapáte ra kuna. Á ta manganánnuán, ajjan yù duá nga tolay nga minay,

<sup>61</sup> nga nakkagi, "Yane tolay, kinagi na ta aijan yù awayyá na nga dabbátan yù mangilin nga bale ni Namarò, á patáddagan na galâ, á balinan na ta mekatallu nga ággaw," kud da.

<sup>62</sup> Á pakaginná nayù kotunán na pári sù kinagi ra, limikkâ laguk, á iniyabbû na kâ Apu Kesu, "Anni yù itabbák mu karanniai nga ipappaliwâ da nikaw?" kun na.

<sup>63</sup> Ngam ari bulubugá nakkituk si Apu Kesu. Á kinagi nayù kotunán nga pári, "Mapagássingán ka sù ngágan nayù siggatotay nga Namarò, á kagiam mu nikami nu sikaw yù Kiristu nga Aná ni Namarò," kun na.

<sup>64</sup> Á kinagi ni Apu Kesu kuna, "Wan, kuruk yù nakagim. Á kagiak ku nikayu ngámin, ta pappasá na yaw sangaw, nga ari mabayák, masingan nawà, nga Kaká na ngámin na tatolay, nga magitubang sù ággitubangán nayù maráyaw ta jiwanán ni Namarò nga Makáwayyá. Á masingan nawà nga duttál ta kunam nga maggagu ta lángi."

<sup>65</sup> Á pakaginná nayù kotunán nga pári sù kinagi ni Apu Kesu, pinisil na yù barawási na lápay, nga kunnay ta maguyung. Á kinagi na sù ira kábulun na nga pári, "Narákè yù inubobuk na, ta ipton na yù baggi na tapè mepaggittá kâ Namarò. Arát tam máwák yù ira massistígu sù ipappaliwâ da kuna. Ye! Naginná naw yù kinagi na nga aggina yù Aná ni Namarò!

<sup>66</sup> Anni laguk yù ure naw?" kun na. Á kinagi ra, "Kuruk nga nalliwâ nga mepángngà nga matay," kud da.

<sup>67</sup> Á nallulutábád da laguk yù mammang ni Apu Kesu, áンna sinusultù da. Á lippilippák da gapay nayù ira káruán.

<sup>68</sup> Á kinagi ra kuna, "Sikaw nga Kiristu, kanu, labbúnam mè nu asinni yù mallappák nikawl!" kud da.

### *Yù Pangilímak ni Eduru ta Pakánnámmu na kâ Apu Kesu*

*Markus 14:66-72; Lukas 22:56-62; Kuan 18:15-18, 25-27*

<sup>69</sup> Á aijan lâ paga si Eduru nga nepagitubang ta námmuák nayù balay. Á jimikkì kâ Eduru yù babay nga aripan nayù kotunán nga pári, á kinagi na, "Ari panó sikaw gapay yù nepulupulù kâ Kesu nga taga Galilia?" kun na.

<sup>70</sup> Á nilímak ni Eduru ta arubáng da ngámin. Kinagi na, "Arák ku amma-ammu yù kagiam mu," kun na.

<sup>71</sup> Á minárayyu si Eduru ta baddì laguk nga nappángè ta puertá ta jijing na alitù. Á aijan tán yù táddy nga aripan nga babay. Á pakasingan na kâ Eduru, kinagi na sù ira tatolay tán, "Yawe laláki yù kabbulun ni Kesu nga taga Nasaret," kun na.

<sup>72</sup> Á pidduá na nilímak ni Eduru. Á nappagássingán, á kinagi, "Arák ku amma-ammu yane tolay!" kun na.

<sup>73</sup> Á manganánnuán, minárranni kâ Eduru yù ira tatolay nga nattatáddak tân, á kinagi ra kuna, "Kuruk nga sikaw gapay yù kabbulud da! Awán ta awayyám nga mangilímak, ta mepaggittá yù ággubobuk mu sù ággubobuk nayù ira taga Galilia," kud da.

<sup>74</sup> Á nappagássingán má si Eduru, á kinagi na, "Mássiki pagikaruan nangà ni Apu Namarò nu ari kukurugán yù kagiak ku! Arák ku bulubugá amma-ammu yian nga tolay!" kun na. Á dagarágâ nagittarákkò yù manù.

<sup>75</sup> Pakaginná ni Eduru ta pagittarákkò na manù, nanonò na yù kinagi ni Apu Kesu kuna, "Lage na pagittarákkò na manù sangaw nu gabi, namillingin yù pakkagim ta arám mà ammu." Á nánaw si Eduru, ta nepallà yù daddam na, á inigabbuá na nakkulukulé.

<sup>1</sup> Á ta pannawák, naggagammung yù ira kátannangán nga pári ánná yù ira karakalán, nga nakkaká-ubobuk, tapè igagángé ra yù ámmapáte ra kâ Apu Kesu.

<sup>2</sup> Á kabalist da nakkaká-ubobuk, bináluk da si Apu Kesu, á iniyángé ra laguk kâ Gubinador Pilatto nga taga Roma, tapè ikeká ra ta arubáng na.

*Yù Pate ni Kudas Iskariote, nga Nappagápù kâ Apu Kesu  
Kingnguá 1:18-19*

<sup>3</sup> Á si Kudas nga nangiránuk kâ Apu Kesu, narámak na ta pagikaruad da ta pate na si Apu Kesu nga awán ta liwâ na. Á pakánnámmu ni Kudas sù akkuád da, nakalò yù daddam na, á nabababáwi laguk sù kingnguá na. Á en na initoli yù tallupulu nga pirâ nga pinaláta sù ira kátannangán nga pári ánná yù ira karakalán.

<sup>4</sup> Á pangitolni na sù pirâ, kinagi na nira, “Apan naw, ta nakaliwákà gapu ta inipagápù ku yù tolay nga awán ta liwâ na,” kun na. Á simibbák ira nga kinagi kuna, “Á arám mi ammu yian! Sikaw lápay yù makaliwâ tán!” kud da kâ Kudas.

<sup>5</sup> Á iniwári ni Kudas yù tallupulu nga pirâ sù áttallungán nayù mangilin nga kapilliá ni Namarò, á nánaw laguk nga minay nga binesin na yù baggi na, á natay.

<sup>6</sup> Á ta páno ni Kudas, jimmà da laguk nayù ira kátannangán nga pári yù pirâ. Á kinagi ra, “Yawe pirâ yù nepappagá sù inángà na tolay. Mekontarà sù tunung tam nu ilannà tam nakuan yawe pirâ sù ággianán nayù kuártu nga nelimù nga napakappián ta mangilin nga kapilliá,” kud da.

<sup>7</sup> Á kabalist da nakkaká-ubobuk, ed da laguk inigátáng yù pirâ ta dabbun nayù mináddamili, nga pabbalinad da ta pangitanamád da sù ira ari Kudio.

<sup>8</sup> Á yáyù nga mangngágán yane katanamán ta Naragán ta áddè kunangan, gapu ta ginátáng da sù kuártu nga pagá nayù inángà nayù pinapáte ra.

<sup>9</sup> Á kunnian natuppál yù kinagi na ngaw ni Jeremia, nga yù ngaw ábbilinán ni Namarò, nga dán nga netúrâ nga kunniauw:

“Inâ da yù tallupulu nga pirâ nga pinaláta, nga pagá na inángà na tolay nga kinagi nayù ira taga Israel ta pattarátu ra,

<sup>10</sup> á inigátáng da ta dabbun nayù mináddamili, gapu ta yáyù kinagi ni Namarò nikán.”\*

*Yù Pamestigá ni Gubinador Pilatto kâ Apu Kesu  
Markus 15:2-5; Lukas 23:3-5; Kuan 18:33-38*

<sup>11</sup> Á pakáddè nayù ira karakalán na Kudio ta gián ni Gubinador Pilatto, iniyarubáng da si Apu Kesu sù Gubinador, tapè bestigarán na. Á iniyabbû ni Pilatto kuna, “Sikaw panò yù patul nayù ira Kudio?” Á simibbák si Apu Kesu, nga kun na, “Kuruk yù nakagim,” kun na.

<sup>12</sup> Ngam sù pamaliwâ da kuna nayù ira kátannangán nga pári ánná yù ira karakalán, awán bulubugá ta itabbák na.

<sup>13</sup> Á yáyù nga kinagi nayù Gubinador kuna, “Arám mu panò maginná yù ipappaliwâ da nikaw?” kun na.

<sup>14</sup> Ngam ari bulubugá simibbák si Apu Kesu. Awán bulubugá ta initabbák na sù ipappaliwâ da kuna. Á yáyù nga nakalò yù kapállâ nayù Gubinador sù pagimammà na.

*Pinagikáru ra si Apu Kesu ta Matay nga Awán ta Liwâ na  
Markus 15:6-15; Lukas 23:13-25; Kuan 18:39-19:16*

<sup>15</sup> Á kádaragun sù piestá na panaddamád da sù pattalebák nayù daroban, ajjan yù kustombare nayù Gubinador nga mama lubbáng sù tádday nga nebáluk nga pilian nayù íra tatolay.

<sup>16</sup> Á tán nga ággaw, ajjan yù nebáluk nga mangngágán ta Kesu Barabas, nga neparámak sù ira ngámin nga tatolay megapu sù narákè nga kingngikingnguá na.

<sup>17</sup> Á paggagammung nayù ira magaru nga tatolay, yáyù nga iniyabbû na laguk ni Gubinador Pilatto nira, “Asinni yù ikáyâ naw nga palubbángak ku? Si Kesu Barabas? Onu si Kesu nga mangngágán ta Kiristu?” kun na.

<sup>18</sup> Ta ammu ni Pilatto ta mangabubu yù ira karakalán nga Kudio kâ Apu Kesu, á yáyù lâ yù ipangikeká ra kuna.

<sup>19</sup> Á pagitubang na paga ni Gubinador Pilatto sù ámmanunnután, inipakagi nayù atáwa na kuna, “Arám mu akkuán bulubugá yane tolay nga awán ta liwâ na. Ta narigákà ta pattatagenà ku sù gabi, á nepallà yù burung ku megapu kuna!”

\* **27:10** Innan naw yù netúrâ sù libru ni Sakariá 11:12-13

20 Ngam yù ira kátannangán nga pári áんな yù ira karakalán, pinappatapátu ra yù ira magaru nga tatolay ta kiddawad da kâ Pilatto ta palubbángan na si Barabas áんな ipapáte na si Apu Kesu.

21 Á pidduán na laguk nayù Gubinador nga nangiyabbû nira, “Asinni sawe ira duá yù ikáyâ naw nga palubbángak ku?” kun na. Á kinagi ra, “Si Barabas!” kud da.

22 Á iniyabbû ni Pilatto nira, “Anni laguk yù akkuák ku kâ Kesu nga mangngágan ta Kiristu?” kun na. “Ipepátâ mu ta kurù!” kud da ngámin.

23 Á iniyabbû na má ni Pilatto, “Anni má? Anni panò yù liwâ na?” kun na. Á nappanà ira nga nangikatakatol, nga kud da, “Arà! Ipepátâ mu ta kurù!” kud da.

24 Á pakánnámmu ni Pilatto ta awánin ta awayyá na sù ira magaru, áんな natagenà na ta ajjan sangaw yù akkuád da nga jikkù gapu ta nappanà yù pagaragiák da, á nangâ yù Gubinador ta danum tapé baggawán na yù limá na ta arubáng nayù ira tatolay. Á pabbaggo na, kinagi na nira, “Akkuák ku yaw nga ipakánnámmu nikayu ta awán ta liwâ ku megapu sù pamapáte naw sawe tolay! Sikayu lággapay noka yù manabbák kuna!” kun na nira.

25 Á iníkatol nayù ira ngámin nga tatolay nga kinagi ra, “Paguráyám mu lâ, ta sikami áんな yù ira gakagaká mi noka yù manabbák sù kapapáte na!” kud da.

26 Á yáyù nga pinalubbáng na laguk ni Pilatto si Barabas nira. Á kabalin na nangipapaligà kâ Apu Kesu, iniyawâ na sù ira suddálú, tapè ipátâ da ta kurù.

### *Yù Panguyoyung nayù ira Suddálú kâ Apu Kesu*

*Markus 15:16-20; Kuan 19:2-3*

27 Á initallung da laguk nayù ira suddálú ni Pilatto si Apu Kesu sù bale nayù Gubinador. Á inagálád da ngámin yù ira káruán nga kábulud da nga suddálú, á nagarimummungád da si Apu Kesu.

28 Á niluppù da yù barawási na, á binarawasiád da ta apaddu nga ujjojin, nga kun na barawási na patul.

29 Á nilubik da yù sî nga pidde ra ta kun na kuroná, nga inibarungù da kuna. Á inipatangngal da yù tagisi ta jiwanán nga limá na nga kun na baston na patul. Á namalittúkak ira ta arubáng na, nga áppè maddayaráyw ta panguyo ra kuna. Á kinagi ra, “Ajjan ka pá nga maráyw nga Patul nayù ira Kudio!” kud da.

30 Á nallulutábád da, á iná da yù tagisi nga sinangngalán na, á inipalapalù da ta ulu na.

31 Á kabalid da nanguyoyung kuna, iniriád da yù apaddu nga inibarawási ra kuna, á inibarawási ra lággapay kuna yù barawási na lápay. Á inilawád da, tapè ed da ipátâ ta kurù.

### *Yù Pangipátâ da kâ Apu Kesu ta Kurù*

*Markus 15:21-32; Lukas 23:26-43; Kuan 19:17-27*

32 Á páno nayù ira suddálú ta ili, nga mammártiá ta dálán, nerapunád da yù tolay nga taga Sirine nga mangngágan ta Simon. Á inipakáttu ra kuna yù kurù ni Apu Kesu.

33 Á nakáddé ira ta gián nga mangngágan ta Golgota, nga Gián na Balakábâ yù kebalinán nayù ngágan na.

34 Á iniyawâ da nakuan kâ Apu Kesu yù binaráyág ngakirugán ta uru nga napè, nga ámannay ta anutù. Ngam ta pakakákkâ na kuna, arán na ininum.

35 Á inipátâ da ta kurù.

Kabalid da nangipátâ kâ Apu Kesu ta kurù, nabbúnù ira tapè pabballáyád da yù gámi na.

36 Á nagitubang ira laguk nga magguárdiá kuna.

37 Á sù kurù ta aruk na ulu na ajjan yù nipe ra nga netúratán nga inipappaliwâ da kuna nga kunniauw: “Yaw si Kesu nga Patul nayù ira Kudio.”

38 Á ajjan gapay duá ira nga tulisán nga inipátâ da ta kurù da. Á pamatáddak da sù ira kurù da, nattangngán nayù ira tulisán si Apu Kesu, ta pinatáddak da yù tádday sù jiwanán na áんな yù táddy sù jimigi na.

39 Á yù ira tatolay nga nattalebák tán, gilingilingián ira nga makkakagi kâ Apu Kesu.

40 Kinagi ra kuna, “Sikaw yù nakkagi ta dabbátam mu yù bale ni Namarò, á patáddagam mu galâ nga balinan ta tallu nga ággaw! Ye! Arà! Iyigù mu ngè laguk yù baggim, nu Anâ naka ni Namarò! Ámmutták ka ngè laguk saw!” kud da.

41 Á yù ira kátannangán nga pári, yù ira mesturu nga mangituddu ta tunung áんな yù ira karakalán, kunnian gapay yù ángnguyo ra kuna.

42 Kinagi ra, “Ajjan kanu yù ira iniyígù na, ngam arán na meyígù yù baggi na, mássiki nu aggina kanu yù Patul nayù ira taga Israel! Ámmutták laguk nakuan kunangan, á manguruk ittam kuna!

<sup>43</sup> Ikatalà na kanu si Apu Namarò! Á kinagi na ta aggina yù kuruk nga Anâ ni Namarò. Si Namarò nakuan laguk yù mangiyígù kuna, nu kuruk nga ikáyâ na,” kud da.

<sup>44</sup> Á kunnian gapay yù pamarabárù da kuna nayù ira tulisán nga kagiddán na nga nepatà ta kurù da.

#### *Yù Pate ni Apu Kesu*

*Markus 15:33-41; Lukas 23:44-49; Kuan 19:28-30*

<sup>45</sup> Á ta tangngá na ággaw, nakkallà yù tangapáddabbunán áddè ta alas tares, nga pannarek na bilák ta págák.

<sup>46</sup> Á ta alas tares ta págák, inikáddagâ na lâ nakkatol ni Apu Kesu ta nasikan, á kinagi na, “Eli, Eli, lema sabák tani?” kun na. Á yaw kebalinán nayù kinagi na, “Ammò ku nga Apu Namarò, ngattá, ta sinájjíam mà?” kun na.

<sup>47</sup> Pakkatal ni Apu Kesu, á yù ira tatolay nga aranni kuna, naginná ra, á kinagi ra, “Katólán na támma yù ngaw Elias nga ábbilinán,” kud da.

<sup>48</sup> Á dagarágâ nga nakkarerá yù táddy nira nga en na inâ yù kun na sine na áttabbatabbúrù nga nakatáng. Á inipasassà na sù nássam nga inumad da, á inipe na ta áttukil, tapè ipasussù na kâ Apu Kesu.

<sup>49</sup> Ngam yù ira káruán nga tatolay, kinagi ra, “Magiddak ittam lábbì, tapè masingat tam nu umay si Elias nga mangiyígù kuna,” kud da.

<sup>50</sup> Á nakkalli mángin laguk ta nasikan si Apu Kesu, á inibbatán na yù ikararuá na, á nagattâ yù inángà na.

<sup>51</sup> Á pakagattâ na inángà ni Apu Kesu, negiddán nga napisil nga naggadduá yù nakannak nga kortiná nga nerijjing sù kangilinán nga lágum, nga paggianán ni Namarò sù mangilin nga kapilliá. Á namegapu yù pisil na kortiná ta utun na ta áddè ta gukák, ánnna nallunik, á napakkapakká yù ira darakal nga batu.

<sup>52</sup> Á nabruká yù ira kuebá nga katanamáni, á aru yù ira nanguruk kâ Namarò nga naginnanolay laguk nga naggapu sù ira námmatay.

<sup>53</sup> Ágilawalanán ira sù tanam da. Á ta kabalin ni Apu Kesu nga naginnanolay, minay dannian laguk sù mangilin nga ili na Jerusalem, á aru yù ira tatolay nga nakasingan nira.

<sup>54</sup> Á yù kapitán ánnna yù ira suddálú na nga magguárdiá kâ Apu Kesu, pakasingad da ta nallunik ánnna yù ngámin nga nesímmu, á nepallà yù assing da. Á kinagi ra, “Kuruk nga Anâ ni Namarò yaw lagugam!” kud da.

<sup>55</sup> Á aru gapay yù ira bábbay nga naggián ta arayyu ta baddì, nga mangirípâ. Aggira yù nepulupulu kâ Apu Kesu ánnna nangabbák kuna áddè sù páno na ta Galilia.

<sup>56</sup> Á ajjan sù ira bábbay di Maria Maddalena, kári Maria nga yená di Ime kâ Kusè, ánnna yù yená nayù ira ánâ ni Sebedo.

#### *Yù Ketanam ni Apu Kesu*

*Markus 15:42-47; Lukas 23:50-56; Kuan 19:38-42*

<sup>57</sup> Á ta págágún limibbè yù táddy nga maríku, nga mangngágan ta Kusè nga taga Arimatia. Aggina gapay yù siminuttul kâ Apu Kesu.

<sup>58</sup> Á minay laguk kâ Pilatto, á kiniddo na kuna yù baggi ni Apu Kesu. Á binilin ni Pilatto ira ta iyawâ dà kuna.

<sup>59</sup> Á en na laguk inâ ni Kusè yù baggi ni Apu Kesu, á binungubungun na sù bagu nga sinnun nga kun na kustombare ra.

<sup>60</sup> Á pineddá na sù unak na kuebá, nga kapákkokkok na lâ paga ta batu tapè dán nga naparán ta baggi na lápay nu matay nakuan. Á iniserrá na sù áttallungán na tanam yù dakal nga batu nga kinarebu na sù puertá na, á nánaw.

<sup>61</sup> Á ajjan paga tán di Maria Maddalena ánnna yù táddy nga Maria, nga nabattáng nga nagitubang ta arubáng nayù tanam.

#### *Yù ira Magguárdiá sù Tanam ni Apu Kesu*

<sup>62</sup> Á ta pannawák na Sabadu, nga ággibannák nayù ira Kudio, minay yù ira kátannangán nga pári ánnna yù ira Parisio ta gián ni Gubinador Pilatto.

<sup>63</sup> Á kinagi ra kuna, “Apu, manonò mi yù kinagi nayù minángngilogò ta keggá na paga nga matolay. Kinagi na ta maginnanolay sangaw nu mappasá yù tallu nga ággaw.

<sup>64</sup> Á yáyù nga ikomá mi nikaw ta dobam mu yù ira magguárdiá sù tanam na áddè ta mappasá yù mekatallu nga ággaw, marakè ed da kokotan nayù ira sinudduán na yù baggi na, nepatalugáring ta istoriá ra sangaw ta naginnanolayin. Á nu kunnian yù ángngilogò da sangaw, mappanà laguk sangaw yù pangiloku ra nikami,” kud da.

<sup>65</sup> “Wan á,” kun ni Pilatto. “Mangâ kayu laguk sù ira magguárdiá, ánnna ipataron naw nira ta napiá yù netanamán na,” kun na.

<sup>66</sup> Á minay ira laguk sù kuebá nga netanamán na, á nasingad da ta naserrán yù tanam ta napiá, á minárkád da yù batu nga tákkak na kuebá, tapè ammu ra nu ajjan yù mabbuká sù tanam. Á bittáng da laguk tán yù ira suddálú nga magguárdiá.

## 28

### *Yù Paginnanole ni Apu Kesu*

*Markus 16:1-10; Lukas 24:1-12; Kuan 20:1-10*

<sup>1</sup> Á pappasá na Sabadu, nga ággibannák, á ta alippánnawák na Liggú, minay di Maria Maddalena ánnna yù tádday nga Maria, sù netanamán ni Apu Kesu, ta ed da sinullúnán.

<sup>2</sup> Á inikáddagá lâ nallunik ta masikan. Ta ajjan yù daroban ni Namarò nga nappagukák nga naggapu ta lángì, á en na laguk kinarebu yù batu nga nepanerrá sù áttallungán na tanam, á yáyù nagitubangán na.

<sup>3</sup> Á makatulang yù mammang na nga kun na kilâ, ánnna kitapuraw yù gámì na.

<sup>4</sup> Á yù ira suddálú nga magguárdiá, pakasingad da kuna, namippippik ira ta assing da, á napeddá ira nga kun na natay.

<sup>5</sup> Á nagubobuk yù daroban sù ira bábbay. Kinagi na nira, “Ari kayu maganássing. Ammù gemma ta ala-aleran naw si Apu Kesu nga nepátá ta kurù.

<sup>6</sup> Awánin saw, ta naginnanolayin nga kun na kinagi na ngaw. Tullung kayu laguk, ta en naw innan yù nagiddán na.

<sup>7</sup> Á mabbíbí kayu lâ, ta móanaw kayu nga umay mangipakánnámmu sù ira sinudduán na ta naginnanolayin, á mapolungin ánnè nikayu nga umay ta Galilia. Maporián kayu laguk, ta masingan naw lâ sangaw túrin. Arà! Móanaw kayin, ta yaw lâ kagiak ku nikayu,” kun nayù daroban nira.

<sup>8</sup> Á pakkagi nayù daroban, inapurá ra laguk nayù ira bábbay nga nánaw sù tanam. Á mássiki nu maganássing ira, ngam nepallà yù pagayáyâ da gapay. Á nakkarerá ira, ta umay ira mangiparámak sù ira sinudduán ni Apu Kesu.

<sup>9</sup> Á páno ra nga nakkarerá, inikáddagá lâ jíminápun nira si Apu Kesu, á kinagi na nira, “Ajjan kayu pál!” Á pakasingad da kuna, namalittúkak ira ta arubáng na, á sinangngalád da yù takki na ánnna nakimoray ira kuna.

<sup>10</sup> Á kinagi ni Apu Kesu nira, “Ari kayu maganássing. En naw laguk kagian sù ira wáwwagi ta umay ira ta Galilia. Á túrin sangaw yù pakkakásinganát tam,” kun ni Apu Kesu nira.

### *Yù Iniránuk nayù ira Suddálú nga Nagguárdiá*

<sup>11</sup> Á páno nayù ira bábbay, nánaw gapay yù ira káruán nga suddálú nga nagguárdiá, á minay ira ta ili na Jerusalem tapé iránuk da sù ira kátannangán nga pári yù ngámin nga nesimu.

<sup>12</sup> Á yáyù nga nepaggagammung yù ira kátannangán nga pári sù ira karakalán, tapé ubobugad da nu anni laguk yù akkuád da. Á kabaliid da nakkaká-ubobuk, aru yù kuártu nga iniyawâd da sù ira suddálú.

<sup>13</sup> Á kinagi ra nira, “Kagian naw lâ sù ira tatolay ta minay yù ira sinudduán ni Kesu ta tangngá na gabi sù ira pakkaturuk naw, á kinokò da yù baggi na.

<sup>14</sup> Á nu marámak na sangaw nayù Gubinador ta nakkaturuk kayu ta pagguárdiá naw, ari kayu maburung, ta sikami yù makiubobuk kuna, tapé arán nakayu pagikaruan,” kud da nira.

<sup>15</sup> Á ináda laguk nayù ira suddálú yù kuártu, á kinuruk da yù kinagi ra nga akkuád da. Á yáyù lâ paga yù dámak nga massamâ sù ira Kudio áddè ta ággawo.

### *Yù Pappasingan ni Apu Kesu sù ira Sinudduán na*

*Markus 16:14-18; Lukas 24:36-49; Kuan 20:19-23; Kingnguá 1:6-8*

<sup>16</sup> Á minay laguk yù ira mapulu tádday nga sinudduán ni Apu Kesu túrin ta Galilia, sù puddul nga kinagi ni Apu nga angayád da.

<sup>17</sup> Á pakasingad da kâ Apu, nakimoray ira kuna, mássiki nu nabbábáng paga yù ira káruán.

<sup>18</sup> Á jimíkkì si Apu Kesu nira, á kinagi na nira, “Neddánà sù ngámin pakáwayyá nayù mammaguray ta lángì ánnna dabbuno.

<sup>19</sup> Umay kayu laguk ta ngámin nga tatolay ta ngámin nga lugár, á ituddu naw nira yù inituddù nikayu, tapé manguruk ira gapay nikán. Á jigutan naw ira laguk, megapu sù pakáwayyá ni Ammò ku ánnna yù pakáwayyá nga Anâ na, ánnna yù pakáwayyá nayù Mangilin nga Ikararuá.

20 Á ituddu naw nira ta napiá, tapè tuppálad da ngámin yù bilik ku nikayu. Á nonopan naw yaw, nga aijjanà nga mannanáyun nga mepulupulù nikayu ta áddè ta pagáddekán na ággaw."

## Yù Napiá nga Dámak nga Meyannung kâ Apu Kesu Kiristu nga Initúrâ ni Markus

*Yù Meyannung sù Initúrâ ni Markus*

Si Markus yù tádday sù ira appâ nga nangitúrâ sù napiá nga dámak nga meyannung kâ Apu Kiristu, á inistoriá na yù aru nga makapállâ nga kingngi-kingnguá ni Apu, yù pamagaddátu na, yù pammapiá na sù ira máttak, yù pamapáno na sù ira anitu, yù pangiyangngà na sù pate na megapu nittam, ánná yù paginnanole na.

Ta pagubobuk ni Apu Kesu, abbúnan na yù baggi na ta “Kaká na ngámin na tatolay,” (2:10). Á sù ira káruán nga ággubobuk, netúrâ ta “Anâ na toláy.” Á yá kebalinán na, ta mássiki nu tolay si Apu Kesu, aggina yù sigga-inángà nga makáwayyá. Á ta pamegapu nayù libru ni Markus, kinagi na, “Netúrâ sawe yù napiá nga dámak nga meyannung kâ Apu Kesu Kiristu nga Anâ ni Namarò.”

*Yù Mayán na yawe Napiá nga Dámak*

Yù Bilin nga Inilayalayâ ni Kuan nga Minánnigù (1:1-8)

Yù Pakirigù ni Apu Kesu kâ Kuan ánná Pamarubá ni Satanas kuna (1:9-13)

Yù Keggá ni Apu Kesu sù Purubinsia na Galilia (1:14-9:50)

Yù Ánge ni Apu Kesu ta Jerusalém (10:1-52)

Keggá ni Apu Kesu ta Jerusalém sù Maporián nga Ligguán na (11:1-15:47)

Yù Paginnanole ni Apu Kesu (16:1-8)

Mappasingan si Apu Kesu ánná Manoli ta Lángì (16:9-20)

*Yù Bilin nga Inilayalayâ ni Kuan nga Minánnigù*

*Mattiu 3:1-12; Lukas 3:1-18; Kuan 1:19-28*

<sup>1</sup> Netúrâ sawe yù napiá nga dámak nga meyannung kâ Apu Kesu Kiristu nga Anâ ni Namarò.

<sup>2</sup> Kunniaw yù pamegapu nayù napiá nga bilin ni Namarò. Ajjan yù inipetúrâ ni Namarò kâ Isaya, nga yù ngaw nabbilinán na. Á initúrâ ni Isaya yù kinagi na ngaw ni Namarò sù Anâ na, nga kun na,

“Yawe yù ábbilinák ku nga dobak ku ta mapolu ánnè nikaw,  
tapè paránan na yù dálan nga pallakarám mu.”\*

<sup>3</sup> Aggina yù makkatakátol ta kalállammatán. Yaw ikatakátol na:

‘Umayin si Apu! Paránan naw yù dálan na.

Tunungan naw yù pallakarán na.’ †

<sup>4</sup> Á napalurò yawe nga initúrâ ni Lákay Isaya, ta jmittál ta kalállammatán si Kuan nga Manigù. Á aru yù ira tatolay nga minay ta kalállammatán, tapè ginniginnád da yù kagian na. Á kinagi na nira, “Mabbabáwi kayu sù liwiliwâ naw, ánná makirigù kayu, nga pangipasinganán naw sù pabbabáwi naw, á pakomán na kayu ni Namarò,” kun na.

<sup>5</sup> Á naddagaráddán yù ira tatolay nga minay kâ Kuan ta kalállammatán, nga naggapu ta tanga purubinsia na Judiya ánná yù ira ngámin nga taga Jerusalém. Á inipalapalappâ da yù liwiliwâ da, á jinigù ni Kuan ira sù danum na Jordan.

<sup>6</sup> Nabbarawási si Kuan ta gámi nga napadday ta duddù na kamel, nga ayám nga sináppukul barâ na. Á nabbarakâ ta tabbi na ayám. Á yá lâ kanan na yù durun ánná issi na asúkán.

<sup>7</sup> Á yawe yù bilin nga inilayalayâ ni Kuan: “Ajjan yù umayin nga maporián nga tumubbâ nikán, nga makáwayyá ánnè nikán. Á aringà mepángngà nga mangubbák ta kaddang na sapátu na.

<sup>8</sup> Á jitutat takayu, á danum lâ yù ipanigù ku nikayu. Ngam aggina, ta panigù na nikayu, tanakuán yù ánnigù na. Ta ari danum yù ipanigù na nu ari galâ yù Mangilin nga Ikaranuá, nga ipepulù na nikayu,” kun ni Kuan sù ira tatolay.

*Yù Pakirigù ni Apu Kesu kâ Kuan*

*Mattiu 3:13-17; Lukas 3:21-22*

<sup>9</sup> Á pangilayalayâ ni Kuan ta kalállammatán, minay kuna si Apu Kesu, nga naggapu ta ili na Nasaret ta purubinsia na Galilia. Á jinigù na laguk ni Kuan sù danum na Jordan.

\* <sup>1:2</sup> Netúrâ yù káruán nayù kinagi na gapay sù libru ni Malakia 3:1      † <sup>1:3</sup> Isaya 40:3

<sup>10</sup> Gon ni Apu Kesu nga naggapu ta danum, dagarágâ nga nasingan na yù lángì nga nabukatán ánná yù Ikararuá ni Namarò nga mappagukák nga umay maddappá kuna ta kun na palomá.

<sup>11</sup> Á aijan yù ngárál nga naggapu ta lángì, á kinagi na, “Sikaw yù Anâ ku nga iddukak ku, á ayatánà nikaw!”

*Yù Pamarubá ni Satanas kâ Apu Kesu*

*Mattiu 4:1-11; Lukas 4:1-13*

<sup>12</sup> Á kabalín ni Namarò nga nagubobuk, dagarágâ nga inipángè nayù Mangilin nga Ikararuá si Apu Kesu ta kalállamatán.

<sup>13</sup> Á naggián si Apu Kesu ta kalállamatán ta appátapulu nga ággaw, ánná pinarubán ni Satanas nga liwatan na. Á awán ta kabbulun na, nu ari lá yù ira simaron nga ayám. Ngam minay yù ira daroban ni Namarò nga mangabbák kuna.

*Yù Pagágál ni Apu Kesu sù ira Olu nga Makituddu kuna*

*Mattiu 4:12-22; Lukas 4:14-15; 5:1-11*

<sup>14</sup> Á nipagápù nayù mammaguray ta Judiya si Kuan, nga pinukù na ta ábbalurán. Á ta keggá ni Kuan ta ábbalurán, nánaw si Apu Kesu nga nanoli ta Galilia, nga mangilayalayâ sù napiá nga dámak nga bilin ni Namarò.

<sup>15</sup> Yá inilayalayâ na, “Natuppálin yù ággaw nga sinullà ni Namarò. Á duttálín nikayu yù pammagure ni Namarò. Likurán naw laguk yù liwiliwâ naw, á kurugan naw yù napiá nga dámak,” kun na.

<sup>16</sup> Á ta pattalebák ni Apu Kesu ta aggik na bebay na Galilia, nasingan na yù ira duá nga mawwagi, di Simon kâ Andares, nga mattabukul, gapu ta yáyù ángngalluád da.

<sup>17</sup> Pakasingan ni Apu Kesu nira, inagálán na ira, “E kayu saw ta tumuttul kayu nikán,” kun na. “Á ta kun na káru na sírá nga apan naw kunangan, á kunnian gapay yù káru na tatolay nga patutulan naw nikán noka,” kun na.

<sup>18</sup> Pakaginná ra sù kinagi na, dagarágâ nga nánawád da yù ira tabukul da. Á minay ira nepulupulù nga makituddu kuna.

<sup>19</sup> Á nallakák di Apu Kesu ta baddi paga ta aggik na bebay. Á pakáddè da ta baddi, nasingan na yù ira duá nga ánná ni Sebedo, di Ime kâ Kuan, nga ipolí da yù ikâ da sù barange ra.

<sup>20</sup> Pakasingan ni Apu Kesu nira, dagarágâ nga inagálán na ira gapay. Á nánawád da di Sebedo nga ammò da sù barangay, ánná yù ira kábulud da nga minággissirá. Á minay ira nepulupulù nga makituddu kâ Apu Kesu gapay.

*Yù Pamapáno ni Apu Kesu ta Anitu sù Tolay*

*Lukas 4:31-37*

<sup>21</sup> Manganánnuán, limibbè di Apu Kesu ta ili na Kapernium. Á kunnay ta kustombare na Kudio ta ággaw na Sabadu nga ággibannák da, dagarágâ nga simillung si Apu Kesu ta kapilliá, á nangituddu sù ira tatolay.

<sup>22</sup> Á pakaginná ra kuna, napállâ ira sù pangituddu na, gapu ta makáwayyá yù ángngituddu na ánné sù ángngituddu nayù ira mesturu na rilisiód da.

<sup>23</sup> Á simillung laguk sù kapilliá yù tolay nga naggusapel ta mamopoyung nga anitu.

<sup>24</sup> Á iniyássá-ássikan ná yù ubobugan na, á kinagi na, “Anni yù akkuám mu nikami nga anitu, Kesu nga taga Nasaret? Em mu kami talamánan? Ammu taka gemma, sikaw yù Mangilin nga naggapu kâ Namarò,” kun na.

<sup>25</sup> Ngam gimmá ni Apu Kesu, “Arám mà ubu-ubobugán. Panawám mu yawe tolay.”

<sup>26</sup> Á pinabballiák nayù anitu yù tolay. Á pakkalli nayù anitu, nánawán na.

<sup>27</sup> Á yù ira tatolay nga naggagammung, pakasingad da karanniaw, napállâ ira. Á nakkaká-ubobuk ira, á kinagi ra, “Anni panò danniaw? Kuruk nga bagu yù ituddu na gemma! Sigga-pakáwayyá nga maggammá, mássiki sù ira mamopoyung nga anitu, á kurugad da yù kagian na!” kud da.

<sup>28</sup> A dagarágâ nga iniparámak da yù meyannung kuna sù tanga purubinsia na Galilia.

*Yù Pamammapiá ni Apu Kesu sù ira Máttakí*

*Mattiu 8:14-17; Lukas 4:38-41*

<sup>29</sup> Á kabalín ni Apu Kesu namapánaw sù anitu, dagarágâ nga nánaw sù kapilliá, nga nepulù kári Ime kâ Kuan, á minay ira ta bale ri Simon kâ Andares.

<sup>30</sup> Á labbè da ta bale ra, naratang da yù bakabákà nga katugángán ni Simon, nga nagiddá gapu ta makkulikuk. Á dagarágâ da nga kinagi kâ Apu Kesu.

<sup>31</sup> Pakaginná ni Apu Kesu, jimikkì kuna. Á sinangngalán na yù limá na, á pinagikkáng na. Á gíkkáng nayù bakabákà, nammapiá ngín. Á en na ira pinakán.

<sup>32</sup> Á manganánuán, ta pajibbà, minay kâ Apu Kesu yù ira tatolay nga nangituluk sù ira máttaki áンna yù ira tarepoyungán na anitu.

<sup>33</sup> Á naggagammung ira ngámìn nga tangelián nga naddarassil sù lawán na puertá na balay.

<sup>34</sup> Á aru yù ira pinammapiá ni Apu Kesu, nga natakì ta makkakerumá nga takitan. Á aru yù ira anitu nga pinapáno na, á arán na ira anugutan nga magubobuk, ta ammu ra ta aggina yù Anâ ni Namarò.

*Yù Pangilayalayâ ni Apu Kesu sù Purubinsia na Galilia*

*Lukas 4:42-44*

<sup>35</sup> Á ta alippánnawák, pagittarakkò na manù, nallákuâ nga nánaw si Apu Kesu nga minay ta gián nga awán ta tatolay, tapè makimállà kâ Namarò.

<sup>36</sup> Á pakánnámmu ra ta awán si Apu Kesu, minay di Simon áンna yù ira kábulun na nga magalek kuna.

<sup>37</sup> Pakálek da kuna, kinagi ra, "Ngámìn nga tatolay, alerad daka," kud da.

<sup>38</sup> "Mánaw ittam laguk," kun ni Apu Kesu nira. "Et tamín sù ira káruán nga babálay, tapè ilayalayâ ku nira gapay yù napiá nga dámak, ta yáyù sinalákkuruk ku nga minay saw," kun na.

<sup>39</sup> Á minay laguk nga mangilayalayâ sù ngámìn nga kapilliá na Kudio sù tanga purubinsia na Galilia, á pinapáno na yù ira anitu sù ira tatolay nga barániituán.

*Yù Pamammapiá ni Apu Kesu sù Naggoggong*

*Mattiu 8:1-4; Lukas 5:12-16*

<sup>40</sup> Á minay jímkki kâ Apu Kesu yù naggoggong, á namalittúkak ta arubáng na nga makimállà kuna, á kinagi na, "Apu, nu ikáyâ mu, makáwayyá ka nga mamammapiá nikán," kun nayù naggoggong kâ Apu Kesu.

<sup>41</sup> Á pakasingan ni Apu Kesu kuna, nakalò yù allà na. Á sinonnâ na yù limá na, á sinámmi na yù naggoggong. Á kinagi na kuna, "Yáyù gemma ikáyâ ku akkuan! Mammapiá ken laguk," kun na.

<sup>42</sup> Á ta pagubobuk ni Apu Kesu, dagarágâ nga nammapiá yù naggoggong, áンna napakarenuánin yù baggi na.

<sup>43</sup> Á lage na pinapáno ni Apu Kesu yù tolay, sinaddánán na.

<sup>44</sup> Á kinagi na, "Arám mu bulubugá kagian ta tolay. Daretiu ka nga umay mappasingan sù pári na Kudio. Á ipeyátáng mu sù pári yù iyawâ mu kâ Namarò nga kunnay sù kinagi ni Moyses, tapè manguruk yù ira tatolay ta napakarenuán ken," kun ni Apu Kesu kuna.

<sup>45</sup> Ngam ta páno na tolay, en na garè iniparámak sù ili ánná babálay. Á yáyù nga ari makángay si Apu Kesu ta ili, marakè maggugúru yù ira tatolay kuna. Á naggián lâ ta agayyuán. Á naddagaráddán yù ira tatolay nga minay kuna nga naggapu ta ngámìn nga lugár.

## 2

*Pammapián ni Apu Kesu yù Tolay nga Ari Makaguyu*

*Mattiu 9:1-8; Lukas 5:17-26*

<sup>1</sup> Á pappásá nayù ira ággaw nga pangituddu ni Apu Kesu ta agayyuán, nanoli ta ili na Kapernium. Á narámkay nayù ira tatolay yù labbè na.

<sup>2</sup> Á minay ira naggagammung sù gián na, ádèt ta awán ta paggianád da mássiki sù lawán na puertá. Á inilayalayâ na nira yù bilin ni Namarò.

<sup>3</sup> Á pangilayalayâ ni Apu Kesu, limibbè yù appâ nga tolay, á kináttu ra yù tolay nga matakì, nga kúnna natay baggi na.

<sup>4</sup> Á gapu ta ari ira makarakkì kâ Apu Kesu megapu ta magaru nga tatolay, minuné ira ta sináttatapán nga atâ na balay. Á binobbotád da yù atâ sù aruk ni Apu Kesu, nga pangilabbutád da sù matakì, nga nagiddá sù dapan na. Á inayáyud da sù arubáng ni Apu Kesu.

<sup>5</sup> Á pakasingan ni Apu Kesu ta inipanapanà da lâ nga inituluk kuna, natagenà na yù ángngikatalà da kuna, á kinagi na sù tolay nga kun na natay yù baggi na, "Kopun, napakomá ngín yù ira liwiliwâ mu," kun na.

<sup>6</sup> Á nagitubang gapay tán yù ira mesturu nga mangituddu sù tunung. Á pakaginná ra sù kinagi ni Apu Kesu sù matakì, kagiad da ta nonò da,

<sup>7</sup> “Ngattá, ta kunniaw yù ubobuk na yawe tolay? Potuán na pá si Namarò! Asinni panò makapakomá ta liwâ nu ari lâ si Namarò!” kud da ta nonò da.

<sup>8</sup> Á dagarágâ nga natagenà ni Apu Kesu yù nonò da. Á kinagi na nira, “Ngattá, ta kagian naw ta nonò naw ta awánà ta awayyá nga makkagi sù kinagi sù matakí?

<sup>9</sup> Anni panò yù ikáyâ naw nga kagiak ku nakuan sù tolay nga kun na natay yù baggi na? Á ta ángngarigán, nu kagiak ku kuna nakuan, ‘Napakomá ngin yù ira liwiliwâ mu,’ onu kuk ku lâ, ‘Gumikkáng ka, apam mu yù dapam mu, á mallakák ka,’ kuk ku nakuan?

<sup>10</sup> Ngam yae yù akkuák ku, tapè kánánmuún naw ta sikán nga Kaká na ngámin na tatolay yù makáwayyá sawe dabbuno nga mamakomá ta liwâ,” kun ni Apu Kesu nira. Á kinagi na sù matakí nga natay yù baggi na,

<sup>11</sup> “Yawe yù kagiak ku nikaw. Gumikkáng ka laguk, á apam mu yù dapam mu, á lubbè ka lâ ta balem,” kun na.

<sup>12</sup> Á gimikkáng yù matakí, á dagarágâ inakkâ na yù dapan na. Á ta arubáng da ngámin, nappabattáng nira nga nánaw. Á napállâ ira, á jináyo ra si Namarò. Á kinagi ra, “Awán paga ta nasingam mi nga kunniaw, nu ari lâ paga kunangan,” kud da.

*Yù Pagágál ni Apu Kesu kâ Libi*

*Mattiu 9:13; Lukas 5:27-32*

<sup>13</sup> Á nánaw si Apu Kesu nga nanoli ta aggik na bebay. Á nallalabbè kuna yù magaru nga tatolay. Á sinudduán na ira.

<sup>14</sup> Á manganánnuán, nallakák paga, á nasingan na si Libi nga anâ ni Alpio nga mináttuki ta buwì nga nagitubang sù upisina na. Á kinagi ni Apu Kesu kâ Libi, “Tuttulam mà.” Á gimikkáng si Libi, á siminuttul kâ Apu Kesu.

<sup>15</sup> Á minay laguk di Apu Kesu ánná yù ira makituddu kuna nga nepakkákán sù bale ni Libi. Á nepagitubang tán gapay yù ira kábulun ni Libi nga minángngalawâ ta buwì ánná yù ira kárúán nga minálliwâ, gapu ta aru yù ira danniaw nga siminuttul kâ Apu Kesu.

<sup>16</sup> Á yù ira mesturu nga Parisio, nasingad da si Apu Kesu nga nepakkákán sù ira minálliwâ ánná yù ira mináttuki ta buwì, nga maddarogâ ánná mangilogò. Pakasingad da ta nepakkákán si Apu Kesu sù ira ilulludde da, kinagi ra sù ira tudduán ni Apu Kesu, “Ngattá ta mepakkákán sù ira mináttuki ta buwì ánná yù ira kárúán nga minálliwâ?” kud da.

<sup>17</sup> Á pakaginná ni Apu Kesu sù iniyabbû da, kinagi na nira, “Á yù ira nga napiá yù gawagawáyáda, ari ira magáwák ta minángnguru, nu ari galâ yù ira máttakí. Ásikán, aringà umay nga magágál sù ira nga kagiad da ta awán ta liwâ da, nu ari galâ ta umayá nga magágál sù ira nga ammu ra yù liwâ da.”

*Yù Ituddu ni Apu Kesu nga Meyannung sù Ággaw nga Arád da Pakkákán*

*Mattiu 9:14-17; Lukas 5:33-37*

<sup>18</sup> Á yù ira makituddu kâ Kuan ánná yù ira makikultu ta Parisio, ngilinad da yù tádday nga ággaw nga ari ira kumán, tapè makimállâ ira kâ Apu Namarò. Á minay yù ira kárúán nga tatolay nga nangiyabbû kâ Apu Kesu, á kinagi ra, “Mesturu, ari kumán yù ira makituddu kâ Kuan ánná yù ira Parisio. Ngam yù ira tudduám mu, anni má ta kumán ira?” kud da.

<sup>19</sup> Á kinagi ni Apu Kesu nira, “Á ta ángngarigán, nu aijan yù bodá, manaki panò kumán yù ira makibodá nu aijan yù nobiu nira? Arán na awayyá nga ari ira kumán nu aijan paga yù nobiu nira.

<sup>20</sup> Á duttál sangaw yù ággaw nga páno nayù nobiu nira, á maraddam ira, á ari ira laguk kumán,” kun ni Apu Kesu nira.

<sup>21</sup> Á nagángngarigán si Apu Kesu, ta ipakánnámmu na nira ta ari metádday yù ngaw netuddu nira ánná yù ituddu na nira. Á kinagi na, “Awán ta magappíl ta bagu ta dán nga sinnun, ta nu meyappíl kuna, kubbâ yù bagu sangaw nu mebabál ánná mapisil yù dán, á mappanà laguk yù pisil na sangaw,” kun na.

<sup>22</sup> Á kunnian gapay sù ira nga mappadday ta binaráyáng. Awán ta mangipay ta issi sù dán nga tabbì, gapu ta nataggâ yù tabbì. Ta nu dán nga tabbì yù pangipayyán na, mabattâ sangaw ta pagassam nayù issi, á mebuttu laguk, á kengá lâ yù binaráyáng ánná yù ággianán na gapay. Mawák yù tabbì nga bagu nga malapà, nga pangipayyád da, tapè ari mabattâ,” kun na.

*Yù Meyannung sù Ággaw nga Ággibannák*

*Mattiu 12:1-8; Lukas 6:1-5*

<sup>23</sup> Á sù tádday nga Sabadu, nga ággaw nga ággibannák da, nallakák di Apu Kesu sù dálán nga natangngán na ákkomanán. Pattalebák da, nangâ yù ira tudduán ni Apu Kesu sù nataggatán nga dáwa.

<sup>24</sup> Á yù ira Parisio, nasingad da ira. “Innam mè!” kud da kâ Apu Kesu. “Ngattá ta akkuád da yù ipugik nayù tunung tam sù ággaw na ággibannák?” kud da kuna.

<sup>25</sup> “Wan ay,” kun ni Apu Kesu nira. “Á arán naw panò binibbik yù meyannung sù kingnguá na ngaw ni Patul Dabid nga ipugik nayù tunung tam gapay? Nabisinán di Dabid áanna yù ira kábulun na.

<sup>26</sup> Á dagarágâ simillung si Dabid sù bale ni Namarò sù keggá ni Abiatar nga kátannangán nga pári. Á iná na yù pán nga neyátang nayù pári kâ Namarò, á kinán na ánná iniyawâ na gapay sù ira kábulun na, nga mepugik nga kanan na tolay. Yù lâ pári yù mepángngà nga kumán kuna. Ngam arán na paliwatan ni Namarò si Dabid sù kingnguá na.

<sup>27</sup> Tá pinarò ni Namarò yù tolay, nga ari megapu sù ággaw nga ággibannák, ngam sinullà na yù ággaw nga ággibannák megapu sù máwák na tolay nga magibannák.

<sup>28</sup> Ngam egga gapay yù máwák na tolay nga kanan. Á sikán nga Kaká na ngámin na tatoley, makáwayyágâ nga makkagi sù mepángngà nga akkuán na tolay ánná mepugik nga akkuád da ta ággaw nga ággibannák,” kun ni Apu Kesu nira.

### 3

*Yù Tolay nga Nassesseng Limá na*

*Mattiu 12:9-14; Lukas 6:6-11*

<sup>1</sup> Á minay má ngin simillung si Apu Kesu ta kapilliá na Kudio sù ággaw nga ággibannák. Á aijan sù kapilliá yù tolay nga nassesseng limá na.

<sup>2</sup> Á aijan gapay tán yù ira Parisio, á sisímád da si Apu Kesu tapè masingad da nu pammapián na yù nassesseng sù ággaw nga ággibannák, tapè ikeká ra.

<sup>3</sup> Pakasingan ni Apu Kesu sù nassesseng, kinagi na kuna, “E ka bì saw.”

<sup>4</sup> A kinagi na laguk sù ira massísím kuna, “Anni yù kagian nayù tunung tam nga meyannung sù akkuát tam sù ággaw na ággibannák? Mâyá yù mangabbák onu yù mangnguá ta tolay? Iyígù tam nakuan yù ikáttole tam onu papatáyat tam ira?” kun na nira. Ngam ari ira bulubugánakkituk.

<sup>5</sup> Á nallipilipay si Apu Kesu nira, á napporay ánná nakalò yù daddam na gapu ta nataggâ yù nonò da, ta arád da ikállà yù tolay. Á kinagi na laguk ni Apu Kesu sù tolay nga nassesseng limá na, “Sonnatam mu yù limám.” Á sinonnâ na, á nammapiá ngin yù limá na.

<sup>6</sup> Á pakasingan nayù ira Parisio sù kingnguá ni Apu Kesu, dagarágâ nallawán ira ta kapilliá, á makiubobuk ira sù ira tatole ni Patul Erodo, nu kunnasi yù ámmapáte ra kâ Apu Kesu.

*Neparámak yù Ngágán ni Apu Kesu*

<sup>7</sup> Á nallillì laguk di Apu Kesu ánná yù ira tudduán na ta ili, nga minay ta bebay. Á jimináddán nira yù ira magaru nga tatoley nga naggapu sù ira purubinsia na Galilia ánná Judiya.

<sup>8</sup> Á aru ira gapay nga naggapu ta ili na Jerusalem, ánná yù lugár na Iddumia, yù dammáng na Jordan, á yù ira ili na Tiro ánná Sidon ánná yù lugár ta lepuád da. Minay yù ira ngámin nga tatoley kâ Apu Kesu, gapu ta narámak da yù akka-akkuán na nga makapállâ.

<sup>9</sup> Á gapu sù ira magaru nga minay kâ Apu Kesu, inipaparán na sù ira makituddu kuna yù barangay nga pagitungbángán na, tapè ari marappi sù ira tatoley nga naddarassil ta aggik na bebay.

<sup>10</sup> Á gapu ta aru yù ira máttakì nga pinammpapiá na, naggugúru yù ira ngámin nga máttakì na maniggek kuna.

<sup>11</sup> Á yù ira nagunagán na anitu, pakasingad da kuna, namalittúkak ira ta arubáng na, á inikalli ra, “Sikaw yù Anâ ni Namarò,” kud da.

<sup>12</sup> Ngam gimmá na ira ta arád da ipakánnámmu.

*Pilian ni Apu Kesu yù ira Mapulu duá nga Makituddu kuna*

*Mattiu 10:1-4; Lukas 6:12-16*

<sup>13</sup> Á giminon si Apu Kesu ta puddul. Á inagálán na yù ira tatoley nga inikáyâ na, á minay ira kuna.

<sup>14</sup> Á sinullà na yù ira mapulu duá, tapè mepulù ira kuna, ánná doban na ira ta umay mangilayalayâ.

<sup>15</sup> Á inipe na nira yù pakapangnguá na nga mamapánaw ta anitu.

<sup>16</sup> Á danniaw yù ira mapulu duá nga sinullà na: si Simon nga iningágan na ta Eduru,

<sup>17</sup> á yù ira duá nga ánâ ni Sebedo, di Ime kâ Kuan, nga iningágan na ta Buanages. Á yù kebalinán na, ánâ na alittúgaw.

<sup>18</sup> Á si Andares gapay kâ Pilippi, si Bartolome, si Mattiu, si Tomâ, si Ime nga anâ ni Alpiu, si Tajjio, si Simon nga Mengal,

<sup>19</sup> á si Kudas Iskariote nga nabbalin ta mappagápù kâ Apu Kesu.

*Yù Siri nga Kinagi nayù ira Mesturu na Kudio  
Mattiū 12:22-32; Lukas 11:14-23; 12:10*

<sup>20</sup> Á gapu ta kabalin na nanullà sù ira tudduán na, limibbè si Apu Kesu ta paggianán na. Á naggagammung mángin yù ira magaru sù gián na. Á yáyù nga arád di Apu Kesu natángngák nga kumán.

<sup>21</sup> Á pakarámak nayù ira kanakanáyun ni Apu Kesu, ed da nakuan gaputan, ta kagiad da ta magisassay maguyung.

<sup>22</sup> Á ajian gapay yù ira mesturu na Kudio, nga naggapu ta ili na Jerusalem. Á kinagi ra sù ira tatolay, "Aggina, nagunagán ni Satanas, nga patul nayù ira anitu, á iyawâ ni Satanas kuna yù pakapangnguá na nga mamapánaw ta anitu," kud da.

<sup>23</sup> Á inagálán na ira laguk ni Apu Kesu. Á iniyángngarigán na yù itabbák na nira, á kinagi na, "Ikáyâ ni Satanas panò papanáwan yù ira anitu sù ira tatolay?

<sup>24</sup> Á nu ángngarigán ta ajian yù páppatulán, nga maddaráma yù ira tatole na, mabì lâ yù pagáddékán nayù páppatulád da.

<sup>25</sup> Á kunnian gapay sù ira makkakábbalay, nu maddaráma ira, ari ira gemma makapaggián sù bale ra.

<sup>26</sup> Á nu maddaráma di Satanas áンna yù ira anitu nga masserbi kuna, ari mabayák yù pammagure na, ta duttálín yù áddè na.

<sup>27</sup> "Á ta ángngarigán, awán ta makatallung sù bale nayù masikan, nu arán na olu nga igálù, tapè apan na yù maguray lâ nga ikáyâ na.

<sup>28</sup> Ginnán naw laguk, ta kuruk yù kagiak ku nikayu, mapakomá yù ira tatolay sù ngámin nga liwiliwâ da, mássiki yù ira nga magubobuk ta narákè kâ Namarò.

<sup>29</sup> Ngam yù makkakagi ta narákè sù Mangilin nga Ikararuá, ari bulubugá mapakomá yù liwâ na ta áddé ta áddé."

<sup>30</sup> Yáyù initabbák ni Apu Kesu nira, gapu ta kinagi ra ta aggina yù nagunagán na anitu.

*Di Yená ni Apu Kesu áンna yù ira Wáwwagi na  
Mattiū 12:46-50; Lukas 8:19-21*

<sup>31</sup> Á limibbè yù yená ni Apu Kesu áンna yù ira wáwwagi na, á naggián ira ta námmuák na balay. Á inipágál da si Apu Kesu ta umay nira ta lawán.

<sup>32</sup> Á aru yù ira tatolay nga nagarimummung kâ Apu Kesu sù unak na balay. Á kinagi ra kuna, "Ajjan ta lawán si innò mu áンna yù ira wáwwagim, á ipágál daka," kud da.

<sup>33</sup> Á simibbák si Apu Kesu, á kinagi na, "Asinni yù kuruk nga yenâ? Asinni yù ira kuruk nga wáwwagi?" kun na.

<sup>34</sup> Nilipilipe na yù ira nagarimummung kuna, á kinagi na, "Danniaw ira yù pannakayenâ áンna pannakawáwwagi!

<sup>35</sup> Ta ngámin ira nga mamalurò sù ipakuá ni Namarò nira, aggira yù meyárik ta wáwwagi ñga lálláki áンna wáwwagi ñga bábbay áンna yenâ," kun na.

## 4

*Yù Ángngarigán nga Meyannung sù Mangiwári ta Bini  
Mattiū 13:1-9; Lukas 8:4-8*

<sup>1</sup> Uli otturu nga pangituddu ni Apu Kesu ta aggik na bebay, kitáru yù ira tatolay nga minay kuna. Á yáyù nga nappittà ta barangay nga nappatangngá ta baddì, á naggián yù ira tatolay ta aggik. Á nagitubang si Apu Kesu nga nangarubáng nira.

<sup>2</sup> Á ta pangituddu na, nagángngarigán, á aru yù inituddu na nira. Kinagi na,

<sup>3</sup> "Ginnán naw laguk. Ajjan yù tolay nga minámmulá, á en na iwári yù bini sù ákkomanán na.

<sup>4</sup> Pangiwári na ta bini, natágâ yù baddì ta aggik na dálan, á dagarágâ nga kinán nayù mammánù ira.

<sup>5</sup> Á natágâ yù baddì ta gián na batu, nga baddì lâ yù dabbun na, á mabì mattubbu.

<sup>6</sup> Á sangaw nu mabilagán, malelay gapu ta ari naggamù ta napiá.

7 “Á natágâ yù baddì nga bini paga ta kasisítán. Á gapu ta alistu yù paddakal nayù sî, nababaláluk yù bini, á ari makapabbungá.

8 Á yù bini nga iniwári na tolay sù ákkomanán na, jiminakal, á nabbungá ngámin. Ajjan yù bini nga kustu yù ábbungá na, ámma ajjan nga kitapiá yù ábbungá na, ámma ajjan gapay nga kapiánán yù ábbungá na.

9 Á sikayu nga makaginná, ginnán naw ta napiá yù kagiak ku,” kun ni Apu Kesu nira.

*Yù Gapu na nga Nagángngarigán si Apu Kesu*

*Mattiu 13:10-17; Lukas 8:9-10*

10 Manganánnuán, páno nayù ira magaru, ajjan lá paga kâ Apu Kesu yù ira nga makituddu kuna ámma yù ira mapulu duá nga sinullà na. Á iniyabbû da kuna yù meyannung sù kebalinán nayù ira ángngarigán na.

11 Á simibbák, á kinagi na nira, “Sikayu yù iniddán ni Namarò ta pakánnámmu naw sù nelímak ngaw nga meyannung sù ira mesipà ta pammagure ni Namarò. Ngam iyángngarigák ku lá sù ira káruán nga tatolay,

12 tapè mapalurò yù dán nga netúrâ ni Isaya, nga yù ngaw ábbilinán ni Namarò. Kinagi na:

‘Mássiki nu inni-innad da, ngam arád da tákkilalán,  
á mássiki nu ginniginnád da, ngam arád da kánnámmuán.  
Ta nu kánnámmuád da, likurád da nakuan yù liwiliwâ da,  
ámma mattoli ira kâ Namarò, tapè pakomán na ira.’ ”\*

*Ibukalán ni Apu Kesu yù Kebalinán nayù Mangiwári ta Bini*

*Mattiu 13:18-23; Lukas 8:11-15*

13 Á kinagi ni Apu Kesu nira, “Ngattá, ta arán naw kánnámmuán yù kinagi? Á nu arán naw kánnámmuán yaw, kunnasi laguk pakánnámmu naw sù ira káruán nga pagángngarigák ku?

14 Yù minángngiwári ta bini, yáyù keyarigán nayù tolay nga mangituddu ta bilin ni Namarò sù ira tatolay.

15 Á kunnay ta aggik na dálan nga natágatán ta bini, kunnian gapay sù ira káruán nga tatolay nga magginná sù ubobuk ni Namarò. Pakaginná ra, dagarágâ nga umay si Satanás, á irián na ta nonò da yù ubobuk ni Namarò.

16 Á kunnay ta gián na batu nga natágatán ta bini, kunnian gapay sù ira káruán nga tatolay, gapu ta pakaginná ra sù ubobuk ni Namarò, magayáyá ira nga mangalawâ kuna,

17 ngam ari mapatattam ta nonò da, a mabi lá ira manguruk. Á sangaw nu umay yù jigá da, onu ajjan yù manigirigá nira megapu sù ángnguruk da, dagarágâ nga likurád da yù ángnguruk da.

18 “Á yù ira káruánnga tatolay nga magginná sù ubobuk ni Namarò, kunnay ta mesimmu ta bini nga newáríta kasisítán, kunnian gapay nira,

19 gapu ta tángngagad da lá yù pagalerád da ámma yù pangayâ da sù kukuá ra, ámma yù pakkaragâ da ta aru nga makkakerumá. Á yáyù nga kunnay ta bini nga ari tulluáta kasisítán, kunnian gapay sù ubobuk ni Namarò ta nonò da, gapu ta arád da tángngagan.

20 Á yù ira tatolay nga magginná ámma manguruk sù ubobuk ni Namarò, kunnay ira ta napiá nga komán nga newárítan na bini nga mabbungá ta napiá. Ta mepatattam ta nonò da yù ubobuk ni Namarò, á napasigaggá yù ángnguruk da, ámma aru yù napiá nga palurotad da.”

*Yù Ángngarigán nga Meyannung ta Isingan*

*Lukas 8:16-18*

21 Á kinagi ni Apu Kesu nira, “Á ta ángngarigán, nu pagatangat tam yù isingan, kallabát tam panò, onu ipe tam panò ta silárung na katri? Ari gemma! Ngam ipotut tam ta lamesá.

22 Á kunnian gapay sù pangituddu ta meyannung sù pammagure ni Namarò, ta awán gemma ta metuttu nga ari galâ sangaw mepakánnámmu. Á awán ta melímak nga ari galâ sangaw mepalappâ.

23 Nu eggá yù talingá naw nga makaginná, magginná kayu laguk.”

24 Á kinagi na paga nira, “Tángngagan naw ta napiá yù magginná naw. Ta ángngarigán, yù saluk na eggá nikayu, yáyù mepatappang nikayu, á malannapán sangaw gapay. Kunnian sù ira tatolay nga manángngák sù metuddu nira. Nu manguruk ira, á aru paga sangaw yù kánnámmuád da.

\* 4:12 Isaya 6:9-10

<sup>25</sup> Á nu patattamad da ta nonò da yù ubobuk ni Namarò, aru paga sangaw ipakánnámmu ni Namarò nira. Á yù ira tatolay nga ari manguruk sù metuddu nira, máttamád da sangaw yù baddì nga kagiad da ta kánnammuád da.”

*Kunnasi yù Paddakal nayù Pammagurayán ni Namarò?*

<sup>26</sup> Pangituddu na má ni Apu Kesu, kinagi na, “Kunniaw yù keyarigán nayù paddakal nayù pammagurayán ni Namarò. Ta ángngarigán, aijan yù tolay nga mangiwári ta bini sù ákkomanán na.

<sup>27</sup> Á kabalín na nangiwári sù komán na, magiddá nga makkaturuk káda gabi ánná gumikkáng kággágaw. Á mattubbu yù bini, nga dumakal lá dumakal, ngam arán na ammu nayù tolay nu kunnasi yù áddakal na.

<sup>28</sup> Á palattuáran na dabbun ta olu yù don na pángè nayù dáwa na nga dumakal áddè ta pattaggâ na.

<sup>29</sup> Kalutu nayù dáwa na, doban nayù tolay yù ira umay maggaták kuna, gapu ta náddékánin yù kagaták na.”

*Anni yù Pabbalinán nayù Kabaddítán na Bukal?*

*Mattiú 13:31-32, 34; Lukas 13:18-19*

<sup>30</sup> Á kinagi na má ni Apu Kesu sù ira tatolay, “Anni panò yù pangigitták ku sù pammagure ni Namarò? Onu anni yù pangiyarigák ku kuna?”

<sup>31</sup> Kunay sù kabaddítán nga bukal nga nemulá ta dabbun.

<sup>32</sup> Nu nemulá ngin, mattubbu nga dumakal ta áddè ta mabbáli ta karakalán na mulá nga darakal yù pangá na. Á umay magumù yù ira mammánù sù pangá na.”

<sup>33</sup> Á ta pangituddu na nira, aru nga kunnian yù iniyángngarigán na nira, ta yáyù lá maginnára ta áddè ta arád da kánnammuán.

<sup>34</sup> Á awán bulubugá ta kinagi na sù ira tatolay nu ari lá megapu sù pagángngarigán na. Ngam ta kepulù da lá kuna nayù ira makituddu kuna, inibukalán na ngámin nira.

*Pagimammatten ni Apu Kesu yù Baggiú*

*Mattiú 8:23-27; Lukas 8:22-25*

<sup>35</sup> Á ta pajíbbà, kinagi ni Apu Kesu sù ira makituddu kuna, “Et tamin, ta dumákì íttam ta dammáng na bebay,” kun na.

<sup>36</sup> Á nánawád da yù ira magaru, á nappittà ira sù barangay nga gián ni Apu Kesu, á inipulù da nga iráki ta dammáng. Á aijan yù ira káruán nga barangay nga namulun nira.

<sup>37</sup> Á nikáddágå lá nappaddák ta nasikan, á lappágan nayù palung yù barangay, á massab-buetán ta áddè ta maddaggun mapannu.

<sup>38</sup> Ngam nakkaturuk si Apu Kesu nga nappungán sù gián na ulin na barangay. Á ed da nilukák. “Mesturul!” kud da. “Arám mu kemámmatán yù kalaggak tam?” kud da.

<sup>39</sup> Á kalukák na, gimmá na yù paddák ánná palung, á kinagi na, “Magimammà ken.” Á nagimammà yù paddák, á nalínák yù danum.

<sup>40</sup> Á kinagi na sù ira makituddu kuna, “Ngattá, ta maganássing kayu? Arán nawà paga ikatalà?” kun na.

<sup>41</sup> Á nappanà yù assing da ánná nakalò yù kapállâ da. Á nakkaká-ubobuk ira nga kinagi, “Asinni laguk yaw? Ta mássiki yù paddák ánná danum, tuppálad da yù kagian na!” kud da.

## 5

*Pammapián ni Apu Kesu Yù Naggusapel*

*Mattiú 8:28-34; Lukas 8:26-39*

<sup>1</sup> Á nakáddé di Apu Kesu ta dammáng na bebay sù gián nga mangngágan ta Gerasa.

<sup>2</sup> Gatták ni Apu Kesu ta barangay, minay jiminápun kuna yù tolay nga naggapu ta katanamán, nga nagunagán na anitu.

<sup>3</sup> Á kuebá ta katanamán yù paggianán na, gapu ta awán ta tolay nga makegálù kuna, mássiki nu káwák yù gálù na.

<sup>4</sup> Ta name-aru nga nagalután ta káwák nga balayáng yù takki na ánná yù limá na, ngam gattakan na lá, á awán ta tolay nga masikan nga makegaggak kuna.

<sup>5</sup> Á kággágaw ánná káda gabi magagga-aggay sù katanamán ánná puddupuddul ira, á bigibigarán na yù baggi na ta batu nga nataram.

<sup>6</sup> Pakerípâ nayù naggusapel kâ Apu Kesu ta arayyu paga, nakkarerá nga minay na-malittúkak sù arubáng na.

7 Á nikalli na nga kinagi kuna, “Anni akkuám mu nikán, sikaw Apu Kesu nga Anâ ni Namarò nga Kotunán? Á ta arubáng ni Namarò, kiddawak ku nikaw ta arám mà jigirigáta,” kun nayù maguyung kâ Apu Kesu.

8 Yáyù kiniddo na, gapu ta makiubobugin si Apu Kesu, á kinagi na sù anitu nga nagunak, “Mallawán ka nga mánaw sù tolay, sikaw, anitu!”

9 Á iniyabbû na laguk ni Apu Kesu kuna, “Anni yù ngágam mu?” “Jibu yù ngágak ku gapu ta apípiá kami,” kun nayù naggusapel.

10 Á inikukkuttu na nga nakimállà kuna ta arán na ira papanáwan sù lugár da.

11 Á naggián tán apípiá nga bábi ira nga nadduki sù garek na puddul.

12 Á nakimállà yù ira anitu kâ Apu Kesu, á kinagi ra, “Dobam mu kami bì sù ira bábi, tapè tullung kami nira,” kud da.

13 Á iniyangù na nira, á nallawán ira nga simillung sù ira bábi. Á ngámin yù ira bábi nga maddaggun duá ribu, nakkarerá ira nga minutù nga minay sù danum na bebay. Á nalaggabán ira ngámin nga natay ta bebay.

14 Pakasingan nayù ira minánnaron ta bábi sù nesimmu, nattálaw ira, á ed da iniparámak sù ili áんな ngámin nga báriu. Á pakarámak nayù ira tatolay, ed da pinasikkái nu anni yù nesimmu.

15 Pakáddè da kâ Apu Kesu, nasingad da yù tolay nga naggusapel ngaw, nga nagitubang nga nabbarawási ngin. Nanoli ngin yù napiá nga nonò na. Pakasingad da kuna, nakalò yù assing da, á nepallà yù kapállà da megapu sù pakáwayyá ni Apu Kesu.

16 Á yù ira tatolay nga nakasingan, inistoriá ra sù ira káruán yù ngámin nga nesimmu sù tolay nga naggusapel áんな yù ira aya-ayám da.

17 Á dagarágâ makikomá ira ngámin kâ Apu Kesu ta panawán na bì yù lugár da.

18 Á gapu ta panaki da kuna, minay si Apu Kesu nga nappittà ta barangay. Á yù tolay nga nagunagán na ngaw na anitu, minay laguk nakimállà kâ Apu Kesu, ta gustu na mepulú kuna.

19 Ngam arán na inanugù ni Apu Kesu, á kinagi ni Apu kuna, “Manoli ka lâ ta balem, á kagiám mu sù ira kanakanáyum mu yù ngámin nga kingnguá ni Apu nikaw áんな yù ángngikállà na nikaw,” kun ni Apu Kesu kuna.

20 Á nánaw laguk yù tolay, á dagarágâ nanoli ta lugár na nga mangngágan ta Mapulu Ili, ta en na inilayalayá yù kingnguá ni Apu Kesu kuna. Á pakaginná nayù ira tatolay, napállâ ira ngámin.

*Paginnanolayan ni Apu Kesu yù Anâ ni Jeru áんな Pammapián na yù Babay nga Naniggek kuna*

*Mattiu 9:18-26; Lukas 8:40-56*

21 Á nabbarangay laguk si Apu Kesu nga nanoli ta dammáng na bebay. Pakatunù na tán, nagarimummungád da nayù ira magaru nga tatolay ta aggik na bebay.

22 Á minay gapay yù táddy ngagaylaguk si Apu Kesu, namalittúkak laguk ta arubáng na. Á pakasingan ni Jeru kâ Apu Kesu, namalittúkak laguk ta arubáng na.

23 Á inikomá na kuna, nga kun na, “Magisassay matay yù anâ ku nga babay. Em mu bì támmitan, tapè mammapiá áんな matolay,” kun ni Jeru kâ Apu Kesu.

24 Á binulun na laguk ni Apu Kesu, ta umay ira sù bale na. Á nepulù nira yù magaru nga tatolay. Á masirisirì ira sù dálan.

25 Á ta kasirisirì nayù ira tatolay, ajian yù babay nga mapparága ta mapulu duá nga dagun.

26 Á aru yù jígá nga inattamán na megapu ta panguru ra kuna nayù ira aru nga minángnguru. Á napúnu ngin yù kuártu na, á ari paga nammapiá, nu ari galâ nga mappanà lâ mappanà yù taki na.

27 Á narámak na yù meyannung kâ Apu Kesu, á minay laguk nga jimikkì sù likuk na. Á siniggek na yù barawási na.

28 Ta nanonò na, “Nu ek ku siggeran mássiki yù gámì na, á mampapiángà,” kun na ta nonò na.

29 Á paniggek na kuna, dagarágâ nattukkâ yù papparága na! Á natagenà na ta nammapiá ngin yù baggi na.

30 Á ta pammapiá nayù babay, dagarágâ natagenà ni Apu Kesu ta nammapiá yù tolay megapu sù ámmagaddátu na, á nagginná laguk ta dálan, nga nallipay sù ira tatolay, á iniyabbû na nira, “Asinni naniggek ta gámì ku?” kun na.

<sup>31</sup> Á kinagi nayù ira makituddu kuna, “Arám mu panò masingan yù ira tatolay nga manirisirì nikaw? Ngattá, ta iyabbú mu lâ paga ta asinni naniggek nikaw?” kud da kuna.

<sup>32</sup> Á nilipilipe na ira ngámin tapè masingan na yù naniggek kuna.

<sup>33</sup> Á yù babay, natáká na ta nammapiá ngin, á minay namalittuká ta arubáng ni Apu Kesu, nga mamippippik nga maganássing, a kinagi na yù kurugán.

<sup>34</sup> Á kinagi ni Apu Kesu kuna, “Tíyá, nammapiá ken megapu sù ángngikatalà mu nikán. Lubbè ken, á ari ka maburung, ta kuruk nga nammapiá ken nga ari mapatolián,” kun na.

<sup>35</sup> Á pakiubobuk na paga ni Apu Kesu sù babay, jmittál yù ira tatolay nga naggapu ta bale nayù kapatás, á kinagi ra sù kapatás, “Natayin yù anâ mu. Ngattá, ta bannagam mu paga yù mesturu?” kud da.

<sup>36</sup> Ngam arán na sinangngák ni Apu Kesu yù kinagi ra, á kinagi na sù kapatás, “Ari ka maganássing. Ipasigaggá mu lâ yù ángngikatalà mu nikán,” kun ni Apu Kesu kuna.

<sup>37</sup> Á arán na inanugù nga mepulù yù ira tatolay kuna. Tallu ira lâ yù mepulù kuna, di Eduru ánná yù duá nga mawwagi, di Ime kâ Kuan.

<sup>38</sup> Á labbè da ta bale nayù kapatás, nasingan ni Apu Kesu yù ira matannuk nga gikulukuletán.

<sup>39</sup> Á tallung ni Apu Kesu sù balay, kinagi na nira, “Ngattá, ta matannuk kayu ánná makkulè? Yù abbing, ari natay, ngam makkaturuk lâ,” kun na.

<sup>40</sup> Á inipappagalà da. Ngam pinapáno ni Apu Kesu ira sù balay. Á yù yená nayù abbing ánná yù yáma na, á si Apu Kesu ánná yù ira tallu nga kábulun na, aggira lâ yù simillung sù gián nayù abbing.

<sup>41</sup> Tallung da ta lágum, jímikkì si Apu Kesu sù abbing, á singngalán na yù limá na. Á kinagi na kuna sù ággubobuk na, “Talita kumi.” Á yù kebalinán na, “Abè, gumikkáng ka.”

<sup>42</sup> Á dagarágâ giminiikkáng yù abbing, á nallakák, ta dakalin, ta mapulu duá yù dagun na. Á pakasingan nayù ira darakal na, nakalò yù kapállâ da.

<sup>43</sup> Á sinabarangán na ira ni Apu Kesu ta arád da bulubugá ipakánnámmu. Á kinagi na nira ta pakanad da yù abbing.

## 6

*Arád da Dayáwan si Apu Kesu nayù ira Katangelián na  
Mattiu 13:53-58; Lukas 4:16-30*

<sup>1</sup> Á nánaw laguk si Apu Kesu nga nanoli sù lugár na ta ili na Nasaret. Á nepulupulù kuna yù ira makituddu kuna.

<sup>2</sup> Á sù ággaw nga ággibannák da, minay mangituddu ta kapilliá na Kudio. Á aru yù ira tatolay nga napállâ ta pakaginná ra sù ituddu na. Á kinagi ra, “Isaw panò pangápán na danniaw nga kagian na nittam? Anni panò yù sírik nga nepay kuna? Á kunnasi panò yù pamagaddátu na ta makapállâ nga akka-akkuán na?

<sup>3</sup> Ari panò aggina yù kalapinteru, nga anâ ni Maria, ánná yù kaká ri Ime, kári Kusè, si Kudas, si Simon? Á aijan gapay saw yù ira wáwwagi na nga bábbay,” kud da. Á nataki yù nonò da kuna.

<sup>4</sup> Á kinagi na laguk ni Apu Kesu nira, “Ngámin nga tatolay, makimoray ira sù ábbilinán ni Namarò. Awán ta manaki kuna, nu ari lâ yù ira katangelián na ánná yù ira kanakanáyun na ánná yù kábbale na,” kun na nira.

<sup>5</sup> Á ari makapagaddátu tán, gapu ta awán ta manguruk kuna, ngam yù ira lâ nga káruán nga máttaki, sinámmì na ira ánná pinammapiá na ira.

<sup>6</sup> Á napállâ, gapu ta awán ta ángnguruk da. Á minay laguk mangituddu ta tatolay sù ira barrabáriu.

*Doban ni Apu Kesu yù Mapulu Duá nga Sinullà na ta Umay ira Mangilayalayâ sù Napiá nga Dámak*

*Mattiu 10:5-15; Lukas 9:1-6*

<sup>7</sup> Á inagálán ni Apu Kesu yù mapulu duá nga sinullà na, tapè doban na ira nga taggiruá, ta umay ira mangilayalayâ sù bilin ni Namarò. Á ipe na nira yù pakáwayyá na nga maggammá sù ira anitu.

<sup>8</sup> Á sinabarangán na ira ta awán bulubugá ta ipulù da, ngam yù lâ tagukuk da sù lakarad da. Yáyù lâ, ta arán na nira inipállâ yù bálud da nga kanan onu gámì onu kuártu sù arikáwà da.

<sup>9</sup> Kinagi na nira ta massapátù ira, ngam arád da ipulù yù pappataliád da.

10 Á kinagi na nira, “Á yù labbetán naw nga balay, yáyù lâ ággammátán naw áddè ta páno naw ta lugár da.

11 Á nu lubbè kayu ta gián nga awán ta mangalawâ nikayu, áンna manakì ira magginná sù bilin naw, mánav kayu laguk. Á ta páno naw, pápparán naw yù káppù sù takki naw, nga pangipanónò naw nira ta liwâ da lápay nu manakì ira magginná sù bilin naw,” kun na nira.

12 Á nánaw laguk yù ira mapulu duá nga sinullà na, á minay ira mangilayalayâ ta máwák nga mabbabáwi yù ira tatolay áンna likuránad da yù narákè nga ággangnguá ra.

13 Á aru yù ira anitu nga pinapáno ra ta tatolay, á aru yù ira máttakì nga jinenuád da, á nammapiá ira.

*Yù Ipate ni Kuan nga Minánnigù*

*Mattiu 14:1-12; Lukas 9:7-9*

14 Á gapu ta neparámak yù kingngikingnguá ni Apu Kesu, naginná na gapay ni Patul Erodo. Á yù ira káruán nga tatolay, kinagi ra, “Naginnanolayin si Kuan, nga yù ngaw Minánnigù. Á yáyù gapu na nga eggá ngin kuna yù ámmagaddátu na,” kud da.

15 Á yù ira káruán nga tatolay, kagiad da, “Aggina si Elias\* nga yù ngaw ábbilinán,” kud da. Á yù ira káruán, kagiad da, “Aggina yù ábbilinán ni Namarò nga kagittá nayù ira ngaw ábbilinán,” kud da.

16 Ngam si Patul Erodo, pakaginná na sù kagiad da, kinagi na, “Asinni panò, nu ari si Kuan nga inipaputul ku ngaw, nga naginnanolayin!” kun na.

17 Yáyù kinagi ni Patul Erodo, gapu ta manononò na lâ yù kingnguá na ngaw kâ Kuan, sù ngaw pangipukù na kuna.

Á yawe yù istoriá ra nga meyannung sù kingnguá na ngaw ni Patul Erodo kâ Kuan. Eggá yù urián ni Patul Erodo, nga laláki, nga si Pilippi yù ngágán na. Á nagatáwa di Pilippi kâ Erodia. Ngam inâ ni Patul Erodo si Erodia, nga asípák na, ta atawán na.

18 Á pakánnámmu ni Kuan sù kingnguá ni Patul Erodo, kinagi na kuna, “Arám mu inururay yù katunungán, ta inâ mu yù atáwa ni Pilippi nga uriám mu,” kun na.

19 Á pakánnámmu ni Erodia sù kinagi ni Kuan sù patul, kitaporay si Erodia kâ Kuan, á gustu na papatáyan, ngam awán ta awayyá na.

20 Ta makimoray si Patul Erodo kâ Kuan, gapu ta ammu na ta katunungán nga tolay, nga ábbilinán ni Namarò. Á yáyù nga jinok na ngaw ni Patul Erodo yù umay maggápù kâ Kuan, á inipapukù na, tapé melillì kâ Erodia nga mamapátyay kuna nakuan. Á sinángngák nayù patul nga gininná yù ituddu ni Kuan, ta ikáyâ na nga ginnán, mássiki nu nabábâng sù bilin na.

21 Á manganánnuán, jímittál yù awayyá ni Erodia nga mangipapátyay kâ Kuan, ta ággaw nga pabbúyá ra ta keyanâ ni Patul Erodo. Ta inapâ ni Erodo yù ira mammaguray nga gádday kuna áンna yù ira kapitán na suddálu, á yù ira girikuán ta purubinsia na gapay, tapé umay ira mepallállang áンna mabbúyá ta keyanâ na.

22 Á aijan yù anâ ni Erodia nga magingánay. Á minay mattálá megapu sù ira álliuk. Á ayatán di Erodo áンna yù ira álliuk na sù pattálá na. Á kinagi ni Patul Erodo kuna, “Á Parinsesa, kiddawam mu nikán yù gustum, á iyawâ ku nikaw,” kun na.

23 Á inipagássingán ni Erodo kuna, á kinagi na, “Maguray lâ yù kiddawam mu nikán, kuruk nga iyawâ ku nikaw, mássiki nu gadduá na kukuâ,” kun na.

24 Á nánaw nira yù magingánay sù ira álliuk, nga minay kâ innò na. Á kinagi na kâ innò na, “Anni yù kiddawak ku?” kun na. “Á yù ulu ni Kuan nga Minánnigù,” kun ni innò na kuna.

25 Á dagarágâ nanoli yù magingánay sù patul, á kinagi na, “Gustù daretiu nga iyawâ mu nikán kunangane yù ulu ni Kuan nga Minánnigù nga nepay ta palanggána,” kun na.

26 Á nakalò yù daddam nayù patul, ngam arán na gustu nga ari mamalurò sù kinagi na, megapu sù nepagássingán na áンna sù ira álliuk nga nakaginná sù kinagi na.

27 Á dagarágâ jinok na patul yù suddálu nga magguárdiá, tapé en na apan yù ulu ni Kuan. En na pinutulán si Kuan sù áppukután.

28 Inipe na yù ulu na sù palanggána nga inituluk na sù magingánay, á iniyawâ na kuna. Á iniyawâ nayù magingánay kâ innò na.

29 Á yù ira sinudduán ni Kuan, pakaginná ra karanniaw, ed da inâ yù baggi na, á initanam da.

\* 6:15 Netúrâ sù dán nga libru yù meyannung kâ Elias, nga ábbilinán ni Namarò nga natay ngaw nga nabayágín, ta matolay si Elias nga manoli ta dabbuno lage na umay si Apu. Innan naw Malakia 4:5.

*Mappagaddátu si Apu Kesu tapè Mapakán na yù Magaru nga Tatolay  
Mattiu 14:13-21; Lukas 9:10-17; Kuan 6:1-14*

<sup>30</sup> Á kabalid da nangilayalayâ nayù ira makituddu kâ Apu Kesu, naggagammung ira sù gián ni Apu Kesu. Á inistoriá ra yù kingngikingnguá ra ánná inituddu ra sù ira tatolay.

<sup>31</sup> Á kinagi ni Apu Kesu nira, "Et tamin ta ággimammatán, sittam lâ, tapè magibannák kayu bî," kun na. Ta aru yù ira tatolay nga naddagaráddán nga umay sù giád da, á mássiki nu kumán ira nakuan, arád da natángngák.

<sup>32</sup> Á nappittà ira sù barange ra ta manaw ira nga umay sù ággimammatán.

<sup>33</sup> Á aru yù tatolay nga nakasingan sù páno ra, á natákkilalád da. Á nakkarakarerá ira nga naggapu ta ngámin nga barrabáriu ra, á napolu ira nga nakáddè ta dammáng.

<sup>34</sup> Á tappi da ta aggik, gmitták si Apu Kesu sù barangay. Á nasingan na yù magaru nga tatolay, á nakalò yù allâ na nira, gapu ta kunnay ira ta karneru nga awán ta manaron nira. Á namegapu nga mangituddu nira, á aru yù inituddu na nira.

<sup>35</sup> Á ta púgágín, minay kâ Apu Kesu yù ira tudduán na. Á kinagi ra, "Kalállammatán yawe giát tam, á ajan mágge gabi ngin.

<sup>36</sup> Dobam mu bì yù ira tatolay, tapè umay ira gumátáng ta kanad da túrin ta babálay," kud da.

<sup>37</sup> Á sikayu lá yù umay mamakán nira," kun ni Apu Kesu nira. "Á kunnasi laguk? Awán ta ipangâ mi ta pán. Á nu eggá nakuan nikami yù sueldu na tolay ta tangaragun, á makatò mapúgák, tapè makagátáang kami ta pán ta ipamakám mi nira," kud da.

<sup>38</sup> Á kinagi ni Apu Kesu nira, "Á pígiá bullung nga pán eggá nikayu? En naw bi innan." Á kabalid da naningen, ed da kinagi kuna, "Ajan límá bullung nga pán ánná duá nga sirá."

<sup>39</sup> Á kinagi ni Apu Kesu sù ira tatolay ta mattatáddy ira nga makkakanáyun, á mesisinná ira nga magitubang sù kakáddapán.

<sup>40</sup> Á nagitubang ira nga taggimagatù ánná taggilímápulu.

<sup>41</sup> Á pakálâ ni Apu Kesu sù límá bullung nga pán ánná duá nga sirá, sinánguk na yù lángì, á nabbabalabálâ kâ Namarò sù kanan. Á giddigiddúá na ánná iniyawâ na sù ira makituddu kuna, tapè isinek da sù ira tatolay. Á giddigiddúá na gapay yù duá nga sirá nga mesinek sù ira ngámin.

<sup>42</sup> Á kiminán ira ngámin, á nabattuk ira.

<sup>43</sup> Á ed da inâ yù buná ra nga pán ánná sirá, á mapulu duá yù lappi nga napannu sù buná ra.

<sup>44</sup> Á límá ribu yù ira tatolay nga lálláki nga kiminán, á ari nebiláng yù ira ábbing ánná yù ira bábbay.

*Yù Pallakák ni Apu Kesu sù Utun na Danum  
Mattiu 14:22-33; Kuan 6:5-21*

<sup>45</sup> Á kabalid da kiminán, dagarágâ pinapolu ni Apu Kesu yù ira sinudduán na ta mappittà ira ta barangay nga umay ta dammáng na bebay, ta ili na Betseda. Á nabattáng lâ si Apu Kesu, tapè palabbetan na lábbì yù magaru nga tatolay sù bale ra.

<sup>46</sup> Á naguroray si Apu Kesu nga giminon ta puddul, tapè makiubobuk kâ Namarò.

<sup>47</sup> Á manganánnuán, pajjibbakin, nakáddè yù barangay ta tangngá na bebay. Á naguroray si Apu Kesu ta kannak.

<sup>48</sup> Á nerípâ na yù jigâ nayù ira makabarabarangay ta tangngá na danum, nga mallapálápák nga ari makálì gapu ta nasikan yù paddák. Á ta tangngá na gabi, nga lage na magittarákkò na manù, mínyai si Apu Kesu nga mappángè nira nga mallakák ta utun na danum. Á mattalebák nakuan nira.

<sup>49</sup> Ngam nasingad da yù nallakák sù utun na danum, á kagiad da ta annáni, á nakaráring ira!

<sup>50</sup> Ta aggira ngámin nakasingan kuna, á nepallà yù assing da. Ngam dagarágâ kinagi ni Apu Kesu nira, "Pataggatan naw yù nonò naw, ta sikán yaw. Ari kayu maganássing," kun na.

<sup>51</sup> Á nappittà laguk si Apu Kesu sù barange ra. Á nattukkâ yù paddák. Á nerallà yù kapállâ da,

<sup>52</sup> ta arád ta paga kánnámmuán yù kebalinán nayù pagaru na pán nga inipamakán ni Apu Kesu sù ira magaru, ta arád da nonotan.

*Yù Pamammapiá ni Apu Kesu sù ira Máttakì ta Purubinsia na Gennesaret  
Mattiu 14:34-36*

53 Á ta pakáddè di Apu Kesu ta dammáng, minay ira jiminung sù dappâ na Gennesaret.

54 Á gatták da ta barangay, dagarágâ natákkilalán nayù ira tatolay si Apu Kesu.

55 Á gikarakarerán ira ta ngámin nga lepuán, ta ed da apan yù ira máttakì, nga kináttu ra sù dapad da, tapé iyáne ra ira kuna ta maguray nga gián na.

56 Á maguray lá yù angayán ni Apu Kesu, nga babálay, ánná ili, ánná lelepuán, minay gapay ta ngámin nga pakirapunán yù ira tatolay nga mangiyáne sù ira máttakì. Á inikomá ra kuna ta anugutan na yù paniggek da lá ta kiddanán na barawási na. Á ngámin ira nga naniggek, nammapiá iren.

## 7

*Anni yù Napiá nga Tuttulan na Tolay? Yù Kustombare nayù Parisio onu yù Tunung ni Namaro?*

*Mattiu 15:1-9*

¹ Á eggá yù ira tatolay nga naggapu ta Jerusalem, nga Parisio ánná yù ira kárúan nga mangituddu sù tunung nayù ira Kudio, á ed da nagarimummungán si Apu Kesu.

² Á nemámmatád da yù ira kárúan nga makituddu kâ Apu Kesu, nga kumán nga arád da paga binaggawán yù limá ra ta kunnay sù ituddu nayù tunung.

³ Ta yù ira Parisio ánná yù ira ngámin nga Kudio, ari ira gemma kumán, nu ari ira paga nabbaagaw ta kunnay sù negagángay nga kustombare nayù ira naggaká nira.

⁴ Á nu maggapu ira ta dápun, ari ira kumán nu ari ira paga nabbaagaw. Á aru paga yù tuppálad da nga ituddu nayù rilisiód da, yù ággugâ da ta ákkilò, ánná garapon, ánná kalderu.

⁵ Á yáyù iniyabbû da kâ Apu Kesu nayù ira Parisio ánná yù ira mangituddu sù tunung, á kinagi ra, "Yù ira sinudduám mu, kumán ira, nga ari nabbaagaw. Ngattá, ta arád da tuppálán yù kustombare nayù ira naggaká nittam?"

⁶ Á kinagi ni Apu Kesu nira, "Sikayu nga agippípiá! Kurugán yù Ubobuk ni Namaro ngá inipetúrá na kâ Isaya, nga yù ngaw ábbilinán na. Ta netúrâ yù kinagi ni Namaro, 'Danniaw ira nga tatolay, yù lá paddáyo ra nikán yù pagubobuk da,

ngam awán bulubugá ta ángnguruk da nikán ta nonò da.

⁷ Awán ta serbi nayù ákkimore ra nikán,  
ta ituddu ra yù inipapílì da ta nonò da,  
nga kagiad da ta tunung nga naggapu nikán,\*  
kun ni Namaro.

⁸ Á sikayu gemma yù ubobugan na, gapu ta paguráyán naw yù tunung ni Namaro, tapé tuppálán naw lá yù ituddu na tolay," kun ni Apu Kesu.

⁹ Á kinagi ni Apu Kesu nira, "Kitasírik kayu! Ammu naw yù mamotu sù taddán ni Namaro, tapé tuppálán naw galâ yù kustombare nayù ira ngaw naggaká nikayu.

¹⁰ Ta inituddu na ngaw ni Moyses yù taddán ni Namaro, á kinagi na, 'Makimoray kayu sù ira darakal naw.' Á kinagi na má, 'Yù tolay nga magubobuk ta narákè sù ira darakal na, matay, tapé magikáru ta liwâ na.'†

¹¹ Ngam sikayu, ngattá, ta kagian naw ta máyâ nu kagian na tolay sù ira darakal na, 'Awán ta awayyâ nga mangabbák nikayu, gapu ta Korbánin yù kukuá.' Á yù kebalinán na Korbánin yù neyawákin kâ Namaro.

¹² A nu kagian nayù tolay ta neyawákin yù kukuá na kâ Namaro, á ngattá, ta arán naw laguk anugutan yù ángngabbák na sù ira darakal na.

¹³ Á ta kunnian potuán naw yù ubobuk ni Namaro megapu sù kustombare naw nga ituddu naw sù ira ánná naw. Á aru yù akkuán naw nga kunniaw," kun ni Apu Kesu sù ira Parisio ánná sù ira kárúan nga mesturu na Kudio.

*Anni yù Makararál sù Ákkiyápu na Tolay kâ Namaro?*

*Mattiu 15:10-20*

¹⁴ Á inagálán ni Apu Kesu yù ira kárúan nga tatolay ta umay ira kuna. Á kinagi na nira, "Sikayu ngámin, ginnán naw yù kagiak ku, á kánnámmuán naw laguk.

¹⁵ Awán ta itammul na tolay ta simù na nga makararál sù Ákkiyápu na kâ Namaro, nu ari galâ yù ilawán na ta simù na nga ubobuk na nga maggapu ta narákè nga nonò na.

¹⁶ Nu eggá yù talingá naw nga makaginná, magginná kayu laguk!" kun na nira.

¹⁷ Kabalin na nagubobuk, nánaw di Apu Kesu sù ira tatolay, á simillung ira sù balay. Á yù ira makituddu kuna, iniyabbû da kuna yù kebalinán nayù gangù nga ángngarigán na.

\* 7:7 Isaya 29:13    † 7:10 Exodus 20:12; 21:17

<sup>18</sup> Á kinagi ni Apu Kesu nira, “Á mássiki sikayu, arán naw panò ammu? Arán naw paga kánnámmuán ta ari yù kanan na tolay yù manarál sù ákkiyápu na kâ Namarò,

<sup>19</sup> gapu ta ari makatallung yù kanan na tolay ta nonò na, ngam tullung lâ ta gutù na, á ikawè na sangaw,” kun na nira. Á ta kunniane, inituddu na ta awán ta kanan nga kanniawan.

<sup>20</sup> Á kinagi na má, “Yù naggapu ta nonò na tolay, yáyù maddaping ta tolay, nga makararál sù ákkiyápu na kâ Namarò.

<sup>21</sup> Ta naggapu ta nonò na tolay yù naráké nga nononotan na, nga kunnay sù mamabay ánnna makilaláki, yù makkokò, yù mampapátay, yù makkarallaw,

<sup>22</sup> yù mokkuk, yù kitaraké, yù mangilogò, yù mangiyappa-appà, yù mamassil, yù mallilíbâ, yù mappeddaráyaw, ánnna yù mallokuloko.

<sup>23</sup> Ngámin danniaw nga naráké yù maggapu ta nonò na tolay, á danniaw ira maddirál sù ákkiyápu ra kâ Namarò,” kun ni Apu Kesu nira.

*Yù Pabbálà ni Apu Kesu sù Ángnguruk nayù Babay nga ari Kudio  
Mattiū 15:21-28*

<sup>24</sup> Gapu ta kabalín na nangituddu nira, nánaw si Apu Kesu nga minay sù lugár na Tiro ánnna Sidon. Á simillung sù balay, ta gustu na nga ari mappasingan sù ira magaru nga tatolay, ngam ari makalillí nira.

<sup>25</sup> Á aijan tán yù babay nga eggá yù anâ na nga babay nga nagunagán na anitu. Pakarámak na babay ta keggá ni Apu Kesu, dagarágâ nga minay namalittúkak ta arubáng na.

<sup>26</sup> Á ari Kudio yù babay, ta Sirupinisia yù ikáttolé na. Á inikomá na kâ Apu Kesu ta palawanan na yù anitu sù anâ na.

<sup>27</sup> Á iniyángngarigán ni Apu Kesu yù itabbák na, á kinagi na kuna, “Iddagám mu lábbì yù kabattuk nayu ira ábbing sù kanad da, ta ari mepángngâ nga mepakán yù kanad da sù ira ítu,” kun na.

<sup>28</sup> Á kánnámmuán nayù babay yù kebalinán nayù kinagi ni Apu Kesu kuna, nga ari mepángngâ nu abbágán na yù ira ari Kudio lage na mangabbák sù ira Kudio. Á kinagi nayù babay kâ Apu Kesu, “Wan, Apu. Ngam dánnaman nayù ira ítu yù buttá nayù ira ábbing,” kun na.

<sup>29</sup> “Ákurugán yù nakagím! Napiá yù initabbák mu nikán,” kun ni Apu Kesu kuna. “Manoli ka ta balem, ta nánavin yù anitu sù anâ mu,” kun na.

<sup>30</sup> Á limibbè yù babay ta bale na, á naratang na yù anâ na nga nagiddá ta katri na, á awánin ta anitu.

*Yù Pamammapiá ni Apu Kesu sù Kitul nga Umal*

<sup>31</sup> Á nánaw laguk si Apu Kesu ta ili na Tiro. Á sinalebarán na yù ili na Sidon ánnna yù gián na Mapulu Ili, ta umay ta bebay na Galilia.

<sup>32</sup> Á yù ira tatolay nga naggián tán, inituluk da kâ Apu Kesu yù tolay nga kitul nga umal, á inikomá ra kuna ta támmítan na bi.

<sup>33</sup> Á inillili ni Apu Kesu yù umal sù ira káruán nga tatolay. Á initulâ ni Apu Kesu yù amassisiddu na sù talingá na. Á niluluán na, á inisiggek na sù jilá na.

<sup>34</sup> Á sinánguk na yù lángì, á nanalasigà, á kinagi na, “Epata,” á yù kebalinán na, “Mabukatán ken laguk.”

<sup>35</sup> Á dagarágâ nga nabukatánin yù ágginná nayù umal, á nakaginná. Á nabbalikâ yù jilá na, á nagubobuk, ánnna napiá yù ággubobuk na.

<sup>36</sup> Á sinabarangán ni Apu Kesu yù ira tatolay, ta arád da bulubugá iparámak yù kingnguá na. Á mássiki nu initotoli na nga kinagi nira, mappanà ira laguk nga mangiparámak sù ira ngámin nga tatolay.

<sup>37</sup> Á pakarámak nayù ira tatolay, napállâ ira, á nepállâ yù kapállâ da. Á kinagi ra, “Napiá yù ngámin nga kingnguá na,” kud da. “Mássiki yù kitul, pakaginnán na, á mássiki yù umal, pakobobugan na,” kud da.

## 8

*Yù Pamakán ni Apu Kesu sù ira Appátaribu nga Tatolay  
Mattiū 15:32-39*

<sup>1</sup> Á keggá ni Apu Kesu tán nga lugár, uli otturu nga minay yù magaru nga tatolay nga naggagammung ta gián na. Á napúmu yù kanad da. Á inagálán ni Apu Kesu yù ira tudduán na, á kinagi na nira,

<sup>2</sup> “Nakalò yù allà ku sù ira magaru nga tatolay, gapu ta naggián ira nikán ta tallu nga ággaw, á awán ta kanad da,” kun na.

<sup>3</sup> “Á nu palabbetak ku ira sù babále ra, malupulupuk ira ta dálan megapu ta bisid da, ta kuruk nga arayyu yù naggapuán nayù ira káruán.”

<sup>4</sup> Á simibbák yù ira tudduán na, á kinagi ra, “Á kunnasi ámmakám mi nira sawe kalállammatán?”

<sup>5</sup> Á iniyabbú na nira, “Á pígiá nga bullung nga pán yù eggá nikayu?” Á kinagi ra, “Pitu bullung.”

<sup>6</sup> Á kinigá ni Apu Kesu sù ira magaru nga tatolay ta magitubang ira sù kakáddapán. Á iná na laguk yù pitu bullung nga pán. Kabalin na nabbalabálà kâ Namarò, giddigiddúu na yù pán, á iniyawâ na sù ira tudduán na, tapé isinek da sù ira tatolay. Á ed da iniyawâ nira.

<sup>7</sup> Á eggá gapay nira yù baddì nga sirá. Kabalin ni Apu Kesu nabbalabálà kâ Namarò sù sirá, giddigiddúu na gapay, á iniyawâ na nira, tapé isinek da gapay sù ira tatolay.

<sup>8</sup> Á kiminán ira ngámin, á nabattuk ira. Á inunnuk da yù buná ra nga nakkákán, á napannu yù pitu nga lappi.

<sup>9</sup> Á mágge appátaribu nga tatolay yù kiminán.

*Kiddawan nayù ira Parisio kâ Apu Kesu yù Panákkilalád da*

*Mattiu 16:1-4*

<sup>10</sup> Á kabalist da kiminán nayù ira magaru nga tatolay, pinapáno ni Apu Kesu ira. Á dagarágá nappittá di Apu Kesu ta barangay ánná yù ira tudduán na, á minay ira sù lugár nga Dalmanuta.

<sup>11</sup> Á minay nira yù ira Parisio, á pinereperang da ta ubobuk si Apu Kesu, ta parubád da. Á kiniddo ra kuna ta ipasingan na nira yù pagaddatuán na, tapé kurugad da ta naggapu kâ Namarò yù pakáwayyá na.

<sup>12</sup> Á nanalasigá si Apu Kesu. Á kinagi na, “Anni má ta magiddak danniaw ira nga tatolay ta pagaddatuák ku nga panákkilalád da? Kukurugán yù kagiak ku nikayu, nga awán bulubugá ta pagaddatuák ku nga panákkilalán naw,” kun na.

<sup>13</sup> Kabalin na nakkagi sù ira Parisio, nánawán na ira. Á nappittá sù barangay, á nanoli ta dammáng na bebay.

*Ituddu ni Apu Kesu sù ira Tuudduán na ta Mappalán ira sù Ituddu nayù ira Parisio ánná yù Ituddu ni Erodo*

*Mattiu 16:5-12*

<sup>14</sup> Pakabarabarange ri Apu Kesu, náttamán nayù ira tudduán na yù bálud da, á ajjan lâ nira yù táttádday nga bullung nga pán sù barangay.

<sup>15</sup> Á sinabarangán ni Apu Kesu ira, á iniyángngarigán na yù meyannung sù áppalappák ta pán, ta mássiki nu baddì lâ yù áppalappák nga nekiruk ta pán, á palappáran na yù ngámin nga pán. Á ta kunnay gapay sù kustombare nga narákè, nga massamá sù ira tatolay. Á kinagi na nira, “Ginnán naw. Mappalán kayu sù kun na áppalappák ta pán nga ajjan kári Patul Erodo ánná yù ira Parisio,” kun na nira.

<sup>16</sup> Ngam arád da matákál yù kakágian na, gapu ta nononotad da lâ yù náttamád da nga bálud da. Á nakkaká-ubobuk ira nga makkaká-anasâ, á kinagi ra, “Kunniaw yù kagian na gapu ta awán ittam ta pán,” kud da.

<sup>17</sup> Á ammu ni Apu Kesu ta arád da kánnámmuán yù kebalinán nayù kinagi na, ngam nononotad da lâ yù pán. Á kinagi na nira, “Anni má ta ubobugan naw nga awán kayu ta pán? Ngattá ta arán naw paga matákál yù ituddù nikayu? Arán naw panò manonokin?”

<sup>18</sup> Ajjan yù mepasingan nikayu. Ngattá ta arán naw masingan? Á ajjan yù mepakánnámmu nikayu. Ngattá ta arán naw maginná? Máttamán naw panò yù kingnguá?

<sup>19</sup> Á paggaddagadduá ta límá bullung nga pán nga nepakán sù ira límá ribu nga tatolay, pígiá nga lappi yù napannu ta buná ra nga nonnuk naw?” kun na nira. Á kinagi ra kuna, “Mapulu duá yù lappi nga napannu,” kud da.

<sup>20</sup> Á sù paggaddagadduá ta pitu bullung nga pán sù ira appátaribu nga tatolay, pígiá yù napannu nga lappi nga nangipayyán naw ta buná ra?” kun ni Apu Kesu nira. “Pitu,” kud da.

<sup>21</sup> “Á arán naw panò paga kánnámmuán?” kun ni Apu Kesu nira.

*Yù Pamakasingan ni Apu Kesu sù Buling*

<sup>22</sup> Á pappatale ri Apu Kesu, nakáddè ira ta ili na Betseda, á iniyángé nayù ira tatolay yù buling kâ Apu Kesu, á inikomá ra kuna ta támmitan na.

23 Á kinering ni Apu Kesu yù buling, á inipáno na sù babálay. Á niluluán na yù matá nayù buling, á sinámmì na. Á iniyabbû na kuna, “Ajian yù masingam mu?” kun na.

24 Á maningan yù buling, á kinagi na, “Masingak ku yù ira tatolay, ngam kun na káyu ira nga mallakák,” kun na.

25 Á sinámmì na má ni Apu Kesu yù matá na. Á inni-innan nayù buling ta napiá, á nammapiá yù matá na, á nalitáwin yù ánnungan na.

26 Á pamalabbè ni Apu Kesu kuna ta bale na, kinagi na, “Ari ka manoli sù babálay,” kun na.

*Mepalappâ kâ Eduru nu Asinni si Apu Kesu*

*Mattiu 16:13-20; Lukas 9:18-21*

27 Á nánaw di Apu Kesu áンna yù ira tudduán na, ta umay ira sù ira babálay ta lugár na Sesaria Pilippi. Á sù pakalakalakák da ta dálan, iniyabbû ni Apu Kesu nira, “Asinningà kanu nga kun na tatolay?”

28 Á kinagi ra, “Sikaw kanu si Kuan nga Minánnigù,” kud da. “Á yù ira káruán, kagiad da ta sikaw si Elias nga ábbilinán ni Namarò, onu yù tádday sù ira ngaw ábbilinán ni Namarò,” kud da kâ Apu Kesu.

29 Á iniyabbû ni Apu Kesu nira, “Á sikayu, anni yù kagian naw? Asinningà gapay?” Á simibbák si Eduru, á kinagi na, “Sikaw yù MakKirstu nga sinullà ni Namarò nga umay magmaguray.”

30 Á sinaddánán ni Apu Kesu ira, ta arád da lábbì kagian yù meyannung kuna.

*Ipakánnámmu ni Apu Kesu yù Pate na Sangaw*

*Mattiu 16:21-28; Lukas 9:22-27*

31 Á inigapu ni Apu Kesu nga inipakánnámmu nira yù mesimmu kuna sangaw. Kinagi na nira, “Á jigirigátad dangà sangaw, sikán nga Kaká na ngámin na tatolay. Á mawák ku nga magattam, ta ipuerá rangà nayù ira karakalán áンna yù ira kátannangán nga pári áンna yù ira mesturu ta rilision. Á ipapapáte rangà sangaw. Á pappasá na tallu nga ággaw, maginnanolayà.”

32 Á yane nga meyannung ta pate ni Apu Kesu, kinagi na nga daretiu nira. Á si Eduru, inillili na laguk si Apu Kesu ta baddì sù ira kábulud da, á gimmá na. “Ari ka magubobuk ta kunnian,” kun ni Eduru kuna.

33 Ngam nallipay si Apu Kesu, nga maningan sù ira tudduán na. Á ginammá na laguk si Eduru. Kinagi na kuna, “Mánaw ka saw nikán, ta naggapu kâ Satanas yù kinagim! Ta kunnay ta negagángay ta tolay yù nonotam mu, nga ari naggapu kâ Namarò.”

*Tabarangán ni Apu Kesu yù ira Tumuttul kuna*

*Mattiu 10:38-39; 16:24-28; Lukas 9:23-27; 17:33; Kuan 12:25*

34 Á inagálán ni Apu Kesu yù magaru nga tatolay áンna yù ira tudduán na, ta umay ira kuna. Á kinagi na nira, “Yù tolay nga ikáyâ na tumuttul nikán, arán na laguk tuttulan yù ikáyâ na baggi na, ngam tuttulan na lâ yù ikáyâ ku. Á attamán na gapay yù jígâ nga umay kuna, mássiki nu matay megapu sù ángnguruk na nikán. Á ta kunnian, kunnay ta káttuan na yù kurù na, á tuttulan nangâ.

35 Ta yù tolay nga nonotan na lâ yù ákkatole na ta dabbuno, matay galâ sangaw nga mesinna kâ Namarò ta áddè ta áddè. Ngam yù tolay nga tumulù nikán, tapè tuppálan na yù ipakuâ kuna, á mássiki nu matay megapu sù ángnguruk na nikán áンna megapu sù pangipakánnámmu na sù napiá nga dámak nga meyannung nikán, aggina yù mepattolay kâ Namarò ta áddè ta áddè.

36 “Á ta ángngarigán nu málâ na tolay yù ngámin nga káríkuán nga ajjan ta dabbuno ta kukuá na, á eggá panò yù serbi na, nu lonán na yù mannanáyun nga áttole na nga iyawâ ni Namarò nakuan kuna?

37 Awán bulubugá ta metáli na tolay sù mannanáyun nga áttole na áンna yù kesipâ na kâ Namarò.

38 Á yù tolay nga mangipasirán nikán ta arubáng nayù ira tatolay nga manakì nikán áンna naráké yù nonô na, á ipasirák ku gapay sangaw nu manolingá saw. Ta sikán nga Kaká na ngámin na tatolay, manolingà sangaw, nga mangipalappâ sù áddalingáráng áンna yù pakáwayayá ni Namarò nga Yámà. Á mepulù nikán yù ira mangilin nga daroban ni Namarò.”

<sup>1</sup> Á kinagi na laguk ni Apu Kesu nira, “Kurugán yù kagiak ku nikayu. Ajjan saw nikayu yù ira tatolay nga ari matay lage ra masingan yù dattál nayù pammagure ni Namarò nga makáwayyá.”

<sup>2</sup> Á pappasá na annam nga ággaw, inapà ni Apu Kesu di Eduru ánná yù ira duá nga mawwagi, di Ime kâ Kuan. Á aggira lâ yù nepulù kuna, á giminon ira ta atannáng nga puddul. Labbè da ta utun, naddalingárang yù baggi ni Apu Kesu sù ánningad da.

<sup>3</sup> Á nerallà yù kapuro nayù gámì na nga nassiling. Á awán bulubugá ta negittá sù kapuro na ta dabbuno.

<sup>4</sup> Á limittuák di Elias kâ Moyses, nga yù ira ngaw ábbilinán ni Namarò. Á makiubu-ubobuk ira kâ Apu Kesu. Á di Eduru, nasingad da ira.

<sup>5</sup> Á kinagi ni Eduru kâ Apu Kesu, “Apu, napiá ta ajjan ittam saw. Ipappadde mi kayu nakuan ta ággirádde naw nga amíngán. Sikayu kári Moyses kâ Elias.”

<sup>6</sup> Á yáyù lâ nakagi ni Eduru, gapu ta arán na ammu yù kagian na nakuan, ta naganássing ira ánná yù ira duá nga kábulun na, di Ime kâ Kuan. Á nerallà yù assing da.

<sup>7</sup> Á minay yù kunam nga nilirúmán na ira. Á naggapu sù kunam yù ngárál nga nakkagi, á kinagi na, “Yaw yù Anâ ku nga iddukak ku. Gimnán naw yù kagian na.”

<sup>8</sup> Á nallipilipay ira. Á nakkaddák ira, ta táttáddyá lâ yù nasingad da, nga si Apu Kesu.

<sup>9</sup> Á minutù ira sù puddul. Utù da, sinaddánán na ira ni Apu Kesu ta arád da kagian sù ira tatolay yù nasingad da ta utun áddé ta kabalín na nga maginnanolay nayù Kaká na ngámin na tatolay.

<sup>10</sup> Á kinuruk da. Pinatattam da ta nonò da yù nasingad da. Ngam aggira lâ, nakkaká-ububobuk ira nu anni yù kebalinán nayù kinagi na nga paginnanole na.

<sup>11</sup> Á iniyabbû da laguk kuna, “Anni má ta kagian nayù ira mesturu na Kudio ta mapolu nga umay yù ngaw ábbilinán, nga si Elias, ánné sù MakKiristu?” kud da.

<sup>12</sup> “Wan,” kun ni Apu Kesu nira. “Mapolu si Elias nga umay, ta paránan na ngámin, tapè dán nga naparán sù dattál nayù MakKiristu. Á anni laguk yù kebalinán nayù dán nga netúrâ nga meyannung nikán nga Kaká na ngámin na tatolay? Ta ajjan nga netúrâ ta mawák nga attamál ku yù panigirigâ da nikán ánná yù pangluddé da nikán.

<sup>13</sup> Ngam kagiak ku nikayu, ta minay ngin si Elias, á kingnuá nayù ira tatolay yù ngámin nga gustu ra nga naráké, ta kun nayù netúrâ nga meyannung kuna.” Á ubobugan ni Apu Kesu si Kuan nga Minánnigù.

#### *Palawanan ni Apu Kesu yù Anitu sù Abbing*

*Matti 17:14-21; Lukas 9:37-43a*

<sup>14</sup> Á pakáraanni ra sù ira káruán nga tudduán ni Apu Kesu, nasingad da yù magaru nga tatolay nga nagarimummung. Á ajjan gapay yù ira mesturu na Kudio nga mameperang nira ta ubobuk.

<sup>15</sup> Pakasingan nayù magaru nga tatolay kâ Apu Kesu, nakaddák ira nga ayatán. Á nakkarakarerá ira nga jiminápun kuna.

<sup>16</sup> Á iniyabbû ni Apu Kesu nira, “Anni yù pakkakáperangán naw nga ubobuk?” kun na.

<sup>17</sup> “Mesturu,” kun nayù táddyá, “ituluk ku nikaw yù anâ ku nga laláki gapu ta nagunagán na anitu nga umal.

<sup>18</sup> Á sù pattaliponak nayù anitu kuna, pannátan na yù abbing, á mabbugubugá yù simù na ánná manggarangngaringngì ánná mangngattuk. Á inikomâ sù ira tudduám mu ta palawanad da bì yù anitu, ngam arád da makuá,” kun nayù tolay kâ Apu Kesu.

<sup>19</sup> Á simibbák si Apu Kesu, á kinagi na nira, “Innan nawé yawe ira tatolay nga awán bulubugá ta ángngikatalà da! Kunnasi paga yù kabayák nayù paggiák ku ánná keyattam ku nikayu? Iyánge naw saw yù abbing.”

<sup>20</sup> Á iniyángé ra kuna yù abbing. Á pakasingan nayù anitu kâ Apu Kesu, dagarágâ nga pinabbaliák na yù abbing, á napannâ ta dabbun nga nakkarakarebu, á nabbugubugá yù simù na.

<sup>21</sup> Á iniyabbû ni Apu Kesu sù yáma nayù abbing nu káni yù pamegapu nayù takì na. Á sibbák nayù tolay, á kinagi na, “Namegapu sù kabajì na.

<sup>22</sup> Á name-aru ngaw initupâ nayù anitu ta api ánná danum, tapè papatáyan na. Ngam nu eggá yù awayyám nga mangabbák, ikállâ kami bì, á abbágám kami.”

<sup>23</sup> Á kinagi ni Apu Kesu kuna, “Nu eggá yù awayyám nga mangikatalà! Si Namarò yù makáwayyá nga mamalurò ta ngámin, á awán bulubugá ta arán na makuá megapu sù ira nga mangikatalà kuna.”

24 Á inigarù na nga kinagi nayù yáma nayù abbing, “Apu, ikatalà taka! Abbágám mà, tapè aringà mabbábang!”

25 Á pakasingan ni Apu Kesu ta makkarakarerá yù magaru nga tatolay nga magarimum-mung nira, gimmá na yù anitu, á kinagi na kuna, “Sikaw nga umal ánná kitul nga anitu, dobat taka ta mánaw ka sù abbing, á ari ka bulubugá manoli kuna.”

26 Á nakkalli, á pinabballiák na, nga nepallà yù pamabballiák na sù abbing, á nallawán kuna. Á nagiddá yù abbing ta kun na natay. Á aru yù ira nakkagi, nga kud da, “Ye! Natayin.”

27 Ngam sinangngalán ni Apu Kesu yù limá na, á pinagikkáng na, á nanáddak.

28 Á simillung di Apu Kesu lâ ánná yù ira tudduán na ta balay. Á iniyabbû da kuna, “Anni má ta arám mí gangù napapánaw yù anitu sù abbing?”

29 Á kinagi ni Apu Kesu nira, “Awán ta makapapánaw ta kunnian nga anitu, nu ari galâ megapu sù pakimállà na kâ Namaro.”

*Kagian na má ni Apu Kesu yù Meyannung ta Pate na*

*Mattiu 17:22-23; Lukas 9:43b-45*

30 Á nánaw di Apu Kesu táne lugár. Á nattalebák ira sù purubinsia na Galilia. Á arán na ikáyâ ni Apu Kesu ta ammu nayù ira tatolay yù angayád da.

31 Ta ikáyâ na matángngák yù pangituddu na sù ira tudduán na. Á kinagi na nira, “Sikán nga Kaká na ngámin na tatolay, mekekángà sangaw sù ira malussaw nikán, á papatáyad dangà. Á nu mapásá yù tallu nga ággaw, maginmanolayà,” kun na.

32 Ngam yù ira tudduán na, arád da kánnámmuán yù kinagi na, á awán ta makeyattam nga makeyabbû kuna.

*Anni yù Akkuán nayù Kátannangán?*

*Mattiu 18:1-5; Lukas 9:46-48*

33 Á nakáddé di Apu Kesu ta Kaperium, á simillung ira ta balay. Á keggá ra ta lágum na balay, iniyabbû ni Apu Kesu nira, “Anni yù pakkakáperangán naw ta ubobuk gangù sù pallaká tam ta dálan?”

34 Ngam ari ira nakkituk, gapu ta mappasirán ira, ta nakkakáperang ira nu asinni nira yù kátannangán.

35 Á nagitubang si Apu Kesu, á inagálán na yù ira mapulu duá ta umay ira kuna. Á kinagi na nira, “Yù tolay nga máyâ mabbáli ta kátannangán na tatolay, máwák nga mabbáli ta kagukábán ánná makiaripan sù ira ngámin nga tatolay.”

36 Á iná na laguk ni Apu Kesu yù baddì nga abbing, á pine na sù tangngá ra. Á sinábbì na, á kinagi na sù ira tudduán na,

37 “Nu iddukan na tolay yù kunniaw nga abbing megapu nikán, á nebiláng ta sikán gapay yù iddukan na. Á nu iddukan nangà, ari lâ sikán yù iddukan na, nu ari gapay yù naddok nikán.”

*Yù Tolay nga Ari Makikontará kâ Apu Kesu, Aggina yù Mangabbák kuna*

*Lukas 9:49-50*

38 Á kinagi ni Kuan, “Mesturu, nasingam mi yù táddy ngatolay nga mangabbún sù ngágam mu ta pamapáno na ta anitu sù ira nagunagán nga minay kuna. Á pinatukkâ mi, gapu ta arát tam kabbulun.”

39 Á kinagi ni Apu Kesu nira, “Arán naw gammán! Nu ajjan yù tolay nga mamagaddátu megapu sù pakáwayyá nayù ngágak ku, arán nangà sangaw táttáijián.

40 Ta yù tolay nga ari makikontará nittam, aggina yù kopun nga mangabbák nittam.

41 Á kurugán yù kagiak ku nikayu. Mássiki nu baddì lâ yù ángngabbák na tolay nikayu gapu ta sikán nga MakKiristu yù Yápu naw, mássiki nu mamenum nikayu lâ, á alawatan na gemma noka alawatan yù balabálâ na.”

*Mappalán yù ira nga Maddok ta Malliwâ*

*Mattiu 18:6-9; Lukas 17:1-2*

42 Á kinagi ni Apu Kesu nira, “Yù tolay nga mangituddu ta narákè sù ira baddì nga abbing nga mangikatalà nikán, napiá nu magakkátán yù bullo na ta dakal nga batu, á metabbâ ta kálaranána bebay, tapè ari mangituddu ta narákè sù ira nga manguruk nikán.

43 Á nu yù limá naw yù kegapuánán nayù liwâ naw, más napiá nu gappulan naw. Ta napiá nu mepattolay kayu ta áddè ta áddè sù gián ni Namaro ta lángì, mássiki nu táddy lâ yù limá naw, ánné ta keggá na duá nga límá naw, ánná metabbâ kayu ta ornu, nga api nga ari bulubugá máddà.

44 Á yù labbetán nayù ira minálliwâ yù ornu, á pagikaruan ni Namarò ira tán. Awán ta pagibannagád da, á awán ta áddè nayù jígâ da.\*

45 “Á nu yù takki naw yù mangituluk nikayu ta liwâ, más napiá galâ nu gappulan naw. Ta mássiki nu gappul yù takki naw, napiá nu mepattolay kayu ta áddè ta áddè sù gián ni Namarò ta lángi, ánné ta keggá na duá nga takki naw nga mangituluk nikayu ta liwâ, á metabbâ kayu sù ornu nga awán ta káddâ na.

46 Á yù labbetán nayù ira minálliwâ yù ornu, á pagikaruan ni Namarò ira tán. Awán ta pagibannagád da kuna, á awán ta áddè nayù jígâ da.”†

47 “Á nu malliwâ kayu megapu sù masingan nayù matá naw, baddulan naw yù matá naw. Ta más mapiá galâ mássiki nu buling kayu sù tádday nga matá naw, á mesipà kayu sù pammagurayán ni Namarò, ánné ta keggá na duá nga matá naw nga mangituddu nikayu ta liwâ, á metabbâ kayu sù ornu nga awán ta káddâ na.

48 Á yù labbetán nayù ira minálliwâ yù ornu, á pagikaruan ni Namarò ira tán. Awán ta pagibannagád da kuna, á awán ta áddè nayù jígâ da.”‡

49 Á kinagi na má ni Apu Kesu, “Yù ira ngámin nga tatolay, máwák nga kunnay ira ta másinán, megapu sù kun na api nga iyattam da. Á yaw kebalinán na, ta máwák nga mapasigaggâ yù ángngikatalà da níkán, mássiki nu anni yù mesimmu nira, tapè mepángngâ ira nga mesipà nikán gapay ta pammagure ni Namarò.

50 Masingngâ gemma yù asin. Ngam másin panò nu nári yù paggák na? Magimuguk kayu laguk, ta arán naw lonán yù pakkaká-iddu naw áンna pakkaká-abbák naw, tapè napiá lâ yù áaggián naw.”

## 10

*Yù Inituddu ni Apu Kesu nga Meyannung sù Paggúnge na Magatáwa  
Mattiū 19:1-12; Lukas 16:18*

1 Nánaw laguk si Apu Kesu ta Galilia, á minay ta lugár na Judiya ta dammág na Jordan. Á yù magaru nga tatolay, nagarimummungád da má, á sinudduán na ira ta kunnay ta gagángay nga ángnguá na.

2 Á minay gapay yù ira Parisio, á jimikkì ira nga maki-ubobuk kuna, tapè parubád da nu anni yù kagian na. Iniyabbû da kuna, “Anni yù ituddu nayù tunung tam? Egga panò yù awayyá na tolay nga maggúngay ta atáwa na?”

3 Á simibbák si Apu Kesu, á kinagi na nira, “Anni yù ituddu ni Moyses, nga ábbilinán ni Namarò, nga meyannung ta paggúnge nayù ira magatáwa?”

4 Á kinagi ra, “Á inanugù ni Moyses ta igúnge na tolay yù atáwa na nu itúrâ na yù paninanán ta pangigúngay na sù atáwa na,” kud da kuna.

5 Á kinagi ni Apu Kesu nira, “Yayù inituddu ni Moyses gapu ta nataggâ yù nonò naw.

6 Ngam aijan yù netúrâ nga meyannung sù pamarò ni Namarò ta tolay, nga kunniauw: ‘Pidde ni Namarò yù tolay nga laláki áンna babay.’\*

7 Yayù nga panawán na laláki yù darakal na ta umay metáddy sù atáwa na.

8 Á yù ira magatáwa, mabbáli ta kun na táttáddy ngag baggi yù áaggiad da.”† Yayù bibbirat tam sù dán nga netúrâ. Á kuruk nga aringin laguk duá yù ira magatáwa, ngam táttáddy lâ yù baggi ren.

9 Yayù nga arán na tolay passinnán yù ira magatáwa nga pinattáddy ni Namarò.”

10 Á limibbè di Apu Kesu áンna yù ira tudduán na ta balay. Á iniyabbû da kâ Apu Kesu yù meyannung sù ituddu na.

11 Kinagi ni Apu Kesu nira, “Yù laláki nga igúnge na yù atáwa na, á mangatáwa sangaw ta tanakuán, makaliwâ, ta mebiláng ta mangarallaw áンna malliwâ sù olu nga atáwa na.

12 Á yù babay nga igúnge na yù atáwa na, á makiatáwa sangaw ta tanakuán, makaliwâ gapay, áンna mebiláng ta makikarallaw.”

*Ayatan ni Apu Kesu yù ira Ábbing  
Mattiū 19:13-15; Lukas 18:15-17*

13 Á manganánuán, minay yù ira tatolay, ta inituluk da kâ Apu Kesu yù ira ánâ da, tapè támmitan na ira, áンna bindisionán na ira. Ngam yù ira tudduán ni Apu Kesu, gimmá ra yù ira tatolay.

\* 9:44 Nagittá yù netúrâ ta numeru 44, 46, áンna 48. Á ari netúrâ sù ira káruán nga dán nga netúratán. Á netúrâ lâ yù keyarigán na: “Ari bulubugá matay yù tuggi da tán, áンna ari bulubugá máddâ yù api.” † 9:46 Isaya 66:24 ‡ 9:48

<sup>14</sup> Á pakasingan ni Apu Kesu sù kingnguá nayù ira tudduán na, napporay nira. Á kinagi na nira, "Arán naw ira gammán. Iyanugù naw yù ánge nayù ira ábbing nikán, ta aggira mesipà sù pammagure ni Namarò, ánná ngámin ira nga tatolay nga kunnay karanniaw nga ábbing nga mangikatalà nikán.

<sup>15</sup> Kurugán yù kagiak ku nikayu, nga ari mesipà yù tolay sù pammagure ni Namarò nu ari mangikatalà kâ Namarò ta kunnay sù pangikatalà nayù ira ábbing."

<sup>16</sup> Á sinábbi na yù ira ábbing nga taggitáddy. Á sinámmì na ira ta ulu ra, á kiniddo na kâ Namarò yù kapiániad da. Kinagi na sù ira katággitáddy, "Alluárán na ka ni Namarò."

*Yù Tolay nga Maríku*

*Mattiu 19:16-30; Lukas 18:18-30*

<sup>17</sup> Á ta páno di Apu Kesu ta umay ira ta tanakuán nga lugár, nakkarerá nga minay kuna yù táddy nga laláki nga namallittúkak ta arubáng na, á kinagi na, "Mesturu, napiá nga tolay ka. Anni yù kagiam mu nga máwák nga akkuák ku, tapè mepattolayà nga mesipà kâ Namarò ta áddè ta áddè?"

<sup>18</sup> Á kinagi ni Apu Kesu kuna, "Ngattá, ta kagiam mu ta sikán yù napiá? Awán ta kuruk naga napiá nu ari galâ ni Namarò.

<sup>19</sup> Ammum yù taddán ni Namarò nga netúrâ. 'Ari ka mampatay ta tolay. Ari ka mangarallaw. Ari ka makkokò. Ari ka massiri nu massistigu ka. Ari ka maddarogà. Makimoray ka sù ira darakal mu.' <sup>‡</sup>

<sup>20</sup> Á kinagi nayù tolay kâ Apu Kesu, "Mesturu, ngilinak ku ngámin danniaw áddè sù kabajjì ku."

<sup>21</sup> Á inimámmatán ni Apu Kesu yù tolay, á nakalò yù iddù na kuna. Á kinagi na kuna, "Ajjan paga táddy nga pakkúrangám mu. Em mu bì íláku yù ngámin nga kukuám, á isinek mu yù pallakuám mu sù ira pobare, tapè maríku ka galâ ta lángì kâ Namarò. Á manoli ka saw laguk nga tumuttul nikán."

<sup>22</sup> Pakaginná nayù tolay sù kinagi na, nakalò yù daddam na, á siggaraddam nga nánaw, gapu ta eggá kuna aru nga kukuá na.

<sup>23</sup> Páno nayù maríku, nilipilipe ni Apu Kesu yù ira tudduán na, á kinagi na nira, "Marigâ nga tumulù yù ira maríku sù pammagure ni Namarò, tapè mesipà ira kuna."

<sup>24</sup> Á napállâ yù ira tudduán na sù kinagi na. Á pidduá na nakkagi nira, "Wáwwagì, kuruk naga marigâ nga tumulù yù tolay, tapè mesipà sù pammagure ni Namarò.

<sup>25</sup> Más malogon yù állabbû na kamel ta abbû na dágum, ánnè ta tumulù yù maríku nga tolay kâ Namarò, tapè mesipà sù pammagure na." Á dakal nga ayám ánnè ta kabáyu onu nuáng yù kamel, nga sináppukul yù barâh na.

<sup>26</sup> A nerallâ yù kapállâ da, á kinagi ra kuna, "Asinni laguk yù meyígù ánná mesipà kâ Namarò ta lángi?"

<sup>27</sup> Á inni-innan ni Apu Kesu ira, á kinagi na, "Á awán ta tolay nga makáwayyá. Ngam si Namarò yù mamalurô galâ, ta aggina yù makáwayyá ta ngámin."

<sup>28</sup> Á kinagi na laguk ni Eduru kuna, "Á sikami, pinanawám mi ngámin, á tumuttuttul kamingin nikáw."

<sup>29</sup> Á kinagi ni Apu Kesu, "Kurugán yù kagiak ku nikayu. Yù tolay nga panawán na yù bale na onu wáwwagi na, darakal na, ánná na, ánná dabbun na, nu nánawán na ira megapu sù panguruk na nikán, tapè umay mangipakánnámmu sù napiá nga dámak nga meyannung nikán,

<sup>30</sup> á kuruk nga bálatan ni Namarò. Ta iddán ni Namarò ta aru nga paggianán na, wáwwagi na, yená na, ánná na, ánná dabbun na ta keggá na sawe dabbuno. Ngam parubán nayù tolay gapay yù panigirigâ da kuna megapu sù panuttl na nikán. Á sangaw nu duttál yù ággaw, meddán gapay ta inángâ na nga awán ta áddè na.

<sup>31</sup> Ngam aru yù ira nga makáwayyá kunangan nga baddì yù pakáwayyá ra sangaw nu duttál yù ággaw. Á yù ira nga awán ta pakáwayyá ra kunangan, makáwayyá ira tán nga ággaw."

*Pilluán ni Apu Kesu nga Makkagi ta Pate na*

*Mattiu 20:17-19; Lukas 18:31-34*

<sup>32</sup> Á nappatalay di Apu Kesu ánná yù ira tudduán na nga mappángè ta Jerusalem. Á pallakál da, mapolu si Apu Kesu ta dálan ánnè nira. Á napállâ yù ira tudduán na, á naganássing yù ira tatolay nga tumuttul kuna, gapu ta umay si Apu Kesu ta ili na Jerusalem, nga paggianán nayù ira malussaw kuna. Á inillí ni má nigin ni Apu Kesu yù ira tudduán na, tapè kagian na nira yù mesimmu kuna sangaw.

<sup>33</sup> Á kinagi na, "Ginnán naw. Gumen ittam ta ili na Jerusalem. Á labbè ku tán, sikán nga Kaká ngámin na tatolay, gaputad dangà, á ipatangngal dangà sù ira kátannangán nga pári ánnna yù ira mesturu. Á kagiad da yù pamagikáru ra nikán ta patè. Á ipatangngal dangà sù ira ari Kudio nga mammaguray.

<sup>34</sup> Á yù ira ari Kudio, uoyoyungád dangà. Pallulutábád dangà, á paligatad dangà, á papatayad dangà. Ngam sangaw nu mapasá tallu nga ággaw sù patè, á maginnanolayà."

*Yù Ikomá nayù ira Duá, di Ime kâ Kuan*

*Mattiu 20:20-28*

<sup>35</sup> Á jímkki laguk kâ Apu Kesu di Ime kâ Kuan, nga duá nga ánâ ni Sebedo. Á kinagi ra kuna, "Mesturu, ajan yù ikomá mi nga akkuám mu megapu nikami."

<sup>36</sup> Á kinagi na nira, "Anni yù ikomá naw nga akkuák ku megapu nikayu?"

<sup>37</sup> Á kinagi ra kuna, "Nu mammaguray ka sù páppatulám mu, anugutam mu ta pat-tangngám mi sikaw sù pagitubangám mu, tádday sù jiwanám mu ánna tádday sù jímigim, nga mesipà sù keparáyom."

<sup>38</sup> Ngam kinagi na laguk ni Apu Kesu nira, "Arán naw garè kánnámmuán yù kebalinán nayù ikomá naw. Makeyangngá kayu panò ta jígá nga kunnay ta jígá nga attamák ku sangaw? Attamán naw panò yù pate naw nga kunnay sù patè?"

<sup>39</sup> Á kinagi ra kuna, "Makeyattam kami ngay." Á kinagi ni Apu Kesu nira, "Yáyù gemma noka yù attamán naw.

<sup>40</sup> Ngam aringà makáwayyá nga mangiyawá nikayu ta pagitubangán naw sù jiwanák ku ánna jímigi. Napakappiánin yù ira ággitubangán nga naparán sù ira nga sinullá ni Namarò."

<sup>41</sup> Á pakaginná nayù ira mapulu nga tudduán na sù pakkiddo nayù ira kábulud da, di Ime kâ Kuan, napporay ira, ta kiniddo ri Ime yù ira ággitubangán nayù ira maráyaw.

<sup>42</sup> Á inagálán ni Apu Kesu ira ta umay ira ta gián na, á kinagi na nira. "Ammu naw ta kitarov yù ira nga mammaguray sù ira makkakerumá nga tatolay nga ari Kudio. Á yù ira kátannangád da, makáwayyá ira nga mamattuttl sù ure ra.

<sup>43</sup> Ngam ari kunnian nikayu. Yù tolay nga máyâ nakuan nga mepotun ánnè nikayu, aggina laguk yù tumulù nga masserbi nikayu.

<sup>44</sup> Á yù tolay nga ikáyâ ta aggina yù makáwayyá ánnè nikayu, aggina laguk yù mab-baluntáriu nga makiaripan ta ngámìn.

<sup>45</sup> Á mássiki sikán nga Kaká ngámin na tatolay, minayà saw, nga ari passerbián nayù ira tatolay, nu ari galâ ta sikán yù masserbi sù ira tatolay, ánnna itapil ku yù baggi, nga mebuwi ta aru nga tatolay, tapè pakomán na ira ni Namarò ta liwâ da."

*Pammapián ni Apu Kesu yù Buling*

*Mattiu 20:29-34; Lukas 18:35-43*

<sup>46</sup> Á nakáddé di Apu Kesu ánnna yù ira tudduán na ta ili na Jeriku, nga pattalebarád da lá. Á páno ra ta Jeriku, magaru yù ira tatolay nga mepulù nira. Á ajan yù buling nga minákkilimù, nga nagitubang sù aggik na dálan. Si Bartimio yù ngágan na, nga anâ ni Timio.

<sup>47</sup> Á pakaginná ni Bartimio ta mattalebák si Apu Kesu nga taga Nasaret, á nakkatakatal, á kinagi na, "Kaw! Apu Kesu, nga Ginaká ni Patul Dabid, ikállà mà bí!" kun na.

<sup>48</sup> Á aru yù ira tatolay, á gimmá ra, á kinagi ra kuna, "Ari ka mattannuk," kud da kuna. Ngam iníuppanà na nakkatakatal, "Ginaká ni Patul Dabid, ikállà mà bí!"

<sup>49</sup> Á pakaginná ni Apu Kesu kuna, nagginná, á kinagi na nira, "Agálán naw ta umay saw." Á ed da kinagi kuna, "Pataggatam mu yù nonò mu. Á gumikkáng ka, ta ipágál na ka."

<sup>50</sup> Á inirián na laguk yù ulolà na, á nattábbarikuâ nga gimikkáng, á minay kâ Apu Kesu.

<sup>51</sup> Á kinagi ni Apu Kesu kuna, "Anni yù ikáyâ mu nga akkuák ku nikaw?" Á kinagi nayù buling kuna, "Apú, parè bì ta makasinganà."

<sup>52</sup> Á kinagi ni Apu Kesu kuna, "Makapánaw ken, ta nammapiá ken megapu sù pangikatalà mu nikán." Á dagarágâ nanoli yù ánnningan nayù buling, á nepulù kâ Apu Kesu ta pappatale na ta dálan.

## 11

*Lubbè di Apu Kesu ta Ili na Jerusalem*

*Mattiu 21:1-11; Lukas 19:28-40; Kuan 12:12-19*

<sup>1</sup> Pakáddé di Apu Kesu ta puddul nga namulán ta káyu nga olibo, nerípâ da yù ira babáláy na Bepagi ánna Bitania, nga aranni ta ili na Jerusalem. Á pinapolu ni Apu Kesu yù duá ira nga tudduán na.

<sup>2</sup> Á kinagi na nira, “E kayu lábbì tukewà babáláy, ta masingan naw sangaw tán yù kígaw na dongki nga negálù, nga ari bulubugá paga nga nattakayán. Ubbarán naw laguk, tapè iyángé naw saw.

<sup>3</sup> Á nu ajjan yù mangiyabbù nikayu ta ‘Ngattá ta apan naw?’ á kagian naw, ‘Wan, ta máwák ni Apu, á ipetoli na galâ sangaw,’ kun naw kuna.”

<sup>4</sup> Á gapu ta paddok ni Apu Kesu nira, nánaw ira, á nálek da yù kígaw sù kalsáda, nga negálù ta puertá na balay, á inubbarád da.

<sup>5</sup> Á ajjan yù ira tatolay nga nanáddak ta kalsáda, á nasingad da yù kingnguá ra. Á iniyabbù da nira, “Ngattá ta ubbarán naw yù kígaw?”

<sup>6</sup> Á initabbák da yù nipakagi ni Apu Kesu nira, á nipálâ da laguk nira.

<sup>7</sup> Á nánaw ira, á ed da imiyágay yù kígaw kâ Apu Kesu. Á iminánnâ da yù gagámì da sù barâ na ayám, á nattakayán na laguk ni Apu Kesu.

<sup>8</sup> Á arau yù ira tatolay nga ajjan tán, á ininánnâ da yù gagámì da ta dálan. Á yù ira káruán, ininánnâ da yù pangapangá na káyu nga naddon, nga sippisippáng da ta aggik na dálan.

<sup>9</sup> Á ngámín yù ira nga mapolu kári Apu Kesu ta dálan áんな yù ira maporián ta likuk da, magayáyâ ira nga nagaragiák, á kinagi ra, “Dayáwat tam si Namarò. Dayáwat tam yù Patul nga jinok ni Namarò ta umay mammaguray nittam,”\*

<sup>10</sup> ta aggina yù táli nayù ngaw mammaguray nga naggaká nittam, si Patul Dabid, á napiá yù pammagure na. Maráyaw si Namarò ta lángi.”

<sup>11</sup> Á labbè da ta Jerusalem, simillung si Apu Kesu sù mangilin nga kapilliá, nga bale ni Namarò, ta en na sinullúnán ngámín yù ajjan ta lágum na. Á gapu ta púgágìn, kabalín na maningen, nánaw, á minay ira ta Bitania, di Apu Kesu áんな yù ira mapulu duá nga tudduán na.

### *Makatáng yù Káyu nga Igò*

*Mattiū 21:18-19*

<sup>12</sup> Á sù tádday nga ággaw, panoli ra ta Jerusalem nga naggapu ta Bitania, nabisin si Apu Kesu.

<sup>13</sup> Á nerípá na yù káyu nga igò, nga naddon ta napiá. Á en na iningan nu eggá bungá na, ta nasingngà gemma yù bungá na igò. Labbè na kuna, nasingan na ta dipúrù don na, nga awán bulubugá ta bungá na, gapu ta ari paga yù ággaw na pabbungá na.

<sup>14</sup> Á kinagi ni Apu Kesu, “Aringin bulubugá mabbungá yawe káyu áddè kunangan ta áddè ta áddè.” Á naginná nayù ira tudduán na yù kinagi na.

### *Pakarenuán ni Apu Kesu yù Mangilin nga Kapilliá*

*Mattiū 21:12-17; Lukas 19:45-48; Kuan 2:13-22*

<sup>15</sup> Á labbè da ta Jerusalem, simillung mággin si Apu Kesu sù mangilin nga kapilliá, nga bale ni Namarò. Á pinaturiák na yù ira malláku áんな yù ira nga umay gumátáng. Á sinottombá na yù lamesá ira nayù ira minánnáli ta kuártu áんな yù bángku nayù ira malláku ta mammánù.

<sup>16</sup> Á arán na anugutan yù ira mattalebák nga mangáttu sù námmuák nayù mangilin nga kapilliá.

<sup>17</sup> Á inituddu na sù ira tatolay, á kinagi na, “Arán naw panò ammu yù netúrâ nga Ubobuk ni Namarò, nga kunniaw: ‘Yù bale yù ákkimállatán na ngámín nga tatolay.’” Ngam sikayu, pinatalián naw ta ággianán nayù ira maddarogá.”

<sup>18</sup> Á yù ira kátannangán nga pári áんな yù ira mesturu ta tunung, narámak da yù kingnguá ni Apu Kesu, á inigagángé ra nu kunnasi yù ámmápaté ra kuna. Ta maganássing ira kuna, áんな passilad da, gapu ta napállâ yù ira magaru nga tatolay megapu sù pakáwayá yù nayù ángngituddu na.

<sup>19</sup> Á ta pajjibbà, nánaw di Apu Kesu sù ili.

### *Yù Ituddu na nga Meyannung ta Pakimállà tam áんな Pakkakápakomá tam*

*Mattiū 21:20-22*

<sup>20</sup> Á ta pannawák, panoli ri Apu Kesu ta Jerusalem, nasingad da yù káyu nga igò nga sinalebarád da sù tádday ággaw, nga nakatángin ngámín áddè ta gamù na.

<sup>21</sup> Á manonò ni Eduru yù kinagi ni Apu Kesu nga meyannung sù káyu, á kinagi na, “Apu, innam mè yù káyu nga inigagek mu. Nakatángin!”

<sup>22</sup> Á simibbák si Apu Kesu, á kinagi na nira, “Mangikatalà kayu kâ Namarò.

\* **11:9** Isaya 56:7; Jeremias 7:11    † **11:17** Paddayan nayù ira Kudio ta binaráyáng yù tabbuk nayù bungá na úbas.

<sup>23</sup> Kurugán yù kagiak ku nikayu. Nu manguruk yù tolay kâ Namarò ánnna ari mabbábáng ta pangikatalà na, ajjan yù awayyá na nga maddok ta puddul, nga kagian na, ‘Meyalì ka, puddul, nga melappák ta bebat,’ á kurugan na.

<sup>24</sup> Yáyù nga kagiak ku nikayu ta maguray lâ yù ikomá naw kâ Namarò ta pakimállà naw, ikatalà naw ta alawatan nawin, á kuruk nga meyawâ nikayu.

<sup>25</sup> Á sù pakimállà naw kâ Namarò, nu matakì yù nonò naw sù tolay nga nakaliwâ nikayu, máwâk nga pakomán naw laguk, tapé pakomán nakayu gapay nayù Yáma naw nga Namarò nga maggián ta lángì.

<sup>26</sup> Ta nu ari kayu mamakomá sù ira kábulun naw, arán na kayu gapay pakomán nayù Yáma naw nga Namarò nga maggián ta lángì.”

*Iyabbú da kâ Apu Kesu yù Paggapuán na Pakáwayyá na*

*Mattiu 21:23-27; Lukas 20:1-8*

<sup>27</sup> Á limibbè di Apu Kesu má ngin ta Jerusalem. Á nallakalakák si Apu Kesu sù námmuák nayù mangilin nga kapilliá nga najijijingán. Á jímkì kuna yù ira kátannangán nga pári ánnna yù ira mesturu ta tunung ánnna yù ira karakalán.

<sup>28</sup> Á iniyabbú da kuna, “Anni yù paggapuán nayù pakáwayyám sù kingnguám? Asinni yù nangiyawâ nikaw sù pakáwayyám?” kud da kâ Apu Kesu.

<sup>29</sup> Simibbák si Apu Kesu, á kinagi na nira, “Ajjan gapay yù iyabbú ku nikayu. Á nu tabbagan nawà, kagiak ku laguk nikayu yù naggapuán nayù pakáwayyâ.

<sup>30</sup> Si Kuan, nga yù ngaw minánnigù sù ira tatolay, asinni naggapuán nayù pakáwayyá na? Naggapu kâ Namarò, onu naggapu ta tolay? Kagian naw nikán.”

<sup>31</sup> Á nakkakápererang ira ta ubobuk, nga kud da, “Anni yù itabbák tam? Nu itabbák tam ta naggapu kâ Namarò yù pakáwayyá na, á iyabbú na sangaw, ‘Ngattá, ta arán naw laguk kinuruk si Kuan?’

<sup>32</sup> Á metabbák tam panò ta naggapu ta tolay?” Yáyù kinagi ra gapu ta maganássing ira sù ira tatolay nga makimoray kâ Kuan, gapu ta kinagi nayù ira tatolay ta kuruk nga ábbilinán ni Namarò si Kuan.

<sup>33</sup> Á yáyù nga initabbák da kâ Apu Kesu, “Arám mi ammu yù naggapuán nayù pakáwayyá ni Kuan.” Á kinagi ni Apu Kesu nira, “Á yáyù nga arák ku laguk kagian nikayu yù naggapuán nayù pakáwayyâ sù akka-akkuák ku.”

## 12

*Yù Ángngarigán nga Meyannung sù ira Manangngal sù Kamulán ta Úbas*

*Mattiu 21:33-46; Lukas 20:9-19*

<sup>1</sup> Á nagángngarigán si Apu Kesu ta pangituddu na paga sù mangilin nga kapilliá, á kinagi na nira, “Ajjan yù tolay nga namulá ta úbas sù komán na, á inalitukán na. Á kinokkok na yù abbú ta áppagalán ta bungá na.\* Á pidde na yù atannáng nga balay nga paggianán nayù ira minánnaron, tapé merípâ da yù ngámin nga áddè na kamulán. Á inikatalà na yù kamulán sù ira minánnangngal kuna, á nánaw nga minay ta arayyu nga lugár.

<sup>2</sup> “Á ta áppupúsik na bungá na úbas, jinok nayù tolay yù aripan na ta umay sù ira minánnangngal, tapé apan na nira yù balle na.

<sup>3</sup> Ngam ginápù da yù aripan, á pinalapaligà da, á pinapáno ra nga awán ta inâ na.

<sup>4</sup> Á jinok na má yù mekarú nga aripan na. Á kingnguá ra yù ulu na ánnna pinasiránad da.

<sup>5</sup> Á jinok na má nira yù mekatallu nga aripan na, á pinapáte ra. Á kunniaw gapay kingnguá ra sù ira káruán nga jinok na, biddibiddù da yù ira káruán, á pinapáte ra yù ira káruán.

<sup>6</sup> “Á ta kabalín na yaw, ajjan lâ sù makáddabbun yù táttáddyay nga awayyá na nga doban, yù anâ na nga laláki nga iddukan na. Aggina yù naporíán nga jinok na, ta kagian na ta nonò na, ‘Kuruk nga pakimorayád da yù anâ ku.’

<sup>7</sup> Ngam yù ira minángngallu, pakasingad da sù makáddabbun yù táttáddyay nga awayyá na nga doban, yù anâ na nga laláki nga iddukan na. Aggina yù naporíán nga jinok na, ta kagian na ta nonò na, ‘Kuruk nga pakimorayád da yù anâ ku.’

<sup>8</sup> Á ginápù da, á pinapáte ra ánnna inilappák da sù liák na alitù.”

<sup>9</sup> Á kinagi ni Apu Kesu nira, “Anni laguk akkuán nayù makáddabbun sù ira minánnaron ta kobásán na? Umay mamapátyay nira, á ipataron na yù kamulán na sù ira tanakuán.

<sup>10</sup> Arán naw panò binibbik yaw nga netûrâ, nga Ubobuk ni Namarò:

‘Ajjan yù batu nga inipuerá nayù ira nabbalay ta batu,  
gapu ta kagiad da ta awán ta serbi na.

\* 12:1 Salmo 118:22-23

Á aggina yù batu nga mabbáli ta ánnáddagán nayù balay.

<sup>11</sup> Yaw yù kingnguá ni Apu Namarò, nga makapállâ nittam.’ ”†

<sup>12</sup> Á yù ira karakalán na Kudio, nánnámmuád da ta aggira yù ituddu ni Apu Kesu megapu sù pagangngarigán na nga meyannung sù ira narákè nga minánnaron ta kamulán ánná megapu sù netúrá nga meyannung sù ira nabbalay ta batu, nga nangipuerá sù kapiánán. Á gaputad da nakuan, ngam pinaguráyád da, gapu ta maganássing ira sù ira magaru nga tatolay nga makimoray kuna. Á nánawád da laguk.

*Iyabbû da kâ Apu Kesu nu Mappágá ira nakuan ta Buwì*

*Mattiu 22:15-22; Lukas 20:26*

<sup>13</sup> Á jinok da yù ira káruán nga Parisio ánná yù ira káruán nga kákkapárán ni Patul Erodo, tapè parubád da si Apu Kesu megapu sù pangiyabbû da kuna.

<sup>14</sup> Á jimikkì ira kuna, á kinagi ra, “Mesturu, ammu mi ta kurugán ngámin yù ubobuk mu. Á arám mu paddurúmán yù ira tatolay, mássiki nu maríku ira onu pobare. Á ituddum lá yù kurugán nga bilin ni Namarò nga meyannung sù ipakúa na sù ira tatole na. Kagiam mu laguk nikami nu ipugik nayù tunung tam yù mappágá ta buwì kâ Patul Sisar, nga mammaguray ta ili na Roma? Mappágá ittam laguk, onu ari?”

<sup>15</sup> Ngam natákál ni Apu Kesu ta áppé pípiá ira, tapè ilogó da. Á yáyù nga kinagi na nira, “Ngattá, ta parubán nawà? Ipasingan nawè bi nikán yù pírá.”

<sup>16</sup> Á iniyawá da kuna. Á kinagi na nira, “Asinni yù makámmammang ánná makángngágan nga masingat tam sawe kuártu?” Á kinagi ra, “Si Patul Sisar.”

<sup>17</sup> Á kinagi ni Apu Kesu nira, “Iyawâ naw laguk kâ Sisar yù kukuá na. Á iyawâ naw gapay kâ Namarò yù kukuá ni Namarò.” Á yù kebalinán na, pagán naw yù buwì sù mammaguray, á iddukan naw ánná kurugan naw si Namarò. Á napállâ ira megapu sù napiá nga itabbák na.

*Iyabbû da kâ Apu Kesu ta Meyannung ta Paginnanole na Tolay*

*Mattiu 22:23-33; Lukas 20:27-40*

<sup>18</sup> Kabalin na yaw, minay nga jimmikkì kâ Apu Kesu yù ira káruán nga Sadusio. Aggira yù Kudio nga kagiad da ta ari maginnanolay yù baggi na tolay sù pagáddekan na ággaw. Á iniyabbû da kâ Apu Kesu, á kinagi ra,

<sup>19</sup> “Mesturu, aijjan yù tunung nga initúrá ni Moyses megapu nittam, ta nu patayán na tolay yù atáwa na ngam awán ta anâ da, máwák nga atawán nayù urián na yù bálu na, tapè maganâ ira sù pannakabaggi nayù kaká na nga natay.

<sup>20</sup> Á góri, naggián saw pitu nga mawwawági nga lálláki. Á nangatáwa yù kaká, ngam natay nga awán ta anâ na.

<sup>21</sup> Á inatáwa nayù mekaruá yù asípák na, ngam natay gapay nga awán ta anâ na. Á kunnian gapay yù nesímmu sù mekatallu ánná ngámin nga káruán.

<sup>22</sup> Aggira ngámin nga pitu, nattutubbâ ira nga nangatáwa sù babay, ngam awán bulubugá ta ánâ da. Á naporíán nga natay gapay yù babay.

<sup>23</sup> Á kagiam mu nikami laguk, sù ággaw nga paginnanole nayù ira námmatay, asinni sù ira pitu yù atáwa nayù babay, nepatalugáring ta nakiatáwa sù ira ngámin nga pitu,” kud da kâ Apu Kesu.

<sup>24</sup> Á kinagi ni Apu Kesu nira, “Yáyù nga makaliwá kayu, ta arán naw garè ammu yù netúrá sù mangilin nga ubobuk ni Namarò ánná yù pakapangnguá ni Namarò.

<sup>25</sup> Á noka nu duttál yù paginnanole nayù ira námmatay, ari ira mangatáwa ánná makiatáwa, gapu ta megítá ira sù ira daroban ni Namarò nga maggián ta lángi.

<sup>26</sup> “Á ta meyannung sù paginnanole nayù ira námmatay, arán naw panò binibbik yù netúrá sù libru ni Moyses nga meyannung sù káyú nga naggatang, nga ari nakassá? Pakasingan ni Moyses sù káyú nga naggatang, jimmikkì kuna, á naginná na yù ngárál ni Namaro, á kinagi ni Namarò kâ Moyses: ‘Sikán si Namarò, nga pakiyápuán nayù ira naggaká nikaw. Sikán yù Yápu di Abrakam kári Isak kâ Akup.’”‡

<sup>27</sup> Á yù ira námmatay, ari ira makiyápu kâ Namarò, ngam yù ira matolay yù makiyápu kuna. § Ari matunung yù nonotan naw, ta arán naw ammu yù kuruk.”

*Yù Purmeru nga Tunung nga Initaddán ni Namarò*

*Mattiu 22:34-40; Lukas 10:25-28*

† 12:11 Exodus 3:6    ‡ 12:26 Á yáyù nga ammu tam ta matolay paga di Abrakam kári Isak kâ Akup ta lángi, mássiki nu natay ira ta nabayágún ta keggá ni Moyses, gapu ta pakimorayád da paga si Namarò.    § 12:27 Deuteronomio 6:5

28 Á ajjan tán yù tádday nga mesturu ta tunung, á naginná na yù pakkakápereperang nayù ira Sadusio kâ Apu Kesu. Á gapu ta kemámmatán na ta napiá yù initabbák ni Apu Kesu nira, jimikkì kuna ta iniyabbû na gapay kuna, á kinagi na, “Apu, anni yù purmeru nga tunung sù ira ngámin nga initaddán ni Namarò?”

29 Á simibbák si Apu Kesu, á kinagi na, “Yawe yù purmeru nga tunung sù ira initaddán ni Namarò: ‘Sikayu nga ginaká ni Israel, ginnán naw yù kagiak ku nikayu. Si Apu Namarò nga Yápu tam, aggina lá yù táttáddyay.

30 Iddukan naw si Namarò nga Yápu naw, á itulù naw kuna yù ayâ nayù putu naw, yù ure naw, yù nonò naw, ánna yù sikan nayù baggi naw.”\*

31 Á ajjan gapay nga netúr yù mekaruá nga máwák nga kurugam mu: ‘Iddukan naw yù ikáttole naw ta kunnay ta ángngiddù naw ta baggi naw.’† Awán ta tanakuán nga máwák nga kurugam mu, nu ari galâ danniaw nga duá,’ kun ni Apu Kesu kuna.

32 Á kinagi na laguk nayù mesturu ta tunung kâ Apu Kesu, “Á kustu, Mesturu. Kurugán yù kinagim, nga táttáddyay lá si Namarò, á awán ta tanakuán, nu ari lá aggina.

33 Á máwák nga iddukat tam si Namarò nga Yápu tam, megapu sù napasigaggà nga ayâ nayù putu tam, ánna ngámin yù nonò tam, ánna yù sikan nayù baggi tam. Á iddukat tam gapay yù ira ikáttole tam ta kunnay ta ángngiddù tam ta baggi tam. Napiá yaw. Más napiá ta tuppálat tam danniaw nga tunung nga initaddán ni Namarò ánné sù mangiyátang ta ayaám nga natuggí ánna ngámin yù Meyátang nga Meyawâ kâ Namarò.”

34 Á pakaginná ni Apu Kesu ta napiá yù initabbák na, kinagi na kuna, “Nu tuppálam mu yù eggá ta nonò mu, mesipâ ken sù pammagure ni Namarò.” Á kabalin ni Apu Kesu nakkagi karannian, awán laguk ta mangiyabbû kuna, ta napállâ ira gapu ta makáwayyá yù pagubobuk na.

#### *Asinni yù MakKiristu?*

*Mattiu 22:41-46; Lukas 20:41-44*

35 Á pangituddu ni Apu Kesu sù mangilin nga kapilliá, nga bale ni Namarò, iniyabbû na sù ira tatolay, nga kun na, “Á yù ira mesturu sù tunung, anni má ta kagiad da ta ginaká ni Patul Dabid yù MakKiristu?

36 Ta si Patul Dabid, kinagi na yù inipalappâ nayù Mangilin nga Ikararuá kuna, á kinagi na,

‘Nagubobuk si Apu Namarò, á kinagi na sù Yápu:

Magitubang ka sù jiwanák ku, nga ággitubangán nayù meparáyaw,  
áddè ta ipeguppè ku nikaw yù ira malussaw nikaw.’‡

37 Á yáyu nga abbúnan ni Patul Dabid ta Yápu na yù MakKiristu. Á nu Yápu na yù MakKiristu, ngattá ta kagiad da ta ginaká na lâ? Ari galâ motun yù Yápu na ánné kuna?’

Á ayatán yù ira magaru nga tatolay nga magginná sù inituddu ni Apu Kesu.

#### *Yù Kinagi ni Apu Kesu nga Meyannung sù ira Parisio ánna yù ira Mesturu ta Tunung*

*Mattiu 23:1-36; Lukas 20:45-47*

38 Á ta pangituddu ni Apu Kesu, kinagi na, “Mappalán kayu sù ira mesturu ta tunung. Ta ikáyâ da mabbarawási ta apaddu nga barawási ra ánna mappasingan ta dápun, tapè pakimorayád da ira nayù ira tatolay ta pappassapassiár da.

39 Á piliad da yù kapiánán na ággitubangán ta kapilliá ánna yù ággitubangán nayù maráyaw ta pakilálláng da ta piestá.

40 Á ilogò da yù ira bálu nga bábbay, tapè apad da yù kukuá ra, á áppa-áppè ira nga makimállâ ta mabayák kâ Namarò, tapè ilímak da yù narákè nga akka-akkuâd da. Á mepallâ yù pamagikáru ni Namarò nira ta pagáddekan na ággaw.”

#### *Yù Inilimù nayù Bálu nga Babay*

*Lukas 21:1-4*

41 Á nagitubang si Apu Kesu aranni sù ángngipayán ta kuártu nga ajjan sù lágum nayù mangilin nga kapilliá. Á inni-innan ni Apu Kesu yù ira tatolay nga umay mangipay ta limù da. Á aru yù ira maríku nga miinay nangipay ta aru nga kuártu.

42 Á minay gapay yù bálu nga babay nga pobare, á pine na duá nga baddì nga pirâ, nga negittá ta duá nga sintábu.

43 Á inagálán ni Apu Kesu yù ira tudduán na, á kinagi na nira, “Innan nawè yù kingnguá nayù babay. Kurugán yù kagiak ku nikayu, aru yù kuártu nga inipe nayù pobare nga bálu ánné sù inipe nayù ngámin ira káruán.

\* 12:30 Libitiko 19:18

† 12:31 Salmo 110:1

‡ 12:36 Daniel 9:27; 11:31; 12:11

<sup>44</sup> Ta inipe ra yù kuártu nga naggapu ta sobará ra. Ngam yù bálu, inipe na ngámin yù áddè na kapobare na, á awánin bulubugá ta ipakkatole na.”

## 13

*Yù Pangipalappâ ni Apu Kesu ta Merakunù yù Mangilin nga Kapilliá  
Mattiu 24:1-2; Lukas 21:5-6*

<sup>1</sup> Á ta páno ri Apu Kesu sù mangilin nga bale ni Namarò, kinagi nayù tádday nga tudduán na, “Mesturu, innám mu yawe ira mallakay nga batu, ánná yù ira nakástá nga bale nayù mangilin nga kapilliái” kun na.

<sup>2</sup> “Wan,” kun ni Apu Kesu kuna. “Á innan naw yawe ira nakástá nga balay nga kapilliái! Ta duttál yù ággaw ya ánawán bulubugá ta batu na nga mallalátuk, ta mewarawarâ ira ngámin.”

*Yù Dattál nayù Jigâ  
Mattiu 24:3-14; Lukas 21:7-19*

<sup>3</sup> Á labbè da sù puddul nga namulán ta káyu nga olibo, ta ábbák nayù mangilin nga kapilliái, á nagitubang ira. Á jímkiki kâ Apu Kesu yù ira lá nga appâ nga tudduán na, si Eduru, si Ime, si Kuan, ánná si Andares, aggira lá, ta ajian yù iyabbú da kuna.

<sup>4</sup> Á kinagi ra kuna, “Kagiam mungè nikami nu anni yù ággaw nga kesimmu na danniaw nga kinagim gangù nga meyannung sù mangilin nga kapilliái. Á anni yù panákkilalán ta duttál yù kapaluro na?”

<sup>5</sup> Á simibbák si Apu Kesu, á kinagi na nira, “Mappalán kayu, tapè ari kayu melogò.

<sup>6</sup> Ta aru yù ira nga umay noka nga mappassíppíl nikán. Á kagiad da ta aggira sikán nga MakKiristu, á aru yù ira tatolay nga ilogò da.

<sup>7</sup> Á nu marámak naw yù meyannung sù ira maggerrá ánná yù ira nga makigerrá ta arayyu nga lugár, ari kayu maburung ta máwák nga mesimmu yaw, ngam ari paga yaw yù pagáddekán na dabbuno.

<sup>8</sup> Á yù ira tatolay nga naggapu ta dumá nga lugár, umay ira makigerrá sù ira nga maggián ta tanakuán nga lugár, á umay yù ira nga naggapu ta tádday nga páppatulán nga makigerrá sù ira nga maggián ta tanakuán nga páppatulán. Á mallunik ta aru nga lugár, ánná mabbisin yù ira tatolay ta aru nga lugár. Danniaw ira nga mesimmu yù pamegapu na lá nayù jigâ, nga kunnay sù jigâ na babay nga maganâ yù keyarigán na.

<sup>9</sup> “Ngam sikayu, magimuguk kayu, ta gaputad da kayu nga ikeká sù ira Kudio nga mamanunnù, á mabaddù kayu sù ira kapilliá ra. Á gapu ta panguruk naw nikán, ikeká ra kayu ta arubáng nayù ira gubinador ánná yù ira patul. Á keyarubáng naw nira, yáyù yù awayyá naw nga mangipakánnámmu nira sù napiá nga dámak nga meyannung nikán.

<sup>10</sup> Ta máwák nga melayalayâ yù napiá nga dámak ta ngámin nga makkakerumá nga tatolay pángè na duttál yù áddè nayù dabbuno.

<sup>11</sup> Á ta pangikeká ra nikayu, ari kayu maburung nu anni yù itabbák naw nira. Á ta pangiyabbú da nikayu, mepakánnámmu nikayu yù kagian naw nira. Ta ari maggapu ta nonó naw yù kagian naw nira, nu ari galâ nga maggapu sù Mangilin nga Ikararuá ni Namarò.

<sup>12</sup> Á yù ira nga mawwagi nga lálláki, ikeká nayù tádday yù wagi na, á ipapapáte na. Á ikeká nayù yáma yù anâ na, á ipapapáte na. Á yù ira ábbing, mapporay ira sù ira darakal da, á ikeká ra yù ira darakal da, á ipapapáte ra ira.

<sup>13</sup> Á sikayu nga makituddu nikán, ikalusso ra kayu na ngámin na tatolay gapu ta panguruk naw nikán. Ngam yù tolay nga mapasigaggâ yù pangikatalà na nikán áddè ta pagáddekán, aggina yù meyígù nga mesipâ kâ Namarò sù pammagurayán na ta áddè ta áddè,” kun ni Apu Kesu.

*Yù Mangala-állirák nga Makánnanássing  
Mattiu 24:15-28; Lukas 21:20-24*

<sup>14</sup> Á kinagi ni Apu Kesu paga nira, “Masingan naw sangaw yù mangala-állirák nga makánnanássing nga mamassíppíl, nga manáddak sù gián nga arán na nakuan panáddagán.\* Á sikayu nga mabbibbiik, nonotan naw yù kebalinán na! Á yù ira tatolay nga maggián sù purubinsia na Judiya ta ággo na dattál nayù makánnanássing, máwák nga mattálaw ira nga umay ta puddul.

<sup>15</sup> Á yù tolay nga ajian ta lawán na bale na, onu magibannák ta utun nayù sináttatapán nga bale na, ari tullung ta bale na, nga umay mangâ ta ípulù na.

\* 13:14 Isaya 13:10; 34:4; Inipalappâ 6:12-13

16 Á yù tolay nga mattarabáku sù ákkomanán na, máwák nga ari manoli ta bale na, nga umay mangá ta ulolá na.

17 Á kábbi yù ira nga mabussì áんな yù ira nga konsu tagibi tán nga ággaw, ta ari ira makakarerá.

18 Makimállà kayu kâ Namarò ta ari mekanná ta ammián yù ággo nayù jigâ naw.

19 Ta umay sangaw yù jigâ nga mappanà ánné ta ngámin nga jigâ ta áddè ngaw pamarò ni Namarò ta dabbuno ta áddè kunangan, á awánin bulubugá ta jigâ nga kagittá na ta áddè ta áddè.

20 Á nu arán na nakuan pangarián ni Namarò yù ággo na jigâ, awán bulubugá ta matoley. Ngam pangarián na megapu sù ira nga piníli na ta tatole na.

21 “Á nu aijan yù tolay nga makkagi nikayu ta ‘Innan nawè, aijanin saw yù MakKiristu,’ onu kagian na, ‘Innan nawè, aijanin tukewà yù MakKiristu,’ arán naw kurugan yù kagian na.

22 Ta duttál yù ira nga mattákiristu áんな yù ira nga mattá-ábbilinán, á aru yù ipasingad da nga panákkilalán nga makapállà, tapè ilogò da nakuan mássiki yù ira piníli ni Namarò ta tatole na.

23 Ngam sikayu, magimuguk kayu, ta dán nga kinagi nikayu pángè na mesimmu danielian.”

*Yù Tappi nayù Kaká na Ngámin na Tatoley*

*Mattiu 24:29-31; Lukas 21:25-28*

24 Á kinagi ni Apu Kesu paga,

“Á ta kabalin nayù jigâ, makkallà yù bilák.

Á ari manawák yù bulán gapay.

25 Á gipannátán yù ira bituan, nga maggapu ta lángi.

Á yù ira nga maggián ta lángi, meyalí ira sù giád da.<sup>†</sup>

26 Á masingad dangà laguk nayù ira tatoley, sikán nga Kaká ngámin na tatoley, nga umay nga mepulù sù kunam, nga maddalingárang áんな makáwayyá.

27 Á dobak ku yù ira daroban nga maggián kâ Namarò, tapè ed da ammungan yù ira piníli ni Namarò nga siminuttul nikán ta dabbuno, aggira ngámin nga naggapu ta ngámin nga lugár da sù utun na dabbuno,” kun ni Apu Kesu nira.

*Yù Panákkilalán ta Panoli na saw ni Apu Kesu*

*Mattiu 24:32-35; Lukas 21:29-33*

28 Á kinagi ni Apu Kesu nira, “Ginnán naw yù ángngarigán nga meyannung ta igò áんな yù ira káruán nga káyu. Nu masingan naw ta mapatalián yù don na káyu, ammu naw ta mapatalián sangaw yù ággíán na ággaw.

29 Á ta kunnian gapay, nu masingan naw yù kesimmu nayù ngámin nga jigâ nga kinagi ná umay, mánnámmuán naw ta aranni ngin yù panolì saw, sikán nga Kaká na ngámin na tatoley.

30 Kurugán yù kagiak ku nikayu, mesimmu ngámin danniaw nga kinagi nikayu lage na pate nayù ira tatoley nga matoley kunangan.

31 Duttál yù ággaw nga awánin yù dabbuno áんな yù lángì áんな ngámin nga aijan nira. Ngam ari bulubugá mapatalián yù ubobuk ku,” kun ni Apu Kesu.

*Awán Bulubugá ta Makánnámmu sù Oras nayù Panoli ni Apu*

*Mattiu 24:36-44*

32 Á kinagi na laguk, “Á ta meyannung sù ággaw áんな oras nga kesimmu na ngámin danniaw, awán ta makánnámmu. Mássiki yù ira daroban ni Namarò nga maggián ta lángi, arád da ammu. Á sikán, nga Anâ ni Namarò, arák ku ammu. Ngam si Ammò ku nga Namarò, aggina lâ makánnámmu.

33 Á mappalán kayu laguk. Napiá nu kunnay kayu ta matturá, ta arán naw ammu nu anni nga oras yù dattál na.

34 Á kunniauw yù keyarigán na. Aijan yù tolay nga maggagannuâ ta umay ta arayyu nga lugár. Á inipataron na ngámin yù kukuá na sù ira aripan na, á kagian na sù ira katággitáddyay yù tarabáku na. Á kagian na sù ira magguárdiá ta matturá ira nga manaron ta ngámin.

<sup>†</sup> 13:25 Yáyù piéstá nga panaddamád da sù ngaw pattalebák nayù daroban ni Namarò. Ta keggá nayù ira ngaw Kudio ta gián nayù ira Egipto nga nangaripan nira, jinok na ngaw ni Namarò yù daroban na nga umay mampatý sù ira kaká nga ánâ nayù ira Egipto. Á ari simillung ta bale nayù ira Kudio, ngam sinalebarán na yù bale ra, ta aijan yù dága na kareru nga pine ra ta utun áんな taging na puertá na bale ra, nga kunnay ta kinagi ni Namarò kâ Moyses ta ipakuá na nira.

<sup>35</sup> Yáyù nga magiddi-iddak kayu laguk, ta arán naw ammu nu káni yù labbè nayù makábbalay, nu lubbè sangaw nu pajibbà onu tangngá na gabi, onu pagittarakkò na manù, onu alippánnawák.

<sup>36</sup> Magimuguk kayu laguk nga magiddak, tapè arán na kayu maratang nga ari paga maparán nga kunnay ta makkaturuk, nu ikáddagâ na lâ manoli.

<sup>37</sup> Á yaw nga kagiak ku nikayu, kagiak ku sù ira ngámin nga tatolay, magimuguk kayu nga magiddak, tapè dán nga naparán kayu," kun ni Apu Kesu.

## 14

*Pangigagángé ra ta Ámmapáte ra kâ Apu Kesu  
Mattiú 26:1-5; Lukas 22:1-2; Kuan 11:45-53*

<sup>1</sup> Á ajjan duá nga ággaw paga lage na piestá na pattalebarán nayù daroban, nga pakkákád da ta pán nga awán ta állapparán na. Á yù ira kátannangán nga pári na Kudio áんな yù ira mesturu ta tunung, alerad da yù paggápù da kâ Apu Kesu nga awán ta makánnámmu, tapè papatáyad da.

<sup>2</sup> Yáyù gapu na nga makkakátabarang ira, á kinagi ra, "Arát tam lábbì gubatan sù keggá ra nga makipiestá, marakè akkuád da ittam nayù ira tatolay."

*Denuán na Babay si Apu Kesu  
Mattiú 26:6-13; Kuan 12:1-8*

<sup>3</sup> Á minay di Apu Kesu ta ili na Bitania, ta bale ni Simon nga naggoggong ngaw. Á pakkákád da, minay yù babay sù gián ni Apu Kesu, nga nanangngal ta boteliá nga napadday ta puraw nga batu, nga napannu ta denu nga bábbanguk nga naggapu ta gamù na nardu, nga kitanginá. Á pikká nayù babay yù bullo na boteliá, á inibubbù na yù denu ta ulu ni Apu Kesu.

<sup>4</sup> Ngam yù ira káruán nga makasingan, napporay ira. Á nakkaká-ubobuk ira, á kinagi ra, "Kengá lâ yù bábbanguk. Ngattá, ta initabbâ ná?

<sup>5</sup> Mapiá nakuan nu meláku ta maturù nga tallu gatù nga pesù ta Meyawâ nakuan sù ira pobare," kud da. Á gimmá ra yù babay.

<sup>6</sup> Ngam simíbbák si Apu Kesu nira, á kinagi na, "Arán naw akkuán. Ngattá, ta pasiránán naw? Napiá yù kingnguá na nikán.

<sup>7</sup> Maggián gemma ta áddè sù gián naw yù ira pobare, á awayyá naw ira abbágán, nu anni nga ággaw nga gustu naw nga mangabbák nira. Ngam sikán, aringà maggián nikayu ta áddè.

<sup>8</sup> Á kingnguá nayù babay yù lâ awayyá na nga akkuán. Arán na imiddagán yù patè, ta jinenúán na yù baggi, nga paránan na ta ketanam ku.

<sup>9</sup> Á kurugán yù kagiak ku nikayu, maguray lâ ta dabbuno yù pangilayalayatán sù napiánga dámak, mepakánnámmu gapay yù kingnguá nayù babay nikán, ta panaddamán nayù ira tatolay kuna."

*Pangigagángé ni Kudas ta Pappagápù na kâ Apu Kesu  
Mattiú 26:14-16; Lukas 22:3-6*

<sup>10</sup> Á si Kudas Iskariote, nga mebiláng sù ira mapulu duá nga sinullà ni Apu Kesu, minay laguk sù gián nayù ira kátannangán nga pári na Kudio, tapè makitarátu nira ta ipagápù na si Apu Kesu.

<sup>11</sup> Á pakaginná ra sù kinagi na, nagayáyâ ira, á initabbá ra ta iddád da ta kuártu. Á inalek na laguk ni Kudas yù awayyá na nga mappagápù kâ Apu Kesu nira.

*Yù Pallalálláng di Apu Kesu sù Panaddamád da sù Pattalebák nayù Daroban  
Mattiú 26:17-25; Lukas 22:7-14, 21-23; Kuan 13:21-30*

<sup>12</sup> Á jmittál yù olu nga ággo nayù piestá, nga pakkákád da ta pán nga awán ta állapparán na, áんな pappárti ra ta karneru.\* Á iniyabbû da kâ Apu Kesu nayù ira tudduán na, "Sisaw ikáyâ mu nga papparánâm mi ta pakkákanát tam?"

<sup>13</sup> Á jinok ni Apu Kesu yù duá nga tudduán na, á kinagi na nira, "E kayu bì tuke ili, á maratang naw yù laláki nga mangáttu ta ammutu. Á tumuttul kayu kuna.

<sup>14</sup> Á sù balay nga tallungán na, kagián naw yaw sù makábbalay, 'Tyabbû nayù Mesturu nikaw nu sisaw gián nayù paggianán na álliuk, tapè umay sangaw kumán ta panaddamán ta pattalebák nayù daroban, aggina áんな yù ira tudduán na?" kun naw sangaw kuna.

<sup>15</sup> Á ipasingan na nikayu sangaw yù aláwa nga lágum ta utun. Á dán nga naparán sù lágum yù ngámin nga awágan naw. Paránan naw tán yù kanat tam," kun ni Apu Kesu sù ira duá.

16 Á nánaw yù ira duá, á minay ira ta ili. Á naratang da ngámin nga kunnay sù kinagi na, á pinarád da yù kanad da nga panaddamán ta pattalebák nayù daroban.

17 Á ta pajjibbà, limibbè di Apu Kesu ánná yù ira mapulu duá nga tudduán na.

18 Á pallalálláng da paga, kinagi ni Apu Kesu nira, "Kurugán yù kagiak ku nikayu, ajjan nikayu yù mappagápú nikán, nga mepallálláng nikán kunangane."

19 Á pakaginná ra karanniai, inikáddagâ da lâ naraddam. Á nattutubbâ ira nga nangiyabbû kuna, á kinagi ra, "Ari nga sikán, unè?"

20 "Wan, tádday nikayu, nga mepasuddâ ta pán sù tangalosá nga jigu.

21 Matayà gemma, sikán nga Kaká na ngámin na tatolay, ta yáyù inipetúrâ ni Namarò sù dán nga netúrâ, ngam kábbi yù tolay nga mappagápú nikán. Mapiá nakuan nu ari neyanâ."

*Yù Pamágák di Apu Kesu, nga Panaddamát tam ta Pate na*

*Mattiu 26:26-30; Lukas 22:14-20; 1 Korinto 11:23-25*

22 Á sù pakkákád da paga, inâ ni Apu Kesu yù pán. Á kabalin na nabbalabálâ kâ Namarò, giddigiddúu na yù pán nga iniyawâ na nira. Á kinagi na, "Mangâ kayu sawe, ta kanan naw. Yawe yù baggi."

23 Á inâ na yù tangapassuelu nga binaráyáng nga naggapu ta tabbuk na úbas. Á pabbalabálâ na kâ Namarò, iniyawâ na nira, a aggira ngámin mininum kuna.

24 Á kinagi na nira, "Yawe yù dágâ nga mebubbù ta ketapil ku megapu ta aru nga tatolay, tapè pakomán ni Namarò ira ta liwiliwâ da. Yù dágâ yù panákkilalan ta napasigaggâ ánná mekatalâ yù bagu nga tarátu ni Namarò sù ira tatole na.

25 Kurugán yù kagiak ku nikayu, arák kin ulian nga inuman áddè ta inumak ku noka yù bagu sù pammagurayán ni Namarò."

26 Á nakkansion ira ta áddáyo ra kâ Namarò. Kabalid da nakkansion, nánaw ira nga minay sù puddul nga namulán ta káyu nga olibo.

*Nípalappâ ni Apu Kesu yù Panájji ni Eduru kuna*

*Mattiu 26:31-35; Lukas 22:31-34; Kuan 13:36-38*

27 Á pallakalakák da, kinagi ni Apu Kesu sù ira tudduán na, "Sikayu ngámin yù manájji nikán sangaw nu mappanà yù ággiák ku. Ta ajjan yù netúrâ nga kinagi ni Namarò nga kunniaiw:

'Papatáyak ku yù mináppárak,  
á mewarawarâ yù ira karneru, gapu ta awán ta manaron nira.'<sup>†</sup>

28 Ngam maginnanolayà, á ta paginnanolè, mapolungâ ánné nikayu nga umay túrin ta purubinsia na Galilia."

29 Á pakkagi ni Apu Kesu ta tátájjíad da, kinagi ni Eduru kuna, "Mássiki nu aggira ngámin yù mánnaw nikaw, ngam sikán lápay, arát taka tájjián."

30 Á kinagi ni Apu Kesu kuna, "Kurugán yù kagiak ku nikaw, lage na mamiddúá magittarákkò yù manù sangaw nu gabi, mamillu ka nga makkagi ta arám mà ammu."

31 Ngam initaggâ ni Eduru nga kinagi, "Mássiki nu sitta duá yù matay, arák ku ilímak ta ammu taka." Á kunnian yù kinagi ra ngámin nga katággitáddy.

*Makimállâ si Apu Kesu sù Kamulán ta Getsemani*

*Mattiu 26:36-46; Lukas 22:39-46*

32 Á labbè di Apu Kesu ta kamulán nga mangngágan ta Getsemani, kinagi ni Apu Kesu sù ira tudduán na, "Magiddak kayu saw, ta ek ku bi tán nga makimállâ kâ Namarò."

33 Ngam inipulù na yù ira tallu lâ, si Eduru, ánná si Ime kâ Kuan. Á inikáddagâ na lâ ni Apu Kesu napábbaw ánná naburung.

34 Á kinagi na nira, "Mággekà mappassi sù kepallà nga daddam ku. Maggián kayu saw nga matturá."

35 Á nallilli si Apu Kesu ta baddì paga nira, á namalittúkak, á nakimállâ kâ Namarò tanu awayyá na, ari nakuan mesimmu kuna yù jígâ nga umay kuna.

36 Á kinagi na, "Ammò ku, Ammò ku, sikaw ngámin yù makáwayyá. Illílì mà sù jígâ nga umay nikán. Ngam arám mu anugutan yù urè nu ari galâ yù urem," kun na kâ Namarò.

37 Á ta kabalin na nga nakimállâ, nattoli si Apu Kesu sù ira tallu nga kábulun na, á naratang na ira nga makkaturuk. Á kinagi na kâ Eduru, "Simon, makkaturuk ka? Ari ka panò makapatturâ ta mássiki lâ tangoras?

38 Matturá kayu nga makimállâ, tapè arán na kayu appútan na liwâ. Ta mássiki nu molang kayu malliwâ, ngam makapi yù baggi naw."

<sup>†</sup> 14:27 Daniel 7:13-14

<sup>39</sup> Kabalin na nga nilukák ira, nallillì si Apu Kesu má, á inuli na má yù ákkimállà na kâ Namarò.

<sup>40</sup> Á nanoli má nira, á naratang na ira má nga makkaturuk, ta arád da magimmúlák yù matá ra. Á arád da ammu nu anni yù itabbák da nakuan kuna.

<sup>41</sup> Á namillu nga nanoli si Apu Kesu nira, á iniyabbû na nira, "Makkaturuk kayu paga nga magibannák? Kustu ngin. Jimittál ngin yù oras nga kagápù ku, á iyawâ dangà sù ira minálliwâ, sikán nga Kaká na ngámin na tatolay.

<sup>42</sup> Gumikkáng kayu, ta et tamín. Innan nawè. Ajjanin yù mappagápù nikán."

*Gaputad da si Apu Kesu*

*Mattiu 26:47-56; Lukas 22:47-53; Kuan 18:3-12*

<sup>43</sup> Á sù arán na paga kabalin nga nagubobuk ni Apu Kesu nira, dagarágâ nga limibbè si Kudas, nga mebiláng sù ira mapulu duá nga tudduán na. Á nepulù kâ Kudas yù ira kitáru nga nagármas ta badáng ánná palù. Aggira ngámin yù jinok nayù ira kátannangán nga pári na Kudio ánná yù ira mesturu ta tunung ánná yù ira karakalán.

<sup>44</sup> Á pattatarátu ra gangù, kinagi ni Kudas nira yù panákkilalád da kâ Apu Kesu. "Yù tolay nga ummaták ku, aggina yù gaputan naw sangaw. Á ipáno naw, á taronán naw ta napiá."

<sup>45</sup> Á pakáddè da ta kamulán, dagarágâ nga jímikki si Kudas kâ Apu Kesu. Á kinagi na, "Apu," á inummatán na.

<sup>46</sup> Á ginápù da si Apu Kesu, á inigaggak da ta napiá.

<sup>47</sup> Ngam ajjan yù táddy ngä kabbulun na, á inilayâ na yù badáng na, á kittak na yù aripan nayù pári nga kátannangán, á nalasspán yù talingá na.

<sup>48</sup> Á kinagi ni Apu Kesu sù ira naggápù kuna, "Kagian naw panò ta tulisánà, ta umay kayu maggápù nikán nga nagármas ta badáng ánná palù?

<sup>49</sup> Á kággággaw, naggiánà nikayu nga mangituddu sù mangilin nga bale ni Namarò, á arán nawà ginápù. Ngam mesimmu yaw, tapè matuppál yù imipetúrâ ni Namarò sù dán nga neturatán."

<sup>50</sup> Á ngámin yù ira nga sinudduán ni Apu Kesu, nattálaw ira, á nánawád da.

<sup>51</sup> Á ajjan tán gapay yù bagitolay nga nagulolà. Á yù ira mangikeká, ginápù da.

<sup>52</sup> Ngam bittáng na nira lâ yù ulà na, á nagilongán nga nattálaw.

*Yù Pangiyabbû nayù ira Kudio kâ Apu Kesu*

*Mattiu 26:57-68; Lukas 22:54-55, 63-71; Kuan 18:13-14, 19-24*

<sup>53</sup> Á inituluk da laguk si Apu Kesu ta bale nayù kátannangán nga pári. Á ngámin ira nga káruán nga kátannangán nga pári ánná yù ira karakalán, á yù ira mesturu ta tunung, naggagammang ira tán.

<sup>54</sup> Á jimináddán si Eduru ta arayyu ta likuk da. Á labbè da ta bale nayù kátannangán nga pári, simillung si Eduru sù nálitukán nga námmuák, á minay nepagitubang nga nepaggirínu sù ira magguárdia.

<sup>55</sup> Á yù ira kátannangán nga pári ánná ngámin ira nga mammaguray, alerad da yù ipangiéká ra kâ Apu Kesu, tapè ajjan yù awayyá ra nga mamapátatay kuna, ngam awán ta nálek da.

<sup>56</sup> Ta aru yù ira nga nassirisiri nga nangiéká kuna, ngam ari naggiggítta yù kinagi ra.

<sup>57</sup> Á manganánnuán, ajjan yù ira káruán nga minay nga mangikeká kuna, á nassirisiri ira gapay, á kinagi ra,

<sup>58</sup> "Naginná mi yù kinagi na. Kinagi na ta iwarâ na yù mangilin nga bale ni Namarò nga pidde na tolay, á nu mapasá tallu nga ággaw, patáddagan na yù tanakuán nga arán na pidde na tolay."

<sup>59</sup> Á mássiki nu kunnian yù pangikeká ra, ari negittá yù kinagi ra.

<sup>60</sup> Á limíkkâ yù kátannangán nga pári ta tangngá ra, á iniyabbû na kâ Apu Kesu, "Awán panò ta itabbák mu sù ira mamaliwâ nikaw?"

<sup>61</sup> Ngam ari bulubugá nakkituk si Apu Kesu. Awán bulubugá ta itabbák na nira. Á iniyabbután na má nayù kátannangán nga pári, "Sikaw panò yù MakKiristu, nga Anâ ni Namarò?"

<sup>62</sup> Á kinagi ni Apu Kesu,

"Wan, sikán. Á masingan nawà nga Kaká na ngámin na tatolay, nga magitubang sù ággitubangán nayù maráyaw,

ta jiwanán ni Namarò nga Makáwayyá ta ngámin.

Á masingan nawà nga umay nga mepulù ta maddalingárang nga kunam ta lángì."‡

<sup>63</sup> Á pakaginná nayù kátannangán nga pári sù kinagi ni Apu Kesu, pinisil nayù pári yù bistí na nga apaddu, gapu ta napátu yù nonò na. Á kinagi na, “Awánin ta máwák tam nga magalek paga ta tolay nga makkagi ta liwâ na.

<sup>64</sup> Naginná naw yù kinagi na, nga aggina yù Anâ ni Namarò. Anni yù ure naw nga meyannung kuna?” kun nayù pári nira. Á aggira ngámin, kinagi ra ta ikáru na yù liwâ na ta pate na.

<sup>65</sup> Á pakaginná nayù ira káruán ta mapapátay si Apu Kesu, nilutábád da. Á kinallabád da yù mammang na, á sinultù da, ánná kinagi ra kuna, “Labbúnam mu yù manultù nikaw.” Á ed da laguk iná nayù ira magguárdiá, ánná lippilippák da.

*Ilímak ni Eduru yù Pakánnámu na kâ Apu Kesu*

*Mattiu 26:69-75; Lukas 22:56-62; Kuan 18:15-18, 25-27*

<sup>66</sup> Á paggián ni Eduru paga ta námmuák, minay yù babay nga aripan nayù kátannangán nga pári.

<sup>67</sup> Á pakasingan nayù babay kâ Eduru nga mepaggirínu, inimámmatán na, á kinagi na kuna, “Sikaw gapay yù kabbulun nayù tolay nga taga Nasaret.”

<sup>68</sup> Ngam inilímak ni Eduru, á kinagi na, “Arák ku ammu. Arák ku kánnámuán yù kagiam mu nikán.” Á nallillí si Eduru nga minay ta puertá nayù alitù. Á dagarágâ nagittarákkò yù manù.

<sup>69</sup> Á manganánnuán, nasingan na má nayù babay, á kinagi na sù ira tatolay nga nanáddak tán, “Aggina gemma yù kabbulud da.”

<sup>70</sup> Ngam inilímak na má ni Eduru. Á manganánnuán, á yù ira káruán nga aijjan tán, kinagi ra gapay kâ Eduru, “Sikaw yù kabbulun na, ta taga Galilia ka gemma gapay.”

<sup>71</sup> Ngam inigagek ni Eduru yù baggi na, á nappagássingán kâ Namarò ta kurugán yù kagian na. Á kinagi na nira, “Arák ku ammu yawe nga laláki nga kagian naw.”

<sup>72</sup> Á iníkáddagâ pidduá nayù manù nagittarákkò. Á dagarágâ, nanonò ni Eduru laguk yù kinagi ni Apu Kesu kuna, nga “Sangaw nu gabi, lage na mamiddúá magittarákkò yù manù, mamillu ka nga makkagi ta arám mà ammu.” Pakanonò ni Eduru karannian, inigabbiú na nga nakkulè.

## 15

*Pangikeká ra kâ Apu Kesu ta Arubáng ni Pilatto*

*Mattiu 27:1-2, 11-14; Lukas 23:1-5; Kuan 18:28-38*

<sup>1</sup> Á ta pannawák, naggagammung yù ira ngámin nga kátannangán nga pári, yù ira karakalán, yù ira mesturu ta tunung, ánná yù ira káruán nga makáwayyá. Á nakkaká-ubobuk ira ta meyannung sù akkuád da kâ Apu Kesu. Á bináluk da laguk, nga iniyángé ra kâ Gubinador Pilatto, ta ikeká ra kuna.

<sup>2</sup> Á iniyabbú ni Gubinador Pilatto kâ Apu Kesu, “Sikaw yù Patul nayù ira Kudio?” Á simibbák si Apu Kesu, á kinagi na, “Kurugán yù kinagim.”

<sup>3</sup> Á yù ira kátannangán nga pári, aru yù kinagi ra kâ Gubinador Pilatto nga ipamaliwâ da kâ Apu Kesu.

<sup>4</sup> Á pakaginná ni Gubinador Pilatto ta aru nga kinagi ra, iniyabbú na má kâ Apu Kesu, “Awán panò ta itabbák mu? Arám mu panò naginná yù aru nga ipamaliwâ da nikaw?”

<sup>5</sup> Ngam ari má simibbák si Apu Kesu, á napállâ si Pilatto ta pagimammà na.

*Pakkagi ra ta Magikáru si Apu Kesu*

*Mattiu 27:15-26; Lukas 23:13-25; Kuan 18:39-19:16*

<sup>6</sup> Á sù piestá nga panaddamád da ta pattalebák nayù daroban, aijjan yù kustombare ni Gubinador Pilatto nga palubbángan na yù tádday nga nebáluk nga pilian nayù ira tatolay.

<sup>7</sup> Á aijjan yù tolay nga nebáluk nga mangngágan ta Barabas, nga netádday ngaw sù ira nakikontará ta gubermente. Á aggina namapátya ta paggerrá ra, á yáyù nga inibáluk da.

<sup>8</sup> Á minay kâ Gubinador Pilatto yù magaru nga tatolay, nga makkiddaw ta akkuán na yù kustombare na nira.

<sup>9</sup> Á iniyabbú ni Pilatto nira, “Ikáyá naw nu palubbángak ku yù Patul na Kudio?”

<sup>10</sup> Yáyù iniyabbú ni Pilatto nira, ta ammu na ta inikeká nayù ira kátannangán nga pári gapu ta mapassil ira kuna.

<sup>11</sup> Ngam pinappatapátu nayù ira kátannangán nga pári yù ira magaru nga tatolay, ta kiddawad da galá ta si Barabas yù palubbángan na.

<sup>12</sup> Á iniyabbú na má ni Pilatto nira, “Anni akkuák ku laguk sù tolay nga abbúnan naw ta Patul na Kudio?”

<sup>13</sup> Á nagagga-aggay ira má nga mapporay, á kinagi ra, “Papatáyam mu! Itepátà mu ta kurù!” kud da ngámin.

<sup>14</sup> Á kinagi ni Pilatto nira, “Ngattá? Anni yù liwâ na?” Ngam nappanà ira nga nagagga-aggay, á kinagi ra, “Papatáyam mu! Itepátà mu ta kurù!”

<sup>15</sup> Á gapu ta ikáyâ ni Pilatto nga pakáppagan na yù ira tatolay, pinalubbáng na laguk si Barabas. Á kabalin na nangipaligâ kâ Apu Kesu, iniyawâ na sù ira suddálú, tapè ipátà da ta kurù.

*Yù Panguyoyung nayù ira Suddálú kâ Apu Kesu*

*Mattiu 27:27-31; Kuan 19:2-3*

<sup>16</sup> Á yù ira suddálú, iniyângé ra si Apu Kesu ta námmuák na palásiu nayù Gubinador. Á inagálád da yù ira káruán nga suddálú gapay, á naggagammung ira ngámin.

<sup>17</sup> Á appè ira naddáyaw kâ Apu Kesu. Á inibarawási ra kuna yù apaddu nga ujjojin, nga kun na barawási na patul. Á inipe ra sù ulu na yù kuroná nga sî nga nalubik.

<sup>18</sup> Á appè ira naddáyaw nga nagagga-aggay, á kinagi ra, “Káy! Ajjan yù Patul na Kudio!”

<sup>19</sup> Á pinalapalu ña yù ulu na, á nallulutábád da, á namalittúkak ira nga áppè maddáyaw ta arubáng na.

<sup>20</sup> Á kabalid da nga nanguyoyung, iniriád da kuna yù barawási nga ujjojin, á pine ra kuna yù barawási na lápay. Á iniyângé ra ta lawán, tapè papatáyad da ta kurù.

*Yù Kepátà ni Apu Kesu ta Kurù*

*Mattiu 27:32-44; Lukas 23:26-43; Kuan 19:17-27*

<sup>21</sup> Á pangiyângé nayù ira suddálú kâ Apu Kesu, nerapunád da ta dálan si Simon nga taga Sirine, nga yáma ri Alekanduru kâ Rupo, nga naggapu ta ákkomanán na. Á inipakáttu ra kuna yù kurù ni Apu Kesu.

<sup>22</sup> Á iniyângé ra ta gián nga mangngágán ta Golgota, á yù kebalinán na sù ággubobuk da yù gián na balakâbâ.

<sup>23</sup> Á iniyalawâ da kuna yù binaráyâng nga nakkiruk ta uru nga mirrá nga ámmatukkâ ta takì, ngam arán na inalawâ.

<sup>24</sup> Á inipátâ da sù kurù. Á nabbbúnù ira, tapè natunung yù ábballe ra ta gagámi na.\*

<sup>25</sup> Á yá pangipátâ da kuna yù pannarek na bilák ta ummá.

<sup>26</sup> Á netûrâ sù utun na kurù na yù ipangikekâ ra kuna nga kunniaw, “Yù Patul na Kudio.”

<sup>27</sup> Á nipátâ da gapay yù duá nga tulisán ta kurù da, nga nattangngád da si Apu Kesu, tádday sù jiwanán na, á tádday sù jímigi na.

<sup>28</sup> Yáyù nga napalurò yù dán nga netûrâ nga bilin ni Namarò: “Aggina inibiláng da sù ira minálliwâ.”†

<sup>29</sup> Á yù ira tatolay nga nattalebák sù kurù, inuyo ra nga binilibilawád da si Apu Kesu. Á kinagi ra kuna, “Asakay! Sikaw yù makkagi ta iwarawarâ mu nakuan yù batu nayù mangilin nga kapilliá, á paddayam mu má ta tallu nga ággaw!‡

<sup>30</sup> Iyígù mu laguk yù baggim! Ámmuluk ka laguk sù kurù,” kud da.

<sup>31</sup> Á yù ira káttannangán nga pári áonna yù ira mesturu ta tunung, inuyoyungád da si Apu Kesu, á makkaká-ubobuk ira, á kinagi ra, “Iniyígù na yù ira káruán nga tatolay, ngam arán na meyígù yù baggi na.

<sup>32</sup> Nu aggina yù Kiristu nga Piníli ni Namarò, nga Patul na Israel, ámmuluk laguk nakuan sù kurù, tapè masingat tam. Á nu masingat tam, manguruk ittam,” kud da. Á yù ira kábulun na nga nepátâ, aggira pay manguyaw kuna.

*Yù Pate ni Apu Kesu*

*Mattiu 27:45-56; Lukas 23:44-49; Kuan 19:28-30*

<sup>33</sup> Á ta tangngá na ággaw, nakkallà sù tangapáddabbunán ta tallu oras, áddè ta pannarek na bilák ta págák.

<sup>34</sup> Á ta alas tares ta págák, nakkatakatal si Apu Kesu, á kinagi na, “Eloy, Eloy, lama sabák tani?” Á yù kebalinán na, “Apu Namarò, Apu Namarò, anni má ta sinájjíám mà?”§ kun na.

<sup>35</sup> Á yù ira tatolay nga nanáddak tán, naginná ra. Á kinagi ra, “Ginnán nawè! Agálán na támma si Elias,” kud da, ta arád da ammu yù ággubobuk na.

<sup>36</sup> Á nakkarerá yù tádday nga en na inâ yù sine na áttabatabbürù nga nakatáng, á inipasassâ na yù nássam nga bínaráyâng. Sinubbâ na ta káyu, á iniyalawâ na kuna, tapè

\* 15:24 Isaya 53:12    † 15:28 Salmo 22:7    ‡ 15:29 Salmo 22:1    § 15:34 Salmo 22:1

sussutan na. Á kinagi na sù ira naggíraw tán, “Iddagát tam lábbi, tapè masingat tam nu umay si Elias nga mangiyuluk kuna.”

<sup>37</sup> Á nakkalli si Apu Kesu ta masikan, á dagarágâ nagattâ yù inángà na.

<sup>38</sup> Á napisil yù nakannak nga kortíná nga nelippak sù lágum nga kangilinán, sù mangilin nga kapilliá ta ili na Jerusalem. Namegapu nga naggadduá yù kortíná ta utun na áddè ta gukák na. Á negiddán sù pate ni Apu Kesu yù paggadduá na.

<sup>39</sup> Á ajjan yù kapitán na suddálú nga mepagarubáng kâ Apu Kesu. Á pakasingan na ta kagattâ nayù inángà na, kinagi na, “Aggina yù kukurugán nga Anâ ni Namarò!”

<sup>40</sup> Á ajjan gapay tán yù ira bábbay nga mangiripâ kâ Apu Kesu. Á nepulù nira di Maria nga taga Maddala, kári Saloma, kâ Maria nga yená nayù ira duá nga lálláki, di Kusè kâ Ime ngáurián na.

<sup>41</sup> Danniaw ira yù siminuttul kâ Apu Kesu nga nangabbák kuna sù keggá na ta Galilia. Á ajjan tán gapay aru ira paga nga nepulù kuna sù ángé na ta Jerusalem.

#### *Yù Ketanam ni Apu Kesu*

*Mattiu 27:57-61; Lukas 23:50-56; Kuan 19:38-42*

<sup>42</sup> Á Biernes yù pappárán nayù ira Kudio ta ággibannák da nga Sabadu.

<sup>43</sup> Á ta pajjibbâ, limibbè ta Jerusalem si Kusè nga taga Arimatia. Aggina yù tádday nga mammaguray nga ipakimore ra. Á iniddagán na gapay yù dattál nayù pammagure ni Namarò ta dabbuno. Á pinataggâ ni Kusè yù nonò na, á en na kiniddaw kâ Pilatto yù baggi ni Apu Kesu.

<sup>44</sup> Á napállâ si Pilatto ta pakarámak na ta natayin. Á gapu ta nabbábáng, inipágál na yù kapitán, ta iyabbû na nu natayin.

<sup>45</sup> Á pakaginná na sù kagian nayù kapitán ta kurugán nga natayin, inipálâ na kâ Kusè yù baggi ni Apu Kesu.

<sup>46</sup> Á giminátang si Kusè ta puraw nga gámì. Á iniyutták na yù baggi ni Apu Kesu, á binungun na sù gámì nga kapágatáng na. Á pinneddá na ta abbû, sù batu nga nakokkobán, á kinarebu na yù dakal nga batu sù tanam.

<sup>47</sup> Á di Maria nga taga Maddala kâ Maria nga yená ri Kusè, nasingad da yù nangitanamán na kuna.

## 16

#### *Maginnanolay si Apu Kesu*

*Mattiu 28:1-8; Lukas 24:1-12; Kuan 20:1-10*

<sup>1</sup> Á ta pappásá na Sabadu nga ággibannák da, minay di Maria nga taga Maddala, kári Saloma, kâ Maria nga yená ri Ime, á giminátang ira ta bábbanguk nga nakakerumá, tapè ed da denuán yù baggi ni Apu Kesu.

<sup>2</sup> Á alippánnawák na Liggú, ta apállassáng na bilák, minay ira sù tanam.

<sup>3</sup> Pakalakalakák da paga sù dálan, nakkaká-abbû ira nga kud da, “Asinni yù mangikarebu ta batu nga ajjan ta abbû na tanam?” Ta mallakay yù batu.

<sup>4</sup> Á pakeripâ da sù tanam, nasingad da ta nakarebu ngin yù batu, á aringin naserrán yù tanam.

<sup>5</sup> Á pakáddè da ta tanam, simillung ira, á nasingad da ta jiwanán na lágum na tanam yù bagitolay nga magitubang, nga nabbarawási ta gámì nga puraw nga apaddu. Á pakasingad da kuna, nakaráríng ira.

<sup>6</sup> Á kinagi na nira, “Ari kayu maganássing. Ammù ta aleran naw si Apu Kesu nga taga Nasaret, nga nepátâ ta kuru. Ngam awánin saw, ta naginnanolayin. Innan nawé yù nameddád da kuna.

<sup>7</sup> Á lubbè kayu laguk, ta en naw bì kagian kári Eduru ánná yù ira káruán nga tudduán na ta mapolu si Apu Kesu ánné nira nga umay túrin ta purubinsia na Galilia. Yáyù pakasinganád da kuna, nga kunnay sù kinagi na ngaw nira,” kun nayù bagitolay sù ira bábbay.

<sup>8</sup> Á nánaw ira ta tanam, á nattálaw ira, ta ikáddagâ lâ yù pamippippik da ánná nerallà yù kapállâ da. Á awán bulubugá ta kinagi ra sù ira nerapunád da gapu ta ikássing da.

#### *Mappasingan si Apu Kesu kâ Maria nga taga Maddala*

*Mattiu 28:9-10; Kuan 20:11-18*

<sup>9</sup> Á ta pannawák na Liggú, nga mapolu nga ággaw ta tangaligguán, kabalin ni Apu Kesu naginnanolay, nappasingan ta olu kâ Maria nga taga Maddala. Si Maria yù babay nga namalawanán na ta pitu nga anitu.

<sup>10</sup> Á minay si Maria ta gián nayù ira kábulun ni Apu Kesu. Á gikulukuletán ira ta daddam da. Á kinagi na nira ta nasingan na si Apu.

<sup>11</sup> Ngam pakaginná ra ta matolay má ngin si Apu Kesu, áんな nasingan ni Maria, arád da kinuruk.

*Mappasingan si Apu Kesu sù ira Duá nga Sinudduán na  
Lukas 24:13-35*

<sup>12</sup> Á manganánnuán, nappasingan si Apu Kesu sù duá nga sinudduán na ta pallakák da ta dálan nga umay ta agayyuán, ngam dumá yù paninganád da kuna.

<sup>13</sup> Á nanoli yù ira duá ta Jerusalem, ta ed da kagian sù ira kábulud da yù ngámin nga nesimmu. Ngam arád da ira gapay kinuruk.

*Mappasingan si Apu Kesu sù ira Mapulu Tádday  
Mattiū 28:16-20; Lukas 24:36-49; Kuan 20:19-23; Kingnguá 1:6-8*

<sup>14</sup> Á kabalin na yaw, limittuák si Apu Kesu nga mappasingan sù ira mapulu tádday nga sinudduán na ta pallalálláng da. Á gimmá na ira gapu ta pabbábáng da áんな kataggâ nayù nonò da, ta arád da garé kinuruk yù kinagi nayù ira nakasingan kuna ta kabalin na naginnanolay.

<sup>15</sup> Á kinagi na laguk ni Apu Kesu nira, “E kayu mangilayalayâ sù napiá nga dámak sù ira ngámin nga tatolay ta ngámin nga lugár.

<sup>16</sup> Á meyígù yù ira nga manguruk áんな mariġù megapu sù ángnguruk da nikán, á mepattolay ira kâ Namarò ta áddè ta áddè. Ngam yù ira nga ari manguruk, mekanakanâ ira sù pamagikáru ni Namarò.

<sup>17</sup> “Á yù ira manguruk nikán, meyawâ nira yù pakáwayyá ra nga mamagaddátu ta makapállâ. Á mamalawán ira ta anitu megapu sù pakapangnguá nayù ngágak ku. Á magubobuk ira ta tanakuán nga ággubobuk nga arád da ammu.

<sup>18</sup> Á nu mesimmuád da yù iráw nga marítá onu aijan yù akáppatay sù inumad da, ari ira manganni. Á nu támmitad da yù ira máttaki, mammapiá ira.”

*Yù Kálâ ni Apu Kesu ta Lángì  
Lukas 24:50-53; Kingnguá 1:9-11*

<sup>19</sup> Á kabalin ni Apu Kesu nakiubobuk nira, nálâ ni Namarò ta lángi, á nagitubang ta jiwanán ni Namarò, nga ággitubangán nayù maráyaw.

<sup>20</sup> Á nánaw laguk yù ira sinudduán ni Apu Kesu, á minay ira nga mangilayalayâ sù napiá nga dámak ta ngámin nga lugár. Á nangabbák si Apu Namarò nira, ta iniyawâ na nira yù pakáwayyá ra nga mamagaddátu ta makapállâ, tapè mepakánnámmu sù ira tatolay ta kurugán yù bilid da.

## Yù Napiá nga Dámak nga Initúrâ ni Lukas

### Yù Meyannung sawe Napiá nga Dámak

Yù ngaw doktor nga mangngágán ta Lukas yù nattúrâ sawe libru. Á yawe yù olu nga libru nga initúrâ na, nga napiá nga dámak nga meyannung kâ Apu Kesu Kiristu nga Mangiyígù, nga netapil megapu nittam ngámin nga tatolay. Istoríá na ta napiá ni Lukas yù keyanâ ni Apu Kesu, á ilistá na yù ngágán nayù ira naggaká kâ Apu Kesu, nga namegapu kâ Maria nga yená na ta áddè ngaw kâ Kákay Adan, nga olu nga toláy nga pinarò ni Apu Namarò.

Aru yù istoríá ni Lukas nga awán sù libru nga initúrâ ni Mattiu, onu libru ni Markus, onu libru ni Kuan. Kagian ni Lukas yù pakimállà ni Apu Kesu lage na pinalurò yù ngámin nga inipakuá na kuna ni Namarò nga Yáma na. Á ipakánnámmu na yù panángngák ni Apu Kesu sù ira pobare, áんな yù pangikállà na nira. Á ta maporián, kagian na yù ipakuá ni Apu Kesu nittam.

### Yù Mayán nayù Libru

Yù Gapu na nga Initúrâ ni Lukas kâ Don Topilu (1:1-4)

Yù Pakkagi nayù Daroban ni Namarò sù Keyanâ ni Kuan (1:5-25)

Pakkagi nayù Daroban ni Namarò sù Keyanâ ni Apu Kesu (1:26-45)

Yù Paddáyaw ni Maria kâ Apu Namarò (1:46-56)

Yù Keyanâ ni Kuan nga Minánnigù (1:57-66)

Yù Nipalappâ ni Namarò kâ Sakariâ nga Duttál Noka (1:67-80)

Yù Keyanâ ni Apu Kesu (2:1-52)

Yù Pangilayalayâ ni Kuan nga Minánnigù (3:1-20)

Yù Karigù ni Apu Kesu áんな Pamarubá ni Satanas kuna (3:21-4:13)

Yù Pangilayalayâ ni Apu Kesu ta Galilia (4:14-9:50)

Yù Ánge ni Apu Kesu ta Jerusalem (9:51-19:27)

Yù Pamaddulò da kâ Apu Kesu ta Jerusalem (19:28-44)

Yù Pangituddu ni Apu Kesu ta Jerusalem (19:45-21:38)

Yù Naporián nga Pakkákad di Apu Kesu áんな yù ira Sinudduán na (22:1-38)

Yù Paggápù da kâ Apu Kesu (22:39-23:25)

Yù Pangipátà da kâ Apu Kesu ta Kurù (23:26-56)

Yù Paginnanole ni Apu Kesu (24:1-53)

### Yù Gapu na nga Initúrâ ni Lukas kâ Don Topilu

<sup>1</sup> Mattúrákà nikaw nga kopuk ku, Don Topilu. Á aru yù ira tatolay nga nattúrâ ta meyannung sù ngámin nga pinalurò ni Namarò sù giám mi.

<sup>2</sup> Á yù ira olu nga nakasingan sù nesímmu áddè ngaw pamegapu na, aggira yù mangipakánnámmu sù nasingad da, á mangilayalayâ ira sù bilin ni Namarò.

<sup>3</sup> Á yáyù nga ginigiámmu ta napiá yù meyannung ta ngámin nga nesímmu, ta napiá ta urè nu itúrâ ku gapay nikaw, Don Topilu. Á pattutuppangak ku ta napiá yù ngámin nga itúrâ ku,

<sup>4</sup> tapè kánnámmuám mu nu kukurugán yù neparámak nikaw.

### Yù Pakkagi nayù Daroban ni Namarò sù Keyanâ ni Kuan

<sup>5</sup> Ta keggá na ngaw ni Patul Erodo nga mammaguray ta Judiya, ajjan yù pári nga Kudio nga mangngágán ta Sakariâ, nga nepulù sù ira kábulun na nga pári nga mangngágán ta Kábulun ri Abiya megapu sù ngaw Abiya. Á yù atáwa ni Sakariâ si Elisabet, nga ginaká nayù ngaw Aron, nga olu nga pári.

<sup>6</sup> Á napiá di Elisabet kâ Sakariâ ta ánnungan ni Namarò. Á matunung yù panuppál da sù ngámin nga taddán ni Namarò áんな yù tunung na, á awán ta kapaliwatád da.

<sup>7</sup> Ngam awán ira ta anâ, gapu ta nabbalá si Elisabet, á bakabákkâ áんな lakalákay iren.

<sup>8</sup> Á jmittál yù passerbi di Sakariâ áんな yù ira kábulun na nga pári ta arubáng ni Namarò sù mangilin nga kapilliá.

<sup>9</sup> Á nabbubúnù ira ta kun na kustombare ra, tapè ammu ra nu asinni yù manuggi ta bábbanguk. Á natullà si Sakariâ. Á simillung laguk sù mangilin nga kapilliá nga umay manuggi ta bábbanguk.

<sup>10</sup> Á keggá ni Sakariâ ta unak na kapilliá, naggián ta lawán yù ira magaru nga tatolay nga makimállà.

<sup>11</sup> Á panuggi ni Sakariâ ta bábbanguk sù mangilin nga kapilliá, nappasingan kuna yù daroban ni Namarò nga nanáddak sù jiwanán nayù ánnuggián.

<sup>12</sup> Pakasingan ni Sakariâ sù daroban, nakaráring. Á nerallà yù assing na.

<sup>13</sup> Á kinagi nayù daroban kuna:

“Sakariâ, ari ka maganássing, ta naginná ni Namarò yù ipakimállà mu. Á sangaw nu manganámuán, mangáguk yù atáwam, á maganâ ta laláki. Ingágam mu ta Kuan.

<sup>14</sup> Á ayatán ka sangaw sù anâ mu. Á aru yù ira tatolay nga mepagayáyâ sù keyanâ na.

<sup>15</sup> “Á makáwayyá yù anâ mu ta ánnigan ni Namarò. Ari bulubugá mamissán, á mássiki lage na meyanâ, mepaggián kuna yù Ikararuá ni Namarò.

<sup>16</sup> Á yáyù nga aru yù ira kábulun na nga ginaká ni Israel nga pabbabawian na ta liwâ da, megapu sù ángngituddu na, tapè manguruk ira kâ Namarò nga Yápu ra.

<sup>17</sup> Á aggina yù mapolu nga umay, tapè ipákánnámmu na sù ira tatolay yù labbè nayù Mangiyígú. Á makáwayyá nga kunnay kâ Elias nga yù ngaw ábbilinán ni Namarò nga mamagaddátu. Á megapu sù pangituddu ni Kuan, mammapiá yù ángngiddù nayù ira giriámán sù ira ánâ da. Á yù ira ari manguruk kâ Namarò, ipakánnámmu na nira yù napiá, tapè manguruk ira gapay ánná mepaggítta yù nonò da ta nonò nayù ira manguruk. Yáyù akkuán na, tapè paránan na yù ira tatolay, tapè dán nga naparán ira sù labbè ni Apu.” Yáyù kinagi nayù daroban kâ Sakariâ.

<sup>18</sup> Á kinagi ni Sakariâ sù daroban, “Kunnasi laguk pakánnámmu nu kuruk nga mesimmu yù kagiam mu? Amnum ta lakalákayakin, ánná bakabákà gapay yù atáwà.”

<sup>19</sup> Á simibbák yù daroban, á kinagi na kuna, “Sikán si Gabriel nga daroban ni Namarò. Maggiánà ta arubáng ni Namarò. Á jinok nangà nga umay nikaw, tapè kagiak ku nikaw yawe napiá nga dámak.

<sup>20</sup> Á gapu ta ari ka manguruk sù kinagi nikaw, yáyù nga magumal ka laguk. Á ari ka makobobuk áddè ta kapalurò nayù initabbâ nikaw. Á kuruk nga mesimmu yù ngámin nga kinagi sangaw nu duttál yù ággo na,” kun nayù daroban.

<sup>21</sup> Á yù ira tatolay nga naggián sù lawán nayù mangilin nga kapilliá, nabayák ira nga magiddak sù pallawán ni Sakariâ. Á ninononò da nu anni yù inikabayák na.

<sup>22</sup> Á manganánuán, nallawán si Sakariâ sù kapilliá, á ari makobobuk. Á natákál yù ira tatolay ta ajjan yù nappasingan kuna ta keggá na sù unak nayù mangilin nga kapilliá. Á nassennias lâ níra, ánná nagumal lâ.

<sup>23</sup> Á ta pappásá nayù ira ággaw nga passerbi ni Sakariâ sù mangilin nga kapilliá, nánaw nga nanoli sù gián na.

<sup>24</sup> Á ari kuruk nga nabayák, á nangáguk si Elisabet nga atáwa na. Á yáyù nga naggián lâ ta bale ra ta límá nga bulán.

<sup>25</sup> Ta kinagi na, “Nepallà yù allà ni Apu nikán, ta inabbágán nangà, tapè aringà mapasirán sù ira kábuluk ku,”\* kun na.

#### *Pakkagi nayù Daroban ni Namarò sù Keyanâ ni Apu Kesus*

<sup>26</sup> Á sù mekánnam nga bulán nayù kabussi ni Elisabet, jinok ni Namarò si Gabriel nga daroban na ta umay ta ili na Nasaret sù purubinsia na Galilia.

<sup>27</sup> Ta inibilin ni Namarò kuna yù kagian na sù maingingáy nga naggián tán, nga mangngágan ta Maria. Nakitarátu si Maria sù laláki nga mangngágan ta Kusè. Á si Kusè yù ginaká nayù ngaw Patul Dabid.

<sup>28</sup> Á limibbè yù daroban sù gián ni Maria, á kinagi nayù daroban kuna, “Ye, Maria, nga meddù ni Apu! Mapagayáyâ ka, ta mepulù nikaw si Apu,” kun na.

<sup>29</sup> Á pakaginná ni Maria sù kinagi na, nerallà yù bagal na. Á ninononò na nu anni yù kebalinán na.

<sup>30</sup> Á kinagi nayù daroban kuna, “Ari ka maganássing, Maria, ta nepallà yù pangikállà ni Namarò nikaw.

<sup>31</sup> Á yáyù nga mangáguk ka sangaw, á maganâ ka ta laláki nga ingágam mu ta Kesu.

<sup>32</sup> Aggina yù Kotunán, á ingágad da ta Anâ ni Namarò. Á pabbalinan ni Apu Namarò ta patul, nga táli nayù ngaw Patul Dabid nga naggaká kuna.

<sup>33</sup> Á mammaguray ta áddè ta áddè sù ira ginaká ni Akup. Á awán ta áddè nayù pammagure na.” Yáyù kinagi nayù daroban kâ Maria.

\* <sup>1:25</sup> Yù ira ngaw Kudio, kagiad da nu ajjan yù babay nga nakiatáwa nga ari naganâ, á yáyù pamággáng ni Namarò kuna. Á iniluddè nayù ira kábulun na nga bábbay.

<sup>34</sup> Á kinagi ni Maria sù daroban, “Kunnasi yù kesimmu na yaw, ta awánà ta atáwa?”

<sup>35</sup> Á kinagi nayù daroban kuna, “Umay nikaw yù Mangilin nga Ikararuá, ánnna malirúmán naka nayù pakáwayyá ni Namarò nga mamagaddátu. Á yáyù nga mangilin yù assitay nga meyaná, á ingágad da ta Mangilin nga Aná ni Namarò.

<sup>36</sup> Á mabussi gapay si Elisabet nga kanakanáyum mu, mássiki nu bakabákakin, nga kagiad da ta mabbalá. Á annam nga bulánin yù bussi na. Á maganâ sangaw ta laláki.

<sup>37</sup> Ta awán ta arán na makuá ni Namarò,” kun nayù daroban.

<sup>38</sup> Á kinagi ni Maria, “Sikán yù masserbi kâ Apu. Parè bì ta mesimmu nikán ngámin danniaw nga kinagim,” kun na. Á nánaw yù daroban.

### *Yù Ánge ni Maria Pattúllun kâ Elisabet*

<sup>39</sup> Á ari nabayák, á naggagannuâ si Maria, á nánaw ta inapurán na nga umay ta ili sù puddul sù purubinsia na Judiya.

<sup>40</sup> Á minay sù bale ri Sakariâ. Á kinagi ni Maria kâ Elisabet, “Et taka tullúnán, Elisabet. Kunnasi ka?”

<sup>41</sup> Pakaginná ni Elisabet sù ubobuk ni Maria, inikáddagâ na lâ nagguyu ta nasikan yù assítay sù sán na. Á dagarágâ nga minay yù Ikararuá ni Namarò kâ Elisabet.

<sup>42</sup> Á yáyù nga iniyássikan ni Elisabet yù ngárál na, á kinagi na kâ Maria:

“Mapagayáyâ ka ánnè sù ira ngámin nga bábbay, gapu ta piníli naka ni Namarò. Á mapagayáyâ gapay yù abbing nga iyanâ mu sangaw!

<sup>43</sup> Á magayáykâ megapu sù ángngiparáyom nikán, ta em mà sinullúnán, sikaw nga yená nayù yápù!

<sup>44</sup> Á ta pakaginná sù ubobuk mu, matagenà ku yù pagayáyâ nayù anâ ku, ta nasikan yù pagguyu na sù sák ku.

<sup>45</sup> Á pagayáyatan na ka ni Namarò gapay, gapu ta panguruk mu ta palurotan ni Namarò yù ngámin nga kinagi na nikaw.” Yáyù kinagi ni Elisabet.

### *Yù Paddáyw ni Maria kâ Apu Namarò*

<sup>46</sup> Á kinagi ni Maria,

“Dayáwak ku si Apu Namarò,  
á nepallà yù paddáyò kuna.

<sup>47</sup> Á ayatánà kâ Namarò,  
ta aggina yù mangiyígù nikán.

<sup>48</sup> Á kemámmatán nangà,  
nga tumulù nga masserbi kuna.

Á ta áddè kunangan ta áddè noka,  
iparámak nayù ira ngámin nga tatolay  
ta sikán yù piníli ni Namarò nga pagayáyatan na.

<sup>49</sup> Si Namarò yù makáwayyá ta ngámin,  
á makapállâ yù kingnguá na megapu nikán.

Aggina yù kotunán nga mangilin.

<sup>50</sup> Á ikállà na yù ira ngámin nga tatolay nga makimoray kuna,  
yù ira ngaw olu nga tatolay ánnna yù ira ginaká ra ta áddè noka.

<sup>51</sup> Ipasingan ni Namarò yù pakáwayyá na nga mamagaddátu,  
á pawwarawaratan na yù ira tatolay nga mappeddaráyaw, nga notun yù nonò da.

<sup>52</sup> Irián na yù ira motun nga patul sù pammagure ra,  
á ipotun na yù ira kagukábán nga tumulù, tapé meparáyaw ira.

<sup>53</sup> Pakáppagan na ta magannagannuk nga napiá yù ira magáwák.  
Ngam yù ira maríku, papanáwan na ira nga awán bulubugá ta ipáno ra.

<sup>54</sup> Abbágán na yù ira masserbi kuna,  
nga ginaká nayù ngaw Kákay Israel,

ta arán na káttamáu yù initabbá na,  
nga allà na nittam nga tatole na ta áddè ta áddè.

<sup>55</sup> Tuppálan na yù initabbá na ngaw kâ Kákay Abrakam ánnna yù ira ngaw naggaká nittam,  
ta ikákkállà na ittam nga ginaká ni Kákay Abrakam ta áddè ta áddè.”

Yáyù kinagi ni Maria sù paddáyó na kâ Apu Namarò.

<sup>56</sup> Á naggián si Maria ta bale ni Elisabet ta tallu bulán. Á pappasá na tallu bulán, nánaw nga nanolí ta gián na.

### *Yù Keyanâ ni Kuan nga Minánnigù*

57 Á jmittál yù paganâ ni Elisabet. Á laláki yù iyanâ na.

58 Á pakaginná nayù ira karúbá ra áonna kanakanáyud da ta meyannung sù makapállâ nga pinalurò ni Apu Namarò megapu kâ Elisabet, mepagayáyâ ira gapay nira.

59 Á sùmekawalu nga ággaw nayù abbing, naggagammung yù ira kábultur da ta bale ra, ta tuppálad da yù kustombare ra nga mangugì sù abbing. Á ingágad da nakuan ta Sakariâ, nga ngágán nayù yáma na.

60 Ngam kinagi nayù yená na, "Ari! Ari mangngágán ta Sakariâ, ngam si Kuan yù ngágán na."

61 Á kinagi ra kuna, "Ngattá, ta awán gemma ta kanakanáyun naw nga mangngágán ta Kuan!" kud da.

62 Á sinenniasád da laguk yù yáma nayù abbing, ta iyabbû da nu anni yù ikáyâ na nga ingágán sù abbing.

63 Á kiniddo ni Sakariâ yù pattúratán na, á initúrâ na, "Kuan yù ngágán na." Á napállâ ira ngámín.

64 Á kabalín ni Sakariâ nangitúrâ, dagarágâ nakobobuk, á naddáyaw kâ Namarò.

65 Á yù ira ngámín nga karúbá ra, maganássing ira áonna nepallà yù kapállâ da. Á pinassamâ da yù dámak ta ngámín nga ili ta puddul na Judiya.

66 Á yù ira ngámín nga nakarámak, inipatattam da lâ ta nonò da yù narámak da ta meyannung sù abbing. Á kinagi ra, "Anni panò laguk yù pabbalinán nayù abbing?" kud da. Ta natákál da ta nepalù kuna yù pakáwayyá ni Namarò.

#### *Yù Nipalappâ ni Namarò kâ Sakariâ nga Duttál Noka*

67 Á minay laguk yù Ikararuá ni Namarò kâ Sakariâ, nga yáma nayù abbing. Á nagubobuk si Sakariâ sù ipakagi nayù Mangilin nga Ikararuá kuna, á kinagi na:

68 "Dayáwat tam si Apu Namarò nga pakimorayát tam,

sittam nga ginaká nayù ngaw Kákay Israel,

ta en na ittam sinullúnán ni Namarò,

ta palubbángan na ittam tapé arán na ittam pagikaruan.

69 Á sinullâ ni Namarò yù makáwayyá nga umay nittam mangiyígù.

Aggina yù ginaká nayù ngaw Pátul Dabid nga aripán ni Namarò.

70 Yáyù inipakánnámmu ni Namarò gári,

megapu sù ubobuk na nga inipakagi na ngaw sù ira mangilin nga ábbilinán na.

71 Initabbá ni Namarò ta iyígù na ittam,

tapé arád da ittam aripanan nayù ira malussaw nittam.

72 Á palurotan ni Namarò yù initabbá na sù ira ngaw naggaká nittam.

Arán na káttamán yù mangilin nga tarátu na nira nga meyannung sù allà na nittam.

73 Initabbá ni Namarò kâ Kákay Abrakam, nga yù ngaw naggaká nittam,

74 ta iyígù na ittam, á ilillì na ittam sù panangngal nayù ira malussaw nittam,

tapé makapasserbi ittam kuna nga awán ta assing tam.

75 Á yawe yù ásserbi tam kâ Namarò,

nu napiá yù ángnguruk tam kuna,

áonna pareku nga matunung yù akkuát tam sù ira kábultur tam

ta kággágaw nga keggá tam ta utun na dabbuno."

76 Á kinagi na laguk ni Sakariâ sù anâ na,

"Á sikaw, anâ ku, sangaw nu dumakal ka,

sikaw yù ábbilinán ni Namarò, si Namarò nga Kotunán.

Á mapulu ka nga umay, ta em mu iparámak yù ánge ni Apu,

tapé dán nga naparán yù ira tatolay sù labbè na.

77 Ipakánnámmum sù ira tatolay ta meyígù ira,

megapu sù pamakomá ni Namarò ta liwâ da, tapé mesipà ira kuna.

78 Á nepallà nga allà ni Namarò nittam.

Á doban na yù mangiyígù nga umay nittam nga naggapu ta lángì,

nga mamannawák ta nonò na tolay nga kunnay ta lassáng na bilák,

79 tapé pannawagan na ittam ngámín nga kunnay nga naggián sù kallà,

nga ikássing tam yù pate tam.

Á ituddu na nittam yù napiá nga tuttulat tam,

tapé mepagimammâ ittam kâ Namarò."

Yáyù áddè nayù kinagi ni Sakariâ, nga inipakagi nayù Mangilin nga Ikararuá kuna.

80 Á similluâ si Kuan nga anâ ni Sakariâ, á napasigaggâ yù ángnguruk na kâ Namarò. Á naggián ta kalállammatán ta áddè ta pappasingan na nga mangilayalayâ sù ira ginaká ni Israel.

## 2

*Yù Keyanâ ni Apu Kesu*

*Mattiu 1:18-25*

1 Á ta kássite ni Kuan, si Sisar Agusto yù kotunán nga mammaguray ta Roma. Á inibilin na sù ira ngámín nga tatolay ta ngámín nga lugár ta umay ira mappalistá ta ngágad da sù ili nayù ngaw ira naggaká nira.

2 Yaw yù olu nga pappalistá nayù ira tatolay, ta keggá ni Kirinu nga gubinador ta Siria.

3 Á minay laguk nappalistá yù ira ngámín nga tatolay sù ili nayù ngaw ira naggaká nira.

4 A nánaw laguk di Kusè sù paggianád da ta Nasaret sù purubinsia na Galilia, á minay ira ta Betlekem sù purubinsia na Judiya, nga nakeyanatán na ngaw ni Patul Dabid, gapu ta di Kusè yù ginaká ni Patul Dabid.

5 Á minay ira nappalistá ta ngágad da tán, ta nepulù kâ Kusè si Maria nga nakitarátu kuna. Á nabussì si Maria.

6 Á keggá ra ta Betlekem, jimittál yù paganâ ni Maria.

7 Á gapu ta awán ta paggianád da sù áddagatán na álliuk megapu sù káru na tatolay, minay ira sù ággianán na ayám, á naganâ si Maria sù kaká nga anâ na nga laláki. Á inappitán na, á pineddá na ta lutung, nga ángngipayyâd da ta ipamakád da ta ayám.

*Yù ira Daroban nga Mappasingan sù ira Minánnaron ta Karneru*

8 Á tán nga gabi ajjan yù ira mináppárák nga naggián ta kakáddapán nga aranni sù ili na Betlekem, nga matturá nga manaron sù ira karneru ra.

9 Á inikáddagâ na lâ nappasingan nira yù daroban ni Namarò. Á nanawagán ira sù dalingárang ni Namarò. Á nerallà yù assing da.

10 Á kinagi nayù daroban sù ira mináppárák, "Ari kayu maganássing, ta minayà tapè ipakánnámmù nikayu yù napiá nga dámak. Á magayáyâ ngámín yù ira tatolay megapu kuna.

11 Ta ajjan tán nga ilí nayù ngaw Patul Dabid yù assitay nga kapángngiyanaâ na kunangane, nga umay mangiyígù nikayu. Aggina yù sinullà ni Apu Namarò nga mammaguray. Aggina si Apu Kíristu nga Yápu tam!

12 Á yawe yù ánnákkilálán naw kuna. Masingan naw sangaw yù assítay nga náppítán nga nopeddá sù lutung," kun nayù daroban.

13 Á kabalin na nakkagi nayù daroban karanniawe, dagarágâ nappasingan yù ira kábulun na nga naggapu ta lángi. Aru ira, á nakkansion ira nga naddáyaw kâ Apu Namarò. Á kinagi ra,

14 "Meparáyaw si Apu Namarò ta lángi.

Á yù ira tatolay ta dabbuno nga mamagayáyâ kuna, á mapagimammâ ira, tapè napiá yù ággigiád da!"

15 Á páno nayù ira daroban nga nanoli ta lángi, nakkaká-ubobuk yù ira mináppárák, á kinagi ra, "Et tamín tuke ta Betlekem, ta et tam innan yù assítay nga inípákánnámmu ni Apu Namarò nittam," kud da.

16 Á inapurád da laguk nga nánaw, ta ed da aleran yù abbing. Á naratang da di Maria kâ Kusè, á nasingad da yù assítay nga nagiddá sù lutung.

17 Á pakasingan nayù ira mináppárák sù assítay, inistoriá ra sù ira darakal na yù kinagi nayù daroban ni Namarò nira nga meyannung sù abbing.

18 Á napállâ yù ira ngámín nga nakaginná sù kinagi nayù ira mináppárák.

19 Á si Maria, pinatattam na ta nonò na yù ngámín nga naginná na, á yáyù ninononò na.

20 Á nánaw yù ira mináppárák, á nanoli ira sù gián nayù ira ayám da, nga maddáyaw kâ Namarò megapu sù ngámín nga nasingad da ánná naginná ra, ta napaluro yù ngámín nga kinagi nayù daroban nira.

21 Á sù mekawalu nga ággo nayù assítay, jimittál yù pangugì da kuna, á iningágad da ta Kesu, ta yáyù kinagi nayù daroban ni Namarò kâ Maria lage na kabussi na.

*Paddáyo ni Lákay Simion kâ Apu Namarò*

22 Á pappasa na appátpapulu nga ággaw áddè sù paganâ ni Maria, jimittál yù ággaw nga panuppál da sù tunung ni Moyses nga meyannung sù pamakarenu ta babay nga naganâ.

Á minay ira ta Jerusalem, ta umay ira sù mangilin nga kapilliá. Á iniyángé ra yù abbing, ta iyawâ da kâ Apu Namarò, tapè dumakal, ánnna masserbi kuna.

<sup>23</sup> Ta ajjan yù netúrâ nga tunung ni Namarò sù ira ginaká ni Israel, nga kun na, "Ngámin yù ira mapolu nga meyanâ nga lálláki, meyawâ ira kâ Apu, tapè mangilin ira nga masserbi kuna."

<sup>24</sup> Á ajjan gapay nga netúrâ sù tunung ta iyángé nayù ira darakal na abbing gapay yù ipeytátang da nga duá nga lummun onu duá nga ibbung na kalapáti. Á yáyù sinuppál di Maria kâ Kuse.

<sup>25</sup> Á ajjan yù lakalákay nga taga Jerusalem nga mangngágán ta Simion. Napiá nga tolay si Simion, nga matunung yù panguruk na kâ Namarò, á mepulupulu kuna yù Mangilin nga Ikararuá. Á ta nabayák nagiddi-iddak ta pamalurò ni Apu sù initabbá na ngaw sù ira ginaká ni Israel, nga pangiyígú na nira.

<sup>26</sup> Á inipakánnámmu nayù Mangilin nga Ikararuá kâ Simion ta ari matay ta áddè ta arán na pakasingan sù MakKirstu nga sinullà ni Apu Namarò ta mangiyígù nira.

<sup>27</sup> Á iniyángé nayù Mangilin nga Ikararuá si Simion sù mangilin nga kapilliá. Á yáyù nga ajjan tán si Simion sù paddulò di Maria nga pangiyángé ra sù abbing, tapè tuppálad da yù tunung ni Namarò nga meyannung kuna.

<sup>28</sup> Á pakasingan ni Simion sù abbing, sinubbâ na kâ Maria nga binállo na. Á jináyo na si Namarò, á kinagi na,

<sup>29</sup> "Apu Namarò, ikállà mà, nga aripam mu, á anugutam mu ta matayakin, ta nakáppagakin, gapu ta pinalurò mu ngin yù initabbám nikán.

<sup>30</sup> Ta nasingak ku ngin yù Mangiyígù nga naggapu nikaw,

<sup>31</sup> nga sinullà mu ngaw ta umay, á aggina yù mepakánnámmu sù ira ngámin makkakerumá nga tatolay.

<sup>32</sup> Á kunnay sù nawák, aggina yù mamannawák ta nonò nayù ira ari Kudio, ta ipakánnámmu na nira yù ángngiyígù ni Namarò.

Á yù ira tatolem nga ginaká ni Israel,  
meparáyaw ira megapu kuna."

Yáyù kinagi ni Simion, nga inipakánnámmu nayù Mangilin nga Ikararuá kuna.

<sup>33</sup> Á yù ira darakal nayù abbing, napállà ira sù kinagi ni Lákay Simion nga meyannung sù abbing.

<sup>34</sup> Á nakimállà si Lákay Simion ta iddukan na ira ni Namarò. Á kinagi na gapay kâ Maria, "Yawe anâ mu yù sinullà ni Namarò. Á aru yù ira ginaká ni Israel nga meyawáwán megapu kuna, á aru gapay yù ira meyígù megapu kuna. Ta aggina yù pangurugán, ngam aru yù ira mangipuerá kuna.

<sup>35</sup> Á yáyù nga mepalappâ yù nelímak nga nonò nayù ira tatolay. Á sikaw, mepallà yù daddam mu nga kunnay sù áddujuk na nataram nga píká sù baggim," kun ni Lákay Simion kâ Maria.

### *Paddáyo ni Bákò Ana kâ Apu Namarò*

<sup>36</sup> Á ajjan yù bakabákà, nga ábbilinán ni Namarò nga mangngágán ta Ana, nga anâ ni Panuel, á yù ngaw Lákay Aser yù naggaká kuna. Á áddè sù kamagingáne na, pitu ragun yù pattádde na sù atáwa na lage na nabálu.

<sup>37</sup> Á nabálu paga, nga walupulu ta appâ yù dagun na. Á ta kággággaw minay sù mangilin nga kapilliá, tapè makimoray kâ Namarò ánnna makimállà kuna ta ággaw ánnna gabi. Á nu káruán, linonán na yù pakkákán na.

<sup>38</sup> Á pakasingan ni Bákò Ana kári Maria, jimikkì nira. Á naddáyaw si Bákò Ana kâ Namarò, á kinagi na yù meyannung sù abbing, nga iddanamán nayù ira ngámin nga taga Jerusalem ta mamaalubbáng sù ira ngámin nga ginaká ni Israel.

### *Yù Panoli di Kusè ta Nasaret*

<sup>39</sup> Á kabaliid da nattuppál di Maria sù ngámin nga netúrâ nga tunung ni Namarò nga meyannung sù naganâ ánnna yù mapolu nga anâ na, á nanoli ira ta Nasaret, nga ili ra, sù purubinsia na Galilia.

<sup>40</sup> Á similluâ yù abbing, nga massikan ánnna malannapán yù ammu na, á iniddù ni Namarò.

### *Nabattáng si Apu Kesu sù Mangilin nga Kapilliá*

<sup>41</sup> Á ajjan yù kustombare nayù ira darakal ni Apu Kesu nga manoli ta Jerusalem kádaragun, tapè makipiestá ira sù panaddamán nayù ira ginaká ni Israel sù pattalebák nayù daroban ni Namarò sù ira naggaká nira ta pamapáte na sù ira Egipto.

42 Á sù mapulu duá nga dagun ni Apu Kesu, nepulù sù ira darakal na sù ánge ra ta piestá ta kun na kustumbaré ra.

43 Á ta kabalín na piestá, nánaw di Maria ta manoli ira ta giád da. Ngam nabattáng yù abbing ta Jerusalem, á arád da nánnámuán nayù ira darakal na.

44 Kagiad da ta aijan sù ira káruán nga nakipiestá nga mepattoli nira. Á nallakalakák ira ta tangatangágaw. Á sù pagammâ da, inala-alek da sù ira kanakanáyud da ánná kákkopud da nga nepulupulù nira.

45 Ngam arád da nálek.

Á sù tádday ággaw, nanoli yù ira darakal ni Apu Kesu ta Jerusalem, ta ed da aleran yù abbing tán.

46 Á sù mekatallu nga ággaw, naratang da sù mangilin nga kapilliá nga nepagitubang sù ira lállakalákay nga mamesturu, nga magginná sù kagiad da ánná magiyabbú nira.

47 Á yù ira ngámin nga nakaginná kuna, napállâ ira sù pakánnámu na ánná yù napiá nga ákkitabbák na sù ira mamesturu.

48 Á pakasingan nayù ira darakal na kuna nga mepagitubang sù ira mamesturu, napállâ ira gapay. Á kinagi ni innò na kuna, “Anâ ku! Ngattá ta kunniaw kingnguám? Nepallà yù burung mi kâ amám nga magala-alek nikaw!” kun na.

49 Á kinagi na níra, “Ngattá ta ala-aleran nawà? Arán naw panò ammu ta máwák nga maggiánà sawe bale ni Ammó ku?” kun na.

50 Ngam arád da nánnámuán yù kebalinán nayù kinagi na.

51 Á nepanoli si Apu Kesu sù ira darakal na sù giád da ta Nasaret, á napiá yù ángnguruk na níra. Á si innò na, pinatattam na ta nonò na yù ngámin nga kingnguá ni Kesu, nga ninononò na.

52 Á jiminakal yù abbing ánná nassikan yù baggi na ánná nalannapán ta napiá yù ammu na. Á si Apu Namarò ánná yù ira ngámin nga tatolay, ayatán ira kuna.

### 3

*Yù Pangilayalayá ni Kuan nga Minánnigù  
Mattiu 3:1-12; Markus 1:1-8; Kuan 1:19-28*

1 Á sù mekamapulu límá nga dagun nayù pammagure ni Sisar\* Tiberio ta Roma ánná ngámin nga dabbun, aijan si Pontius Pilatto nga gubinador ta Judiya. Á si Erodo yù mammaguray sù purubinsia na Galilia. Á si Pilippi nga wagi ni Erodo yù mammaguray sù ira lugár na Ituria ánná Tarakonita. Á si Lisanio yù mammaguray ta Abilena.

2 Á di Annas kâ Kayapas yù ira kátannangán na pári. Á páppári ra, binilin ni Namarò si Kuan nga anâ ni Sakariá ta paggián na ta kalállammatán.

3 Á pakálá ni Kuan sù bilin ni Namarò, minay laguk ta ngámin nga lugár nga aranni sù danum na Jordan, nga mangilayalayá sù ira ngámin nga tatolay ta mabbabáwi ira ánná likuránád da yù narákè nga akka-akkuád da, ánná makirigù ira laguk tapè mepasingan ta pakomán ni Namarò ira sù liwâ da.

4 Ta pinalurò ni Kuan yù inipetúrâ ni Namarò ngaw kâ Isaya, nga kinagi na,  
“Aijan yù makkatakatal ta kalállammatán.

Yaw ikatakátol na: ‘Umayin si Apu! Paránan naw yù dálan na.

Tunungan naw yù pallakárán na.

5 Á munitán naw yù ngámin nga likkong.

Limpíán naw yù ngámin nga puddul, tapè pareku yù pallakárán na.

Tunungan naw yù dálan nga nakkilikillu,

Á linísan naw yù ari nalnís,

6 tapè ngámin nga tatolay ta dabbuno,

masingad da laguk yù doban ni Namarò ta mangiyígù nira.’ ”

Yáyù initúrá ni Isaya ngaw.

7 Á pangilayalayá ni Kuan, kitáru yù ira tatolay nga minay makirigù kuna, mássiki arád da inibabáwi yù liwâ da. Á yáyù nga kinagi ni Kuan níra, “Kunnay kayu ta ánná na iráw! Asinni panò nakkagi nikayu ta marigù kayu, tapè ari kayu nakuanmekanakaná sù pangukum ni Namarò?

8 Nu kuruk nga nabbabáwi kayu, likuránán naw laguk yù narákè nga ággangnguá naw. Á arán naw kaqian ta ari kayu mekanâ sù pamagikáru ni Namarò gapu ta si Lákay Abrakam yù naggaká nikayu. Ari yù kesipà naw sù ginaká ni Abrakam yù gapu na nga mesipà kayu

\* 3:1 Yù kebalinán na “Sisar” yù kátannangán nga mammaguray.

nakuan kâ Namarò. Ta nu ikáyâ ni Namarò, ajjan yù awayyá na nga pabbalinan yawe ira batu ta ginakâ ni Abrakam, nu makúráng ira nakuan.

<sup>9</sup> Á naparánin yù ángngukum ni Namarò, nga kunnay ta wátay nga ipattukák ta káyu. Á ngámín nga káyu nga jíkkù yù bungá ra, tukáran na ira ánná tuggian na ira,” kun ni Kuan.

<sup>10</sup> Á pakaginná nayù ira tatolay ta meyannung sù pangukum ni Namarò, iniyabbû da kâ Kuan, “Anni laguk akkuám mi?”

<sup>11</sup> Á kinagi na nira, “Yù tolay nga ajjan yù duá nga barawási na, iyawâ na laguk yù tádday sù awán ta barawási na. Á yù tolay nga egga kanan na, isipà na gapay yù awán ta kanan na,” kun na.

<sup>12</sup> Á ajjan yù ira mináttuki ta buwì, nga minay gapay tapè makirigù ira kâ Kuan. Á iniyabbû da kuna, “Mesturu, anni laguk yù akkuám mi?” kud da.

<sup>13</sup> “Nu alawatan naw yù buwì, arán naw passobarán yù apan naw ánné sù mepángngà,” kun na nira.

<sup>14</sup> Á ajjan gapay tán yù ira suddálu. Á iniyabbû da kâ Kuan, “Á sikami nga suddálu, anni akkuám mi laguk?” kud da gapay. Á kinagi na nira, “Arán naw akkuán yù ira tatolay ánná arán naw ira iddâ nga ikeká tapè apan naw yù kuártu ra. Á magayáyâ kayu lâ sù sueldu naw,” kun na.

<sup>15</sup> Á pakaginná nayù ira tatolay sù kinagi ni Kuan, ninononò da yù initabbá ni Namarò nga meyannung sù MakKiristu nga umay mammaguray. Á nakkaká-abbû ira, á kinagi ra, “Ari panò yawe tolay yù MakKiristu nga iddagát tam?” kud da.

<sup>16</sup> Á yáyù nga kinagi ni Kuan nira ngámín, “Á sikán, jígutat takayu lâ ta danum. Ngam ajjinan sangaw yù umay nga makáwayyá ánné nikán, á aringâ mepángngà nga mangubbák ta kaddang na sapátù na. Á dumá yù ájjigù na nikayu, ta iyawâ na nikayu yù Ikararuá ni Namarò, nga kunnay ta ipanigù na nikayu. Ngam sikayu nga tumuttul ta liwâ, kunnay ta api yù ipanigù na nikayu, ta mekanakanâ kayu sù pangukum na.

<sup>17</sup> Á labbè na, kunnay sù tolay nga mangisâ ta aggì, tapè pakappián na yù aggì sù ággianán na. Á kunnian yù keyarigán nayù ira tatolay, ta passisinnán ni Apu yù ira manguruk ánná yù ira ari manguruk. Á yù ira manguruk, meyígù ira. Ngam yù ira ari manguruk, nga kunnay ta attá nga nesinná sù aggì, metabbâ ira sù api nga ari máddâ ta áddè ta áddè.”

<sup>18</sup> Á aru paga yù initabarang ni Kuan sù ira tatolay sù pangilayalayâ na sù napiá nga dámak. Á jinuduúk na ira ta pataliád da yù narákè nga ággangnguá ra.

<sup>19</sup> Á kinagi ni Kuan gapay kâ Gubinador Erodo ta aru yù liwâ na, nepatalugáring ta ginubâ na sù wagi na si Erodia, nga asípák na.

<sup>20</sup> Ngam nappanà nga nalliwâ si Erodo, ta linnapán na yù ngámín nga liwâ na, ta pinukù na si Kuan sù ábbalurán.

#### *Yù Pakirigù ni Apu Kesu kâ Kuan*

*Mattiū 3:13-17; Markus 1:9-11*

<sup>21</sup> Á ta panigù ni Kuan sù ira tatolay, lage na napukù sù ábbalurán, jinigù na gapay si Apu Kesu. Á pakimállâ ni Apu Kesu, nabrukâ yù lángi.

<sup>22</sup> Á minay kuna yù Ikararuá ni Namarò, nga kun na lummun yù baggi na. Á nappáginná yù ngárál ni Namarò, á kinagi na, “Sikaw yù Anâ ku nga iddukak ku, á ayatánâ nikaw,” kun na.

#### *Yù ira Nelistá nga Naggaká kâ Apu Kesu*

*Mattiū 1:17*

<sup>23</sup> Á sù pamegapu ni Apu Kesu sù pangituddu na, tallupulungin yù dagun na. Á yù ira tatolay, kagiad da ta anâ ni Kusè.

Á yù káke ni Apu Kesu si Keli.

<sup>24</sup> Á yù ammò ni Keli si Matat, yù káke ni Keli si Libi, yù káke na ta siku si Melki, yù káke na ta dulung si Jannay, á yù káke na ta tumang si Kusè.

<sup>25</sup> Á yù ammò ni Kusè si Matatias, yù káke ni Kusè si Amos, yù káke na ta siku si Nakum, yù káke na ta dulung si Esli, á yù káke na ta tumang si Naggay.

<sup>26</sup> Á yù ammò ni Naggay si Mat, yù káke ni Naggay si Matatias, yù káke na ta siku si Semi, yù káke na ta dulung si Josek, á yù káke na ta tumang si Joda.

<sup>27</sup> Á yù ammò ni Joda si Jowanan, yù káke ni Joda si Resa, yù káke na ta siku si Sirubbabel, yù káke na ta dulung si Salatiel, á yù káke na ta tumang si Neri.

<sup>28</sup> Á yù ammò ni Neri si Melki, yù káke ni Neri si Addi, yù káke na ta siku si Kosam, yù káke na ta dulung si Elmadam, á yù káke na ta tumang si Er.

- <sup>29</sup> Á yù ammò ni Er si Josiuwa, yù káke ni Er si Elieser, yù káke na ta siku si Jorim, yù káke na ta dulung si Matat, á yù káke na ta tumang si Libi.
- <sup>30</sup> Á yù ammò ni Libi si Simion, yù káke ni Libi si Juda, yù káke na ta siku si Kusè, yù káke na ta dulung si Jonam, á yù káke na ta tumang si Eliakim.
- <sup>31</sup> Á yù ammò ni Eliakim si Meleya, yù káke ni Eliakim si Minna, yù káke na ta siku si Mattata, yù káke na ta dulung si Natan, á yù káke na ta tumang si Patul Dabid.
- <sup>32</sup> Á si Patul Dabid, yù ammò na si Jesse, á yù káke ni Patul Dabid si Obed, yù káke na ta siku si Boas, yù káke na ta dulung si Salmon, á yù káke na ta tumang si Nassion.
- <sup>33</sup> Á yù ammò ni Nassion si Amminadab, yù káke ni Nassion si Admin, yù káke na ta siku si Arni, yù káke na ta dulung si Esron, á yù káke na ta tumang si Peres, nga anâ ni Juda.
- <sup>34</sup> Á yù ammò ni Juda si Akup, yù káke na si Isak, yù káke na ta siku si Abrakam, yù káke na ta dulung si Tera, á yù káke na ta tumang si Nakor.
- <sup>35</sup> Á yù ammò ni Nakor si Seruk, yù káke ni Nakor si Ragaw, yù káke na ta siku si Peleg, yù káke na ta dulung si Eber, á yù káke na ta tumang si Selak.
- <sup>36</sup> Á yù ammò ni Selak si Kaynan, yù káke ni Selak si Arpaksad, yù káke na ta siku si Sem, yù káke na ta dulung si Noe, á yù káke na ta tumang si Lamek.
- <sup>37</sup> Á yù ammò ni Lamek si Lákay Matusala, yù káke ni Lamek si Enok, yù káke na ta siku si Jared, yù káke na ta dulung si Makalael, á yù káke na ta tumang si Kenan.
- <sup>38</sup> Á yù ammò ni Kenan si Enos, yù káke ni Kenan si Set, yù káke na ta siku si Kákay Adan. Á si Kákay Adan yù anâ ni Apu Namarò.

## 4

*Yù Pamarubá ni Satanas kâ Apu Kesu*

*Mattiu 4:1-11; Markus 1:12-13*

<sup>1</sup> Á kabalin na nakirigù ni Apu Kesu kâ Kuan nga Minánnigù, nánaw sù danum na Jordan. Á nepulù kuna yù Ikararuá ni Namarò, á iniyángé na si Apu Kesu ta kalállamatán.

<sup>2</sup> Á paggián na ta kalállamatán ta appátapulu nga ággaw, pinarubán ni Satanas nga liwatan. Á ari bulubugá kiminán ta paggián na tán. Á kabalin nayù appátapulu nga ággaw, nepallà yù bisin na.

<sup>3</sup> Á kinagi ni Satanas kuna, “Nu kuruk nga anâ naka ni Namarò, pabbalinam mu yawe batu ta kanam.”

<sup>4</sup> Á simibbák si Apu Kesu, á kinagi na, “Ajjan yù inipetúrâ ni Namarò nga kinagi na, ‘Ari lâ yù kuan yù ipakkatole na tolay,’” kun na.

<sup>5</sup> Á iniyángé ni Satanas si Apu Kesu sù kátannangán nga puddul, á inipasingan na yù ira ngámin páppatulán ta dabbuno.

<sup>6</sup> Á kinagi ni Satanas kuna, “Masingam mu danniawe ngámin nga nakástá nga páppatulán ta dabbuno. Á iyawâ ku nikaw yù pakáwayyám sù ira ngámin nga masingam mu. Ta yáyù gemma ngín yù neyawâ nikán, á makáwayyágà nga mangiyawâ sù gustù nga pangiyawatán.

<sup>7</sup> Á sikaw laguk yù pangiyawaták ku nu mamalittúkak ka nga makimoray ta arubáng ku,” kun ni Satanas kâ Apu.

<sup>8</sup> Á simibbák si Apu Kesu, á kinagi na, “Ajjan yù inipetúrâ ni Namarò nga kun na, ‘Si Apu Namarò lâ yù pakimorayám mu, á aggina lâ yù pangurugám mu!’” kun na.

<sup>9</sup> Á iniyángé ni Satanas si Apu Kesu ta Jerusalem. Á initun na sù bubbungán nayù mangilin nga kapilliá. Á kinagi na kuna, “Nu kuruk nga anâ naka ni Namarò, makkassú ka laguk ta gowang.

<sup>10</sup> Ta ajjan yù inipetúrâ ni Namarò nga kun na, ‘Ipataron naka ni Namarò sù ira daroban nà.’

<sup>11</sup> Á ajjan gapay yù netúrâ nga kun na,

‘Tanggalád daka, tapè ari ka bulubugá manganni, á mássiki nu takkim, ari ira mabigarán.’

<sup>12</sup> Ngam simibbák si Apu Kesu, á kinagi na, “Wan á, ngam ajjan gapay yù netúrâ ta ‘Arám mu parubán si Apu nga Namarò nikaw,’” kun na.

<sup>13</sup> Á kabalin ni Satanas namarubá kâ Apu Kesu ta ngámin nga makkakerumá nga mamalliwâ, á nánawán na lábbì.

*Yù Pamegapu ni Apu Kesu nga Mangilayalayâ ta Galilia*

*Mattiu 4:12-17; Markus 1:14-15*

14 Á nanoli laguk si Apu Kesu ta Galilia. Á aijan kuna yù pakáwayyá nayù Mangilin nga Ikararuá ni Namarò. Á nassamâ yù dámak nga meyannung kuna sù ira ngámin nga páppatulán.

15 Á minay nangituddu sù ira kapilliá ra. Á ngámin ira nga tatolay, naddáyaw ira kuna.

*Yù Panaki nayù ira taga Nasaret kâ Apu Kesu  
Mattiui 13:53-58; Markus 6:1-6*

16 Á nakáddè si Apu Kesu ta Nasaret nga naddakalán na. Á ta Sabadu nga ággibannák nayù ira Israel, minay má sù kapilliá ra, ta yáyù kustombare na. Á minay nanáddak ta arubáng da, ta inikáyá da nga mabbibbik sù netúrâ nga ubobuk ni Namarò.

17 Á iniyawâ da kuna yù nalukù nga nangitúratán ni Isaya, nga yù ngaw ábbilinán ni Namarò. Á binullarán na, á nálek na yù gián nayù ikáyâ na bibriran nira. Á yawe yù binibbik na:

18 “Yù Ikararuá ni Apu Namarò yù kapulupulù ku.

Ta sinullà nangà ta ek ku ilayalayâ yù napiá nga dámak sù ira pobare.

Á jinok nangà ta ek ku ilayalayâ sù ira nabáluk yù pamalubbáng ni Namarò nira.

Á pagimmulagak ku yù ira buling ánná abbágák ku yù ira marigirigâ.

19 Á ek ku gapay ilayalayâ ta jmittálin yù pangikállà ni Apu sù ira tatolay.”

20 Á kabalín na nabbibbik ni Apu Kesu, nilukù na yù netúratán na bilin, á initoli na sù nangiyawâ kuna. Á nagitubang laguk, tapè ituddu na nira. Á yù ira ngámin nga tatolay tán, jinúlangád da.

21 Á kinagi na nira, “Ta pakaginná naw, napalurokin yù ubobuk ni Namarò nga binibbik ku.”

22 Á yù ira ngámin nga nakaginná, napállâ ira megapu sù napiá nga ubobuk na, á kinagi ra, “Kuruk nga napiá yù kagian na. Á ari panò aggina yù anâ ni Kusé?” kud da.

23 Á kinagi ni Apu Kesu nira, “Ikáyâ naw támma kagian nikán yù dán nga nakagi nayù ira lállakalákay, nga kun na, ‘Doktor, pammapiám mu yù baggim lápay’ Yáyù kagian naw, ta arán naw garè kurugan. Á ikáyâ naw nu akkuák ku sawe giát tam yù kunnay sù narámak naw naga kingngikingnguâ ta Kapernium.

24 Ngam yawe yù kagiax ku nikayu, ta awán bulubugá ta ábbilinán ni Namarò nga pakimorayád da sù gián nga naddakalán na.

25 Á ta ángngarigán á, ammu naw yù ngaw nesímmu sù keggá na ngaw ni Elias nu ari nagurán ta tallu ragun ta gadduá, á nassamâ yù bisin ta ngámin nga dabbun. Á kuruk ta aru yù ira bálu nga kelián na.

26 Ngam arán na jinok ni Namarò sù ira kagittá na nga naggián ta Israel, ta jinok na lâ ta en na abbágán yù tádday nga bálu nga ari Kudio, nga naggián sù ili na Serepta ta lugár na Sidon.

27 “Otturu, sù keggá na ngaw gapay ni Elisio nga ábbilinán ni Namarò, aru yù ira Kudio nga taga Israel naga naggoggong, á awán bulubugá ta pinammapiá ni Elisio nira, ngam si Naaman lâ naga taga Siria naga ari Kudio,” kun ni Apu Kesu.

28 Á yù ira ngámin nga tatolay sù kapilliá, pakaginná ra sù kinagi ni Apu Kesu, naporay ira kuna. Á nerallà yù pore ra.

29 Á ikáddagá da gimikkáng, á ginuggud da. Á pinalawád da ta ili, á iniyángé ra sù tappáng, tapè itabbâ da nakuán.

30 Ngam nattalebák sù tangngá nayù ira magaru nga tatolay, á nánawán na ira.

*Yù Pamammapiá ni Apu Kesu sù Nagunagán  
Markus 1:21-28*

31 Á nánaw laguk si Apu Kesu ta Nasaret, nga gimitták nga nanoli ta Kapernium sù purubinsia na Galilia gapay. Á ta Sabadu nga ággibannák da, minay sù kapilliá ra, tapè tudduán na ira.

32 Á napállâ ira ngámin sù ángngituddu na, á ta makáwayyá gemma yù ággubobuk na.

33 Á aijan sù kapilliá yù nagunagán na anitu, á nakkalli, á kinagi na kâ Apu Kesu,

34 “Ye! Kesu naga taga Nasaret, anni iniyángem saw? Arám mu kami akkuán! Ammu taka. Sikaw yù mangilin nga naggapu kâ Namarò!” kun nayù anitu.

35 Ngam gimmá ni Apu Kesu yù anitu, á kinagi ni Apu kuna, “Magimammà ka, á pánawám mu yù tolay!” Á inilappák na laguk nayù anitu yù nagunagán na ta arubáng nayù ira tatolay, á nallawán kuna. Á mássiki natombá yù tolay, ngam ari nanganni.

<sup>36</sup> Á napállâ yù ira nga naggagammung tân, á nakkaká-ubobuk ira, á kinagi ra, “Anni ngillâ yù pakáwayyá nayù ubobuk na! Gammán na yù ira anitu, á kurugad da ánná mallawán ira sù nagunagád da!” kud da.

<sup>37</sup> Á nassamâ yù dámak nayù kingnguá na sù ngámin nga lugár nga aranni ta Kapernium.

*Kitáru yù Pinammapiá ni Apu Kesu*

*Mattiu 8:14-17; Markus 1:29-34*

<sup>38</sup> Á kabalín ni Apu Kesu nangituddu nira, nánaw ta kapilliá nga minay sù bale ri Simon Eduru. Á nakkulikuk yù katugángán ni Simon, á inikomá ra bì kâ Apu Kesu megapu kuna, ta nerallà yù kulikuk na.

<sup>39</sup> Á jímkíkí si Apu Kesu sù babay nga nagiddá nga natakì, á gimmá na yù kulikuk na. Á dagarágâ naakkápù yù babay, á gimikkáng laguk nga minay namagon, tapè mepakkákán ira.

<sup>40</sup> Á lammak na bilák, iniyángé ra kâ Apu Kesu nayù ira tatolay yù ira nga máttakì ta makkakerumá nga tulágan. Á simmì na ira ngámin nga taggitáddy, á pinammapiá na ira.

<sup>41</sup> Á aru gapay yù ira anitu nga pinalawán na sù ira nagunagán. Á pallawád da, naakkalli ira, á kinagi ra, “Sikaw yù Anâ ni Namarò.” Ngam gimmá na ira ta arán na inanugù yù pakkagi ra, gapu ta ammu ra ta aggina yù MakKirstu nga sinullà ni Namarò ta mammaguray.

*Pappassiár ni Apu Kesu nga Mangilayalayâ sù Bilin ni Namarò*

*Markus 1:35-39*

<sup>42</sup> Á ta alippánnawák, nánaw si Apu Kesu nga minay ta nalappang nga lugár. Á ed da alaleran nayù ira tatolay. Pakálek da kuna, igaggak da nakuan ta arán na ira pánaván.

<sup>43</sup> Ngam kinagi na nira, “Pánavát takayu, ta máwák nga ek ku ilayalayâ sù ira káruán na ili gapay yù napiá nga dámak nga meyannung sù pammagure ni Namarò, ta yáyù gemma yù gapu na jinok nangá ni Namarò,” kun na.

<sup>44</sup> Á minay laguk mangilayalayâ sù ira kapilliá nayù ira Kudio sù ira káruán nga ili ra.

## 5

*Yù Pagágál ni Apu Kesu sù ira Napolu nga Sinudduán na*

*Mattiu 4:18-22; Markus 1:16-20*

<sup>1</sup> Á sù táddy ággaw, minay si Apu Kesu sù karek na Bebay na Gennesaret. Á kitáru yù ira tatolay nga jimináddán kuna. Á maddarassil ira, tapè ginnád da yù bilin ni Namarò nga ilayalayâ na.

<sup>2</sup> Á nasingán na yù duá nga barangay nga nereddè sù karagátán, nga nánawán nayù ira minággissé, ta ed da baggawán yù ira tabukul da.

<sup>3</sup> Á nappítta si Apu Kesu sù barange ni Simon, á kinagi na ta ipatangngá na yù barangay ta baddì. Á nagitubang si Apu Kesu nga nangituddu sù ira magaru nga tatolay nga naggián ta karagátán.

<sup>4</sup> Á kabalín ni Apu Kesu nangituddu nira, kinagi na kâ Simon, “Patangngám mu bì tuke alaram, á itán naw yù ira sansoru tân, tapè makálâ kayu ta aru,” kun na.

<sup>5</sup> Á simibbák si Simon, á kinagi na, “Mesturu, tangatangagabi kami sù gabi nga nassansoru, á awán bulubugá ta nálâ mi. Ngam nu dobak kami, á itám mi laguk,” kun na.

<sup>6</sup> Á kabaliid da nanuppál sù kinagi na, kitáru yù nálâ da, á maddaggun mapisil yù sansoru ra.

<sup>7</sup> Á pinayápayád da yù ira kábulud da sù táddy nga barangay, ta ed da ira abbágán. Á minay ira gapay, á pinnu ra yù ira duá nga barangay ta sirá, áddé ta maddaggun ira lummak sù kárammá nayù kárgá ra.

<sup>8</sup> Á pakasingári ni Simon Eduru sù nesimmu, namalittúkak ta arubág ni Apu Kesu, á kinagi na kuna, “Pánavám mà, Apu, ta mappasiránà nikaw, ta minálliwákà garè!” kun na.

<sup>9</sup> Ta napállâ di Eduru ánná yù ira kábulun na sù káru nayù sirá nga nálâ da.

<sup>10</sup> Á napállâ gapay di Ime kâ Kuan, nga ánâ ni Sebedo nga mepattarabáku kâ Simon sù táddy nga barangay. Á kinagi ni Apu Kesu kâ Simon, “Ari ka lá maganásing. Aringin sirá yù tarabakuan naw, ta dobat takayu ta umay kayu mangapá ta tatolay nga umay metáddy nikáñ,” kun na.

<sup>11</sup> Á pakaginná ra sù kinagi na, inireddè da yù ira barangay ra sù karagátán, á nánawád da ngámin tapè tuttulad da si Apu Kesu.

*Yù Pamammapiá ni Apu Kesu sù Naggoggong*

*Mattiu 8:1-4; Markus 1:40-45*

12 Á sù tádday ággaw, limibbè si Apu Kesu sù tádday nga ili. Á aijan tán yù tolay nga naggoggong. Á pakasingan na kâ Apu, minay namalittukak nga nallakak ta arubáng na, á inikomá na kuna, "Apu, nu ikállà mà, á pammapiám mà bíl!" kun na.

13 Á sinonnâ ni Apu Kesu yù limá na, á sinámmì na yù naggoggong, á kinagi na, "Wan gemma. Mammapiá ken!" kun na. Á dagarágâ nammapiá yù tolay sù tulágan na.

14 Á sinaddánán ni Apu Kesu, á kinagi na kuna, "Arám mu iparámak yaye kingnguá nikaw. Em mu lâ ipasingan yù baggim sù pári, tapè mánnámmuán na ta nári ngin yù tulágam mu. Á ipeytáting mu kuna yù kinagi ni Moyses, nga netúrâ sù tunung na, tapè manguruk gapay yù ira tatolay ta kuruk nga nammapiá ken," kun ni Apu Kesu kuna.

15 Á mássiki nu kinagi ni Apu Kesu sù tolay ta arán na iparámak yù nesimmu kuna, ngam nassamâ paga yù dámak nga meyannung sù kingnguá ni Apu Kesu, á kitáru yù ira jinibbuáng kuna, tapè maginná ra yù ituddu na ámma pammapián na ira gapay sù ira tulágad da.

16 Á nallillì sù ira tatolay, á minay nga kunnay sù kustombare na ta nalappang nga lugár nga makimállà kâ Namarò.

*Yù Pamammapiá ni Apu Kesu sù Tolay nga Nabbannak yù Baggi na  
Matti 9:1-8; Markus 2:1-12*

17 Á sù tádday ággaw nga pangituddu ni Apu Kesu, aru yù ira tatolay nga magginná kuna. Á aijan gapay yù ira Parisio ámma yù ira mangituddu sù tunung ni Moyses, nga naggapu ta ngámin nga ili sù ira purubinsia na Galilia ámma Judiya ámma yù ili na Jerusalem gapay. Á aijan kâ Apu Kesu yù ámmagaddáti ni Namarò nga mamammapiá sù ira máttaki.

18 Á limibbè laguk yù ira mangisú tolaiy nga nabbannak yù baggi na. Á itallung da nakuan sù balay, tapè ipeddá ra ta arubáng ni Apu Kesu.

19 Ngam arád da máwayyá gapu sù káru na tatolay. Á yáyù nga iniyuné da ta atà na balay, á binobbotád da yù atà. Á inilabbú da yù matakì nga inayáyud da nga pineddá sù arubáng ni Apu Kesu.

20 Á pakasingan ni Apu Kesu sù kingnguá ra, natákál na yù ángngikatalà da kuna. Á kinagi na laguk sù matakì, "Kopun, napakomá ken sù ira liwiliwâ mu," kun na.

21 Á pakaginná ra sù kinagi ni Apu Kesu, nakkaká-anasâ yù ira mangituddu sù tunung ni Moyses ámma yù ira Parisio nga aijan tán, á kinagi ra, "Tolay lá yaw, á ngattá, ta igittá na yù baggi na kâ Namarò, ta asinni panò yù mamakomá ta liwâ nu ari lá si Namarò? Ngattá, ta kunniauw yù ággububok nal!" kud da.

22 Ngam ammu ni Apu Kesu yù nononopad da, á simibbák nira, á kinagi na, "Ngattá, ta kunnian yù nononopan naw!

23 Anni panò yù ikáyâ naw nakuan nga kagiak ku sù tolaiy nga kun na natay yù baggi na? Ta mabbábâng kayu megapu sù kinagi kuna nga, 'Napakomá ngin yù ira liwiliwâ mu.' Á nu kük ku lá, 'Gumikkáng ka, á mallakák ka,' á manguruk kayu panò?

24 Ngam nu masingan naw ta nammapiá yaye tolay megapu sù ubobuk ku, á kánnámmuán naw laguk ta makáwayyángâ gapay sawe dabbuno nga mamakomá ta liwâ, sikán nga Kaká na ngámin na tatolay," kun ni Apu Kesu nira.

Á kinagi na laguk ni Apu Kesu sù matakì, "Yáyù nga kagiak ku nikaw. Gumikkáng ka. Apam mu yù nagiddám mu, á lubbè ka ta balem," kun na.

25 Á dagarágâ gimikkáng yù matakì ta arubáng da ngámin. Á inâ na yù nagiddán na, á nánaw ta lubbè ta bale na, nga maddáyaw kâ Namarò.

26 Á ngámin yù ira nakasingan, nerallà yù kapállâ da, á naddáyaw ira gapay kâ Namarò. Á kinagi ra, "Nasingat tam yù kuruk nga makapállâ ta ággawo!" kud da ngámin.

*Pagágál ni Apu Kesu kâ Libi  
Matti 9:9-13; Markus 2:13-17*

27 Á kabalin ni Apu Kesu namammapiá sù tolaiy nga nabbannak yù baggi na, nánaw laguk. Á pallakák na, nasingan na yù tolaiy nga mangngágan ta Libi, nga mináttuki ta buwì, nga nagitubang sù upisína na. Á kinagi ni Apu Kesu kuna, "Tuttulam mà," kun na.

28 Á dagarágâ gimikkáng si Libi, á nánawán na ngámin yù kukuá na tán, á siminuttul kuna.

29 Á inapà na laguk ni Libi yù ira kákkopun na ámma di Apu Kesu sù bale na, tapè mepallálláng ira kuna nga mangiparáyaw kâ Apu Kesu. Á aru yù ira kákkopun ni Libi nga minay, nepatalugáring sù ira kábulun na nga mináttuki ta buwì.

30 Á pakasingan nayù ira Parisio ámma yù ira kábulud da nga mangituddu sù tunung ni Moyses ta mepallálláng di Apu Kesu ta gián ni Libi, naddagaragim ira sù ira sinudduán ni

Apu Kesu. Á kinagi ra nira, "Ngattá, ta mepallálláng kayu sù ira minálliwâ, nepatalugáring sù ira mináttuki ta buwî!" kud da nira.

<sup>31</sup> Á si Apu Kesu yù simibbák nira, á kinagi na, "Ari yù ira napiá yù gagawagáwayád da yù magáwák ta minángnguru, nu ari galâ yù ira máttakì.

<sup>32</sup> Á yáyù iniyágè saw, ta ek ku pabbabawian yù ira minálliwâ. Aringà umay nga magágál sù ira nga kagiad da ta awán ta liwâ da, nu ari galâ ta umayà nga magágál sù ira nga ammu ra yù liwâ da, tapè mabbabáwi ira," kun na.

*Yù Meyannung sù Kustombare ra nga ari Kumán ta Pakimállà da kâ Namarò*

*Mattiu 9:14-15; Markus 2:18-20*

<sup>33</sup> Á aijan yù ira nga minay nagiyabbû kâ Apu Kesu, á kinagi ra, "Yù ira makituddu kâ Kuan nga Minánnigù, sigídá ra ngilinan yù ággaw nga ari ira kumán tapè makimállà ira kâ Apu Namarò. Á kunnian gapay yù kustombare nayù ira makikultu sù ira Parisio. Ngam yù ira makituddu nikaw, sigídá ira kumán ánnna ámminum. Ngattá ta arád da tuttulan yù kustombare nga ari kumán?" kud da.

<sup>34</sup> Á simibbák si Apu Kesu, á kinagi na, "Á ta ángngarigán, nu aijan yù bodá, á yù ira álliuk nga makibodá, arád da gemma lonán yù pakkákád da, ta mepallálláng ira ngámin sù nobiu. Á aijanakin lâ paga nga kunnay sù nobiu sù ira makituddu nikán. Á yáyù nga kumán ira.

<sup>35</sup> Ngam duttál yù ággaw nga kepánò nira, á yáyù nga lonád da laguk yù pakkákád da megapu sù daddam da nikán," kun na.

*Yù Keyarigán nayù Dán nga Kustombare ánnna Bagu*

*Mattiu 9:16-17; Markus 2:21-22*

<sup>36</sup> Á kinagi na paga ni Apu Kesu yù tádday nga ángngarigán na, tapè ipakánnámmu na nira ta ari mayâ nu tuttulad da yù dán nga kustombare ra nu ikáyâ da nga tumuttul sù bagu nga ituddu na. Á kinagi na, "Awán ta magappíl ta bagu sù dán. Á nu kunnian yù akkuán na nakuan, mapittang yù dán, á mapisil, ta ari negítta gapay yù bagu sù dán.

<sup>37</sup> Á ta kunnian gapay sù ira mappadday ta binaráyáng. Awán ta mangipay ta tabbuk na úbas sù dán nga ággianán na nga tabbi, marakè mabattâ sangaw yù tabbi. Á metabbà laguk yù tabbuk, á kengâ lâ yù binaráyáng ánnna yù ággianán na gapay.

<sup>38</sup> Ngam yawe yù máwák nga akkuád da. Ipe ra yù bagu nga tabbuk ta bagu nga ággianán na nga tabbi," kun na.

<sup>39</sup> Á kinagi na gapay yù meyannung sù tolay nga molang na patalián yù dán nga ággangnguá na, nga kun na, "Á ta ángngarigán, nu aijan yù tolay nga mamissán, á nu napenám sù dán, arán na ikáyâ yù bagu, gapu ta kagian na ta napiá yù dán ánnè sù bagu."

## 6

*Yù Meyannung ta Sabadu, nga Ággibannák da*

*Mattiu 12:1-8; Markus 2:23-28*

<sup>1</sup> Á tádday nga Sabadu, nga ággibannák nayù ira Kudio, nallakák di Apu Kesu nga mattalebák ta ákkomanán. Á yù ira makituddu kuna, inurù da yù bungá na ammay, á binussilád da ta jinum da.

<sup>2</sup> Á pakasingan nayù ira Parisio sù kingnguá ra, inibúyá ra ira, nga kud da, "Ngattá, ta magiurù kayu ta ammay sù ággaw nga ággibannák? Ta kunnay ta maggaták kayin, á arán na anugutan nayù tunung tam yù maggaták sù ággaw nga ággibannák," kud da.

<sup>3</sup> Á simibbák si Apu Kesu nira, á kinagi na, "Á arán naw panò paga binibbik yù kingnguá ra ngaw di Patul Dabid ánnna yù ira kábulun na ta kabisid da?

<sup>4</sup> Simillung si Dabid sù baile ni Namarò, á inâ na yù pán nga mangilin nga meyátáng kâ Apu, á kinán na, á iniyawâ na gapay sù ira kábulun na. Á kagian nayù tunung tam ta awán ta makkawayyá nga makkákán nu ari galâ yù ira pári. Ngam arán na liwâ ni Dabid, mássiki nu kinán na ánnna inipamakán na sù ira kábulun na."

<sup>5</sup> Á kinagi ni Apu Kesu paga, "Sikán, nga Kaká na ngámin na tatolay, sikán yù makáwayyá nga makkagi sù mepángngá ánnna mepugik nga akkuán na tolay sù ággaw nga ággibannák," kun na.

*Pamammapiá ni Apu Kesu sù Tolay nga Nassesseng yù Limá na*

*Mattiu 12:9-14; Markus 3:1-6*

<sup>6</sup> Á sù tádday nga Sabadu, nga ággibannák, minay si Apu Kesu sù kapilliá na Kudio, tapè mangituddu. Á aijan tán yù tolay nga nassesseng yù limá na nga jiwanán, nga arán na masonnâ.

<sup>7</sup> Á yù ira Parisio áんな yù ira mangituddu sù tunung ni Moyses, sinissimmurád da si Apu Kesu, tapè masingad da nu mamammapiá sù ággaw nga ággibannák, ta ikáyá da nga ikeká.

<sup>8</sup> Ngam ammu ni Apu Kesu yù nonopad da. Á kinagi na sù tolay nga nassesseng limá na, “Kopun, e ka bì manáddak sawe arubáng mi,” kun na. Á gimikkáng yù laláki nga minay nanáddak sù gián ni Apu Kesu.

<sup>9</sup> Á keggá nayù tolay nga nassesseng limá na ta arubáng da, kinagi na laguk ni Apu Kesu sù ira tatolay, “Ajjan bì iyabbú ku nikayu. Anni yù anugutan nayù tunung nga akkuát tam sù ággaw nga ággibannák? Abbágát tam yù ira kábolut tam, onu akkuát tam ira? Anni yù kustu nga akkuát tam? Yù panole tam ta tolay onu pamapáte tam?” kun na.

<sup>10</sup> Á iningan na yù ira ngámin nga ari makkituk. Á kinagi na laguk sù tolay nga nassesseng yù limá na, “Sonnatám mu yù limám,” kun na. Á sinonnâ na. Á ta panonnâ na kuna, dagarágá nammapiá ngin.

<sup>11</sup> Ngam yù ira Parisio áんな yù ira mangituddu sù tunung, nepallà yù pore ra kâ Apu Kesu, á nakkaká-ubobuk ira nu anni yù akkuád da kuna.

*Panullà ni Apu Kesu sù ira Mapulu duá nga Minángngilayalayâ  
Mattiu 10:1-4; Markus 3:13-19; Kingnguá 1:12-13, 26*

<sup>12</sup> Pappasá na yaw, giminon si Apu Kesu ta puddul, tapè umay makimállà kâ Namarò. Á tangatangagabi nga nakimállà tán.

<sup>13</sup> Á ta alippánnawák, inagálán na yù ira makituddu kuna, á sinullà na nira yù ira mapulu duá, nga iningágán na ta minángngilayalayâ.

<sup>14</sup> Aggira di Simón nga iningágán na ta Eduru, áんな yù wagi na nga si Andares, á di Ime kâ Kuan, di Pilippi kâ Bartolome,

<sup>15</sup> di Mattiu, kâ Tomâ, á si Ime nga tádday, nga anâ ni Alpio, áんな si Simon nga tádday nga abbúnad da ta Mengal sù ággubobuk da,

<sup>16</sup> á si Kudas, nga anâ ni Ime, áんな si Kudas Iskariote, nga nabbalin nga mappagápù kâ Apu Kesu sù ira Kudio nga nalussaw kuna.

*Yù Pangituddu ni Apu Kesu áんな Pamammapiá na sù ira Måttakì  
Mattiu 4:23-25*

<sup>17</sup> Kabalin ni Apu Kesu nanullà nira, minutù ira ngámin sù puddul nga minay ta aláwa nga lugár. Á ajjan nga naggagammung tán yù ira káruán nga makituddu kuna áんな yù ira magaru gapay nga naggapu ta Jerusalem áんな káruán nga ili gapay sù purubinsia na Judiya, áんな yù ira nga naggapu sù duá nga ili ta aggik na bebay, nga Tiro áんな Sidon, tapè maginnára yù ituddu na áんな iddagád da yù pamammapiá na sù tulágad da.

<sup>18</sup> Á minay gapay yù ira buruburionán nayù ira anitu, á pinammapiá na ira gapay.

<sup>19</sup> Á yù ira ngámin nga magaru, pinarubád da siniggek si Apu Kesu. Á ngámin yù ira naniggek kuna, nammapiá ira megapu sù ámmagaddátu na.

*Yù ira Pagayáyatán ni Namarò áんな yù ira Pagikaruan na  
Mattiu 5:1-12*

<sup>20</sup> Á nallipay si Apu Kesu sù ira makituddu kuna, á kinagi na nira,

“Napiá yù ággíán naw, sikayu nga tumulù nga magáwák!

Ta mapagayáyâ kayu sangaw, gapu ta mesipâ kayu sù pammagure ni Namarò.

<sup>21</sup> “Napiá yù ággíán naw, sikayu nga makkaragâ nga makituddu nikár áんな manuppál sù ipakuá ni Namarò nikayu!

Mapagayáyâ kayu sangaw, gapu ta pakáppagan na kayu sangaw ni Namarò, nga kunnay sù mabisin, nga mappálâ ta kanan na.

Á napiá yù ággíán naw, sikayu nga maraddam nga makkulé!

Ta pagayáyatán na kayu sangaw ni Namarò, á maggagálà kayu.

<sup>22</sup> “Napiá yù ággíán naw, nu malussaw yù ira tatolay nikayu, áんな manakì ira nikayu áんな iluddè da kayu, áんな paraparáketad da kayu megapu sù pangikatalà naw áんな panuttul naw nikán nga Kaká na ngámin na tatolay, ta mapagayáyâ kayu sangaw.

<sup>23</sup> Naggittá yù ira manigirigâ nikayu sù ira ngaw naggaká nira, ta yáyù gapay yù kingnguára ngaw sù ira ngaw ábbilinán ni Namarò. Á nu kunnian yù akkuád da nikayu, paguráyán naw. Magayáyâ kayu laguk sù dattál nayù ággaw nga panigirigâ da nikayu. Ayatán kayu lá nga kunnay ta mattatála megapu sù ayâ na, ta aru yù napiá nga bálà naw nga pinakappián ni Namarò ta lángi, nga málâ naw sangaw nu lubbè kayu tán,” kun ni Apu Kesu.

<sup>24</sup> Á kinagi na paga,

“Ngam sikayu nga maríku. Bay e! Makállállà kayu,  
ta ikatalà naw lá yù karíku naw, nga ari gemma mannanáyun.

Nálâ nawin yù napiá nga ikáyâ naw ánnâ yù napiá nga ággián naw sawe dabbuno, á yáyù áddè na.

<sup>25</sup> “Bay e! Makállallâ kayu, sikayu nga sigídá makákkáppagin,  
ta kagian naw ta napiá kayu ánnâ awán ta mówák naw.

Ta kunnay kayu sangaw ta mabisin, gapu ta yáyù pagáddekan nayù pagayáyâ naw.

Bay e! Makállallâ kayu, sikayu nga sigídá maggagalà kunangan,

ta kagian naw ta napiá kayu nga awán bulubugá ta ikaburung naw.

Maburung kayu sangaw ta liwâ naw, á mepallâ sangaw yù daddam naw ánnâ pakkulukulè naw,

gapu ta linonán naw yù awayyá naw nga mabbabáwi.

<sup>26</sup> “Bay e! Makállallâ kayu lâ nu dayáwad da kayu nayù ira ngámin nga tatolay, gapu ta kunnian gapay yù paddáyo nayù ira ngaw naggaká nikayu sù ira ngaw mattá-ábbilinán nga nakkagi ta naggapu kâ Namarò yù bilid da, ngam ari kuruk, ta nassirisiri ira.”

*“Iddukan naw yù ira Makiramá nikayu.”*

*Mattiu 5:38-48; 7:12a*

<sup>27</sup> Á kinagi ni Apu Kesu paga, “Ngam sikayu nga magginná sù kagiak ku, iddukan naw yù makiramá nikayu. Á ikállâ naw yù ira malussaw nikayu.

<sup>28</sup> Kiddawan naw kâ Namarò yù allâ na sù ira mangigagek nikayu, tapè pakomán ni Apu ira. Á makimállâ kayu megapu sù ira manigirigâ nikayu.

<sup>29</sup> Á nu ajjan yù tolay nga mallappák nikayu, ari kayu mabbálâ, mássiki nu palapalingian na kayu. Á nu ajjan yù maggubâ ta gámì naw, paguráyán naw lâ. Iyawâ naw paga yù barawási naw kuna gapay nu apan na paga.

<sup>30</sup> Iddán naw yù ira ngámin nga makkiddaw nikayu. Á nu ajjan yù mangâ ta kukuá naw, paguráyán naw nu arán na itoli.

<sup>31</sup> Á yù napiá nga ikáyâ naw nga akkuán nayù ira kábulun naw nikayu, yáyù lâ akkuán naw nira.

<sup>32</sup> Á nu yù ira lâ nga mangiddù nikayu yù iddukan naw, bálatan na kayu panò ni Namarò? Ari gemma, ta mássiki yù ira nga mangnúá ta narákè, iddukad da gapay yù ira mangiddù nira.

<sup>33</sup> Á kunnian gapay, nu yù ira lâ nga mangabbák nikayu yù abbágán naw, bálatan na kayu panò ni Namarò? Ari gemma, ta mássiki yù ira minálliwâ, kunnian gapay yù akkuád da.

<sup>34</sup> Á nu yù ira lâ nga ammu ra nga mappagá yù pagatukán naw, dayáwan na kayu panò ni Namarò? Ari gemma, ta mássiki yù ira minálliwâ, makkakápagatû ira gapay sù ira nga ammu ra mappagá.

<sup>35</sup> “Ngam sikayu, mówák naw iddukan yù ira ngámin nga kábulun naw, mássiki yù ira malussaw nikayu, ánnâ ikállâ naw ira. Á mappagatû kayu sù ira ngámin nga makkiddaw, mássiki yù ira nga arád da mówayyá nga itoli nikayu. Á nu kunnian yù akkuán naw, dakal yù bálâ naw ta lángì. Á mabbálí kayu ta ánnâ ni Apu Namarò nga Kotunán, gapu ta kunnian gapay yù akkuán na. Ta ikákkállâ na yù ira narákè gapay ánnâ yù ira ari mabbalabálâ kuna.

<sup>36</sup> Párigán naw laguk si Namarò nga Yáma naw, á mangikállâ kayu ta kunnay kuna, ta nepallâ yù allâ na,” kun ni Apu Kesu.

*Arát tam laguk Ibúyá yù ira Kábolut tam*

*Mattiu 7:1-5*

<sup>37</sup> Á kinagi ni Apu Kesu, “Arán naw panunnután yù ira kábulun naw, ánnâ arán naw ira pagikaruan. Á si Namarò, arán na kayu panunnután, ánnâ arán na kayu pagikaruan. Pakomán naw yù ira kábulun naw, á pakomán na kayu laguk ni Namarò.

<sup>38</sup> Á iyawâ naw sù ira kábulun naw yù ángngabbák naw nira. Á si Namarò, iyawâ na gapay nikayu yù napiá nga tappangan na, nga inittâ na, nga pinnu na, nga pinallábi na nga arán na kinari. Ta igittâ ni Namarò yù tappang na sù tappang naw, á kunnay sù tappangan naw ta iyawâ naw sù ira kábulun naw, kunnian gapay yù tappangan ni Namarò nga iyawâ na nikayu.”

<sup>39</sup> Á nagángngarigán si Apu Kesu, á kinagi na nira, “Nu ajjan yù buling, mówayyá na panò nga aggina yù mamulù sù kábulun na nga buling? Ari gemma, ta mesawwâ ira duá ta abbû, gapu ta arád da masingan yù angayád da.

<sup>40</sup> Á kunnian gapay sù makituddu, nga ari makáwayyá ánnè sù mesturu na. Ngam sangaw nu ammu na ngámin yù netuddu kuna, á megittâ sù mangituddu kuna.”

<sup>41</sup> Á nagángngarigán si Apu Kesu ta meyannung sù ira nga makkakagi sù ira kábulud da, á kinagi na, “Ngattâ, ta ibúyá naw yù baddi nga apuling sù matá nayù kábulun naw, ngam arán naw matagenâ yù karakal nayù apuling nga ajjan ta matá naw!

<sup>42</sup> Måwayyá naw panò nga kagian sù kabbulun naw, ‘Kopun, ápulingát taka,’ ngam ajjan ga yù dakal nga apuling ta matá naw? Áppè pípiá kayu! Napiá nu mapolu bì irián naw yù dakal nga apuling ta matá naw, tapè masingan naw ta napiá, á mári naw gapay yù baddì nga apuling sù matá nayù kabbulun naw.”

*Yù Kebalinán nayù Káyu ánná yù Bungá na  
Mattiu 7:16-20; 12:33-35*

<sup>43</sup> Á kinagi na paga ni Apu Kesu, “Yù napiá nga káyu, ari mabbungá ta jikkù. Á yù jikkù nga káyu, ari mabbungá ta napiá.

<sup>44</sup> Ta tákkilatám tam yù káyu megapu sù bungá na. Á arát tam gemma málâ yù lubbán sù gurawing. Á arát tam gemma málâ yù bayábà sù baribbi.

<sup>45</sup> Á kunnian gapay, napiá lâ yù akkuán nayù napiá nga tolay, nga naggapu ta napiá nga nonò na. Á naráké yù akkuán nayù naráké nga tolay nga naggapu ta naráké nga nonò na. Ta akkuán na tolay yù nononopan na, á yáyù gapay yù ubobugan na.”

*Yù Keyarigán nayù Mangruk ánná yù ari Mangruk  
Mattiu 7:24-27*

<sup>46</sup> Á kinagi na paga ni Apu Kesu, “Ngattá, ta kagian naw ta sikán yù yápu naw, ta ‘Apu,’ kun naw lâ nikán, ngam arán naw kurugan yù kagiak ku nikayu!

<sup>47</sup> Á yù ira tatolay nga umay nikán, nga magginná sù kagiak ku ánná kurugad da, á kagiak ku nikayu yù keyarigád da.

<sup>48</sup> Kunnay ira ta nabbalay, nga alaram yù kinokkobán na. Á pakatunù na sù batu ta unak, yáyù pamatáddagán na sù kallang na. Á nu maddakal yù danum, malítù yù balay ánná masikan yù agi na danum. Ngam ari meburuk yù balay, gapu ta maláddá yù kapadde na.

<sup>49</sup> Ngam yù tolay nga makaginná sù kagiak ku nga arán na kurugan, kunnay sù nabbalay, nga ababbaw yù inikokkok na sù kallang na, nga pinatáddak na lâ sù dabbun. Á paddakal nayù danum, nalítù yù dabbun, á nagagi yù danum sù gián nayù bale na. Á dagarágâ nakutukutáng yù balay nga neburuk, á kengá lâ.”

## 7

*Yù Pamammapiá ni Apu Kesu sù Aripa nayù Kapitán nga taga Roma  
Mattiu 8:5-13*

<sup>1</sup> Kabalin na nattuddu ni Apu Kesu sù ira tatolay nga nagginná, nánaw nga minay ta ili na Kapernium.

<sup>2</sup> Á naggián tán yù ari Kudio, nga kapitán na suddálu nga taga Roma. Á ajjan kuna yù aripan na nga iddukan na ta napiá, nga magisassay matay.

<sup>3</sup> Á pakaráramak nayù kapitán ta ajjan tán si Apu Kesu, jinok na kuna yù ira karakalán na Kudio ta ed da agálán bì ta umay nga mamammapiá sù aripan na nga mataki.

<sup>4</sup> Á dakkì da kâ Apu Kesu, inikomára kuna ta abbágán na yù kapitán. Á kinagi ra, “Apu, mássiki nu ari Kudio yù kapitán, kuruk nga napiá nga tolay,

<sup>5</sup> ta nepallà yù allà na nittam nga Kudio, ta aggina yù nappapadday sù kapilliá tam,” kud da.

<sup>6</sup> Á nepulù laguk si Apu Kesu nira.

Á pakáranni di Apu Kesu sù bale nayù kapitán, jinok nayù kapitán yù ira kopun na ta ed da ira dapunan. Á kinagi ra kâ Apu Kesu, “Apu, paguráyám mu lâ kanu, ta mappasirán yù kapitán nikaw, nu umay ka ta bale na.

<sup>7</sup> Á yáyù gapay yù gapu na nga arán na ángay panápun nikaw, ta ammu na nu magubobuk ka lâ, á mammapiá yù aripan na.

<sup>8</sup> Ta aggina gapay yù tolay nga manuppál sù kagian nayù maddok kuna. Á ajjan gapay yù ira suddálu na, nga manuppál sù kagian na. Nu kagian na sù táddy, ‘Mánaw ka,’ á dagarágâ mánaw. Á nu kagian na sù tanakuán, ‘E ka saw,’ á dagarágâ umay. Á nu ajjan yù kagian na sù aripan na, dagarágâ kurugan na. Á yáyù nga ammu na ta matuppál gemma yù kagiam mu,” kud da.

<sup>9</sup> Á pakaginná ni Apu Kesu sù kinagi ra nga bilin nayù kapitán, napállâ sù ángngikatalà na kuna. Á nallipay sù ira aru nga tatolay nga mepulupulù kuna, á kinagi na nira, “Awán ta naratang ku nga mangikatalà nikán, mássiki sù ira ngámin kábulut tam nga ginaká ni Israel, nga kunnay sù kapitán yù ángngikatalà na nikán!” kun na.

10 Á panoli nayù ira jinok nayù kapitán ta bale na, nasingad da ta nammapiá ngin yù aripan na.

*Yù Pamaginnanole ni Apu Kesu sù Bagitolay nga Anâ nayù Bálù*

11 Á manganánnuán, minay si Apu Kesu ta ili na Nen. Á nepulupulù kuna yù ira makituddu kuna ánnà yù ira magaru nga tatolay.

12 Á pakáranni ra sù áttallungán nayù ili, nerapunád da yù magaru nga tatolay nga naggapu ta ili nga umay mananam. Á yù natay yù laláki nga tátádday nga anâ na babay nga nabálù. Á nepulù nira gapay yù babay.

13 Á pakasingan ni Apu Kesu sù babay nga yená nayù natay, nepallà yù allà na kuna. Á kinagi na kuna, “Ari ka bì makkulè,” kun na.

14 Á minay si Apu Kesu sù ira nangáttu sù natay, á sinámmì na yù lungun na, tapè magginnà ira. Á pagginnà da, nagubobuk si Apu Kesu sù bagitolay nga natay, á kinagi na kuna, “Ilù, gumikkáng ka.”

15 Á dagarágâ nga gimikkáng yù bagitolay, nga magubobuk nira. Á initoli na laguk ni Apu Kesu sù yená na.

16 Á maganássing yù ira ngámin nga tatolay tán, á nerallà yù kapállâ da. Á naddáyaw ira kâ Apu Namáro, á kinagi ra, “Ajjan yù jímittál nittam nga makáwayá nga ábbilinán ni Namáro,” kud da. Á kinagi ra gapay, “Napiá ta arán na ittam náttamán ni Namáro nga tatole na, ta en na ittam sinullúnán,” kud da.

*Yù Bilin ni Apu Kesu kâ Kuan nga Minánnigù*

*Mattiu 11:1-6*

17 Á paginnanole nayù bagitolay, nassamâ yù dámak nga meyannung sù kingnguá ni Apu Kesu ta ngámin nga ili sù purubinsia na Judiya ánnà yù ira ngámin nga babálay.

18 Á narámak gapay ni Kuan nga Minánnigù, gapu ta minay yù ira sinudduán na sù gián na ta ábbalurán nga makkagi kuna.

19 Á yáyù nga inipágál ni Kuan yù duá nga sinudduán na. Á jinok na ira ta ed da iyabbù kâ Apu Kesu nu aggina yù patul nga initabbá ni Namáro nga umay mammaguray, onu ajjan lá paga tanakuán nga iddagád da.

20 Á labbè nayù ira nabilin ni Kuan ta gián ni Apu Kesu, kinagi ra kuna, “Si Kuan nga Minánnigù yù naddok nikami, ta em mi iyabbù nikaw nu sikaw yù umay mammaguray, onu iddagám mi lá paga yù tanakuán?” kud da.

21 Á negiddán ta keggá ra yù pangnguá ni Apu Kesu sù aru nga makapállâ, ta aru yù ira mâtakì nga pinammpipiá na ta tulágad da nga makkakerumá, á pinalawán na yù ira nattaliponak sù ira tatolay. Á aru gapay yù ira buling nga pinakasingan na.

22 Á simibbák si Apu Kesu laguk sù ira jinok ni Kuan, á kinagi na, “Manoli kayu kâ Kuan, ta en naw kagian kuna yù nasingan naw ánnà naginná naw saw, ta makasinganin yù ira ngaw buling, á makalakák yù ira ngaw pilay. Nammapiá yù ira ngaw naggoggong, á makaginná ngin yù ira ngaw kitul. Naginnanolayin yù ira natay. Á nelayalayá sù ira makállallà yù napiá nga dámak.

23 Á kagian naw gapay kuna ta magayáyâ yù tolay nga ari mabbábáng nga mangikatalà nikán,” kun ni Apu Kesu.

*Yù Kinagi ni Apu Kesu nga Meyannung kâ Kuan*

*Mattiu 11:7-15*

24 Á ta páno nayù ira binilin ni Kuan, kinagi ni Apu Kesu sù ira magaru nga tatolay yù meyannung kâ Kuan, nga kun na, “Anni panò yù en naw iningan ta kalállammatán? Ikáyá wan panò masingan yù mímì nga mepayapayák ta paddák?

25 Á nu ari, anni laguk? En naw panò iningan yù tolay nga nabbísti ta nakástá? Ngam ari! Ta yù ira nabbísti ta nakástá, maggián ira ta palásiu na patul, nga awán bulubugá ta awágad da.

26 “Á anni laguk yù kuruk nga en naw iningan? En naw panò iningan yù ábbilinán ni Namáro? Wan, á kuruk gemma! Ta si Kuan yù kotunán ánnè sù ira ngámin nga káruán nga ábbilinán.

27 Aggina yù ubobugan ni Namáro sù inipetúrâ na ngaw nga kunniaw:

‘Yawe yù ábbilinák ku nga dobak ku ta mapolu ánnè nikaw,

tapè ituddu na sù ira tatolay yù akkuád da nakuan,

tapè dán nga naparán ira sù labbè mu.’

<sup>28</sup> Á kuruk yawe nga kagiak ku nikayu, nga awán ta tolay nga neyanâ sawe dabbuno nga napiá ánné kâ Kuan. Ngam yù kagukábán nga tolay nga mesipà sù pammagure ni Namarò, aggina yù napiá ánné kâ Kuan, megapu sù allà ni Namarò.”

<sup>29</sup> Á yù magaru nga tatolay, mássiki yù ira minálliwâ, nepatalugáring sù ira magâ ta buwì nga mangilogò, nagayáyâ ira ngámin ta pakaginná ra sù pangituddu ni Kuan sù bilin ni Namarò. Á kinuruk da yù ubobuk ni Namarò nga kinagi ni Kuan, á yáyù nakirigù ira kuna.

<sup>30</sup> Ngam yù ira Parisio ánná yù ira mangituddu sù tunung ni Moyses, inípuerá ra yù ure ni Namarò nira, á manakì ira nakirigù kâ Kuan.

*Yù ira Manakì sù ira Ábbilinán ni Namarò*

*Mattiu 11:16-19*

<sup>31</sup> Á kinagi na paga ni Apu Kesu, “Á sikayu, anni laguk yù pangiyarigák ku nikayu? Anni yù keyarigan naw?

<sup>32</sup> Kunay kayu sù ira ábbing nga makkukul ta dápun. Á kagian nayù ira káruán sù ira kábulud da, ‘Naggássá kami, tapè mattálá kayu nakuan, ngam manakì kayu. Á kinagi mi ta makkulè kami nga áppa-áppè mananam, ngam manakì kayu gapay!’ kud da.

<sup>33</sup> Á sikayu yù kagítta ra, ta jmittál si Kuan, á manakì kayu kuna, á lillibatan naw, ta kagian naw ta nagunagán, gapu ta dumá yù kanan na sù kanan naw, ánná ari bulubugá mamissán.

<sup>34</sup> Á minayà laguk, sikán nga Kaká na ngámin na tatolay, nga naporián kâ Kuan, nga mepallálláng nga mepámmínun nikayu. Á manakì kayu gapay nikán. Á paliwatan nawà, ta kagian naw ta kitadullágà ánnna magilellaw. Á paliwatan nawà gapay megapu ta pakikopuk ku sù ira minálliwâ, nepatalugáring sù ira mináttuki ta buwì.

<sup>35</sup> “Ngam yù ira nga manguruk nikán, ipakánnámmu ra ta napiá ánnna masírik yù bilin ni Namarò,\* nga ituddù ánnna ituddu ni Kuan, megapu sù napiá nga akka-akkuád da,” kun ni Apu Kesu.

*Keggá ni Apu Kesu ta Bale ni Simon nga Parisio*

<sup>36</sup> Á tádday ággaw, ajjan yù Parisio nga mangngágan ta Simon, á inapà na si Apu Kesu ta umay kumán ta bale ra. Á nepulù si Apu Kesu kuna nga minay kiminán ta bale ra.

<sup>37</sup> Á ajjan gapay tâne ili yù babay nga minákkikarallaw. Á pakarámak na ta ajjan si Apu Kesu nga mepallálláng sù bale nayù Parisio, á minay gapay sù bale nayù Parisio, tapè makimoray kâ Apu Kesu. Á inipulù na yù boteliá na nga nasiling nga napannu ta bábbanguk nga nanginá.

<sup>38</sup> Á tallung na sù bale nayù Parisio, minay namalittúkak nga nakkulè sù gián ni Apu Kesu. Á napannátán sù kalulluá na yù takki ni Apu, á nabasá ira. Á inipappunâ na yù duddù na sù takki na. Á inummatán na yù takki na, megapu sù pakimore na kuna. Á binukatán na yù nasiling nga boteliá na, á jinenuán na yù takki na sù bábbanguk.

<sup>39</sup> Á yù Parisio nga mangálliuk kâ Apu Kesu, pakasingan na sù kingnguá nayù babay, nakujjá yù mammang na, á nonotan na nga kun na, “Yawe tolay, nu kuruk nga ábbilinán ni Namarò, ammu na nakuan yù nonò na yawe babay nga maniggek kuna, á gimmá na nakuan,” kun na ta nonò na.

<sup>40</sup> Ngam si Apu Kesu, ammu na yù ninonò nayù Parisio, á yáyù kinagi na laguk kuna, “Simon, ajjan yù kagiak ku nikaw,” kun na. “Wan, Mesturu,” kun ni Simón kuna.

<sup>41</sup> Á kinagi ni Apu Kesu kuna, “Ajjan yù duá nga naggagatù. Á límágatù yù gatù nayù tádday. Á yù mekaruá, singkuentá lá yù gatù na.

<sup>42</sup> Á gapu ta arád da máwayyá nga pagán yù gatù da, pinakomá nayù tolay ira. Á yawe iyabbú ku bi nikaw, Simon. Asinni sù íra duá yù eggá nga nepallâ nga ayâ na sù mappagatù?” kun ni Apu Kesu.

<sup>43</sup> Á simibbák si Simon, á kinagi na, “Á yù tolay támma nga aru yù gatù na nga pinakomá na,” kun na. “Wan, kuruk!” kun ni Apu Kesu kuna.

<sup>44</sup> Á nallipay si Apu Kesu sù babay, á kinagi na paga kâ Simon, “Á kunnay gapay sawe babay, nga masingam mu. Ta inapà mà, á minayà. Ngam tallung ku sù balem, arám mà iniddán ta danum, tapè baggawák ku nakuan yù takki ta kunnay ta kustombare tam. Ngam yawe babay, binaggawán na yù takki sù kalulluá na, á pinunatán na sù duddù na.

<sup>45</sup> Á sikaw, arám mà pakimorayán sù tallung ku ta balem. Ngam yawe babay, ummu-ummatán na yù takki áddè ta tallung ku, ta áddè kunangan.

\* <sup>7:35</sup> Innam mu yù Túrâ ni Ime 1:5 ánná 3:17.

<sup>46</sup> Á sikaw, arám mu jinenuán yù ulù ta kunnay sù kustombare tam. Ngam yawe babay, jinenuán na yù takki sù nanginá nga bábbanguk.

<sup>47</sup> Á yawe laguk yù kagiak ku nikaw, ta napakomángin yù ngámin nga liwâ na, á yáyù nga ipasingan na yù nepallá nga ayâ na nikán. Ngam yù tolay nga baddì lâ yù napakomá kuna, baddì lággapay yù ayâ na,” kun ni Apu Kesu.

<sup>48</sup> Á kinagi ni Apu Kesu sù babay, “Kuruk nga napakomá ngin yù liwâ mu,” kun na.

<sup>49</sup> Á yù káruán nga tatolay nga mepallállág nira, nakkaká-anasâ ira nga kud da, “Asinni panò yaw, nga kagian na ta pakomán na yù tolay ta liwâ na?” kud da.

<sup>50</sup> Á kinagi na paga ni Apu Kesu sù babay, “Neyígú ken megapu sù ángngikatalà mu nikán. Lubbe ka ta balem nga mabannáyánin yù nonò mu,” kun na sù babay.

## 8

### *Yù ira Bábbay nga Nepulù kâ Apu Kesu*

<sup>1</sup> Á ari nabayák, á nánaw si Apu Kesu nga minay sù ira ili ánnna babálay, nga nangilayalayá sù napiá nga dámak nga meyannung sù pammagure ni Namarò. Á nepulupulù kuna yù ira mapulu duá nga tudduán na.

<sup>2</sup> Á aijan gapay nga nepulù kâ Apu Kesu yù ira bábbay nga pinammapiá na sù takì da ánnna yù ira nga pinapáno na yù ira anitu nira. Aijan si Maria, nga taga Maddala, nga nánawán na pitu nga anitu.

<sup>3</sup> Á aijan gapay si Juana nga atáwa ni Kosa. Si Kosa yù minánnaron sù ngámin nga kukuá ni Patul Erodo. Á aijan si Susana ánnna aru ira paga nga bábbay, nga mangisipà kári Apu Kesu.

### *Yù Ángngarigán nga Meyannung ta Bini nga Iniwári nayù Minákkomán*

*Mattiu 13:1-9; Markus 4:1-9*

<sup>4</sup> Á kitáru yù ira tatolay nga jimináddán kâ Apu Kesu, nga naggapu sù ira ngámin nga ili ánnna babálay. Á paggagammung da, nagángngarigán si Apu Kesu, á kinagi na,

<sup>5</sup> “Aijan yù tolay, nga en na iniwári yù bini sù komán na. Á pangiwári na ta bini, natágâ yù baddì sù dálan, nga neguppuguppé, á kinán na mammánù.

<sup>6</sup> Á aijan gapay yù baddì nga natágâ ta kabatuán. Á pattubbu na, nalelay gapu ta namagá yù gián na.

<sup>7</sup> Á aijan paga yù baddì nga natágâ ta kasisítán. Á nattubbu gapay, ngam nepattubbu gapay kuna yù sì nga jiminakal, á narubbù yù gián na.

<sup>8</sup> Á yù káruán na bini, natágâ sù napiá nga dabburun, á jiminakal áddè ta paddáwa na. Á napiá yù áddáwa na, nga kitáru yù bungá na.”

Á kabalin ni Apu Kesu nagángngarigán, nikatol na nga kinagi, “Sikayu nga makaginná, magginná kayu ta napiá sù ubobuk ku!” kun na.

### *Yù Gapu na nga Nagángngarigán si Apu Kesu*

*Mattiu 13:10-17; Markus 4:10-12*

<sup>9</sup> Á yù ira makituddu kâ Apu Kesu, iniyabbû da kuna, “Anni yù kebalinán nayù ángngarigám mu?” kud da.

<sup>10</sup> Á simibbák si Apu Kesu nira, á kinagi na, “Sikayu lâ yù pangipakánnámuák ku ta meyannung sù pammagure ni Namarò, nga nelímak áddè kunangan. Ngam iyángngarigák ku lâ sù ira káruán, gapu ta inni-innad da yù akkuák ku, ngam ari ira manguruk ta si Namarò yù naddok nikán. Á ginniginnád da yù bilin ni Namarò, ngam arád da manonò yù kebalinán na,” kun na.

### *Yù Pangibukalán ni Apu Kesu sù Keyarigán nayù Bini*

*Mattiu 13:18-23; Markus 4:13-20*

<sup>11</sup> Á kinagi na laguk ni Apu Kesu, “Á yawe yù kebalinán nayù ángngarigán nga kinagi. Yù bini yù keyarigán nayù bilin ni Namarò.

<sup>12</sup> Á ta kunnay sù bini nga natágâ sù dálan, aijan yù ira tatolay nga nakaginná sù bilin ni Namarò, ngam umay si Satanas mepassassábbárâ ta nonò da, marakè manguruk ira, tanu manguruk ira nakuan, á meyígù ira.

<sup>13</sup> “Á yù bini nga natágâ ta kabatuán yù kunnay sù ira tatolay nga magayáyâ nga manguruk sù bilin ni Namarò ta pakaginná ra kuna. Ngam ta kunnay sù bini nga ari makapaggamù ta kabatuán, awán bulubugá ta ipatattam da ta nonò da. Á yáyù nga mabi lâ yù panguruk da. Á sangaw nu umay yù jigâ da, pallikuránád da yù ángnguruk da.

<sup>14</sup> Á yù bini nga natágâ ta kasisítán yù kunnay sù ira tatolay nga magginná sù bilin ni Namarò, ngam ari makatalluâ yù ángnguruk da. Á kunnay ira sù bini nga nakkurítal gapu ta narubbù yù gián na, ta megaggak yù ángnguruk da megapu sù ikaburung da nga ággiad da ta dabbuno ánnna yù ukkuk da ta kukuá ra, ánnna yù ngámin nga ala-alerad da nga ipagayáyáda.

<sup>15</sup> Á yù bini nga natágâ ta napiá nga dabbun, nga nabbungá ta napiá, yù kunnay sù ira tatolay nga magginná sù bilin ni Namarò, nga ipatattam da ta napiá sù nonò da. Á yáyù nga mássiki nu umay nira yù jígâ, napasigaggâ yù ángnguruk da. Á kunnay sù bini nga napiá yù ábbungá na, napiá gapay yù akka-akkuád da megapu sù bilin ni Namarò nga inipatattam da ta nonò da.”

*Yù Isingan yù Keyarigán nayù Bilin ni Namarò*  
*Markus 4:21-25*

<sup>16</sup> Á nagángngarigán paga si Apu Kesu, á kinagi na, “Egga panò yù tolay nga paggatangan na yù isingan, nga kallabán na ta palanggána onu ipe na ta silárung na katri? Awán gemma, ta ipotun na gemma sù ággianán na, tapè manawagán yù ira tatolay nga tullung ta balay.

<sup>17</sup> Á kunnian gapay sù pangituddù ta meyannung sù pammagure ni Namarò, ta mepasin-gan sangaw yù ari ngaw netuddu, á mepakánnámmu sangaw yù ari ngaw nánnámmuán, tapè manawagán yù nonò naw.

<sup>18</sup> Tángngagan naw laguk yù ágginná naw sù bilin ni Namarò. Ta yù tolay nga manguruk sù bilin ni Namarò, malannapán sangaw yù ammu na. Ngam yù tolay nga ari manguruk sù bilin na, máttamán na sangaw yù kagian na nga kánnámmuán na,” kun ni Apu Kesu.

*Yù ira Ibiláng ni Apu Kesu ta Yená na ánnna Wáwwagi na*  
*Mattiu 12:46-50; Markus 3:31-35*

<sup>19</sup> Á kabalin ni Apu Kesu nagubobuk, simippi di innò na ánnna yù ira wáwwagi na, ngam arád da marakkítan gapu ta káru na tatolay.

<sup>20</sup> Á yù tádday nga tolay, kinagi na kâ Apu Kesu, “Ajjan ta lawán di innò mu ánnna yù ira wáwwagim, á ipágál da ka.”

<sup>21</sup> Á kinagi ni Apu Kesu sù ira ngámin nga tatolay, “Ngámin yù ira nga magginná ánnna manuppái sù bilin ni Namarò, aggira yù yená ánnna yù ira wáwwagi.”

*Yù Pamagimammà ni Apu Kesu sù Baggio*  
*Mattiu 8:23-27; Markus 4:35-41*

<sup>22</sup> Á tádday ággaw, ajjan di Apu Kesu ta aggik na bebay. Á kinagi na sù ira makituddu kuna, “Et tamin, ta dumákì ittam ta dammáng,” kun na. Á nappittà ira ta barangay, á nánaw ira ta umay ira ta dammáng na bebay.

<sup>23</sup> Á paddákì da, nakkaturuk si Apu Kesu. Á ikáddagâ lâ nappaddák ta nasikan. Á nasibi ira ta barangay, á naganássing yù ira sinudduán na, marakè lummak yù barangay nu mapannu ta danum.

<sup>24</sup> Á ed da nilukák si Apu Kesu, á kinagi ra kuna, “Mesturu, awán ittamin!” kud da. Á dagarágâ gimikkáng, á gimmá na yù paddák ánnna palung, á nagimammà yù paddák ánnna palung. Á kitalínák yù bebay.

<sup>25</sup> Á kinagi na sù ira makituddu kuna, “Anni má ta mabbábáng kayu sù ángngíkatalà naw nikán?” kun na. Á naganássing ira, á nerallà yù kapállâ da. Á nakkaká-ubobuk ira, á kinagi ra, “Asinni yaw maggammá ta paddák ánnna palung, nga tuppálan nayù paddák ánnna yù palung yù kagian na!” kud da.

*Yù Pamammapiá ni Apu Kesu sù Nagunagán*  
*Mattiu 8:28-34; Markus 5:1-20*

<sup>26</sup> Á manganánnuán, nakáddè di Apu Kesu ánnna yù ira sinudduán na ta lugár na Geresa, ta dammáng na Galilia.

<sup>27</sup> Á gatták di Apu Kesu sù barangay, jiminápun nira yù tolay nga taga ili, nga nagunagán na aru ira nga anitu. Á nabayágín nga nagili-ilongán, nga ari naggián ta bale ra, ngam maggián lâ ta kuebá sù katanamán.

<sup>28</sup> Á pakasingan nayù nagunagán kâ Apu Kesu, naganássing nga nakkalli nga napalakak ta arubáng na. Á kinagi na, “Sikaw, Kesu, nga Anâ ni Namarò nga Kotunán, anni yù akkuám mu nikán? Ikállâ mà bi, ta arám mà jígirigátan!” kun na.

<sup>29</sup> Á yáyù kinagi nayù anitu kâ Apu, gapu ta sinaddánán nen ni Apu Kesu yù anitu ta mánaw sù tolay. Ta sigídá nga umay yù anitu kuna. Á yù ira kábulun nayù tolay, mássiki

nu balurad da ta kawák yù limá na ánná yù takki na, ngam gattagattakan na lâ, á pakarerán nayù anitu nga umay ta kalállammatán.

<sup>30</sup> Á iniyabbû na laguk ni Apu Kesu sù anitu, “Anni yù ngágam mu?” kun na. “Sikán si Jinibu,” kun na, ta aru yù ira anitu nga nattaliponak kuna.

<sup>31</sup> Á inikomá ra kâ Apu Kesu ta arán na ira doban nga umay nga magikáru sù abbû nga awán ta áddè nayù kálaram na.

<sup>32</sup> Á gapu ta ajjan tán aru nga bábi nga magárap sù garek na puddul, inikomá nayù anitu kâ Apu Kesu ta doban na ira ta umay ira tullung sù ira bábi. Á iniyangúna nira.

<sup>33</sup> Á dagarágâ nánawád da yù tolay, á simillung ira sù ira bábi, á gikarerán yù ira bábi nga minay nga nelappák ta bebay. Á nalaggabán ira ngámin.

<sup>34</sup> Á pakasingan nayù ira mináppárak sù nesimmu sù ira bábi ra, nattálaw ira, á ed da iniparámak sù ira ili ánná babálay.

<sup>35</sup> Á yù ira nakarámak, ed da pinasikkál. Á labbè da ta gián ni Apu Kesu, naratang da yù tolay nga nánawán nayù ira anitu, nga nagitubang ta taging ni Apu Kesu. Á nabbarawási ngin, nga nammapiá ngin yù nonò na. Á naganássing laguk yù ira tatolay megapu sù pakáwayyâ ni Apu Kesu.

<sup>36</sup> Á yù ira nakasingan sù nesimmu, inistoriá ra sù ira tatolay yù pamammapiá ni Apu Kesu sù tolay.

<sup>37</sup> Á yù ira ngámin nga tatolay nga taga Gerasa, inikomá ra kâ Apu Kesu ta móanaw nira, ta nerallâ yù assing da kuna.

Á gapu ta pampáno ra kâ Apu Kesu, nappittà laguk ta barangay, ta móanaw nira.

<sup>38</sup> Á yù tolay nga nammapiá nga nánawán nayù ira anitu, inikomá na kâ Apu Kesu ta mepulù kuna. Ngam pinapáno ni Apu Kesu, á kinagi na kuna,

<sup>39</sup> “Lubbè ka lâ ta balem, tapè kagiam mu sù ira kábulum mu yù pangikállâ ni Namaró nikaw,” kun na. Á kinuruk nayù tolay, á en na inistoriá sù ira ngámin nga kelián na yù kingnguá ni Apu Kesu megapu kuna. Á nattoli di Apu Kesu ta dammáng na bebay nga naggapuád da.

*Yù Pammapiá nayù Babay nga Naniggek kâ Apu Kesu ánná yù Pamaginnanole ni Apu Kesu sù Anâ ni Jeru*

*Mattiú 9:18-26; Markus 5:21-43*

<sup>40</sup> Á labbè di Apu Kesu ta dammáng, nagayáyâ yù ira tatolay nga magiddi-iddak kuna.

<sup>41</sup> Á minay yù tolay nga mangngágán ta Jeru. Aggina yù lakalákay nga kapatás ta kapilliá na Kudio. Á labbè na ta gián ni Apu Kesu, namalittúkak ta arubáng na, á inikomá na kuna ta umay lábbè ta bale ra,

<sup>42</sup> ta magisassay matay yù táttáddyay nga anâ na, nga babay nga mapulu duá yù dagun na. Á nepulù si Apu Kesu kuna.

Á pallakák da ta dálán, aru yù ira tatolay nga nepulupulù nira, á narassarassil ira sù ira tatolay.

<sup>43</sup> Á ajjan yù babay nga mapparága ta mapulu duá nga dagun, nga pinunu na ngámin nga kukuá na ta ipappágá na sù ira manguru, ngam awán ta nakoru kuna.

<sup>44</sup> Á jímikki yù babay ta likuk ni Apu Kesu, á siniggek na yù kiddanán na barawási na, á dagarágâ nattukkâ yù papparágâ na.

<sup>45</sup> Á kinagi ni Apu Kesu, “Asinni naniggek nikán?” kun na. Á yù ira tatolay, simibbák ira, nga kud da nga katággitáddyay, “Ari sikán,” kud da. Á kinagi ni Eduru kâ Apu, “Mesturu, marassarassil ittam gemma, á iyabbû mu paga?” kun na.

<sup>46</sup> Ngam kinagi ni Apu Kesu, “Wan á, ngam ammù ta ajjan yù naniggek nikán, ta natákál ku ta ajjan yù nammapiá megapu sù pakáwayyâ,” kun na.

<sup>47</sup> Á pakánnámmu nayù babay ta ari nelímak yù kingnguá na, minay nga mamippippik ta assing na, nga namalittúkak ta arubáng ni Apu Kesu. Á sù pakaginná nayù ira ngámin nga tatolay, kinagi nayù babay yù ipaniggek na kuna ánná yù pammapiá na nga naddagarágâ.

<sup>48</sup> Á kinagi ni Apu Kesu kuna, “Anâ ku, nammapiá ken megapu sù ángngikatalà mu nikán. Lubbè ka ta balem nga mabannáyánin,” kun na.

<sup>49</sup> Á sù arán na paga kabalínnga nagubobuk ni Apu Kesu sù kagian na, minay yù tolay nga naggapu sù bale ni Jeru, á kinagi na kâ Jeru, “Arám mu pattáláttanan yù Mesturu, ta natayin yù anâ mu,” kun na.

<sup>50</sup> Á pakaginná ni Apu Kesu ta natayin, kinagi na sù yáma na, “Ari ka lâ maburung sù kinagi na. Ikatalà mà lâ, á nammapiá sangaw,” kun na.

<sup>51</sup> Á labbè di Apu Kesu sù balay, arán na pinatallung yù ira tatolay, ngam di Eduru lâ, kári Kuan, kâ Ime, kári Jeru nga magatáwa, nga darakal nayù abbing.

<sup>52</sup> Á gikulukuletán yù ira ngámin nga naggián ta lawán megapu sù abbing. Ngam kinagi ni Apu Kesu nira, “Mattukkâ kayu nga makkulè, ta ari natay yù abbing! Nakkaturuk lâ!” kun na.

<sup>53</sup> Á inuyoyungád da, gapu ta ammu ra ta natayin yù abbing.

<sup>54</sup> Ngam sinangngalán ni Apu Kesu yù limá nayù abbing, á kinagi na kuna, “Abè, malukák ka!” kun na.

<sup>55</sup> Á nattoli sù abbing yù inángà na, á dagarágâ gimikkáng. Á kinagi na laguk ni Apu Kesu sù ira darakal na ta pakánañ da.

<sup>56</sup> Á napállâ yù ira darakal na. Ngam sinaddánán ni Apu Kesu ira ta arád da bulubugá kakágian.

## 9

*Yù Paddok ni Apu Kesu sù ira Mapulu Duá nga Sinudduán na*

*Mattiu 10:5-15; Markus 6:7-13*

<sup>1</sup> Á ta tádday ággaw, inagálán ni Apu Kesu yù ira mapulu duá nga sinudduán na, á iniddán na ira ta pakáwayyá ra nga mamapánaw sù ira nattaliponak ánnna mamammapiá sù ira makkakerumá nga tulágan.

<sup>2</sup> Á jinok na ira ta umay ira mangilayalayâ ta meyannung sù pammagure ni Namarò ánnna mamammapiá ira sù ira máttakì.

<sup>3</sup> Á kinagi na nira, “Á ta ánge naw, awán bulubugá ta ipulù naw, nga tagukuk naw, onu bungun naw, bálun naw, kuártu naw, onu pappatalián naw.

<sup>4</sup> Á maguray lâ yù labbetán naw nga babálay, nu ajian yù mamaddulò nikayu ta bale na, maggián kayu lâ tán áddè ta páno naw sù giád da.

<sup>5</sup> Á nu arád da kayu paddulotan, panawán naw yù giád da, á pápparán naw yù káppu sù takki naw, nga sinniál ta mappalán kayu nira ta aggíra lâ maguray nu manakì ira mesipà sù pammagure ni Namarò,” kun ni Apu Kesu nira.

<sup>6</sup> Kabalin na nanabarang nira, nánaw ira nga nakkakáttuay, á minay ira sù ira ngámin nga babálay nga mangilayalayâ sù napiá nga dámak ánnna mamammapiá sù ira máttakì.

*Yù Kakusukusu nayù Nonò ni Gubinador Erodo*

*Mattiu 14:1-12; Markus 6:14-29*

<sup>7</sup> Á si Gubinador Erodo yù mammaguray ta Galilia. Á narámak ni Erodo yù ngámin nga kingngikingnguá ri Apu Kesu. Á nokusukusu yù nonò na, ta maburuburung, ta ajian yù ira nakkagi ta si Apu Kesu si Kuan nga Minánnigú, nga naginnanolayin kanu.

<sup>8</sup> Á yù ira kárúán, kagiad da ta naginnanolayin si Elias, nga yù ngaw ábbilinán ni Namarò. Á ajian gapay yù ira nakkagi ta naginnanolayin yù ngaw ábbilinán ni Namarò nga tanakuán, nga ari si Elias.

<sup>9</sup> Ngam kinagi ni Erodo, “Si Kuan yù inipaputul ku ngaw! Ngam asinni yane tolay nga narámak ku yù aru nga akka-akkuán na?” kun na. Á yáyù mapattû nga makasingan kâ Apu Kesu.

*Pamakán ni Apu Kesu sù Límáribu nga Lálláki ánnna yù ira Kábulud da*

*Mattiu 14:13-21; Markus 6:30-44; Kuan 6:1-14*

<sup>10</sup> Á kabaliid da nangilayalayâ nayù ira mapulu duá nga sinudduán ni Apu Kesu, nanoli ira kuna, á inistoriá ra kuna yù ngámin nga kingngikingnguá ra. Á nánaw laguk si Apu Kesu nga nepulù lâ sù ira sinudduán na, á aggíra lâ nallilli nga minay ta kalállamatán nga nappágé te ili na Betseda.

<sup>11</sup> Ngam pakarámak nayù ira magaru sù páno ra, jimináddán ira. Á inikállâ na ira ni Apu Kesu, á inubobuk na nira yù meyannung sù pammagure ni Namarò, á pinammapiá na yù ira máttakì.

<sup>12</sup> Á ta púgágín, minay kâ Apu Kesu yù ira mapulu duá nga sinudduán na. Á kinagi ra kuna, “Papanáwam mu yù ira tatolay, tapé umay ira tán nga babálay nga magalek ta kanad da ánnna pagammátad da, ta nalappang nga lugár yaw,” kud da.

<sup>13</sup> Á kinagi ni Apu Kesu nira, “Sikayu yù mamakán nira.” Á kinagi ra kuna, “Ajian lillímá bullung lâ nga pán ánnna dudduruá lâ nga sirá nikami. Nu dobak kami, umay kami gumátáng ta ipamakám mi nira,” kud da.

<sup>14</sup> Á ajian tán mággé límáribu nga lálláki ánnna yù ira bábbay ánnna yù ira ábbing paga. Á kinagi ni Apu Kesu sù ira sinudduán na, “Pagitubangan naw ira ta ággilímápulu,” kun na.

15 Á sinuppál da, á nagitubang ira ngámin.

16 Á iná ni Apu Kesu yù límá bullung nga pán ánná duá nga sirá, á nattánguk ta lángì, nga makimállà ká Namarò ta pamindision na ta kanan. Á paggaddagadduá na sú pán ánná sirá, iniyawá na sú ira sinudduán na, ta isinisinek da sú ira tatolay.

17 Á kiminán ira ngámin, á nabattuk ira. Á yù ira sinudduán na, ed da inammung yù buná nayù ira nga kiminán, á pinnu ra yù mapulu duá nga lappi.

*Yù Kinagi ni Eduru nga Meyannung kâ Apu Kesu  
Mattiū 16:13-19; Markus 8:27-29*

18 Á táddyá nga ággaw, naguroray si Apu Kesu nga nakimállà. Á minay kuna yù ira sinudduán na. A iniyabbú ni Apu Kesu nira, “Anni yù kagian nayù ira tatolay? Asinningà kanu nga kud da?”

19 Á simibbák ira, á kinagi ra, “Kagiad da ta sikaw si Kuan nga Minánnigù nga naginanolayin, kanu. Á yù ira káruán, kagiad da ta sikaw yù táddyá sú ira ngaw ábbilán ni Namarò nga naginnanolayin, nepatalugáring kanu ta sikaw yù ngaw Elias,” kud da kuna.

20 Á kinagi na laguk nira, “Á sikayu? Anni yù kagian naw? Asinningà laguk?” kun na nira. Á simibbák si Eduru, á kinagi na, “Sikaw yù MakKiristu nga sinullà na ngaw ni Namarò ta mammaguray,” kun na.

21 Ngam pinappalán ni Apu Kesu ira ánnna sinaddánán na ira ta arád da kakágian sú ira tatolay.

22 Á kinagi na nira, “Sikán nga Kaká na ngámin na tatolay, máwák nga attamák ku sangaw yù aru nga mesimmu nikán. Á yù ira giriámán, yù ira kátannangán nga pári, ánná yù ira mesturu ta tunung, manakì ira nikán. Á ipapapáte rangà sangaw. Ngam paginnanolayan nangà ni Namarò sú mekatallu nga ággaw,” kun na.

*Yù Pamalappâ ni Apu Kesu sú Karigirigâ na ánná yù Pate na  
Mattiū 16:21-28; Markus 8:30-9:1*

23 Á kinagi na laguk ni Apu Kesu sú ira ngámin nga tatolay, “Nu ajjan yù tolay nga ikáyâ na tumuttul nikán, arán na laguk tuppálan yù ikáyâ na baggi na, ngam tuppálan na galâ ta kággaggaw yù ipakuâ kuna. Á mássiki nu umay kuna yù jígâ onu pate na, attamán na lâ megapu sú panguruk na nikán. Á tumuttul nikán laguk. Á ta kunnian mepárik nikán, gapu ta kunnian yù pangiyabága na ta kurù na ta kággaggaw, á tuttulan nangà.

24 Á yù tolay nga iddukan na yù áttole na sawe dabbuno, lonán na yù awayyá na nga mesipà kâ Namarò. Ngam yù tolay nga paguráyán na yù áaggián na ta dabbuno tapè tumuttul nikán, mássiki nu matay megapu sú ángnguruk na nikán, paginnanolayan ni Namarò, á mesipà kâ Namarò sú pammagurayán na ta áddè ta áddè.

25 “Á eggá panò yù pammakapián na tolay, nu ukkugan na yù ngámin nga napiá ta utun na dabbun, á matay nga mesinná kâ Namarò? Kengá lâ, ta awán ta serbi.

26 Á yù tolay nga mangipasirán nikán ánná manakì sú bilik ku, ipasírák ku gapay sangaw, sikán nga Kaká na ngámin na tatolay, nu manolingâ nga meparáyaw nga maddalingárâng nga mepulù sú áddalingárâng nayù Yámâ ánná yù áddalingárâng nayù ira mangilin nga daroban na.

27 Á kagiak ku nikayu ta ajjan ira saw nikayu nga ari matay lage ra masingan yù pamegapu nayù pammagure ni Namarò,” kun ni Apu Kesu.

*Yù Pakasingad di Eduru sú Dalingárâng ni Apu Kesu  
Mattiū 17:1-8; Markus 9:2-8*

28 Á pappásá na tangaliggúan sú pagubobuk ni Apu Kesu karannian, inipulù ni Apu Kesu di Eduru kári Kuan kâ Ime sú ánge na ta puddul tapé makimállâ tân.

29 Á pakimállà na, dagarágâ nabáli makatulang yù mammang na, á nappuraw nga naddalingárâng yù barawási na.

30 Á ikáddagâ lâ nappasingan di Moyses kâ Elias nga mepagubobuk kuna.

31 Á naddalingárâng ira gapay, á inubobuk da yù meyannung sú pate na sangaw ta Jerusalem, nga ipakuâ ni Namarò kuna.

32 Á di Eduru, nakatummà ira. Á ikáddagâ da lâ nalukák, á nasingad da di Apu Kesu nga maddalingárâng ánná yù ira duá nga lálláki nga mepanáddak kuna.

33 Á paddaggud da móanaw di Moyses kâ Elias, á iddâ na lâ ni Eduru nagubobuk, á kinagi na kâ Apu Kesu, “Apu, napiá ta ajjan ittam saw! Á ipappadde mi sikayu laguk ta ággítádde naw nga amíngán kári Moyses kâ Elias,” kun na.

<sup>34</sup> Á pagubobuk ni Eduru karannian, ikáddagâ nga natábbunán ira ta kunam, á nganássing ira.

<sup>35</sup> Á dagarágâ ajjan yù ngárál nga naggapu sù kunam, á kinagi na, “Yawe yù Anâ ku nga sinullà ku ta mammaguray ta ngámin nga dabbuno. Ginnán naw ta napiá yù kagian nal!” kun na.

<sup>36</sup> Á kabalín na nagubobuk, limimmà yù kunam, á nasingad da si Apu Kesu lâ nga nabattáng. Á nabayák nga arád da kakágian yù nasingad da sù ira tatolay.

*Yù Pamapáno ni Apu Kesu sù Nattaliponak sù Abbing nga Nabballidá*

*Mattiū 17:14-18; Markus 9:14-27*

<sup>37</sup> Á sù tádday ággaw, minutù di Apu Kesu nga naggapu ta puddul, á aru yù ira tatolay nga jiminápun nira.

<sup>38</sup> Á ikáddagâ nakkatol yù tádday nga tolay, á kinagi na kâ Apu Kesu, “Mesturu, ikállà kami bì, ta innam mu yawe anâ ku nga táttádday.

<sup>39</sup> Ta ajjan yù mattaliponak kuna. Á pattaliponak na kuna, pabbaliárán na. Á makkalli nga mabugubugá yù simù na. Á mabayák nga maggián yù anitu, nga mággé ari mánaw kuna ta áddè ta sinalamán na.

<sup>40</sup> Á nakimállakà sù ira sinudduám mu ta papanáwad da, ngam arád da nakuá,” kun na.

<sup>41</sup> Á kinagi na laguk ni Apu Kesu sù ira tatolay, “Innan nawè yawe ira tatolay nga awán bulubugá ta ángngikatalà da nikán! Anni yù ikataggâ nayù ulu naw! Nabayágakin nga naggián nikayu nga mangituddu. Kunnasi panò yù ággiyattam ku nikayu áddè ta arán nawà ikatalà?” kun na. Á kinagi na sù laláki, “Iyángem bì saw yù anâ mu,” kun na.

<sup>42</sup> Á pangituluk da kuna, initupâ nayù nattaliponak yù abbing, á pinabbaliák na. Ngam gimmá ni Apu Kesu yù nattaliponak, á pinapáno na. Á nammapiá yù abbing, á inipálâ ni Apu Kesu sù yáma na.

<sup>43</sup> Á yù ira ngámin nga nakasingan, napállâ ira sù pakáwayyá ni Namarò.

*Yù Pagubobuk ni Apu Kesu má ta Meyannung sù Pate na*

*Mattiū 17:22-23; Markus 9:30-32*

Á kapállâ nayù ira ngámin nga tatolay sù pakasingad da ta kingngikingnguá ni Apu Kesu, á kinagi ni Apu Kesu sù ira sinudduán na,

<sup>44</sup> “Ginnán naw ta napiá yaw nga kagiak ku nikayu, á patattaman naw ta nonò naw. Sangaw nu mabì lâ, gaputad dangà, sikán nga Kaká na ngámin na tatolay, á iyawâ dangà sù ira malussaw,” kun na.

<sup>45</sup> Ngam arád da nánnámmuán nayù ira sinudduán na yù kinagi na, gapu ta nelímak nira tapè arád da matákál yù kebalinán na, á nappasirán ira nga mangiyabbû ta meyannung sù kinagi na.

*Asinni yù Tolay nga Ibiláng ni Apu ta Kátannangán?*

*Mattiū 18:1-5; Markus 9:33-37*

<sup>46</sup> Á sangaw, namegapu nga nakkakápereperang ta ubobuk yù ira sinudduán ni Apu Kesu, ta meyannung ta asinni nira yù kátannangán.

<sup>47</sup> Á natákál ni Apu Kesu yù eggá ta nonò da, á yáyù nga inâ na laguk yù baddì nga abbing nga pinatáddak na sù taging na.

<sup>48</sup> Á kinagi na sù ira sinudduán na, “Nu iddukan naw yù tolay nga kunniauw nga abbing, megapu sù panguruk naw nikán, yáyù nga ángngipasingan naw gapay sù ángngiddù naw nikán áンna yù ángngiddù naw sù naddok nikán. Á yù tolay nga tumulù nikán nga kunnay sù abbing, aggina yù mebiláng ta kátannangán,” kun na.

*Yù ira Kákkipun ni Apu Kesu yù ira nga Ari Makikontará kuna*

*Markus 9:38-40*

<sup>49</sup> Á kinagi na laguk ni Kuan kâ Apu Kesu, “Apu, nasingam mi yù tolay nga mamapánaw sù ira nattaliponak, á abbúnán na yù ngágam mu, á kinagi na ta sikaw kanu yù paggaguán nayù pakáwayyá na. Á gimmá mi gapu ta arán na ittam kapulupulù,” kun na.

<sup>50</sup> Ngam kinagi ni Apu Kesu nira, “Arán naw gammán. Ta yù tolay nga ari makikontará nittam, aggina yù koput tam nga mangabbák nittam.”

*Yù Panaki nayù ira taga Samaria kári Apu Kesu*

<sup>51</sup> Á nu maddaggun makatunù yù ággo nayù kálâ ni Apu Kesu ta lángì, á pinataggâ na yù nonò na ta umay ta Jerusalem.

<sup>52</sup> Á pinapolu na yù ira binilin na ta umay ira ta babálay sù purubinsia na Samaria, tapè iparád da yù pagammátad da, ta yáyù pallakarád da nga umay ta Jerusalem.

<sup>53</sup> Ngam nabì lâ ira nattoli, ta manaki yù ira tatolay nga taga Samaria nga mamaddulò nira, gapu ta ammu ra ta umay ira ta Jerusalem, á arád da kurugan ta Jerusalem yù mepángngà nga ákkimorayán kâ Apu Namarò.

<sup>54</sup> Á di Ime kâ Kuan, nga sinudduán na, pakánnámmu ra sù nesimmu, kinagi ra kuna, "Apu, dobak kami ta kiddawam mi kâ Namarò yù api nga naggapu ta lángì nga umay manuggi nira," kud da.

<sup>55</sup> Ngam nilipe ni Apu Kesu ira nga gimmá.

<sup>56</sup> Á nattalebáí ira nga minay sù tanakuán nga babálay.

*Yù Pabbábáng nayù ira nga Tumuttul Nakuan kâ Apu Kesu  
Mattiu 8:19-22*

<sup>57</sup> Á pallakák da ta dálán, ajjan yù tolay nga nakkagi kâ Apu Kesu, "Apu, tumuttulà nikaw, mássiki nu sisaw angayám mu," kun na.

<sup>58</sup> Á kinagi ni Apu Kesu kuna, "Wan á, ngam nonotam mu yawe, ta yù ira simaron nga ayám, ajjan yù ájjimonád da. Á yù ira mammánú, ajjan yù ággapunád da. Ngam sikán nga Kaká na ngámin na tatolay, awán bulubugá ta labbeták ku," kun na.

<sup>59</sup> Á ajjan yù tádday nga tolay, á kinagi ni Apu Kesu kuna, "Tumuttul ka nikán." Ngam kinagi nayù tolay kuna, "Wan, Apu, ngam ari lábbi, ta mapolu bì nga itanam ku yù yámà pángé ku tumuttul nikaw," kun na.

<sup>60</sup> Á kinagi ni Apu Kesu kuna, "Yù ira ari tumuttul nikán, kunnay ira sù natayin. Aggira yù mangitanam sù ira kábulud da nga natay. Ngam sikaw, umay ka mangilayalayá ta meyannung sù pammagure ni Namarò," kun na.

<sup>61</sup> Á yù tádday nga tolay, kinagi na, "Apu, tumuttulà nikaw, ngam anugutam mu ta lubbeká bì ta bale mi, ta ek ku bì kagian nira," kun na.

<sup>62</sup> Á kinagi ni Apu Kesu kuna, "Yù tolay nga mamegapu nga mattarabáku sù ipakuá ni Namarò kuna, arán na nakuan nonotan yù tanakuán, marakè melingun na yù ipakuá ni Namarò kuna. Ta yù tolay nga mangilingun, ari makapasserbi sù pammagure ni Namarò," kun ni Apu Kesu.

## 10

*Yù Pabbilin ni Apu Kesu sù ira Pitupulu duá nga Tatolay*

<sup>1</sup> Á pappasá na yaw, piníli ni Apu Kesu yù pitupulu duá nga tatolay. Á jinok na ira nga ággiruá, ta mapolu ira nga umay mangituddu ta ngámin nga ili nga angayán na sangaw.

<sup>2</sup> Á kinagi na nira, "Aru yù ira tatolay nga tumuttul nikán nakuan nu ajjan yù umay mangapá nira. Á kunnay ira ta nalutu nga ammay nga magiddak ta kagaták na. Ngam nakúráng garè yù ira umay maggaták. Á yáyù makimállà kayu laguk kâ Apu Namarò nga makákkua ta ammay, ta doban na yù ira nga umay maggaták.

<sup>3</sup> E kayin laguk. Ngam mappalán kayu, ta dobat takayu nga kunnay ta kígaw na karneru nga nasippá nga umay sù ira tatolay nga kunnay ta simaron nga ayám nga nalulluk.

<sup>4</sup> Á ari kayu mangipulù ta bungun naw, onu kuártu, onu pappatalián naw nga sapátù. Umay kayu daretiu nga ari mattaláttán nga makiubobuk sù ira tatolay ta dálán.

<sup>5</sup> Á maguray yù balay nga paddulotán naw, yawe yù mapolu nga kagian naw nira. 'Parè bì ta iyawá ni Namarò yù kuruk nga ággimammá na nikayu saw balay,' kun naw nira.

<sup>6</sup> Á nu ajjan yù ira nga mangalawâ sù kagian naw, nabbalin ta napiá yù ággiad da. Ngam nu manaki ira, paguráyán naw lâ, ta awán ta serbi nayù kagian naw nira.

<sup>7</sup> Á nu ikáyâ da kayu alliugan, maggián kayu ta bale ra. Ari kayu magala-ali. Á kanan naw ánná inuman naw yù iyawá da nikayu. Ta kuruk nga mepángngà nu alawatan na tolay yù táddán na ta pattarabáku na.

<sup>8</sup> Á kunnian laguk yù akkuán naw ta ngámin nga ili nga labbetán naw. Nu ilágum da kayu, á kanan naw laguk yù iyawá da nikayu.

<sup>9</sup> Á pammapián naw yù ira máttaki. Á kagian naw nira, 'Ipakánnámmu mi nikayu yù dattál nayù pammagure ni Namarò, tapeì mesipà kayu kuna,' kun naw nira.

<sup>10</sup> "Ngam nu makalabbè kayu sù ili nga ajjan yù ira tatolay nga manaki mamaddulò nikayu, paguráyán naw lâ. Mallakalakák kayu lâ sù ira kalsáda, á kagian naw sù ira tatolay,

<sup>11</sup> 'Pápparám mi yù káppu ta takki mi, nga sinniál ta minay kamingin nga mangipakánnámmu sù dattál nayù pammagure ni Namarò, ta apatam mí kayu nakuan nga umay mesipà sù pammagure ná, ngam manaki kayu,' kun naw nira.

<sup>12</sup> Á kagiak ku nikayu ta sangaw nu duttál yù pangukum ni Namarò sù ira tatolay ta dabbuno, nerallà yù ámmagikáru na sù ira tatolay nga manaki nikayu támé lugár ánné sù

ámmagikáru na sù ira taga Sodoma, nga natay ngaw sù katuggi nayù ili ra megapu sù liwâda!" kun ni Apu Kesu nira.

*Yù Meyannung sù ira Ari Manguruk kâ Apu Kesu  
Mattiū 11:20-24*

<sup>13</sup> Á kinagi ni Apu Kesu paga yù daddam na sù ira Kudio nga nánawán na megapu sù panakì da kuna. "Bay e! Sikayu nga taga Korasin ánnna taga Betseda, kábbi kayu gapu ta narámmà yù pamagikáru ni Namarò nikayu. Ta mássiki aru yù makapállâ nga kingnguâ sù lugári naw, ngam ari kayu manguruk. Makállállà kayu ánnne sù ira ngaw taga Tiro ánnna taga Sidon nga ari Kudio. Tanu kingnguâ nakuan yù makapállâ sù ira ili na Tiro ánnna Sidon, inalistuád da ngaw nakuan nga pinatalián yù barawási ra ta bayon, á nagitubang ira nakuan nga payyád da ta abu yù baggi ra, tapè ipasingad da yù daddam da ánnna pabbabáwi ra ta liwâ da.

<sup>14</sup> Á sangaw nu duttái yù pangukum ni Namarò sù ngámin ira nga tatolay, aláppaw yù pamagikáru na sù ira taga Tiro ánnna taga Sidon ánnne sù pamagikáru na sù ira taga Korasin ánnna taga Betseda.

<sup>15</sup> "Á sikayu gapay nga taga Kapernium nga mappeddaráyaw! Kagian naw ta mepotun kayu ta lángi nga meparáyaw. Ngam ari gemma! Ta gapu ta ari kayu mabbabáwi ta liwâ naw, mepettung kayu laguk sù impiernu," kun na.

<sup>16</sup> Á nagubobuk si Apu Kesu sù ira makituddu kuna, nga piníli na ta umay ira mangi-layalayâ, á kinagi na nira, "Yù ira tatolay nga magginná sù kagian naw, sikán gapay yù kurugad da, gapu ta sikán yù nabbilin nikayu. Ngam yù ira nga manaki nikayu, á panakitád dangà gapay. Á nu manaki ira nikán, panakitád da gapay si Namarò nga naddok nikán," kun na.

*Yù Panoli nayù ira Pitupulu duá nga Sinullà ni Apu*

<sup>17</sup> Á ta kabálid da nangilayalayâ nayù ira pitupulu duá nga jinok ni Apu Kesu sù ira ngámin nga ilí ánnna babálay, ayatán ira nga nanoli kâ Apu. Á kinagi ra kuna, "Apu, nasikan yù pakáwayyá mi nga iniyawâ mu nikami, ta mássiki yù ira nattaliponak, kinuruk da yù kinagi mi nira ta pamapáno mi nira megapu sù pannakabaggim," kud da.

<sup>18</sup> Á kinagi ni Apu Kesu nira, "Wan á, ta náppù si Satanas, á nasingak ku yù kepanná na nga naggapu ta lángi nga kunnay sù kilâ.

<sup>19</sup> Á iniyawâ ku nikayu yù pakáwayyá naw, tapè awán ta mesimmu nikayu, mássiki nu iguppè naw yù iráw onu asisípi. Á appútan naw yù pakáwayyá ni Satanas nga malussaw nikayu, á awán bulubugá ta manganni nikayu.

<sup>20</sup> Ngam arán naw laguk ipagayáyâ yù pakáwayyá naw nga mamapánaw sù ira nattaliponak. Ngam ipagayáyâ naw galâ yù kelistá nayù ira ngágan naw kâ Namarò ta lángi, gapu ta mepattolay kayu kâ Namarò ta áddè ta áddè."

*Yù Pagayáyâ ni Apu Kesu  
Mattiū 11:25-27; 13:16-17*

<sup>21</sup> Á kabalin na nagubobuk ni Apu Kesu nira, á pinagayáyâ na si Apu Kesu nayù Mangilin nga Ikararuá. Á nakimállà kâ Namarò, á kinagi na, "Ammò ku, sikaw yù Yápu ta lángi ánnna dabbuno. Á dayáwat taka, ta inipakánnámmum yù bilim mu nga meyannung sù pammagurem sù ira matulù nga mangikatalà nikaw nga kunnay sù ira ábbing. Ngam inilímak mu sù ira masírik ánnna yù ira naggigiámmu. Wan, Ammò, ta yáyù ikáyâ mu nga akkuán," kun na.

<sup>22</sup> Á kinagi ni Apu Kesu sù ira tatolay, "Inikatalà na nikán nayù Yámà yù pakáwayyâ sù ngámin nga eggá. Á awán ta makánnámmu nu asinningà, nu ari lâ si Ammò Namarò. Á awán gapay ta makánnámmu nu asinni yù Yámà, nu ari lâ sikán nga Anâ na ánnna aggira ngámin nga pangipakánnámmuák ku," kun ni Apu Kesu.

<sup>23</sup> Kabalin ni Apu Kesu nagubobuk sù ira tatolay, nallillì di Apu ánnna yù ira sinudduán na, á kinagi na lâ nira, "Nepalla yù pangikállà ni Namarò nikayu, ta masingan naw yù akka-akkuák ku ánnna maginná naw yù kagiak ku.

<sup>24</sup> Á kagiak ku nikayu ta aru yù ira ngaw ábbilinán ni Namarò ánnna yù ira ngaw papatul, nga kinaragatád da nga masingan yù masingan naw kunangane, ngam arád da nasingan. Á iniddanamád da nga maginná yù maginná naw kunangane, ngam arád da naginná," kun ni Apu Kesu.

*Yù Napiá nga Kingnguá nayù Tolay nga Taga Samaria*

<sup>25</sup> Á ajjan yù tolay nga mesturu sù tunung ni Moyses, á en na pinarubán nga ilogò si Apu Kesu. Á iniyabbû na kâ Apu, “Mesturu, anni yù mawák ku nga akkuán, tapè málâ ku yù inángâ nga awán ta áddè na?” kun na.

<sup>26</sup> Á kinagi ni Apu Kesu kuna, “Anni yù netúrâ sù tunung ni Moyses? Anni yù kánnámmuám mu ta pabbibbik mu kuna?”

<sup>27</sup> Á simibbák yù tolay, á kinagi na, “Mawák nga napasigaggâ yù ángngiddù tam kâ Apu Namarò, tapè metáddy yù nonò tam ta nonò na. Á akkuát tam yù napiá nga ipakuá na nittam. Á iddukat tam gapay yù ira kábulut tam ta kunnay sù ángngiddù tam ta baggi tam,” kun na.

<sup>28</sup> Á kinagi ni Apu Kesu kuna, “Wan, kustu yù kinagim. Nu kurugam mu yian, mepattolay kâ Namarò ta áddè ta áddè,” kun na.

<sup>29</sup> Á pakaginná nayù tolay sù kinagi ni Apu Kesu, ikáyâ na nga ipasingan ta matunung yù akka-akkuán na, tapè ari mepasiránán. Á yáyù nga iniyabbû na kâ Apu Kesu, “Asinni yù ira kábuluk ku nga iddukak ku nakanu?” kun na.

<sup>30</sup> Á simibbák si Apu Kesu nga nagángngarigán, á kinagi na, “Ajjan yù tolay nga kagittá tam nga Kudio nga taga Jerusalem, nga minutù ta umay ta ili na Jeriku. Á pallakák na ta dálan, sinanabán nayù ira minákkokò. Á inâ da ngámin yù barawási na ánnna kukuá na, á sinalamád da. Á nánavád da nga magisassay matayin.

<sup>31</sup> Á manganánuán, ajjan gapay yù pári nga nallakák tán nga dálan. Á pakasingan na sù tolay, nallillí, á sinalebarána.

<sup>32</sup> Á pappasá na yaw, ajjan má yù tádday nga tolay, nga minay tán. Aggina yù ginaká ni Libi, nga nasserbi sù mangilin nga kapilliá ta Jerusalem. Á pakasingan na sù tolay nga kingnúra, nattalebák gapay ta kunnay sù pári.

<sup>33</sup> Á minay gapay yù tolay nga taga Samaria, nga ikalusso nayù ira Kudio nga taga Jerusalem. Á pakasingan na sù tolay, nerallà yù allâ na kuna.

<sup>34</sup> Á jimikkì kuna, á inuru na ta denu ánnna binaráyáng yù bigibigák na, á binabbak na. Á pinakkabáyu na sù ayám na, á inituluk na sù ággammátán na tolay nga mattalebák, á sinaronán na ta gabi.

<sup>35</sup> Á ta ággawin, iniyawâ nayù taga Samaria sù makákkua ta ággammátán yù kuártu, á kinagi na kuna, ‘Taronám mu, á nu makúráng yù kuártu nga iniyawâ ku, pagák ku sangaw nu manolingâ,’ kun na.”

<sup>36</sup> Á ta kabalin ni Apu Kesu nagángngarigán, kinagi na sù tolay, “Á asinni ta urem sù tallu ira yù kuruk ngababulun nayù tolay nga sinalamád da?” kun na.

<sup>37</sup> “Á yù tolay nga nangikállâ kuna,” kun nayù tolay nga masírik. Á kinagi ni Apu Kesu kuna, “Wan, á napiá nu kunniû gapay yù akkuám mu,” kun na.

### *Yù Pakiálliuk ni Apu Kesu kári Marta kâ Maria*

<sup>38</sup> Á nánav di Apu Kesu ánnna yù ira sinudduán na. Á nakáddè ira sù tádday nga babálay. Á ajjan tán yù babay nga mangngágán ta Marta, á pinaddulò na ira ta bale na.

<sup>39</sup> Á ajjan gapay yù urián na nga mangngágán ta Maria. Á nepaggitubang si Maria kâ Apu Kesu, tapè ginnán na yù ituddu na.

<sup>40</sup> Ngam si Marta, arán na matángngák yù ituddu ni Apu Kesu gapu ta aru yù paránan na. Á mabagal sù ikalángan na, á en na kinagi kâ Apu, “Apu, ikállâ mà bì, ta innam mu yù wagí, ta pinaguráyán nangâ. Á ajjanà lá nga masserbi. Kagiam mu bì kuna ta abbágán nangâ bì!” kun na.

<sup>41</sup> Á kinagi ni Apu Kesu kuna, “Ey, Marta! Anni má ta mabagabagal ka? Anni yù ikaburung mu?

<sup>42</sup> Ta piníli ni Maria yù kapiánán, nga ari mepugik kuna,” kun ni Apu.

## 11

### *Yù Meyannung sù Ákkimállâ tam Mattiu 6:9-13, 7:7-11*

<sup>1</sup> Á tádday ággaw nakimállâ si Apu Kesu mángin. Kabalin na nakimállâ, jimikkì kuna yù tádday nga sinudduán na, á kinagi na kuna, “Apu, ituddum bì níkami gapay yù ákkimállâ mi ta kunnay ta pangituddu ni Kuan sù ira makituddu kuna.”

<sup>2</sup> Á kinagi ni Apu Kesu nira, “Nu makimállâ kayu, kunniaw yù kagian naw: ‘Ammò, parè lá ta sikaw yù meparáyaw sù ira ngámin nga tatolay. Á parè lá ta mabì nga duttlá yù pammagurem ta dabbuno.

<sup>3</sup> Á iyawâ mu nikami yù kanam mi ta kággâggaw.

<sup>4</sup> Á pakomák kami ta liwâ mi,  
ta pakomá mi gapay yù liwâ da nikami nayù ira ngámin nga ikáttole mi.

Á ililli kami lâ sù mamalliwâ nikami.’”

<sup>5</sup> Á kinagi ni Apu Kesu gapay nira, “Á ta ángngarigán nu ajjan yù tádday nikayu nga umay ta bale nayù kopun na ta tangngá na gabi, á kagian na kuna, ‘Kopun, iddám mà bì ta ipamakák ku ta álliuk ku.

<sup>6</sup> Ta ajjan yù kopuk ku nga kalalabbè na lâ ta balè, á awán bulubugá ta ipamakák ku kuna!”

<sup>7</sup> Á ta ángngarigán nu itabbák nayù kopun na, nga kun na, ‘Arák kami bì sikkágan, ta nelitukin yù puertá, á nakkaturugin yù ira ánâ ku, á molangà gumikkáng nga mangiyawâ nikaw,’ kun na nakuan.

<sup>8</sup> Á kagiak ku nikayu ta mássiki nu napiá yù ákkopud da, manakì nga gumikkáng nga mangiyawâ. Ngam mapuersá sangaw nga gumikkáng nga mangiyawâ sù ngámin nga awágan na, gapu ta ari mattukkâ nga makkiddaw kuna.

<sup>9</sup> “Á kunnian gapay Nakuan nikayu sù pakimállâ naw kâ Apu. Ari kayu mappasirán nga makimi-imállâ kâ Namarò. Taddánát takayu ta kiddawan naw lâ kiddawan kuna yù awágan naw, tapè iyawâ na nikayu. Á magala-alek kayu, tapè málek naw, ánnna makkatakatol kayu, tapè patallungan na kayu.

<sup>10</sup> Ta yù ira ngámin nga makimállâ kâ Apu, iddán na ira. Á yù ira ngámin nga magalek, málek da. Á patallungan ni Apu yù ira ngámin nga makkatol kuna.

<sup>11</sup> “Á sikayu nga eggá anâ na, ta ángngarigán nu makkiddaw yù abbing ta sirá, iddán naw panò ta iráwí? Ari gemma!

<sup>12</sup> Á nu makkiddaw ta illuk, iddán naw panò ta asisípi? Ari gemma!

<sup>13</sup> Á sikayu, mássiki nu narákè kayu, ammu naw mangiyawâ ta napiá sù ira ánâ naw. Á nepatalugáring kâ Yáma tam ta lángi, ta awán ta kárík piá nayù ángngiddù na nittam, á iyawâ na yù Mangilin nga Ikararuá na sù ira ngámin nga makkiddaw kuna.”

*Yù Meyannung kâ Apu Kesu ánnâ yù Meyannung kâ Satanas*

*Mattiú 12:22-30; Markus 3:20-27*

<sup>14</sup> Á ajjan yù tolay nga umal megapu sù nattaliponak. Á pinapáno ni Apu Kesu yù anitu nga nagumal sù tolay. Á páno nayù anitu, nagubobuk yù ngaw nagumal, á nepallâ yù kapállâ nayù ira tatolay.

<sup>15</sup> Ngam yù ira kárúán nga tatolay, kinagi ra, “Papanáwan na yù ira nattaliponak megapu sù pakáwayyâ ni Satanas, nga abbúnat tam ta Belsebul, nga kátannangán nayù ira anitu,” kud da.

<sup>16</sup> Á yù ira kárúán nga tatolay, ari ira nanguruk sù pakáwayyâ ni Apu Kesu, á yáyù nga inikomára kuna ta akkuán na paga yù makapállâ, tapè masingad da.

<sup>17</sup> Ngam ammu ni Apu Kesu yù eggá ta nonò da. Á kinagi na nira, “Á ta ángngarigán nu ajjan yù tangapáppatulán, nga maddaráma yù ira tatolay, á makkakátlamán ira sangaw. Onu ajjan yù tangapamiliá, nga maddaráma yù ira mawwawági ánnna yù ira darakal da, á ari iren mattatáddy, ta makkakátlamán ira gapay.

<sup>18</sup> Á yáyù nga ammu tam ta ari máyâ nu papanáwan ni Satanas yù ira anitu nga masserbi kuna, ta nu kunnian yù akkuán na nakuan, makkakákontará ira, á makkakátlamán ira gapay sangaw. Ngam kagian naw ta papanáwak ku yù ira nattaliponak megapu sù pakáwayyâ ni Satanas. Kuruk panò? Ari gemma kuruk.

<sup>19</sup> “Á ta ángngarigán nu si Satanas Nakuan yù mangiyawâ nikán sù pakáwayyâ sù ira anitu, á asinni laguk panò yù mangiyawâ sù ira kábulun naw ta pakáwayyâ ra nga mamapánaw sù ira nattaliponak? Ari panò si Namarò galâ yù mangiyawâ nira? Wan, kuruk nga si Namarò yù paggupuán nayù pakáwayyâ ra, á yáyù nga aggira yù mamanunnù nikayu, nga mangipakánnammu ta ari kustu yù kagian naw nga meyannung nikán.

<sup>20</sup> Ta kuruk nga si Namarò gapay yù paggupuán nayù pakáwayyâ nga mamapánaw sù ira nattaliponak. Á yáyù panákkilalán naw ta ajjanin nikayu yù pammagure ni Namarò.”

<sup>21</sup> Á nagángngarigán si Apu Kesu, tapè ipakánnámmu na ta masikan yù pakáwayyâ ni Namarò ánné kâ Satanas. Kinagi na nira, “Masikan si Satanas nga kunnay ta tolay nga naparán yù ira ármas na, nga magguárdiá sù bale na, tapè awán ta makatallung nga maggubâ ta kukuá na.

<sup>22</sup> Ngam nu ajjan yù masikan ánné kuna nga umay mangnuá kuna, appútan na ánnna gubatan na yù ármas na nga ikatalà na ta ángngiyígù na ta baggi na. Á gubatan na gapay yù ngámin nga kukuá na, nga balláyan na sù ira kábulun na.”

<sup>23</sup> Á kinagi ni Apu Kesu paga, “Ngámin yù ira tatolay nga ari metáddyay nikán, aggira yù makikontará nikán. Á yù ira tatolay nga ari mangabbák nikán ta pagágál ku sù ira umay metáddyay nikán, aggira yù mamawarawarawá sù ira umay nakuan nikán.”

*Yù Panoli nayù Anitu sù ngaw Nagunagán  
Mattiu 12:43-45*

<sup>24</sup> Á nagubobuk paga si Apu Kesu nga kinagi na nira, “Á yù anitu, ta páno na sù nagunagán na, umay ta namagá nga lugár nga magalek ta pagibannagán na. Á gapu ta arán na málek yù paggianán na tám, nonotan na ta mattoli sù nánawán na.

<sup>25</sup> Á mattoli laguk, á masingan na yù tolay nga nammapiá ngin ta kun na balay nga napakarenuánin, nga awán ta maggián kuna.

<sup>26</sup> Á umay laguk yù anitu nga magágál ta pitu nga kábulun na nga anitu nga narákè ánné kuna, tapè mepaggián ira kuna. Á mattoli ira nga maggián sù tolay, á mappanà laguk yù ággián nayù tolay.”

*Yù Kuruk nga Ággayáyâ tam*

<sup>27</sup> Á ta pagubobuk ni Apu Kesu sù ira magaru nga tatolay, ajian yù babay nga iniyássikan na yù ággubobuk na, á kinagi na, “Magayáyâ yù babay nga nangiyánâ nikaw, nga namasusu nikaw!” kun na.

<sup>28</sup> Ngam simibbák si Apu Kesu, á kinagi na, “Más magayáyâ paga yù tolay nga magginná sù bilin ni Namarò áんな manguruk sù taddán na!”

*Gustu ra Masingan yù Pamagaddátu ni Apu Kesu  
Mattiu 12:38-42; Markus 8:12*

<sup>29</sup> Á nalannapán yù ira magaru nga nagarimummung kâ Apu Kesu. Á kinagi na nira laguk, “Narákè yù ira tatolay ta ággawo, ta yá lâ gustu ra innan yù makapállâ nga panákkilalád da, ta lage ra manguruk ta si Namarò yù maddok nikán. Ngam awán ta ipasingak ku nikayu nga panákkilalán naw, nu ari lâ yù kunnay sù makapállâ nga inipasingan na ngaw ni Jona, nga yù ngaw ábbilinán ni Namarò túrin ta Ninaba.

<sup>30</sup> Ta yù nesimmu ngaw kâ Jona, yáyù yù panákkilalán nayù ira taga Ninaba ta si Namarò yù naddok kuna. Á kunníú gapay nikán, sikán nga Kaká na ngámin na tatolay. Ta ajian sangaw yù mesimmu nikán, nga panákkilalán nayù ira tatolay ta ággawo.

<sup>31</sup> “Á nu duttál yù ággaw nga pamanunnù ni Namarò sù ira ngámin nga tatolay, gumikkáng yù ngaw rena nga nammaguray ta Seba, á massistígu ta kuruk nga liwâ naw. Ta minay yù rena nga naggapu ta arayyu nga páppatulán tapè ginnán na yù aru nga napiá nga inituddu nayù ngaw Patul Solomon. Á yáyù nga awayyá nayù ngaw rena nga mangikeká nikayu, ta manaki kayu magginná, mássiki nu ajian ta arubáng naw kunangane yù makáwayyá ánné kâ Patul Solomon.

<sup>32</sup> “Á yù ira ngaw taga Ninaba gapay, gumikkáng ira sù ággaw nga pamanunnù ni Namarò ta tolay, á massistígu ira ta kuruk nga liwâ naw. Ta nabbabáwi ira ngaw ta liwâ da ta pakaginná ra sù bilin ni Namarò nga imilayalayâ na ngaw nira ni Jona. Á yáyù awayyá ra nga mangikeká nikayu, ta mássiki nu ajianin nikayu kunangane yù makáwayyá ánné kâ Jona, ngam manakì kayu manguruk kuna.”

*Yù Meyárik ta Isingan  
Mattiu 5:15; 6:22-23*

<sup>33</sup> Á kinagi ni Apu Kesu paga, “Á ta ángngarigán, nu paggatangan na tolay yù isingan, arán na gemma ituttu onu kallabán ta palanggána. Ngam ipe na sù ággianán na ta utun, tapè manawagán yù ira ngámin nga tullung ta balay.

<sup>34</sup> Á yù keyarigán nayù matá na tolay yù isingan, nga paggappuán na nawák, tapè makasingan. Á ta ángngarigán nu napiá yù matá na, napiá gapay yù ánnigan na. Ngam nu jikkù yù matá na, á buling nga maggián ta kallà. Á ta kunnian gapay sù ángnguruk na kâ Namarò. Nu napiá yù ángnguruk na, manawagán yù nonò na megapu sù bilin ni Namarò, á kánnámmuán na yù napiá, á napiá gapay yù akka-akkuán na.

<sup>35</sup> “Mappalán kayu laguk, maraké kun na kallà yù nonò naw!

<sup>36</sup> Nu napiá yù ángnguruk naw kâ Namarò, kuruk nga manawagán kayu nga awán bulubugá ta kallà ta nonò naw. Á kunnay ta manawagán na kayin nayù isingan.”

*Yù Pamappalán ni Apu Kesu sù ira Parisio áんな yù ira Mangituddu sù Tunung ni Moyses  
Mattiu 23:1-36; Markus 12:38-40; Lukas 20:45-47*

<sup>37</sup> Á kabalin na nagubobuk ni Apu Kesu, ajian yù tádday nga Parisio nga nangapà kuna ta umay kumán ta bale ra. Á minay laguk nepallállang nira.

<sup>38</sup> Ngam nakaddák yù Parisio áンna napállâ, ta arán na sinuppál ni Apu Kesu yù kustombare na Kudio nga mabbaggaw lage ra kumán.

<sup>39</sup> Á kinagi ni Apu Kesu kuna, "Sikayu nga Parisio, mabbaggaw kayu ta passuelu áンna tariaw, tape malínis yù masingan. Ngam arán naw pakarenuán yù eggá ta nonò naw nga ari masingan, ta mangilogò kayu áンna narákè yù akka-akkuán naw.

<sup>40</sup> Maguyung kayu! Awán ta awayyá naw nga ilímak kâ Namarò yù eggá ta nonò naw. Ta aggina lá yù namarò sù masingan áンna ari masingan. Pidde na kayu áンna yù nonò naw, á ammu na gemma yù pinatattam naw ta nonò naw.

<sup>41</sup> "Pakarenuán naw laguk yù nonò naw nga ari masingan, tapè ammu naw mangikállà sù ira kábulun naw. Ta nu napiá yù eggá ta nonò naw nga ari mepasingan, á napiá gemma gapay yù mepasingan nga akka-akkuán naw sù ira kábulun naw.

<sup>42</sup> "Magimuguk kayu, sikayu nga Parisio, ta mapanunnután kayu! Ta másiki nu matnung kayu sú ángngiballe naw kâ Namarò sùmekamapulu sú ngámin nga makkakerumá nga kiruk nga atang, ngam mangilogò kayu sù ira kábulun naw áンna arán naw iddukan si Namarò. Mawák nakuán nga tángngagan naw yù iddu naw kâ Namarò áンna iddukan naw gapay yù ira kábulun naw. Á uputan naw gapay nga iballay kâ Namarò yù mekamapulu.

<sup>43</sup> "Magimuguk kayu, sikayu nga Parisio! Ta paggagammung naw sù kapilliá, karagatán naw yù magitubang sù kapiánán nga ággitubangán nayù maráyaw áンna yù pakialimánu nayù ira tatolay ta pappassiár naw ta dápun.

<sup>44</sup> "Magimuguk kayu, sikayu nga Parisio! Sikayu yù kunnay ta tanam nga ari namárkán, nga iguppuguppé nayù ira tatolay gapu ta arád da ammu ta ajjan." Yáyù kinagi ni Apu Kesu sù ira Kudio nga Parisio, ta nu iguppé da yù tanam, mebiláng ira ta marapingán, nga ari mepaggagammung sù ira kábulud da nga maddáyaw kâ Namarò. Á yáyù keyarigád da gapu ta agippiáira. Á mekanakanâ nira yù ira káruán nga tatolay gapu ta arád da ammu ta narákè yù nonò da.

<sup>45</sup> Á simbbák yù táddyá nga mangituddu sù tunung ni Moyses, á kinagi na kâ Apu Kesu, "Mesturu, mekanakanâ kami nga mepasiránán sù kinagim sù ira Parisio!" kun na.

<sup>46</sup> Á kinagi ni Apu Kesu kuna, "Sikayu nga mesturu sù tunung ni Moyses, magimuguk kayu gapay, ta mapanunnután kayu sangaw gapay. Sikayu yù kun na maddok sù ira mangáttu ta narámmâ, nga arán na ira bulubugá abbágán. Jigirigátan naw yù ira tatolay, ta ipatuppál naw nira yù tunung nga lannapán naw, á arád da matuppál.

<sup>47</sup> "Magimuguk kayu! Ta pakkástán naw yù ira tanam nayù ngaw ira ábbilinán ni Namarò, nga pinapáte nayù ira ngaw naggaká nikayu.

<sup>48</sup> Á sikayu, negittá yù nonò naw ta nonò nayù ira ngaw naggaká nikayu áンna anugutan naw yù kingnguá ra sù ira ngaw ábbilinán. Ta ari kayu manguruk sù bilin ni Namarò nga initúrâ nayù ira ngaw ábbilinán. Áppé pípiá kayu nga maddáyaw sù ira námmatay megapu ta pamakkástá naw sù tanam da. Á nu doban na má ni Namarò yù ira káruán na ábbilinán na, á sikayu nga kunnay sù ira ngaw naggaká nikayu, sikayu yù mamapáyat nira.

<sup>49</sup> Á yáyù nga nappasingan ta kuruk yù kinagi ni Namarò ngaw nga nabayágín. Kinagi na, "Dobak ku ta umay nira yù ira ábbilinák ku, á papatáyat da yù ira káruán, á jigirigátad da yù ira káruán," kun na.

<sup>50</sup> Á sikayu laguk yù pabbabálatán ni Namarò sù pamapáte ra ngaw sù ira ngámin nga ábbilinán na ta áddè ngaw o-olu nga napapáyat ta áddè kunangan.

<sup>51</sup> Si Abel nga anâ ni Adan yù ngaw o-olu nga natay megapu sù panguruk na kâ Apu Namarò, á aggira ngámin nga ábbilinán nga siminubbâ kuna ta áddè kâ Sakariâ nga naporián, nga pinapáte ra ta námmuák nayù mangilin nga kapilliá ta taging nayù pangiyátagáng Wan, á kagiak ku nikayu ta sikayu nga matolay kunangan yù pabbabálatán ni Namarò megapu ta pate nayù ngaw ira ngámin nga ábbilinán na.

<sup>52</sup> "Magimuguk kayu, sikayu nga mangituddu sù tunung ni Moyses! Kunnay ta inituttù naw yù ánnúsi nga mabbukâ ta pakánnámumu na tolay sù kuruk nga bilin ni Namarò nga meyannung ta ángngiyígù na ta tolay. Mapanunnután kayu, gapu ta manakí kayu manguruk, á ipugik naw gapay yù panguruk nayù ira tatolay nga umay nakuan kâ Namarò," kun na.

<sup>53</sup> Á ta páno di Apu Kesu tán nga balay, nakujjá yù mammang nayù ira Parisio áンna yù ira mesturu sù tunung ni Moyses, megapu sù kinagi ni Apu Kesu nira. Á ninonò da yù aru nga makkakerumá nga iyabbû da kuna,

<sup>54</sup> tapè makagi na nakuán yù ipamaliwâ da kuna.

## 12

*Mappalán kayu sù Ituddu nayù ira Parisio  
Mattiū 10:26-27*

<sup>1</sup> Á yù ira jinibu nga tatolay nga maddarassil ánná makkakáguppé, nagarimummungád da di Apu Kesu. Á nagubobuk si Apu Kesu sù ira sinudduán na, á kinagi na nira, “Mappalán kayu sù ituddu nayù ira Parisio nga ari kuruk, tapè arád da kayu ilogò. Ta agippípiá ira, á kunnay ta áppalappák ta pán yù narékè nga ituddu ra nga malogon massamá.

<sup>2</sup> Á kagiad da ta awán ta makánnámmu sù akka-akkuád da. Ngam mepakánnámmu sangaw, ta duttál sangaw yù ággo na nga mepalappá yù ngámin nga nelimak kunangan.

<sup>3</sup> Á yù ubobugan naw ta gabi sù lágum na balay, mepalappâ sangaw ta lawán ta tangngá na ággaw. Á yù iyanasâ naw ta unak na balay nga nelitù, yáyù melayalayâ ta ággaw sù tangngá na ili.

*Yù Kuruk nga Ikássing tam  
Mattiū 10:28-31*

<sup>4</sup> “Á yawe yù kagiak ku nikayu nga kákkopuk ku, arán naw ikássing yù ira tatolay nga mamapátay ta baggi naw, á ta kabalin na, awán ta awayyá ren nga manganni nikayu.

<sup>5</sup> Ngam kagiak ku yù ikássing naw! Maganássing kayu laguk kâ Namarò, ta ari lâ nga makáwayyá nga mamapátay ta baggi na tolay, nu ari gapay makáwayyá nga mangipettung ta impiernu. Á yáyù nga pappalánat takayu ta si Namarò laguk yù ikássing naw!

<sup>6</sup> “Ngam si Namarò gapay yù mangiddù, á nepallà yù allà ni Namarò nikayu. Á mássiki yù ira límá nga ballì, nga iláku ra ta dápun ta duá sintábu, arán na ira máttamán ni Namarò, nga taggitáddy.

<sup>7</sup> Á ammu na ngámin yù meyannung nikayu, mássiki yù biláng na duddù naw. Á yáyù nga ari kayu laguk maganássing, ta nepallà yù ángngiddù ni Namarò nikayu nga katággítáddy anné sù kitáru nga ballì.

*Kengá lâ yù Ákkiyápu tam kâ Apu Kesu nu Mappasirán ittam nga Makkagi ta Ketádde tam kuna*

*Mattiū 10:32-33; 12:32; 10:19-20*

<sup>8</sup> Á kagiak ku nikayu, nu ari kayu mappasirán nga makkagi sù ira kábulen naw ta sikán yù Yápu naw, mássiki nu uyoyungád da kayu megapu sù panguruk naw nikán nga Kaká na ngámin na tatolay, á sikayu gapay yù tákkilalák ku ta arubáng nayù ira daroban ni Namarò ta lángì.

<sup>9</sup> Ngam nu makkagi kayu ta arubáng nayù ira kábulen naw ta arán nawà tuttulan, á panakítát takayu gapay ta arubáng nayù ira daroban ni Namarò ta lángì.

<sup>10</sup> Á yù tolay nga makkakagi nikán, á nu mabbabáwi ánná makipakomá, á pakomán ni Namarò. Ngam yù tolay nga makkakagi sù Mangilin nga Ikararuá ni Namarò, ari bulubugá mapakomá ta áddé ta áddé.

<sup>11</sup> Á nu aijan yù mangiyángay nikayu sù ira kátannangán naw ta kapilliá onu sù ira makáwayyá, tapè ikeká ra kayu ta arubáng da megapu ta panguruk naw nikán, ari kayu mabburung nu kunnansu yù itabbák naw nira.

<sup>12</sup> Ta pamestigá ra nikayu, á yù Mangilin nga Ikararuá yù mangipakánnámmu nikayu sù itabbák naw nira.”

*Yù Meyannung sù Maríku*

<sup>13</sup> Á ta pangituddu ni Apu Kesu sù ira kitáru nga tatolay, aijan yù táddy nga nagubobuk kuna, á kinagi na, “Mesturu, kagiam mu bì sù wagì ta iballáyán nangà sù kukuá nayù yáma mi nga bittáng na nikami,” kun na.

<sup>14</sup> Á kinagi ni Apu Kesu kuna, “Kopun, sikayu lággipay, ta aringà minay saw nga umay mamanunnù ánná mamabballay.”

<sup>15</sup> Á kinagi na laguk sù ira ngámin nga naggagammung tán, “Magimuguk kayu, maraké passilan naw yù eggá ta dabbuno. Ta yù kuruk nga napiá nga áttolé na tolay ari megapu sù aru nga kukuá na.”

<sup>16</sup> Á nagángngarigán si Apu Kesu, á kinagi na, “Aijan ngaw yù tolay nga maríku, nga aru yù ákkomanán na ánná aru yù ginaták na.

<sup>17</sup> Á yáyù nga ninonò na, ‘Massiri yù ira balay nga ángngipayyák ku ta ammè. Anni yù akkuák ku?’

<sup>18</sup> Á kinagi na, ‘Á yawe laguk yù akkuák ku. Táttakak ku lâ yù ira balay nga ángngipayyák ku, á mappaddayá sù ira darakal nga ángngipayyák ku, tapè pakappiák ku nira yù ammè ánná ngámin nga kukuâl’ kun na.

<sup>19</sup> Á ninonò na paga, ‘Maríkungakin, ta ajjan yù kanak ku ta mabayák nga dagun, mássiki aringakin mattarabáku. Magibannágà lâ nga kumán, ámmínun, ánnna makipabbúyál’ kun na nga mannononò.

<sup>20</sup> Ngam kinagi ni Namarò laguk kuna, ‘Maguyung ka! Matay ka sangaw nu gabingo. Á asinni panò sangaw yù mangâ sù ngámin nga pinakappiám mu nga kagiam mu ta kukuám?’

<sup>21</sup> Á kunnian gapay yù ággíán nayù ira ngámin nga tatolay nga mokkuk, ta lonád da yù ákkiyápu ra kâ Namarò,’ kun ni Apu Kesu.

*Yù Meyannung sù ira Mangikatalà kâ Namarò*  
*Mattiu 6:25-34*

<sup>22</sup> Á nagubobuk si Apu Kesu sù ira sinudduán na, á kinagi na nira, “Yáyù nga kagiak ku nikayu ta arán naw laguk ikaburung yù máwák naw ta áttole naw sawe dabbuno, nga kanan naw ánnna gámi naw.

<sup>23</sup> Ta máwák nga tángngagan naw yù áttole naw kâ Namarò ánnè sù kanan naw, ánnna iddukan naw yù baggi naw ánnè sù gámi naw.

<sup>24</sup> Á ta ángngarigán, nonopan naw yù ira mammánù. Ari ira mammulá, á ari ira makigaták, á awán ta ággubbuá da. Ngam pakanan ni Namarò ira. Á nepallà yù ángngiddù na nikayu ánnè sù ira mammánù.

<sup>25</sup> Á awán ta napiá nga pabbalinán nayù burung naw, ta arán naw awayyá nga lannapán yù ággaw nga áttole naw, mássiki lâ tádday, megapu sù burung naw.

<sup>26</sup> Á nu arán naw makuá yù kunníu nga baddì, anni laguk yù serbi nayù burung naw sù aru nga makkakerumá!

<sup>27</sup> Á nonopan naw yù ira lappáw. Ari ira mattarabáku. Ari ira mangabal. Ngam nakástá ira ánnè sù ipabbarawási ni Patul Solomon, nga yù ngaw maríku nga patul.

<sup>28</sup> Á nu kunnian yù ámmarawási ni Namarò sù ira lappáw, nga ajjan ta kakáddapán nga nakástá kunangan, nga tuggiad da sangaw nu ummá, á arán na panò iyawâ nikayu gapay yù ipabbarawási naw nga mepángngà? Iyawâ na nikayu gemma! Á sikayu, ngattá ta arán naw ikatalà si Namarò?

<sup>29</sup> “Ari kayu laguk maburung nga mannononò nu anni sangaw yù kanan naw onu anni sangaw yù ipabbarawási naw.

<sup>30</sup> Ta yáyù lâ ikaburung nayù ira tatolay ta dabbuno nga ari mangikatalà kâ Namarò. Ngam sikayu, arán naw ira párigán, ta ammu ni Namarò nga Yáma naw ta lángi yù máwák naw.

<sup>31</sup> Á yáyù nga tángngagan naw lállaguk yù meyannung sù pammagure ni Namarò ánnna yù ákkiyápu naw kuna, á iyawâ na laguk nikayu yù máwák naw.”

*Yù Pamakáppi ni Namarò ta Lángi sù Iyawâ na sù ira Tatole na*  
*Mattiu 6:19-21*

<sup>32</sup> Á kinagi ni Apu Kesu paga, “Sikayu nga makituddu nikán, ari kayu maganássing, mássiki baddì kayu lâ, ta magayáyâ yù Yáma naw ta lángi nga mangisipà nikayu sù pammagure na.

<sup>33</sup> Iláku naw laguk yù kukuá naw, á ilímù naw yù pallakuán naw sù ira íkáttole naw nga magáwák. Á nu kunnian yù akkuán naw, pakappián ni Namarò ta lángi yù iyawâ na nikayu sangaw nu umay kayu tán. Á kunnay ta ajjan yù kuártu naw nga ari bulubugá napangarián, nga neipay ta pitáka nga ari mabbálí ta dán ánnna ari marúnù, nga napakappián sù gián nga awán ta makkokò ánnna awán ta ulolak nga manarál.

<sup>34</sup> Ta yù piggianán nayù kukuá naw, yáyù gapay tángngagan naw nga nonopan. Arán nawin laguk nononopan yù ággíán naw ta dabbuno, ngam nononopan nawin galâ yù ákkiyápu naw kâ Yáma naw ta lángi.”

*Yù ira Aripa ná Naparán ánnna Magiddak*

<sup>35</sup> Á kinagi ni Apu Kesu paga nira, “Dán nga naparán kayu laguk nga magiddak sù labbè ku, mássiki nu gabi, ta kunnay sù tolay nga eggá yù isingan na nga makegagátang.

<sup>36</sup> Yáyù nga keyarigán naw yù kunnay sù ira aripa ná maturá nga magiddi-iddak sù labbè nayù yápu ra nga manoli nga maggupu ta bodá. Á nu mattottò sangaw ta puertá, dagarágâ nga bukatád da.

<sup>37</sup> Á magayáyâ yù ira aripa nu maratang na ira nayù yápu ra nga magiddi-iddak sù labbè na. Kagiak ku nikayu ta pagitubangan na ira laguk nayù yápu ra, tapé mallalálláng ira, á aggina yù masserbi nira.

<sup>38</sup> Á yáyù nga magayáyâ ira nu dán nga naparán iren, mássiki nu lubbè nakuan ta tangngá na gabi onu alippánnawák.

39 "Á kánnámuán naw laguk! Ta ángngarigán, nu ammu nayù tolay yù dattál nayù makkokò sù bale na, á matturá nga magiddak, tapè ari makatallung yù makkokò ta bale na.

40 Á kunnian gapay nikayu, máwák nga dán nga naparán kayu gapay, ta awán ta makánnámmu sù oras na labbè ku, ta ikáddagâ ku lâ lubbè, sikán nga Kaká na ngámin na tatolay."

*Yù Meyannung sù Aripaŋ nga Mekatalà ánnna yù Aripaŋ nga Ari Mekatalà  
Mattiu 24:45-51*

41 Á kabalin na nagubobuk ni Apu Kesu, kinagi ni Eduru kuna, "Apu, sikami lâ yù pakkagiám mu sù ángngarigám mu? Ónu kagiam mu gapay sù ira tatolay?" kun na.

42 Á simibbák si Apu Kesu megapu sù tádday nga ángngarigán, á kinagi na, "Nu ajjan yù napiá nga aripaŋ nga kunnay nikayu nga manuppál sù ipakuá nikayu, aggina yù ikatalà nayù yápu na ta manaron sù ira kábulun na nga aripaŋ. Á aggina laguk yù mangiyawâ nira sù kanad da ta pakkákád da.

43 Á magayáyâ yù aripaŋ ta labbè nayù yápu na, nu maratang nayù yápu na nga matuppál yù ngámin nga inikatalà na kuna!

44 Á gapu ta napiá yù ánnaron na sù ira kábulun na nga aripaŋ, napiá yù ábbalabálà nayù yápu na kuna, ta aggina yù mekatalà nayù yápu na sù ngámin nga kukuá na.

45 "Ngam ta ángngarigán nu nonopan nayù aripaŋ ta mabayák paga támma lubbè yù yápu na, á yáyù nga maguray lâ yù akkuán na, á jigirigátan na yù ira kábulun na nga aripaŋ, ánnna kumán lâ ánnna mappissán ánnna magilellaw.

46 Á ikáddagâ lâ lubbè yù yápu na, á marángnganán na nga mangngamangnguá ta naráké. Á pagikaruan na laguk yù aripaŋ, á metádday nga mekanakanâ sù ira ari manguruk.

47 Á yù aripaŋ nga makánnámmu sù ipakuá nayù yápu na kuna, ngam arán na tuppálan ánnna ari naparán sù labbè na, nepallà yù pamagikáru nayù yápu na kuna.

48 Ngam yù aripaŋ nga ari makánnámmu sù ipakuá nayù yápu na kuna ánnna malliwâ, á aláppaw lâ yù pamagikáru na kuna. Ngam yù tolay nga ikatalà nayù yápu na ta pakáwayyá na, iddagán na gapay yù panuppál na sù ipakuá na. Á yù tolay nga ikatalà nayù yápu na ta aru nga pakáwayyá na, aru gapay yù iddagán nayù yápu na nga palurotan na."

*Massinná yù ira Tatolay Megapu kâ Apu Kesu  
Mattiu 10:34-36*

49 Á kinagi ni Apu Kesu gapay, "Yaw iniyángè sawe dabbuno yù bilin ni Namarò nga kun na api nga maggatang, tapè manawagán yù nonò nayù ira makaginná, ngam mabáli ta kun na api nga manarál sù nonò nayù ira malussaw nikán, á parè bi ta maggatangin nga mabí mabalín.

50 Ngam máwák nga attamák ku yù jigâ ánnna patè, á ari magimammà yù nonò ku áddè ta arán na kabalin.

51 Á kagian naw mápugák ta minayà tapè pagimammatak ku yù ira tatolay ta dabbuno. Ngam ari, ta mepakkakáttuay ira ta nonò, ta ajjan yù ira tumuttul nikán, ánnna ajjan yù ira manakì.

52 Á yáyù nga mamegapu kunangane nga makkakáttuay yù nonò nayù ira mawwawágí. Á ta ángngarigán nu ajjan yù límá nga tolay sù tádday nga balay, á yù ira tallu, makikontará ira sù ira duá. Á yù ira duá gapay, makikontará ira sù ira tallu.

53 Á yù ira matáma, makkakontará ira. Á kunnian gapay sù ira masíná, makkakontará ira. Á yù katugángán, kontarán na yù manugáng na, á yù manugáng, kontarán na yù katugángán na."

*Yù Panákkilalát tam ta Mesimmu Sangaw  
Mattiu 16:2-3; 5:24-26*

54 Á kinagi ni Apu Kesu sù ira magaru nga tatolay, "Á sikayu, ammu naw ta magurán támma sangaw, nu masingan naw yù naribbà ta lalammarán. Á kuruk nga magurán sangaw.

55 Á nu mappaddák nga naggapu ta abagátán, ammu naw ta mapátu yù ággaw sangaw, á kuruk nga mapátu.

56 Agippípiá kayu! Ngattá, ta matákkilalán naw yù masingan naw ta lángì ánnna dabbun, ngam arán naw tákkilalán yù mesimmu kunangan!

57 Ngattá, ta arán naw nonopan yù mepángngà nga akkuán naw nakuan!

<sup>58</sup> Á ta ángngarigán, nu ajjan yù tolay nga nakaliwatán naw, lage naw makáddè ta kues, makká-ubobuk kayu, tapè mammapiá yù ággíán naw. Ta nu iddagán naw yù pangikeká na nikayu ta kues, á yù kues, ipaparesu na kayu sù ira pulis.

<sup>59</sup> Á kagiak ku nikayu, ta maggián kayu laguk ta karsel áddè ta arán naw pakekáru.”

## 13

### *Yù Meyannung ta Pabbabáwi na Tolay ánná yù Kapanunnù na*

<sup>1</sup> Á pangituddu ni Apu Kesu, ajjan yù ira tatolay nga minay nangiparámak kuna sù pamapáte ni Gubinador Pilatto sù ira taga Galilia, ta pangiyátáng da ta ayám kâ Namarò.

<sup>2</sup> Á pakararamak ni Apu Kesu, kinagi na nira, “Á gapu ta natay ira, kagian naw mápugák ta nepallà yù liwâ da ánné sù ira kábulud da nga taga Galilia.

<sup>3</sup> Ngam ari gemma kuruk. Á kagiak ku nikayu, nu arán naw ibabáwi yù liwâ naw, matay kayu gapay nga kunnay nira, á mesinná kayu laguk kâ Namarò ta áddè ta áddè.

<sup>4</sup> “Á anni ta ure naw sù ira mapulu ta walu nga tatolay nga narámak tam nga natay ta karabbâ mayù atannáng nga balay tuke ta Silowam sù ili na Jerusalem? Kagian naw mápugák ta nepallà yù liwâ da ánné sù ira ngámin nga keliád da nga maggián ta Jerusalem.

<sup>5</sup> Ngam ari kuruk gemma, á kagiak ku nikayu, nu arán naw ibabáwi yù liwâ naw, á ikáddagâ lâ nga matay kayu gapay ta kunnay nira, á mesinná kayu laguk kâ Namarò ta áddè ta áddè.”

### *Yù Meyannung sù Káyu nga Igò nga Ari Mabbungá*

<sup>6</sup> Á nagángngarigán si Apu Kesu, á kinagi na nira, “Ajjan yù tolay nga eggá yù káyu nga igò\* nga nemulá sù kamulán na ta úbas. Á en na sinullúnán nu eggá bungá na. Ngam awán bulubugá ta bungá na.

<sup>7</sup> Á kinagi na sù tolay nga minánnaron ta mulá na, ‘Innam mu yawe káyu! Tallu ragunakin nga umay mangá ta bungá na nakuan, á awán bulubugá ta málá ku! Tukáram mu laguk, ta awán gemma ta serbi na, tapè memulá yù dumá,’ kun na.

<sup>8</sup> “Ngam yù minánnaron sù kamulán, kinagi na sù yápu na, ‘Paguráyám mu lábbì, Apu, ta tanga ragun, ta kokkobák ku yù pun na ámma payyák ku ta attay na ayám.

<sup>9</sup> Á nu mabbungá sangaw nu tádday ragun, á napiá laguk! Á nu ari, ipattukák mu sangawin laguk.’”

### *Yù Pamammapiá ni Apu Kesu sù Nakkabbuk ta Ággaw nga Ággibannák*

<sup>10</sup> Á ta ággaw na Sabadu, nga ággibannák da, minay si Apu Kesu nangituddu sù kapilliá mayù ira Kudio.

<sup>11</sup> Á ajjan tán yù babay nga nataki ta mapulu ta walu nga dagunin, nga nagunagán na anitu, á nakkabbuk nga ari makatáddak.

<sup>12</sup> Á pakasingan ni Apu Kesu kuna, inagálán na, á kinagi na kuna, “Tíyá, napammapiá ken sù takì mu!” kun na.

<sup>13</sup> Á singngalán na, á dagarágâ nammapiá nga nanáddak, á jináyo na si Namarò.

<sup>14</sup> Á gapu ta pinammapiá ni Apu Kesu yù matakí ta Sabadu nga ággibannák da, naporay kuna yù kapatás ta kapilliá. Á yáyu nga kinagi na sù ira tatolay, “Ngattá, ta umay kayu mapporu sù ággaw na Sabadu, nga mangilin nga ággaw? Ajjan gemma annam nga ággaw nga awayyá tam nga mattarabáku, nga umay kayu nakuan mapporu,” kun na.

<sup>15</sup> Á simibbák si Apu Kesu, á kinagi na, “Agippípiá kayu! Eggá panò nikayu yù tádday nga arán na ikállá yù ayám na ámma arán na ubbarán, nga en na penuman, mássiki nu Sabadu?

<sup>16</sup> Á ngattá, ta kagian naw ta ari máyâ ta Sabadu yù pamalubbáng ku sawe babay nga ginaká ni Lákay Abrakam, nga jinigirigâ ni Satanas ta mapulu ta walu nga dagunin!” kun na.

<sup>17</sup> Á tabbák ni Apu Kesu, nepasiránán yù ira malussaw kuna. Ngam yù ira ngámin nga kárúán nga tatolay, magayáyâ ira sù ngámin nga makapállá nga kingnguá ni Apu Kesu.

### *Yù ira Keyarigán mayù Pammagure ni Namarò*

#### *Mattiū 13:31-33; Markus 4:30-32*

<sup>18</sup> Á nangituddu si Apu Kesu mángin, á kinagi na, “Nonopan naw nu kunnasi yù pammagure ni Namarò ta tolay. Anni yù pangiyarigák ku sù pammagure na?

<sup>19</sup> Kunay sù babaddì nga bukal nga inimulá na tolay sù ákkomanán na. Á nattubbu, á dumakal lâ dumakal, áddè ta umay magumù yù ira mammánù kuna.”

<sup>20</sup> Á kinagi na má nira, “Anni paga yù meyárik sù pammagure ni Namarò?

\* <sup>13:6</sup> Igò yù káyu nga masingngá bungá na.

<sup>21</sup> Massamâ yù pammagure na sù ira tatolay nga kunnay sù passamâ na áppalappák ta pán nga inâ nayù babay, nga inikiruk na sù tallu súpá nga arená, tapè luppák yù pán.”

*Meyannung sù ira Mesipà sù Pammagure ni Namarò  
Mattiu 7:13-14, 21-23*

<sup>22</sup> Á nánaw di Apu Kesu ta umay ira ta Jerusalem. Á naddagâ nga mangituddu sù ira ngámin nga babálay nga talebarád da.

<sup>23</sup> Á ajjan yù tádday nga minay nangiyabbû kuna, “Apu, baddì panò lâ yù ira meyígù, tapè ari ira magikáru ta impiernu?” kun na. Á simibbák si Apu Kesu nga nagángngarigán, á kinagi na,

<sup>24</sup> “Meyárik yù pammagure ni Namarò sù balay nga nasirì yù puertá na. Italákkuruk naw nga tullung kunangane! Ta aru sangaw yù ira mamarubá, ngam ari ira makatallung.

<sup>25</sup> “Á ta ángngarigán, nu inilitù nen nayù makákkua ta balay, arán na kayin patallungan. Á sangaw nu umay kayu mattottò ta puertá, á katolán naw, ‘Apu, bukatám mu bi!’ Ngam kagian na nikayu, ‘Arák ku nikayu bukatán, ta arát takayu ammu ánná arák ku ammu yù naggapuán nawl’ kun na.

<sup>26</sup> Á kagian naw kuna, ‘Apu, nepallálláng kami nikaw, á sikaw yù nangituddu ta babále mi.’

<sup>27</sup> Ngam kagian na má, ‘Arát takayu ammu, á arát ta kayu kábulun. Mánaw kayu, sikayu nga minálliwâ!

<sup>28</sup> “Á yáyù nga gikuletán kayu nga mangngarangngaringngì ta pakerípâ naw sù ira naggaká nikayu, di Abrakam kári Isak kâ Akup ánná yù ira ngámin nga ábbilinán ni Namarò, nga mesipà sù pammagurayán ni Namarò. Ngam sikayu, mapaturiák kayu, á maggián kayu ta lawán.

<sup>29</sup> Á umay yù ira makkakerumá nga tatolay nga naggapu ta ngámin nga makkakerumá nga lugár, tapè mepallalálláng ira sù pammagurayán ni Namarò.

<sup>30</sup> Á ajjan yù ira maporián kunangane, nga mapolu sangaw. Á ajjan yù ira mapolu kunangane, nga maporián sangaw.”

*Yù Daddam ni Apu Kesu sù ira Tatolay ta Jerusalem  
Mattiu 23:37-39*

<sup>31</sup> Á ajjan yù ira Parisio nga minay kâ Apu Kesu, á kinagi ra kuna, “Mánaw ka saw, á umay ka ta tanakuán nga lugár, tapè melillì ka kâ Patul Erodo, ta gustu na ka ipapapátay,” kud da.

<sup>32</sup> Á kinagi na nira, “En naw kagian táne minángngilogò ta tángngagak ku bì yù tarabákù nga mamapánaw sù ira nattaliponak ánná pammapiák ku yù ira máttaki ta ággawo ánná sangaw nu ummá, áddè ta arák ku mabalin sù mekatallu nga ággaw.

<sup>33</sup> Á yawe lâ kagiai ku nikayu, ta uputak ku yù akkuák ku ta ággawo ánná sangaw nu ummá, ánná táddy nga ággaw, ta áddè ta arák ku labbè ta Jerusalem. Á umayà ta Jerusalem gapu ta yáyù namapatayád da sù ira ábbilinán ni Namarò, á ari máyâ nu matay yù ábbilinán ni Namarò ta tanakuán nga lugár.

<sup>34</sup> “Sikayu nga taga Jerusalem, maraddamà megapu nikayu, á nepallà yù daddam ku, ta narákè yù ággangnguá naw. Pinapáte naw yù ira ábbilinán ni Namarò, á pinayáng naw ta batu yù ira nabilin nga umay nikayu mangituddu! Á namepígiá nga inapà takayu nga umay nikán, nga kunnay sù ángngiddù na manù sù píyà na, ngam manakí kayu lâ!

<sup>35</sup> Á yáyù nga manakikin laguk si Namarò sù ira tatolay ta Jerusalem, á nánawán na yù gián naw. Á kagiai ku laguk ta arán nawà má sangaw masingan áddè ta matunù yù panolí saw nikayu, á tákkilalán nawà, ánná kagian naw sù ira kábulun naw, ‘Dayáwat tam yù Yápu tam nga jinok ni Namarò nga umay mammaguray!’ ”

## 14

*Pamammapiá ni Apu Kesu sù Tolay nga Mataki nga Nallábbák*

<sup>1</sup> Á ta Sabadu nga ággibannák da, minay nakilálláng si Apu Kesu ta bale nayù táddy nga kátannangán nayù ira Parisio. Á yù ira tatolay, iningad da si Apu Kesu, nu anni yù akkuán na,

<sup>2</sup> gapu ta jímikkì kuna yù tolay nga nallábbák.

<sup>3</sup> Á nakiubobuk si Apu Kesu sù ira mangituddu sù tunung ni Moyses ánná yù ira Parisio, á kinagi na, “Anni yù mepugik nayù tunung tam nga meyannung ta pangilit tam sù ággaw nga ággibannák? Malliwâ ittam panò sù ággaw nu pammapiát tam yù ira máttaki?”

<sup>4</sup> Ngam arád da sibbák si Apu Kesu. Á singngalán na yù tolay nga mataki, á pinammapiá na, á pinapáno na ta lubbè ta bale na.

5 Á kinagi na laguk nira, "Sikayu nga katággítádday, ta ángngarigán nu ajjan yù ayám na nga napanná ta abbû, arán na panò dagarágâ nga igon, mássiki ta ággaw na Sabadu?"

6 Á awán bulubugá ta matabbák da sù kinagi na.

### *Yù Meyannung sù Álliuk ánná yù Mangapà kuna*

7 Á nasingan ni Apu Kesu ta ajjan yù ira napolu ta bale nayù Parisio, á minay ira nagitubang sù kapiánán nga ággitubangán nayù ira kotunán. Á yáyù nga kinagi ni Apu Kesu nira,

8 "Á ta ángngarigán, nu ajjan yù mangapà nikayu ta bodá, napiá nu ari kayu nakuan magitubang sù ággitubangán nayù ira kotunán. Ta ajjan mápugák yù inapà na nga maráyaw ánné nikayu.

9 Á nu magitubang kayu sù ággitubangán nayù maráyaw, á umay yù nangapà nikayu, á kagian na, 'Magalì ka bì, ta tanakuán yù magitubang saw,' kun na. Á yáyù nga mappasirán kayu, ta mapuersá kayu nga magitubang sù ággitubangán nayù kagukábán.

10 "Ngam napiá galâ nu mapolu kayu nga magitubang sù ággitubangán nayù kagukábán. Á sangaw nu umay yù mangálliuk, á kagian na nikayu, 'Kopun, umay ka magitubang táne napiá nga ággitubangán nayù maráyaw,' kun na. Á ta kunnian meparáyw kayu gapay ta arubáng nayù ira káruán nga tatolay.

11 Ta yù ira ngámin nga mappeddaráyw, mepagukák ira nga mepasiránán. Á yù ira tumulù nga gumukák, mepotun ira nga meparáyw."

12 Á kinagi ni Apu Kesu sù mangálliuk kuna, "Nu mamakán ka, ari ka mangapà sù ira lânga makápà gapay nikaw, nga kopum mu, wagim, kanakanáyum mu ánná yù ira maríku nga karúbám, maraké apatad da ka gapay sangaw sù pappabbúyá ra, á yáyù nga mabalabálà ka.

13 Ngam sikaw á, kunniauw yù akkuám mu nakuan. Nu mamakán ka, mangapà ka galâ sù ira nári makápà nikaw, yù ira pobare, pilay, gappung, ánná buling.

14 Nu kunnian yù ángngikállà mu nira, mapagayáyâ ka, gapu ta ari ira makabalabálà nikaw, á si Namarò yù mabbalabálà nikaw sangaw nu matunù yù ággo na pamaginnanole na sù ira ngámin nga napiá nga tatolay."

### *Yù Ángngarigán nga Meyannung sù ira Mallalálláng Mattiü 22:1-10*

15 Á ajjan yù tádday nga mepakkákán kári Apu Kesu, á pakaginná na sù kinagi ni Apu Kesu, kinagi na kuna, "Magayáyâ gemma yù ira tatolay nga alliúgan na sangaw ni Namarò nga mallalálláng sù pammagurayán na!" kun na.

16 Ngam kinagi ni Apu Kesu kuna, "Á ta ángngarigán, ajjan yù tolay nga mapparán ta aru nga kanan, tapé mangapà sangaw ta aru nga tatolay ta umay ira makilálláng.

17 Á ta kabalin na napparán, jinok na yù aripan na ta en na agálán yù ira apatan na. Á kinagi nayù aripan nira, 'Umay kayu bì, ta naparánin,' kun na.

18 "Á ta pagágál nayù aripan sù ira tatolay, ajjan yù angayád da ngámin nga katággítádday. Yù napolu nga inapà na, kinagi na sù aripan, 'Kagiam mu bì kâ yápum ta pakomán nangá bì ta aringà makángay, ta ajjan ginátang ku nga ákkomanák ku, á máwák ta ek ku tullúnán,' kun na.

19 Á yù tádday nga inapà na, kinagi na, 'Kagiam mu bì kâ yápum ta pakomán nangá lábbì ta aringà makángay, ta ek ku tullúnán yù mapulu nga báka nga ginátang ku,' kun na.

20 Á yù mekatallu nga inapà na, kinagi na, 'Aringà garè makángay ta apángngatáwangà garè,' kun na.

21 "Á nanoli yù aripan, á kinagi na sù yápu na yù ngámin nga kinagi ra. Á pakaginná na karannian, napporay gapu ta ari minay yù ira inapà na. Á kinagi na sù aripan na, 'Apurám mu nga umay sù ira dálan ánná kalsáda, á iyángem saw yù ira marángnganám mu sangaw nga pobare, pilay, buling, ánná gappung,' kun na.

22 Á sinuppál nayù aripan. Á kinagi na sù yápu na, 'Apu, natuppálin yù kinagim, á aijjanin yù ira inapà ku, ngam aru lâ paga yù paggiánán,' kun na.

23 Á kinagi na má sù aripan na, 'E ka laguk ta arayyu nga lugár, á apatam mu yù ira maratang mu ta umay ira makilálláng ta bâlé, tapé mapannu yù bâlé.'

24 Ta awán bulubugá sù ira napolu nga inapà ku nga pakákkapak ku sù kanan nga pinarák ku!' "

### *Yù Meyannung sù ira Makituddu kâ Apu Kesu Mattiü 10:37-38*

25 Á ta pallakák di Apu Kesu nga pappángè ta Jerusalem, aru yù ira tatolay nga siminuttul kuna. Á nallipay si Apu Kesu nira, á kinagi na nira,

26 "Yù tolay nga umay nikán gapu ta gustu na tumuttul nikán, mawák nga sikán yù iddukan na ánné sù ángngiddù na sù ira darakal na, atáwa na, ánâ na, wáwwagi na, ánâ baggi na gapay.

27 Á yù tolay nga ari makeyangngà sù jigâ ánna pate na megapu sù panuttul na nikán, á ari makatuttul nikán.

28 "Á ta ángngarigán nu ajjan nikayu yù tolay nga mappadday ta balay, á mapolu bì bilangan na nu eggá kuna yù makatò áddè ta kabalin na.

29 Ta nu patáddagan na yù kallang, ánna awán ta makatò, awán ta awayyá na nga mamalin. Á pakasingan nayù ira tatolay ta arán na mabalin, uyozungáda.

30 Á kagiad da, 'Mamegapu yù tolay nga mabbalay, ngam arán na balinan!' kud da.

31 "Á kunnian gapay nu ajjan yù patul nga eggá lâ yù mapulu ribu nga suddálú na, á lage na umay makigerrá sù tádday nga patul nga eggá yù duápulu ribu nga suddálú na, á nonopan na nu eggá yù awayyá na nga mangappú nira.

32 Á nu nonopan na ta awán ta awayyá ra nga mangappù, doban na yù gádde na ta en na dapunan yù patul ánna yù ira suddálú na lage ra umaranni kuna, tapè makikomá kuna ta magimammá ira.

33 Á kunnian gapay nikayu nga katággitádday, nu ajjan nikayu yù ikáyâ na makituddu nikán, mawák nga mapolu nga nonopan na nu awayyá na nga ikatala ngámin nikán yù ayatan na ánna ure na, ánna lonán na ngámin yù kukuá na, tapè makituddu nikán.

*Yù Meyárik ta Asin nga Náríngin yù Paggák na*

*Mattiu 5:13; Markus 9:50*

34 "A nu ajjan yù tumuttul nikán, ngam arán na ngámin ikatalà nikán, kunnay sù asin nga nári yù paggák na. Ta napiá yù asin, ngam nu awánin yù paggák na, á nalállák, á kunnasi panò nga manguli? Awán.

35 Á kengá lâ yù asin, ta awán ta serbi na. Mássiki ikiruk da ta dabbun, ari máyâ ta abúno, á itabbà da lâ. Á sikayu nga makaginná, ginnán naw ta napiá yù kinagì!"

## 15

*Yù Karneru nga Nagawáwán*

*Mattiu 18:12-14*

1 Á yù ira mináttuki ta buwi ánna yù ira káruán nga minálliwâ, minay ira kâ Apu Kesu, tapè ginnád da yù inituddu na.

2 Á naddagaragim yù ira Parisio ánna yù ira mangituddu sù tunung ni Moyses, á kinagi ra, "Yawe tolay, alawatan na yù ira minálliwâ nga metádday kuna, á mepallalálláng nira gapay!" kud da.

3 Á yáyù nga nagángngarigán si Apu Kesu, á kinagi na nira,

4 "Á ta ángngarigán, ajjan yù tolay nga nagayám ta magatù nga karneru. Á anni panò yù akkuán na, nu magawáwán sangaw yù tádday? Arán na panò ibattáng yù ira siámapulu ta siám ta ággarabád da, tapè en na aleran yù tádday nga nagawáwán áddè ta arán na pakálek kuna?

5 Á nu málek na, ayatán, á buttungan na nga ilabbè na ta bale na.

6 Á labbè na ta bale na, agálán na yù ira kákkopun na ánna yù ira karúbá na, á kagian na nira, 'Mepagayáyâ kayu nikán, á mappabbúyá ittam, ta nálek ku yù karnerù nga nagawáwán!' kun na.

7 "Á kagiai ku nikayu, ta kunnay sù pagayáyâ nayù minápprák ta pakálek na sù tádday nga karneru na nga nagawáwán, á kunnian gapay yù kepagayáyâ di Namaro ánna yù ira nga maggián kuna ta lángì megapu sù tádday nga tolay nga mabbabáwi ta liwâ na, ánne sù ira siámapulu ta siám nga tatolay nga makkagi ta matunung ira nga awán ta liwâ nga mawák da ibabáwi."

*Yù Pirâ nga Neyawáwán*

8 Á kinagi ni Apu Kesu, "Á ta ángngarigán, ajjan yù babay nga eggá pirâ na nga mapulu. Á nu metabbà sangaw yù tádday, anni panò yù akkuán na? Paggatangan na yù isigan, á aleran na. Kuregán na yù ngámin nga unak na bale na áddè ta arán na pakálek kuna!"

9 Á pakálek nayù babay sù pirâ na, agálán na yù ira kákkopun na ánna yù ira karúbá na, tapè makipabbúyá ira kuna. Á kagian na nira, 'Mepagayáyâ kayu nikán, ta nálek ku yù pirâ ku nga netabbà,' kun na.

10 “Á kuruk yù kagiak ku, ta kunnay sù pagayáyâ da, kunnian gapay yù pagayáyâ nayù ira daroban ni Namarò megapu sù táttáddy nga tolay nga mabbabáwi ánnna likuránán na yù liwâ na.”

*Yù Bagitolay nga Nagawáwán*

11 Á nagángngarigán paga si Apu Kesu, á kinagi na, “Ajjan yù tolay nga maríku, nga eggá duá nga ánâ na nga lálláki.

12 Á yù anâ na nga urián, en na kinagi kâ yáma na, ‘Ammò, iyawâ mu nikán yù ballè sù kukuám,’ kun na. Á bille na laguk nayù yáma ra yù kukuá na sù ira duá nga ánâ na.

13 “Á ari nabayák, á en na iniláku nayù urián yù ngámin nga balle na nga iniyawâ nayù yáma na, á inâ na yù kuártu, á nánaw, nga minay naggián ta arayyu nga lugár. Á ginástu na ngámin yù kuártu na sù narákè nga akkuán na.

14 “Á ta kapunu na kuártu na, jmittál yù bisin tán nga lugár. Á yáyù nga nabbisin gapay yù bagitolay, gapu ta awánbulubugá ta ipangâ na ta kanan na.

15 Á minay laguk nakiaripan sù tolay nga maggián tâne lugár, á inipataron na kuna yù ira bábi na.

16 Á nepallà yù bisin nayù bagitolay, á ikáyâ na nakuan kumán sù ipamakán na sù ira bábi, ta awánbulubugá ta tolay nga mangiyawâ ta kanan na.

17 “Á gapu ta nepallà yù bisin na, á ninonò na yù kaloku na, á nakemmunaw. Á kinagi na ta nonò na, ‘Aru yù ira mangallu kâ yámâ, á massobará ira ngámin ta kanan. Ngam aijanâ saw ngamagisassay matay ta bisin!

18 Mattolingâ laguk kâ Ammò, á kagiak ku sangaw kuna ta nakaliwákâ kuna, á nepatalugáring kâ Namarò.

19 Á kagiak ku gapay kuna ta nilonák ku yù pakáwayyâ nga mebiláng ta anâ na, tapè apan nangâ ta makiaripan kuna,’ kun na.

20 Á pakanonò na karannian, gimikkáng nga nánaw tâne lugár ta lubbè kâ yáma na.

“Á pallakák nayù bagitolay paga ta dálan, á neripâ nayù yáma na nga arayyu paga sù bale na. Ánakkarerá nga en na jinápun yù anâ na, gapu ta nerallà yù allâ na kuna. Á ináppungulán na, á inummatán na.

21 Á kinagi nayù bagitolay sù yáma na, ‘Ammò, nakaliwákâ nikaw, á nepatalugáring kâ Namarò, á aringâ mepángngâ nga mebiláng ta anâ mu,’ kun na.

22 Ngam yù yáma na, inagálán na yù ira aripan na, á kinagi na nira, ‘Alistuán naw nga umay mangâ ta barawási nga kapiánán, ta barawasián naw. Á passapátukan naw ánnna passákkalágan naw gapay.

23 Á kabalin naw mamarawási, apan naw yù kígaw nga báka nga matabá, ta pártian naw. Ta kumán ittam nga mappabbúyá,

24 gapu ta yawe anâ ku yù kunnay ta natay, ngam kun na naginnanolayin. Á kunnay ta nagawáwán, ngam náleránin,’ kun na. Á yáyù nga nappakán ira ánnna nappabbúyá.

25 “Á pappabbúyá ra, limibbè yù kaká nga anâ na nga naggapu ta ákkomanán nayù yáma na. Á pakáraanni na sù bale ra, nakaddák sù pakaginná na ta paggássá ra ánnna pattatála ra.

26 Á inagálán na yù tádday nga aripad da, á iniyabbû na kuna nu anni yù akkuád da.

27 Á kinagi nayù aripan kuna, ‘Limibbè yù uriám mu, á inipapárti nayù yámam yù kígaw nga natabá, gapu ta napalabbé na nga napiá gawagawáyán na.’

28 “Á pakaginná nayù kaká karannian, nappattunnuk, á ari simillung sù balay gapu ta pore na. Á pakasingan nayù yáma na nga aijan ta lawán yù anâ na nga kaká, á en na laguk patallungan.

29 Ngam simibbák sù yáma na, á kinagi na, ‘Pígiá nga dagunin yù pattarabákù nikaw ámma arátaka bulubugá pinotuán! Ngam arám mà bulubugá paga iniddán ta mássiki kajjing nga ipappabbúyá mi sù ira kákkopuk ku.

30 Ngam yawe anâ mu, ginástu na yù ngámin nga kukuám sù ira minákkikarallaw. Á aggina yù inipártiám mu sù kígaw! kun na.

31 “Á kinagi nayù yáma na kuna, ‘Anâ ku, sigídá ka nga maggián nikán, á kukuám ngámin yù kukuâ.

32 Ngam napiá nu mappabbúyá ittam nga magayáyâ, gapu ta nakalabbé galâ yù wagim nga kunnay ta natay, ngam matolay. Á kunnay gapay ta nagawáwán, ngam nálegin.”

1 Á nagángngarigán paga si Apu Kesu, á kinagi na sù ira makituddu kuna, “Ajjan yù tolay nga maríku nga ajjan kuna yù maggián nga manaron ta ngámín nga kukuá na. Á ajjan yù ira minay nangiránuk sù maríku ta ginásstu nayù minákkárgu yù nekárgu kuna.

2 Á pakaginná nayù maríku, inipágál na, á kinagi na kuna, ‘Anni yawe naginná nga kingnguám sù inikárgù nikaw? Arà! Itúrâ mu laguk yù ngámín nga kingnguám sù kukuâ, ta mapatalián ka sangaw,’ kun na.

3 “Á pakánnámmu nayù minákkárgu ta mári sù tarabáku na, ninonò na, nga kun na, ‘Á kunnasi laguk yù áttolè, ta irián nangà sangaw nayù yápù sù tarabákù? Á anni yù akkuák ku, ta nakapi yù baggi nga makkomán, á mappasiránà makilimù’’ kun na.

4 Á pakanonò na, kinagi na, ‘E, ajjan yù akkuák ku, tapè ajjan yù ira kákkopuk ku nga mangilágum nikán sangaw nu máringà sù tarabáku,’ kun na.

5 “Á kunniai yù kingnguá na laguk, ta inipágál na yù ira ággítádday nga naggagatù sù yápù na. Á labbè Nayù mapolu, kinagi na kuna, ‘Pígiá yù gatù mu sù yápù?’

6 Á kinagi na, ‘Magatù nga láta nga denu,’ kun na. Á kinagi nayù minákkárgu kuna, ‘Ajjan saw yù risíbüm. Apam mu, ta alistuám nga ulian, ta itúrâ mu yù límápu lânga láta,’ kun na.

7 Á mangánánnuán, minay yù táddy, á kinagi na gapay kuna, ‘Pígiá yù gatù mu sù yápù?’ Á kinagi na, ‘Magatù nga kaban nga baggâ.’ Á kinagi na kuna, ‘Á apam mu laguk yawe risíbüm ta uliam mu, ta itúrâ mu yù walupulu lâ.’

8 “Á pakánnámmu nayù yápù na sù kingnguá nayù narákè nga aripan na, á kinagi na, ‘Ye, masírik yù tolay, ta ammu na nga paránan yù pakkatolayán na!’”

Á kinagi ni Apu Kesu nira, “Napiá yù ánnonò nayù minákkárgu nga nangilogò, nga kunnay sù ira ari manguruk kâ Namarò, ta masírik ira ánné sù ira manguruk kâ Namarò, gapu ta ammu ra iyusá yù kukuá ra, tapè napiá yù ággíad da.

9 Á yawe laguk yù itabarang ku nikayu ta napiá nu iyusá naw yù kukuá naw sawe dabbuno ta ángngabbák naw sù ira kábulun naw, tapè sangaw nu mapúnu, á mapadduló kayu sù mannanáyun nga paggianán naw ta lángi.”

10 Á kinagi na paga ni Apu Kesu, “Á yù tolay nga ammu na manaron sù baddì ngamekatalà kuna, ammu na gapay manaron sangaw nu aru yù mekatalà kuna. Ngam yù tolay nga arán na ammu manaron ta baddì, kunnian gapay yù akkuán na, nu aru nakuan yù mekatalà kuna.

11 Á sikayu gapay, nu ari napiá yù ánnaron naw sù mekatalà nikayu sawe dabbuno, eggapànò yù mangikatalà nikayu sù kukurugán nga karíku naw nga mannanáyun ta lángi? Awán!

12 Á nu ari kayu mekatalà nga manaron sù kukuá na tanakuán nga mepataron nikayu, eggapànò yù mangiyawâ nikayu, tapè ajjan yù kukuá naw lápay? Awán!

13 “Á awán ta tolay nga makapasserbi sù duá nga yápù na, gapu ta ayatan na yù táddy ánnna ikalusso na yù táddy. Á nu pakimorayán na yù táddy, iluddè na yù táddy. Á kunnay gapay nikayu, ari kayu makapasserbi kâ Namarò nu yá lâ ikáyâ naw yù kuártu ánnna yù kegatángán na sawe dabbuno.”

#### *Dumá yù Ánninan ni Namarò sù Ánninan na Tolay ta Dabbuno*

*Mattiu 11:12-13; 5:31-32; Markus 10:11-12*

14 Á yù ira Parisio, nakaginná ra sù kinagi ni Apu Kesu, á inuyoyungád da, gapu ta kitokkuk ira ta kuártu, á yáyù lâ ikáyâ da.

15 Á kinagi ni Apu Kesu nira, “Sikayu, agippípiá kayu, ta ipasingan naw sù ira tatolay yù piá naw, ngam ammu ni Namarò yù nonò naw! Á yù mappeddaráyaw ánnna yù agippípiá, nga mepotun sawe dabbuno, aggira yù ikálrík ni Namarò.”

16 Á kinagi na gapay ni Apu Kesu, “Yù tunung nga inituddu ni Moyses ánnna yù inituddu nayù ira ngaw ábbilinán ni Namarò, yáyù sinuttul nayù ira tatolay áddè ngaw, ta áddè ta dattál ni Kuan nga Minánnigù. Ngam dattál ni Kuan, pinegapuanán na mangilayalayá sù napiá nga dámak nga meyannung sù pammagure ni Namarò, á aru laguk yù ira nga mapattú nga mesipâ kuna.

17 Ngam yù tunung nga inituddu ni Moyses, ari mapangarián, mássiki nu baddì lâ. Á lumma yù lángi ánnna dabbuno lage na pangarián nayù tunung ni Moyses.

18 Á ginnán naw yù tunung. Nu igúnge na laláki yù atáwa na pángè na mangatáwa ta tanakuán, á mangarallaw. Á nu mangatáwa yù laláki ta babay nga negúngay ta atáwa na, á mangarallaw gapay.”

*Yù Nesimmu sù Maríku ánnna si Lasaru nga Pobare*

<sup>19</sup> Á kinagi na paga ni Apu Kesu, “Ajjan yù tolay nga maríku nga nabbísti ta kunnay ta patul, nga mappabbúyá nga mappakán ta kágaggaw.

<sup>20</sup> Á ajjan gapay yù pobare nga mangngágan ta Lasaru, nga nallutulutu yù baggi na, á ta kágaggaw iyángé ra nga peddád da lâ ta aranni sù áttallungán na bale nayù maríku,

<sup>21</sup> ta iddanamán na ta iyawâ da yù buttá ra kuna. Á minay yù ira ítu nga najjjijil sù lutu na.

<sup>22</sup> Á manganánnuán, natay yù pobare. Á yù ira daroban ni Namarò, inâ da yù ikararuá nayù pobare ta makipabbúyá sù giád di Kákay Abrakam. Á manganánnuán, natay gapay yù maríku, á initanam da.

<sup>23</sup> Á yá labbetán nayù maríku yù impiernu.

“Á karigirigâ nayù maríku ta impiernu, nattánguk ta arayyu, á nasingan na di Kákay Abrakam kâ Lasaru nga namerik kuna.

<sup>24</sup> Á kinatolán nayù maríku laguk si Kákay Abrakam, á kinagi na, ‘Kákay Abrakam, ikállà mà ta dobam bì si Lasaru, ta en na pasinatán yù jílâ ta danum, tapè malannáwán, ta marigirigákå sawe api,’ kun na.

<sup>25</sup> Ngam kinagi ni Abrakam kuna, ‘Ilû, nonotam mu ta aru yù napiá nga nálâ mu ngaw sù katolem ta dabbun. Ngam si Lasaru, narigirigâ ngaw. Á kunangane, nabannáyánin saw nga magayáyâ si Lasaru, á sikaw, maparigirigâ ka.

<sup>26</sup> Á nepatalugáring ta awán ta awayyá mi nga mangabbák nikaw, ta ajjan yù aláwa nga abbû nga namassinná nittam, á awán ta makángay tân nga maggagu saw, á awán gapay ta makángay saw nga maggagu tân.’

<sup>27</sup> Á kinagi na laguk nayù ngaw maríku, ‘Á Kákay, ikállà mà bì, á dobam bì si Lasaru ta bale nayù yámâ,

<sup>28</sup> ta en na kagian sù ira límá nga wáwwagi ta pataliád da yù narákè nga ággangnguá ra, tapè ari ira gapay lubbè sawe giák ku, nga gián na jígâ,’ kun na.

<sup>29</sup> Ngam kinagi ni Abrakam kuna, ‘Ajjan nira yù inipetúrâ na ngaw ni Namarò kári Moyses ánná yù ira ábbilinán. Ajjan laguk yù awayyá ren nayù ira wáwwagim nga manguruk.’

<sup>30</sup> Á kinagi na, ‘Wan, Kákay, ngam arád da ira tángngagan. Á nu ajjan yù naginnanolay nga umay nira, ta ipakánnámmu na nira yù kuruk, á likuránád da támma yù liwâ da, á manguruk ira mápugák.’

<sup>31</sup> Ngam kinagi ni Abrakam kuna, ‘Nu arád da ginnán yù inituddu ni Moyses ánná yù ira káruán nga ábbilinán ni Namarò, arád da gapay kurugan nu umay nakuan yù naginnanolay nga makkagi nira.’”

## 17

*Yù Mesimmu sù Tolay nga Mamalliwâ*

*Mattiü 18:6-7, 21-22; Markus 9:42*

<sup>1</sup> Á kinagi ni Apu Kesu sù ira makituddu kuna, “Negagángay yù awayyá na tolay nga malliwâ. Ngam makállállâ ira nga mamápáyâ ánná mangirudduák ta malliwâ yù ira kábulud da. Bay e! Kábbi ira!

<sup>2</sup> Ta más napiá nakuan nu igakkâ da yù ággilingán ta mangi sù bullo nayù tolay, á itabbâ da ta bebay tapè matay, tapè awán ta mangituddu ta narákè sù ira kapángnguruk kâ Namarò.

<sup>3</sup> Magimuguk kayu laguk, ta arán naw tudduán ta narákè yù ira ikáttole naw. Á nu malliwâ yù kabbulun naw, gammán naw. Á nu mabbabáwi ta liwâ na, pakomán naw.

<sup>4</sup> Á nu ajjan yù tolay nga mameppitu nga malliwâ nikayu ta tangággaw, á mameppitu nga mattotoli nikayu nga makipakomá, máwák naw pakomán.”

*Yù Meyannung sù Ángngikatalà tam kâ Namarò*

<sup>5</sup> Á yù ira sinudduán ni Apu Kesu, kinagi ra kuna, “Apu, pasikanam mu bì yù ángngikatalà mi kâ Namarò.”

<sup>6</sup> Á kinagi ni Apu, “Mássiki nu makapi paga yù ángngikatalà naw, nga kunnay ta kabajjítan nga bini, á ajjan nakuan yù awayyá naw nga makkagi sawe káyu, ‘Mabaddul ka nga meyalî ngá memulá ta bebay! á mapalurò!’

*Yù Meyannung sù Tarabáku tam nga Masserbi kâ Namarò*

<sup>7</sup> Á kinagi ni Apu Kesu, “Á ta ángngarigán nu ajjan yù tolay nga eggá yù aripan na, á mattarabáku yù aripan na sù ákkomanán nayù yápu na onu manaron sù ayám na. Á sangaw nu págák, lubbè ta balay nga maggagu sù ákkomanán. Á anni panò yù kagian nayù yápu na kuna? Kagian na panò ta umay kumán?”

<sup>8</sup> Ari gemma, ngam kagian na galâ, 'E ka bì mabbaggaw, á pataliám mu yù barawásim, á magapi ka tapé kumánà, ta sikán yù mapolu nga kumán, á ta kabalik ku kumán, á kumán ka gapay,' kun na.

<sup>9</sup> "Á ta ángngarigán nu tuppálan nayù aripan yù ipakuá nayù yápu na kuna, dayáwan na panò nayù yápu na? Ari gemma, ta yáyù gemma yù tarabáku nayù aripan.

<sup>10</sup> Á sikayu gapay, ta kabalín naw manuppál sù ngámin nga ipakuá ni Namarò nikayu, á kagian naw lâ, 'Ara-aripan kami lâ, á sinuppál mi lâ yù inipakuá na nikami nayù yápu mi megapu sù allà na nikami.'

*Pamammapiá ni Apu Kesu sù ira Mapulu nga Naggoggong*

<sup>11</sup> Á sù ánge ri Apu Kesu ta Jerusalem, nallakák ira sù lállátán na purubinsia na Samaria áんな Galilia.

<sup>12</sup> Á pakáramni ra ta tádday nga babálay, nerapunád da yù mapulu nga tatolay nga naggoggong, ngam arayyu lâ yù nanáddagád da.

<sup>13</sup> Á kinatolád da si Apu Kesu, á kinagi ra kuna, "Mesturu, ikállà kami bì!" kud da.

<sup>14</sup> Á pakasingan ni Apu Kesu sù ira naggoggong, kinagi na nira, "E kayu sù ira pári, tapè innad da yù baggi naw," kun na. Á sù pappángè da nga umay sù pári, ikáddagâ lâ nammapiá iren.

<sup>15</sup> Á yù tádday nira, pakasingan na ta nammapiá ngin, dagarágâ nanoli, nga makkatakatol sù áddáyo na kâ Namarò.

<sup>16</sup> Á pakáddè na kâ Apu Kesu, namalittúkak ta arubáng na nga nabbalabálâ.

Á yane tolay nga nanoli nga nabbalabálâ kâ Apu Kesu, aggina yù taga Samaria nga ari Kudio, nga ikalusso nayù ira Kudio.

<sup>17</sup> Á kinagi ni Apu Kesu sù ira mepulupulù kuna, "Ari panò mapulu yù ira nammapiá? Á aijan saw yù tádday. Isaw giád da panò nayù ira siám?

<sup>18</sup> Á ngattá, ta yawe lâ nga ari Kudio yù nattoli nga maddáyaw kâ Namarò!"

<sup>19</sup> Á kinagi na gapay sù tolay, "Gumikkáng ka, ta móanaw ken, ta nammapiá ken megapu sù ángngikatalà mu nikán," kun na.

*Yù Meyannung sù Dattál nayù Pammagure ni Namarò*

*Mattiu 24:23-28, 37-41*

<sup>20</sup> Á aijan yù ira Parisio nga minay nangiyabbû kâ Apu Kesu nu káni yù dattál nayù pammagure ni Namarò. Á simibbák si Apu Kesu, á kinagi na, "Awán bulubugá ta pakasinganán naw sù dattál nayù pammagure ni Namarò.

<sup>21</sup> Á ari makagi na tolay ta aijan saw onu aijan tán, gapu ta aijanin galâ sù nonò nayù ira manguruk."

<sup>22</sup> Á kinagi ni Apu Kesu sù ira makituddu kuna, "Mapattû kayu sangaw nga maningen sù mássiki lâ tádday nga ággó nayù pammagurè saw dabbuno, sikán nga Kaká na ngámin na tatolay, ngam arán naw masingan.

<sup>23</sup> Á sangaw aijan yù ira umay makkagi ta 'Ye, aijan tán!' Onu kagiad da, 'Aijan saw!' Ari kayu mepulù nira! Arán naw pasikkálan!

<sup>24</sup> Ta kunnay ta kilâ nga mamannawák ta lángì, kunnian sangaw yù pattolì ta dabbuno, sikán nga Kaká na ngámin na tatolay.

<sup>25</sup> Ngam mówák ta olu nga attamák ku yù aru nga panigirigâ da nikán áんな panaki da nikán nayù ira tatolay nga matolay ta ággawo.

<sup>26</sup> "Á noka nu maddaggunà mattoli, sikán nga Kaká na ngámin na tatolay, á naggittá yù kustombare nayù ira tatolay sù kustombare ra ngaw ta keggá ra ngaw di Noe.

<sup>27</sup> Ta yá lâ sinángngák da ngaw yù pakkákád da, pamissád da áんな pangatáwa ra, áddè ta ággaw nga pamatlallung ni Namarò kári Noe sù dakal nga barangay. Á jmittál yù paddakal na danum, á nalítù yù dabbun, á neburuk yù ira tatolay nga ari simillung sù barangay, á nalaggabán ira.

<sup>28</sup> "Á kunnay gapay sù kingngúra ngaw ta keggá ri Lot, ta sinángngák da lággapay yù pakkákád da, pamissád da, paggatagátang da, pallakaláku ra, pammulá ra, áんな pabbala-be ra.

<sup>29</sup> Á kapálllikul di Lot nga nánaw ta ili na Sodoma, ikáddagâ lâ aijan yù api áんな asupri nga naggapu ta lángì, nga nappannà sù ili na Sodoma, á natuggi yù ira ngámin nga tatolay tán.

<sup>30</sup> Á kunnay sù kustombare ra ngaw nayù ira tatolay ta keggá ri Lot, kunnian gapay sangaw yù ággaw nga pattolì, sikán nga Kaká na ngámin na tatolay.

31 “Á yáyù nga pappalánat takayu, ta sangaw nu duttál yù ággaw, á yù ira tatolay nga ajjan ta lawán na bale ra, ari iren nakuan tullung nga umay mangâ sù kukuá ra. Á yù ira nga ajjan ta ákkomanád da, ari ira nakuan lubbè.

32 Á nonotan naw yù ngaw atáwa ni Lot, tapè arán naw párigán! Ta pattálo ra ta ili na Sodoma, ninonò na lá nayù babay yù kukuá na, á arán na kinuruk yù kinagi ni Namarò. Á nabbáli ta asin nga nanáddak ta kun na kallang.

33 Á yù tolay nga mangiddù ta baggi na ta dabbuno, á matay gemma galâ. Ngam yù tolay nga mangitapil sù baggi na megapu sù ángnguruk na kâ Namarò, napiá yù áaggián na, ta mesipà kâ Namarò ta áddè ta áddè.

34 “Á kagiai ku nikayu, ta ángngarigán nu gabi yù tappi ku, á nu ajjan duá nga tolay nga madduruk nga makkaturuk, á málâ yù táddy, á mabattáng yù táddy.

35 Á kunnay gapay sù ira duá nga bábbay nga mabbáyu, ta málâ yù táddy á mabattáng yù táddy.

36 Á mássiki yù ira duá gapay nga mattarabáku sù ákkomanán, málâ yù táddy á mabattáng yù táddy.”

37 Á yù ira makituddu kâ Apu Kesu, pakaginná ra karannian, kinagi ra kuna, “Apu, isaw gián na?” Á kinagi na, “Yù gián nayù natay, yáyù pagunnurán nayù ira bukkaw.”\*

## 18

### *Yù Babay nga Bálú áんな yù Kues*

¹ Á nagángngarigán si Apu Kesu sù ira makituddu kuna, ta ituddu na nira ta máwák da nga ari malurâ nga makimállà kâ Namarò, á ari ira mabbábâng sù ángngikatalà da kuna.

² Á kinagi ni Apu Kesu, “Ajjan sù táddy nga ili yù kues nga ari bulubugá maganássing kâ Namarò, á arán na gapay pakimorayán yù ira kábulun na nga tatolay.

³ “Á téne ili, ajjan yù babay nga bálú nga sigidá nga umay sù kues, á kagian na kuna, ‘Abbágám mà bi, ta ajjan yù tolay nga iddâ nangâ lá ikeká, nga awánà gemma ta liwâ,’ kun na.

⁴ Á ta olu, arán na sinángngák nayù kues. Ngam manganánnuán, ninonò na, nga kun na, ‘Mássiki arák ku ikássing si Namarò áんな awán ta pasirák ku sù ira ikáttolé,

⁵ ngam panunnuták ku yù mangikeká sù babay, maraké makkara-ángay yù babay nikán, áddè ta arák ku kalurâ!’”

⁶ Á kabalin na nagángngarigán ni Apu Kesu, á kinagi na, “Naginná naw yù kingnguá nayù kues, ta mássiki nu arán na inabbágán yù babay ta olu nga ánge na kuna, ngam inabbágán na galâ.

⁷ Á nepatalugáring kâ Namarò, ta ari panò dán nga naparán nga mangabbák sù ira tatole na, nga sigidá makimállà kuna ta ággaw áんな gabi? Abbágán na ira gemma, á arán na ira ikikkítulán.

⁸ Ta kuruk yù kagiak ku nikayu, ta dagarágâ nga abbágán ni Namarò yù ira tatole na. Ngam sangaw nu mattolingâ ta dabbuno, sikán nga Kaká na ngámin na tatolay, ajjan panò sangaw yù ira marángnganák ku nga manguruk nikán? Baddì ira lá, ta aru yù ira manakì nikán.”

### *Yù Duá ira nga Minay Nakimállà sù Mangilin nga Kapilliá ta Jerusalem*

⁹ Á nagángngarigán si Apu Kesu, ta ammu na ta ajjan yù ira makkagi ta aggira yù kapiánán, á iluddè da yù ira kábulud da.

¹⁰ Á kinagi ni Apu Kesu nira, “Ajjan yù duá nga lálláki nga minay sù mangilin nga kapilliá ta Jerusalem, tapè makimállà ira. Á Parisio yù táddy, á yù táddy yù mináttuki ta buwi.

¹¹ Á minárrayu yù Parisio ta baddi sù mináttuki ta buwi, á nanáddak nga nakimállà, á kinagi na, ‘Apu Namarò, mabbalabálakà nikaw ta aringâ negittá sù ira káruán, ta aringâ mokkuk, aringâ massiri, aringâ minángngarallaw, á aringâ gapay negittá téne tolay nga mináttuki ta buwi.

¹² Á sikán, mamidduángâ nga ari kumán ta tangaligguán tapè makimállakà. Á iyawâ ku nikaw yù mekamapulu sù ngámin nga málâ ku,’ kun na. Yáyù yù ákkimállà nayù Parisio.

¹³ “Ngam yù tolay nga mináttuki ta buwi, minay nanáddak ta arayyu, á nakkummak áんな kidduk na yù góko na, gapu ta maraddam sù liwâ na. Á kinagi na, ‘Apu Namarò, ikállà mà bi, ta minálliwákà!’ kun na.

\* 17:37 Á yù kebalinán nayù kinagi na támma, ta alistu yù keparámak nayù nesimmu. Á yù táddy nga kebalinán na yù aru nga tatolay nga maggiraw sangaw nu pakarámak da. Otturu, yù bukkaw yù panákkilalán nayù ira ngaw suddálu nayù ira mammaguray ta ili na Roma.

14 “Á kuruk yawe nga kagiak ku nikayu, ta pinakomá ni Namarò galâ yù mináttuki ta buwì ánnè sù Parisio. Á yù ira nga mappeddaráyaw, aggira yù mepasiránan ta arubáng ni Namarò. Ngam yù tolay nga tumulù, nga makipakomá kâ Namarò sù liwâ na, aggina yù meparáyaw.”

*Yù Pangikallà ni Apu Kesu sù ira Ábbing*

*Mattiu 19:13-15; Markus 10:13-16*

15 Á tádday ággaw sù arád da paga pakáddè di Apu Kesu ta Jerusalem, á minay yù ira tatolay nga iniyángé ra yù ira ánâ da kâ Apu Kesu, tapè ipotun na yù limá na sù ira ábbing ta kunnay ta kustombare ra, á kagian na yù pangiddù ni Namarò nira. Á yù ira makituddu kâ Apu Kesu, nasingad da yù pangiyángé ra sù ira ábbing, á gimmá ra ira.

16 Ngam inagálán ni Apu Kesu yù ira ábbing, á kinagi na sù ira makituddu kuna, “Arán naw gammán yù ánge nayù ira ábbing nikán, ta yù ira tatolay nga kunnay nira, aggira yù mesipà sù pammagure ni Namarò.

17 Á kuruk yawe nga kagiak ku nikayu, nu ari kayu tumulù nga mangikatalà kâ Namarò ta kunnay sù ángngikatalà abbing, ari kayu bulubugá mesipà sù pammagure na.”

*Yù Ánge nayù Maríku kâ Apu Kesu*

*Mattiu 19:16-30; Markus 10:17-31*

18 Á minay kâ Apu Kesu yù tádday nga Kudio nga makáwayyá, á kinagi na, “Mesturu, sikaw yù kapiánán nga mangituddu. Á anni laguk yù akkuák ku, tapè mesipakà kâ Namarò ta áddè ta áddè?” kun na.

19 Á kinagi ni Apu Kesu kuna, “Ngattá, ta kagiam mu ta sikán yù kapiánán? Awán bulubugá ta kapiánán, nu ari lâ si Namarò!

20 Á ammul gemma yù tuttulam mu nakuan nga tunung ni Namarò: Ari ka mangarallaw, ari ka mamapátay, ari ka makkokò, ari ka massirisiri, á pakimorayám mu yù ira darakal mu,” kun na.

21 Á kinagi nayù tolay, “Wan, á sinuppál ku ngámin dannian áddè sù kabaddì ku,” kun na.

22 Á kinagi ni Apu Kesu kuna, “Ajjan lâ paga yù akkuám mu nakuan, ta em mu iláku yù ngámin nga kukuám, á isinek mu yù pallakuám mu sù ira magáwák, tapè ajjan yù táli nayù kukuám nga pakappián ni Namarò ta lángi. Á kabalim mu manuppál karannian, umay ka laguk tumuttul nikán,” kun na.

23 Ngam ta pakaginná nayù tolay sù kinagi na, nerallà yù daddam na, gapu ta aru yù kukuá na.

24 Á pakasingan ni Apu Kesu ta maraddam yù maríku, kinagi na sù ira makituddu kuna, “Marígå garè nga tumulù yù maríku kâ Namarò, tapè mesipà nakuan sù pammagure na.

25 Á ta ángngarigán, kunnay ta karigâ na labbù na dakal nga ayám nga kamel sù abbû na dágum, á kunnian gapay, marigâ yù kesipà nayù maríku sù pammagure ni Namarò.”

26 Á napállâ yù ira nakaginná sù kinagi na. Á kinagi ra, “Á nu arán na awayyá na maríku na mesipà sù pammagure ni Namarò, á asinny laguk yù mesipà?”

27 Á kinagi ni Apu Kesu nira, “Mássiki nu arán na awayyá na tolay nga palurotan, awayyá ni Namarò nga palurotan. Á yáyù nga meyígù yù ira ngámin nga manguruk kuna, mássiki nu maríku onu pobare,” kun na.

28 Á kinagi ni Eduru, “Apu, nonopam mu kami, ta nánawám mi ngámin, tapè tumuttul kami nikaw.” kun na.

29 Á kinagi ni Apu Kesu nira, “Kuruk yawe nga kagiak ku nikayu, ta nu pánawán na tolay yù bale na, atáwa na, wáwwagi na, darakal na, onu ánâ na tapè mesipà sù pammagure ni Namarò,

30 á aru yù báli na nga napiá nga meyawâ kuna ta paggián na paga ta dabbuno ánnè sù nánawán na, á mepattolay noka kâ Namarò ta áddè ta áddè.

*Pilluan ni Apu Kesu Magubobuk sù Meyannung ta Pate na*

*Mattiu 20:17-19; Markus 10:32-34*

31 Á si Apu Kesu, inililli na yù ira mapulu duá nga sinudduán na, á kinagi na nira, “Ginnán naw bi yù kagiak ku, ta umay ittam ta Jerusalem. Á tappi tam tán, mapalurò yù ngámin nga inipetúrá na ngaw ni Namarò sù ira ábbilinán na, nga mesimmu nikán nga Kaká na ngámin na tatolay.

32 Ta gaputad dangà sangaw, á iyawâ dangà sù ira ari Kudio. Á uyu-uyawad dangà, pakkakagiád dangà, ánnna pallulutábád dangà.

33 Á palapaligatad dangà, á papatáyad dangà. Ngam maginannolayà ta mekatallu nga ággaw,” kun ni Apu Kesu.

<sup>34</sup> Ngam arád da bulubugá nánnámmuán nayù ira sinudduán na yù kinagi na, gapu ta kunnay ta monak nga nelímak nira, á arád da nánnámmuán yù kebalinán na.

*Yù Pamammapiá ni Apu Kesu sù Buling*

*Mattiu 20:29-34; Markus 10:46-52*

<sup>35</sup> Á paddaggud di Apu Kesu tumunù sù ili na Jeriku, ajjan yù tolay nga buling nga ngitutubang nga makilimù ta aggik na dálán.

<sup>36</sup> Á ta pakaginná nayù buling ta aru yù ira tatolay nga mattalebák, á kinagi na, “Anni yù nesimmu? Ngattá, ta aru yù mattatalebák?” kun na.

<sup>37</sup> Á kinagi ra kuna, “Mattalebák si Apu Kesu nga taga Nasaret,” kud da.

<sup>38</sup> Á nakkatol, á kinagi na, “Apu Kesu, nga ginaká ni Patul Dabid, ikállà mà bil!” kun na.

<sup>39</sup> Á yù ira tatolay nga napolu, gímmá ra, á kinagi ra, “Magimammá ka!” kud da. Ngam iniyásikan na nakkatol, nga kun na, “Sikaw nga ginaká ni Patul Dabid, ikállà mà bil!”

<sup>40</sup> Á pakaginná ni Apu Kesu sù pakkatol nayù buling, á nagginnà, á kinagi na nira ta iyángé ra yù buling kuna. Á pakerakkì da kuna, nagiyabbù si Apu Kesu sù buling.

<sup>41</sup> “Anni yù ikáyá mu nga akkuák ku megapu nikaw?” Á kinagi na, “Apu, gustù ta makasinganakin,” kun na.

<sup>42</sup> Á kinagi ni Apu Kesu kuna, “Wan. Makasingan ken laguk, ta napammapiá ken megapu sù ángngikatalà mu nikán.”

<sup>43</sup> Á dagarágå nakasingan, á nepattututtul nira nga maddáyaw kâ Namarò. Á yù ira tatolay, naddáyaw ira gapay kâ Namarò gapu ta nasingad da yù nesimmu.

## 19

*Pakkaragâ ni Sakio nga Makasingan kâ Apu Kesu*

<sup>1</sup> Á nattalebák di Apu Kesu ta ili na Jeriku.

<sup>2</sup> Á ajjan tán yù tolay nga maríku nga mangngágan ta Sakio. Aggina yù tádday nga káttannangán nayù ira mináttuki ta buwì.

<sup>3</sup> Á gustu na nga innan si Apu Kesu, ngam awán ta awayyá na, gapu sù káru nayù ira tatolay ánná alinná garè si Sakio.

<sup>4</sup> Á yáyù nga nakkarerá nga napolu nga nakkalay ta káyu, tapè masingan na sangaw nu mattalebák tán.

<sup>5</sup> Á pakáddè ni Apu Kesu ta káyu nga gián ni Sakio, á nattánguk, á kinagi na kâ Sakio, “Á apurám mu ámmutták, ta ek ku ta balem magammái!” kun na.

<sup>6</sup> Á dagarágå gimitták si Sakio, á ayatán nga mamaddulò kuna.

<sup>7</sup> Á pakasingan nayù ira tatolay ta minay si Apu Kesu sù bale ni Sakio, naddagaragim ira, á kinagi ra, “Ngattá, ta makiálliuk yawe tolay sù bale nayù minálliwâ!” kud da.

<sup>8</sup> Ngam si Sakio, nanáddak ta arubáng nayù ira tatolay, á kinagi na kâ Apu Kesu, “Apu, iyawâ ku yù gadduá nayù ngámin nga kukuá sù ira pobare. Á yù sinuítì ku, taliák ku ta taggiappá yù taggitáddy,” kun na.

<sup>9</sup> Á pakaginná ni Apu Kesu sù kinagi ni Sakio, nga italákkuruk na, á kinagi ni Apu Kesu kuna, “Sakio, kunañane ta ággawo meyígù kayin ánná yù ira kábbalem! Á ari kayu mekanakaná sù pamagikáru ni Namarò ta tolay, gapu ta negittá yù ángngikatalà mu kâ Namarò sù ángngikatalà ni Abrakam. Yáyù nga mepasingan ta kuruk nga ginaká na ka ni Abrakam.

<sup>10</sup> Á yáyù nga minayà saw, sikán nga Kaká na ngámin na tatolay, ta ek ku agálán ánná iyígù yù ira tatolay nga nagawáwan megapu sù liwâ da, tapè umay ira makiyápu kâ Namarò ánná mesipà ira kuna.”

*Yù Pamalabálà ni Apu sù ira Mekatalà*

*Mattiu 25:14-30*

<sup>11</sup> Á pallakák di Apu Kesu ta dálan, maddaggun ira nga makáddè ta Jerusalem. Á yù ira tatolay, gininná ra ta napiá yù kinagi ni Apu Kesu, ta kagiad da ta sangaw nu makalabbè ira ta Jerusalem, yáyù pamegapu nayù pammagure ni Namarò ta dabbuno. Á yáyù nga nagángngarigán si Apu Kesu nira.

<sup>12</sup> Á kinagi ni Apu Kesu nira, “Ajjan yù tolay nga ginaká na patul nga nágalán ta umay ta arayyu nga páppatulán, tapè málâ na yù pakáwayyá na nga mappatul, á tapè manoli nga mammaguray sù gián na.

13 Á lage na mánaw sù gián na, inagálán na yù ira mapulu nga aripan na, á iniyawâ na nira nga katággitádday yù pirâ nga buláwán, á kinagi na nira, 'Sù káwák ku, pagaruan naw yawe kuártu,' kun na. Á nánaw.

14 "Á yù ira káruán nga tatolay nga maggián sù lugár na, malussaw ira kuna. Á yáyù nga jinok da yù ira tumuttul kuna nga makkagi ta panakitád da nga mappatul nira.

15 Á mássiki nu manaki ira kuna, ngam nálâ na yù pakáwayyá na nga mappatul, á nanoli sù gián na. Á inipágál na yù ira aripan na nga iniddán ta pirâ, tapè ammu na nu pígiá yù naganánsiá ra.

16 Á minay yù tádday nga aripan, á kinagi na, 'Apu Patul, nabbalin ta mapulu yù tádday naga pirâ nga iniyawâ mu nikán,' kun na.

17 'Á napiá yù kingnguám,' kun nayù patul kuna. 'Á sikaw yù napiá nga aripan. Á gapu ta pangikatalakán ka tâ baddì nga inikatalà ku nikaw, á iyawâ ku nikaw yù pakáwayyám sù mapulu naga ili,' kun nayù patul kuna.

18 "A manganánnuán, minay yù mekarúá nga aripan, á kinagi na, 'Apu Patul, pinabbalik ku ta límá yù tádday nga iniyawâ mu nikán,' kun na.

19 'Á sikaw gapay, mammaguray ka laguk ta límá nga ili,' kun nayù patul kuna.

20 "Á minay yù tádday nga aripan ta arubáng nayù patul, á kinagi na, 'Apu Patul, ajjan saw yù pirâ mu nga nabungun, nga pinakappiáku,

21 gapu ta maganássingà nikaw. Ta ammù ta mapporay ka nga maríku megapu sù bannák nayù ira káruán nga tatolay, ta apam mu ta kukuám yù arám mu pabbannagán,' kun na.

22 Á kinagi nayù patul kuna, 'Mapanunnután ka megapu sù kinagim, sikaw nga naráké naga aripan! Ta kinagim ta ammul ta sikán yù mapporay nga mangâ sù arák ku pabbannagán.

23 Á nu ammul yian, ngattá ta arám mu inibángku yù kuártu, tapè málâ ku yù baddì naga ganánsiá na sù panoli!

24 "Á kinagi na laguk nayù patul sù ira nanáddak tán, 'Apan naw yù kuártu na, á iyawâ naw sù tolay naga eggá kuna yù mapulu,' kun na.

25 Ngam kinagi ra, 'Á wan, Apu, ngam ajjanin gemma yù mapulu kuna!' kud da.

26 Á kinagi nayù patul nira, 'Wan, á kuruk yawe naga kagiak ku nikayu. Yù tolay naga mekatalà, naga napiá yù ángngiyusá na sù eggá kuna, malannapán yù eggá kuna. Ngam yù tolay naga ari napiá yù ángngiyusá na sù nekatalà kuna, mári kuna mássiki yù baddì naga nekatalà kuna.

27 Á yù ira naga malussaw nikán, naga nanakì ta sikán yù mammaguray nira, iyángé naw ira saw, tapè papatáyan naw ira ta arubáng ku.' "

### *Yù Tallung di Apu Kesu ta Jerusalem*

*Mattiu 21:1-11; Markus 11:1-11; Kuan 12:12-19*

28 Kabalin na nagángngarigán ni Apu Kesu nira, á minay napolu nga mappángè ta Jerusalem.

29 Á pakarakkì da sù ira ili na Bepagi ánnna Bitania, naginnà ira sù puddul nga mangngágán ta Olibo. Á inagálán ni Apu Kesu yù duá nga makituddu kuna, á kinagi na nira,

30 "Mapolu kayu sù ili, á sù tallung naw, marángnganán naw yù kígaw nga kabáyu naga ari paga nattakayán. Ubbarán naw, á iyángé naw saw.

31 Á nu ajjan yù mangiyabbû ta anni má ta ubbarán naw, á kagian naw lá kuna, 'Máwák ni Apu,' kun naw kuna."

32 Á minay yù ira jinok ni Apu Kesu, á nélek da ngámin yù kunnay sù kinagi na.

33 Á pagubbák da sù kaddang nayù kígaw, iniyabbû na nira nayù makákkua, "Anni má ta ubbarán naw?"

34 Á kinagi ra, "Máwák ni Apu."

35 Á iniyángé ra yù kígaw kâ Apu Kesu. Á ininánnâ da yù gámì da sù barâ na, á pinakkabáyu ra si Apu Kesu kuna.

36 Á pakkabáyu na nga mappángè ta Jerusalem, ininánnâ nayù ira káruán nga tatolay yù gámì da ta dálan.

37 Á maddaggun nga makáddè di Apu Kesu ta ili na Jerusalem. Á kitáru yù ira naga mepulù kuna. Á utù da sù puddul na Olibo, namegapu ira ngámin naga ikatakatol da yù áddáyo ra kâ Namarò, gapu ta pagayáyâ da sù ngámin naga pinagaddátu na naga nasingad da.

38 Á kinagi ra,

"Dayáwat tam yù Patul nga jinok ni Namarò, naga umay mammaguray nittam!  
Meparáyaw ta lángi si Namarò naga Kotunán, ánnna napiá ánnna magímmammà yù gián na!"

<sup>39</sup> Á yù ira káruán nga Parisio nga nepulù nira, gapu ta kagiad da ta tolay lâ si Apu Kesu, kinagi ra kuna, “Mesturu, gammám mu yù paddáyo nayù ira tatolay, ta malliwâ íra!” kud da.

<sup>40</sup> Á simibbák si Apu Kesu, á kinagi na nira, “Kuruk yù kagiak ku nikayu, ta nu magimammà ira nakuan, á yù ira batu ta dálan yù makkatol nga maddáyaw kâ Namarò.”

#### *Yù Pakkulè ni Apu Kesu sù ira taga Jerusalem*

<sup>41</sup> Á pakáránni ra ta ili na Jerusalem, nasingan ni Apu Kesu yù ili, á nakalò yù pangikállà na sù ira tatolay nga taga Jesusalem, ánakkulé si Apu Kesu megapu nira.

<sup>42</sup> Á kinagi na, “Sikayu nga taga Jerusalem, parè bì nakuan ta kánnámmuán naw yù paggapuán nayù ággimammà naw. Parè bì ta kánnámmuán naw yù máwák naw nga makipakomá kâ Namarò kunangane ta ággawo, tapè mapiá nakuan yù ággián naw kuna! Ngam awániń ta awayyá naw nga mánnámmuán, ta nelímak nikayu.

<sup>43</sup> Á kábbi kayu, ta duttál yù ággaw nga umay yù ira malussaw nga makigerrá nikayu. Á alikúbungad da kayu, tapè ari kayu makalawán.

<sup>44</sup> Á papatáyad da kayu áンna yù ira ánâ naw. Á bugayad da yù ngámin nga babále naw, á iwarawarâda yù batu nga napadday ta balay, gapu ta panaki naw sù ánge ni Namarò nga mangiyígú nikayu!”

#### *Yù Ánge ni Apu Kesu sù Mangilin nga Kapilliá ta Jerusalem*

*Mattiū 21:12-17; Markus 11:15-19; Kuan 2:13-22*

<sup>45</sup> Á pakatunù di Apu Kesu ta Jerusalem, dagarágâ nga minay sù mangilin nga bale ni Namarò, á pinaturiák na yù ira nga malláku tán.

<sup>46</sup> Á pamaturiák na nira, kinagi na nira, “Ajjan yù netúrâ nga kinagi ni Namarò, ‘Yù mangilin nga bale yù ákkimállatán nayù ira tatolay.’ Ngam sikayu, pabbalinan naw ta pallakuán nayù ira minángngilogò!”

<sup>47</sup> Á ta kággaggaw minay si Apu Kesu nga mangituddu sù mangilin nga bale ni Namarò. Á yù ira kátannangán nga pári áンna yù ira mangituddu sù tunung ni Moyses áンna yù ira tatolay nga makáwayyá, inigagánge ra ipapátyat.

<sup>48</sup> Ngam arád da bulubugá paga makuá, gapu ta makkaraǵâ yù ira tatolay nga magginná sù ngámin nga kagian na.

## 20

#### *Iyabbû da yù Naggapuán nayù Pakáwayyá ni Apu Kesu*

*Mattiū 21:23-27; Markus 11:27-33*

<sup>1</sup> Á tádday ággaw nga pangituddu ni Apu Kesu sù ira tatolay sù mangilin nga kapilliá, inilayalayá na yù napiá nga dámak nga meyannung sù ángngiyígú ni Namarò. Á minay sù gián na yù ira kátannangán nga pári áンna yù ira mangituddu sù tunung ni Moyses áンna yù ira giriámán na Kudio.

<sup>2</sup> Á kinagi ra kuna, “Asinni yù nangiyawâ nikaw sù pakáwayyám nga akkuám mu nga kunnia? Asinni naddok nikaw?” kud da.

<sup>3</sup> Á kinagi ni Apu Kesu nira, “Ajjan bì mapolu iyabbû ku nikayu nga tabbagan naw.

<sup>4</sup> Isaw naggapuán nayù pakáwayyá ni Kuan nga Minánnigù? Jinok ni Namarò, onu tolay yù naddok kuna?” kun na.

<sup>5</sup> Á nallilli ira laguk nga nakkaká-ubobuk nu anni yù itabbák da. Á kinagi ra, “Nu kagiat tam nakuan ta si Namarò yù naddok kâ Kuan, á iyabbû na sangaw nu anni má ta arát tam kurugan yù kinagi ni Kuan nga meyannung kâ Namarò?

<sup>6</sup> Ngam máyâ panò nu kagiat tam ta tolay yù paggapuán nayù pakáwayyá na, maraké payangan nayù tatolay ittam? Ta kurugan nayù ira tatolay ta ábbilinán ni Namarò si Kuan,” kud da.

<sup>7</sup> Á kabaliid da nakkaká-ubobuk, kinagi ra galâ kâ Apu Kesu, “Arám mi garè ammu nu asinni yù naddok kâ Kuan.”

<sup>8</sup> Á kinagi ni Apu Kesu nira, “Arák ku gapay kagian nikayu yù naggapuán nayù pakáwayyá.”

#### *Yù Pagángngarigán ni Apu Kesu nga Meyannung sù ira Manakì kuna*

*Mattiū 21:33-46; Markus 12:1-12*

<sup>9</sup> Á nagángngarigán si Apu Kesu mángin sù ira tatolay, á kinagi na, “Ajjan yù tolay nga nammulá ta úbas. Á inipataron na yù kamulán na sù ira makirabbun, gapu ta ajjan yù angayán na ta arayyu nga lugár, á ammu na ta mabayák tán.

<sup>10</sup>“Á dattál na kapusik nayù bungá na úbas, jinok nayù makáddabbun yù tádday nga aripan na ta umay mangá ta balle na. Á labbè na sù ira makirabbun, pinalapalù da, á pinapáno ra nga awán bulubugá ta iniyawâ da kuna.

<sup>11</sup>Á jinok na yù mekarúá nga aripan na, ngam kunnay sù napolu, pinalapalù da má nga inipasiránad da, á pinapáno ra gapay nga awán bulubugá ta inâ na.

<sup>12</sup>Á jinok na má yù mekallu gapay. Á binigarád da ánná pinapáno ra má.

<sup>13</sup>“Á ninonò na laguk nayù makákkua ta dabbun nu anni yù akkuán na. Á kinagi na, ‘Yawe yù akkuák ku. Dobak ku yù anâ ku nga iddukak ku, abernu pakimorayád da.’

<sup>14</sup>Ngam ta pakasingan nayù ira makirabbun sù anâ na, nakkaká-ubobuk ira, á kinagi ra, ‘Yawe yù pangiyawatán na sangaw nayù makákkua sawe dabbun. Papatayat tam laguk tapé kukuá tam yù dabbun na.’

<sup>15</sup>Á ginápù da, á inilawáda sù kamulán, á pinapáte ra.

“Á gapu ta kunnian kingnguá ra, á anni panò yù akkuán nayù makákkua ta kamulán sù ira makirabbun?

<sup>16</sup>Á aggina laguk yù umay, á papatayán na ira. Á ipataron na sangaw yù kamulán na sù ira tanakuán,” kun ni Apu Kesu. Á pakaginná nayù ira tatolay sù kinagi na, napállâ ira, á kinagi ra, “Ari lá nakuan mesímmu!” kud da.

<sup>17</sup>Ngam inni-innan ni Apu Kesu ira, á kinagi na nira, “Nu ari nakuan kunnian yù mesímmu, á anni panò yù kebalinán nayù dán nga inipetúrá ni Namarò? Yù batu nga inipuerá nayù ira mabbalay,

aggina yù sinullà ni Namarò nga panádagán nayù balay.”

<sup>18</sup>Á yù ira tatolay nga mangipuerá sù sinullà ni Namarò nga meyárik ta batu, á kunnay ira ta napannâ nga makattakattu ta batu. Á yù ira nga kunnay ta napannátán nayù batu, kunnay ira ta marappi nga maburâ.” Á yá kebalinán na, si Apu Kesu yù awayyá ra nga pakiyigután. Á nu lonád da yù awayyá ra, ari ira makipakomá kâ Namarò, á maggián ira lá nga ari napakomá yù liwâ da, á mekanakanâ ira sù pore ni Namarò.

### *Pangiyabbû da ta Meyannung ta Pappagá ra ta Buwi*

*Mattiū 22:15-22; Markus 12:13-17*

<sup>19</sup>Á yù ira mangituddu sù tunung ni Moyses ánná yù ira kátannangán nga pári, ammu ra ta aggira yù inubobuk ni Apu Kesu sù ángngarigán na, á nappanà yù lusso ra kuna. Á gaputad da nakuan, ngam arád da pinalurò gapu ta maganássing ira sù ira tatolay.

<sup>20</sup>Á yáyù nga sinissimmurád da. Á inagálád da yù ira nga jinok da ta umay ira manukuk kuna. Á appé pípiá ira nga magiyabbû kuna, tapé mález da yù awayyá ra nga mangikeká kuna ta arubáng nayù gubinador.

<sup>21</sup>Á jimikki ira laguk kâ Apu Kesu, á kinagi ra kuna, “Mesturu, ammu mi ta matunung yù ngámin nga ituddum ánná ngámin nga kagiam mu, á arám mu írumá yù ira tatolay, ta ituddum yù napiá nga ure ni Namarò nga ipatuppál na nittam.

<sup>22</sup>Á yáyù nga iyabbû mi nikaw, ari panò mekontará sù tunung ni Moyses nu mappagá ittam ta buwi kâ Patul Sisar ta Roma?” kud da.

<sup>23</sup>Á natákál ni Apu Kesu yù ángngilogò nayù ira nagiyabbû, á yáyù nga kinagi na nira,

<sup>24</sup>“Ipasingan naw bì nikán yù pirâ nga ipappagá naw nakuan ta buwi.” Á pakasingan ni Apu Kesu sù pirâ, iniyabbû na nira, “Asinni yù makámmammang ánná makángngágan nga nemárka sawe pirâ?” kun na. “Si Patul Sisar,” kud da.

<sup>25</sup>Á kinagi ni Apu Kesu nira, “Wan gemma! Á yáyù nga mappagá kayu ta buwi sù patul, ta kukuá na gemma. Á kunnian gapay sù kukuá ni Namarò, ta iyawâ naw gapay kuna yù kukuá na,” kun na.

<sup>26</sup>Á awán ta mález da nga liwâ na sù kinagi na ta arubáng nayù ira tatolay. Á nerallâ yù kapállâ da sù napiá nga initabbák na nira, á ari ira nakkituk.

### *Yù Meyannung ta Paginnanolay nayù ira Námmatay*

*Mattiū 22:23-33; Markus 12:18-27*

<sup>27</sup>Á ajjan gapay tán yù ira Sadusio. Aggira yù makkagi ta ari maginnanolay yù ira námmatay. Á minay ira gapay kâ Apu Kesu, á kinagi ra kuna,

<sup>28</sup>“Mesturu, ajjan yù initúrá na ngaw ni Moyses nga kagian na, ‘Nu matay yù laláki nga natayán na yù atáwa na nga awán ta anâ da, atawán nayù wagi na yù atáwa na, tapé nu maganâ ira, á ajjan yù mebiláng ta anâ nayù natay.’

<sup>29</sup>Á ajjan ngaw yù pitu nga lálláki nga mawwawági, á nangatáwa yù kaká, á natayán na yù atáwa na nga awán ta anâ da.

<sup>30</sup> Á yù mekaruá nga wagi na, inatáwa na yù atáwa nayù kaká na, á natayán na má, nga awán ta anâ da.

<sup>31</sup> Á kunnian má gapay sù mekatallu nga wagi na, áddè sù mekapitu. Natay ira ngámin nga awán ta anâ da.

<sup>32</sup> Á naporián nga natay gapay yù babay.

<sup>33</sup> Á nu kuruk ta maginnanolay yù ira námmatay noká, asinni laguk yù kukurugán nga atáwa na, ta inatáwa ra ngámin nga pitu?" kud da.

<sup>34</sup> Á kinagi ni Apu Kesu nira, "Mangatáwa yù ira tatolay ta dabbuno.

<sup>35</sup> Ngam sangaw nu duttál yù paginnanole nayù ira nga ibiláng ni Namarò ta mepángngà nga mepaginnanolay nga mesipá kuna ta lángì, ari ira maggagáttawa tán nga ággaw.

<sup>36</sup> Á ari ira matamatay, ngam kunnay ira sù ira daroban ni Namarò, ta ánâ na ira ni Namarò nga paginnolanay na.

<sup>37</sup> Á mássiki si Kákay Moyses, inituddu na ngaw yù paginnanole nayù ira námmatay. Ta nabibbik tam yù pangistoriá na sù dakkì na sù maggatagatang nga káyu, sù pakiubobuk ni Namarò kuna. Á kinagi ni Moyses ta si Namarò yù pakimorayád di Abrakam kári Isak kâ Akup.

<sup>38</sup> Á yáyù nga ammu tam ta matolay paga di Abrakam, gapu ta yù ira lâ nga matolay yù makapaddáyaw kâ Namarò, ngam ari gemma yù ira námmatay. Á ta ánnunganán ni Namarò, matolay paga yù ira ngámin, mássiki yù ira nga natayin yù baggi ra."

<sup>39</sup> Á yù ira káruán nga mangituddu sù tunung ni Moyses, kinagi ra lâ kâ Apu Kesu, "Mesturu, napiá yù initabbák mu!" kud da.

<sup>40</sup> Á napállâ ira ngámin, á yáyù nga awán bulubugá ta tolay nga magiyabbû kuna.

*Asinni yù Sinullà ni Namarò ta Mammaguray?*

*Mattiu 22:41-46; Markus 12:35-37*

<sup>41</sup> Á kinagi na laguk ni Apu Kesu nira, "Ajjan bì yù iyabbû ku nikayu. Ngattá ta ituddu ra ta ginaká ni Patul Dabid yù MakKiristu nga patul nga sinullà ni Namarò ta umay mammaguray?

<sup>42</sup> Ta aijjan yù initúrâ na ngaw ni Dabid sù libru nga Salmo\*, nga kunniauw:

'Si Apu Namarò, kinagi na sù Yápu,

"E ka bì magitubang ta jiwanák ku,

sù ággitubangán nayù Kotunán nga Patul,

<sup>43</sup> áddè ta arák ku appútan yù ira malussaw nikaw."

Yáyù yù ubobuk ni Namarò nga initúrâ ni Dabid.

<sup>44</sup> Á gapu ta kinagi ni Dabid ta Yápu na yù Patul nga sinullà ni Namarò, á kunnasi laguk ta kagiad da ta ginaká na galâ ni Dabid?"

*Yù Liwâ nayù ira Mangituddu sù Tunung ni Moyses*

*Mattiu 23:1-36; Markus 12:38-40*

<sup>45</sup> Á ta pakaginná nayù ira ngámin nga tatolay, sinabarangán ni Apu Kesu yù ira makituddu kuna. Á kinagi na nira,

<sup>46</sup> "Mappalán kayu, tapè arán naw párigán yù ira mangituddu sù tunung ni Moyses. Ta gustu ra lâ mabbarawási ta apaddu nga nakástá, nga mappassapassiár, tapè makiálimánu yù ira tatolay nira. Á ánge ra ta kapilliá, magitubang ira sù kapiánán nga ággitubangán. Á nu umay ira mepallálláng, gustu ra magitubang sù ággitubangán nayù meparáyw.

<sup>47</sup> Á ilogò da yù ira bábbay nga nabálu, ánná gubatad da yù ngámin nga kukuá ra. Á ta pakimállâ da, umay ira mappasingan nga makimállâ ta mabayák, nga kunnay ta napiá. Ngam agippípiá ira, á aru yù ikáru ra sangaw nu pagikaruán ni Namarò ira."

## 21

*Yù Inilimù nayù Bálu*

*Markus 12:41-44*

<sup>1</sup> Á ta keggá ra paga ta mangilin nga kapilliá, nallipay si Apu Kesu, á nasingan na yù ira maríku nga mangipay ta kuártu sù ággipayayán ta melimù.

<sup>2</sup> Á nasingan na gapay yù babay nga nabálu nga pobare nga minay nangipay ta duá lâ nga sintábu.

\* **20:42** Yù kebalinán na Salmo yù libru nga netúratán ta aru nga Kansion nga pidde nayù ira ngaw tatole ni Namarò, nga pakimállâ da ánná paddáyo ra kuna.

<sup>3</sup> Á kinagi ni Apu Kesu sù ira makituddu kuna, “Kuruk yawe nga kagiak ku nikayu, ta masingan naw yane babay nga bálu, á ta ánnungan ni Namarò, aru yù inilimù na ánnè sù ira ngámin.

<sup>4</sup> Á yù ira maríku, inilimù da yù baddì lâ nga naggapu sù sobará ra nga arád da igátáng. Ngam yù babay nga nabálu, inilimù na yù ngámin nga kuártu na, nga ipangâ na nakuan ta máwák na,” kun na.

*Kagian ni Apu Kesu yù Kabuge na noka nayù Mangilin nga Kapilliá ta Jerusalem  
Mattiui 24:1-2; Markus 13:1-2*

<sup>5</sup> Á aijan yù ira makkaká-ubobuk ta meyannung sù kapiá nayù mangilin nga kapilliá, gapu ta nakástá yù jijing na nga batu ánná yù aru nga makkakerumá nga aruátan na nga neyawâ kâ Namarò. A pakaginná ni Apu Kesu sù kinagi ra, á kinagi na nira,

<sup>6</sup> “Á danniaw ira nga masingan naw, duttál sangaw yù ággaw nga kabugubuge na, á awán ta batu nga ari mabugay,” kun na.

*Yù Karigirigâ na Tolay ta Dattál nayù Pagáddekkán na Ággaw  
Mattiui 24:3-14; Markus 13:3-13*

<sup>7</sup> Á iniyabbû da kuna, “Mesturu, sangaw nu anni yù kesimmu nayù kinagim? Á anni yù panákkilál mi ta dattál na?”

<sup>8</sup> Á kinagi na nira, “Mappalán kayu, tapè ari kayu melogò, ta aru yù umay nga makkagi ta aggira si Apu Kesu Kiristu. Á kagiad da gapay ta duttálín yù pagáddekkán na ággaw. Mappalán kayu laguk, á arán naw ira tuttulan.

<sup>9</sup> Á mássiki nu marámak naw sangaw ta aijan yù ira makigerrá ánná yù ira makiramá sù ira mammaguray nira, ngam ari kayu mabbagal, gapu ta kunniúrin yù mapolu nga mesimmu, ngam ari paga yù pagáddekkán na ággaw,” kun na.

<sup>10</sup> Á kinagi na laguk ni Apu Kesu nira, “Á yù tádday nga ili, makigerrá ira sù ira tanakuán nga ili. Á yù ira makkakerumá nga páppatulán ta dabbuno, makigerrá ira.

<sup>11</sup> Á aru yù lunik nga masikan. Á duttál yù bisin ánná makkakerumá nga tulágan ta káruán nga lugár. Á aru yù mesimmu ta lángì nga makapállâ ánná makánnanássing.

<sup>12</sup> “Ngam lage na kesimmu na, mapolu nga gaputad da kayu nayù ira malussaw nikayu, á jígirigádat da kayu. Á ikeká ra kayu sù ira makáwayyá ta kapilliá na Kudio, tapè ikarsel da kayu. Á iyángé ra kayu gapay ta arubáng nayù ira patul ánná yù ira gubinador megapu sù ángnguruk naw nikán.

<sup>13</sup> Á yáyù sangaw yù awayyá naw nga ipakánnámmu nira yù napiánga dámak nga meyannung nikán.

<sup>14</sup> “Á lage na kesimmu na, ipe naw yù urà naw laguk ta arán naw ikaburung yù itabbák naw nira.

<sup>15</sup> Ta nu bestigarád da kayu, sikán yù mangipakánnámmu nikayu sù kagian naw nira. Á arád da matabbák yù kagian naw, gapu ta ipakánnámmu nikayu yù napiánga itabbák naw sù ira malussaw nikayu. Á ari ira makatubáng nikayu.

<sup>16</sup> Á mássiki yù ira kanakanáyun naw, yù ira darakal naw ánná wáwwagi naw, á yù ira kákkopun naw gapay, aggira yù mangikeká nikayu, á papatáyad da yù ira káruán nikayu.

<sup>17</sup> Á yù ira ngámin nga tatolay, malussaw ira nikayu megapu sù ángnguruk naw nikán.

<sup>18</sup> “Ngam si Namarò, arán na kayu bulubugá tájjián. Ari kayu mabburung!

<sup>19</sup> Magattam kayu laguk. Ta mepattolay kayu kâ Namarò ta áddè ta áddè megapu sù napasigaggâ nga ángngikatalà naw nikán.”

*Yù Katalamán nayù Ili na Jerusalem  
Mattiui 24:15-21; Markus 13:14-19*

<sup>20</sup> Á kinagi na gapay ni Apu Kesu nira, “Á nu masingan naw yù aru nga suddálu nga lepuanád da yù ili na Jerusalem, yáyù nga kánnámmuán naw ta maddaggunin yù katalamán na.

<sup>21</sup> Á yù ira tatolay nga maggián ta purubinsia na Judiya, mattálaw ira nga umay ta puddul. Á nepatalugáring sù ira nga maggián ta ili na Jerusalem, mabbakkuì ira. Á yù ira nga aijan ta ákkomanád da ta lawán na ili, ari iren mattoli sù ili.

<sup>22</sup> Ta yáyù pamagikáru ni Namarò sù ira tatolay nga nangipuerá kuna, tapè mapalurò yù ngámin nga inipetúrâ na sù ira ngaw ábbilinán na.

<sup>23</sup> Á kábbi yù ira mabussi ánná yù ira mappasusu, ta mepallà yù karigirigâ nayù ira ngámin nga tatolay megapu sù ámmagikáru ni Namarò nira.

<sup>24</sup> Á mapapátay ta bayunetá yù ira káruán. Á yù káruán nga ari matay, gaputad da ira nayù ira ari Kudio, á iyángé ra ira nga mebáluk ta arayyu ta makkakerumá nga páppatulán. Á ta ili na Jerusalem, mammaguray yù ira ari Kudio, á maguray lâ yù akkuád da áddè ta pamatukkâ ni Namarò nira.”

*Yù Mesimmu Lage nayù Pattoli nayù Kaká na Ngámin na Tatolay  
Mattiu 24:29-31; Markus 13:24-27*

<sup>25</sup> Á kinagi na gapay ni Apu Kesu, “Á ta lage na pagáddekan na ággaw, aijan gapay yù mesimmu sù bilák, bulán ánnna bituan. Á kunnay gapay sù bebay, nga makánnnanássing yù gurú na ánnna palung na. Á yù ira tatolay ta ngámin nga lugár, merallà yù assing da, á mabagabagal ira megapu sù mesimmu.

<sup>26</sup> Á maganássing yù ira tatolay ánnna malupulupuk ira nga magiddak sù mesimmu ta ngámin nga dabbuno, nepatalugáring nu masingad da yù panguli nayù áaggián nayù bilák, bulán, ánnna bituan ta lángi, ta mapagali yù ngámin nga aijan ta lángi.

<sup>27</sup> Á umayà laguk nga mappasingan sù kunam ta lángi, nga mattoli sawe dabbuno, sikán nga Kaká na ngámin na tatolay, nga makáwayyá ánnna maddalingárang.

<sup>28</sup> Á nu mamegapu dannian nga ikássing, patattaman naw yù nonò naw ánnna magiddi-iddak kayu, ta duttálín yù kapalubbáng naw sù jígå naw.”

*Yù Keyarigán nayù Pattoli ni Apu Kesu ta Dabbuno  
Mattiu 24:32-35; Markus 13:28-31*

<sup>29</sup> Á nagángngarigán si Apu Kesu ta meyannung sù panoli na ta dabbuno, á kinagi na nira, “Inni-innan naw yù káyu nga igò ánnna yù ira ngámin nga káruán nga káyu gapay.

<sup>30</sup> Nu masingan naw ta massungngi yù don na, á ammu naw ta maddaggunin yù dagun.

<sup>31</sup> Á ta kunnian gapay, nu masingan naw danniaw nga mamegapu nga mesimmu ta kunnay sù kinagi, yáyù pakánnámmuán naw ta duttálín yù pammagure ni Namarò ta dabbuno.

<sup>32</sup> Á kuruk yù kagiak ku nikayu, aijan yù ira tatolay nga ari paga natay lage na kesimmu na ngámin.

<sup>33</sup> Á mássiki nu mappasá noka yù ngámin nga aijan ta lángi ánnna yawe dabbuno, ngam ari bulubugá mapatalián yù kinagi nikayu, gapu ta mapaluro ngámin.”

*Mapparán kayu tapè Dán nga Naparán kayin*

<sup>34</sup> Á kinagi na nira paga ni Apu Kesu, “Magimuguk kayu, marakè melingúnán naw sangaw yù kinagi nikayu, nu yá lá tángngagan naw yù pabbúyá naw, pappissán naw, ánnna pajigirigá naw sawe dabbuno. Ta nu mättamán naw, makaráring kayu sangaw nga kunnay ta masikuatán, nu duttál yù pagáddekan na ággaw.

<sup>35</sup> Ta ikáddagâ lâ duttál yù ággaw nga pamanunnù ni Namarò sù ira ngámin nga tatolay ta ngámin nga dabbuno, á makaráring ira.

<sup>36</sup> Á yáyù nga napiá nu mapparán kayu, á makimállà kayu kâ Namarò ta abbágán na kayu, tapè mapasigaggá yù ángnguruk naw kuna. Ta nu dán nga naparán kayu, á aijan yù awayyá naw nga magattam ta jíga nga kinagi nikayu nga mesimmu sangaw, ánnna mappelò kayu nu umay kayu ta arubáng ku, sikán nga Kaká na ngámin na tatolay,” kun ni Apu Kesu.

<sup>37</sup> Á naggián si Apu Kesu sù mangilin nga kapilliá ta kággággaw, nga mangituddu sù ira tatolay. Á ta kádagabi minay nagammâ sù puddul na Olibo.

<sup>38</sup> Á yáyù nga minay yù ira ngámin nga tatolay ta káda alippánnawák sù mangilin nga kapilliá nga magginná sù ituddu na.

## 22

*Yù Pangigagánge ra nga Mamapátay kâ Apu Kesu  
Mattiu 26:1-5, 14-16; Markus 14:1-2, 10-11; Kuan 11:45-53*

<sup>1</sup> Á maddaggunin yù piestá nga pakkákán nayù ira Kudio ta pán nga awán ta áppalappák na, nga mangngágán ta Panaddamád da sù Pattalebák nayù Daroban ni Namarò sù ira ngaw ginaká ni Israel túrin ta Egípto.

<sup>2</sup> Á yù ira kátannangán nga pári ánnna yù ira mangituddu sù tunung ni Moyses, inigagánge ra nga ipapátay si Apu Kesu, ngam inilímak da yù akkuád da, gapu ta assing da sù ira tatolay nga tumututtul kâ Apu Kesu.

<sup>3</sup> Á si Satanas, nagunagán na si Kudas Iskariote, nga tádday sù ira mapulu duá nga sinudduáni ni Apu Kesu.

<sup>4</sup> Á minay laguk si Kudas nakiubobuk sù ira kátannangán nga pári ánná yù ira kapítan nayù ira magguárdiá sù mangilin nga kapilliá, nu kunnasi sangaw yù pangipagápù na kâ Apu Kesu.

<sup>5</sup> Á nagayáyâ ira, á kinagi ra kuna ta táddanád da.

<sup>6</sup> Á pattatarátu ra, namegapu si Kudas nga massísim kâ Apu Kesu, tapè málek na yù awayyá na nga mangipagápù kuna sangaw nu awán ta tolay nga magaru nga mepulù kuna.

*Papparád da ta Kanad da sù Piestá nga Panaddamád da  
Mattiu 26:17-25; Markus 14:12-21; Kuan 13:21-30*

<sup>7</sup> Á ta piestá, jmittál yù ággaw nga pakkákád da ta pán nga awán ta áppalappák na, nga pangiyatáng da gapay sù kígaw na karneru kâ Namarò, nga kanad da ta panaddamád da.

<sup>8</sup> Á jinok ni Apu Kesu di Eduru kâ Kuan, á kinagi na nira, "Umay kayu mapparán ta kanat tam ta panaddamát tam sù pattalebák nayù daroban ni Namaró sù ira ngaw naggaká nittam," kun na.

<sup>9</sup> Á kinagi ra kuna, "Á isaw em mi papparánán?" kud da.

<sup>10</sup> Á kinagi na nira, "Umay kayu ta ili. Á labbè naw sangaw, marápun naw yù tolay nga namuttung ta ammutu. Tuttulan naw, ta yù balay nga tallungan na, yáyù gapay tallungan naw.

<sup>11</sup> Á kagian naw sù makábbalay, 'Yù Mesturu, ipeyabbû na nikami nu isaw gián nayù pakkákanám mi ta panaddamám mi sù pattalebák nayù daroban, aggina ánná síkami nga makituddu kuna,' kun naw.

<sup>12</sup> Á ituluk na kayu ta utun, sù dakal nga lágum nga ajjan kuna yù ngámin nga máwák tam. Yáyù papparánán naw," kun na.

<sup>13</sup> Á minay di Eduru, á nélek da yù ngámin nga kunnay sù kinagi na, á pinarád da yù kanad da.

*Yù Naporián nga Pakkákád di Apu Kesu ánná yù ira Sinudduán na  
Mattiu 26:26-30; Markus 14:22-26; 1 Korinto 11:23-25*

<sup>14</sup> Á ta pamúgák da, nallalálláng di Apu Kesu ánná yù ira mapulu duá nga sinudduán na.

<sup>15</sup> Á kinagi na nira, "Napiá ta ajjan ittam saw, ta karagaták ku nga kuruk nga mepal-lalálláng nikayu kunangan sù panaddamát tam sù pattalebák nayù daroban ni Namaró, pángè ku marigirigâ.

<sup>16</sup> Ta kagiak ku nikayu ta yawe lâ yù pakkákáku sù panaddamát tam, ta áddè ta kapalurò nayù ngámin nga kebalinán nayù piestá, sangaw nu ajjan ittam ta pammagurayán ni Namarò," kun na.

<sup>17</sup> Á inâ na yù passuelu nga ajjan kuna yù inumad da, á nabbalabálà kâ Namarò, á iniyawâ na nira. Á kinagi na nira, "Pattutubbátán naw nga inuman ta ággibaddì.

<sup>18</sup> Á aringakin makenum ta tabbuk na úbas, áddè ta dattál nayù pammagure ni Namarò ta dabburuno, á yáyù pakenum ku má," kun na.

<sup>19</sup> Á inâ na laguk ni Apu Kesu yù pán, á nabbalabálà kâ Namarò. Á giddigidduá na, á inisinek na nira. Á kinagi na nira, "Alawatan naw yù baggi nga metapil megapu nikayu. Mapiá nu kunniauw yù akkuán naw ta panaddamán naw nikán," kun na.

<sup>20</sup> Á kabalid da nga namúgák, inâ na má ni Apu Kesu yù inumad da nga tabbuk na úbas, á iniyawâ na nira, á kinagi na nira, "Yawe yù panákkiláñ naw sù bagu nga tarátu ni Namarò nikayu, nga mapalurò megapu sù dágà sangaw nu matayà nga metapil megapu nikayu.

<sup>21</sup> Á ajjan saw nga nepallalálláng nittam yù mappagápù nikán.

<sup>22</sup> Á sikán, nga Kaká na ngámin na tatolay, matayá sangaw gapu ta yáyù netúrâ nga sinalákkuruk na ngaw ni Namarò. Ngam kábbi yù tolay nga mappagápù nikán," kun na.

<sup>23</sup> Á pakaginná ra karannian, naburuburung ira, á nakkaká-abbû ira nga kinagi, "Asinni panò nittam yù mangnguá ta kunnian?" kud da.

*Yù Pakkakápereperang da ta Ubobuk nu Asinni yù Kotunán*

<sup>24</sup> Á yù ira sinudduán ni Apu Kesu, nakkakápereperang ira ta ubobuk nu asinni yù kotunán nira.

<sup>25</sup> Á yáyù nga kinagi ni Apu Kesu nira, "Yù ira mammaguray sawe dabbuno, darobad da yù ira tatolay, ngam iparámak da ta aggira yù mangabbák nira.

<sup>26</sup> Ngam sikayu, ari kunnian yù ággíán naw. Ta napiá nu yù kotunán nikayu yù kunnay sù urián nga tumulù nga masserbi. Á yù mangituddu nikayu, napiá nu aggina yù masserbi nikayu nga kunnay sù makiaripan.

<sup>27</sup> Á asinni panò yù ibiláng na tolay ta kotunán? Á ta ángngarigán, yù tolay nga magitubang nga kumán? Onu yù doban na nga masserbi kuna? Á ibiláng da gemma ta kotunán yù magitubang nga kumán. Ngam sikán, ajjanà nikayu nga kunnay ta masserbi.

<sup>28</sup> “Á sikayu yù ira nga maggián nikán nga mangabbák nikán ta jigâ ku.

<sup>29</sup> Á yáyù nga sikayu yù sinullà ku ta mepammaguray nikán, ta kunnay ta panullà nayù Yámà nikán ta mammaguray.

<sup>30</sup> Á mepalalálláng kayu nikán ánnna mesipà kayu sù pammagurè, á magitubang kayu nga mammaguray ánnna mamanunnù sù ira ginaká nayù mapulu duá nga ánn ni Akup, nga mangngágán ta Israel.”

*Pakkagi ni Apu Kesu sù Panáji ni Eduru kuna  
Mattiū 26:31-35; Markus 14:27-31; Kuan 13:36-38*

<sup>31</sup> Á kinagi ni Apu Kesu kâ Eduru, “Simon, nga kopuk ku, tángngagam mu yù kagiak ku nikaw. Inanugù ni Namarò si Satanás nga mamarubá nikayu nga katággítádday, nga kunnay ta mangisâ ta aggì, tapè mári yù kupì.

<sup>32</sup> Á nepatalugáring nikaw, Simon. Ngam inipakimállà taka, tapè ari mári yù ángnguruk mu nikán. Á sangaw nu mabbabáwi ka ta liwâ mu, ánnna mattoli ka nikán, tabarangám mu laguk yù ira kábulum mu, tapè mapasigaggà yù ángngikatalà da nikán,” kun na.

<sup>33</sup> Ngam kinagi ni Eduru kuna, “Apu, naparánakin nga mepulù nikaw, mássiki nu mekársel itta, mássiki nu matay itta!” kun na.

<sup>34</sup> Á kinagi ni Apu Kesu, “Kuruk yù kagiak ku nikaw, Eduru, ta pilluam mu nga kagian ta arám mà ammu, lage na pagittarakkò na manù sangaw nu gabi.”

*Kagian ni Apu Kesu yù Dattál nayù Nepallà nga Jigâ*

<sup>35</sup> Á iniyabbû ni Apu Kesu sù ira sinudduán na, nga kun na, “Á ta paddok ku ngaw nikayu, nga ari nangipulù ta kuártu, bungun, onu sapátù naw, á nakúráng panò yù awágan naw?” kun na. “Ari, Apu!” kud da.

<sup>36</sup> Á kinagi na nira, “Ngam dumá yù áaggián naw kunangane, ta nu eggá yù kuártu naw onu bungun, napiá nu ipulù naw yù eggá. Á nu ajian yù tolay nga awán ta badáng na, á iláku na yù barawási na, tapè ajian yù ipangâ na ta badáng na.

<sup>37</sup> Ta máwák nga mapatuppá yawe dán nga inipetúrâ ni Namarò nga kinagi na sù ngaw ábbilinán na nga meyannung nikán:

‘Yù sinullà ku ta mammaguray,

ibiláng nayù ira tatolay ta tulisán, á pagikaruad da.’

Á duttálín yù kapalurò nayù ngámin nga netúrâ nga meyannung nikán,” kun na.

<sup>38</sup> Á kinagi nayù ira sinudduán na kuna, “Apu, innam mè. Ajjan duá nga badáng saw,” kud da. Á kinagi na, “Kustu nen!”

*Yù Pakimállà ni Apu Kesu ta Keggá na sù Puddul na Olibo  
Mattiū 26:36-46; Markus 14:32-42*

<sup>39</sup> Á nánaw si Apu Kesu sù balay, á minay sù puddul na Olibo, ta yáyù kustombare na. Á nepulù kuna yù ira sinudduán na.

<sup>40</sup> Á labbè da tán, kinagi ni Apu Kesu nira, “Makimállà kayu kâ Namarò ta melillì kayu sù narákè nga mamarubá nikayu,” kun na.

<sup>41</sup> Á bittáng na ira ni Apu Kesu, á minárayyu nira ta baddì, nga namalittükak nga nakimállà kâ Namarò. Á kinagi na,

<sup>42</sup> “Ammò, nu urem nakuan ta melillikà sù jigâ nga umay nikán, á ilillì mà. Ngam ari yù uré yù matuppál, nu ari galâ yù urem,” kun na.

<sup>43</sup> Á nappasingan kuna yù daroban ni Namarò nga naggapu ta lángì, á en na pinassikan yù baggi na ánnna nonò na.

<sup>44</sup> Á gapu ta nepallà yù karigirigâ na ánnna yù daddam na, pine na má nakimállà, nga naguggáng, á kun na dága yù uggáng na nga massísínâ ta dabbn.

<sup>45</sup> Á kabalin na nakimállà, gimikkáng nga nattoli sù gián nayù ira sinudduán na, á naránganganán na ira nga nakkaturuk gapu ta nappunaw ira sù nerallà nga daddam da.

<sup>46</sup> Á kinagi na nira, “Anni má ta nakkaturuk kayu? Gumikkáng kayu nga makimállà, tapè melillì kayu sù narákè nga mamarubá nikayu,” kun na.

*Yù Paggápù da kâ Apu Kesu  
Mattiū 26:47-56; Markus 14:43-50; Kuan 18:3-11*

47 Á ta arán na paga kabalin ni Apu Kesu nga nagubobuk, limibbè yù ira tatolay nga magaru, nga nepulù ká Kudas nga tádday sù ira mapulu duá nga sinudduán na. Á jímíkki si Kudas, á inummatán na yù paringil ni Apu Kesu ta kunnay ta kustombare ra.

48 Ngam kinagi ni Apu Kesu kuna, “Kudas, napiá panò yù akkuám mu? Ta iyummà mu yù panájjim nikán, sikán nga Kaká na ngámin na tatolay!” kun na.

49 Á ta pakasingan nayù ira sinudduán na ta ajjan yù akkuán nayù ira tatolay kuna, kinagi ra, “Apu, magibadág kami nira?” kud da.

50 Á yù tádday nga kabbulun ni Apu Kesu, á dagarágâ na kittak yù aripan nayù kátannangán nga pári, á napingarán yù jiwanán nga talingá na.

51 Ngam kinagi ni Apu Kesu, “Kustu nen!” Á sinámmì ni Apu Kesu yù talingá nayù tolay, á nammapiá ngín.

52 Á yù ira nga minay naggápù kâ Apu Kesu yù ira kátannangán nga pári, yù ira suddálú nga magguárdiá sù mangilin nga kapilliá, áんな yù ira giriámán. Á kinagi ni Apu Kesu nira, “Kunnayà panò ta tulisán? Ta nattagibadág áんな nattagipalù kayu nga umay maggápù nikán!

53 Á mássiki nu nepulupulukà nikayu ta kággágaw sù mangilin nga kapilliá, á arán nawà ginápù! Ngam jímittálín yù awayyá naw nga mangnguá nikán, áんな yù pakapangnguá ni Satanás, nga meyárik ta kallà.”

*Yù Panájji ni Eduru kâ Apu Kesu*

*Mattiu 26:57-58, 69-75; Markus 14:53-54, 66-72; Kuan 19:12-18, 25-27*

54 Á gapu ta paggápù da kâ Apu Kesu, inituluk da sù bale nayù kátannangán nga pári. Á sinuttlu na ira ni Eduru, ngam arayyu lá nira.

55 Á nappagaddul ira ta námmuák na balay. Á nepaggirínu si Eduru nira.

56 Á ajjan tán yù babay nga masserbi ta balay. Á nasingan na si Eduru nga nanawagán ta dalingáráng na api, á inni-innan na ta napiá, á kinagi na, “Yane paga yù kabbulun ni Kesu,” kun na.

57 Ngam nallímak si Eduru, á kinagi na, “Amma-ammù panò yù tolay?” kun na.

58 Á manganánniuán, ajjan gapay yù tádday nga tolay nga nakasingan kâ Eduru, á kinagi na kuna, “Sikaw pá gemma yù sigídá nga kabbulud da!” Ngam kinagi ni Eduru, “Ari gemma sikán!” kun na.

59 Á pappasá na tangoras, á kinagi nayù tádday nga tolay, “Kuruk gemma ta mepulupulù yawe tolay kuna, ta taga Galiliú gemma gapay!” kun na.

60 Ngam kinagi ni Eduru, “Arák ku ammu yù kakágiam mu!” kun na. Á pagubobuk ni Eduru karannian, dagarágâ nagittarákkò yù manù.

61 Á nilipe ni Apu Kesu si Eduru, á nanonò ni Eduru yù kinagi ni Apu Kesu kuna, nga “Pilluam mu nga kagian nga arám mà ammu, lage na pagittarákkò na manù sangaw nu gabi.”

62 Á nánaw si Eduru, nga makkulè, nga nepallà yù kulè na ta pakanonò na sù kingnguá na.

*Yù Panguyoyung da áんな Pamalapalù da kâ Apu Kesu*

*Mattiu 26:67-68; Markus 14:65*

63 Á yù ira tatolay nga nagguárdiá kâ Apu Kesu, inuyoyungád da áんな pinalapalù da.

64 Á binabarád da yù matá na, á lippilippák da, á kinagi ra kuna, “Asinni yù nallappák nikaw? Abbúnam mu yù ngágad da nu ammum!” kud da.

65 Á aru gapay yù pamasapasirád da kuna.

*Yù Keyarubáng ni Apu Kesu sù ira Minámmununù*

*Mattiu 26:59-66; Markus 14:55-64; Kuan 18:19-24*

66 Á ta pannawák, naggagammung mángin yù ira giriámán, yù ira kátannangán nga pári, áんな yù ira mesturu sù tunung ni Moyses. Á inipágál da si Apu Kesu ta mepagarubáng nira.

67 Á kinagi ra kuna, “Nu kuruk ta sikaw yù MakKiristu nga sinullà ni Namarò ta mammaguray, á kagiam mu laguk!” kud da. Á simbbák, á kinagi na nira, “Á nu kagiak ku nakuán, arán nawà gemma kurugan.

68 Á kunnian gapay nu ajjan yù iyabbú ku nikayu, arán nawà tabbagán.

69 “Ngam kagiak ku galá nikayu, ta sangaw nu mappasá yaw, á sikán nga Kaká na ngámin na tatolay, mepagitubangà sù jiwanán ni Namarò nga Kotunán nga makáwayyá ta lángi,” kun na.

70 Á naggigiddán ira nga nagubobuk, á kinagi ra, “Sikaw yù Anâ na laguk ni Namarò?” kud da. Á kinagi na nira, “Wan, kuruk yù kagian naw. Sikán,” kun ni Apu Kesu nira.

<sup>71</sup> Á kinagi ra, "Ye, arát tam máwák yù tanakuán nga massistígu, ta aggina yù nakkagi, á naginná tam yù kinagi na," kud da.

## 23

*Yù Keyarubáng ni Apu Kesu kâ Gubinador Pilatto  
Mattiu 27:1-2, 11-14; Markus 15:1-5; Kuan 18:28-38*

<sup>1</sup> Á yù ira ngámin nga minámmunnnù, ed da laguk inituluk si Apu Kesu kâ Gubinador Pilatto.

<sup>2</sup> Á nassirisiri ira nga nangikeká kuna, á kinagi ra kâ Gubinador, "Ginápù mi yawe laláki, ta buruburionan na yù ira tatolay, ta ipakontará na nira si Patul Sisar ta Roma, á ipugik na yù pappagá ra ta buwi kâ Patul Sisar. Á kagian na gapay ta aggina yù patul nga sinullà ni Namaro ta mammaguray," kud da.

<sup>3</sup> Á iniyabbû na laguk ni Pilatto kâ Apu Kesu, "Á kuruk nga sikaw yù patul nayù ira Kudio?" kun na. Á kinagi ni Apu Kesu, "Ammán, kuruk yù kagiam mu," kun na.

<sup>4</sup> Á kinagi ni Pilatto sù ira kátannangán nga pári ánná yù ira tatolay, "Awán ta ammù nga liwâ na yawe tolay," kun na.

<sup>5</sup> Á inipappanà da nga kinagi kâ Pilatto, "Á buruburionan na yù ira ngámin nga tatolay ta Judiya megapu sù ituddu na, ta pinegapuanán nen nga binuruburion ira túrin ta Galilia, áddè saw," kud da.

*Keyarubáng ni Apu Kesu kâ Gubinador Erodo*

<sup>6</sup> Á pakaginná ni Gubinador Pilatto ta yù purubinsia na Galilia yù namegapuanán na, iniyabbû na nira, "Taga Galilia lagugam?" kun na.

<sup>7</sup> "Wan," kud da. Á pakánnammu ni Pilatto ta taga Galilia si Apu Kesu, inipeyángé na kâ Gubinador Erodo, nga mammaguray ta Galilia, ta aijinan ta Jerusalem sù kesímmu na yaw.

<sup>8</sup> Á nagayáyâ si Erodo ta pakasingan na kâ Apu Kesu, gapu ta nabayágín nga narámak na, ánná yù kingngi-kingnguá na, á gustu na masingan yù pamagaddátu na.

<sup>9</sup> Á yáyù nga aru yù iniyabbû na kâ Apu Kesu. Ngam ari bulubugá simibbák si Apu Kesu.

<sup>10</sup> Á aru yù ipamaliwâ da kuna nayù ira kátannangán nga pári ánná yù ira mangituddu sù tunung ni Moyses.

<sup>11</sup> Á di Erodo gapay ánná yù ira suddálú na, iniluddè da ánná inuyu-uyo ra, á binarawasiád da ta barawási na patul lage ra initoli kâ Pilatto.

<sup>12</sup> Á yáyù namegapuanád da nga makkákopun di Erodo kâ Pilatto, mássiki nu dán nga makkálussaw ira.

*Yù Pamagikáru ni Pilatto kâ Apu Kesu*

*Mattiu 27:15-26; Markus 15:6-15; Kuan 18:39-19:16*

<sup>13</sup> Á pangitoli ra kâ Apu Kesu kâ Pilatto, inipágál ni Pilatto yù ira kátannangán nga pári, yù ira giriámán, ánná yù ira kárúan nga tatolay.

<sup>14</sup> Á kinagi na nira, "Iniyángé naw yawe tolay ta arubáng ku nga kagian naw ta aggina yù minámmuruburion sù ira tatolay, á binestigá kin ta arubáng naw, á ammu naw ta awán ta nánnámmuák ku nga liwâ na nga kunnay sù kinagi naw nga akkuán na.

<sup>15</sup> Á si Erodo gapay, awán ta nánnámmuán na nga liwâ na, ta initoli na gemma nittam. Á ammu nawin laguk ta awán bulubugá ta kingnguá na nga ipamapáte tam kuna.

<sup>16</sup> Á yáyù nga ipabaddû ku lâ, á palubbángak ku sangaw," kun ni Pilatto.

<sup>17</sup> Á yáyù kinagi na gapu ta aijan yù kustombare na nga mamalubbáng ta tádday nga nabáluk nu mappiestá yù ira Kudio ta kádaragun.

<sup>18</sup> Ngam nagaragiák yù ira tatolay nga nakkagi, "Papatáyam mu, ta si Barabas yù palubbángam mu," kud da.

<sup>19</sup> Á nabáluk si Barabas negapu sù pakikontará na ta gubermente ánná yù pamapáte na.

<sup>20</sup> Á gapu ta gustu ni Pilatto nga palubbángan si Apu Kesu, piniddúá na nga kinagi nira.

<sup>21</sup> Ngam nagaragiák ira lállaguk nga nakkagi, "Ipepátá mu ta kurù tapé matay!" kud da.

<sup>22</sup> Á gapu ta manaki yù ira tatolay nga matabarangán, pinillu na laguk ni Pilatto nga kinagi nira, "Anni má? Anni yù liwâ na? Awán gemma ta ammù nga liwâ na nga ipamapáte kuna. Ipabaddû ku lâ, á palubbángak kul!" kun na.

<sup>23</sup> Ngam nerallà yù káragiák da. Á inikalli ra, "Ipepátá mu ta kurù tapé matay," kud da. Á napuersá si Pilatto sù ikáyá da.

<sup>24</sup> Á kinagi na yù anugù na sù gustu ra, nga matay si Apu Kesu.

25 Á pinalubbáng na laguk yù piníli ra nga tolay nga nabáluk negapu sù pakikontará na ta gubermente ánná pamapáte na. Ngam si Apu Kesu, initulù na nira tapè matuppál yù ure ra kuna.

*Yù Pangipátà da kâ Apu Kesu ta Kurù*  
*Mattiu 27:32-44; Markus 15:21-32; Kuan 19:17-27*

26 Á ta pangipáno ra kâ Apu Kesu, nerapunád da si Simon nga taga Sirine nga lubbè ta ili, á pinuersá ra nga inipakáttu kuna yù kurù nga ituttul na kâ Apu Kesu.

27 Á aru yù ira tatolay gapay nga siminuttul kuna. Á aijan gapay yù ira bábbay nga gikuletán megapu kuna.

28 Ngam nilipe ni Apu Kesu ira, á kinagi na nira, “Sikayu nga bábbay nga taga Jerusalem, arán nawà kuletán, ngam kuletán naw lâ nakuan yù baggi naw ánná yù ira ánâ naw!

29 Ta nu duttái sangaw yù ággaw na jígá, á kagian nayù ira tatolay, nga kud da, ‘Magayáyâ yù ira bábbay nga awán ta anâ da, nga ari nakaparubá nga maganâ, nga ari nappasu, kud da.

30 Á pegapuanád da gapay nga kagian, ‘Maddaggay ngillâ nakuan yù puddul, tapè matábbunán kami,’ kud da.

31 Á gapu ta kunniaw yù akkuád da nikán nga awán gemma ta liwâ ku, á pappanganâ lâ sangaw nikayu nga minálliwâ!” kun na.

32 Á aijan gapay yù duá nga tulisán nga iniyángé ra, tapè megiddán ira nga matay kâ Apu Kesu.

33 Á pakáddè da sù gián nga mangngágán ta Balakábâ, inipátà da si Apu Kesu ta kurù tán. Á inipátà da yù ira duá nga tulisán, yù táddy sù jiwanán na, á yù táddy sù jimigi na.

34 Á nakimállâ si Apu Kesu, á kinagi na, “Ammò, pakomám mu ira, ta arád da garè ammu yù akkuád da,” kun na.

Á kabalid da nga nangipátà nira nayù ira suddálú, á nabbubúnù ira, tapè pabbaballáyád da yù barawási ni Apu Kesu.

35 Á aru yù ira tatolay nga naggíraw. Á yù ira kamotungán nga Kudio, inuyoyungád da, á kinagi ra, “Ye! Niyígù na yù ira tatolay! Ngam yù baggi na, arán na meyígù! Á nu aggina yù kuruk nga Mangiyígù nga sinullâ ni Namarò, iyígù na gapay nakuan yù baggi na!” kud da.

36 Á yù ira suddálú, inuyoyungád da gapay. A jimikkì ira kuna ta iyalawâ da kuna yù silam.

37 Á kinagi ra kuna, “Nu kuruk nga sikaw yù patul nayù ira Kudio, iyígù mu laguk yù baggim!” kud da.

38 Á aijan gapay yù netúrâ nga inipátà da ta utun na kurù, nga kunniaw, “Yawe yù Patul nayù ira Kudio.”

39 Á yù táddy nga tulisán nga nepátâ tán, inuyo na gapay si Apu Kesu, á kinagi na, “Sikaw panò yù kuruk nga Mangiyígù nga sinullâ ni Namarò? Arà! Iyígù mu ittam laguk!” kun na.

40 Á gimmá nayù kabbulun na nga tulisán, á kinagi na, “Ngattá, ta ari ka maganássing kâ Namarò, nepatalugáring ta naggigittá ittam nga matay?

41 Á sitta, magikáru itta ta liwâ ta. Á yawe tolay, awán ta liwâ na!” kun na.

42 Á kinagi na laguk kâ Apu Kesu, “Apu, nonopam mà lággapay nu duttál yù ággaw nga pattolim nga umay mammajuray!” kun na.

43 Á kinagi ni Apu Kesu kuna, “Kuruk yù kagiak ku nikaw, ta mepulù ka nikán ta ággawo ta láng,” kun na.

*Yù Pate ni Apu Kesu*

*Mattiu 27:45-56; Markus 15:33-41; Kuan 19:28-30*

44 Á ta tangngá na ággaw, iddâ na lâ nakkallâ yù ngámin nga dabbun áddè ta alas tares ta púgák.

45 Á pakkallâ na bilák, iddâ na lâ naggadduá yù nakannak nga kortíná nga nelippak sù kangilinán nga lágum sù mangilin nga kapilliá ta Jerusalem.

46 Á nakkatol si Apu Kesu ta nasikan, á kinagi na, “Ammò, ikatalà ku yù ikararuâ nikaw!” kun na. Á kabalín na nakkagi ta kunnian, á nagattâ yù inángà na.

47 Á ta pakasingan nayù kapitán nayù ira suddálú sù nesimmu, jináyo na si Namarò, á kinagi na, “Kuruk nga napiá lâ yawe tolay nga awán ta liwâ na!” kun na.

48 Á yù ira tatolay nga naggíraw tán, pakasingad da sù nesimmu, á limibbè ira ta bale ra, nga nepallâ yù daddam da.

49 Á yù ira ngámin nga kákkopun na ánná yù ira bábbay nga nepulupulù kuna sù paggapu ra ta Galilia, naggián ira ta arayyu ta baddì nga maningen sù ngámin nga nesimmu kuna.

*Yù Ketanam ni Apu Kesu**Mattiu 27:57-61; Markus 15:42-47; Kuan 19:38-42*

<sup>50</sup> Á aijan si Kusè nga taga Arimatia, nga tádday nga ili sù purubinsia na Judiya. Á napiá nga tolay si Kusè, nga matunung yù ngámin nga akkuán na.

<sup>51</sup> Á aggina gapay yù tádday sù ira kamotungán nga Kudio, ngam ari netádday yù nonò na ta nonò da, ta arán na inikáyà yù kingnguá ra kâ Apu Kesu, á iddanamán na gapay yù dattál nayù pammagure ni Namaro.

<sup>52</sup> Á minay si Kusè kâ Gubinador Pilatto, ta en na kiddawan yù baggi ni Apu Kesu, tapè en na itanam.

<sup>53</sup> Á iniyangù ni Pilatto kuna. Á minay si Kusè sù gián nayù baggi ni Apu Kesu. Á iniyutták na, á binungun na ta puraw nga gámì. Á initanam na sù nakokkobán nga batu nga awán paga ta netanam kuna.

<sup>54</sup> Á púgák na Biernes yù pate ni Apu Kesu, á inikukkutù ni Kusè nga initanam, gapu ta lammak bilák yù pamégapu nayù ággaw na ággibannák.

<sup>55</sup> Á yù ira bábbay nga nepulupulù kâ Apu Kesu sù paggapu na ta Galilia, sinuttul da si Kusè, á nasingad da yù pangitanamán na ta baggi ni Apu Kesu ánnna kunnasi yù ángngitanam na kuna.

<sup>56</sup> Á limibbè ira laguk, tapè paránad da yù makkakerumá nga bábbanguk nga ipe ra sù baggi nayù natay. Á sù tádday ággaw, nga ággaw na Sabadu, naggián ira ta bale ra nga magibannák, ta kunnay sù ituddu nayù tunung ni Moyses.

**24***Yù Paginnanole ni Apu Kesu**Mattiu 28:1-10; Markus 16:1-8; Kuan 20:1-10*

<sup>1</sup> Á ta alippánnawák na Liggú, minay yù ira bábbay ta tanam, ta ed da iyángay yù makkakerumá nga bábbanguk nga pinarád da.

<sup>2</sup> Á labbè da ta tanam, narángnganád da nga nabukatán, nga nakarebu yù batu nga nelippak kuna.

<sup>3</sup> Á simillung ira laguk ta unak. Ngam tallung da, á nasingad da ta awánin yù baggi ni Apu Kesu tán.

<sup>4</sup> Á pakasingan nayù ira bábbay ta awán, nanáddak ira tán nga namáyyang. Á inikáddagá da lâ nga limituák yù duá nga lálláki nga nepanáddak nira, nga naddalingáráng yù barawási ra.

<sup>5</sup> Á naganássing yù ira bábbay, á nalipay ira nga nakkummak. Á kinagi nayù ira lálláki nira, "Anni má ta aleran naw yù matolay sù gián nayù ira námmatay?

<sup>6</sup> Awánin saw, ta naginnanolayin! Nonopan naw yù kinagi na ngaw nikayu sù arán na paga pánaw ta Galilia.

<sup>7</sup> Ta kinagi na ta metulù yù Kaká na ngámin na tatolay sù ira minálliwâ, á mepátâ ta kurù tapè matay, á maginnanolay sù mekatallu nga ággaw," kud da.

<sup>8</sup> Á pakaginná nayù ira bábbay sù kinagi ra, á nanonò da.

<sup>9</sup> Á nánawád da yù tanam, ta ed da kagian sù ira mapulu tádday ánnna yù ira káruán nga kábulud da.

<sup>10</sup> Á yù ira bábbay nga nakkagi sù ira mapulu tádday nga minánggilayalayâ, aggira di Maria Maddala, si Juana, si Maria nga yená ní Ime, ánnna yù ira káruán nga bábbay gapay nga nepulù nira.

<sup>11</sup> Ngam yù ira lálláki, arád da kinuruk yù kinagi nayù ira bábbay, ta kagiad da ta gaggátung da lâ yù kagiad da.

<sup>12</sup> Ngam si Eduru lâ, pine na nakkarerá nga minay sù gián na tanam, ta en na pasikkálan nu kuruk. Á sinígik na yù unak na tanam, á yá lâ nasingan na yù nakabungunán na. Á limibbè nga napállâ sù nesimmu.

*Nappasingan si Apu Kesu sù ira Duá nga Umay ta Emmos**Markus 16:12-13*

<sup>13</sup> Á aijan yù duá ira nga nakiutdu kâ Apu Kesu, nga yane yù ággaw nga páno ra nga umay ta babálay nga mangngágan ta Emmos. Á mapulu tádday nga kilometro yù kárayyu na ta Jerusalem.

<sup>14</sup> Á pallakalakák da, nakká-ubobugad da yù ngámin nga nesimmu.

<sup>15</sup> Á pakká-ubu-ubobuk da, á narángnganán ni Apu Kesu ira, á nepappulukin laguk nira.

<sup>16</sup> Ngam arád da natákkilalán.

17 Á kinagi ni Apu Kesu nira, “Anni yù pakká-ubobugan naw?” kun na. Á nagginnà ira, nga melásin yù daddam da.

18 Á yù tádday nga mangngágán ta Kalopas, gapu ta arán na paga matákkilálán si Apu Kesu, á kinagi na kuna, “Á makiálliuk ka támma ta Jerusalem, á sikaw lâ yù táttáddy ngarán na ammu yù ngámin nga nesimmu tán ngarán ili gangùl” kun na.

19 Á iniyabbû ni Apu Kesu kuna, á kinagi na, “Á anni panò laguk yù nesimmu?” kun na. Á kinagi ra kuna, “Yù kingngikingnguá ra kâ Apu Kesu nga taga Nasaret. Aggina yù kukurugán nga ábbilinán ni Namarò. Ta inipasingan na yù pakáwayyá na nga makapállá megapu sù aru nga pinagaddátu na ta arubáng na ngámin nga tatolay, ánná makáwayyá yù ággububuk na gapay.

20 Ngam yù ira kátannangán nga pári ánná yù ira káruán nga karakalám mi nga Kudio, narákè yù nonò da kuna, á ginápù da, á nassirisiri ira nga nangikeká kâ Guginador Pilatto, tapè aggina yù mamagikáru kuna. Á inipepátâ na ta kurù tapè matay, ta yáyù ámmagikáru na kuna.

21 Á sikami, á kinagi mi ta aggina yù iddanamám mi nga maddaggunin nga mangiyígù nikami nga ginaká ni Israel. Á mekatallungin ta ággawo áddè sù pate na.

22 “Á napállâ kami gapay sù kinagi nayù ira bábbay nga kábulum mi. Ta minay ira ta alippánnawák ta katanamán,

23 ngam awán yù baggi na. Á labbè da, kinagi ra nikami ta nasingad da yù ira daroban ni Namarò nga nakkagi nira ta naginnanolayin.

24 “Á pakarámak mi, á minay yù ira káruán nga kábulum mi, ta ed da innan nu kuruk yù kinagi nayù ira bábbay. Á naratang da nga kunnay sù kinagi ra, ngam arád da gapay nasingan si Apu Kesu.”

25 Á kinagi na laguk ni Apu Kesu nira, “Ngattá, ta nakúráng paga yù ángnguruk naw sù ngámin nga kinagi nayù ira ngaw ábbilinán ni Namarò!

26 Arán naw panò ammu ta ajian yù netúrá, nga marigirigâ yù MakKiristu nga sinullá ni Namarò, lage na mepotun nga meparáyaw?” kun na.

27 Á inibukalán na laguk ni Apu Kesu nira yù ngámin nga meyannung sù baggi na nga netúrá sù libru ni Namarò, nga namegapu sù initúrá ni Moyses ánná yù ira ngámin nga initúrá nayù ira káruán nga ábbilinán ni Namarò.

28 Á manganánuán ta pakáranni ra ta ili nga angayán nayù ira duá, á nekáttuay si Apu Kesu nira nga kunnay ta arayyu paga yù angayán na.

29 Ngam inigaggak da, á kinagi ra kuna, “Ari ka lákin móanaw, ta púgággin. Mepagammâ ka nikami,” kud da. Á nepulù nira laguk nga nepaddulò.

30 Á nepallalálláng si Apu Kesu laguk nira nga nakkákán. Á inâ ni Apu Kesu yù pán, á nabbabalabálâ kâ Namarò. Á gidduá na yù pán, á iniyawâ na nira.

31 Á ikáddagâ da lâ natákkilálán si Apu Kesu. Á dagarágâ limimmâ.

32 Á nakkaká-ubobuk ira, á kinagi ra, “Á yáyù ga nga nalunnayán yù nonò ta, sù pappatale tam ta dálan, sù pangibukalán na sù kebalinán nayù initúrá ni Moyses ánná yù ira ngaw ábbilinán ni Namarò,” kud da.

33 Á dagarágâ nga nánaw yù ira duá nga nattoli ta Jerusalem. Á labbè da, narángnganád da nga naggagammung yù ira mapulu tádday ánná yù ira káruán nga kábulud da.

34 Á kinagi nayù ira naggagammung, “Kuruk nga naginnanolay si Apu, ta nappasingan kâ Simon Edurul!” kud da.

35 Á inistoriá ra laguk nayù ira duá yù pakesimmu ni Apu Kesu nira ta dálan ánná yù pakatákkilála ra kuna sù paggadduá na ta pán.

*Yù Pappasingan ni Apu Kesu sù ira Makituddu kuna*

*Mattiú 28:16-20; Markus 16:14-18; Kuan 20:19-23; Kingnguá 1:6-8*

36 Á pakkaká-ubobuk da, ikáddagâ lâ limittuák si Apu Kesu nga nepanáddak nira. Á kinagi na nira, “Á napiá ta ajian kayu ngámin saw,” kun na.

37 Á nakaddák ira ánná nepallá yù assing da, ta kagiad da ta annáni.

38 Á kinagi na nira, “Anni má ta maganássing kayu? Anni má ta arán naw kurugan ta sikán yaw?

39 Innan naw yù limâ ánná takki, tapè ammu naw ta sikán yaw. Tangngalán nawà, tapè kurugan naw nga aringâ annáni. Ta yù annáni, awán ta pattak na ánná tuláng na. Ngam sikán, masingan naw ta ajian yù tuláng ku ánná pattak ku,” kun na.

40 Á pakkagi ni Apu Kesu karannian, inipasingan na nira yù limá na ánná takki na.

<sup>41</sup> Ngam napállâ ira nga nabbábáng paga, gapu ta nerallà yù ayâ da. Á yáyù nga kinagi na nira, "Egga panò kanan saw nikayu?" kun na.

<sup>42</sup> "Ajjan!" kud da. Á iniyawâ da yù sirá nga nesuppá.

<sup>43</sup> Á kinán na ta arubáng da ngámin.

*Yù Naporíán nga Panabarang ni Apu Kesu sù ira Makituddu kuna*

<sup>44</sup> Á kinagi na gapay ni Apu Kesu sù ira mapulu tádday áんな yù ira káruán nga kábulud da, "Á yù ngámin nga nesimmu nikán, nakagì ngaw nikayu ta keggâ lâ paga nikayu. Ta kinagi ta mawák nga mapatuppál yù ngámin nga meyannung nikán nga neturâ sù libru nga tunung ni Moyses áんな yù libru nayù ira káruán nga ábbilinán ni Namarò, áんな yù neturâ sù libru nga Salmo, nga kansion nga áddayo ra kâ Namarò," kun na.

<sup>45</sup> Á pagubobuk ni Apu Kesu karannian, pinannawák na yù nonò da, tapè mánnámmuád da yù inipetúrâ na ngaw ni Namarò sù ira ábbilinán na.

<sup>46</sup> Á kinagi na nira, "Ajjan yù dán nga neturâ, nga maparigâ nga matay yù Mammaguray nga sinullà ni Namarò, á maginnanolay sù mekatallu nga ággaw.

<sup>47</sup> "Á ajjan gapay yù dán nga neturâ, nga mawák nga melayalayâ yù bilin ni Namarò ta ngámin nga lugár, ta mabbabáwi yù ira ngámin makkakerumá nga tatolay sù liwiliwâ da, áんな mangikatalà ira nikán, tapè pakomán ni Namarò ira. Á sawe Jerusalem yù pangigapuád da nga mangilayalayâ.

<sup>48</sup> Á sikayu yù umay mangipakánnámmu nikán, gapu ta nasingan naw yù ngámin nga nesimmu nikán.

<sup>49</sup> Ngam ari kayu lábbì móanaw sawe ili, ta dobak ku sangaw nga umay nikayu yù Mangilin nga Ikararuá nga initabbá na ngaw nayù Yámà. Á iddagán naw yù tappi na, nga maggapu ta lángi, ta iyawâ na nikayu yù pakáwayyá naw."

*Pattoli ni Apu Kesu ta Lángi*

*Markus 16:19-20; Kingnguá 1:9-11*

<sup>50</sup> Á sù dattál nayù oras nga páno ni Apu Kesu nga umay ta lángi, á iniyánge na yù ira siminuttul kuna ta lawán na Jerusalem áddè ta babálay na Bitania. Á labbè da tán, á sinonnâ ni Apu Kesu yù limá na, á kinagi na yù pangikállâ ni Namarò nira, nga pamindision na nira.

<sup>51</sup> Á pakkagi na karannian, nánawán na ira, á neyángay ta lángi.

<sup>52</sup> Á yù ira ngámin nga siminuttul kuna, jináyo ra si Apu. Á nanoli ira laguk ta Jerusalem nga nerallà yù ayâ da.

<sup>53</sup> Á yáyù nga kággágaw manotoli ira sù mangilin nga kapilliá, nga maddáyaw kâ Namarò.

## Yù Napiá nga Dámak nga Meyannung kâ Apu Kesu Kiristu nga Initúrâ ni Kuan

*Yù Meyannung sù Initúrâ ni Kuan*

Si Kuan nga nattúrâ sawe libru yù tádday sù ira mapulu duá nga sinudduán ni Apu Kesu. Á netúrâ ta meyannung kâ Kuan sù libru ni Mattiu (4:21), ta aggina yù anâ ni Sebedo. Á pattúrâ ni Kuan, initúrâ na ta kunnay ta tanakuán yù mattúrâ, á ta meyannung ta baggi na, kun na lâ, "yù tudduán ni Apu Kesu nga iddukan na." Á netúrâ gapay sawe libru ni Kuan (19:25-27) yù kinagi ni Apu Kesu ta keggá na ta kurù lage na natay, ta sinullà na si Kuan ta manaron sù innò na.

Á ipakánnámmu ni Kuan ta si Apu Kesu yù mannanáyun nga Anâ ni Namarò, nga kapulupulù ni Namarò. Á si Apu Kesu yù mangngágán ta Ubobuk ni Namarò, nga pannakasimù ni Namarò. Á megapu sù pagubobuk na, pinarò na yù ngámin nga aijan, á awán bulubugá ta arán na pinarò.

Á nabbáli si Apu Kesu ta tolay nga nakipaggián ta tolay megapu sù keyanâ na. Á kinagi ni Kuan (20:31) yù ipangitúrâ na sawe libru, "tapè kurugan naw ta si Apu Kesu yù MakKiristu nga Anâ ni Namarò nga Makáwayyá nga Mangiyigù. Ta nu kurugan naw ánnna ikatalà naw, mepattolay kayu kuna ta áddè ta áddè."

Á ta meyannung sù baggi na, kinagi ni Apu Kesu, "Sikán yù Egga, nga áttotole na tolay. Sikán yù manotolay" (6:48). Á meyárik ta nawák, gapu ta "mamannawák ta nonò na tolay" (12:35-36). Á sittam nga mangikatalà kuna yù meyárik ta karneru na. Á kinagi na, "Sikán yù napiá nga minánnaron, á ammù yù ira ngámin nga kukuâ. Á yù ira kukuâ, ammu rangà gapay" (10:14).

*Yù Mayán na yawe Napiá nga Dámak*

Paddáyo ni Kuan sù Ubobuk ni Namarò (1:1-18)  
Pangilayalayá ni Kuan nga Minánnigù (1:19-34)  
Paggál ni Apu Kesu sù ira Tuudduán na (1:35-51)  
Pamagaddáti ni Apu Kesu ánnna Pangituddu na (2:1-9:41)  
Meyárik si Apu Kesu sù Mináppárak ta Karneru (10:1-42)  
Pate ni Lasaru ánnna Pamaginnanole ni Apu kuna (11:1-12:11)  
Pamaddulò da kâ Apu Kesu ta Jerusalem (12:12-50)  
Pangituddu ni Apu ta Keggá na ta Jerusalem (13:1-16:33)  
Yù Pakimállà ni Apu Kesu megapu nittam (17:1-26)  
Paggápù da ánnna Pampapáte ra kâ Apu Kesu (18:1-19:27)  
Yù Pangipátâ da kâ Apu Kesu ta Kurù (19:17-27)  
Pate ni Apu Kesu ánnna Pangitanam da kuna (19:28-42)  
Matolay si Apu Kesu, nga Mappasingan! (20:1-21:25)

*Yù Paddáyo ni Kuan sù Manotolay nga Mangngágán ta Ubobuk ni Namarò*

<sup>1</sup> Gári, sù ngaw lage na kaparò na dabbuno, eggá yù mangngágán ta Ubobuk ni Namarò.  
Á yù mangngágán ta Ubobuk ni Namarò yù kapulupulù ni Namarò, nga magubobuk sù ubobuk ni Namarò.

Á aggina si Namarò.

<sup>2</sup> Á ta áddè ngaw kapámmegapu na ngámin,  
dán nga maggián kâ Namarò.

<sup>3</sup> Á megapu sù mangngágán ta Ubobuk ni Namarò, pinarò ni Namarò yù ngámin nga aijan,  
á awán bulubugá ta pinarò na nga ari megapu sù pagubobuk na.

<sup>4</sup> Á sigga-inángà yù Ubobuk ni Namarò, nga manotolay,  
nga paggapuán nayù inángà na ngámin nga matolay.

Á aggina yù meyárik ta nawák, nga mamannawák ta nonò na tolay,  
gapu ta ipakánnámmu na si Namarò.

<sup>5</sup> Á ta kunnay ta pannawagan na nawák yù kallà,  
á pannawagan nayù meyárik ta nawák yù nonò na tolay.  
Ta arád da ammu si Namarò, á kunnay ta maggián ira ta kallà.  
Á arán na bulubugá máppù na kallà yù nawák.

<sup>6</sup> Á sinullà ni Namarò yù tolay nga mangngágan ta Kuan.\*

<sup>7</sup> Á jinok ni Namarò si Kuan ta umay mangipakánnámmu ta meyannung sù tádday nga umay, nga meyárik ta nawák,  
tapè aijan yù awayyá nayù ira ngámín nga tatolay nga mangikatalà ánnna manguruk kuna,  
megapu sù pangituddu ni Kuan.

<sup>8</sup> Ari si Kuan yù meyárik ta nawák,  
ngam minay galâ, tapè ipakánnámmu na yù tádday nga meyárik ta nawák.

<sup>9</sup> Yù MagUbobuk yù kukurugán nga meyárik ta nawák, nga duttálín ta dabbuno,  
nga mamannawák ta nonò na ngámín nga tatolay.

<sup>10</sup> Jimittál yù MagUbobuk ta dabbuno.

Á mássiki nu pinarò ni Namarò yù ira ngámín nga tatolay ta dabbuno  
megapu sù pagubobuk nayù MagUbobuk,  
ngam arád da natákkilalán.

<sup>11</sup> Á yá labbetán na ta dabbuno yù lugár nayù ira ikáttolé na,  
ngam arád da inalawâ.

<sup>12</sup> Ngam aijan yù ira nga mangalawâ ánnna mangikatalà kuna,  
á iniyawâ na nira yù pakáwayyá ra nga mabbáli ta ánâ ni Namarò.

<sup>13</sup> Á yù pabbáli ra ta ánâ ni Namarò, ari megapu sù pangatáwa nayù ira darakal da.

Á ari megapu sù pakkaragâ na tolay, onu yù ure ra.

Ngam si Namarò galâ yù mamabbalin nira ta ánâ na.

<sup>14</sup> Á dattál nayù MagUbobuk ta dabbuno, nabbáli ta tolay,  
nga neyanâ ta tolay ánnna nakipaggián ta tolay.

Aggina yù siggapiá ánnna sigga-allâ nga minángngikállâ ta tolay,  
á kuruk ngámín yù kinagi na.

Á sikami, nasingam mi yù dalingárang na nga naggapu sù Yáma na,  
nga dalingárang nga iniyawâ nayù Yáma na sù táttaáday nga Anâ na.

<sup>15</sup> Á yù MagUbobuk, aggina yù inipakánnámmu na ngaw ni Kuan. Inikatakatol na ngaw ni Kuan, á kinagi na, “Aggina yù kinagi nikayu nga maporián nga tumubbâ nikán, nga makáwayyá ánné nikán, ta mannanáyun nga eggá sù ngaw aringá paga neyanâ,” kun na.

<sup>16</sup> Á gapu ta sigga-allâ yù MagUbobuk, mesipà ittam sù pangikállâ na nittam. Á ta kággággaw lannapán na yù iyawâ na nittam megapu sù ángngikállâ na, ta uputan na yù pangikállâ na nittam nga awán ta áddè na.

<sup>17</sup> Si Lákay Moyses, nga yù ngaw ábbilinán ni Namarò, aggina yù nangituddu sù tunung ni Namarò. Ngam si Apu Kesu Kiristu yù mangipakánnámmu sù allâ ni Namarò nittam, ánnna ipakánnámmu na gapay nittam yù ngámín nga kuruk nga meyannung kâ Namarò.

<sup>18</sup> Á kuruk gemma nga awán bulubugá ta tolay nga nakasingan kâ Namarò. Ngam yù táttaáday nga Anâ ni Namarò nga aijan kuna ánnna iddukan na, aggina yù mangipakánnámmu sù Yáma na.

*Yù Pangilayalayâ ni Kuan nga Minánnigù*

*Mattiú 3:1-12; Markus 1:1-8; Lukas 3:1-18*

<sup>19</sup> Á yù ira karakalán na Kudio nga naggián ta Jerusalem, jinok da yù ira pári ánnna yù ira kábulud da nga ginaká ni Lákay Libi, ta ed da iyabbû kâ Kuan yù meyannung ta baggi na. “Asinni ka?” kud da kâ Kuan.

<sup>20</sup> Á arán na inilímak níra ni Kuan yù kuruk. Kinagi ni Kuan níra, “Ari sikán yù mangiyígú nga mangngágan ta Kiristu nga iddagát tam ta umay nga mammaguray ta dabbuno,” kun na.

<sup>21</sup> Á asinni ka laguk? Sikaw panò si Lákay Elias nga yù ngaw ábbilinán ni Namarò nga kagiad da ta manoli?” kud da kâ Kuan. Á “Ari,” kun ni Kuan. Á namiddúu ira nga nangiyabbû, á kinagi ra, “Ari panò sikaw yù ábbilinán ni Namarò nga iddagám mi?” kud da. “Ari,” kun ni Kuan.

<sup>22</sup> Á kinagi ra laguk kuna, “Kagiam mu ngè nu asinni ka, tapè ammu mi yù kagiam mi sù ira naddok nikami. Anni kagiam mu nga meyannung ta baggim?” kud da.

<sup>23</sup> Á initabbaík ni Kuan yù kunnay sù dán nga netúrâ nga ubobuk ni Lákay Isaya, nga yù ngaw ábbilinán ni Namarò. Kinagi ni Kuan níra, “Sikán yù makkatakatal ta kalállammatán. Yá ikatakatol ku, ‘Umayin si Apu. Tunungan naw yù pallakarán na.’”

<sup>24</sup> Á aijan gapay yù ira nga jinok nayù ira karakalán na Kudio, nga Parisio.<sup>†</sup>

\* <sup>1:6</sup> Yawe si Kuan nga minánnigù, nga ari yù sinudduán ni Apu Kesu nga nattúrâ sawe. † <sup>1:24</sup> Parisio yù ira Kudio nga naggigiámmu sù tunung ni Moyses ánnna yù ira tunung da nga inilannà da.

25 Á iniyabbù da laguk kâ Kuan, “Nu ari sikaw yù MakKiristu nga mammaguray, onu si Lákay Elias, onu yù ábbilinán ni Namarò nga iddagám mi, á ngattá, ta manigù ka?” kud da.

26 Á kinagi ni Kuan nira, “Á sikán, danum lá yù ipanigù ku. Ngam aijinan nikayu yù tádday nga arán naw ammu.

27 Aggina yù maporián nga tumubbâ nikán, nga makáwayyá ánnè nikán, á aringà mepángngà nga mangubbák ta kaddang na sapátù na.”

28 Á nesimmu ngámin danniaw túrin ta Bitania ta dammáng na danum na Jordan, ta keggá na ngaw ni Kuan nga naniigù sù ira tatolay.

#### *Yù Meyárik ta Karneru nga Meyátang*

29 Á ta tádday ággaw, nasingan ni Kuan si Apu Kesu nga mappángè kuna. Á kinagi ni Kuan sù ira tatolay, “Aggina yù meyárik ta karneru, ta aggina yù iyawâ ni Namarò nga meyátang, tapè mári yù ngámin nga liwâ na tolay.

30 Aggina yù kinagi ni karyu nga maporián nga tumubbâ nikán, nga makáwayyá ánnè nikán, ta eggá nga mannanáyun sù ngaw aringà paga neyanâ.

31 Á mássiki sikán, sù ngaw, arák ku ammu nu asinni. Ngam yáyù nga minayà ta danum na Jordan nga manigù sù ira tatolay, tapè aggina yù mepakánnámmu sù ira ginaká ni Kákay Israel,”<sup>‡</sup> kun ni Kuan.

32 Á kinagi na laguk ni Kuan, “Nasingak ku yù Ikararuá ni Namarò ta pappagukák na nga kun na kalapáti nga maggapu ta lángì, á minay naddappá nga naggián sù tádday nga tolay.

33 Á arál ku paga natákkilál. Ngam si Namarò nga naddok nikán ta umayà manigù, kinagi na nikán, ‘Masingam mu sangaw yù Mangilin nga Ikararuá nga mappagukák, á maddappá nga maggián sù tádday nga tolay. Aggina yù sinullà ku ta manigù ta tolay, nga tanakuán yù ánnigù na. Ta ari danum yù ipanigù na, nu ari galâ yù Mangilin nga Ikararuá, nga ipepulù na sù ira tatolay,’ kun ni Namarò nikán.

34 Á gapu ta nasingak ku yù pappagukák nayù Mangilin nga Ikararuá ni Namarò nga naggapu ta lángì ta kun na kalapáti, nga naddappá nga naggián tane tolay, á yáyù nga ipakánnámmu nikayu ta aggina yù Anâ ni Namarò,” kun ni Kuan.

#### *Yù Pagágál ni Apu Kesu sù ira Olu nga Tuđduán na*

35 Á ta tádday nga ággaw, aijan di Kuan ánnna duá ira nga tuđduán na.

36 Á nasingan ni Kuan si Apu Kesu nga mattalebák nira. Á kinagi ni Kuan sù ira kábulun na, “Yane yù meyárik ta karneru, gapu ta iyawâ ni Namarò, tapè mári yù liwâ na tolay!”

37 Á pakaginná nayù ira duá nga kábulun ni Kuan sù kinagi na, sinuttul da si Apu Kesu.

38 Á nallipay si Apu Kesu, á nasingan na yù ira tumuttul kuna. Á kinagi na nira, “Anni yù ikáyâ naw?” Á iniyabbù da, “Rabbi, sisaw paggianám mu?” kud da. Á “Mesturu” yù kebalinán na Rabbi.

39 Á kinagi ni Apu Kesu nira, “Et tamin ta en naw innan,” kun na. Á binulud da laguk tapè masingad da yù paggianán na. Á nepagammâ ira kuna, gapu ta púgágín yù labbè da.

40 Á si Andares nga wagi ni Simon Eduru yù tádday sù ira duá nga siminuttul kâ Apu Kesu ta pakaginná ra sù kinagi ni Kuan.

41 Á dagarágâ en na laguk inalek ni Andares si Simon nga wagi na. Pakálek na kuna, kinagi na, “Nesimmuám mi ngin yù Messiya!” kun ni Andares. Á yù kebalinán na “Messiya” yù “MakKiristu, nga kamotungán nga patul nga initabbá na ngaw ni Namarò nga umay mammaguray ta ngámin nga dabbuno.”

42 Á inituluk ni Andares si Simon nga wagi na kâ Apu Kesu. Á inni-innan ni Apu Kesu si Simon, á iniyabbù na kuna, “Á sikaw laguk si Simon, nga anâ ni Kuan? Ingágat taka ta Eduru,” kun ni Apu Kesu kuna. Á “Batu” yù kebalinán na “Eduru.”

#### *Yù Pagágál ni Apu Kesu kári Pilippi kâ Nataniel*

43 Á ta tádday ággaw, ninonò ni Apu Kesu ta umay ta Galilia. Á nesimmuán na si Pilippi. Á kinagi na kuna, “Tuttulam mà,” kun na kâ Pilippi.

44 Taga Betseda gapay si Pilippi, nga keliád di Andares kâ Eduru.

45 Á nálerán na laguk ni Pilippi si Nataniel, á kinagi na kuna, “Nálerám mi ngin yù tolay nga kakágiad da ngaw di Lákay Moyses ánnna yù ira ngaw ábbilinán ni Namarò, nga netúrâ sù tunung ánnna yù dán nga netúrâ. Ajjan tuke. Aggina si Apu Kesu nga taga Nasaret, nga anâ ni Lákay Kusé,” kun ni Pilippi kâ Nataniel.

46 “Egga panò yù napiá nga taga Nasaret?” kun ni Nataniel kuna. “Á et ta ngè innan,” kun ni Pilippi kuna.

<sup>‡</sup> 1:31 Yù ira Kudio yù ginaká ni Lakay Israel ánnna yù ikáttolle ni Apu Kesu.

<sup>47</sup> Á pakáranni ra ta gián ni Apu Kesu, nasingan na laguk ni Apu Kesu si Nataniel nga mappángè kuna. Á kinagi ni Apu Kesu sù ira kábulun na, “Aggina yù tolay nga kuruk nga ginaká ni Israel, nga ajjan kuna yù napiá nga nonò nga awán ta jibak,” kun ni Apu Kesu.

<sup>48</sup> Á iniyabbû ni Nataniel kuna, “Kunnasi nga ammum yù nonò ku?” kun na. “Nasingat taka ta kapállirum mu paga ta káyú nga igò, sù arán na ka paga jinagá ni Pilippi,” kun ni Apu Kesu kuna.

<sup>49</sup> Á kinagi ni Nataniel kuna, “Mesturu, sikaw yù Anâ ni Namarò! Sikaw yù Patul nga mammaguray nikamu nga ginaká ni Kákay Israel!” kun na.

<sup>50</sup> Á kinagi ni Apu Kesu kâ Nataniel, “Yaw panò ipanguruk mu nikán yù pakkagì ta nasingat taka sù silárung na igò? Ngam masingam mu paga noka yù akka-akkuák ku nga makapállá ánnè sawe.

<sup>51</sup> Á kukurugán nga kuruk yù ngámin nga kagiak ku nikayu. Masingan naw noka yù pabbukâ na lágì ánná yù ira daroban ni Namarò nga mánaw nga umay ta utun ánná mappagukák nga umay nikán, sikán nga Kaká ngámin na tatolay,” kun ni Apu Kesu.

## 2

### *Yù Pamagaddátu ni Apu Kesu sù Keggá na ta Bodá ta Kana*

<sup>1</sup> Á pappásá na duá nga ággaw áddè sù pakiubuk ni Apu Kesu kâ Nataniel, ajjan yù bodá ta ili na Kana sù purubinsia na Galilia. Á ajjan tán yù yená ni Apu Kesu.

<sup>2</sup> Á inapà da gapay di Apu Kesu ánná yù ira tudduán na.

<sup>3</sup> Á yù ira tatolay nga nakibodá, napúnu ra yù binaráyáng.\* Kapúnu na binaráyáng, en na kinagi nayù yená ni Apu Kesu kuna, “Napúnungin yù binaráyáng,” kun na.

<sup>4</sup> Á kinagi ni Apu Kesu sù yená na, “Paguráyám mu, Innò, ta ammù gemma. Ari paga jimmittál yù oras nga sinullà ni Namarò nga kepalappâku,” kun ni Apu Kesu.

<sup>5</sup> Á kinagi na laguk nayù yená na sù ira aripan, “Mássiki nu anni yù ipakuá na sangaw nikayu, á kurugan naw,” kun na nira.

<sup>6</sup> Á ajjan tán annam nga angáng nga darakal, nga pangipayyád da ta danum nga ájjigután nayù ira Kudio ta meyannung sù kustombare ra nga mappakarenu megapu sù rilisiód da. Á makárgá támma ta límá láta yù taggitáddy ngangáng.

<sup>7</sup> Á kinagi ni Apu Kesu sù ira aripan, “Pannuan naw yù ira angáng ta danum,” kun na. Á pinnu ra ira.

<sup>8</sup> Á kinagi na nira, “Sirutan naw, ta en naw ituluk sù minángngálliuk,” kun na. Á kinuruk da.

<sup>9</sup> Á yù minángngálliuk, kinákkapán na lâ ta baddì yù danum nga nabbáli ta binaráyáng, ngam arán na gemma ammu nu sisaw nangápád da. Ngam yù ira nanágak, aggira lâ makánnámu sù naggapuán na. Á pangákkâ nayù minángngálliuk, inagálán na yù nobiu.

<sup>10</sup> Á kinagi na kuna, “Gagángay nittam ta papoluat tam yù kasingngatán, á sangaw nu nakapissán ira ta napiá, á pororianat tam yù jikkù. Ngam sikaw, pinakappiám mu yù kasingngatán, á kapangilattuák mu lâ kunangane,” kun na.

<sup>11</sup> Á yù makapállá nga kingnguá ni Apu Kesu ta keggá na ta bodá sù ili na Kana ta purubinsia na Galilia, yáyù olu nga pinagaddátu na, nga pangipasingan na ta pakáwayyána. Á pakasingan nayù ira makituddu sù kingnguá na, nangikatalá ira kuna.

<sup>12</sup> Á ta kabalin na yaw, nappupúlù di Apu Kesu nga nánaw nga minay ta Kapernium, aggira ánná yù ira wáwwagi na ánná si innò da ánná yù ira tudduán na, á nakipaggián ira lábbi tán.

### *Yù Pamakarenu ni Apu Kesu sù Mangilin nga Kapilliá*

*Mattiú 21:12-13; Markus 11:15-17; Lukas 19:45-46*

<sup>13</sup> Á maddaggunin yù Piestá ta Jerusalem, nga panaddamán nayù ira Kudio sù ngaw pattalebák nayù mangilin nga daroban sù ira ngaw naggaká nira ta keggá ra ta lugár na Egipto. Á minay laguk di Apu Kesu ta Jerusalem.

<sup>14</sup> Labbè da ta Jerusalem, simillung si Apu Kesu sù mangilin nga kapilliá, á narratang na yù ira minálláku ta báka, karneru, mammánù ánná yù ira minánnáli ta kuártu.

<sup>15</sup> Á iná ni Apu Kesu yù lubik, nga pidde na ta paligá, á pinaturiák na ira ngámin ánná yù ira ayám da sù mangilin nga kapilliá. Á sinottombá na yù ira lamesá nayù ira minánnáli ta kuártu ánná iniwári na yù kuártu ra.

\* <sup>2:3</sup> Tabbuk nayù bungá na úbas yù pidde nayù ira Kudio ta binaráyáng.

16 Á kinagi na sù ira malláku ta mammánù, “Ipáno naw danniaw. Ngattá, ta pabbalinán naw ta dápun yawe mangilin nga bale nayù Yámà!” kun ni Apu Kesu.

17 Á pakasingan nayù ira tudduán na sù kingnguá na, ninonò da laguk yù inipetúrâ ni Namarò sù dán nga netúrâ, nga kunniauw:

“Apu Namarò, nakalò yù ánggigiddu ku sù balem, nga kun na api ta unak ku.

Á nepallà yù daddam ku, gapu ta arád da pakimorayán yù balem.”<sup>†</sup>

18 Á gapu ta pinaturiák ni Apu Kesu yù ira minálláku, minay yù ira karakalán na Kudio, á kinagi ra kuna, “Anni yù ipasingam mu nikami nga makapállâ, nga panákkilálam mi ta ajan yù pakáwayyám sù kingnguám?” kud da kuna.

19 Simibbák si Apu Kesu nira, á kinagi na, “Táttakan naw yawe mangilin nga bale ni Namarò, á ta tallu ággaw patáddagak ku,” kun na.

20 Á kinagi nayù ira Kudio kuna, “Appátapulu ta annam ta dagunin yù pappadde ra sù mangilin nga kapilliá nga bale ni Namarò! Á patáddagam mu panò ta tallu nga ággaw?” kud da.

21 Ngam yù mangilin nga bale ni Namarò nga kinagi ni Apu Kesu yù baggi na.

22 Á ta pappasá na pate ni Apu Kesu ánná yù paginnanole na, yáyù lá pakanonò nayù ira tudduán na sù kinagi na, á yáyù panguruk da sù ngámin nga inipetúrâ ni Namarò sù dán neitúrâ ánná yù ngámin gapay nga kinagi ni Apu Kesu.

23 Á ta keggá ni Apu Kesu ta Jerusalem nga nakipiestá, aru yù ira nanguruk kuna ta pakasingad da sù aru nga pinagaddátu na nga makapállâ.

24 Ngam arán na ira inikatálà, ta ammu na ta negagángay ta nonò na tolay yù mattá-iki-ikáyá. Ta ammu na yù nonò na ngámin nga tatolay.

25 Á arán na mawák yù umay maddiránuk kuna ta meyannung sù kakágian nayù ira tatolay ta nonò da, ta ammu na lápay ngámin yù ajjan ta nonò da.

### 3

#### *Yù Pakiubobuk ni Nikudemu kâ Apu Kesu*

1 Ajjan yù táddy sù ira karakalán na Kudio nga Parisio, nga mangngágan ta Nikudemu.

2 Á ta táddy nga gabi, minay si Nikudemu nakiubobuk kâ Apu Kesu. “Mesturu,” kun ni Nikudemu kuna, “ammu mi ta sikaw yù mangituddu nga jinok ni Namarò, ta awán gemma ta makapagaddátu ta kun na kingnguám, nu ari mepulù si Namarò kuna,” kun ni Nikudemu kâ Apu Kesu.

3 Á simibbák si Apu Kesu, á kinagi na, “Kukurugán nga kuruk yù kagiak ku nikaw, nga ari bulubugá mesipà yù tolay sù pammagure ni Namarò nu ari moli nga meyanâ,” kun na.

4 Á kinagi ni Nikudemu, “Á kunnasi? Egga panò yù awayyá na tolay nga meyanâ nu lakalákayin? Makatallung panò paga ta sán ni innò na, tapè mamiddúu nga meyanâ?” kun ni Nikudemu.

5 Á simibbák si Apu Kesu, á kinagi na, “Kukurugán nga kuruk yù kagiak ku nikaw, nu ari moli meyanâ yù tolay megapu sù danum ánná yù Ikararuá ni Namarò, ari mesipà sù pammagure ni Namarò.

6 Ta yá lá meyanâ ta tolay yù tolay lá gemma, nga eggá kuna yù nonò na tolay. Ngam yù tolay nga moli meyanâ megapu sù Ikararuá ni Namarò, á pabbalinan ni Namarò ta anâ na, ná moli gapay yù nonò na.

7 Ari ka laguk mapállâ sù kagiak ku nikaw, nga mawák naw ngámin moli nga meyanâ.

8 Ta mássiki nu arán naw ammu nu kunnasi yù kesimmo na, á mesimmo gemma. Á yù paddák yù keyarigán na, ta arán naw ammu yù paggapuán na ánná pappángetán na, ngam ginnán naw yù sarò na. Á kunnian gapay sù keyanâ na tolay kâ Namarò megapu sù Ikararuá na,” kun ni Apu Kesu.

9 Á kinagi ni Nikudemu kâ Apu Kesu, “Á kunnasi yian?” kun na.

10 Á simibbák si Apu Kesu, á kinagi na kuna, “Sikaw yù maráyaw nga mangituddu sù ira ikáttolle tam nga ginaká ni Israel, ngam arám mu ammu yù kinagi nikaw?

11 Kukurugán nga kuruk yù kagiak ku nikaw. Á kagiak ku yù ammù ánná yù nasingak ku. Ngam sikaya nga Parisio, arán naw kurugan yù kagiak ku.

12 Á nu arán naw kurugan yù kinagi nikayu nga meyannung ta dabbuno, manguruk kayu panò nu kagiak ku nikayu yù meyannung ta lángi?

13 Awán bulubugá ta minay ta lángi nu ari lá sikán nga naggapu ta lángi, sikán nga Kaká na ngámin na tatolay.

<sup>14</sup> “Á góri, ta keggá ri Moyses ánná yù ira ginaká ni Israel ta kalállamatán, pidde ni Moyses yù baronsi ta siná-iráw, nga imitaráng na ta káyu nga inisiddá na ta dabbun, tapè mammapiá yù ira kinagá na iráw ta pattánguk da kuna.\* Á kunniúrin gapay yù keyarigák ku. Ta sikán nga Kaká na ngámin na fatolay, ipotud dangà sangaw nga mepátá ta kurù nga patáddagad da.

<sup>15</sup> Á yù ira ngámin nga mangikatalà nikán, mepattolay ira kâ Namarò, á mesipà ira sù pammagurayán ni Namarò ta áddè ta áddè.

<sup>16</sup> “Á gapu ta napasiggá yù ángngiddú ni Namarò sù ira tatolay ta dabbuno, yáyù nga iniyawá na yù Anâ na nga táttáddy ta metapil megapu nira, tapè aggira ngámin nga mangikatalà kuna, ari ira mesinná kâ Namarò, nu ari galâ nga mesipà ira nga mepattolay kuna ta áddè ta áddè.

<sup>17</sup> Ta yáyù gapu na nga jinok ni Namarò yù Anâ na ta dabbuno, nga ari nga mamagikáru ta tolay, nu ari galâ ta aggina yù magikáru ta liwiliwá nayù ira ngámin nga tatolay, tapè meyígù ira megapu kuna.

<sup>18</sup> Á yù ira nga mangikatalà sù Anâ ni Namarò, ari ira mekanâ sù pamagikáru ni Namarò. Ngam yù ira nga ari mangikatalà kuna, nekanâ iren sù pamagikáru ni Namarò, gapu ta arád da ikatalà yù táttáddy nga Anâ ni Namarò.

<sup>19</sup> “Á yáyù nga pagíkárwan ni Namarò ira, gapu ta minayin ta dabbuno yù Anâ na, nga māmannawák ta nonò na tolay, ngam manakì yù ira tatolay kuna. Á yá ipanakì da, ta arád da ikáyâ yù nawák, nu ari galâ yù kallà yù ikáyâ da, gapu ta narákè yù akka-akkuád da.

<sup>20</sup> Á ngámin nga tatolay nga narákè yù akka-akkuád da, malussaw ira sù māmannawák, á molang ira umay kuna, maraké mepasingan yù narákè nga akka-akkuád da.

<sup>21</sup> Ngam yù ira tatolay nga napiá yù akka-akkuád da, umay ira sù māmannawák, tapè mepasingan ta akkuád da lâ yù ngámin nga napiá nga ipakuá ni Namarò nira megapu sù ángngabbák na nira.”

### *Si Apu Kesu ánná si Kuan nga Minánnigù*

<sup>22</sup> Á ta kabalin na yaw, minay di Apu Kesu ánná yù ira tudduán na ta purubinsia na Judiya, á naggián ira nga nanigù ta tatolay tán.

<sup>23</sup> Á nanigù gapay si Kuan ta gián na Enon nga aranni ta ili na Salim, gapu ta napiá yù danum tán. Á minay yù ira tatolay, tapè makirigù ira kâ Kuan, á jinigù na ira.

<sup>24</sup> Ta ari paga nebáluk si Kuan.

<sup>25</sup> Á ajjan yù táddy nga Kudio nga minay nakipereperang ta ubobuk sù ira makituddu kâ Kuan ta meyannung sù kustombare na rilisiód da nga mappakarenu.

<sup>26</sup> Á minay ira laguk kâ Kuan. “Mesturu,” kud da kuna, “manonò mu yù ngaw kabbulum mu nga inipakánnámmum nikami ta paggiát tam ngaw ta dammáng na Jordan? Ajinan nga manigù, á umay yù ira ngámin nga tatolay makirigù kuna!” kud da kâ Kuan.

<sup>27</sup> Á simibálk si Kuan, á kinagi na nira, “Á napiá laguk, ta si Namarò yù mangiyawâ kuna ta pakáwayyá na sù akkuán na, ta awán ta pakáwayyá na tolay nga arán na iniyawâ ni Namarò kuna.

<sup>28</sup> Á sikayu, naginná naw yù kinagi ngaw nikayu, nga aringà MakKiristu nga umay mammaguray. Sikán galâ yù pinapolu ni Namarò nga umay mangipakánnámmu kuna, tapè manguruk kayu kuna.

<sup>29</sup> “Á nu ángngarigán ta ajjan yù bodá, yù nobiu yù mangalawâ ta babay nga atáwa na. Á yù kopun nayù nobiu, nepallà yù pagayáyâ na sù labbè nayù nobiu. Á kunnay gapay nikán, ta nepallà yù pagayáyâ ku megapu sù ira tatolay nga umay kâ Apu.

<sup>30</sup> Kuruk nga aggina yù mepotun nga meparáyaw. Ngam sikán, máwák ta gukágà lâ gukák,” kún ni Kuan nga Minánnigù.

### *Makáwayyá ta Ngámin yù Naggapu ta Lángì*

<sup>31</sup> “Á yù Anâ ni Namarò yù naggapu ta lángì, á aggina yù kotunán ta ngámin. Á yù ira tatolay nga yawe dabbuno yù paggapuád da, á maggián ira lâ ta dabbuno, á ammu ra lâ yù meyannung ta dabbuno, ánná yáyù lâ ubobugad da. Ngam yù naggapu ta lángì, aggina yù kotunán nga makáwayyá ta ngámin.

<sup>32</sup> Á ubobugan na yù nasingan na ánná naginná na ta lángì, ngam awán garè ta manguruk sù kagian na.

<sup>33</sup> Ngam yù ira tatolay nga manguruk sù bilin na, ipakánnámmu ra ta kuruk yù ngámin nga ubobuk ni Namarò, megapu sù panguruk da.

<sup>34</sup> “Á si Apu Kesu Kiristu yù jinok ni Namarò, á ipakánnámmu na yù ubobuk ni Namarò, ta awán ta pakáddékán nayù pakapangnguá na ánná pakáwayyá na megapu sù Ikararuá ni Namarò nga iniyawâ na kuna.

<sup>35</sup> Ta iddukan ni Namarò yù Anâ na, ánná inikatalà na kuna yù pakáwayyá na ta ngámin nga eggá ta lángi ánná dabbuno.

<sup>36</sup> “A yù tolay nág mangikatalà sù Anâ ni Namarò, mesipà kâ Namarò nga mepattolay kuna ta áddè ta áddè. Ngam yù tolay nga ari manguruk sù Anâ ni Namarò, ari bulubugá mepattolay kâ Namarò, nu ari galâ ta ukuman na ira ni Namarò, ánná pagikaruan na ira ta áddè ta áddè.”

#### 4

##### *Yù Pakiubobuk ni Apu Kesu sù Babay nga taga Samaria*

<sup>1</sup> Á yù ira karakalán na Kudio nga Parisio, narámak da ta napakáru yù ira tatolay nga umay makituddu ánná makirigù kâ Apu Kesu ánné sù ira nga makituddu ánná makirigù kâ Kuan.

<sup>2</sup> Ngam ari gemma si Apu Kesu yù manigù, nu ari galâ yù ira tudduán na.

<sup>3</sup> Á pakaginná ni Apu Kesu ta narámak nayù ira Parisio yù pakirigù nayù ira tatolay sù gián na, nánaw laguk ta Judiya nga nepulù sù ira tudduán na, ta umay ira ta purubinsia na Galilia.

<sup>4</sup> Á pallakák di Apu Kesu nga umay ta Galilia, mattalebák ira sù purubinsia na Samaria.

<sup>5</sup> Á nakáddé ira ta ili na Sikar sù purubinsia na Samaria nga aranni ta dabbun nga bittáng na ngaw ni Akup sù ngaw anâ na, nga si Kusè.

<sup>6</sup> A ajjan tán yù bubun ni Akup. Á gapu ta nabannák si Apu Kesu ta pallakalakák na, nagitubang ta aggik na bubun. Á tangngá na ággaw yù labbè da tán.

<sup>7</sup> Pagitubang ni Apu Kesu ta aggik na bubun, minay nanágak yù babay nga taga Samaria. Á kinagi ni Apu Kesu kuna, “Penumam mà bì,” kun na sù babay.

<sup>8</sup> Ta nánawin garè yù ira makituddu kâ Apu Kesu, nga minay ta ili, ta ed da gatángan yù kanad da.

<sup>9</sup> Á yù babay nga kobobuk ni Apu Kesu, nakaddák ta pakiubobuk na kuna, gapu ta iluddè nayù ira Kudio yù ira taga Samaria. Á yáyù nga simibbák yù babay, á kinagi na kâ Apu Kesu, “Kunnasi laguk ámmenum ku nikaw, ta síkaw, Kudio ka. Ngam sikán, taga Samariangá,” kun nayù babay kuna.

<sup>10</sup> Á simibbák si Apu Kesu, á kinagi na kuna, “Nu ammuñ nakuan yù iyawâ ni Namarò ta tolay, á nu ammuñ gapay nakuan nu asinningá nga makkiddaw nikaw, á sikaw nakuan laguk yù makkiddaw nikán ta inumam mu, á iyawâ ku nikaw yù tanakuán nga danum nga manotolay ta áddè ta áddè,” kun na.

<sup>11</sup> “Apu,” kun nayù babay kuna, “awán ka gemma ta itágak, á alaram yawe bubun! Sisaw pangápám mu sù danum nga manotolay ta áddè ta áddè?

<sup>12</sup> Ta góri, si Kákay Akup nga yù ngaw naggaká nittam, aggina yù nakkokkok sawe bubun nga bittáng na nikami. Á aggira ngaw ánná yù ira ngámin nga ánná na ánná ayám da, ininum da yù sinágak da sawe bubun. Makáwayyá ka panò ánné kâ Kákay Akup?” kun nayù babay.

<sup>13</sup> Á simibbák si Apu Kesu kuna, á kinagi na, “Yù ira ngámin nga ámminum ta danum na yawe bubun, mapangál ira paga sangaw.

<sup>14</sup> Ngam yù tolay nga ámminum sù tanakuán nga danum nga iyawâ ku, ari ngin bulubugá mapangál. Ta nu inuman na yù iyawâ ku, mabbáli ta kun na wék ta unak na, nga mallatuá nga manotolay kuna ta áddè ta áddè,” kun ni Apu Kesu kuna.

<sup>15</sup> Á kinagi nayù babay kuna, “Apu, iyawâ mu bì nikán, tapè aringà mabannák nga manoli sawe bubun nga umay manágak,” kun na.

<sup>16</sup> Á pakkiddo nayù babay, kinagi na laguk ni Apu Kesu kuna, “Em mu bì agálán yù atáwam, ta umay kayu saw,” kun na.

<sup>17</sup> “Awánà ta atáwa,” kun nayù babay. Á kinagi ni Apu Kesu kuna, “Wan ay, kuruk yù kinagim, nga awán ka ta atáwa.

<sup>18</sup> Ngam límá gemma ngin yù nangatáwa nikaw. Á yù laláki nga kabbulum mu kungan-gane, ari nga kukurugán nga atáwam. Kuruk yù kinagim nga awán ka ta atáwa,” kun na.

<sup>19</sup> Á kinagi nayù babay, “Apu, síkaw yù ábbilán ni Namarò lagugam!

<sup>20</sup> Á ajjan bì yù iyabbû ku nikaw. Yù ira naggaká nikami nga taga Samaria, yawe puddul yù naggagammungád da ta pakimore ra kâ Namarò. Ngam sikayu nga Kudio, kagian naw ta Jerusalem nakuan yù paggagammungán nayù ira tatolay nga umay makimoray kâ Namarò. Sisaw gián na laguk nayù kuruk nga paggagammungát tam nga makimoray kâ Namarò?” kun nayù babay.

<sup>21</sup> Á kinagi ni Apu Kesu kuna, “Kurugam mu yù kagiak ku nikaw. Duttál sangaw yù ággo na nga ari sawe puddul ánná ari tuke Jerusalem yù paggagammungán nayù ira tatolay nga makimoray kâ Namarò.

<sup>22</sup> Á sikayu nga taga Samaria, makimoray kayu, ngam arán naw garè ammu nu asinni yù pakimorayán naw. Ngam sikami nga Kudio, ammu mi yù pakimorayám mi, ta Kudio gemma yù naggaká sù mangiyígù ta tolay.

<sup>23</sup> Á umayin yù ággo na, mässiki kunangane, nga aijan yù ira nga kuruk nga makimoray kâ Namaro nga Yáma tam ta lángì, nga ari nga áppa-áppè yù pakimore ra, ngam kukurugán nga makimoray ira megapu sù nonò da ánná megapu sù panguruk da, gapu ta kunniaw nga tatolay yù agálán ni Namarò nga Yáma tam nga may makimoray kuna.

<sup>24</sup> Si Namarò yù sigga-inángà nga ari masingan, nga manotolay ta tolay. Á yù ira tatolay nga makimoray nakuan kuna, máwák da makimoray kuna megapu sù nonò da ánná yù panguruk da kuna,” kun ni Apu Kesu.

<sup>25</sup> Á kinagi nayù babay kuna, “Ásikán, ammù gemma ta umay ta dabbuno yù Mangiyígù nga mammaguray nittam. Aggina yù mangngágán ta Kiristu. Á sangaw nu lubbè, aggina yù mangipakánnámmu nittam ta ngámin nga kuruk,” kun na.

<sup>26</sup> Á kinagi ni Apu Kesu kuna, “Sikán yaw nga makiubobuk nikaw,” kun na.

<sup>27</sup> Á ta pagubobuk na paga ni Apu Kesu sù babay, limibbè yù ira tudduán na nga naggapu ta ili, á narángnganád da ira. Á nakaddák ira ta pakibobuk ni Apu Kesu sù babay, ngam awán ta nangiyabbú kuna nu anni yù ikáyâ nayù babay, onu anni yù gapu na nga pakibobuk ni Apu Kesu kuna.

<sup>28</sup> Á yù babay, pakaginná na sù kinagi ni Apu Kesu kuna, dagarágâ nga nánaw laguk nga bittág na yù ammutu na, á nanoli ta ili. Á en na kinagi sù ira katangelián na,

<sup>29</sup> “Et tamín, ta en naw innan yù tolay nga nakkagi nikán ta ngámin nga kingnguâ. Ari panò aggina yù Mangiyígù nga mangngágán ta Kiristu, nga iddagát tam?” kun na.

<sup>30</sup> Á nánaw ira laguk ta ili, ta ed da innan si Apu Kesu.

<sup>31</sup> Á ta kapapáno nayù babay kári Apu Kesu ta bubun, á yù ira tudduán ni Apu Kesu, kinagi ra kuna, “Mesturu, kumán ka bi,” kud da.

<sup>32</sup> Ngam simibbák si Apu Kesu, á kinagi na nira, “Aijan yù tanakuán nga kanak ku nga arán naw ammu,” kun na.

<sup>33</sup> Á yáyù nga nakkaká-abbú yù ira tudduán na, á kinagi ra, “Egga panò yù minay nangiyawâ kuna?” kud da.

<sup>34</sup> Á kinagi ni Apu Kesu nira, “Yaw galá ipakkatolé yù pamalurò ku sù ure ni Namarò nga naddok nikán ánná yù panuppál ku sù ipakuá na nikán.

<sup>35</sup> Ari panò nakagi nikayu ta aijan paga appátabulán áddè ta ággagaták? Ngam kagiak ku nikayu ta namegapungin yù paggagaták. Irípâ nawè yù ira tatolay nga umayin nikán. Meyárik ira ta ammay nga nalutu, ngá mayá magatágún kunangane, ta naparán iren nga umay manguruk nikán.

<sup>36</sup> Á yù ira nga mamatuttul nira, málá da yù napiá nga bálá da. Á yù ira nga patuttulad da nikán, málá da yù kepáttolé ra kâ Namarò ta áddè ta áddè. Á yáyù nga mepagayáyâ ira, nga kunnay sù ira mammulá ánná yù ira maggaták.

<sup>37</sup> Ta kuruk yù dán nga nakagi, nga ‘Aijan yu mammulá, á tanakuán yù umay maggaták.’

<sup>38</sup> Á dobat takayu, ta en naw patuttulan yù ira tatolay nga arán naw sinudduán. Á aijan yù ira nangituddu nira nga napolu ánné nikayu, tapé mesipá kayu sù pabbalinán na bannák na baggi ra.”

<sup>39</sup> Á aru yù ira nga taga Sikar nga nangikatalá kâ Apu Kesu megapu sù kinagi nayù babay nira, nga kun na, “Kinagi na nikán yù ngámin nga kingnguâ,” kun na.

<sup>40</sup> Á yáyù nga minay ira kâ Apu Kesu. Á pakáddè da sù gián ni Apu Kesu, inigaggak da ta maggián bì nira. Á naggián si Apu Kesu nira ta duá nga ággaw.

<sup>41</sup> Á kitáru yù ira nga nanguruk megapu sù ubobuk ni Apu Kesu.

<sup>42</sup> Á kinagi ra sù babay, “Ari lâ yù kinagim yù ipanguruk mi kuna, ta gininná mi ngin gapay yù ubobuk na, á yáyù nga ammu mi ta kukurugán nga aggina yù iddanamát tam nga Mangiyígù ta tolay ta dabbuno,” kud da.

### *Yù Pamammapiá ni Apu Kesu sù Aná nayù Tolay nga Kátannangán*

<sup>43</sup> Á pappasá na duá nga ággaw, nánaw di Apu Kesu ta Sikar nga minay ta Galilia, nga naddakalán ni Apu Kesu.

<sup>44</sup> Á kinagi na ngaw ni Apu Kesu, “Pakimorayád da yù ábbilinán ni Namarò ta ngámin nga lugár. Ngam yù ira katangelián na, arád da pakimorayán,” kun na.

<sup>45</sup> Ngam ta labbè ni Apu Kesu ta Galilia, magayáyâ yù ira tatolay nga mamaddulò kuna, gapu ta nasingad da yù pinagaddátu na ta pakipiestá ra ngaw ta Jerusalem.

<sup>46</sup> Á keggá ni Apu Kesu ta Galilia, nanoli ta ili na Kana ta purubinsia na Galilia, nga gián na ngaw sù pamabbálí na sù danum ta binaráyáng. Á eggá tán yù tolay nga kátannangán, nga matakì yù anâ na nga laláki ta bale ra ta ili na Kapernium.

<sup>47</sup> Pakaginná nayù tolay ta limibbè si Apu Kesu ta Kana, nga naggapu ta purubinsia na Judiya, minay laguk nga nakikomá kuna ta umay ta Kapernium, tapè pammapián na yù anâ na nga magisassay matay.

<sup>48</sup> Á kinagi ni Apu Kesu kuna, “Nu arán naw masingan yù pagaddatuak ku nga makapállâ, egga panò yù ángnguruk naw nikán?” kun na.

<sup>49</sup> “Apu,” kun nayù tolay, “et ten, ta kúragat ta yù arán na paga patay!” kun na.

<sup>50</sup> Á kinagi ni Apu Kesu kuna, “Lubbé ken, ta nammapiá ngín yù anâ mu,” kun na. Á kinuruk nayù tolay yù kinagi ni Apu Kesu kuna, á nánaw, ta manoli sù gián na.

<sup>51</sup> Á sù tádday ággaw, pallakák nayù tolay paga nga lubbè sù gián na ta Kapernium, nerapunán na ta dálan yù ira aripan na. Á kinagi ra ta nammapiá ngín yù anâ na.

<sup>52</sup> Á iniyabbû na nira nu káni yù pammapiá na. Á kinagi ra kuna, “Kagabi ta pannarek na bilák ta págák yù kári na kulikuk na,” kud da kuna.

<sup>53</sup> Á nanonò nayù tolay ta yáyù gapay yù oras nga pakkagi ni Apu Kesu kuna ta nammapiá ngín yù anâ na. Á aggira ngámin nga makkakábbalay, nanguruk ira kâ Apu Kesu.

<sup>54</sup> Á ta keggá ni Apu Kesu paga ta Galilia nga naggapu ta Judiya, yawe yù mekaruá nga pinagaddátu na nga makapállâ.

## 5

*Yù Pamammapiá ni Apu Kesu sù Tolay nga Natay yù Gadduá na Baggi na*

<sup>1</sup> Á kabalist da nappassiár ta ili na Kana, jmittál yù piestá nayù ira Kudio, á giminon di Apu Kesu ta ili na Jerusalem, tapè nakipiestá ira.

<sup>2</sup> Á aijan ta Jerusalem yù danum nga ájjigután nga mangngágan ta Betseda sù ággubobuk nga Kebru,\* nga aranni ta puerá na ili nga ángngitallungád da ta karneru. Á nalepuanán yù danum ta límá nga állirumán nga nattutuppang.

<sup>3</sup> Á kitáru yù ira tatolay nga gipeddán nga máttakì nga naggián tán, nga buling, pilay, ánná yù ira natay yù gadduá na baggi ra, ta iddi-iddagád da lá yù pappalung na danum. Á

<sup>4</sup> Ta aijan kanu yù daroban ni Namarò nga en na ikáddagâ palapalungan yù danum. Á pappalung na danum, mammapiá yù mapolu nga tolay nga mabbassung kuna.

<sup>5</sup> Á aijan tán yù tolay nga natakì ta tallupulu ta walu nga dagunin.

<sup>6</sup> Á nasingan ni Apu Kesu, á ammu na ta nagiddá ta nabayágin. Á iniyabbû na laguk ni Apu Kesu kuna, “Ikáyâ mu ta mammapiá ka?” kun na.

<sup>7</sup> Á simibbák yù matakì, á kinagi na kâ Apu Kesu, “Wan, Apu, ngam awán ta mangipay nikán sù danum ta pappalung na. Á pakáddè ku ta danum, aijjanin yù mapolu ánnè nikán,” kun na.

<sup>8</sup> Á kinagi ni Apu Kesu kuna, “Arà, manáddak ka laguk. Apam mu yù dapam mu, á mallakák ka,” kun na.

<sup>9</sup> Á dagarágâ nammapiá yù tolay, á inâ na yù dapan na, á nallakák nga nánaw. Á Sabadu yù pammapiá nayù tolay, nga ággibannák na Kudio.

<sup>10</sup> Á gapu ta Sabadu yù pammapiá nayù tolay, kinagi nayù ira karakalán nga Kudio kuna, “Sabadu ággawo, nga mangilin nga ággaw. Á mekontará gemma sù tunung tam yù mangáttu ta ággaw nga ággibannák tam. Ngattá, ta káttuam mu yù dapam mu?” kud da.

<sup>11</sup> Á simibbák yù tolay, á kinagi na nira, “Yù tolay nga namammapiá nikán, aggina yù nakkagi nikán ta apak ku yù dapak ku ánná mallakárà,” kun na.

<sup>12</sup> Á iniyabbû da kuna, “Asinni yù tolay nga naddok nikaw ta apam mu yù dapam mu ta mallakák ka?”

<sup>13</sup> Ngam arán na garè ammu nayù tolay nu asinni yù namammapiá kuna, ta napakáru yù ira tatolay tán, á dagarágâ nga nánaw si Apu Kesu.

<sup>14</sup> Á manganánuán, narángnganán ni Apu Kesu yù tolay sù mangilin nga kapilliá, á kinagi na kuna, “Innam mè! Nammapiá ken! Ari ka laguk mamidduá nga malliwâ, maraké mappanà yù mesimmu sangaw nikaw ánnè sù ngaw jigâ mu,” kun na.

\* <sup>5:2</sup> Á Kebru yù ággubobuk nayù ira ngaw Kudio, ta keggá ri Akup, ánná yù ira ngaw ábbilinán ni Namarò.

<sup>15</sup> Á pakasingan nayù tolay kâ Apu Kesu, á nánaw laguk, á en na kinagi sù ira karakalán nga Kudio ta si Apu Kesu yù namammapiá kuna.

<sup>16</sup> Á yáyù nga napporay yù ira karakalán nga Kudio kâ Apu Kesu, á jinigirigâ da, gapu ta ággaw nga ággibannák da yù pamammapiá na sù matakì.

<sup>17</sup> Ngam simibbák si Apu Kesu, á kinagi na nira, "Si Namarò nga Ammò ku, uputan na paga yù pattarabáku na, maguray lâ nga ággaw. Á kunnian gapay nikán, mattarabákungà, ta uputak ku nga tuppálan yù ngámin nga ipakuá nayù Yámà nikán, maguray lâ nga ággaw," kun na.

<sup>18</sup> Á yáyù nga nappanà yù lusso nayù ira karakalán nga Kudio kâ Apu Kesu, á inigagángé ra papatáyan, nga ari lâ megapu sù arán na kinuruk nga kustombare ra ta meyannung sù ággaw nga ággibannák da, ngam megapu paga ta pangigittá na sù baggi na kâ Namarò, ta kinagi na ta si Namarò yù yámà na.

### *Yù Pakáwayyá nayù Anâ ni Namarò*

<sup>19</sup> Á gapu ta pamaliwâ nayù ira karakalán nga Kudio kâ Apu Kesu, kinagi na laguk nira, "Kukurugán nga kuruk yù kagiak ku nikayu. Arák ku mororay yù akkuák ku. Ngam yá lâ akkuák ku yù masingak ku nga akkuán ni Namarò nga Yámà. Á ngámin yù akkuán nayù Yámà, yáyù gapay akkuák ku, sikán nga Anâ na.

<sup>20</sup> Ta ayatan nangà nayù Yámà, á yáyù nga ipasingan na nikán yù ngámin nga akkuán na. Á ipakuá na paga sangaw nikán yù akka-akkuák ku nga makapállâ ánnè karannian nga kingnguâ, tapè mapállâ kayu sangaw.

<sup>21</sup> Á kunnayà kâ Yámà, ta paginnolanayan na yù ira námmatay, ánnà iddán na ira ta inángà tapè matolay ira. Á kunnian gapay yù akkuák ku, sikán nga Anâ na, ta paginnolanayak ku ánnà tolayak ku yù ira nga ikáyâ ku tolayan.

<sup>22</sup> Á ari yù Yámà yù mamanunnù ta tolay, nu ari lâ sikán nga Anâ na, ta inikatalà na nikán nga Anâ na yù mamanunnù ta ngámin,

<sup>23</sup> tapè dayáwad dangà nayù ira ngámin nga tatolay ta kunnay sù áddayo ra kâ Namarò nga Yámà. Á yù tolay nga ari maddáyaw nikán nga Anâ na, arán na gapay dayáwan yù Yámà naddok nikán.

<sup>24</sup> "Kukurugán nga kuruk yawe nga kagiak ku nikayu. Yù tolay nga magginná ta ubobuk ku ánnà manguruk kâ Namarò nga naddok nikán, mepattolay nga mepaggián kâ Namarò ta áddè ta áddè. Á aringin mokum, ta napakomá ngin yù liwiliwâ na, á ásigurán nen ni Namarò, á apan na sangaw nga mesipâ kuna ta áddè ta áddè.

<sup>25</sup> Á kuruk yù kagiak ku nikayu. Ngámin nga tatolay nga ari paga manguruk nikán, kunnay ta natay íren gapu ta nesinná ira kâ Namarò. Ngam ajjanin yù awayyá ra kunangane nga makaginná ta pagágál ku, á yù ira nga magginná ánnà manguruk nikán nga Anâ ni Namarò, mepattolay ira nga mesipâ kâ Namarò ta áddè ta áddè.

<sup>26</sup> Ta sigga-inángâ si Ammò ku, nga manotolay. Á sikán gapay, sigga-inángakâ, ta iniyawâ ni Ammò ku nikán nga Anâ na yù awayyá nga manotolay.

<sup>27</sup> Á iniyawâ na gapay nikán yù pakáwayyá nga mamanunnù ta ngámin, gapu ta sikán yù Kaká na ngámin na tatolay.

<sup>28</sup> "Ari kayu mapállâ sù kinagi, ta duttál sangaw yù pakádekkán nga ággaw, á ngámin yù ira námmatay, maginná ra yù ngárál ku.

<sup>29</sup> Á pakaginná ra, mallawán ira sù tanam da. Á yù ira nga napiá yù kingngikingnguá ra ta keggá ra ta dabbuno, maginnolanay ira nga mepattolay kâ Namarò ta áddè ta áddè. Á yù ira nga narákè yù kingngikingnguá ra ta keggá ra ta dabbuno, mallawán ira gapay ta tanam da nga mekanâ sù pangukum ni Namarò, ta pagikaruan na ira," kun ni Apu Kesu.

### *Yù ira Mangipakánnámu kâ Apu Kesu*

<sup>30</sup> Á kinagi na laguk ni Apu Kesu, "Arák ku mororay yù akkuák ku, ta si Namarò nga Yámà yù naddok nikán, á ta kun na kagian nayù Yámà nikán, kunnian galâ yù pamanunnù ku. Á yáyù nga matunung yù ámmanunnù ku, ta ari yù urè yù tuttulak ku, nu ari galâ yù ure nayù Yámà.

<sup>31</sup> "Á nu sikán lápay nakuan yù makkagi ta meyannung ta baggi, arán naw gemma kurugan yù kagiak ku.

<sup>32</sup> Ngam ajjan yù tanakuán nga mangipakánnámu ta meyannung nikán, nga yù Ammò ku, á ammù ta kuruk ngámin yù kagian na.

<sup>33</sup> "Á sikayu, jinok naw yù ira mangiyabbû kâ Kuan ta meyannung nikán, á kuruk gapay yù kinagi ni Kuan.

<sup>34</sup> Á arák ku gemma awágán yù tolay nga makkagi ta meyannung nikán, ngam ipanonò ku nikayu yù kinagi ni Kuan, tapè meyígù kayu.

<sup>35</sup> Á meyárik si Kuan ta isingan nga maggatang, ta pannawagan na yù nonò na tolay. Á pakaginná naw ngaw sù pangilayalayá ni Kuan, nagayáyá kayu ta mabì.

<sup>36</sup> Ngam ajjan yù makáwayyá nga mangipakánnámmu ta kuruk yù ubobuk ku, nga yù ira makapállá nga pinagaddátù, nga inipakuá nayù Yámà nikán. Á danniaw nga inipakuá ni Ammò nikán yù makáwayyá ánné sù pangilayalayá ni Kuan. Danniaw yù ipanguruk naw ta si Namarò yù Yámà nga naddok nikán.

<sup>37</sup> “Á yù Yámà nga naddok nikán, aggina gapay yù mangipakánnámmu sù meyannung nikán. Ngam sikayu, arán naw bulubugá gininná yù ngárál na, á arán naw nasingan.

<sup>38</sup> Á arán naw inalawá yù bilin na, ta arán nawà kurugan, nga jinok na.

<sup>39</sup> Á gigiámmuan naw yù dán nga netúrâ nga ubobuk ni Namarò, gapu ta kagian naw ta yáyù pakálerán naw sù mannanáyun nga ipakkatole naw. Á mássiki uputan naw nga bibbiran danniaw nga netúrâ, arán naw tákkitlalán ta sikán gemma yù kakágiad da.

<sup>40</sup> Ngattá, ta manaki kayu manguruk nikán, á sikán yù makáwayyá nga manotolay nikayu ta áddé ta áddé?” kun ni Apu Kesu sù ira Kudio.

<sup>41</sup> Á kinagi na paga ni Apu Kesu sù ira karakalán nga Kudio, “Arák ku aleran yù paddáyo na tolay nikán.

<sup>42</sup> Ngam ammù gemma yù nonò naw, á ammù ta awán ta ángngiddù naw kâ Namarò.

<sup>43</sup> Á minayá nikayu ta pannakabaggi ni Namarò nga Yámà, ngam arán nawà alawatan. Á sangaw nu ajjan yù tanakuán nga umay megapu sù ure na lápay, aggina laguk yù alawatan naw.

<sup>44</sup> Egga panò laguk yù awayyá naw nga manguruk nikán, gapu ta yá galâ aleran naw yù paddáyo nayù ira ikáttolle naw, ngam manaki kayu mapaluro sù ipakuá ni Namarò nikayu tapè málâ naw yù paddáyo nayù táttáddy ngá si Namarò?

<sup>45</sup> “Á arán naw laguk kagian ta sikán yù mangikeká nikayu kâ Namarò nga Yámà. Ari sikán yù mangikeká, nu ari galâ si Moyses, nga nangiyawâ sù netúratán nga tunung nga iddanamán naw. Si Moyses yù mangikeká nikayu, ta arán naw kurugan yù initúrâ na.

<sup>46</sup> Á nu kinuruk naw nakuan yù initúrâ na ngaw ni Moyses, á kurugan nawà gapay nakuan, gapu ta sikán yù kakágian na sù initúrâ na.

<sup>47</sup> Ngam nu arán naw kurugan yù initúrâ na, á kunnasi laguk ta manguruk kayu sù kagiak ku nikayu?” kun na.

## 6

*Yù Pamakán ni Apu Kesu ta Límáribu nga Tatolay*

*Mattiu 14:13-21; Markus 6:30-44; Lukas 9:10-17*

<sup>1</sup> Pappásá na danniaw, ajjan di Apu Kesu ánná yù ira tudduán na nga nanoli ta purubinsia na Galilia. Á ta táddy ággaw, minay ira ta dammáng na Bebay na Galilia, nga mangngágan gapay ta Tiberio.

<sup>2</sup> Á ajjan yù ira magaru nga tatolay nga jímináddán kâ Apu Kesu gapu ta nasingad da yù makapállá nga pinagaddátu na ta pamammapiá na sù ira máttakì.

<sup>3</sup> Á pakáddé di Apu Kesu ánná yù ira tudduán na ta dammáng, giminon ira ta puddul, á nagitubang ira tán.

<sup>4</sup> Á maddaggunin yù piestá na Kudio nga panaddamád da ta pattalebák nayù daroban ni Namarò.

<sup>5</sup> Á pagitubang da, nerípâ ni Apu Kesu yù ira magaru nga tatolay nga mappángè nira. Á iniyabbù na laguk kâ Pilippi, “Sisaw yù pangápát tam ta ipamakát tam sawe ira magaru nga tatolay?” kun na.

<sup>6</sup> Á dán nga ammu ni Apu Kesu yù akkuán na sangaw, ngam yáyù iniyabbù na kâ Pilippi, tapè mepasingan nakuan yù pangikatalà ni Pilippi kuna.

<sup>7</sup> Á kinagi ni Pilippi kuna, “Á kunnasi laguk, Apu, ta napakáru ira. Á mássiki nu pígiá yù kuártu nga igátáng tam nakuan, á makúrâng paga yù ipamakát tam sù ira tatolay, mássiki nu isinek tam ta ággibaddì nira,” kun na.

<sup>8</sup> Á si Andares yù táddy sù ira makituddu kâ Apu Kesu, nga wagi ni Simon Eduru. Á simibbák si Andares, á kinagi na kâ Apu Kesu,

<sup>9</sup> “Ajjan saw yù abbing nga eggá kuna yù bálun na nga límá bullung nga pán ánná duá nga baddì nga sirá. Ngam pígiá lâ kapúnu na yian sù ira magaru nga tatolay?” kun na.

10 Á kinagi na laguk ni Apu Kesu nira, “Pagitubangan naw ira bì,” kun na. Á nagitubang ira laguk, gapu ta aláwa yù kakáddapán. Á límáribu támma yù biláng da nga lálláki, nu ari nebiláng yù ira bábbay ánná ábbing ira.

11 Á inâ na laguk ni Apu Kesu yù bálun nayù abbing. Á nakimállà kâ Namarò megapu sù iniyawâ na nga pán ánná sirá, á inipesinek na yù pán. Á nallabbuk yù pán ta pangisinek da sú ira tatolay. Á ta kunnay gapay sù sirá, ta iniddád da ira ta gustu ra nga kanan.

12 Á kiminán ira ta áddè ta kabattuk da. Á kabalid da kiminán, kinagi ni Apu Kesu sù ira tudduán na, “Unnuran naw yù buná ra, tapè ari metabbà,” kun na.

13 Á inunnuk da laguk yù buná ra, á mapulu duá yù lappi nga napannu sù buná ra.

14 Á pakasingan nayù ira tatolay sawe pinagaddátu ni Apu Kesu, napállâ ira, á kinagi ra, “Aggina gemma yù ábbilinán ni Namarò nga initabbá na ngaw nga umay ta dabbuno!” kud da.

15 Á natagenà ni Apu Kesu yù nonò da, ta gaputad da nakuan nga puersán nga mappatul nira. Á yáyù nga nánaw nga naguroray nga giminon ta puddul.

*Yù Pallakák ni Apu Kesu ta Utun na Danum*

*Mattiü 14:22-33; Markus 6:45-52*

16 Á ta pajibbà, minutù yù ira tudduán ni Apu Kesu ta aggik na bebab.

17 Á gapu ta gabingin ánná awán paga si Apu Kesu nira, nappittà ira ta barangay, ta dumáki ira ta dammáng, nga manoli ta ili na Kapernium.

18 Á pattake ra ta barangay, jímittál yù masikan nga paddák, á nappalapalung yù danum.

19 Á pangilápák da sù barangay, annam nga kilometro támma yù kárayyu ra ta aggik. Á nasingad da si Apu Kesu nga mallakalakák sù utun na danum nga umay sù barange ra. Á nepallà yù assing da.

20 Ngam kinagi ni Apu Kesu nira, “Sikán yaw. Ari kayu maganássing,” kun na.

21 Á ayatán ira nga namattakay kuna ta barangay, á dagarágâ ira nga nakáddè ta aggik.

*Si Apu Kesu yù Manotolay nga Meyárik ta Kanan na Tolay*

22 Á sù táddyá ággaw, naggián lâ paga yù ira magaru nga tatolay nga nabattáng ta dammáng, nga magiddak kâ Apu Kesu. Ta nasingad da yù páno nayù ira tudduán ni Apu Kesu sù táttáddyá nga barangay nga ajjan tán, ánná ari nepattakay si Apu Kesu nira. Á yáyù nga iniddagád da lâ paga.

23 Á ta pannawák, aru yù ira barangay nga jiminung nga naggapu ta Tiberio. Aranni yù áddungád da sù nakkákanán nayù ira tatolay ta pán ta kabalín ni Apu Kesu nabbalabálâ kâ Namarò.

24 Á pakánnámmu nayù ira tatolay ta awán lâ awán si Apu Kesu ánná yù ira tudduán na, á nakipattakay ira laguk sù ira barangay nga naddagâ tán, ta ed da aleran si Apu Kesu ta Kapernium.

25 Á pakáddè nayù ira tatolay ta dammáng na bebay, nálek da si Apu Kesu. Á pakálek da kuna, kinagi ra, “Mesturu, kání yù ángem saw?” kud da.

26 Á simibbák si Apu Kesu, á kinagi na nira, “Kukurugán nga kuruk yù kagiak ku nikayu. Ari yá ipagalek naw nikán, gapu ta nasingan naw ánná kánnámmuán naw yù kebalinán nayù makapálâ nga pinagaddátu ta arubáng naw. Ngam yá lâ ipagalek naw nikán yù kabattuk naw ta pán.

27 Ari kayu nakuan mabbannabannák nga magala-alek sù kanan nga mabi malabbak. Aleran naw galá yù tanakuán nga ákkatole naw nga mannanáyun, tapè meppattolay kayu kâ Namarò ta áddè ta áddé. Á sikán nga Kaká na ngámin na tatolay yù mangiyawâ sù ákkatole naw nga mannanáyun, ta sikán yù neddán ni Namarò nga Yámá sù pakáwayâ,” kun ni Apu Kesu nira.

28 Á yáyù nga iniyabbû da laguk kâ Apu Kesu, “Anni nakuan yù akkuám mi, tapè tuppálam mi yù ipakuá ni Namarò nikami?” kud da.

29 Á simibbák si Apu Kesu, á kinagi na nira, “Yawe lâ yù ipakuá ni Namarò nikayu, ta ikatalà nawà, ta sikán yù jinok na saw,” kun na.

30 Á pakaginnára karannian, kinagi ra kuna, “Á anni laguk yù makapálâ nga ipasingam mu nikami, tapè manguruk kami nikaw? Anni laguk yù akkuám mu?

31 Yù ira ngaw naggaká nittam, góri ta keggá ra ta kalállammatán, kinád da yù inipamakán na nira ni Lákay Moyses nga mangngáagan ta manna, ta ajjan yù netúrâ nga, ‘Iniyawâ na nira yù kanad da nga naggapu ta lángi,’<sup>\*</sup> kud da kâ Apu Kesu.

32 Á kinagi ni Apu Kesu nira, "Kurugán nga kuruk yù kagiak ku nikayu. Tanakuán yù manna nga iniyawâ ni Moyses, nga ari yù kanan nga ubobugak ku. Yù Yámà yù mangiyawâ nikayu sù kuruk nga kanan nga ubobugak ku, nga maggagu ta lángì.

33 Á yù kuruk nga kanan nga iyawâ ni Namarò nga maggagu ta lángì yù umay saw dabbuno nga manotolay ta tolay," kun ni Apu Kesu.

34 Á kinagi ra kuna, "Apu, ta keggá mi nga matolay ta utun na dabbun, sigídá iddák kami ngè sawe kanan," kud da.

35 Á kinagi ni Apu Kesu nira, "Sikán yù ubobugak ku nga kanan nga maggagu ta lángì. Sikán yù manotolay. Á yù ira nga umay makituddu ánná mangikatalà nikán, ari iren kun na mabisin ánná mapangál, á ari iren bulubugá magala-alek.

36 Ngam sikayu, máwák nga kagiak ku lá má yù kinagi nikayu, ta mássiki nu masingan nawà, awán galâ ta ángnguruk naw nikán.

37 "Ngam yù ira ngámin nga iyawâ nayù Yámà nikán, aggira yù umay mesipà nikán. Á alawatak ku yù ngámin ira nga umay makituddu nikán, nga arák ku bulubugá papanáwan.

38 Á yá iniyángé saw nga maggagu ta lángì, ta arák ku tuppálan yù urè, nu ari galâ yù ngámin nga ure nayù Yámà nga naddok nikán.

39 Á yawe yù ure nayù naddok nikán, ta ásigurák ku yù ira ngámin nga tatolay nga iniyawâ na nikán, tapè awán bulubugá ta meyawáwán, ngam paginnanolayak ku ira galâ ta panguriánán nga ággaw, tapè mepattolay ira kâ Namarò.

40 Ta yáyù ure nayù Yámà, ta aggira ngámin nga makituddu ánná mangikatalà nikán nga Anâ na, aggira mannanáyun nga mepattolay kuna ta áddè ta áddè. Á sikán yù mamaginnanolay nira ta panguriánán nga ággaw."

41 Á ta pakaginná nayù ira Kudio sù kinagi ni Apu Kesu, nga aggina yù kanan nga naggagu ta lángì, naddagaragim ira.

42 Á kinagi ra, "Ari panò aggina si Kesu nga anâ di Kusè, ta ammu tam gemma di ammò na kâ innò na!" kud da. "Á ngattá laguk, ta kagian na ta naggagu ta lángì?" kud da.

43 Á simibbák si Apu Kesu, á kinagi na nira, "Mattukkâ kayin nga maddagaragim.

44 Awán ta umay makituddu nikán nu arán na agálán nayù Yámà nga naddok nikán, á paginnanolayak ku ta panguriánán nga ággaw.

45 Ajjan yù netúrâ nga inipetúrâ ni Namarò sù ira ngaw ábbilinán na, nga kunniaw: 'Aggira ngámin nga tatolay yù tudduán ni Namarò.'<sup>†</sup>

Á ngámin ira nga magginná ánná manguruk sù ituddu nayù Yámà, aggira yù umay mangikatalà nikán.

46 "Á arák ku kagian ta nasingan na tolay si Namarò nga Yámà. Awán gemma ta nakasingan kâ Namarò nga Yámà, nu ari galâ sikán nga Anâ na nga naggagu ta gián na.

47 Á kukurugán nga kuruk yù kagiak ku nikayu, ta mannanáyun nga mepattolay kâ Namarò yù ira nga mangikatalà nikán.

48 "Sikán yù áttotole na tolay. Sikán yù manotolay, á yá keyarigák ku yù kanan na tolay.

49 Á yù ngaw ira naggaká nikayu, mássiki nu kinád da yù ngaw kanan nga manna, ta pallakalakák da túrin ta kalállamatán, ngam natay ira galâ.

50 Ngam yù kanan nga ubobugak ku, yáyù yù maggagu ta lángì nga umay saw, tapè ajjan yù awayyá na tolay nga kumán kuna, ánná ari matay.

51 Sikán yawe kanan nga maggagu ta lángì. Nu kumán yù tolay sawe kanan nga ubobugak ku, mannanáyun nga mepattolay kâ Namarò ta áddè ta áddè. Á yù kanan nga iyawâ ku, yáyù yù baggi, nga metapil tapè matolay yù ira tatolay," kun ni Apu Kesu.

52 Á pakaginná nayù ira Kudio sù ubobuk ni Apu Kesu, makkákápererang ira ta ubobuk, á kinagi ra, "Kunnesi panò yù ángngipakán na ta baggi na nittam, nga ari gemma makán?" kud da.

53 Á yáyù nga kinagi ni Apu Kesu nira, "Kukurugán nga kuruk yù kagiak ku nikayu. Sikán nga Kaká na ngámin na tatolay, á ta ángngarigán, nu arán naw kanan yù baggi ánná arán naw inuman yù dágà, awán bulubugá ta áttole naw.

54 Ngam yù ira ngámin nga kumán ta baggi ánná ámminum ta dágà, mannanáyun nga mepattolay ira kâ Namarò ta áddè ta áddè, á paginnanolayak ku ira ta panguriánán nga ággaw.

55 Ta kuruk nga kanan yù baggi, ánná kuruk nga inuman yù dágà.

56 "Á yù tolay nga kumán ta baggi ánná ámminum ta dágà, aggina yù mepaggián nikán, á sikán gapay yù mepaggián kuna.

<sup>57</sup> Á yù Yámà nga naddok nikán, aggina yù sigga-inángà nga manotolay, nga paggaguán nayù áttolè. Á yáyù nga matolayà megapu kuna. Á kunnian gapay sù ira ngámin nga kumán ta baggi, matolay ira megapu nikán.

<sup>58</sup> Ta sikán yù kanan nga naggapu ta lángì, nga dumá sù ngaw kinán nayù ira naggaká nittam, ta mássiki nu kinád da, ngam natay ira galâ. Ngam yù ira ngámin nga kumán sawe kanan nga ubobugak ku, mannanáyun ira nga mepattolay kâ Namarò ta áddé ta áddè."

<sup>59</sup> Yáyù kinagi ni Apu Kesu sù pangituddu na ta ággagammungán na Kudio ta ili na Kapernium.

*Yù Meyannung sù Áttolay nga Awán ta Áddè na*

<sup>60</sup> Á ta pakaginná nayù ira siminuttul kâ Apu Kesu sù kinagi na, aru yù ira nga manakì sù kinagi na. Á naddagaragim ira, á kinagi ra, "Jikkù yù kagian na. Egga panò yù manguruk sù kagian na?" kud da.

<sup>61</sup> Á mássiki nu awán ta nakkagi kâ Apu Kesu, ngam ammu na lápay ta maddagaragim ira. Á yáyù nga kinagi na nira, "Ngattá, ta manaki kayu sù kagiak ku?

<sup>62</sup> Á anni laguk yù kagian naw sangaw nu masingan nawà nga umay ta lángì, nga manoli ta gián nga naggapuák ku?

<sup>63</sup> Yù Ikararuá ni Namarò yù manotolay ta tolay. Á yù sikan na baggi na tolay ánná yù pakawayá na, awán ta serbi ra. Yù bilin ni Namarò nga kinagi nikayu, yáyù yù manotolay nikayu ta áddé megapu sù Ikararuá ni Namarò.

<sup>64</sup> Ngam ajjan nikayu yù ira nga ari manguruk," kun na. Yáyù kinagi ni Apu Kesu nira, gapu ta áddé ngaw, dán nga ammu ni Apu Kesu yù ira nga ari manguruk kuna ánná yù tádday nga mappágápù kuna.

<sup>65</sup> Á kinagi na laguk ni Apu Kesu nira, "Yáyù gapu na nga kinagi nikayu ta awán ta umay manguruk nikán nu arán na iyawá nayù Yámà nira yù ángnguruk da," kun na.

<sup>66</sup> A gapu ta panaki da sù ubobuk ni Apu Kesu, aru yù ira nalurâ nga siminuttul kuna, á nánav ira nga aringin nepulupulù kuna.

<sup>67</sup> Á kinagi ni Apu Kesu sù ira mapulu duá nga sinudduán na, "Á sikayu, ikáyâ naw nga mánaw gapay?" kun na.

<sup>68</sup> Á simibbák si Simon Eduru, á kinagi na, "Apu, asinni paga panò dumá nga pakiyápuám mi nakuan? Ta sikaw lâ yù makawayá nga mangipakánnámmu sù ubobuk ni Namarò nga manotolay ta tolay ta áddé ta áddè.

<sup>69</sup> Á kuruk nga manguruk kami nikaw, ánná ammu mingin ta kuruk nga sikaw yù Mangilin nga jinok ni Namarò," kun ni Eduru.

<sup>70</sup> Á pakkagi ni Eduru karannian, simibbák si Apu Kesu nira, á kinagi na, "Ari panò sikayu yù mapulu duá nga piníli? Sikayu gemma, ngam ajjan nikayu yù tádday nga nagunagán ni Satanas."

<sup>71</sup> Yáyù kinagi ni Apu Kesu ta meyannung kâ Kudas, nga anâ ni Simon Iskariote, ta nebilang sù ira mapulu duá nga sinudduán na, ngam aggina yù mangipagápù kuna.

## 7

*Yù ira Wáwwagi ni Apu Kesu nga ari Manguruk kuna*

<sup>1</sup> Á ta kabalin na yaw, naddagâ si Apu Kesu nga nangituddu sù ira ili ámma babálay sù purubinsia na Galilia, ta molang na umay ta Judiya, gapu ta inigagángé ra papatáyan nayù ira karakalán nga Kudio tán.

<sup>2</sup> Á maddaggun yù piestá na Kudio nga mangngágán ta Piestá na Amíngán.

<sup>3</sup> Á yù ira wáwwagi ni Apu Kesu, kinagi ra kuna, "Ngattá, ta maggián ka saw? Napiá nu mánaw ka nga umay ta Judiya, tapè masingan nayù makituddu nikayu yù akka-akkuám mu.

<sup>4</sup> Ta yù tolay nga ikáyâ na nga meparámak, arán na gemma ilímak yù akkuán na. Umay ka laguk ta dakal nga ili, tapè mepasingan sù ira ngámin nga tatolay yù makapállâ nga akka-akkuám mu." Yáyù kinagi nayù ira wáwwagi ni Apu Kesu.

<sup>5</sup> Ta mássiki yù ira wáwwagi na, ari ira paga manguruk kuna.

<sup>6</sup> Á kinagi ni Apu Kesu nira, "Ari paga jimitál yù oras nga pappásingak ku ta ili na Jerusalem. Ngam sikayu, maguray lâ nga ággaw yù pappasingan naw.

<sup>7</sup> Ta ari sikayu yù ikalusso nayù ira tatolay nga ari manguruk kâ Namarò. Ngam sikán, ikalusso rangá, gapu ta sikán yù makkagi nira ta naráké yù akka-akkuád da.

<sup>8</sup> Umay kayu lápay, ta aringá lábbi umay, gapu ta ari paga oras nga pappásingak ku," kun na.

<sup>9</sup> Á ta pakkagi na karannian, nabbattáng lábbi ta Galilia.

*Yù Pakipiestá ni Apu Kesu ta Ili na Jerusalem*

10 Á ta párónayù ira wáwwagi ni Apu Kesu nga minay nakipiestá ta Jerusalem, minay gapay nakipiestá si Apu Kesu, nga naguroray nga awán ta kepulután na, tapè ari mappasin-gan.

11 Á yù ira karakalán na Kudio, ala-alera da si Apu Kesu ta áppiestán. Á iniyabbú da sù ira kábulud da, “Sisaw gián na?” kud da.

12 Á magaru yù ira tatolay nga makipiestá, á nakkaká-anasâ ira ta meyannung kâ Apu Kesu. “Aggina yù napiá nga tolay,” kun nayù ira káruán. Á “Ari,” kud da gapay nayù ira káruán, “ta ilogò na yù ira tatolay,” kud da.

13 Ngam arád da lá ipágginá yù ubobuk da nga meyannung kuna, gapu ta ikássing da sù ira karakalán na Kudio.

14 Á pattangngá nayù piestá, minay si Apu Kesu sù mangilin nga kapilliá, nga nangituddu sù ira tatolay nga ajjan tán.

15 Á napállâ yù ira karakalán na Kudio sù pangituddu na, á kinagi ra, “Ari bulubugá naggigiámmu yane tolay! Á kunnasi laguk ta napakáru yù kánnámmuán na?” kud da.

16 Á yáyù nga simibbák si Apu Kesu, á kinagi na nira, “Yawe nga ituddù, ari nga maggagu sù nonò ku, ngam maggagu galâ sù nonò nayù naddok nikán.

17 Á nu italákkuruk nayù tolay nga manuppál sù ipakuá ni Namarò kuna, kánnámmuán na nu si Namarò yù paggaguán nayù ituddù, onu maggagu galâ ta nonò ku.

18 Á nu ubobugan na tolay yù uru-ure na lápay, yá lá ikáyâ na yù keparáyo na. Ngam yù tolay nga ikáyâ na ta meparáyaw yù naddok kuna, á kuruk ngámin yù kagian na, nga awán bulubugá ta siri na,” kun ni Apu Kesu.

19 Á kinagi na paga sù ira karakalán na Kudio, “Á ari panò sikayu yù iniddán na ngaw ni Moyses sù tunung ni Namarò? Ngam awán nikayu ta mamalurò sù tunung. Ngattá, ta igagángé nawà papatáyan?” kun ni Apu Kesu nira.

20 Á simibbák yù ira magaru, á kinagi ra kuna, “Maguyung ka! Asinni panò mangigagángay nga mamapátay nikaw?” kud da.

21 Á simibbák si Apu Kesu, á kinagi na nira, “Tádday lá yù pinagaddátù sù ággaw nga ággibannák, ta pinammapiá yù tolay nga natakì, á mapálá kayu.

22 Ngam sikayu, palurotan naw yù pakkugi naw sù ira ánâ naw tamekawalu nga ággo ra, mássiki nu Sabadu nga ággibannák, gapu ta yáyù inituddu na ngaw ni Moyses nikayu. Ngam ari gemma si Moyses yù naggaguán nayù kustombare, nu ari galâ yù ira ngaw naggaká nittam.

23 Á nu ángngarigán ta mabigarán yù baggi na tolay sù ággaw nga ággibannák tapè mapalurò yù tunung ni Moyses nga meyannung ta pakkugi na, ngattá laguk, ta mapporay kayu nikán nu pammapiák ku yù matakí sù ággaw nga ággibannák?

24 Nu mananunnú kayu, arán naw Nakuan panunután ta meyannung ta ánnunganán naw, nu arán naw bì iyabbú ta olu yù meyannung ta kuruk, tapè kánnámmuán naw, ánná matunung yù ámmanunnú naw,” kun ni Apu Kesu nira.

*Ari panò si Apu Kesu yù MakKiristu?*

25 Á yù ira tatolay ta Jerusalem, nakkaká-ubobuk ira laguk, á kinagi nayù ira káruán, “Ari panò aggina yù ala-alera da, nga ikáyâ da papatáyan?

26 Á innan nawè! Ajjanin nga magubobuk ta arubáng na ngámin na tatolay, ngam awán ta mamattukkâ kuna! Ammu ra panò ta kuruk nga aggina yù MakKiristu nga umay magmaguray nittam nga Israel?

27 Ngam ari támma, ta ammu tam gemma yù naggaguán na, á nu duttál yù kuruk nga MakKiristu, awán ta makánnámmu sù paggaguán na,” kud da.

28 Á ta pangituddu ni Apu Kesu paga sù mangilin nga kapilliá, inikáddagá na laguk iniyássikan yù ubobuk na, á kinagi na sù ira tatolay, “Ammu nawà panò? Á ammu naw panò yù naggaguán ku? Ngam ari nga sikán yù maká-uray ta ángè saw, nu ari galâ si Namarò yù naddok nikán. Aggina yù kuruk nga napiá, á kuruk ngámin yù kagian na. Á aggina gapay arán naw ammu.

29 Ngam sikán, ammù gemma, ta aggina yù naggaguán ku, á aggina yù naddok nikán,” kun ni Apu Kesu.

30 Á ta pakaginná nayù ira karakalán na Kudio sù kinagi ni Apu Kesu, ikáyâ da gaputan. Ngam awán ta maggápù kuna, gapu ta ari paga yaw yù oras nga sinullà ni Namarò nga paggápù da kuna.

<sup>31</sup> Ngam aru yù ira tatolay nga nanguruk kuna. Á kinagi ra, “Egga panò yù tanakuán nga MakKiristu nga iddagát tam? Á nu ángngarigán ta duttál nakuan yù tanakuán nga MakKiristu, makapagaddátu panò ta makapálâ ánnè karanniawe nga pinagaddátu na? Awáni!” kud da.

*Jinok da yù ira Magguárdiá ta Maggápù kâ Apu Kesu*

<sup>32</sup> Á pakaginná nayù ira Parisio sù kagakagian nayù ira tatolay ta meyannung kâ Apu Kesu, dagarágâ nga nattatáddy ira sù ira kátannangán nga pári, á jinok da yù ira magguárdiá su mangilin nga kapilliá, ta ed da gaputan si Apu Kesu.

<sup>33</sup> Á kinagi na laguk ni Apu Kesu sù ira tatolay, “Makipaggiánà lábbì paga ta baddì nikayu, ta maddaggunakin mánaw nga manoli sù naddok nikán.

<sup>34</sup> Á sangaw nu awánakin saw, ala-aleran nawà, ngam arán nawà málek, ta ari kayu makángay sù giák ku,” kun ni Apu Kesu nira.

<sup>35</sup> Á pakaginná nayù ira karakalán na Kudio sù kinagi na, nakkaká-ubobuk ira, á kinagi ra, “Sisaw panò angayán na nga arát tam pakángayán? Umay panò sù ira ikáttole tam nga makipaggián ta arayyu nga lugár sù ira nga ari Kudio, tapè tudduán na gapay yù ira nga ari Kudio?” kud da.

<sup>36</sup> “Anni panò yaw nga kagian na, nga alerat tam, ngam arát tam málek ánnna ari ittam makángay sù angayán na? Anni panò yù kebalinán na?” kud da.

*Yù Kebalinán nayù Danum nga Manotolay*

<sup>37</sup> Á ta kaporianán nga ággo nayù piestá, nga nanginá nga ággaw, nanáddak si Apu Kesu ta arubág nayù ira tatolay, á iniyásikan na yù ubobuk na, á kinagi na, “Nu eggá yù tolay nga mapangál, umay laguk nikán, tapè penumak ku.

<sup>38</sup> Ta aijan yù netúrâ sù bilin ni Namarò nga kunniaiw: ‘Yù tolay nga mangikatalà nikán, aijan yù kun na wek nga mallatuá nga maggappu ta nonò na, nga manotolay ta áddè ta áddè;’,\* kun ni Apu Kesu.

<sup>39</sup> Á yawe nga wek nga inubobuk ni Apu Kesu, yá kebalinán na yù Ikararuá ni Namarò nga alawatad da sangaw nayù ira nga mangikatalà kuna. Ta ari paga neyawâ yù Ikararuá ni Namarò, gapu ta ari paga jimittál yù pangiparáyo ni Namarò kâ Apu Kesu ta panoli na ta lángi.

*Naddurúmá yù Nonò nayù ira Tatolay ta Meyannung kâ Apu Kesu*

<sup>40</sup> Á ta pakaginná nayù ira tatolay sawe nga kinagi ni Apu Kesu, kinagi nayù ira káruán, “Yawe tolay yù kuruk nga ábbilinán ni Namarò nga iddi-iddagát tam,” kud da.

<sup>41</sup> Á yù ira káruán, kinagi ra, “Aggina gemma yù MakKiristu nga jinok ni Namarò ta mammaguray nittam,” kud da. “Ari,” kun nayù ira káruán, “ta taga Galilia gemma, á Galilia panò yù paggapuán nayù MakKiristu?

<sup>42</sup> Ari panò netúrâ sù dán nga bilin ni Namarò ta yù MakKiristu yù ginaká nayù ngaw Patul Dabid, ánnà Betlejem yù keyanatán na, nga ili ni Patul Dabid?” kud da.

<sup>43</sup> Á yáyù nga ari tangpareku yù nonò nayù ira tatolay ta meyannung kâ Apu Kesu.

<sup>44</sup> Á yù ira káruán, ikáyâ da nakuan gaputan, ngam awán paga bulubugá ta maggápù kuna.

*Ari Manguruk yù ira Karakalán na Kudio*

<sup>45</sup> Á nanoli laguk yù ira magguárdiá sù ira naddok nira nga Parisio ánnna yù ira kátannangán nga pári. Á kinagi nayù ira Parisio nira, “Ngattá, ta arán naw ginápù, nga iyángé naw nakuan saw?” kud da.

<sup>46</sup> Á simibbák yù ira magguárdiá, á kinagi ra nira, “Awán ta tolay nga magubobuk ta kunnay sù ággubobuk na! Awán bulubugá ta kagittá na nga mangituddu!” kud da.

<sup>47</sup> Á kinagi nayù ira Parisio nira, “Nelogò kayu gapay ngam!

<sup>48</sup> Egga panò nikami nga karakalán ánnna yù ira Parisio yù manguruk kuna, mássiki nu tádday? Awán.

<sup>49</sup> Danniaw ira nga magaru nga tumuttul kuna, ari ira naggigiámmu, á arád da ammu yù tunung ni Moyses, á yáyù nga mokum ira laguk,” kud da.

<sup>50</sup> Á aijan gapay nira si Nikudemu, nga Parisio gapay, nga minay ngaw kâ Apu Kesu ta tangngá na gabi. Á pakaginná ni Nikudemu sù kinagi nayù ira kábulun na nga Parisio, simibbák, á kinagi na nira,

<sup>51</sup> “Nu kurugat tam yù tunung ni Moyses, arát tam nakuan panunnután ánná pagikaruan yù toláy, nu arát tam bì olu nga ginnán yù kagian na, tapè ammu tam yù akka-akkuán na,” kun na.

<sup>52</sup> Á simibbák yù ira kábulun ni Nikudem, á kinagi ra kuna, “Taga Galilia ka panò gapay?” kud da. “Bibbiram mu laguk ta napiá yù dán nga netúrâ nga ubobuk ni Namarò, tapè kánnámuám mu gapay ta awán bulubugá ta ábbilinán ni Namarò nga duttál nga maggapu ta Galilia,” kud da.

<sup>53</sup> Á kabalid da nagubobuk, nallalabbé ira nga katággitádday ta bale na.

## 8

### *Yù Babay nga Makikarallaw*

<sup>1</sup> Ta páno nayù ira Parisio ánná yù ira karakalán na Kudio sù mangilin nga kapilliá, nánaw gapay si Apu Kesu nga minay ta puddul na Olibo.

<sup>2</sup> Á ta alippánnawák, nanoli si Apu Kesu sù mangilin nga kapilliá. Á minay nga naggagam-mung yù magaru nga tatolay, á nagarimummungád da si Apu Kesu. Á nagitubang si Apu Kesu nga nangituddu nira.

<sup>3</sup> Á ta pangituddu ni Apu Kesu nira, minay yù ira mesturu ta tunung na Kudio ánná yù ira nga Parisio, á iniyángé ra kuna yù babay nga ginápù da gapu ta narángnganád da nga nakiruruk sù arán na atáwa. Á iniyarubáng da yù babay sù ira tatolay.

<sup>4</sup> “Mesturu,” kud da kâ Apu Kesu, “narángnganám mi yawe babay nga nakiruruk sù arán na atáwa.

<sup>5</sup> Á aijan netúrâ sù tunung tam yù kinagi ni Moyses nga meyannung sù pamagikáru tam sù kunniaw nga babay, ta payapayangat tam nakuan ta batu, tapè matay. Á sikaw, anni laguk yù urem kuna?” kud da.

<sup>6</sup> Yáyù kinagi ra kâ Apu Kesu, gapu ta parubád da, ta ikáyá da nu aijan nakuan yù ipamaliwâ da kuna nga meyannung sù itabbál na nira. Ta nu kagian na nakuan ta arád da papatáyan, kontarán na yù tunung ni Moyses. Ngam nu kagian na nakuan ta palurotad da yù tunung ni Moyses, ámekontará laguk sù tunung nayù patul nga taga Roma. Á yáyù nga maguray lâ yù itabbák na, yáyù ipangikeká ra kuna. Á nakkummak lâ si Apu Kesu, á nattúrâ ta amassisiddu na ta dabbun.

<sup>7</sup> Á gapu ta mangupù ira nga mangiyabbû kuna, á gimikkáng si Apu Kesu, á kinagi na nira, “Yù tolay nikayu nga awán bulubugá ta liwâ na, aggina yù olu nga mamayang sù babay,” kun na.

<sup>8</sup> Á nagitubang nga nakkummak má, nga nangupù nga nattúrâ ta amassisiddu na ta dabbun.

<sup>9</sup> Á ta pakaginná ra sù kinagi na, nappasirán ira ngámin, á nassisínù ira nga nánaw. Napopolu yù kalakalákayád da, á jimináddán ira ngámin. Á nabattáng lâ si Apu Kesu ánná yù babay.

<sup>10</sup> Á sinánguk na laguk ni Apu Kesu yù babay, á kinagi na kuna, “Sisaw ine ra? Awán panò ta mamayang nikaw ta batu?”

<sup>11</sup> “Awánin, Apu. Nánaw iren,” kun nayù babay. Á kinagi ni Apu Kesu kuna, “Á sikán gapay, arát taka pagikaruan. Mánaw ken laguk, ngam arám mu ngin pidduán yù malliwâ,” kun ni Apu Kesu kuna.

### *Si Apu Kesu yù Mamannawák ta Nonò na Tolay*

<sup>12</sup> Á manganánuán, ta pangituddu na mángin ni Apu Kesu sù ira magaru nga tatolay, kinagi na nira, “Sikán yù meyárik ta nawák, ta sikán yù mamannawák ta nonò na tolay. Á yù tolay nga umay makituddu nikán, ari bulubugá magawáwán nga kunnay sù mallakák ta gabi nga awán ta tulu na, nga makkarakarárà sù kallâ. Ta sikán yù mepulù kuna, sikán nga mamannawák ánná manotolay ta áddè ta áddè,” kun ni Apu Kesu.

<sup>13</sup> Á ta pakaginná nayù ira Parisio sù kinagi ni Apu Kesu nga meyannung ta baggi na, kinagi ra kuna, “Awán gemma ta manguruk nikaw, ta táttádday ka lápay nga makkagi ta meyannung ta baggim. Á yáyù nga ari kuruk yù kagiam mu,” kud da kuna.

<sup>14</sup> Á simibbák si Apu Kesu, á kinagi na nira, “Mássiki nu sikán lápay yù makkagi, á kuruk yù kagiak ku gapu ta ammu yù naggapuák ku ánná yù angayák ku. Ngam sikayu, arán naw gemma ammu yù naggapuák ku ánná yù angayák ku.

<sup>15</sup> Á sikayu, nu mamanunnù kayu, á kunnay ta ánnninganán na tolay yù ámmanunnù naw. Ngam sikán, awán ta panunnuták ku.

<sup>16</sup> Á ta ángngarigán nu sikán yù mamanunnù, matunung yù ámmanunnù ku, ta aringà maguroray nga maramunnù, nu ari galá sikami nga duá kâ Yámà nga naddok nikán.

<sup>17</sup> Á ajian yù neturá sù tunung naw, ta nu eggá duá nga naggittá yù kagiad da, á kuruk laguk yù kagiad da.

<sup>18</sup> Á kunnian gemma nikami, ta duá kami nga makkagi ta meyannung nikán, ta sikán yù tádday, á yù mekarúá yù Yámà nga naddok nikán,” kun ni Apu Kesu nira.

<sup>19</sup> Á yáyù nga kinagi nayù ira Parisio kâ Apu Kesu, “Sisaw gián nayù yámam?” kud da. Á simibbák si Apu Kesu, á kinagi na nira, “Arán naw kami ammu, sikami ánnna yù Yámà. Nu ammu nawá, ammu nawin gapay nakuan yù Yámà,” kun na.

<sup>20</sup> Yáyù kinagi ni Apu Kesu ta pangituddu na sù mangilin nga kapilliá, sù lágum nga ággianán nayù kakon nga pangipayád da ta kuártu nga inilimù nayù ira tatolay. Ngam awán ta minay naggápú kuna, gapu ta arán na paga oras nga kagápú na nga sinullá ni Namarò.

#### *Awán ta Makángay sù Angayán ni Apu Kesu*

<sup>21</sup> Á manganánuán, pidduán na nakkagi ni Apu Kesu sù kinagi na nira, “Mánawakin sangaw, á ala-aleran nawà, ngam arán nawà málek, ta matay kayu nga ari paga napakomá yù liwá naw. Á yáyù nga ari kayu makángay sù angayák ku,” kun na.

<sup>22</sup> Á yáyù nga nakkaká-ubobuk yù ira karakalán na Kudio, á kinagi ra, “Anni panò yù kagian na nga ari ittam makángay sù angayán na? Papatáyan na panò sangaw yù baggi na?” kud da.

<sup>23</sup> Á kinagi ni Apu Kesu nira, “Sikayu, taga dabbuno kayu, á nonopan naw lá yù eggá ta dabbuno. Ngam sikán, túrin ta lángi yù naggapuák ku, á yáyù nga nonopak ku ánnna ubobugak ku yù meyannung ta lángi.

<sup>24</sup> Á yáyù nga kinagi nikayu ta matay kayu nga ari paga napakomá yù liwá naw, ta nu arán naw kurugan yù kinagi nga sikán gemma, á sangaw nu matay kayu, maggián nikayu yù ikáru naw nga liwá, á mesinná kayu kâ Namarò ta áddè ta áddè,” kun ni Apu Kesu nira.

<sup>25</sup> Á yáyù nga iniyabbú nayù ira karakalán nga Kudio kâ Apu Kesu, “Á sikaw, asinni ka laguk?” kud da. Á kinagi ni Apu Kesu nira, “Sikán pá gemma aggina nga kinagi nikayu áddè ngaw pamegapu na pangituddu.

<sup>26</sup> Á aru paga yù kagiak ku nakuan nikayu nga meyannung sù akka-akkuán naw nga narákè, ánnna aru yù ággangnguá naw nga panunnuták ku nakuan. Ngam yá lá kagiak ku sù ira tatolay sawe dabbuno yù naginná nga kinagi nayù naddok nikán, á kuruk gemma yù ngámin nga kagian na,” kun ni Apu Kesu nira.

<sup>27</sup> Ngam arád da nánnámuún ta sì Namarò yù ubobugan na, nga Yáma na.

<sup>28</sup> Á yáyù nga kinagi ni Apu Kesu nira, “Sangaw nu ipotun nawà ta kurù, nga Kaká na ngámin na tatolay, á yáyù pakánnámuún naw ta sikán gemma. Á kánnámuún naw gapay ta awán ta akkuák ku megapu sù ure, ngam ubobugak ku galá yù inituddu nayù Yámà nikán.

<sup>29</sup> Á mannanáyun nga mepulù nikán yù Yámà nga naddok nikán. Arán nangà bulubugá pagurorayan, ta akkuák ku lá yù ipakuá na nikán,” kun ni Apu Kesu nira.

<sup>30</sup> Á pagubobuk na karanniaw, aru yù ira tatolay nga nanguruk kuna.

#### *Yù Kuruk nga Bilin ni Namarò yù Mamalubbáng sù ira Makiaripan ta Liwá*

<sup>31</sup> Á kinagi na laguk ni Apu Kesu sù ira Kudio nga nanguruk kuna, “Nu uputan naw yù panguruk naw sù ituddù nikayu, á sikayu yù kuruk nga makituddu nikán.

<sup>32</sup> Á ipakánnámmù nikayu yù kuruk nga maggápu kâ Namarò, tapè mapalubbáng kayu sù mangaripan nikayu,” kun ni Apu Kesu nira.

<sup>33</sup> Á simibbák ira, á kinagi ra kuna, “Sikami yù ginaká ni Kákay Abrakam! Awán bulubugá ta mangaripan nikami áddè ngaw ta áddè kunangane! Ngattá, ta kagiam mu nikami ta mapalubbáng kami sù mangaripan nikami?” kud da.

<sup>34</sup> Á simibbák si Apu Kesu nira, á kinagi na, “Kukurugán nga kuruk yù kagiak ku nikayu. Ngámin yù ira malliwá, aripanan na ira na liwá.

<sup>35</sup> Á ari mannanáyun nga maggián yù aripan ta bale nayù yápu na. Ngam yù kuruk nga anâ na tolay, mannanáyun nga maggián kuna.

<sup>36</sup> Á yáyù nga kagiak ku nikayu laguk, nu yù Anâ ni Namarò yù mamalubbáng nikayu, á kukurugán nga napalubbáng kayin!

<sup>37</sup> “Ammù gemma ta ginaká na kayu ni Abrakam. Ngam igagángé nawà papatáyan, gapu ta arán naw álawatan yù ituddù nikayu.

<sup>38</sup> A ituddù lá yù ipasingan nayù Yámà nikán. Ngam sikayu, akkuán naw yù kagian nayù yáma naw nikayu,” kun ni Apu Kesu nira.

<sup>39</sup> Á simibbák yù ira Kudio, á kinagi ra, "Si Kákay Abrakam yù yáma mi," kud da. Á kinagi ni Apu Kesu nira, "Nu kuruk nga ginaká nakayu ni Abrakam, párigán naw nakuan yù napiá nga kingnguá na ngaw ni Abrakam.

<sup>40</sup> Ngam ari gemma kunnay sù akkuán naw yù kingnguá na ngaw ni Abrakam. Ta sikayu, aleran naw yù awayyá naw nga mamapátay nikán, mássiki nu sikán yù makkagi nikayu ta kuruk nga kinagi ni Namarò nikán.

<sup>41</sup> "Á naggittá galâ yù akka-akkuán naw sù ággangnguá nayù yáma naw," kun ni Apu Kesu nira. Á kinagi ra kuna, "Ari kami labbuák. Ajjan táttádday nga yáma mi nga si Namarò," kud da.

<sup>42</sup> Á kinagi ni Apu Kesu nira, "Nu kukurugán nga yáma naw si Namarò, iddukan nawà nakuan laguk, ta si Namarò gemma yù naggapuák ku, á yáyù gapu na nga minayà saw. Ta arák ku uray yù ángé saw, ngam si Namarò galâ yù naddok nikán.

<sup>43</sup> "Ngattá, ta arán naw kánnámmuán yù kagiak ku nikayu? Wan, yáyù gapu na nga arán naw kánnámmuán, gapu ta kun na kitul kayu, nga manaki nga magginná sù kagiak ku.

<sup>44</sup> Ánâ na kayu ni Satanas nga yáma naw, á yá lâ ikáyâ naw nga akkuán yù ipakuá na nikayu. Á minámmapátay si Satanas ta áddè ngaw nga pamegapu na ngámin, á arán na ammu yù kuruk, ta awán bulubugá ta kuruk sù nonò na. Sirisiri galâ yù kagian na, ta negagángay ta nonò na yù passirisiri na. Aggina yù minássirisiri ánna yù paggapuán na ngámin na siri.

<sup>45</sup> Ngam sikán, kuruk lâ yù kagiak ku, á yáyù nga arán nawà kurugan.

<sup>46</sup> "Asinni nikayu yù makkagi ta ajian liwâ ku? Awán! Á nu kagiak ku yù kuruk, ngattá, ta arán nawà kurugan!

<sup>47</sup> Yù ira ánâ ni Namarò, ginniginnád da yù bilin ni Namarò. Ngam sikayu, arán naw ginnán yù ubobuk ni Namarò. Á yáyù nga arán na kayu anâ," kun ni Apu Kesu nira.

### *Yù Meyannung kâ Apu Kesu ánna si Abrakam*

<sup>48</sup> Á pakkagi ni Apu Kesu ta arán na ira ánâ ni Namarò, simibbák yù ira Kudio, á kinagi ra kuna, "Kuruk yù kagiam mi, nga taga Samaria ka, ta makikontará ka nikami nga taga Israel! Á nagunagán naka na anitu!" kud da.

<sup>49</sup> Á simibbák si Apu Kesu, á kinagi na nira, "Aringà nagunagán na anitu. Ngam iparáyò galâ yù Yámà megapu sù akkuák ku. Á sikayu, pakkakagián nawà.

<sup>50</sup> Á arák ku aleran yù keparáyò. Ngam aijan yù tádday nga magalek sù ira maddáyaw nikán. Á aggina yù mamanunnu.

<sup>51</sup> Á kukurugán nga kuruk yù kagiak ku nikayu. Yù tolay nga manguruk sù kagiak ku, ari bulubugá matay, mássiki ta áddè ta áddè," kun ni Apu Kesu.

<sup>52</sup> Á kinagi nayù ira Kudio kuna, "Á ammu mi ngin ta maguyung ka, nga nagunagán na anitu! Ta natay si Kákay Abrakam ánna natay gapay yù ngaw ira ngámin nga ábbilinán ni Namarò. Ngattá, ta kagiam mu ta ari bulubugá matay yù ira nga manguruk sù kagiam mu?

<sup>53</sup> Makáwayyá ka panò ánnè sù ngaw Kákay Abrakam nga naggaká nikami? Ta natay gemma, á natay gapay yù ngaw ira ngámin nga ábbilinán ni Namarò. Asinni ka panò laguk?" kud da.

<sup>54</sup> Á simibbák si Apu Kesu, á kinagi na nira, "Ta ángngarigán nu dayáwak ku yù baggi nakuan, awán ta serbi na. Ngam yù Yámà yù mangiparáyaw nikán. Aggina si Namarò, nga kagian naw nga Yápu naw.

<sup>55</sup> Arán naw bulubugá ammu si Namarò. Ngam sikán, ammù. Á nu ángngarigán ta kagiak ku nakuan ta arák ku ammu si Namarò, mepárigà nakuan nikayu nga massiri. Ngam kuruk nga ammù gemma, á palurotak ku yù ngámin nga ubobuk na.

<sup>56</sup> Á si Abrakam, nga káke naw, nagayáyâ sù ngaw pagiddanáma na ta masingan na sangaw yù ángé sawe dabbuno. Á nasingan nen yù dattál ku saw, á nepallà yù pagayáyâ na," kun ni Apu Kesu nira.

<sup>57</sup> Á gapu ta natay ta nabayágín si Abrakam, kinagi nayù ira Kudio kâ Apu Kesu, "Awán ka paga ta límpalúnga dagun. Nasingam mu panò si Kákay Abrakam?" kud da.

<sup>58</sup> Á kinagi ni Apu Kesu nira, "Kukurugán nga kuruk yù kagiak ku nikayu. Gári, lage na neyanâ paga ni Abrakam, dán nga aijanakin," kun ni Apu Kesu.

<sup>59</sup> Á pakaginná ra sù kinagi na, minay ira nangâ ta batu, ta payangad da nakuan. Ngam nattuttú si Apu Kesu, á nallammang nga nánaw laguk sù mangilin nga kapilliá.

## 9

*Yù Pamakasingan ni Apu Kesu sù Tolay nga Buling yù Nakeyanakán na*

<sup>1</sup> Á pallakalakák di Apu Kesu, nasingad da yù tolay nga buling nakeyanakán na.

<sup>2</sup> Á yù ira makituddu kâ Apu Kesu, iniyabbû da kuna, “Mesturu, asinni yù nakaliwâ, nga gapu na nga buling nakeyanakán na? Megapu panò ta liwâ na lápay, onu megapu galâ ta liwâ nayù ira darakal na?” kud da.

<sup>3</sup> Á simibbák si Apu Kesu, á kinagi na nira, “Ari megapu sù liwâ na ánnna ari megapu sù liwâ nayù ira darakal na, ngam buling galâ tapè mepasingan yù pakáwayyá ni Namarò megapu kuna.

<sup>4</sup> Á kunangane yù ággó na pattarabáku tam ta keggâ tam paga ta utun na dabbun, tapè palurotat tam yù ipakuá nayù naddok nikán. Awán ta makatarabáku sangaw nu gabingin. Á kunniú gapay nittam, ta nu natay ittamin, awánin ta awayyá tam nga mattarabáku.

<sup>5</sup> Á keggâ paga ta dabbuno, sikán yù mamannawák, á pannawagak ku yù nonò nayù ira tatolay.”

<sup>6</sup> Á kabalin ni Apu Kesu nakkagi karannian, nilutábán na yù dabbun. Á inikiruk na yù luták na ta dabbun, ta paddayan na ta lupè. Á yáyù inâ na nga inileruk na ta matá nayù buling.

<sup>7</sup> Á kinagi na sù buling, “Arà! E ka magámmuâ ta danum nga ájjigután nga mangngágán ta Silowam.” Á “Narok” yù kebalinán na “Silowam.” Á minay laguk nagámmuâ yù buling ta Silowam. Á pagámmuâ na, nakasinganin, á limibbè ta balay.

<sup>8</sup> Á labbè nayù tolay, nasingan nayù ira karúbá na ánnna yù ira nga nakasingan kuna ngaw nga nakilimù, á kinagi ra, “Ari panò aggina yù tolay nga magitubang nga makilimù?” kud da.

<sup>9</sup> “Wan, aggina,” kun nayù ira kárúan. Á yù ira kárúan, kinagi ra, “Ari, ngam kagittá na lâ,” kud da. Ngam yù tolay, kinagi na, “Sikán yù tolay nga buling ngaw,” kun na.

<sup>10</sup> Á kinagi ra kuna, “Anni má ta makasingan ken?” kud da.

<sup>11</sup> Á simibbák yù tolay, á kinagi na nira, “Yù tolay nga mangngágán ta Kesu, inâ na yù dabbun nga binasá na ta luták na, á inileruk na ta matâ. Á kinagi na nikán ta ek ku magámmuâ ta Silowam. Á yáyù kinuruk ku. Á ta pagámmuâ ku, makasinganakin,” kun na.

<sup>12</sup> Á kinagi ra kuna, “Sogián nen?” kud da. “Arák ku ammu. Arák ku ammu yù ine na,” kun na nira.

*Yù Pamestigá nayù ira Parisio sù Tolay nga Buling Ngaw*

<sup>13</sup> Á yù ira karúbá na, inituluk da laguk sù ira Parisio yù tolay nga buling ngaw.

<sup>14</sup> Á Sabadu yù pappadde ni Apu Kesu ta lupè ánnna pamammapiá na sù buling, nga ággó na ággibannák.

<sup>15</sup> Á yáyù nga iniyabbû da má nayù ira Parisio sù ngaw buling nu anni yù inipammapiá na. Á kinagi na nira gapay, “Inileruk na sù matâ yù dabbun nga binasá na ta luták na, á nagámmuákâ, á makasinganakin,” kun na.

<sup>16</sup> Á yáyù nga kinagi nayù ira kárúan nga Parisio, “Ari naggapu kâ Namarò, ta arán na ngilinan yù ággibannák tam nga Sabadu,” kud da. Ngam yù ira kárúan, kinagi ra, “Nu makaliwâ nakuán, ari makapagaddátu ta kunniaue nga makapállâ,” kud da. Á naddurúmá yù nonò da ta meyannung kâ Apu Kesu.

<sup>17</sup> Á yáyù nga iniyabbû da má nayù ira Parisio sù tolay nga buling ngaw, “Á gapu ta kagiam mu ta aggina yù namakasingan nikaw, á anni laguk yù kagiam mu nga meyannung kuna?” kud da. Á kinagi na nira, “Aggina yù ábbilinán ni Namarò,” kun na.

<sup>18</sup> Á danniaw ira nga karakalán na Kudio, arád da kinuruk ta buling ngaw yù tolay nga makasinganin. Á yáyù nga inipágál da yù ira darakal na.

<sup>19</sup> Á iniyabbû da nira, “Kuruk panò nga aggina yù anâ naw nga kagian naw ta nakeyanakán na yù buling na? Á ngattá laguk, ta makasinganin?” kud da.

<sup>20</sup> Á simibbák yù ira darakal na, á kinagi ra, “Wan, kuruk nga aggina yù anâ mi, á kuruk nga neyanâ nga buling.

<sup>21</sup> Ngam arám mi ammu nu kunnasi pakasingan nen. Á arám mi gapay ammu nu asinni yù namakasingan ta matâ na. Iyabbû naw galâ sù anâ mi, ta dakalin gemma, á awayyá nen nga kagian nikayu,” kud da.

<sup>22</sup> Yáyù kinagi nayù ira darakal na, ta maganássing ira sù ira karakalán na Kudio. Ta nattatádday yù ira karakalán ta nonò da ta papanáwad da ta kapilliá áんな arád da bulubugá patallungan yù tolay nga makkagi ta si Kesu yù MakKiristu.

<sup>23</sup> Á yáyù nga kinagi nayù ira darakal na ta aggina lâ yù pangiyabbutád da, “ta dakalin gemma, á awayyá nen nga kagian nikayu,” kud da.

<sup>24</sup> Á pakaginná nayù ira Parisio sù kinagi nayù ira darakal na, pinidduá ra nga inipágál yù tolay nga buling ngaw. Á kinagi ra kuna, “Kagiam mu yù kuruk ta arubáng ni Namarò, ta ammu mi ta nakaliwâ yù tolay nga namammapiá nikaw,” kud da.

<sup>25</sup> Á simibbák yù tolay, á kinagi na nira, “Arák ku ammu nu nakaliwâ, onu ari. Yá lâ ammù, ta bulingà ngaw gemma, á makasinganakin,” kun na.

<sup>26</sup> Á iniyabbû da kuna, “Anni yù kinguguá na nikaw? Kuniasi yù pamakasingan na sù matam?” kud da.

<sup>27</sup> Á simibbák, á kinagi na nira, “Yáyù gemma kinagi nikayu gangù nga arán naw gininná. Ngattá garè, ta itotoli naw nga iyabbû? Ikáyá naw panò nga makituddu gapay kuna?” kun na.

<sup>28</sup> Á pakaginná ra sù initabbák nayù tolay nga buling ngaw, napporay ira. Á nakkakagiád da, á kinagi ra kuna, “Sikaw yù tumuttul kuna! Ngam sikami, si Moyses yù tuttulam mi!

<sup>29</sup> Ta ammu mi ta nakiubobuk si Namarò kâ Moyses. Ngam yane tolay, arám mi ammu yù naggapuán na,” kud da.

<sup>30</sup> Á simibbák yù tolay nga buling ngaw, á kinagi na, “Yawe yù kuruk nga makapállâ lagugam! Ta pinammapiá na yù matâ, ngam arán naw paga ammu yù naggapuán na!”

<sup>31</sup> Ammu tam gemma ta arán na ginnán ni Namarò yù kagian nayù ira malliwâ. Ngam ginnán na yù tolay nga makimoray kuna áんな manuppál ta ure na.

<sup>32</sup> Á áddè ngaw sù kaparò na dabbuno ta áddè kunangan, awán bulubugá ta narámak nga namakasingan ta tolay nga nakeyanakán na yù buling na!

<sup>33</sup> Á nu ari naggapu kâ Namarò, awán bulubugá ta makuá na nga kunniaw,” kun na nira.

<sup>34</sup> Á napporay yù ira karakalán na Kudio, á simibbák ira, á kinagi ra kuna, “Minálliwâ ka gemma áddè ngaw lage na keyanâ mu, á tudduám mu kami panò?” kud da. Á pinapáno ra ta kapilliá, nga arád den bulubugá patallungan.

<sup>35</sup> Á nakarámak si Apu Kesu ta napapánaw yù ngaw buling sù kapilliá, á en na lagukinalek. Pakálek na, iniyabbû na kuna, “Kurugán nga manguruk ka panò sù Kaká na ngámin na tatolay?” kun ni Apu Kesu kuna.

<sup>36</sup> Á simibbák yù tolay nga buling ngaw, á kinagi na kuna, “Asinni, Apu, tapè mangurugà kuna?” kun na.

<sup>37</sup> Á kinagi ni Apu Kesu kuna, “Masingam mu ngin, ta aggina yù makiubobuk nikaw,” kun na.

<sup>38</sup> Á kinagi nayù tolay, “Apu, mangurugà,” kun na. Á dagarágâ nga namalittúkak nga makimoray kâ Apu Kesu.

<sup>39</sup> Á kinagi ni Apu Kesu laguk, “Minayà sawe dabbuno, tapè mesinná yù ira tatolay nga manguruk kâ Namarò sù ira nga ari manguruk kuna. Á yù ira nga kun na buling gapu ta arád da kánnámuán yù kuruk, á pannawagak ku yù nonò da, tapè manguruk ira. Ngam yù ira nga kagiad da ta makasingan ira, ngam manakì ira nga mangikatalà nikán, mabbálí ira ta kun na buling,” kun na.

<sup>40</sup> Á yù ira káruán nga Parisio tán, naginná ra yù kinagi ni Apu Kesu. Á iniyabbû da kuna, “Anni yane nga kagiam mu? Kagiam mu panò ta kun na buling kami gapay?” kud da.

<sup>41</sup> Á kinagi ni Apu Kesu nira, “Ta ángngarigán nu kuruk nga buling kayu nakuan, nga arán naw paga ammu yù bilin ni Namarò, á awán laguk ta pakaliwatán naw. Ngam gapu ta kagian naw ta makasingan kayu, maggián lâ paga nikayu yù ikáru naw megapu sù pakaliwatán naw.”

## 10

### Meyárik si Apu Kesu sù Mináppárák ta Karneru

<sup>1</sup> Á nagángngarigán laguk si Apu Kesu, á kinagi na, “Kukurugán nga kuruk yù kagiak ku nikayu. Nu ángngarigán ta umay yù tolay ta ággianán na karneru, á ari tullung ta puertá na, ngam magalek ta tanakuán nga pattallungán na, aggina yù minákkokò áんな tulisán.

<sup>2</sup> Ngam yù tullung ta puertá, aggina yù mináppárák sù ira karneru.

<sup>3</sup> Á yù magguárdiá ta puertá, bukatán na, tapè tullung yù mináppárak. Á yù ira karneru na, tákkilalád da yù ngárál nayù yápu ra. Á agálán na ira, á ingagánán na ira nga kukuá na nga katággitádday, tapè ilawán na ira.

<sup>4</sup> Á ta kabalín na nangilawán sù ira ngámín nga kukuá na, mallakák nga mapolu nira, á tuttulad da, gapu ta ammu ra yù ngárál na.

<sup>5</sup> Á nu ángngarigán ta umay yù tanakuán nga tolay nga magágál nira, ikarerád da, gapu ta arád da ammu yù ngárál na,” kun ni Apu Kesu.

<sup>6</sup> Yáyù inistoriá ni Apu Kesu sù ira tatolay, ngam arád da nánnámmuán yù kebalinán na. Arád da kánnámmuán ta yù ira nga manguruk kâ Apu Kesu yù meyárik ta karneru na, á aggina yù meyárik ta mináppárak nga manaron nira.

#### *Yù Meyannung sù Áttallungán nga Mappángè kâ Namarò*

<sup>7</sup> Á gapu ta arád da kánnámmuán yù pagángngarigán na, yáyù nga kinagi ni Apu Kesu nira, “Kukurugán nga kuruk yù kagiak ku nikayu. Sikán yù meyárik ta puertá nga áttallungán nayù ira karneru ta ággianád da.

<sup>8</sup> Á yù ira ngámín nga minay nga napolu ánnè nikán, kunnay ta minákkokò ira ánnna tulisán, gapu ta kagiad da ta tanakuán yù meyárik ta áttallungán. Ngam yù ira tatolay nga manguruk nikán, arád da ira gininná.

<sup>9</sup> Sikán yù meyárik ta áttallungán. Á yù ira nga tullung megapu nikán, meyígù ira. Á napiá yù ánnarok ku nira, nga kunnay ta karnerù nga makatallung ánnna makalawán nga umay magárák.

<sup>10</sup> Á yù tulisán, yá lâ iyángé na yù makkokò ánnna mamapátay ánnna manarál. Ngam sikán, minayà manotolay ta tolay, tapè mepattolay ira kâ Namarò ta áddè ta áddè, ánnna nepallà yù piá nayù áttolle ra,” kun ni Apu Kesu.

#### *Si Apu Kesu yù Napiá nga Minánnaron*

<sup>11</sup> Á kinagi ni Apu Kesu, “Sikán yù napiá nga minánnaron, nga meyárik sù napiá nga mináppárak ta karneru, nga itapil na yù baggi na megapu sù ira karneru na, tapè meyígù ira.

<sup>12</sup> Á yù minángngallu, ari kuruk nga mináppárak, gapu ta arán na kukuá yù ira karneru. Á ta ángngarigán nu masingan na yù simaron nga ayám nga umay mangnuá sù ira karneru, ikarerán na ánnna panawán na ira. Á umay yù simaron nga ayám, á akkuán na yù ira karneru, á mawwarawarâ ira.

<sup>13</sup> Á yá ipattálo nayù minángngallu, gapu ta awán ta ákkengá na sù ira karneru, ta arán na ira kukuá.

<sup>14</sup> Sikán yù napiá nga minánnaron, á ammù yù ira ngámín nga kukuá. Á yù ira kukuá, ammu rangà gapay.

<sup>15</sup> Á kunníu gapay nikami kâ Yámà, ta ammu nangà, á ammù yù Yámà. Á itapil ku yù baggi megapu sù ira nga meyárik ta karnerù, tapè meyígù ira.

<sup>16</sup> Á ajjan paga yù ira káruán nga kukuá, nga meyárik ta karnerù nga ari paga námmung. Aggira gapay itallung ku paga, á ginnád da yù ngárál ku, tapè mepattatádday yù ira ngámín nga kukuá, nga kun na tangapangan, á táttádday lâ yù minánnaron nira.

<sup>17</sup> Á yáyù nga iddukan nangà nayù Yámà, gapu ta itapil ku yù baggi megapu sù ira kukuá, tapè máginnanolayà sangaw.

<sup>18</sup> Awán ta makapapátay nikán nu arák ku uray, ngam mabbaluntáriungà nga mangitapil ta baggi. Ta sikán galâ yù makáwayyá nga mangitapil ta baggi, á sikán lággapay yù makáwayyá nga mamaginnanolay ta baggi, ta yáyù ipakuá na nikán nayù Yámà,” kun ni Apu Kesu.

<sup>19</sup> Á pakaginná nayù ira Kudio karannian nga kinagi ni Apu Kesu, naddurúmá yù nonò da ta meyannung kuna.

<sup>20</sup> Aru nira yù ira nga nakkagi, nga kud da, “Nagunagán ánnna maguyung! Ngattá, ta ginniginnán naw yù kagian na?” kud da.

<sup>21</sup> Á yù ira káruán, kinagi ra, “Nu nagunagán, ari kunniauw nakuan yù ággubobuk na. Á makapammpapiá panò yù anitu ta matá na buling?” kud da.

#### *Yù Panaki nayù ira Kudio kâ Apu Kesu*

<sup>22</sup> Á ta kalummin na tiempu, jímittálín yù piestá nga panaddamán nayù ira Kudio sù ngaw pamoli da sù mangilin nga kapilliá ta Jerusalem.

<sup>23</sup> Á ajjan si Apu Kesu sù mangilin nga kapilliá, nga nallakalakák sù balkon nga ingágad da ta Balkon nayù ngaw Patul Solomon.

<sup>24</sup> Á yù ira karakalán na Kudio, nagarimummungád da si Apu Kesu, á kinagi ra kuna, “Anni ikabayák mu nga ipeddak nikami? Nu kuruk nga sikaw yù MakKiristu nga sinullà ni Namarò ta mammaguray nikami, á kagiam mu laguk nikami nga daretiu,” kud da.

<sup>25</sup> Á simibbák si Apu Kesu, á kinagi na nira, “Yáyù kinagikin nikayu, ngam arán naw kurugan. Á yù makapállâ nga akka-akkuák ku megapu sù pakáwayyá nayù Yámà, danniawe nakuan yù ipanguruk naw nikán.

<sup>26</sup> Ngam sikayu, ari kayu mebiláng sù ira nga kun na karnerù, ta ari kayu manguruk.

<sup>27</sup> Yù ira tatolè, meyárik ira ta karnerù, á ginnád da yù kagiak ku nira. Á ammù ira nga taggitáddyá, á tuttulad dangà.

<sup>28</sup> Á totolayak ku ira tapè mepattolay ira kâ Namarò ta áddè ta áddè. Ari ira bulubugá mesinná kâ Namarò, á awán ta makagubâ nira, gapu ta tangngalák ku ira.

<sup>29</sup> Á yù Yámà yù nangiyawâ nira nikán. Aggina yù kotunán, nga makáwayyá ta ngámin. Á awán ta makagubâ sù ira tatolè gapu ta yù Yámà yù manangngal nira.

<sup>30</sup> Sikami kâ Yámà, táddy kamí lâ,” kun ni Apu Kesu.

<sup>31</sup> Á pakaginná nayù ira karakalán na Kudio karannian nga kinagi ni Apu Kesu, minay ira nangâ ta batu, tapè payapayangad da.

<sup>32</sup> Ngam kinagi ni Apu Kesu nira, “Aru yù napiá nga kingngikingnguâ nga inipakuá nayù Yámà nikán megapu sù pakáwayyá na. Anni yù ipamayáng naw nikán?” kun na nira.

<sup>33</sup> Á simibbák yù ira Kudio, á kinagi ra kuna, “Ari yù napiá nga kingnguám yù ipamayáng mi nikaw, nu ari galâ yù pamotum kâ Namarò. Ta tolay ka lâ gemma, á pattáddiosam mu yù baggim!” kud da.

<sup>34</sup> Á simibbák si Apu Kesu, á kinagi na nira, “Arán naw panò binibbik yù netúrâ sù tunung naw nga kinagi na ngaw ni Namarò sù ngaw ira gillakalakayán naw, nga kunniaw: ‘Kinagi nikayu ta kunnay ta dios kayu gapay.’\*

<sup>35</sup> Á ammu tam ta ari gemma mapatalián yù netúrâ nga ubobuk ni Namarò. Á nu kinagi ni Namarò ta kunnay ta dios yù ira ngaw karakalán naw nga nangiyawatán na sù ubobuk na,

<sup>36</sup> á nepatalugáring nikán nga sinullà nayù Yámà áんな jinok na ta umay ta dabbuno!

“Ngattá laguk ta kagian naw ta potuák ku si Namarò gapu ta kinagi ta sikán yù Anâ na?

<sup>37</sup> Á ta ángngarigán nu arák ku nakuan akkuán yù ipakuá nayù Yámà nikán, á arán nawà laguk kurugan.

<sup>38</sup> Ngam nu akkuák ku yù ipakuá nayù Yámà nikán, mássiki nu arán naw kurugan yù kinagi, kemámmatán naw laguk yù kingngikingnguâ, tapè ammu naw áんな kánnámmuán naw ta ajjan yù Yámà nikán áんな ajjanà gapay kâ Yámà,” kun ni Apu Kesu.

<sup>39</sup> Á yù ira Kudio, pakaginná ra sù kinagi ni Apu Kesu, gaputad da nakuan, ngam arád da nagápù gapu ta nallilli nira nga nánaw.

<sup>40</sup> Á páno ni Apu Kesu ta Jerusalem, minay nanoli ta dammág na danum na Jordan, nga nanigután na ngaw ni Kuan, á naggián lâ tán.

<sup>41</sup> Á aru yù tatolay nga minay kuna. Á nakkaká-ubobuk ira, á kinagi ra, “Awán bulubugá ta pinagaddátu na ngaw ni Kuan, ngam kuruk yù ngámin nga kinagi na nga meyannung sawe tolay,” kud da.

<sup>42</sup> Á aru yù ira tatolay tán nga lugár nga nanguruk kâ Apu Kesu.

## 11

### *Yù Pate ni Lasaru*

<sup>1</sup> Á naggián ta ili na Bitania yù ira tallu nga mawwawági, di Lasaru áんな yù ira bábbay, di Maria kâ Marta. Á natakì si Lasaru.

<sup>2</sup> Á si Maria, aggina yù nangipay ta bábbanguk sù takki ni Apu Kesu, á pinunatán na sù duddù na. Á si Lasaru nga wagi na yù natakì.

<sup>3</sup> Á di Maria kâ Marta, nabibilin ira ta umay kâ Apu Kesu, á kinagi na, “Apu, matakì yù kopum mu nga ayatam mu.”

<sup>4</sup> Á pakarámak ni Apu Kesu, kinagi na, “Arán na ipate ni Lasaru yawe takì na. Ngam mesimmu galâ tapè maddáyaw yù ira tatolay kâ Namarò. Á sikán gapay, nga Anâ ni Namarò, meparáywà gapay megapu sù takì ni Lasaru,” kun na.

<sup>5</sup> Á kurugán nga iniddú ni Apu Kesu yù ira mawwawági, di Marta kári Maria kâ Lasaru.

<sup>6</sup> Á másiski nu ammu ni Apu Kesu ta mataki si Lasaru, inipappánná na lâ ta duá nga ággaw yù páno na sù gián na.

\* 10:34 Salmo 82:6

<sup>7</sup> Á pappásá na duá nga ággaw, kinagi ni Apu Kesu sù ira tudduán na, “Mánaw ittam laguk, ta manoli ittam ta Judiya,” kun na.

<sup>8</sup> Á kinagi ra kuna, “Mesturu, gangù lâ mággè pinayáng daka nayù ira karakalán na Kudio tán! Á manoli ka panò paga tán?” kud da kuna.

<sup>9</sup> Á simibbák si Apu Kesu nga nagángngarigán, á kinagi na nira, “Ari kayu maburung. Ari panò mapulu duá nga oras nga manawák ta tangággaw? Á ajjan yù awayyá tam paga nga palurotan yù ipakuá ni Namarò nittam, nga kunnay ta tolay nga mallakák ta kanawák, nga ari mesiddúkal, gapu ta masingan na yù pallakarán na.

<sup>10</sup> Ngam yù tolay nga mallakák ta gabi, mesiddúkal gapu ta kallà garè,” kun na.

<sup>11</sup> Á kabalin ni Apu Kesu nakkagi karannian, kinagi na laguk sù ira tudduán na, “Si Lasaru nga koput tam, makkaturugin. Et tamin, ta lukagak ku,” kun na.

<sup>12</sup> Á kinagi ra kuna, “Apu, nu makkaturugín si Lasaru, mammapiá ngin sangaw,” kud da.

<sup>13</sup> Yáyù kinagi ra gapu ta kagiad da ta makkaturuk lâ si Lasaru nga magibannák. Ngam inubobuk ni Apu Kesu yù pate na nga kunnay ta pakkaturuk na.

<sup>14</sup> Á gapu ta arád da nánnámuún yù kinagi na, yáyù nga kinagi na nira nga daretiu, “Natayin si Lasaru.

<sup>15</sup> Á magayáyákà, gapu ta awánà ta gián na sù pate na, tapè ajjan yù awayyá naw sangaw nga manguruk. Et tamin laguk sù gián na,” kun ni Apu Kesu nira.

<sup>16</sup> Á si Tomâ nga iningágad da ta Jiping, nakiubobuk sù ira kábulun na nga makituddu kâ Apu Kesu, á kinagi na nira, “Á et tamin laguk, ta nu papatáyad da si Mesturu tam, á sittam ngámín yù mekanakanâ kuna nga matay gapay,” kun na.

#### *Si Apu Kesu yù Manotolay nga Mamaginnanolay sù ira Námmatay*

<sup>17</sup> Á ta labbè di Apu Kesu ta Bitania, nánnámuád da ta appâ ta ággawin nga ajjan si Lasaru ta tanam.

<sup>18</sup> Á aranni ta Jerusalem yù bárriu na Bitania. Tallu kilometro lâ yù kárayyu na.

<sup>19</sup> Á aru yù ira Kudio nga taga Jerusalem nga minay manganna-annay kári Marta kâ Maria, tapè mabannáyán ira sù pate nayù wagi ra.

<sup>20</sup> Á si Marta, pakarámák na ta umayin si Apu Kesu, en na jinápun. Ngam si Maria, naggián lâ nga nagitubang sù bale ra.

<sup>21</sup> Á pakáddè ni Marta kâ Apu Kesu, kinagi na kuna, “Apu, nu eggá ka nakuan saw, ari nakuan natay yù wagi.

<sup>22</sup> Á mássiki nu natayin, ammukin ta iyawâ ni Namarò nikaw yù maguray lâ nga kiddawam mu,” kun ni Marta.

<sup>23</sup> Á kinagi ni Apu Kesu kuna, “Maginnanolay yù wagim,” kun na.

<sup>24</sup> Á kinagi ni Marta kuna, “Wan, Apu, ammù ta mepaginnanolay sù ira námmatay ta panguriánán nga ággaw,” kun na.

<sup>25</sup> Á simibbák si Apu Kesu, á kinagi na kuna, “Sikán yù sigga-inángâ nga mamaginnanolay sù ira námmatay. Sikán yù manotolay nira. Á yù tolay nga mangikatalà nikán, mássiki nu matay, á matolay.

<sup>26</sup> Á ngámín yù ira nga matolay nga mangikatalà nikán, ari ira bulubugá mesinná kâ Namarò ta áddè ta áddè.” Á iniyabbû na laguk kâ Marta, “Kurugam mu panò yaw?” kun na.

<sup>27</sup> Á kinagi ni Marta kuna, “Wan, Apu. Mangurugà ta sikaw yù MakKirstu, nga Anâ ni Namarò nga iddagám mi nga umay mammaguray ta dabbuno,” kun na.

#### *Yù Karaddam ni Apu Kesu sù Pate ni Lasaru*

<sup>28</sup> Kabalin ni Marta nga nakkagi karannia, limibbè ta bale na. Á en na iniyanasâ nga kinagi kâ Maria, “Ajjanin yù Mesturu, á ipágál na ka,” kun na.

<sup>29</sup> Pakaginná ni Maria ta limibbè si Apu Kesu, dagarágâ nga limikkâ nga nánaw, ta umay sù gián na.

<sup>30</sup> Ta ari paga nakáddè si Apu Kesu ta babále ra, ngam naggián lâ paga ta nanapunán ni Marta kuna.

<sup>31</sup> Á yù ira Kudio nga ajjan ta bale ra, nga manganna-annay kâ Maria, pakasingad da ta ikáddagâ lâ yù páno ni Maria, siminuttul ira kuna, ta kagiad da ta umay makkulè sù tanam nayù wagi na.

<sup>32</sup> Á pakáddè ni Maria sù gián ni Apu Kesu, namalittúkak ta arubáng na, á kinagi na kuna, “Apu, nu ajjan ka lâ nakuan saw, ari nakuan natay yù wagi mi,” kun na.

<sup>33</sup> Á pakasingan ni Apu Kesu sù ira Kudio nga nepakkulè kári Maria, nakalò yù daddam na ánnna nepallà yù allà na nira.

<sup>34</sup> Á iniyabbû na nira, "Sisaw nangitanamán naw kuna?" kun na. Á kinagi ra kuna, "Apu, et tam ta em mu innan," kud da.

<sup>35</sup> Á nepakkulè gapay nira si Apu Kesu.

<sup>36</sup> Á yáyù nga nakkaká-ubobuk yù ira Kudio, á kinagi ra, "Innan nawè! Nepallà yù ayâ na kuna," kud da.

<sup>37</sup> Ngam yù ira káruán, kinagi ra, "Aggina yù mamammapiá ta matá na buling. Á ngattá garè, ta arán na pinammapiá si Lasaru, tapè ari nakuan natay?" kud da.

### *Yù Pamaginnanole ni Apu Kesu kâ Lasaru*

<sup>38</sup> Á jimikkì ta tanam si Apu Kesu, nga nakalò má laguk yù daddam na. Á kuebá yù nangitanamád da, nga naserrán ta mallakay nga batu.

<sup>39</sup> Á kinagi ni Apu Kesu nira, "Irián naw yù batu," kun na. Á si Marta nga wagi nayù natay, kinagi na, "Apu, nabuyukin garè, ta appâ tangággawin nga netanam," kun na.

<sup>40</sup> Á kinagi ni Apu Kesu kuna, "Arák ku panò kinagi nikaw gangù tanu mangikatalà ka, masingam mu sangaw yù pakáwayyá ni Namarò nga makapállâ?" kun na.

<sup>41</sup> Á yáyù nga imiriád da yù batu. Á sinánguk ni Apu Kesu yù lángì, á kinagi na, "Ammò, magayáykà ta gininnám yù kinagi nikaw.

<sup>42</sup> Á ammù gemma ta tángngagam mu ngámin yù kagiak ku nikaw, ngam yaw lá yù kagiak ku megapu sawe ira tatolay, tapè manguruk ira ta sikaw yù naddok nikán," kun na.

<sup>43</sup> Á kabalín na nakkagi sawe, nakkátol, á kinagi na, "Lasaru, mallawán ka saw," kun na.

<sup>44</sup> Á dagarágâ nga nallawán, nga naputápútán ta sinnun áddè ta takki na áddè ta limá na ánnna mammang na gapay. Á kinagi ni Apu Kesu nira, "Bullarán naw, tapè lubbekin," kun na.

### *Yù Pangigagánge ra nga Mamapátay kâ Apu Kesu*

*Mattiu 26:1-5; Markus 14:1-2; Lukas 22:1-2*

<sup>45</sup> Á aru yù ira Kudio nga mamulun kári Maria, á nasingad da yawe nga kingnguá ni Apu Kesu, Á yáyù nga aru nira yù manguruk kuna.

<sup>46</sup> Ngam yù ira káruán, nanoli ira ta Jerusalem, ta ed da iránuk yù kingnguá ni Apu Kesu sù ira Parisio nga malussaw kuna.

<sup>47</sup> Á yáyù nga naggagammung yù ira Parisio ánnna yù ira kátannangán nga pári sù ira karakálán na Kudio. Á kinagi ra, "Anni yù akkuát tam sù tolay? Ta aru garè yù makapállâ naga pagaddatuan na.

<sup>48</sup> Á nu paguráyat tam tapè uputan na yù kunniaw nga akkuán na, á manguruk sangaw yù ira ngámin nga tatolay kuna. Á mappanà yù ággíat tam sangaw, gapu ta marámak da sangaw nayù ira kátannangán nga taga Roma, á umay ira laguk saw giát tam, á darálad da yù mangilin nga kapilliá ánnna sittam ngámin ánnna yù ira ili tam," kud da.

<sup>49</sup> Ngam yù tádday nira si Kayapas, nga kamotungán na pári tán nga dagun, á simibbák, á kinagi na nira, "Sikayu, awán ta ammu naw,

<sup>50</sup> ta arán naw kánnámuán yawe, nga más mapiá nu metapil yù tádday nga tolay megapu nittam, tapè ari ittam ngámin mámmatay, nga tangapáddabbunán nga Kudio," kun na.

<sup>51</sup> Á yù kinagi ni Kayapas, ari naggapu ta nonò na. Ngam gapu ta aggina yù kamotungán na pári tán nga dagun, á yáyù nga inipakkagi ni Namarò kuna yawe nga meyannung sù ketapil na sangaw ni Apu Kesu megapu sù ira tangapáddabbunán nga Kudio.

<sup>52</sup> Á yù ketapil ni Apu Kesu, ari lâ megapu sù ira Kudio, nu ari galâ megapu sù ira ngámin nga mangikatalà kuna, tapè pattatáddayan ni Namarò yù ira ngámin nga makkakerumá nga ánnna na nga nesinisinek ta ngámin nga tatolay ta dabbuno.

<sup>53</sup> Á áddè sù paggagammung nayù ira kátannangán na Kudio, yáyù pamegapu ra nga mangigagángay sù ámmaté ra kâ Apu Kesu.

<sup>54</sup> Á yáyù gapu na nga ari mappasapasingan si Apu Kesu sù ira tatolay sù purubinsia na Judiya. Nánaw laguk di Apu Kesu ánnna yù ira tudduán na, á minay ira ta babálay na Epraim nga aranni ta kalállamatán. Á nakipaggián ira tán.

<sup>55</sup> Á naddaggunin nga duttál yù Piestá na Kudio, nga panaddamád da sù pattalebák nayù daroban ni Namarò. Á aru yù ira Kudio nga naggapu ta arayyu nga minay ta Jerusalem, ta ed da tuppálan yù kustombare ra nga mappakarenu ta baggi ra lage na piestá, tapè dán nga naparán ira sù pamegapu na.

56 Á ala-alerañ da si Apu Kesu. Á ta paggagammung da ta mangilin nga kapilliá, nakkaká-ubobuk ira, á kinagi ra, "Anni kagian naw? Ari támma umay makipiestá?" kud da.

57 Á yù ira kátannangán nga pári ánná yù ira Parisio, kinagi ra sù ira tatolay tanu ajan yù makánnámmu sù gián ni Apu Kesu, á ipakánnámmu na bì nira, tapè gaputad da.

## 12

*Yù Pangibubbù ni Maria ta Denu nga Nabanguk sù Takki ni Apu Kesu*

*Mattiu 26:6-13; Markus 14:3-9*

1 Á annam paga yù ággaw pángè na pamegapu na piestá. Á minay di Apu Kesu ta Bitania, ta gián ni Lasaru nga pinaginnanole ni Apu Kesu.

2 Á pinarád di Lasaru yù pamugák di Apu Kesu. Á si Marta yù nasserbi nira, á si Lasaru yù tádday nga nepallálláng kâ Apu Kesu.

3 Á iná ni Maria yù tangaboteliá nga bábbanguk nga nanginá, nga denu na nardu, á inibubbù na sù takki ni Apu Kesu, á pinunatán na yù takki na sù duddù na. Á limingngák yù aguk nayù bábbanguk sù balay.

4 Á ajan si Kudas Iskariote, nga tádday sù ira mapulu duá nga makituddu kâ Apu Kesu, á matakí yù nonò na ta pakasingan na sù kingnguá ni Maria. Yawe Kudas yù mappagápù sangaw kâ Apu Kesu. Á kinagi ni Kudas,

5 "Ngattá, ta ari neláku yawe bábbanguk ta tallu gatù, tapè ilimù tam yù pagá na sù ira magáwák?" kun ni Kudas.

6 Á ari kuruk nga mangikállà si Kudas sù ira magáwák, ngam áppè lâ yù kinagi na, gapu ta aggina yù minákkokò, á aggina yù manangngal ta kuártu ra nga kokokotan na lâ.

7 Á kinagi ni Apu Kesu kuna, "Paguráyám mu si Maria. Iyanugù mu kuna, tapè paránan na yù baggi ta ketanam ku.

8 Ta ajan nga mannanáyun nikayu yù ira magáwák. Ngam sükán, mabíkà lâ maggián nikayu," kun na.

*Yù Pangigagánge ra ta Ámmapáte ra kâ Lasaru*

9 Á pakarámak nayù ira magaru nga Kudio ta ajan si Apu Kesu ta Bitania, minay ira sù gián na, ta ed da innan. Á ari lâ si Apu Kesu yù ikáyâ da nga innan, ngam si Lasaru gapay nga pinaginnanole na.

10 Á yáyù nga inigagánge ra nga papatáyan nayù ira kátannangán nga pári si Lasaru gapay,

11 ta aggina yù gapu na nga aru yù ira Kudio nga manguruk kâ Apu Kesu, nga likuránad da yù ira kátannangád da.

*Yù Paddáyo nayù ira Magaru kâ Apu Kesu sù Pakáddè na ta Ili na Jerusalem*

*Mattiu 21:1-11; Markus 11:1-11; Lukas 19:28-40*

12 Á sù tádday nga ággaw, ajan yù ira magaru nga tatolay nga minay nakipiestá, á narámak da ta umayin si Apu Kesu ta Jerusalem.

13 Á nangâ ira ta palákkay, ta ed da jinápun, tapè dayáwad da. Á nagaragiák ira, á kinagi ra, "Dayáwat tam si Namarò.

Dayáwat tam yawe nga jinok ni Namarò ta umay mammaguray nittam.

Dayáwat tam yù Patul na Israel!"\* kud da.

14 Á inikko ni Apu Kesu yù kígo na kabáyu nga dongki, nga nattakayán na. Á yáyù nga napalurò yù inipalappâ ni Namarò nga inipetúrâ na sù dán nga libru nga kunniaw:

15 "Sikayu nga taga Jerusalem, ari kayu maganássing.

Ajjanin yù patul naw nga umay nikayu,  
nga mattakay ta kígo na dongki."†

16 Á yù ira sinudduán ni Apu Kesu, arád da nánnámmuán yù kebalinán nayù netúrâ. Ngam ta kabalín na nagínnanolay nga límibbè ta lángi, ninonò da laguk ta yáyù kapalurò nayù dán nga netúrâ nge meyannung sù pattake na ta dongki nga minay ta Jerusalem.

17 Á yù ira magaru nga tatolay nga nakasingan kâ Apu Kesu sù pagágál na kâ Lasaru ta tanam na ta pamaginnanole na kuna, kinagi ra yù nasíngad da sù ira tatolay ta Jerusalem.

18 Á yáyù nge minay yù ira magaru nga tatolay nga jiminápun kâ Apu Kesu, ta narámak da yù makapállâ nga pinagaddátu na.

19 Á nakkaká-ubobuk laguk yù ira Parisio, á kinagi ra laguk, "Ye, innan nawè! Awán garé ta awayyá tam, ta siminuttul ngámin nga tangapáddabbunán kuna!" kud da.

*Yù Ánge nayù ira ari Kudio kâ Apu Kesu*

\* 12:13 Salmo 118:25-26    † 12:15 Sakariá 9:9

20 Á aijan gapay yù ira nga ari Kudio nga taga Garesia nga minay makipiestá ta Jerusalem, tapè makimoray ira gapay kâ Namarò.

21 Á minay ira laguk kâ Pilippi, nga taga Betseda sù purubinsia na Galilia, ta ed da kagian kuna, “Apu, ikáyâ mi makiammu kâ Apu Kesu,” kud da.

22 Á en na kinagi ni Pilippi kâ Andares, á nappulù ira, ta ed da kagian kâ Apu Kesu.

*Yù Pagubobuk ni Apu Kesu ta Meyannung sù Pate na*

23 Á pakkagi di Andares ta aijan yù ira umay nga taga Garesia, simibbák si Apu Kesu, á kinagi na nira, “Duttálín yù ággo na keparáyò, nga kepotuk ku sangaw ta lángì, sikán nga Kaká na ngámin na tatolay.

24 Kukurugán nga kuruk yù kagiak ku nikayu. Máwák nga matayà sangaw ánnna metanamà, tapè aru yù ira meyígù. Á yaw keyarigán na, yù tangabullung nga bini. Nu ari memulá ta dabbun, tattádday lá nga ari umaru. Ngam nu memulá ta dabbun nga kunnay ta natay, á mattubbu, á mabbáli ta aru.

25 Á kunnian gapay yù keyarigán nayù tolay nga tángngagan na lâ yù ákkatole na ta baggi na sawe dabbuno, ta lonán na ngámin ta pate na sangaw ánnna mesinná kâ Namarò ta áddè ta áddè. Ngam yù tolay nga máyâ nga mamalurò sù ipakuâ kuna, mássiki nu lonán na ngámin yù ikáyâ na sawe dabbuno, ngam meyígù, á málâ na yù áttole na kâ Namarò nga awán ta áddè na.

26 Á yù tolay nga máyâ nga makiaripan nikán, máwák na tumuttuttul nikán, tapè maguray lâ yù giák ku, aijan lâ nikán yù aripak ku. Á iparáyo nayù Yámà ngámin yù ira nga makiaripan nikán,” kun na.

27 Á inupù ni Apu Kesu nga kinagi, “Á duttálín yù jigâ ku, á maburungà nga mapábbaw. Anni laguk ipakimállà ku kâ Yámà? Makimállakà nakuan panò kuna ta ililli nangà sù jigâ nga duttál nikán sangaw? Ngam ari gemma, ta yáyù iniyángè saw, tapè attamák ku yù jigâ,” kun na.

28 Á kinagi na laguk ni Apu Kesu kâ Namarò, “Ammò ku, meparáyaw yù ngágam mu ta arubáng nayù ira tatolay megapu nikán,” kun na. Á dagarágâ aijan yù ngárál nga naggapu ta lángì, á kun na, “Neparáyawin yù ngágak ku nga kamotungán, á meparáyaw paga sangaw,” kun na.

29 Á yù ira magaru nga tatolay nga nanáddak ta aranni kuna, naginná ra yù ngárál, á kagiad da ta nagalittúgaw. Á yù ira káruán, “Ari,” kud da, “ngam nagubobuk yù daroban ni Namarò kuna,” kud da.

30 Á kinagi ni Apu Kesu nira, “Yane ngárál nga naginná naw, ari nagubobuk megapu nikán, nu ari galâ megapu nikayu, tapè manguruk kayu.

31 Á duttálín yù pamegapu nayù pamanunnù ni Namarò sù ira tatolay sawe dabbuno, ánnna duttálín yù káppù ni Satanos, ánnna yù ketabbà na.

32 Á sikán, sangaw nu mepotunà, agálák ku yù ira tatolay ta ngámin nga lugár, á abbágák ku ira, tapè umay ira mangikatalà nikán,” kun na.

33 Á yáyù kinagi ni Apu Kesu, tapè ipakánnámmu na nira yù ipate na nga mepátà ta kurù nga mapatáddak.

34 Á yáyù nga simibbák yù ira magaru nga tatolay, á kinagi ra kuna, “Naginná mi yù binibbik da nga netúrâ sù tunung tam, nga matolay yù MakKiristu ta áddè ta áddè nga mammaguray nittam. Ngattá laguk, ta kagiam mu ta mepotun nga mepátà ta kurù yù Kaká na ngámin na tatolay? Ari panò aggina yù mammaguray nga mangngágan ta Kiristu? Asinni laguk yù Kaká na ngámin na tatolay nga kum mu?” kud da.

35 Á yáyù nga kinagi na laguk ni Apu Kesu nira, “Maggiánà paga nikayu ta mabì. Á keggâ lâ paga nga mamannawák ta nonò naw, tuttulan nawà, tapè ari kayu sangaw mepárik sù tolay nga magabíyán. Ta yù tolay nga mallakák ta kallà, magawáwan gapu ta arán na ammu yù angayán na.

36 Á ta keggâ paga ta dabbuno nga mamannawák ta nonò na tolay, ikatalà nawà, tapè manawagán yù nonò naw nga mepagittá ta nonò ku,” kun ni Apu Kesu nira.

*Yù Panakì nayù ira Kudio nga Manguruk*

Á kabalin ni Apu Kesu nagubobuk sù ira magaru nga tatolay, nánawán na ira, á nattuttù nira.

37 Ta mássiki nu aru yù pinagaddátu na nga makapállâ ta arubáng da, nanakì ira nga manguruk kuna.

38 Á yáyù nga napatuppál yù initúrâ na ngaw ni Lákay Isaya, nga ábbilinán ni Namarò, nga kunnia:

“Apu, awán ta manguruk sù kinagi mi nira nga meyannung nikaw.

Á awán gapay ta makánnámmu sù inipalappâ mu nga ámmagaddátum!”‡

<sup>39</sup> Á gapu ta ari ira manguruk, kinagi na paga nayù ngaw Lákay Isaya yù meyannung sù ipanaki da, ta kinagi na,

<sup>40</sup> “Pinabbalin na ira ni Namarò ta kun na buling,  
ánnna pinataggâ na yù nonò da.

Yáyù nga arád da kemámmatán yù mepasingan nira  
ánnna arád da kánnámmuán yù mepalappâ nira.

Ta kinagi ni Namarò,

‘Nu mabbabáwi ira nakuan ánnna umay ira nikán,  
á pakomák ku ira,’ kun na.”§

<sup>41</sup> Yáyù kinagi na ngaw ni Lákay Isaya sù ngaw gári, gapu ta nasingan na yù dalingáráng  
nayù MakKiristu, á kinagi na yù meyannung kuna.

<sup>42</sup> Á mássiki nu ari nanguruk yù ira káruán nga Kudio, aru yù ira nga makáwayyá nga  
Kudio nga manguruk kâ Apu Kesu. Ngam inilímán da yù ángnguruk da gapu ta maganássing  
ira sù ira Parisio, marakè palawanad da ira sù ággagammungád da.

<sup>43</sup> Ta ikáyâ da yù paddáyo nayù ira ikáttolé ra ánné sù paddáyo ni Namarò nira.

*Si Apu Kesu yù Mangiyígù sù ira Mangikatalà kuna*

<sup>44</sup> Á uliotturu nga pangituddu ni Apu Kesu, iniyássikan na yù ubobuk na, á kinagi na, “Yù  
tolay nga manguruk nikán, ari lâ sikán yù kurugan na, nu ari gapay si Namarò nga naddok  
nikán.

<sup>45</sup> Á yù tolay nga maningen nikán, imámmatán na gapay yù naddok nikán.

<sup>46</sup> Sikán yù meyárik ta nawák, á minayà ta dabbuno nga mamannawák ta nonò na tolay,  
tapè ari maggián ta kallà yù ira nga mangikatalà nikán.

<sup>47</sup> Á nu aijan yù tolay nga makagínná sù kagiak ku, ngam ari manguruk, á ari sikán yù  
mamanunnù kuna. Ta aringà minay nga mamanunnù ta tolay, ngam minayà ta dabbuno  
tapè sikán yù mangiyígù nira.

<sup>48</sup> “Ngam aijan yù mamanunnù sù ira tatolay nga manakì nikán ánnna ari manguruk sù  
kinagi, ta mokum ira sù pagáddekan na ággaw. Á yá ikokum da yù ubobuk ku nga arád da  
kinuruk.

<sup>49</sup> Ta aringà magubobuk megapu sù pakáwayyâ, nu ari galâ megapu sù pakáwayyá nayù  
Yámà nga naddok nikán. Ta inibilin na nikán ngámin yù kagiak ku ánnna ituddù.

<sup>50</sup> Á ammù gemma ta manotolay yù taddán nayù Yámà ta tolay ta áddè ta áddè. Á yáyù  
nga kagiak ku yù ngámin nga inibilin nayù Yámà nikán.”

## 13

*Yù Pangituddu ni Apu Kesu ta Keggá na ta Jerusalem*

<sup>1</sup> Á maddaggunin yù Piestá na panaddamád da ta pattalebák nayù daroban ni Namarò,  
á ammu ni Apu Kesu ta duttálín yù ággaw nga páno na ta dabbuno, nga manoli sù Yáma na  
ta lángi. Á aijan yù ángngiddù ni Apu Kesu sù ira tatole na ta utun na dabbuno ta áddè ngaw  
pamegapu na ngámin. Á yáyù nga inipasingan na yù ángngiddù na nira nga napasigaggà ta  
áddè ta áddè.

<sup>2</sup> Á ta púgágén, nakkakálálláng nga namúgák di Apu Kesu ánnna yù ira tudduán na. Á  
kinuríru nen ni Satanás yù nonò ni Kudas nga anâ ni Simon Iskariote, ta ipagápù na si Apu  
Kesu sù ira malussaw kuna.

<sup>3</sup> Á ammu ni Apu Kesu ta inikatalà nayù Yáma na kuna yù pakáwayyá na ta ngámin, ánnna  
ammu na gapay ta si Namarò yù naggapuán na ánnna labbetán na sangaw.

<sup>4</sup> Á kabaliid da kiminán, gimikkáng laguk si Apu Kesu, á inirián na yù latuk na barawási  
na, á inibarakà na yù tuálliá.

<sup>5</sup> Á iná na yù palanggána nga piniyyán na ta danum, á pinegapuanán na nga binaggawán  
yù takki nayù ira tudduán na ánnna pinunatán na ira sù tuálliá nga inibarakà na.

<sup>6</sup> Á pabbago ni Apu Kesu paga ta takki ra, jimikkì kâ Simon Eduru, tapè baggawán na  
yù takki na. Ngam nanaki si Éduru, á kinagi na kuna, “Apu, sikaw panò yù mamaggaw ta  
takki?” kun na.

<sup>7</sup> Á kinagi ni Apu Kesu kuna, “Arám mu kánnámmuán yawe nga akkuák ku kunangan,  
ngam kánnámmuám mu sangaw,” kun na.

8 Á kinagi ni Eduru kuna, "Apu, ari nakuan sikaw yù mamaggaw ta takki. Arák ku bulubugá ipabbaggaw nikaw yù takkì," kun na. Á kinagi ni Apu Kesu kuna, "Nu arát taka baggawán, ari ka mesipà nikán," kun na.

9 "Apu," kun ni Simon Eduru kuna, "nu kunniú laguk, ari lâ yù takkì yù baggawám mu, nu ari gapay yawe limâ ira áンna ulù," kun na.

10 Á kinagi ni Apu Kesu kuna, "Yù tolay nga najjigukin, ari má majjigù, ngam yù lâ takki na yù mabaggawán, tapè pareku nga marenú yù baggi na. Á sikayu, napakarenuán kayin, ngam ari sikayu ngámin," kun na.

11 Ta ammu ni Apu Kesu yù tolay nga mappagápù kuna, á yáyù gapu na nga kinagi na ta ari ira ngámin yù napakarenuán.

12 Á kabalin ni Apu Kesu namaggaw ta takki ra, inâ na yù barawásí na, á nanoli sù nagitubangán na. Á kinagi na nira, "Kánnámmuán naw panò yù kebalinán nayù kingnguá nikayu?

13 Makimesturu kayu áンna makiyápu kayu nikán, á yáyù kustu, ta sikán gemma yù kukurugán nga yápu naw.

14 Á nu sikán, nga yápu naw áンna mesturu naw, yù mamaggaw ta takki naw, á sikayu gapay nakuan laguk yù makkakábaggaw ta takki naw.

15 Á inipasingak ku yawe nga kingnguá nikayu, tapè kánnámmuán naw ta tumulù nakuan yù nonò naw, áンna párigán naw gapay yù akkuák ku.

16 Ta kukurugán nga kuruk yù kagiak ku nikayu. Ari makáwayyá yù aripan ánnè sù yápu na. Á kunniú gapay, ari makáwayyá yù ábbilinán ánnè sù maddok kuna.

17 Á nu kánnámmuán naw yawe nga ituddù nikayu, magayáyá kayu laguk nu kurugan naw."

### *Yù Pamalappá ni Apu Kesu sù Mappagápù kuna*

*Mattiu 26:20-25; Markus 14:17-21; Lukas 22:21-23*

18 Á kinagi ni Apu Kesu paga, "Yawe nga kinagi nikayu, ari nga sikayu ngámin yù keyannungán na, ta ammu yù ira nga pinílì. Ngam eggá yù mappagápù nikán, tapè mapalorù yù dán nga netúrâ nga kunniai.\*

'Yù kapulupulù ku nga nepakkákán nikán, aggina yù mappagápù nikán.\*'

19 Yáyù nga kagiak ku nikayu kunangane pángé na kesimmu na, tapè sangaw nu mesimmu, manguruk kayu nikán, ta sikán yù Mangiyígú.

20 Á kukurugán nga kuruk yù kagiak ku nikayu. Yù tolay nga mangalawâ sù ira nga dobak ku, kunnay ta sikán gapay yù alawatan na. Á yù tolay nga mangalawâ nikán, kunnay ta alawatan na gapay yù naddok nikán."

21 Á kabalin ni Apu Kesu nakkagi, mapábbaw yù nonò na, á kinagi na, "Kuruk yù kagiak ku nikayu. Ajjan nikayu yù mappagápù nikán," kun na.

22 Á yù ira tudduán na, nakkakálipilip ira, ta arád da ammu nu asinni yù kagian na.

23 Á ajjan yù tádday nira nga nagitubang ta taging ni Apu Kesu. Aggina yù kuruk nga iddukan na.

24 Á inisenias ni Simon Eduru ta iyabbù na kâ Apu Kesu nu asinni yù kagian na.

25 Á yù tolay nga iddukan ni Apu Kesu, nga namerik kuna, iniyabbù na kuna. "Apu, asinni yù kagiam mu nga mappagápù nikaw?" kun na.

26 Á kinagi ni Apu Kesu kuna, "Yù iddák ku ta pán nga itunnà ku ta jigu," kun na. Á pangitunnà na sù pán, iniyawâ na kâ Kudas nga anâ ni Simon Iskariote.

27 Á pangalawâ ni Kudas sù pán, dagarágâ nga simillung si Satanas kuna. Á kinagi na laguk ni Apu Kesu kâ Kudas, "Mabì ka lâ sù akkuám mu," kun na.

28 Á awán bulubugá sù ira nepakkákán ta makánnámmu nu anni yù ipangapurá ni Apu Kesu kâ Kudas.

29 Á gapu ta ammu nayù ira tudduán ni Apu Kesu ta si Kudas yù minánnangngal ta pitáka, kagian nayù ira káruán ta nonò da ta kinagi ni Apu Kesu kuna ta umay bì gumátáng ta kanan nga awágad da ta piestá, onu jinok na támma ta umay mangilimù sù ira magáwák.

30 Á pakálâ ni Kudas sù pán, nallawán nga nánaw. Á gabi ngin yù páno na.

### *Yù Bagu nga Tunung ni Apu Kesu*

31 Á kapállikuk ni Kudas nga nánaw, kinagi ni Apu Kesu, "Mepalappákin yù keparáyò, sikán nga Kaká na ngámin na tatolay. Á meparáyaw gapay si Namarò megapu nikán.

\* 13:18 Salmo 41:9

<sup>32</sup> Á ta pangipalappâ ku sù keparáyo ni Namarò, ipalappâ na gapay yù keparáyò. Á dagarágâ yù pangipalappâ na sù keparáyò,” kun ni Apu Kesu.

<sup>33</sup> “Sikayu nga makituddu nikán, sikayu yù ánnâ ku,” kun na gapay ni Apu Kesu. “Á mabiká lá paga maggián nikayu. Á aleran nawà sangaw. Ngam kagiak ku gapay nikayu yù kun na kinagi gangú sù ira karakalán na Kudio, ta ari kayu makángay sù angayák ku.

<sup>34</sup> Á yáyù nga kagiak ku nikayu yù bagu nga tunung ku, ta makkaká-iddù kayu. Á kunnay sù ángngiddù ku nikayu, kunnian gapay yù ángngiddù naw sù ira kábulun naw.

<sup>35</sup> Ta yáyù pakánnámmuán nayù ira ngámin na tatolay ta sikayu yù kuruk nga makituddu nikán, nu masingad da yù pakkaká-iddù naw.”

*Yù Pamalappâ ni Apu Kesu sù Panájji ni Eduru kuna  
Mattiū 26:31-35; Markus 14:27-31; Lukas 22:31-34*

<sup>36</sup> Á iniyabbi na laguk ni Simon Eduru kâ Apu Kesu, “Apu, sisaw angayám mu?” kun na. Á simibbák si Apu Kesu, á kinagi na, “Ari ka lábbì makatuttul nikán sù angayák ku kunangane, ngam tumuttul ka galâ noka nikán,” kun na.

<sup>37</sup> Á kinagi ni Eduru kuna, “Apu, anni má, ta aringà mepulù nikaw kunangane? Ta naparánakin, másíski nu metapil yù baggì megapu nikaw,” kun ni Eduru.

<sup>38</sup> Á simibbák si Apu Kesu, á kinagi na, “Naparán ken panò nga metapil megapu nikán? Ngam kuruk galâ yawe nga kagiak ku nikaw. Sangaw nu ari paga nagittarákkò yù manù, namillu ken nga nakkagi ta arám mà ammu,” kun ni Apu Kesu kâ Eduru.

## 14

*Si Apu Kesu yù Mangiyángay nittam kâ Namarò*

<sup>1</sup> Gapu ta kunnian, kinagi ni Apu Kesu paga, “Ari kayu mabbagal ta nonò naw megapu sù kinagi. Ikatalà naw si Namarò, á ikatalà nawà gapay.

<sup>2</sup> Ta aijan yù kitáru nga paggianán na tatolay sù gián ni Ammò ku. Nu ari kuruk yian, arák ku gemma nakuan kagian nikayu. Á ek ku paránan yù paggianán naw.

<sup>3</sup> Á kabalik ku mamarán sangaw sù paggianán naw, manolingà saw ta et takayu apan, tapè ilabbè takayu ta balè, á mepaggián kayu nikán.

<sup>4</sup> Á ammu naw yù angayák ku ánnâ yù dálán nga makáddè tání,” kun ni Apu Kesu.

<sup>5</sup> Á si Tomâ, kinagi na kuna, “Apu, arám mi gemma ammu yù angayám mu. Á kunnasi laguk pakánnámmu mi ta dálán?” kun na.

<sup>6</sup> Á kinagi ni Apu Kesu, “Sikán yù meyárik ta dálán nga mappángè kâ Namarò, ta sikán yù mangipakánnámmu ta kuruk, ánnâ sikán yù manotolay. Awán bulubugá ta makángay kâ Ammò Namarò nu ari nga mangikatalà nikán.

<sup>7</sup> Nu kuruk nga ammu nawà, ammu naw gapay yù Yámà. Á kunangane, ammu nawin yù Yámà ánnâ nasingan nawin,” kun ni Apu Kesu.

<sup>8</sup> Á pakaginná ni Pilippi karannian, kinagi na, “Apu, ipasingam mu nikami yù Yámam, tapè makáppak kami laguk,” kun na.

<sup>9</sup> Á kinagi ni Apu Kesu kuna, “Nabayágà nga nepulupulù nikayu, Pilippi, á arán nawà paga ammu? Yù tolay nga nakasingan nikán, nemámmatán na gapay yù Yámà. Ngattá ta kagiam mu nikán ta ipasingak ku bi nikayu yù Yámà?

<sup>10</sup> Arám mu paga kurugan ta aijanà sù Yámà, á aijan gapay yù Yámà nikán? Á ari nga naggapu ta ure yù ngámin nga ubobugak ku, nu ari galâ naggapu ta ure nayù Yámà. Ta maggián yù Yámà nikán, á aggina yù mangipakuá ta ngámin nga akkuák ku.

<sup>11</sup> Manguruk kayu laguk megapu sù kinagi nikayu nga aijanà sù Yámà ánnâ aijan gapay yù Yámà nikán. Á másíski nu arán naw kurugan yù kinagi nikayu, ngam kurugan naw galâ megapu sù pinagaddátu nga makapállâ nga nasingan naw,” kun ni Apu Kesu.

<sup>12</sup> Á kinagi ni Apu Kesu paga, “Á kukturugán nga kuruk yù kagiak ku nikayu. Yù tolay nga manguruk nikán, akkuán na gapay yù kunnay sù kingnguâ. Á napakáru paga yù makapállâ nga akkuán na ánnè sù kingnguâ, gapu ta manolingâ sù Yámà.

<sup>13</sup> Á maguray lá yù ipakimállâ naw sù Yámà megapu ta panguruk naw nikán, á yáyù akkuák ku tapè meparáyw yù Yámà megapu nikán.

<sup>14</sup> Nu aijan yù ipakimállâ naw megapu sù pangikatalà naw nikán, yáyù akkuák ku,” kun ni Apu Kesu.

*Yù Mangilin nga Ikararuá nga Mepaggián nga Mangabbák sù ira Manguruk*

<sup>15</sup> Á kinagi ni Apu Kesu, “Nu kuruk nga iddukan nawà, á tuppálan naw yù taddák ku nikayu.

<sup>16</sup> Á makimállakà sù Yámà, ta iyawâ na nikayu yù tanakuán nga mangabbák nikayu, nga mepulupulù nikayu ta áddè ta áddè.

<sup>17</sup> Aggina yù Ikararuá ni Namarò, á ipakánnámmu na nikayu yù kuruk nga meyannung kâ Namarò. Á yù ira tatolay nga ari manguruk, arád da málawâ gapu ta arád da ammu ánnna arád da kánnámmuán. Ngam sikayu, ammu naw, ta sigídá mepulupulù nikayu ánnna maggián ta nonò naw.

<sup>18</sup> “Á mássiki nu panawát takayu, arát takayu táttájjián nga kun na ulilá, ta manolingà sangaw nikayu.

<sup>19</sup> Á sangaw nu manganánnuán, arád dangà masingan nayù ira nga ari manguruk. Ngam sikayu nga manguruk, masingan nawà. Á gapu ta sikán yù sigga-inángà nga manotolay, mepattolay kayu gapay nikán ta áddè ta áddè.

<sup>20</sup> Á sangaw nu duttál yù Ikararuá ni Namarò nikayu, yáyù nga pakánnámmuán naw ta aijanà kâ Yámà. Á kánnámmuán naw gapay ta netádday kayu nikán, nga kunnay ta aijanà gapay nga netádday nikayu.

<sup>21</sup> Á yù tolay nga magginná sù bilik ku ánnna tángngagan na yù ipakuâ kuna, aggina yù mangiddù nikán. Á yù tolay nga mangiddù nikán, iddukan nayù Yámà. Á sikán gapay yù mangiddù kuna, á ipakánnámmu kuna yù ngámin nga meyannung nikán,” kun ni Apu Kesu.

<sup>22</sup> Á si Kudas nga tanakuán, nga ari MagIskariote, iniyabbû na laguk kâ Apu Kesu, “Apu, ngattá, ta sikami yù pangipalappátám mu sù nonò mu, ngam ari sù ira ngámin nga tatolay?” kun na.

<sup>23</sup> Á simibbák si Apu Kesu, á kinagi na, “Yù tolay nga mangiddù nikán, tuppálan na yù bilik ku. Á aggina yù iddukan nayù Yámà. Á sikami kâ Yámà yù umay makipaggián kuna.

<sup>24</sup> Ngam yù tolay nga ari mangiddù nikán, arán na tuppálan yù bilik ku. Á yù bilik ku nga ginnán naw, ari nga sikán yù paggapuán na nu ari galâ nga naggapu sù Yámà nga naddok nikán.

<sup>25</sup> “Á kagiak ku nikayu ngámin danniaw ta keggâ paga nikayu.

<sup>26</sup> Ngam doban na sangaw nayù Yámà yù Mangilin nga Ikararuá nga umay nikayu nga pannakabaggi nga mangabbák nikayu. Á aggina yù mangituddu nikayu sù ngámin nga napiá ánnna ipanonò na gapay nikayu yù ngámin nga kinagi nikayu.

<sup>27</sup> “Á gapu ta panawát takayu sangaw, ibattáng ku nikayu yù ággimammà ku nga maggagu sù nonò ku. Á yù ággimammà ku nga iyawâ ku nikayu, awán ta kárik piá na sawe dabbuno. Ari kayu laguk mabburung, ánnna ari kayu maganássing.

<sup>28</sup> Naginná nawin yù kinagi gangù nikayu, nga máñawakin, á manolingà sangaw nikayu. Nu kuruk nga iddukan nawà, magayáyâ kayu laguk, gapu ta umayà sù Yámà, á makáwayyá yù Yámà ánnè nikán.

<sup>29</sup> Á kinagikin yù pánò nikayu lage na kesimmu na, tapè sangaw nu mesimmu ngin, manguruk kayu laguk.

<sup>30</sup> Á aringakin mabbayák nga makiubobuk nikayu, ta umay sangaw yù mammaguray sù ira narák te dabbuno. Awán gemma ta awayyá na nga mammaguray nikán.

<sup>31</sup> Ngam meyanugù yù akkuán na, tapè ipasingak ku ta ngámin nga tolay ta iddukak ku yù Yámà, ánnna tuppálar ku ngámin yù ipakuâ na nikán,” kun ni Apu Kesu nira. Á kabalin na nakkagi karannian, kinagi na nira, “Ará! Gumíkkáng kayu lagük, ta máñaw ittamin,” kun na.

## 15

*Yù Keyarigán ni Apu Kesu yù Nemulá nga Úbas*

<sup>1</sup> Á nagángngariégán si Apu Kesu, á kinagi na sù ira tudduán na, “Sikán yù meyárik sù napiá nga nemulá nga úbas,\* á meyárik yù Yámà ta manaron sù nemulá.

<sup>2</sup> Á tappágan na yù ira pangapangá na nga ari mabbungá, ánnna pakarenuán na yù ira pangapangá na nga mabbungá, tapè mapakáru yù bungá ra.

<sup>3</sup> Á kunnay gapay nikayu, ta napakarenuán kayin megapu sù kuruk nga bilin nga inipakánnámmu nikayu.

<sup>4</sup> Maggián kayu laguk nga mepattatáddyay nikán, á maggiánà gapay nga mepattatáddyay nikayu. Á ta ángngariégán, nu ari maggián yù pangá nayù nemulá sù pun na, ari gemma makapabbungá. Á kunnay gapay nikayu, tanu arán nawà ikatalà nga mangabbák nikayu, arán naw makuá yù napiá nga ipakuâ nikayu.

\* **15:1** Yù ira ginaká ni Israel yù meyárik ta úbas nga inimulá ni Namarò. Innam mu Salmo 80:8-18; Isaya 5:1-2, 7

<sup>5</sup> “Sikán yù kun na pun na úbas nga nemulá, á sikayu yù kun na pangapangá na. Á nu napasigaggà yù ángngikatalà naw nikán, maggiánà nikayu nga mangabbák, á aru yù napiá nga akkuán naw. Ngam nu mesinná kayu nikán, awán bulubugá ta makuá naw nga napiá.

<sup>6</sup> Á yù tolay nga ari maggián nikán, meyárik ta pangá nga natappáng. Á yù ira pangapangá nga natappáng, monnuk ira nga metabbà ta api nga matuggi.

<sup>7</sup> “Ngam sikayu, nu napasigaggà yù ángngikatalà naw nikán ánná nepittà ta nonò naw yù bilik ku, á maguray lâ yù ipakimállà naw kâ Yámà, yáyù mapalurò megapu nikayu.

<sup>8</sup> Á ta kunnian, meparáyw yù Yámà megapu sù aru nga napiá nga akka-akkuán naw, ánná mepasingan ta kuruk nga sikayu yù makituddu nikán.

<sup>9</sup> Iddukat takayu. Á kunnay sù ángngiddù nayù Yámà nikán, kunníu gapay yù ángngiddù ku nikayu. Arán nawà laguk ikalurâ. Maggián kayu galâ nikán, nga mesipà sù ángngiddù ku nikayu.

<sup>10</sup> Nu kurukurugan naw yù itaddák ku nikayu, mesipà kayu sù ángngiddù ku nikayu. Á kunnian gapay nikán, ta kurukurugak ku yù kagian nayù Yámà nikán, ánná mesipakà sù ángngiddù na nikán.

<sup>11</sup> Á kagiak ku danniawe nikayu, tapè mepagayáyâ kayu nikán ánná mepallà yù ággayáyâ naw nga awán kárík piá na.

<sup>12</sup> Á yawe yù itaddák ku nikayu, ta makkaká-iddù kayu ta kunnay sù ángngiddù ku nikayu.

<sup>13</sup> “Nu mabbaluntáriu yù tolay nga mangitapil sù baggi na megapu sù ira kopun na, awán ta nepallà nga ángngiddù ánné sawe.

<sup>14</sup> Á sikayu yù kopuk ku nu tuppálan naw yù itaddák ku nikayu.

<sup>15</sup> Arát takayin laguk ingágán ta aripak ku, gapu ta arán na gemma ammu nayù aripan yù akkuán nayù yápu na. Ingágat takayin ta kopuk ku, gapu ta inipakánnámmu nikayu yù ngámin nga kinagi nayù Yámà nikán.

<sup>16</sup> Á ari sikayu yù nappíli nikán, nu ari galâ ta sikán yù nappíli nikayu. Sinullà takayu tapè umay kayu mamalurò sù aru nga napiá nga ipakuâ nikayu, ánná mannanáyun yù napiá nga akka-akkuán naw. Á yáyù nga maguray lâ yù kiddawan naw sù Yámà ta pannakabaggi, yáyù iyawâ na nikayu.

<sup>17</sup> Á yaw itaddák ku nikayu, ta makkaká-iddù kayu.”

### *Malussaw yù ira ari Manguruk sù ira Manguruk kâ Apu Kesu*

<sup>18</sup> Á kinagi ni Apu Kesu, “Ari kayu mapállà nu malussaw nikayu yù ira tatolay nga ari manguruk nikán, ta ammu naw gemma ta sikán yù kegapuánán nayù kalusso ra nikayu.

<sup>19</sup> Á ta ángngarigán nu naggigittá yù nonò naw ta nonò da, ayatad da kayu nakuan. Ngam ari ngin negittá yù nonò naw ta nonò da, gapu ta piníli takayu ta manguruk nikán, á yáyù nga ikalusso ra kayu.

<sup>20</sup> Manonò naw yù kinagi nikayu, nga ari notun yù aripan ánné sù yápu na. Nu jinigirigâ dangà, nga Yápu naw, jígirigátad da kayu gapay sangaw. Nu sinángngák da yù kinagi nira, tágngngagad da gapay yù kagian naw.

<sup>21</sup> Á ikalusso ra kayu ánná jígirigátad da kayu, gapu ta pangikatalà naw nikán, ta arád da garè ammu yù naddok nikán.

<sup>22</sup> “Á nu aringà nakuan minay saw nga umay mangituddu nira, awán ira nakuan ta liwâ. Ngam minaya gemma nangituddu nira, á ari ira manguruk. Á yáyù nga ari ira makalillì sù ikáru ra nga liwâ.

<sup>23</sup> Á yù tolay nga malussaw nikán, ikalusso na gapay yù Yámà.

<sup>24</sup> Nu arák ku nakuan pinagaddátu ta arubâng da yù makapállà nga arán na makuá na tanakuán nga tolay, awán ira nakuan ta liwâ. Ngam nasingad da yù akka-akkuák ku, á ikalusso ra kami kâ Yámà.

<sup>25</sup> Á nesimmu yaw, tapè mapalurò yù dán nga netúrâ nga ubobuk ni Namarò nga kunniaewe:

‘Ikalusso rangà, nga awán ta gapu na.’<sup>†</sup>

<sup>26</sup> “Á dobak ku sangaw ta umay saw nikayu yù Mangabbák nga maggapu kâ Yámà. Aggina yù Mangilin nga Ikararuá, nga mangipakánnámmu ta ngámin nga kuruk nga meyannung kâ Namarò, á ipakánnámmu na yù meyannung nikán.

<sup>27</sup> Á sikayu gapay yù makkagi ta kuruk nga meyannung nikán, gapu ta sikayu yù mepulupulú nikán áddè ngaw pamegapu na pangituddu,” kun ni Apu Kesu.

**16**

<sup>1</sup> Á kinagi na paga ni Apu Kesu sù ira tudduán na, "Kinagì nikayu ngámin danniaw nga panigirigâ da nikayu nayù ira ari manguruk, tapè arán naw likuránán yù ángngikatalà naw nikán, mássiki nu anni yù mesimmu sangaw nikayu.

<sup>2</sup> Ta yù ira kábulun naw nga Kudio nga manangngal sù tunung, papanáwad da kayu sangaw ta kapilliá ra, á arád da kayu pattallungan. Á nu aijan yù mampatay nikayu, kagian na ta arán na liwâ, nu ari galâ ta passerbi na kâ Namarò.

<sup>3</sup> Á kunnin yù akkuád da nikayu, gapu ta arád da ammu yù Yámà. Á sikán, arád dangà ammu gapay.

<sup>4</sup> Á kagiak ku danniaw nikayu kunangan, tapè sangaw nu duttál yù panigirigâ da nikayu, manonò naw laguk yù kinagi nga meyannung sù akkuád da.

*Yù Tarabáku nayù Mangilin nga Ikararuá*

"Arák ku ngaw kinagi nikayu, gapu ta aijanà paga nikayu.

<sup>5</sup> Ngam móawakin sangaw, á manolingà sù Yámà nga naddok nikán. Á awán nikayu ta mangiyabbú nu sisaw angayák ku.

<sup>6</sup> Ta nakalò yù daddam naw gapu ta kinagì nikayu yù pánò.

<sup>7</sup> Á kuruk yù kagiak ku nikayu, ta mammapiá yù ággíán naw nu panawát takayu. Ta nu arát takayu nakuan panawán, ari nakuan umay yù Ikararuá ni Namarò nga mangabbák nikayu. Ngam nu móawà sangaw nikayu, dobak ku laguk yù Mangilin nga Ikararuá ta umay maggián nga mangabbák nikayu.

<sup>8</sup> "Á tappi nayù Mangilin nga Ikararuá saw nikayu, ipakánnámmu na sù ira tatolay ta dabbuno yù meyannung ta liwâ da. Á ipakánnámmu na yù meyannung sù kuruk nga matunung, ánná yù meyannung ta pangukum ni Namarò sù ira nga ari manguruk.

<sup>9</sup> Á gapu ta pangitduu nayù Ikararuá ta meyannung ta liwâ da, á yáyù nga kánnámmuád da ta yá pakaliwâ da kâ Namarò yù panaki da nikán, ta arád dangà ikatalà.

<sup>10</sup> Á ta meyannung ta katunungán, ipakánnámmu nayù Ikararuá gapay ta sikán yù matunung, gapu ta pinalurò ku ngámin yù inipakuá nayù Yámà nikán, á móawakin nga umay sù Yámà, á arán nawà masingan.

<sup>11</sup> Á ipakánnámmu na gapay yù meyannung ta pangukum ni Namarò sù ira nga ari manguruk nikán, gapu ta dán nga naparán yù ángngukum ni Namarò kâ Satanás, nga mammaguray sù ira nga ari manguruk nikán ta dabbuno.

<sup>12</sup> "Á aijan paga aru nga arák ku makagi, gapu ta arán naw paga kánnámmuán.

<sup>13</sup> Ngam sangaw nu umay saw yù Ikararuá ni Namarò, ituddu na nikayu yù ngámin nga kuruk. Á ari yù ure na lápay yù paggapuán nayù ipakánnámmu na, ta ipakánnámmu na lâ yù kuruk nga maginná na kâ Namarò. Á ipalappâ na gapay nikayu yù duttál noka.

<sup>14</sup> Á aggina yù mangiparáyaw nikán, gapu ta ipakánnámmu na nikayu yù kuruk nga maggapu nikán.

<sup>15</sup> Ta kukuá ngámin yù kukuá nayù Yámà. Á yáyù nga kinagì nikayu ta ipakánnámmu na nikayu yù kuruk nga maggapu nikán," kun ni Apu Kesu.

*Yù ira Maraddam nga Mabbáli ta Magayáyâ Sangaw*

<sup>16</sup> Á kinagi ni Apu Kesu nira, "Sangaw, á arán nawà masingan. Á ari mabayák, á masingan nawà má," kun na.

<sup>17</sup> Á nakkaká-ubobuk yù ira káruán nga tudduán na, á kinagi ra, "Anni yawe nga kagian na nittam, nga arát tam sangaw masingan, á ari mabayák, á masingat tam má? Á yù kinagi na paga, nga 'Manolingà sù Yámà'?

<sup>18</sup> Anni panò yù kebalinán nayù kinagi na nittam, nga 'sangaw' ánná 'ari mabayák'? Arát tam kánnámmuán yù kagian na," kud da.

<sup>19</sup> Á ammu ni Apu Kesu yù ikáyâ da nga iyabbú nakuan kuna, á yáyù nga kinagi na nira, "Yawe panò yù ikáyâ naw nga iyabbú nikán, nu anni yù kebalinán nayù kinagi gangù, nga 'Sangaw, á arán nawà masingan, á ari mabayák, á masingat nawà má sangaw'?

<sup>20</sup> Kukurugán nga kuruk yù kagiak ku nikayu. Sangaw nu arán nawà masingan, makkulukulé kayu, ta nerallà yù daddam naw. Ngam yù ira nga ari manguruk nikán, magayáyâ ira. Á mepallà yù daddam naw. Ngam mapatalián yù daddam naw ta pagayáyâ naw, sangaw nu masingan nawà má.

<sup>21</sup> Á yá keyarigán naw yù babay nga maganâ, nga mabagal sù jígâ na ta paganâ na. Ngam ta pallawán nayù abbing, arán nen manonò yù jígâ na gapu ta ayâ na sù anâ na.

<sup>22</sup> Á kunnay gapay nikayu, ta nakalò yù daddam naw sangaw. Ngam masingat takayu má sangaw, á mepallà yù pagayáyâ naw, á awán ta makári ta pagayáyâ naw.

<sup>23</sup> Á sangaw nu duttál yù ággaw nga pakkakásingat tam má, aringin sikán yù pakkid-dawán naw, nu ari galá yù Yámà. Á kukurugán nga kuruk yù kagiak ku nikayu, makkiddaw kayu ta pannakabaggí, á maguray lâ yù kiddawan naw sù Yámà, yáyù iyawâ na nikayu megapu sù pangikatalà naw nikán.

<sup>24</sup> Á ta áddè kunangan, ari kayu paga minay nga pannakabaggí nga makkiddaw sù Yámà. Makkiddaw kayu laguk megapu sù pangikatalà naw nikán, tapè málawâ naw, ánnna mepallà yù pagayáyâ naw,” kun ni Apu Kesu.

### *Yù Pangappù ni Apu Kesu kâ Satanas*

<sup>25</sup> Á kinagi ni Apu Kesu paga nira, “Pangituddù nikayu, yá ángngituddù nikayu yù pagángngarigán. Ngam sangaw arák ku iyángngarigán yù kagiak ku, ngam ibukalák ku nikayu nga daretiu yù meyannung sù Yámà.

<sup>26</sup> Á dattál nayù ággaw, ari ngín sikán yù makimállà sù Yámà megapu nikayu, nu ari galâ sikayu nga pannakabaggí yù makkiddaw sù Yámà.

<sup>27</sup> Ta ayatan na kayu lággapay nayù Yámà, gapu ta ayatan nawà ánnna kurugan naw ta sikán yù naggapu kuna.

<sup>28</sup> Á si Namarò nga Yámà yù naggapuák ku, á minayà sawe dabbuno. Á mánawakin sangaw ta dabbuno nga manoli sù Yámà.”

<sup>29</sup> Á pakaginná ra sù kinagi ni Apu Kesu, nga umayin sù Yámà na, kinagi nayù ira tudduán na, “Á kánnámuám mi ngín yù kagiam mu, ta malitáwin, gapu ta arám min iniyángngarigán.

<sup>30</sup> Á ammu mi ngín ta sikaw yù makánnámu ta ngámin. Á mássiki nu awán ta mangiyabbû nikaw, ammum yù ajian ta nonò mi. Á yáyù nga manguruk kami ngín ta sikaw yù naggapu kâ Namarò,” kud da kuna.

<sup>31</sup> Á simibbák si Apu Kesu, á kinagi na nira, “Kuruk panò nga manguruk kayin?

<sup>32</sup> Duttál sangaw yù oras, á makkkáttuay kayu nga mallalabbè ta bale naw, á sikán lâ mabattáng. Ngam aringá maguroray, ta ajian lâ nikán yù Yámà.

<sup>33</sup> Á kinagi yaw nikayu, tapè magimammà yù nonò naw megapu sù ketádde naw nikán. Ta keggâ naw ta dabbuno, marigirigâ kayu. Pataggatan naw lâ yù nonò naw, ta ippù kin si Satanas, nga pakiyápuán nayù ira nga ari manguruk nikán.”

## 17

### *Yù Pakimállà ni Apu Kesu megapu sù ira nga Manguruk kuna*

<sup>1</sup> Á ta kabalin ni Apu Kesu nagubobuk karannian, nattánguk ta lángì, á nakimállà kâ Namarò, á kinagi na, “Ammò, jmittálín yù ággò. Iparáyom laguk yù Anâ mu, tapè iparáyó taka gapay.

<sup>2</sup> Ta iniyawâ mu nikán yù pakáwayyâ sù tolay, tapè iyawâ ku sù ira ngámin nga tatolè yù áttole ra nga awán ta áddè na.

<sup>3</sup> Á yawe yù áttole ra nga awán ta áddè na, ta pakánnámuád da ta kuruk nga sikaw si Namarò nga tátídday, ánnna sikán yù MakKiristu, nga jinok mu ta dabbuno.

<sup>4</sup> Á meparáyaw ka sawe dabbuno megapu nikán, ta sinuppál kin ngámin yù inipakuám nikán.

<sup>5</sup> Ammò, ipotum mà bì laguk ta arubáng mu, tapè metoli nikán yù dalingárang nayù keparáyò, nga aijan ngaw nikán sù keggâ paga nikaw lage na kaparò na dabbuno.

<sup>6</sup> “Sikaw yù inipakánnámmu sù ira tatolay ta dabbuno nga iniyawâ mu nikán. Tatolem ira gemma, á iniyawâ mu ira nikán, á kinuruk da yù bilim mu.

<sup>7</sup> Á nánnámuád da ta sikaw yù paggapuán nayù ngámin nga kingnguâ.

<sup>8</sup> Ta inituddù nira yù ngámin nga bilim mu nikán, á kinuruk da. Á ammu ra ta kuruk nga sikaw yù naggapuák ku ánnna sikaw yù naddok nikán.

<sup>9</sup> Á Ammò ku, aggira yù ipakimállà ku. Arák ku ipakimállà yù ira ngámin ta dabbuno, nu ari galá yù ira nga iniyawâ mu nga mangikatalà nikán, ta tatolem ira gemma.

<sup>10</sup> Ngámin yù ira tatolè, tatolem ira gemma, ánnna ngámin nga kukuám, kukuâ ira gapay. Á meparáyawà megapu nira.

<sup>11</sup> Á mánawâ sangaw ta dabbuno, nga umay nikaw. Ngam mabattáng paga ta dabbuno yù ira tatolay nga iniyawâ mu nikán, gapu ta lubbekakin nikaw. Ammò nga Mangilin, ásigurám mu yù ira tatolè nga iniyawâ mu nikán, megapu sù pakáwayyám ta ngámin, tapè maggigittá yù nonò da nga kunnay ta nonò ta.

<sup>12</sup> Á ta keggâ paga nira, sikán yù pannakabaggim nga manaron nira. Inásigurák ku yù ira ngámin nga iniyawâ mu nikán, tapè awán ta magawáwán nira, ngam yù táddy lâ, tapè mattuppál yù dán nga netúrá nga bilim mu.

13 “Á lubbekakin nikaw, Ammò. Ngam kagiak ku yawe ta keggâ paga nira, tapè maginnára ánná mesipà ira sù pagayáyâ ku.

14 Inikatalà ku nira yù bilim mu, á manguruk iren. Á yáyù nga aggira yù ikalusso nayù ira nga ari manguruk, gapu ta kunnay nikán, ari ira mepulù sù ira nga ari manguruk.

15 “Á yawe lá ipakimállà ku nikaw, ta arám mu ira ipánaw ta dabbuno, ngam taronám mu ira, tapè arán na ira melogò ni Satanas.

16 Ta aggira yù kunnay nikán nga ari gemma mepulù sù ira nga ari manguruk, ta ari negittá yù nonò da.

17 Pakarenuám mu laguk yù nonò da megapu sù bilim mu, tapè mabbáli ira ta tatolem nga mangilin. Ta kuruk gemma yù bilim mu.

18 Á kunnay ta paddok mu nikán ta umay sù ira tatolay ta dabbuno, dobak ku ira ta umay ira ta ngámin nga lugár, tapè ipakánnámuu ra yù bilim mu sù ira nga ari paga nakaginná.

19 Á gapu ta ángngiddù ku níra, itulù ku yù baggi nikaw, nga metapil megapu nira, tapè mabbáli ira ta tatolem megapu sù bilim mu,” kun ni Apu Kesu sù Yáma na.

20 “Á ari lá yawe ira yù ipakimállà ku, Ammò, nu ari gapay yù ira ngámin nga manguruk nikán noka megapu sù pangituddu ra.

21 Á yá ipakimállà ku, Ammò, ta naggigittá ngámin yù nonò da, nga kunnay nitta nga naggigittá yù nonò ta, tapè mesipà ira nitta. Á yáyù ipakimállà ku, tapè kurugan nayù ira tatolay ta dabbuno ta sikaw yù naddok nikán.

22 Á iniparayò ira gapay nga kunnay sù pangiparáyom nikán, tapè mepaggittá yù nonò da nga kunnay ta naggittá nga nonò ta.

23 Á ajjanà níra, nga kunnay ta ajjan ka nikán, tapè kuruk nga napiá yù áttatádde na nonò da. Á ta kunnian, kánnámuuán nayù ira nga ari manguruk ta sikaw yù naddok nikán, ánná ammu ra ta iddukam mu yù ira nga mangikatalà nikán ta kunnay ta ángngiddù mu nikán,” kun na.

24 “Ammò, iniyawâ mu nikán ta tatolè yù ira nga manguruk nikán. Á ikáyâ ku ta mesipà ira gapay noka nikán ta paggianák ku ta lángi, tapè masingad da yù keparayò ánná yù dalingárang ku nga iniyawâ mu nikán sù arán na paga kaparò na dabbuno megapu sù ángngiddù mu nikán.

25 Ammò, napiá yù nonò mu nga awán kárik piá na. Á yù ira tatolay nga ari manguruk, arád da ka ammu. Ngam sikán, ammu taka. Á yù ira tatolè nga iniyawâ mu nikán, ammu ra ta sikaw yù naddok nikán.

26 Á sikaw yù inipakánnámuu níra, á aringà mattukkâ nga mangipakánnámuu nikaw, tapè maggiáná níra ánná makkaká-iddù ira. Á kunnay sù ángngiddù mu nikán, kunnian gapay yù ángngiddù da sù ira kábulud da.”

## 18

*Yù Paggápù da kâ Apu Kesu*

*Mattiu 26:47-56; Markus 14:43-50; Lukas 22:47-53*

1 Á kabalin ni Apu Kesu nakimállà sù Yáma na, nánaw di Apu Kesu ánná yù ira tudduán na ta Jerusalem. Á minay ira sù kamulán ta dammáng na danum na Kidron.

2 Á si Kudas, nga nabbalin ta mappágapù kâ Apu Kesu, ammu na gapay yawe lugár nga angayád da, ta yáyù ággangayád da kári Apu Kesu.

3 Á inipulù ni Kudas yù ira tangapangan nga suddálu ánná yù ira magguárdia nga jinok nayù ira kátannangán nga pári ánná yù ira Parisio. Á minay ira nga konsu ármas ánná tulu sù giád di Apu Kesu.

4 Á pakáranni nayù ira nagármas sù giád di Apu Kesu ta kamulán, á mássiki nu ammu ni Apu Kesu yù mesímuu kuna sangaw, en na ira jinápu. “Asinni aleran naw?” kun na níra.

5 Á simibbák ira, á kinagi ra, “Si Kesu nga taga Nasaret,” kud da. “Sikán yaw,” kun ni Apu Kesu níra. Á ajjan nga nepulù níra si Kudas, nga mangituddu kâ Apu Kesu níra.

6 Á pakkagi ni Apu Kesu níra, “Sikán yaw,” á nassanuk ira, á natombá ira.

7 Á pidduá ni Apu Kesu nangiyabbú níra, á kinagi na, “Asinni aleran naw?” kun na. “Si Kesu nga taga Nasaret,” kud da má.

8 Simibbák si Apu Kesu, á kinagi na, “Sikán, kuk ku pá gangù. Á nu sikán lá aleran naw, paguráyán naw yawe ira kábuluk ku, tapè mánaw ira,” kun na.

9 Yáyù kinagi na tapè mapalurò yù ngaw kinagi na sù Yáma na, nga kun na, “Yù ira tatolay nga iniyawâ mu nikán, awánà bulubugá ta máwáwan níra.”

<sup>10</sup> Á aijan kâ Simon Eduru yù badáng na nga konsu alák. Á inásù na, á kittak na yù talingá nayù aripan nayù kotunán na pári, á nalasápán yù jiwanán nga talingá na. Á si Malkus yù ngágán nayù aripan.

<sup>11</sup> Á kinagi na laguk ni Apu Kesu kâ Eduru, “Iyalák mu yù badáng mu. Kagiam mu panò ta arák ku meyangngà yù jígâ ku nga sinullà nayù Yámà nikán?” kun na.

*Iyarubáng da si Apu Kesu kâ Annas*

<sup>12</sup> Á yù ira suddálú áんな yù kapatás da, áんな yù ira magguárdiá, ginápù da laguk si Apu Kesu, á bináluk da.

<sup>13</sup> Á napolu iniyángé ra kâ Annas, nga katugángán ni Kayapas nga kotunán na pári tán nga dagun.

<sup>14</sup> Si Kayapas yù nanabarang sù ira Kudio ta más napiá nu metapil yù táddy nga tolay megapu sù ira ngámin nga tatolay.\*

*Yù Panájji ni Eduru kâ Apu Kesu*

*Mattiu 26:69-70; Markus 14:66-68; Lukas 22:55-57*

<sup>15</sup> Á paggápù da kâ Apu Kesu, aijan yù ira duá nga sinudduán ni Apu Kesu, di Simon Eduru áんな yù táddy paga nga simiúttul nira ta pangituluk da kuna sù kotunán na pári. Á yù kabbulun ni Eduru, ammu na yù kotunán na pári, á yáyù nga nepulù kâ Apu Kesu nga simillung sù nálitukán nga námmuák na bale na pári.

<sup>16</sup> Ngam naggián lâ si Eduru ta puertá nayù alitù. Á minay laguk yù kabbulun na nga nakkagi sù babay nga manaron ta puertá, ta patallungan na gapay si Eduru ta námmuák nayù balay.

<sup>17</sup> Tallung ni Eduru, iniyabbû nayù babay kuna, “Ari gapay sikaw yù táddy nga makituddu sù tolay nga ginápù da?” kun na. “Ari sikán,” kun ni Eduru.

<sup>18</sup> Á gapu ta malummin yù gabi, nappagaddul yù ira aripan áんな yù ira magguárdiá ta bága, á nanáddak ira nga naggirínu. Á nepaggirínu gapay si Eduru nira.

*Yù Pamestigá nayù Kotunán na Pári kâ Apu Kesu*

*Mattiu 26:59-66; Markus 14:55-64; Lukas 22:66-71*

<sup>19</sup> Á paggirínu ni Eduru ta námmuák, aijan ta balay yù kotunán na pári, á binestigá na si Apu Kesu ta meyannung sù ira sinudduán na áんな yù meyannung sù ituddu na.

<sup>20</sup> Á simibbák si Apu Kesu, á kinagi na kuna, “Sinudduák ku yù ira tatolay ta arubáng na tangapáddabbunán, sù ira kapilliá ra áんな sù mangilin nga kapilliá, nga paggagammungán na ngámin na Kudio, á awán bulubugá ta inilímak ku.

<sup>21</sup> Ngattá, ta sikán yù pangiyabbutám mu? Iyabbû mu lâ sù ira tatolay nga nakaginná sù inituddù, ta ammu ra gemma yù kinagi nira,” kun na.

<sup>22</sup> Pakkagi na karannian, á lippák nayù táddy nga magguárdiá si Apu Kesu. Á kinagi nayù magguárdiá kuna, “Ngattá, ta kunnian ákkitabbák mu sù kotunán na pári?” kun na.

<sup>23</sup> Á simibbák si Apu Kesu sù magguárdiá, á kinagi na, “Nu nakaliwaták ku nakuan yù ákkitabbák ku kuna, kagiam mu yù liwâ ku. Ngam nu kuruk yù kinagi, ngattá, ta lippák mà?” kun na.

<sup>24</sup> Á yáyù nga nipabáluk ni Annas si Apu Kesu, á inipeyángé na laguk kâ Kayapas, nga kamotungán na pári.

*Yù Pillu nga Panájji ni Eduru kâ Apu Kesu*

*Mattiu 26:71-75; Markus 14:69-72; Lukas 22:58-62*

<sup>25</sup> Á nepattáddak lâ paga si Simon Eduru nga mepaggirínu nira. Á kinagi ra kuna, “Ari sikaw gapay yù táddy nga tudduán na?” kud da. “Ari sikán,” kun ni Eduru.

<sup>26</sup> Á aijan yù táddy nga aripan nayù pári, nga kanakanáyun nayù tolay nga kittak ni Eduru, á iniyabbû na kâ Eduru, “Ari sikaw yù nasingak ku gangù nga kabbulun na túrin ta kamulán?” kun na.

<sup>27</sup> Á nilímak na má ni Eduru. “Ari,” kun na. Á dagarágâ nagittákkò yù manù.

*Yù Pamestigá ni Gubinador Pilatto kâ Apu Kesu*

*Mattiu 27:1-2, 11-14; Markus 15:1-5; Lukas 23:1-5*

<sup>28</sup> Á ta alippánnawák, lage na lussáng yù bilák, inipáno ra si Apu Kesu ta palásiu ni Kayapas, á ed da iniyágay sù palásiu nayù gubinador nga taga Roma. Ngam yù ira Kudio nga nangiyángay kuna, ari ira simillung sù palásiu, ta nu tallung ira nakuan sù bale na ari Kudio, á ari ira meyanugú nga kumán sù Piestá na panaddamád da ta pattalebák nayù daroban ni Namarò, gapu ta mebiláng ira ta marapingán.

<sup>29</sup> Á yáyù nga nallawán si Gubinador Pilatto nira, á iniyabbû na sù ira Kudio, “Anni ipangikeká naw sawe tolay?” kun na.

<sup>30</sup> Á simibbák ira, á kinagi ra kuna, “Nu awán ta liwâ na, arám mi nakuan ikeká nikaw,” kud da.

<sup>31</sup> Á kinagi ni Gubinador Pilatto nira, “Apan naw laguk, ta sikayu mabbestigá kuna ta meyannung sù tunung na Kudio,” kun na. Á kinagi nayù ira Kudio kuna, “Awán ta awayyá mi nga mamagikáru kuna ta patay, ta sikayu lâ nga taga Roma yù makáwayyá nga mamagikáru ta tolay ta pate na ta kurù,” kud da.

<sup>32</sup> Á nesimmu yaw, tapè mattuppál yù kinagi ni Apu Kesu nga meyannung sù ámmapáte ra kuna.

<sup>33</sup> Á simillung si Pilatto laguk sù palásiu na, á inipágál na si Apu Kesu, á iniyabbû na kuna, “Sikaw panò yù patul nayù ira Kudio?” kun na.

<sup>34</sup> Á simibbák si Apu Kesu, á kinagi na, “Asinni nakaginnám mu? Naggapu panò ta nonò mu, onu eggá panò yù nakkagi nikaw?” kun na.

<sup>35</sup> Á simibbák si Pilatto, á kinagi na, “Kudiongà panò? Yù ira ikáttolem nga Kudio ánná yù ira kátannangán nga pári yù mangikeká nikaw. Anni panò kingnguám nga ipangikeká ra nikaw?” kun na.

<sup>36</sup> Simibbák si Apu Kesu, á kinagi na, “Tanakuán yù pammagurayák ku, nga ari saw dabbuno. Nu saw dabbuno nakuan yù pammagurayák ku, makigerrá nakuan yù ira tatolè, tapè arád dangà magápù nayù ira Kudio. Ngam ari saw dabbuno yù pammagurayák ku,” kun na.

<sup>37</sup> Á kinagi ni Pilatto kuna, “Á kuruk nga patul ka lagugam?” kun na. Á simibbák si Apu Kesu, á kinagi na, “Sikaw yù nakkagi ta patulà. Á yawe inikeyanâ ku ta dabbuno, tapè ituddù yù meyannung sù kuruk. Á yù ira tatolay nga makánnámu sù kuruk, magginná ira sù kagiak ku,” kun na.

<sup>38</sup> Á kinagi ni Pilatto kuna, “Anni panò yù kuruk?” kun na.

Kabalin na nagubobuk karanniaw, minay si Pilatto sù gián nayù ira Kudio ta lawán, á kinagi na nira, “Awán bulubugá ta ammù nga liwâ na,” kun na.

<sup>39</sup> “Ngam ajjan yù kustombare naw nga palubbángak ku yù táddy ngá nebáluk megapu sù piestá na panaddamán naw ta pattalebák nayù daroban. Gustu naw ta palubbángak ku yawe Patul na Kudio?” kun ni Pilatto nira.

<sup>40</sup> Ngam nagagga-aggay ira, á kinagi ra, “Ari yawe tolay, ngam si Barabas yù palubbángam mu,” kud da. Á tulisán si Barabas.

## 19

*Karagatán ni Pilatto nga Mamalubbáng kâ Apu Kesu*

*Mattiu 27:15-31; Markus 15:6-20; Lukas 23:13-25*

<sup>1</sup> Á gapu ta piníli nayù ira Kudio si Barabas ta mapalubbáng, yáyù inipapaligà na laguk ni Gubinador Pilatto si Apu Kesu.

<sup>2</sup> Á yù ira suddálu, nilubik da yù sî nga pidde ra ta kun na kuroná, nga pine ra sù ulu na. Á binarawasiád da ta ujjojin nga kun na barawási na patul.

<sup>3</sup> Á Jimikkì ira kuna, á inuyoyungád da. Kinagi ra kuna, “Maráyaw ka, sikaw nga patul na Kudio!” kud da. Á lippilippák da.

<sup>4</sup> Á minay laguk si Pilatto ta lawán sù ira Kudio, ta en na má kinagi nira, “Iyarubáng ku nikayu, tapè kánñámuún naw ta awán ta ammù nga liwâ na,” kun na.

<sup>5</sup> Á yáyù nga nallawán si Apu Kesu nga neyarubáng nira, nga nakuronán paga ta sî ánná nabbarawási ta ujjojin nga kun na patul. Á kinagi ni Pilatto nira, “Ye! Innan nawé yawe tolay!” kun na.

<sup>6</sup> Á yù ira kátannangán nga pári na Kudio ánná yù ira magguárdia sù mangilin nga kapilliá, pakasingad da kâ Apu Kesu, nga napaligà ánná nakuronán ta sî, nagagga-aggay ira, á kinagi ra, “Papatáyam mu! Ipepátâ mu ta kurù!” kud da. Á kinagi ni Pilatto nira, “Apan naw laguk, ta sikayu lággapay mangipátâ kuna, ta awán ta ammù nga liwâ na,” kun na.

<sup>7</sup> Á simibbák yù ira Kudio, á kinagi ra kâ Pilatto, “Ajjan yù tunung na Kudio nga makkagi ta mepángngà nu mapagikáru ta patay yawe tolay, gapu ta pabbalinan na ta dios yù baggi na, ta kinagi na ta aggina yù Anâ ni Namarò,” kud da.

<sup>8</sup> Pakaginná ni Pilatto sù kinagi ra nga meyannung kâ Apu Kesu, nga aggina yù Anâ ni Namarò, nakalò yù assing ni Pilatto.

9 Á simillung sù palásiu na, á iniyabbú na kâ Apu Kesu, "Naggapuám mu?" kun na. Ngam arán na bulubugá ni Apu Kesu sinabbák.

10 Á kinagi ni Pilatto kuna, "Ngattá, ta arám mà tabbagan?" kun na. "Arám mu panò ammu ta eggá yù pakáwayyâ nga mammalubbáng nikaw? Á eggá gapay yù pakáwayyâ nga mangipepátâ nikaw ta kurù," kun ni Pilatto.

11 Á simibbák si Apu Kesu, á kinagi na kuna, "Awán nakuan ta pakáwayyám nikán nu arán na iniyawâ ni Namarò nikaw. Á yáyù nga narámmà yù liwâ nayù mangikeká nikán ta arubáng mu ánnè sù liwâ mu," kun ni Apu Kesu.

12 Pakaginná ni Pilatto sù kinagi ni Apu Kesu, á nappanà yù pakkaragâ na nga mammalubbáng kuna. Ngam yù ira Kudio, pine ra má nagagga-aggay, á kinagi ra, "Nu palubbángam mu yawe tolay, arán na ka kopun ni Patul Sisar.\* Ta kinagi nayù tolay ta aggina yu patul, á yáyù nga kontarán na si Patul Sisar nga patul tam," kud da.

13 Pakaginná ni Pilatto karannian, pinalawán na má si Apu Kesu. Á minay si Pilatto nag-itubang sù ággitubangán na kues. Naratagán ta batu nga nalínis yù gián nayù ággitubangán na, nga Gabbata yù ngágán na ta ággubobuk nga Kebru.

14 Á pagitubang ni Pilatto nga mamestigá kâ Apu Kesu, mággè tangngá na ággawin, nga ággaw nayù papparán nayù ira Kudio ta piestá ra. Á kinagi ni Pilatto nira, "Innan nawé yawe patul naw!" kun na.

15 Á nagagga-aggay yù ira Kudio, á kinagi ra, "Ipepánom! Ipapátem! Ipepátâ mu ta kurù!" kud da. Á kinagi ni Pilatto nira, "Yawe yù patul naw! Ngattá, ta ipepátâ ku nakuan ta kurù yù patul naw?" kun na. Á simibbák yù ira kotunán nga pári, á kinagi ra, "Awán ta patul mi nu ari lâ si Patul Sisar túrin ta Roma!" kud da.

16 Á yáyù nga iniyawâ na laguk ni Pilatto nira, ta ipepátâ da ta kurù.

*Yù Pangipátâ da kâ Apu Kesu ta Kurù*

*Mattiū 27:32-44; Markus 15:21-32; Lukas 23:26-43*

17 Á yáyù nga inâ nayù ira suddálú si Apu Kesu, á inipakáttu ra kuna yù kurù nga pangipátakád da sangaw kuna. Á iniyángé ra ta puddul nga mangngágan ta Golgota sù ággubobuk nga Kebru, á yù kebalinán na yù Gián na Balakábâ.

18 Á pakáddé da ta gián na Golgota, inipátâ nayù ira suddálú si Apu Kesu ta kurù. Á inipátâ da gapay yù duá nga tolay ta kurù, nga pinatáddak da. Á pine ra si Apu Kesu ta tangngá ra.

19 Á inipetúrâ ni Pilatto yù panákkilálán nga pine ra ta utun na kurù, nga kunniaw yù kinagi na, "Yawe si Kesu nga taga Nasaret, yù Patul na Kudio," kun nayù inipetúrâ na.

20 Yáyù inipetúrâ na ta tallu nga makkakerumá nga ággubobuk, yù ággubobuk na Kudio, ánnâ yù Latin nga ággubobuk na taga Roma, ánnâ yù ággubobuk na Gareko gapay. Á aru yù ira Kudio nga nabibibbik sù netúrâ, ta aranni ta ilí yù nangipátakád da kuna.

21 Á yù ira kátannangán nga pári na Kudio, kinagi ra kâ Pilatto, "Arám mu nakuan itúrâ, 'Yù Patul na Kudio.' Kunniawe lâ nakuan itúrâ mu, 'Yawe tolay, kinagi na ta aggina yù Patul na Kudio,'" kud da.

22 Á simibbák si Pilatto, á kinagi na nira, "Yù initúrâ ku, netúrákin. Aringin mapatalián," kun na.

23 Á kabaliid da nangipátâ nayù ira suddálú kâ Apu Kesu, inâ da yù gagámì na ta baggi na, á pinakkáppâ da sù pabballe ra. Ngam yù apaddu nga barawási na, arád da pinakkáppâ, ta inabal nga ari naragé.

24 Á yáyù nga nakkaká-ubobuk ira, á kinagi ra, "Arát tam pisilan yawe, ngam mabbib-innúnú ittam bì, tapé ammu tam yù makálâ kuna," kud da. Yáyù nesimmu tapé mapatuppál yù dán na netúrâ sù libru nga ubobuk ni Namarò, nga kunniaw:

"Nabbaballáyád da yù gagámì ku, á nabbibinnunutád da yù barawásì."†

Á yáyù kingnguá nayù ira suddálú.

25 Á ajian tán di yená ni Apu Kesu nga nanáddak ta aranni ta kurù, aggira ánnâ yù wagi na yená ni Apu Kesu nga babay, á si Maria nga atáwa ni Kalopas, ánnâ si Maria Maddala.

26 Á pakasingan ni Apu Kesu kári innò na ánnâ yù sinudduán na nga iddukan na, kinagi ni Apu Kesu sù innò na, "Innò, anâ mu yù tolay nga kataging mu," kun na.

27 Á kinagi na laguk sù sinudduán na, "Yená min yane," kun na. Á yáyù nga inâ na yù yená ni Apu Kesu ta makipaggián kuna ta bale na tán nga ággaw.

\* 19:12 Si Patul Sisar yù kotunán nga mammaguray ta Roma. Á aru yù purubinsia sù pammagurayán na. Á sinullà na si Gubinador Pilatto ta mammaguray ta purubinsia na Judiya. † 19:24 Salmo 22:18

*Yù Pate ni Apu Kesu**Mattiu 27:45-56; Markus 15:33-41; Lukas 23:44-49*

<sup>28</sup> Á ta kabalín na yaw, ammu ni Apu Kesu ta nabalinin ngámin. Á kinagi na laguk, "Makenumà," kun na. Yáyù kinagi na tapè mapalurò yù dán nga netúrâ nga ubobuk ni Namarò.

<sup>29</sup> Á ajjan tán yù angáng nga napannu ta binaráyáng, nga náppà nga inuman nayù ira suddálú. Á nisoso ra yù áttabbatabbúrù kuna, á pine ra ta tuppák na káyu. Á inigawâ da ta simùna.

<sup>30</sup> Á pakakákkâ ni Apu Kesu kuna, kinagi na, "Netuppálin ngámin!" kun na. Á nakkum-magin, á nagattâ yù inângâ na.

*Yù Pamíká nayù Suddálú ta Bikà ni Apu Kesu*

<sup>31</sup> Á gapu ta ággo nayù papparâd da ta piestá, minay yù ira Kudio, á kinagi ra kâ Pilatto ta ipakattu na yù tuláng na takki nayù ira nepátâ, tapè mabi ira matay ánná mári ira sù kurù, ta ari mepángngà nu naggián yù pate ra ta kurù ta pappiestá ra, gapu ta mangilin nga ággaw na Sabadu.

<sup>32</sup> Á yáyù nga minay yù ira suddálú, á kittu ra yù tuláng na takki nayù ira duá nga kábulun ni Apu Kesu nga nepátâ.

<sup>33</sup> Ngam pakáddé da kâ Apu Kesu, nasingad da ta natayin, á arád da kittu yù takki na.

<sup>34</sup> Ngam yù táddy ngä suddálú, piníká na yù bikâ ni Apu Kesu, á dagarágâ nallawán yù dágâ ánná danum.

<sup>35</sup> Á yù tolay nga nakasingan sù kesimmu na ngámin karanniaw, aggina yù nangitúrâ sawe, á kuruk ngámin yù inistoriá na, ta ammu na gemma yù nesimmu. Á kuruk ngámin yù kinagi na, tapè manguruk kayu gapay.

<sup>36</sup> Nesimmu danniaw tapè mapalurò yù dán nga netúrâ nga ubobuk ni Namarò nga kunniauw:

"Awán bulubugá ta makattu nga tuláng na."‡

<sup>37</sup> Á ajjan gapay yù netúrâ nga kunniauw:

"Inni-innad da yù piníká ra."§

*Yù Pangitanam da kâ Apu Kesu**Mattiu 27:57-61; Markus 15:42-47; Lukas 23:50-56*

<sup>38</sup> Á ajjan yù táddy ngä makituddu kâ Apu Kesu, si Kusè nga taga Arimatia. Ngam inilímak ni Kusè yù ángnguruk na gapu ta assing na sù ira karakalán na Kudio. Á pakarámak ni Kusè ta natayin si Apu Kesu, minay kâ Pilatto, ta en na kiddawan yù baggi ni Apu Kesu, tapè itanam na. Á inanugù ni Pilatto, á en na inâ yù baggi ni Apu Kesu, nga inipáno na.

<sup>39</sup> Á nepulù kâ Kusè si Nikudem. Si Nikudem yù nallammang ngaw sù ánge na kâ Apu Kesu ta gabi. Á inipulù na yù bábbanguk nga mirrá ánná álo nga nekiruk, nga límápu lu nga kílo yù kárammâ na.

<sup>40</sup> Á pangâ da sù baggi ni Apu Kesu, pinatáputâd da ta puraw nga sinnun nga napayyán sù bábbanguk ta kun na kustombare na Kudio.

<sup>41</sup> Á ajjan tán yù kamulán nga aranni sù nangipátakâd da kâ Apu Kesu. Egga sù kamulán yù kuebâ nga kapákkokkok lâ paga nga pangitanamâd da nakuan, ngam awán paga bulubugá ta netanam tán.

<sup>42</sup> Á gapu ta maddaggúnin yù nanginá nga ággaw na Sabadu, nga ággibannák na Kudio, ánná aranni yù kuebâ sù nangipátakâd da ta kurù, á yáyù nga inikurák da nga initanam tán yù baggi ni Apu Kesu.

**20***Matolay si Apu Kesu!**Mattiu 28:1-8; Markus 16:1-8; Lukas 24:1-12*

<sup>1</sup> Pappásá na ággibannák da, á ta alippánnawák na Liggu, minay di Maria Maddala sù tanam ni Apu Kesu. Labbè da ta kuebâ, nasingad da ta náringin yù dakal nga batu nga iniserrá ra ta puertá na kuebâ nga nangitanamâd da kuna.

<sup>2</sup> Á nakkarerá si Maria nga minay kári Simon Eduru ánná yù táddy ngä sinudduán ni Apu Kesu nga iddukan na. Á kinagi ni Maria nira, "Iniriád da si Apu sù tanam, á arám mi ammu yù nangikuâd da kuna," kun na.

<sup>3</sup> Á pakaginná ra sù kinagi ri Maria, dagarágâ nga minay di Eduru ánná yù táddy ngä sinudduán ni Apu Kesu nga iddukan na, nga nappángè sù tanam.

‡ 19:36 Salmo 34:20    § 19:37 Sakariâ 12:10

<sup>4</sup> Nakkarerá ira, á napolu nga nakáddè sù kuebá yù táddy, nga kabbulun ni Eduru.

<sup>5</sup> Á nakkummak, á nilákkawán na yù unak na tanam. Á nasingan na ta awánin si Apu Kesu. Nasingan na lâ yù sinnun nga neputápù nga kimibbà, ta awánin ta mayán na. Ngam ari simillung.

<sup>6</sup> Á pakáddè na gapay ni Simon Eduru ta puertá na kuebá, dagarágâ nga inoluán na yù kabbulun na nga simillung sù unak na tanam, á nasingan na gapay yù sinnun nga nabattáng,

<sup>7</sup> ánná yù gámì nga inibubbud da ngaw ta mammang na, nga náringin nga nakappil ánná nesinná ta baddì sù kárúán na sinnun.

<sup>8</sup> Á yù táddy nga sinudduán ni Apu Kesu nga napolu sù tanam na, simillung gapay ta en na iningan. Pakasingan na ta awánin, nangurugin ta naginnanolayin.

<sup>9</sup> Ta mássiki nu nepalappâ sù dán nga netúrâ nga ubobuk ni Namarò yù meyannung sù máwák ni Apu Kesu nga matay ánná maginnanolay, arád da paga nánnámmuán yù dán nga netúrâ.

<sup>10</sup> Á pakasingad da ta awán ta baggi ni Apu Kesu tán, nánaw ira laguk nga limibbè ta bale ra.

*Yù Pappasining ni Apu Kesu kâ Maria Maddala*

*Mattiū 28:9-10; Markus 16:9-11*

<sup>11</sup> Ngam si Maria Maddala, naggián lâ nga nakkulè ta lawán na tanam. Pakkulè na, nakkummak nga iningan na yù unak na kuebá.

<sup>12</sup> Á pallácko na ta unak, nasingan na yù duá nga daroban ni Namarò nga nabbarawási ta puraw, nga nagitubang sù naggianán na gangú na baggi ni Apu Kesu. Naggián yù táddy ngá daroban sù uluán na, á naggián yù mekaruá sù kiddanán na.

<sup>13</sup> Á pakasingan nayù ira daroban kâ Maria, kinagi ra kuna, “Anni ipakkulè mu?” kud da kuna. Á kinagi na nira, “Inâ da garè si Yápu, á inipáno ra, á arák ku ammu yù nangipeddád da kuna,” kun na.

<sup>14</sup> Á kabalín ni Maria nakiubobuk sù ira daroban, nallipay, á nasingan na si Apu Kesu nga nanáddak tán, nga arán na tákklalán.

<sup>15</sup> Á kinagi ni Apu Kesu kuna, “Abè, anni ipakkulè mu?” kun na. “Asinni aleram mu?” kun na. Á kagian ni Maria ta yù minámmulá yù makiubobuk kuna, á yáyù kinagi na kuna, “Tíyu, nu sikaw yù nangâ kuna, kagiam mu bì yù nangipeddám mu kuna, ta ek ku apan,” kun na.

<sup>16</sup> Á kinagi ni Apu Kesu kuna, “Maria,” kun na. Nallipay si Maria, á kinagi na kuna sù ággubobuk nga Kebru, “Rabboni!” kun na. Á yù kebalinán na, “Mesturu!”

<sup>17</sup> Á kinagi na laguk ni Apu Kesu kuna, “Arám mà igaggak, ta aringâ paga minay ta lángì sù Yámâ. Ngam em mu bì kagian sù ira wáwwagì ta umayakin ta lángì sù gián nayù Yámâ, nga Yáma naw gapay. Aggina yù Yápu nga pakimorayák ku ánná yù Yápu naw gapay nga pakimorayán naw,” kun na.

<sup>18</sup> Á nánaw laguk si Maria Maddala, á en na kinagi sù ira sinudduán ni Apu Kesu, “Nasingak ku si Apu!” kun na. Á kinagi na nira yù ngámin nga kinagi ni Apu Kesu kuna.

*Yù Pappasining ni Apu Kesu sù ira Sinudduán na*

*Mattiū 28:16-20; Markus 16:14-18; Lukas 24:36-49*

<sup>19</sup> Á ta gabi na Liggú, naggagammung yù ira sinudduán ni Apu Kesu ta lágum na balay. Nelitù yù puertá na, ta maganássing ira sù ira karakalán na Kudio. Á limittuák laguk si Apu Kesu sù giád da. Á kinagi na nira, “Ajjawà saw. Mapagimammâ yù nonò naw,” kun na nira.

<sup>20</sup> Á inipasingan na laguk nira yù limá na ánná yù bikâ na. Á ayatán ira ta pakasingad da sù Yápu ra.

<sup>21</sup> Á pidduán na laguk ni Apu Kesu yù kinagi na nira, “Mabannáyán kayin ánná mapagimammâ yù nonò naw. Dobat takayin ta kunnay sù paddok nayù Yámâ nikán, ta umay kayu mangipakánnámmu nikán,” kun na.

<sup>22</sup> Á pakkagi na karannian, inisù na ira, á kinagi na nira, “Alawatan nawin yù Mangilin nga Ikararuá.

<sup>23</sup> Á nu pakomán naw yù liwâ nayù ira tatolay, pakomán ni Namarò ira gapay. Ngam nu arán naw pakomán yù liwâ da, arán na ira gapay pakomán ni Namarò,” kun na.

*Yù Pappasining ni Apu Kesu kâ Tomâ*

<sup>24</sup> Á pappasining ni Apu Kesu sù ira sinudduán na, awán lâ si Tomâ, nga táddy sù ira mapulu duá nga iningágad da ta Jíping.

<sup>25</sup> Á yáyù nga kinagi nayù ira káruán nga sinudduán ni Apu kuna, “Nasingam mi si Apu,” kud da. Ngam kinagi ni Tomâ nira, “Nu arák ku masingan yù pilâ nga napátakán ta limá na, áんな nu arák ku karápan gapay yù pilâ ta limá na áんな yù bikà na nga piníká ra, á arák ku kurugan,” kun na.

<sup>26</sup> Á pappásá na walu nga ággaw, sù tádday Liggu, naggagammung yù ira sinudduán ni Apu Kesu mángin sù balay. Á aijjanin gapay nira si Tomâ. Nelitù yù puertá. Á límittuák si Apu Kesu nira, á kinagi na, “Mabannáyán kayin, áんな mapagimammà yù nonò naw,” kun na.

<sup>27</sup> Á kinagi na laguk kâ Tomâ, “Innam mu yù pilâ na limâ. Á em mu ira karápan áんな yù bikâ ku nga piníká ra, tapè ari ka mabbábâng nga manguruk,” kun na.

<sup>28</sup> Á simibbák si Tomâ, á kinagi na kuna, “Sikaw yù Yápù! Sikaw yù Pakimorayák ku,” kun na.

<sup>29</sup> Á kinagi ni Apu Kesu, “Tomâ, napiá ta manguruk ka gapu ta pakasingam mu nikán. Á mepallà yù pagayáyâ nayù ira nga manguruk, mássiki arád dangá masingan,” kun na.

### *Netúrâ Yawe Libru tapè Manguruk kayu*

<sup>30</sup> Á aru paga yù makapálâ nga pinagaddátu ni Apu Kesu ta arubâng nayù ira sinudduán na, nga ari netúrâ sawe libru.

<sup>31</sup> Á netúrâ danniawe, tapè kurugan naw ta si Apu Kesu yù MakKirstu nga Anâ ni Namarò nga Makáwayyá nga Mangiyigù. Ta nu kurugan naw áんな ikatalà naw, mepattolay kayu kuna ta áddè ta áddè.

## 21

### *Yù Pappasingan ni Apu Kesu sù ira Pitu ta Aggik na Bebay*

<sup>1</sup> Ta kabalín na yaw, nappasingan má si Apu Kesu sù ira sinudduán na ta keggá ra ta aggik na bebay na Tiberio. Nesimmu ta kunniawe.

<sup>2</sup> Nappupulù di Simon Eduru, áんな si Tomâ nga iningágad da ta Jiping, si Nataniel nga taga Kana sù purubinsia na Galilia, yù ira duá nga áñâ ni Sebedo, áんな duá ira paga nga sinudduán ni Apu Kesu.

<sup>3</sup> Á kinagi ni Simon Eduru nira, “Ek ku magissirá.” Á kinagi ra kuna, “Á em mi sikaw bulunan,” kud da kâ Eduru. Á minay ira nappittâ ta barangay. Á tangatangagabi ira nga nanígay, ngam awán bulubugá ta nálâ da.

<sup>4</sup> Á ta alippánnawák, aijjan si Apu Kesu nga nanáddak ta aggik na bebay, ngam arád da natákkilalán nayù ira sinudduán na.

<sup>5</sup> Á kinatolán ni Apu Kesu ira, á iniyabbû na, “Kopun, eggâ panò yù nálâ naw?” kun na. “Awán,” kud da kuna.

<sup>6</sup> Á kinagi na nira, “Itán naw lâ ta jiwanán na barangay, ta yá pakálapán naw,” kun na. Á yáyù initád da, á arád den makkâ gapu sù napakáru nga inâ na.

<sup>7</sup> Á yáyù nga kinagi na laguk kâ Simon Eduru nayù tádday nga sinudduán ni Apu Kesu nga iddukan na, “Ye, si Apu!” kun na. Á pakaginná ni Eduru ta kuruk nga si Apu, inisillong na yù barawási na, ta nagilongán nga mattarabáku, á nakkassú sù danum ta umay ta aggik.

<sup>8</sup> Á yù ira káruán nga nabattáng sù barangay, naporíán ira nga umay ta aggik, á ginuggud da yù sígøy nga napannu ta sirá. Aranni ira lâ ta aggik, ta magatû nga metro lâ támma yù kárayyu ra.

<sup>9</sup> Á pakáddè da ta aggik, gimitták ira, á nasingad da yù bága na api áんな yù dán nga nesuppá nga sirá áんな pán gapay.

<sup>10</sup> Á kinagi ni Apu Kesu nira, “Mangâ kayu bì sù sirá nga inâ naw, á iyângé naw saw,” kun na.

<sup>11</sup> Á yáyù nga minay si Simon Eduru ta barangay, á inigon na yù sígøy ta kannak, nga napannu ta darakal nga sirá. Magatû ta límápulu tallu yù biláng na sirá. Á mássiki nu aru yù nálâ na, ngam ari napisil.

<sup>12</sup> Á kinagi na laguk ni Apu Kesu nira, “Umay kayu bì kumán,” kun na. Á awán nira ta nakeyabbû kuna nu asinni, ta ammu ra ta si Apu.

<sup>13</sup> Á en na laguk inâ ni Apu Kesu yù pán, á bille na nira. Á kunnay gapay sù sirá, bille na nira.

<sup>14</sup> Á yane yù mekatallu nga pappasingan ni Apu Kesu sù ira sinudduán na áddè sù paginnanole na.

### *Yù Kinagi ni Apu Kesu kâ Simon Eduru*

<sup>15</sup> Á kabalid di Apu Kesu kiminán, iniyabbû na laguk ni Apu Kesu kâ Simon Eduru, “Simon, nga anâ ni Kuan, nepallà panò yù ángngiddù mu nikán ánnè karannian?” kun na. Á kinagi ni Eduru kuna, “Wan, Apu, ammum ta ayatat taka,” kun na. Á kinagi ni Apu Kesu kuna, “Taronám mu laguk yù ira mangikatalà nikán, ta meyárik ira ta kígò,” kun na.

<sup>16</sup> Á pidduán ni Apu Kesu nga iyabbû kâ Eduru, nga kun na, “Simon, nga anâ ni Kuan, egga panò yù ángngiddù mu nikán?” kun na. Á kinagi na má ni Eduru kuna, “Wan, Apu. Ammum ta ayatat taka,” kun na. Á kinagi ni Apu Kesu kuna, “Taronám mu laguk yù ira tatolè nga meyárik ta karnerù,” kun na.

<sup>17</sup> Á pillu ni Apu Kesu nga iyabbû kâ Eduru, “Simon, nga anâ ni Kuan, egga panò yù ayâ mu nikán?” kun na. Á maraddam si Eduru gapu ta namillu si Apu Kesu nga nangiyabbû kuna. Á kinagi ni Eduru kuna, “Apu, ammum ngámin. Ammum ta ayatat taka,” kun na. Á kinagi na laguk ni Apu Kesu kuna, “Taronám mu yù ira tatolè nga meyárik ta karnerù.

<sup>18</sup> Kukurugán nga kuruk yù kagiai ku nikaw. Áddè sù ngaw kabagitolem, sikaw lággapay yù mamarawási ta baggim ánná sikaw lággapay yù maguray ta angayám mu. Ngam nu mallakalákay ka noka, á tanakuán yù mabbáluk ta baggim. Á sonnatam mu yù limám, á iyángé naka ta arám mu ikáyâ nga angayán,” kun na.

<sup>19</sup> Yáyù kinagi ni Apu Kesu ta ipákánnámmu na yù áppate ni Eduru noka tapè meparáyaw si Namarò. Á kabalín na nakkagi ni Apu Kesu karannian, kinagi na laguk kâ Eduru, “Tuttulam mà,” kun na.

*Yù Kinagi ni Apu Kesu nga Meyannung sù Sinudduán na nga Iddukan na*

<sup>20</sup> Á nallipay si Eduru laguk, á nasingan na ta likuk da yù táddyá nga tumuttuttl nira. Aggina yù sinudduán ni Apu Kesu nga iddukan na, nga kataging na ngaw sù pakkákád da lage na pate na. Á aggina yù nangiyabbû kâ Apu nu asinni yù mappagápù kuna.

<sup>21</sup> Á pakasingan ni Eduru sù kabbulun na ta likuk da, kinagi na kâ Apu Kesu, “Apu, anni panò yù mesímu sangaw sawe tolay?” kun na.

<sup>22</sup> Á kinagi ni Apu Kesu kuna, “Á ta ángngarigán nu ikáyâ ku ta matolay yane tolay ta dabbuno ta áddè ta panoli saw, sikán lâ yù makánnámmu. Paguráyám mu lápay. Tumuttul ka nikánl!” kun na.

<sup>23</sup> Á yáyù nga neparámak sù ira kábulud da nga makituddu kâ Apu ta ari matay yane sinudduán na. Ngam arán ni Apu Kesu kinagi ta ari matay. Yá lâ kinagi na, “Ta ángngarigán nu ikáyâ ku ta matolay yane tolay ta dabbuno ta áddè ta panoli saw, sikán lâ yù makánnámmu,” kun na kâ Eduru.

<sup>24</sup> Á yane sinudduán ni Apu Kesu nga ubobugan na, aggina yù mangipakánnámmu karanniaw nga nesímu. Á aggina yù nangitúrâ, á ammu mi ta kuruk yù ngámin nga kinagi na.

<sup>25</sup> Á aru paga yù kingngikingnguá ni Apu Kesu. Á nu metúrâ nakuan ngámin, ari mopù. Á ta urè, ari támma mekárgá yù paketúratán na ta tangapáddabbunán.

## **Yù Kingngikingnguá nayù ira Olu nga Minángngilayalayâ**

### *Yù Meyannung sù Túrâ*

Yawe yù mekaruá nga libru nga initúrâ ni Lukas, nga doktor nga nepulupulù ngaw sù ira kárúán nga minángngilayalayâ. Á yù olu nga libru nga initúrâ ni Lukas **Yù Napiá nga Dámak**. Á tán nga libru, kinagi na yù ngámin nga kingnguá na ngaw ni Apu Kesu áddè ngaw ta pamegapu na mangituddu, ta áddè ta kálâ na ta lángi (Kingnguá 1:1-2).

Á sawe libru, uputan ni Lukas nga istorián yù nesimmu sù ira mangikatalà kâ Apu Kesu ta pamalurò da sù kinagi ni Apu nira. Ta kinagi ni Apu, “Ilayalayâ naw yù ngámin nga meyannung nikán sawe ili na Jerusalem, ánnna ngámin tâne lugár na Judiya, ánnna tuke lugár na Samaria, ta áddè túrin ta pagáddekan na dabbuno” (Kingnguá 1:8). Á nassamâ yù napiá nga dámak nga meyannung kâ Apu Kesu Kiristu ta ngámin nga lugár ta tangapáddabbuno. Á yáyù nga nepakánnámmu sù ira ngámin nga tatolay nga Kudio ánnna yù ira makkakerumá nga ari Kudio gapay yù awayyá ra nga mabbabawí ta liwiliwâ da ánnna makiyápu ira kâ Apu Kesu, tapè meyígú ira.

Á yù ira ngaw Kudio nga nangikatalà kâ Apu Kesu, narigâ yù áaggiád da, gapu ta nanakì yù ira kátannangán nga pári na Kudio nga manguruk kâ Apu Kesu, ánnna jinigirigâ da yù ira mangikatalà kâ Apu Kesu Kiristu (4:1-31; 7:1-59). Á nappanà yù áaggián nayù ira Kudio nga mangikatalà kâ Apu, gapu ta arád da kánnámmuán ta mesipâ gapay yù ira makkakerumá nga ari Kudio sù awayyá ra nga makiyígú kâ Apu Kesu Kiristu. Ngam nánnámmuán nayù ira kárúán nga Kudio ta mesipâ yù ira ngámin nga tatolay, á minay si Pilippi nga mangilayalayâ sù gián nayù ira ari Kudio nga taga Samaria (8:7-25).

Á minay laguk si Eduru nga mangilayalayâ sù ira ari Kudio ta bale ni Kornelio, nga kapítan nayù ira suddálú nga taga Roma (10:1-48). Á nanoli si Eduru ta ili na Jerusalem, ta en na kagian sù ira kábulun na yù nesimmu megapu sù pangilayalayâ na (11:1-18). Á naggagammung ira nga nakuubobuk, á nattatáddyay yù nonò da laguk ta napiá nu umay ira gapay nga mangilayalayâ sù ira tatolay nga ari Kudio.

Á si Saulo yù kátannangán nga Parisio nga nanigirigâ sù ira olu nga Kudio nga manguruk kâ Apu Kesu. Á nappasingan kâ Saulo si Apu Kesu nga naginnanolayin. Á manguruk gapay si Saulo, nga mangngágan gapay ta Pablo (13:9). Á pinalurò ni Pablo yù ngámin nga inipakuá ni Apu kuna, ta minay nangilayalayâ ta ngámin nga lugár áddè ta ili na Roma, tapè mesipâ gapay yù ira ari Kudio sù pammagure ni Namarò (28:30-31).

### *Yù Mayán nayù Libru*

Melayalayâ yù Napiá nga Dámak ta ili na Jerusalem (1:1-8:3)

Massamâ yù Napiá nga Dámak ta Lugár na Judiya ánnna Samaria (8:4-12:25)

Yù Olu nga Ánge ni Pablo nga Mangilayalayâ sù Napiá nga Dámak (13:1-14:28)

Yù Pakkaká-ubobuk nayù ira Manguruk ta Paggagammung da ta Jerusalem (15:1-35)

Yù Mekaruá nga Ánge ni Pablo nga Mangilayalayâ sù Napiá nga Dámak (15:36-18:22)

Yù Mekatallu nga Ánge ni Pablo nga Mangilayalayâ sù Napiá nga Dámak (18:23-21:16)

Yù Paggápù nayù ira Suddálú kâ Pablo ta Ili na Jerusalem (21:17-23:22)

Yù Pangituluk nayù ira Suddálú kâ Pablo ta Ili na Sesaria (23:23-26:32)

Yù Pangituluk nayù ira Suddálú kâ Pablo ta Ili na Roma (27:1-28:31)

<sup>1</sup> Mattúrákà nikaw, Don Topilu. Á sù ngaw olu nga initúrâ ku, kinagi nikaw yù ngámin nga kingnguá na ngaw ni Apu Kesu áddè ngaw ta pamegapu na mangituddu,

<sup>2</sup> ta áddè ta kálâ na ta lángi. Á lage na nánaw, sinaddánán ni Apu Kesu yù ira sinudduán na nga sinullà na megapu sù pakawayyá nayù Mangilin nga Ikararuá ni Namarò, ta umay ira mangilayalayâ sù bilin ni Namarò.

<sup>3</sup> Á pappasá na pate ni Apu Kesu ta kurù, sù paginnanole na, á naggián ta dabbuno ta appátapulu nga ággaw ánnna nappasingan sù ira sinullà na. Name-aru nga nappasingan nira, á aru yù kingngikingnguá na ta arubáng da, tapè ammu ra ta kuruk nga matolayin. Á kinagi na nira yù meyannung sù pammagure ni Namarò ta dabbuno.

<sup>4</sup> Á paggián ni Apu Kesu paga nira, kinagi na nira, “Ari kayu lábbi mánav ta Jerusalem. Iddagán naw yù iyawâ ni Namarò nikayu nga Mangilin nga Ikararuá, ta aggina yù kinagi ngaw nikayu nga initabbá na ngaw ni Ammò Namarò.

5 Á si Kuan ngaw, jinigù na kayu ta panákkilalán ta panguruk naw kâ Apu Namarò. Á danum yù inipanigù na nikayu. Ngam dumá yù ipanigù ni Namarò nikayu, ta umay sangaw nikayu yù Mangilin nga Ikararuá," kun ni Apu Kesu nira.

*Yù Kálâ ni Apu Kesu ta Lángì*

6 Á paggagammung nayù ira sinudduán na, iniyabbû da kâ Apu Kesu, "Apu, sangaw nu anni yù pamatulon nikami nga ginaká ni Israel sù pammagurayám mi, nga ginubâ nayù ira kalusso mi?"

7 Á kinagi ni Apu Kesu nira, "Arán naw awayyá nga kánnámmuán yù ággaw nga kesimmu na. Si Ammò ku nga Namarò, aggina lâ yù makáwayyá nga manullà ta ággaw nga kapalurò na ngámin.

8 Á sangaw nu umay nikayu yù Mangilin nga Ikararuá, iyawâ na nikayu yù pakáwayyá naw nga mangilayalayâ sù napiá nga dámak. Á ilayalayâ naw yù ngámin nga meyannung nikán sawe ili na Jerusalem áんな ngámin tâne lugár na Judiya áんな tuke lugár na Samaria ta áddè túrin ta pagaddekán na dabbuno."

9 Á kabalin ni Apu Kesu nakkagi, á ta panigan nayù ira sinudduán na, nálâ nga nagayáyun nga minay ta lángì, á nalipparán nga nattukiâ ta kunam, á arád den masingan.

10 Á sinánguk da lâ paga ta lángì.

Á pattánguk da, inikáddagâ lâ limittuák yù duá nga daroban ni Namarò, nga lálláki nga nabbarawási ta puraw nga gámì nga makatulang.

11 Á kinagi ra, "Sikayu nga taga Galilia, anni yù kabayák naw nga mattatáddak nga mattánguk ta lángì? Si Apu Kesu, nga nasingan naw nga minay ta lángì, aggina yù manoli saw noka, á kunnay ta páno na nga nasingan naw, kunnian gapay noka yù panoli na," kud da nira.

12 Pakagginná ra sù kinagi nayù ira daroban, nánaw ira laguk ta puddul nga mangngágan ta Olibo, á nanoli ira ta Jerusalem. Tangakilometro lâ yù kárayyu nayù puddul ta ili na Jerusalem.

13 Á labbè da ta Jerusalem, naddulò ira ta balay nga paggianád da, á minunè ira ta lágum ta utun, aggira ngámin kári Eduru, á si Kuan, si Ime, si Andares, si Pilippi, si Tomâ, si Bartolome, si Mattiu, si Ime nga anâ ni Alpio, si Simon nga Maláppâ, á si Kudas nga anâ ni Ime.

14 Á naggagammung ira ta kágággaw, ta nattatáddy yù nonò da nga nakimállâ kâ Apu Namarò, aggira ngámin áんな yù ira bábbay kári Maria nga yená ni Apu Kesu áんな yù ira lálláki nga wáwwagi ni Apu Kesu.

*Yù Pappúli ra ta Táli ni Kudas*

15 Á paggagammung da sù táddy nga ággaw, mággè magatù ta duápulu ira nga naggagammung tân. A nanáddak si Eduru, á kinagi na nira,

16 "Wáwwagi, napalurokin yù inipalappâ nayù Mangilin nga Ikararuá nga inipetúrá na ngaw kâ Patul Dabid sù ngaw pammagure na ta Israel. Yáyù initúrá ni Patul Dabid nga meyannung kâ Kudas nga nappagápù kâ Apu Kesu. Á napalurokin, ta inipagápù ni Kudas si Apu Kesu sù ira nangruá kuna.

17 Á nebiláng si Kudas nikami nga mapulu duá nga sinullà ni Apu, nga mesipâ ta pattarabáku mi.

18 Á gapu ta pangabbák ni Kudas sù ira nga maggápù kâ Apu Kesu, inâ na yù kuártu nga táddán na megapu sù narékè nga kingnguá na, á yáyù inigátâng na ta dabbun nga natayán na. Ta napanñâ si Kudas nga nallakak, á nabattâ yù sán na, á nallawán yù sine na.

19 Yaw yù narámak da ngámin ta Jerusalem. Yáyù gapu na nga iningágad da yù dabbun ta Akaldama sù ággubobuk da, á yá kebalinán na yù Naragán nga Dabbun.\*

20 Á aijan yù netúrá nga kinagi na ngaw ni Patul Dabid sù kansion na, nga netúrá ta libru nga Salmo, nga meyannung kâ Kudas, nga kunnia:

'Nánawán yù paggianán na, á awán bulubugá ta maggián kuna.'†

Á aijan gapay nga netúrá,

'Meyawâ laguk sù tanakuán nga tolay yù pakáwayyá na nga mattarabáku.'‡

21 "Á yáyù nga piliat tam laguk yù táddy sù ira nga nepappapulù ngaw nikami ta ngámin nga dagun nga keggá ni Apu Kesu nikami,

<sup>22</sup>ta áddè ngaw sù panigù ni Kuan ta áddè sù kálâ ni Apu ta lángì. Á yù tolay nga piliat tam, aggina yù mepattatáddy nikami, tapè ipakánnámmu na gapay yù paginnanole ni Apu.” Yáyù áddè nayù kinagi ni Eduru.

<sup>23</sup>Á kabalin ni Eduru nanabarang nira, pinaddepuaú da laguk yù duá nga lálláki, si Kusè nga iningágad da ta Barsabas, nga Justo yù apulídu na, ánnna si Matias.

<sup>24</sup>Á nakimállà ira kâ Apu ta meyannung sù duá nga lálláki. Á kinagi ra, “Apu, ammum yù nonò na ngámin nga tatolay ánnna danniaw nga duá. Ituddum nikami bì nu asinni yù piliam mu,

<sup>25</sup>tapè aggina yù málâ sù pakáwayyá na nga mangilayalayâ ta bilim mu ánnna masserbi nikaw, ta nilonán ni Kudas yù pattarabáku na, tapè umay sù gián nga mepángngà kuna,” kud da kâ Apu.

<sup>26</sup>Á kabalid da nakimállà, nabbúnù ira megapu sù duá, á napíli si Matias, nga nelannà sù ira mapulu táddy nga minángngilayalayâ.

## 2

### *Yù Dattál nayù Mangilin nga Ikararuá*

<sup>1</sup>Á jmittál yù piestá nga mangngágan ta Pentekosto,\* á nattatáddy yù ira ngámin nga manguruk sù táddy nga balay.

<sup>2</sup>Á inikáddagâ lâ yù gurù nga naggapu ta lángì, nga kun na gurù na paddák nga masikan. Á kitagurù sù lágum na balay nga paggagammungád da.

<sup>3</sup>Á limittuák nga nappasingan nira yù kun na api nga nesinisinek nga naddappá nira nga katággítáddy.

<sup>4</sup>Á napayyán ira ngámin sù Mangilin nga Ikararuá ni Namarò. Á dagarágâ nagubobuk ira ta makkakerumá nga ággubobuk, megapu sù Mangilin nga Ikararuá nga mangiyawá nira ta pakáwayyá ra.

<sup>5</sup>Á aru yù ira nga naggián ta Jerusalem, nga Kudio nga nakimoray kâ Namarò nga naggapu ta ngámin nga áppatulán ta dabbuno.

<sup>6</sup>Á pakaginná ra ta gurù nga kun na masikan nga paddák, gikarakarerán ira nga minay nakipagammung. Á naginná ra yù pagubobuk nayù ira tatolay nga manguruk kâ Apu Kesu. Á nakalalang ira, ta mássiki nu makkakerumá yù katatole ra, naginná ra nga katággítáddy yù ággubobuk na nga nakeyanatán na.

<sup>7</sup>Á nepallà yù kapállâ da, á kinagi ra, “Asinni ngámin danniaw ira nga giyubu-ubobugán ta makkakerumá? Ari panò aggira yù taga Galilia?

<sup>8</sup>Á kunnasi laguk ta maginná tam yù ággubobuk tam nga nakeyanatát tam nga katággítáddy? Ta arád da gemma ammu nayù ira taga Galilia yù ira makkakerumá nga ággubobuk tam!

<sup>9</sup>Á sittam, naggapu ittam ta aru nga áppatulán. Ajjan yù ira taga Partia ánnna taga Media, taga Elam, á taga Mesopotamia gapay ánnna taga Judiya, taga Kappadosia, taga Pontu, ánnna taga Asia.

<sup>10</sup>Á ajjan gapay yù ira taga Parigia ánnna taga Pampilia, taga Egipto, ánnna yù ira nga naggapu ta lugár na Libia nga aranni ta Sirene. Á ajjan gapay yù ira álliuk nga taga Roma, nga Kudio ánnna yù ira nattuduán ta kustombare na Kudio, nga nakKudiongín.

<sup>11</sup>Á ajjan gapay yù ira taga Kreta ánnna taga Arabia. Á sittam ngámin, kánnámmuát tam yù kagian nayù ira taga Galilia, gapu ta magubu-ubobuk ira sù makkakerumá nga ággubobuk tam nga katággítáddy. Á mangilayalayâ ira ta meyannung sù ngámin nga makapállâ nga kingngíkingnguá ni Namarò.

<sup>12</sup>Aanni panò yù kebalinán na?” Yáyù inubobuk nayù ira tatolay, gapu ta napállâ ira, ánnna nakalalang ira.

<sup>13</sup>Ngam ajjan gapay tán yù ira nga nanguyaw sù ira sinudduán ni Apu Kesu, á kinagi ra, “Námmellaw lâ danniaw ira!” kud da.

### *Yù Pangilayalayâ ni Eduru sù Bilin ni Namarò*

<sup>14</sup>Á gapu ta panguyo nayù ira káruán nga tatolay, nanáddak laguk tán di Eduru ánnna yù ira mapulu táddy nga sinudduán ni Apu Kesu nga mepulù kuna. Á si Eduru, iniyássikan na yù ngárál na, á kinagi na sù ira ngámin nga tatolay tán, “Sikayu nga kagittâ nga Kudio,

\* <sup>2:1</sup> Pappasá na límápulu nga ággaw áddè ta kabalin nayù panaddamád da ta pattalebák nayù daroban, duttál yù Pentekosto nga panaddamád da ta pangalawá ni Moyses sù tunung ni Namarò.

ánna sikayu ngámin nga maggián ta Jerusalem, tángngagan naw yù kagiak ku nikayu, tapè mepakánnámmu nikayu yù kukurugán.

<sup>15</sup> Sikayu, kagian naw ta mellaw danniaw ira nga magubobuk, ngam ari kuruk, ta ari ira gemma namissán, ta awán ta mamissán ta pannawák.

<sup>16</sup> Ngam yawe nga pagubobuk da nga maginná naw kunangan, kunnian yù kinagi na ngaw ni Joel, nga yù ngaw ábbilinán ni Namarò. Ta ajan yù netúrâ nga inipakkagi ni Namarò kâ Joel, nga kun na:

<sup>17</sup> 'Nu duttál yù ira panguriánán nga ággaw, iyawâ ku sù ira ngámin nga tatolay yù Ikararuâ.

Á yù ira ánâ naw, mangilayalayâ ira sù bilik ku.

Á yù ira bábbagitole naw, masingad da yù ipalappâ ku nira.

Á yù ira lállakaláke naw, mattatagenâ ira, gapu ta pattatagenatak ku ira.

<sup>18</sup> Á karanniuín nga ággaw nga maporián, iddák ku ta Ikararuâ yù ira masserbi nikán, nga lálláki ánna bábbay,

á ilayalayâ da yù bilik ku, megapu sù pakáwayyá nayù Ikararuâ.

<sup>19</sup> Á pagaddatuak ku yù makapállâ nga panákkilalán ta lángì ánna dabbuno. Ipasingak ku yù dága, ánna api, ánna atû.

<sup>20</sup> Makkallâ yù bilák, á magujin yù bulán ta kun na dága, lage nayù pangukum ku, ta pagáddekan na ággaw, nga ággaw nga mangilin, nga awán bulubugá ta kagittá na.

<sup>21</sup> Á aggira ngámin nga makimállâ nikán nga Yápu ra, meyígù ira, á arák ku ira ukuman,<sup>†</sup> kun ni Namarò.

Yáyu initúrâ na ngaw ni Joel, nga yù ngaw ábbilinán," kun ni Eduru.

<sup>22</sup> Á kabalín ni Eduru nga nangiyubobuk sù initúrâ ni Joel, kinagi na, "Sikayu nga kábuluk ku nga ginaká ni Israel, ginnán naw yù kagiak ku nikayu nga meyannung kâ Apu Kesu nga taga Nasaret. Inipakánnámmu ni Namarò nikayu ta aggina yù sinullà na, megapu sù aru nga pinagaddátu na nga makapállâ, nga inipakuá ni Namarò kuna. Á ammu naw gemma ngámin danniaw, ta nesímu saw giát tam.

<sup>23</sup> Á lage na namarò, dán nga ammu ni Namarò ngámin, ánna sinalákkuruk na nga ipetulù nikayu nga Kudio si Apu Kesu nga taga Nasaret. Á aggina yù ginápù naw ánna inipapapáte naw sù ira ari Kudio, á inípátâ da ta kurù.

<sup>24</sup> Ngam si Namarò, pinaginnanole na. Á nallawán sù tanam, nga matolay, ta ari megaggak megapu sù pate na.

<sup>25</sup> Á initúrâ na ngaw ni Patul Dabid yù kuruk nga ubobuk ni Apu Kesu. Kinagi na: 'Matákál ku si Apu Namarò nga sigídá mepulupulù nikán.'

Aringâ bulubugá maburung, gapu ta maggián nikán nga mangabbák.

<sup>26</sup> Yáyu gapu na nga ayatán yù putù. Á ubobugak ku yù pagayáyâ ku, ta mássiki nu matay yù baggi, ajan yù iddanamák ku, megapu nikaw, Apu.

<sup>27</sup> Ta arám mà tájjián sù gián nayù ira námmatay.

Arám mu iyanugù ta malabbak yù baggi ta tanam, ta sikán yù Anâ mu nga iddukam mu, nga masserbi nikaw.

<sup>28</sup> Á inipakánnámmum nikán yù napiá, nga meyárik ta dálan nga mappángè ta mannanáyun nga katolé,

ta maginnanolayà nga mepattolay nikaw ta áddè ta áddè. Á magayáyákà nga mepap-papulù nikaw.<sup>‡</sup>

Yáyu initúrâ na ngaw ni Patul Dabid," kun ni Eduru.

<sup>29</sup> Á kinagi ni Eduru paga, "Wáwwagi, ammu tam gemma ta natay ngaw nga nabayágín yù ngaw Patul Dabid nga naggaká nittam, á netanam, á aijjan lá paga nittam yù tanam na. Ari gemma yù baggi ni Patul Dabid yù inubobuk na sù initúrâ na.

<sup>30</sup> "Ngam ta keggá na ngaw ni Patul Dabid, aggina yù ábbilinán ni Namarò, á ammu na ta kuruk nga mapalurò yù initabbá ni Namarò kuna. Á kinagi ni Namarò ta duettál noka yù ginaká ni Patul Dabid, nga táli na nga mammaguray sù áppatulán na.

<sup>31</sup> Ta inipalappâ ni Namarò kuna yù mesímu noka pángè na kesímu na, á yáyu nga kinagi na ngaw ni Patul Dabid yù meyannung sù duettál nga MakKiristu, nga maginnanolay, nga ari matájjián sù gián nayù ira námmatay, ánna ari malabbak yù baggi na ta tanam.

<sup>32</sup> Aggina si Apu Kesu, nga pinaginnanole ni Namarò. Á sikami ngámin yù massistígu ta kukurugá nga naginnanolay, gapu ta nasingam mi.

<sup>33</sup> Á kunangan aijjanin si Apu Kesu ta lángì, nga nagitubang ta jiwanán ni Namarò nga Yáma na, nga paggianán na maráyaw. Á iniyawâ nayù Yáma na kuna yù Mangilin nga

<sup>†</sup> 2:21 Joel 2:28-32    <sup>‡</sup> 2:28 Salmo 16:8-11

Ikararuá nga initabbá na ngaw kuna. Á jinok ni Apu Kesu yù Mangilin nga Ikararuá ta umay nikamí nga sinudduán na. Á yáyù nga masingan naw ánnna maginná naw kunangan yawe nga akkuám mi, megapu sù pakáwayyá nayù Mangilin nga Ikararuá.

<sup>34</sup> “Wáwwagi, ari gemma si Patul Dabid yù minay ta lángì, nu ari galâ si Apu Kesu Kiristu. Ngam kinagi ni Patul Dabid,  
‘Si Apu Namarò, kinagi na sù Yápù, “E ka bì magitubang ta jiwanák ku, nga pagitubangán nayù maráyaw,

<sup>35</sup> áddé ta arál ku pangappù sù ira nga malussaw nikaw,” kun ni Patul Dabid.<sup>§</sup>

<sup>36</sup> Á sikayu ngámín nga wáwwagi mi nga ginaká ni Israel, mánnámuán naw laguk ta si Apu Kesu nga inipepátá naw ta kurú, aggina yù sinullá ni Namarò ta Yápù tam nga MakKiristu nga mammaguray.”

<sup>37</sup> Á ta pakaginná nayù ira tatolay karannian, napábbaw ira. Á kinagi ra kári Eduru ánnna yù ira kábulun na, “Wáwwagi, anni laguk yù akkuám mi?”

<sup>38</sup> Á kinagi ni Eduru nira, “Mabbabáwi kayu nga katággítáddyay ta liwiliwá na. Á maparigú kayu megapu sù pakáwayyá nayù ngágán ni Apu Kesu Kiristu, tapè ipakánnámuu naw yù pangikatalà naw ánnna pakiyápu naw kâ Apu Kesu Kiristu.\* Á pakomán na kayu sù liwiliwá naw, ánnna iyawá na gapay nikayu yù Mangilin nga Ikararuá.

<sup>39</sup> Ta kinagi na ngaw ta aggira ngámín nga agálán na yù pangiyawatán na sù initabbá na. Mesipà kayu gapay ánnna yù ira ánâ naw ánnna ngámín yù ira tatolay ta dabbuno nga magginná ta pagágál ni Apu Namarò ta manguruk kuna,” kun ni Eduru nira.

<sup>40</sup> Á aru paga yù kinagi ni Eduru nira. Á sinabarangán na ira, á kinagi na, “Ari kayu meppattáddyay sù ira naráké, tapè ari kayu mekanakaná sù liwiliwá da nga ipamanunnú ni Apu nira,” kun na.

<sup>41</sup> Á aru sù ira nga nakaginná yù nanguruk sù kinagi ni Eduru. Á nakirigú ira, á talluribu yù ira tatolay nga nelanná sù ira manguruk.

<sup>42</sup> Á naggagummung ira ta kággágaw nga maggiámuu sù ituddu nayù ira sinudduán ni Apu, ánnna makkaká-ubobuk ira ta meyannung sù napiá nga bilin ni Namarò. Á nakkakálálláng ira nga kun na tangapamiliá. Á giddigiddúá ra yù pán nga kinád da ta panaddamád da ta pate ni Apu Kesu, ta pakimore ra kâ Apu Namarò, ánnna nakimállá ira kuna.

### *Yù Kustombare nayù ira Manguruk kâ Apu Kesu*

<sup>43</sup> Á aru yù ira makapállâ nga pinagaddátu nayù ira sinudduán ni Apu Kesu. Á yáyù nga napállâ yù ira ngámín nga tatolay.

<sup>44</sup> Á ngámín ira nga manguruk, nattatáddyay ira ta nonò da, á nakkakásipà ira sù ngámín nga kukuá ra.

<sup>45</sup> Á iniláku ra yù dabbud da ánnna kukuá ra, á inisinek da yù nallakuád da sù ira ngámín nga manguruk ta meyannung sù awágad da.

<sup>46</sup> Á ta kággágaw naggagummung ira nga nakimállá kâ Namarò sù mangilin nga kapilliá. Á minay ira kiminán sù bile ra ánnna nakkakásipà ira ta kanad da, á nagayáyá ira.

<sup>47</sup> Á naddáyaw ira kâ Apu Namarò. Á ngámín yù ira katangeliád da, mássiki yù ira nga ari manguruk, nakimorayád da yù ira nga manguruk. Á kággágaw linnapán na ira ni Namarò sù ira bagu nga mangikatalà kuna.

## 3

### *Yù Pamammapiá di Eduru sù Pilay*

<sup>1</sup> Á ta pannarek na bilák ta págák, nga negagángay nga oras nga pakimállá nayù ira Kudio, nappulú di Eduru kâ Kuan nga minay sù mangilin nga kapilliá, tapè makimállá ira.

<sup>2</sup> Pakáranni ra ta puertá nayù kapilliá nga mangngágán ta Kakástán nga Puertá, naratang da yù laláki nga pilay yù nakeyanatán na. Á ta kággágaw initotoli ra yù pilay tapè makilimù sù ira nga mattatallung sù kapilliá.

<sup>3</sup> Pakasingan nayù pilay kári Eduru kâ Kuan, nakilimù nira gapay.

<sup>4</sup> Á inni-innad di Eduru, á kinagi ra kuna, “Innam kami,” kud da.

<sup>5</sup> Á sinánggák na ira, ta iniddagán na yù iyawá da kuna.

<sup>6</sup> Ngam kinagi ni Eduru kuna, “Awán kami ta kuártu, ngam ajjan yù awayyá mi nga mangabbák nikaw megapu sù pakáwayyá ni Apu Kesu Kiristu nga taga Nasaret. Gumikkáng ka laguk, tapè mallakák ka.”

<sup>7</sup> Á sinangngalán ni Eduru yù limá na nga jiwanán, tapè pagikkangan na. Á dagarágâ nga nassikan yù takki na.

<sup>8</sup> Á nikáddagâ na lâ gimikkáng. Á nepulù nira nga simillung sù mangilin nga kapilliá, nga nallakalakák nga nakkassakassú, ánnna naddáyaw kâ Namarò.

<sup>9</sup> Á ngámin nga tatolay, nasingad da yù tolay nga nallakalakák ánnna naddáyaw kâ Namarò.

<sup>10</sup> Á natákkilálád da ta aggina yù ngaw nagitubang nga minákkilimù sù puertá nga Kakástán. Á nepallà yù kapállâ da sù nesimmu kuna.

<sup>11</sup> Á ta pakikering nayù ngaw pilay paga kári Eduru kâ Kuan ta balkon nayù kapilliá nga mangngágan ta balkon ni Patul Solomon,\* minay yù ira ngámin nga tatolay nga makkarakarerá nga magarimummung nira ta balkon, ta nerallà yù kapállâ da.

#### *Yù Pangilayalayâ ni Eduru sù Mangilin nga Kapilliá*

<sup>12</sup> Á pakasingan ni Eduru ta napállâ yù ira tatolay, kinagi na nira, “Sikayu nga kábuluk ku nga ginaká ni Israel, ngattá, ta napállâ kayu gapu ta makalakák yù ngaw pilay? Ngattá, ta dúlangán naw kami? Kagian naw panò ta sikami yù nammapiá ánnna namalakák sawe tolay, megapu sù ámmagaddátu mi onu piá mi?

<sup>13</sup> Ari gemma sikami yù mappagaddátu, nu ari galâ si Namarò nga Yápu di Abrakam kári Isak kâ Akup, ánnna ngámin nga naggaká nittam. Á pinalakák ni Namarò yawe tolay, tapè meparaway si Apu Kesu nga Anâ na. Ngam sikayu, ginápù naw si Apu Kesu, á inikeká naw ta arubáng ni Guginador Pilatto nga awán ta liwâ na. Á manakà kayu kuna. Á mássiki nu inikáyâ ni Pilatto nga palubbángan, ngam ari makatubáng sù ure naw.

<sup>14</sup> Sínájjian naw yù kuruk nga napiá nga mangilin, nga awán ta liwâ na, á kinagi naw kâ Pilatto ta palubbángan na yù namapáyat.

<sup>15</sup> Á pinapáte naw yù manotolay. Ngam pinaginnanole ni Namarò, á sikami yù massistígu ta kuruk yian, ta nasingam mi.

<sup>16</sup> Á yawe tolay, inikatalà na si Apu Kesu. Á megapu sù pakáwayyá ni Apu Kesu, nammapiángin ánnna nasikanin. Aggina yù ngaw pilay nga masingan naw ánnna matákkilálán naw. Á megapu ta pangikatalà na kâ Apu Kesu nga Yápu mi, napammapiángin ta arubáng naw.”

<sup>17</sup> “Wáwwagi,” kun na paga ni Eduru sù ira tatolay, “ta pamapáte naw kâ Apu Kesu, ammù ta arán naw kánnámuán ta aggina yù MakKirstu nga jinok ni Namarò saw. Á yù ira káttannangán naw, arád da gapay ammu.

<sup>18</sup> Ngam si Namarò, inibilin na sù ngaw ira ábbilinán na yù jigâ nga umay sù MakKirstu nga doban na ta umay saw. Á yáyù nga mapatuppál laguk yù kinagi nayù ira ábbilinán na sù kepátâ ni Apu Kesu ta kurù.

<sup>19</sup> Mabbabáwi kayu laguk, á kurugan naw si Namarò ánnna likuránán naw yù liwiliwâ naw. Á pakomán na kayu ni Namarò sù liwiliwâ naw,

<sup>20</sup> ánnna pabannáyán na yù nonò naw. Á doban na má sangaw sawe dabbuno si Apu Kesu, nga sinullà na ta mammaguray nittam.

<sup>21</sup> Ngam maggián lábbì ta arubáng ni Namarò ta lángì ta áddè ta dattál nayù ággaw nga sinullà ni Namarò nga panguli na ta dabbuno. Yáyù inibilin na ngaw ni Namarò sù ira ngaw ábbilinán na sù ira olu nga ággaw.”

<sup>22</sup> Á kinagi na paga ni Eduru, “Ajan yù kinagi na ngaw ni Moyses, nga yù ngaw ábbilinán ni Namarò, nga kun na, ‘Doban na sangaw ni Apu Namarò yù ábbilinán na, nga kagittá tam nga Kudio, ta kunnay sù paddok na nikán.

Á tángngagan naw ngámin yù kagian na nikayu.

<sup>23</sup> Á ngámin yù ira tatolay nga ari manguruk, ari iren mesipà sù ira tatole ni Namarò, nu ari galâ ta mesinna ira kâ Namarò ta áddè ta áddè:<sup>†</sup>

<sup>24</sup> Yáyù kinagi na ngaw ni Moyses. Á di Samuel ánnna yù ira ngaw ábbilinán ni Namarò nga naporián nga siminubbâ kuna, kinagi ra yù Meyannung sù karannian nga ággaw.

<sup>25</sup> Á sittam ngámin nga Kudio yù mesipà sù initarátu na ngaw ni Namarò sù ira ngaw naggaká nittam, gapu ta ánâ da ittam nga naporián. Ta yawe yù initarátu ni Namarò kâ Kákay Abrakam, nga kun na, ‘Mammapiá yù ággíán nayù ira ngámin nga tatolay ta dabbuno, megapu sù tádday nga ginakám.’

<sup>26</sup> Yáyù kinagi ni Namarò kâ Kákay Abrakam. Á yáyù gapu na nga sittam nga Kudio yù olu nga naddobán na kâ Apu Kesu nga Anâ na, tapè pammapián na yù ággíát tam, ánnna ituddu

\* <sup>3:11</sup> Si Patul Solomon yù ngaw mammaguray sù ira Kudio, nga siminubbâ sù yáma na, nga si Patul Dabid. † <sup>3:23</sup> Deuteronomio 18:15, 18-19

na nittam ta likuránát tam yù narákè nga akka-akkuát tam, áンna palurotat tam yù ipakuá na nittam,” kun ni Eduru.

## 4

*Yù Pangikeká nayù ira Kátannangán na Kudio kári Eduru kâ Kuan*

<sup>1</sup> Á pagubobuk di Eduru kâ Kuan paga sù ira magaru nga tatolay, nappángè nira yù ira pári na Kudio áンna yù kapitán nayù ira nga magguárdiá sù mangilin nga kapilliá, áンna yù ira Sadusio.

<sup>2</sup> Á napporay ira, gapu ta pangituddu ri Eduru áンna yù ira kábulun na sù ira tatolay. Ta inituddu ri Eduru ta naginnanolayin si Apu Kesu, á yáyù nga pakánnámmuád da ta kuruk nga maginnanolay gapay noka yù ira nga námmatay.

<sup>3</sup> Á ginápù da laguk di Eduru kâ Kuan. Á gapu ta gabingin, pinukù da ira áddè ta pannawák.

<sup>4</sup> Ngam napakáru yù ira nga manguruk, gapu ta pagginná ra sù bilin ni Namarò nga kinagi ri Eduru nira. Á mágge límáribu yù ira lálláki nga manguruk.

<sup>5</sup> Á ta pannawák, naggagammung ta Jerusalem yù ira Kudio nga mammaguray áンna yù ira giriámán, áンna yù ira mesturu nga mangituddu ta tunung da gapay.

<sup>6</sup> Ajjan gapay tán di Annas nga kotunán na pári, kári Kayapas, áンna si Kuan, si Alekanduru, áンna ngámin ira nga kanakanáyún nayù kotunán na pári.

<sup>7</sup> Paggagammung da, inipágál da di Eduru ta meyarubáng nira, tapè bestigád da ira. Á iniyabbú da nira, “Sisaw yù paggapuán nayù pakáwayyá naw? Asinni naddok nikayu ta kingnguá naw?” kud da kári Eduru.

<sup>8</sup> Á yù Mangilin nga Ikararuá, inipakánnámmu na kâ Eduru yù itabbák na, á kinagi ni Eduru laguk nira, “Sikayu nga mammaguray nikami, áンna sikayu nga karakalám mi,

<sup>9</sup> nu bestigán naw kami megapu sù napiá nga kingnguá mi sù pilay kagabi áンna yù nipammapiá mi kuna,

<sup>10</sup> á mánnámmuán naw laguk, áンna yù ira ngámin nga kagittá tam nga ginaká ni Israel, ta nammapiángin yù tolay nga manáddak sawe arubáng naw megapu sù pakáwayyá áンna ámmagaddátu ni Apu Kesu Kiristu nga taga Nasaret. Aggina yù inípátá naw ta kurù, ngam pinaginnanole ni Namarò.

<sup>11</sup> Aggina yù meyárik ta batu nga inubobuk nayù ngaw ábbilinán ni Namarò sù dán nga netúrâ, nga batu nga nanakitán naw. Á sikayu yù meyárik sù ira minábbalay. Á yù iníwallián naw, aggina yù piníli ni Namarò, nga nabbáli ta panáddagán nayù bale na, nga keyarigán nayù ira ngámin nga mangikatalà kuna.\*

<sup>12</sup> Á ta ngámin nga dabbuno, awán ta mangiyígù ta tatolay, nu ari galá si Apu Kesu Kiristu. Awán ta tanakuán nga mangiyígù nittam.”

<sup>13</sup> Á ta pakaginná nayù ira mammaguray sù initabbák di Eduru, napállá ira, gapu ta pobare di Eduru nga ari naggigiámmu, ngam ari ira nappasirán nga nagubobuk nira. Á yáyù nga kánnámmuád da ta kábulun na ira ngaw ni Apu Kesu.

<sup>14</sup> Á awán ta ipaliwâ da kári Eduru kâ Kuan, ta nepanáddak gapay nira yù tolay nga pilay ngaw, nga nammapiángin.

<sup>15</sup> Á pinalawád da ira laguk nayù ira mamestigá nira, tapè makkaká-ubobuk ira.

<sup>16</sup> Á kinagi ra, “Anni yù akkuát tam sù ira tolay? Ta nappasingan yù pinagaddátu ra sù ira ngámin nga tatolay nga maggián ta Jerusalem, á awán ta awayyá tam gemma nga makkagi ta ari kuruk.

<sup>17</sup> Ngam ananássingat tam ira laguk, tapè ari ira má mangituddu ta meyannung kâ Kesu, áンna ari massamâ paga yù dámak nga meyannung kuna sù ira tatolay.”

<sup>18</sup> Á kabalid da nakkaká-ubobuk, pinatallung da di Eduru, á inipugik da yù pangilayalayá da áンna pangituddu ra ta meyannung kâ Apu Kesu.

<sup>19</sup> Ngam simibbák nira di Eduru kâ Kuan, á kinagi ra, “Nononopan naw nu anni yù napiá ta ánniganán ni Namarò, nu kurugam mi yù kagian naw ánné sù kagian ni Namarò.

<sup>20</sup> Ta awán ta awayyá mi nga mattukká nga makkagi sù nasingam mi áンna naginná mi nga kingnguá ni Apu Kesu áンna inituddu na,” kud da.

<sup>21</sup> Á yù ira mammaguray, inananássing da má di Eduru. Á pinalubbáng da ira laguk, ta arád da nálek yù awayyá ra nga mamággáng nira, gapu ta naddayaráyw yù ira ngámin nga tatolay kâ Namarò, megapu sù nesimmu sù ngaw pilay.

<sup>22</sup> Á matturù ta appátapulu ngin yù dagun nayù tolay nga nammapiángin megapu sù pakáwayyá ri Eduru nga naggapu sù ámmagaddátu ni Apu Kesu.

\* 4:11 Salmo 118:22

*Yù Pakimállà nayù ira Manguruk kâ Apu*

<sup>23</sup> Á ta kapalubbáng di Eduru kâ Kuan, minay ira ta gián nayù ira kákkopud da, á kinagi ra nira yù ngámin nga kinagi nayù ira kátannangán nga pári ánná yù ira giriámán.

<sup>24</sup> Á ta pakaginná nayù ira kákkopud da ta inananássing da ira, nattatáddy ira nga nakimállà kâ Namarò, á kinagi ra:

“Apu Namarò, sikaw yù mammaguray ánná sikaw yù namarò ta lángì ánná dabbuno, bebay, ánná ngámin yù maggián nira.

<sup>25</sup> Á si Patul Dabid, nga yù ngaw naggaká nikami nga masserbi nikaw, kinagi na yù bilim mu nga nipakagi nayù Mangilin nga Ikararuá kuna. Á aijan nga netúrá yù kinagi na ngaw, nga kunniaw:

‘Yù ira ná ari Kudio nga mammaguray ta dabbuno, ngattá, ta mapporay ira kâ Namarò?

Á yù ira Kudio, ngattá, ta potuád da si Namarò!

<sup>26</sup> Mattatáddy yù ira patul ánná yù ira ngámin nga mammaguray ta dabbuno,  
tapè igagánge ra yù pakikontará ra kári Namarò ánná yù MakKirstu nga sinullà na ta  
mammaguray.<sup>†</sup>

<sup>27</sup> “Apu Namarò, napalurokin kunangane yù kinagi na ngaw ni Patul Dabid, ta nepag-gagammung ngaw gemma sawe ili na Jerusalem yù ira kagítá mi nga ginaká ni Israel ánná yù ira ngámin nga ari Kudio gapay, kári Patul Erodo kâ Gubinador Pilatto. Á nattatáddy ira tapè igagánge ra nu kunnasi yù ámmapáte ra sù mangilin nga Anâ mu nga masserbi nikaw.

<sup>28</sup> Á kingnguá ra yù ngámin nga dán nga sinalákkuruk mu ngaw, megapu sù pakáwayyám ánná urem.

<sup>29</sup> Apu, naginnám yù pangananássing da nikami. Á pataggatam mu bì yù nonò mi ngámin nga masserbi nikaw, tapè ari kami maganássing nga mangilayalayâ sù bilim mu nga meyannung kâ Apu Kesu.

<sup>30</sup> Pammapíám mu yù ira máttakí ánná ipasingam mu yù pagaddatuam mu nga makapálá, megapu sù pakáwayyá ni Apu Kesu, nga mangilin nga Anâ mu nga masserbi nikaw.”

<sup>31</sup> Á kabalid da nakimállà, nagguyu yù balay nga naggagammungád da. Á minay yù Mangilin nga Ikararuá sù ira ngámin. Á ari ira maganássing nga mangilayalayâ sù bilin ni Namarò.

*Yù Pakkaká-abbák nayù ira Manguruk*

<sup>32</sup> Á yù ira ngámin nga manguruk, nattatáddy ira ta nonò da ánná ayá da. Á awán nira ta nakíkkí, nga makkagi ta kukuá na lápay yù ngámin nga kukuá na, ngam pinattatádde ra yù ngámin nga kukuá ra, tapè makkakásipà ira.

<sup>33</sup> Á yù ira minángngilayalayâ, naláppà ira nga ari nattukkâ nga makkagi ta nagin-nanloyin si Apu Kesu, nga kuruk nga matolay móngin. Á nepallà yù pangikállà ni Namarò sù ira ngámin nga manguruk.

<sup>34</sup> Á awán nira ta magáwák, gapu ta yù ira nga aijan kuá na nga dabbun ánná balay, iniláku ra nga katággitáddy,

<sup>35</sup> Á inipaggiwâ da yù nallakuád da sù ira minángngilayalayâ, tapè aggira mangisinek ta kuártu sù ira magáwák ta meyannung ta awágad da.

<sup>36</sup> Á aijan si Kusè, nga ginaká ni Libi nga taga Sipro, nga iningágan nayù ira minángngilayalayâ ta Bernabe. Á yù kebalinán na “Bernabe” yù minánnabarang.

<sup>37</sup> Á iniláku ni Kusè yù dabbun na, á inipaggiwâ na yù pagá na sù ira minángngilayalayâ.

## 5

*Di Ananiâ kâ Sapira nga Magatáwa*

<sup>1</sup> Á naggián gapay tán di Ananiâ kâ Sapira nga atáwa na. Á iniláku ra gapay yù dabbud da.

<sup>2</sup> Á naggítá yù nonò da ta pakappiád da yù káruán nga nallakuád da, á inituluk ni Ananiâ yù káruán nga inipe na ta arubáng nayù ira minángngilayalayâ. Ngam inilímak na yù pinakappiád da.

<sup>3</sup> Á kinagi ni Eduru, “Ananiâ, ngattá, ta initulù mu yù nonò mu kâ Satanas? Ngattá, ta passiriám mu yù Mangilin nga Ikararuá? Ta kinagim ta iniyawâ mu ngámin yù nallakuám mu ta dabbun, nga arám mu inipaggiwâ, ngam initágum yù káruán.

<sup>4</sup> Á nu arám mu iláku, kukuám gemma lâ. Á pallákum, maguray ka lággapay sù nallakuám mu. Ngattá, ta ninononò mu yù massiri? Ari gemma tolay yù passiriám mu, nu ari gabba galâ si Namarò.”

<sup>†</sup> 4:26 Salmo 2:1-2

<sup>5</sup> Á pakaginná ni Ananiâ karannian, nikáddagâ lâ natombá nga natay. Á yù ira ngámin nga nakarámak sù nesimmu kuna, nepallà yù assing da.

<sup>6</sup> Á yù ira bábbagitolay, gimikkáng ira, á ed da binungun yù natay. Á nipáno ra, á ed da initanam.

<sup>7</sup> Á manganánnuán, pappasá na tallu nga oras, limibbè gapay si Sapira, ngam arán na ammu ta natayin yù atáwa na.

<sup>8</sup> Á kinagi ni Eduru kuna, “Kagiam mu bì nikán nu iniyawâ naw ngámin nga nallakuán naw ta dabbun naw.” Á kinagi nayù babay, “Wan, ngámin.”

<sup>9</sup> Á kinagi ni Eduru kuna, “Ngattá ta naggittá yù nonò naw kâ atáwam nga mamaraparubá nga mangilogò sù Ikararuá ni Apu Namarò? Ginnám mu! Manolingin yù ira nga nangitanam sù atáwam, á ed da ka gapay apan,” kun na.

<sup>10</sup> Á dagarágâ nga natombá yù babay ta arubáng ni Eduru nga natay. Á tallung nayù ira bábbagitolay, naratang da yù pate na, á inipáno ra gapay, á imitanam da ta taging na atáwa na.

<sup>11</sup> Á ngámin ira nga manguruk kâ Apu Kesu ánnna ngámin ira nga nakarámak sù nesimmu, nepallà yù assing da.

#### *Pamagaddátu nayù ira Minángngilayalayâ sù Aru nga Makapállâ*

<sup>12</sup> Á yù ira minángngilayalayâ, pinagaddátu ra yù aru nga makapállâ sù ira tatolay ta Jerusalem. Á yù ira ngámin nga manguruk kâ Apu, sigídá nga naggagammung ira, ta kunnay sù kustombare ra, sù mangilin nga kapilliá, sù balkon ni Patul Solomon.

<sup>13</sup> Á ngámin yù ira ari manguruk, nasingad da ta napiá nga tatolay yù ira manguruk kâ Apu ánnna nakimorayád da ira, ngam naganássing ira nga metádday sù ira manguruk.

<sup>14</sup> Á lanallalannapán paga yù ira manguruk ta magaru nga lállaki ánnna bábbay nga manguruk kâ Apu Kesu.

<sup>15</sup> Á gapu ta pamagaddátu nayù ira minángngilayalayâ, iniyánge nayù ira tatolay yù ira máttaki ta kalsáda, nga pinagiddá ra ta katri ra ánnna dapad da, tapé malirumán ira sù alinu ni Eduru ta pattalebák na nira.

<sup>16</sup> Á yù ira magaru nga naggapu ta ngámin nga barrabárriu na Jerusalem, iniyánge ra yù ira máttakì ánnna yù ira nagunagán na anitu. Á nammapiá ira ngámin.

#### *Yù Karigirigâ nayù ira Minángngilayalayâ*

<sup>17</sup> Á yù kotunán na pári ánnna yù ira ngámin nga kábulun na nga Sadusio, nalussaw ira sù ira minángngilayalayâ. Á nerallà yù passíl da nira.

<sup>18</sup> Á ginápù da ira, á pinukù da ira ta karsel.

<sup>19</sup> Ngam ta tangngá na gabi, minay yù daroban ni Namarò, á binukatán na yù puertá nayù karsel, á inilawán na yù ira minángngilayalayâ. Á kinagi na nira,

<sup>20</sup> “Sangaw nu pannawák, umay kayu ta mangilin nga kapilliá, á ilayalayâ naw sù ira ngámin nga tatolay yù meyannung sù awayyá ra nga mesipà sù áttole ni Namarò nga awán ta áddè ná,” kun na nira.

<sup>21</sup> Á pakaginná ri Eduru sù kinagi nayù daroban ni Namarò, kinuruk da. Á ta pannawák, minay ira sù mangilin nga kapilliá nga mangituddu sù ira tatolay.

Á manganánnuán, naggagammung yù kotunán na pári ánnna yù ira kábulun na sù mangilin nga kapilliá, á inipágál da laguk yù ira karakalán na Kudio. Á jinok da yù ira magguárdiá ta ed da apan yù ira minángngilayalayâ nga pinukù da ta karsel, tapé iyánger ra ira nga meyarubáng nira.

<sup>22</sup> Ngam labbè nayù ira magguárdiá ta karsel, awán ira tán. Á nanoli ira sù ira minámmaguray, á kinagi ra nira,

<sup>23</sup> “Labbè mi ta karsel, netúsí ta napiá yù puertá na, á naggián paga yù ira magguárdiá ta puertá, ngam pabbukâ mi, awán ta tolay ta unak.”

<sup>24</sup> Á yù kapitán nayù ira magguárdiá ta mangilin nga kapilliá ánnna yù ira kátannangán na pári, pakaginná ra ta awán yù ira nepukù ta karsel, nakalalang ira ánnna nononopad da nu anni yù nesimmu sù ira minángngilayalayâ.

<sup>25</sup> Á minay laguk yù tádday nga tolay, á kinagi na nira, “Yù ira tatolay nga pinukù naw, nasingak ku ira gangù ta kapilliá nga mangituddu sù ira tatolay.”

<sup>26</sup> Á minay laguk di kapitán ánnna yù ira magguárdiá, á inâ da yù ira minángngilayalayâ, á inilabbè da ira ta ámmanunnután, ngam arád da ira pinuersá, gapu ta ikássing da yù ira tatolay nga tudduád di Eduru, marakè payangad da ira ta batu.

<sup>27</sup> Á pangiyángé ra nira, iniyarubáng da ira sù ira minámmununñù. Á binestigá na ira nayù kotunán na pári.

<sup>28</sup> Á kinagi na, "Sinaddánám mi kayu ta napiá ta ari kayu bulubugá mangituddu ta meyannung sù tolay nga tuttulan naw, ngam piñassamâ naw yù ituddu na ta ngámin nga tatolay ta Jerusalem! Á ngattá, ta ipaliwâ naw paga nikami yù pate na!" kun nayù kotunán nga pári.

<sup>29</sup> Ngam simibbák di Eduru ánná yù ira kábulun na, á kinagi ra, "Máwák nga kurugam mi yù taddán ni Apu Namarò ánné sù taddán na tolay.

<sup>30</sup> Á si Namarò, nga pakiyápuán nayù ira naggaká nittam, pinaginnanole na si Apu Kesu nga pinapáte naw, nga inipepátâ naw ta kurù.

<sup>31</sup> Á inâ ni Namarò ta lángì, á pinagitubang na ta jiwanán na, tapè aggina yù mammagray ánná mangiyígù ta tatolay. Á yáyù nga ajian yù awayyá tam nga ginaká ni Israel nga mabbabawí ta liwiliwâ tam, tapè pakomán ni Namarò ittam.

<sup>32</sup> Á sikami yù makkagi ta kuruk ngámin danniaw. Á yù Mangilin nga Ikararuá, nga iniyawâ ni Namarò nikami ánná yù ira ngámin nga manguruk kuna, aggina gapay yù mangipakánñámmu ta kukurugán."

*Yù Panabarang ni Gamaliel sù ira Kábulun na nga Minámmaguray*

<sup>33</sup> Á pakagináá nayù ira minámmaguray sù kinagi di Eduru, naporay ira, á gustu ra nga papatáyan yù ira minángngilayalayâ.

<sup>34</sup> Ngam ajian tán yù tádday nga Parisio nga mangngágan ta Gamaliel, nga mangituddu ta tunung na Kudio, á aggina yù pakimorayán na ngámin nga tatolay. Á gimikkáng si Gamaliel, á pinalawán na lábbì ta manganánnuán yù ira minángngilayalayâ.

<sup>35</sup> Á kabaliid da namalawán nira, kinagi ni Gamaliel sù ira kábulun na nga minámmaguray, "Wáwwagi, nga ginaká ni Israel, magimuguk ittam, á nononopat tam ta napiá yù akkuát tam karanniauw nga tatolay.

<sup>36</sup> Ta manonò ku yù ngaw Teras, nga nappeddaráyaw, á mággè appátagatù yù ira siminuttul kuna. Ngam napapátay si Teras, á newarawarâ ngámin yù ira nga siminuttul kuna, á awán ta nabbalinád da.

<sup>37</sup> Á siminubbâ yù ngaw Kudas nga taga Galilia, nga jimittál sù pangilistá nayù ira mammaguray sù ira ngámin nga tatolay ta áppatulán. Á aru gapay yù ira tatolay nga pinatuttul na ta baggi na. Ngam natay gapay si Kudas, á newarawarâ gapay yù ira siminuttul kuna.

<sup>38</sup> "Á yáyù nga kagiak ku nikayu, wáwwagi, ta paguráyat tam lábbì yù ira minángngilayalayâ. Arát tam ira akkuán, tanu tolay yù paggapuán nayù ituddu ra, á mattukkâ sangaw, á yáyù áddé na.

<sup>39</sup> Ngam nu si Namarò yù paggapuán na, ari ittam makatubáng. Paguráyat tam ira laguk, maraké matákál tam sangaw ta si Namarò galâ yù pakikontarát tam," kun ni Gamaliel nira. Á gininná ra yù kinagi na.

<sup>40</sup> Á kabalín na nanabarang ni Gamaliel sù ira kábulun na, inipágál da yù ira minángngilayalayâ. Á nipabaddú da ira, mássiki nu awán ta liwâ da. Á inipugik da má nira yù pangituddu ra ta meyannung kâ Apu Kesu. Á pinalubbáng da ira.

<sup>41</sup> Á nánaw laguk yù ira minángngilayalayâ ta ámmanunnután. Á nagayáyâ ira gapu ta ammu ra ta inikatalà ni Namarò nira yù pangituddu ra sù bilin na ánná yù pangiyangngâ da ta panigirigá nayù ira tatolay nira megapu sù panguruk da kâ Apu Kesu.

<sup>42</sup> Á kággággaw, minay ira sù mangilin nga kapilliá ánná ta gibbalayán nayù ira tatolay, tapè ituddu ra ánná ilayalayâ da ta si Apu Kesu yù MakKirstu nga sinullà ni Namarò ta mammaguray ta dabbuno.

## 6

*Panullà da ta Pitu nga Lálláki nga Mangabbák*

<sup>1</sup> Á ta kággággaw, nalannapán yù ira manguruk kâ Apu Kesu. Á yù ira Kudio nga naggapu ta arayyu, nga Gareko yù ággubobuk da, netádday ira sù ira Kudio nga taga Jerusalem, nga magubobuk ta Kebru. Á ta pangisinek nayù ira minángngilayalayâ ta máwák nayù ira tatolay, naddagaragim yù ira Kudio nga Gareko yù ággubobuk da, gapu ta nakúráng yù neywâ sù ira kábulud da nga bábbay nga bálu.

<sup>2</sup> Á pakarámak nayù ira mapulu duá nga minángngilayalayâ, pinaggagammung da yù ira manguruk, á kinagi ra nira, "Arám mi nakuan iginná yù pangilayalayâ mi ta bilin ni Namarò, tapè matángngák mi lâ yù pangisinek mi ta pakkatole naw.

<sup>3</sup> Wáwwagi, mappíli kayu laguk ta pitu nikayu nga lálláki nga pangikatalakán, nga tumulù sù Mangilin nga Ikararuá ánnna napiá yù nonò da, tapè aggira yù mangisinek ta máwák na tolay.

<sup>4</sup> Ngam sikami, tángngagam mi galâ yù ipakimállà mi kâ Apu ánnna yù pangilayalayâ mi sù bilin ni Namarò,” kud da.

<sup>5</sup> Á nagayáyâ yù ira magaru nga manguruk megapu sù kinagi ra. Á danniaw ira yù piníli ra: si Esteban, nga mapasigaggâ yù ángnguruk na kâ Apu Kesu ánnna tumulù sù Mangilin nga Ikararuá. Á si Pilippi, si Porokoro, si Nikanor, si Timon, si Parmenas, á si Nikolas nga taga Antokia nga nakKudiongin.

<sup>6</sup> Á iniyarubáng da ira sù ira mapulu duá nga minángngilayalayâ, tapè ipakimállà da ira kâ Namarò. Á ta pakimállà nayù ira minángngilayalayâ, inipotud da yù limá ra ta ulu nayù ira katággitádday nga napíli, nga panákkilalán ta aggira yù ira natullà nga manaron ánnna mangisinek ta máwák na tolay.

<sup>7</sup> Á yáyù nga nassamâ yù bilin ni Namarò. Á nalannapán ta aru yù ira manguruk ta ili na Jerusalem. Á nanguruk gapay kâ Apu Kesu yù aru nga pári ira nga Kudio.

#### *Yù Paggápù da kâ Esteban*

<sup>8</sup> Á si Esteban, aru yù ira pinagaddátu na nga makapállà ta arubáng nayù ira tatolay ta Jerusalem megapu sù allà ni Namarò kuna, ta iniyawâ ni Namarò kuna yù ámmagaddátu na.

<sup>9</sup> Ngam ajjan gapay ta Jerusalem yù ira Kudio nga makkakábulun ta ággagammungán nga mangngágan ta Kapilliá nayù ira Napalubbáng, nga taga Sirene ánnna taga Alekandria. Á ajjan gapay yù ira nga taga Silisia ánnna taga Asia. Á nattatádday ira nga minay nakikontará kâ Esteban, ánnna naríri ira ta ubobuk na.

<sup>10</sup> Ngam arád da náppù, gapu ta napiá yù itabbák ni Esteban megapu sù pangabbák nayù Mangilin nga Ikararuá kuna.

<sup>11</sup> Á yáyù nga inagálad yù ira lálláki nga sináddanád da ta kuártu, tapè massiri ira ta meyannung kâ Esteban. Á kinagi nayù ira massiri, “Naginná mi yù pakkagi ni Esteban ta narákè nga meyannung ta yù ngaw Moyses ánnna si Namarò,” kud da.

<sup>12</sup> Á yù ira massirisiri, pinappatapátu ra yù ira kárúán nga tatolay, ánnna yù ira giriámán na Kudio, ánnna yù ira mesturu nga mangituddu ta tunung ni Moyses. Á inikáddagâ da lâ ginápù si Esteban, á iniyángé ra sù ira minámmununni.

<sup>13</sup> Á minay yù ira nga sináddanád da ta kuártu, á nanáddak ira ta arubáng nayù ira minámmununni, tapè massistigu ira. Ngam massiri ira, á kinagi ra, “Yawe tolay, arán na tukkatan yù narákè nga kagian na nga meyannung sawe mangilin nga kapilliá ánnna yù tunung ni Moyses.

<sup>14</sup> Naginná mi yù kinagi na, nga umay sangaw si Kesu nga taga Nasaret, á darálan na yawe kapilliá, á patalián na yù kustombare tam nga inituddu ni Moyses sù ira naggaká nittam,” kud da.

<sup>15</sup> Á yù ira minámmaguray nga nagitubang ta ámmanunnután, pakaginná ra sù kinagi nayù ira massiri, inimámmatád da si Esteban, á nasingad da yù mammang na nga maddalingárang ta kun na mammang nayù daroban ni Namarò nga naggapu ta lángi.

## 7

#### *Yù Initabbák ni Esteban sù ira Massiri nga Nangikeká kuna*

<sup>1</sup> Á yù kotunán na pári, pakaginná na ta pangikeká ra kâ Esteban, iniyabbû na kâ Esteban, “Kuruk panò yù ipangikeká ra nikaw?”

<sup>2</sup> Á simibbák ni Esteban, á kinagi na nira, “Wáwwagi ámma giriámán, nononopan naw bi yù kingnguá ni Namarò megapu nittam nga Kudio. Ta góri, piníli ni Namarò si Kákay Abrakam, nga yù ngaw naggaká nittam. Á paggián ni Abrakam paga ta Mesopotamia, nga ari paga minay nakipaggián ta Karan, nappasingan si Namarò kuna nga maddalingárang.

<sup>3</sup> Á kinagi ni Namarò kuna, ‘Panawám mu yù ira kanakanáyum mu ámma yù lugár nga paggianám mu, á umay ka sù gián nga ipasingak ku nikaw sangaw.’\*

<sup>4</sup> Á nánav laguk di Kákay Abrakam ta paggianád da sù ira kagittá ra nga taga Kaldia, á minay ira naggián ta dabbun na Karan.

“Á keggá ri Kákay Abrakam paga ta Karan, natay si ammò na. Á iniyángé na ira laguk ni Namarò sawe dabbun nga paggianát tam.

\* <sup>7:3</sup> Genesis 12:1

5 Á arán na iniyawâ kâ Abrakam yawe dabbun, mássiki nu baddì lâ. Ngam initabbá ni Namarò ta iyawâ na yù dabbun noka kári Abrakam áンna yù ira ginaká na. Á ta pangitabbá ni Namarò kuna, awán paga ta anâ ni Kákay Abrakam.

6 Á kinagi ni Namarò gapay kuna, 'Yù ira ginakám, umay ira noka makipaggián ta tanakuán nga dabbun. Á yù ira pakipaggianád da, aripanad da ira áンna jigirigátad da ira ta appáttagatú nga ragun.

7 Ngam nu napasángin yù paggiád da túrin, panunnuták ku yù ira mangaripan nira. Á megapu sù panigirigá ku sù ira mangaripan, palubbángak ku yù ira ginakám, á ipánó ira tapè umay ira makimoray nikán sawe dabbun,' kun ni Namarò kâ Kákay Abrakam."

8 Á kinagi ni Esteban paga, "Á pangitabbá ni Namarò kári Kákay Abrakam áンna yù ira ginaká na, inipakugì ni Namarò yù ira ánâ da nga lálláki ta panaddamád da ta pattarátu na nira. Á yáyù nga kinugi ni Abrakam si Isak nga anâ na sù mekawalu nga ággo nayù abbing, gapu ta yáyù kinagi ni Namarò kuna. Á kunnian gapay yù kingnguá ni Isak, ta kinugì na si Akup nga anâ na. Á kunnian gapay yù kingnguá ni Akup, ta kinugì na gapay yù ira mapulu duá nga ánâ na nga lálláki nga naggaká nittam.

9 "Á yù ira ánâ ni Kákay Akup nga naggaká nittam, napassil ira kâ Kusè nga uriád da. Á iniláku ra si Kusè sù ira mangaripan kuna ta arayyu nga lugár na Egípto. Ngam nepulù si Namarò kâ Kusè.

10 Á inabbágán ni Namarò, á yáyù nga napiá lâ yù pabbalinán na ngámin nga jigâ ni Kusè. Á iniyawâ ni Namarò kuna yù napiá nga nonò na áンna inipakámmu na kuna yù mappilí ta napiá. Á ta keyarubáng ni Kusè kâ Paro nga patul ta Egípto, nagayáyá si Paro kuna, á sinullà na ta gubinador, áンna pine na ta magmaguray ta ngámin nga áppatulán na, áンna inipataron na gapay kuna yù ngámin ira kábbale na ta palásiu na.

11 "Á pammagure na ngaw ni Kusè ta Egípto, jmittál yù bisin ta ngámin nga lugár na Egípto áンna yù lugár na Kenan. Á narigirigá ngámin yù ira tatolay. Á di Kákay Akup áンna yù ira ánâ na nga naggaká nittam, awán ta málezek da nga kanad da.

12 Ngam ta pakarámak ni Kákay Akup ta eggá kanan ta Egípto, jinok na yù ira ánâ na ta umay ira mangâ ta kanad da. Yáyù lâ paga yù olu nga ánge re ta Egípto.

13 "Á ta mekarúá nga ánge nayù ira wáwwagi ni Kusè ta Egípto, inipakánnámmu ni Kusè yù baggi na nira. Á inipakánnámmu na gapay kâ Paro yù ira kanakanáyun na.

14 Á inipágál ni Kusè di Kákay Akup nga ammò na áンna ngámin nga kanakanáyun na ta umay ira ta Egípto. Pitupulu límánga tatolay yù ira ngámin.

15 Á yáyù nga minay di Akup ta Egípto, á naggián ira ta Egípto ta áddè ta pate ra. Ta Egípto yù natayád di Kákay Akup áンna yù ira ngámin nga ánâ na nga naggaká nittam.

16 Ngam nelabbé yù baggi ra ta Sekem nga naggianád da ngaw di Kákay Akup, á netanam ira ta Sekem sù ángngitanamán nga ginátáng na ngaw ni Kákay Abrakam sù ira ánâ ni Amor.

17 "Á mággè nga jmittál yù ággaw nga sinullà ni Namarò nga pamapáno na nira ta Egípto, tapè ipetoli na ira sawe lugár tam ta kunnay sù initabbá na ngaw kâ Abrakam. Á gapu ta nabayák iren nga naggián túrin ta lugár na Egípto, minaru yù ira tatolay.

18 Á napatalián yù patul ta Egípto ta tanakuán nga patul, nga arán na ammu yù napiá nga kingnguá nayù ngaw Kusè.

19 Á arán na inikállà yù ngaw ira naggaká nittam. Inilogò na ira. Á pinuersá na ira ta tájjiád da yù ira ánâ da, tapè matay ira.

20 "Á tán nga ággaw ngaw yù keyanâ ni Moyses. Á napiá nga abbing, á ayatán si Namarò kuna. Á inituttù di innò na áンna sinaronád da ta tallu nga bulán sù bale ra.

21 Á nu awánin ta awayyá ra nga mangituttù, napuersá ira nga nangipay ta lawán. Á nález nayù babay nga anâ nayù patul, á jimmà na, nga pinataganatán na ta kun na anâ na.

22 "Á naggigiámmu si Moyses ta ngámin nga ituddu nayù ira Egípto, á napiá áンna makáwayyá yù ággubú-ubobuk na áンna napiá ngámin yù akkuán na.

23 Á nu appátapulu yù dagun ni Moyses, nanonò na ta en na tullúnán yù ira kuruk nga wáwwagi na nga ginaká ni Israel.

24 Á naratang na yù tádday nga jigirigátan nayù Egípto. Á en na iniyígù yù kagittá na, á pinapáte na yù Egípto.

25 Ta kagian ni Moyses ta kánnámmuán nayù ira kanakanáyun na ta aggina yù jinok ni Namarò ta mama lubbáng nira sù ira mangaripan nira. Ngam arád da nánnámmuán.

26 “Á sù tádday ággaw, naratang na yù duá nga ginaká ni Israel nga maddamá, á gimmá na ira. ‘Wáwwagi,’ kun ni Moyses nira, ‘anni ipaddamá naw, ta mawwagi kayu gemma?’ kun na.

27 Á yù tolay nga iddâ na lâ nakiramá, inirubbâ na si Moyses, á kinagi na, ‘Asinni panò naddok nikaw ta mammaguray ánnna mamanunñu nikami?

28 Ipárik mà sù Egipto nga pinapátem kagabi?’ kun na.

29 Á pakaginná ni Moyses sù kinagi na, naganássing, ta ammu na ta neparámak yù pamapáte na sù Egipto. Á nattálaw, á minay nakipaggíán ta dabbun na Midian. Paggíán na tán, nangatáwa. Á tán nga lugár yù neyanakán nayù ira duá nga ánâ na nga lálláki.

30 “Á naggián si Moyses ta Midian ta nabayák. Á pappasá na appátapulu ta dagun, ta panaron na ta ayám ta kalállammatán nga aranni ta puddul na Saynay, nappasingan si Namarò kuna, ta limituák yù daroban na ta api sù alinnâ nga káyú nga maggatang nga ari makán na api.

31 Á napállâ si Moyses ta pakasingan na sù káyú nga naggatang, á jimikkì kuna, tapè imámmatán na ta napiá. Á naginná na yù ngárál ni Apu Namarò nga naggapu ta api, á kinagi ni Apu,

32 ‘Síkán si Namarò, nga Yápu nayù ira naggaká nikaw, nga Yápu di Abrakam kári Isak ká Akup.’ Á pakaginná ni Moyses, namippippik nga ari makeyangngà nga maningen.

33 Á kinagi ni Apu kuna, ‘Iriám mu yù sapátù mu, ta mangilin yù dabbun nga nanáddagám mu.’

34 Á kabalin ni Moyses nangari ta sapátù na, á kinagi ni Apu kuna, ‘Masingak ku gemma yù karigirigâ nayù ira tatolé túrin ta Egipto, á maginná yù paggaráyad da. Á yáyù nga minulugakin, tapè iyígù ku ira. Arà! Umay ken laguk, ta dobat taka ta umay ka túrin ta Egipto,’ kun ni Namarò kuna.

35 “Wáwwagi,” kun ni Esteban paga, “ta keggá ra ngaw nayù ira naggaká nittam ta Egipto, nanakitád da si Moyses. Ta kinagi ra ngaw kuna, ‘Asinni panò naddok nikaw ta mammaguray ánnna mamanunñu nikami?’ Á si Moyses, aggina yù jinok ni Namarò nga mangiyígù ánnna mammaguray nira, á inabbágán ni Namarò megapu sù daroban na nga nasingan ni Moyses sù káyú nga naggatang.

36 Á si Moyses yù nangitulò sù ira naggaká nittam ta páno ra ta Egipto, á aru yù pinagaddátu na nga makapállâ ta keggá ra paga ta Egipto, ánnna pallakák da nga umay ta dammáng nayù bebay nga mangngágan ta Ujjojjin, ánnna keggá ra gapay ta kalállammatán ta appátapulu nga dagun.

37 “Á si Moyses yù nakkagi sù ira ngaw ginaká ni Israel, nga kun na, ‘Si Namarò, doban na noka nikayu yù ábbilinán na ta kunnay ta paddok na nikán, nga naggapu sù ira ginaká naw,’ kun na.

38 Á paggagammung nayù ira naggaká nittam ta kalállammatán, si Moyses yù kobobuk nayù daroban ni Namarò ta puddul na Saynay. Á si Moyses yù neddán sù bilin ni Namarò nga netúrâ, nga paggapaná nayù ákkatole na tolay ta áddè ta áddè, tapè aggina yù mangiyawâ nittam.

39 Ngam yù ngaw ira naggaká nittam, nanakì ira nga manguruk kâ Moyses, á inipuerá ra, ta ikáyâ da manoli ta Egipto.

40 “Á nakiubobuk yù ira tatolay kâ Aron, nga wagi ni Moyses ánnna yù olu nga pári na Kudio, á kinagi ra kuna, ‘Mappadday ka laguk sù ira didios tam nga mangipulù nittam, tapè tuttulat tam ira, ta arát tam ammu yù nesimmu kâ Moyses nga nangituluk nittam ta páno tam ta Egipto,’ kud da.

41 Á pidde ra laguk yù sináddios nga kun na kígaw nga báka, nga kinagi ra ta yápu ra, á pinárti ra yù ira ayám da nga iniyátang da kuna. Á nabbúyá ira gapu ta pagayáyâ da sù pidde ra.

42 “Á yáyù nga naporay si Namarò nira, á nilikuránán na ira. Á pinaguráyán na ira, tapè maguru-uray ira lâ nga makimoray sù ira bituan ta lángì. Á kingnguá ra ta kunnay ta netúrâ sù libru nayù ira ábbilinán ni Namarò, nga kunniaw:

‘Sikayu nga ginaká ni Israel, ngattá, ta ari sikán yù nangiyátangán naw sù ira ayám naw, ta pangiyátang naw ta kalállammatán ta appátapulu ta dagun?

43 Ari sikán yù nakimorayán naw, nu ari galâ yù ira sináddios! Inakkâ naw nga inipulupulù yù paggianán nayù sináddios nga mangngágan ta Molok ánnna yù sináddios nga pidde naw ta kun na bituan, nga mangngágan ta Repan.

Aggira yù ira sináddios nga pidde naw nga pakimorayán naw, á namalittúkak kayu nira! Á yáyù liwâ naw, nga gapu na nga papanáwat takayu ta dabbun naw, á mánaw kayu nga umay túrin ta abbák na dabbun na Babilonia, á marigirigâ kayu tán.<sup>†</sup>

<sup>44</sup> “Wáwwagi,” kun ni Esteban, “ta keggá nayù ira ngaw naggaká nittam ta kalállamatán, eggá nira yù balay nga ákkimorayád da kâ Namarò, ta naggián si Namarò nira. Á pidde ra ta bale na yù gámì áんな tabbì na ayám, ta kunnay sù inipasingan ni Namarò kâ Moyses.

<sup>45</sup> Á littáng da yù balay ni Namarò sù ira ginaká ra. Á ta pate ni Moyses, si Josiuwa yù tali na. Á inipulù da yù bale ni Namarò nira ta áddé ngaw tallung di Josiuwa sawe dabbun nga initabbá ni Namarò nittam. Á naratang da yù ira olu nga naggián saw, ngam pinapáno na nira ni Namarò, á iniyawá na yù dabbud da sù ira ngaw naggaká nittam. Á naggián lâ paga yù bale ni Namarò sù ira naggaká nittam ta áddè ta pammagure na ngaw ni Patul Dabid.

<sup>46</sup> “Á ta keggá na ngaw ni Patul Dabid, ayatán si Namarò kuna. Á iníkomá ni Patul Dabid kâ Namarò ta ipapadde na kuna yù bale na, nga pakimorayán nayù ginaká ni Akup sù Yápu ra.

<sup>47</sup> Ngam arán na inanugù. Á si Patul Solomon, nga anâ ni Patul Dabid, aggina yù namadday ta bale ni Namarò.

<sup>48</sup> “Ngam si Apu Namarò, ari gemma maggián ta balay nga pidde na tolay. Ta netúrâ yù ubobuk ni Apu Namarò, nga kinagi nayù ábbilinán na, nga kunniauw:

<sup>49</sup> ‘Yù lángì, kunnay lâ ta pagitubangák ku. Á yù dabbuno, kunnay lâ ta pangipotunák ku ta takkí.

Egga panò yù paddayan naw nga paggianák ku? Awán!

Egga panò yù paddayan naw nga pagibannagák ku? Awán!

<sup>50</sup> Ta sikán galâ yù nappadday ta lángì áんな dabbuno, áんな ngámin nga eggá nira,\* kun ni Namarò.”

<sup>51</sup> Á kinagi na laguk ni Esteban sù ira minámmunnù áんな yù ira tatolay, “Sikayu, anningillá yù kataggâ na ulu naw! Narákè yù nonô naw áんな kitul kayu, á arán naw tángngagan yù bilin ni Namarò. Naggigittá kayu sù ira ngaw naggaká nittam, ta makikontará kayu payap sù Mangilin nga Ikararuá.

<sup>52</sup> Egga panò yù tádday sù ira ngaw ábbilinán ni Namarò nga arád da jinigirigâ? Awán! Pinapáte ra yù ira ngámin ngaw nga nangilayalayâ ta umay ta dabbuno yù napiá nga Masserbi kâ Apu Namarò, nga MakKiristu. Á labbè na, sináttájjíán naw áんな pinapáte naw.

<sup>53</sup> Á sikayu yù iniddán nayù ira daroban ni Namarò ta tunung na. Ngam ari kayu manguruk!” Yáyù áddè nayù kinagi ni Esteban.

### *Yù Pate ni Esteban*

<sup>54</sup> Á pakaginná nayù ira minámmunnù sù kinagi ni Esteban, naporay ira, á nangngarangaringí ira megapu sù nepallà nga pore ra.

<sup>55</sup> Ngam si Esteban, aijan nga nepulù kuna yù Mangilin nga Ikararuá, nga mangabbák kuna. Á sináguk ni Esteban yù lángì, á nasingan na yù dalingáráng ni Namarò áんな si Apu Kesu nga makáwayá nga manáddak ta jiwanán ni Namarò.

<sup>56</sup> Á kinagi ni Esteban, “Innan nawé! Nabukatán yù lángì, á masingak ku yù Kaká na Ngámin na Tatolay nga manáddak ta jiwanán ni Apu Namarò,” kun na.

<sup>57</sup> Á pakaginná nayù ira tatolay sù kinagi ni Esteban, lippà da laguk yù talingá ra, áんな nagaggay ira ta pore ra kâ Esteban. Á gikarakarerán ira nga minay naggápù kuna.

<sup>58</sup> Á pinalawád da ta ili, á pinayapayáng da ta batu. Á yù ira nga namayáng kuna, iniriád da yù barawási ra nga inipatarod da sù bagitolay nga mangngágan ta Saulo.

<sup>59</sup> Á pamayáng da kâ Esteban, nakimállà si Esteban kâ Apu, á kinagi na, “Apu Kesu, paddulotam mà,” kun na.

<sup>60</sup> Á namalittúkak, áんな iniyássikan na yù ngárál na, á kinagi na, “Apu, arám mu lâ ibiláng nga liwâ da yawe akkuád da nikán,” kun na. Á yáyù lâ áddè na kinagi na, á natayin.

### *Yù Pawwarawarâ nayù ira Manguruk*

<sup>1</sup> Á si Saulo, inanugù na yù pamapáte ra kâ Esteban, ta aggina yù manangngal ta barawási nayù ira namayáng kuna. Á sù ággó na pamapáte ra kâ Esteban, yáyù pamegapu ra manigirigâ sù ira ngámin nga manguruk kâ Apu Kesu nga naggián ta Jerusalem. Á

nawwarawarâ yù ira manguruk ta purubinsia na Judiya áんな Samaria. Ngam yù ira mapulu duá nga minángngilayalayâ nga sinuddúan ni Apu Kesu, naggián ira ta Jerusalem.

<sup>2</sup> Á ajjan yù ira tatolay nga napasigaggâ yù ángnguruk da kâ Apu, á pakarámak da ta pate ni Esteban, kinulukletád da, á inâ da yù baggi na, á ed da initanam.

<sup>3</sup> Ngam si Saulo, jinigirigâ na ira ngámin nga manguruk kâ Apu Kesu. Simillung ta katágítádday nga bale ra, á inipagápù na yù ira nga lálláki áんな bábbay, á inipabáluk na ira.

*Yù Pangilayalayâ da sù Bilin ni Namarò ta Samaria*

<sup>4</sup> Á yù ira manguruk nga nawwarawarâ ta arayyu nga lugár, minay ira nga nangilayalayâ sù bilin nga meyannung kâ Apu Kesu.

<sup>5</sup> Si Pilippi yù tádday. Á páno ni Pilippi ta Jerusalem, minay ta ili sù purubinsia na Samaria, á inilayalayâ na nira si Apu Kesu Kíristu.

<sup>6</sup> Á ngámin yù ira tatolay, sinángngák da ta napiá yù kinagi ni Pilippi áんな yù nasingad da nga pinagaddátu na.

<sup>7</sup> Á aru yù ira anitu nga pinapáno ni Pilippi, nga nakkalli ta nasikan ta páno ra sù ira nagunagád da. Á aru gapay ira nga tatolay nga natay baggi ra áんな yù ira pilay gapay nga pinammapíá ni Pilippi.

<sup>8</sup> Á yáyù nga magayáyâ yù ira ngámin nga tatolay ta ili.

<sup>9</sup> Á naggián gapay ta ili yù laláki nga mangngágán ta Simon, nga minágganánitu nga mamappállâ sù ira tatolay ta Samaria sù angnga-angnguá na nga májik. Mappeddaráyw, á kinagi na nira ta aggina yù makáwayyá.

<sup>10</sup> Á ngámin ira nga maríku áんな pobare, sinángngák da si Simon ta napiá. Á kud da, “Ajjan támma kuna yù pakapangnguá ni Namarò nga mamagaddátu,” kud da.

<sup>11</sup> Á sinángngák da ta napiá, gapu ta nabayágín nga minássalamangkâ ta arubáng da, á napállâ ira.

<sup>12</sup> Ngam ta panguruk da sù napiá nga dámak nga kinagi ni Pilippi nga meyannung sù pammagure ni Namarò áんな yù pakáwayyá ni Apu Kesu Kíristu, nakirigû ira laguk, aggira nga lálláki áんな bábbay.

<sup>13</sup> Á mássiki si Simon, nanguruk gapay áんな nakirigû. Á nepulupulù kâ Pilippi. Á napállâ si Simon, nga nepallà yù kapállâ na ta pakasingan na ta aru nga pinagaddátu ni Pilippi.

<sup>14</sup> Á yù ira minángngilayalayâ nga naggián ta Jerusalem, pakarámak da ta manguruk yù ira tatolay ta Samaria ta bilin ni Namarò, jinok da di Eduru kâ Kuan ta umay nira.

<sup>15</sup> Á tappi di Eduru ta Samaria, nakimállâ ira kâ Namarò ta ipepulù na sù ira bagu nga manguruk yù Mangilin nga Ikararuá.

<sup>16</sup> Ta arán ni Namarò paga jinok yù Mangilin nga Ikararuá ta umay nira, ngam narigû ira lâ nga netádday kâ Apu Kesu.

<sup>17</sup> Á di Eduru, sinámmi da ira, á jimittál nga naggián nira yù Mangilin nga Ikararuá.

<sup>18</sup> Á nasingan ni Simon ta minay naggián sù ira manguruk yù Mangilin nga Ikararuá ta panámmi di Eduru nira. Á en na laguk iniyalawâ kâ Eduru yù kuártu,

<sup>19</sup> ta kinagi na kuna, “Iddám mà gapay ta pakáwayyá nga kunnay sù pakáwayyám, tapè umay yù Mangilin nga Ikararuá nga maggián sù ira ngámin nga támmitak ku gapay,” kun na.

<sup>20</sup> Á kinagi ni Eduru kuna, “Mokum ka áんな yù kuártum, nu kagiam mu ta magátáng yù iyawâ na lâ ni Namarò ta ikáyâ na nga pangiyawatán!

<sup>21</sup> Ari ka meballay karanniaue nga akkuám mi, gapu ta ari pareku nga napiá yù nonò mu ta ánningánan ni Apu Namarò.

<sup>22</sup> Ibábwim laguk yù narákè nga nonò mu, á makimállâ ka kâ Apu ta abernu pakomán na ka ta narákè nga nononotam mu.

<sup>23</sup> Matákál ku ta nepallà yù passil mu, áんな ari ka paga napalubbáng ta passerbim ta narákè nga karagatám mu,” kun ni Eduru kuna.

<sup>24</sup> Á simibbák si Simon, á kinagi na, “Ipakimállâ mà bì kâ Apu ta ari bulubugá mesimmu nikán yù kinagim.”

<sup>25</sup> Á kabalid di Eduru nangilayalayâ sù bilin ni Namarò tán, nánaw ira, ta manoli ira ta Jerusalem. Á ta ánge ra, inilayalayâ da yù napiá nga dámak nga meyannung kâ Apu Kesu ta aru nga babálay nga sinalebarád da ta purubinsia na Samaria.

*Di Pilippi áんな yù Tolay nga taga Etiopia*

<sup>26</sup> Á ajjan yù daroban ni Apu Namarò nga limittuák, á kinagi na kâ Pilippi, “Umay ka ta abagátán, sù dálan nga naggapu ta Jerusalem nga mappángè túrin ta Gasa.” Á yù dálan nga kinagi na, talebarán na yù namagá nga gián ta kalállammataán.

<sup>27</sup> Á naggagannuâ si Pilippi, á nánaw. Á pakáddè na sù dálan, naratang na yù tolay nga nattakay ta kalesá nga naggapu ta Jerusalem. Aggina yù makáwayyá nga laláki nga taga Etiopia, nga minángngikárgu nga masserbi kâ Kandase nga rená nga mammaguray ta áppatulán na Etiopia. Á yù tolay yù manaron ta ngámin nga kuártu ánnna kukuá nayù rená. Á minay ta Jerusalem, tapè makimoray kâ Namarò.

<sup>28</sup> Á ta kabalin na nakimoray, nánaw ta Jerusalem, á manolingin ta Etiopia. Á pattake na ta kalesá na, bibriran na yù libru nga initúrâ na ngaw ni Isaya, nga yù ngaw ábbilinán ni Namarò.

<sup>29</sup> Á pakaratang ni Pilippi sù kalesá, kinagi nayù Mangilin nga Ikararuá kuna, “Dukki ka tâne kalesá ta mepulù ka kuna.”

<sup>30</sup> Á sinimmâ ni Pilippi yù kalesá, á mináraanni kuna. Á naginná na laguk yù tolay nga mabbibbik sù libru ni Isaya nga yù ngaw ábbilinán ni Namarò. Á iniyabbû ni Pilippi kuna, “Kânnámuámmu mu yù bibriram mu?”

<sup>31</sup> Á simibbák yù tolay, á kinagi na kâ Pilippi, “Kunnasi laguk pakánnámmù, ta awán gemma ta tolay nga mangituddu nikán?” Á inapà na si Pilippi ta mepattakay kuna. Á nappittà si Pilippi nga nepaggitubang kuna.

<sup>32</sup> Á yawe yù bilin nga binibbik nayù laláki sù libru:

“Aggina yù Meyárik ta karneru nga iyânge ra ta appártián.

Á magimammâ nga kunnay ta kigaw na karneru nu usitád da yù duddù na, ta ari bulubugá makkítuk.

<sup>33</sup> Nepasiránâ ta arubâng nayù ira tatolay, á ari kustu yù pamestigá ra kuna, ngam iddâ da lâ pinapátay nga awán ta liwâ na.

Á awán ta makkagi ta meyannung sù ira ginaká na,

ta nári ngin yù inángâ na sù dabbuno.”\*

<sup>34</sup> Kabalin na nabbibbik, iniyabbû nayù tolay kâ Pilippi, “Asinni yù ubobugan ni Isaya sawe túrâ na? Kagian na panò yù meyannung ta baggi na, onu kagian na yù meyannung ta tanakuán?”

<sup>35</sup> Á yáyù nga inigapu ni Pilippi nga ibukalán na yù binibbik na nga kinagi ni Isaya, á inipakánnámmu na yù napiá nga dámak nga meyannung kâ Apu Kesu.

<sup>36</sup> Á ta pallakák da ta dálan, nakáddè ira ta danum. “Innam mè yù danum!” kun nayù tolay kâ Pilippi. “Awayyâ nakuan nga marigù kunangane?” kun na.

<sup>37</sup> “Wan,” kun ni Pilippi kuna. “Máyâ nu kuruk ka nga manguruk kâ Apu Kesu,” kun na. “Wan, mangurugâ,” kun nayù tolay kâ Pilippi. “Kurugak ku ta Anâ ni Namarò si Apu Kesu Kiristu.”

<sup>38</sup> Á pinaginnâ na laguk yù kalesá na, á gimitták ira, á minay ira sù danum. Á jinigù ni Pilippi.

<sup>39</sup> Á god da nga naggapu sù danum, inakkâ nayù Ikararuá ni Apu si Pilippi. Á yù tolay, arán na má nasingan. Á nattakay yù tolay nga nánaw nga nappángè ta gián na, nga magayáyâ megapu sù panguruk na kâ Apu Kesu.

<sup>40</sup> Á si Pilippi, inikáddagâ na lâ jimittá ta ili na Asoto. Á nánaw, nga nappángè ta ili na Sesaria. Á inilayalayá na yù napiá nga dámak nga meyannung kâ Apu Kesu ta ngámin nga ili nga sinalebarán na ta áddè ta pakáddè na ta Sesaria.

## 9

### *Pabbáli ni Saulo ta Manguruk kâ Apu Kesu*

<sup>1</sup> Á si Saulo, narákè yù nonò na sù ira nga manguruk kâ Apu Kesu, á inupù na yù ánnanássing na ta papatáyan na ira. Á yáyù nga minay sù kotunán na pári,

<sup>2</sup> Á kiniddo na yù túrâ na nga iyânge na sù ira Kudio ta kapilliá ra ta ili na Damasku, tapè mepakánnámmu nira yù pakáwayyá na nga maggápù sù ira nga tumutul kâ Apu Kesu, nga lálláki ánnna bábbay, á iyânge na ira ta ábbalurán ta Jerusalem.

<sup>3</sup> Á di Saulo ánnna yù ira kábulun na, pakálâ da sù túrâ, nánaw ira laguk nga minay nga mappángè ta Damasku. Á pakáraanni ra ta ili, ikáddagâ lâ naddalingárang yù giád da megapu sù nawák nga naggapu ta lángì.

<sup>4</sup> Á dagarágâ natombá si Saulo, á naginná na yù ngárál nga nakkagi, nga kun na, “Saulo, Saulo, ngattá, ta jigirigátam mà?”

<sup>5</sup> Á kinagi ni Saulo, “Asinni ka, Apu?” Á kinagi na, “Sikán si Kesu nga jigirigátam mu.

<sup>6</sup> Ngam gumikkáng ka, á umay ka ta ili, ta makagi nikaw yù akkuám mu,” kun na kâ Saulo.

7 Á yù ira kábulun ni Saulo, nakalalang ira, ta naginná ra yù ngárál, ngam awán ta tolay nga nasingad da.

8 Á gimikkáng si Saulo, á naggimmúlák, ngam awán bulubugá ta masingan na. Á kinering da laguk nga iniyángé ra ta ili na Damasku.

9 Á ari nakasingan ta tallu nga ággaw si Saulo, ánná ari bulubugá kiminán ánná mininum.

10 Á naggián ta Damasku yù napiá nga tolay nga manguruk kâ Apu Kesu, nga mangngágán ta Ananiâ. Á nappasingan si Apu nga nagubobuk kuna, á kinagi na, "Ananiâ," kun na. "Wan, Apu, ajianâ saw," kun ni Ananiâ kuna.

11 Á kinagi ni Apu kuna, "Gumikkáng ka, ta umay ka ta kalsáda nga mangngágán ta Matunung. Á umay ka ta bale ni Juda, á kagiam mu nira ta em mu tullúnán yù tolay nga mangngágán ta Saulo nga taga Tarsu. Ajianin tán nga makimállâ nikán.

12 Á natagenà ni Saulo ta kunnay ta nappasingan kuna yù tolay nga mangngágán ta Ananiâ, nga umay nga manámmì kuna, tapè makasingan má," kun ni Apu kâ Ananiâ.

13 Á maganássing si Ananiâ kâ Saulo. Á simibbák si Ananiâ kâ Apu, á kinagi na, "Aro! Apu, aru yù ira nga mangiparámak nikán ta meyannung kâ Saulo ánná yù kingngikingnguá na naga narákè sù ira tatolem túrin ta Jerusalem.

14 Á yù ira kotunán na pári túrin ta Jerusalem, iniddád da ta pakáwayyá na ta umay saw maggápù ta ngámín ira nga mangikatalà nikaw," kun na.

15 Ngam kinagi ni Apu kuna, "Arà! E ken, ta sinullà ku si Saulo ta umay mangipakánnámmu nikán sù ira makkakerumá nga tatoley nga ari Kudio, nga abbúnan naw ta Kentil\*, ánná yù ira patul da, ánná yù ira ginaká ni Israel gapay.

16 Á ipasingak ku gapay kuna yù ngámín nga jigâ nga iyattam na megapu ta panguruk na nikán," kun ni Apu.

17 Á nánaw laguk si Ananiâ nga minay ta bale ni Juda. Tallung na ta balay, jímíkki kâ Saulo, á sinámmì na, á kinagi na, "Saulo nga wagì, si Apu Kesu yù naddok nikán ta umayá saw. Aggina yù nappasingan nikaw sù dálán nga nilakák mu sù ángem saw. Á jinok nangá ta umayá nikaw, tapè makasingan ka má, ánná umay nikaw yù Mangilin nga Ikararuá."

18 Á dagarágâ nári yù kun na sissi ta matá ni Saulo, á nakasingan mángin. Á gimikkáng, á nakirigù laguk.

19 Á minay kiminán, á nanoli yù sikan na.

### *Yù Pangilayalayâ ni Saulo ta Damasku*

Á nakipaggián bì si Saulo sù ira nga manguruk ta ili na Damasku.

20 Á dagarágâ minay sù ira ággagammungán na Kudio, tapè mangilayalayâ sù meyannung kâ Apu Kesu. "Si Apu Kesu yù kuruk nga Anâ ni Namarò," kun na.

21 Á ngámín ira nga nakaginná kuna, napállâ ira. Á nakkakká-ubobuk ira, nga kud da, "Asinni yaw, nu ari yù tolay nga nanigirigâ ngaw sù ira nga maggián ta Jerusalem, nga manguruk kâ Apu Kesu? Á anni panò yù gapu na nga minay saw, nu ari lâ ta gaputan na yù ira nga manguruk, á baluran na ira ánná iyángé ná ira sù ira kátannangán na pári na Kudio túrin ta Jerusalem," kud da.

22 Ngam pinasikan ni Namarò yù nonò ni Saulo ánná yù pakáwayyá na nga mangilayalayâ. Á inilayalayâ ni Saulo si Apu Kesu, nga MakKirstu nga kinagi nayù ira ngaw ábbilinán ni Namarò nga umay ta dabbuno nga mammaguray ánná mangiyigù ta tolay, tapè mapakomá ni Namarò ira. Á pinalalang ni Saulo yù ira Kudio nga maggián ta Damasku, megapu sù pakáwayyá nayù pangituddu na, ta awán ta itabbák da kuna.

23 Á kabalin na aru nga ággaw nga paggián ni Saulo ta Damasku, á yù ira Kudio nga ari manguruk, inigagángé ra si Saulo nga papatáyan.

24 Ngam narámak ni Saulo yù pangigágange ra kuna. Á simmisimmurád da yù áttallungán ta ili ta ággaw ánná gabi, tapè papatáyad da si Saulo nu parubán na mattálaw.

25 Ngam yù ira kákkopun ni Saulo nga manguruk kâ Apu Kesu, inipittâ da si Saulo ta unak na kuribù, á nipagukák da ta abbák na alitù na ili ta tádday nga gabi, tapè mallammang nga mánav.

### *Yù Ánge ni Saulo ta Jerusalem*

26 Á minay si Saulo ta Jerusalem, á mepattatádday nakuan sù ira manguruk kâ Apu Kesu, ngam maganássing ira kuna, ta arád da kinuruk ta aggina gapay yù siminuttul kâ Apu Kesu.

\* 9:15 Yù ira Kentil yù ngámín makkakerumá nga tatoley nga ari Kudio.

<sup>27</sup> Ngam si Bernabe, inabbágán na si Saulo, ta en na inituluk sù ira minángngilayalayâ. Á inistoriá ni Bernabe nira yù nesimmu kâ Saulo ta dálan sù ánge na ta Damasku, nga nasingan na si Apu Kesu nga nagubobuk kuna. Á kinagi na gapay ta ari naganássing si Saulo nga mangilayalayâ sù bilin ni Apu Kesu Kiristu túrin ta Damasku.

<sup>28</sup> Á yù ira tatolay nga manguruk nga naggián ta Jerusalem, pakaginná ra sù kinagi ni Bernabe, inalawâ da si Saulo, á nepulupulu nira.

<sup>29</sup> Á inilayalayâ na si Apu Kesu Kiristu ta Jerusalem gapay. Á nakiubobuk gapay nga nepappeperang sù ira Kudio nga Gareko yù ággubobuk da. Á yáyù nga gustu ra papatáyan.

<sup>30</sup> Á yù ira nga mawwawági megapu ta ángnguruk da kâ Apu Kesu, pakarámak da sù pangigagânge ra kâ Saulo, inituluk da laguk ta ili na Sesaria ta aggik na bebay. Á pinapáno ra ta umay ta ili na Tarsu.

<sup>31</sup> Á nakemammà laguk yù ira nga mawwawági ta ángnguruk da kâ Apu Kesu, nga naggián sù purubinsia ira na Judiya ánnna Galilia ánnna Samaria, ta awánin ta nakikontará nira. Á nakimorayád da si Apu Kesu nga Yápu ra. Á gapu ta pangabbák nayù Mangilin nga Ikararuá nira, nepasigaggâ yù ángnguruk da kâ Apu ánnna nalannapán ira ta aru nga manguruk.

### *Yù Ánge ni Eduru ta Lidda ánnna Joppa*

<sup>32</sup> Á nappassapassiár si Eduru nga mangituddu sù ngámin ira nga manguruk ta aru nga ili. Á simippi sù ira nga manguruk kâ Apu nga maggián ta Lidda.

<sup>33</sup> Á naratang na tán yù tolay nga mangngágán ta Aneyà. Á nagiddá ta dapan na ta walu ragunin nga matakí gapu ta kun na natay yù baggi na.

<sup>34</sup> Á kinagi ni Eduru kuna, “Aneyà, pammapián na ka ni Apu Kesu Kiristu. Gumikkáng ka, á lukutam mu yù dapam mu.” Á dagarágâ giminikkáng si Aneyà.

<sup>35</sup> Á ngámin nga tatolay nga naggián ta Lidda ánnna Siaron, nasingad da si Aneyà nga nammapiángin, á linikurád da yù dán nga sinuttulád da, á nanguruk ira gapay kâ Apu.

<sup>36</sup> Á túrin ta Joppa naggián yù babay nga manguruk kâ Apu, nga mangngágán ta Tabita. Á iningágad da ta Dorka ta ággubobuk na Gareko, á “Uttá” yù kebalinán na. Á napiá nga babay si Dorka, nga mangikállà sù ira pobare, ta sigídá inabbágán na ira.

<sup>37</sup> Á keggá ni Eduru ta ili na Lidda, iddâ na lâ natakì si Dorka, á natay. Á panigù da kuna, iniyunè da ta utun, á pineddá ra ta lágum.

<sup>38</sup> Á aranni ta ili na Joppa yù ili na Lidda. Á pakarámak nayù ira manguruk nga naggián ta Joppa ta ajjan si Eduru ta Lidda, jinok da yù duá nga lálláki nga minay nagágál kâ Eduru. Á kinagi ra kâ Eduru, “Ari ka bi mattáláttán nga umay nikamí,” kud da.

<sup>39</sup> Á pakaginná ni Eduru sù kinagi ra, naggagannuá nga nepulù nira nga minay ta Joppa. Á labbè da ta Joppa, inituluk da si Eduru ta lágum ta utun, nga nameddád da sù natay. Á yù ira bábbay nga nabálu, gikulukuletán ira nga naggugúru kâ Eduru, tapè ipasingad da kuna yù ira gámì nga pidde na ngaw ni Dorka.

<sup>40</sup> Ngam pinalawán na ira ngámin ni Eduru, á namalittúkak, á nakimállà kâ Apu. Kabalin na nakimállà, nallipay sù natay. “Tabita, gumikkáng ka,” kun ni Eduru sù natay. Á naggimmúlák yù matá na. Á pakasingan na kâ Eduru, giminikkáng.

<sup>41</sup> Á singgalán ni Eduru yù limá na ta abbágán na, á nanáddak. Á inagálán ni Eduru yù ira nga manguruk ánnna yù ira kábkulud da nga bábbay ira nga nabálu, á inipataron na nira nga natolayin.

<sup>42</sup> Á narámak nayù tangelián na Joppa. Pakaginná ra, aru ira nanguruk kâ Apu Kesu.

<sup>43</sup> Á si Eduru, nakipaggián nira ta Joppa ta nabayák sù bale ni Simon nga minámmalapà ta tabbì na ayám.

## 10

### *Di Eduru kâ Kornelio*

<sup>1</sup> Á naggián ta Sesaria yù tolay nga ari Kudio nga mangngágán ta Kornelio. Aggina yù kapitán ta magatù nga suddálu nga taga Roma nga abbúnad da ta Kampo na Italia.

<sup>2</sup> Á mássiki nu ari ira Kudio, makimoray kâ Namarò di Kornelio ánnna yù ira kábbale na. Á minángngikállà si Kornelio nga minállímù sù ira pobare nga Kudio. Á sigídá nga nakimállà si Kornelio kâ Namarò.

<sup>3</sup> Á ta pannarek na bilák ta págák, nasingan ni Kornelio yù daroban ni Namarò nga limittuák nga minay kuna. Á kinagi na, “Kornelio.”

<sup>4</sup> Á nakaddák si Kornelio, á jinúlangán na yù daroban, ta nepallà yù assing na. Á kinagi ni Kornelio laguk, “Anni yù kagiam mu nikán, Apu?” Á kinagi nayù daroban ni Namarò kuna, “Nonotan na ka ni Namarò ánná yù pakimállà mu kuna ánná yù pallimù mu sù ira pobare.

<sup>5</sup> Á dobam mu laguk ta ili na Joppa yù umay magágál sù tolay tán nga mangngágán ta Simon nga abbúnad da gapay ta Eduru.

<sup>6</sup> Makipaggián kâ Simon nga minámmalapà ta tabbi na ayám. Ajjan yù bale na ta aggik na bebay,” kun nayù daroban kâ Kornelio.

<sup>7</sup> Á páno nayù daroban ni Namarò, inagálán ni Kornelio yù duá nga lálláki nga aripan na ánná tádday nga suddálu nga masserbi kuna, nga makimoray gapay kâ Namarò.

<sup>8</sup> Á kinagi na nira ni Kornelio yù Meyannung sù daroban nga nappasingan kuna ánná ngámin yù kinagi na kuna. Á jinok na ira ta Joppa.

<sup>9</sup> Á sù tádday ággaw, nallakák ira ta dálan nga mináranni ta ili ta tangngá na ággaw. Á ajjan si Eduru ta balay. Á minunè si Eduru ta atà nga sináttatapán, tapè maguroray nga makimállà kâ Apu.

<sup>10</sup> Á manganánuán, nabisin si Eduru, á gustu na nakuan kumán, ngam ari ira paga nakalutu. Pagiddak na ta pakkákád da, ajjan yù inipasingan ni Namarò kuna nga kunnay ta nattatagenà, ngam ari gemma nakkaturuk.

<sup>11</sup> Á nasingan na nga kun na nabukatán yù lángì, ánná yù kun na dakal nga ulà nga magayáyun, nga kun na natangngalán yù appâ nga túkù na, nga mináranni kuna.

<sup>12</sup> Á ta unak na ulà ajjan yù ira makkakerumá nga ayám nga mallakák ánná makkáray ánná makkakerumá nga iráw ánná mammánù gapay.

<sup>13</sup> Á naginná ni Eduru yù ngárál nga nakkagi kuna, nga kun na, “Eduru, gumikkáng ka á pártsim mu, á kanam mu,” kun na.

<sup>14</sup> Á kinagi ni Eduru, “Molangà, Apu. Arák ku bulubugá kinán yù kanniawan mi nga Kudio, nga ipugik nayù tunung mi,” kun na.

<sup>15</sup> Á kinagi na laguk nayù ngárál, “Arám mu kanniawan yù pinakarenúán ni Namarò,” kun na.

<sup>16</sup> Á namillu yù kunniaw nga nesimmu kâ Eduru. Á kapamillu na, netoli yù ulà ta lángì.

<sup>17</sup> Á nakalalang si Eduru, á ninononò na nu anni yù kebalinán nayù nasingan na. Panononò na paga, á yù ira tallu nga lálláki nga jinok ni Kornelio, nálek da yù bale ni Simon, á simppi ira ta puertu nayù alitù na.

<sup>18</sup> Á nakkatol ira ta iyabbú da, nga kud da, “Egga saw yù tolay nga mangngágán ta Simon nga abbúnad da gapay ta Eduru?” kud da.

<sup>19</sup> Á ajjan si Eduru paga ta utun, nga mannononò paga ta nasingan na. Á kinagi nayù Mangilin nga Ikararuá kuna, “Ginnám mu, ta aijinan yù ira tallu nga tatolay, nga magalek nikaw.

<sup>20</sup> Gumikkáng ka, ta ámmuluk ka. Ari ka mabbábáng nga umay nira, mássiki ari ira Kudio, ta sikán gemma yù naddok nira,” kun na kâ Eduru.

<sup>21</sup> Á minuluk si Eduru laguk, á kinagi na nira, “Sikán yù tolay nga aleran naw. Anni yù iniyángé naw nikán?”

<sup>22</sup> Á kinagi ra, “Jinok na kami ni Kapitán Kornelio. Aggina yù kapitán na magatù nga suddálu, ánná napiá nga tolay nga makimoray kâ Namarò. Á aggina gapay yù pakimorayán nayù ira ngámin nga ikáttolem nga Kudio. Á ajjan yù daroban ni Namarò nga nakkagi kuna ta ipágál na ka ta umay ka ta bale na, tapè ginnán na yù kagiam mu kuna,” kud da kâ Eduru.

<sup>23</sup> Á pinaddulò ni Eduru ira, á inálliuk na ira. Á nagammá ira tán.

Á ta pannawák, nánañ yù ira tatolay nga naggapu kâ Kornelio, á nepulù nira si Eduru. Á nepappupulù gapay nira yù ira káruán nga taga Joppa nga mawwagi ta ángnguruk da kâ Apu Kesu.

<sup>24</sup> Á ta tádday ággaw nakáddè ira ta Sesaria. Á ajjan di Kornelio, nga nagiddak nira ta bale na. Á naggagammung gapay ta bale na yù ira kanakanáyun na ánná yù ira kákkopun na, ta inapà na ira, tapè magiddak ira gapay sù labbè ni Eduru.

<sup>25</sup> Á tappi di Eduru ta bale ni Kornelio, minay si Kornelio jiminápun nira, á namalittúkak ta arubáng ni Eduru nga makimoray kuna.

<sup>26</sup> Ngam pinagikkáng ni Eduru, á kinagi na kuna, “Gumikkáng ka, ta tolayà lâ nga kunnay nikaw gemma,” kun na kâ Kornelio.

<sup>27</sup> Á nakkaká-ubobuk ira. Á tallung da ta lárum na balay, nasingan ni Eduru ta aru yù ira tatolay nga naggagammung tán.

<sup>28</sup> Á kinagi ni Eduru laguk nira, “Ammu naw ta mepugik nikami nga Kudio yù makikábulun ta tolay nga ari Kudio, ánnna ari kami makatallung ta bale na tolay nga ari Kudio. Ngam si Namaro, inipakánnámmu na nikán ta arák kin bulubugá panakitán yù tolay, mássiki nu tanakuán yù katole na ánnna ari napakarenuán ta kunnay ta kustombare mi nga Kudio.

<sup>29</sup> Á yáyù nga aringà nabbábáng nga minay saw ta pangipágál naw nikán. Á iyabbû ku laguk nu anni yù gapu na nga inipagágál nawà?” kun ni Eduru nira.

<sup>30</sup> Á kinagi ni Kornelio kuna, “Tallu nga ággawin yù napasá ta kunniawe nga pannarek na bilák ta púgák, á naggiánà ta balè nga makimállà kâ Namaro nga kunnay ta kustombare naw. Á limittuák ta arubáng ku yù tolay nga naddalingárang yù barawási na.

<sup>31</sup> Á kinagi na nikán, ‘Kornelio, naginná ni Namaro yù pakimállà mu kuna, á kemámmatán na gapay yù pallimù mu sù ira pobare.

<sup>32</sup> Dobam mu laguk ta ili na Joppa yù umay magágál sù tolay nga mangngágán ta Simon, nga abbúnad da gapay ta Eduru. Makipaggián kâ Simon nga minámmalapâ ta tabbì na ayám. Ajjan ta bale na ta aggik na bebay,’ kun na nikán.

<sup>33</sup> Á yáyù nga daretiu laguk inipágál taka, á napiá ta minay ken. Á yáyù nga ajjan kami ngámin saw ta ánnunganán ni Apu Namaro, tapè ginnám mi ngámin yù ipakagi na nikaw,” kun ni Kornelio kuna.

#### *Yù Pangituddu ni Eduru sù ira nga ari Kudio*

<sup>34</sup> Á namegapu si Eduru nga nagubobuk, á kinagi na, “Natákál kin ta kurugán nga awán ta paddurúmán ni Namaro nga tatolay.

<sup>35</sup> Ta alawatan ni Namaro yù ira ngámin nga makimoray kuna ánnna napiá yù akka-akkuád da, maguray lá yù katole ra.

<sup>36</sup> Á ammu naw gemma ta sikami nga ginaká ni Israel yù nabbilinán ni Namaro sù napiá nga dámak nga meyannung kâ Apu Kesu Kiristu. Aggina yù Yápu tam ngámin nga Kudio ánnna ari Kudio, gapu ta aggina yù Namakkápiá ta tolay kâ Namaro.

<sup>37</sup> Á narámak naw yù nesimmu ta ngámin tangapáddabbunán na Judiya, nga namegapu ta purubinsia na Galilia ta kabalín na pangilayalayá na ngaw ni Kuan nga Minánnigù.

<sup>38</sup> Sinullà ni Namaro si Apu Kesu nga taga Nasaret, á inipepulù ni Namaro kuna yù Mangilin nga Ikararuá na. Á iniyawâ na gapay kuna yù pakáwayyá na ánnna yù ámmagaddátu na. Á napiá ngámin yù kingngikingnguá ni Apu Kesu. Minay ta ngámin nga lugár, á pinamampipiá na ngámin yù ira nga máttakí ánnna pinalubbáng na yù ira nga jinigirigâ ni Satanás ánnna yù ira nga tarepoyungan, gapu ta nepulupulù si Namaro kuna.

<sup>39</sup> Á sikami nga sinuduán na, kagiam mi ngámin yù nasingam mi nga kingnguá ni Apu Kesu ta ngámin nga babálay nayu ira Kudio sù purubinsia na Judiya ánnna yù ili na Jerusalem. Á ginápù da laguk, á pinapáte ra ta kurù.

<sup>40</sup> Ngam pinaginnanolay ni Namaro sù mekatallu nga ággaw áddè ta pate na. Á nappasin-gan nikami.

<sup>41</sup> Ari nappasingan sù ngámin nga tatolay nu ari galâ sikami nga dán nga piníli ni Namaro ta mangipakánnámmu ta kuruk ngámin yù nasingam mi nga kingnguá na ánnna yù nesimmu kuna.

“Á kabalín ni Apu Kesu naginnanolay, sikami yù nepakkákán kuna ánnna nepaginum kuna.

<sup>42</sup> Á jinok na kami ta umay kami mangilayalayá sù napiá nga dámak ta ngámin nga tatolay, ánnna ipakánnámmu mi gapay ta aggina yù sinullà ni Namaro nga mamanunnù ta ngámin nga tatolay nga námmatay ánnna matolay paga ta pagáddekan nga ággaw.

<sup>43</sup> Aggina yù ubobugan nayu ngaw ira ábbilinán ni Namaro sù dán nga netúrâ ira. Á kinagi ra ta mapakomá yù liwiliwá nayu ira ngámin nga manguruk kâ Apu Kesu, megapu sù pakáwayyá ni Apu Kesu ánnna yù kingnguá na,” kun ni Eduru kári Kornelio.

#### *Yù Pangalawâ nayu ira nga ari Kudio sù Mangilin nga Ikararuá ni Namaro*

<sup>44</sup> Á pagubobuk ni Eduru paga kári Kornelio, minay yù Mangilin nga Ikararuá sù ira ngámin nga nakaginná ta ubobuk ni Eduru.

<sup>45</sup> Á yù ira Kudio nga manguruk nga naggapu ta Joppa, nga nepappupúlù kâ Eduru, napállà ira ta pakasingad da ta iniddán na gapay ni Namaro yù ira nga ari Kudio sù Mangilin nga Ikararuá.

<sup>46</sup> Nánnámmuád da yaw gapu ta naginná ra yù pagubu-ubobuk di Kornelio ta tanakuán nga ággubobuk nga arád da ammu, ánnna maddayaráyw ira kâ Namaro.

Á kinagi na laguk ni Eduru sù ira Kudio nga nepappupúlù kuna,

47 "Danniaw ira nga tatolay, inalawâ da gapay yù Mangilin nga Ikararuá ta kunnay nittam nga Kudio. Egga panô yù mangipugik ta pakirigù da gapay sù danum?" kun ni Eduru.

48 Á yáyù nga jinok ni Eduru ira ta marigù ira, tapè ipasingad da yù pakiyápu ra kâ Apu Kesu Kiristu. Á di Kornelio, inapà da si Eduru ta maggián lábbì nira.

## 11

*Yù Pangiparámak ni Eduru sù ira Minángngilayalayá ta Jerusalem*

1 Á yù ira minángngilayalayá áんな yù ira manguruk nga naggián ta Judiya, narámak da ta nangalandâ gapay yù ira nga ari Kudio sù bilin ni Namarò.

2 Á nanoli si Eduru ta Jerusalem. Á ajian tân yù ira káruán nga Kudio nga nakkagi ta mawák nga manuppál yù ira ari Kudio sù ngámin nga tunung ni Moyses. Á nakkakákpereperang ira kâ Eduru ta ubobuk.

3 Á kinagi ra, "Ngattá, ta minay ka nepakikiruk áんな nepakkákán sù ira nga ari Kudio?"

4 Á yáyù nga inigapu ni Eduru nga inibukalán yù ngámin nga nesimmu kuna.

5 Kinagi na nira, "Sù ngaw paggiák ku ta ili na Joppa, nakimállakâ kâ Apu. Á ta pakimállâ ku, ajian yù nappasingan nikán. Nasingak ku yù nagaya-ayáyun nga kun na dakal nga ulâ nga naggapu ta lángi, á kun na natanggalán yù appâ nga túkù na. Á minay nikán.

6 Á iningak ku ta napiá, á nasingak ku ta ajian ta unak na yù ngámin ira nga ayám nga masíppâ áんな simaron, áんな iráw áんな mammánù gapay.

7 "Á paningak ku sù eggá ta ulâ, naginnâ yù ngárál nga nagubobuk nikán, á kinagi na, 'Eduru, gumíkkág ka. Pártiam mu, á kanam mu,' kun na nikán.

8 Ngam simibbágâ, á kinagi, 'Ari, Apu! Arák ku bulubugá kinán yù jikkù nga kanniawam mi, ta yáyù kustombare mi nga Kudio,' kuk ku.

9 Á yù ngárál nga naggapu ta lángi, pidduá na nagubobuk, 'Arám mu panakitán yù pinakarenúan ni Namaró,' kun nayù ngárál.

10 Á namillu nga nesimmu nikán, á nálâ ngámin ta lángi.

11 "Á kálâ nayù ulâ ta lángi, negiddán nga simippi ta balay nga paggianák ku yù ira tallu nga tolay nga naggapu ta Sesaria.

12 Á kinagi na nikán nayù Mangilin nga Ikararuá ta aringâ mabbábâng nga umay nira, mássiki nu ari ira Kudio. Á annam gapay yù ira nepulù nikán nga wáwwagi nga Kudio nga taga Joppa.

"Á tappi mi ta Sesaria, naddulò kami ta bale nayù tolay nga naddok sù ira tallu.

13 Á kinagi na nikami ta nasingan na yù daroban ni Namarò nga limittuák ta bale na. Á kinagi nayù daroban kuna, 'Dobam mu ta ili na Joppa yù umay magágál kâ Simon nga abbúnad da gapay ta Eduru.

14 Aggina yù mangipakánámu nikayu sù bilin ni Namarò, tapè meyígù kayu ngámin áんな yù ira kábbalem,' kun nayù daroban kuna.

15 "Á pagubobuk ku paga nira, minay nira yù Mangilin nga Ikararuá ta kunnay sù ánge na nittam pamegapu tam mangikatalâ.

16 Á nanonò ku yù ngaw kinagi ni Apu Kesu, nga kun na, 'Si Kuan ngaw, jinigù na kayu ta panákkilalán ta panguruk naw kâ Apu Namarò. Á danum yù inipanigù na nikayu. Ngam dumá yù ipanigù ni Namarò nikayu, ta umay sangaw nikayu yù Mangilin nga Ikararuá,' kun ni Apu Kesu.

17 Á mássiki nu ari ira Kudio, iniddán ni Namarò ira sù Mangilin nga Ikararuá nga kunnay ta pangiyawâ na nittam nga Kudio gapay, ta pamegapu tam mangikatalâ kâ Apu Kesu Kiristu. Á asinningâ panò nga maggammá kâ Namarò!" kun ni Eduru.

18 Á pakaginná nayù ira Kudio karannian, ari iren mapporay kâ Eduru, á awán ta itabbák da kuna. Ngam naddayaráyw ira galâ kâ Namarò, á kinagi ra, "Kuruk lállaguk ta iniyawâ ni Namarò gapay sù ira nga ari Kudio yù awayyá rá nga mabbabáwi ta liwiliwâ da, tapè mepattolay ira gapay kâ Namarò sù pammagurayán na ta áddè ta áddè," kud da.

*Yù ira Manguruk nga Ajian ta Ili na Antokia*

19 Á ta pamapáte ra kâ Esteban nayù ira Kudio nga ari manguruk, jinigirigâ da yù ira manguruk, á nattálaw ira nga nawwarawarâ. Á nakáddè yù ira káruán ta arayyu, áddè ta áppatulán na Pinisia áんな yù pugu na Sipro, áんな yù ili na Antokia. Á inilayalayá da yù bilin ni Namarò, ngam awán ta nangilayalayatád da, nu ari lá yù ira kagittá ra nga Kudio.

<sup>20</sup> Á aijjan yù ira manguruk kâ Apu Kesu nga taga Sipro ánnna taga Sirene, á minay ira gapay ta ili na Antokia, nga mangilayalayâ sù napiá nga dámak nga meyannung kâ Apu Kesu. Á yù ira nga ari Kudio gapay yù nangilayalayatád da.

<sup>21</sup> Á makáwayyá yù pangilayalayâ da megapu sù ángngabbák nayù Yápu tam nira. Á yáyù nga aru yù ira nga manguruk nga naggián ta ili na Antokia, á nababáwi ira, á inikatalà da si Apu Kesu.

<sup>22</sup> Á yù ira nga manguruk nga naggián ta Jerusalem, narámak da ta aru yù ira nga manguruk kâ Apu Kesu ta Antokia. Pakarámak da, jinok da si Bernabe ta Antokia.

<sup>23</sup> Á labbè ni Bernabe ta Antokia, nasingan na yù aru nga napiá nga kingnguá ni Namarò megapu ta allà na sù ira tatolay, á yáyù nga nagayáyá si Bernabe. Á sinabarangán na ira ta ipasigaggá da yù ángnguruk da kâ Apu, maguray lá yù mesimmu nira.

<sup>24</sup> Napiá nga tolay si Bernabe, nga tumulù sù Mangilin nga Ikararuá, á napasigaggá yù ángnguruk na. Á yáyù nga aru yù ira nga naggián ta Antokia nga netádday kâ Apu Kesu megapu sù pangituddu ni Bernabe.

<sup>25</sup> Á minay laguk si Bernabe ta ili na Tarsu, ta aleran na si Saulo.

<sup>26</sup> Á pakálek na kuna, iniyángé na ta Antokia. Á nepaggagammung ira sù ira nga manguruk ta tangaragun, á aru yù ira nga sinudduád da. Á danniaw ira nga manguruk kâ Apu Kesu nga naggián ta Antokia, aggira yù napolu nga abbúnan nayù ira tatolay ta Kiristiánu.

<sup>27</sup> Á keggá ri Bernabe kâ Saulo ta ili na Antokia, minay gapay tán yù ira ábbilinán ni Namarò nga naggapu ta ili na Jerusalem.

<sup>28</sup> Á yù tádday nga mangngágán ta Agabo, nanáddak ta arubáng nayù ira nga naggagam-mung, á kinagi na nira yù inipakánnámmu nayù Ikararuá ni Namarò, nga duttál yù bisin ta ngámíu nga dabbuno. Á jmittál yù bisin sù pammaguray ni Patul Kalodio ta Roma, nga kunnay ta kinagi ni Agabo.

<sup>29</sup> Á yáyù nga ninonò nayù ira nga manguruk ta mangitubbuk ira nga katággítádday ta abbák na nga meyannung ta awayyá na sù ira wáwwagi ra ta ángnguruk da kâ Apu nga maggián ta purubinsia na Judiya.

<sup>30</sup> Á jinok da laguk di Bernabe kâ Saulo ta umay mangituluk ta inilimù da sù ira giriámán nayù ira manguruk ta Jerusalem.

## 12

### *Yù Karigirigâ nayù ira Manguruk*

<sup>1</sup> Á tán nga ággaw, jinigirigâ ni Patul Erodo yù ira nga manguruk kâ Apu Kesu.

<sup>2</sup> Á inipaputul na si Ime, nga kaká ni Kuan.

<sup>3</sup> Á pakasingan na ta magayáyá yù ira Kudio megapu sù pamapáte na kâ Ime, inipagápù na gapay si Eduru. Á nesimmu yù paggápù da kâ Eduru ta keggá nayù piestá nga pakkákán nayù ira Kudio ta pán nga awán ta állappárán na.

<sup>4</sup> Á pappágápù ni Patul Erodo kâ Eduru, inipabáluk na. Á nipatangngal na ta appákapurù nga suddálu, nga taggiappâ ira, tapè mattutubbâ ira nga magguárdiá kuna. Ta ínigagángé ni Patul Erodo nga panunnután ánnna ipapapátay si Eduru ta arubáng nayù ira tatolay ta kabalín na piestá.

<sup>5</sup> Á napukù laguk si Eduru. Ngam yù ira nga mangikatalà kâ Apu Kesu, inipasikkál da yù ákkimi-imállà da kâ Namarò megapu kâ Eduru.

### *Yù Pangipáno nayù Daroban ni Namarò kâ Eduru sù Ábbalurán*

<sup>6</sup> Á ta gabi nga lage na pamestigá ni Patul kâ Eduru, nakkaturuk si Eduru nga natangngán nayù duá nga suddálu. Á nabáluk si Eduru ta duá nga káwák, ánnna aijjan gapay ta puertá na ábbalurán yù ira suddálu nga magguárdiá.

<sup>7</sup> Á inikáddagâ lâ limittuák yù daroban ni Namarò sù unak na ábbalurán, á nanawagán yù lágum. Á jimikkì yù daroban kâ Eduru, á sippâ na yù bikâ ni Eduru ta lukagan na. “Arà, gumikkáng ka,” kun na kâ Eduru. Á dagarágâ nári yù káwák ta limá na.

<sup>8</sup> Á kinagi nayù daroban kuna, “Isillong mu yù barawásim ánnna sapátù mu.” Á kinuruk ni Eduru. Á kinagi nayù daroban kuna, “Ipagulolà mu yù ulà mu, á tuttulam mà.”

<sup>9</sup> Á náaw ira laguk, á sinuttul ni Eduru yù daroban ni Namarò.

Á arán na ammu ni Eduru nu kuruk nga mesimmu kuna yù akka-akkuán nayù daroban, ta kagian na ta mattatagenà lá.

10 Á sinalebarád da yù olu nga magguárdiá áんな yù mekaruá, á nakáddè ira sù dakash ngá puertá nga balayáng, ngá áttallungán ngá mappángé te ili. Á inikáddagá na lá nabbuká yù puertá nga awán ta tolay nga namuká kuna. Á nallawán ira, á nallakák ira ta tádday ngá kalsáda. Á ikáddagá limimmá yù daroban ni Namarò, á nabattáng lá si Eduru nga maguroray sù kalsáda.

11 Á nakemmunaw laguk si Eduru, á ninonò na, ngá kun na, “Nánnámmuák kuin ta iniyígù nangà ni Apu Namarò, ta jinok na yù daroban na ta umay mangilillí nikán sù panangngal ni Patul Erodo nikán, tapè ari mesimmu nikán yù iddi-iddagán nayù ira Kudio,” kun na.

12 Á pakánnámmu ni Eduru ta kuruk ngá napalubbángin, minay laguk ta bale ni Maria ngá yená ni Kuan nga magapulidú ta Markus. Á aru yù ira manguruk ngá naggagammung tán, ngá makimi-imállá kâ Namarò megapu kuna.

13 Á pakáddè ni Eduru ta balkon na balay ta aggik na kalsáda, nattottó ta puertá. Á minay si Roda, ngá abbing ngá babay ngá masserbi, ta en na innan nu asinni yù umay ngá mattottó.

14 Á nakkatol si Eduru, ámná natákkilalán ni Roda yù ngárál na, á ayatán si Roda. Á gapu ta nepallá yù pagayáyá nayù abbing, inilingun na yù akkuán na. Arán na binukatán yù puertá, ngam nakkarerá ngá minay ta lágum, á kinagi na nira ta ajjan si Eduru sù puertá.

15 Á yù ira ngá naggagammung ta balay, kinagi ra kâ Roda, “Maguyung ka!” Ngam initaggá ni Roda ta kuruk yù kinagi na. Á kinagi ra, “Ajjan támma yù daroban ni Namarò ngá manaron kuna.”

16 Ngam naggián lá si Eduru ngá mattottó ta puertá. Á ed da laguk binukatán. Á pakasingad da kâ Eduru, napállá ira.

17 Á initáyák ni Eduru yù limá na tapè pagimammattan na ira. Á kinagi na nira yù pangipáno ni Namarò kuna sù karsel. Á kinagi na, “Kagian naw gapay kári Ime áんな yù ira káruán ngá kábulut tam ngá mangikatalá kâ Apu.” Á nánaw laguk ngá minay ta tanakuán ngá lugár.

18 Á ta pannawák, napakapakúyu yù ira suddálu ngá magguárdiá, ta maburung ira, gapu ta awán si Eduru ta karsel.

19 Á pakarámak ni Patul Erodo ta awán si Eduru, jinok na laguk yù ira suddálu na, ta umay ira magalek kuna. Ngam arád da nálek. Á yáyù ngá inipágál nayù patul yù ira magguárdiá, á binestigá na ira, á inipapapáte na ira. Á ta kabalin na, nánaw laguk si Patul Erodo ta Judiya ngá minay ta Sesaria, á naggián lá túrin.

### *Yù Pate ni Patul Erodo*

20 Á kitaporay si Patul Erodo sù ira tatolay ngá taga Tiro áんな taga Sidon, á narigá yù ággigiád da, ta yù áppatulán ni Erodo yù paggaguán na kanad da. Á yáyù ngá nattatádday yù ira ngá taga Tiro áんな taga Sidon, ta umay ira makipiá sù patul. Á minay ira ta olu ngá nakikopun kâ Balastu ngá minángngikárgu ta ngámin ta palásiu nayù patul, ta abbágán na ira, tapè makkapiá ira sù patul.

21 Á sù ággaw ngá natullá, nabbisti si Patul Erodo sù kapiánán ngá sinnun na, ngá bistí na mammaguray, á nagitubang sù mepotun ngá ággitubangán na. Á inilayalayá na yù bilin na sù ira magaru ngá tatolay ngá naggagammung tán.

22 Kabalin na nagubobuk ni Patul Erodo, nagagga-aggay yù ira tatolay, á kinagi ra, “Ari tolay yù magubobuk, nu ari galâ dios!” kud da.

23 Á dagarágá ngá minay yù daroban ni Apu Namarò, á jinigirigá na si Patul Erodo, gapu ta arán na gimmá yù paddáyo nayù ira tatolay kuna, áんな arán na jináyaw si Apu Namarò. Á sinuggi yù baggi ni Patul Erodo, á natay.

24 Á nassamá yù bilin ni Namarò sù ira tatolay, á minaru yù ira ngá manguruk.

25 Á kabalid di Bernabe kâ Saulo namalurò sù ipakuá ni Namarò nira ta Jerusalem, nánaw ira ngá nanoli ta ili na Antokia. Á nepulù nira si Kuan ngá magapulidú ta Markus.

## 13

### *Yù Panullá da kári Saulo kâ Bernabe ta Mangilayalayá*

1 Á eggá sù ira ngá manguruk ta Antokia yù ira ngá minángngilayalayá sù bilin ni Namarò áんな yù ira gapay ngá mangituddu ta kebalinán na. Aggira si Bernabe, si Simon ngá magapulidú ta Ngisi, si Lusio ngá taga Sirene, si Manen ngá nesipà ngaw kâ Patul Erodo ta kabajjìna sù bale ni ammò na, áんな si Saulo.

<sup>2</sup> Á ta tádday ággaw, naggagammung yù ira nga manguruk, nga nakimoray kâ Apu Namarò, áんな ari ira kiminán, tapè tángngagad da yù pakimállà da kâ Apu. Á ta pakimállà da, kinagi nayù Mangilin nga Ikararuá nira, "Tullatan naw di Bernabe kâ Saulo, ta ajjan yù ipakuá nira," kun na.

<sup>3</sup> Á ta kabalid da nga ari kiminán áんな nakimállà, sinámmì da yù ira duá nga sinullà da, á jinok da ira ta umay ira manuppál sù ipakuá nayù Mangilin nga Ikararuá nira.

<sup>4</sup> Á gapu ta paddok nayù Mangilin nga Ikararuá nira, náñaw laguk di Saulo kâ Bernabe nga minay ta ili na Selusia ta aggik na bebay. Á páno ra tán, nabbiray ira nga minay ta pugu na Sipro.

<sup>5</sup> Á pakáddè da ta Salami, nga dakal nga ili ta pugu na Sipro, ed da inilayalayâ yù bilin ni Namarò ta ngámin nga kapilliá na Kudio. Á nepulù nira si Kuan Markus nga mangabbák nira.

#### *Yù Nesimmu kâ Elimas nga Maganánitu*

<sup>6</sup> Á nappassapassiár di Saulo ta ngámin nga ili áんな babálay ta pugu, ta áddè ta Papo. Á pakáddè da ta Papo, naratang da yù tolay nga Kudio nga maganánitu, nga áppè ábbilinán nga ari kuruk yù kágian na. Si Baresus yù ngágán na.

<sup>7</sup> Á kopun ni Baresus si Sergio Polus nga gubinador sù pugu. Á maláppà nga mammaguray yù gubinador, á inipágál na di Bernabe kâ Saulo ta ikáyâ na gapay ginnán yù bilin ni Namarò.

<sup>8</sup> Ngam si Baresus, nga mangngágán gapay ta Elimas, nga salamangkeru yù kebalinán nayù ngágán na sù ággubobuk na Gareko, á kinontará na di Bernabe kâ Saulo, ta ikáyâ na gammán yù panguruk nayù gubinador sù bilin ni Namarò.

<sup>9</sup> Á si Saulo, nga mangngágán gapay ta Pablo, natagenà na yù pakáwayyá nayù Mangilin nga Ikararuá nga mepulù kuna, á inni-innan na ta napiá si Elimas.

<sup>10</sup> Á kinagi ni Pablo kuna, "Sikaw, anâ na ka ni Satanas, ta malussaw ka sù ngámin nga napiá. Massirisiri ka nga mangilogó. Ngattá, ta ari ka magammagammá nga mamakkillu sù ubobuk ni Namarò!

<sup>11</sup> Ginnám mu á! Pággangan naka ni Apu Namarò, á mabbuling ka, á arám mu masingan yù nawák na bilák ta aru nga ággaw," kun ni Pablo kuna. Á dagarágâ natagenà nayù salamangkeru yù kun na kallà nga angà nga nelappà sù matá na, á ari makasingan. Á nakkarakarárà nga magala-alek ta mangering kuna.

<sup>12</sup> Á pakasingan nayù gubinador sù nesimmu kâ Elimas, nanguruk kâ Apu Kesu, ta napállà sù bilin ni Namarò nga inituddu ni Pablo.

#### *Yù Pangilayalayâ ni Pablo ta Purubinsia na Pisidia*

<sup>13</sup> Á nánaw di Pablo ta Papo, á nabbiray ira nga minay ta ili na Perga sù purubinsia na Pampilia. Á pakáddè da ta Perga, nánawán na ira ni Kuan Markus, nga nanoli ta Jerusalem.

<sup>14</sup> Ngam nattalebák di Pablo ta Perga, á minay ira ta tanakuán nga Antokia sù purubinsia na Pisidia. Á ta Sabadu nga ággibannák, minay ira ta kapilliá na Kudio, á nepagitubang ira sù ira tatolay nga naggagammung tán.

<sup>15</sup> Á kabalín nayù tolay nga nabibbik sù tunung ni Moyses áんな yù netúrâ nga inituddu nayù ira kárúan nga ábbilinán ni Namarò, á jinok nayù ira giriámán yù tolay nga umay kári Pablo, á kinagi na, "Wáwwagi, nu eggá yù itabarang naw sù ira tatolay, á kagian naw," kun na.

<sup>16</sup> Á nanáddak laguk si Pablo, á initáyák na yù limá na, tapè tángngagad da. Á kinagi na, "Wáwwagi, nga ginaká ni Israel yù nappílì sù ira naggaká nikami. Á góri ta pakipaggiád da ta dabbun na Egípto, pinagaru na ira. Á nu nabayák ira ta lugár na Egípto, pinapáno na ira megapu sù pamagaddátu na.

<sup>17</sup> Si Namarò nga Yápu tam nga ginaká ni Israel yù nappílì sù ira naggaká nikami. Á góri ta pakipaggiád da ta dabbun na Egípto, pinagaru na ira. Á nu nabayák ira ta lugár na Egípto, pinapáno na ira megapu sù pamagaddátu na.

<sup>18</sup> Á inattamán ni Namarò ira, mássiki nu pinotuád da áんな ari ira nanguruk kuna ta paggiád da ta kalállamatán ta appátapulu ta dagun.

<sup>19</sup> Á inabbágán ni Namarò ira, tapè appútad da yù ira tatolay nga ari Kudio ta pitu nga áppatulán sù lugár na Kenan, á iniyawá ni Namarò yù dabbun sù ira tatole na ta kukuá ra.

<sup>20</sup> Á appátagatù ta límápulu ta dagun yù nappasá ta áddè ta labbè da ta lugár na Egípto ta áddè ta pangiyawâ ni Namarò nira sù dabbun na Kenan.

"Á pamegapu ra nga maggián ta Kenan, sinullà ni Namarò yù ira minámmanunnù nga mattutubbâ nga mammaguray nira, ta áddè ta dattál ni Samuel, nga ábbilinán ni Namarò.

21 Á keggá ni Samuel, kiniddo nayù ira tatolay kâ Namarò yù tullatan na ta patul da. Á sinullà ni Namarò si Saulo nga aná ni Kí, nga ginaká ni Benjamin. Á nammaguray si Saulo nira ta appátapulu ta dagun.

22 Á inirían na laguk ni Namarò ta patul si Saulo, á sinullà na si Dabid ta patul da. Á kinagi ni Namarò yù Meyannung kâ Dabid, nga kun na, 'Nálek ku yù napiá nga tolay nga iddukak ku, si Dabid nga aná ni Jesse nga manguruk nikán. Aggina yù ikatalà ku ta manuppál ta ngámín nga uré, kun na.

23 "Á sinullà ni Namarò yù tádday nga naggapu sù ira ginaká ni Patul Dabid ta mangiyígù nittam ngámín nga ginaká ni Israel. Aggina si Apu Kesu nga initabbá na ngaw ni Namarò sù ngaw ira naggaká nittam ta umay mangiyígù nittam.

24 Á lage na dattál ni Apu Kesu nga mangituddu, si Kuan nga Minánnig yù nangilayalayâ. Á inilayalayâ na sù ira ngámín nga ginaká ni Israel ta mabbabáwi ira ta liwiliwâ da ánná makirigú ira.

25 Á nu mággè mabalin ni Kuan yù pangilayalayâ na, kinagi na sù ira tatolay, 'Sikán panò yù mangiyígù nga iddi-iddagán naw? Ari gemma sikán, nu ari galâ yù umay sangaw. Ta aijan yù umayin nga maporián nga tumubbâ nikán, nga makáwayyá ánné nikán. Á awán kárík piá na, á yáyù nga aringà mepángngà nga mangubbák ta kaddang na sapátu na,' kun ni Kuan.

26 "Wáwwagi," kun ni Pablo, "sikayu nga ginaká ni Kákay Abrakam, ánná sikayu gapay nga ari Kudio nga makimoray kâ Namarò, iniddán ni Namarò sittam ngámín ta bilin na nga Meyannung ta keyígù tam megapu sù ketapil ni Apu Kesu.

27 Á yù ira tatolay nga maggián ta Jerusalem ánná yù ira nga kátannangád da, arád da natákkilalán ta si Apu Kesu yù mangiyígù nira, gapu ta arád da nánnámmuán yù kebalinán nayù initúrâ nayù ngaw ira ábbilinán ni Namarò, mássiki nu binibbik da ta kapilliá ra ta káda Sabadu. Ngam sinuppál da yù dán nga netúrâ ta pamagikáru ra kâ Apu Kesu.

28 Ta mássiki nu ari mepángngà yù pamagikáru ra kuna, gapu ta awán ta liwâ na, ngam iddâ da lâ kinagi kâ Pilatto ta papatáyan na ta kurù.

29 "Á kabaliid da nanuppál ta ngámín nga dán nga netúrâ nga Meyannung kuna, iniyutták da ta kurù, á initanam da. Á kuebá yù nameddád da.

30 Ngam pinaginnanole ni Namarò.

31 Á ta aru nga ággaw, name-aru nga nappasingan sù ira nga kapulupulù na ngaw sù ánge ra ta Jerusalem nga naggapu ta Galilia. Á aggira yù mangipakánnámmu nittam nga ginaká ni Israel ta naginnanolayin si Apu Kesu.

32 "Á sikami, minay kami saw, tapé ilayalayâ mi nikayu yù napiánga dámak, nga yù ngaw initabbá ni Namarò sù ira ngaw naggaká nittam.

33 Á pinalurò ni Namarò yù initabbá na nira megapu nittam nga ginaká ra, ta pinaginnanole na si Apu Kesu ta keggá tam. Yáyù kebalinán nayù mekarúá nga kansion. Netúrâ ta kansion yù kinagi ni Namarò, nga kunniai:

'Sikaw yù Anâ ku. Á ta ággawo, ipakánnámmu sù ira tatolay ta sikán yù Yámam.\*

34 Á kinagi ni Namarò gapay yù Meyannung ta pamaginnanole na kâ Apu Kesu ta pate na, nga aringin bulubugá matamatay. Yáyù nga kinagi na,

'Sikán yù mekatalà, á palurotak ku yù kunnay sù initabbá kâ Dabid megapu nikaw,'† kun ni Namaró.

35 Á netúrâ gapay sù tádday nga kansion yù initabbá ni Namarò kuna:

'Apu, arám mu anugutan yù kalabbak na ta tanam nayù baggi nayù mangilin nga masserbi nikaw,'‡ kun na.

36 "Wáwwagi," kun ni Pablo nira, "ta pammagure na ngaw ni Patul Dabid sù ira tatolay, sinuppál na yù ure ni Namarò. Á ta pate na, initanam da sù katanamán nayù ira naggaká kuna. Á nallabbak gemma yù baggi na ta tanam.

37 Ngam si Apu Kesu yù pinaginnanole ni Namarò, á ari nallabbak yù baggi na ta tanam.

38 "Wáwwagi," kun ni Pablo, "yawé yù ipakánnámmu nikayu. Gapu ta metapil si Apu Kesu megapu nittam, aijan yù awayyá tam nga makipakomá kâ Namarò ta liwiliwâ tam, ta si Apu Kesu yù nagikáru ta liwâ tam.

39 Á mássiki nu tuppalat tam yù tunung ni Moyses, ari ittam mapalubbáng ta passerbi tam sù narákè nga negagángay nittam. Ngam sittam ngámín nga mangikatalà kâ Apu Kesu, mapalubbáng ittam megapu sù pakáwayyá nayù Yápu tam.

\* 13:33 Salmo 2:7    † 13:34 Isaya 55:3    ‡ 13:35 Salmo 16:10

<sup>40</sup> Magimuguk kayu laguk, tapè ari mesimmu nikayu yù kinagi ni Namarò, nga ini-palappâ nayù ira ngaw ábbilinán na. Kinagi na:

<sup>41</sup> 'Sikayu nga ari manguruk, nga manguyaw sù bilik ku, magimuguk kayu!  
Ta keggá naw nga matolay paga, mapalurò yù akkuák ku.

Á mapállâ kayu, á matay kayu nga mesinná nikán,  
gapu ta arán naw kurugan yù akkuák ku, mássiki nu ajian yù mangibukalán nikayu ta  
napiá.' <sup>§</sup>

Yáyù áddè na pangilayalayâ ni Pablo nira.

<sup>42</sup> Á ta pano ri Pablo kâ Bernabe ta paggagammungád da, á inapà da ira nayù ira tatolay  
ta manoli ira ta táddy Sabadu nga mangibukalán má ta meyannung sù kinagi ra.

<sup>43</sup> Á ta kapapáno nayù ira tatolay ta kapilliá, aru ira nga Kudio ánnna yù ira nga nakKu-  
diongan ta meyannung sù panguruk da, nappupúlù ira kári Pablo kâ Bernabe. Á di Pablo,  
sinabarangád da ira ta ipasigaggâ da yù ángngikatalà da sù pangikállâ ni Namarò nira.

### *Yù Páno ri Pablo ta Antokia*

<sup>44</sup> Á ta táddy Sabadu, mággé tangelián yù naggagammung, nga Kudio ánnna kitáru nga ari  
Kudio, tapè magginná ira sù bilin ni Namarò.

<sup>45</sup> Ngam ta pakasingan nayù ira Kudio ta neppagagammung nira yù ira magaru nga ari  
Kudio, tapè magginná ra yù ituddu ni Pablo, á napassil yù ira Kudio. Á naríri ira sù kinagi  
ni Pablo ánnna nakkakagiád da si Pablo.

<sup>46</sup> Ngam ari maganássing di Pablo kâ Bernabe nga tubbák nira, nga kud da, "Máwák nga  
sikayu nga ginaká ni Israel yù mapolu nga makáginná sù bilin ni Namarò. Ngam gapu  
ta manaki kayu sù bilin na, yáyù nga mepasingtan ta ari kayu mesipà sù áttole ni Namarò  
nga mannanáyún. Á gapu ta linikuránán naw yù bilin ni Namarò, á likuránám mi sikayu, á  
umay kami laguk nga mangilayalayâ sù ira makkakerumá nga ari Kudio.

<sup>47</sup> Ta yáyù initaddán ni Apu Namarò nikami. Kinagi na,  
'Sikayu yù meyárik ta nawák, nga mamannawák ta nonò nayù ira makkakerumá nga ari  
Kudio.

Á dobat takayu ta umay kayu mangilayalayâ sù ira ngámin nga tatolay ta tangapáddabbunán,  
tapè ipakánnámmu naw nira ta sikán yù makáwayyá nga mangiyígù nira.' <sup>\*</sup>  
Yáyù kinagi ri Pablo.

<sup>48</sup> Á pakaginná nayù ira ari Kudio sù bilin ni Namarò, nagayáyâ ira, á jináyo ra si Namarò  
megapu sù bilin na nga kinagi ni Pablo. Á yù ira ngámin nga piníli ni Namarò ta mesipà  
kuna ánnna meddán ta áttole na nga awán ta áddè na, nanguruk ira.

<sup>49</sup> Á yáyù nya nassamâ yù bilin ni Apu Namarò ta ngámin nga lugár.

<sup>50</sup> Ngam yù ira Kudio nga ari nanguruk, pinappatapátu ra yù ira makáwayyá nga lálláki  
nga mammaguray ta ili, ánnna yù ira mariku nga bábbay nga siminuttul sù kustombare na  
Kudio, tapè jígirigádat da di Pablo kâ Bernabe, á pinapáno ra ira tán nga lugár.

<sup>51</sup> Ngam di Pablo kâ Bernabe, iniwákkâ da yù káppú sù takki ra, nga panákkilalán ta arád  
da má ilayalayâ yù bilin ni Namarò sù ira tatolay nga naggián tán, gapu ta manaki ira nga  
manguruk. Á nánaw di Pablo laguk nga minay ta ili na Ikonium.

<sup>52</sup> Ngam yù ira manguruk nga naggián ta Antokia, nagayáyâ ira lâ, ánnna nepulù nira yù  
Mangilin nga Ikararuá nga mangabbák nira.

## 14

### *Yù Pangilayalayâ di Pablo sù Ili na Ikonium*

<sup>1</sup> Á labbè di Pablo kâ Bernabe ta ili na Ikonium, minay ira nangilayalayâ gapay ta kapilliá  
nayù ira Kudio, nga kunnay sù kingnguá ra ta Antokia. Á aru yù ira nga nanguruk megapu  
ta pangilayalayâ da, nga Kudio ánnna ari Kudio gapay.

<sup>2</sup> Ngam yù ira Kudio nga ari nanguruk, pinappatapátu ra yù ira káruán nga ari Kudio,  
tapè naráké yù nonò da gapay sù ira manguruk.

<sup>3</sup> Á naggián di Pablo kâ Bernabe ta Ikonium ta nabayák, á ari ira naganássing nga  
mangilayalayâ ta meyannung kâ Apu Kesu. Á si Apu yù mangipakánnámmu ta kuruk yù  
inituddu ri Pablo nga meyannung sù allà na, gapu ta inipakuá ni Apu nira yù aru nga  
makapállâ nga pinagaddátu ra megapu sù pakáwayyá na nga iniyawâ na nira.

<sup>4</sup> Ngam yù ira tatolay ta Ikonium, nesinná ira ta nonò da. Á yù ira káruán, sinuttul  
da yù ira Kudio nga ari nanguruk. Ngam yù ira káruán, kinuruk da di Pablo nga  
minánggilayalayâ.

<sup>5</sup> Á nattatáddyay laguk yù ira ari nanguruk, nga Kudio ánná ari Kudio, ánná yù ira nga kátannangád da, á inigagángé ra nga jígirigátan di Pablo kâ Bernabe, á payangad da ira nakuan ta batu, tapè matay ira.

<sup>6</sup> Ngam pakánnámmu ri Pablo ta inigagángé ra ira, nattálaw ira laguk, nga minay ta lugár na Likonia. Á nappassapassiár ira gapay sù ira ili na Listara ánná Derbi, ánná sù ira káruán na ili nga aranni.

<sup>7</sup> Á inilayalayâ da yù napiá nga dámak nga meyannung kâ Apu Kesu sù ira ngámin nga ili.

*Yù Nesimmu kári Pablo ta Listara*

<sup>8</sup> Á ta ili na Listara, ajjan yù tolay nga pilay, nga ari bulubugá nakalakák áddè ta keyanâ na.

<sup>9</sup> Á gininniginná na yù pangilayalayâ ni Pablo. Á natagenà ni Pablo ta ajjan yù ángngikatalà nayù pilay kâ Apu Kesu ánná yù pakáwayyá ni Apu nga mamammapiá kuna. Á inni-innan ni Pablo ta napiá,

<sup>10</sup> ánná iniyássikan na yù ngárál na, á kinagi na, “Gumikkáng ka!” kun na. Á dagarágâ nga giminikkáng yù tolay, á nallakalakák.

<sup>11</sup> Á pakasingan nayù ira magaru nga tatolay sù kingnguá ni Pablo, pine ra nga nagagga-aggay ta paddáyo ra nira. Á sù ággubobuk da nga Likonia, kinagi ra, “Aggira didios nga kun na tolay, á gmitták ira nga minay nittam!” kud da. Ngam di Pablo kâ Bernabe, arád da garé kánnámmu yù kinagi ra, ta arád da ammu yù ággubobuk da.

<sup>12</sup> Á yù ira tatolay, abbúnad da di Pablo ta ngágán nayù ira didios da. Si Bernabe, abbúnad da ta Sus. Á gapu ta si Pablo yù magubobuk, abbúnad da ta Ermis.

<sup>13</sup> Á ajjan yù iglesia ni Sus, nga dios nayù ira taga Listara, sù lawán na ili. Á yù pári ni Sus, iniyángé na ta áttallungán na ili yù ira toru nga naddusáriú ta lappáw. Ta ikáyâ nayù ira pári ánná yù ira magaru nga tatolay nga mappárti sù ira toru, tapè iyátáng da ira, nga pakimore ra kári Pablo.

<sup>14</sup> Ngam di Pablo kâ Bernabe, pakánnámmu ra ta ikáyâ da nakuan iyátáng nayù ira pári ta toru megapu nira, pinisil da laguk yù barawásí ra, gapu ta kabagal da ánná daddam da sù akka-akkuán nayù ira tatolay, á nakkarakarerá ira nga nagagga-aggay sù tangngá nayù ira magaru nga tatolay.

<sup>15</sup> Á kinagi ri Pablo sù ira magaru nga tatolay, “Ngattá, ta mangiyátáng kayu ta toru megapu níkami? Tolay kami gemma nga kunnay nikayu! Minay kami saw ta kagiam mi nikayu yù napiá nga dámak, tapè likuránán naw yù ira didios naw nga awán ta inángà da, á manguruk kayu sù Dios nga matolay nga sigga-inángà. Aggina si Namarò, nga nappadday ta lángi ánná dabbuno, bebay, ánná ngámin nga naggián nira.

<sup>16</sup> Á góri, inanugù ni Namarò sù ira makkakerumá nga ari Kudio yù maguray lâ nga ikáyâ da nga akkuán.

<sup>17</sup> Ngam ta áddè ngaw, eggá yù awayyá tam nga makánnámmu ta meyannung kâ Namarò, megapu sù napiá nga akka-akkuán na. Ta káda ragun iyawâ na yù urán, tapè mabbungubungá ta napiá yù nemulá. Á aggina yù mangiyawâ nittam ta kanan, tapè mepagayáyâ ittam,” kud di Pablo sù ira tatolay.

<sup>18</sup> Á mássiki nu kunnian yù kinagi ri Pablo nira, mággè ari ira nagammá, ta gustu ra nakuan mangiyátáng ta toru nira.

<sup>19</sup> Á manganánnuán, limibbè ta Listara yù ira Kudio nga ari manguruk nga taga Antokia sù purubinsia na Pisidia, ánná taga Ikonium. Á initotobù da di Pablo sù ira tatolay ta Listara. Á pinayapayáng da si Pablo, á ginuggud da nga iniyángay ta lawán na ili, ta kagiad da ta natayin.

<sup>20</sup> Ngam yù ira manguruk kâ Apu Kesu, nagarimummungád da si Pablo, á giminikkáng laguk, á nanoli ta ili. Á sù táddyay ággaw, nánaw di Pablo kâ Bernabe, á minay ira ta ili na Derbi.

*Panoli ri Pablo ta Antokia sù Purubinsia na Siria*

<sup>21</sup> Á labbè di Pablo ta ili na Derbi, inilayalayâ da gapay tán yù napiá nga dámak. Á aru yù ira tatolay nga pinatuttul da kâ Apu Kesu. Á kabalid da nangilayalayâ ta Derbi, nánaw ira, á nanoli ira ta ili na Listara ánná Ikonium, ánná Antokia sù purubinsia na Pisidia.

<sup>22</sup> Á sinabarangád di Pablo yù ira manguruk ta pataggatad da yù nonò da, tapè mepasigaggá yù ángngikatalà da, maguray lâ yù mesimmu nira nga jigâ. Á kinagi di Pablo nira, “Máwák nga attamát tam yù aru nga jigâ nga makkakerumá, pángè tam mesipà sù pammadurayán ni Namarò,” kud da.

<sup>23</sup> Á ta katággítádday nga ili nga inangayád di Pablo, sinullà da yù ira karakalán nga ammu ra manabarang, tapè manaron ira sù ira kábulud da ta paggagammungád da. Á ari di Pablo bì kiminán, tapè tángngagad da yù pakimállà da kâ Apu megapu sù ira manaron. Á inikatalá da ira kâ Apu Kesu, nga Yápu ra nga pangikatalatád da.

<sup>24</sup> Á nattalebák di Pablo ta purubinsia na Pisidia ánnna Pampilia, á nakáddè ira ta ili na Perga.

<sup>25</sup> Á inilayalayâ da yù bilin ni Apu Kesu ta Perga. Á kabalid da nangilayalayâ ta ili na Perga, nánaw ira, á minay ira ta ili na Attalia.

<sup>26</sup> Á páno ra ta Attalia, nattakay ira ta biray nga nanoli ta ili na Antokia sù purubinsia na Siria. Yù ili na Antokia yù naggapuád da, nga paggianán nayù ira naddok nira. Yù ira manguruk nga maggián ta Antokia, nakimállà ira kâ Namarò ta ikállà na di Pablo ánnna abbágán na ira sù anga-angayád da. Á yáyù nga nanoli ira, gapu ta nabalist den yù inipakuá ni Namarò nira.

<sup>27</sup> Á tappi di Pablo ta Antokia, pinaggagammung da laguk yù ira manguruk, á kinagi ra nira yù inipakuá ni Namarò nira, ánnna yù ngámin nga pinalurò ni Namarò megapu sù ángngabák na nira. Á kinagi ra gapay ta iniyawâ na gapay ni Namarò sù ira ari Kudio yù awayyâ ra nga magginná sù bilin na, á aru nira gapay yù nanguruk kâ Apu Kesu.

<sup>28</sup> Á nakipaggián di Pablo kâ Bernabe ta nabayák sù ira manguruk kâ Apu Kesu nga naggián ta Antokia.

## 15

*Yù Pakkaká-ubobuk nayù ira Manguruk ta Paggagammung da ta Jerusalem*

<sup>1</sup> Á ajjan yù ira tatolay nga naggapu ta Judiya, nga minay ta Antokia, nga mangituddu sù ira ari Kudio nga mangikatalà kâ Apu Kesu. Á pangituddu ra, kinagi ra, “Nu ari kayu mappakugi ta kunnay sù kustombare mi nga Kudio nga inituddu na ngaw ni Moyses, á ari kuyu meyigù,” kud da.

<sup>2</sup> Á di Pablo kâ Bernabe, naríri ira sù ira mangituddu, á nerallà yù pakkakátabbák da. Á yáyù nga ninonò nayù ira manguruk nga taga Antokia ta dobad da di Pablo kâ Bernabe ánnna yù ira káruán nga kábulud da ta umay ira ta Jerusalem, tapè iyabbû da sù ira olu nga minángngilayalayâ ánnna yù ira giriámán yù meyannung sù ituddu nayù ira taga Judiya.

<sup>3</sup> Á gapu ta jinok da ira nayù ira manguruk nga taga Antokia, nánaw di Pablo, ta umay ira ta Jerusalem. Á sinalebarád da yù purubinsia na Pinisia ánnna Samaria. Á inisinisinek da nga iniparámak ta mangurugin gapay kâ Apu Kesu yù ira ari Kudio. Á ngámin ira nga mawwawági ta ángnguruk da kâ Apu, nagayáyâ ira ta pakaginná ra.

<sup>4</sup> Á pakáddè di Pablo ta Jerusalem, nagayáyâ nga namaddulò nira yù ira nga manguruk ánnna yù ira olu nga minángngilayalayâ ánnna yù ira giriámán. Á kinagi ri Pablo nira gapay yù ngámin nga inipakuá ni Namarò nira.

<sup>5</sup> Ngam ajjan gapay tán yù ira Parisio nga manguruk gapay kâ Apu Kesu, á gimikkáng ira, á kinagi ra, “Kagiat tam sù ira manguruk nga ari Kudio ta máwák nga mappakugì ira, á ituddu tam nira ta tuppálad da yù kustombare tam nga inituddu na ngaw ni Moyses,” kud da.

<sup>6</sup> Á yáyù nga naggagammung yù ira olu nga minángngilayalayâ ánnna yù ira giriámán, tapè makkkaká-ubobuk ira ta meyannung sù kinagi nayù ira Parisio.

<sup>7</sup> Á nakkakápereperang ira ta nabayák.

Á gimikkáng laguk si Eduru. Á kinagi na nira, “Wáwwagì, ammu naw ta góri, sikán yù piníli ni Namarò ta umay mangilayalayâ sù ira nga ari Kudio, tapè makaginná ira gapay sù napiá nga dámak nga meyannung kâ Apu Kesu ánnna manguruk ira.

<sup>8</sup> Á si Namarò, nga makánnámmu sù nonò na tolay, inipasingan na yù pangalawâ na sù ira ari Kudio nga mangikatalà kuna, ta jinok na ta umay nira gapay yù Mangilin nga Ikararuá, ta kunnay sù ánge na nittam nga Kudio nga mangikatalà kuna.

<sup>9</sup> Á arán na ira inirumá nittam, ta pinakomá na ira gapay ta liwiliwâ da nga kunnay sù pamakomá na nittam, megapu sù pangikatalà tam kuna.

<sup>10</sup> Á ngattá laguk, ta talliwanán naw yù ure ni Namarò? Ta inalawâ ni Namarò yù ira ari Kudio, ngam kagian naw nira ta máwák da manuppál sù tunung tam. Ngam sittam nga Kudio ánnna yù ira ngaw naggaká nittam gapay, ari ittam nakatuppál sù tunung.

<sup>11</sup> Ngam ammu tam gemma ta meyigù ittam megapu galà sù allà ánnna ángngiddù ni Apu Kesu nittam, ta kunnay gapay sù ira ari Kudio,” kun ni Eduru nira.

<sup>12</sup> Á pakaginná nayù ira tatolay sù kinagi ni Eduru, nagimammà ira. Á gininná ra yù pattubbâ di Pablo kâ Bernabe nga magubu-ubobuk sù ngámin nga makapállâ nga pinagaddátu ra nga inipakuá ni Namarò nira sù ánge ra pangilayalayâ sù ira ari Kudio.

<sup>13</sup> Á kabalid da nagubobuk, gimikkáng si Ime, á kinagi na, “Wáwwagi, ginnán naw yù kagiak ku.

<sup>14</sup> Si Simon Eduru, kinagi na nittamin yù Meyannung sù olu nga pangipakánnámmu ni Namarò sù ángngiddú nu sù ira ari Kudio, tapè eggá nira gapay yù ira tatole na.

<sup>15</sup> Á negittá yù kinagi ni Eduru sù initúrá nayù ngaw ira ábbilinán ni Namarò, nga kunniauw:

<sup>16</sup> ‘Sikán si Apu, á duttál yù ággaw nga panolì ta dabbuno.

Á ipoli ku yù pammagurayán ni Dabid, megapu sù ira ginaká na.  
Patáddagak ku yù bale ni Dabid nga narabbâ.

<sup>17</sup> Á yáyù nga makiyápu laguk nikán yù ira ngámin makkakerumá nga tatolay nga ari Kudio, nga agálák ku gapay ta tumuttul ira nikán.

<sup>18</sup> Yáyù inipakánnámmu sù ngaw gári nga nabayágin. Sikán si Namarò nga nakkagi.\*

<sup>19</sup> Á yáyù nga napiá ta urè, nu arát tam jigirigátan yù ira ari Kudio nga manguruk kâ Apu Kesu. Arát tam ituddu nira yù ngámin nga kustombare tam nga Kudio, nga arát tam gapay matuppâl ta áddè ngaw.

<sup>20</sup> Ngam yawe lâ ituddu tam sù ira ari Kudio, nga wáwwagi tam megapu sù ángnguruk tam. Itúrá tam lâ ta arád da kanan yù neytâng ta sináddios ánná ari ira makiruruk sù arád da atáwa, á arád da kanan yù ayám nga ari naparágá, á arád da gapay kanan yù dágá na.

<sup>21</sup> Á yáyù lâ ituddu tam nira, tapè ari maburung yù ira kábulud da nga Kudio. Ta sittam nga Kudio, ammu tam yawe ira tunung ni Moyses, gapu ta bibbirat tam sù ngámin nga kapilliá tam ta káda Sabadu ta áddè gári olu nga ággaw. Ngam ari Meyannung sù ira ari Kudio yù ira kárúán nga kustombare tam,” kun ni Ime nira.

#### *Yù Túrâ nayù ira Karakalán nga Kudio nga taga Jerusalem sù ira Ari Kudio*

<sup>22</sup> Á pakaginná nayù ira manguruk sù kinagi ni Ime, napiá gapay ta ure ra. Á yù ira minángngilayalayâ ánná ngámin nga kárúán nga manguruk ánná yù ira giriámán, ikáyâ da pilian yù ira lálláki nira ta mepulù ira kári Pablo kâ Bernabe nga umay ta Antokia. Á sinullâ da yù duá nga pakimorayán, si Kudas nga mangngágan gapay ta Barsabas ánná si Silas.

<sup>23</sup> Á initúrá da yù bilid da sù ira bagu nga manguruk nga maggián ta Antokia, á initubbuk da kári Pablo kâ Bernabe. Yawe yù kinagi ra ta pattúrâ da nira:

“Sikami nga olu nga minángngilayalayâ ánná yù ira giriámán, nga wáwwagi naw sù ángnguruk tam kâ Apu Kesu, sikami yù mattúrâ nikayu ngámin nga wáwwagi mi nga ari Kudio, nga maggián ta Antokia ánná Siria ánná Silisia. Á kunnasi kayu? Á parè bì ta napiá yù gawagawáyán naw.

<sup>24</sup> Á narámak mi ta mabbábâng kayu megapu sù kinagi nayù ira nga naggapu sawe giám mi nga Jerusalem. Ngam arám mi gemma ira jinok.

<sup>25</sup> Á yáyù nga naggagammung kami, á nattatádday yù nonò mi ta piliam mi yù ira tatolay nga dobam mi nga mepulù sù ira wáwwagi tam nga iddukat tam, di Pablo kâ Bernabe, nga umay ta gián naw.

<sup>26</sup> Aggira yù toláy nga pinaguráyád da yù baggi ra ánná inángâ da, tapè masserbi ira kâ Apu Kesu Kiristu nga Yápu tam.

<sup>27</sup> Á yáyù nga jinok mi laguk di Kudas kâ Silas, nga mepulù kári Pablo, tapè ibukalád da gapay yù megitá sù itúrâ mi nikayu.

<sup>28</sup> Á inípakanánnámmu nayù Mangilin nga Ikararuá nikami ta napiá galâ nu arám mi kagian ta tuppálan naw yù ngámin nga kustombare mi nga Kudio, ngam yù itúrâ mi lâ sawe, tapè ari kayu marigirigâ.

<sup>29</sup> Á yawe ira tunung lâ yù kagiam mi nikayu, ta arán naw kanan yù neytâng ta sináddios. Arán naw kanan yù dágá. Arán naw kanan yù ayám nga ari naparágá. Á ari kayu makiruruk sù arán naw atáwa. Á nu kurugan naw yù ira appâ nga tunung, á napiá. Yáyù áddè na itúrâ mi nikayu, sikami nga maggián ta Jerusalem nga mangikatalâ kâ Apu Kesu.”

<sup>30</sup> Á kabalid da nattúrâ, iniyawâ da kári Pablo ánná yù ira tallu nga kábulun na yù túrâ da, á pinapáno ra ira. Á minay di Pablo laguk ta Antokia. Á labbè da tán, pinaggagammung da yù ira ngámin nga manguruk, á iniyawâ da nira yù túrâ.

<sup>31</sup> Á pabbibbik da sù túrâ, nagayáyâ ira megapu sù initabarang da nira, á mináláppaw yù nonò da.

\* 15:18 Amos 9:11-12

<sup>32</sup> Á di Kudas kâ Silas, nga ábbilinán ni Namarò gapay, sinabatabarangád da ira ta nabayák, tapè mepasigaggà yù ángnguruk da kâ Apu Kesu.

<sup>33</sup> Á nakipaggián lábbì di Kudas ta Antokia sù ira manguruk. Á kabalid da naggián nira, pinapáno ra ira nayù ira manguruk, tapè manoli ira sù ira nga naddok nira túrin ta Jerusalem. Á kinagi ra, "Mepulù nikayu si Apu Namarò nga mangabbák nikayu."

<sup>34</sup> Ngam naggián lâ si Silas paga ta Antokia.

<sup>35</sup> Á nabattáng paga di Pablo kâ Bernabe ta Antokia, nga mangituddu ánná mangilayalayâ ta meyannung kâ Apu Kesu, ánná aru yù ira kábulud da gapay nga mangituddu ánná mangilayalayâ.

#### *Yù Pakkáttue ri Pablo kâ Bernabe*

<sup>36</sup> Á kabalid da nangituddu tán nga lugár, kinagi ni Pablo kâ Bernabe, "Et ta tullúmán yù ira manguruk kâ Apu ta ngámin nga ili nga mangilayalayatát ta ngaw, tapè ammu ta nu kunnasi ira."

<sup>37</sup> Á ikáyâ ni Bernabe ta mepulù si Kuan, nga mangngágan gapay ta Markus.

<sup>38</sup> Ngam molang si Pablo, ta kinagi na ta ari mepángngâ nu mepulù nira, gapu ta nánaw nira ngaw ta Pampilia, nga ari nepangabbák nira ta tarabáku ra.

<sup>39</sup> Á nerallà yù pakkakátabbák da, á nakkáttuay ira. Á inâ ni Bernabe si Markus ta kabbulun na, á nabbiray ira nga minay ta Sipro.

<sup>40</sup> Á si Pablo, piníli na si Silas ta mepulù kuna. Á yù ira nga manguruk kâ Apu, inipakimállà da kâ Namarò ta taronán na di Pablo. Á kabalid da nakimállà, pinapáno ra ira.

<sup>41</sup> Á nánaw laguk di Pablo nga minay naddagâ ta ngámin nga ili sù purubinsia na Siria ánná Silisia, nga mangilayalayâ ánná manabarang sù ira nga mangikatalà kâ Apu Kesu ta ngámin nga ággagammungád da, tapè mepasigaggà yù ángnguruk da.

## 16

#### *Yù Kepulù ni Timotio kári Pablo kâ Silas*

<sup>1</sup> Á nakáddè di Pablo ta ili na Derbi ánná Listara. Á naggián ta Listara yù tolay nga manguruk nga mangngágan ta Timotio. Á Kudio yù yená ni Timotio, nga manguruk gapay, ngam Gareko yù yáma na nga taga Garesia.

<sup>2</sup> Á yù ira manguruk nga naggián ta Listara ánná Ikonium, napiá yù kinagi ra nga meyannung kâ Timotio.

<sup>3</sup> Á si Pablo, ikáyâ na apan si Timotio ta kabbulun na. Ngam yù ira Kudio nga naggián ta ngámin nga gián nga angayád da, ammu ra ta Gareko yù ammò ni Timotio. Á yáyù nga nipakugi ni Pablo si Timotio, tapè awatadat da gapay nayù ira Kudio.

<sup>4</sup> Á nánaw di Pablo laguk, nga naddagaragâ ta aru nga ili. Á ta káda ili, inipakánnámmu ra yù kinagi nayù ira olu nga minángngilayalayâ ánná yù ira giriámán nga naggián ta Jerusalem, tapè tuppálad da gapay.

<sup>5</sup> Á nepasigaggà yù ángnguruk nayù ira manguruk ta ngámin nga ili, á ta kággággaw, nalannapán ira ta tatolay nga manguruk.

#### *Yù Nappasingan kâ Pablo ta Keggá na ta Tarowas*

<sup>6</sup> Á nattalebák di Pablo laguk ta purubinsia na Parigia ánná Galasia, gapu ta arán na ira inanugù nayù Mangilin nga Ikararuá yù pangilayalayâ da ta bilin ni Namarò sù lugár na Asia.

<sup>7</sup> Á pakáddè da ta purubinsia na Misia, umay ira nakuan ta purubinsia na Bisinia, ngam arán na ira inanugù nayù Ikararuá ni Apu Kesu.

<sup>8</sup> Á naddaretiu ira nga nattalebák sù purubinsia na Misia, á minay ira ta ili na Tarowas ta aggik na bebay.

<sup>9</sup> Á tán nga gabi, inipasingan ni Namarò kâ Pablo yù tolay nga taga Masidonia nga limittuák, nga nanáddák nga makimállà kuna. Á kinagi na, "Ikállà kami bì. Umay kayu saw giám mi nga Masidonia, á abbágán naw kami," kun na.

<sup>10</sup> Á pakasingan ni Pablo sù inipasingan ni Namarò kuna, á sikami kâri Pablo, dagarágâ nga naggagannuâ kami. Á sikán si Lukas nga nattúrâ, á sikán gapay yù kabbulun ni Pablo. Á inalek mi yù nattakayám mi nga biray nga umay ta Masidonia, ta natákál mi ta jinok na kami ni Namarò, tapè mangilayalayâ kami sù napiá nga dámak tán nga lugár.

#### *Yù Panguruk na kâ Apu ni Lidia nga taga Pilippay*

11 Á nabbiray kami laguk nga nánaw ta Tarowas, á minay kami daretiu ta pugu na Samotrasia. Á sù tádday ággaw, nakáddé kami ta Niapolis.

12 Gatták mi ta biray ta Niapolis, nappatalay kami nga minay ta Pilippay, nga karakalán na ili sù purubinsia na Masidonia. Nesipà yù ili na Pilippay sù pammagurayán na Roma, á aru yù ira taga Roma nga naggián sù ili. Á natturù ta tangaliguán yù paggiám mi ta Pilippay.

13 Á ta ággaw na Sabadu, nga ággibannák da, minay kami ta lawán na ili ta aggik na danum, ta nanonò mi ta ajjan támma tán yù ákkimállatán na Kudio. Á nagitubang kami nga makiubobuk sù ira bábbay nga naggagammung tán.

14 Á ajjan sù ira nga nagginná ta ubobuk mi yù babay nga taga Tiyatira nga mangngáagan ta Lidia, nga minállaku ta gagamì nga ujjojin. Á ari Kudio si Lidia, ngam nakimoray gapay kâ Apu Namarò. Á pakaginná na sù kinagi mi, pinannawák ni Apu yù nonò na, tapé tánggagan na yù kinagi ni Pablo.

15 Á narigù laguk di Lidia ánná yù ira kábbale na. Kabalid da narigù, inapà na kami ni Lidia ta bale ra, nga kun na, "Nu kagian naw ta kukurugán nga mangurugá kâ Apu, umay kayu bì maggián ta bale mi." Á kinagumán na kami inâ, á naggián kami nira.

#### *Yù Kebáluk di Pablo ta Pilippay*

16 Á tádday nga ággaw, ta pallakák mi nga umay ta ákkimállatán, jiminápun nikami yù magingánay, nga aripan nga minállabbún, nga nagunagán na anitu, á yù anitu yù paggauán nayù pakalabbún na. Á yù ira yápu na, aru yù ganánsiá ra nga nálâ da megapu sù pallababalabbún na.

17 Á siminuttul yù babay nikami, nga nakkatakátol, nga kun na, "Danniaw ira yù masserbi kâ Namarò nga Kotunán. Á ilayalayâ da nikayu yù pakiyígù naw kâ Namarò," kun na.

18 Á kággaggaw, kunniaw yù kingnguá na áddè ta arán na kalurâ ni Pablo, á nallipay kuna, á kinagi na sù anitu na, "Yawe yù kagiai ku nikaw ta pannakabaggi ni Apu Kesu Kiristu, ta mánaw ka sù babay." Á dagarágâ nánaw yù anitu kuna.

19 Á pakasingan nayù ira yápu nayù babay ta awánna ta paganánsiád da, naporay ira. Á ginápù da di Pablo kâ Silas, á ginuggud da ira nga iniyarubáng sù ira minámmmanunnù ta giád da ta dápun.

20 Á kinagi ra sù ira minámmmanunnù, "Danniaw ira nga tolay, Kudio ira, á buruburionád da yù katangeliát tam.

21 Ituddu ra yù kustombare ra nga mekontará sù tunung tam nga taga Roma. Arát tam tuttulan gemma yù ituddu ra," kud da.

22 Á nattatáddy yù ira magaru nga tatolay nga mangnuá kári Pablo. Á yù ira minámmmanunnù, pinisipisil da yù barawási ri Pablo tapè iriád da. Á jinok da yù mamalù nira.

23 Á kabalid da nira namalapalù, pinukù da ira ta ábbalurán, á sinaddánád da yù magguárdiá, ta guárdián na ira ta napiá.

24 Á pakaginná nayù magguárdiá sù kinagi ra, pinukù na ira sù lágum nga nattangngán nayù ábbalurán. Á siniri na yù takki ra ta duá nga káyú nga netúsi.

#### *Yù Pabbáli nayù Magguárdia ta Mangruk kâ Apu Kesu*

25 Á ta tangngá na gabi, ajjan di Pablo kâ Silas ta ábbalurán, nga nakimállà kâ Apu Namarò, ánná nakkanskansion ira ta paddáyo ra kuna. Á yù ira káruán nga tatolay nga nabáluk, gininján ra.

26 Á ikáddagâ lâ nallunik ta nasikan, á naguyuguyu yù ábbalurán. Á dagarágâ nabukatán yù ngámin nga puertá, ánná nári yù ngámin nga ánnangngal sù ira tatolay nga napukù.

27 Á kalukák nayù magguárdiá, nasingan na yù ngámin nga puertá na ábbalurán nga nabukatán, á kagian na ta nattálawin yù ira guárdián na. Á yáyù nga inásù na yù bayunetá na ta papatáyan na nakuan yù baggi na. Ta nu nattálaw iren, á jigirigátad da laguk nayù ira naddok kuna ánná papatáyad da.

28 Ngam nakkatol ta nasikan si Pablo sù magguárdiá, á kinagi na kuna, "Arám mu akkuán yù baggim! Ajjan kami ngámin saw nga guárdiám mu."

29 Á inagálán na laguk nayù magguárdiá yù mamagatang ta tulu. Á pakálâ na ta tulu, nakkarerá nga minay ta lágum, á namalittükak ta arubáng di Pablo kâ Silas nga namippippik ta assing na.

<sup>30</sup> Á iniyángé na ira laguk ta lawán, á iniyabbû na nira, nga kun na, “Mesturu, anni yù máwák nga akkuák ku, tapè meyígukà nga mesipà kâ Namarò?”

<sup>31</sup> Á kinagi ri Pablo, “Mangikatalà ka kâ Apu Kesu, á mesipà kayu kâ Namarò sù pammagurayán na, sikayu ngámin sù ira kábbalem.”

<sup>32</sup> Á kinagi di Pablo laguk yù bilin ni Apu sù ira ngámin nga kábbale nayù magguárdiá.

<sup>33</sup> Á tán nga gabi, iniyángé nayù magguárdiá ira ta lawán, tapè baggawán na yù bigibigák da. Á kabalin na namaggaw nira, dagarágâ nakirigù yù magguárdiá áンna yù ira kábbale na.

<sup>34</sup> Á iniyángé na di Pablo kâ Silas ta bale na, á pinakán na ira. Á nagayáyâ ira ngámin nga makkakábbalay gapu ta pangikatalà da kâ Namarò.

<sup>35</sup> Á ta pannawák, jinok nayù ira minámmunnù yù ira pulis, ta ed da kagian sù magguárdiá ta palubbángan na yù ira tatolay.

<sup>36</sup> Á yù magguárdiá, en na kinagi kári Pablo. “Yù ira minámmunnù, jinok da yù ira pulis nga minay nakkagi nikán ta palubbángat takayu. Á mánaw kayu laguk.”

<sup>37</sup> Ngam kinagi ni Pablo sù ira pulis, “Kagabi, iddâ da kami lâ inipapalù ta arubáng na tangelián, nga awán ta liwâ mi. Á mássiki nu tolay kami nga taga Roma gapay nga kunnay nira, inipapukù da kami, nga arád da paga binestigá. Mekontará gemma sù tunung na Roma yù kingnguá ra nikami. Inipasiránad da kami ta arubáng na tolay, á kagiad da panò ta ilímak da yù liwâ da, á ilammang da kami nga palubbángan? Molang kami mánaw nu ari aggira yù umay nikami mama lubbáng.”

<sup>38</sup> Á nanoli yù ira pulis, á kinagi ra sù ira minámmunnù yù kinagi ni Pablo. Á pakaginnára ta eggá kári Pablo yù papel da nga pakasinganán ta mesipà ira gapay sù pakáwayyá na Roma, á naganássing ira.

<sup>39</sup> Á yáyù nga minay ira ta ábbalurán nga nakipakomá kári Pablo, á iniyángé ra ira ta lawán. Á nakimállà ira kári Pablo ta mánaw ira lâ sù ili.

<sup>40</sup> Á nánaw laguk di Pablo ta ábbalurán nga minay daretiu ta bale ri Lidia. Á sinabarangád da yù ira nga naggagamitung ta bale ra, nga mawwawági sù ángngikatalà da kâ Apu Kesu, tapè mepasigaggà yù ángnguruk da. Á kabaliid di Pablo nanabarang, nánaw ira laguk.

## 17

### *Yù Keggá ri Pablo ta Tessalonika*

<sup>1</sup> Páno ri Pablo ta Pilippay, nattalebák ira ta ili na Ampipolis áンna ili na Apolonia, á limibbè ira ta ili na Tessalonika. Á eggá tán yù kapilliá na Kudio.

<sup>2</sup> Á naggián ira ta tallu ligguán, á káda Sabadu minay si Pablo ta kapilliá, nga kunnay ta kustombare na, á nakubobuk sù ira tatolay ta meyannung sù dán nga netúrâ nga ubobuk ni Namaró.

<sup>3</sup> Á pabbibbik na sù ubobuk ni Namarò, inibukalán na nira ta máwák nga matay yù Mangiyígú, á maginnanolay. Á kinagi na nira, “Si Apu Kesu nga ilayalayâ ku nikayu, aggina yù Mangiyígú nga iddagán naw, nga ubobugan nayù dán nga netúrâ nga mangngágan ta Kiristú.”

<sup>4</sup> Á nanguruk yù ira káruán na Kudio, á nepappuplù ira kári Pablo kâ Silas, nga kunnay gapay sù ira aru nga Gareko nga taga Garesia, nga makimoray kâ Namarò, áンna aru nga bábbay nga maríku.

<sup>5</sup> Ngam yù ira kátannangán na Kudio nga ari nanguruk, napassil ira kári Pablo. Á inagálád da yù ira tatolay nga narákè, á jinok da ira ta ammungad da yù magaru nga tatolay. Á pinappatapátu ra yù ira tangelián. Á ed da sillung yù bale ni Jeson, nga paggianád di Pablo kâ Silas, tapè iyarubáng da ira nakuan sù ira magaru nga tatolay.

<sup>6</sup> Ngam arád da ira nálek. Á yáyù nga ginápù da di Jeson áンna yù ira kábulun na nga mawwawági ta ángnguruk da kâ Apu, á ginuggud da ira nga iniyarubáng sù ira mammaguray ta ili, tapè ikeká ra ira. Á nagagga-aggay ira, nga kud da sù ira mammaguray, “Ajjan yù ira tatolay nga mamuruburion áンna ntamappatapátu ta tangapáddabunán, á limibbè iren saw ili tam.”

<sup>7</sup> Si Jeson yù nangilágum nira. Á aggira ngámin, potuád da si Patul Sisar, ta kagiad da ta ajan tanakuán nga patul nga mangngágan ta Kesu,” kud da.

<sup>8</sup> Á pakaginná nayù ira tatolay áンna yù ira mammaguray ta ili sù kinagi ra, naburung ira.

<sup>9</sup> Á pinapiánsá ra di Jeson áンna yù ira kábulun na, á pinalubbáng da ira laguk.

### *Yù Keggá ri Pablo ta Beria*

10 Á yù ira mawwawági ta ángnguruk da kâ Apu, dagarágâ nga inilammang da nga pinapánow di Pablo kâ Silas tán nga gabi, ta umay ira ta Beria. Á tappì da tán, minay ira ta kapilliá na Kudio.

11 Á napiá yù ira Kudio nga naggián ta Beria ánné sù ira Kudio ta Tessalonika. Á nagayáyá ira nga magginná sù bilin ni Namarò. Á kágággaw binibbik da yù dán nga netúrâ nga bilin ni Namarò, nga iniggítá ra sù kinagi ni Pablo, tapè ammu ra nu kuruk yù ituddu na.

12 Á yáyù nga aru yù ira Kudio nga nangikatalà kâ Apu Kesu. Á aru gapay yù ira nangikatalà nga Gareko nga maríku nga bábbay áんな lálláki.

13 Á pakarámak nayù ira Kudio nga naggián ta Tessalonika ta ajjan si Pablo ta Beria nga mangilayalayá ta bilin ni Namarò, minay ira gapay ta Beria, nga mamuruburion ánná mampatapatápú sù ira magaru nga tatolay tán.

14 Ngam pakasingan nayù ira manguruk ta limibbè yù ira mamuruburion, dagarágâ pinapáno ra si Pablo ta umay ta bebay. Ngam naggián lábbì ta Beria di Silas kâ Timotio.

15 Á yù ira nga namapánaw kâ Pablo, inituluk da ta ili na Atenas. Á ta páno ra nga manoli ta Beria, inibilin ni Pablo nira yù kagian na kári Silas kâ Timotio, ta mabi ira nga dumáddán kuna.

### *Yù Pangilayalayá ni Pablo ta Pagiddak na ta Atenas*

16 Á ta pagiddak ni Pablo kári Silas ta Atenas, nabagal yù nonò na, ta nasingan na ta ili yù kitáru nga sináttolay nga didios da.

17 Á yáyù nga minay si Pablo ta kapilliá na Kudio nga nakiubu-ubobuk sù ira Kudio ánná yù ira ari Kudio nga naggagammung tán. Á kágággaw minay gapay ta dápun nga nakiubobuk sù ira tatolay nga ajjan tán.

18 Á ajjan yù ira sinudduán ni Epikurio ánná yù ira nga sinudduán ni Estoyku nga nakaginná sù kinagi ni Pablo. Á kinagi ra, “Anni panò yù kagian na yawe kitobobuk nga tolay?” kud da. Ngam yù ira káruán, kinagi ra, “Ilayalayá na támma yù tanakuán nga dios nga arát tam ammu.” Yáyù kinagi ra gapu ta inilayalayá ni Pablo si Apu Kesu ánná yù meyannung ta paginnanole nayù námmatay.

19 Á iná da laguk si Pablo, á iniyánge ra ta arubáng nayù ira kátannangád da sù ággagammungád da ta utun na puddul nga mangngágan ta Ariappagu. Á kinagi ra kâ Pablo, “Ipakánnámmum bì nikami yù meyannung sù ituddum.

20 Ta mapállâ kamí, gapu ta kapágginná mi lâ paga, á ikáyâ mi kánnámmuán yù kebalinán na,” kud da.

21 Á yù ira ngámin nga tatolay nga taga Atenas ánná ngámin yù ira tanakuán nga makipaggián tán, awán ta dumá nga sinarabáku ra, nu ari galâ yù pakaginná ra sù bagu nga dámak, nga inubu-ubobuk da ta tangatangággaw.

22 Á yáyù nga nanáddak si Pablo ta arubáng nayù ira kátannangáng nga naggagammung ta Ariappagu, á kinagi na nira, “Sikayu nga taga Atenas, nasingak ku ta tángngagan naw yù aru nga didios naw nga ákkimorayán naw.

23 Á ta pappassapassiár ku ta ili naw, nasingak ku ta kitáru yù ira ákkimorayán naw. Á nesimmuák ku yù tádday nga ákkimorayán naw nga ajjan nga netúrâ kuna nga kunniaw, ‘Ta Dios nga arát tam ammu.’ Á yane pakimorayán naw nga arán naw ammu, aggina laguk yù ilayalayá ku nikayu kunangane.

24 “Yawe Dios rga ilayalayá ku nikayu, aggina yù Namarò ta dabbuno ánná lángì ánná ngámin nga eggá nira. Aggina yù Yápu na ngámin, yù Mammaguray ta lángì ánná dabbuno. Á yáyù nga ari maggián ta balay nga pidde na tolay.

25 Á awán bulubugá ta awayyá na tatolay nga mangabbák kuma, ta aggina yù mangiyawâ nittam ta áttolle tam, inángâ tam, ánná ngámin yù awágat tam.

26 “Á pidde ni Namarò yù ira ngámin nga tatolay nga makkakerumá katole ra, negapu sù táttádday nga tolay nga olu nga pinarò na. Á sinullà ni Namarò yù ággaw nga keggá ra ánná yù áddé na dabbun nayù ira páppatulád da nga katággitáddy.

27 Yáyù kingnguá ni Namarò, tapè eggá sù ira ngámin nga tatolay yù awayyá ra nga mannononò sù namarò nira, ánná ammu ra sangaw si Apu Namarò, nu inni-innad da ta napiá yù pinarò na megapu nira ánná nonotad da ta napiá yù pangikállâ na nira. Ngam ari gemma arayyu si Namarò nittam, nu ari galâ aranni nittam nga katággitáddy.

28 “Á ajjan yù ngaw tádday nikayu nga minángngitúrâ, á kinagi na, ‘Si Apu Namarò yù paggapuán na inángâ tam ánná ágguyu tam ánná nonò tam ánná ikararuá tam.’ Á kinagi na gapay, ‘Ánâ na ittam gemma ni Apu Namarò,’ kun na.

<sup>29</sup> Á gapu ta ánâ ni Namarò ittam, arát tam nakuan kagian ta aggina yù kun na bulawán onu pinaláta, batu, onu yù ira sináttolay nga pidde na tolay.

<sup>30</sup> Á sù ngaw, arán na pinagikáru ni Namarò yù ira tatolay, gapu ta arád da paga ammu bulubugá yù meyannung kuna. Ngam kunangane kagian ni Namarò sù ira ngámin nga tatolay ta máwák nga mabbabáwi ira sù narákè nga akka-akkuád da.

<sup>31</sup> Ta sinullà ni Namarò yù ággaw nga pamanunnù na ta ngámin nga makkakerumá nga tatolay ta dabbuno. Á sinullà na yù mamanunnù nga matunung yù ámmanunnù na. Á inipakánnámmu ni Namarò sù ira ngámin nga tatolay yù sinullà na nga mamanunnù, ta pinaginnanole ni Namarò, nga naggapu ta gián nayù ira námmatay.

<sup>32</sup> Á pakaginná ra sù kinagi ni Pablo nga meyannung ta paginnanole nayù ira námmatay, inuyo nayù ira kárúán si Pablo. Ngam kinagi nayù ira kárúán kuna, “Ikáyâ mi maginná má sangaw yù kagiam mu nga meyannung karanniaw,” kud da.

<sup>33</sup> Á nánaw laguk si Pablo nira.

<sup>34</sup> Á páno na, nepappapulù kuna yù ira kárúán nga tatolay, gapu ta nanguruk ira. Si Dionisio yù tádday nga manguruk, nga kabbulun nayù ira kátannangán ta Ariappagu, áんな yù tádday nga babay nga mangngágán ta Damaris. Á ajjan yù ira kárúán paga nga nangikatalà kâ Apu Kesu, nga netádday kâ Pablo.

## 18

### *Yù Pangilayalayâ ni Pablo ta Korinto*

<sup>1</sup> Kabalin na yaw, nánaw si Pablo ta Atenas, á minay ta Korinto.

<sup>2</sup> Á nesimmuán na tán di Akila kâ Persila, nga magatáwa. Kudio ira nga taga Pontu ngaw, á nakipaggián ira lâ gangù ta áppatulán na Italia. Á gapu ta pinapáno ni Patul Kalodio yù ira ngámin nga Kudio ta Roma, nga karakalán na ili ta Italia, nagálì di Akila, á limibbè ira ta Korinto. Á en ni Pablo ira sinullúnán.

<sup>3</sup> Á gapu ta naggittá yù ággalerad da kâ Pablo, nga mináppadday ta tarapál, á nakipaggián si Pablo ta bale ra, nga mepattarabáku nira.

<sup>4</sup> Á káda Sabadu minay si Pablo sù kapilliá na Kudio nga makiubobuk sù ira Kudio áんな yù ira Gareko gapay, tapé dudduáran na ira ta manguruk ira kâ Apu Kesu.

<sup>5</sup> Á labbè di Silas kâ Timotio ta Korinto, nga naggapu ta Masidonia, yáyù nga awayyá ni Pablo nga tángngagan yù pangilayalayâ na sù ira Kudio. Á inilayalayâ na nira si Apu Kesu nga Kiristu nga Mangiyígù nga initabbá na ngaw ni Namarò nga umay mammaguray.

<sup>6</sup> Ngam kinontará ra si Pablo nayù ira Kudio áんな nakkakagiád da. Á iniwákkâ na laguk ni Pablo yù barawási na, ta panákkilalán ta kabalin na nangilayalayâ sù ira Kudio. Á kinagi na nira, “Liwâ naw lággapay, nu ari kayu meyigù. Arák ku liwâ, ta sinabarangát takayu gemma. Á ek ku lállaguk ilayalayâ sù ira ari Kudio.”

<sup>7</sup> Á nánaw si Pablo laguk nga minay ta bale ni Tisio Justo, nga tolay nga ari Kudio nga makimoray kâ Namarò. Netaging ta kapilliá na Kudio yù bale na.

<sup>8</sup> Á si Kirispo, nga kátannangád da ta kapilliá na Kudio, nanguruk gapay kâ Apu Kesu. Á nanguruk gapay yù ira ngámin nga kábbale na. Á aru gapay yù ira tatolay nga naggián ta Korinto nga nakaginná sù kinagi ni Pablo, á nanguruk ira, á nakirigù ira.

<sup>9</sup> Á ta tádday gabi, ajjan yù nappasingan kâ Pablo. Á naginná ni Pablo si Apu Kesu nga magubobuk kuna, á kinagi ni Apu, “Ari ka mattukkâ nga mangilayalayâ sù meyannung nikán, á ari ka maganássing sù ira tatolay.

<sup>10</sup> Awán ta tolay nga umay mangnúá nikaw, ta sikán yù mepulù nikaw. Á kitáru paga yù ira tatolay sawe ili nga manguruk áんな mesipà nikán,” kun ni Apu kuna.

<sup>11</sup> Á yáyù nga naggián tán si Pablo ta tangaragun ta gadduá, nga mangituddu sù bilin ni Namarò sù ira tatolay.

<sup>12</sup> Á paggián na lâ paga ni Pablo ta Korinto, á naggubinador si Gallio ta purubinsia na Akeya. Á nattatádday yù ira Kudio nga ari manguruk, á ginápù da si Pablo. Á iniyarubáng da kâ Gubinador Gallio, tapé ikeká ra kuna.

<sup>13</sup> Á kinagi ra, “Yawe tolay, kagumánan na yù ira tatolay ta tanakuán nga ákkimore ra kâ Namarò nga mekontará sù tunung mi!” kud da.

<sup>14</sup> Á lage ni Pablo nakuan magubobuk, nga tubbák sù kagiad da, kinagi ni Gallio sù ira Kudio, “Nu eggá nakuan yù liwâ na, onu narákè yù kingnguá na, á máwák nakuan ta anúsát takayu nga Kudio áんな ginnák ku nakuan yù kagian naw.

<sup>15</sup> Ngam gapu ta maddagaragim kayu galâ ta meyannung ta ubobuk áンna ngágán na tolay áンna yù tunung naw lápay, sikayu lággapay yù mamanunnù. Manakikà mamanunnù karanniau.”

<sup>16</sup> Á pinaturiák na ira sù ámmanunnután.

<sup>17</sup> Á ginápù da laguk nayù ira tatolay si Sostenes, nga kapatas ta kapilliá na Kudio, á kingnguá ra sù námmuák nayù ámmanunnután. Ngam si Gubinador Gallio, pinagurayán na ira. Arán na ira sinángngák.

#### *Panoli ni Pablo ta Antokia sù Purubinsia na Siria*

<sup>18</sup> Pappásá na yaw, naggián paga si Pablo ta nabayák ta Korinto sù ira mawwawági ta ángenguruk da kâ Apu. Á páno na, nepulù kuna di Akila kâ Persila. Á minay ira ta Kenkareya ta aggik na bebay. Labbè da tân, nakiúsi si Pablo ta sinniál na ta sinuppál nen yù ngaw initabbá na kâ Namarò, ta yáyù kustumbaré ra. Á nabbiray ira laguk nga minay ta purubinsia na Siria.

<sup>19</sup> Á jiminung ira ta ili na Epeso. Yáyù nabattángád di Akila. Ngam naddagâ lâ si Pablo ta kapilliá, tapè makiubobuk sù ira Kudio.

<sup>20</sup> Á inapà da ta maggián nira ta mabayák, ngam kinagi ni Pablo ta máwák na lábbì mánav.

<sup>21</sup> Á ta paggagannuá na, kinagi na nira, “Nu ure ni Namarò, á manolingà nikayu noka.” Á nabbiray laguk si Pablo nga nánaw ta Epeso.

<sup>22</sup> Á jiminung yù birey ta Sesaria. Á gatták ni Pablo, giminon ta Jerusalem tapè tullúnán na yù ira mangikatalà kâ Apu Kesu nga naggián tán. Á páno na ta Jerusalem, minay laguk ta ili na Antokia sù purubinsia na Siria.

<sup>23</sup> Á naggián ta Antokia nga nangabbák nira. Á páno na ta Antokia, minay naddagaragâ ta ngámin nga ili sù ira purubinsia na Galasia áンna Parigia. Á sinabarangán na yù ira ngámin nga manguruk kâ Apu Kesu ta ipasigaggâ da yù ángenguruk da.

#### *Yù Pangituddu ni Apolo ta Korinto áンna Epeso*

<sup>24</sup> Á paggián ni Pablo ta Galasia áンna Parigia, ajjan yù Kudio nga taga Alekandria nga mangngágan ta Apolo nga limibbè ta Epeso. Á napiá yù ángngituddu ni Apolo, ta natudduán sù ngámin nga dán nga netúrâ nga ubobuk ni Namarò.

<sup>25</sup> Á natudduán gapay ta meyannung sù panguruk tam kâ Apu Kesu. Á yáyù nga kuruk yù inituddu na gapay ta meyannung kâ Apu Kesu, á naláppâ nga mangituddu. Ngam yaw lâ paga nga ammu na yù pakirigù na tolay nga inituddu na ngaw ni Kuan nga Minánigù.

<sup>26</sup> Á minay si Apolo nangituddu sù kapilliá na Kudio nga ari naganássing. Á di Akila kâ Persila, naginná ra yù kinagi ni Apolo ta kapilliá, á inapà da ta bale ra, á inibukalád da ta napiá yù pakiyígù nayù ira tatolay kâ Namarò megapu sù pangikatalà da kâ Apu Kesu.

<sup>27</sup> Á inikáyâ ni Apolo ta dumákì nga umay ta purubinsia na Akeya. Á yù ira kábulun na ta Epeso, jinudduák da ta umay, á initúrá da laguk sù ira nga manguruk kâ Apu Kesu nga maggián ta Akeya, ta alawatad da si Apolo. Á labbè ni Apolo ta Akeya, inabbágán na ta napiá yù ira tatolay nga mangikatalà kâ Apu Kesu, megapu sù pangikállâ ni Namarò nira.

<sup>28</sup> Á nábbágán ira megapu sù pangappù ni Apolo sù ira Kudio nga ari nanguruk, ta pakkakátabbatabbák da ta arubáng nayù ira magaru nga tatolay. Á inibukalán ni Apolo yù dán nga netúrâ nga ubobuk ni Namarò, á kunnian inípakkuruk na sù ira Kudio ta si Apu Kesu yù MakKiristu nga mangiyígù nga ubobugan nayù ira ngaw ábbilinán.

## 19

#### *Si Pablo ta Epeso*

<sup>1</sup> Á keggá ni Apolo paga ta Korinto, minay si Pablo ta ili na Epeso, nga nallakák ta puddupuddul sù tangngá nayù purubinsia. Á ta Epeso, naránganganán na yù ira manguruk kâ Namarò.

<sup>2</sup> Á iniyabbû ni Pablo nira, “Á ammu naw nu minay nikayu yù Mangilin nga Ikararuá ta kapángnguruk naw?” Á kinagi ra kuna, “Ari. Arám mi bulubugá naginná yù meyannung sù Mangilin nga Ikararuá.”

<sup>3</sup> Á kinagi ni Pablo nira, “Anni laguk yù kebalinán nayù karigù naw?” Á kinagi ra, “Á kunnay sù ánnigù ni Kuan ngaw.”

<sup>4</sup> Á kinagi ni Pablo, “Jinigù ni Kuan yù ira tatolay nga nabbabáwi ta liwiliwâ da, á inituddu na gapay nira ta kurugad da yù umay nga maporián kuna. Aggina si Apu Kesu,” kun na.

<sup>5</sup> Á pakaginná ra ta meyannung kâ Apu Kesu, nanguruk ira áンna nakirigù ira má, nga metádday kâ Apu Kesu.

<sup>6</sup> Á sinámmi ni Pablo ira, á minay nira yù Mangilin nga Ikararuá, á iddâ da nangiyubobuk ta tanakuán ira nga ággubobuk nga arâd da ammu, ánnna iniyubobuk da yù inipalappâ ni Namarò nira.

<sup>7</sup> Á mapulu duá yù ira ngámin nga narigù.

<sup>8</sup> Á naggián si Pablo ta Epeso ta tallu bulán nga mangilayalayâ ta kapilliá na Kudio. Á ari naganássing nga makiubobuk nira ta meyannung sù pammagure ni Namarò ta dabbuno, tapè manguruk ira gapay kâ Apu Kesu.

<sup>9</sup> Ngam nataggâ yù nonò nayù ira kárúan, á ari ira nanguruk. Á nagubobuk ira ta narákè ta meyannung kâ Apu Kesu ta arubâng nayù ira tangapaggammungán. Á yáyù nga inipáno ni Pablo yù ira manguruk, á minay ira naggagammung ta iskuelá ni Tirano. Á kággaggaw, nangituddu si Pablo sù ubobuk ni Namaro sù iskuelá.

<sup>10</sup> Á kunniai yù pangituddu ni Pablo tánínga iskuelá ta duá ragun. Á yù ira ngámin nga tatolay nga Kudio ánnna yù ira ari Kudio nga naggián ta purubinsia na Asia, naginná ra yù bilin ni Apu Kesu.

#### *Yù ira Pitu nga Minágganánitu nga Ánná ni Eskeba*

<sup>11</sup> Á aru yù makapállâ nga pinagaddátu ni Pablo megapu sù pakáwayyá ni Namarò.

<sup>12</sup> Á yáyù nga mássiki nu mesiggek lâ yù panniu onu appì ta baggi ni Pablo, nga metuluk sù ira mâtakì, á nammapiá ira, ánnna nánawán na ira nayù ira anitu.

<sup>13</sup> Á aijan yù ira Kudio nga minágganánitu nga mappassapassiár, tapè parubád da pammapián yù ira nagunagán. Á kinagi ra, “Papanáwam mi sikayu nga anitu megapu sù ngágán ni Apu Kesu nga ilayalayâ ni Pablo.”

<sup>14</sup> Á aijan yù pitu nga lálláki, nga ánâ ni Eskeba nga kátannangán nga pári na Kudio, nga kunnian yù kingnguá ra.

<sup>15</sup> Á pagubobuk da sù anitu, simibbák yù anitu, á kinagi na nira, “Ammù gemma si Kesu, á ammù gapay si Pablo. Ngam sikayu, asinni kayu laguk?”

<sup>16</sup> Á yù tolay nga nagunagán nayù anitu, ikáddagâ na lâ kingnguá na yù ira pitu nga minágganánitu, á pinisil na yù barawásí ra ánnna pinatulù na ira ngámin. Á nattálaw ira nga nagilongán ánnna nabigibigarán.

<sup>17</sup> Á neparámak yù nesímmu ta ngámin nga tatolay nga naggián ta Epeso, nga Kudio ira ánnna yù ira ari Kudio. Á naganássing ira ánnna nerallà yù kapállâ da. Á jináyo ra si Apu Kesu ta ngámin nga lugár.

<sup>18</sup> Á yáyù nga aru gapay yù ira nangikatalà kâ Apu Kesu nga nabbabáwi ta liwiliwâ da, á ed da pinalappâ yù narákè nga kingngikingnguá ra.

<sup>19</sup> Á aru gapay yù ira nga minágganánitu ngaw, nga inammung da yù ngámin nga libru ra nga meyannung ta salamangkâ ra, á sinuggi ra ngámin ta arubâng nayù ira ngámin na tatolay. Á biniláng da yù pagá nayù libru ra nga sinuggi ra, á singkuentá nga ribu nga pirâ yù pagá na.

<sup>20</sup> Á yáyù nga nepasingan ta makáwayyá yù bilin ni Apu Namarò, á nassamâ yù bilin nga meyannung kâ Apu Kesu, á nalannapán ta aru yù ira manguruk.

#### *Yù ira Magaru nga Mapporay ta Ili na Epeso*

<sup>21</sup> Kabalin na yaw, ninonó ni Pablo ta maddagâ ta Masidonia ánnna Akeya, ta lage na umay ta Jerusalem. Á kinagi na gapay, “Sangaw nu mánawà ta Jerusalem, umayà laguk ta ili na Roma,” kun na.

<sup>22</sup> Á pinapolu na yù ira duá nga mangabbák kuna, di Timotio kâ Erasto, ta umay ira ta Masidonia. Ngam nabattáng si Pablo lâ paga ta Epeso, sù purubinsia na Asia.

<sup>23</sup> Á paggián ni Pablo paga ta Epeso, aru yù ira tatolay nga naggugúru nga napporay, ta molang ira sù metuddu nga tuttulan nayù ira tatolay nga mangikatalà kâ Apu Kesu. Á kunniai yù kesímmu na.

<sup>24</sup> Ajjan ta Epeso yù laláki nga mangngágan ta Dimitrio. Aggina yù minábbattál ta pinaláta nga paddayan na ta baddì nga sinákkapilliá ira nga meyárik ta dakal nga kapilliá nga áddasalád da kâ Artemi, nga dios da nga babay. Á pinatarabáku ni Dimitrio yù aru ira nga minábbattál ta pinaláta, á aru yù ganánsiá ra megapu sù tarabáku ra.

<sup>25</sup> Á pinaggagammung ni Dimitrio yù ira pappatarabakuan na ánnna yù ira nga negittá ta pagalerád da, á kinagi na nira, “Sikayu nga kábuluk ku, ammu tam ta napiá yù áaggiát tam megapu sawe pagalerát tam, ta maríku ittam.

<sup>26</sup> Á nasingan naw ánnna naginná naw yù akkuán nayù tolay nga mangngágan ta Pablo, ta ituddu na ta ari kuruk nga dios yù pidde na tolay. Á aru yù ira tatolay nga manguruk sù

pangilayalayâ na. Aru yù ira nga kinagumán na sawe Epeso ánnâ sù tangapurubinsia na Asia.

<sup>27</sup> Á yáyù gapu na ikaburung tam, marakè iluddè nayù ira tatolay yù ággalerát tam, á nepatalugáring ta awán sangaw ta serbi nayù dakal nga kapilliá nga pakimallatán na tolay sù kotunán nga dios tam nga babay, si Artemi, ánnâ arád da sangaw paddayawán si Artemi, nga pakimorayán na ngámin na tatolay ta Asia ánnâ tangapáddabbunán,” kun ni Dimitrio nira.

<sup>28</sup> Á pakaginná ra sù kinagi ni Dimitrio, nappatapátu ira. Á nakkatakátol ira, nga kud da, “Kotunán si Artemi nga dios ta Epeso!” kud da.

<sup>29</sup> Á mabagal yù ira tangelián. Á ginápù da di Aristarko kâ Gayo nga taga Masidonia, nga nepulù kâ Pablo sù ánge na ta Epeso. Á gikarakarerán ira nga ginuggun di Aristarko nga iniyángé ra ta dakal nga ábbúyád da.

<sup>30</sup> Á pakarámak ni Pablo ta ginápù da di Aristarko, umay nakuan makiarubáng sù ira magaru, ngam arád da inanugú nayù ira manguruk kâ Apu.

<sup>31</sup> Á yù ira kákkopun ni Pablo nga makáwayyá ta purubinsia, inibilid da kâ Pablo yù ikomára nga ari lá mappasingan ta ággagammungán, marakè akkuád da.

<sup>32</sup> Á yù ira magaru, nakkatakátol ira, nga naddurúmá yù kakágiad da nga ikatakátol da. Á nakalalang yù ira tangapaggammungán, ta arád da ammu nayù ira kárúan yù ipaggammung da.

<sup>33</sup> Á yù ira Kudio, pinarubáng da si Alekanduru, tapè aggina yù magubobuk sù ira magaru nga tatolay. Á yáyù nga initáyák na yù límá na, ta pagimammatan na ira, tapè ibukalán na nakuan nira yu nesímu.

<sup>34</sup> Ngam natákkilalád da ta Kudio si Alekanduru, á kagiad da ta aggina yù papporayád da. Á nakkatakátol ira ta duá nga oras, nga kud da, “Kotunán si Artemi nga dios ta Epeso!” kud da.

<sup>35</sup> Á pappasá na duá nga oras nga pakkatakátol da, eggá tán yù iskiribiente sù munisipuра, á nanáddak ta arubáng nayù magaru, á pinagimammà na ira. Á kinagi na nira, “Sikayu nga tangeliák ku ta Epeso, eggá panò yù tolay nga arán na ammu ta ajjan saw nittam ta Epeso yù dakal nga áddasalán ta Artemi nga kotunán, ánnâ yù mangilin nga batu nga napannâ nga naggapu ta lángi?

<sup>36</sup> Á gapu ta awán gemma ta makariri sù masingat tam ánnâ ammu tam ngámin, napiá laguk nu magimammà ittam, nga ari magapa-apurá nga mangnguá.

<sup>37</sup> Ta yawe ira tatolay nga iniyángé naw saw, awán ira ta liwâ. Ari ira nakkabukán sù áddasalát tam onu yù dios tam ngábabay.

<sup>38</sup> “Á di Dimitrio ánnâ yù ira kábulun na nga minábbattál, nu eggá yù ikeká ra nira, á mangíleké kira laguk sù ira minámmmanunnù sù ámmanunnután nayù gubinador. Umay ira ngámin makkakákeká.

<sup>39</sup> Á nu eggá paga yù ikáyâ naw, ubobugat tam laguk sangaw sù paggagammung nayù ira kátannangát tam, tapè makkakáppiá ittam lággapay.

<sup>40</sup> Ta maburungá, marakè papporayán na ittam nayù gubinador megapu sù pattannatan-nuk tam ta ággawo, ta awán ittam ta itabbák kuna.”

<sup>41</sup> Á kabalin nayù iskiribiente nga nanabarang sù ira magaru, pinapáno na ira.

## 20

### *Yù Ánge ni Pablo ta Masidonia ánnâ Garesia*

<sup>1</sup> Á pappasá nayù pattannatannuk nayù ira tatolay ta Epeso, inipámmung ni Pablo yù ira manguruk kâ Apu Kesu. Á kabalin na nanabarang nira, nánaw nira, á minay ta purubinsia na Masidonia.

<sup>2</sup> Á naddagaragâ ta ngámin nga ili, nga manabarang sù ira manguruk. Á pakáddè na ta purubinsia na Garesia,

<sup>3</sup> naggián ta tallu bulán. Á kabalin na naggián nira, naggagannuâ, ta umay nakuan mallúgán ta biray nga umay ta purubinsia na Siria. Ngam narámk na ta igagángé nayù ira Kudio. Á nabbabáwi laguk, á ninonò na ta manoli nga mattalebák ta Masidonia.

<sup>4</sup> Á sikán si Lukas nga kabbulun ni Pablo. Á ajjan gapay nikami si Sopatro nga anâ ni Pirro nga taga Beria, ánnâ di Aristarko kâ Segundo nga taga Tessalonika, si Gayo nga taga Derbi, ánnâ si Timotio, á di Tikiko kâ Taropimo gapay nga taga Asia.

<sup>5</sup> Danniaw ira nga kábulum mi, nánaw ira nga napolu ánnè nikami, á iniddagád da kami ta ili na Tarowas.

<sup>6</sup> Á ta kabalín na piestá nga pakkákám mi ta pán nga awán ta állapparán na, nánaw kami gapay ta Pilippay. Á nattakay kami ta biray. Á pabbire mi ta límá nga ággaw, jiminung kami ta Tarowas nga dumáddán nira, á naggián kami ta tangaliguán.

### *Yù Kapannâ ni Yutiko*

<sup>7</sup> Á ta púgák na Liggu, naggagammung kami ta pakimore mi kâ Namarò áんな pakkákám mi ta pán nga giddigduá mi, nga panaddamám mi ta pate ni Apu Kesu. Á nagubu-ubobuk si Pablo sù ira tatolay ta nabayák, áddè ta tangngá na gabi, gapu ta mánaw sangaw nu kapannawagán na.

<sup>8</sup> Á aru yù ira isingan sù paggagammungám mi ta utun.

<sup>9</sup> Á ajian yù bagitolay nga mangngágán ta Yutiko nga nagitubang ta bintá. Á gapu ta nabayák si Pablo nga magubobuk, nattummâ si Yutiko. Á pakkaturuk na ta napiá, napanñá ta dabbun nga naggapu ta mekatallu nga daták ta utun, nga naggagammungám mi. Á ed da inakkâ nga natayin.

<sup>10</sup> Ngam minuluk si Pablo, á inappungulán na nga pinagikkáng yù bagitolay. Á kinagi ni Pablo nira, "Ari kayu mabagabagal, ta matolayin."

<sup>11</sup> Á minuné ira ta utun. Á giddigduá ni Pablo yù pán, á nepakkákán kami. Á kabalim mi nakkákán, nakiubobuk si Pablo nira ta áddè ta pannawák. Á nánawán na ira laguk.

<sup>12</sup> Á yù bagitolay, inilabbè da nga matolayin ta bale ra, á nagayáyâ ira.

### *Ánge ni Pablo ta Miletó*

<sup>13</sup> Páno mi ta Tarowas, nabbiray kami nga minay ta Asson. Ngam nappatalay si Pablo, ta pinapolu na kami, á kinagi na nikami ta dagatam mi sangaw ta ili na Asson.

<sup>14</sup> Pakaratang na nikami ta Asson, initake mi ta biray, á minay kami ta pugu na Mitilene.

<sup>15</sup> Á pabbire mi paga nga naggapu ta Mitilene, nattalebák kami ta pugu na Kiyos ta tádday ággaw. Á sù mekaruá nga ággaw naddagâ kami ta pugu na Samos. Á sù mekatallu nga ággaw jiminung kami ta ili na Miletó.

<sup>16</sup> Ta sinalebarám mi yù ili na Epeso, gapu ta manakì si Pablo maddagâ tán, marakè mabayák kami ta Asia, ta apurádu si Pablo nga makáddè ta Jerusalem pángé na ággaw nayù piestá na Kudio nga mangngágán ta Pentekosto.

### *Pagubu-ubobuk ni Pablo sù ira Karakalán nga taga Epeso*

<sup>17</sup> Á dung mi ta ili na Miletó, jinok ni Pablo yù umay ta Epeso, tapè agálán na yù ira karakalán nayù ira tangapaggammungán ta umay ira ta gián na.

<sup>18</sup> Á labbè da ta Miletó, kinagi ni Pablo nira, "Sikayu nga taga Epeso, ammu naw yù kustombarè nikayu ta kággágaw sù paggiák ku nikayu áddè ngaw sù labbè ku ta purubinsia na Asia.

<sup>19</sup> Tumulukà nga masserbi kâ Apu, á aringà nallálâ ta passerbi kuna. Á inattamák ku lâ yù jígâ ku, mássiki nu nepallà yù daddam ku megapu sù ira Kudio nga mangigagángay nikán.

<sup>20</sup> Awán bulubugá ta inilímak ku ta pangituddù nikayu sù bilin nga mamammapiá nikayu, ta sigidángà nga nangituddu nikayu ta paggagammungán naw áんな sù ira gibbalayán naw.

<sup>21</sup> Á kinagi sù ira kagittâ nga Kudio áんな sù ira nga ari Kudio gapay ta mabbabáwi ira ta liwiliwâ da, á makipakomá ira kâ Namarò áんな manguruk ira kâ Apu Kesu Kiristu.

<sup>22</sup> "Á kunangane umayakin ta Jerusalem, ta doban nangà nayù Ikararuá ni Namarò. Á arák ku ammu yù mesimmuák ku sangaw túrin.

<sup>23</sup> Ngam ta ngámin nga ili nga paddagaták ku, ipakánnámmu nayù Mangilin nga Ikararuá nikán yù jígâ nga naparán nga attamák ku sangaw áんな yù kapukù ku sangaw túrin ta Jerusalem.

<sup>24</sup> Ngam maguray lâ yù mesimmu nikán nga jígâ, mássiki nu matayà, ikáyâ ku lâ ta palurotak ku yù ipakuá ni Apu nikán. Ta awán ta serbi nayù inángâ ku nu arák ku palurotan ngámin nga ipakuá ni Apu Kesu nikán, nga pangilayalayâ ku sù napiá nga dámak nga meyannung sù ayâ ni Apu áんな allâ na ta tatolay.

<sup>25</sup> "Á pappassapassiár ku ta gigián naw, inilayalayâ ku nikayu yù meyannung sù pamagure ni Namarò nga awán ta áddè na. Á kunangane, mánawakin, á ammù ta arán nawà masining mángin, ta aringakin manoli saw.

<sup>26</sup> Á yáyù nga kagiak ku laguk nikayu kunangane nu eggá nikayu yù tolay nga umay ta impiernu, á ure na lággapay. Arán nangà paliwatan,

<sup>27</sup> ta aringà nallálâ ta pangilayalayâ ku nikayu ta ngámin nga sinalákkuruk ni Namarò.

<sup>28</sup> Magimuguk kayu laguk, á taronán naw gapay yù ira manguruk. Sikayu yù meyárik ta mináppárák nga sinullá nayù Mangilin nga Ikararuá ta manaron sù ira manguruk, nga meyárik ta karneru nga kukuá nayù Yápu tam. Tabarangán naw ira ta napiá ánná abbágán naw ira. Ta aggira yù tatole ni Apu Namarò, nga ginátáng na sù dága nayù kukurugán nga Aná na.

<sup>29</sup> Á ammù gapay ta sangaw nu nánawát takayin, umay ta ággagammungán naw yù ira nga mangituddu nikayu ta siri. Meyárik ira ta simaron nga ayám nga mangnuá ta ayám nga masippà. Á ilogò da yù ira káruán nga kábulun naw, tapè meywáwán ira, ta awán ta allà da nikayu.

<sup>30</sup> Á duttál yù ággaw nga ajjan yù ira mangituddu nga maggapu galâ nikayu nga manguruk, á massirisiri ira, tapè melogò yù ira tatolay nga tumuttul nira.

<sup>31</sup> Á yáyù nga kagiak ku nikayu ta magimuguk kayu laguk, tapè arád da kayu ilogò. Nononopan naw yù itabarang ku nikayu ta paggiák ku nikayu ta tallu ragun, ta aringà nallálà nga nanabarang nikayu nga katággítádday ta ággaw ánná gabi, á aru yù pakkulukulé ku, gapu ta nerallà yù allà ku nikayu.

<sup>32</sup> Á ipatarot takayu laguk kâ Apu Namarò. Nononopan naw yù bilin na nga meyannung sù allà na sù ira manguruk kuna, tapè mapasigaggà yù ángnguruk naw ánná mesipà kayu sù ira tatole na, á iyawâ na gapay nikayu yù pinarán na megapu sù ira mapasigaggà nga mangikatalà kuna.

<sup>33</sup> Á ammu naw ta awán bulubugá ta pissil ku nikayu nga kuártu naw, onu buláwán naw, onu gagámi naw.

<sup>34</sup> Ammu naw ta sikán lápay yù nattarabáku nga nagalek ta áttolé mi sù ira kábuluk ku.

<sup>35</sup> Nattarabákungà, tapè ipasingak ku nikayu yù párigán naw. Ta napiá nu maláppà kayu nga mattarabáku gapay, tapè eggá yù awayyá naw nga mangabbák sù ira makapi. Nononopan naw yù kinagi ni Apu Kesu, nga kun na, Nepallà yù pagayáyâ nayù mangiyawâ sù ira magáwák ánné ta pagayáyâ nayù tolay nga mangalawâ."

<sup>36</sup> Á kabalín ni Pablo nga nagubobuk sù ira karakalán nayù ira taga Epeso, namalittúkak ira ngámin, á nakimállà ira kâ Apu.

<sup>37</sup> Á inappungulád da laguk si Pablo ánná inummataj da, á kinulukuletád da.

<sup>38</sup> Ta nakalò yù daddam da, nepatalugáring sù kinagi na nga arád da mángin masingan. Á ed da laguk nilúgán ta biray.

## 21

### *Ánge ni Pablo ta Jerusalem*

<sup>1</sup> Páno mi nira, nallúgán kami laguk ta biray, á minay kami daretiu ta pugu na Kos. Á sù mekaruá nga ággaw minay kami ta pugu na Roda. Páno mi ta Roda, nakáddè kami ta ili na Patara.

<sup>2</sup> Á dung mi ta Patara, nálek mi yù táddyángára ngára umay ta Pinisia, á yáyù nattakayám mi nga nánaw ta Patara.

<sup>3</sup> Á pakáranni mi ta pugu na Sipro, sinalebarám mi, á nánawám mi yù pugu ta jimigi mi, á nabbiray kami daretiu ta purubinsia na Siria. Á jiminung kami ta ili na Tiro, nga pangigattágád da ta kárgá na biray.

<sup>4</sup> Labbè mi ta Tiro, nálek mi yù ira manguruk kâ Apu Kesu, á naggián kami nira ta tangaliggúan. Á kinagi ra kâ Pablo ta ari umay ta Jerusalem, gapu ta pinalappâ nayù Mangilin nga Ikararuá nira yù mesimmu sangaw kuna nga jíga túrin.

<sup>5</sup> Á jmittál yù ággaw nga páno mi nira. Á yù ira maggagáttáwa nga manguruk ánná yù ira ánná da, binulud da kami áddè ta lawán na ili. Á namalittúkak kami ngámin ta karagátán, á nakimállà kami kâ Apu.

<sup>6</sup> Á kabalim mi nakimállà, kinagi mi nira, "Panawám mi kayu laguk." Á "Wan," kud da. Á nabbiray kami nga nánaw, á nanoli ira gapay ta bale ra.

<sup>7</sup> Á pabbiray mi nga naggapu ta Tiro, nakáddè kami ta ili na Tolemes. Á keggá mi ta Tolemes, em mi laguk sinullúnán yù ira nga mawwawági sù ángnguruk mi kâ Apu Kesu, á naggián kami nira ta táttagággaw.

<sup>8</sup> Á sù táddyángára, nánaw kami nira, á minay kami ta ili na Sesaria. Á naddaretiu kami ta bale ni Pilippi. Si Pilippi yù minángngilayalayâ nga nebiláng sù ira pitu nga sinullá da ngaw ta Jerusalem ta mangabbák sù ira mapulu duá. Á naggián kami kuna.

<sup>9</sup> Á ajjan yù appâ nga ánná ni Pilippi nga bábbay nga mámmagingánay. Á minámmalappâ ira ngámin, á inubobuk da yù pinalappâ ni Namarò nira.

<sup>10</sup> Á paggiám mi paga nira, minay yù laláki nga mangngágán ta Agabo, nga minámmalappâ gapay ta ubobuk ni Namarò, nga naggapu ta purubinsia na Judiya.

<sup>11</sup> Á minay si Agabo nikami, á inâ na yù barakà ni Pablo, nga inigálù na ta takki na lápay ánnâ limá na. Á kinagi na, "Yawe yù kagian nayù Mangilin nga Ikararuá, nga kunniaiw sangaw yù pangigálù nayù ira Kudio sù makábbarakà túrin ta Jerusalem, á ikeká ra sù ira ari Kudio, tapè ikarsel da," kun na.

<sup>12</sup> Á pakaginná mi sù kinagi ni Agabo, sikami ánnâ yù ira manguruk, inikomá mi kâ Pablo ta ari umay ta Jerusalem.

<sup>13</sup> Á simibbák laguk si Pablo, á kinagi na, "Ngattá, ta kuletán nawà? Ta pappanatan nawà nga paddaddamán. Ta naparánakin nga mebáluk, á umayà ta Jerusalem, mássiki nu papatáyad dangà megapu sù ángnguruk ku kâ Apu Kesu."

<sup>14</sup> Á gapu ta arám mi nakagumán ta ari umay, nattukkâ kami, á kinagi mi laguk, "Mapalurò galâ yù ikáyâ ni Apu Namarò."

<sup>15</sup> Á kabalín na paggiám mi kârì Pilippi, naggagannuâ kami, á nánaw kami nga umay gúmon ta Jerusalem.

<sup>16</sup> Á nepulù nikami yù ira káruán nga manguruk nga taga Sesaria, á niyânge ra kami ta bale ni Mason, nga tolay nga taga Sipro nga manguruk kâ Apu ta nabayágín. Á yù bale ni Mason yù naggianám mi.

#### *Pattullun ni Pablo kârì Ime*

<sup>17</sup> Á pakáddé mi ta Jerusalem, nagayáyâ yù ira manguruk nga naggián ta Jerusalem megapu sù labbè mi.

<sup>18</sup> Á sù tádday ággaw, nepulù si Pablo nikami, á em mi tullúnán di Ime. Á ajjan tán gapay yù ira karakalán nayù ira manguruk kâ Apu.

<sup>19</sup> Á kinagi ni Pablo nira, "Á kunnasi kayu, wáwwagi?" Á inistoriá na nira yù ngámin nga inipakuá ni Namarò kuna megapu sù pangilayalayâ na ta bilin ni Apu sù ira ari Kudio.

<sup>20</sup> Á pakaginná ra sù ngámin nga kinagi ni Pablo, naddayaráyw ira kâ Namarò. Á kinagi ra laguk kâ Pablo, "Wagi, narámak mungin ta ajjan jinibu nga Kudio sawe Jerusalem nga mangurugin kâ Apu Kesu. Á maláppâ ira ngámin nga manuppál ta napiá yù tunung ni Moyses.

<sup>21</sup> Á narámak da ta ituddum kanu sù ira Kudio nga nakipaggián sù lugár nayù ira ari Kudio ta likuránad da yù ituddu ni Moyses. Á ituddum kanu gapay ta arád den ipakugì yù ira ánâda, ánnâ ari iren tumuttul sù kustombare tam nga Kudio.

<sup>22</sup> Á mapporay ira támma sangaw nu marámak da ta limibbè ka saw. Anni laguk yù akkuát tam, tapè mánnámmuád da ta ari kuruk yù narámak da nga meyannung sù ituddum?

<sup>23</sup> "Á kunniaiw laguk yù ipakuá mi nikaw, á napiá nu kurugam mu yù kagiam mi, tapè arád da ka paliwatan megapu sù kustombare tam. Ajjan nikami yù appâ nga lálláki nga Kudio, nga nakitarátu kâ Namarò, á balinad da kunangan yù initabbá ra kuna.

<sup>24</sup> Mepulù ka nira laguk nga umay sù mangilin nga kapilliá, tapè tuppálan naw yù kustombare tam nga mamakarenu ta baggi naw. Á sikaw yù mappagá sù iyátáng da, tapè mappakálbu ira ta panákkilalán ta sinuppál den yù initabbá ra. Á yáyù nga mánnámmuán nayù ira tatolay ta awán ta kukurugán sù narámak da nga meyannung nikaw, nu ari galâ ta tuttulam mu gapay yù tunung ni Moyses.

<sup>25</sup> "Á ta meyannung sù ipakuá mi sù ira ari Kudio nga manguruk kâ Apu Kesu, initúrá mi nira, á arám mi nira kinagi ta tuttulad da yù kustombare tam nga Kudio. Ngam yawe lá yù kinagi mi sù túrâ mi ngaw nira, ta arád da kanan yù neyátáng ta sináddios, á arád da kanan yù dágâ ánnâ yù ayám nga ari naparága, á ari ira makiruruk sù arád da atáwa. Yáyù lá kinagi mi sù ira ari Kudio," kud di Ime kâ Pablo.

<sup>26</sup> Á sù tádday ággaw, binulun na laguk ni Pablo yù ira appâ nga tolay, á pinalurò da yù kustombare ra nga meyannung ta pitu nga ággaw nga pamakarenu ra nga Kudio. Á minay laguk si Pablo sù mangilin nga kapilliá, tapè ipakánnámmu na sù pári yù ággaw nga kabalín nayù pamakarenu ra ánnâ yù pangiyawâ da sù meyátáng megapu nira nga katággitáddy.

#### *Paggápù da kâ Pablo*

<sup>27</sup> Á naddaggun nga nappasá yù pitu nga ággo nayù pamakarenu ra, á yù ira Kudio nga taga Asia, nasingad da si Pablo sù mangilin nga kapilliá. Á initotobù da si Pablo sù ira magaru nga tatolay, á ginápù da si Pablo.

<sup>28</sup> Á nakkatakátol ira nga kud da, "Sikayu nga kagittá mi nga ginaká ni Israel, en naw kami abbágán! Ajjan saw yù tolay nga mangituddu sù mekontará nittam ánnâ yù mekontará sù

tunung ni Moyses, á ituddu na gapay yùmekontará sù mangilin nga kapilliá. Á yaw paga yù liwâ na, ta pinatallung na saw yù ira ari Kudio, á yáyù nga jinapingán na yù mangilin nga kapilliái!"

<sup>29</sup> Yáyù kinagi ra gapu ta nasingad da di Pablo ta ili nga mappulupulù kâ Taropimo nga taga Epeso. Á kagiad da ta pinatallung ni Pablo si Taropimo ta kapilliá gapay, ngam ari ga.

<sup>30</sup> Á nappatapátu yù ira tangelián nga naggugúru ta kapilliá. Á ginápù da si Pablo, á ginuggud da nga iniyángay ta lawán na kapilliá. Á dagarágâ inilitù da yù puertá na.

<sup>31</sup> Á papatáyád da nakuan si Pablo, ngam nakarámak yù kátannangán nga kapitán na suddálú nga taga Roma ta maggugúru yù ira tangelián na Jerusalem, nga mamapáyat.

<sup>32</sup> Á inagálán na yù ira aru nga suddálú ánnna yù ira kapitád da, á nakkarerá ira nga minay sù ira magaru.

Á pakasingan nayù ira tatolay sù kátannangán nga kapitán ánnna yù ira suddálú ánnna yù ira kapitád da, nattukkâ ira nga manultù kâ Pablo.

<sup>33</sup> Á jimikki yù kátannangán nga kapitán kâ Pablo, á ginápù na. Á inipegálù na ta duá nga káwák. Á iniyabbû na laguk sù ira tatolay yù ngágan na ánnna anni yù liwâ na.

<sup>34</sup> Ngam nakkakerumá yù inikatakátol da. Á gapu ta kitatannuk ira, arán na kánnámmuán yù ipamaliwâ da kuna. Á yáyù nga jinok na yù ira suddálú ta iyángé ra si Pablo sù kámpu ra.

<sup>35</sup> Á pakáddè da ta áddán na paggianád da, kináttu nayù ira suddálú si Pablo, tapè ilillì da sù pore nayù ira magaru,

<sup>36</sup> gapu ta sinuttlú da ira nayù ira magaru nga maggugúru paga ánnna makkatakátol, nga kud da, "Papatáyat tamin!"

<sup>37</sup> Á paddaggud da pangitallung kâ Pablo ta paggianád da, kinagi ni Pablo sù kátannangán nga kapitán, "Anugutam mà bì, ta aijan yù kagiak ku nakuan nikaw." Á nakaddák yù kapitán, gapu ta Gareko yù ággubobuk ni Pablo ta pagubobuk na kuna. Á kinagi nayù kapitán kâ Pablo, "Ammum yù ággubobuk na Gareko?

<sup>38</sup> Ari sikaw laguk yù laláki nga taga Egipto? Ta kagiak ku ta sikaw yù namappatapátu ánnna nangituluk ta appátaribu nga tulisán nga nagármas túrin ta kalállammatán!" kun nayù kapitán.

<sup>39</sup> Á kinagi ni Pablo kuna, "Ari sikán, ta Kudiongà nga taga Tarsu, nga dakal nga ili sù purubinsia na Silisia. Á ikomá bì nikaw ta anugutam mà nga makiubobuk sù ira tatolay."

<sup>40</sup> Á inanugù nayù kapitán. Á nanáddak si Pablo laguk ta áddán, á initáyák na yù lím na, tapè magimammà yù ira tatolay. Á pagimammà da, nagubobuk si Pablo ta Kebru, nga ággubobuk na Kudio.

## 22

### *Yù Panabbák ni Pablo sù ira Kudio*

<sup>1</sup> "Sikayu nga giriámán ánnna wáwwagì," kun ni Pablo sù ira magaru nga Kudio, "ginnán naw bì yù itabbák ku nikayu."

<sup>2</sup> Á pakaginná ra sù ággubobuk da nga Kebru, nagimammà ira, tapè ginnád da ta napiá. Á kinagi ni Pablo,

<sup>3</sup> "Síkán, Kudiongà. Á yù ili na Tarsu yù neyanaták ku sù purubinsia na Silisia. Á yawe ili na Jerusalem yù naddakalák ku. Á naggigiámmungà saw, á si Gamaliel yù nangituddu nikán. Inituddu na ta napiá yù ngámin nga tunung nayù ira ngaw naggaká nittam. Á maláppakà nga manuppál sù ipakuá ni Namarò nikán, nga kunnay nikayu saw kunangane.

<sup>4</sup> "Á jinigirigâ ku yù ira manguruk kâ Kesu, áddè ta pate nayù ira káruán. Á ginápù ku yù ira káruán, nga lálláki ánnna bábbay, á inipebáluk ku ira.

<sup>5</sup> Á yù kotunán na pári ánnna yù ira giriámán, aijan yù awayyá ra nga massistígu ta kuruk yù kagiak ku, ta aggira gemma yù nangiyawâ nikán ta túrâ da sù ira wáwwagi tam nga Kudio túrin ta Damasku. Á yáyù iniyángé túrin, ta ek ku gaputan ánnna ipabáluk yù ira manguruk kâ Kesu, nga ilabéé ku sangaw saw Jerusalem, tapé maparigá ira.

<sup>6</sup> "Á pappángè ku ta Damasku, minárranningà ta ili ta tangngá na ággaw. Á inikáddagâ lâ nanawagánà megapu sù nawák nga naddalingárang nga naggapu ta lángì.

<sup>7</sup> Á napalakagá, á naginná yù ngárál nga magubobuk nikán, nga kun na, 'Saulo, Saulo, ngattá ta iddâ mà lâ jigirigátan?'

<sup>8</sup> Á simibbágà, á kuk ku, 'Asinni ka, Apu?' Á kinagi na nikán, 'Sikán si Kesu nga taga Nasaret nga iddâ mu lâ jigirigátan.'

<sup>9</sup> Á yù ira kábuluk ku, nasingad da yù nawák nga maddalingárang, ngam arád da naginná yù magubobuk nikán.

<sup>10</sup> Á iniyabbû ku kuna, ‘Apu, anni yù ipakuám nikán?’ Á kinagi ni Apu nikán, ‘Gumikkáng ka, á umay ka ta Damasku, ta mepakánnámmu nikaw tán yù ngámin nga ipakuâ nikaw.’

<sup>11</sup> Á gapu ta nabbulingà megapu sù paddalingárang nayù nawák, kinering dangà nayù ira kábuluk ku, á iniyángé rangà ta Damasku.

<sup>12</sup> Á naggián ta Damasku yù tolay nga mangngágan ta Ananiâ, nga tumuttul sù ngámin nga tunung tam nga Kudio. Á agina yù pakimorayán nayù ira ngámin nga Kudio nga maggián ta Damasku.

<sup>13</sup> Á minay si Ananiâ nga jimikkì nikán, á kinagi na nikán, ‘Saulo nga wagì, makasingan ka mángin.’ Á dagarágâ nakasinganakin, á nasingak ku si Ananiâ.

<sup>14</sup> Á kinagi na nikán, ‘Si Namarò nga pakimorayán nayù ira naggaká nittam, sinullà na ka, tapè sikaw yù pangipakánnámmuán na sù ipakuá na. Á yáyù nga sinalákkuruk na ta sikaw yù makasingan sù Katunungán nga masserbi kuna, áんな sikaw yù makaginná sù ubobuk na.

<sup>15</sup> Ta sikaw yù doban na ta mangipakánnámmu sù ngámin nga nasingam mu áんな naginnám ta ngámin nga tatolay.

<sup>16</sup> Á anni laguk yù iddagám mu? Arà! Gumikkáng ka, á makimállà ka kâ Apu Kesu nga Yápum, tapè pakomán na ka sù liwiliwâ mu, á mapparigù ka, nga panákkilalán ta pangikatalà mu kâ Apu,’ kun ni Ananiâ nikán.

<sup>17</sup> Á labbè ku ta Jerusalem, minayà nakimállà sù mangilin nga kapilliá. Á pakimállà ku sù kapilliá,

<sup>18</sup> nappasingan nikán si Apu, á kinagi na nikán, ‘Arà! Alistuám mu mánaw sawe Jerusalem, marakè akkuád da ka nayù ira Kudio, ta arád da kurugan yù kagiam mu nira nga meyannung nikán,’ kun na nikán.

<sup>19</sup> ‘Apu,’ kuk ku kuna, ‘kurugad dangà támma, ta ammu ra ta minayà ta ngámin nga kapilliá, á ginapagápù ku yù ira nga manguruk nikaw, á inibáluk ku ira áんな pinalapaiú ku ira.

<sup>20</sup> Á sù pampáte ra kâ Esteban megapu sù pangilayalayâ na ta meyannung nikaw, nanáddagà nga naggíraw sù pate na, ta inanugù ku yù kingnguá ra áんな sinaronák ku yù barawási nayù ira nga namapátay kuna,’ kuk ku kâ Apu.

<sup>21</sup> Ngam kinagi ni Apu nikán, ‘Máñaw ken laguk, ta dobat taka kunangane ta umay ka mangilayalayâ sù bilik ku sù ira ari Kudio ta arayyu nga lugár,’ kun na.”

<sup>22</sup> Á yù ira magaru nga Kudio, nagginná ira sù kinagi ni Pablo. Ngam ta pakaginná ra ta ánge na sù ira ari Kudio, naporay ira, á pine ra nagagga-aggay, nga kud da, “Papatáyat tam laguk, ta awán ta kepángngatán na nga matolay.”

<sup>23</sup> Á iniwawwák da yù barawási ra áんな nagagga-aggay ira. Á iniwári da yù káppù na dálan ta utun, gapu ta kataki na nonò da.

#### *Yù Keyarubáng ni Pablo sù Kapítán na Suddálú nga taga Roma*

<sup>24</sup> Á yù kátannangán nga capitán na suddálú, pakasingan na sù pore nayù ira Kudio, pinatallung na si Pablo ta paggianád da. Á jinok na yù ira suddálú ta paligatad da si Pablo, tapè palappátan na nira yù liwâ na nga ipappore nayù ira tatolay.

<sup>25</sup> Ngam ta pangigakkâ da kâ Pablo, lage ra kuna mamaligà, nagubobuk si Pablo sù gadde nayù kapitán nga nanáddak ta aranni kuna, á kinagi na, “Awayyá naw panò mappaligâ sù tolay nga taga Roma nga ari paga nabestigán?”

<sup>26</sup> Á pakaginná nayù kapitán ta taga Roma si Pablo, en na kinagi sù kátannangán nga kapitád da, “Anni laguk yù akkuát tam, ta taga Roma yawe tolay.”

<sup>27</sup> Á minay laguk yù kátannangán, á iniyabbû na kâ Pablo, “Kuruk nga taga Roma ka?” “Wan, kuruk,” kun ni Pablo.

<sup>28</sup> Á kinagi nayù kátannangán, “Aru yù ginástu ta papel nga permâ, tapè mebilángâ sù ira taga Roma.” Á simibbák si Pablo, á kinagi na, “Ngam sikán, yáyù nakeyanaták ku.”

<sup>29</sup> Á yù ira suddálú nga mággè mamaligà kuna, pakaginná ra ta kuruk nga taga Roma si Pablo, dagarágâ nga nánawád da. Á naburung gapay yù kátannangán nga kapitán, ta pakánnámmu na ta taga Roma si Pablo, ta yù kapitán gemma yù naddok sù ira suddálú nga nangigakkâ kuna.

#### *Si Pablo ta Arubáng nayù ira Minámanunnù*

<sup>30</sup> Á gapu ta kuruk nga ikáyâ nayù kátannangán nga kapitán paga nga kánnámmuán yù ipangikekâ nayù ira Kudio kâ Pablo, á sù táddy ággaw pinaggagammung na yù ira

kátannangán nga pári nga Kudio áンna yù ira ngámin nga giriámán nga minámmanunnù. Á pinalawán na si Pablo, nga iniyarubáng na nira.

## 23

<sup>1</sup> Pakiarubáng ni Pablo sù ira Kudio nga minámmanunnù, inimámmatán na ira ta napiá, á kinagi na, "Wáwwagi, ammu ni Namarò ta napiá yù nonò ku addè kunangane, ta awán bulubugá ta narákè nga kingnguá," kun ni Pablo sù ira minámmanunnù.

<sup>2</sup> Ngam si Ananiâ nga kotunán na pári, pakaginná na sù kinagi ni Pablo, inipalappák na sù ira nanaging kuna.

<sup>3</sup> Á kinagi ni Pablo kuna, "Kunnian gapay ipalappák na ka ni Namarò sangaw, sikaw nga agippiái. Mamanunnù ka nikán ta meyannung sù tunung ni Namarò nakuan, ngam nakaliwatám mu galá yù tunung ta inipalappák mà," kun ni Pablo kuna.

<sup>4</sup> Á yù ira nga nanaging kâ Pablo, kinagi ra kuna, "Ngattá, ta pakkakagiám mu yù kotunán na pári?"

<sup>5</sup> Á kinagi ni Pablo nira, "Wáwwagi, arák ku ammu ta aggina yù kotunán na pári! Á nu ammu nakuan, arák ku nakuan sibbák, ta ajjan yù netúrâ sù libru ni Namarò ñga kunniauw, 'Ari kayu magubobuk ta narákè nga meyannung sù mammaguray nikayu..,\*"

<sup>6</sup> Á inikádagâ na lâ natákál si Pablo ta dumá yù sinuttul nayù ira káruán nga minámmanunnù, ta ajjan yù ira Sadusio, á Parisio yù ira káruán. Á inikátol na yù kinagi na nira, "Wáwwagi! Sikán, á Parisiongà, ánnna Parisio gapay yù ira darakal ku. Á yáyù nga mangurugâ gapay ta pagínnanolayan ni Namarò yù ira námmatay. Á yáyù ipangikeká ra nikán ta arubáng naw."

<sup>7</sup> Á pakkagi ni Pablo ta aggina lápay yù Parisio, dagarágâ nga nakkakátabbák yù ira Parisio ánnna yù ira Sadusio, gapu ta massisiinná ira ta nono.

<sup>8</sup> Ta yù ira Sadusio, kagiad da ta ari magínnanolay yù ira námmatay. Á kagiad da gapay ta awán ta ari masingan nga daroban ni Namarò onu tanakuán nga ari masingan, ánnna awán ta ikararuá na tolai. Ngam yù ira Parisio, ammu ra ngámin dannian.

<sup>9</sup> Á yáyù nga makkakápererang ira ta ubobuk, ta kagumánañ da nakuan yù ira káruán. Á kitatannuk ira ngámin nga magubu-ubobuk. Á gimilkkáng laguk yù ira káruán nga mesturu, nga Parisio yù tuttulad da, á kinagi ra, "Arám mi nálek yù liwâ nayù tolai. Ajjan támma yù ari masingan nga nagubobuk kuna."

<sup>10</sup> Á nappanà yù paddaráma ra, á naburungin yù kapitán nayù ira suddálu, maraké piissipissángan nayù ira tatolay si Pablo. Á jinok na laguk yù ira suddálu ta ed da gubatan si Pablo, ta ililli da nga iyángay ta kámpu ra.

<sup>11</sup> Á ta gabi, nappasingan si Apu Kesu kâ Pablo. Á kinagi na kuna, "Ari ka maganássing. Pataggatam mu yù nonò mu, ta umay ka sangaw mangilayalayâ ta meyannung nikán sù ili na Roma, ta kunnay ta pangilayalayâ mu sawe ili na Jerusalem."

### Pangigagángay nayù ira Kudio kâ Pablo

<sup>12</sup> Á ta pannawák, naggagammung yù ira Kudio nga nangigagángay nu kunnasi yù ámmapáte ra kâ Pablo. Á nappagássingán ira ta ari ira kumán onu ámminum addè ta arád da paga napapátyay si Pablo.

<sup>13</sup> Á matturù ta appátapulu yù ira nattatarátu.

<sup>14</sup> Á minay ira sù ira kátannangán nga pári nayù ira Kudio ánnna sù ira giriámán. Á kinagi ra, "Napasisaggâ yù pagássingám mi ta ari kami kumán nu arám mi paga napapátyay si Pablo.

<sup>15</sup> Á sikayu ánnna yù ira minámmanunnù, sestemán naw laguk nga ipeyángay si Pablo kâ kapitán sawe ámmanunnután, ta kunnay ta bestigán naw paga. Ngam maggián kami ta aggik na dálán nga naparapártay nángay.

<sup>16</sup> Á ajjan yù kánakán ni Pablo, nga anáñ na wagi na nga babay, á narámak na ta tanabád da sangaw si Pablo ta dálán. Á minay laguk kâ Pablo sù kámpu ra, ta iránuk na kuna.

<sup>17</sup> Á inagálán ni Pablo yù tádday nga kapitán, á kinagi na kuna, "Iyángem bi yawe bagitolay sù gián nayù kapitán mu, ta ajjan yù iránuk na kuna."

<sup>18</sup> Á iniyángé na laguk sù kátannangán na, á kinagi na kuna, "Si Pablo nga nebáluk, ipeyángé na nikán yawe bagitolay nikaw, ta ajjan kanu yù kagian na nikaw."

<sup>19</sup> Á kinering nayù kapitán yù bagitolay, á nallilli ira ta baddì. Á iniyabbû na kuna, "Anni yù iránuk mu nikán?"

\* 23:5 Exodus 22:28

<sup>20</sup> Á kinagi nayù bagitolay sù kapitán, "Yù ira Kudio, nattatáddy yù nonò da nga ipeyángéra nikaw si Pablo sangaw nu ummá ta umay túrin ta ámmannutád da, á kagiad da nikaw ta ikáyâ da bestigán paga ta napiá.

<sup>21</sup> Ngam arám mu ira kurugan, ta ajjan matturù ta appátapulu ira nga magiddak nga mattanak kuna ta dálan. Nappagássingán ira ta ari ira kumán onu ámmínun áddè ta arád da paga napapátay si Pablo. Á naparán iren nga mattanak. Á iddagád da lâ yù kagiam mu."

<sup>22</sup> Á kinagi nayù kapitán sù bagitolay, "Arám mu kakágian ta inipakánnámmum nikán." Á pinapáno na laguk yù bagitolay.

#### *Ketuluk ni Pablo kâ Gubinador Pelik ta Sesaria*

<sup>23</sup> Á ta kapapáno nayù bagitolay, inagálán nayù kátannangán nga kapitán yù duá nga kapitán, á kinagi na nira, "Paránan naw yù duá gatù nga suddálú ánná pitupulu nga makkabáyu ánná duá gatù nga nagármas ta duppil. Á mánaw kayu sangaw nu gabi nu alas nuebi nga mangiyángay kâ Pablo ta ili na Sesaria.

<sup>24</sup> Á pakkabáyuan naw gapay si Pablo. Á taronán naw ta napiá, tapè awán ta mesimmu kuna áddè ta ilabbé naw túrin kâ Gubinador Pelik," kun nayù kátannangán nga kapitán.

<sup>25</sup> Á initúrâ nayù kátannangán nga kapitán gapay yù iránuk na kâ Gubinador, nga initubbk na sù ira suddálú. Yawe itúrâ na.

<sup>26</sup> "Síkán nga mattúrâ si Kalodio Lisias. Á itúrâ ku nikaw, Gubinador Pelik, nga Maráyaw nga Gubinador. Á kunnasi kayu laguk?

<sup>27</sup> Á yawe tolay nga dobak ku nikaw, aggina yù ginápù nayù ira Kudio gangù, á papatáyad da nakuan. Á pakánnammù ta taga Roma yù tolay, jmittálà nga mepulù sù ira suddálú, á iniyígù ku tapé ari matay.

<sup>28</sup> Á ikáyâ ku nga mánnámmuán yù pangikeká ra kuna. Á yáyù nga iniyángè laguk sù ámmanunnután nayù ira Kudio.

<sup>29</sup> Á nánnámmuák ku galâ ta awán ta liwâ na, á ari mepángngà nu mapapátay onu mebáluk. Yá ipappore ra galâ kuna yù Meyannung sù tunung da.

<sup>30</sup> Á pakaginnâ ta ajjan yù ira mangigagángay kuna nga mattanak nga mamapátay kuna, dagarágâ nga inipeyángé nikaw. Á kinagi gapay sù ira mamaliwâ ta umay ira mangikeká ta arubâng mu." Yáyù áddè nayù túrâ nayù kapitán sù Gubinador.

<sup>31</sup> Á yù ira suddálú, kinuruk da yù initaddán nayù kapitán, á inituluk da si Pablo ta ili na Antipatris tán nga gabi.

<sup>32</sup> Á ta pannawák, á yù ira suddálú nga nappatalay, nattoli ira ta kámpu ra ta Jerusalem, á nabattáng yù ira suddálú nga makkabáyu, ta aggira yù mangituluk kâ Pablo sù Gubinador.

<sup>33</sup> Á labbè da ta Sesaria, iniyawâ da sù Gubinador yù túrâ nayù kapitán ánná iniyawâ da gapay kuna si Pablo.

<sup>34</sup> Á pabbibbik nayù Gubinador sù túrâ, iniyabbû na kâ Pablo nu anni yù purubinsia na. Á "Sílisia," kun ni Pablo.

<sup>35</sup> Á kinagi na laguk kâ Pablo, "Bestigát taka sangaw nu lubbè yù ira mangikeká nikaw." Á inipaguárdiá na si Pablo sù palásiu nayù ngaw Patul Erodo.

## 24

#### *Pangikeká nayù ira Kudio kâ Pablo*

<sup>1</sup> Á paggián ni Pablo ta Sesaria ta límá nga ággaw, á limibbè di Ananiâ nga kotunán na pári ánná yù ira kárúán nga giriámán, ánná yù abugádu nga mangngágan ta Tertulo. Á minay ira sù Gubinador, ta ikeká ra si Pablo.

<sup>2</sup> Á inipeyarubâng da laguk kâ gubinador si Pablo, á si Tertulo nga abugádu yù magubobuk.

Á namegapu si Tertulo nga mangiránu kù ipangikeká ra kâ Pablo. Á kinagi ni Tertulo, "Maráyaw nga Apu Gubinador Pelik, magimammà kami nga maggián sawe purubinsia megapu sù napiánga pammagurem nikami. Á aru yù ira tunung nga inulim ta napiá megapu nikami, tapè mammapiá yù ágga-ággíam mi.

<sup>3</sup> Á sikami ngámin, tákkilalám mi ta napiá yù ángngabbák mu nikami ta ngámin nga lugár, á nepalla yù pabbalabálá mi nikaw ta kággággaw.

<sup>4</sup> "Á arám mi ikáyâ ta mataláttán ka, á ikomâ lâ nikaw ta pasensián kami bì, tapè ginnám mu yù pangikeká mi sawe tolay.

5 Ta ammu mi ta aggina yù mamappatapátu sù ira Kudio ta ngámin nga lugár, tapè maddaráma ira. Á aggina yù maddok sù ira tatolay nga tumuttul sù inituddu nayù tolay nga taga Nasaret.

6 Á dapingan na nakuan yù mangilin nga kapilliá, ta akkuán na nakuan yù ari mepángngà. Ngam ginápù mi, á gapu ta nalliwá sù kustombare mi, panunnutám mi nakuan ta kunnay sù ituddu nayù tunung mi.

7 Ngam minay si Kapitán Lisias, á ginubâ na nikami.

8 Á sinaddánán na kami ta umay kamí mangikeká ta arubáng mu. Á nu bestigám mu lápay, mánnamuám mu lágapay yù ngámin nga liwâ na nga ipangikeká mi kuna," kun nayù abugádu sù Gubinador.

9 A yù ira ngámin nga Kudio nga kábulun nayù abugádu, nakuwan ira ta kuruk ngámin yù kinagi na.

#### *Yù Panabbák ni Pablo ta Arubáng ni Gubinador Pelik*

10 Á pinayápayán na laguk nayù Gubinador si Pablo ta magubobuk nga tubbák nira. Á kinagi ni Pablo, "Apu Gubinador, ammù ta sikaw yù mamanunnù sawe purubinsia mi nga Kudio ta nabayágin nga dağun, á yáyù nga magayáyákà nga tubbák sù pangikeká ra nikán ta arubáng mu.

11 Á nu damágam mu nira, ari gemma natturù ta mapulu duá nga ággaw ngaw yù ángè ta Jerusalem, tapè makimorayà kâ Namarò ta mangilin nga kapilliá.

12 Á arád dangà gemma naratang nga makiriri sù ira tatolay, á arák ku ira gapay pappatapatuan ta ili onu sù mangilin nga kapilliá onu sù ira ngámin nga káruán nga ággagammungád da.

13 Á awán gapay ta mepasingad da, tapè pasikkálam mu nu kuruk yù ipangikeká ra nikán.

14 "Ngam yaw lâ ipalappâ ku nikaw, ta kuruk nga makimorayà kâ Namarò nga pakimorayán nayù ira naggaká nikami. Á kurugak ku yù inituddu ni Apu Kesu, nga kagiad da ta ari kuruk. Á kurugak ku gapay yù ngámin nga tunung ni Moyses áンna yù initúrâ nayù ngaw ira ábbilinán ni Namarò.

15 Á aijan yù iddanamák ku nga kunnay sù iddanamád da gapay nayù ira mangikeká nikán, nga paginnanolayan ni Namarò yù ira ngámin nga námmatay, mássiki yù ira napiá áンna yù ira naráké gapay.

16 Á yáyù nga magimugugá, tapè napiá lâ yù akkuák ku megapu sù ira tatolay, á aringà mappasirán ta arubáng ni Namarò áンna yù ira tatolay.

17 "Á nabayágin nga aringà minay ta Jerusalem. Á yáyù nga minayà, tapè ituluk ku yù ilimù mi su ira ikáttole mi nga pobare áンna mangiyátángá kâ Namarò.

18 Á keggâ sù mangilin nga kapilliá, narángnganád dangà nga napakarenuánin, ta namalurokakin sù kustombare mi. Á awán ta magaru nga tatolay nga namulupulù nikán, á awán ta pinappatapátu.

19 "Ngam aijan tân yù ira Kudio nga taga Asia, á nu eggá nakuan yù liwâ ku nga ikáyâ da nga ipangikeká nikán, aggira nakuan yù minay ta arubáng mu. Ngam awán nira nga minay saw ta mangikeká nikán.

20 Á yáyù nga ipobobuk mu sù ira minay, ta ammu ra gapay ta awán ta nálek da nga liwâ ku ta keyarubáng ku sù ira minámmunnù ta Jerusalem.

21 Ta yawe lâ ipangikeká ra nikán, yù inikátol ku ta arubáng da ta pamestigá ra nikán. Ta inikátol ku nga kinagi nira, 'Mangurugá gapay ta paginnanolayan ni Namarò yù ira námmatay.' Yáyù áddè nayù initabbák ni Pablo kâ Gubinador Pelik.

22 Ngam aru yù nánnámuán ni Gubinador Pelik nga meyannung sù inituddu ni Apu Kesu Kiristu, á yáyù nga inipappánná na yù ira mangikeká. Á kinagi na nira, "Sangaw nu lubbè si Kapitán Lisias, balinak ku yù pamestigá kâ Pablo." Á pinapáno na ira.

23 Á kinagi na laguk sù kapítan ta ipaguárdiá na si Pablo, ngam kunnay lâ ta álliuk, nga arán na pukutan. Á kinagi na gapay ta arán na ipugik yù ira kákkopun na nga umay mangituluk sù awágan na.

#### *Yù Keyarubáng ni Pablo kári Pelik kâ Durusila*

24 Á ari nabayák, á minay si Gubinador Pelik nga nepulù kâ Durusila nga atáwa na. Á Kudio si Durusila. Á inipágál da si Pablo, tapè ginnád da yù kagian na nga meyannung sù ángnguruk na kâ Apu Kesu Kiristu.

25 Á nagubobuk si Pablo gapay ta meyannung sù napiá nga ipakuá ni Namarò ta tolay áンna yù máwák na tolay nga gaggarán yù baggi na, nga ari tumulù sù karagâ na nga naráké,

á kinagi na gapay yù Meyannung sù ággaw nga pamanunnù ni Namaro ta ngámin nga tatolay. Á pakaginná ni Pelik, naganássing ánná naburung, á kinagi na kâ Pablo, "Kustungin. Awayyám nga mánaw laguk. Agálát taka má sangaw nu matángngák ku."

<sup>26</sup> Ta ikáyâ ni Pelik gapay nu iddán na nakuan ni Pablo ta kuártu, á yáyù nga sigídá inipágál na si Pablo ta makiubobuk kuna.

<sup>27</sup> Á ta pappasá na duá ragun, napatalián si Pelik nga gubinador, á si Porsio Pesto yù táli na. Á gapu ta inikáyâ ni Pelik nga pagayáyatán yù ira Kudio, yáyù nga inibattáng na si Pablo sù ábbalurán.

## 25

### *Yù Keyarubáng ni Pablo kâ Gubinador Pesto*

<sup>1</sup> Á jímittál laguk si Pesto ta Sesaria, nga maggubinador ta purubinsia na. Á pappasá na tallu nga ággaw, minay si Pesto ta Jerusalem.

<sup>2</sup> Á keggá na ta Jerusalem, minay kuna yù ira kátannangán nga pári ánná yù ira makáwayyá nga Kudio, ta ikeká ra si Pablo.

<sup>3</sup> Á inikomára kâ Pesto ta ipeyalí na si Pablo ta Jerusalem. Yáyù lâ kinagi ra kâ Pesto, nga sesestémára lâ, ta igagére ra nga tanabán nga papatáyan si Pablo ta dálan.

<sup>4</sup> Ngam simibbák si Pesto, á kinagi na nira, "Ajjan si Pablo nga napukù ta Sesaria, á manolingà sangaw tû.

<sup>5</sup> Mepulù kayu laguk nikán, sikayu nga makáwayyá, ta túrin lâ yù pangikekán naw kuna nu eggá yù liwâ na," kun nayù gubinador nira.

<sup>6</sup> Á naggián nira paga si Gubinador Pesto ta Jerusalem ta matturù nga tangaliguán, á nanoli ta Sesaria. Á sù táddyá ággaw, nagitubang ta ámmanunnután, á inipeyángé na si Pablo ta arubáng na.

<sup>7</sup> Á labbè ni Pablo ta ámmanunnután, niletungán nayù ira Kudio nga taga Jerusalem, nga mangikeká kuna ta aru nga narákè, ngam awán ta ipasingad da kâ gubinador, tapè ammu na nu kuruk yù kinagi ra kuna.

<sup>8</sup> Á simibbák laguk si Pablo, á kinagi na, "Awán bulubugá ta liwâ ku sù tunung mi nga Kudio onu sù mangilin nga kapilliá onu kâ Patul Sisar ta Roma."

<sup>9</sup> Ngam si Pesto, gustu na mamagayáyá sù ira Kudio, tapè makikopun ira kuna, á yáyù nga iniyabbú na kâ Pablo, "Ikáyâ mu panò nga umay ta Jerusalem, tapè panunnutát taka tân ta Meyannung sù ipangikeká ra nikaw?"

<sup>10</sup> Á simibbák laguk si Pablo, á kinagi na sù gubinador, "Ajjanà gemma sawe arubáng mu. Á yawe lâ yù ámmanunnután ni Patul Sisar, á sikaw gemma yù sinullà na nga mamanunnù. Awán ta liwâ ku sù ira Kudio, á yáyù gemma amnum ta napiá.

<sup>11</sup> Á nu eggá nakuan yù liwâ ku, nga awayyám nga ipampápte nikán, itulù ku nakuan yù baggi nikaw. Ngam ari gemma kuruk yù pangikeká ra nikán, á yáyù nga awán ta tolay nga makáwayyá nga mangiyawâ nikán nira. Á ikáyâ ku laguk ta umayà makipanunnù kâ Patul Sisar," kun ni Pablo kâ Gubinador Pesto.

<sup>12</sup> Á kabalin ni Pesto nakiubobuk sù ira kábulun na nga mamanunnù, kinagi na kâ Pablo, "Kinagim ta makipanunnù ka kâ Patul Sisar, á aggina laguk yù mamanunnù nikaw. Ipeyángé taka sù gián na."

### *Yù Keyarubáng ni Pablo kâri Patul Agripa kâ Bernis*

<sup>13</sup> Á pappasá na tangaliguán támma onu matturù ta baddì, limibbè ta Sesaria di Patul Agripa kâ Bernis, ta ed da tullúnán si Gubinador Pesto ta kabagu na nga naggubinador.

<sup>14</sup> Á gapu ta naggián ira ta nabayák, kinagi ni Pesto sù patul yù Meyannung kâ Pablo, nga kun na, "Ajjan saw yù tolay nga inibattáng ni Pelik nga inibáluk na.

<sup>15</sup> Á ta keggá ta Jerusalem, kinagi nayù ira kátannangán nga pári nga Kudio ánná yù ira griámán yù Meyannung kuna, á gustu ra ta pagikaruak ku ta patay.

<sup>16</sup> Ngam kinagi nira, 'Ari yù kustombare mi nga taga Roma nga mamanunnù ta tolay nu ari bì olu makiarubáng sù ira mangikeká kuna, tapè tabbagán na yù pangikeká ra kuna,' kulku nira.

<sup>17</sup> Á sù ánge ra saw, arák ku inipappánná yù pamanunnù ku kuna. Sù táddyá ággaw, nagitubangà sù ámmanunnután, á inipágál ku yù tolay ta meyarubáng nikán.

<sup>18</sup> Á panáddak nayù ira mangikeká kuna ta arubáng ku, kagiak ku ta ikeká ra támma megapu ta narákè nga kingnguá na. Ngam awán ta kinagi ra nga kuruk nga liwâ na.

<sup>19</sup> Yá lâ ipappore ra kuna ta nakkakápereperang ira ta meyannung ta ángnguruk da sù kustombare ra nga Kudio ánná yù meyannung sù ngaw tolay nga natay nga mangngágán ta Kesu, nga kinagi ni Pablo ta naginnanloyin.

<sup>20</sup> Á gapu ta arák ku ammu mamestigá sù meyannung ta kustombare ra, iniyabbú ku kâ Pablo nu gustu na umay ta Jerusalem, tapè yáyú pamanunnuták ku kuna.

<sup>21</sup> Ngam molang si Pablo, ta gustu na maggián lâ saw nga maguárdián, tapè si Patul Sisar yù mamanunnù kuna. Á yáyú ipaguárdiá áddè ta arák ku ipeyángay kâ Patul Sisar,” kun ni Gubinador Pesto kâ Patul Agripa.

<sup>22</sup> Á kinagi ni Patul Agripa kâ Pesto, “Ikáyâ ku gapay nakuan tángngagan yù kagian nayù tolay.” Á kinagi ni Pesto sù patul, “Á ginnám mu sangaw nu ummá,” kun na.

<sup>23</sup> Á ta tádday ággaw, nabbisti di Patul Agripa kâ Bernis, á nammártiá ira nga minay ta ámmanunnután nga nappupulù sù ira kapítan na suddálú ánná yù ira maríku nga makáwayayá ta ili. Á ta paddok ni Gubinador Pesto, iniyángé ra si Pablo ta arubáng da.

<sup>24</sup> Á kinagi ni Gubinador Pesto, “Patul Agripa ánná sikayu ngámin nga kábulun na saw, innan naw yù tolay ta napiá. Ngámin yù ira Kudio nga ajian ta Jerusalem ánná yù ira nga maggián sawe ili tam gapay, ikeká ra, ánná ikatakátol da nga kagian ta ipapapátè, ta ari kanu mepángngà nga matolay.

<sup>25</sup> Ngam pamestigâ kuna, awán ta liwâ na nga nálek ku nga ipamapátè kuna. Á gapu ta umay makipanunnù kâ Patul Sisar, yáyú nga ipeyángè sangaw kâ Patul Sisar.

<sup>26</sup> “Ngam arák ku ammu yù iránuk ku nga itûrâ sù yáypù nga meyannung sù tolay. Á yáyú gapu na nga iyarubáng ku nikayu, talugáring nikaw, Patul Agripa, tapè bestigám mu gapay, á kagiam mu nikán yù ipamaliwâ da kuna, nga itûrâ ku kâ Patul Sisar ta Roma.

<sup>27</sup> Ta ari mepángngà ta urè nu ipeyángè yù nebáluk kâ Patul Sisar, nu arák ku gapay kagian yù liwâ na nga pangikeká ra kuna,” kun ni Gubinador Pesto.

## 26

### *Panabbák ni Pablo sù Pangikeká ra ta Arubáng ni Patul Agripa*

<sup>1</sup> Á pamegapu ni Patul Agripa mabbestigá kâ Pablo, kinagi nayù patul kuna, “Anugutat taka nga tubbák megapu sù baggim ta pangikeká ra nikaw.” Á initáyák na laguk ni Pablo yù limá na, á kinagi na,

<sup>2</sup> “Patul Agripa, magayáykâ ta ággawo, ta sikaw yù manángngák sù itabbák ku tayù pangikeká ra nikán nayù ira ikáttolle ta nga Kudio.

<sup>3</sup> Nepatalugáring ta sikaw yù makánnámmu ta ngámin nga kustombare tam nga Kudio ánná yù ngámin nga ariríri tam. Á pasensiám mà bi, á ginnám mu yù kagiak ku nikaw.

<sup>4</sup> “Yù ira ngámin nga Kudio, ammu ra ta napiá yù nonò ku ánná yù kustombarè ta áddè ngaw sù kabaddì ku, ta naggíánà nira sù paggiák ku ta Tarsu ánná ta Jerusalem.

<sup>5</sup> Ammu rangà ta nabayágim, á nu gustu ra nakuan massistigu, kagiad da nikaw ta Parisiongà nga maláppà nga manguruk ta ngámin nga tunung tam ánná kustombare tam nga Kudio.

<sup>6</sup> Á kunangane manáddagà ta arubáng mu nga mabestigán megapu sù iddanamák ku, nga palurotan na sangaw ni Namarò yù initabbá na sù ira ngaw naggaká nitta, ta paginnanloyan na yù ira námmatay.

<sup>7</sup> Á nepatalugáring sù ira ikáttolle ta nga ginaká nayù ira mapulu duá nga ánâ ni Kákay Israel, pakimorayád da si Namarò ta kággaggaw ánná káda gabí megapu sù iddanamád da gapay, nga mesipá ira sù napiá nga initabbá ni Namarò. Á Patul Agripa, yaw nga iddanamát tam nga Kudio yù ipangikeká ra nikánl! Á yù ira ikáttolle ta nga Kudio yù mangikeká nikán!

<sup>8</sup> Sikayu nga ajian saw, ngattá, ta ajian yù ira káruán nikayu nga mabbábáng ta pakáwayayá ni Namarò nga mamaginnanloy sù ira námmatay?

<sup>9</sup> Á mássiki sikán, sù ngaw, kinagi ta napiá nu jígirigátak ku yù ira manguruk kâ Apu Kesu nga taga Nasaret.

<sup>10</sup> Á yáyú kingngikingnguá ngaw ta Jerusalem. Á yù ira kátannangán nga pári, jinok dangá ta umayá mappagápù sù ira manguruk kâ Apu Kesu, á aru yù ira pinukù ku sù ábbalurán. Á pamagikáru nayu mamanunnù nira, sikán gapay yù tádday nga nakagi ta pagikaruan na ira ta patay.

<sup>11</sup> Á name-arungà nga nanigirigâ nira ta ngámin nga kapilliá ra, tapè kagumának ku ira nakuan ta mabbabáwi ira sù ángnguruk da. Á nerallà yù pátu na nonò ku nira, áddè ta arák ku ira gapay jinigirigâ ta makkakerumá nga ili nayù ira ari Kudio ta arayyu nga lugár.

<sup>12</sup> “Á yáyù gapu na nga minayà ta ili na Damasku, ta jinok dangà nayù ira kátannangán nga párí, á iniyawâ da nikán yù pakáwayyâ nga umay mappagápù sù ira manguruk.

<sup>13</sup> Á Apu Patul, pallakák ku ta dálán ta tangngá na ággaw, inikáddagâ lâ yù nawák nga nasingak ku nga naggapu ta lángì nga naddalingárang ánné sù bilák, á nanawagán kami ngámin sù ira kábuluk ku.

<sup>14</sup> Á ikáddagâ nga napalakak kami ngámin ta dabbun, á naginnâ yù ngárál nga nagubobuk ta Kebru nga ággubobuk tam nga Kudio. Á kinagi na, ‘Saulo, Saulo, ngattá ta iddâ mà jigirigátan? Ta síkaw gemma galá yù majjigâ,’ kun na nikán.

<sup>15</sup> Á kinagi laguk kuna, ‘Asinni ka, Apu?’ Á kinagi ni Apu, ‘Sikán si Kesu nga jigirigátam mu.

<sup>16</sup> Ngam gumikkáng ka, ta mappasiganà nikaw kunangane, gapu ta sikaw yù tullatak ku ta masserbi nikán. Sikaw yù mangipakánnámmu sù masingam mu kunangawe nga meyannung nikán ánná yù ipasingak ku paga nikaw.

<sup>17</sup> Á dobat taka sù ira ikáttolem nga Kudio ánná yù ira ari Kudio, á sikán yù mangiyígù nikaw nu ajian yù ira mangnúá nikaw.

<sup>18</sup> Umay ka laguk nga kunnay ta mamukâ ta matá ra, tapè manawagán yù nonò da, á likuránad da yù narákè nga ággangnúá ra. Á mapalubbáng ira sù panangngal ni Satanas nira, tapè si Namarò galá yù tuttulad da. Á yáyù nga pakomán na ira laguk ni Namarò sù liwiliwâ da, á mesipâ ira sù ira mangilin nga tatole ni Namarò, megapu sù ángngikatalà da nikán. Yáyù kinagi ni Apu Kesu nikán.

<sup>19</sup> “Apu Patul Agripa, yáyù nga kinuruk ku yù inipasingan ni Apu Kesu nikán, nga naggapu ta lángi.

<sup>20</sup> Á minayà ta olu nga nangilayalayâ ta Damasku, á ta Jerusalem, ánná yù ira ngámin nga ili ta purubinsia na Judiya. Á nangilayalayákà sù ira ari Kudio gapay. Á inilayalayâ ku nira ta máwák nga likuránad da yù narákè nga kustombare ra, á tuttulad da si Namarò ánná tuppálad da yù napiá nga ipakuá ni Apu nira, tapè mepasingan ta kuruk nga tatole ni Namarò ira.

<sup>21</sup> Yáyù inituddù nira, á yáyù nga ginápù dangà nayù ira ikáttole ta nga Kudio sù pangilayalayâ ku sù mangilin nga kapilliá, á gustu rangà nakuán papatáyan.

<sup>22</sup> “Ngam si Namarò yù mangabbák nikán áddè kunangane, á yáyù nga manáddagà saw nga mangilayalayâ sù ira tatolay nga makáwayyá ánná sù ira pobare. Á awán ta tanakuán nga kagiak ku, nu ari lâ yù inipalappâ da ngaw di Moyses ánná yù ira ngaw ábbilinán ni Namarò. Á yù kinagi ra ngaw nga mapaluro, yáyù napalurokin.

<sup>23</sup> Ta máwák nga napápatáy si Apu Kesu. Á aggina yù olu nga naginnanolay, tapè ilayalayâ na yù pangiyígù na sù ira ikáttole ta nga Kudio ánná sù ira ari Kudio.”

<sup>24</sup> Á lage na kabalin ni Pablo nanabbák ta arubáng nayù patul, á inikatol ni Pesto nga gubinador, á kinagi na, “Pablo, maguyung ka, ta nepásá yù ginigiámmum!” kun ná.

<sup>25</sup> Ngam kinagi ni Pablo, “Aringà maguyung, maráyaw nga Gubinador Pesto. Ngam kagiak ku lâ yù kukurugán.

<sup>26</sup> Á ammu nayù patul yù meyannung ta ngámin nga kinagi. Yáyù nga aringà mappasirán nga makkagi daretíi kuna, ta kánnámmuán na ngámin danniaw nga kinagi. Awán támma ta arán na nemámmatán nga nakuá, ta ari nelímak,” kun ni Pablo kâ gubinador.

<sup>27</sup> Á kinagi na laguk ni Pablo sù patul, “Patul Agripa, ari ka panò manguruk sù kinagi nayù ira ngaw ábbilinán ni Namarò? Ngam ammù ta kurugam mu gemma.”

<sup>28</sup> Á kinagi ni Agripa kâ Pablo, “Kagiám mu panò ta malogonà nga apatam mu ta manguruk kâ Kesu?”

<sup>29</sup> Á kinagi ni Pablo, “Mássiki nu marigâ onu malogon, ngam yá lâ ipakimállà ku kâ Namarò, ta ari lâ sikaw nu ari galá sikayu ngámin gapay nga makaginná sù ubobuk ku kunangane yù megitá nikán nakuán sù ángnguruk ku kâ Apu Kesu, ngam ari kayu lâ mepárik nikán sù kebáluk ku,” kun ni Pablo nira.

<sup>30</sup> Á di patul kári gubinador kári Bernis ánná yù ira ngámin nga nagitubang tán, gimikkáng ira.

<sup>31</sup> Á nánaw ira laguk nga minay ta lawán. Á nakkaká-ubobuk ira, á kinagi ra, “Awán ta liwâ na yane tolay nga ipate na onu kebáluk na.”

<sup>32</sup> Á kinagi ni Patul Agripa kâ Gubinador Pesto, “Mapalubbáng yù tolay nakuán, nu arán na nakuán kinagi ta umay makipanunnù kâ Patul Sisar,” kun na.

**27***Yù Pabbire di Pablo nga Umay ta Roma*

<sup>1</sup> Á pamapáno ra nikami ta mabbiray kami nga umay kâ Patul Sisar ta Roma sù purubinsia na Italia, á nipatangngal da dí Pablo ánná yù ira káruán nga nabáluk kâ Kapitán Kulio, nga kapitán na Tangagatú nga Suddálú ni Patul Sisar Agusto.

<sup>2</sup> Á nappittà kami laguk sù biray nga naggapu ta Adramitu nga umay sù ira ili ta aggik na bebay sù purubinsia na Asia. Á nepulì nikami si Aristarko nga taga Tessalonika, nga ili sù purubinsia na Masidonia.

<sup>3</sup> Á sù tádday ággaw, jiminung kami ta Sidon. Á inikállà ni Kulio si Pablo, á inanugù na nga umay melágum sù ira kákkopun na ta ili.

<sup>4</sup> Á páno mi ta Sidon, jinápun na kami nayù paddák. Á nabbiray kami laguk ta aranni ta aggik na pugu na Sipro, tapè melibang kami ta pugu.

<sup>5</sup> Á sinalebarám mi yù ira lugár na Silisia ánná Pampilia, á jiminung kami ta dappâ na Mira sù purubinsia na Lisia.

<sup>6</sup> Á dung mi ta Mira, nálek nayù kapitán yù biray nga taga Alekandria, nga mappángè ta Italia, á pinappittà na kami.

<sup>7</sup> Á páno mi ta Mira nga mappángè ta Italia, naganna-annánà kami lâ nga nabbiray, á narigirigâ kami nga nakáddè ta ili na Ngido. Á gapu ta jinápun na kami nayù masikan nga paddák, natupak kami, á sinalebarám mi laguk yù tuppák na pugu na Kreta nga mangngágan ta Salmone, á nallibang kami ta pugu na Kreta.

<sup>8</sup> Á nabbiray kami nga nattalebák aranni ta aggik na dabbun, á narigirigâ kami nga nakáddè ta dappâ nga mangngágan ta Napiá nga Áddúngán, nga aranni ta ili na Laseya.

<sup>9</sup> Á gapu ta paganna-annánà mi, nabayák kamingínnga nabbiray ta Laseya, á jmittálín yù ammián, nga ikákássing nayù ira minábbiray. Á yáyù nga sinabarangán ni Pablo yù ira minábbiray,

<sup>10</sup> á kinagi na nira, "Kopuk ku, nu mánaw ittam sangaw, marigirigâ ittam ta bebay. Magián ittam labbi saw, maraké kengá lâ yù kárgá tam ánná yù biray, á maraké malaggabán ittam nga matay gapay."

<sup>11</sup> Ngam si Kapitán Kulio, arán na kinuruk yù kinagi ni Pablo. Kinuruk na lâ yù kinagi nayù mamilotu ánná yù kinagi nayù makákkua sù biray.

<sup>12</sup> Á aru yù ira kábulum mi nga gustu ra gapay mánaw, ta kagiad da ta nonò da ta jikkù yù naddúngám mi nu ammián. Á yáyù nga gustu ra gapay mánaw nga mappángè ta pugu na Kreta, á paré bi nakuan ta makáddè kami ta áddúngán na Penik, nga nallibangán ta ammiánán. Ta kinagi ra, "Penik nakuan yù pakipaggianat tam ta áddè ta paddagun," kud da.

*Yù Baggiu ta Bebay*

<sup>13</sup> Á manganánuán, aijjan yù napiá nga paddák nga naggapu ta abagátán, á kagiad da ta makutunù kami ta Penik. Á inakkâ da laguk yù tagebbatu na biray, á nánaw kami, á nabbiray kami ta aranni ta aggik na pugu na Kreta.

<sup>14</sup> Ngam inikáddagâ lâ nabbagliu, nga naggapu ta ammiánán.

<sup>15</sup> Á gapu ta ari kami nakatubáng sù paddák, napaturiák kami, á pinaguráyám mi lâ.

<sup>16</sup> Á nallibang kami ta ábbák nayù pugu na Kalodi. Á yù baddì nga barangay nga ginuggun na biray, narigâ nga inigom mi sù biray, tapè pakappíam mi.

<sup>17</sup> Kabalim mi namakáppi sù barangay, binabbak da yù biray ta lubik. Á naburung ira, maraké meráddâ yù biray sù kábabawán ta Sirte. Á yáyù nga nilukù da laguk yù dakal nga layyk, á pinaturiák na paddák yù biray.

<sup>18</sup> Á gapu ta nasikan yù baggiu, á nalleembá ánná nepáttapáttu yù biray. Á ta tádday ággaw, inilappák da yù kárgá na biray ta danum.

<sup>19</sup> Á ta mekatallu nga ággaw, inilappák da lággapay ta danum yù lubik da ánná yù káruán nga aruádat da ta pattarabáku ra ta biray.

<sup>20</sup> Á aru yù ággaw nga nappasá nga arám mi bulubugá nasingan yù bilák onu bituan. Á nabbagliu ta nasikan nga ari bulubugá naginnà, á arám mi iddanamán ta matolay kami.

<sup>21</sup> Á ta nabayágin, ari kami bulubugá kíminán. Á yáyù nga gimikkáng si Pablo, á kinagi na laguk, "Kákkopun, nu kinuruk naw nakuan yù kinagi ngá ari ittam bi nakuan mánaw ta Kreta, awán nakuan ta nararál ánná náwáwán."

<sup>22</sup> Ngam ari kayu lâ maburung, ta kunangane tabarangát takayu ta pataggatan naw lâ yù nonò naw, ta awán ta matay nittam, ngam kengá lâ yù biray.

<sup>23</sup> Yáyù ammù, gapu ta inipakánnámmu ni Namarò nikán. Ta si Namarò yù makákkua nikán áんな pakimorayák ku, á jinok na nikán ta gabingò yù daroban na nga nappasingan nikán.

<sup>24</sup> Á kinagi na nikán, ‘Pablo, ari ka maganássing, ta máwák nga umay ka meyarubáng kâ Patul Sisar ta Roma. Á inikállà naka ni Namarò, ta inanugù na nikaw yù ipakimállà mu kuna nga meyannung sù ira kábulum mu, á yáyù nga awán gapay ta matay níra,’ kun nayù daroban ni Namarò nikán.

<sup>25</sup> Á yáyù ari kayu lâ mabburung, kákkopuk ku, ta ikatalà ku si Namarò ta palurotan na yù ngáminku nga kinagi nayù daroban nikán.

<sup>26</sup> Ngam máwák nga meráddâ ittam sangaw ta pugu,” kun ni Pablo nira.

<sup>27</sup> Á nabbaggiu ngin ta duá ligguán, á pinaturiák na kami na paddák sù bebay nga mangngágán ta Adria. Á ta tangngá na gabi, natákál nayù ira mattarabáku ta biray ta aranni kamingin ta dabbun.

<sup>28</sup> Á sinúkuk da yù danum, á duápu lu nga appá yù kálaram na. Á pallakák mi paga ta baddì, sinúkuk da má, á mapulu límá lâ nga appá yù kálaram na.\*

<sup>29</sup> Á naburung ira marakè meráddâ kami ta dútung. Á yáyù nga inigatták da sù danum yù appá nga tagebbatu ta ulin na biray, á nakimállà ira kâ Namarò ta iddagád da yù ággaw.

<sup>30</sup> Á gapu ta ikaburung nayù ira mattarabáku ta biray, ikáyâ da nakuan panawán yù biray, tapè mattálaw ira. Á sinestemád da kami. Áppè ira minay nangigatták ta tagebbatu sù parowá na biray, ngam iyutták da nakuan yù baddì nga barangay ta danum, tapè pattakayád da nga mattálaw.

<sup>31</sup> Ngam natákál ni Pablo yù nonò da, á kinagi na kâ Kapitán Kulio áんな yù ira suddálu, “Dannian ira nga mattarabáku ta biray, nu mattálaw ira áんな panawád da yù biray, awán nittam bulubugá ta meyígù.”

<sup>32</sup> Á gittâ da laguk nayù ira suddálu yù kaddang nayù baddì nga barangay, á neburuk.

<sup>33</sup> Á ta alippánnawák, inikomá ni Pablo nira ta kumán ira bì. Kinagi na nira, “Duá ligguánin ngu maburuburung kayu áんな awán bulubugá ta kinán naw.

<sup>34</sup> Á yáyù noga dudduárat takayu ta kumán kayu bì, tapè massikan kayu sangaw, ta awán bulubugá nittam ta manganni,” kun ni Pablo nira.

<sup>35</sup> Á kabalín ni Pablo nanabarang nira, inâ na laguk yù tangabullung nga pán, á naddasal ta pabbalabálà na kâ Namarò ta arubáng da ngámin. Á giddú na yù pán, á kinán na.

<sup>36</sup> Á pakasingad da sù pakkákán na, minálláppaw yù nonò da, á kiminán iren gapay.

<sup>37</sup> Á duá gatù ta pitupulu ta annam sikami ngámin ta biray.

<sup>38</sup> Á kabalid da kiminán, initabbà da yù kárgá ra nga tirígu ta danum, tapè umáláppaw yù biray.

### Katáttáttâ nayù Biray

<sup>39</sup> Á ta pannawák, nerípâ da yù dabbun ngam arád da natákkilalán. Á nasingad da ta aggik yù napiá nga karagátán. Á ikáyâ da nga iráddâ yù biray sù karagátán, nu awayyá na.

<sup>40</sup> Á gittâ da laguk yù kaddang nayù ira tagebbatu, á inibattáng da ira ta danum. Á inubbarád da yù lubik nga gálù nayù ulin, áんな inullák da yù layyák sù parowá, tapè mepayák kami nga mappángè ta karagátán.

<sup>41</sup> Ngam neráddâ yù parowá na biray ta kábabbawán nga nalepuanán ta nálaran nga danum. Á awán ta awayyá ra nga mangiyali sù parowá. Á napalapalungán yù pangulin na biray, á natáttáttâ.

<sup>42</sup> Á inigagánge nayù ira suddálu ta papatáyan nakuan yù ngámin ira tatolay nga guárdiad da, marakè makanunnuk ira nga mattálaw.

<sup>43</sup> Ngam gimmá na ira ni Kapitán Kulio, gapu ta ikáyâ na nga iyígù si Pablo, tapè ari matay. Á sinaddánán na yù ira makanunnuk ta aggira yù mapolu nga makkassú ta danum áんな mappángè ta dabbun.

<sup>44</sup> Á pinattagippáto na laguk yù ira káruán ta tábalá áんな táttâ na biray. Á yáyù noga nakáddé kami ngámin ta karagátán.

\* <sup>27:28</sup> Á tallupulu annam nga metro yù duápu lu nga appá, áんな duápu lu pitu nga metro yù mapulu límá nga appá.

<sup>1</sup> Á gom mi ta kannak, yáyù pakánnámmu mi ta Malta yù ngágan nayù pugu nga nalabbetám mi.

<sup>2</sup> Á yù ira tatolay nga naggián tán, nepallà yù allà da nikami, á minay ira nakikopun nikami. Á nappagaddul ira ta paggirinuám mi, gapu ta magurán ánná malummin.

<sup>3</sup> Á si Pablo, en na gapay jinammà yù tangababbak nga káyu nga iruppáng na sù api. Á pangiruppáng na sù káyu, nallawán yù maritá nga iráw megapu sù pátu na api, á kinagâ na yù limá na nga arán na ibbatán.

<sup>4</sup> Á yù ira tatolay nga naggián tán, pakasingad da sù maritá nga iráw nga nabbesin ta limá ni Pablo, kinagi ra sù ira kábulud da, "Kuruk nga minámmápatay yù tolay, ta mássiki nakagon nga naggapu ta bebay nga nelillí ta pate na, ngam aringin meyanugù nga matolay, ta matunung yù Dios nga mamagikáru kuna," kud da.

<sup>5</sup> Ngam iniwássi ni Pablo yù iráw nga nabbesin sù limá na, á napannâ sù api. Á awán bulubugá ta nesimmu kâ Pablo.

<sup>6</sup> Á yù ira tatolay, iddi-iddagád da yù pabbagá na limá na sangaw onu ikáddagâ na lâ mapalakak nga matay. Á pagiddak da ta nabayák, á awán bulubugá ta nesimmu kuna. Á nanguli laguk yù nonò nayù ira tatolay, á kinagi ra ta aggina yù táddy nga dios.

<sup>7</sup> Á naddepuák yù gián nga nalabbetám mi sù dabbun ni Publio nga mammaguray ta Malta. Á si Publio, inikállà na kami, á tallu nga ággaw inilágum na kami.

<sup>8</sup> Á narángnganám mi yù yáma ni Publio nga nagiddá nga makkulikuk ánná makkursu. Á si Pablo, en na iningan. Á nakimállà si Pablo kâ Namarò megapu kuna. Á sinangngalán na yù lakalákay, á pinammapiá na.

<sup>9</sup> Á yù ira káruán nga tatolay, narámak da, á minay ngámin yù ira máttakì kâ Pablo, á pinammapiá na ira ngámin gapay.

<sup>10</sup> Á aru yù makkakerumá nga iniyawâ da nikami. Á ta paggagannuâ mi nga mánav, iniyawâ da yù ngámin nga bálun nga awágam mi, nga inipittâ da sù biray.

#### *Páno ri Pablo ta Malta nga Umay ta Roma*

<sup>11</sup> Á tallu bulánin yù paggián mi ta Malta, ta awán ta awayyá mi nga mabbiray gapu ta ammián. Á ajjan gapay yù biray nga mangngágan ta Jiping, nga naggapu ta Alekandria nga magiddak ta napiá nga ággaw. Á yáyù nattakayám mi ta páno mi ta Malta.

<sup>12</sup> Labbè mi ta ili na Sirakusa, naggián kami ta tallu ággaw.

<sup>13</sup> Á páno mi ta Sirakusa, á nabbiray kami nga nakáddè ta ili na Regium. Á táddy ággaw, nepabulun nikami yù paddák nga naggapu ta abagátán. Á ta mekarúnga ággaw, limibbè kami ta ili na Putioli. Á gimitták kami laguk sù biray.

<sup>14</sup> Á narángnganám mi ta Putioli yù ira mawwawági ta ángnguruk mi kâ Apu Kesu, á inapà da kami ta makipaggián kami lábbì nira, á naggián kami ta pitu nga ággaw. Á ta páno mi ta Putioli, nappatalay kami nga minay ta ili na Roma.

<sup>15</sup> Á yù ira mawwawági ta ángnguruk mi kâ Apu Kesu nga naggián ta Roma, pakarámaka da ta labbè mi, ed da kami jinápun ta arayyu, ta Dápun na Appio. Á yù ira káruán, jinápud da kami ta Tallu nga Kantina. Pakasingan ni Pablo nira, nabbalabálà kâ Namarò, á nagayáyâ.

#### *Keggá ni Pablo ta Roma*

<sup>16</sup> Labbè mi ta Roma, á ari nabáluk si Pablo, ta anugutad da ta maggián lâ sù sippítán na nga balay nga aranni ta ábbalurán, ngam guárdián nayù táddy nga suddálu.

<sup>17</sup> Á ta pappasá na mekatallu nga ággaw, inipágál ni Pablo yù ira Kudio nga makáwayyá sù ili na Roma. Paggagammung da sù gián na, kinagi na nira, "Wáwwagi, mássiki awánà ta liwâ sù kustombare nayù ira naggaká nittam onu sù ira ikáttolé tam nga Kudio ta Jerusalem, ngam ginápù dangá nga iniyawâ da sù limá nayù ira taga Roma.

<sup>18</sup> Á binestigá rangà, á gustu rangà nakuan palubbángan, ta awánà gemma ta liwâ nga ipamapáte ra nikán.

<sup>19</sup> Ngam yù ira ikáttolé tam nga Kudio, manakì ira. Á yáyù nga nakagumánà nga umay makipanunnù kâ Patul Sisar. Ngam sikán, awánà ta ipamaliwâ nga pangikekâ nakuan sù ira ikáttolé.

<sup>20</sup> Á yáyù laguk nga inammung takayu saw, tapè makiubobugà nikayu. Ta gustu ipakánnámmu nikayu yù kuruk nga ikebáluk ku, nga megapu sù ángnguruk ku sù iddanamát tam nga ginaká ni Israel," kun ni Pablo nira.

<sup>21</sup> Á kinagi ra kâ Pablo, "Awán ta limibbè saw nga túrâ nga meyannung nikaw nga naggapu ta purubinsia na Judiya. Á mássiki yù ira tatolay nga naggapu túrin, awán bulubugá ta iníránuñ da nga narékè nga meyannung nikaw.

<sup>22</sup> Ngam gustu mi ginnán yù kagiām mu nga naggapu ta nonò mu, ta ammu mi ta aru yù ira makikontará sù ira manguruk kâ Kesu,” kun nayù ira Kudio kâ Pablo.

<sup>23</sup> Á sinullà da laguk yù ággaw nga pakatángngák da kâ Pablo. Á dattál nayù ággaw, minay ira ta bale ni Pablo, á napakáru ira. Á si Pablo, nagammiá nga nagubobuk nira áddè ta nagabiyán paga. Á kinagi na nira yù meyannung sù pammagure ni Namarò ta dabbuno. Á pinarubán na ira kagumánan, tapè manguruk ira gapay kâ Apu Kesu, megapu sù pangibukalán na sù tunung ni Moyses ánnna yù initúrâ nayù ngaw ira ábbilinán ni Namarò.

<sup>24</sup> Á yù ira kárúán, nanguruk ira. Ngam yù ira kárúán, ari ira nanguruk.

<sup>25</sup> Á gapu ta ari ira metáddy ta nonò da nga meyannung sù kinagi ni Pablo, nariríri ira. Á lage ra nánaw, kinagi na laguk ni Pablo nira, “Napiá yù kinagi nayù Mangilin nga Ikararuá ni Namarò ta paddok na kâ Isaya, nga yù ngaw ábbilinán na, ta umay makkagi sù bilin na sù ira ngaw naggaká nittam. Kinagi na kâ Isaya,

<sup>26</sup> ‘E ka sù ira tatolay nga Kudio, á kagiām mu nira,

“Mássiki nu ginniginnán naw, ngam arán naw bulubugá kánnámmuán.

Mássiki nu inni-innan naw, ngam arán naw bulubugá matákkilalán.”

<sup>27</sup> Yáyù kagiām mu nira, gapu ta nataggâ yù nonò da.

Sinulatád da yù talingá ra. Á nakkimmà yù matá ra,

marakè matákkilalád dangà, á kánnámmuád da yù kagiak ku ánnna alawatad da ta nonò da.

Ta nu mabbabáwi ira nakuan ta liwiliwâ da ánnna umay ira makipakomá nikán,

á iriák ku laguk yù liwiliwâ da ánnna pakomák ku ira.’

Yáyù kinagi ni Namarò kâ Isaya.\*

<sup>28</sup> “Mánnámmuán naw laguk yaw. Binilin na laguk ni Namarò yù ira ari Kudio ta meyannung sù pangiyígù na ta tolay, tapè mesipà ira sù pammagure na. Á aggira, magginná ira.”

<sup>29</sup> Kabalin ni Pablo nga nagubobuk, nánaw yù ira Kudio. Á ta páno ra, nakkakátabbatabbák ira.

<sup>30</sup> Á naggián si Pablo ta Roma ta duá ragun ta bale na nga labbetán na. Á pinaddulò na ngámín yù ira minay kuna.

<sup>31</sup> Á inilayalayâ na nira yù meyannung sù pammagure ni Namarò ta dabbuno ánnna inituddu na nira yù meyannung kâ Apu Kesu Kiristu. Á ari mappasirán nga mangituddu, á awán ta nakikontará kuna. Áddè na yù.

## Yù Túrâ ni Pablo sù ira Manguruk nga taga Roma

*Yù Meyannung sù Túrâ*

Dakal yù ili na Roma, nga paggianán nayù kátannangán nga mammaguray nga abbúnad da ta Sisar sù ággubuk da. Á aru yù ira purubinsia gapay ta pammagurayán nayù Sisar. Á pattúrâ ni Pablo sawe túrâ, ari paga minay ta ili na Roma, ngam ammu na yù ngágán na aru nga tatolay nga manguruk kâ Apu Kesu nga naggián sù ili. Á yáyù nga initúrâ na yawe nga pakiammu na nira.

Á ipanonò ni Pablo sù ira nga mabbibbik sawe yù ággíán nayù ira ngámin nga tatolay megapu ta liwiliwâ da. Ta nu ari ittam mabbabáwi sù naráké nga ággangnguá tam, á pagikaruuan na ittam sangaw ni Namarò. Á ibukalán na yù pakáwayyá ni Namarò nga mangiyígù ta tolay, maguray lá yù katatole ra, nga Kudio onu ari Kudio, tapè ari ittam mapagikáru. Ta netapil si Apu Kesu Kiristu megapu nira. Á nagínnanolay, ánná abbágán na yù ira nga mangikatalà kuna, tapè palurotad da yù napiá nga ipakuá ni Namarò nira.

*Yù Mayán nayù Túrâ*

Yù Meyannung kâ Pablo ánná yù Bilin na (1:1-17)

Awán ta Ari Nakaliwâ (1:18-3:20)

Yù Ámmakomá ni Namarò ta Tolay (3:21-4:25)

Yù Bagu nga Áttole nayù ira nga Mangikatalà kâ Apu Kesu Kiristu (5:1-8:39)

Yù Ággíán nayù ira Kudio (9:1-11:36)

Yù Ipakuá ni Namarò sù ira Tatole na (12:1-15:13)

Yù Pangilayalayâ ni Pablo sù ira Ari Kudio (15:14-21)

Yù Panalákkuruk ni Pablo nga Umay ta Roma (15:22-33)

Yù Pangiyabbû ni Pablo nu Kunnasi yù ira Kákkopun na (16:1-27)

<sup>1</sup> Sikán si Pablo nga mattúrâ nikayu. Masserbingà kâ Apu Kesu Kiristu, gapu ta inagálán nangà ni Namarò, nga sinullà na ta umay mangilayalayâ sù bilin na.

<sup>2</sup> Yawe bilin ni Namarò yù meyannung sù initabbá na ngaw nga nabayágìn, nga inipetúrâ na sù ira ngaw ábbilinán na.

<sup>3</sup> Yawe yù napiá nga dámak nga meyannung sù Anâ ni Namarò. Á ta meyannung sù katatole nayù Anâ na, neyanâ sù ginaká ni Patul Dabid.

<sup>4</sup> Ngam nepasingan ta aggina yù Anâ ni Namarò nga makáwayyá, megapu sù Mangilin nga Ikararuá nga namagínnanolay kuna. Aggina si Apu Kesu Kiristu, nga Yápu tam.

<sup>5</sup> Á sinullà nangà ni Namarò megapu sù allà na nikán, á jinok nangà, ta umayà mangilayalayâ sù bilin na nga meyannung kâ Apu Kesu Kiristu sù ira ngámin nga makkakerumá nga tatolay, tapè manguruk ira ánná mangikatalà ira kâ Apu Kesu.

<sup>6</sup> Á sikayu gapay, inagálán na kayu gapay ni Namarò ta mangikatalà kâ Apu Kesu, tapè mesipà kayu gapay sù ira tatole na.

<sup>7</sup> Á yáyù nga mattúrákà nikayu nga maggián ta ili na Roma, sikayu ngámin nga iddukan ni Namarò, nga inagálán na ta mabbalin ta tatole na. Á ipakimállà takayu, ta ikákkállà da kayu di Namarò nga Yáma tam ánná si Apu Kesu Kiristu nga Yápu tam, tapè mepagimammà kayu ánná napiá yù ággigíán naw.

*Yù Pakimállà ni Pablo, nga Pabbalabálà na kâ Namarò*

<sup>8</sup> Á yawe bì yù mapolu nga kagiak ku. Makimállakà kâ Namarò, ta pannakabaggi ni Apu Kesu Kiristu, ánná dayáwak ku si Namarò megapu nikayu ngámin, ta aringâ makabalabálà kuna megapu sù napiá nga ángnguruk naw, nga neparámak ta ngámin nga lugár.

<sup>9</sup> Á si Namarò yù makasistigu megapu nikán, ta kuruk yù kagiak ku, ta ammu na ta malápakà nga mangilayalayâ sù bilin na, nga napiá nga dámak nga meyannung sù Anâ na. Á ammu na ta sigídà nga ipakimállà takayu kuna.

<sup>10</sup> Á ta ngámin nga pakimállà ku kuna, kiddawak ku kuna ta iyawâ na nikán yù awayyâ nga umay mattúllun nikayu.

<sup>11</sup> Ta karagatágat takayu nga matullúnán, tapè ipakánnámmu nikayu yù napiá nga ángngabbák nayù Ikararuá ni Namarò nikayu, tapè mapasigaggâ yù ángngikatalà naw.

<sup>12</sup> Á kuk ku nakuan ta makkakátabarang ittam, megapu sù ángngikatalà tam kâ Apu Kesu.

<sup>13</sup> Wáwwagi, yawe yù ikáyâ ku nga ipakánnámmu nikayu. Initálakkuruk ku ta nabayágìn nga umay mattúllun nikayu, ngam ajjan garè yù kegaggarák ku. Ta ikáyâ ku nakuan nga mangituddu sù bilin ni Namarò nikayu, tapè mapasigaggâ yù ángnguruk naw, ánná

manguruk gapay yù ira káruán nga ari paga nanguruk, ta kunnay sù nesimmu ngaw gapay sù ira káruán nga ari Kudio ta ngámin nga lugár nga nappassapassiárák ku.

<sup>14</sup> Á makaliwákà nu arák ku tudduán yù ira ngámin nga makkakerumá nga tatolay, yù ira nga maggián ta dakal nga ili onu yù ira nga maggián ta kakayyuán, ánná yù ira naggiglámmu onu yù ira ari naggiglámmu.

<sup>15</sup> Á yáyù nga mapattükà nga umay ta Roma gapay, tapè mangilayalayákà sù napiá nga dámak nikayu nga maggián tán.

*Yù Pakáwayyá nayù Ubobuk ni Namarò*

<sup>16</sup> Á aringà mappasirán nga mangituddu sù napiá nga dámak nga meyannung kâ Apu Kesu Kiristu, ta makáwayyá si Namarò nga mangiyígù sù ira ngámin nga tatolay nga mangikatalà kuna, tapè ari ira mokum. Á yù ira Kudio yù napolu nga nakaginná. Á kunangane ajjan yù awayyá ra gapay nayù ira ari Kudio nga magginná ánná makiyígù kuna.

<sup>17</sup> Á yù kebalinán nayù napiá nga dámak yù ámmakapiá ni Namarò sù ira tatolay, nga megapu galâ sù pangikatalà da kâ Apu Kesu Kiristu. Á yù ira lâ nga mangikatalà kâ Apu yù meddán sù katunung na, ánná alawatan ni Namarò ira. Yáyù inipetúrá ni Namarò nga kun na, “Yù ira tatolay nga ibiláng ni Namarò ta matunung megapu sù pangikatalà da, aggira yù mepattolay nga mesipà kuna ta áddè ta áddè.”\*

<sup>18</sup> Maggián si Namarò ta lángì, á mapporay megapu sù narákè nga akkuán nayù ira tatolay. Á inipakánnámmu na ta ukuman na sangaw yù ira nga mangnuá ta narákè ánná yù ira nga manakì kuna, gapu ta yá lâ tángngagad da yù akkuád da nga narákè, á yáyù nga megaggak yù pakáwayyá nayù kuruk nga bilin na nga nepakánnámmu nira.

<sup>19</sup> Ta kánnámmuád da yù ngámin nga mepakánnámmu nga meyannung kâ Namarò, ta si Namarò galâ yù mangipakánnámmu nira megapu sù ngámin nga pinarò na.

<sup>20</sup> Á áddè ngaw ta kaparò nayù dabbuno, inipakánnámmu ni Namarò yù ari masingan nga meyannung kuna, megapu sù pinarò na. Inipakánnámmu na ta aggina yù mepángngà nga pakiyápuán na tolay. Á inipakánnámmu na gapay ta aggina yù mannanáyun nga makáwayyá ta ngámin ta áddè ta áddè. Á kuruk nga ammu ra dannian, ta mepasingan megapu sù ngámin nga pinarò ni Namarò. Á yáyù nga ari ira makatabbák kuna nga makkagi ta arád da ammu, sangaw nu ukuman na ira, gapu ta ajjan yù awayyá ra nga makánnámmu megapu sù masingad da nga pinarò na.

<sup>21</sup> Á mássiki nu ammu nayù ira tatolay ta ajjan si Namarò, ngam arád da nakimorayán. Á ammu ra yù ángngikállà ni Namarò nira, ngam arád da jináyaw. Arád da piníli yù napiá. Á nonopad da lâ yù awán ta serbi na. Á nakkallà yù nonò da.

<sup>22</sup> Kagiad da ta masírik ira, ngam pinotuád da si Namarò, á nabbalin ira ta ulapá.

<sup>23</sup> Á inipuerá ra lâ si Namarò nga ari matay, nga eggá ta áddè ta áddè, nga awán ta namarò kuna. Á pakimorayád da lállaguk yù gustu ra, nga pidde ra nga sináttolay, sinámmammánù, siná-ayám, ánná siná-iráw.

<sup>24</sup> Á yáyù nga pinaguráyán ni Namarò yù ira tatolay, tapè tuttulad da laguk yù gustu ra nga narákè, nga ari mepángngà ta baggi ra. Á makapasirán yù kingnuá ra.

<sup>25</sup> Á sinájjíád da si Namarò, á kinuruk da yù ari kuruk. Á nakimorayád da ánná nasserbiád da yù makkakerumá nga ayám nga pinarò ni Namarò. Ngam arád da pakimorayán yù Namarò nira. Si Namarò lâ yù kepángngatán nga paddayawán na tolay ta áddè ta áddè. Á mapalurò! Ammán!

<sup>26</sup> Á gapu ta pakimore nayù ira tatolay ta makkakerumá nga naparò, pinaguráyán ni Namarò ira, tapè tumutul ira sù narákè nga makapasirán, nga gustu na baggi ra. Yù ira bábbay, pinataliád da yù gagángay nga pakiatáwa ra ta laláki, á makállirák nga ari mepángngà yù kingnuá ra sù ira kábulud da nga bábbay.

<sup>27</sup> Á yù ira lálláki gapay, pinataliád da yù gagángay nga keruruk da ta babay nga atáwa ra, á nakiruruk yù ira lálláki sù kelugád da nga lálláki. Á kingnuá ra yù ari mepángngà sù kábulud da nga lálláki. Á yáyù gapu na nga mabbalin ira ta matakì ánná maguyung, ta yáyù laguk yù bálá nayù liwâ da.

<sup>28</sup> Á gapu ta arád da bulubugá sinángngák si Namarò, yáyù nga pinaguráyán ni Namarò ira, tapè nonopad da lâ yù narákè ánná akkuád da lâ ngámin yù ninonò da.

<sup>29</sup> Á kingnguá ra ngámin yù ari matunung ánná makkakerumá nga narákè. Mamassil ira. Malussaw ira. Mangabubu ira. Mamapátay ira. Maddaráma ira. Mangilogò ira. Á ayatán ira nga manigirigâ ta kábulud da. Á mabbébbek ira.

<sup>30</sup> Mallilibá ira. Malussaw ira kâ Namarò. Mappeddaráyaw ira ánná mappalaláki ira. Alerad da yù lannà nayù akkuád da nga narákè. Á potuád da yù darakal da.

<sup>31</sup> Ulapá ira nga awán ta pasirád da. Massirisiri ira. Ari ira mekatalà. Awán ta ayâ da ánná ángngiddù da sù ira darakal da ánná wáwwagi ra. Á awán ta allà da sù ira kábulud da.

<sup>32</sup> Kinagi ni Namarò yù mepángngà sù ngámin ira nga mangnguá ta kunnian, ta matay ira nga umay maggián ta impiernu ta áddè ta áddè. Á mássiki nu ammu ra yù kinagi na, ngam akkuád da lâ dannian. Á ari lâ aggira yù mangnguá, ta duduárad da gapay yù ira kárúan ngam mangnguá ta kunnian.

## 2

### *Matunung yù Pamanunnù ni Namarò*

<sup>1</sup> Á gapu ta naggiggítta ittam nga malliwâ, arát tam nakuan panunnután yù ira kábulut tam. Á maguray nu asinni nikayu, nu panunnután naw yù kabbulun naw, panunnután naw gapay yù baggi naw, gapu ta aijan gapay yù liwâ naw nga negittá ta liwâ na. Á yáyù nga awán ta itabbák naw kâ Namarò sangaw nu pagikaruan na kayu.

<sup>2</sup> Á ammu tam gemma ta pagikaruan ni Namarò yù ira ngámin nga mangnguá ta kunnian nga narákè, á matunung yù pamanunnù ni Namarò, ánná mepángngà yù ámmagikáru na.

<sup>3</sup> Á sikayu nga mamanunnù sù ira kábulun naw, nu akkuán naw gapay yù kunnay ta akkuán nayù ira panunnután naw, á melillítán naw panò yù pamagikáru ni Namarò? Ari gemma, ta pagikaruan ni Namarò yù ira ngámin nga mangnguá ta narákè.

<sup>4</sup> Á ngattá, ta paguráyan naw yù pangikállà ni Namarò nikayu? Ta arán naw paga nilikurán yù akkuán naw nga narákè. Arán naw panò ammu ta attamán na kayu lâ nga arán na lábbì pagikaruan, gapu ta nepallà yù allà na nikayu? Á iddagán na lábbì yù pabbabáwi naw, nu matagenà naw nakuan yù pangikállà na nikayu.

<sup>5</sup> Ngam sikayu, pinataggâ naw yù nonò naw, á arán naw tágngagan yù pangikállà ni Namarò nikayu. Á yáyù nga sigídá nga lannapán naw yù liwâ naw, á yáyù nga mappanà yù pore ni Namarò nikayu sù ággaw nga pangukum na.

<sup>6</sup> Á sangaw nu duttál yù ággaw nga piníli ni Namarò ta pangukum na, bestigán na ittam, á iyawâ na nittam nga katággitáddy yù bálà na nga mepángngà sù kingnguá na.

<sup>7</sup> Á iyawâ ni Namarò yù inángà nga awán ta áddè na sù ira tatolay nga ari malurâ nga mangnguá ta napiá nga ipakuá na nira. Aggira yù magattam, gapu ta iddanamád da ta málâ da yù ikáyâ da nga kepotud da nga mepaggián kâ Namarò ta áddè ta áddè, nga mesipà sù karáyo na.

<sup>8</sup> Ngam yù ira tatolay nga motun yù nonò da, mekanâ ira sù pore ni Namarò. Ta gapu ta arád da kurugan yù kuruk nga napiá nga inipakánnámmu ni Namarò nira, ánná akkaúad da lâ yù narákè, á yáyù nga ukuman na ira.

<sup>9</sup> Á yù ira ngámin nga tatolay nga mangnguá ta narákè, marigirigâ ira, ánná magaráyan ira sù takì da, nepatalugáring sù ira Kudio, ánná yù ira ari Kudio gapay.

<sup>10</sup> Ngam yù ira nga mangnguá ta napiá, ipotun ni Namarò ira, á mesipà ira sù karáyo na, á pagimammatan na ira ngámin, ta iyawâ na nira yù napiá nga áaggiád da kuna, nepatalugáring sù ira Kudio, ánná yù ira ari Kudio gapay.

<sup>11</sup> Ta arán ni Namarò paddurúmán yù ira tatolay.

<sup>12</sup> Á yù ira nga ari Kudio, mássiki nu ari ira meddán ta tunung ni Namarò, ammu ra yù napiánga akkuád da nakuan, á yáyù nga ukuman ni Namarò ira gapu ta arád da akkuán yù napiánga ammu ra. Á yù ira Kudio nga iniddán ni Namarò ta tunung, mapanunnután ira gapu ta arád da kurugan yù tunung nga netuddu nira.

<sup>13</sup> Ta arán na gemma ibiláng ni Namarò ta matunung yù ira tatolay nga maginná ra lâ yù tunung na ngam arád da palurotan. Ngam yù ira tatolay nga mamalurò sù tunung ni Namarò, aggira yù ibiláng na ta matunung.

<sup>14</sup> Á yù ira ari Kudio, mássiki nu ari ira natudduán sù tunung ni Namarò, negagángay nira yù mappíli sù napiánga tuppalad da, nga negittá sù taddánnga netúrâ sù tunung ni Namarò. Á yù napiánga ammu ra, yáyù tunung da.

<sup>15</sup> Á nu tuppalad da yù napiánga ammu ra, ayatán ira sù kingnguá ra. Ngam nu arád da tuppalan yù napiánga ammu ra, mappasirán ira gapu ta ammu ra ta narákè yù kingnguá

ra. Á yáyù nga ipasingad da ta ammu ra ta nonò da yù napiá nga ituddu ni Namarò, mássiki nu ari ira yù iniddán na sù tunung na nga netúrâ.

<sup>16</sup> Á sangaw nu duttál yù ággaw, nga piníli ni Namarò nga pangukum na, meyarubáng yù ira tatolay kâ Apu Kesu Kiristu nga mamanunnù, á bestigán na ira. Á pamanunnù na nira, mepalappâ yù liwiliwâ da nga inilímak da ngaw. Yáyù ituddu nayù bilin ni Namarò nga ilayalayâ ku.

### *Yù Áaggián nayù ira Kudio Megapu sù Tunung ni Namarò*

<sup>17</sup> Á sikayu nga kábuluk ku nga Kudio, ngattá ta arán naw palurotan yù ipakuá ni Namarò nittam? Mappeddaráyaw kayu gapu ta Kudio kayu, á ipappalaláki naw yù maláddá nga áaggián naw kâ Namarò, gapu ta iniddán na kayu sù tunung na.

<sup>18</sup> Ammu naw yù ure ni Namarò nga akkuán naw nakuan, á ammu naw mappíli sù napiá, gapu ta natudduán kayu sù tunung na.

<sup>19</sup> Á kagian naw ta kuruk nga mesturu kayu, nga mamannawák ta nonò nayù ira ari natudduán. Kagian naw ta sikayu yù mangituddu ta napiá nga dálan sù ira nga meyárik ta buling, ánná kunnay kayu ta tulu nga mamannawák sù ira mallakalakák ta kallâ.

<sup>20</sup> Á kagian naw ta makáwayáyá kayu nga maggammá sù ira ulapá ánná mattuddu sù ira ábbing. Ta sikayu yù makánnámmu sù ngámin nga kuruk, gapu ta eggá nikayu yù tunung ni Namarò nga inítúrâ ni Moyses.

<sup>21</sup> Á sikayu nga makkagi ta ammu naw mangituddu sù ira kábulun naw, ngattá, ta arán naw tudduán yù baggi naw? Á sikayu nga manaddán sù ira kábulun naw ta ari ira makkokò, ngattá ta makkokò kayu?

<sup>22</sup> Á sikayu nga makkagi sù ira kábulun naw ta ari ira makiruruk sù arád da atáwa, ngattá ta makiruruk kayu sù arán naw atáwa? Sikayu nga mangiluddè sù ira sináttolay nga pakimorayán nayù ira ari Kudio, ngattá ta tullung kayu nga makkokò sù giád da?

<sup>23</sup> Sikayu nga Kudio nga mappalaláki gapu ta iniddán na kayu ni Namarò sù tunung na, ngattá, ta arán naw kurugan yù tunung na? Á ta kunnian, ipasapasirán naw si Namarò sù ira ari Kudio!

<sup>24</sup> Á yáyù kebalinán nayù netúrâ sù bilin ni Namarò, nga kun na, "Sikayu nga Kudio yù mangipasirán kâ Namarò, megapu sù narékè nga akka-akkuán naw. Ta yáyù gapu na nga iluddè da si Namarò nayù ira ari Kudio, ánná pakkakagiád da yù ngágan na."\*

### *Tatolay ni Namarò yù ira Manguruk kuna*

<sup>25</sup> Kinagi na ngaw ni Namarò sù ira Kudio ta kugitad da yù ira lálláki ta sinniál da ta piníli ni Namarò ira. Á sikayu nga kábuluk ku nga Kudio, nu kurugan naw yù tunung ni Namarò, á kuruk nga sinniál yù kakugì naw ta tatole na kayu ni Namarò. Ngam awán ta serbi nayù kakugì naw, nu arán naw kurugan yù tunung ni Namarò.

<sup>26</sup> Á yù ira ari Kudio, nu kurugad da yù taddán ni Namarò sù tunung na, á mássiki nu ari ira nakugì, isipà ni Namarò ira sù ira tatole na, ánná ibiláng na ira ta kun na nakugì ta ánninanán na.

<sup>27</sup> Á sikayu nga Kudio, mássiki nu nakugì kayu ánná ajjan nikayu yù netúrâ nga tunung ni Namarò, ngam arán naw palurotan yù napiá nga ituddu na. Á yáyù nga mappasirán kayu ánná mapagikáru kayu laguk, megapu sù ira ari Kudio nga mamalurò sù napiá, mássiki nu ari ira meddán ta tunung.

<sup>28</sup> Ta ari kuruk nga Kudio ta ánninanán ni Namarò yù tolay nga Kudio yù baggi na, nga tumuttul sù kustombare na Kudio. Á ari kuruk nga sinniál ta tolay ni Namarò yù nekuá lâ ta baggi na.

<sup>29</sup> Ngam kuruk nga tatole ni Namarò yù ira nga manguruk kuna. Á ari yù nekuá ta baggi ra, ngam yù nekuá ta nonò da yù kuruk nga sinniál ta tatole ni Namarò ira. Á yù Ikararuá ni Namarò, iniyawâ na nira yù napiá nga nonò da. Á mássiki nu awán ta tolay nga mangiráyaw nira, ngam si Namarò yù mangiráyaw nira.

## 3

### *Palurotan ni Namarò yù Ngámin nga Initabbá na*

<sup>1</sup> Á gapu ta arán na paddurúmán ni Namarò yù ira tatolay, eggá panò yù pakkapiánán na Kudio megapu sù kakugì na? Eggá panò yù pangappútám mi nga Kudio ánné sù ira ari Kudio?

\* 2:24 Ezekiel 36:21-22

<sup>2</sup> Á aru gemma yù pakkapiánám mi nga Kudio! Ta olu, sikami nga Kudio yù nangikatalakán ni Namarò sù ubobuk na nga inipetúrâ na.

<sup>3</sup> Á ammu naw ta ajian yù ira Kudio nga ari manguruk sù bilin ni Namarò nga inikatalà na nira. Á mássiki nu kuruk nga ari ira mekatalà, arán naw nakuan kagian ta ari gapay mekatalà si Namarò ánná ari mamalurò sù initabbá na.

<sup>4</sup> Ari massiri si Namarò, ta kuruk ngámin yù kagian na, mássiki nu massirisiri yù ira ngámin nga tatolay. Yáyù kebalinán nayù dán nga netúrâ nga kunniaw: "Apu, kuruk ngámin yù ubobuk mu.

Á mepasingan ta matunung ka, Apu, megapu sù ubobuk mu.\*

Á mássiki nu ajian yù tolay nga iddâ na ka lâ ikeká, ngam mangappù ka, ta mepasingan ta awán ta liwâ mu."

<sup>5</sup> Á ajian garè yù ira nga makkagi ta mepasingan ta napiá ánná matunung si Namarò, megapu sù narákè nga akkuát tam. Á kagiad da ta ari napiá si Namarò nu pagikaruan na ittam megapu sù liwâ tam, gapu ta kunnay ta abbágát tam megapu sù narákè nga akkuát tam, gapu ta mepasingan ta matunung si Namarò megapu sù pakkillu tam. Kunnian yù liwâ na tolay ta nonò na.

<sup>6</sup> Ari gemma kuruk yù kagiad da. Ta nu arán na nakuan pagikaruan ni Namarò yù ira malliwâ, á kunnasi nakuan laguk yù ámmanumnu na ta ngámin nga tatolay ta dabbuno?

<sup>7</sup> Á ta ángngarigán nu kuruk nakuan ta meparáyaw si Namarò nga mepasingan ta kuruk ngámin yù kinagi na, megapu ta passirisiri tam, á ngattá laguk ta pagikaruan na ittam ta liwâ tam?

<sup>8</sup> Nu kuruk nakuan ta meparáyaw si Namarò megapu ta siri tam, á kagiak ku nakuan, "Arà! Mangnuá ittam laguk ta narákè, tapè meparáyaw si Namarò," kuk ku nakuan. Á ajian garè yù ira mabbeknikán, nga makkagi ta yáyù kanu yù kinagi, kud da, ngam ari gemma kuruk yù kagiad da. Á mepángngà nga matunung yù parmagikáru ni Namarò nira.

#### Awán ta Tolay nga Ari Malliwâ

<sup>9</sup> Á sikami nga Kudio, napiá panò yù ággíam mi ta ánniganán ni Namarò ánnè sù ira ari Kudio? Ari gemma! Á yáyù gemma yù kinagikin, ta makaliwâ ittam ngámin, nga Kudio ánná ari Kudio.

<sup>10</sup> Yáyù kebalinán nayù inipetúrâ na ngaw ni Namarò nga kunniaw: "Awán bulubugá ta tolay nga matunung, mássiki lâ táddyay.

<sup>11</sup> Awán ta tolay nga makánnámmu sù nonò ni Namarò, ánná awán ta tolay nga magalek kâ Namarò, tapè makiyápu kuna.

<sup>12</sup> Nekáttuay yù ira ngámin nga tatolay kâ Namarò, á mappupúlú ira nga mangnuá ta narákè.

Awán bulubugá ta tolay nga mangnuá ta napiá, mássiki lâ táddyay."†

<sup>13</sup> Á kun na buyù nayù nalabbak ta tanam nga nabukatán yù simù da, gapu ta jikkù yù ubobugad da.

Á massiri ira, tapè ilogò da yù ira kábulud da."‡

"Á kunnay ta jitá na iráw yù ángngiparaké da ta kábulud da."§

<sup>14</sup> "Ari ira maganássing nga mangigagek sù ira kábulud da gapu ta lusso ra."\*

<sup>15</sup> "Dán nga naparán ira gapay nga mamapátyay.

<sup>16</sup> Á ta ngámin nga pallakarád da, ajian yù ira darálad da ánná yù ira jigirigátad da.

<sup>17</sup> Arád da garè ammu yù paggupuán nayù napiá nga ággimammà."†

<sup>18</sup> "Á awán ta assing da kâ Namarò."‡

Yáyù inipetúrâ ni Namarò.

<sup>19</sup> Á sittam nga Kudio yù nangiyawatán ni Namarò sù tunung na, á ammu tam gemma ta netúrâ yù ngámin nga tunung na, tapè kánnámmuát tam yù ngámin nga ipatuppál na nittam. Á mássiki nu eggá nittam yù tunung, arát tam kurugan. Á yáyù nga awán bulubugá ta tolay nga makatabbák kâ Namarò sangaw nu bestigán na yù ira ngámin nga tatolay ta dabbuno.

<sup>20</sup> Ta awán bulubugá ta tolay nga matunung ta ánniganán ni Namarò megapu ta panuppál na sù tunung. Yá lâ serbi nayù tunung ni Namarò yù pangituddu na sù napiá nga akkuát tam nakuan, tapè kánnámmuát tam ta makaliwâ ittam.

#### Mebiláng yù Tolay ta Matunung megapu sù Pangikatalà na kâ Apu Kesu Kiristu

---

\* 3:4 Salmo 51:4   † 3:12 Salmo 14:1-3; 53:1-3   ‡ 3:13 Salmo 5:9   § 3:13 Salmo 140:3   \* 3:14 Salmo 10:7   † 3:17  
Isaya 59:7-8   ‡ 3:18 Salmo 36:1

<sup>21</sup> Á kunangane, inipakánnámmu ni Namarò yù ámmakomá na ta tatolay, tapè ibiláng na ira ta matunung sù ánnunganán na ánnna alawatan na ira ta tatole na. Á ari gemma megapu sù panuppál tam sù tunung. Yáyù inipakánnámmu ni Namarò sù libru nga inipetúrâ na ngaw kári Moyses ánnna yù ira ngaw ábbilinán na.

<sup>22</sup> Pakomán ni Namarò yù liwâ na tolay, á ibiláng na ta matunung yù tolay megapu galâ ta pangikatalà na kâ Apu Kesu Kiristu. Á yáyù akkuán ni Namarò megapu sù ira ngámin nga mangikatalà kâ Apu Kesu, ta awán ta irumá na, mássiki nu Kudio ira onu ari ira Kudio.

<sup>23</sup> Ta nalliwâ ittam ngámin nga tatolay, á nakúráng yù napiá nga akkuát tam, nga pangiráyaw na nittam nakuan ni Namarò.

<sup>24</sup> Ngam gapu ta pangikállà ni Namarò nittam, minay si Apu Kesu Kiristu, á inikáru na yù liwâ tam, nga arát tam matalián, tapè pakomán ni Namarò ittam nga mangikatalà kâ Apu Kesu ánnna ibiláng na ittam ta matunung.

<sup>25</sup> Jinok ni Namarò si Apu Kesu Kiristu ta metapil nga meyátáng, nga magikáru ta liwâ tam megapu sù kebubbù na dágá na ta pate na ta kurù. Á yáyù nga pakomán ni Namarò ittam ta liwâ tam nu ikatalà tam si Apu Kesu. Á mepasingan yù katunung ni Namarò, gapu ta pinagikáru na si Apu Kesu megapu sù liwâ tam nga tatolay, ánnna pinakomá na ittam gapu ta pamagikáru na kâ Apu Kesu. Á lage na pate ni Apu Kesu, arán na ngaw pinagikáru ni Namarò yù ira ngaw tatolay ta liwâ da, ngam inattamán na ira, ánnna pinakomá na yù narákè nga kingnguá ra.

<sup>26</sup> Á arán na pinaguráyán ni Namarò yù liwâ nayù ira ngaw tatolay, ta jinok na si Apu Kesu, nga nagikáru ta ngámin nga liwâ da. Yáyù nga mepasingan ta matunung si Namarò, á yáyù gapay ipakkuruk na nittam ta pakomán na ánnna ibiláng na ta matunung yù ira ngámin nga tatolay nga mangikatalà kâ Apu Kesu.

<sup>27</sup> Á gapu ta kunnian yù áaggiát tam, egga panò yù awayyá tam nga mangipappeddaráyaw sù napiánga akkuát tam? Awán! Ta mássiki nu napiá lâ yù akkuát tam, arát tam mapagán yù liwâ tam. Á pakomán na ittam ni Namarò ánnna ibiláng na ittam ta matunung megapu galâ sù pangikatalà tam kâ Apu Kesu Kiristu.

<sup>28</sup> Yaw yu kagiak ku, ta ibiláng ni Namarò ta matunung yù tolay megapu galâ sù ángngikatalà na kâ Apu Kesu, nga ari megapu sù panuppál na sù tunung.

<sup>29</sup> Á ta ángngarigán nu alawatan ni Namarò nakuan yù tolay megapu ta panuppál na sù tunung na, á yù ira Kudio lâ nakuan yù alawatan na ta tatole na, ta aggira lâ iniddán na sù tunung na. Ngam ari gemma kunnian, ta alawatan ni Namarò gapay yù ira ari Kudio ta tatole na,

<sup>30</sup> gapu ta tádday lâ si Namarò. Á arán na irumá yù Kudio ánnna ari Kudio, ta ibiláng na ta matunung yù ira ngámin nga makkakerumá nga tatolay, megapu ta pangikatalà da kâ Apu Kesu Kiristu.

<sup>31</sup> Á gapu ta pangikatalà tam kâ Apu Kesu, anni panò laguk yù passerbián nayù tunung ni Namarò? Masserbi gemma ta mangipakánnámmu nittam sù napiá, tapè tákkitálát tam yù liwâ tam, ánnna tuppálat tam ta napiá yù ituddu nayù tunung, megapu sù pangikatalà tam kâ Apu Kesu.

## 4

### *Yù Meyannung sù Pangikatalà ni Abrakam kâ Namarò*

<sup>1</sup> Á anni laguk yù kagiat tam nga meyannung kâ Kákay Abrakam, nga naggaká nikami nu Kudio?

<sup>2</sup> Á ta ángngarigán nu inibiláng na nakuan ni Namarò ta matunung si Abrakam megapu sù napiánga kingnguá na, á aijan nakuan yù awayyá ni Abrakam nga mangipappeddaráyaw sù katunung na ta arubáng ni Namarò. Ngam awán gemma ta awayyá na, gapu ta ari gemma yù piá ni Abrakam yù gapu na nga inibiláng ni Namarò ta matunung.

<sup>3</sup> Anni yù kagian nayù inipetúrâ na ngaw ni Namarò nga meyannung sù katunung ni Abrakam? Kinagi na, "Inikatalà ni Abrakam si Namarò, á inibiláng ni Namarò ta matunung megapu sù pangikatalà na kuna."\*

<sup>4</sup> Á ta ángngarigán nu aijan yù tolay nga matáddanán megapu sù tarabáku na, á ari gemma mebiláng ta nelimù kuna yù táddán na, nu ari galâ nga táli nayù bannák na.

<sup>5</sup> Ngam ari yù akka-akkuán na tolay yù gapu na alawatan ni Namarò, nu ari galâ yù pangikatalà na kâ Namarò, nu minámmakomá sù ira makaliwâ nga tumulù kuna. Ta awán ta bannák na baggi na nga táli nayù allà ni Namarò kuna. Ngam pakomán ni Namarò ánnna ibiláng na ta matunung megapu galâ sù pangikatalà na kuna.

\* **4:3** Genesis 15:6

<sup>6</sup> Yáyù gapay yù kebalinán nayù kinagi na ngaw ni Patul Dabid, ta kinagi na ta magayáyá yù tolay nga pinakomá ni Namarò ta liwâ na, á ari negapu ta kingnguá na, ngam megapu galâ ta allâ ni Namarò kuna. Netúrâ yù kinagi ni Patul Dabid, nga kun na,

<sup>7</sup> "Magayáyá yù ira tatolay nga pinakomá ni Namarò ta liwâ da, aggira ngámin nga náttamán ni Namarò yù naráké nga kingnguá ra.

<sup>8</sup> Magayáyá yù ira tatolay nga arán ni Namarò nonopan yù liwiliwâ da."<sup>†</sup>

<sup>9</sup> Á yù ira nga kinagi ni Patul Dabid ta magayáyá megapu ta pamakomá ni Namarò nira, asinní ira? Ari lâ yù ira Kudio nga nakugi, ta mesipà gapay yù ira ari Kudio, mássiki nu ari ira nakugi. Ta binibbik tam yaw nga inipetúrâ ni Namarò, ta inibiláng na ta matunung si Abrakam megapu sù pangikatalà na kuna.

<sup>10</sup> Á ari napolu yù kakugì ni Abrakam pángè na pangibiláng ni Namarò kuna ta matunung. Yá ipanguruk tam ta mesipà gapay yù ira ari Kudio sù pamakomá ni Namarò, gapu ta ari paga nakugi si Kákay Abrakam ta kebiláng na ta matunung.<sup>‡</sup>

<sup>11</sup> Inikatalà ni Abrakam si Namarò, á yáyù nga inibiláng ni Namarò ta matunung, lage na nakugi. Á nakugi laguk si Abrakam ta panákkilál na napakomángin, nga nebiláng ta matunung ta ánnunganán ni Namarò megapu sù pangikatalà na kuna. Á yáyù nga nabbalin si Abrakam ta kunnay ta naggaká sù ira ngámin nga mangikatalà kâ Namarò, mássiki yù ira ari Kudio, nga ari nakugi, gapu ta ibiláng ni Namarò ira gapay ta matunung megapu ta mangikatalà da kuna.

<sup>12</sup> Á naggaká gapay si Kákay Abrakam sù ira Kudio nga mangikatalà kâ Namarò. Á ari yù kakugì da yù kegapuánán nayù kesipâ da kâ Abrakam, nu ari galâ yù pangikatalà da kâ Namarò ta kunnay sù ángngikatalà ni Abrakam kuna ngaw pángé na nakugi.

### Málawâ tam yù Initabbá ni Namarò megapu sù Pangikatalà tam kuna

<sup>13</sup> Á initabbá ni Namarò kári Abrakam áンna yù ira ginaká na ta aggira yù makákkua ta ngámin nga dabbuno, á mammaguray ira sù ira tatolay nga maggián kuna. Á yawe nga initabbá ni Namarò nira, ari gemma negapu ta panuppál ni Abrakam sù tunung na, ta arán na paga iniyawâ ni Namarò yù tunung.<sup>§</sup> Ngam initabbá na nira gapu ta inibiláng na ta matunung si Abrakam megapu galâ sù pangikatalà na kuna.

<sup>14</sup> Á ta ángngarigán, nu yù ira tatolay lâ nga iniddán ni Namarò sù tunung na yù mangalawâ nakuan sù initabbá na, awán nakuan ta serbi nayù ángngikatalà tam kuna. Á awán gapay nakuan ta serbi nayù initabbá na, ta awán nakuan ta iddán na, gapu ta awán gerâ ta tolay nga makatuppál sù tunung na, mássiki nu parubán na ta napiá.

<sup>15</sup> Á mekanakanâ ittam ngámin nga tatolay sù pore ni Namarò megapu sù tunung na nga pakaliwatát tam. Á ta ángngarigán nu arán na nakuan iniyawâ yù tunung, awán gapay nakuan ta ikáru tam gapu ta awán nakuan ta pakaliwatát tam.

<sup>16</sup> Á yáyù nga málâ tam yù initabbá ni Namarò megapu galâ sù pangikatalà tam kuna, tapè maláddâ yù initabbá na sù ira ngámin nga mangikatalà kuna megapu galâ sù allâ na nittam. Á yáyù nga ari lâ yù ira Kudio nga tumuttul sù tunung yù mesipà sù ira initabbá ni Namarò, ngam mesipà gapay yù ira mangikatalà nga ari Kudio, nga negittá yù ángngikatalà da sù ángngikatalà ni Abrakam. Á si Kákay Abrakam yù kunnay ta naggaká nittam ngámin nga mangikatalà kâ Namarò nga kunnay kuna.

<sup>17</sup> Yáyù nga inipetúrâ na ngaw ni Namarò yù kinagi na kâ Abrakam, nga kun na,

"Sinullà taka, tapè sikaw yù maggaká sù aru ira nga makkakerumá nga tatolay."<sup>\*</sup>

Yáyù initabbá ni Namarò kâ Abrakam megapu sù pangikatalà ni Abrakam kâ Namarò. Á si Namarò yù makáwayá nga manotolay sù ira námmatay áンna magubobuk lâ sù ikáyâ na nga parotan, á maparo.

<sup>18</sup> Á sù pangitabbá ni Namarò kári Abrakam, lakalákay áンna bakabákâ iren, nga awán ta anâ da. Ngam iniddanámán na lâ ni Abrakam yù paganâ da, gapu ta kinuruk na yù kinagi ni Namarò kuna, nga kunnay ta káru nayù ira bituan yù biláng nayù ira ginaká na noka.<sup>†</sup>

<sup>19</sup> Á mássiki nu ammu na ta mabi yù pate na támma, gapu ta mágge magatû yù dagun na, ngam ari nabbábâng nga magiddak sù initabbá ni Namarò kuna. Á mássiki nu ammu na ta bakabákâ si Sara nga atáwa na, nga ari bulubugá naganâ, á ari nakkapi yù ángngikatalà ni Abrakam.

<sup>†</sup> 4:8 Salmo 32:1-2    <sup>‡</sup> 4:10 Mapulu appâ yù dagun nga napásá ta pangikatalà ni Abrakam ta palurotan ni Namarò sù initabbá na, ta áddè ta kakugì na.    <sup>§</sup> 4:13 Naggián ngaw nga nabayágín si Kákay Abrakam, lage na keyanâ ni Moyses, nga yù ngaw iniddán ni Namarò ta tunung na.    <sup>\*</sup> 4:17 Genesis 17:5    <sup>†</sup> 4:18 Genesis 15:5-6

<sup>20</sup> Ari bulubugá mabbábáng si Abrakam ta meyannung sù initabbá ni Namarò kuna, ngam napasigaggà yù ángngikatalà na kuna, á jináyo na si Namarò pángè na nangalawâ sù initabbá na.

<sup>21</sup> Á napasigaggà yù pangikatalà ni Abrakam sù pakáwayyá ni Namarò nga mammalurò sù initabbá na.

<sup>22</sup> Á yáyù nga inipetúrâ ni Namarò ta inibiláng na ta matunung si Abrakam, megapu sù pangikatalà na kuna.

<sup>23</sup> Á netúrâ yù ubobuk nga “inibiláng na ta matunung,” nga ari lâ megapu kâ Abrakam,

<sup>24</sup> nu ari gapay megapu nittam, tapé ammu tam ta ibiláng na gapay ta matunung ittam ngámin nga mangikatalà kâ Namarò nga namaginnanolay kâ Apu Kesu Kiristu, nga Yápu tam.

<sup>25</sup> Ta nebáyuk nga netapil si Apu Kesu megapu sù liwiliwâ tam, á pinaginnanole ni Namarò, tapé mapakomá ittam ánnna ibiláng ni Namarò ta matunung ittam.

## 5

### *Si Apu Kesu yù Namakkápiá nittam kâ Namarò*

<sup>1</sup> Á gapu ta pangikatalà tam kâ Apu Kesu, pinakomá na ittamin ni Namarò ánnna inibiláng na ittam ta matunung. Á yáyù nga napiángin yù áaggiát tam kâ Namarò megapu sù kingnguá ni Apu Kesu Kiristu nga Yápu tam.

<sup>2</sup> Á gapu ta pangikatalà tam kâ Apu Kesu, mesipâ ittamin sù pangikallà ni Namarò. Á yáyù nga magayáyâ ittam, ta iddanamát tam ta mesipâ ittam kâ Namarò ánnna meparáyaw ittam kuna ta lángi.

<sup>3</sup> Á ari lâ yian yù ipagayáyâ tam, ta magayáyâ ittam gapay megapu sù jigâ tam, gapu ta ammu tam sangaw magattam, nga napiá nga pabbalinán nayù pajjigâ tam.

<sup>4</sup> Á nu magattam ittam, abbágán na ittam ni Namarò, tapé mabbáli ta napiá yù nonò tam. Á yáyù nga iddanamát tam yù napiá nga initabbá ni Namarò nittam.

<sup>5</sup> Á maguray lâ yù mesimmu nittam, ari ittam bulubugá mepasiránán, ta ammu tam ta kukurugán nga alawatat tam yù ngámin nga iddanamát tam, nga initabbá ni Namarò nittam. Á matagenà tam yù iddù ni Namarò nittam megapu sù Mangilin nga Ikararuá na nga iniyawâ na nittam.

<sup>6</sup> Á sù ngaw, nakaliwâ ittam ngámin, á awán paga ta mangabbák nittam, tapé palurotat tam nakuan yù ikáyâ ni Namarò. Ngam ikállà ni Namarò ittam, á dattál nayù ággaw nga sinullà na, netapil si Apu Kesu Kiristu megapu nittam nga minálliwâ.

<sup>7</sup> Á marigâ gemma nu mabbaluntáriu nga matay yù tolay, nga metapil megapu sù tádday nga tolay nga matunung. Á eggá mápugák yù tolay nga mabbaluntáriu nga matay megapu sù tádday nga tolay nga kuruk nga napiá.

<sup>8</sup> Ngam yá pangipasinganán ni Namarò sù iddù na nittam, ta mássiki nu nakaliwâ ittam paga, initapil ni Apu Kesu Kiristu yù baggi na megapu nittam.

<sup>9</sup> Á yáyù nga napakomá ittamin, nga nebiláng ta matunung megapu sù dága ni Apu Kesu nga nepappagá megapu sù liwiliwâ tam. Á ari lâ yian, nu ari gapay ta iyígù na ittam, tapé ari ittam mekanakanâ sù pore ni Namarò sangaw nu ukuman na yù ira manakì kuna.

<sup>10</sup> Kinontará tam ngaw si Namarò, ngam kunangane, arát tamin ikalussaw, gapu ta pinakomá na ittam ta liwâ tam ánnna pinakkápiá na ittamin kuna, megapu sù pate nayù Anâ na. Á gapu ta nakkkápiá ittamin kuna, kuruk nga meyígù ittam gapay, gapu ta naginnanolayin si Apu Kesu nga matotolay ta áddè ta áddè nga mangabbák nittam.

<sup>11</sup> Á ari lâ yian, ta magayáyâ ittam gapay gapu ta napiá nigin yù áaggiát tam kâ Namarò. Á dayáwat tam si Namarò megapu kâ Apu Kesu Kiristu nga Yápu tam, ta aggina yù namakkápiá nittam kâ Namarò.

### *Yù Kingnguá ni Adan ánnna yù Kingnguá ni Apu Kesu*

<sup>12</sup> Á anni má panò ta makaliwâ ittam? Sù ngaw keggá nayù ira olu nga tatolay ta dabbuno, nalliwâ si Adan, nga olu nga tolay, á yáyù pamegapu na palliwâ nayù ira tatolay ta dabbuno, megapu sù táttáddyay nga tolay. Á natay si Adan megapu sù liwâ na. Yáyù pamegapu na pate nayù ira tatolay ta dabbuno, gapu ta nakaliwâ ittam ngámin.

<sup>13</sup> Á nalliwâ gemma yù ira ngámin nga tatolay áddè ngaw lage na pangalawâ ni Moyses sù tunung ni Namarò, ngam ari netúrâ yù liwâ da, gapu ta arán na paga iniyawâ ni Namarò yù tunung na nira.

<sup>14</sup> Á mepasingan ta nalliwâ yù ira tatolay, gapu ta natay ira ngámin áddè sù keggá ni Adan ta áddè sù keggá ni Moyses, mássiki nu nerumá yù liwâ da sù liwâ ni Adan. Ta nalliwâ si Adan ta pamotu na sù daretiu nga taddán ni Namarò kuna.

Á si Adan yù keyarigán ni Apu Kesu Kiristu, ngam ajjan yù áddumá ra. Ta kinagi ni Namarò kâ Adan yù kurugan na nakuan, ngam pinotuán na. Á yáyù nga jinok ni Namarò si Apu Kesu Kiristu, nga minay ta dabbuno nga siminubbâ kâ Adan. Á kinuruk ni Apu Kesu yù ngámin nga kinagi ni Apu Namarò kuna.

<sup>15</sup> Á kuruk nga naddumá yù kingnguá ni Adan ánná yù kingnguá ni Apu Kesu! Ta nalliwâ yù olu nga tolay, á yáyù pamegapu nayù palliwâ ánná pate na tolay ta dabbuno. Ngam jinok ni Namarò yù tádday, nga si Apu Kesu Kiristu. Á pinalurò ni Apu Kesu yù inipakuá ni Namarò kuna. Á yáyù nga pinatturù ni Namarò yù allà na nittam, megapu sù kingnguá ni Apu Kesu. Á aru yù ira tatolay nga málâ da yù arád da mapagán, nga pamakomá ni Namarò nira, tapè mesipâ ira kâ Namarò.

<sup>16</sup> Á nerumá yù pabbalinán nayù kingnguá ni Adan sù pabbalinán nayù kingnguá ni Apu Kesu. Ta napagikárú yù ira ngámin nga tatolay megapu sù liwâ nayù tádday, nga si Adan. Ngam megapu sù pangikállà ni Namarò nira, iniyawâ na yù táttádday nga Anâ na, tapé aru yù ira tatolay nga mapakomá ta aru nga liwiliwâ da, ánná mebiláng ira ta matunung.

<sup>17</sup> Á megapu sù liwâ nayù tádday nga tolay, nga si Adan, matay yù ira ngámin nga tatolay. Ngam megapu sù nerallà nga allà ni Namarò, aru yù ira nga mangalawâ sù allà na ánná yù iyawâ na nira, nga katunung da megapu kâ Apu Kesu, á matotolay ira nga mepammaguray kâ Apu Kesu Kiristu ta áddè ta áddè.

<sup>18</sup> Á yá pabbalinán nayù liwâ nayù tádday nga tolay, ta mapagikárú yù ira ngámin nga tatolay. Ngam megapu sù napiá nga kingnguá nayù tádday, nga si Apu Kesu Kiristu, á mapakomá ittamin, ánná mesipâ ittam nga mepattolay kâ Namarò.

<sup>19</sup> Á aru yù nalliwâ megapu sù palliwâ nayù olu nga tolay. Ngam megapu sù panguruk nayù tádday, aru yù ira nga mapatunung.

<sup>20</sup> Iniyawâ ni Namarò yù tunung na, tapè tákkitálát tam yù liwiliwâ tam nga aru. Á mássiki nu aru yù liwâ tam, patturutan na gapay ni Namarò yù allà na nittam.

<sup>21</sup> Á natay yù ira ngámin nga tatolay gapu ta kinuruk da yù pakkaragâ da nga malliwâ, nga kunnay ta mammaguray níra. Ngam sittam nga makiyápu kâ Apu Kesu Kiristu, kurugat tamin si Namarò nga mangikállà nittam. Á yáyù nga mammaguray ngin si Namarò nittam, á ibiláng na ittam ta matunung megapu sù pangikatalà tam kâ Apu Kesu Kiristu, ánná mesipâ ittam nga mepattolay kuna ta áddè ta áddè.

## 6

### *Yù Meyannung ta Bagu nga Áttolé tam*

<sup>1</sup> Á gapu ta allà ni Namarò nittam, anni laguk nakuan yù kagiat tam? Mâyâ panò ta uputat tam nakuan nga malliwâ, tapè patturuturutan ni Namarò yù pangikállà na nga sigidá na pakomán ittam? Ari gemma!

<sup>2</sup> Arát tam gemma uputan yù malliwâ! Ta nu kuruk nga ikatalà tam si Apu Kesu, á kunnay ta nesipâ ittam gapay kuna ta pate na ta kurù. Á aringin malliwâ yù tolay nga natayin!

<sup>3</sup> Arán naw panò ammu yù kebalinán nayù karigù tam? Sittam nga narigù megapu sù ángngikatalà tam kâ Apu Kesu Kiristu, nepattatádday ittam kuna. Á yáyù nga kunnay ta nepappatay ittam gapay kuna.

<sup>4</sup> Á kunnay ta nepattatádday ittam gapay kuna sù ketanam na. Á kunnay sù pamaginanole na kuna ni Namarò nga Yáma na, megapu sù ámmagaddátu na nga makapálâ, á mepárik ittam gapay kuna sù áttolé na, tapè uputat tam gapay nga akkuán yù napiá nga mepángngâ sù bagu nga áttolé tam.

<sup>5</sup> Á gapu ta nepattatádday ittam kâ Apu Kesu, nga nepappatay kuna sù pate na, á yáyù nga mepárik ittam gapay kuna sangaw nu maginnanolay ittam nga kunnay sù paginnanole na.

<sup>6</sup> Ta ammu tam ta ajian yù dán nga nonò tam nga kunnay ta nebáyuk gapay sù pate ni Apu Kesu ta kurù, tapè maringin yù dán nga nonò tam, nga nakkaragâ ta malliwâ, á ari ittamin kunnay ta makiaripan sù mamalliwâ nittam.

<sup>7</sup> Ta nu natay yù tolay, napalubbángin, á awánin ta awayyá nayù mamalliwâ nga mangaripan kuna.

<sup>8</sup> Á nu nebiláng ta nepappatay ittamin kâ Apu Kesu Kiristu sù pate na, ammu tam ta mepattolay ittam gapay kuna.

\* 6:3 1 Korinto 12:13; Galasia 2:27

<sup>9</sup> Ta ammu tam gemma ta naginnanolayin si Apu Kesu Kiristu, á aringin bulubugá matay.

<sup>10</sup> Á mittán lâ nga natay ta pagikáru na ta liwâ tam ngámin, á yáyù áddè na. Á matolayin, tapè palurotan na ngámin yù ikáyâ ni Namarò nga Yáma na.

<sup>11</sup> Á ta kunnian, ibiláng naw yù baggi naw ta kunnay ta natay kayin nga aringin malliwâ. Á kunnay ta nepaginnanolay kayin, nga bagu yù áttole naw megapu sù kepattatádde naw kâ Apu Kesu Kiristu, tapè akkuán naw gapay yù napiá nga ikáyâ ni Namarò.

<sup>12</sup> Á arán naw laguk itulù yù baggi naw sù narákè nga karagatán naw, tapè arán naw tuppálan yù narákè nga negagángay ta baggi naw. Ta matay gemma yù baggi naw.

<sup>13</sup> Arán naw laguk iyusá yù baggi naw ta mangnguá ta narákè. Ngam itulù naw yù nonò naw áんな ngámin nga baggi naw kâ Namarò, tapè palurotan naw yù napiá nga ipakuá ni Namarò nikayu, ta yáyù mepángngâ sù ira nga kunnay ta natayin nga aringin makkaragâ ta narákè, áんな kunnay gapay ta nepaginnanolay iren nga mesipà sù pammagurayán ni Namarò.

<sup>14</sup> Ta nelilli kayin sù pammagure nayù mamalliwâ, á yáyù nga ari kayin mapagikáru megapu sù tunung. Ta si Namarò yù mammaguray nikayu, á pinakomá na kayin ta liwiliwâ naw megapu sù allà na.

### *Nupalubbáng ittam, tapè Makiaripan ittam kâ Namarò*

<sup>15</sup> Anni laguk yù kagiat tam? Egga panò yù awayyá tam nga akkuán yù narákè nga karagatát tam, gapu ta meyígù ittam megapu sù allà ni Namarò, tapè ari ittam mapagikáru megapu ta pakaliwâ tam sù tunung? Aringin gemma!

<sup>16</sup> Á ta ángngarigán, nu makiaripan kayu sù tolay, á ammu naw gemma ta aripan na kayu, á yáyù nga kurugan naw yù kagian na. Á kunnian gapay nikayu, ta nu itulù naw yù nonò naw ta narákè nga karagatán naw, á kunnay ta aripan na kayu nayù narákè. Á yá pabbalinán nayù pakiaripan naw ta narákè, ta matay kayu nga mesinná kâ Namarò ta áddè ta áddè. Ngam nu manguruk kayu kâ Namarò, aggina yù Yápu naw, á mesipà kayu kuna, gapu ta ibiláng na kayu ta matunung.

<sup>17</sup> Sù ngaw, kunnay ta aripan na kayu nayù narákè. Ngam kunangane, aringin. Á yáyù nga dayawak ku si Namarò, ta pinatattam nawin ta nonò naw áんな kurugan naw yù napiá nga inituddù nikayu.

<sup>18</sup> Á pinalubbáng na kayu ni Namarò sù narákè, tapè makiaripan kayu kâ Apu Kesu, áんな akka-akkuán naw lâ yù napiá áんな matunung.

<sup>19</sup> Á iyángngarigák ku yù meyannung ta aripan áんな yù yápu na, tapè kánnámmuán naw. Á sù ngaw, initulù naw yù baggi naw ta narákè áんな sinuppál naw yù narákè nga ninonò naw. Ngam kunangane, itulù naw yù baggi naw kâ Apu Kesu Kiristu, á tuppálan naw yù napiá nga mepángngâ kuna, tapè mabbalin ta pareku nga napiá yù nonò naw nga kun na nonò nayù Yápu naw.

<sup>20</sup> Sù ngaw pakiaripan naw ta narákè nga nonò naw, ari kayu nesipà sù pammagure ni Namarò áんな arán naw kingnguá yù napiá áんな matunung nga ipakuá na nakuan nikayu.

<sup>21</sup> Ngam anni laguk yù málâ naw nga balabálâ naw sù narákè nga kingngikingnguá naw? Yaw lâ pabbalinán na yù kepasirán naw áんな pate naw nga mesinná kâ Namarò.

<sup>22</sup> Ngam kunangane, pinalubbáng na kayin ni Namarò sù narákè nga nangaripan ngaw nikayu, á pinabbalin na kayin ni Namarò ta aripan na, nga masserbi kuna. Á yá pabbalinán nayù pakiaripan naw kâ Namarò yù napiá nga nonò naw, nga iyawâ na níkayu, tapè tuppálan naw yù napiá nga ipakuá na nikayu, áんな mesipà kayu nga mepattolay kuna ta áddè ta áddè.

<sup>23</sup> Ta yù ira tatolay nga makiaripan ta narákè nga pakkaragâ da, mattáddanán ira ta pate ra nga mesinná kâ Namarò ta áddè ta áddè, megapu sù palliwâ da. Ngam ikállâ na ittam ni Namarò, á ilímù na nittam yù bagu nga áttole tam, tapè mesipà ittam kuna nga mepattolay ta áddè ta áddè megapu ta kepattatádde tam kâ Apu Kesu Kiristu ngó Yápu tam.

## 7

### *Nupalubbáng ittam sù Pakáwayyá nayù Tunung*

<sup>1</sup> Wáwwagi, kánnámmuán naw yawe nga kagiak ku, sikayu nga makánnámmu sù tunung. Megaggárán yù tolay ta keggá na lâ nga matolay, megapu sù ira taddán nga netúrâ sù tunung.

<sup>2</sup> Á ta ángngarigán nu aijan yù babay nga nakiatáwa, á ta meyannung sù taddán nayù tunung, maggián lâ yù babay sù atáwa na ta keggá na lâ nayù laláki nga matolay paga, á mattádday ira lâ nga magatáwa. Ngam nu natayin yù laláki, á náringin yù pakáwayyá nayù

tunung nga meyannung sù olu nga atáwa na, gapu ta natayin, á awayyá nayù babay nga makiatáwa ta tanakuán.

<sup>3</sup> Á ta meyannung sù tunung, nu matolay paga yù olu nga atáwa na, á nu umay yù babay nga makiatáwa ta tanakuán, ingágad da ta makikarallaw. Ngam nu natay yù olu nga atáwa na, á nu makiatáwa yù babay ta tanakuán, ari makikarallaw.

<sup>4</sup> Á kunnian gapay yù keyarigát tam, sittam nga mangikatalà kâ Apu Kesu. Gapu ta ketádde tam kâ Apu Kesu Kiristu, á kunnay ta nepappatay ittam gapay kuna ta pate na, á napalubbáng ittam sù pakáwayyá nayù tunung. Á yáyù nga metádday ittam sù tanakuán, nga si Apu Kesu Kiristu nga naginnanolay, tapè akkuát tam yù napiá nga ipakuá na nittam, ánná meparáyaw si Namarò.

<sup>5</sup> Á sù ngaw panguruk tam paga sù dán nga nonò tam, narámak tam yù ira taddán ni Namarò nga netúrâ sù tunung, á nangakkakalò yù pakkaragâ tam ta narákè, megapu sù inipanonò nayù tunung nittam. Á yáyù nga nappanà yù narákè nga kingnguá tam. Á yá pabbalinán nayù liwiliwâ tam yù pate tam, nga mesinná kâ Namarò ta áddè ta áddè.

<sup>6</sup> Ngam kunangane, aringin yù tunung yù mammaguray nittam, gapu ta kunnay ta natay ittamin, nga napalubbáng sù pakáwayyá na. Á si Namarò laguk yù passerbiát tam, nga ari megapu sù pakáwayyá nayù tunung nga dán nga netúrâ, nu ari galâ megapu sù pakáwayyá nayù bagu nga áttole tam nga naggapu sù Ikararuá ni Namarò.

### *Yù Meyannung sù Tunung ánná Liwâ*

<sup>7</sup> Á kagiat tam panò ta narákè yù tunung, gapu ta nappanà yù palliwâ tam ta pakánnámmu tam sù tunung? Ari gemma! Nu awán nakuan ta tunung, arák ku ammu ta narákè yù ággangnguâ. Á ta ángngarigán, nu arán na kagian nayù tunung nga kuniaw, "Ari kayu mamassil," á arák ku nakuan ammu ta nalliwâkâ nu passilak ku yù kukuá nayù kabbuluk ku.

<sup>8</sup> Á gapu ta sikán yù minálliwâ, yáyù nga nangakkakalò yù pakkaragâ ku sù ngámin nga mepugík nikán, megapu sù kinágí nayù tunung, nga aringà nakuan mamassil. Ngam nu awán nakuan ta tunung, awán gapay ta pakaliwaták ku.

<sup>9</sup> Á sù ngaw aringà paga natuddúan sù tunung, kinagi ta napiá yù áaggiák ku, ta arák ku ammu yù liwâ ku. Ngam pakánnámmu sù taddán ni Namarò nga tunung, á natákkilálâk ku yù liwâ ku, á nappanà laguk yù palliwâ ku.

<sup>10</sup> Á iniyawâ ni Namarò yù tunung tapè mepattolay ittam kuna ta áddè ta áddè megapu sù panuppál tam sù tunung. Ngam mapagikárungâ nga matay nga mesinná kâ Namarò, gapu ta arák ku matuppál yù tunung.

<sup>11</sup> Ta pakánnámmu sù taddán nga netúrâ sù tunung, inilogò nangà nayù dán nga nonò ku megapu sù narákè nga pakkaragâ ku. Á yáyù nga nakaliwaták ku laguk yù tunung, á kunnay ta pinapáte nangà nayù liwâ ku, gapu ta mapagikáru yù ira minálliwâ, nga matay umay ta impiernu.

<sup>12</sup> Á yáyù nga kuruk nga napiá ánná mangilin yù ira ngámin nga taddán ni Namarò nga netúrâ sù tunung.

<sup>13</sup> Á makagi tam panò ta yù napiá nga tunung yù paggapaná nayù pate tam? Ari gemma! Ngam yù liwâ tam galâ yù paggapaná nayù pamagikáru ni Namarò nittam, ta pakaliwatát tam yù tunung. Á yáyù nga mepasingan ta kuruk nga narákè yù palliwâ tam megapu sù napiá nga tunung.

### *Arát tam Matuppál yù Tunung*

<sup>14</sup> Ammu tam ta kuruk nga napiá yù tunung, nga naggapu kâ Namarò. Ngam sikán, tolayà lá nga minálliwâ, á arák ku matuppál yù tunung, gapu ta kunnay ta aripa nangà nayù mammaliwâ.

<sup>15</sup> Á arák ku kánnámmuán yù akkuák ku, ta arák ku garè akkuán yù napiá nga ikáyâ ku nga akkuán, ngam iddâ ku lá akkuán yù narákè nga arák ku ikáyâ.

<sup>16</sup> Á mássiki nu arák ku akkuán yù ituddu nayù tunung, tákkilálâk ku ta kuruk nga napiá yù tunung, gapu ta mappasiránâ megapu sù narákè nga akkuák ku.

<sup>17</sup> Á aringin sikán yù paggapaná nayù narákè nga akkuák ku, nu ari galâ negapu sù narákè nga pakkaragâ nayù dán nga nonò ku, nga manudduák nikán.

<sup>18</sup> Á ammù gemma ta awán ta napiá nga nakeyanaták ku. Awán bulubugá ta napiá sù dán nga nonò ku. Mássiki nu talákkurugak ku nga akkuán yù napiá, ngam arák ku makuá.

<sup>19</sup> Arák ku akkuán yù napiá nga ikáyâ ku. Ngam yù narákè nga arák ku ikáyâ, yáyù akkuák ku.

<sup>20</sup> Á nu akkuák ku yù narákè nga arák ku ikáyâ, aringin sikán yù maká-uray, nu ari galâ yù narákè nga manudduák nikán, tapè malliwákâ.

<sup>21</sup> Á kunniauw laguk yù ággiák ku. Mássiki nu ikáyâ ku nga akkuán yù napiá megapu sù tunung, ngam megaggarà megapu sù narákè nga karagatán nayù dán nga nonò ku.

<sup>22</sup> Ayatán yù nonò ku áンna baggi nga manuppál sù ngámin nga napiá nga tunung ni Namarò.

<sup>23</sup> Ngam ammù ta ajjan yù tanakuán nga ággangnguá nayù baggi, nga mangontará sù napiá nga tunung ta nonò ku. Á yáyù nga kunniauw ta aripan nanga nayù narákè nga ággangnguâ, ta malliwákâ megapu sù narákè nga ággangnguá.

<sup>24</sup> Kábbingâ lâ! Asinni panò yù makáwayyá nga mangiyígù nikán? Asinni yù malubbâng nikán sù baggi nga mangngamangnguá ta narákè áンna matay nga mapagikáru ta áddè ta áddè?

<sup>25</sup> Dayáwak ku si Namarò, ta ajjanin yù mangiyígù nittam, nga si Apu Kesu Kiristu nga Yápu tam.

Á kunniawe laguk yù ággiák ku. Talákkurugak ku nga tuppálan yù napiá nga tunung nga ikáyâ ku, gapu ta si Namarò yù passerbiák ku. Ngam ajjan yù dán ta nonò ku nga manudduák nikán ta tuppálak ku yù narákè nga karagatán na.

## 8

### *Yù Bagu nga Áttole tam nga Naggapu sù Ikararuá ni Namarò*

<sup>1</sup> Á sittam nga nepattatádday kâ Apu Kesu Kiristu, kunniauw laguk yù ággiát tam. Awánin bulubugá ta ipékárú ni Namarò nittam.

<sup>2</sup> Á gapu ta nepattatádday ittam kâ Apu Kesu Kiristu, pinalubbâng na ittam nayù Ikararuá ni Namarò sù pakáwayyá nayù narákè sù dán nga nonò tam, á iniyawâ na nittam yù bagu nga áttole tam, tapè ari ittam mapagikáru nga mesinná kâ Namarò.

<sup>3</sup> Ari ittam meyígù megapu sù tunung, ta megaggak ittam nga ari makatuppál sù tunung, gapu ta narákè yù karagatán nayù baggi tam. Ngam pinalurò ni Namarò yù pangiyígù na nittam, nga ari mapalurò megapu sù tunung. Ta jinok ni Namarò yù Anâ na ta umay meyanâ ta tolay, tapè eggá yù baggi na nga negítta ta baggi tam, ngam awán na liwâ na. Á pinagikáru ni Namarò yù baggi nayù Anâ na megapu sù liwiliwâ tam ngámin nga tatolay.

<sup>4</sup> Yáyù pinalurò ni Namarò, tapè mapalurò tam yù napiá nga taddán nga netûrâ sù tunung. Á yáyù nga arát tamín kurugan yù narákè nga karagatán nayù baggi tam, ngam tumulù ittam sù Mangilin nga Ikararuá ni Namarò, tapè mapalurò tam yù napiá nga ipakuá na nittam megapu sù ángngabbák na.

<sup>5</sup> Yù ira tatolay nga tumulù sù pakkaragâ nayù baggi ra, nonopad da lâ yù narákè nga karagatán nayù dán nga nonò da. Ngam nu tumulù ittam sù Mangilin nga Ikararuá ni Namarò, ipittâ tam laguk ta nonò tam yù napiá nga ituddu na.

<sup>6</sup> Ta nu tumulù yù tolay sù narákè nga pakkaragâ nayù baggi na, impiernu lâ yù labbetán na. Ngam nu tumulù ittam sù Ikararuá ni Namarò, magimammâ yù nonò tam, á meppattolay ittam nga mesipâ kâ Namarò ta áddè ta áddè.

<sup>7</sup> Á nu nonopat tam yù narákè nga pakkaragâ nayù baggi tam, makikontará ittam kâ Namarò, gapu ta arát tam kurugan yù tunung na. Á arát tam gemma matuppál yù tunung na, gapu ta megaggak ittam megapu sù narákè nga karagatán nayù dán nga nonò tam.

<sup>8</sup> Á nu tumulù ittam sù narákè nga pakkaragâ nayù baggi tam, arát tam mapagayáyâ si Namarò.

<sup>9</sup> Ngam sikayu nga paggianán nayù Ikararuá ni Namarò, arán nawin kurugan yù narákè nga pakkaragâ nayù baggi naw. Ngam kurugan naw yù ipakánnámmu na nikayu nayù Mangilin nga Ikararuá ni Namarò, gapu ta kuruk nga maggiánin nikayu. Á yù tolay nga arán na paggianán nayù Ikararuá ni Apu Kesu Kiristu, ari yù tole na.

<sup>10</sup> Ngam maggián si Apu Kesu Kiristu nikayu, á mássiki nu máwák nga matay yù baggi naw megapu sù liwâ naw, á meppattolay kayu sù Ikararuá ni Namarò, gapu ta pinakomá na kayu ni Namarò ta liwâ naw, ánná iníbiláng na kayu ta matunung.

<sup>11</sup> Á pinaginnanole ni Namarò si Apu Kesu Kiristu. Á nu kuruk nga maggián yù Mangilin nga Ikararuá ni Namarò nikayu, pagínnanolayan na gapay sangaw ni Namarò yù baggi naw megapu sù Ikararuá na nga maggián nikayu.

<sup>12</sup> Á wáwwagi, yáyù nga ajjan yù máwák tam nga palurotan, ngam arát tam palurotan yù narákè nga karagatán nayù baggi tam.

<sup>13</sup> Á nu kurugan naw yù narákè nga pakkaragâ naw, mokum kayu nga mesinná kâ Namarò ta áddè ta áddè. Ngam nu tumulù kayu sù Ikararuá ni Namarò, ánná arán naw

akkuán yù narékè nga karagatán nayù baggi naw, mepattolay kayu nga mesipà kâ Namarò ta áddè ta áddè.

<sup>14</sup> Ta sittam ngámin nga tumulù sù Ikararuá ni Namarò, ánâ na ittam ni Namarò.

<sup>15</sup> Á gapu ta ánâ na ittamin ni Namarò, ari ittamin maganássing nga kunnay ta ikássing na aripan sù yápu na. Ta iniyawâ ni Namarò nittam yù Ikararuá na, á yáyù nga ajianin yù awayyá tam nga magubobuk kuna, nga kut tam, "Ammò, nga Yáma tam!"

<sup>16</sup> Á yù Ikararuá ni Namarò nga maggián nittam yù mangipakánnámmu nittam ta ánâ na ittam ni Namarò.

<sup>17</sup> Á gapu ta pinataganatán na ittam ni Namarò, ipakánnámmu na gapay nittam nayù Ikararuá na ta mesipà ittam sù ngámin nga initabbá ni Namarò, nga iyawâ na kâ Apu Kesu Kiristu. Ta mawák nga iyangngâ tam yù balle tam nga jigâ, nga kunnay sù pangiyangngâ ni Apu Kesu Kiristu, tapè mesipà ittam gapay kuna sù kepotun na ánnna keparáyo na.\*

*Yù Napiá nga Iddanamán nayù ira Mangikatalà kâ Apu Kesu*

<sup>18</sup> Nonopat tam yaw, ta mássiki nu narámmâ yù jírigâ tam ta keggá tam sawe dabbuno, á kunnay ta awán lâ yù jigâ tam nu nonopat tam yù pagayáyâ tam megapu sù ngámin nga napiá ánnna nakástá nga mepalappâ nittam sangaw nu iparáyaw ni Namarò ittam.

<sup>19</sup> Á ari lâ sittam nu ari gapay yù ira ngámin nga naparò ta dabbuno yù mapattû nga magiddi-iddak sù pangipalappâ ni Namarò sù ira ánâ na.

<sup>20</sup> Sù ngaw nga nabayágîn, inigagek ni Namarò yù ira tatolay ánnna pinatalián na yù áaggiád da megapu sù liwâ da, á nekanakanâ yù ngámin nga dabbuno ánnna ngámin nga naparò sù pangigagek na nira, nga ari megapu ta ure ra, ngam megapu galâ sù ure ni Namarò. Á yáyù nga arán na ira pinabbalin paga ta kun na ikáyâ na, ta mallabbak lâ mallabbak yù ngámin nga pinarò na. Ngam aijan gapay yù iddanamád da.

<sup>21</sup> Ta palubbángan na íra galâ sangaw ni Namarò sù pangigagek na sù ngámin nga naparò, tapè mesipà yù ngámin nga pinarò ni Namarò sù pangiyígù na sù ira ánâ na ánnna yù pamalubbáng na nira, á awánin ta matay ánnna marúnù.

<sup>22</sup> Á ammu tam yù ággíán nayù ngámin nga naparò ta áddè ngaw sù keggá ni Adan ta áddè kunangan, nga kunnay ta babay nga magaráyan nga magiddak ta paganá na.

<sup>23</sup> Á ari lâ yù dabbuno ánnna yù mayán na yù marigirigâ nga magiddi-iddak, ngam sittam gapay nga iniddán nen ni Namarò sù Ikararuá na, nga olu nga initabbá na nittam. Ta kunnay ta magaráyan ittam nga mapattû nga magiddi-iddak sù pangipalappâ ni Namarò nittam nga pinataganatán na, ánnna yù panguli na sangaw sù baggi tam ta bagu nga ari mataki ánnna ari matay.

<sup>24</sup> Á áddè ngaw sù pamegapu tam panguruk kâ Apu Kesu Kiristu ta áddè kunangan, iddanamát tam yù paginnanole tam. Á mássiki nu neyígù ittamin, arát tam paga nálâ yù iddanamát tam, ta nu nálâ tam nakuan, arát tamin iddanamá.

<sup>25</sup> Ngam gapu ta iddanamát tam yù arát tam paga nálâ, ari ittam laguk malurâ nga magiddak ta áddè ta arát tam pakálawâ kuna.

*Ipakimállâ na ittam nayù Ikararuá ni Namarò*

<sup>26</sup> Á mábbágân ittam megapu sù pagiddanáma tam. Á aijan yù pakkapíyát tam, á arát tam garè ammu yù kapiánán nga ipakimállâ tam, nga mepángngâ sù ira ánâ ni Namarò. Ngam yù Mangilin nga Ikararuá ni Namarò gapay yù mangabbák nittam, á ipakimállâ na ittam megapu sù panalasigâ na nga ari makagi.

<sup>27</sup> Á si Namarò, nga makánnámmu sù ngámin nga eggâ ta nonò tam, kánnámmuán na gapay yù eggâ ta nonò nayù Mangilin nga Ikararuá, gapu ta ipakimállâ na ittam ánnna kiddawan na lâ yù ikáyâ ni Namarò nga meyannung nittam.

<sup>28</sup> Á sittam nga mangiddú kâ Namarò, maguray lâ yù mesimmu nittam nga napiá onu marigâ, á ammu tam ta napiá yù pabbalinán na, gapu ta yáyù talákkurugan ni Namarò ta meyannung sù ira ngámin nga inagálán na ta mangikatalà ánnna manguruk kuna.

<sup>29</sup> Á ta áddè ngaw, dán nga ammu ni Namarò yù ira nga manguruk kuna. Á danniaw ira gapay, sinalákkuruk ni Namarò ta pabbalinan na ira ta kagittá nayù Anâ na nga táttáddy, tapè aggina yù kaká nayù ira aru nga pabbalinan na ta mawwawági.

<sup>30</sup> Á danniaw ira nga sinalákkuruk ni Namarò ta pabbalinan na ta ánâ na, inagálán na ira gapay, tapè mangikatalà ira sù Anâ na. Á yù ira nágalán na, pinakomá na ira gapay sù liwiliwâ da, ánnna inibiláng na ira ta matunung. Á danniaw ira nga inibiláng na ta matunung, iráyo na ira gapay, ánnna isipâ na ira sù dalingárâng na.

*Yù Pangiddù ni Namarò nittam Megapu kâ Apu Kesu Kiristu*

\* 8:17 2 Korinto 1:5; 1 Eduru 4:13

<sup>31</sup> Á gapu ta pakánnámmu tam sù napiá nga akkuán ni Namarò megapu nittam, anni laguk yù kagiat tam nga meyannung sù ággát tam? Eggá panò yù manganni nittam? Awán bulubugá! Ta si Namarò yù mangabbák nittam.

<sup>32</sup> Sù ngaw, ari nabábág si Namarò nga mangiyawâ sù Anâ na nga tátádday, tapè metapil megapu nittam ngámin. Á gapu ta kunnian yù allà na nittam, á arán na panò laguk iyawâ nittam yù ngámin nga máwák tam nga arát tam matalián? Dán nga naparán nga mangiyawâ nittam!

<sup>33</sup> Á gapu ta sinullà ni Namarò ittam ta tatole na, eggá panò yù makáwayyá nga mangikeká nittam? Awán! Ta si Namarò gemma yù mamakomá nittam, tapè ibiláng na ta matunung ta ánnunganán na.

<sup>34</sup> Eggá panò yù mamanunnù nga mamagikáru nittam? Awán bulubugá! Ta si Apu Kesu Kiristu yù mamanunnù nga sinullà ni Namarò. Á si Apu Kesu Kiristu yù natay nga nagikáru ta liwâ tam, nga naginnanolayin nga nepotun sù gián nayù maráyaw ta jiwanán ni Namarò. Á aggina yù makimállà kâ Namarò megapu nittam.

<sup>35</sup> Á anni laguk panò yù makáwayyá nga mangari sù iddù ni Apu Kesu Kiristu nittam? Awán! Mássiki nu marigirigâ ittam onu mabagabagal ittam, nu eggá yù manigirigâ nittam megapu sù panguruk tam kâ Apu Kesu, nu mabisin ittam onu awán ittam ta gámi, nu eggá yù mangnguá nittam, nu eggá yù mamapáyat nittam, á maguray lâ yù mesímmu nittam, ari ittam mesinná kâ Apu Kesu Kiristu nga mangiddù nittam.

<sup>36</sup> Á kunnian yù inipetúrâ ni Namarò, nga kinagi nayù ira tatole na nga meyannung sù jígâ da, nga kud da,  
"Apu, tangatangággaw ta kágággaw, iddagám mi yù pamapáte ra nikami megapu ta ángnguruk mi nikaw.

Á ajjan kami ta ánnunganán nayù ira tatolay nga kunnay ta karneru nga partiad da sangaw."<sup>†</sup>

<sup>37</sup> Á mássiki nu malannapán yù jígâ tam, awán ta makatubág nittam, ta appútat tam ngámin megapu kâ Apu Kesu Kiristu nga mangiddù nittam.

<sup>38</sup> Á ammù ta kuruk nga ari ittam bulubugá mesinná kâ Namarò nga mangiddù nittam. Á mássiki nu matolay ittam onu matay ittam, iddukan na ittam paga. Á awán ta makári sù iddù na nittam, mássiki nu yù ira makáwayyá ta dabbuno, onu yù ira makáwayyá ta lángi, nga daroban ni Namarò nga ari masingan, onu di Satanás árma yù ira daroban na nga anitu. Á awán bulubugá ta umay nittam kunangane onu umay nittam noka, nga makári sù pangiddù ni Namarò nittam.

<sup>39</sup> Á mássiki yù ira ngámin nga makapangnguá nga ajjan ta lángi árma ta dabbuno, árma ngámin nga naparò, awán nira ta makáwayyá nga mangari sù iddù ni Namarò nittam, nga megapu kâ Apu Kesu Kiristu nga Yápu tam.

## 9

*Yù Pappíli ni Namarò sù ira Ginaká ni Abrakam*

<sup>1</sup> Á ajjan yù ikáyâ ku nga kagian nikayu, á kuruk yù kagiak ku, ta netáddayà kâ Apu Kesu Kiristu, árma maggián nikán yù Mangilin nga lkáraruá ni Namarò, nga mangipakánnámmu ta nonò ku ta kuruk yù kagiak ku. Aringâ massiri, ta pakkagi nikayu.

<sup>2</sup> ta kuruk nga nepallà yù daddam ku, á kunnay ta mabagal yù putù nga ari mabannáyán,

<sup>3</sup> megapu sù ira kagittâ nga Kudio. Á nu eggá nakuan yù awayyâ, parè bì ta sikán nakuan yù táli ra, nga mokum árma mesinná kâ Apu Kesu Kiristu ta áddè ta áddè, megapu sù liwâ da, tapè meyígú ira nakuan.

<sup>4</sup> Ta aggira yù ginaká ni Israel, nga piníli ni Namarò árma pinataganatán na ira. Á aggira yù nappalappátan ni Namarò sù dalingárang na, nga panákkilalád da ta ajjan si Namarò nira. Á ajjan yù ira tarátu ni Namarò nira, nepatalugáring ta iniyawâ na nira yù tunung na. Á inituddu ni Namarò nira yù áddáyo ra kuna árma ákkimállà da kuna. Á aru yù napiá nga initabbá na nira.

<sup>5</sup> Á yù ira ngaw naggaká nira, aggira yù ira ngaw giriámán nga neparámak: di Abrakam, kári Isak, árma si Akup rga ingágán ni Namarò ta Israel. Á ta meyannung sù katabole na, ginaká ra gapay si Apu Kesu Kiristu, nga mammaguray ta ngámin nga makkakerumá nga tatolay. Parè bì laguk ta meparáyw si Namarò ta áddè ta áddè. Á mapalurò! Ammán.

<sup>6</sup> Á mássiki nu ajjan yù ira Kudio nga manaki nga manguruk kâ Apu Kesu, arát tam makagi ta awán ta serbi nayù initabbá ni Namarò nira. Ta ari yù ira ngámin nga ginaká ni Israel yù mesipà sù ira tatole ni Namarò.

7 Á ari yù ira ngámin nga ginaká ni Abrakam yù mebiláng ta kuruk nga ginaká na nga mesipà sù pangitabbá ni Namarò kuna. Ta kinagi ni Namarò kâ Abrakam, “Yù ira lâ nga ginaká ni Isak yù mebiláng ta ginakám nga initabbá nikaw.”\*

8 Á yá kebalinán nayù kagian na, ta ari mebiláng ta ginaká ni Abrakam yù ira ngámin nga ginaká na, nu ari galâ yù ira ginaká na nga neyanâ megapu sù pangitabbá ni Namarò kâ Abrakam.

9 Á sù ngaw lage na keyanâ ni Isak, yawe yù initabbá ni Namarò kâ Abrakam nga meyannung kâ Isak, nga kun na, “Sangaw nú mapasá yù tangaragun, á mattolinga, á maganâ si Sara ta anâ mu nga laláki,”† kun ni Namarò.

10 Á kunnian gapay yù nesimmu ta paganâ ni Rabeka sù ira jiping nga lálláki, di Eso kâ Akup, nga ánâ ni Isak.

11 Ta lage ra neyanâ, awán paga ta kingnguá ra nga napiá onu narákè, á inipakánnámmu ni Namarò ta aggina lápay yù manalákkuruk ta meyannung sù ira agálán na, nga ari megapu sù kingnguá ra.

12 Á ta kabussi ni Rabeka, nga ari paga naganâ, kinagi ni Namarò kuna: “Yù kaká nga anâ mu, passerbián na yù urián na,”‡ kun na.

13 Yáyù gapay yù kebalinán nayù inipetúrâ na ngaw ni Namarò nga kunniauw: “Pinílì si Akup nga iddukak ku, ngam nanakiták ku si Eso.”§

#### *Si Namarò yù Mangikállà áんな Matunung*

14 Á gapu ta kunnian yù kinagi ni Namarò, kagiat tam panò ta ari matunung si Namarò gapu ta pilian na yù tádday ánnè sù tádday? Ari gemma.

15 Makáwayyá si Namarò nga mammaguray. Á kinagi na ngaw kâ Moyses: “Sikán lâ yù maguray sù ira kâbbiak ku. Á piliak ku yù ira ikállà ku.”\*

16 Á yáyù nga ammu tam ta ari napílì yù tolay megapu sù ikáyâ na, á ari megapu sù akkuán na. Ngam pilian ni Namarò yù ira tatole na megapu galâ sù allâ na.

17 Á nonopat tam yù netûrâ nga kinagi na ngaw ni Namarò kâ Paro, nga patul na Eipto. Kinagi na, “Sinullà taka, ta sikaw yù patul nga mammaguray, tapè sikaw yù pangipasinganák ku sù ámmagaddátù, áんな meparámak yù ngágak ku sù ira tatolay ta ngámin nga dabbuno.”†

18 Á yáyù nga mepakánnámmu ta si Namarò lápay yù maká-uray nga mappílì sù ira ikállà na. Á aggina gapay yù maká-uray sù ira ikáyâ na nga paguráyán ta áddè ta kataggâ nayù nonò da.

19 Á gapu ta awán ta áddè nayù pakáwayyá ni Namarò, aijan támma nikayu yù makkagi nikán, nga kun na, “Anni má laguk ta paliwatan ni Namarò íttam? Egga panò mássiki tádday nga tolay nga makatubáng ta ure na? Awán!”

20 Ngam yawe itabbák ku. Egga panò yù tolay nga makáwayyá ngaubbák kâ Namarò! Tolay íttam lâ gemma! Á ta ángngarigán, yù bângä nga pidde na tolay, egga panò yù awayyá na nga tabbatabbagan yù namadday kuna? Awayyá na panò nga kagian, “Ngattá laguk ta pidde mà ta kunniauw nga ággíak ku?” Ari gemma!

21 Á ta ángngarigán, yù maddamíli. Aijan gemma yù awayyá na nga mappílì sù ággíán nayù paddayan na. Á paddayan na yù tádday nga nakástá nga angáng nga mapayyán ta binaráyáng ta bodá, áんな yù tádday nga bângä nga baddì nga maguray lâ yù mepay kuna ta kággággaw.

22 Á yáyù keyarigán ni Namarò gapay, ta aggina lápay yù maká-uray sù akkuán na. Á inikáyâ na nga ipasingan yù pore na sù ira minálliwâ, áんな ipakánnámmu na nira yù pakáwayyá na nga mangukum sù ira ngámin nga narákè. Ngam inattamán na lâ ta nabayák yù ira minálliwâ, nga dán nga naparán nga mokum nakuan.

23 Á yá ipangiyattam na nira, tapè ipakánnámmu na sù ira ngámin nga tatolay yù pangikállà na sù ira mangikatalà kuna, nga pinarán nen ta mangalawâ sù pangisipatán na nira.

24 Á ari lâ sittam nga Kudio yù inagálán na nga ikákkállà na, nu ari gapay yù ira ari Kudio.

25 Á kinagi na ngaw ni Namarò yù meyannung ta pangisipà na gapay nikayu nga ari Kudio, ta inipetúrâ na ngaw kâ Kuseya nga kunniauw:

“Yù ira arák ku ngaw tatolay, aggira sangaw yù tatolè.

Á yù ira arák ku ngaw iniddù, aggira yù abbúnak ku ta tatolè nga iddukak ku.

\* 9:7 Genesis 21:12    † 9:9 Genesis 18:10, 14.    ‡ 9:12 Genesis 25:23    § 9:13 Malakia 1:2-3    \* 9:15 Exodus 33:19

† 9:17 Bibbiram mu yù ngámin nga istoriá na ta Exodus 9:13-16.

26 Á yù ira ngaw tatolay nga nakkagiák ku ta, ‘Ari sikayu yù tatolè,’ á makagi sangaw ta giád da ta aggira yù ánâ ni Namarò nga matotolay.”‡

27 Á aijan gapay yù initúrâ ni Isaya nga inilayalayâ na nga meyannung sù ira ginaká ni Israel, nga kunniaw:

“Mássiki nu magaru yù ira ginaká ni Israel,

áddè ta ari ira mabiláng nga kunnay ta dágâ ta aggik na bebay,  
á baddi lâ yù ira mabuná nga meyígù.

28 Ta sangaw, á ikáddagâ na lâ ukuman ni Namarò yù ira tatolay ta dabbuno,  
á mabì lâ yù pamalurò na sù kinagi na.”§

Yáyù inilayalayâ na ngaw ni Isaya.

29 Á yawe gapay yù kinagi na ngaw ni Isaya:

“Si Namarò yù Yápu tam,

nga mammaguray ánnna mamanunnù ta ngámin.

Á nu arán na ittam ikállà nga Kudio,

á awán nakuan ta baddi nga mabuná sù ira ginaká tam  
megapu sù pamággâng na nira.

Á mepárik ittam nakuan sù ira ngaw tatolay ta ili na Sodoma ánnna Gomorra,

nga pinággâng na ngaw, nga awán bulubugá ta nabuná.”\*

*Manaki paga kâ Apu Kesu yù ira Ginaká ni Israel*

30 Anni laguk yù kebalinán nayù kinagi? Á yù ira ari Kudio, mássiki nu arád da aleran yù katunung da, ta arád da ninonò nu kunnasi yù pakipiá ra kâ Namarò, á nakkápiá ira galâ kâ Namarò megapu sù ure na, ta inibiláng na ira ta matunung megapu sù pangikatalà da kâ Apu Kesu Kiristu.

31 Á yù ira Kudio nga nagala-alek sù katunung da ta ánnninganán ni Namarò megapu sù pamalurò da ta tunung, á arád da mapalurò yù tunung.

32 Á anni má panò? Gapu ta arád da ikatalâ si Apu Kesu Kiristu, nga nanuppál sù tunung megapu nira, tapè mesipâ ira nakuan sù katunung na. Ta kagiad da ta matunung ira megapu ta panuppál da sù tunung, ngam arád da gemma matuppál sù tunung, ánnna panakitád da si Apu Kesu Kiristu. Á yáyù nga meyárik si Apu Kesu ta batu, nga kesiddúkaláda.

33 Yáyù kebalinán nayù inipetúrâ na ngaw ni Namarò nga kunniaw:

“Tángngagan naw yaw. Tán nga lugár nga mangngágan ta Sion,†

yáyù pangipayáy ku sù kun na batu nga ánnáddagán nayù balay, tapè mesiddúkal ira nga mapalakak.

Ngam yù ira mangikatalà kuna, ari ira mepasiránán.”‡

## 10

*Táttádday lâ yù Pakiyígután na Tolay*

1 Wáwwagi, nepallà yù pakkaragâ ku ta meyígù nakuan yù ira kagittâ nga Kudio, á yáyù nga sigídá nga ipakimállâ ku kâ Namarò.

2 Á sistiguák ku ta kuruk nga maláppâ ira nga manuppál sù kagiad da nga ikáyâ ni Namarò, ngam arád da garè kánnámmuán yù kuruk nga ikáyâ na nga meyannung sù pakiyápu ra kuna.

3 Arád da kánnámmuán yù pamakomá ni Namarò ta tatolay, tapè mebiláng ira ta matunung sù ánnninganán na. Á yáyù nga parubád da lápay nga tunungan yù nonò da ánnna yù akka-akkuáda megapu ta panuppál da sù tunung. Á panakitád da yù pamammapiá ni Namarò nira, tapè matunung ira ta ánnninganán na.

4 Á yaw yù pamammapiá ni Namarò ta ngámin nga tatolay, ta minay si Apu Kesu Kiristu ta dabbuno, á aggina yù mamalurò sù tunung ni Namarò nga arád da mapalurò, tapè matunung ta ánnninganán ni Namarò yù ira ngámin nga mangikatalà kâ Apu Kesu.

*Awán ta Tolay nga Panakitán ni Namarò*

5 Sù ngaw, initúrâ ni Moyses yù meyannung sù ira tatolay nga mebiláng ta matunung megapu ta pamalurò da sù tunung ni Namarò. Kinagi ni Moyses, “Nu palurotan na ngámin, ánnna awán ta talákayan na, á matolay megapu ta pamalurò na sù tunung.”\*

‡ 9:26 Oseas (Kuseya) 1:10; 2:23    § 9:28 Isaya 10:22-23    \* 9:29 Isaya 1:9    † 9:33 Sion yù puddul nga gián na ili na Jerusalem, nga paggianán nayù palásiu nayù ngaw Patul Dabid, nga paggianán nayù gubernente nayù ira Israel ánnna yù sinniáí nayù keparáyo ra ánnna yù karáyo ni Namarò.    ‡ 9:33 Isaya 8:14; 28:16; 1 Eduru 2:6-8    \* 10:5 Libitiko 18:5; Galasia 3:12

<sup>6</sup> Ngam ajjan gapay yù inipetúrâ ni Namarò nga meyannung sù ámmanunung na ta tatolay megapu galâ sù ángngikatalà da kâ Apu Kesu Kiristu, nga kun na, “Arán naw kagian ta máwák yù umay ta lángì, tapè iyutták na saw yù MakKiristu nga Mangiyigù.” Ta jinok nen gemma saw ni Namarò si Apu Kesu.

<sup>7</sup> Á kagian na gapay, “Arán naw kagian ta máwák yù umay ta unak na dabbun sù gián na námmatay, tapè iyuné na yù MakKiristu.” Ta matolay si Apu Kesu, gapu ta pinaginnanole ni Namarò.

<sup>8</sup> Ngam yawe yù netúrâ, nga kun na, “Ajjan nikayu yù bilin ni Namarò nga meyannung sù ángngiyigù na ta tatolay. Á ajjan yù awayyá naw nga nononopan ánnna ubu-ubobugan yù bilin na.”<sup>†</sup> Á yawe bilin na yù ilayalayá mi.

<sup>9</sup> Á nu kagian naw sù ira kábulun naw ta si Apu Kesu galâ yù Yápu naw, ánnna kuruk nga manguruk kayu ta matolay si Apu Kesu Kiristu gapu ta pinaginnanole ni Namarò, á meyigù kayu, nga mesipá kâ Namarò ta áddé ta áddé.

<sup>10</sup> Ta íbiláng ni Namarò ta matunung yù tolay megapu sù pangikatalà na kâ Apu Kesu Kiristu. Á meyigù megapu sù pakkagi na sù pangikatalà na kâ Apu Kesu ta arubáng nayù kábulun na.

<sup>11</sup> Á ajjan gapay yù inipetúrâ na ngaw ni Namarò nga kun na, “Awán bulubugá ta mepasíranán sù ira nga mangikatalà kâ Apu.”

<sup>12</sup> Á ari merumá yù ira Kudio sù ira nga ari Kudio, ta táttáddy lâ yù Yápu ra, á ikákkállà na yù ira ngámin nga makimállà kuna.

<sup>13</sup> Á netúrâ gapay yaw: “Ngámin yù ira nga makimállà kâ Apu ta iyigù na ira, á iyigù na ira.”<sup>‡</sup>

<sup>14</sup> Á eggá panò yù awayyá nayù ira tatolay nga makimállà kâ Apu ta iyigù na ira, nu arád da ikatalà? Awán gemma. Á eggá panò yù awayyá ra nga mangikatalà kuna, nu arád da paga narámak yù meyannung kuna? Awán! Á kunnasi laguk yù pakaginná ra sù meyannung kuna, nu awán ta umay nga mangilayalayá?

<sup>15</sup> Á eggá panò yù umay mangilayalayá sù napiá nga dámak nu arán na jinok ni Namarò? Ngam ajjan yù ira nga jinok ni Namarò, á magayáyá yù ira tatolay nga magginná sù ilayalayá da. Ajjan yù meyannung nira nga inipetúrâ na ngaw ni Namarò nga kunniauw: “Magayáyá ittam megapu sù labbè nayù ira nga umay mangilayalayá sù napiá nga dámak.”<sup>§</sup>

<sup>16</sup> Á aru yù ira nakaginná sù bilin ni Namarò, ngam baddì lâ yù ira manguruk kuna. A si Isaya nga yù ngaw ábbilinán ni Namarò, kunnian yù iniyabbú na ngaw kâ Namarò, “Apu, eggá panò yù manguruk sù inilayalayá mi?”\*

<sup>17</sup> Á másíki nu baddì yù ira nga manguruk, á máwák nga makaginná yù ira tatolay sù napiá nga dámak nga melayalayá nga meyannung kâ Apu Kesu Kiristu, lage ra mangikatalà kuna.

<sup>18</sup> Á ajjan yù iyabbú ku laguk. Á yù ira Kudio, arád da panò naginná yù bilin ni Namarò? Narámak da gemma! Ta ajjan yù inipetúrâ ni Namarò nga kun na, “Narámak da yù bilin ni Namarò

ta ngámin nga lugár.

Nelayalayá yù ubobuk na,

nga nassamâ ta ngámin makkakerumá nga tatolay ta dabbuno.”<sup>†</sup>

<sup>19</sup> Á yawe iyabbú ku laguk. Yù ira Kudio, arád da panò kánnámmuán ta ari lâ aggira yù mesipá kâ Namarò, nu ari gapay yù ira ngámin nga makkakerumá nga ari Kudio? Nánnámmuád da gemma. Ta si Moyses yù napolu nga nangipakánnámmu nira, ta kinagi na yù kinagi ni Namarò, nga kun na,

“Alawatak ku yù ira tatolay nga ari Kudio,  
tapè mangabubu kayu nira.

Á mapporay kayu

megapu ta pangikállà ku sù ira tanakuán nga tatolay nga ari natudduán.”<sup>‡</sup>

<sup>20</sup> Á si Isaya, nga yù ngaw ábbilinán, ari naganássing ta pakkagi na sù kinagi ni Namarò sù ira Kudio nga meyannung sù ira ari Kudio. Kinagi na, “Nálerád dangá nayù ira ari nagalek nikán.

Á nappasinganà sù ira nga ari nangiyabbú ta meyannung nikán.”

<sup>21</sup> Ngam ta meyannung sù ira Kudio, kinagi ni Namarò,

“Nabayágakin nga magágál nira,

<sup>†</sup> **10:8** Deuteronomio 30:12-14

<sup>‡</sup> **10:13** Joel 2:32

<sup>§</sup> **10:15** Isaya 52:7

<sup>\*</sup> **10:16** Isaya 53:1

<sup>†</sup> **10:18** Salmo 19:4

<sup>‡</sup> **10:19** Deuteronomio 32:21

ta umay ira nakuan nga mangikatalà nikán,  
ngam nataggâ yù nonò da, á potuád dangà paga.”<sup>§</sup>

## 11

*Yù Allà ni Namarò sù ira Kudio*

<sup>1</sup> Á yawe iyabbû ku laguk. Gapu ta manakì yù ira Kudio nga manguruk kâ Namarò, á kagian naw panò ta sináttájjián ni Namarò ira nga sinullà na ta tatole na? Ari gemma! Ajjan paga yù ira baddì nga nabuná nga tatole na. Á sikán lápay yù tádday nga kukurugán nga Kudio, nga ginaká ni Israel. Si Abrakam yù naggaká nikán, á ginaká nangà ni Benjamin, nga urián nga anâ ni Israel, nga apù ni Abrakam.

<sup>2</sup> Arán na gemma sináttájjián ni Namarò yù ira Kudio nga piníli na ngaw ta tatole na. Nonopan naw bì yù ngaw inipetúrâ ni Namarò nga meyannung kâ Elias. Ta pakimállà ni Elias kâ Namarò, iniránuk na yù kingnguá nayù ira ginaká ni Israel.

<sup>3</sup> Kinagi ni Elias kâ Apu Namarò, “Apu, pinapáte ra yù ira ábbilinám mu! Á iniwarawarâ da yù batu nayù ira pattuggiád da ta iyátáng da nikaw! Á sikán lâ yù nabuná nga manguruk nikaw! Á igagánge rangá papatáyan gapay!” kun na.

<sup>4</sup> Á anni yù initabbák ni Namarò kâ Elias? Kinagi na, “Ajjan lâ paga pituribu nga tatolè nga nabuná, nga ari makimoray sù Baal, nga sináddios nga pidde nayù ira pakipaggianád da.”\*

<sup>5</sup> Á kunnay ta ajjan ngaw yù ira nabuná, á kunangane ajjan paga yù ira nga baddì nga nabuná nga Kudio, nga piníli ni Namarò ta tatole na gapu ta ikáyâ na ira nga ikállà.

<sup>6</sup> Á yá lâ ipappíli ni Namarò nira yù allà na nira, nga ari megapu sù napiá nga akka-akkuád da. Nu yù napiá nga akka-akkuád da yù ipappíli na nakuan ni Namarò nira, á aringin nakuan laguk megapu sù allà na.

<sup>7</sup> Á kunnasi laguk yù áaggián nayù ira ginaká ni Israel? Mássiki nu ala-aleraad da yù katurung da megapu ta panuppál da sù ira taddán ni Namarò nga netúrâ sù tunung na, tapè alawatan na íra ni Namarò ta tatole na, á arád da nálek. Yù ira lâ nga baddì nga mangikatalà kâ Apu, aggira yù piníli ni Namarò nga mebiláng ta matunung. Ngam yù ira káruán, nataggâ yù ulu ra.

<sup>8</sup> Yáyù kebalinán nayù inipetúrâ ni Namarò nga kun na,  
“Pinataggâ ni Namarò yù nonò da áddè kunangan.

Á eggá matá ra,  
    ngam arád da matákkilalán yù maggapu kâ Namarò.

Á eggá talingá ra,  
    ngam arád da kánnámmuán yù kebalinán nayù bilin na.”†

<sup>9</sup> Á kinagi na ngaw gapay ni Patul Dabid yù meyannung nira, nga kun na,  
“Parè bì ta mapagikáru ira,

    gapu ta náttamád da yù pakimore ra kâ Apu ta pappiestá ra áんな yù ira káruán nga  
    ipagayáyâ da.

Parè bì ta kunnay ta mapalakak ira,  
    tapè bálatan ni Namarò ira ta liwiliwâ da.

<sup>10</sup> Parè bì ta makkallà yù nonò da,  
    tapè arád da kánnámmuán yù kuruk nga naggapu kâ Namarò.

Parè bì ta maparigâ ira ta áddè,  
    nga kunnay ta makkabbuk megapu sù narámmà nga káttuan na.”‡

Yáyù kinagi na ngaw ni Patul Dabid.

*Yù Keyígù nayù ira Makkakerumá nga Ari Kudio*

<sup>11</sup> Anni panò yù pabbalinán nayù kataggâ na nonò nayù ira Kudio? Kagiat tam panò ta tåttájjián ni Namarò ira ta áddè ta áddè? Ari gemma. Ngam megapu sù liwâ nayù ira Kudio, pinaguráyán na ira lábbi, á inagálán na yù ira ari Kudio ta umay ira makiyígù kuna, tapè mangabubu yù ira Kudio, áんな manoli ira nga manguruk kuna.

<sup>12</sup> Á nu napiá yù ángngabbák ni Namarò sù ira makkakerumá nga ari Kudio megapu sù liwâ nayù ira Kudio, á pappanganâ sangaw nu manoli yù ira Kudio nga mesipà kâ Namarò, ta patturutan ni Namarò yù napiá nga iyawâ na sù ira ngámin nga ari Kudio.

§ 10:21 Isaya 65:1-2    \* 11:4 Bibbiram mu 1 Ar-ari 19:14, 18 (1 Patul ira)    † 11:8 Deuteronomio 29:4; Isaya 29:10

‡ 11:10 Salmo 69:22-23

13 Á sikayu nga ari Kudio, yawe yù kagiak ku nikayu, ta binilin nangà ni Namarò ta umayà nikayu mangilayalayâ. Á yáyù nga magayáyákà nga mangilayalayâ sù napiá nga dámak nga meyannung kâ Apu Kesu Kiristu.

14 Á nu maláppakà nga mangilayalayâ nikayu, parè bì ta mangabubu yù ira ikáttolè nga Kudio, ánnna aijjan nira nakuan yù ira meyígù.

15 Ta gapu ta panájji ni Namarò sù ira Kudio megapu sù panakì da kuna, iniyawâ na laguk ni Namarò sù ira ngámin nga ari Kudio yù awayyá ra nga makiyígù kuna. Á nu nakkápiá yù ira ari Kudio kâ Namarò megapu sù panájji ni Namarò sù ira Kudio, á más napiá sangaw nu awatanan ni Namarò yù ira Kudio, nga kunnay ta paginnanolayan na ira sù ira námmatay!

16 Á kunniaw yù keyarigán nayù ira Kudio. Ajjan yù kustumbare ra, nu mappadday ira ta pán, á isinná ra yù baddi nga iyátang da kâ Namarò. Á nu mangilin yù resinná nga kuá ni Namarò, á kuá na gapay nga mangilin yù paggapuán na. Á meyárik ira gapay ta káyu na olibo nga nemulá. Nu kuá ni Namarò yù gamù na, kuá na gapay yù ira pangapangá na.

17 Ngam sippáng ni Namarò yù kárúan na pangapangá na, á inituppan na yù pangapangá na olibo nga simaron sù naggianán nayù ira inirián na. Á sikayu nga ari Kudio yù kun na simaron nga pangapangá na, nga táli nayù ira Kudio nga sippáng ni Namarò, tapè mesipà kayu sù napiá nga áttolle ra.

18 Ari kayu laguk mattagapiá megapu sù kesipà naw, á arán naw iluddè yù ira Kudio. Nonopan naw yaw, ta sikayu yù kun na simaron nga pangapangá nga netuppan lâ sù káyu, ngam aggira yù kun na gamù na, nga paggapuán nayù áttolle naw.

19 Á aijjan támma nikayu nga ari Kudio yù makkagi ta, "Síkami nga ari Kudio yù iddukan ni Namarò! Ta sippáng na yù ira Kudio, nga kuruk nga pangapangá nayù káyu, tapè ituppan na kami!"

20 Wan, kuruk yian! Sippáng na yù ira Kudio gapu ta awán ta pangikatalà da kâ Apu. Á napasigaggà yù napiá nga ággíán naw kâ Namarò megapu galâ sù pangikatalà naw kâ Apu. Ari kayu laguk mappeddaráyaw, ngam maganássing kayu ánnna makimoray kayu kâ Namarò megapu sù allà na nikayu.

21 Ta nu sippáng ni Namarò yù ira nga kun na negagángay nga pangapangá, megapu sù pamotu ra kuna, á magimuguk kayu laguk. Arán naw ira párigán nga mamotu kâ Namarò, maraké matappáng kayu gapay nga mepárik nira.

22 Kemámmatán naw laguk yù allà ni Namarò ánnna yù katunung na. Matunung nga mamággáng sù ira Kudio nga manakì kuna. Ngam ikákkallà na sikayu nga mangupú nga magiddanáma sù allà na. Ipasigaggà naw laguk yù ángngikatalà naw kuna, tapè ari kayu gapay matappáng.

23 Á yù ira Kudio nga namotu kâ Namarò, nu mabbabáwi ira ta pamotu ra ánnna ikatalà da si Apu Kesu, awatanan ni Namarò ira gapay, á kunnay ira ta pangapangá nga itoli na sù nangarián na nira, gapu ta makáwayyá si Namarò nga mangitoli nira.

24 Á sikayu nga ari Kudio yù kunnay ta pangapangá na simaron nga olibo, nga natappáng, tapè metuppan ira sù káyu nga nemulá ta garden, nga ari gagángay nga naketuppan gáda. Á gapu ta isipà na kayu ni Namarò, á nepatalugáring sù ira Kudio, nga kunnay ta gagángay nga pangapangá na olibo nga nemulá ta garden, ta malogon sangaw gemma yù ketuppan da sù káyu nga nakatappángáda.

#### *Yù Allà ni Namarò sù ira Kudio ánnna yù ira Ari Kudio*

25 Wáwwagi, aijjan yù ibukalák ku nikayu, nga ari paga napalappâ, maraké mattagapiá kayu ánnna kagian naw ta napiá kayu ánnè sù ira taga Israel. Kuruk nga nataggâ yù nonò nayù ira kárúan nga Kudio, tapè aijjan yù awayyá nayù ira ari Kudio nga mangikatalà kâ Apu Kesu. Á sangaw nu kustungin yù biláng nayù ira ari Kudio nga mangikatalà kâ Apu, mári laguk yù kataggâ nayù nonò nayù ira Kudio, á mabbabáwi ira gapay, ánnna mangikatalà ira kâ Apu.

26 Á yáyù nga meyígù yù ira ngámin nga taga Israel. Yáyù kebalinán nayù inipetúrâ na ngaw ni Namarò nga kun na,

"Umay yù Mangiyígù nga maggapu ta ili na Sion.

Á irián na yù narákè nga akka-akkuán nayù ira Kudio nga ginaká ni Akup.

27 Á yáyù nga palurotak ku sangaw yù ngaw tarátù nira,

sangaw nu pakomák ku yù liwiliwâ da."§

28 Á kunangane, ta meyannung sù napiá nga dámak, ikalusso nayù ira Kudio si Namarò, gapu ta manakì ira nga mangikatalà kâ Apu Kesu Kiristu. Á yáyù nga aijjan yù awayyá naw

nga makiyígù, sikayu nga ari Kudio, megapu sù panakì da. Ngam aggira yù napolu nga piníli ni Namarò, á yáyù nga iddukan na ira lâ paga megapu sù pangitabbá na ngaw sù ira tatole na nga naggaká nira.

<sup>29</sup> Ta arán na ibabáwi ni Namarò yù ira sinullà na nga ikákkallà na.

<sup>30</sup> Á sikayu nga ari Kudio, arán naw ngaw kinuruk si Namarò. Ngam kunangane, inikállà na kayín ánná pinakomá na kayu ta liwiliwâ naw, megapu sù panakì nayù ira Kudio kuna.

<sup>31</sup> Á kunnian gapay sù ira Kudio, ta kunangane arád da gapay kurugan si Namarò, á inikállà ni Namarò nikayu nga ari Kudio, tapè ikállà na gapay sangaw yù ira Kudio, á pakomán na ira gapay, megapu sù pangikállà na nikayu nga ari Kudio.

<sup>32</sup> Á ipakánnámmu na sù ira ngámin nga tatolay nga Kudio ánná ari Kudio yù liwiliwâ da. Á kunnay ta pinukù na ira ngámin megapu sù liwâ da, tapè ikállà na ira ngámin ánná pakomán na ira.

### *Mepángngà nga Meparáyaw si Namarò*

<sup>33</sup> Makapállà yù allà ni Namarò nittam! Monak yù ammu na, ánná awán ta kárik piá nayù sirk na. Awán ta tolay nga makánnámmu sù nonotan na. Á awán ta makebukalán sù akka-akkuán na.

<sup>34</sup> Ajjan yù netúrâ sù dán nga libru ni Namarò, nga kun na,  
“Egga panò yù tolay nga makánnámmu sù nonò ni Namarò?

Egga panò yù manabarang kuna?”

<sup>35</sup> “Egga panò yù mangiyawâ kâ Namarò,  
tapè ikáru ni Namarò kuna?”\*

<sup>36</sup> Si Namarò, pinarò na yù ngámin nga eggá, nga masingan ánná ari masingan. Maggián yù ngámin nga pinarò na megapu sù pakáwayyá na. Á yawe ikeggá na ngámin, tapè meparáyaw si Namarò megapu nira. Dayáwat tam si Namarò ta áddè ta áddè. Mapalurò! Ammán.

## 12

### *Yù Mepángngà nga Ásserbi tam kâ Namarò*

<sup>1</sup> Á gapu ta pangikállà ni Namarò nittam nga mangikatalà kuna, á dudduárat takayu, wáwwagi, ta itulù naw kâ Namarò yù baggi naw, nga kunnay ta iyátang naw yù matolay nga mangilin, tapè ayatán si Namarò megapu sù napiá nga akkuán naw, ta yáyù mepángngà nga pakimore naw kuna.

<sup>2</sup> Á arán naw párigán yù ággangnguá nayù ira tatolay saw dabbuno, nga ari manguruk kâ Namarò, tapè ari kayu mepaggítá nira. Anugutan naw yù panguli ni Namarò ta nonò naw, tapè napiá yù ággangnguá naw, ánná kánnámmuán naw yù napiá nga ipakuá ni Namarò nikayu. Ta napiá ánná matunung yù ure ni Namarò, á magayáyâ si Namarò sù ira nga tumulù ánná mamalurò sù ikáyâ na.

<sup>3</sup> Á gapu ta pangikállà ni Namarò nikán, binilin nangà, á yáyù nga tabarangát takayu ngámin ta arán naw kagian ta napiá kayu ánné sù ira kábulun naw. Ngam máwák naw nga katággitádday nga nonopan yù iniyawâ ni Namarò nga pakáwayyá na lápay nga meyannung su ángngikatalà na.

<sup>4</sup> Á ta ángngarigán, tádday lâ yù baggi na tolay. Ngam ajjan yù aru nga makkakerumá nga mesipá sù baggi na, nga limá na, takki na, ulu na, talingá na, simù na, ngámin, á makkakerumá gemma yù keyusá ra.

<sup>5</sup> Á kunnay gapay nittam nga manguruk. Aru ittam nga makkakerumá, ngam nepat-tatádday ittam kâ Apu Kesu Kiristu, nga kun na limá na, takki na, simù na, sittam ngámin nga makkák-abbák sù baggi na nga tattádday.

<sup>6</sup> Á gapu ta allà ni Namarò nittam, inisinek na nittam yù makkakerumá nga pakáwayyá tam nga mepángngà nittam nga katággitádday. Akkuát tam laguk ta napiá yù ipakuá ni Namarò nittam. Ta ángngarigán, nu iniyawâ ni Namarò nikayu yù pakáwayyá naw nga mangilayalayâ sù ipalappâ ni Namarò nikayu, á malláppâ kayu laguk nga mangilayalayâ sù bilin na, nga kunnay ta meyannung sù ángngikatalà naw.

<sup>7</sup> Á nu iniyawâ ni Namarò nikayu yù awayyá naw nga mangabbák sù ira wáwwagi tam nga manguruk, á abbágán naw ira laguk ta napiá. Á nu iniyawâ ni Namarò nikayu yù pakáwayyá naw nga mangituddu sù bilin na, á ituddu naw laguk sù ira kábulun naw.

<sup>8</sup> Á nu iniyawâ ni Namarò nikayu yù pakáwayyá naw nga manabarang ánná mamannay, á tabarangán naw ánná bannáyán naw laguk yù ira kábulun naw. Nu iniyawâ ni Namarò nikayu yù pakáwayyá naw nga mangisipá, á ari kayu laguk makkikkì. Á sikayu nga pine

\* 11:35 Isaya 40:13; Job 41:11; 1 Korinto 2:16

ni Namarò ta mammaguray sù ira kábulun naw, ipe naw yù urà naw nga mappílì sù napiá megapu nira. Sikayu nga iniddán ni Namarò ta awayyá naw nga mangikállà sù ira marigirigá ánná sù ira mättakì, magayáyá kayu laguk nga mamálappaw sù nonò nayù ira abbágán naw.

<sup>9</sup> Ari kayu áppè nga makkaká-ayâ, ngam kukurugán nga iddi-iddukan naw yù ira kábulun naw. Likuránán naw yù narákè, á tángngagan naw yù napiá.

<sup>10</sup> Makkaká-ayâ kayu, nga kunnay ta mepongngà sù ira mawwawági nga ánâ nayù tåttádday nga Yáma. Á magayáyá kayu nga makimoray sù ira kábulun naw nga manguruk.

<sup>11</sup> Ari kayu malurâ nga mangnuá sù napiá, ánná ari kayu mattalakák. Malláppà kayu laguk, á ipe naw yù urà naw nga mamalurò sù ipakuá ni Namarò nikayu.

<sup>12</sup> Magayáyá kayu laguk megapu sù ággiddanáma naw kâ Namarò. Á nu marigirigá kayu, attamán naw lâ, ánná ipakimi-imállà naw kâ Namarò yù ngámin nga meyannung nikayu, tapè mepasigaggà yù ángngikatalà naw kuna.

<sup>13</sup> Ilimù naw yù ángngabbák naw sù ira magáwák, nga wáwwagi naw ta ángnguruk naw. Á ilágum naw yù ira ngámin nga umay makiálliuk nikayu.

<sup>14</sup> Á nu eggá yù ira manigirigá nikayu, ipakimállà naw ira kâ Namarò ta ikállà na ira. Arán naw ira igagek. Arán naw kagian kâ Namarò ta bálatan na ta jígá yù akkuád da nikayu.

<sup>15</sup> Nu ajjan yù ira magayáyá, mepagayáyá kayu gapay nira. Á nu eggá yù ira maraddam, mepadaddam kayu gapay nira.

<sup>16</sup> Arán naw irumá yù ira kábulun naw. Makkaká-iddù kayu. Ari kayu mappegung, ngam makikopun kayu sù ira pobare gapay. Á ari kayu mattagápi.

<sup>17</sup> Á nu ajjan yù mangnuá ta narákè nikayu, arán naw bálatan ta narákè. Yá lâ akkuán naw yù napiá ta ánniganán nayù ira ngámin nga tatolay.

<sup>18</sup> Ari kayu makitabbaabbák sù ira kábulun naw, ngam tumulù kayu, tapè magimammà kayu. Á áddè ta awayyá naw, parubán naw makikopun ta ngámin nga tatolay, tapè napiá yù ággján naw ngámin.

<sup>19</sup> Wáwwagi nga iddukak ku, arán naw bulubugá ibálà yù akkuád da nikayu nga narákè, ta si Namarò yù mabbálà. Inipetúrâ na ngaw ni Namarò yù kinagi na, nga kun na, "Sikán lâ yù mabbálà.

Á bálatak ku yù ira mangnuá ta narákè, megapu sù kingnuá ra,"\* kun ni Apu Namarò.

<sup>20</sup> Á netúrâ galâ yù kinagi ni Namarò nga akkuán naw, nga kun na,

"Nu mabisin yù ira malussaw nikayu, pakanan naw ira.

Nu mapangál ira, penuman naw ira.

Ta nu kunnian yù akkuán naw, mappasirán ira megapu sù napiá nga kingnuá naw nira."†

<sup>21</sup> Arán naw párigán yù ira mangnuá ta narákè. Ta nu akkuán naw gapay yù narákè, máppù kayu nga mepárik nira. Ngam akkuán naw galâ yù napiá, tapè appútan naw yù narákè megapu sù napiá nga akkuán naw.

## 13

*Tumulù ittam sù ira Mammaguray*

<sup>1</sup> Sittam ngámin nga tatolay, tumulù ittam sù ira mammaguray nittam, ta awán ta mammaguray nga arán na sinullà ni Namarò. Á si Namarò yù mangiyawâ nira ta pakáwayyá ra nga mammaguray nittam.

<sup>2</sup> Á nu kontarán nayù ira tatolay yù ira mammaguray, kontarád da gapay si Namarò nga nanullà nira. Á mapagikáru yù ira ngámin nga makikontará sù ira sinullà ni Namarò nga mammaguray.

<sup>3</sup> Ngam arát tam ikássing yù ira makáwayyá sù gubermente nu napiá lâ yù akkuát tam. Yù ira lâ nga mangnuá ta narákè yù maganássing sù ira mammaguray. Á nu ikáyá naw ta awán ta ikássing naw sù ira mammaguray, akkuán naw lâ yù napiá, á magayáyá ira nikayu.

<sup>4</sup> Ta sinullà ni Namarò yù ira makáwayyá sù gubermente, tapè abbágád da yù ira nga mangnuá ta napiá.

Ngam nu akkuán naw yù narákè, maganássing kayu laguk nira, ta kuruk nga makáwayyá ira nga mamaigikáru, gapu ta masserbi ira kâ Namarò, á ipapággáng ni Namarò nira yù ira nga mangnuá ta narákè.

<sup>5</sup> Á yáyù nga tumulù ittam laguk sù ira mammaguray nittam, tapè ari ittam mekanâ sù pore ni Namarò megapu sù pamággáng da nittam. Á ari lâ yian, ngam tumulù ittam nira gapay, gapu ta ammu tam ta yáyù ipakuá ni Namarò nittam, tapè aláppaw yù nonò tam.

\* **12:19** Deuteronomio 32:35    † **12:20** Proberbio 25:21-22

<sup>6</sup> Á yáyù gapay yù gapu na nga mappagá ittam ta amilliár ánná ngámin nga buwì nga ipapagá ra nittam. Ta si Namarò nga nanullà nira yù passerbiád da, ta pattuki ra ta buwi.

<sup>7</sup> Pagát tam laguk yù ipapagá ra nittam, yù buwì sù ira mammaguray, ánná yù amilliár sù ira mináttuki. Á makimoray ittam sù ira pakimorayán, ánná dayáwat tam yù ira maráyaw.

### *Makkaká-iddù ittam*

<sup>8</sup> Nu aijan yù gatú tam, pagát tam ngámin. Ngam arát tam mapagán yù allà ni Namarò nittam. Á yáyù nga makkaká-iddù ittam. Yù tolay nga mangiddù sù kábulun na, palurotan na ngámin nga tunung nga initaddán ni Namarò kâ Moyses.

<sup>9</sup> Yawe yù taddán na, nga kun na, "Ari kayu meruruk sù arán naw atáwa. Ari kayu mamapátyay. Ari kayu makkokò. Á ari kayu mamassil sù kukuá na kábulun naw."\* Á mapalurò yù ira ngámin nga initaddán ni Namarò, nu palurotat tam yawe nga kinagi na, "Iddukan naw yù ira kábulun naw ta kunnay sù ángngiddù naw sù baggi naw."<sup>†</sup>

<sup>10</sup> Ta nu iddukan nayù tolay yù ira kábulun na, awán ta narákè nga akkuán na nira. Á yáyù nga mapalurò tam yù ngámin nga tunung nga initaddán ni Namarò nu iddukat tam yù ira kábulut tam.

<sup>11</sup> Á ammu naw ta máwák tam magimuguk sù akka-akkuát tam, ta aringin mabayák yù dattál nayù ággaw nga sinullà ni Namarò, nga keyígù tam. Áddè ngaw sù pamegapu tam nga manguruk, magiddi-iddak ittam sù pangiyígù na nittam, á umaranni lâ umaranni ta kággággaw. Ari ittam laguk maggián nga kunnay ta mattummà! Mallukák ittam, nga malláppá nga mangnguá sù ipakuá ni Apu nittam.

<sup>12</sup> Yù ággíán nayù dabbuno yù kun na gabi megapu ta liwiliwá nayù ira tatolay. Ngam mappasá yù kallà, á maddaggunin yù ággaw, nga dattál nayù pammagure ni Apu Kesu ta dabbuno. Likuránat tam laguk yù narákè, á palurotat tam yù napiá nga ipakuá ni Apu Kesu nittam, nga mepángngà sù ira tatole na nga manawagánin yù nonò da, nga naparán nga mangipuerá ta narákè.

<sup>13</sup> Akkuát tam laguk yù napiá nga kunnay ta akkuán na tolay ta gián nga manawák. Arát tam akkuán yù kepasiránat tam. Ari ittam magillellaw, onu mangarallaw. Ari ittam maddiráma, onu mangabubu.

<sup>14</sup> Nonopat tam lâ si Apu Kesu Kiristu nga mepulupulù nittam, ta kesipatát tam yù nonò na ánná yù napiá nga ággangnguá na. Á akkuát tam laguk yù napiá nga ipakuá na nittam. Á imugurát tam yù baggi tam, tapè arát tam akkuán yù narákè nga karagatán nayù dán nga nonò tam.<sup>‡</sup>

## 14

### *Arát tam Panunnután yù ira Wáwwagi tam nga Manguruk*

*1 Korinto 8:1-13; 10:23-33*

<sup>1</sup> Wáwwagi, ta paggagammung naw, alawatan naw yù ira wáwwagi naw ta ángngikatalà naw kâ Apu Kesu, mássiki nu makapi yù ángnguruk da, á arán naw ira peperangan ta ubobuk nga meyannung sù ángnguruk da nga nerumá ta ángnguruk naw.

<sup>2</sup> Ta aijan yù ira tatolay nga awán ta kanniawad da nga kanan, á aijan yù ira káruán nga makapi yù ángnguruk da, nga arád da kanan yù kárne, ngam yù atang lâ yù ikád da.

<sup>3</sup> Á yù tolay nga kumán ta ngámin, arán na nakuan iluddè yù tolay nga ari kumán ta kárne. Á yù tolay nga kumán lâ ta atang, arán na gapay nakuan panunnután yù tádday nga kumán ta ngámin, gapu ta inalawâ ni Namarò gemma ta tole na.

<sup>4</sup> A gapu ta Yápù tam ngámin si Namarò, ari ittam laguk makkakápanunnù, ta awán ta pakáwayá tam nga mamanunnù sù aripan na tanakuán. Ta yù yápù na lápay yù makáwayá nga makkagi nu napiá yù akkuán nayù aripan na. Á napiá gemma yù akka-akkuán nayù aripan na, gapu ta makáwayá yù yápù na nga mangabbák kuna.

<sup>5</sup> Á aijan yù ira kábulut tam nga manguruk kâ Apu, nga sinullà da yù tádday ággaw nga ngilinan da, nga paddáyo ra kâ Apu. Á aijan gapay yù ira maddáyaw kâ Apu, nga ari mangirumá ta ággaw. Á ari kayu nakuan mabbálábáng nga katággítáddyay ta meyannung sù ággaw nga ngilinan na.

<sup>6</sup> Nu ngilinan na tolay yù tádday nga ággaw, yáyù ákkimore na kâ Apu. Á yù tolay nga kumán ta ngámin, yáyù ákkimore na kâ Apu, gapu ta mabbálábálà kâ Namarò megapu sù kanan na. Á yù tolay nga makkanniaw ta kanan, yáyù ákkimore na kâ Apu, gapu ta mabbálábálà gapay kâ Namarò.

\* <sup>13:9</sup> Exodus 20:13-15, 17; Deuteronomio 5:17-19, 21    † <sup>13:9</sup> Líbitiko 19:18    ‡ <sup>13:14</sup> Bibbiram mu Galasia 3:27

<sup>7</sup> Á sittam nga manguruk, maguray lâ nu matolay ittam onu matay ittam, arát tam akkuán yù lâ ikáyâ tam, nu ari galâ yù ikáyâ nayù Yápu tam.

<sup>8</sup> Ta nu matolay ittam, kukuá na ittam ni Apu Kesu Kiristu, á akkuát tam yù napiá nga ipakuá na nittam, tapè meparáyaw yù Yápu tam. Á nu matay ittam, kukuá na ittam lâ, á mesipà ittam kuna. Á ta kunnian, mássiki nu matolay ittam onu matay ittam, kukuá na ittam ni Apu Kesu Kiristu nga Yápu tam.

<sup>9</sup> Á yáyù gapu na nga natay si Apu Kesu Kiristu, á naginnanolay, tapè aggina yù Yápu tam, nu matolay ittam lâ paga onu natay ittamin.

<sup>10</sup> Arát tam laguk panunnután yù ira kábulut tam ta meyannung sù kanad da. Á arát tam ira iluddè megapu sù arád da kanan. Ta sittam ngámin, umay ittam makiarubáng kâ Namarò, á aggina lâ yù mamanunnù.

<sup>11</sup> Ta aijan yù inipetúrâ ni Namarò, nga kun na,  
“Sikán si Apu Namarò nga matolay ta áddè ta áddè,  
á kukturugán nga mapalurò sangaw yaw nga kagiak ku.  
Mamalittúkak yù ira ngámin nga tatolay ta arubáng ku,  
á maddáyaw ira nilkán.”\*

<sup>12</sup> Á yáyù nga máwák tam ngámin sangaw nga kagian kâ Namarò yù ngámin nga kingnguá tam ta paggiát tam ta dabbuno.

#### *Arát tam Panunnután yù ira Kábulut tam*

<sup>13</sup> Ari ittamin laguk makkakápanunnù. Á yawe laguk itálakkuruk tam, ta arát tam akkuán yù kagian nayù ira kábulut tam ta liwâ, maraké mekáttuay ira ta panguruk da kâ Namarò, nu párigád da ittam ánná akkuát da gapay yù kagiad da ta liwâ.

<sup>14</sup> Á sikán, gapu ta pangikatalà ku kâ Apu Kesu Kiristu, ammù ta awán bulubugá ta kanan nga máwák kú kanniawan. Ngam ta ángngarigán nu aijan yù kanan nga ibiláng nayù tolay ta makanniaw, á napiá laguk nu arán na kanan, ta kuruk nga malliwâ nu kanan na yù ibiláng na ta maraping.

<sup>15</sup> Á nu aijan yù wagi tam ta ángngikatalà tam kâ Apu Kesu, nga maburung gapu ta kinat tam yù kanniawan na, á arát tamin laguk inipasingan yù ángngiddù tam kuna. Á yáyù nga ari ittam laguk kumán sù kanniawan na, maraké mararál yù ángngikatalà na kâ Namarò, megapu sù kanat tam. Ta aggina gapay yù táddy nga nakedapilán ni Apu Kesu Kiristu.

<sup>16</sup> Á mássiki nu ibiláng tam ta napiá yù akkuát tam, nu ibiláng nayù kabbulut tam ta narákè, arát tam laguk akkuán, tapè arán na kagian ta malliwâ ittamin.

<sup>17</sup> Ta sittam nga mangikatalà kâ Apu Kesu, mesipà ittam sù pammagure ni Apu Namarò. Á yù pammagure na nittam, ari meyannung sù kanat tam ánná inumat tam. Ngam yawe yù pabbalinán nayù pammagure ni Namarò nittam, yù napiá ánná matunung nga akka-akkuát tam, yù ággimammà nayù nonò tam, ánná yù pagayáyâ tam megapu sù Mangilin nga Ikararuá ni Namarò.

<sup>18</sup> Á nu kunnian yù ásserbi tam kâ Apu Kesu Kiristu, magayáyâ si Namarò nittam, á meráyw ittam gapay sù ira kábulut tam.

<sup>19</sup> Á yáyù nga tuttuttulat tam laguk yù napiánga mabbalin ta magimammà nga nonò tam, tapè makkkaká-abbká ittam, ánná mapasigaggà yù ángngikatalà tam kâ Apu.

<sup>20</sup> Á arát tam laguk kanan yù kanniawan nayù wagi tam, tapè ari mararál yù ángngikatalà na kâ Namarò, megapu sù kanat tam. Kuruk nga awán ta kanan nga makanniaw, ngam pakaliwatát tam yù ira kábulut tam nu mabbábâng ira ta panguruk da megapu sù kanat tam.

<sup>21</sup> Á yáyù nga más napiá galâ nu arát tam kanan yù kárne ánná ari ittam mappissán, á awán bulubugá ta akkuát tam nga paggupuán nayu palliwâ nayù ira wáwwagi tam nga mangikatalà kâ Apu Kesu.

<sup>22</sup> Á maguray lâ yù ure naw nga meyannung sù ikán naw onu inuman naw, ngam arán naw ubobugan sù ira kábulun naw, tapè sikayu lâ kâ Namarò yù makánnámmu sù akkuán naw. A magayáyâ yù tolay nga ari mabbábâng ta meyannung sù akkuán na.

<sup>23</sup> Ngam yù tolay nga mabbábâng sù kanan na, ikáru na kâ Namarò nu kanan na, gapu ta pakaliwatán na yù ángnguruk na, nu arán na kurugan yù ammu na nga napiánga meyannung ta kanan na. Á makaliwâ ittam laguk nu akkuát tam yù ari negapu sù ángngikatalà tam kâ Namarò.

\* <sup>14:11</sup> Isaya 45:23; Pilippay 2:10-11

## 15

*Akkuát tam lâ yù Napiá, nga Pakkapiánán nayù ira Kábulut tam  
Galasia 6:1-5*

<sup>1</sup> Sittam nga napasigaggà yù ángngikatalà na kâ Apu Kesu, arát tam ipapílì yù ure tam ánná yù ikáyâ tam, ngam anugutat tam gapay yù ure nayù ira wáwwagi tam nga makapi yù ángnguruk da. Arát tam ira paguráyán, ngam paguráyat tam lâ yù ikáyâ tam.

<sup>2</sup> Akkuát tam lâ yù napiá nga ikáyâ nayù ira kábulut tam, tapè mábbágán ira ánná mepasigaggà yù ángngikatalà da.

<sup>3</sup> Ta kunnian gapay yù kingnguá ni Apu Kesu Kiristu. Pinaguráyán na yù inikáyâ na, á inattamán na yù pallillibâ da kuna, nga kunnay sù netúrâ sù dán nga libru, nga kun na, "Apu Namarò, nekuá nikán yù pakkakagi ra nikaw."<sup>\*</sup>

<sup>4</sup> Á ngámin nga netúrâ ngaw, inipetúrâ ni Namarò, tapè mattudduán ittam. Á megapu sù netúrâ nga netuddu nittam, mapatattam yù nonò tam ánná mabannáyán, tapè mapasi-gaggà yù ággiddanáma tam kâ Apu Namarò.

<sup>5</sup> Si Namarò, nga mangabbál nittam ánná mamannay nittam, á parè bì ta abbágán na kayu, tapè magimammà kayu, ánná mattatáddyay yù nonò naw nga kunnay ta nonò ni Apu Kesu Kiristu, megapu sù ángngikatalà naw kuna.

<sup>6</sup> Á ta kunnian, mattatáddyay kayu nga maddáyaw kâ Namarò, nga Yáma ni Apu Kesu Kiristu nga Yápu tam.

*Mesipà gapay yù ira Makkakerumá nga Tatolay nga ari Kudio*

<sup>7</sup> Á gapu ta kepattatádde tam kâ Apu Kesu, makkaká-alawâ kayu laguk, nga kunnay ta pangalawâ ni Apu Kesu nikayu, tapè meparáyaw si Namarò.

<sup>8</sup> Ta kagiak ku nikayu ta yá gapu na nga minay si Apu Kesu Kiristu nga masserbi nikami nga Kudio, tapè ipasingan na ta kuruk nga mekatalâ si Apu Namarò, á palurotan na yù ngámin nga initabbá na sù ira ngaw naggaká nikami nga Kudio.

<sup>9</sup> Á yawe gapay yù gapu na nga minay si Apu Kesu Kiristu, tapè maddáyaw gapay yù ira ari Kudio kâ Namarò, megapu sù pangikállà na nira, nga kunnay sù inipetúrâ na ngaw ni Namarò, nga kun na,

"Dayáwat taka, Apu, ta arubáng nayù ira makkakerumá nga ari Kudio,  
á ikansion ku yù paddáyò nikaw."<sup>†</sup>

<sup>10</sup> Á aijan gapay yù netúrâ, nga kun na,  
"Sikayu nga makkakerumá nga ari Kudio, mepagayáyâ kayu sù ira tatolay nga sinullà ni Namarò ta tatole na."<sup>‡</sup>

<sup>11</sup> Á aijan paga nga netúrâ,  
"Sikayu ngámin nga ari Kudio, maddáyaw kayu kâ Apu Namarò.

Sikayu ngámin nga makkakerumá nga tatolay, dayáwan naw si Apu."<sup>§</sup>

<sup>12</sup> Á initúrâ na ngaw ni Isaya, nga kun na,  
"Aijan yù umay nga meyanâ sangaw,

nga ginaká ni Jesse, nga yáma ni Patul Dabid.

Aggina yù umay mammaguray  
sù ira makkakerumá nga tatolay nga ari Kudio.

Aggina yù iddanamád da ta mangiyígú nira."<sup>\*</sup>

<sup>13</sup> Si Namarò yù paggapuán nayù ággiddanáma tam. Á ipakimállà ku kuna, ta parè bì ta pagayáyatán na kayu ánná pagimammatan na kayu, megapu ta ángngikatalà naw kâ Apu Kesu, tapè kuruk nga magayáyâ kayu, ánná mapasigaggà yù pagiddanáma naw megapu sù pangngapangnguá nayù Mangilin nga Ikararuá ni Namarò.

*Yù Pangilayalayâ ni Pablo sù ira Ari Kudio*

<sup>14</sup> Wáwwagi, ammukin ta napiá yù nonò naw, ánná kánnámmuán naw yù ngámin nga meyannung ta ángngikatalà tam kâ Apu Kesu Kiristu. Á yáyù nga makáwayyá kayu nga makkakátabatabarang.

<sup>15</sup> Á aringà mabbábáng nga mattúrâ nikayu, tapè ipanonò ku nikayu yù ammu nawin áddè ngaw. Á mappelokâ nga mangitúrâ, megapu sù pakáwayyâ nga iniyawâ ni Namarò nikán megapu ta pangikállà na nikán.

<sup>16</sup> Ta sinullà nangà ni Namarò nga mangilayalayâ sù ira makkakerumá nga tatolay nga ari Kudio, tapè passerbiák ku si Apu Kesu Kiristu, nga kunnay sù pári nga masserbi sù láguém nayù mangilin nga kapilliá. Á inilayalayâ ku nira yù napiá nga dámak nga naggapu kâ

\* 15:3 Salmo 69:9   † 15:9 Salmo 18:49   ‡ 15:10 Deuteronomio 32:43   § 15:11 Salmo 117:1   \* 15:12 Isaya 11:10

Namarò, tapè mangikatalà ira gapay kâ Apu Kesu. Á alawatan ni Namarò ira ta tatole na, nga kun na mepángngà nga meyátang kuna, megapu sù pamakarenu na nira nayù Mangilin nga Ikararuá nga maggián nira.

<sup>17</sup> Á gapu ta ketáddè kâ Apu Kesu Kiristu, aringà mappasirán nga mangipakánnámmu sù akkuák ku ta passerbi kâ Namarò.

<sup>18</sup> Á awát ta ubogak ku, nu ari galá yù pinalurò ni Apu Kesu megapu sù pangilayalayâ ku ánná ággangnguâ, tapè manguruk gapay kâ Namarò yù ira makkakerumá nga tatolay nga ari Kudio.

<sup>19</sup> Ta inipakuá na gapay nikán yù makapállâ nga pamagaddátu na, nga pinalurò na megapu sù pakáwayyá nayù Mangilin nga Ikararuá nga mangabbák nikán. Á ilayalayâ ku yù napiá nga dámak nga meyannung kâ Apu Kesu Kiristu ta ngámin nga lugár, nga inigapu ta ili na Jerusalem ta áddè ta Ilirkum.

<sup>20</sup> Á ta áddè ngaw, italákkuruk ku ta yù ira tatolay nga pangilayalayaták ku sù bilin ni Namarò yù ira lâ nga ari paga nakaginná ta meyannung kâ Apu Kesu Kiristu, tapè arák ku tudduán yù ira nga sinudduán nayù tanakuán nga tolay.

<sup>21</sup> Á yáyù kingnguâ nga kunnay ta inipetúrâ na ngaw ni Namarò, nga kun na, "Yù ira nga ari bulubugá nakarámak ta meyannung kuna, masingad da sangaw nu manganánnuán.

Á yù ira ari bulubugá nakaginná sù meyannung kuna, maginná ra sangaw, á kánnámmuád da."<sup>†</sup>

#### *Panalákkuruk ni Pablo nga Umay ta Roma*

<sup>22</sup> Á yáyù nga aringà paga nakángay tán nga lugár naw, gapu ta negaggagà megapu sù pangilayalayâ ku sawe ira lugár.

<sup>23</sup> Á gapu ta nabalinin yù tarabákù saw, ninonò ku ta et takayu tullúnán, ta yáyù karagaták ku ta nabayák.

<sup>24</sup> Á sangaw nu umayà túrin ta Espania, ikáyâ ku ta maddagákà ta gián naw, tapè mepagayáyákà lábbì nikayu. Á ikáyâ ku nga mappábbák nikayu, sangaw nu panawát takayu nga umayin ta Espania.

<sup>25</sup> Ngam kunangane, umayà bì mattúllun sù ira wáwwagi tam nga maggián ta Jerusalem, ta ek ku ituluk yù kuártu nga nelimù nira.

<sup>26</sup> Ta yù ira ari Kudio nga mangikatalà kâ Apu, nga maggagammung ta Masidonia ánná Akeya, sinalákkuruk da nga mangabbák sù ira pobare nga Kudio nga taga Jerusalem nga mangikatalà kâ Apu.

<sup>27</sup> Á magayáyâ ira nga mangisipà ta kukuá ra sù ira Kudio. Á mepángngà gemma ta iyawáda yù kukuá ra, nga ángngabbák da nira, nga kunnay ta pappágâra ta gatù da sù ira Kudio nga manguruk. Ta aggira nga ari Kudio, mesipà ira gapay sù ira Kudio, á yáyù nga kesipatád da gapay yù pangikállâ ni Namarò ánná yù initabbá na sù ira tatole na.

<sup>28</sup> Á sangaw nu kabaliuk ku mangituluk sù ábbák da nga nelimù sù ira manguruk nga Kudio nga taga Jerusalem, á mánawà laguk nga umay ta Espania, á maddagákà bì ta gián naw, ta et takayu tullúnán.

<sup>29</sup> Á ammù ta pagayáyatan na ittam ni Apu Kesu Kiristu sangaw nu mappasinganà nikayu, megapu sù bilin na nga ilayalayâ ku.

<sup>30</sup> Wáwwagi, gapu ta makkaká-iddù ittam megapu sù Ikararuá ni Namarò, á ta panakabaggi ni Apu Kesu Kiristu, ikomâ nikayu ta mattatádday kayu nga mepakimi-imállâ bì kâ Namarò megapu nikán.

<sup>31</sup> Á yaw ipakimállâ naw, ta taronán nangà ni Namarò ánná illillì nangà, tapè arád dangà akkuán nayù ira nga ari manguruk nga maggián ta purubinsia na Judiya. Á ipakimállâ naw gapay yù ira wáwwagi tam nga maggián ta Jerusalem, tapè magayáyâ ira nga mangalawâ sù abbák nayù ira kábuluk ku, nga ituluk ku nira.

<sup>32</sup> Á ipakimállâ naw gapay ta anugutan na gapay ni Namarò yù ángè ta gián naw, tapè mepagayáyákâ nikayu ánná magibannágâ.

<sup>33</sup> Á yawe ipakimállâ ku, ta parè bì ta egga nikayu si Namarò, nga paggaguán nayù imammâ na nonò tam. Ammán.

## 16

#### *Iyabbú ni Pablo nu Kunnasi yù ira Kákkopun na*

<sup>†</sup> 15:21 Isaya 52:15

<sup>1</sup> Wáwwagi, ajjan yù babay nga umay ta gián naw, nga ikáyâ ku ipakámmu nikayu. Aggina si Pibi, nga wagi tam nga mangabbák sù ira wáwwagi tam nga maggagammung ta Kenkareya.

<sup>2</sup> Á labbè ni Pibi ta gián naw, alawatan naw nga kunnay ta mepángngà nittam nga tatole ni Namarò, megapu sù ángngikatalà na kâ Apu Kesu Kiristu. Á abbágán naw ta napiá, ánná iyawâ naw kuna yù máwák na, gapu ta napiá gapay yù ággasigurá na ta aru nga tatolay, nepatalugáríng nikán, ta napiá gapay yù ángngabbák na nikán.

<sup>3</sup> Á manonò ku yù ira kopuk ku nga magatáwa, di Akila kâ Persila, á iyabbû ku nu kunnasi ira, ta aggira gapay yù kábuluk ku nga masserbi kâ Apu Kesu.

<sup>4</sup> Á nágge ira natay ngaw ta pangiyígú da nikán sù nággekà natay. Á yáyù nga ari lâ sikán yù mabbalabálà nira, nu ari gapay yù ira manguruk kâ Apu nga ari Kudio nga maggagammung ta lugár da.

<sup>5</sup> Á manonò ku gapay yù ira wáwwagi tam nga maggagammung ta bale ri Akila nga makimoray kâ Namarò, nu kunnasi ira.

Á manonò ku si Epaneto nga iddukak ku. Kagian naw gapay kuna yù pangiyabbû ku ta meyannung kuna. Aggina yù napolu nga manguruk kâ Apu Kesu Kiristu ta purubinsia na Asia.

<sup>6</sup> Á iyabbû ku gapay nu kunnasi si Maria, nga kitaláppà nga mangabbák nikayu.

<sup>7</sup> Á kagian naw gapay kâri Andaroniko kâ Jun ta manonò ku ira, nu kunnasi ira. Aggira yù kagittâ nga Kudio, nga kábuluk ku ngaw nga nebáluk. Á kábulud da gapay nayù ira minángngilayalayâ nga pakimorayán, á napolu ira nga nanguruk kâ Apu Kesu Kiristu ánnè nikán.

<sup>8</sup> Á manonò ku gapay si Ampilato nga kopuk ku nga iddukak ku megapu sù ketádday mi kâ Apu Kesu.

<sup>9</sup> Á iyabbû ku gapay yù meyannung kâ Urbano, nga kabbulut tam nga masserbi kâ Apu Kesu, ánná si Estako gapay nga iddukak ku.

<sup>10</sup> Á kagian naw gapay kâ Apeli yù pakanonò ku kuna. Mássiki nu narigirigâ si Apeli, á nepasingan ta napasigaggâ yù ángnguruk na kâ Apu Kesu Kiristu, á ayatán si Apu kuna.

Á kunnasi gapay yù ira nga maggián ta bale ri Aristobulu? Kagian naw bì nira yù pangiyabbû ku ta meyannung nira.

<sup>11</sup> Á kunnasi gapay si Erodio, nga kagittâ nga Kudio? Ánna yù ira wáwwagi tam ta ángnguruk tam kâ Apu nga maggián ta bale ri Narsiso, kagian naw gapay nira ta iniyabbû ku nu kunnasi ira.

<sup>12</sup> Á manonò ku gapay yù ira bábbay, di Taripina kâ Tariposa, nga masserbi ta napiá kâ Apu Kesu. Kagian naw bì nira. Á si Persida gapay, nga iddukat tam ngámin, nga napiá yù ásserbi na kâ Apu, kagian naw gapay kuna yù pakanonò ku kuna.

<sup>13</sup> Á manonò ku gapay di Rupo nga sinullà ni Apu Kesu nga masserbi kuna, ánná yù yená na, nga kun na yená gapay.

<sup>14</sup> Á manonò ku gapay yù ira lállakalákay, di Asingkarito kâri Palegon, si Ermas, si Patrobo, si Ermis, ánná yù ira kárúán nga manguruk nga mepulupulù nira.

<sup>15</sup> Á manonò ku gapay di Pilologo kâ Kulia nga atáwa na, di Nerio kâ wagi na nga babay, ánná di Olimpo ánná yù ira ngámin nga manguruk nga mepulupulù nira.

<sup>16</sup> Á sikayu gapay nga maggagammung tán, makkaká-iddù kayu ta kunnay ta mepángngà sù ira mawwawági nga manguruk kâ Apu. Á yù ira ngámin nga wáwwagi naw megapu sù panguruk da kâ Apu, nga maggagammung ta makkakerumá nga lugár nga nappassapas-siárak ku, ipetúrâ da nikán yù pakanonò da ánná yù ayâ da nikayu gapay.

### *Yù Maporián nga Itabarang ni Pablo sù ira taga Roma*

<sup>17</sup> Wáwwagi, yawe ikomâ nikayu, ta mappalán kayu sù ira mamuruburion ánná masinnâ nga umay nikayu mangituddu ta tanakuán nga bilin nga mekontará sù kuruk nga bilin ni Namarò nga netuddu nikayu. Lillítan naw ira.

<sup>18</sup> Ari si Apu Kesu Kiristu yù passerbiád da, nu ari galâ yù karagatád da lápay. Á ilogò da yù ira awán ta áppalán, megapu sù marenu nga ubobuk da nga nakástá.

<sup>19</sup> Á magayáykâ gapu ta neparámak sù ira ngámin nga tatolay yù napiá nga ángnguruk naw kâ Apu. Á yawe paga karagaták ku megapu nikayu, ta kánnámmuán naw yù ngámin nga meyannung sù napiá nga netuddu nikayu, ngam awán nakuan ta ammu naw nga meyannung ta narákè.

<sup>20</sup> Á ari mabayák, á si Namarò nga mamagimammà nittam, appútan na si Satanas, nga máppù nga kunnay ta iguppè tam. Á yawe ipakimállà ku megapu nikayu, ta ikákkallà na kayu ni Apu Kesu Kiristu.

<sup>21</sup> Si Timotio, nga kabbuluk ku nga masserbi kâ Apu, ipetúrâ na gapay nikán yù pakanonò na nikayu. Á di Lusio kári Jeson kâ Sosipatro gapay, nga kagittâ nga Kudio, manonò da kayu gapay.

<sup>22</sup> Á sikán si Tersio nga nangitúrâ sawe nga inipetúrâ ni Pablo nikán. Manonò takayu gapay nga wáwwagi megapu sù ángngikatalà tam kâ Apu Kesu Kiristu.

<sup>23</sup> Á si Gayo, nga mangálliuk nikán, manonò na kayu gapay. Yawe bale na yù paggagam-mungán nayù ira manguruk. Á si Erasto, nga kusarero sawe ili, áんな si Kuarto, nga wagi tam gapay, manonò da kayu gapay.

<sup>24</sup> Á ipakimállà ku ta parè bì ta ikákkallà na kayu ngámin ni Apu Kesu Kiristu, tapè magimammà kayu. Ammán.

*Yù Paddáyo ni Pablo ta Pakimállà na kâ Apu*

<sup>25</sup> Dayáwat tam si Namarò, ta aggina lâ yù makáwayyá nga mangabbák nikayu, tapè mapasigaggà yù ángngikatalà naw, megapu sù napiá nga dámak nga ilayalayá ku nga meyannung kâ Apu Kesu Kiristu. Á áddè ngaw nga nabayágìn, ari paga mepakánnámmu yù bilin na nga meyannung sù ángngiyígù na ta tatolay.

<sup>26</sup> Ngam kunangane, nepalappákin. Ta si Namarò, nga maggián ta áddè ta áddè, inipetúrâ na yù bilin na sù ira ngaw ábbilinán na. Á jinok na yù ira umay nga mangipakánnámmu ta bilin na ta ngámin nga makkakerumá nga tatolay, tapè manguruk ira, áんな mangikatalà ira kuna.

<sup>27</sup> Dayarayáwát tam si Namarò! Aggina lâ yù táttáddy ngasírik nga makánnámmu ta ngámin. Meparáyaw ta áddè ta áddè, megapu kâ Apu Kesu Kiristu! Ammán. Áddè na yû.

## Yù Napolu nga Túrâ ni Pablo sù ira Manguruk nga taga Korinto

*Yù Meyannung sù Túrâ*

Yù ili na Korinto yù karakalán nayù ira ili sù purubinsia na Akeya, nga lugár nga mangngágán ta Garesia kunangan, á Gareko yù ággubobuk da. Á gapu ta aggik na bebay yù gián nayù ili, aru yù ira barangay nga maddung tán, nga naggapu ta arayyu, ta umay yù ira tatolay nga malláku ta magannagannuk.

Á aru gapay yù ira makkakerumá nga tatolay nga maggián sù ili. Á neparámak yù ili, gapu ta ajjan tán yù makkakerumá nga narákè. Á sù ngaw pattúrâ ni Pablo sù ira taga Korinto, aru yù ira makkakerumá nga sináddios da, á narákè gapay yù ággangnguá nayù ira tatolay ta pakimore ra sù ira sináddios.

Á aru gapay yù ira Kudio nga naggián ta ili na Korinto, nga ajjan gapay yù ággagammungád da, gapu ta si Namarò yù pakimorayád da. Á nakipaggián ngaw nira si Pablo. Keggá ni Pablo tán, mináppadday ta tarapál nga tabbi na ayám ánnna nakannak nga gómi, ta yáyù ággalerán na. Á minay nepaggagammung sù ira Kudio, tapè ituddu na nira yù meyannung kâ Apu Kesu (Kingnguá 18:3). Á aru gapay yù ira Gareko nga mepaggagammung nira, ánnna yù ira kárúan nga ari Kudio, nga mangikatalà kâ Apu.

Á páno ni Pablo ta Korinto, nagaru yù ira nga mangikatalà kâ Apu Kesu. Ngam sù pakkakápereperang da ta ubobuk, initúrâ da laguk yù iyabbû da kâ Pablo nga meyannung sù panguruk da nga inituddu ni Pablo nira. Á initubbuk da kuna ta Epeso. Yawe túrâ yù itabbák ni Pablo sù túrâ da.

*Yù Mayán nayù Túrâ*

Yù Pamegapu nayù Túrâ (1:1-9)

Ikomá ni Pablo sù ira Manguruk ta Pattatáddayad da yù Nonò da (1:10-4:21)

Yù Meyannung sù Ággasigurá nayù ira Makkábalay (5:1-7:40)

Yù Meyannung sù Kanan nga Meyátang ta Sináddios (8:1-13)

Yù Mepángngá nga Akkuán nayù Minángngilayalayâ (9:1-27)

Mepugik nittam yù Makimoray ta Sináddios (10:1-11:1)

Yù Meyannung sù ira Bábbay nga Mangikatalà kâ Apu (11:2-16)

Yù Panaddamat tam ta Pate ni Apu Kesu nga Ingágad da ta Pamúgák ni Apu (11:17-34)

Yù Makkakerumá nga Pakáwayyá tam nga Naggapu sù Mangilin nga Ikararuá (12:1-31)

Makkaká-iddù ittam (13:1-13)

Yù Duá nga Pakáwayyá na Tolay nga Iywáni Namarò (14:1-25)

Yù Ákkimore tam kâ Namarò ta Paggagammung tam (14:26-40)

Yù Paginnanolay ni Apu Kesu Kiristu ánnna yù Iddanamát tam nga Paginnanole tam (15:1-58)

Yù Pangabbák naw sù ira Wáwwagi tam nga Magáwák (16:1-4)

Yù Panalákkuruk ni Pablo nga Manúllun sù ira taga Korinto (16:5-12)

Yù Naporíán nga Pangitbarang ni Pablo (16:13-24)

<sup>1</sup> Sikán si Pablo nga sinullá ni Namarò, ta umayá mangilayalayâ sù meyannung kâ Apu Kesu Kiristu. Á si Sostenes yù kabbuluk ku, nga wagi tam megapu sù pangikatalà tam kâ Apu Kesu.

<sup>2</sup> Á nakapattúrâ kami nikayu nga taga Korinto,\* nga maggagammung tán nga makimoray kâ Namarò, sikayu nga taggitádday nga napakarenuánin yù nonò na megapu sù kepattatadé na kâ Apu Kesu. Ta imagálán na kayu ni Namarò, tapè pabbalinan na kayu ta mangilin nga tatole na, nga makimoray kuna ta pannakabaggi ni Apu Kesu Kiristu, nga kunnay sù pakimore mi gapay ánnna yù ira nga ajjan ta ngámin nga lugár nga makiyápu kâ Apu Kesu Kiristu nga Yápu tam.

<sup>3</sup> Á parè bì ta napiá yù gawagawáyán naw ánnna yù áaggián naw, tapè magimammà yù nonò naw megapu sù pangikállà di Namarò nga Yáma tam kâ Apu Kesu Kiristu nga Yápu tam.

*Yù Paddáyo ni Pablo*

<sup>4</sup> Á dayarayáwak ku si Namarò, ta aringà makabalabálà kuna, gapu ta pangikállà na ánnna pangiddù na nikayu, ta mesipà kayu kâ Apu Kesu Kiristu megapu sù pangikatalà naw kuna.

\* 1:2 Bibbiram mu yù meyannung sù pangilayalayâ ni Pablo sù ili na Korinto: Kingnguá 18:1-17.

<sup>5</sup> Á gapu ta ánggabbák ni Apu Kesu nikayu, napammapiá yù ngámin nga meyannung sù ákkiyápu naw kuna, á kánnámmuán naw ta napiá yù kuruk nga bilin na, ánná makáwayyá kayu nga mangibukalán sù kebalinán na.

<sup>6</sup> Ta nepatattà ta napiá ta nonò naw yù bilin ni Namarò nga meyannung kâ Apu Kesu, á napasigaggá yù ángnguruk naw kuna.

<sup>7</sup> Á yáyù nga awán ta kúráng nayù iniyawâ ni Namarò nikayu, nga pakáwayyá naw nga mamalurò sù ipakuá na nikayu, ta pagiddi-iddak naw ta pattoli ni Apu Kesu Kiristu, nga Yápu tam.

<sup>8</sup> Á uputan ni Namarò nga abbágán sikayu ta áddè ta pagáddekan na ággaw, tapè napasigaggá yù pangikatalà naw kuna ánná awán ta pakaliwatán naw sangaw nu duttál yù ággaw nga pattoli ni Apu Kesu Kiristu, nga mamanunnú ta ngámin nga tatolay.

<sup>9</sup> Á mapalurò yian gemma, ta mekatalà si Namarò, á aggina yù nagágál nikayu, ta mepattatádday kayu sù Anâ na, si Apu Kesu Kiristu nga Yápu tam.

#### *Nassisinná yù ira Mangikatalà nga taga Korinto*

<sup>10</sup> Á wáwwagì, yawe ikomâ nikayu megapu sù pakáwayyá nga naggapu kâ Apu Kesu Kiristu nga Yápu tam. Pattatáddayan naw yù nonò naw, tapè ari kayu massisinná.

<sup>11</sup> Yáyù itbarang ku nikayu, gapu ta ajjan yù ira kábbale di Kulowe nga nangiránuk nikán ta ajjan nikayu yù ira naddarâma.

<sup>12</sup> Ta ajjan yù ira nga kunniauw yù kagiad da, "Si Pablo yù tuttulam mi," kud da. Á yù ira kárúan, "Sikami yù tumuttuttl kâ Apolo,"<sup>†</sup> kud da. Onu kagian nayù ira kárúan, "Tuttulam mi si Eduru," kud da. Á ajjan yù ira nga kagiad da, "Si Apu Kesu Kiristu yù tuttulam mi," kud da.

<sup>13</sup> Aro! Mesinná panò si Apu Kesu Kiristu! Ari gemma! Á sikán panò yù natay ta kurù nga netapil megapu nikayu! Onu narigù kayu panò megapu ta kesipatán naw yù ngágán ni Pablo? Ari gemma, nu ari galâ megapu ta kesipatán naw yù ngágán ni Apu Kesu Kiristu.

<sup>14</sup> Á magayáyákà ta allà ni Namarò ta baddi lâ nikayu yù jinigù ku. Aggira lâ di Kirispo kâ Gayo,<sup>‡</sup>

<sup>15</sup> marakè kagian naw ta sikán yù tuttulan naw, nu sikán nakuan yù nanigù nikayu.

<sup>16</sup> Á manonokin ta jinigù ku gapay yù ira kábbale ri Estepano.<sup>§</sup> Ngam aggira lâ manonò ku nga jinigù ku. Awán ta tanakuán nga manonò ku.

<sup>17</sup> Ta jinok nangà ni Apu Kesu Kiristu, nga ari ta manigù ta tatolay, nu ari galâ ta mangilayalayákà sù napiá nga dámak nga meyannung kuna. Á ta pangilayalayâ ku, arák ku iniyusá yù monak nga ubobuk ánná yù pakáwayyá nayù sírik nayù ággubobuk ku, marakè maginná naw lâ yù ubobuk ku, ngam arán naw kánnámmuán yù pakáwayyá nayù pate ni Apu Kesu ta kurù.

#### *Ajjan kâ Apu Kesu Kiristu yù Pakáwayyá ni Namarò ánná yù Sirik na*

<sup>18</sup> Á yawe bilin ni Namarò yù meyannung sù pagikáru ni Apu Kesu Kiristu ta liwiliwâ na tatolay sù pate na ta kurù. Á yù ira tatolay nga ari manguruk, nga mekanâ noka sù pangukum ni Namarò, á kagiad da ta awán ta serbi nayù bilin ni Namarò. Ngam sittam nga makiyígù kâ Apu Kesu, ammu tam yù pakáwayyá nayù bilin ni Namarò, ta yáyù nga makiyígù íttam kuna, gapu ta naginná tam yù bilin na.

<sup>19</sup> Á ajjan yù dán nga netûrâ, nga inipetûrâ na ngaw ni Namarò, nga kun na, "Darálak ku yù sírik nayù ira tatolay nga makkagi ta masírik ira ánná naggigiámmu ira, nga ari manguruk nikán.

Á gammák ku yù pakáwayyá nayù ira tatolay nga makkagi ta makánnámmu ira, tapè ari mapalurò yù akka-akkuád da, á mabbábáng ira nga mapállá.\*

<sup>20</sup> Á anni laguk yù ággigián nayù ira tatolay nga masírik, ánná yù ira naggigiámmu sù tunung ni Moyses, ánná yù ira masírik nga mamereperang ta ubobuk? Yù ira tatolay nga ari manguruk kâ Namarò, mássiki nu aru yù ammu ra, ipasingan ni Namarò ta awán ta serbi nayù ngámin nga ammu ra, á kunnay ta molapá ira, gapu ta arád da kurugan si Namarò.

<sup>21</sup> Á megapu sù sírik ni Namarò, yáyù nga sinalákkuruk na ta arád da mánnaámmuán nayù ira tatolay yù Namarò nira megapu sù kagiad da nga sírik da, nu ari galâ ta iyígù na yù ira nga mangikatalà kuna, megapu sù bilin na nga ilayalayâ mi, nga ibiláng nayù ira ari manguruk ta awán ta serbi na.

\* <sup>1:12</sup> Asinni si Apolo? Kingnguá 18:24-28    † <sup>1:14</sup> Asinni di Kirispo kâ Gayo? Kingnguá 18:8; Kingnguá 19:29; Roma 16:23    § <sup>1:16</sup> Asinni si Estepano? 1 Korinto 16:15    \* <sup>1:19</sup> Isaya 29:14

<sup>22</sup> Á yù ira Kudio, ari ira manguruk kâ Namarò, nu arád da masingan yù pamagaddátu na. Á yù ira Gareko, alerad da yù ibiláng da ta masírik.

<sup>23</sup> Ngam sikami, ilayalayâ mi si Apu Kesu Kiristu nga natay ta kurù, nga nagikáru ta liwiliwâ na tatolay. Á yù ira Kudio, manakì ira nga magginná, gapu ta iluddè da yù natay ta kurù. Á yù ira ari Kudio, kagiad da ta awán ta serbi nayù kingnguá ni Apu Kesu, ánnna kagiad da ta molapá yù ira mangikatalà kuna.

<sup>24</sup> Ngam sittam nga manguruk sù pagágál ni Namarò ta umay ittam makiyígù kuna, mássiki nu Kudio onu ari Kudio, ammu tam ta makáwayyá si Apu Kesu Kiristu nga mangiyígù ta tatolay, megapu sù pakáwayyá ni Namarò ánnna sírik na.

<sup>25</sup> Á yù pinalurò ni Namarò, nga kagian nayù ira ari manguruk ta awán ta serbi na, yáyù masírik ánnè ta ngámín nga sírik da. Á yù kagiad da ta kapi ni Namarò, yáyù masikan ánnna makáwayyá ánnè ta ngámín nga pakáwayyá na tatolay ánnna sikad da. Ta kagian nayù ira ari manguruk ta awán ta serbi nayù pate ni Apu Kesu, ngam sinalákkuruk ni Namarò ta yáyù gapu na nga pakomán na yù ira nakaliwâ. A kagiad da ta makapi si Namarò gapu ta arán na inililli si Apu Kesu sù pate na ta kurù, ngam sinalákkuruk ni Namarò ta yáyù gapu na nga iyígù na yù ira tatolay, tapè ari ira sangaw mekanakanâ ta pangukum na.

<sup>26</sup> Á wáwwagì, nonopan naw yù ággigián naw lage naw nanguruk sù pagágál ni Namarò nikayu. Baddi lâ nikayu yù inibiláng nayù ira ari manguruk ta masírik, onu makáwayyá, onu kátannangán. Ngam piníli na kayu ni Namarò, tapè sikayu yù manguruk kuna.

<sup>27</sup> Ta piníli ni Namarò yù ira tatolay nga kun na awán ta ammu ra ta ánnninganán nayù ira ari manguruk, tapè mespiránán yù ira nga makkagi ta masírik ira. Á piníli ni Namarò yù ira tatolay nga makapi, tapè mespiránán yù ira makáwayyá.

<sup>28</sup> Á yù ira nga meluddè, nga uyoyungán nayù ira ari manguruk ánnna kagiad da ta awán ta serbi ra, aggira yù piníli ni Namarò, tapè ipakánnámmu na ta kuruk nga awán ta serbi nayù ibiláng na tatolay ta importá ta dabbuno.

<sup>29</sup> Á yù ira ari mebiláng ta importá ta dabbuno, aggira yù piníli ni Namarò, tapè awán ta tolay nga ajian yù awayyá na nga mappeddaráyaw ta arubáng ni Namarò.

<sup>30</sup> Ta si Namarò yù manotolay nittam, á pinattatadéne ittam kâ Apu Kesu Kiristu, tapè mesipà ittam sù sírik na ánnna piá na. Á megapu kâ Apu Kesu Kiristu, nga nagikáru ta liwâ tam, pakomán ni Namarò ittam, tapè ari ittam mekanakanâ sù pamagikáru na. Á pakarenuán na yù nonò tam, ánnna pabbalinan na ittam ta tatole na.

<sup>31</sup> Á yáyù nga ajian yù dán nga netúrâ nga kunniawe, “Nu ajian yù iparáyaw na tolay, á ari yù baggi na, nu ari galâ si Apu Kesu Kiristu nga Yápu na, ánnna yù kingnguá ni Apu megapu kuna.”<sup>†</sup>

## 2

*Yù Napiá nga Dámak nga Meyannung sù Ketapil ni Apu Kesu Megapu nittam*

<sup>1</sup> Á sikán, wáwwagì, labbè ku sù gián naw nga umay mangilayalayâ sù bilin ni Namarò, arák ku iniyubobuk yù monak onu masírik nga ubobuk nayù ira naggigiámmu.

<sup>2</sup> Á ta paggiák ku nikayu, initialákkuruk ku ta yá lâ ilayalayâ ku si Apu Kesu Kiristu, nga natay ta kurú, nga netapil megapu nittam.

<sup>3</sup> Á nakapingá ánnna namippippigá nga naganássing.

<sup>4</sup> Á ta pangilayalayâ ku, arák ku iniyubobuk yù monak ánnna masírik, ta arát takayu kinagumán megapu sù ággubobuk ku. Ngam kinuruk naw yù bilik ku megapu galâ sù pakáwayyá nayù Mangilin nga Ikararuá ni Namarò.

<sup>5</sup> Á yáyù nga ikatalà naw si Apu Kesu Kiristu, ari megapu sù sírik na tolay, nu ari galâ megapu sù pakáwayyá ni Namarò.

*Yù Sírik ni Namarò*

<sup>6</sup> Á ta pangituddu mi sù ira nga napasigaggâ yù ángngikatalà da kâ Apu Kesu, masírik ánnna monak yù ubobugam mi, ngam dumá sù kagiad da ta masírik nayù ira kátannangán nga mammaguray ta dabbuno, ánnna yù ira kárúan nga tatolay nga ari manguruk kâ Apu. Ta mappasá sangaw yù ibiláng da ta masírik ánnna yù pakáwayyá ra.

<sup>7</sup> Ngam yù sírik nga ubobugam mi yù sírik ni Namarò nga inilímak na ngaw ta tatolay. Ta sù ngaw lage na namarò ta dabbuno, sinalákkuruk ni Namarò yù akkuán na, tapè mesipà ittam sù pammagure na ta lángì.

<sup>†</sup> 1:31 Jeremias 9:24

<sup>8</sup> Á awán ta mammaguray ta dabbuno nga nánnámmuán na yù sinalákkuruk ni Namarò. Ta nu nánnámmuád da nakuan, arád da nakuan pinapátay ta kurù si Apu Kesu, nga kotunán nga mammaguray.

<sup>9</sup> Á yù ipakánnámmu mi, yáyù inipetúrá na ngaw ni Namarò sù dán nga libru, nga kun na, "Makapállâ yù talákkurugan ni Namarò nga akka-akkuán na megapu sù ira nga mangiddù kuna,

nga arád da paga bulubugá nasingan onu naginná, ánná arád da paga manonò!"\*

<sup>10</sup> Ngam dannian yù inipalappâ ni Namarò nittam, megapu sù Ikararuá na. Ta yù Ikararuá ni Namarò, ammu na ngámin, mássiki yù monak nga nonopan ni Namarò.

<sup>11</sup> Á ta ángngarigán, asinni panò yù makánnámmu sù ajjan ta nonò na tolay, nu ari galâ yù tolay lápay? Á kunnian gapay kâ Namarò, ta awán ta makánnámmu sù meyannung kâ Namarò, nu ari galâ si Namarò ánná yù Ikararuá na.

<sup>12</sup> Ngam sittam nga mangikatalà kâ Namarò, dumá yù nonò tam ta nonò nayù ira tatolay ta dabbuno nga ari manguruk kâ Apu, gapu ta iniyawâ ni Namarò nittam yù Ikararuá na nga maggián nittam, tapè matákkilál tam yù ngámin nga naggapu kâ Namarò nga iyawâ na nittam.

<sup>13</sup> Á ta pangilayalayâ mi karannian, arám mi iyubobuk yù masírik nga ubobuk nga naggapu ta nonò na tolay ta dabbuno, ngam iyubobuk mi lâ yù ipakánnámmu nayù Ikararuá ni Namarò nikami. Á megapu sù ángngabbák na nikami, ibukalám mi yù kuruk nga meyannung kâ Namarò sù ira tatolay nga ajjan nira yù Mangilin nga Ikararuá.

<sup>14</sup> Ngam yù ira tatolay nga ari manguruk, nga awán nira yù Ikararuá ni Namarò, arád da alawatan yù netuddu nga naggapu sù Ikararuá ni Namarò, gapu ta kagiad da ta awán ta serbi na. Á arád da máwayyá nga kánnámmuán, gapu ta awán nira yù Ikararuá ni Namarò nga mangabbák, tapè kánnámmuád da nakuan.

<sup>15</sup> Ngam yù tolay nga manguruk, nga ajjan kuna yù Ikararuá ni Namarò, ammu na yù mappili sù napiá, á panakitán na gapay yù ari napiá. Ngam yù ira tatolay nga ari manguruk kâ Namarò, arád da kánnámmuán yù ággangnguá nayù tolay nga manguruk kâ Apu.

<sup>16</sup> Á ajjan yù netürâ sù dán nga libru, nga kun na,  
"Egga panò yù makánnámmu sù nonò ni Apu Namarò?

Egga panò yù makáwayyá nga manabarang kuna?"†

Awán gemma. Ngam sittam nga mangikatalà kâ Apu Kesu Kiristu, kánnámmuát tam yù naggapu ta nonò na, megapu sù Ikararuá na nga maggián nittam.

### 3

#### *Yù ira Tatolay nga Masserbi kâ Namarò*

<sup>1</sup> Ngam sikayu, wáwwagi, ta keggâ ngaw ta gián naw nga mangituddu nikayu, arák ku inituddu yù monak nga kunnay sù ituddu sù ira tatolay nga tumulù sù Ikararuá ni Namarò. Ngam ággibajjì lâ yù ángngituddu nikayu, nga kunnay sù pangituddu ta tolay nga tuttulan na lâ paga yù karagatán na baggi na.

<sup>2</sup> Á kunnay kayu paga ta abbing nga massusu, ta arán naw kánnámmuán yù monak nga ituddu nakuan nikayu. Á yáyù nga ággibajjì lábbì yù ángngituddu nikayu. Á mássiki nu kunangane, arán naw paga mánnámmuán!\*

<sup>3</sup> Ta akkuán naw paga yù akka-akkuán nayù ira ari manguruk kâ Apu. Mangabubu kayu ánná maddaráma kayu, á yáyù nga mepasingan ta kun na kayu ta tolay ta dabbuno nga akkuán na yù karagatán nayù baggi na, nga ari manguruk kâ Apu.

<sup>4</sup> Ta ajjan nikayu yù ira makkagi ta tuttulad da si Pablo ánná yù ira makkagi ta si Apolo yù tuttulad da, á yáyù nga mepasingan ta akkuán naw lâ paga yù akka-akkuán nayù ira tatolay ta dabbuno nga ari manguruk kâ Apu.

<sup>5</sup> Á anni laguk yù kingnguá ni Apolo? Á anni laguk yù pinalurò ku? Masserbi kami kâ Namarò, nga mangilayalayâ sù bilin na, tapè ikatalà naw si Apu Kesu. Á sinuppál mi lâ yù inipakuá ni Namarò nikami nga katággitáddy.

<sup>6</sup> Á meyárik kami sù ira nga pattarabakuan nayù makáddabben, ta sikán yù kun na doban na nga umay mammulá ta búkal, á si Apolo yù kun na doban na nga umay massikkuk ta danum. Ngam si Namarò yù mamarakal sù inimulá mi.

<sup>7</sup> Á yáyù nga ari makáwayyá yù mammulá onu yù massikkuk, ta si Namarò galâ yù mamarakal sù nemulá.

<sup>8</sup> Á arán na irumá ni Namarò yù mammulá ámna yù massikkuk, ta iyawâ na nira nga katággitáddy yù bálâ na nga mepángngà ta pattarabáku na.

\* 2:9 Isaya 64:4

† 2:16 Isaya 40:13-14

\* 3:2 Kebru 5:12-13

<sup>9</sup> Á sikami kâ Apolo, makkabbulun kami nga makká-abbák nga mangituddu nikayu, ta yáyù passerbi mi kâ Namarò. Á meyárik kayu ta ákkomanán ni Namarò.

Á meyárik kayu gapay ta balay nga paddayan ni Namarò.

<sup>10</sup> Á megapu sù allà ni Namarò nikán, iniyawâ na nikán yù pakáwayyâ nga mangabbák kuna ta pappadde na sù bale na. Á kunnayâ ta makáwayyâ nga mabbalay, nga mangabbák kâ Apu. Á kunnayâ ta nangipay ta panáddagán nayù balay, ta sikán yù napolu nga mangilayalayâ sù bilin ni Namarò nikayu. Á aijan gapay yù ira nga kun na mamalin ta balay. A sittam nga katággítáddy, imugurán na laguk ta napiá yù áppadde na.

<sup>11</sup> Ta awán ta tanakuán nga meyárik ta panáddagán nayù balay nga ipapadde ni Namarò, nu ari galâ si Apu Kesu Kiristu, nga kun na kallang nga nepatáddagin. Ta aggina lâ yù pangikatalakát tam.

<sup>12</sup> Á ta ánggarigán, yù ira mamalin ta balay, makkakerumá yù ilannà da sù balay. Á kunnian sù ira mangituddu, ta makkakerumá yù ituddu ra. Á yù ira nga napiá yù ituddu na, kunnay ta ilannà da ta balay yù bulawán, ánnna pinalátá, ánnna nanginá nga batu. Ngam nu ari napiá yù ituddu ra, á kunnay ta ilannà da ta balay yù kayu nga támà, ánnna mimí, ánnna don na niuk.

<sup>13</sup> Á sangaw nu duttál yù ággaw nga pamanunnù ni Apu Kesu ta tatolay, mepalappâ yù sinarabáku tam nga katággítáddy, nu napiá. Ta pasikkálán ni Apu yù kingnguá tam, nga kunnay ta ipe na sù api, á maggián lâ yù napiá nga inipakuá ni Namarò nittam, ngam kengá lâ nga kunnay ta matuggi yù akkuát tam nga narákè onu yù awán ta serbi na.

<sup>14</sup> Á nu maggián yù sinarabáku tam, nga kun na balay nga pidde tam nga ari matuggi, á napiá yù bálâ tam nga iyawâ ni Namarò nittam nga katággítáddy.

<sup>15</sup> Ngam yù tolay nga ari napiá yù ituddu na, á kunnay ta matuggi yù sinarabáku na, á kengá lâ. Ta awán ta bálâ na. Ngam meyígù yù baggi na lâ, nga kun na tolay nga nelilli sù katuggi nayù bale na, nga awánin ta kukuá na.

<sup>16</sup> Á arán naw panò ammu ta sittam ngámin nga mangikatalà kâ Apu Kesu yù kun na mangilin nga bale ni Namarò? Ammu naw gemma! Ta maggián nittam si Namarò, gapu ta aijan nittam yù Ikararuá na.<sup>†</sup>

<sup>17</sup> Á nu aijan yù tolay nga manarál sù mangilin nga bale ni Namarò, á aggina gapay yù darálan ni Namarò. Á sikayu lápay nga mangikatalà kuna yù mangilin nga bale ni Namarò.

<sup>18</sup> Arán naw laguk ilogò yù baggi naw! Ta nu aijan yù tolay nikayu nga kagian na ta masírik ta ánnninganán nayù ira tatolay ta dabbuno nga ari manguruk kâ Apu, á napiá nakuan nu mabbáli ta kun na molapá, nga awán ta ammu na ta ánnninganád da, tapé mepakánnámmu kuna yù kukurugán nga sírik nga naggapu kâ Namarò.

<sup>19</sup> Ta yù sírik nayù ira tatolay ta dabbuno, yáyù ibiláng ni Namarò ta awán ta serbi na. Á aijan yù netúrâ sù dán nga libru nga bilin ni Namarò nga kun na, "Yù ira tatolay ta dabbuno nga monak yù sírik da, á yá lâ pabbalinád da yù kunnay ira ta nasikuatán, ta yù sírik da yù gapu na kelogò da lápay, megapu sù ure ni Namarò."<sup>‡</sup>

<sup>20</sup> Á aijan gapay yù netúrâ sù bilin ni Apu nga kunniauw: "Ammu ni Namarò ta awán ta serbi nayù nonopan nayù ira tatolay ta dabbuno nga kagiad da ta masírik."<sup>§</sup>

<sup>21</sup> Á arán naw laguk ipappeddaráyaw yù ira tatolay nga mangituddu nikayu, ta si Namarò yù maddok nira ta umay ira masserbi nikayu. Ta iniyawâ na nikayu ni Namarò yù ngámin noga pammakapián naw.

<sup>22</sup> Á jinok nangá ni Namarò, ánnna jinok na gapay di Apolo kâ Eduru, ta umay kami masserbi nikayu. Á talákkurugan ni Namarò ta mabbáli ta pakkapiánát tam yù ngámin nga aijan ta dabbuno, yù ngámin nga mesimmu kunangan ánnna yù mesimmu noka, ánnna yù áttole tam ánnna yù pate tam. Ngámin dannian yù naggapu kâ Namarò, tapé pabbalinan na ta pakkapiánát tam,

<sup>23</sup> gapu ta sittam nga mangikatalà yù kukuá ni Apu Kesu Kiristu. Á si Apu Kesu Kiristu yù kukuá ni Namarò.

## 4

*Yù ira Sinullà ni Namarò nga Minánggilayalayâ kâ Apu Kesu*

<sup>1</sup> Á kunniauw laguk yù pangibiláng naw nikami kári Apolo, ta masserbi kami kâ Namarò. Ta inikatalà na nikami ni Namarò yù pangilayalayâ mi sù bilin na nga meyannung kâ Apu Kesu, nga inilímak na ngaw ta tatolay.

<sup>†</sup> 3:16 1 Korinto 6:19; 2 Korinto 6:16

<sup>‡</sup> 3:19 Job 5:13

<sup>§</sup> 3:20 Salmo 94:11

2 Á yáyù nga tuppálam mi ta napiá yù ngámin nga ipakuá ni Namarò nikami, ta máwák na tolay nga ipasingan ta aggina yùmekatalà nga masserbi sù yápu na.

3 Á maguray lâ yù kagian naw nga meyannung sù áttarabákù, á paguráyák ku lâ, ta ari sikayu onu tanakuán nga tolay yù mamanunnù nikán, nu ari galâ yù Yápù. Á mássiki sikán, arák ku awayyá nga panunnután yù baggi.

4 Á awán ta ammù nga liwâ ku, ngam arák ku gapay ammu nu kuruk. Si Apu Kesu Kiristu nga Yápù, aggina galâ yù mamanunnù nikán.

5 Á yáyù nga arát tam laguk panunnután yù ira kábultur tam lage na ággo na. Ta sangaw nu duttál yù ággo na, manoli laguk si Apu Kesu, nga umay mamanunnù nittam ngámin nga tatolay. Á ipalappâ na sangaw yù ngámin nga kingngi-kingnguá tam nga inilímak tam, ánná yù aijan ta nonò tam nga arát tam kinagi. Á nu napiá yù kingnguá tam, á si Namarò yù maddáyaw ta katággitádday nittam ta meyannung sù kingnguá na.\*

6 Á wáwwagì, sikami kâ Apolo yù keyarigán nayù inibukalák ku, tapè gigiámmuan naw yù kebalináy nayù netúrâ sù bilin ni Namarò, ánná kurugan naw lâ yù netúrâ. Ta ari mayá nu mappeddaráyaw kayu ánná paddurúmán naw yù ira tatolay nga sinullà ni Namarò ta mangituddu nikayu. Arát tam laguk pilian yù táddy nga pakimorayát tam ánné sù táddy.

7 Ngattá, ta kagian naw ta aijan yù napiá nga pakáwayyá naw ánné sù ira kábultur naw? Á eggá panò yù pakáwayyá naw nga arán na galâ iniyawâ ni Namarò nikayu? Si Namarò gemma yù nangiyawâ nikayu! Ngattá, ta mappeddaráyaw kayu, nga kunnay ta yù baggi naw lápay yù paggapuán nayù pakáwayyá naw?

8 Aro, sikayu nga taga Korinto! Kagian naw ta kunnay ta maríku kayu! Kagian naw ta ammu naw ngámin ánná awán ta kiddawan naw nakuan kâ Namarò, nga iyawâ na nakuan nikayu. Á kagian naw ta makáawayyá kayin, nga kun na patul nga mepammaguray kâ Namarò sù páppatulán na, ngam sikami nga sinullà na nga minánggilayalayâ, ari paga. Á napiá nakuan nu kuruk nga patul kayu, tapè mepammaguray kami gapay nakuan nikayu.

9 Á yáyù kagiak ku gapu ta urè, á sikami nga sinullà ni Namarò nga minánggilayalayâ yù pinagukák na ánné ta ngámin, nga kunnay ta tatolay ira nga pagikaruan na kues, nga matay ta arubáng na aru nga tatolay. Á yù ira tatolay ta dabbuno ánná yù ira daroban ni Namarò gapay, gírawad da kami.

10 Á yù ira tatolay ta dabbuno nga ari mangikatalà kâ Apu, kagiad da ta molapá kami megapu sù panguruk mi kâ Apu Kesu Kiristu. Ngam sikayu, kagiad da ta masírik kayu, megapu sù pangikatalà naw kâ Apu! Á kagiad da ta makapi kami ánná ibiláng da kami ta tatolay nga awán ta pakáwayyá ra. Ngam kagiad da ta makáawayyá kayu ánná masikan kayu! Á yáyù nga pakimorayáda kayu. Ngam sikami, uyozungáda kami.

11 Á ta áddè kunangan, mabisin kami ánná mapangál, ánná napisipisil yù barawási mi. Á jígirigádat da kami, ánná awán ta paggianám mi.

12 Á bannagam mi yù baggi mi nga mattarabákù, tapè aijan yù pakkatole mi.† Á nu igagek da kami, ipakimállà mi lâ ira kâ Apu ta ikállà na ira lâ. Á nu jígirigádat da kami, attamám mi lâ.

13 Á nu lillibatad da kami, apiánám mi ira lâ. Á ta áddè kunangan, ibiláng da kami ta tatolay nga kagukábán nga awán bulubugá ta serbi na, ánná ipeyárik da kami ta kun na basúrá nga metababá.

14 Á ari yaw ipattúrâ ku nikayu, tapè mepasiránán kayu nakuan, nu ari galâ ta tabarangát takayu, tapè kánámmuán naw yù napiá nga tuppálam naw nakuan, ta sikayu yù kun na ánná ku nga iddukak ku.

15 Ta mássiki nu aru yù ira nga mangituddu nikayu ta meyannung sù panguruk naw kâ Apu Kesu Kiristu, á sikán lâ yù kun na yáma naw, ta sikán yù napolu nga mangilayalayâ sù bilin ni Namarò nikayu. Á gapu ta pangilayalayâ ku nikayu, inikatalà naw si Apu Kesu.

16 Á yáyù nga ikomá nikayu, sikán nga kun na yáma naw, ta párigán naw yù ággangnguâ.

17 Á yáyù nga dobak ku tán nikayu si Timotio. Aggina yù iddukak ku, nga kun na anâ ku nga mekatalà megapu sù pangikatalà na kâ Apu. Á ipanonò na nikayu yù napiá nga ipakuá ni Apu sù ira nga tumuttul kuna, nga naggittá sù napiá nga ituddù gapay su ira ngámin nga mangikatalà kâ Apu ta ngámin nga angayák ku.

18 Á aijan garè nikayu yù ira mappeddaráyaw, ta kagiad da ta aringâ umay mattúllun nikayu.

19 Ngam mabíkà nga umay nikayu, sangaw nu ure ni Apu Namarò, á masingak ku yù ira mappeddaráyaw, á ammù sangaw nu kuruk nga aijan yù pakáwayyá ra.

\* 4:5 Roma 2:16    † 4:12 Kingnguá 18:3

<sup>20</sup> Ta mepakánnámmu nu kuruk nga mesipà yù tolay sù pammagure ni Namarò, ari lâ megapu sù pagubobuk na, nu ari galâ megapu sù napiá nga akka-akkuán na, nga pangipasinganán na sù pakáwayyá ni Namarò.

<sup>21</sup> Á anni laguk panò yù ikáyâ naw nga akkuák ku sangaw nu umayà nikayu? Ta nu ari kayu mabbabáwi ánnna pallikuránán naw yù narákè nga akkuán naw, á et takayu sangaw pággangan. Ngam nu tukkatan naw yù narákè nga akkuán naw, á sangaw nu umayà, ipasingak ku lâ yù ángngiddù ku nikayu ánnna yù ángnganna-annè nikayu.

## 5

### *Yù Meyannung sù Tádday nga Liwâ da*

<sup>1</sup> Á neránuk garé ta aijan yù tolay nga mepaggagammung nikayu ta ákkimorayán naw, nga kitarákè yù akka-akkuán na. Á mássiki yù ira ari manguruk kâ Apu, arád da akkuán yù kunnian. Ta aijan kanu yù kabbulun naw nga inatáwa na yù atáwa nayù yáma na, nga massiúmán kuna.

<sup>2</sup> Á sikayu, ngattá ta mappeddaráyaw kayu lâ paga! Ngattá ta arán naw gammán yù tolay? Ari kayu nakuan mappeddaráyaw, nu ari galâ ta maraddam kayu nakuan! Papanáwan naw laguk sù paggagammungán naw yù tolay nga kunnian yù akkuán na!

<sup>3</sup> Á sikán, mássiki nu awánà tán nikayu, á kun na aijanà nikayu megapu sù pakanonò ku nikayu ánnna yù pangitubbuk ku sù túrâ ku nikayu. Á megapu ta pakáwayyá nga naggapu kâ Apu Kesu, kagiak ku nikayu yù pamagikárù sù tolay nga nalliwâ.

<sup>4</sup> Á pakalabbè nayù túrâ ku ta gián naw, maggagammung kayu laguk, ta mepulù nikayu si Apu Kesu Kristu, ánnna kunnay ta aijanakin lápay ta gián naw.

<sup>5</sup> Á megapu sù pakáwayyá ni Apu Kesu, itulù naw yane tolay sù pakáwayyá ni Satanás, tapè jíjirigátan na yù baggi na, abernu mabbabáwi sangaw nu majjigâ, ánnna meyígù yù ikararuá na sangaw nu duttál yù ággaw nga panoli ni Apu Kesu, nga umay mamanunnù ta tatolay.

<sup>6</sup> Á ari gemma napiá yù pappeddárayo naw. Arán naw panò ammu yù nakagi, nga "Mássiki nu babáddi yù áppalappák nga nekiruk ta pán, á luppák ngámín." Á yù kebalinán na yù passamâ nayù narákè, á mekanakanâ kayu ngámín sangaw sù narákè nga akkuád da.

<sup>7</sup> Irián naw laguk yù ngaw ággangnguá naw nga narákè, tapè pareku nga napiá yù akka-akkuán naw. Ta kuruk nga napakarenuán kayin, megapu sù pangikatalà naw kâ Apu Kesu Kristu. Ta netapil si Apu Kesu, nga nepárik sù kígaw na karneru nga neyátáng ngaw, nga kunnay ta iniyátáng nayù ira ngaw Kudio ta panaddamád da sù pattalebák nayù daroban ni Namarò nira, sù ánge na namapátat sù kakâ nga anâ nayù ira Egípto.

<sup>8</sup> Á ta papparád da ngaw sù pappiestá ra, pidde ra yù pán nga awán ta nekiruk kuna nga áppalappák na. Á sittam, á kunnian iriát tam laguk yù narákè nga akka-akkuát tam, tapè ari massamâ yù narákè nga kun na áppalappák ta pán. Á tuppálat tam yù ngámín nga napiá nga ipakuá ni Apu nittam, tapè mepagayyá sì Apu nittam, megapu sù napasigaggà nga pangikatalà tam ánnna yù panguruk tam kuna.

<sup>9</sup> Á pattúrá ku ngaw sù tanakuán nga túrâ ku nikayu, sinaddánát takayu ta ari kayu mepappupulù sù ira mangarallaw.

<sup>10</sup> Ngam arák ku kagian ta ari kayu mepabbulun sù ira mangarallaw nga ari manguruk kâ Apu, onu yù ira mokkuk, yù ira makkokò, ánnna yù ira makimoray ta sináddios. Ta ari máwayyá nga mesinná ittam sù ira tatolay ta dabbuno nga ari manguruk kâ Apu, gapu ta awán ta tanakuán nga paggianát tam nu ari lâ sawe dabbuno.

<sup>11</sup> Ngam initúrá ku nikayu ta ari kayu mepappupulù sù tolay nga makkagi ta wagi tam megapu ta panguruk na, nga narákè lâ yù akkuán na, nga mangarallaw, onu mokkuk onu makimoray ta sináddios, onu mabbébbék onu magillellaw onu makkokò. Ari kayu laguk mepappupulù sù tolay nga makkagi ta wagi tam, nga mangnuá karannian nga narákè. Á ari kayu mepallállang kuna.

<sup>12</sup> Á yù ira nga ari manguruk kâ Apu Kesu, ari ira gemma yù panunnutát tam, nu ari galâ yù ira kábolut fam nga manguruk kâ Apu.

<sup>13</sup> Ta si Namarò galâ yù mamanunnù sù ira ari mangikatalà kuna. Á sikayu, papanáwan naw laguk sù paggagammungán naw yù tolay nga mangnuá ta narákè, ta yáyù taddán ni Namarò nga netúrâ.

## 6

### *Yù Meyannung sù Pangikeká tam sù ira Kábolut tam*

<sup>1</sup> Á nu ajjan nikayu yù mamaliwâ sù kabbulun na nga mangikatalà kâ Apu, á ngattá, ta ikeká na ta arubáng na kues nga ari mangikatalà kâ Apu? Ipapanunnù naw galâ nakuan sù ira kábulun naw nga tatole ni Namarò.

<sup>2</sup> Arán naw panò ammu ta sangaw nu pagáddekan na ággaw, á sittam nga tatole ni Namarò yù mamanunnù? Á panunnutát tam yù ira ngámin nga tatolay nga ari manguruk kuna. Á gapu ta yáyù ipakuá ni Namarò nittam, arát tam panò máwayyá nga panunnután yù ira kábulut tam nga mangikatalà kâ Apu, nu ajjan yù baddì nga áddumá ra ta nonò da?

<sup>3</sup> Á arán naw panò ammu gapay ta sittam nga manguruk kâ Apu yù mamanunnù sangaw sù ira daroban ni Namarò ta lángi? Á pappanganâ lâ sù meyannung ta ággiát tam sawe dabbung!

<sup>4</sup> Á nu ajjan nikayu yù mangikeká ta kabbulun na, á ngattá, ta en naw ipapanunnù sù ira tatolay nga ari mebilang sù ira kábulun naw nga mangikatalà kâ Apu?

<sup>5</sup> Aro! Mappasirán kayu nakuan megapu sù akka-akkuán naw! Awán panò ta tádday nikayu nga masírik, nga ammu na yù mamanunnù ánná yù mamakkakápiá sù ira kábulut tam nga manguruk?

<sup>6</sup> Ngam sikayu, makkakákeká kayu ta arubáng nayù kues nga ari mangikatalà kâ Apu, sikayu nga mawwwawági megapu sù pangikatalà naw!

<sup>7</sup> Á liwâ nawin gapay yù pakkakákeká naw. Más napiá nu attamán naw nakuan yù narákè nga akkuán na nikayu nayù kabbulun naw. Á mássiki nu suitikan na kayu, paguráyán naw lâ nakuan.

<sup>8</sup> Ngam sikayu galâ yù mangilogò ánná yù massuití! Á yù ira kábulun naw nga mangikatalà kâ Apu yù ilogò naw ánná yù suitikan naw!

<sup>9</sup> Arán naw panò ammu ta ari mesipà sù pammagure ni Namarò yù ira tatolay nga mangupù nga mangnuá ta narákè? Ari kayu laguk makilogò sù ira makkagi ta ari kuruk. Ta yù ira tatolay nga meruruk sù arán na atáwa, onu yù ira makimoray ta sináddios, onu yù ira mangarallaw ánná makikarallaw, yù ira mangnuá ta narákè sù kagittá na nga laláki onu babay, ari ira mesipà sù pammagure ni Namarò.

<sup>10</sup> Á kunnian gapay sù ira mattukkam, onu yù ira mokkuk, onu yù ira magillellaw, onu yù ira mamaraparákè, onu yù ira makkokò, ari ira mesipà sù pammagure ni Namarò.

<sup>11</sup> Á yù ira káruán nikayu, kunnian ngaw yù kingnuá ra. Ngam kunangane, napakomá kayin, á napakarenuán kayin, nga mangilin megapu sù pinalurò ni Apu Kesu Kiristu ánná megapu sù pakáwayyá nayù Ikararuá ni Namarò. Á pinabbalin na kayin ni Namarò ta ána na, nga ibilang na ta matunung.

*Akkúát tam lâ yù Napiá, tapè Meparáyaw si Namarò*

*Roma 14:13-23; 1 Korinto 8:7-13; 10:23-33*

<sup>12</sup> Á naginná naw yù nakagi, nga kud da, "Maguray lâ yù ikáyâ tam nga akkuán, yáyù awayyá tam nga akkuán, nu arát tam liwatan yù tunung." Wan. Ngam kagiak ku nikayu ta ari mabbalin ta kapiánat tam yù ngámin nga ikáyâ tam nga akkuán. Á yáyù nga mássiki nu ari mepugik nikán yù ikáyâ ku, á gaggarak ku galâ yù baggi, marakè aripanan nangá nayù pakkaraga ku.

<sup>13</sup> Á naginná naw gapay yù nakagi, nga kud da, "Napadday yù kanan, tapè kanat tam, á napadday gapay yù gutù tam, tapè ajian yù paggianán na kanat tam." Wan. Ngam kagiak ku nikayu ta sinullà ni Namarò yù pagáddekan nayù serbi nayù gutù tam ánná kanat tam, á awán ira sangaw. Á yá ipappadde ni Namarò ta baggi tam, nga ari ta mangarallaw, nu ari galâ tapè dayáwat tam si Apu Kesu Kiristu, ánná palurotat tam yù ipakuá na nittam. Ta si Apu Kesu Kiristu galâ yù máwák tam, nga mammaguray nittam.

<sup>14</sup> Á pinaginnanole ni Namarò si Apu Kesu Kiristu, á paginnanolayan na ittam gapay sangaw, megapu sù pakáwayyá na nga mamagaddáti.

<sup>15</sup> Á arán naw panò ammu ta sittam nga mangikatalà kâ Apu Kesu Kiristu, nepattatáddyittamin kâ Apu, nga kunnay ta sittam yù baggi na? Á gapu ta kunnian yù ággiát tam, arát tam laguk awayyá nga umay metáddy sù narákè nga babay.

<sup>16</sup> Arán naw panò ammu ta nu umay yù tolay meruruk sù makikarallaw, á kunnay ta tádday lâ yù baggi ra? Ta yawe inipeturâ ni Namarò, "Yù ira duá, kunnay ira ta tádday lâ."\*

<sup>17</sup> Ngam sittam nga mangikatalà kâ Apu Kesu, netáddy yù nonò tam ta nonò na, megapu sù Mangilin nga Ikararuá na nga maggián nittam.

<sup>18</sup> Ari kayu laguk mangarallaw. Arayyuán naw yù mangapà nikayu ta mangarallaw. Ta narákè yù liwâ nayù tolay nga mangarallaw, ánné sù ira ngámin nga liwâ na tolay, gapu ta pakaliwatán na lápay yù baggi na.

\* **6:16** Genesis 2:24

<sup>19</sup> Arán naw panò ammu ta kun na bale nayù Mangilin nga Ikararuá yù baggi tam, ta jinok ni Namarò yù Ikararuá na nga maggián ta baggi nayù ira nga mangikatalà kuna. Á yáyù nga arát tam kukuá yù baggi tam, ta si Namarò yù makákuá ta baggi tam.<sup>†</sup>

<sup>20</sup> Nonopat tam laguk yù inipappagá ni Apu Kesu ta pagikáru na ta liwá tam, tapè tatole na ittam. Á iyuás tam laguk yù baggi tam nga manuppál sù napiá, tapè meparáyw si Namarò megapu nittam.

## 7

*Yù Meyannung sù ira Magatáwa*

*Matiu 5:31-32; 19:3-9; Markus 10:2-12; Lukas 16:18*

<sup>1</sup> Á ta meyannung sù iniyabbú naw ta pattúrâ naw ngaw nikán, á yawe yù itabbák ku nikang. Napiá nu ari mangatáwa yù tolay.

<sup>2</sup> Ngam gapu ta malogon yù tolay nga mápà ta malliwâ, á napiá nu ajjan sù katággitáddy yù atáwa na lápay.

<sup>3</sup> Á yù ira magatáwa, napiá nu makká-upu-upù ira nga manuppál sù pagatáwa ra, ta jikkù nu manakì yù tádday nga meruruk sù atáwa na.

<sup>4</sup> Ta ari yù babay yù mammaguray sù baggi na, nu ari lâ yù atáwa na yù mammaguray kuna. Á kunnian gapay sù laláki, ari mammaguray sù baggi na, nu ari lâ yù atáwa na yù mammaguray kuna.

<sup>5</sup> Arán naw laguk panakitán yù ikáyâ nayù atáwa naw. Ngam nu nattatáddy yù nonò naw nga ari kayu lábbi maddiruk ta pígiá nga ággaw, tapè tángngagan naw yù pakimállà naw kâ Apu, á napiá yian. Á ta pappasá nayù ira ággaw nga pakimállà naw, á maddiruk kayu má laguk, maraké kagumánan na kayu ni Satanas, gapu ta arán naw magaggarán yù karagatán naw.

<sup>6</sup> Á kinagi nikayu ta máyâ nu magatáwa kayu, ngam arák ku initaddán.

<sup>7</sup> Á ta urè, más napiá nu mepárik yù tolay nikán nga ari mangatáwa. Ngam ammù ta iniyawâ ni Namarò nittam nga katággitáddy yù pakáwayyá na nga makkakerumá.

<sup>8</sup> Á sikayu nga ari paga nagatáwa ánnna sikayu nga nabálu, yawe yù kagiak ku nikayu. Napiá nu maggián kayu lá nga kunnay nikán nga ari mangatáwa.

<sup>9</sup> Ngam nu arán naw magaggarán yù pakkaragâ nayù baggi naw, á mangatáwa kayu laguk, ta más napiá nu magatáwa kayu, ánnne sù pannononò naw sù karagatán na baggi naw.

<sup>10</sup> Á yawe yù kagiak ku sù ira magatáwa, nga ari lâ yù taddák ku, nu ari galâ yù taddán ni Apu Kesu, nga ari nakuan mesinná yù babay sù atáwa na.

<sup>11</sup> Ngam ta ángngarigán nu panawán nayù babay yù atáwa na, ari laguk makiatáwa ta tanakuán, nu ari galâ ta makikapiá sù ngaw atáwa na, ánnna mattoli kuna. Á yù laláki, arán na nakuan igúngay yù atáwa na.

<sup>12</sup> Á sikayu nga káruán, yawe yù kagiak ku nikayu, nga urè lápay, gapu ta awán ta kinagi ni Apu Kesu nga meyannung karanniaw. Á ta ángngarigán, nu ajjan yù laláki nga mangikatalà kâ Apu Kesu, ngam ajjan yù atáwa na nga ari mangikatalà kâ Apu. Á mássiki nu ari manguruk yù babay, nu ikáyâ na maggián sù atáwa na nga manguruk, á arán na nakuan igúngay na laláki yù atáwa na.

<sup>13</sup> Á kunnian gapay nu ajjan yù babay nga mangikatalà kâ Apu Kesu, ngam ari mangikatalà kâ Apu yù atáwa na. Nu ikáyâ nayù laláki nga maggián sù atáwa na nga manguruk, á arán na laguk igúngay.

<sup>14</sup> Ta yù laláki nga ari manguruk, á ibiláng ni Namarò ta kunnay ta tole na gapay, megapu sù keppattádde na sù atáwa na nga mangikatalà kâ Apu. Á kunnian gapay sù babay nga ari manguruk, nga netáddy sù atáwa na nga mangikatalà kâ Apu Kesu. Ta nu ari kuruk yian, á mebiláng yù ira ánnâ da ta kunnay sù ira ánnâ nayù ira nga ari manguruk. Ngam mangilin ira gemma, nga mesipá sù ira tatole ni Namarò.

<sup>15</sup> Ngam ta ángngarigán nu ajjan yù táddy nga ari manguruk kâ Apu, nga ikáyâ na igúngay yù atáwa na nga mangikatalà kâ Apu, á massinná ira laguk, tapè ari ira maddamá. Á mapalubbángin yù táddy nga mangikatalà kâ Apu, gapu ta ikáyâ ni Namarò ta magimammà ira.

<sup>16</sup> Á sikaw nga babay nga mangikatalà kâ Apu, napiá nu maggián ka sù atáwam, abernu mabbabáwi sangaw megapu sù napiá nga ipasingam mu, á mangikatalà gapay kâ Apu, tapè meyígù. Á sikaw nga laláki nga mangikatalà kâ Apu, napiá gapay nu maggián ka sù atáwam,

abernu mabbabáwi sangaw megapu sù napiá nga ággangnguám kuna, á mangikatalà gapay kâ Apu, tapè meyígù.

*Arát tam Patalián yù Áaggiát tam*

17 Á yawe yù taddák ku sù ira ngámin nga mangikatalà kâ Apu, nga maggagammung ta makkakerumá nga lugár da. Maguray lâ yù áaggiát tam ánná yù pakáwayyá tam ta pagágál ni Namarò nittam ta mangikatalà kuna, yáyù arát tam patalián nu arát tam galá uputan.

18 Á ta ángngarigán, nu nakugì yù tolay lage na nangikatalà kâ Apu Kesu, á arán na laguk irián yù yakugì na. Á nu ari nakugì yù tolay ta pagágál na kuna ni Apu, á maggián lállaguk nga ari nakugì.

19 Ta mássíki nu nakugì yù tolay onu ari nakugì, awán ta kuentá na. Ta yá lâ importá yù panuppál tam sù itaddán ni Namarò nittam.

20 Á yáyù nga maggián ittam laguk sù áaggiát tam ta pamegapu tam mangikatalà kâ Apu.

21 Á ta ángngarigán nu aripan ka ngaw, uputam mu laguk yù pakiaripam mu. Ngam nu aijan yù awayyám nga mapalubbáng sù pakiaripanám mu, á napiá gemma. Alawatam mu laguk yù kapalubbáng mu.

22 Ta arán na paddurúmán ni Namarò yù tolay nga aripan ánná yù tolay nga makáwayyá, nga ari makiaripan. Á ta ánnunganán ni Apu Namarò, tole na nga napalubbángin yù aripan nga mangikatalà kâ Apu Kesu Kiristu. Á yù tolay nga makáwayyá, nga ari makiaripan ta tolay, nabbbái laguk ta aripan ni Apu Kesu, gapu ta pakiyápu na kâ Apu Kesu.

23 Á tatole na kayu ni Apu Namarò, nga nanginá, gapu ta inipappagá na yù inángà nayù tátádday nga Anâ na, si Apu Kesu Kiristu, tapè palubbángan na kayu. Ari kayu laguk makiaripan sù ira tatoley nga mangituddu sù ure ra lápay, ta aijanin yù Yápu naw, si Namarò.

24 Á yáyù, wáwwagi, maggián kayu laguk nga katággítádday sù áaggián na ta pamegapu na tumuttul kâ Namarò, ánná uputan naw gapay yù pakiyápu naw kâ Namarò.

*Yù Meyannung sù ira ari paga Nangatáwa ánná yù ira Nabálu*

25 Á ta meyannung sù ira nga ari bulubugá nangatáwa, awán ta ammù nga kinagi ni Apu Kesu nga meyannung sù áaggiád da. Ngam yawe yù kagiak ku ta uré lápay, á sikán yù mekatalà, megapu sù pangíkallá ni Apu nikán.

26 Á gapu ta mappanà nga majjigá ittam, á napiá ta uré nu maggián ittam sù dán nga áaggiát tam.

27 Á ta ángngarigán, sikayu nga aijan yù atáwa na, á ari kayu laguk massinná. Á sikayu nga awán ta atáwa na, arán naw laguk karagatán nga mangatáwa.

28 Ngam nu magatáwa kayu, á ari gemma liwâ. Ngam ta uré, más napiá nu ari kayu mangatáwa, tapè arán naw maparubán yù jigá nga umay ta ngámin nga naggagáttáwa.

29 Á yawe ipanonò ku nikayu, wáwwagi. Mabì ittamin nga maggián sawe dabbuno, nga aijan yù awayyá tam nga masserbi kâ Apu. Á yáyù, sikayu nga aijan atáwa na, tángngagan naw yù ipakuá ni Apu nikayu, ta kunnay sù panánggák nayù tolay nga awán ta atáwa na.

30 Á kunnian gapay sù ira maraddam, onu magayáyâ, onu yù tolay nga gumátáng ánná yù tolay nga awán ta kukuá na. Arát tam laguk tángngagan yù karaddam tam ánná pagayáyâ tam, á arát tam ikaburung yù eggá nittam onu yù awán, tapè matángngák tam yù passerbi tam kâ Apu.

31 Á napiá nu aláppaw yù panangngal tam sù eggá nittam ta dabbuno. Ta awán ta áddumá na, nu málâ tam yù aru sawe dabbuno onu yù baddì lâ yù málâ tam, ta mabíkin mappasá yù áaggián nayù dabbuno.

32 Á ikáyâ ku ta awán ta ikaburung naw. Á yù tolay nga awán ta atáwa na, tángngagan na yù ipakuá ni Apu kuna, tapè magayáyâ si Apu megapu sù akkuán na.

33 Ngam yù tolay nga aijan yù atáwa na, tángngagan na yù áaggiád da kâ atáwa na, tapè magayáyâ yù atáwa na.

34 Á yáyù nga ari magimammà yù nonò na, ta tángngagan na galâ yù áttole ra ta dabbuno, ngam ikáyâ na nga tángngagan nakuan gapay yù ipakuá ni Apu kuna. Á yù babay nga awán ta atáwa na, tángngagan na lâ yù ipakuá ni Apu kuna, tapè magayáyâ si Apu megapu kuna. Ngam yù babay nga aijan yù atáwa na, tángngagan na lâ yù ikáyâ nayù atáwa na, nu kunnasi gapay yù pamagayáyâ na kuna.

35 Á kinagi yawe nikayu, gapu ta ikáyâ takayu abbágán. Arát takayu gaggarán, nu ikáyâ naw mangatáwa. Ngam ikáyâ ku ta napasigaggà yù ángngiddù naw kâ Apu, ánná tángngagan naw ta napiá yù ipakuá ni Apu nikayu, nga awán ta pakataláttanán na.

<sup>36</sup> Á ta ángngarigán nu ajjan yù ira nattarátu, á kagian nayù laláki ta arán na magaggarán yù karagatán na baggi na, á nepatalugáring ta naparánin yù babay nga makiatáwa, á magatáwa ira laguk, ta arád da gemma liwâ nu magatáwa ira.

<sup>37</sup> Ngam nu nattatáddy yù nonò da, ánnna napasigaggà yù ure ra nga ari ira magatáwa, á nu máwayyá nayù laláki nga igaggak yù karagatán na baggi na, á napiá gapay nu ari ira magatáwa.

<sup>38</sup> Á yáyù nga napiá nu mangatáwa yù laláki sù magingánay nga katarátu na. Ngam más napiá nu ari mangatáwa.

<sup>39</sup> Á yù babay nga mangikatalà kâ Apu, arán na awayyá nga makiatáwa ta tanakuán, nu matolay lâ paga yù atáwa na. Ngam nu natayin yù atáwa na, awayyá nen nga makiatáwa nu ikáyâ na. Ngam yá lâ pakiauwán na yù laláki nga mangikatalà gapay kâ Apu.

<sup>40</sup> Ngam ta urè, más magayáyá yù nabálú nu arán nen pidduán makiatáwa. Á ari lâ negapu ta nonò ku támma yù kagiak ku, nu ari gapay negapu sù ure nayù Mangilin nga Ikararuáu.

## 8

*Yù Meyannung sù Kanan nga Meyátáng ta Sináddios  
Roma 14:13-23; 1 Korinto 6:12-20*

<sup>1</sup> Á yawe yù itabbák ku sù iniyabbû naw nga meyannung sù meyátáng ta sináddios, nu ajjan yù awayyá tam nga kanan. Á kuruk yù kinagi naw gemma, nga sittam ngámin nga mangikatalà kâ Apu, ammu tam ta awán ta pakáwayyá nayù ira sináddios. Ngam yawe yù kagiak ku. Ajjan yù ira kábulut tam nga manguruk, nga mabbábágang paga ta meyannung sù ira sináddios. Á ari ira mábbágán megapu sù ammu tam, nu mappeddaráyaw ittam ánnna motun yù nonò tam. Ngam nu kuruk nga iddukat tam ira, á mábbágán ira, ánnna mapasigaggà yù pangiddù da kâ Apu.

<sup>2</sup> Á nu mappeddaráyaw yù tolay gapu ta kagian na ta aru yù ammu na, arán na paga ammu yù kuruk nga mepánggà sù ira mangikatalà kâ Apu.

<sup>3</sup> Ngam yù tolay nga kuruk nga mangiddù kâ Namarò, aggina yù ammu ni Namarò ánnna ibiláng na ta tole na.

<sup>4</sup> Á ta meyannung sù awayyá tam nga kumán sù neyátáng ta sináddios, á kunnay sù kinagi, ammu tam ta kuruk nga ari matolay yù ira sináddios nga pangiyátangád da. Á ammu tam ta awán ta tanakuán nga pakiyápuát tam, nu ari lâ yù táttáddy ngá Yápu tam nga matotolay.

<sup>5</sup> Á mássiki nu aru yù ira nga kagian na tatolay ta dios da ta lángi ánnna dabbuno, ánnna aru yù ira pidde ra nga pakiyápuád da,

<sup>6</sup> ngam sittam, táttáddy lâ yù pakimorayát tam, nga si Namarò nga Yáma tam. Aggina yù paggapuán na ngámin nga ajjan ta dabbuno ánnna lángi. Á iniyawâ na nittam yù áttolé tam, tapè palurotat tam yù ipakuá na nittam. Á táttáddy lâ yù pakiyápuát tam, nga si Apu Kesu Kiristu. Aggina yù namarò ta ngámin, ta inipaparò ni Namarò yù ngámin kuna. Á matolay ittam megapu kuna.

<sup>7</sup> Ngam yù ira káruán nga kábulut tam nga mangikatalà kâ Apu, arád da paga kánnámmuán ta awán ta pakáwayyá nayù ira sináddios. Á lage ra nanguruk kâ Apu, napenám ira nga makimoray ta sináddios nga kunnay ta matolay ira. Á yáyù, nu kumán ira ta neyátáng ta sináddios, á maburung ira, gapu ta kagiad da ta makaliwâ iren.

<sup>8</sup> Ngam ari gemma yù kanat tam yù gapu na nga ikállà na nittam ni Namarò. Á maguray lâ yù kanat tam, á arát tam liwâ nu arát tam kanan, ánnna arát tam kapiánán nu kanat tam.

<sup>9</sup> Magimuguk kayu laguk, sikayu nga makáwayyá nga kumán megapu sù ángngikatalà naw, marakek malliwâ yù kabbulun naw nga makapi paga yù ángngikatalà na kâ Apu, megapu sù pakkákán naw ta neyátáng.

<sup>10</sup> Ta nu masining na kayu nga me pallálláng sù bale nayù ira sináddios, á mappelò nga umay gapay tán nga kumán ta neyátáng, mássiki nu kagian na ta liwâ na.

<sup>11</sup> Á megapu sù ammu naw, á makaliwâ laguk yù kabbulun naw nga makapi paga yù ángngikatalà na kâ Apu, nga tolay nga naketapilán na gapay ni Apu Kesu Kiristu.

<sup>12</sup> Á nu nakaliwatán naw yù kabbulun naw nga makapi paga yù ángngikatalà na, nakaliwatán naw gapay si Apu Kesu Kiristu.

<sup>13</sup> Á yáyù nu ajjan yù wagì nga makaliwâ nakuan megapu sù pakkákán ku ta neyátáng, á arák ku laguk bulubugá kanan yù neyátáng, tapè awát ta tolay nga makaliwâ kâ Apu megapu nikán.

## 9

*Yù Mepángngà nga Akkuán nayù Minángngilayalayâ*

*2 Korinto 11:7-12; 1 Tessalonika 2:7-9*

<sup>1</sup> Á yawe ipanonò ku sù ira mamaliwâ nikán. Awán ta tolay nga mangaripan nikán. Á sikán gapay yù nabbilinán ni Apu Kesu, nga mangilayalayâ. Á nasingak ku gemma si Apu Kesu nga Yápu tam, ta nappasingan nikán. Á gapu ta pangikatalà naw kâ Apu Kesu, sikayu yù nabbilinán nayù ipatrabáku nayù Yápu nikán.

<sup>2</sup> Á mássiki nu aijan yù ira makkagi ta arán nangâ sinullà ni Apu nga minángngilayalayâ, ngam sikayu nga taga Korinto yù pamakurugán ta nabbilinán nangâ ni Apu Kesu, gapu ta inikatalà naw si Apu Kesu megapu sù pangilayalayâ ku.

<sup>3</sup> Á nu aijan yù ira nga mangiyabbû nikán ta meyannung sù pakáwayyá mi kâ Bernabe, kunniaw yù itabbák ku nira.

<sup>4</sup> Ari panò mepángngà nu sikayu nakuan yù pangápám mi ta mówák mi nga kanan ánná inumam mi? Ngam arám mi apan.

<sup>5</sup> Á ari panò mepángngà nakuan nu mangatáwa kami sù babay nga mangikatalà kâ Apu, nga mepulù nakuan nikami sù ngámín nga angayám mi nga mangituddu, ta kunnay sù ira kárúan nga minángngilayalayâ, ánná si Eduru, ánná yù ira wáwwagi ni Apu Kesu?

<sup>6</sup> Á matunung panò ta sikami lâ kâ Bernabe yù mangallu ta pakkatole mi? Ngam táddanán naw yù ira kárúan nga minángngilayalayâ.

<sup>7</sup> Á ta ángngarigán, eggá panò yù suddálú nga umay makigerrá, nga aggina lápay yù mamalattuák sù pakkatole na? Awán. Á eggá panò yù mammulá nga arán na kanan yù bungá nayù inimulá na? Kanan na gemma! Á yù manaron ta ayám, yáyù gemma gapay yù paggaguán nayù pakkatole na.

<sup>8</sup> Á negagángay gemma sù ira mattarabáku, ta apad da yù pakkatole ra sù ira pattarabakuád da. Á ari lâ negapu ta nonò na tolay yane nga kinagi nikayu, nu ari gapay negittá sù tunung ni Namarò nga bibbirat tam.

<sup>9</sup> Yawe yù inipetúrâ ni Namarò kâ Moyses: “Arán naw bussalán yù simù na báka nga magaggì ta ammay, tapè awayyá na lâ kumán.”\* Á ta panaddán ni Namarò kuna, yù báka panò yù ninonò na?

<sup>10</sup> Ari gemma, nu ari galâ sittam nga tatolay yù kebalinán nayù kinagi ni Namarò, tapè magayyá ittam nga mattarabáku, gapu ta aijan yù iddanamát tam nga málâ tam yù balle tam, maguray lâ yù tarabáku tam, nu magarádu onu maggaták.

<sup>11</sup> Á sikami, meyárik kami ta mammulá, ta inrilayalayâ mi yù bilin ni Namarò nikayu, nga kunnay ta inimulá mi ta nonò naw yù napiá nga pammakapián naw. Á ari panò mepángngà nu málâ mi yù pakkatole mi nga maggagu nikayu?

<sup>12</sup> Á nu aijan yù awayyá nayù ira kárúan nga mangituddu nga mangâ sù balle ra nga maggagu nikayu, á nepatalugáring laguk nikami. Ngam sikami, awán bulubugá ta nálâ mi nikayu. Á mássiki nu marigâ yù ággíam mi, inattamám mi lâ. Á mattarabáku kami ta tanakuán nga pagalerám mi ta pakkatole mi, tapè ari megaggak yù passamâ nayù napiá nga dámak nga meyannung kâ Apu Kesu Kiristu.

<sup>13</sup> Á ammu naw támma ta yù ira tatolay nga mattarabáku sù mangilin nga bale ni Namarò tuke ta Jerusalem, á meyawâ nira yù kanad da. Á yù ira pári nga mangiyátang ta ayám kâ Namarò, apad da gapay yù balle ra sù neyátang, nga kanad da.

<sup>14</sup> Á kunnian gapay sù ira nga mangilayalayâ sù napiá nga dámak, ta initaddán ni Apu Kesu ta meddán ira ta pakkatole ra, nga maggagu sù ira tudduád da.

<sup>15</sup> Ngam sikán, mássiki nu aijan yù awayyá nga apan yù mówák ku sù ira tudduád ku, ngam aringâ nakitáddán. Á pattúrâ ku nikayu kunangan, ari yian yù ipattúrâ ku. Ta más napiá ta uré nu matayá lápay ta bisik ku, ánné ta kári nayù ipagayyá ku ánná ipappeddaráyó ta arák ku apan yù pakkatole nikayu.

<sup>16</sup> Á awán ta awayyá gemma nga ipappeddaráyaw yù pangilayalayâ ku sù napiá nga dámak, gapu ta yáyù ipakuá ni Namarò nikán, nga mówák nga palurotak ku. Á kábbingâ lâ nu arák ku nakuan tuppálan.

<sup>17</sup> Á nu megapu sù uré lápay yù pangilayalayâ ku sù napiá nga dámak, á apak ku nakuan laguk yù táddák ku. Ngam si Namarò yù nanullà nikán, á yáyù nga tuppálak ku yù tarabáku nga inikatalà na nikán.

\* 9:9 Deuteronomio 25:4

<sup>18</sup> Á anni laguk yù bálà ku, nu ari galá yù pagayáyá ku gapu ta aringà naktáddán nikayu ta pangilayalayâ ku sù napiá nga dámak, mássiki nu awayyâ nakuan nga apan yù táddák ku nikayu.

<sup>19</sup> Á gapu ta awán ta tolay nga manáddán nikán, awán laguk ta mangaripan nikán. Ngam mabbaluntáriungà nga makiaripan ta ngámin nga tatolay, tapè aru yù ira mapatuttul ku kâ Apu Kesu Kiristu.

<sup>20</sup> Á nu maggiánà sù ira Kudio, tuttulak ku laguk yù kustombare ra, tapè aru yù ira mapatuttul ku kâ Apu Kesu Kiristu. Á mássiki nu arák kin mapagikáru megapu sù tunung ni Moyses, á tuttulak ku galâ, tapè málâ ku yù awayyâ nga mangituddu sù ira nga tumuttul sù tunung.

<sup>21</sup> Á kunnian gapay nu maggiánà sù ira tatolay nga ari Kudio, á tuttulak ku galâ yù kustombare ra. Á gapu ta arád da tuttulan yù tunung ni Moyses, á arák ku gapay tuttulan, ngam arák ku gemma liwatan yù tunung ni Namarò, gapu ta tuttulak ku yù taddán ni Apu Kesu Kiristu. Á keggâ nira, kunnayà gapay ta ari Kudio, tapè ginnád da gapay yù ituddù nga meyannung kâ Apu Kesu Kiristu, ánná ikatalâ da gapay.

<sup>22</sup> Á nu maggiánà sù ira nga ari paga mapasigaggà yù ángngikatalà da kâ Apu Kesu Kiristu, á arák ku akkuán yù kagiad da nga liwâ, mássiki nu ammu ta ari kuruk nga liwâ, tapè mapasigaggà yù ángngikatalà da megapu sù pangituddu nira. Á kunnian gapay yù akkuák ku ta paggiák ku sù ira ngámin nga makkakerumá nga tatolay. Tuttulak ku gapay yù napiá nga ággangnguá ra, tapè ajjan yù ira mapatuttul ku, nu magginná ira sù ituddù nga meyannung kâ Apu Kesu.

<sup>23</sup> Á yá ipangnguá karannian, ta ikáyâ ku ta meparámak yù pangiyígù ni Apu Kesu Kiristu sù ira tatolay, tapè aru yù ira nga mangikatalà nga mesipà kuna. Á ikáyâ ku gapay ta mesipakà sù pammakapián nayù ira ngámin nga mangruk sù napiá nga dámak.

### Párigát tam yù Panalákkuruk nayù ira nga Mappariká

<sup>24</sup> Á ammu naw gemma ta nu ajjan yù ira nga mappariká, á táddy lâ yù mangappù nira, nga meddán ta bálà na. Á yáyù nga aggira ngámin nga katággítáddy, ipe na yù urà na nga makkarerá, tapè aggina yù mangappù. Á sittam nga kunnay nira, ipe tam laguk yù urà tam nga mamacaré sù ipakuá ni Apu nittam, tapè málâ tam yù bálà tam.

<sup>25</sup> Á yù ira tatolay nga mappariká sangaw, paguráyád da yù karagatád da, ta passikanad da yù baggi ra, tapè dán nga naparán ira nga makkarerá. Á yù táddy nga mangappù, yá bálà na yù kuroná na nga lappáw, nga mabi lâ malelay. Á yáyù keyarigát tam, sittam nga mangikatalà kâ Apu Kesu Kiristu. Ngam yù bálà tam nga meyawâ nittam yù áttole tam nga awán ta áddé na.

<sup>26</sup> Á síkán, arák ku akkuán yù awán ta serbi na, ngam kunnayà ta makipariká nga daretiu yù pakkarerá na nga ari mekáttuay. Á ta pangilayalayâ ku, kunnayà ta manultù, nga arán na sultukan yù paddák, nu ari galâ ta daretiu nga makanná yù sultukan na. Ta makanná yù ubobuk ku sù ira pangilayalayaták ku sù bilin ni Apu.

<sup>27</sup> Á tudduák ku yù baggi, tapè arák ku akkuán yù naráké. Á palurotak ku yù ngámin nga ipakuá ni Apu nikán, marakè aringà nakuan meddán ta bálà ku, mássiki nu sikán yù nangilayalayâ sù napiá nga dámak sù ira tatolay.

## 10

### Mepugik nittam yù Makimoray ta Sináddios

<sup>1</sup> Á wáwwagi, ipasigaggà tam laguk yù panguruk tam kâ Namarò, tapè arán na patukkatan yù ángngabbák na nittam. Ta ipanonô ku nikayu yù nesimmu ngaw sù ira ngaw Kudio nga naggaká nittam, ta panuttul da kâ Moyses. Sinaronán ni Namarò ira ngámin, á nalipparán ira ngámin sù kunam nga nepulù nira, ta pangabbák na nira sù pallakák da ta kalállamatán. Á nappatalay ira ngámin sù namágá nga dabbun ta tangngá nayù bebay nga mangngágan ta Ujjojin, ta paddáki da ngaw nga umay ta dammáng.

<sup>2</sup> Á megapu ta panuttul da kâ Moyses, á kunnay ta narigú ira sù kunam nga nepulù nira ánná yù bebay, ta paddáki da ngámin ta bebay. Á yáyù panákkilalán ta aggira yù patuttul ni Moyses.\*

<sup>3</sup> Á nesipà ira ngámin gapay sù manna, nga kanan nga iniyawâ ni Namarò nira,

4 ánnna nesipà ira ngámin gapay sù danum nga inipenum ni Namarò nira. Mininum ira ngámin ta danum nga pinallawán ni Namarò sù batu. Á yù batu yù keyarigán ni Apu Kesu Kiristu, ta nepulupulù si Apu Kesu nira.

5 Á mássiki nu kunnian yù ángngiddù ni Namarò nira ngámin, ari nagayáyâ si Namarò sù ira káruán, gapu ta ari ira nanguruk. Á yáyù nga aru yù ira námmatay ta kalállammatán.

6 Á dannian nga nesimmu nira ngaw yù inipetúrâ ni Namarò, tapè magimuguk ittam laguk ánnna arát tam karagatán yù narákè nga kunnay sù kingnguá ra.

7 Ta yù ira káruán, nakimoray ira ta sináddios, nga pidde ra. Ammu tam yaw, gapu ta bibbirat tam yù dán nga netúrâ nga kunniauw, "Nepalálláng ira ánnna mininum ira sù neyátang ta sináddios da. Á kabalid da kiminán, gimikkáng ira nga nattatála, ánnna maguray lâ yù kingngikingnguá ra nga narákè."† Arán naw laguk pakimorayán yù ira sináddios.

8 Á arát tam akkuán yù narákè nga kunnay sù kingnguá ra. Ta duápulu ta tallu nga ribu yù natay nira ta tangággaw lâ, negapu sù pangarallo ra.

9 Á arát tam parubán yù pagattam ni Apu nittam, ta kunnay sù kingnguá nayù ira káruán. Ta aru nira yù námmatay negapu sù pakkagâ nayù ira íráw nga maritá.

10 Á ari ittam maddagaragim ta meyannung sù ure ni Namarò, ta kunnay sù kingnguá nayù ira káruán, ta yáyù nga pinapáte na ira nayù namapátya nga jinok ni Namarò.

11 Á nesimmu ngámin danniaw sù ira ngaw naggaká nittam, tapè mepasingan yù pamággáng ni Namarò sù ira nga mangnguá ta kunnay sù kingnguá ra. Á netúrâ, tapè bibbirat tam ánnna magimuguk ittam nga ari mamárik nira, ta maddaggunin duttál yù pagáddekan na ággaw, nga pamanunnù ni Namarò sù ira ngámin nga tatolay.

12 Á yáyù nu ajjan yù tolay nga kagian na ta ari tumulù sù mangapà kuna nga mangnguá ta narákè, megapu sù napasigaggá nga ángngikatalà na, á magimuguk laguk, maraké mekanakanâ sangaw sù ira mangnguá ta narákè, á akkuán na gapay.

13 Ta awán ta tanakuán nga palliwtán naw, nu ari galâ yù negagángay nga palliwâ nayù ira ngámin nga tatolay. Ngam mekatalà si Namarò nga mangabbák nikayu, á arán na anugutan yù mangapà nikayu ta malliwâ, nu arán na kayu gapay abbágán, tapè makáwayyá kayu nga ari tumulù kuna. Á nu ajjan yù mangapà nittam ta malliwâ, ipanonò ni Namarò nittam yù awayyá tam nga melilli, tapè ari ittam makitulù kuna.

14 Á yáyù, kákkopuk ku nga iddukak ku, ari ittam laguk umay nga mesipà sù ira nga makimoray ta sináddios.

15 Ammu naw mannonò, á yáyù nga kagiak ku nikayu ta nonopan naw laguk nu kuruk yù kagiak ku nikayu.

16 Nu maggagamming ittam ta panaddamát tam sù pate ni Apu Kesu Kiristu, mabbal-abálà ittam kâ Namarò megapu sù inumat tam, á ámminum ittam, nga pangipasinganát tam sù kesipà tam kâ Apu Kesu, megapu sù dága na nga nebubbù megapu nittam. Á kunnay gapay sù pán nga nagaddagadduá, ta pakkákát tam kuna, ipasingat tam yù kesipà tam kâ Apu Kesu, megapu sù baggi na nga netapil megapu nittam.

17 Á mássiki nu aru ittam, meyárik ittam ta tádday lâ nga baggi, nga mesipà sù baggi ni Apu Kesu Kiristu, gapu ta tangabullung lâ yù pán nga pabbaballayát tam nga keyarigán nayù baggi na.‡

18 Á ta ángngarigán, nonopan naw yù kustombare nayù ira ginaká ni Lákay Israel. Yù ira nga kiminán sù neyátang kâ Namarò, netádday ira nga nakimoray kâ Namarò. Á kunnian gapay sù ira tatolay nga kumán sù neyátang ta sináddios, metádday ira gapay nga makimoray sù sináddios nga nangiyátangâda.

19 Á anni laguk yù kebalinán nayù kinagi? Kagiak ku panò ta matolay yù ira sináddios, onu egga panò yù pabbalinán nayù pangiyátang na tolay nira? Ari ira gemma matolay, á awán gemma ta serbi nayù meyátang nira!

20 Ngam yù meyátang ta sináddios, iyátang da ta dimoniu ánnna anitu nga masserbi kâ Satanas, á arák ku ikáyâ ta metádday kayu sù ira anitu ánnna dimoniu.

21 Á nu metádday kayu nga kumán ánnna ámminum sù panaddamán ta pate ni Apu Kesu Kiristu, arán na awayyá nga metádday kayu gapay nga kumán ánnna ámminum sù meyátang ta anitu ánnna dimoniu! Ta nu kanan naw ánnna inuman naw yù meyátang ta anitu ánnna dimoniu, á kunnay ta makimoray kayu nira.

22 Á nu makimoray ittam nakuan ta tanakuán, á mangabubu ánnna mapporay si Namarò nittam. Makáwayyá ittam panò ánnè kuna? Ari gemma, á arát tam awayyá nga mallilli sù pamággáng na nittam.

† 10:7 Exodo 32:6    ‡ 10:17 Mattiu 26:26-28; Markus 14:22-24; Lukas 22:19-20

*Akkuát tam lâyù Napiá tapè Meparáyaw si Namarò*

<sup>23</sup> Á ajjan yù ira makkagi, nga kud da, “Nu arát tam pakaliwatán yù tunung, máwayyá tam nga akkuán yù ngámin nga ikáyâ tam.” Wan, kuruk yian. Ngam kagiak ku nikayu ta arát tam mábbágán yù ira kábulut tam megapu sù ngámin nga ikáyâ tam nga akkuán. Ta nu masingad da yù akkuát tam nga kagiad da ta liwâ tam, mabbábâng ira sù ángngikatalà da kâ Apu.

<sup>24</sup> Arát tam laguk nonopan ta olu yù pakkapiánát tam, nu ari galâ yù pakkapiánán nayù ira kábulut tam nga mangikatalà kâ Apu.

<sup>25</sup> Á nu ikáyâ naw gatángan yù kárne nga iláku ra ta dápun, á gatángan naw laguk. Ngam arán naw iyabbú yù paggapuán nayù kárne, maraké mánnámuán naw ta naggapu sù iniyátang da, á mabbábâng kayu laguk nga kumán kuna. Ta ari kayu malliwâ gemma nu kanan naw, megapu sù pangikatalà naw kâ Namarò.

<sup>26</sup> Ta ajjan yù netúrâ ta libru ni Namarò nga kun na, “Si Namarò yù makákkua ta dabbuno áんな ngámin nga mayán na.”<sup>§</sup>

<sup>27</sup> Á ta ángngarigán nu ajjan tám yù toláy nga ari mangikatalà kâ Apu Kesu Kiristu, á apatan na kayu ta bale na ta umay kayu kumán, á nu ikáyâ naw nga umay, á umay kayu laguk. Á kanan naw lâ yù iyawâ na nikayu. Ngam arán naw iyabbú nu naggapu sù neyátang, tapè ari kayu mabbábâng nga kumán kuna.

<sup>28</sup> Á ta ángngarigán nu ajjan tám yù toláy nga makkagi ta neyátang yù kárne, á ari kayu laguk kumán kuna, tapè ari maburung yù toláy nga makkagi nikayu. Ta yáyù kinagi na nikayu, gapu ta kagian na ta liwâ naw nu kumán kayu.

<sup>29</sup> Á nu masinjan na ta kumán kayu sù naggapu ta neyátang, arák ku kagian ta sikayu yù maburung sù pakkákán naw, ngam aggina galâ yù mabagal ta nonò na, gapu ta kagian na ta malliwâ kayu.

Á ajjan támma nikayu yù toláy nga ari magayáyâ sù kinagi, á iyabbú na nakuan, “Ngattá, ta ari íttam kumán áんな lonát tam yù awayyá tam, megapu sù pabbábâng nayù ira kábulut tam?

<sup>30</sup> Á nu mabbalabálâ íttam kâ Namarò megapu sù kanat tam, á ngattá laguk, ta kagian nayù ira kábulut tam ta malliwâ íttam gapu ta pakkákát tam kuna, nepatalugáring ta nabbalabálâ íttam gemma kâ Namarò megapu kuna?”

<sup>31</sup> Á yawe yù itabbák ku, nga gapu na nga arát tam laguk kanan yù kinagi ra nga neyátang ta sináddios, tapè meparáyaw si Namarò megapu sù ngámin nga akkuát tam, mássiki nu kumán íttam onu ámmínnum íttam.

<sup>32</sup> Arát tam laguk akkuán yù kagiad da nga liwâ, mássiki nu Kudio ira onu ari Kudio, mássiki nu kábulut tam ira nga mangikatalà kâ Namarò.

<sup>33</sup> Á sikayu, párigán naw yù napiá nga ággangnguâ. Ta akkuák ku lâ yù ipagayáyâ nayù ira ngámin nga tatolay. Á arák ku olu nga nonopan yù pakkapiánák ku, nu ari galâ yù pakkapiánán nayù ira ngámin nga tatolay, tapè maginnâ ra yù napiá nga dámak, áんな makiyigü ira gapay kâ Apu Kesu, tapè ari ira mekanakanâ sù pamagikáru ni Namarò.

## 11

<sup>1</sup> Á wáwwagì, ipe naw laguk yù urà naw nga mamárik sù napiá nga ággangnguâ, nga kunnay gapay ta pamárik ku sù napiá nga ággangnguâ ni Apu Kesu Kiristu.

*Yù Meyannung sù ira Bábbay nga Mangikatalà kâ Apu*

<sup>2</sup> Á dayáwat takayu, gapu ta arán naw náttamán yù inituddù ngaw nikayu, áんな palurotan naw paga yù ngámin nga napiá nga kustombare tam nga inituddù nikayu ta meyannung sù paggagammung tam.

<sup>3</sup> Ngam yawe paga yù ikáyâ ku nga mánnámuán naw. Si Apu Kesu Kiristu yù mammaguray sù laláki. Á yù laláki yù mammaguray sù atáwa na, áんな si Namarò yù mammaguray kâ Apu Kesu Kiristu.

<sup>4</sup> Á yáyù nu ajjan yù laláki nga nattaddung, nga umay nga makimállâ kâ Namarò ta paggagammungán naw, onu mangilayalayâ sù bilin na, á napiá nu irián na yù taddung na, tapè arán na ipasiránán si Apu Kesu, nga mammaguray kuna.

<sup>5</sup> Á yù babay nga makimállâ kâ Namarò, onu mangipakánnámu sù bilin na, napiá nu ajjan yù panniu na ta ulu na. Ta nu ari nappanniú, ipasiránán na yù atáwa na nga mammaguray kuna. Á nu awán ta panniu na, á kunnay sù babay nga nári ngámin yù duddù na.

6 Á nu manakì yù babay nga mammanniu ta ulu na, irián na nakuan laguk yù duddù na. Ngam mappasirán gemma nu nári yù duddù na, á yáyù nga panniuwán na laguk yù ulu na nu umay ta paggagammungán.

7 Ngam yù laláki, ari mattaddung nu umay ta paggagammungán. Ta pinarò ni Namarò yù laláki ta kágappà na, nga kepasinganán nayù pakáwayyá ni Namarò ánnna yù karáyo na. Ngam yù babay yù kepasinganán nayù karáyo nayù laláki.

8 Á nonopan naw yaw. Sù ngaw, ta pamarò ni Namarò ta tolay, ari yù laláki yù naggapu ta baggi na babay, nu ari galâ yù babay yù naggapu sù baggi nayù laláki, ta sinúttù ni Namarò yù tágágang nayù laláki nga pidde na ta babay.

9 Á ari naparò yù laláki megapu sù babay, nu ari galâ ta pinarò ni Namarò yù babay megapu sù laláki, tapè ari maguroray.

10 Á yáyù nga máwák nga mappanniu yù babay, tapè matákkilálán nayù ira daroban ni Namarò ta tumulù yù babay sù atáwa na.

11 Á mássiki nu mammaguray yù laláki sù atáwa na, á máwák na gapay yù ángngabbák nayù babay, ánnna máwák nayù babay gapay yù ángngabbák nayù laláki, ta makkátungutungán ira, ánnna naggittá ira nga nesipà kâ Apu Kesu Kiristu megapu sù pangikatalà da kuna.

12 Ta pidde ni Namarò yù olu nga babay nga naggapu ta baggi nayù laláki, ngam meyanákin ngámin yù ira kárúan nga lálláki sù ira bábbay. Á pinarò ni Namarò yù ngámin nga ajan.

13 Á sikayu laguk yù maguray nu mepángngà ta umay ta paggagammungán naw yù babay náringin yù ngámin nga duddù na, nga ari nappanniu, nga makimálà kâ Namarò.

14 Ngam yù laláki, á negagángay panò nu pakápaduan na yù duddù na? Ari gemma! Ta mappasirán gemma yù laláki nu mepárik ta babay.

15 Ngam yù babay, yá ipakkástá na ánnna keparáyo na yù apaddu nga duddù na, nga iniyawá ni Namarò kuna, nga lippak na ulu na.

16 Á nu ajian yù tolay nga dumá yù ure na ta meyannung karannian, á nu ikáyâ na makiperang ta ubobuk, á yawe laguk yù itabbák ku kuna, ta yáyù yù kustombare mi ánnna yù kustombare nayù ira kárúan nga mangikatalà kâ Namarò ta ngámin nga lugár, nu umay kami maggagammung nga makimoray kâ Namarò.

*Yù Panaddamát tam ta Pate ni Apu Kesu nga Ingágad da ta Pamúgák ni Apu  
Mattiu 26:26-29; Markus 14:22-25; Lukas 22:14-20*

17 Á ajian paga yù itaddák ku nikayu, ta arát takayu iráyaw megapu sù akkuán naw nga meyannung karanniaw. Ta nu maggagammung kayu nga makimoray kâ Namarò, á ari mabbalin ta pammakapián naw, nu ari galâ mappanà yù paddáké naw.

18 Ta narámak ku ta ari nattatádday yù nonò naw, á makkakápereperang kayu ta ubobuk, ánnna massisinná kayu ta paggagammungán naw. Á kuruk támma yù kárúan nga kagiad da.

19 Ta negagángay nittam gemma nga makkakápereperang ta ubobuk nu dumá yù nonò tam. Ngam ajian támma gapay yù napiá nga serbi nayù pakkakáperang naw, ta mepalappâ yù ira nga kuruk nga napiá yù nonò da.

20 Á nu maggagammung kayu nga kuman ta panaddamán naw sù pate ni Apu Kesu Kiristu, á kunnay ta ari si Apu Kesu yù nonopan naw.

21 Ta ajian garé yù ira kárúan nga mapolu nga kumán sù bálud da, á arád da iballáyán yù ira kábulud da. Á yáyù nga ajian nikayu yù ira mabisin, ánnna ajian yù ira mellaw.

22 Aro! Awán panò ta bale naw nga pakkákanán naw ánnna pappissanán naw? Ajjan gemma! Á ngattá laguk, ta ari kayu makimoray sù ira kábulun naw nga mangikatalà kâ Apu? Ngattá, ta ipasiránán naw yù ira kábulun naw nga pobare? Anni laguk panò yù kagiak ku nakuan nikayu ta meyannung sù akka-akkuán naw? Arát takayu gemma iráyaw!

23 Á inituddukin gemma nikayu yawe nga inipakánnámmu ni Apu Kesu nikán. Ta pamúgák di Apu Kesu sù gabi nga panájji ra kuna, inâ ni Apu Kesu yù pán.

24 Á ta kabalín na nabbalabálà kâ Namarò, giddigiddúá na yù pán, nga inisinek na sù ira sinudduán na, tapè kanad da. Á kinagi na nira, "Yawe yù baggi nga metapil megapu nikayu. Á kunniawe yù akkuán naw ta panaddamán naw nikán," kun na.

25 Á kunnian gapay, ta kabálid da kiminán, inâ ni Apu Kesu yù inumad da, á kinagi na nira, "Yawe yù panákkilálán naw sù bagu nga tarátu ni Namarò nikayu, ta mapalurò sangaw yù bagu nga tarátu, megapu sù dágá nga magagì ta paté. Inuman naw laguk ta panaddamán naw nikán," kun na.

26 Á yáyù ta paggagammung tam nga kumán ta pán ánnna ámminum sù panaddamát tam ta ketapil ni Apu Kesu Kiristu, nga kunnay sù kinagi na, á ipakánnámmu tam yù pate ni Apu, áddé ta panoli na.

<sup>27</sup> Á nu ajjan yù tolay nga metádday nittam nga kumán ánnna ámminum sù panaddamát tam kâ Apu Kesu, ngam arán na nonopan yù ketapil ni Apu megapu kuna, á makaliwâ megapu sù pakkákán na sù panaddamát tam kâ Apu, gapu ta arán na pakimorayán yù baggi ni Apu Kesu ánnna yù dága na.

<sup>28</sup> Pasíkkálat tam laguk yù nonò tam, nu napiá yù ákkimore tam kâ Apu Kesu, lage tam kumán ánnna ámminum sù panaddamát tam kuna.

<sup>29</sup> Ta yù tolay nga kumán ánnna ámminum, nga arán na nonopan yù kebalinán nayù ketapil ni Apu Kesu megapu kuna, á pággangan ni Namarò, megapu sù kataggâ nayù nonò na.

<sup>30</sup> Á yáyù gapu na nga aru nikayu yù ira máttakì ánnna makapi, á ajjan gapay yù ira nga natayin.

<sup>31</sup> Ngam nu pasíkkálat tam ta olu yù nonò tam lápay, á arán na ittamin pasíkkálán ni Namarò.

<sup>32</sup> Á nu narákè yù akkuát tam, tudduán ni Namarò ittam nga mangikatalà kuna ánnna pággangan na ittam kunangane, tapè ari ittam sangaw mekanakaná sù pamagikárú na sù ira tatolay nga ari manguruk kuna, nga metabbà sangaw ta ímpiernu.

<sup>33</sup> Á yáyù, wáwwagi, nu maggagammung kayu, iddagán naw laguk yù labbè nayù ira kárúán na kábulun naw lage naw kumán ta panaddamán naw sù pate ni Apu Kesu Kiristu.

<sup>34</sup> Á nu ajjan yù mabisin, á kumán bì ta bale na lage na umay mepaggagammung nikayu, tapè arán na kayu pággangan ni Namarò. Á sangaw nu umayà nikayu, kagiak ku yù kárúán nga itaddák ku nikayu.

## 12

*Yù Makkakerumá nga Pakáwayyá tam nga Naggapu sù Mangilin nga Ikararuá  
Roma 12:6-8; Epeso 4:1-16*

<sup>1</sup> Á wáwwagi, ibukalák ku laguk nikayu yù meyannung sù pakáwayyá naw nga iyawâ nayù Mangilin nga Ikararuá ni Namarò nittam nga katággítádday nga tatole na, gapu ta ikáyâ ku nga kánnámmuán naw ta napiá.

<sup>2</sup> Á ammu naw ta lage naw nangikatalà kâ Apu Kesu, nelogò kayu megapu sù ira dimoniu ánnna yù ira anitu, á nakimoray kayu sù ira sináddios, másiki nu ari ira makobobuk ánnna awán ta pakáwayyá ra.

<sup>3</sup> Á yáyù nga ipakánnámmu nikayu ta nu kuruk nga tumulù yù tolay sù pammagure nayù Ikararuá ni Namarò, arán na bulubugá igurek si Apu Kesu. Á awán ta tolay nga makkagi ta si Apu Kesu yù Yápu na, nu ari lâ megapu sù pakáwayyá nayù Mangilin nga Ikararuá ni Namarò.

<sup>4</sup> Á ajjan yù makkakerumá nga pakáwayyá tam nga naggapu kâ Namarò. Ngam tádday lâ yù Ikararuá ni Namarò nga mangiyawâ nittam ta pakáwayyá tam.

<sup>5</sup> Á ajjan yù makkakerumá nga tarabáku tam, nga ánggabbák tam sù ira kábulut tam, ngam tádday lâ si Apu Kesu Kiristu nga Yápu tam nga pattarabakuát tam.

<sup>6</sup> Á ajjan yù makkakerumá nga pakapangnguá tam nga mamalurò sù ipakuá ni Namarò nittam. Ngam tádday lâ yù mangipakuá nittam, nga si Namarò. Á aggina galâ yù mangabbák nittam, tapè mapalurò tam yù ngámin nga ipakuá na nittam.

<sup>7</sup> Á sittam nga katággítádday nga mangikatalà kâ Namarò yù neddán sù pakáwayyá tam nga naggapu sù Ikararuá ni Namarò, á yáyù nga mepasingan ta ajjan nittam yù Mangilin nga Ikararuá ni Namarò. Á yá inipangiyawâ na sù pakáwayyá tam, tapè abbágát tam yù ira kábulut tam.

<sup>8</sup> Ta iyawâ nayù Ikararuá ni Namarò yù sírik na sù tádday nga tolay, tapè ilayalayâ na yù bilin ni Namarò. Á iyawâ na gapay sù tádday yù pakáwayyá na nga makánnámmu ánnna mangituddu sù kebalinán nayù bilin na. Á makkakerumá yù pakáwayyá nga meyawâ sù ira tatolay, ngam yù Ikararuá ni Namarò, aggina galâ yù mangiyawâ.

<sup>9</sup> Á iyawâ na gapay sù tádday yù napasigaggà nga pangikatalà na kâ Namarò. Á iyawâ na sù tádday yù pakáwayyá na nga mamammapiá sù ira máttakì.

<sup>10</sup> Á iyawâ nayù Mangilin nga Ikararuá sù tádday yù pakáwayyá na nga mamagaddátu. Á iyawâ na sù tádday yù pakáwayyá na nga makkagi sù ipakánnámmu ni Namarò kuna, ánnna iyawâ na gapay sù tádday yù pakáwayyá na nga manákkilála sù paggapan nayù kagian nayù ábbilinán, nu naggapu sù Ikararuá ni Namarò, onu tanakuán yù paggapan na. Á iyawâ na sù tádday yù pakáwayyá na nga magubobuk ta tanakuán nga ággubobuk nga arán na ginigiámmu, ánnna iyawâ na gapay sù tádday yù pakáwayyá na nga makkagi sù kebalinán nayù kagian na.

<sup>11</sup> Á yù Mangilin nga Ikararuá ni Namarò, aggina lâ yù paggapuán nayù ngámin danniaw nga pakáwayyá na tolay, á aggina galâ yù mammaguray sù pakáwayyá tam nga iyawâ na nittam nga katággitáddy.

*Sittam nga Nepattatáddy kâ Apu Kesu yù Kunnay ta Baggi na*

<sup>12</sup> Á sittam nga mangikatalà kâ Apu Kesu, meyárik ittam ta baggi na, nga aijan yù takki na, limá na, matá na, talingá na, ánnna kárúán na nga aijan ta baggi na, nga naddurúmá yù pakáwayyá ra. Á yù baggi ni Apu Kesu Kiristu yù keyarigát tam, gapu ta mepattatáddy ittam gapay, ánnna naddurúmá yù pakáwayyá tam nga katággitáddy.

<sup>13</sup> Á mássiki nu Kudio ittam onu ari Kudio, ánnna mássiki nu mammaguray ittam onu makiaripan ittam, á narigù ittam ngámin nga nesipà kâ Apu Kesu, megapu sù Mangilin nga Ikararuá. Á maggián nittam ngámin yù Mangilin nga Ikararuá, nga táttáddy nga kesipatá tam, nga meyárik ta mamenum nittam, gapu ta aggina yù paggapuán nayù áttole tam nga mannanáyun.

<sup>14</sup> Á ari lâ tádday yù eggá ta baggi na tolay, nu ari yù aru nga makkakerumá, nga takki na, limá na, matá na, ánnna yù kárúán na, nga netáddy ta baggi na.

<sup>15</sup> Á ta ángngarigán nu magubobuk nakuan yù takki na tolay, á nu kagian na nakuan ta ari nesipà ta baggi na tolay gapu ta ari yù limá na, á ari gemma kuruk gapu ta kuruk nga nesipà gemma sù baggi na.

<sup>16</sup> Á nu kagian nayù talingá na nakuan ta ari nesipà sù baggi na gapu ta ari yù matá na, ngam nesipà lâ paga gemma sù baggi na.

<sup>17</sup> Á nu matá na lâ yù tangabaggi na nakuan, á kunnasi laguk yù pakaginná na? Á nu talingá na lâ nakuan yù tangabaggi na, á kunnasi laguk yù pakáguk na?

<sup>18</sup> Ngam ari kunnian gemma, ta pine na galâ ni Namarò yù makkakerumá nga aijan ta baggi na tolay, nga kunnay ta inikáyâ na.

<sup>19</sup> Á nu pidde na lâ nakuan ni Namarò yù matá ta tangabaggi, á ari gemma yù baggi na tolay.

<sup>20</sup> Ngam ari kunnian, ta aru yù pidde na nga makkakerumá nga pinattatádde na sù táddy nga baggi na tolay.

<sup>21</sup> Á gapu ta kunnian yù ággíán nayù baggi tam, arán na awayyá nayù matá tam nga makkagi sù limá tam, "Arát taka awágán!" Á arán na awayyá nayù ulu tam nga kagian, "Awán ta serbi nayù takki tam."

<sup>22</sup> Ta kuruk nga máwák tam ngámin yù baggi tam, mássiki nu baddi nga makapi.

<sup>23</sup> Á yù kárúán nga aijan ta baggi tam, pakástát tam ira. Á yù kárúán, barawasiát tam ta napiá, tapè ari ira masingan, marakè mappasirán ittam megapu nira.

<sup>24</sup> Ngam aijan yù kárúán nga nakástá ta baggi tam, nga arát tam awágán nga pakástán onu barawasián.

Á pidde ni Namarò yù ággíán nayù baggi tam, tapè napiá yù ásserbi nayù ngámin nga aijan ta baggi tam, nepatalugáring sù kárúán nga baggi tam nga arát tam nonopan. Á yáyù nga máwák tam yù ngámin nga aijan ta baggi tam.

<sup>25</sup> Á pidde ni Namarò yù baggi tam ta kunniauw, tapè makkaká-ásigurá yù ngámin nga aijan ta baggi tam.

<sup>26</sup> Á ta ángngarigán, nu aijan yù mataki ta baggi tam, á matagenà nayù ngámin nga baggi tam yù taki na. Á nu aijan yù meráyaw ta baggi tam, á ayatán laguk yù ngámin nga aijan ta baggi tam sù keráyo na.

<sup>27</sup> Á yawe nga kinagi yù keyarigát tam ngámin nga mangikatalà kâ Apu Kesu Kiristu, ta kunnay ittam ta baggi na, megapu ta kesipà tam nga katággitáddy kuna. Á makkakerumá yù pakáwayyá tam nga kunnay ta aijan ta baggi na.

<sup>28</sup> Ta makkakerumá yù tarabáku tam nga ipakuá ni Namarò nittam nga mangikatalà kuna, nga mesipà sù baggi na. Ta sinullà na ta olu yù ira nga minángngilayalayâ nga sinudduán ni Apu Kesu. Á yù mekaruá nga sinullà na yù ira ábbilinán na. Á mekatallu yù ira mangituddu sù bilin na. Á aijan gapay yù ira mamagaddátu, ánnna yù ira mamammapiá sù ira mättaki, ánnna yù ira mangabbák, ánnna yù ira lállakalákay nga manabarang, ánnna yù ira magubobuk ta ággubobuk nga arád da mánnámmuán.

<sup>29</sup> Á anni laguk yù kagian naw? Sittam ngámin panò yù minángngilayalayâ? Onu sittam ngámin panò yù ábbilinán na, nga mangipakánnámmu sù ipalappâ ni Namarò? Á makáwayyá panò ittam ngámin nga mangituddu sù bilin na? Á sittam ngámin panò yù mamagaddátu? Ari gemma kunnian!

<sup>30</sup> Á eggá panò nittam ngámin yù awayyá tam nga mamammapiá sù ira máttakì? Awán. Á makáwayyá ittam ngámin panò nga magubu-ubobuk ta ággubobuk nga arát tam paga kánnámmuán? Onu makáwayyá panò ittam ngámin nga mangibukalán ta kebalinán na? Ari gemma.

<sup>31</sup> Karagatát tam laguk yù ira kapiánán nga pakáwayyá tam, nga iyawâ ni Namarò nittam. Á ajian paga yù ituddù nikayu nga kapiánán nayù pakáwayyá tam ánnè sù ngámin karannian. Makkaká-iddù ittam.

## 13

### *Makkaká-iddù ittam!*

<sup>1</sup> Nu makáwayyágà nga magubobuk  
sù ira ngámin nga makkakerumá nga ággubobuk na tolay  
ánná yù ággubobuk nayù ira daroban ni Namarò gapay,  
á nu awán ta ángngiddù ku sù ira kábuluk ku,  
á kunnayá laguk ta kekkeng nga matannuk onu gássá nga jikkù yù ággallu na.

<sup>2</sup> Á mássiki nu makáwayyágà nga mangibukalán sù bilin ni Namarò nga ipalappâ na nikán,  
ánná mássiki nu kánnámmuák ku yù ngámin nga monak nga nelimak nga talákkurugan na,  
á mássiki nu masikan yù ángngikatalà ku, tapè máwayyâ nga pagalitan yù ira puddul,  
á awán galâ ta serbi nayù akkuák ku nu awán ta ángngiddù ku sù ira kábuluk ku.

<sup>3</sup> Á mássiki nu isinek ku ngámin yù kukuâ sù ira pobare ánná ipatuggì yù baggi, megapu sù pangikatalà ku kâ Apu,

awán ta pakkapiánák ku nu arák ku iddukan yù ira kábuluk ku,  
<sup>4</sup> Nu mangiddù ittam sù ira kábulut tam,  
attamát tam gapay yù akkuád da,  
ánná ikállá tam ira.

Á ari ittam bulubugá mangabubu nira,

Á ari ittam mappeddaráyaw,  
ánná ari motun yù nonò tam.

<sup>5</sup> Á nu mangiddù ittam sù ira kábulut tam,  
arát tam ira uyoyungán.

Á ari ittam mangukkuk,  
ánná arát tam ipapílì yù ure tam lápay.

Á ari ittam malogon nga mapporay.

Á arát tam ipatattam ta nonò tam yù liwiliwâ nayù ira kábulut tam,  
ánná arát tam ibálâ yù liwâ da nittam.

<sup>6</sup> Á nu mangiddù ittam sù ira kábulut tam,  
arát tam ipagayáyâ yù akkuán nayù ira nga mangnguá ta narákè,  
nu ari galâ ta magayáyâ ittam  
megapu sù napiá nga akkuád da.

<sup>7</sup> Á nu mangiddù ittam sù ira kábulut tam,  
ari ittam malurâ nga mangabbák nira.

Maguray lâ yù mesimmu,  
arát tam ira táttájjián.

Á ipasigaggà tam lâ yù pangikatalà tam kâ Apu  
ánná yù pagiddanáma tam kâ Apu nga mangabbák nittam.

Á mássiki nu marigirigâ ittam,  
onu narákè yù akkuán na tatolay nittam,  
attamát tam lâ yù ngámin nga mesimmu nittam.

<sup>8</sup> Á awán ta áddé nayù pakkaká-iddù tam  
ánná yù pangiddù tam kâ Namarò.

Ngam mappasá sangaw yù pangilayalayâ nayù ira ábbilinán ni Namarò,  
ánná yù pagubobuk nayù ira tatolay ta tanakuán nga ággubobuk nga ari paga nánnámmuán.

Á mappasá gapay sangaw yù ngámin nga ammu tam.

<sup>9</sup> Ta baddì yù ammu tam kunangan, á arát tam kánnámmuán yù ngámin.

Á nakúráng paga yù inipalappâ ni Namarò nittam.

<sup>10</sup> Ngam sangaw nu mapalurokin yù ngámin nga ure ni Namarò  
ánná mesipâ ittamin kâ Apu Kesus Kiristu,

á mappasá laguk yù ammu tam nga baddì,  
ta mepalappá nittam yù ngámin nga nabalinin.

<sup>11</sup> Á ta ángngarigán, sù ngaw kabajji ku,  
á kunnay ta abbing lâ yù ággubobuk ku, ánnna yù ánonnò ku, ánnna yù pangibiláng ku ta  
nonò ku gapay.

Á pattaggâ ku, nilikurák kin yù ággangnguá na abbing.

<sup>12</sup> Á kunangane ta keggá tam ta dabbuno,  
arát tam kánnámmuán ta napiá yù ituddu ni Namarò nittam nga meyannung kuna,  
gapu ta kunnay ta alinu nga masingan ta ispeku nga ari malitáw.

Ngam sangaw nu meyarubáng ittam kâ Namarò ta lángi,  
á kánnámmuát tam laguk ta napiá, nga kunnay sù pakánnámmu na nittam.

<sup>13</sup> Á danniawé nga tallu yù pakkapiánát tam, nga maggián ta áddè ta áddè:  
yù pangikatalà tam kâ Namarò,  
yù pagiddanáma tam kâ Namarò,  
ánnna yù pangiddù tam kári Namarò ánnna yù ira kábulut tam.

Ngam yù kapiánán nayù ira tallu  
yù pangiddù tam kári Namarò ánnna yù ira kábulut tam.

## 14

### *Yù Duá nga Pakáwayyá tam nga Iyawâ ni Namarò*

<sup>1</sup> Gapu ta pangiddù ni Namarò nikayu ánnna yù pangiddù naw kuna, ipe naw laguk yù urà naw nga mangiddù sù ira kábulun naw. Á karagatán naw yù ira káruán nga pakáwayyá naw yù naggapu sù Mangilin nga Ikararuá, nepatalugáring sù pakáwayyá naw nga mangipakánnámmu sù bilin ni Namarò.

<sup>2</sup> Yù tolay nga magubobuk ta ággubobuk nga arád da kánnámmuán nayù ira kábulun na, á si Apu Namarò galâ yù kobobuk na, ta aggina lâ yù makánnámmu, gapu ta awán ta tolay nga makánnámmu sù kagian na. Ta ipeyubobuk na galâ nayù Ikararuá ni Namarò kuna yù monak, nga nelímak ta tolay yù kebalinán na.

<sup>3</sup> Ngam nu mangipakánnámmu yù tolay sù bilin ni Namarò, makiubobuk sù ira kábulun na, tapè abbágán na ira. Á tabarangán na ira, tapè mabannáyán yù nonò da ánnna mapasigaggá yù pangikatalà da kâ Apu.

<sup>4</sup> Á yù tolay nga magubobuk sù ággubobuk nga arád da kánnámmuán nayù ira kábulun na, á yù lâ baggi na yù abbágán na, gapu ta awán ta makánnámmu sù ággubobuk na. Ngam yù mangipakánnámmu sù bilin ni Namarò, á tabarangán na yù ira ngámin nga mepaggammung kuna, nga mangikatalà kâ Apu Kesu Kiristu.

<sup>5</sup> Á parè bì nakuan ta iyawâ ni Namarò nikayu ngámin yù pakáwayyá naw nga magubobuk ta ággubobuk nga ari paga nánnámmuán. Á ta urè, más napiá galâ nu magubobuk kayu ngámin ta ággubobuk naw, nga mangipakánnámmu sù bilin ni Namarò, tapè mánnámmuán nayù ira ngámin nga tatolay yù kagian naw. Ngam napiá lâ nu magubobuk yù tolay sù ipeyubobuk nayù Mangilin nga Ikararuá nga ari paga nánnámmuán, nu ajjan gapay yù tolay nga iniddán nayù Mangilin nga Ikararuá sù pakáwayyá na nga mangibukalán sù kebalinán nayù kagian na, tapè ibukalán na sangaw yù kebalinán na. Á mábbágán laguk yù ira ngámin nga mangikatalà nga maggagammung tán.

<sup>6</sup> Á iyabbú ku laguk nikayu, wáwwagi, nu umayà nikayu nga magubobuk ta ággubobuk nga arán naw kánnámmuán, á eggá panò yù pammakapián naw megapu nikán? Awán gemma. Ngam nu magubobugá galâ sù ággubobuk naw nga kánnámmuán naw, ánnna ubobugak ku nikayu yù inipalappá ni Namarò nikán, onu kagiak ku nikayu yù ammù nga meyannung kâ Namarò, onu kagiak ku nikayu yù bilin ni Namarò, ánnna ituddù nikayu yù kebalinán na, á mábbágán kayu laguk.

<sup>7</sup> Á ta ángngarigán, mássiki nu awán ta inángà nayù paláwatá onu árpá, kunnay ta makobobuk ira nu mappaláwatá yù tolay, onu magárpá. Ngam nu ari napiá yù pattoká na, matákkilalát tam panò yù pattoká na? Ari gemma.

<sup>8</sup> Á kunnian gapay, nu ajjan yù suddálú nga magamariung nga magágál sù ira kábulun na, ta umay ira mangabbák kuna nga makigerrá, á nu ari malitáw yù pagamariung na, á ammu ra panò nayù ira kábulun na ta mapparán ira? Ari gemma.

<sup>9</sup> Á kunnian gapay nikayu, nu magubobuk kayu ta ággubobuk nga ari paga nánnámmuán, á kunnay laguk ta paddák galâ yù kobobuk naw, ta awán ta tolay nga makánnámmu sù kagian naw.

<sup>10</sup> Kuruk gemma ta aru yù ira makkakerumá nga ággubobuk ta dabbuno, ngam ajjan yù kebalinád da ngámín.

<sup>11</sup> Á nu arák ku ammu yù ággubobuk nayù tolay nga makiubobuk nikán, á tanakuán yù katatole na. Á tanakuáná gapay, nga ari yù kagittá na.

<sup>12</sup> Á gapu ta karagatán naw ta iyawâ na nikayu nayù Ikararuá ni Namarò yù pakáwayyá naw, á talákkurugan naw laguk nga manuppál sù pakáwayyá naw nga mangabbák sù ira wáwwagi naw, tapè mapasigaggà yù pangikatalà da kâ Apu Kesu.

<sup>13</sup> Á yáyù nu ajjan yù tolay nga iddán nayù Ikararuá ni Namarò sù pakáwayyá na nga magubobuk ta ággubobuk nga ari paga nánnámmuán, á ipakimállà na laguk ta alawatan na gapay yù pakáwayyá na nga mangibukalán sù kebalinán nayù kagian na.

<sup>14</sup> Á ta ángngarigán, nu makimállakà kâ Namarò ta ággubobuk nga arák ku kánnámmuán, nga ipeyubobuk na nikán nayù Ikararuá ni Namarò, á awán galâ ta pabbalinán na ta nonò ku, gapu ta arák ku kánnámmuán yù kebalinán na.

<sup>15</sup> Á anni laguk panò yù napiá nga akkuák ku ta pakimállà ku kâ Namarò? Kunniaw laguk yù akkuák ku. Tángngagak ku yù pagubobuk ku ta ággubobuk nga arák ku kánnámmuán, megapu sù putù, á sangaw tángngagak ku gapay yù ipakimállà ku megapu sù nonò ku, tapè kánnámmuák ku yù kagiak ku kâ Namarò. Á ta paddáyò kâ Namarò, makkansionà sù ággubobuk nga arák ku kánnámmuán, megapu sù putù, ánná ikansiol ku gapay sangaw yù megapu sù nonò ku nga kánnámmuák ku.

<sup>16</sup> Á ta ángngarigán, nu iyubobuk naw yù ággubobuk nga ari paga nánnámmuán, ánná ajjan yù ira álliuk nga mepaggagammung nikayu, á kunnasi laguk ta mesipà yù ira álliuk sù paddáyò naw kâ Apu? Awán ta awayyá ra nga makkagi ta “Ammán,” gapu ta arád da kánnámmuán yù kagian naw.

<sup>17</sup> Á mássiki nu napiá yù áddáyó naw kâ Namarò, ari mábbágán yù ira kábulun naw, gapu ta arád da kánnámmuán.

<sup>18</sup> Dayáwak ku si Namarò, gapu ta makáwayyángà nga magubobuk ta ággubobuk nga ari paga nánnámmuán, ánné nikayu ngámín.

<sup>19</sup> Ngam nu mepaggagammung sù ira mangikatalà kâ Apu, napiá galâ nu iyubobuk ku yù ággubobuk tam, tapè kánnámmuád da gapay, mássiki nu baddì lâ yù kagiak ku nira, ánné ta aru yù kagiak ku nga iyubobuk ku ta ággubobuk nga arád da kánnámmuán.

<sup>20</sup> Á wáwwagi, arán naw nakuan karagatán yù lá pakobobuk naw ta ággubobuk nga ari paga nánnámmuán. Ta nu yáyù lâ karagatán naw, á kunnay ta ánonò na abbing yù nonò naw. Á ta meyannung sù narákè, napiá nu kunnay ta nonò na assitay yù nonò naw, nga arán na paga ammu mangnúga ta narákè. Ngam ta meyannung sù ira makkakerumá nga pakáwayyá nga iyawâ nayù Ikararuá ni Namarò, á nonopan naw laguk yù kunnay ta ánonò na tolay nga nataggatáni, nga ammu na mappílì sù napiá.

<sup>21</sup> Á yawe yù netúrâ nga kinagi ni Namarò:  
“Dobak ku yù ira tatolay nga naggapu ta tanakuán nga lugár, nga tanakuán yù ággubobuk da,

ta ed da kagian yù bilik ku sù ira tatolay nga manaki manguruk.

Á mássiki nu kunnian, ari ira maggiinná sù kagiak ku nira.”  
Yáyù kinagi ni Namarò.

<sup>22</sup> Á yáyù nga ammu tam ta ari megapu sù ira manguruk, nu ari galâ megapu sù ira nga ari manguruk yù pangiyawâ ni Namarò ta pakáwayyá na tolay nga magubobuk ta tanakuán nga ággubobuk nga ari paga nánnámmuán, tapè tákkitlalán nayù ira ari manguruk yù pakáwayyá ni Namarò nga mamanunnù nira. Ngam ari megapu sù ira ari manguruk, nu ari galâ megapu sù ira tatole ni Namarò yù pangiyawâ na nira sù pakáwayyá ra nga mangipakánnámmu sù bilin na, tapè kánnámmuád da yù pakáwayyá ni Namarò nga mangiyígú nira.

<sup>23</sup> Á sikayu ngámín nga mangikatalà kâ Apu, nu maggagammung kayu nga magububobuk ta ággubobuk nga ari paga nánnámmuán, á nu tullung gapay yù ira nga ari mattudduán onu yù ira ari manguruk, á arád da panò kagian ta maguyung kayu ngámín? Wan gemma, ta arád da kánnámmuán yù kagian naw!

<sup>24</sup> Ngam nu mangipakánnámmu kayu sù bilin ni Namarò nga ipalappâ na nikayu, á nu tullung yù tolay nga ari paga mangikatalà kâ Apu, onu yù tolay nga ari mattudduán, á ta pakaginná na sù kagian naw, tákkitlalán na yù liwiliwâ na ánná ammu na ta mepángngà yù pamagikáru ni Namarò kuna.

<sup>25</sup> Á ipalappâ na laguk yù ngámin nga liwiliwâ na, mássiki yù nelímak ta nonò na, á mamalittukak nga mabbabáwi ta liwiliwâ na, ánnna maddáyaw kâ Namarò. Á kagian na, "Kuruk nga aijan si Namarò nikayu!" kun na.

*Yù Ákkimore tam kâ Namarò ta Paggagammung tam*

<sup>26</sup> Á wáwwagi, anni laguk yù napiá nga akkuán naw ta paggagammung naw nga makimoray kâ Namarò? Napiá nu aijan nikayu yù ira makkansion nga maddáyaw kâ Namarò, á aijan gapay yù ira nga mattutubbâ nga mangituddu sù bilin ni Namarò, ánnna yù mangipakánnámmu sù inipalappâ ni Namarò kuna, ánnna yù magubobuk ta ággubobuk nga ari paga nánnámmuán, ánnna yù makkagi gapay sù kebalinán nayù kinagi na. Ta napiá nu mábbágán kayu ngámin nga naggagammung, megapu sù ngámin nga akkuán naw, tapè mepasigaggà yù ángngikatalà naw kâ Apu.

<sup>27</sup> Á nu aijan yù ira nga magubobuk ta ággubobuk nga ari paga nánnámmuán, á napiá nu duá onu tallu lâ yù mattutubbâ nga magubobuk, á máwák gapay yù tádday nga mangibukalán sù kebalinán nayù kagiad da.

<sup>28</sup> Ngam nu awán ta makáwayyá nga mangibukalán sù kebalinán nayù ubobuk da, á magimammà ira laguk ta paggagammungán, ta makiubobuk ira lâ kâ Namarò ánnna ta baggi ra.

<sup>29</sup> Á yù ira ábbilinán ni Namarò ta paggagammung naw, á napiá nu anugutan naw ta mattutubbâ nga magubobuk yù duá onu tallu lâ, nga mangipakánnámmu sù inipalappâ ni Namarò nira. Á yù ira káruán nikayu, ginnán naw ta napiá, tapè makkakápasikkál kayu ta meyannung sù kinagi ra, nu kuruk nga naggapu sù Ikararuá ni Namarò.

<sup>30</sup> Á nu magubobuk yù napolu, á aijan yù ipalappâ ni Namarò sù tádday, á magimammà laguk yù napolu.

<sup>31</sup> Ta nu mattutubbâ ittam, aijan yù awayyá tam ngámin nga magubobuk, tapè matudúan ittam ngámin ánnna matabarangán ittam ngámin.

<sup>32</sup> Á yù ábbilinán ni Namarò, aggina gemma yù maguray sù baggi na, nu magubobuk onu magimammà.

<sup>33</sup> Á si Namarò, arán na ikáyâ nu makusukusu yù paggagammung tam. Ta ikáyâ na galâ yù napiá nga pakkaká-ásigurá tam.

Á yáyù nga aijan gapay yù kustombare tam ngámin nga mangikatalà kâ Namarò, ta ngámin nga paggagammungát tam,

<sup>34</sup> ta magimammà yù ira bábbay. Ari ira meyanugù nga makipiripirang ta ubobuk, gapu ta máwák nga tumulù ira sù ira lálláki nga kunnay ta netúrâ sù tunung ni Moyses.

<sup>35</sup> Á nu aijan yù arád da kánnámmuán nayù ira bábbay, á iddagád da lábbì yù labbè da ta bale ra, á iyabbù da laguk yù kebalinán na sù atáwa ra. Ta jikkù nu magubobuk yù ira bábbay ta paggagammung tam.

<sup>36</sup> Á ngattá laguk ta manaki kayu manguruk karannian nga kinagi nikayu? Sikayu nga taga Korinto panò yù paggapuán nayù bilin ni Namarò? Onu kagian naw ta sikayu lâ yù pagáddekan nayù bilin na? Ari gemma.

<sup>37</sup> Á yù tolay nga makkagi ta aggina yù ábbilinán ni Namarò, onu kagian na ta aijan yù pakáwayyá na nga iniyawâ nayù Ikararuá ni Namarò kuna, á tákkitlán na laguk ta kuruk nga taddán ni Namarò yù ngámin nga initúrá ku saw.

<sup>38</sup> Á nu aijan yù tolay nga manaki nga manángngák sawe nga taddán gapay ni Namarò, á arán naw laguk tángngagan yù kagian na.

<sup>39</sup> Á yáyù, wáwwagi, nga ipe naw yù urà naw laguk nga mangipakánnámmu sù bilin ni Namarò nga inipalappâ na. Ngam arán naw ipugik yù ira nga magubobuk ta ággubobuk nga ari paga nánnámmuán.

<sup>40</sup> Á napiá lâ nu mattutubbâ kayu ta ngámin nga akkuán naw ta paggagammung naw.

## 15

*Yù Paginnanole ni Apu Kesu Kiristu*

<sup>1</sup> Á wáwwagi, ipanonò ku nikayu yù napiá nga dámak nga inilayalayâ ku ngaw nikayu. Á kinuruk naw, á gapu ta panguruk naw, napasigaggà yù pangikatalà naw kâ Apu Kesu.

<sup>2</sup> Á meyígù kayu nga mesipâ kâ Namarò megapu sù napiá nga dámak, nu uputan naw yù panguruk naw sù netuddu nikayu. Ngam nu áppè manguruk kayu, awán ta pammakapián naw.

<sup>3</sup> Á nepakánnámmu nikán yù bilin nga inilayalayâ ku ngaw nikayu, nga kuruk nga bilin nga máwák naw tángngagan, nga kunniaw:

Netapil si Apu Kesu Kiristu, nga natay megapu sù liwiliwâ tam, tapè mapakomá ittam ta liwâ tam,  
nga kunnay sù inipetûrâ na ngaw ni Namarò sù dán nga libru.

<sup>4</sup> Á netanam si Apu Kesu Kiristu,  
á pinaginnanole ni Namarò sù mekatallu nga ággaw,  
nga kunnay sù netûrâ sù dán nga libru.

<sup>5</sup> Á kabalin ni Apu Kesu naginnanolay, nappasingan kâ Eduru.

Á nappasingan gapay sù ira mapulu duá nga sinullà na ngaw nga umay mangilayalayâ.

<sup>6</sup> Á pappasá na yaw, nappasingan gapay sù ira mawwawágí ta ángnguruk da kuna, nga naggagammung nga natturù ta límá gatù.

Á aru yù matolay paga nira, ngam natayin yù ira káruán.

<sup>7</sup> Á nappasingan gapay kâ Ime.

Á kabalin na yaw, nappasingan gapay sù ira ngámin nga sinullà na nga minángngilayalayâ.

<sup>8</sup> Á sikán yù naporián nga nappasinganán ni Apu Kesu ta kabalin na naginnanolay, ta ikáddagâ lâ nappasingan nikán, mássiki nu kunnayâ ta neyanâ lage na ággo na.

<sup>9</sup> Á sikán yù kagukábán sù ira ngámin nga minángngilayalayâ nga sinullà ni Apu Kesu. Á ta ure, aringâ mepángngâ nga mebiláng sù ira minángngilayalayâ, gapu ta jinigirigâ ku ngaw yù ira mangikatalà kâ Apu.

<sup>10</sup> Ngam sinullà nangâ ni Namarò nga minángngilayalayâ sù bilin na, megapu sù pangikállâ na nikán áんな pangiddù na nikán. Á napiá yù pabbalinán nayù pangikállâ na nikán, ta nilikurák kin yù liwâ ku áんな nangulingin yù ággangnguâ, tapè masserbingâ kuna. Á nasikan yù áttarabákù ánné sù ira ngámin nga káruán nga minángngilayalayâ, nga ari negapu sù pakáwayyâ, nu ari galâ negapu kâ Namarò nga mangabbák nikán.

<sup>11</sup> Á maguray lâ nu sikán yù mangilayalayâ onu yù ira káruán nga sinullà ni Apu, á naggiggítâ yù ilayalayâ mi, nga napiá nga dámak nga kinuruk naw.

*Yù Paginnanole nayù ira nga Mangikatalà kâ Apu*

<sup>12</sup> Á pangilayalayâ mi ngaw nikayu, inipakánnámu mi ta naginnanolayin si Apu Kesu Kiristu. Á ngattâ, ta aijan nikayu yù ira makkagi ta ari maginnanolay yù námmatay?

<sup>13</sup> Ta nu kuruk nakuan ta arán na paginnolanay ni Namarò yù námmatay, á kuruk nakuan gapay ta ari naginnanolay si Apu Kesu Kiristu.

<sup>14</sup> Á nu ari nakuan naginnanolay si Apu Kesu Kiristu, á awán laguk ta serbi nayù pangilayalayâ mi, á awán gapay ta serbi nayù pangikatalà naw kâ Apu.

<sup>15</sup> Á mepasingan nakuan ta nassiri kami ta meyannung kâ Namarò, gapu ta kinagi mi ta pinaginnanole na si Apu Kesu, nga arán na ga pinaginnanolay, nu kuruk nakuan nga ari maginnanolay yù ira námmatay.

<sup>16</sup> Ta nu arán na nakuan paginnolanay ni Namarò yù ira námmatay, á ari laguk nakuan napaginnanolay si Apu Kesu Kiristu.

<sup>17</sup> Á nu arán na nakuan pinaginnanole si Apu Kesu Kiristu, á awán laguk nakuan ta serbi nayù pangikatalà naw kuna, á magikáru kayu paga nakuan ta liwiliwâ naw, gapu ta arán na kayu paga mapakomá ni Namarò.

<sup>18</sup> Á yù ira ngaw nangikatalà kâ Apu Kesu Kiristu, nga natayin, nagawáwán ira nakuan, ta arán na ira pinakomá, á aijan ira nakuan ta impiernu.

<sup>19</sup> Á nu iddanamát tam lâ yù pammakapiát tam sawe dabbuno, áんな awán nakuan ta iddanamát tam nga maginnanolay nga mesipâ kâ Apu Kesu Kiristu, á kâbbi ittam nakuan laguk, ánné sù ira ari manguruk.

<sup>20</sup> Ngam kukurugán nga kuruk nga pinaginnanole ni Namarò si Apu Kesu Kiristu! Á aggina yù napolu nga naginnanolay, tapè ammu tam ta kuruk nga maginnanolay gapay sangaw yù ira tatole ni Namarò nga námmatay.

<sup>21</sup> Ta matay yù ira ngámin nga tatolay megapu sù palliwâ na ngaw nayù tádday nga tolay, nga si Kákay Adan. Á kunnian gapay, duttál yù ággaw nga paginnanole na tatolay, megapu sù paginnanole nayù tádday, nga si Apu Kesu Kiristu.

<sup>22</sup> Matay yù ira ngámin nga tatolay nga ginaká ni Kákay Adan. Á kunnian gapay, yù ira ngámin nga mepattatádday kâ Apu Kesu Kiristu megapu sù pangikatalà da kuna, matolay ira gapu ta paginnolanay ni Namarò ira.

<sup>23</sup> Á si Apu Kesu Kiristu yù napolu nga naginnanolay nga aringin matay. Á sittam ngámin nga tatole na yù maporián nga maginnanolay gapay sangaw nu manoli si Apu Kesu ta dabbuno.

<sup>24</sup> Á duttál laguk yù pagáddekán na ággaw, á appútan ni Apu Kesu yù ira ngámin nga makikontará kuna, nga mammaguray áンna makáwayyá nga mammagaddátu, mássiki nu tolay ira onu di Satanás áンna yù ira kábulun na nga dimoniu áンna anitu. Á pangappú ni Apu Kesu nira, itoli na laguk yù ngámin nga pammagurayán na sù Yáma na, nga si Ammò Namarò.

<sup>25</sup> Ta sinalákkuruk na ngaw ni Namarò ta mówák nga mammaguray si Apu Kesu áddè ta pangappú na sù ira ngámin nga makikontará kuna.

<sup>26</sup> Á kabalín na appútan yù maporián nga makikontará kuna, á irián na yù paggapuán na pate na tolay, á aringin matay yù ira tatolay.

<sup>27</sup> Á bibrirat tam yù inipetúrâ ni Namarò nga kun na, “Á si Namarò, pinatulù na sù pammagure nayù Anâ na yù ngámin nga eggá.” Á ammu tam gemma ta ari mesipà si Namarò sù ngámin nga metulù kâ Apu Kesu Kiristu, gapu ta si Namarò yù mamatułù sù ngámin.\*

<sup>28</sup> Á sangaw nu napatalù yù ngámin sù Anâ ni Namarò, á tumulù gapay yù Anâ ni Namarò sù Yáma na nga nangiyawâ kuna sù ngámin, tapè si Namarò galâ yù kotunán nga mammaguray sù ngámin.

<sup>29</sup> Á ta meyannung sù kagian naw, nu kuruk nga ari nakuan maginnanolay yù ira námmatay, á anni má laguk ta ajian yù ira marigû ta pannakabaggi nayù ira námmatay nga ari narigû? Anni panò yù kagiad da nga serbi nayù pakirigû da, nu ari maginnanolay yù ira námmatay?

<sup>30</sup> Á nu ari nakuan maginnanolay yù ira námmatay, anni má panò ta umay kami mangilayalayâ sù bilin ni Namarò, nepatalugáríng ta ammu mi ta ajian yù ira nga ikáyada mamapáyat nikami ta kággággaw?

<sup>31</sup> Á wáwwagi, kuruk yù kagiad ku nikayu, nga magisassengà matay ta kággággaw, megapu sù pangilayalayâ ku. Á kunnian, kuruk gapay ta ayatánâ megapu sù pangikatalà naw kâ Apu Kesu Kiristu.

<sup>32</sup> Á yù ira nakikontará nikán ta keggâ ta ili na Epeso, kun na simaron nga ayám ira nga mangnuá nikán. Á iyabbû ku laguk, anni panò yù iddanamák ku nga bálâ ku ta pagattam ku sù panigirigâ da nikán, nu aringâ nakuan magiddanáma ta paginnanolè? Á nu kuruk nakuan nga ari maginnanolay yù ira námmatay, á mappabbúyâ ittam laguk, nga kunnay ta kagian nayù ira káruán, nga kud da, “Kumán ittam lâ kumán áンna mappissán ittam, ta matay ittam sangaw.”†

<sup>33</sup> Aro! Arán naw ilogò yù baggi naw! Ari gemma kuruk yù kagiad da. Yawe yù kuruk nga nakagi, “Nu mepulù ittam sù ira narákè, mekanâ ittam sangaw sù narákè nga akka-akkuáda,” kun na.

<sup>34</sup> Pasikkáalan naw laguk yù nonopan naw. Pallikuránán naw yù narákè nga ággangnguá naw, á ari kayu laguk malliwâ má. Ta ajian garè nikayu yù ira nga arád da paga ammu si Namarò. Á mappasirán kayu nakuan ta mówák ku nga kagian nikayu.

*Yù Baggi tam nga Molingin sangaw ta Paginnanole tam*

<sup>35</sup> Á ta meyannung sù paginnanole nayù ira námmatay, ajian támma yù tolay nga ikáyâ na nga mangiyabbû, nga kun na, “Á kunnasi yù paginnanole nayù ira námmatay? Á anni panò yù áaggián nayù baggi ra nu maginnanolay ira?”

<sup>36</sup> Aro! Sikaw nga mangiyabbû, ari panò nataggâ yù nonò mu? Aru yù keyarigán nayù baggi tam nga maginnanolay. Ta ángngarigán, nonopan naw yù bini nga imulá naw. Mówák nga memulâ bì, nga kunnay ta natay nga netanam, lage na mattubbu ta bagu nga baggi na.

<sup>37</sup> Á mássiki nu aggì onu tanakuán yù bini nga imulá naw, á ta pattubbu na, dumá ngin yù baggi na, ta aringin yù bukal nga inimulá naw.

<sup>38</sup> Ta iyawâ ni Namarò yù bagu nga baggi na, nga mepángngà sù ira katággitádday nga bini.

<sup>39</sup> Á yù ira ngámin nga egga nga matolay, makkakerumá gapay yù baggi ra. Ta naddumá yù pattak na tolay ta pattak na ayám. Á tanakuán gapay yù pattak na mammánù ta pattak na sira.

<sup>40</sup> Á makkakerumá gapay yù áaggián nayù baggi ra nga egga ta lángì áンna yù ira nga makkakerumá yù baggi ra nga ajian ta dabbuno. Á nerumá yù kakástá nayù baggi nayù ira nga ajian ta lángì sù baggi nayù ira nga ajian ta dabbuno.

<sup>41</sup> Ta tanakuán yù dalingárang nayù bilák sù dalingárang nayù bulán. Á mássiki yù ira bituan, makkakerumá yù dalingárang da nga katággitádday.

\* 15:27 Salmo 8:6    † 15:32 Isaya 22:13

<sup>42</sup> Á kunnian yù keyarigán nayù ággíán nayù ira baggi na tolay ta paginnanole nayù ira námmatay. Ta nu matay ittam, á metanam ittam, á marúnù yù baggi tam. Ngam sangaw nu paginnolanay ni Namarò ittam, á ari ittamin bulubugá matay nga marúnù, nu ari galâ nga matolay yù baggi tam ta áddè ta áddè.

<sup>43</sup> Á makálirák garè yù natay nga netanam, nga awán ta pakáwayyá na. Ngam sangaw nu maginnolanay, makástá ánnna makáwayyá.

<sup>44</sup> Á saw dabbuno yù kepángngatán nayù ira baggi tam nga matay. Ngam sangaw nu paginnolanay ni Namarò yù ira baggi tam, moli iren, nga mepángngà nga maggián ta lángi. Á ammu tam ta ajian yù ira baggi tam nga mepángngà nga maggián ta dabbuno. Á gapu ta ajian yù baggi tam nga mepángngà nga maggián ta dabbuno, ammu tam ta ajian gapu yù ira baggi tam nga mepángngà nga mepaggián kâ Namarò ta lángi.

<sup>45</sup> Á mabibik tam yù inipetúrá ni Namarò sù dán nga libru na, nga kun na, "Si Kákay Adan yù olu nga tolay nga pinarò ni Namarò, á iniyawâ ni Namarò kuna yù inángà na, tapé matolay."<sup>‡</sup> Á si Apu Kesu Kiristu yù sinullà ni Namarò, nga táli nayù ngaw Adan. Aggina yù sigga-inángà nga manotolay, á iyawâ na nittam yù inángà nga mannanáyun nga awán ta áddè na, tapé mesipà ittam kuna ta lángi.

<sup>46</sup> Á mepasingan nittam ta ari ta lángi yù kepángngatán nayù tolay nga napolu, nu ari galâ ta dabbuno. Á yù naporián, aggina si Apu Kesu, nga mepángngà ta lángi. Kunnian yù keyarigát tam, ta arát tam nakeyanatán yù baggi tam nga mepángngà ta lángi. Ngam ta paginnanole tam, yù baggi tam nga maporián yù mepángngà ta lángi.

<sup>47</sup> Á pidde ni Namarò si Kákay Adan, nga napolu nga tolay, nga naggapu ta káppù na dabbun. Á si Apu Kesu yù maporián, nga naggapu ta lángi.

<sup>48</sup> Á gapu ta ginaká na ittam ngámin ni Kákay Adan, á yáyù nga ajian yù baggi tam nga kunnay ta baggi na nga naggapu ta káppù na dabbun. Á sittam ngámin nga nepattatáddy kâ Apu Kesu Kiristu megapu sù pangikatalà tam kuna, meyawâ nittam yù baggi tam nga kunnay ta baggi na nga mepángngà ta lángi, sangaw nu mesipà ittam gapay kuna ta lángi.

<sup>49</sup> Á gapu ta negittá yù baggi tam sù baggi ni Kákay Adan, nga olu nga tolay nga naggapu ta káppù na dabbun, á kunnin gapay, mepaggitá yù baggi tam sangaw sù baggi ni Apu Kesu Kiristu, nga naggapu ta lángi.

<sup>50</sup> Á yawe yù kagiak ku nikayu, wáwwagì. Yù baggi na tolay nga matay, ari mesipà sù pammagurayán ni Namarò ta lángi. Ta matay garè yù baggi tam, nga marúnù sawe dabbuno, gapu ta awán ta awayyá na nga mannanáyun nga matolay.

### *Si Apu Kesu yù Manotolay nga Mangappù ta Patay*

<sup>51</sup> Á ginnán naw yawe, ta ajian yù kagiak ku nikayu nga inilímak na ngaw ni Namarò, ngam inipakánnámmu na nikán. Sittam nga mangikatalà kâ Apu Kesu, ari ittam ngámin matay, ngam ikáddagâ lâ moli ngámin yù baggi tam.

<sup>52</sup> Á alistu yù kesimmu na, nga kun na pakkimâ na matá, sangaw nu doban ni Namarò yù magamariung sù pagaddekán na ággaw. Á ta pagamariung na, á yù ira námmatay nga netádday kâ Apu Kesu Kiristu, ikáddagâ lâ ira maginnolanay nga aringin bulubugá matay. Á sittam nga matolay paga, nga netádday kâ Apu, á ikáddagâ moli yù baggi tam nga aringin bulubugá matay.<sup>§</sup>

<sup>53</sup> Ta yawe baggi tam nga matay, máwák nga moli, tapé ari ittam bulubugá matay, ngam matolay ittam ta áddè ta áddè. Á yù maddán nga marúnù, máwák nga moli, tapé mannanáyun nga ari maddán.

<sup>54</sup> Á sangaw nu molingin yù baggi tam, ari ittamin bulubugá matay, ánnna sangaw nu molingin yù maddán nga marúnù, á napiá ittamin nga mannanáyun, á yayù sangaw yù katuppál nayù dán nga netúrá, nga kun na,

"Awánin ta námmatay, ta pinaginnanole ni Namarò ira."<sup>\*</sup>

<sup>55</sup> "Máppù ittam panò megapu sù pate tam?

Ari gemma, ta arán na ittam ni Namarò ukuman.

Ari ittam maganássing nga matay,

ta ari ittamin mapagikáru."<sup>†</sup>

<sup>56</sup> Ta maganássing yù ira tatolay nga matay gapu ta ammu ra ta mapagikáru ira megapu sù liwâ da. Á máwák nga mapagikáru ira gapu ta nakaliwatád da yù tunung ni Namarò.

57 Á dayawat tam laguk si Namarò. Ta megapu sù kingnguá ni Apu Kesu Kiristu, nga mangiyigù nittam, ari ittam maganássing nga matay, gapu ta náringin yù ngámin nga liwiliwá tam megapu sù pagikáru ni Apu Kesu.

58 Á wáwwagi nga iddukak ku, yáyù nga ipasigaggà tam laguk yù ángngikatalà tam kâ Apu Kesu, tapè ari ittam mekáttuay kâ Apu. Á uputat tam nga tuppálan yù ngámin nga ipakuá na nittam, ta ammu tam ta ajjan yù pammakapiát tam megapu sù ngámin nga pattarabáku tam nga masserbi kuna.

## 16

*Yù Pangabbák tam sù ira Wáwwagi tam nga Magáwák*

1 Á ta meyannung sù pangunnuk naw ta kuártu nga ángngabbák naw sù ira tatolay ni Namarò nga marigirigâ, á tuppálan naw yù kunnay sù kinagi gapay sù ira wáwwagi tam nga taga Galasia ta meyannung sù ángngabbák da nira.

2 Á ta káda Liggu, isinná naw yù iyawâ naw nga naggapu ta ganánsiá naw nga katággitádday, yù lâ áddè na meyawâ naw, mássiki nu aru onu baddì. Á unnuran naw yù kuártu, tapè dán nga naparán yù ángngabbák naw nira sangaw nu lubbekâ ta gián naw ta Korinto.

3 Á labbè ku sangaw, dobak ku yù ira piníli naw nga ikatalà naw nga mangituluk sù iyawâ naw, tapè ituluk da ta ili na Jerusalem. Á ipetuluk ku gapay nira yù túrâ ku nga mangipakánnámmu sù ira labbetád da ta naggapu ira nittam, tapè alawataad da ira.

4 Á nu kagiak ku ta napiá ta urè nu umayà gapay ta Jerusalem, á mepulù ira laguk nikán.

*Yù Panalákkuruk ni Pablo nga Manúllun sù ira taga Korinto*

*2 Korinto 1:15-24*

5 Á talákkurugak ku ta umayà sangaw ta gián naw, ta et takayu tullúnán. Á pattalebák ku ta Masidonia, maddagákà bi támma tám nga mangituddu ta paggagammungád da.

6 Á sangaw nu umayà ta gián naw, maggiánà nikayu ta mabayák támma, mássiki áddè ta pappasá nayù ammián, tapè sikayu yù mangabbák nikán, ta paggagannuá ku sangaw nu duttál yù ággaw nga pánò nikayu nga umay ta tanakuán nga lugár.

7 Ta arák ku ikáyâ ta mabi lâ yù paddagâ ku ta gián naw, nu ari galâ ta mabayágà ta baddì, nu anugutan ni Namarò.

8 Á yáyù nga ipáppánnâ bì yù pánò saw ili na Epeso, áddè ta pappasá nayù piestá na Pentekosto,

9 gapu ta aru yù awayyâ nga mangituddu sù bilin ni Namarò, mássiki nu aru yù ira makikontará nikán.

10 Á sangaw nu umay si Timotio sù gián naw, alliúgan naw ta napiá, ta aggina yù kunnay nikán nga masserbi kâ Apu Kesu.

11 Á yáyù nga makimoray kayu kuna ta napiá. Arán naw iluddè, ngam abbágán naw sangaw nu maggagannuâ, tapè makatoli saw giák ku, ta iddagák ku, ánná yù ira kábulun na.

12 Á si Apolo, nga wagi tam, kinagi kuna ta mepulù nakuan sù ira wáwwagi tam nga umay mattúllun nikayu, ngam awán ta awayyá na kunangan. Á sangaw lâ nu matángngák na, en na kayu laguk tullúnán.

*Yù Naporián nga Pangitarbarang ni Pablo*

13 Á sikayu, mappalán kayu laguk, tapè ari kayu melogò. Á ipasigaggà naw yù pangikatalà naw kâ Apu. Á ari kayu maganássing, á ipe naw yù urà naw nga malláppà laguk na manuppái sù ngámin nga ipakuá ni Namarò nikayu.

14 Á ta ngámin nga akkuán naw, ipasingan naw yù pakkaká-iddù naw.

15 Á wáwwagi, ammu naw di Estepano ánná yù ira kábbale na, ta aggira yù olu nga nangikatalà kâ Apu ta lugár na Akeya. Á áddè ngaw ta kapángnguruk da ta áddè kunangan, inupù da yù ángngabbák da ta napiá sù ira kábulud da nga mangikatalà kâ Apu.

16 Á yáyù nga ikomâ nikayu ta tumulù kayu nira ánná yù ira ngámin nga kunnay nira nga masserbi kâ Namarò, á tángngagan naw yù itabarang da ánná yù itaddád da nikayu.

17 Á ayatánà sù labbè di Estepano kári Portunato kâ Akeko, ta maraddamà gapu ta awán ta awayyá naw nga umay, á aggira yù táli naw nga mangabbák nikán.

18 Á nabannáyád da yù nonò ku ta kunnay ta pamanne ra gapay ngaw sù nonò naw. Á napiá nu tángngagat tam ira laguk, ánná yù ira ngámin nga masserbi ta napiá nga kunnay nira.

<sup>19</sup> Á yù ira ngámin nga mangikatalà kâ Apu nga taga Asia, kagiad da ta parè bì ta napiá yù áaggián naw, á iyabbû da nu kunnasi kayu ngámin. Á kunnian gapay yù kagiad di Akila kâ Persila nga atáwa na, áんな ngámin ira nga maggagammung ta bale ra.

<sup>20</sup> Á yù ira ngámin nga wáwwagi tam, iyabbû da gapay nu kunnasi kayu. Á ta paggagam-mung naw, makkakámoray kayu, tapè mepasigan yù pakkaká-iddù naw.

<sup>21</sup> Á inipetúrâ ku yawe ngámin ta áddè saw. Á silkán lápay yù mattúrâ sù ngágak ku. Pablo.

<sup>22</sup> Á nu ajjan nikayu yù áppè pípiá nga awán ta ayâ na kâ Apu Kesu Kiristu, nga Yápu tam, á mokum laguk, nga mapagikáru ta áddè ta áddè. Á Apu, umay ka bì umay!\*

<sup>23</sup> Á parè bì ta mepulù nikayu si Apu Kesu nga mangikállà áんな mangiddù nikayu.

<sup>24</sup> Á awán ta áddè nayù ángngiddù ku gapay nikayu ngámin nga mangikatalà kâ Apu Kesu Kiristu. Á yawe yù áddè nen. Ammán!

---

\* **16:22** "Maranatha," kud da ta ággubobuk na Gareko, á yù kebalinán na, "Apu, umay ka bì umay!"

## Yù Mekaruá nga Túrâ ni Pablo sù ira Manguruk nga taga Korinto

*Yù Meyannung sù Túrâ*

Pattúrâ ni Pablo sawe mekaruá nga túrâ na sù ira tatolay nga naggián ta Korinto nga mangikatalà kâ Apu, á tangaragun yu nappasággin áddè ngaw pattúrâ na sù olu nga túrâ na nira. Á naburung si Pablo, marakè ari ira magayáyâ megapu sù initúrâ na nga paggammá na nira. Á yáyù nga jinok ni Pablo si Titò, ta en na ira tullúnán, nu tuttulad da yù taddán na nra meyannung sù pamakomá ra áんな pamanne ra sù ira kábulud da.

Á keggá ni Pablo ta Masidonia, limibbè si Titò nga naggapu ta Korinto. Á napiá yù iniránuk ni Titò ta meyannung sù ira manguruk nga taga Korinto, ta kinuruk da yù kinagi ni Pablo nira, áんな magayáyâ ira. Ngam ajjan ta Korinto yù ira nga massiri, nga nakkagi ta ari kuruk nga minángngilayalayâ si Pablo, ta arán na sinullà ni Apu Kesu Kiristu.

Á pakarámak ni Pablo ta meyannung sù ira mallillibâ kuna ta Korinto, initúrâ na laguk má yù mekaruá nga túrâ na sù ira taga Korinto, tapè kurugad da yù kagian na saw nga meyannung ta panullà ni Apu Kesu Kiristu kuna. Á kagian na gapay yù ngámin nga inattamán na nga jigâ, tapè ipakánnámmu na si Apu Namarò áんな yù bagu nga tarátu na. Á aru paga yù ituddu ni Pablo nga meyannung sù pamakkápiá ni Namarò ta tatolay kuna.

*Yù Mayán nayù Túrâ*

Yù Paddáyo ni Pablo kâ Namarò (1:1-11)

Ibukalán ni Pablo yù Pabbabáwi na nga Umay ta Korinto (1:12-2:4)

Yù Pamakomá tam áんな yù Pamanne tam sù ira Napággág (2:5-17)

Yù Meyannung sù Bagu nga Tarátu ni Namarò (3:1-18)

Si Namarò yù Paggapuán nayù Pakáwayyâ tam nga Masserbi kuna (4:1-12)

Moli yù Baggi tam ta Paginnanole tam nga Mesipâ kâ Namarò ta Lángì (4:13-5:10)

Makikopun ittam kâ Namarò megapu sù Ketapil ni Apu Kesu (5:11-6:13)

Ari Mepappárík yù ira Manguruk sù ira ari Manguruk (6:14-7:1)

Yù Pagayáyâ ni Pablo megapu sù ira taga Korinto (7:2-16)

Mangabbák ittam sù ira Kábulut tam nga Magáwák (8:1-9:15)

Yù Itabbák ni Pablo sù ira Mamaliwâ kuna (10:1-18)

Yù Meyannung sù ira Áppè Minángngilayalayâ (11:1-15)

Yù Meyannung sù Pagattam ni Pablo (11:16-33)

Yù Inipasingan ni Namarò áんな Inipalappâ na kâ Pablo (12:1-10)

Yù Naporíán nga Itabarang ni Pablo sù ira taga Korinto (12:11-13:14)

<sup>1</sup> Sikán si Pablo, nga sinullà ni Namarò ta mangilayalayâ sù bilin na nga meyannung kâ Apu Kesu Kiristu. Á si Timotio yù kabbuluk ku, nga wagi tam nga mangikatalà kâ Apu Kesu. Á mattúrâ kami nikayu nga taga Korinto, áんな yù ira ngámin nga tatole ni Namarò ta purubinsia na Akeya.

<sup>2</sup> Á parè bì ta napiá yù gawagawáyán naw áんな yù ággíán naw, áんな magimammâ gapay yù nonò naw, megapu sù pangikállâ da nikayu di Namarò nga Yáma tam kâ Apu Kesu Kiristu nga Yápu tam.

*Yù Paddáyo ni Pablo kâ Namarò*

<sup>3</sup> Dayáwat tam si Namarò, nga Yáma nayù Yápu tam, si Apu Kesu Kiristu. Ta mangikállâ si Namarò, áんな dán nga naparán nga mamannay nittam ngámin nga makiyáma kuna.

<sup>4</sup> Á nu marigirigâ ittam, bannáyán na ittam, maguray lâ yù jigâ tam, tapè ammu tam gapay yù mamannay sù ira kábulut tam nga marigirigâ ta makkakerumá nga jigâ, nga kunnay sù ámmanne ni Namarò nittam.

<sup>5</sup> Á megapu sù ketádde tam kâ Apu Kesu Kiristu, á kunnay kuna, attamát tam lâ yù jigâ nga umay nittam. Á yáyù nga mabannáyán ittam gapay nga kunnay kuna, megapu sù ámmanne ni Namarò nittam.

<sup>6</sup> Á sikami, attamám mi yù jigâ nga umay nikami megapu sù pangilayalayâ mi sù napiá nga dámak, tapè pabbalinán na yù pakkapiánán naw, á meyígù kayu megapu ta pagginná naw sù bilin ni Namarò. Á gapu ta mabannáyán kami megapu sù ángngabbák ni Namarò nikami, abbágán na kayu gapay, á mabannáyán kayu, áんな meyattam naw gapay yù jigâ nga kunnay sù attamám mi.

<sup>7</sup> Á yáyù nga awán ta ikaburung mi nikayu, ta mássiki nu marigirigâ kayu nga kunnay nikami, á ammu mi ta abbágán na kayu ni Namarò gapay, tapè mabannáyán kayu nga kunnay nikami.

<sup>8</sup> Á wáwwagi, arám mi ilímak nikayu yù nesimmu nikami sù paggiám mi túrin ta purubinsia na Asia, ta nappanà yù jígâ mi áddé te arám mi kapállâ, nga kunnay ta náríngin yù iddanáma mi nga matolay.

<sup>9</sup> Ta kagiam mi ta matay kami ngin tán. Ngam nesimmu lâ nikami, tapè ari yù baggi mi yù ikatalâ mû, nu ari galâ si Namarò, nga mamaginnanolay sù ira námmatay.

<sup>10</sup> Ta mássiki nu nágisassay kami natay, á iniyígù na kami ni Namarò. Á iyígù na kami má gapay. Á iddanámám mi ta uputan na kami nga abbágán, á melilli kami má sù pate mi.

<sup>11</sup> Á sikayu, máwák nga abbágán naw kami gapay, megapu sù aru nga ipakimállâ naw kâ Namarò megapu nikami, tapè ikálâ na kami ni Namarò ánnna abbágán na kami. Á yáyù nga aru gapay yù ira maddáyaw kâ Namarò, megapu sù pangikállâ na nikami ta pakaginná na sù ipakimállâ naw.

### *Ibukalán ni Pablo yù Pabbabáwi na nga Umay ta Korinto*

<sup>12</sup> Á magayáykâ, gapu ta napiá lâ yù nonò ku ánnna yù kustombarè sù ira ngámin nga tatolay ta dabbuno, á nepatalugáring nikayu nga wáwwagi. Á aringâ áppè pípiá, ngam matunwing yù ngámin nga ákkuák ku ánnna yù ngámin nga kagiak ku nikayu, nga ari naggapu sù sírik na tolay, nu ari galâ sù pangikállâ ni Namarò nikán.

<sup>13</sup> Á itúrâ ku lâ nikayu yù awayyá naw nga babbiran ánnna kánnámuún naw. Á mássiki nu arán naw paga nánnámuún, á iddanámák ku ta mánnámuún naw sangaw ngámin,

<sup>14</sup> tapè magayáykâ kayu megapu nikami, ánnna magayáykâ kami gapay megapu nikayu, sangaw nu pagáddekan na ággaw, nu mattoli si Apu Kesu Kiristu nga mamanunnú ta ngámin nga tatolay.

<sup>15</sup> Á gapu ta mappelokâ megapu sù pagayáykâ naw nga mamaddulò nikán, á sinalákkuruk ku ngaw ta pidduát takayu nga tullúnán, tapè mamiddúu gapay yù pammakapián naw megapu nikán.

<sup>16</sup> Ta ninonò ku ta maddagákkâ nakuan ta gián naw nu umayà ta Masidonia, á maddagákkâ má nikayu sangaw nu manolingâ nga maggapu ta Masidonia, tapè abbágán nawà nakuan sù paggagannuâ ku nga umay ta Judiya.

<sup>17</sup> Á aijan támma nikayu yù makkagi ta nu kuruk nga ikáyâ ku nga umay mattúllun nikayu, á anni má laguk ta arák ku palurotan? Onu kagiad da támma ta malogonâ mabbabáwi. Ngam arán naw kagian ta aringâmekatalâ nga kun na tolay nga ari makimoray kâ Apu.

<sup>18</sup> Ta kuruk gapay nga mekatalâ yù ngámin nga kagiam mi, ta kunnay ta mekatalâ si Namarò. Á ari kami mabbábâng, nga makiawan ta arubâng naw ánnna mangari ta likuk naw.

<sup>19</sup> Á ari gemma mabbábâng si Apu Kesu Kiristu nga Anâ ni Namarò nga inilayalayâ mi nikayu, sikami kári Silas kâ Timotio. Ta kuruk ngámin yù kinagi ni Apu Kesu, á pinalurò ni Apu Kesu yù ngámin nga inipakuá nayù Yáma na kuna.

<sup>20</sup> Á mapalurò yù ngámin nga initabbâ ni Namarò megapu kuna. Á yáyù gapu na nga ikatalâ tam si Namarò megapu kâ Apu Kesu, á kagiad tam ta “Ammán!” gapay ta ngámin nga initabbâ ni Namarò nittam, tapè meparáyaw si Namarò.

<sup>21</sup> Á si Namarò yù mangipasigaggâ sù kepattatádde tam kâ Apu Kesu, á sinullâ na ittam ta tatole na nga masserbi kuna.

<sup>22</sup> Á iniyawâ na nittam yù Ikararuá na, nga aijan nittam, nga panákkilalát tam ta tatole ni Namarò ittam. Á yù Ikararuá ni Namarò yù ipamakuruk na nittam ta iyawâ na nittam gapay sangaw yù ngámin nga initabbâ na.

<sup>23</sup> Á si Namarò yù massistígu ta kuruk yù kagiak ku nikayu. Á yawe laguk yù gapu na nga aringâ minay nattúllun nikayu, gapu ta iniddagák ku lâ yù pabbabáwi naw ta liwâ naw, maraké maraddam kayu sangaw nu gammát takayu.

<sup>24</sup> Á ari sikami yù mammaguray nikayu, nu ari galâ si Namarò, á napiá yù ángnguruk naw kuna. Ngam sikami, abbágám mi sikayu lâ, tapè magayáykâ kayu megapu sù napasigaggâ nga pangikatalâ naw.

## 2

<sup>1</sup> Á yáyù laguk nga sinalákkuruk ku ta aringâ bì umay mattúllun nikayu, nu máwák nga gammát takayu má, maraké sikán laguk yù paggapuán nayù pasirán naw ánnna daddam naw.

<sup>2</sup> Ta nu maraddam kayu ta pamanunnù ku nikayu, á asinni laguk yù mamagayáyâ nikán, nu ari galâ yù ira nga pinaraddam ku!

<sup>3</sup> Á yáyù nga nattúrákà ngaw nikayu, tapè aringà nakuan maparaddam megapu nikayu, nu marángnganát takayu paga nakuan nga mangnguá ta naráké. Ta sikayu yù mamagayáyâ nikán nu umayà sangaw ta gián naw. Á ammù gemma ta nu ayatánà nakuan, á mepagayáyâ kayu ngámin gapay megapu sù pagayáyâ ku.

<sup>4</sup> Á sù ngaw pattúrâ ku nikayu, á naraddamà kuruk ánnà nabagabagalà nga nakkulukulè, megapu sù narákè nga kingnguá naw. Ngam yá lá ipattúrâ ku, ari ta paraddamat takayu, nu ari galâ ta ipakánnámmu yù nepallà nga ángngiddù ku nikayu.

*Yù Pamakomá tam ánnà yù Pamanne tam sù ira Napágágáng*

<sup>5</sup> Á ta meyannung sù tolay nga ajjan nikayu nga nalliwâ, á ari lâ sikán yù pakaliwatán na, nu ari gapay sikayu. Á arák ku kagian ta sikayu ngámin yù pakaliwatán na, ngam yù ira káruán nikayu, ta arák ku ikáyâ nga patturutan yù kagiak ku nga meyannung sù liwâ na.

<sup>6</sup> Á arungin nikayu yù namággágang kuna. Á kustungin yù pamággágang naw kuna.

<sup>7</sup> Á nu napággág yù tolay nga nakaliwâ, á máwák tam laguk pakomán. Pakomán naw laguk, á bannáyán naw yù nonò na, marakè mapállâ yù tolay, megapu sù daddam na ánnà pasíráñ na.

<sup>8</sup> Ta yáyù nga ikomâ nikayu ta ikállà naw, ánnà ipasingan naw yù ángngiddù naw kuna.

<sup>9</sup> Á ajjan paga yù inipattúrâ ku nikayu, ta parubát takayu, tapè mánnámmuák ku nu manguruk kayu sù ngámin nga taddák ku nikayu.

<sup>10</sup> Á nu ajjan yù ira kábulun naw nga pinakomá naw, á pakomák ku ira gapay. Ta nu ajjan yù tolay nga máwák ku nga pakomán, á pinakomâ laguk ta paningan ni Apu Kesu Kiristu, tapè mábbágán kayu.

<sup>11</sup> Á yáyù nga pakomát tam yù ira kábulut tam, tapè ari ittam melogò kâ Satanas, ta ammu tam gemma yù ikáyâ ni Satanas nga akkuán nittam.

*Yù Pangipakánnámmu di Pablo ta Meyannung kâ Apu Kesu*

<sup>12</sup> Á pánò ta Epeso, minayà ta ili na Tarowas. Á nélek ku tán yù aru nga awayyâ nga mangilayalayâ sù napiá nga dámak nga meyannung kâ Apu Kesu. Á yáyù nga nánnámmuák ku ta abbágán nangâ ni Apu.

<sup>13</sup> Ngam ari magimammâ yù nonò ku, gapu ta arák ku nálerán tán si Titò nga wagi tam. Á yáyù nga nánawák ku bì yù ili na Tarowas, á minayà ta purubinsia na Misidonia.

<sup>14</sup> Á dayáwat tam laguk si Namarò, gapu ta aggina yù mangappù sù narákè. Á sittam nga mepattatádday kâ Apu Kesu, tatole na ittam. Á aggina yù mangituluk nittam sù angayát tam, ánnà abbágán na ittam, tapè ipakánnámmu tam yù bilin na nga meyannung kâ Apu Kesu ta ngámin nga lugár, nga kunnay ta passamâ nayù aguk na bábbanguk nga naggapu nittam.

<sup>15</sup> Á magayáyâ si Namarò megapu nittam, gapu ta ipakánnámmu tam si Apu Kesu sù ira ngámin nga tatolay, tapè meyígú ira. Á aggira lá yù maguray, nu manguruk ira onu ari ira manguruk.

<sup>16</sup> Á magayáyâ yù ira magginná sù bilin ni Apu, ta yáyù pakáwayyá ra nga makisipâ sù áttole ni Namarò nga awán ta áddè na, megapu sù panguruk da. Ngam yù ira nga ari manguruk, molang da ginnán, gapu ta yáyù pánakkilálád da ta nakaliwâ ira nga metabbà ta impierlu ta áddè ta áddè.

Á eggá panò yù tolay nga makáwayyá nga mamalurò ta kunniauw nga ikalángam mi?

<sup>17</sup> Awán bulubugá ta makáwayyá, nu ari lâ megapu sù pakáwayyá ni Namarò. Á ari kami nagittá sù ira áppè pípiá, nga mangituddu sù bilin ni Namarò tapè málâ da yù táddad da. Ngam sikami, kuruk nga napiá yù nonò mi, á ta ánnunganán ni Namarò, ilayalayâ mi yù bilin ni Namarò nga meyannung kâ Apu Kesu Kiristu, megapu galâ sù pakáwayyá ni Namarò nga nanullà nikami.

### 3

*Yù Meyannung sù Bagu nga Tarátu ni Namarò*

<sup>1</sup> Á anni yù nonotan naw ta meyannung sù kagiak ku, nga ari kami nagittá sù ira áppè pípiá? Kagian naw panò ta mappeddaráyaw kami? Mawák mi panò nga ipasingan nikayu yù túrâ nayù ira nakituddu nikami, nga ipamakuruk mi nikayu ta kuruk nga minángngilayalayâ kami? Á nu manaw kami nga umay ta tanakuán nga lugár, máwák mi panò nga ipetúrâ nikayu yù ipasingam mi sù ira tatolay tán? Ta ajjan yù ira nga kunnian yù akkuád da, ngam awán ta máwák mi nga akkuán.

<sup>2</sup> Ta sikayu yù kun na túrâ nga ipasingam mi, nga massistígu ta kuruk yù kagiam mi, gapu ta napiá yù panguruk naw megapu sù pangituddu mi. A ngámin nga tatolay, masingad da yù napiá nga ággangnguá naw, á matákkilálád da ta napiá yù panguruk naw, á yáyù nga kánnámmuád da ta kuruk nga sinullà na kami ni Namarò ta mangilayalayâ.

<sup>3</sup> Á gapu ta panguruk naw, kunniauw yù keyarigán naw. Sikayu yù kun na túrâ ni Apu Kesu Kiristu, nga inipetubbuk na nikami. Á ari kayu yù kuruk nga túrâ nga tintá ánná papel, nu ari galâ sikayu yù kunnay ta túrâ nayù Ikararuá ni Namarò nga manotolay. Á ari yù dappik nga batu yù nangitúratán na, nga kunnay sù ngaw iniyawâ na kâ Kákay Moyses, nu ari galâ yù nonò naw yù kunnay ta nangitúratán na.

<sup>4</sup> Á yá galâ yù gapu na nga ajjan yù awayyá mi nga makkagi ta kuruk nga napiá yù pangilayalayâ mi, gapu ta si Namarò yù ikatalà mi, nga mangabbák nikami megapu sù kepattatádde mi kâ Apu Kesu Kiristu.

<sup>5</sup> Á awán ta awayyá mi nga makkagi ta sikami lápay yù makáwayyá nga mamalurò sù akka-akkuám mi. Ta ammu mi ta si Namarò galâ yù paggappuán nayù pakáwayyá mi.

<sup>6</sup> Ta sinullà na kami ni Namarò ta masserbi kuna, tapè ipakánnámmu mi yù bagu nga tarátu na. Á ari negittá yù bagu nga tarátu na sù tunung ni Kákay Moyses ngaw, ta iniyawâ ni Namarò yù Ikararuá na nga mangabbák ta tatolay, megapu sù bagu nga tarátu na. Á yá pabbalinán nayù tunung ni Kákay Moyses yù pamagikáru ni Namarò ta tatolay, gapu ta awán ta makatuppál kuna. Ngam megapu sù bagu nga tarátu na, tolayan nayù Ikararuá ni Namarò yù ira tatole na ta bagu nga áttolé ra, tapè mesipà ira kâ Namarò ta áddè ta áddè.

### *Maráyaw yù Bagu nga Tarátu*

<sup>7</sup> Á sù ngaw ketúrâ nayù tunung ni Namarò sù duá nga batu, nepalappâ yù dalingáráng ni Namarò ánná yù karáyo na. Á pakálawâ ni Kákay Moyses sù tunung, mássiki nu nabbalin ta pamagikáru ni Namarò ta tatolay, á naddalingáráng yù mammang ni Kákay Moyses. Á yù ira taga Israel, arád da narúlangán yù mammang na, gapu ta nakatulang yù dalingáráng na, mássiki nu nassisínù nga nári.

<sup>8</sup> Á gapu ta kunnian yù kepalaappâ nayù dalingáráng ni Namarò ánná yù karáyo na ta pangiyawâ na sù tunung na nga paggappuán nayù pate tam, á más makapállâ paga yù kepalaappâ nayù dalingáráng ni Namarò ánná yù karáyo na megapu sù bagu nga tarátu na nga meyawâ nittam megapu sù Ikararuá na.

<sup>9</sup> Ta maráyaw gemma yù tunung ni Namarò, mássiki nu nabbalin sù pamagikáru ni Namarò ta tatolay. Á más maráyaw yù bagu nga tarátu nga meyawâ ta tatolay megapu sù Ikararuá ni Namarò, ta mapakomá ira ta liwiliwâ da ánná mebiláng ira ta matunung ta ánnunganán ni Namarò.

<sup>10</sup> Á kunnay ta aringan masingan yù piá nayù tunung ni Namarò, megapu sù kapiánán nayù bagu nga tarátu ni Namarò.

<sup>11</sup> Á nu maráyaw yù tunung ni Namarò, nga nabí lâ yù passerbi na, á nepatalugáring sù bagu nga tarátu na, nga maráyaw nga awán ta áddè nayù passerbi na.

<sup>12</sup> Á sikami, gapu ta ajjan yù iddanamám mi megapu sù mannanáyun nga tarátu ni Namarò, yáyù nga mappeló kami nga mangipakánnámmu sù meyannung kâ Apu Kesu.

<sup>13</sup> Á awán ta ilímak mi. Ari kami yù kunnay kâ Kákay Moyses ngaw, nga sinákkabán na yù mammang na, tapè arád da masingan nayù ira taga Israel yù kasisínù nayù lammâ nayù dalingáráng na.

<sup>14</sup> Ngam yù ira ngaw taga Israel nga kábulun ni Kákay Moyses, nataggâ yù nonò da. Á áddè ngaw ta áddè ta ággawo, nu bibbirad da yù dán nga tarátu ni Namarò nga iniyawâ na kâ Kákay Moyses, á kunnay ta natákkabán yù nonò da, ta arád da paga mánnámmuán yù kuruk nga kebalinán na. Á mári lâ yù tákkak nayù nonò da nu ikatalà da si Apu Kesu Kiristu, ta aggina yù mangabbák nira tapè mánnámmuád da laguk yù kuruk.

<sup>15</sup> Á ta áddè kunangan, nu bibbiran nayù ira taga Israel yù initúrá ni Moyses, á kunnay ta natákkabán lâ paga yù nonò da.

<sup>16</sup> Ngam nu mabbabáwì yù tolay ta liwiliwâ na ánná ikatalà na yù Yápu tam, mári laguk yù tákkak nayù nonò na, á mánnámmuán na.

<sup>17</sup> Á yù Yápu tam, aggina yù Mangilin nga Ikararuá. Á gapu ta ajjan yù Mangilin nga Ikararuá nittam, á kunnay ta pinalubbáng na ittamin. Á ari ittamin yù kunnay ta napukù nga magiddak sù pamagikáru ni Namarò, ánná abbágán na ittam, tapè makáwayyá ittam nga manakì nga malliwâ, ánná makáwayyá ittam gapay nga manuppál sù ipakuá ni Apu Namarò nittam.

<sup>18</sup> Á sittam ngámin nga mangikatalà kâ Apu Kesu Kiristu, kunnay ta náringin yù tákkan na nonò tam, gapu ta mánnañmuát tamin yù bilin na. Á sittam yù kepasinganán nayù piá nayù Yápu tam ánnna yù pakáwayyá na. Á pakanonò tam kâ Apu Kesu Kiristu ánnna pabbibbik tam sù bilin na, ulian na ittam ta taggibajji, tapè igittá na ittam kuna. Á si Apu Kesu yù Mangilin nga Ikararuá nga mamalurò karannian.

## 4

*Si Namarò yù Paggapuán nayù Pakáwayyá tam nga Masserbi kuna*

<sup>1</sup> Á gapu ta ammu mi ta jinok na kamí ni Namarò nga mangilayalayâ sù napiá nga dámak, megapu sù pangikállà na nikami, á yáyù nga ari kamí maganássing onu mabbábáng, mássiki nu marigirigâ kamí.

<sup>2</sup> Á arám mi akkuán yù narákè nga kepasiránán na tatolay, nga ikáyâ da ilímak. Ari kamí mangilogò. Ari kamí massiri. Á arám mi ulian yù bilin ni Namarò, ngam kagiam mi galâ yù kuruk nga bilin na, nga ibukalám mi tapè mánnañmuán naw. Á yáyù nga máawayyá nayù ira ngámin nga tatolay nga manákkilála ta awán ta narákè ta nonò mi, gapu ta napiá lâ ngámin yù akkuám mi ta ánninanán ni Namarò.

<sup>3</sup> Á nu ajjan yù ira nga ari makánnámu sù ilayalayâ mi, á kunnay ta natákkabán yù nonò da, gapu ta panaki da sù bilin ni Namarò, á mapagikáru ira ta impiernu ta áddè ta áddè.

<sup>4</sup> Ta si Satanas yù mammaguray nga pakiyápuán nayù ira tatolay ta dabbuno nga ari manguruk kâ Apu Kesu, á lippárán ni Satanas yù nonò da, tapè ari mapannawák, ánnna arád da mánnañmuán yù napiá nga dámak nga meyannung sù karáyo ni Apu Kesu Kiristu, nga kagittá ni Namarò.

<sup>5</sup> Á yù ilayalayâ mi, ari yù baggi mi, nu ari galâ si Apu Kesu Kiristu nga Yápu tam. Á sikami nga mangilayalayâ, kunnay kamí ta aripan naw, megapu sù pangayâ mi kâ Apu Kesu.

<sup>6</sup> Á si Namarò, kapámmarò na ta dabbuno, nagubobuk, á pinannawák na yù jibbà. Á pannawagan na gapay yù nonò tam, tapè kánnámuát tam yù pakáwayyá na ánnna karáyo na, nga mepakánnámu megapu kâ Apu Kesu Kiristu.

<sup>7</sup> Á sikami yù pangikatalakán ni Namarò nga mangilayalayâ sù bilin na, mássiki nu tolay kamí lâ nga nakápi ánnna nagukák, nga kunnay ta bângá, nga napadday ta lûpè, tapè mepasingan ta ari naggapu sù baggi mi lápay yù pakáwayyá mi nga mamalurò sù ipakuá ni Namarò nikami, nu ari galâ naggapu kâ Namarò nga makáwayyá ánnna makamangnguá ta ngámin.

<sup>8</sup> Á mame-aru kamí nga marigirigâ, ngam iddanamám mi lâ paga yù pappasá nayù jigâ mi, megapu sù ángngabbák ni Namarò nikami. Á mássiki nu arám mi ammu yù akkuám mi, á ari kamí bulubugá mapállâ.

<sup>9</sup> Jigirigádat da kamí nayù ira malussaw nikami. Ngam si Namarò, arán na kamí táttájíán. Á mássiki nu akkuád da kamí áddè ta magisassay kamí matay, á illí na kamí ni Namarò sù pate mi.

<sup>10</sup> Á ta kággággaw ajjan yù ira nga mangigágay nikami, nga kunnay ta naparubán ni Apu Kesu ta keggá na ta dabbuno. Ngam matolay kamí paga, ánnna napiá yù ággangnguá mi megapu sù ángngabbák ni Apu Kesu, tapè mepasingan ta matolay paga gapay si Apu Kesu.

<sup>11</sup> Á ta paggiám mi lâ paga ta dabbuno, á ta kággággaw attamám mi lâ yù pággé mi matay gapu ta panguruk mi kâ Apu, tapè sikami yù pakasinganán nayù pakáwayyá nayù áttole ni Apu Kesu, mássiki nu tolay kamí lâ nga awán ta pakáwayyá mi, nga matay galâ sangaw.

<sup>12</sup> Á yáyù nga sigidá kamí magisassay matay megapu sù pangilayalayâ mi sù napiánga dámak. Ngam napiá yù pabbalinán nayù pagattam mi ta jigâ, ta mepattolay kayu kâ Namarò ta áddè ta áddè megápu sù pangilayalayâ mi.

*Moli yù Baggi tam ta Bagu ta Paginnanole tam*

<sup>13</sup> Á ajjan yù netúrâ, nga kun na, "Kurugak ku yù kinagi ni Namarò, á yáyù nga kagiak ku gapay sù ira kábuluk ku."\* Á gapu ta negittá yù pangikatalà mi sù pangikatalà nayù ngaw nangitúrâ karannian, á mássiki nu marigirigâ kamí, uputam mi lâ nga kagian yù napiánga dámak nga meyannung kâ Apu Kesu.

<sup>14</sup> Ta ammu mi ta pinaginnanole ni Namarò si Apu Kesu. Á yáyù nga ammu mi ta paginnanolanay na kamí gapay nga mepattatáddy kuna, ánnna sikayu ngámin gapay nga mangikatalà kâ Apu Kesu, tapè apan na ittam ta gián na.

\* 4:13 Salmo 116:10

<sup>15</sup> Ta attamám mi yù ngámin nga jigâ nga umay nikami megapu sù ángngabbák mi nikayu, tapè malannapán kayu ta aru nga tatolay nga mamarubá sù pangikállâ ni Namarò. Á ta kunnian, magaru yù ira nga maddáyaw kâ Namarò, tapè kuruk nga meparáyaw.

### *Awán ta Áddè nayù Kesipà tam kâ Namarò ta Lángì*

<sup>16</sup> Á gapu ta iddanamát tam dannian, ari ittam mapállâ, maguray lâ yù jigâ nga umay nittam. Ta mássiki nu maddán ánnna makkapi yù baggi tam, á ta kággaggaw mapasigaggà yù pangikatâ tam kâ Apu.

<sup>17</sup> Á ibiláng tam ta alápaw yù jigâ tam, nga mabì nga mappasá galâ, gapu ta yá pabbalinán na yù aru nga napiá nga kesipatát tam kâ Namarò, nga awán ta kárík piá na ánnna awán ta áddè na.

<sup>18</sup> Á yáyù nga arát tam karagatán yù makkakerumá nga nakástá nga masingat tam sawe dabbuno, nu ari galâ yù arát tam paga masingan nga kesipatát tam nga ajjan kâ Namarò ta lángi. Ta mabì nga mappasá yù masingat tam, ngam maggián nga awán ta áddè nayù arát tam paga masingan.

## 5

### *Yù Paggianát tam ta Gián ni Namarò*

<sup>1</sup> Á yáyù nga ari ittam laguk malurâ nga masserbi kâ Namarò, ta nu matay ittam, ánnna marúnù yù baggi tam nga kunnay ta amíngán nga paggianát tam sawe dabbuno, á ammu tam ta málâ tam yù bagu nga paggianát tam ta lángi. Ta paddayan ni Namarò yù bagu nga baggi tam nga aringin matay, nu ari galâ mepattolay kuna ta lángì ta áddè ta áddè.

<sup>2</sup> Á keggá tam paga sawe dabbuno, manalasigà ittam nga maraddam gapu sù pakkaragâ tam ta ikáddagâ lâ moli yù baggi tam ta bagu, nga mepángngà ta lángi.

<sup>3</sup> Ta nu ajjan yù bagu nga paggianán nayù ikararuá tam, á ari ittam laguk kun na magilongán nu matay ittam.

<sup>4</sup> Á keggá tam nga matolay sawe dabbuno, marigirigâ ittam, ta aru yù ikaburung tam ánnna yù ikaraddam tam. Ngam arák ku kagian ta ikáyâ tam yù mabi matay, nu ari galâ ta ikáyâ tam ta moli yù baggi tam nga matay, tapè mabbáli ta bagu nga baggi tam nga ari bulubugá matay.

<sup>5</sup> Á si Namarò yù namarán nittam, tapè moli yù baggi tam ta bagu nga mepaggián kuna ta áddè ta áddè. Á iniyawâ na nittam yù Ikararuá na ta maggián nittam, nga pamakuruk na ta tuppálan na sangaw yù ngámin nga initabbá na ngaw nittam.

<sup>6</sup> Á gapu ta ajjan nittam yù Ikararuá ni Namarò, ari ittam maburung, ta ammu tam ta napiá sangaw yù paggianát tam ta lángi. Á keggá tam paga nga matolay sawe dabbuno, ammu tam ta arayyu ittam paga sù gián ni Apu Kesu ta lángi.

<sup>7</sup> Á keggá tam saw dabbuno, attamát tam yù mesimmu nittam ánnna palurotat tam yù ipakuá ni Apu Kesu nittam, gapu ta napasigaggà yù pangikatalâ tam kâ Apu, mássiki nu arát tam paga masingan.

<sup>8</sup> Á yáyù nga magayáyá ittam ánnna mapataggâ yù nonò tam. Á mássiki nu arát tam ikáyâ nga matay, á nonopat tam ta más napiá nu matay ittam ánnna panawát tam yù baggi tam, tapè mepaggián ittam kâ Apu ta lángi.

<sup>9</sup> Á yáyù nga ipe tam laguk yù urà tam nga manuppál sù ipakuá ni Apu Kesu nittam, tapè ayatán nittam, mássiki nu maggián ittam paga sawe dabbuno, onu mepaggián ittamin kuna ta lángi.

<sup>10</sup> Ta sittam ngámin nga katággitáddy, máwák nga meyarubáng kâ Apu Kesu Kiristu, tapè panunnután na. Á alawatat tam nga katággitáddy yù mepángngà nga báliâ na ta meyannung sù kingnguá na nga napiá onu naráke, sù keggá na paga sawe dabbuno.

### *Makikopun ittam kâ Namarò megapu sù Ketapil ni Apu Kesu*

<sup>11</sup> Á gapu ta ammu mi makimoray kâ Apu Kesu, nga mamanunnù nittam, á yáyù nga kagumánam mi nga patuttulan yù ira tatolay kâ Apu Kesu. Á si Namarò, ammu na ta napiá lâ yù nonò mi. Á sikayu, napiá nu ammu naw gapay ta mekatalâ kami.

<sup>12</sup> Á arám mi iráyaw yù baggi mi mángin, ta pakkagi mi ta mekatalâ kami. Ta kagiam mi lâ yù kuruk, tapè ammu naw yù itabbák naw sù ira mappeddaráyaw, nga iráyo ra lâ yù ággíad da ánnna yù pakáwayyá ra, ngam ari yù ággangnguá ra nga kemámmatán ni Namarò.

<sup>13</sup> Á nu ajjan yù makkagi ta maguyung kami gapu ta pangilayalayâ mi, á paguráyám mi lâ, ta ilayalayâ mi si Namarò, tapè meparáyaw. Á nu ajjan gapay yù ira nga makkagi ta napiá

lâ yù ánonnò mi, á kuruk gapay, ta sikayu yù ipangilayalayâ mi, tapè napiá yù pabbalinán naw.

<sup>14</sup> Á maguray lâ yù kagiad da, á mattarabáku kami galâ megapu sù ángngiddù ni Apu Kesu Kiristu ta tatolay. Á ammu mi ta aggina yù natay, nga netapil megapu nittam ngámin. Ta si Apu Kesu yù táli tam nga natay, á sittam nga netádday kuna, kunnay ta námmatay ittam ngámin, gapu ta si Apu yù nagikáru ta liwiliwâ tam ngámin.

<sup>15</sup> Á yawe yù gapu na nga natay si Apu Kesu megapu nittam, tapè sittam nga matolay paga, arát tam akkuán yù ikáyâ tam, nu ari galâ yù ikáyâ na. Ta natay si Apu nga netapil megapu nittam, á naginnolanoy megapu nittam.

<sup>16</sup> Yáyù nga arám mingin laguk kagian ta napiá yù tolay megapu sù masingam mi nga ággían na onu pakáwayyá na, nga kunnay sù ánonnò nayù ira nga ari manguruk kâ Apu. Á kunnian yù ánonnò mi ngaw kâ Apu Kesu Kiristu sù ngaw lage mi nangikatalà. Ngam kunangane napataliánin yù ánonnò mi nga meyannung kuna.

<sup>17</sup> Á yù tolay nga netádday kâ Apu Kesu Kiristu, á kunnay ta bagu nga naparò. Nappasá ngin yù dán nga ánonnò na ánnna yù narákè nga ággangnguá na, á molingin ta bagu yù nonò na ánnna yù ngámin nga meyannung kuna.

<sup>18</sup> Á ngámin dannian pinalurò ni Namarò. Ta megapu sù ketapil ni Apu Kesu Kiristu, pinakkápiá ni Namarò ittam kuna. Á inikatalà na nittam yù pakáwayyá tam nga mangipakánnámmu sù ira tatolay ta aijan yù awayyá ra nga makipakomá kuna, tapè makkápiá ira.

<sup>19</sup> Á yáyù nga ilayalayâ mi ta aijan yù awayyá nayù ira tatolay nga makipakomá kâ Namarò, megapu sù ketapil ni Apu Kesu Kiristu. Á pakomán ni Namarò yù liwiliwâ da, á arán na iren pagikaruan, ta arán nen ibiláng yù liwâ da. Á inikatalà ni Namarò nikami yù pakáwayyá mi nga mangipakánnámmu sù bilin na nga meyannung sù pamakkápiá na ta tatolay kuna.

<sup>20</sup> Á yáyù nga sikami yù kunnay ta pannakasimù ni Apu Kesu Kiristu. Á pagubobuk mi, á kunnay ta si Namarò galâ yù magágál nikayu, ta tángngagan naw yù bilin na nga ipakánnámmu mi nikayu. Á yáyù nga ikomá mi nikayu megapu kâ Apu Kesu, ta umay kayu makipakomá kâ Namarò, tapè makkápiá kayu kuna.

<sup>21</sup> Awán bulubugá ta liwâ ni Apu Kesu. Ngam gapu ta pangikállà ni Namarò nittam, inipekárú na kâ Apu Kesu yù liwiliwâ tam, tapè aijan yù awayyá tam nga mesipà sù piá ni Namarò megapu sù ketádde tam kâ Apu Kesu Kiristu.

## 6

<sup>1</sup> Á gapu ta mepattarabáku kami kâ Namarò, á yáyù nga ikomá mi nikayu ta palurotan naw laguk yù ipakuá ni Namarò nikayu, marakè awán sangaw ta serbi nayù allà ni Namarò ánnna yù iddù na nikayu, nu malurâ kayu nga manguruk kuna.

<sup>2</sup> Ta mappasá sangaw yù ággaw nga pangikállà na ta tatolay. Ginnán naw yù kinagi ni Namarò, nga kun na,

“Aijan yù ággaw nga sinullà ku nga pangikállà ku nikayu, tapè ginnák ku yù ipakimállà naw nikán.

Á dattál nayù ággaw nga pangiyígù ku nikayu, abbágát takayu.”\*

Tángngagan naw laguk, gapu ta kunangane yù pangikállà ni Namarò ta tatolay! Ta ginnán na kunangane yù ipakimállà tam, á kunangane aijan yù awayyá tam nga makiyígù kuna, ta alawatan na yù ira nga makiyígù kuna ta ággawo.

### *Yù Pangiyattam ni Pablo sù Makkakerumá nga Jigâ*

<sup>3</sup> Á gapu ta masserbi kami kâ Namarò, magimuguk kami ta arám mi akkuán yù ipamaliwâ da nakuan nayù ira tatolay nikami, tapè awán ta ipanakì da sù ituddu mi.

<sup>4</sup> Á ta ngámin nga akkuám mi, ipasingam mi ta kuruk nga masserbi kami kâ Namarò, megapu su pagattam mi ta aru nga makkakerumá nga jigâ nga mesimmu nikami.

<sup>5</sup> Ta attamám mi yù pamalapalù da nikami, ánnna yù pamukù da nikami. Á attamám mi nu pagguguruád da kami nga jigirigátan. Á attamám mi gapay yù bannák mi nga nepallà megapu sù tarabáku mi. Á name-aru nga nagattam kami sù patturá mi, ánnna kabisim mi.

<sup>6</sup> Á mepasingan ta si Namarò yù paggapuán nayù pakáwayyá mi, gapu ta napiá yù nonò mi ánnna ággangnguá mi, ánnna gapu ta ammu mi si Namarò ánnna kánnámmuám mi ta napiá yù bilin na. Á ari kami malogon nga mapporay, ngam mappasensiá kami, nga mangikállà sù

\* 6:2 Isaya 49:8

ira wáwwagi tam. Á yáyù nga mepasingan ta aijan nikami yù Mangilin nga Ikararuá, nga mangabbák nikami. Á kuruk nga napiá yù ángngiddù mi sù ira wáwwagi tam.

<sup>7</sup> Á ilayalayá mi yù kuruk nga bilin ni Namarò ánnna mepulù nikami yù pakáwayyá na. Á yù napiá nga ággangnguá mi, yáyù meyárik ta ármas mi, ta nu masingan nayù ira tatolay yù napiá nga akka-akkuám mi, awánin ta awayyá ra nga makikontará nikami.

<sup>8</sup> Ta uputam mi lâ nga akkuán yù napiá, maguray lâ yù akkuád da nikami, nu pakimorayád da kami onu ipasiránad da kami, nu paráketad da kami onu iráyo ra kami. Á kagiad da ta áppé pípiá kami ánnna massiri, ngam ari kuruk, ta kagiam mi lâ yù kuruk.

<sup>9</sup> Á arád da kami kemámmatán, ánnna paguráyád da yù ituddu mi, mássiki nu neparámak kami ta ngámin nga lugár. Á magisassay kami matay, ngam masingan naw ta matolay kami lâ paga. Ta mássiki nu jigirigátad da kami, ari kami matay.

<sup>10</sup> Á mássiki nu mapakaraddam kami, á magayáyá kami paga. Á pobare kami, ngam aru yù ira nga mesipà sù kuruk nga napiá nga karíku ni Namaró, megapu sù pangituddu mi nira. Á yáyù nga mássiki nu awán ta kukuá mi ta dabbuno, á kuá mi ngámin, ta mesipà kami kâ Namarò.

<sup>11</sup> Á sikayu nga kákkopum mi nga taga Korinto, awán ta inilímak mi nikayu, ta kinagi mi yù ngámin nga nonò mi, á nepallà yù ayâ mi ánnna yù ángngiddù mi nikayu.

<sup>12</sup> Ari nakúráng yù pangiddù mi nikayu. Ngam sikayu, nakúráng garè yù pangiddù naw nikami.

<sup>13</sup> Á kunnay kayu ta ánnâ ku, á yáyù nga kunnian yù pakibobuk ku nikayu. Ikomâ nikayu laguk, ta iddi-iddukan naw kami gapay ta kunnay sù pangiddù mi nikayu.

#### *Ari Mepappárik yù ira Manguruk sù ira ari Manguruk*

<sup>14</sup> Á ari kayu mangatáwa onu mepattáddy sù ira tatolay nga ari tumuttul kâ Apu Kesu, ta ari metáddy yù napiá sù narákè. Meyárik ta nawák ánnna kallà, nga ari metáddy.

<sup>15</sup> Á kunnay kâ Apu Kesu, nga ari negittá yù nonò na sù nonò ni Satanas. Á kunnian gapay, ari negittá yù nonò nayù manguruk kâ Apu sù nonò nayù ari manguruk.

<sup>16</sup> Á mepángngà panò nu aijan yù sináddios sù mangilin nga bale ni Namarò? Ari gemma! Á yáyù nga ari ittam mepulù sù ira nga mangnuá ta narákè. Ta sittam nga manguruk kâ Namarò yù mangilin nga bale na, gapu ta maggián nittam si Namarò nga matotolay nga pakimorayát tam. Á yawe yù kinagi ni Namarò:

“Makipaggiánà sù ira tatolè, ta aggira yù paggianák ku.

Ta sikán si Namarò nga pakimorayád da,

á aggira gapay yù tatolè nga pammagurayák ku.”<sup>†</sup>

<sup>17</sup> Á yáyù nga kinagi ni Apu gapay sù ira tatole na,

“Panawán naw yù ira nga mangnuá ta narákè,

tapè mesinná kayu, nga ari mepárik nira.

Arán naw dakkitan yù narákè, gapu ta napakarenuán kayin.”<sup>‡</sup>

<sup>18</sup> “Á paddulotat takayu laguk.

Á yáma nawà laguk ánnna ánnâ takayu.

Yáyù kagian nayù Kotunán,

nga si Apu Namarò nga makáwayyá nga mammaguray ta ngámin.”<sup>§</sup>

## 7

<sup>1</sup> Wáwwagì nga iddukak ku, gapu ta ngámin dannian yù initabbá ni Namarò nittam, iriát tam laguk yù ngámin nga narákè nga ággangnguá tam, ánnna ngámin yù eggá ta nonò tam nga narákè, á pakimorayát tam galá si Namarò ánnna uputat tam nga akkuán yù napiá nga ipakuá na nittam, nga mepángngà nittam nga mangilin nga ánnâ na.

#### *Yù Pagayáyá ni Pablo megapu sù ira taga Korinto*

<sup>2</sup> Á sikayu nga wáwwagi mi, alawatan naw kami laguk ta putu naw gapay, ta awán bulubugá ta nakaliwatám mi nikayu. Awán ta ággangnguá mi nga narákè nga inituddu mi nikayu. Ari kami maddarogá, á arám mi kayu bulubugá inilogó.

<sup>3</sup> Á arát takayu paliwatan ta pakkagi karannian, ta kinagi ngaw nikayu yù ayâ mi nikayu. Á napasigaggá yù ayâ mi nikayu, maguray lâ yù mesimmu nittam, nu matolay ittam onu matay.

<sup>†</sup> 6:16 Libitiko 26:12

<sup>‡</sup> 6:17 Isaya 52:11

<sup>§</sup> 6:18 2 Samuel 7:14

<sup>4</sup> Á mappelokà nikayu, ta sikayu yù kuruk nga pangikatalakák ku. Á sikayu yù iped-darayò. Á mabannáyán yù nonò mi ánnna awán ta áddè nayù pagayáyâ mi nikayu, maguray lâ yù jígâ mi nga attamám mi.

<sup>5</sup> Á sù labbè mi ta Masidonia, awán ta awayyá mi nga magibannák, ta narigirigâ kami megapu sù ira nakiramá nikami, ánnna naburung kami gapay megapu sù ira áppé pípiá, maraké ilogò da sangaw yù ira sinudduák ku.

<sup>6</sup> Ngam si Namarò yù minámmasikan ánnna minángngabbák sù ira mapállâ, á pinataggâ na yù nonò mi megapu sù labbè ni Titò sù giám mi.

<sup>7</sup> Á nabannáyán yù nonò mi, ari lâ negapu sù labbè ni Titò, nu ari gapay negapu sù pagistoriá na sù pagayáyâ na megapu nikayu. Á kinagi na gapay ta nepallà yù pakkaragâ naw nga makasingan nikami. Á kinagi na ta naraddam kayu megapu sù nesimmu, gapu ta ammu naw ta maraddamâ gapay. Á kinagi na yù pagayáyâ na gapu ta kaparán naw nga manuppál sù itaddák ku nikayu. Á yágù nga nepallà yù pagayáyâ ku gapay kunangan.

<sup>8</sup> Á mássiki nu napakaraddam kayu ngaw megapu sù napolu nga túrâ ku nikayu, arák ku ibabáwi yù ipattúrâ ku. Ngam naraddamâ gapay ngaw, ta ammù gemma ta napakaraddam kayu megapu sù túrâ ku, mássiki nu nabi lâ yù karaddam naw.

<sup>9</sup> Ngam magayáyâkâ kunangane, nga ari megapu sù karaddam naw, nu ari galâ megapu sù pabbabáwi naw sù kingnguá naw nga narákè ánnna yù pakipakomá naw kâ Apu. Á kunnian, pinabbalín ni Namarò ta pakkapiánán naw yù karaddam naw, á ari kayu laguk náktitaktán megapu sù túrâ mi.

<sup>10</sup> Ta nu maraddam yù tolay gapu ta liwiliwâ na kâ Namarò, á mabbabáwi laguk, ánnna makiyigù kâ Namarò, á pakomán na laguk ni Namarò ánnna iyigù na. Á yágù nga arán na tolay ibabáwi yù daddam na, ta yá pabbalínán na yù kesipâ na kâ Namarò ta áddè ta áddè. Ngam nerumá yù daddam nayù tolay nga ari manguruk kâ Namarò. Ta ikaraddam na lâ yù jígâ na, ngam arán na ibabáwi yù liwâ na, á yá pabbalínán na yù pate na ánnna kesinná na kâ Namarò ta áddè ta áddè.

<sup>11</sup> Wáwwagi, imámmatán naw laguk yù napiá nga pabbalínán nayù karaddam naw nga naggapu sù allâ ni Namarò nikayu! Ta naláppâ kayin nga manuppál sù ipakuá ni Namarò nikayu, ánnna naparán kayu nga mangipasingan ta kuruk nga napiá yù nonò naw. Ta napporay kayu, ta kuruk nga arán naw ikáyâ yù narákè nga kingnguá nayù tolay, á nerallà yù burung naw ánnna assing naw maraké massamâ nikayu yù narákè. Á kuruk nga karagatán naw yù panolì nga mattúllun nikayu, tapè mepagayáyâkâ nikayu. Á napattû kayu nga namággáng sù tolay nga nalliwâ. Á yágù nga inipasingan naw ta awán ta liwâ naw nga meyannung karannian nga kingnguá na, ta gimmá naw yù tolay nga nalliwâ.

<sup>12</sup> Á pattúrâ ku ngaw nikayu, yá ipattúrâ ku ari lâ megapu sù tolay nga nakaliwâ, ánnna ari lâ tapè mabannáyán yù tolay nga nakaliwatán na. Ngam yá ipattúrâ ku yù pakkapiánán naw galâ, tapè mepakánnámmu nikayu ta kuruk nga napiá yù ángngiddú naw nikami ta ánnningánán ni Namarò.

<sup>13</sup> Á yágù nga nabannáyánin yù nonò mi ánnna magayáyâ kami.

Á nepallà paga yù pagayáyâ mi ta pakasingam mi ta ayatán gapay si Titò ta labbè na nikami nga naggapu nikayu, gapu ta inírián naw yù burung na, ta inipasingan naw kuna yù napiá nga nonò naw.

<sup>14</sup> Á ta lage ni Titò minay nikayu, kinagi kuna yù ngámin nga napiá nga akka-akkúán naw. Á aringâ nepasirán megapu sù pangirayò nikayu, gapu ta labbè ni Titò nga mattúllun nikayu, nasingan na ta kuruk yù kinagi kuna nga meyannung sù napiá nga nonò naw, nga kunnay ta kuruk gapay yù ngámin nga kinagi mi ngaw nikayu.

<sup>15</sup> Á nepallà yù ayâ ni Titò nikayu ta pakanonò na sù pamaddulò naw kuna ánnna yù pakimore naw kuna ánnna yù kaláppâ naw nga mamalurò sù ngámin nga taddán na nikayu.

<sup>16</sup> Á yágù nga ayatánâ gapay, gapu ta ammù ta kuruk nga mekatalà takayu nga manuppál sù napiá.

## 8

### Magayáyâ ittam nga Mangabbák sù ira Magáwák

<sup>1</sup> Á wáwwagi mi, ikáyâ mi ipakánnámmu nikayu yù napiá nga kingnguá nayù ira taga Masidonia nga mangikatalà kâ Apu Kesu, megapu sù pangikállâ ni Namarò nira.

<sup>2</sup> Ta mássiki nu narigirigâ ira ánnna nerallà yù kapobare ra, á ayatán ira megapu kâ Namarò. Á yágù nga maláppâ ira nga mangiyawâ ta ángngabbák da sù ira kábulud da nga magáwák.

<sup>3</sup> Á arád da lâ iniyawâ yù buná ra, nu ari gapay ta linnapád da yù iyawâ da nga naggapu galâ sù máwák da. Á arám mi ira kinagumán, ngam iniyawâ da lápay negapu sù ure ra.

<sup>4</sup> Á inikomá ra nikami ta mesipâ ira gapay nga mangiyawâ sù ira wáwwagi tam nga magáwák túrin ta purubinsia na Judiya.

<sup>5</sup> Á natturù yù kingnguá ra ánnè sù iddanamám mi. Ta lage ra nangiyawâ sù kukuá ra, inikatalà da yù baggi ra kâ Namarò. Á tumulù ira ánnâ inikatalà da nikami gapay yù baggi ra, gapu ta yáyù gapay yù inikáyâ ni Namarò nga akkuád da.

<sup>6</sup> Á gapu ta si Titò yù mangabbák nikayu ta pamegapu naw nga mamarán sù iyawâ naw, á yáyù nga jinok mi má ta umay sù gián naw, ta en na uputan yù inigapu naw, tapè mapalurò yù pangikállâ naw.

<sup>7</sup> Á napiá yù ámmalurò naw ta ngámin nga akka-akkuán naw ánnè sù ira ngámin nga káruán nga tatolay. Napasigaggâ yù pangikatalà naw kâ Apu Kesu, ánnâ ammu naw mangilayalayâ sù napiá nga dámak nga meyannung kuna. Á nánnámmuán naw ta napiá yù kuruk nga bilin ni Namarò. Á maláppâ kayu, nga dán nga naparán nga manuppál sù ngámin nga napiá nga ipakuá ni Apu Kesu nikayu, ánnâ nepallâ yù ángngiddù naw nikami. Á yáyù nga ikáyâ ku ta magayáyâ kayu laguk nga mangiyawâ ta aru nga awán nakuan ta kúráng na sù ira wáwwagi tam nga magáwák.

<sup>8</sup> Á arát takayu puersán nga mangiyawâ. Ngam ipakánnámmù nikayu yù pangikállâ nayù ira káruán nga tatolay sù ira pobare, tapè párigán naw ira, á mepasingan gapay yù napiá nga ángngiddù naw sù ira kábulun naw.

<sup>9</sup> Á ammu naw yù pangikállâ ni Apu Kesu Kiristu ánnâ yù pangiddù na nittam. Ta mássiki nu aggina yù kotunán, nga makákkua ta ngámin nga aijjan, ngam nánawán na ngámin dannian, á minay sawe dabbuno nga nabbáli ta tolay nga pobare, megapu sù pangiddù na nittam, tapè iyawâ na nittam yù awayyá tam nga mabbáli ta maríku, nga mesipâ kuna sù gián na te lángi.

<sup>10</sup> Á yawe laguk yù urè, ta napiá nu palurotan naw yù pinegapuán naw. Ta sikayu yù nattalákkuruk nga mangabbák sù ira pobare. Á sù ngaw dagun nga nappasá, namegapu kayu nga mamarán sù iyawâ naw.

<sup>11</sup> Á nagayáyâ kayu gemma sù ngaw panalákkuruk naw. Uputan naw laguk yù pinegapuán naw, ta iyawâ nayù meyannung ta awayyá naw nga mangiyawâ, tapè ayatán kayu gapay megapu sù pamalurò naw. Á isipâ naw ira sù aijjan nikayu.

<sup>12</sup> Ta magayáyâ si Namarò megapu sù iyawâ naw, nga meyannung ta awayyá naw nga mangiyawâ, nu magayáyâ kayu nga mangiyawâ, ta arán na gemma iddagán yù arán naw awayyá nga meyawâ.

<sup>13</sup> Á arák ku kagian ta iyawâ naw yù ángngabbák naw sù ira kábulun naw áddè ta maríku ira ánnâ marigirigâ kayu.

<sup>14</sup> Ngam gapu ta aijan yù aru nga kukuá naw, yáyù nga kagiak ku ta napiá nu abbágán naw yù ira magáwák. Ta nu sikayu yù magáwák noka, á aggira gapay sangaw yù mangabbák nikayu. Á ta kunnian, mattutubbâ kayu laguk nga makkák-abbák, tapè sikayu ngámin nga katággítádday, eggá kuna yù mepángngâ nga balle na.

<sup>15</sup> Á kunnian yù kebalinán nayù dán nga netûrâ, nga kun na,  
“Yù tolay nga nangâ ta aru, awán ta turù na. Á yù tolay nga nangâ ta baddì, awán ta kúráng na.”\*

#### *Umay Mattúllun si Titò nikayu nga taga Korinto*

<sup>16</sup> Á dayáwam mi si Namarò, ta inipeddù na sikayu gapay kâ Titò, nga kunnay sù ángngiddù mi nikayu.

<sup>17</sup> Á yáyù nga dán nga naparán si Titò, lage mi inikomá kuna, nga umay mattúllun nikayu, ta yáyù ga nga talákkurugan na nga akkuán.

<sup>18</sup> Á ipebulum mi gapay kâ Titò yù wagi tam nga neparámak sù ira ngámin nga kábulut tam nga mangikatalà kâ Apu, megapu sù pakáwayyá na nga mangilayalayâ sù napiá nga dámak.

<sup>19</sup> Á ari lâ yian, ta aggina gapay yù sinullâ nayù ira manguruk nga maggagammung sù ira káruán nga giád da, ta aggina yù ipebulum da nikami nu umay kami mangituluk sù ilimù da nga itubbuk da sù ira pobare nga magáwák túrin ta ili na Jerusalem, tapè meparáyaw si Namarò ánnâ mepasingan gapay yù pagayáyâ tam nga mangabbák nira.

\* 8:15 Exodus 16:18

<sup>20</sup> Á napiá nu mepulù nikami, tapè awán ta mamaliwâ nikami megapu sù ángngisinek mi sù aru nga kuártu nga inikatalà naw nikami.

<sup>21</sup> Ta ikáyâ mi ta mepasingan ta kuruk nga napiá ánnna matunung yù ngámin nga akkuám mi, ari lâ ta ánnninganán ni Namarò nu ari gapay ta arubáng nayù ira tatolay.

<sup>22</sup> Á ipepulù mi gapay kári Titò yù tádday paga nga wagi tam, nga name-aru nga naparubám mi, ánnna nasingam mi yù kaláppà na nga mamalurò sù makkakerumá nga passerbi na kâ Apu. Á nappanà yù pakkaragâ na nga umay ta gián naw, nepatalugáríng ta nepallà yù pangikatalà na nikayu.

<sup>23</sup> Á si Titò, aggina yù kabbuluk ku sù tarabákù nga masserbi nikayu. Á yù ira duá nga mepulù kâ Titò, aggira yù ira pannakabaggi nayù ira manguruk, nga maggagammung sù ira káruán nga lugár da, ánnna meparáyaw si Apu Kesu Kiristu megapu sù akkuád da.

<sup>24</sup> Ipasingan naw laguk yù ángngiddù naw nira ngámin, tapé matákkilalán nayù ira wáwwagi tam sù ira káruán nga lugár da ta napiá gapay yù ángngiddù naw, ánnna kuruk gapay yù iniparámak mi nira nga meyannung nikayu.

## 9

### *Yù Meyannung sù Pangilimù nayù ira taga Korinto*

<sup>1</sup> Á ammù gemma ta arák ku mówák nga itúrâ yù meyannung sù pangilimù naw sù ira wáwwagi tam nga manguruk nga taga Judiya.

<sup>2</sup> Ta yáyù nga ikáyâ naw nga akkuán. Á iniráyo takayu sù ira taga Masidonia, ta kinagi nira, "Yù ira wáwwagi tam nga taga Akeya, tangaragunin ira nga naparán nga mangabbák." Á pakarámak da sù kapattû naw nga mangabbák, aru nira gapay yù mapattû nga mangiyawâ sù ángngabbák da gapay.

<sup>3</sup> Á yáyù nga dobak ku laguk di Titò ánnna yù ira duá nga wáwwagi tam nga kinagi nikayu, nga mangabbák nikayu, tapé dán nga naparán yù ilimù naw, á mepasingan ta kuruk gapay yù iniráyò nga meyannung sù kapattû naw nga mangiyawâ.

<sup>4</sup> Á sangaw nu umayá ta gián naw, nu ajjan yù ira taga Masidonia nga mepulù nikán, á mepasiránán kami nakuan nu ari paga nonnuk yù ilimù naw, gapu ta kinagi mi nira ta naparánin. Á ari lâ sikami yù mepasiránán, nu ari gapay sikayu.

<sup>5</sup> Á yáyù nga ninonò ku ta napiá nu popoluak ku yù ira tallu nga wáwwagi tam nga umay ta gián naw, nga mangabbák nikayu nga mamarán sù initabbá naw. Ta nu dán nga nonnuk lage mi lubbe, á mepasingan laguk ta kuruk nga mangiyawâ kayu, nga ari megapu ta nakagumán kayu, ngam megapu galâ sù ayâ naw.

<sup>6</sup> Á ipanonò ku nikayu yaw nga nakagi.

"Yù tolay nga baddì lá yù bini nga imulá na, baddì lággapay yù gataban na.

Ngam yù tolay nga aru yù bini nga imulá na, aru gapay yù gataban na."

<sup>7</sup> Á sittam nga mangiyawâ nga katággítáddy, nonopan na laguk nu pígiá yù ikáyâ na nga iyawâ, tapè iyawâ na megapu sù ayâ na galâ, nga ari gapu ta napuersá. Ta iddukan ni Namarò yù ira tatolay nga magayáyâ nga mangiyawâ.

<sup>8</sup> Á makáwayá gemma si Namarò nga mangiyawâ ta ngámin nga mówák tam ánnna matturù paga yù iyawâ na, tapè ajjan yù awayá tam gapay nga mangisipà sù ira kábulut tam nga marigirigâ.

<sup>9</sup> Á yawe yù inipetúrá ni Namarò nga meyannung sù tolay nga makállà.

"Á isinek na yù iyawâ na,  
ta abbágán na yù ira marigirigâ.

Á awán ta áddè nayù napiá nga akkuán na, nga pangikállà na."\*

<sup>10</sup> Á si Namarò yù mangiyawâ ta bini sù tolay nga mammulá, ánnna iyawâ na gapay yù kanan na. Á iyawâ na nittam gapay yù ngámin nga mówák tam, tapè umaru yù napiá nga pabbalinán nayù pangikállà tam, nga massamá sù ira kábulut tam nga marigirigâ.

<sup>11</sup> Ta aru yù iyawâ ni Namarò nittam, tapè aru gapay yù iyawâ tam sù ira magáwák. Á sangaw nu ituluk mi yù ilimù naw nira, mepallà yù paddáyo ra kâ Namarò.

<sup>12</sup> Á kuruk nga napiá yù pabbalinán nayù pangiyawâ naw sù ira wáwwagi tam nga magáwák, nga ari lâ ta mábbágán ira, nu ari gapay ta aru yù ira tatolay nga maddáyaw kâ Namarò megapu sù pangikállà naw.

<sup>13</sup> Á yáyù nga aru yù ira tatolay nga mangiráywâ kâ Namarò megapu ta panguruk naw sù napiá nga dámak nga meyannung kâ Apu Kesu Kiristu, ánnna megapu gapay sù aru nga iniyawâ naw nira ánnna yù ira ngámin nga káruán gapay.

\* 9:9 Salmo 112:9

<sup>14</sup> Á ipakimi-imállà da kayu ánnà mepallà yù ayâ da nikayu, gapu ta matákkilalád da ta nepallà yù pangikállà naw nira megapu sù allà ánnà ángngiddù ni Namarò nikayu.

<sup>15</sup> Dayáwat tam laguk si Namarò megapu kâ Apu Kesu Kiristu, nga Anâ na nga iniyawâ na nittam, nga rigálú na nga awán ta kárik piá na.

## 10

*Yù Itabbák ni Pablo sù ira Mamaliwâ kuna*

<sup>1</sup> Á aijan nikayu yù ira nga makkagi ta tumulukà ta arubáng naw, ngam mapporayà nu aijanà ta arayyu. Á yáyù nga ikomâ nikayu ta tángngagan naw lábbì yù kagiak ku, ta párigák ku yù katulù ni Apu Kesu Kiristu ánnà yù pagattam na ta pangituddu na sù ira tatolay.

<sup>2</sup> Á yáyù nga ikomâ nikayu, ta tunungan naw yù akka-akkuán naw, tapè arák ku máwák nga mapporay sangaw nu umayà ta gián naw. Ta aringà maganássing nga makiarubáng naga maggammá sù ira malliliibâ nikán, nga makkagi ta párigák ku yù ággangnguá nayù ira mokkuk nga ari manguruk kâ Apu.

<sup>3</sup> Á kuruk nga maggiánà lâ ta dabbuno, ngam arák ku párigán yù ággangnguá nayù ira tatolay ta dabbuno nga ari manguruk kâ Namarò. Á ari yù baggi yù ikatalà ku ta pakikontarâ ta ngámin nga narékè nga mekontará kâ Namarò.

<sup>4</sup> Ngam ikatalà ku galâ yù pakáwayyá ni Namarò ánnà yù ámmagaddátu na. Ta naparán si Namarò nga mangabbák sù ira mangikatalà kuna. Á yáyù nga appútam mi yù ngámin nga mekontará sù kuruk nga bilin ni Namarò, megapu sù pakáwayyá na nga neyawâ nikami.

<sup>5</sup> Á ta pangituddu mi, tabbagam mi yù ngámin nga kagian nayù ira tatolay nga ipanakì da sù bilin ni Namarò, ánnà appútam mi yù ira mappeddaráyw. Á iriám mi ngámin yù kegaggarán na nonò da, ánnà gammám mi yù notun nga ánonò da, tapè mánnámmuád da yù kuruk nga bilin ni Namarò, á mabbabáwi ira, nga manguruk gapay kâ Apu Kesu Kiristu.

<sup>6</sup> Á sikayu, kurugan naw laguk yù taddán ni Apu Kesu nga inipakánnámmu nikayu, tapè mepasingan ta kuruk nga manguruk kayu. Á nu aijan yù ira nga ari paga tumuttul sù taddán ni Apu, á naparánà nga mamággáng nira.

<sup>7</sup> Á kagian naw ta ammu naw yù tolay megapu sù masingan naw, ngam ari kuruk, ta ari masingan yù nonò na. Pasikkálan naw laguk yù nonò naw, á nu kagian naw ta sikayu yù tatole ni Apu Kesu Kiristu, á nonopan naw gapay ta sikami yù kunnay nikayu nga tatole na, nga sinullà na ta masserbi kuna.

<sup>8</sup> Á mássiki nu pinatturù ku ta baddì yù kinagi nga meyannung ta pakáwayyá mi, á aringà mappasirán, ta kuruk nga iniyawâ na nikami ni Apu yù pakáwayyá mi nga mangituddu sù bilin ni Namarò, nga ari ta gammám mi yù pangikatalà naw, nu ari galâ ta abbágám mi kayu, tapè mapasigaggà yù pangikatalà naw.

<sup>9</sup> Á yáyù nga initúrâ ku nikayu, tapè arán naw kagian ta yá lâ ipattúrâ ku tapè ananássingat takayu.

<sup>10</sup> Ta aijan garè nikayu yù ira nga makkagi ta "Kun na mengal si Pablo nu mattúrâ, ta masírk yù itabbák na ánnà makáwayyá yù túrâ na. Ngam nu makiarubáng nittam, á awán ta tattam na ánnà awán ta serbi nayù kagian na," kud da.

<sup>11</sup> Á yù ira nga makkagi karannian, kánnámmuád da laguk ta tuppalak ku yù ngámin nga itúrâ ku, sangaw nu umayà sù gián naw.

<sup>12</sup> Á sikami, arám mi ikáyâ nga igittá yù baggi mi sù ira tatolay nga mangipeddaráyw ta baggi ra lápay. Á igittá ra yù akka-akkuád da sù ággangnguá nayù ira kagittá ra, á kagiad da ta napiá ira ánné sù ira kábulud da. Ngam arád da nonopan yù kuruk nga napiá nga kagian ni Namarò, á yáyù nga awán ta kánnámmuád da.

<sup>13</sup> Ngam sikami, kagiam mi lâ yù meyannung sù pattarabáku mi nga inipakuá ni Namarò nikami. Á arám mi patturutan yù kagiam mi, ta kagiam mi lâ yù pangituddu mi nikayu, ta yáyù inipakuá ni Namarò nikami.

<sup>14</sup> Á arám mi iturù yù kagiam mi, ta mepasingan ta pinalurò mi yù ipakuá ni Namarò nikami megapu sù panguruk naw. Ta sikami yù napolu nga minay nikayu nga mangilayalayâ sù napiá nga dámak nga meyannung kâ Apu Kesu Kiristu. Á arám mi sinippil yù pakáwayyá mi nga mangituddu nikayu.

<sup>15</sup> Á arám mi iráyw yù baggi mi ta meyannung sù tarabáku na tanakuán nga tolay, nga kunnay ta sikami yù namalurò kuna. Ngam iddanamám mi ta mapasigaggà yù pangikatalà naw kâ Apu, tapè umaru laguk yù awayyá mi nga mangituddu sù ira káruán ta gián naw.

<sup>16</sup> Á kabalin nayù pangilayalayâ mi sù napiá nga dámak nga meyannung kâ Apu Kesu ta gián naw, manaw kami sangaw, nga umay mangilayalayâ ta tanakuán nga lugár gapay, nga

awán paga ta mangituddu nira, tapè ari kami meparáyaw megapu sù kingnguá na tádday nga tolay, nga inipakuá ni Namarò kuna.

<sup>17</sup> Á aijan yù netúrâ, nga kun na, "Nu aijan yù tolay nga mappeddaráyaw, á awán laguk ta tanakuán nga ipeddaráyo na nu ari galâ si Apu."<sup>\*</sup>

<sup>18</sup> Ta mepasingan ta napiá yù tolay, ari megapu sù pangipeddaráyo na ta baggi na, nu ari galâ megapu sù pangiráyo ni Namarò kuna.

## 11

### *Yù Meyannung sù ira Áppè Minángngilayalayâ*

<sup>1</sup> Á parè bì ta attamán naw nga ginnán yawe nga kagiak ku nikayu, mássiki nu magubobugà nga kun na tolay nga awán ta nonò na.

<sup>2</sup> Ta iddukat takayu, nga kun na ánnâ ku, á maburungà megapu nikayu, marakèmekáttuy kayu sù panguruk naw kâ Apu Kesu. Á mangilin yù pangabubù nikayu nga kunnay ta pangabubu ni Namarò, gapu ta initarátu takayu kâ Apu Kesu Kiristu. Sikayu yù meyárik sù magingánay nga metarátu sù pakiatawán na. Á yáyù nga ikáyâ ku ta pareku nga napiá yù nonò naw.

<sup>3</sup> Á yá ikaburung ku ta melogò kayu, á kurugan naw sangaw yù ari kuruk ánnâ lonán naw yù ángngiddù naw kâ Apu Kesu Kiristu, nga kunnay kâ Abbò Eba ngaw, nga nelogò megapu sù passírisiri nayù iráw, nga si Satanas.

<sup>4</sup> Ta ayatán kayin nga mamaddulò sù tolay nga umay nikayu mangilayalayâ sù tanakuán, nga ari si Apu Kesu Kiristu nga inilayalayâ mi nikayu. Ngattá, ta ginnán naw lâ yù ituddu na, mássiki nu ituddu na yù pangalawâ naw sù tanakuán, nga ari yù Mangilin nga Ikararuá nga naggapu kâ Namarò. Á ngattá, ta ginnán naw, mássiki nu tanakuán yù ilayalayâ na, nga ari negittá sù napiá nga dámak, nga inituddu mi nikayu. Á yáyù nga maburungà nikayu, ta malogon kayu nga melogò garè.

<sup>5</sup> Á ta urè, aringà nagukák ánnè sù ira minángngituddu nga minay nikayu, nga makkagi ta aggira yù kátannangán nga minángngilayalayâ.

<sup>6</sup> Á mássiki nu aringà támma malaláki nga magubobuk, ngam ari makúráng yù ammù nga meyannung sù kuruk nga bilin ni Namarò, á yáyù inipakánnámmù nikayu, megapu sù ngámin nga inipasingak ku ánnâ kinagi nikayu.

<sup>7</sup> Á addè ngaw keggâ ta gián naw nga mangituddu sù bilin ni Namarò, aringà bulubugá naktáddán nikayu, ta tanakuán yù pangápák ku ta pakkatolè. Á liwâ ku panò, nga kunnay ta pinagukák ku yù baggi gapu ta pangilayalayâ ku nga arán naw pagán?

<sup>8</sup> Á pangituddù nikayu, kunnay ta kinokoták ku yù ira mangikatalà kâ Apu Kesu nga maggián ta tanakuán nga lugár da, gapu ta aggira yù mangiyawâ nikán ta máwák ku, á arák ku ira nasserbián, nu ari galâ sikayu.

<sup>9</sup> Á mássiki nu nagáwágà ta keggâ nikayu, arát takayu bulubugá nakkiddawán. Ta limibbè yù ira wáwwagi tam nga taga Masidonia, á aggira yù mangiyawâ nikán ta ngámin nga awágak ku. Awán ta kiniddò nikayu, á arák ku bulubugá kiddawan nikayu, tapè ari kayu majjigâ megapu nikán.

<sup>10</sup> Á kuruk yù ipakánnámmu ni Apu Kesu Kiristu nikán, aggina nga mepulupulù nikán. Á yáyù nga kuruk gapay yù kagiak ku nikayu. Awán ta tolay sù purubinsia na Akeya nga makagammá sawe ipeddaráyo. Ta aringà bulubugá mangâ sù pakkatolè nikayu.

<sup>11</sup> Á parè bì ta arán naw kagian ta arát takayu iddukan, gapu ta arák ku apan yù pakkatolè nikayu. Ta ammu na gemma ni Namarò ta kukurugán nga iddi-iddukat takayu!

<sup>12</sup> Á uputak ku yù akka-akkuák ku, tapè awán ta awayyá nayù ira áppè minángngilayalayâ nga makkagi ta negittá yù akka-akkuád da sù ággangnguá mi. Ta ari gemma kuruk, gapu ta táddánan naw ira. Ngam sikami, arán naw kamú táddanán.

<sup>13</sup> Á danniaw ira nga mangituddu nikayu, mangilogò ira nga massirisiri ta meyannung sù tarabáku ra. Áppè minángngilayalayâ ira, nga mattá-ábbilinán, á ari kuruk yù kagiad da nga sinullà na ira ni Apu Kesu Kiristu.

<sup>14</sup> Á ari ittam mapállâ sù pangilogò da. Ta mássiki si Satanas, luttuák nga maddalingárang nga kun na daroban ni Namarò.

<sup>15</sup> Á yáyù nga ari makapállâ nu mappasingan yù ira áppè pípiá nga masserbi kâ Satanas nga kunnay sù ira daroban nga masserbi kâ Namarò. Á pagíkaruan ni Namarò yù ira áppè pípiá ta meyannung sù kingnguá ra sangaw nu pagáddekan na ággaw.

\* 10:17 Jeremia 9:24; 1 Korinto 1:31

*Yù Meyannung sù Pagattam ni Pablo*

<sup>16</sup> Á pidduák ku má nga ikomá nikayu ta arán naw kagian ta maguyungà, megapu sù kagiak ku. Ngam mássiki nu kagian naw ta ulapángà, á parè bì ta attamán naw nga ginnán yù ipeddarayò.

<sup>17</sup> Á yù kagiak ku kunangan, arán na inipakuá nikán ni Apu Kesu Kiristu yù pagubobuk ku karanniaw, nu ari galâ ta kun nangà na ulapá nga magubobuk.

<sup>18</sup> Á gapu ta aru yù ira nga mappeddarayaw ta meyannung ta akkuád da ta dabbuno, á ipeddarayò gapay laguk yù baggi ta baddì.

<sup>19</sup> Ta ari panò kuruk nga aru yù ammu naw, gapu ta magayáyâ kayu nga magattam sù ira nga kun na ulapá yù pagubobuk da?

<sup>20</sup> Á mássiki nu aripanad da kayu, ánná darogatad da kayu, á ngattá, ta attamán naw lâ! Áilogò da kayu, ánná iluddè da kayu, ánná lappágad da kayu! Ngattá laguk ta attamán naw yù narákè nga akkuád da!

<sup>21</sup> Á kuruk yù kagiak ku nikayu, nga ari kunnian yù akkuám mi nikayu, ta mappasirán kami nga mangnguá karannian nga narákè nikayu.

Ngam nu ajjan yù awayyâ ra nga mappeddarayaw, maguray lâ yù ipeddarayo ra, á ajjan gapay yù awayyâ nga makkagi, mássiki nu kun nangà na ulapá nga magubobuk.

<sup>22</sup> Á ipeddarayò ra yù baggi ra, ta Kudio ira nga mangngágána Kebru. Á Kebrungà gapay gemma. Á nu iráyo ra ta aggira yù ginaká ni Kákay Israel, á ginaká nangà gapay ni Kákay Israel. Á aggira yù ginaká nayù ngaw Kákay Abrakam, á sikán gapay gemma yù ginaká ni Kákay Abrakam.

<sup>23</sup> Á kagiad da ta masserbi ira kâ Apu Kesu Kiristu. Á mássiki nu kunnayà ta maguyung ta pagubobuk ku karanniawe, á appútak ku ira ngámin, ta aru yù tarabákù ta passerbi kâ Apu Kesu Kiristu ánnè nira. Á más napiá yù passerbi kâ Apu ánnè nira, ánná aru yù iniyattam ku. Ta name-arungà nga nagattam sù kebáluk ku megapu sù pattarabákù kâ Apu. Á nameppígiángà nga nagattam ta pamalapalù da ánná pamaligà da nikán. Á name-arungà nga nágisassay natay.

<sup>24</sup> Á namellímá yù pamaligà da nikán nayù ira kagittâ nga Kudio, ta taggitallupulu ta siám.

<sup>25</sup> Á namillu gapay nga pinalapalù dangà. Á sù tádday nga ili, pinayáng dangà ta batu. Á namillu yù pattaké ta biray, nga nabbaggiu ta bebay, á natáttâ yù nattakayák ku. Á tangággaw ánná tangagabingâ nga nappátaw.

<sup>26</sup> Á sigídángà nga magala-ali nga mangilayalayâ, á aru yù jigâ nga nesimmu nikán ta pallakalakák ku. Naparubák ku gapay yù kalítu na dabbun, yù pangnguá ra nikán nayù ira tulisán, yù akka-akkuán nayù ira kagittâ nga Kudio nikán ánná yù akka-akkuád da nikán gapay nayù ira ari Kudio. Á jinigirigâ dangà sù ira ili, ánná ta kalállamatán. Á ta pattaké ta biray, narigirigákâ má ta paggiám mi ta tangngá na bebay. Ánná jinigirigâ dangà gapay nayù ira áppé manguruk.

<sup>27</sup> Á aringà naturâ sù pattarabákù, mássiki nu sigídángà mabannák, tapè ajjan yù ipangâ ku ta ipakkatolè, á nepatalugárting ta ajjan yù awayyâ nga mangilayalayâ sù napiá nga dámak. Á name-arungà nga naturá ta tangagabi. Á inattamák ku lâ nu nabisinà onu napangálâ, gapu ta name-aru nga awánâ ta kanan. Á inattamák ku lâ nu malumminâ, nga awún ta gómi ku ánná pallirumák ku.

<sup>28</sup> Á ari lâ dannian yù attamák ku nu ari gapay ta sigídángà maburung nga mannononò nu kunnasi yù ángngabbák ku sù ira mangikatalà kâ Apu nga maggagammung ta ngámin nga lugár, nga iddi-iddukak ku.

<sup>29</sup> Á eggá panò yù tolay nga makapi yù pangikatalà na kâ Apu, á arák ku nakuan matagenâ yù kakapi na? Ta nepallà yù daddam ku nu ajjan yù nekáttuay sù panguruk na kâ Apu ánná makaliwâ.

<sup>30</sup> Á manakikà nakuan nga mangipeddáráyaw, ngam gapu ta nakagumánâ, á yáyù nga mangipeddáráyawâ, ngam ari megapu sù pakáwayyâ, nu ari galâ megapu sù pakkapíyák ku, tapè mepakánnámmu yù pakáwayyâ ni Apu Kesu Kiristu, nga paggapuán nayù pakáwayyâ.

<sup>31</sup> Á si Namarò, nga Yáma ni Apu Kesu Kiristu nga Yápu tam, ammu na ta kuruk yù ngámin nga kagiak ku. Á aggina yù meparáyaw ta áddè ta áddè.

<sup>32</sup> Á yawe nga nesimmu nikán sù paggiák ku ngaw paga ta ili na Damasku yù pangipasin-ganán nayù pakkapíyák ku. Ta yù gubinador nga sinullà ni Patul Aretas, jinok na yù ira suddálú na nga magguárdi sù áttallungán nayù ili, tapè gaputad dangà, nu mánawà.

<sup>33</sup> Ngam ajjan yù ira nangabbák nikán, á inâ da yù mallakay nga basket, á nappittakà kuna. Á inayáyud dangà ta lawán sù bintá nayù attannáng nga jijing ngá batu, ngá alitù na ili, á inipagukák dangà. Á yáyù ngá nakatammangà sù gubinador.

## 12

### *Yù Inipasingan ni Namarò áんな Inipalappâ na kâ Pablo*

<sup>1</sup> Á mássiki nu ammù ta awán ta serbi nayù pappeddaráyò, á gapu ta kagumánan nawà, yáyù ngá kagiak ku laguk yù inipasingan ni Apu Kesu áんな inipalappâ na nikán.

<sup>2</sup> Nappaságín yù mapulu ta appâ ngá dagun áddè ngaw kesímmu na nikán. Á neyángayà ngaw ta lángi ta gián ni Namarò, á arák ku ammu nu neyángay yù ikararuâ, onu naggiánà paga ta baggi ta keyángè tán. Si Namarò lá yù makánnámmu.

<sup>3</sup> Yá lâ ammù, ta neyángayà ta lángi ta paggianán ni Namarò, ngam si Namarò lá yù makánnámmu nu aijanà ta baggi ta keyángè ta gián na.

<sup>4</sup> Á keggâ ta gián ni Namarò ta lángi, naginnâ yù aru ngá makapállâ ngá ari mepalappâ ta ággubobu na tolay, áんな ari meyanugù gapay ngá ubobugan na tolay.

<sup>5</sup> Á nu ikáyâ ku mappeddaráyò, á ipeddaráyò nakuan yù ángé ta lángi áんな yù naginnâ. Ngam ipeddaráyò galâ yù ira pakkapíyák ku.

<sup>6</sup> Á mássiki nu ikáyâ ku nakuan mappeddaráyaw, á aringâ gemma maguyung, ta kuruk ngá nesímmu yù ngámin ngá kagiak ku. Ngam aringâ mappeddaráyaw, marakè matturù yù paddáyo nayù ira tatolay nikán. Á napiá ta urè nu kemámmatád dangà megapu galâ sù masingad da ngá akka-akkuák ku, áんな yù maginnâ ra ngá pangituddù nira.

<sup>7</sup> Á gapu ta aru yù ira makapállâ ngá inipasingan ni Namarò áんな inipalappâ na nikán, á yáyù ngá inanugù na ta majjigákà, megapu sù akkuán na nikán nayù daroban ni Satanás, tapè ari motun yù nonò ku, áんな aringâ matturù ngá mappeddaráyaw.

<sup>8</sup> Á namillungâ ngá nakimállâ kâ Apu Kesu ta irián na yù pajjigâ ku.

<sup>9</sup> Ngam kinagi na nikán, "Máwák mu lá ta abbágát tako megapu sù ángngikállâ ku nikaw, tapè meyattam mu yù ngámin ngá jigâ ngá umay nikaw. Á mepasingan ta napiá yù pakáwayyâ nu nakapi ka," kun na nikán. Á yáyù ngá magayáyákà ngá mappeddaráyaw megapu sù pakapíyák ku, tanu nakapingâ, aijjan yù pakáwayyâ ni Apu Kesu Kiristu ngá mangabbák nikán.

<sup>10</sup> Á yáyù ngá magayáyákà, maguray lá yù mesímmu nikán, nu makapingâ, onu pakkakagiád dangà, onu marigirigákà, onu akkuád dangà megapu sù pangilayalayâ ku kâ Apu Kesu Kiristu, onu matakikâ. Ta nu makapingâ, pasikanan nangâ ni Apu Kesu Kiristu, á yáyù ngá mepasingan ta kuruk ngá masikanâ megapu sù pangabbák na nikán.

### *Yù Kaburung ni Pablo sù ira taga Korinto*

<sup>11</sup> Á kunnayà ta ulapá gapu ta pappeddaráyò, ta kinagumán nawà. Ngam sikayu nakuan yù makimoray nikán, ngá makkagi ta kuruk ngá meyannung nikán. Á yù ira áppè minángngilayalayâ, ari ira gemma makáwayyâ ánnê nikán, mássiki nu awán ta pakáwayyâ.

<sup>12</sup> Á keggâ ta gián naw, inattamák ku yù ngámin ngá jigâ ngá minay nikán, tapè palurotak ku yù ipakuá ni Namarò nikán. Á nasingan naw yù ngámin ngá makapállâ ríga pinagaddátu ni Namarò megapu nikán, ngá panákkilalán ta sikán yù kuruk ngá minángngilayalayâ ngá sinullâ na.

<sup>13</sup> Á anni panò yù liwâ ku nikayu? Ta arát takayu gemma inirumá sù ira ngámin káruán ngá wáwwagi tam ngá mangikatalà kâ Apu, ngá maggagammung ta tanakuán ngá lugár. Ngam yá lâ nangirumák ku nikayu yù arák ku pakitáddán nikayu. Á nu liwâ ku yian, á pakomán nawâ bi laguk!

<sup>14</sup> Á naparánâ ngá umay nikayu mattúllun, á yawe yù mekatallu ngá ángè pattúllun nikayu. Á nu umayá sangaw nikayu, aringâ makkiddaw nikayu, tapè ari kayu marigirigâ megapu nikán. Ta ari yù kukuá naw yù alerak ku, nu ari galâ sikayu ngá mangikatalà áんな mangiddù kâ Apu Kesu. Ta sikayu yù kun na ánâ ku. Á ari nakuan yù ira ábbing yù mamarán ngá mangiyawâ ta máwák nayù ira darakal da, nu ari galâ yù ira mappataganâ yù mangiyawâ ta máwák nayù ira ánâ da.

<sup>15</sup> Á yáyù ngá magayáyákà ngá mangiyusá ta ngámin ngá aijjan nikán áんな yù baggi gapay, mássiki nu metapilâ megapu nikayu, tapè mábbágát takayu, á mapasigaggâ yù pangikatalà naw. Á nu mappanâ yù ángngiddù ku nikayu, malurâ kayu panò ngá mangiddù nikán?

<sup>16</sup> Á ammu naw ta kuruk ngá aringâ nikayu nakitáddán, ngam aijjan galâ nikayu yù ira makkagi ta inilogò takayu áんな jinarogâ takayu.

<sup>17</sup> Á yù ira jinok ku nikayu, jinarogà da kayu panò? Ari gemma! Ammu naw ta awán ta inâ da nikayu, ánnna arád da kayu inilogò.

<sup>18</sup> Á jinok ku si Titò ta umay mattúllun nikayu, nga nepulù sù tádday nga wagi tam. Á jinarogà da kayu panò? Ari gemma! Ta matunung yù ngámin nga kingnguá di Titò ánnna napiá yù nonò da. Á keggá mi ta gián naw, negittá yù nonò mi ánnna ággangnguá mi ta nonò da ánnna ággangnguá ra.

<sup>19</sup> Á kagian naw támma ta iyígù ku yù baggi megapu sù kinagi. Ngam ubobugak ku lâ ta arubáng ni Namarò yù ipeyubobuk ni Apu Kesu Kiristu nikán, tapè mábbágát takayu, sikayu nga iddukak ku, tapè mapasigaggà yù pangikatalà naw kâ Apu.

<sup>20</sup> Á maburungà, marakè aringà magayáyâ sangaw nu umayà sù gián naw, gapu ta marángnganat takayu nga mangnuá sù arák ku ikáyâ. Á nu kunnian yù akkuán naw sangaw nu lubbekâ, á ari kayu gapay magayáyâ nu masingan nawâ, gapu ta mapuersángâ nga maggammá nikayu. Ta yá ikaburung ku nu maratang ku yù ira maddaráma, onu yù ira mangabubu ánnna mamassil, onu yù ira makkkakáporay, onu yù ira magukkuk, onu yù ira mallibbâ, yù ira mabbebek, onu yù ira mappeddaráyaw, onu yù ira makusukusu.

<sup>21</sup> Á maburungà, marakè mepasiránà kâ Namarò sangaw nu umayà ta gián naw, megapu sù narákè nga akka-akkuán naw. Á maraddamà laguk, nga mappanà yù daddam ku megapu sù ira nakaliwâ ngaw, nga ari paga nabbabáwi sù narákè nga ággangnguá ra, nga pangarallo ra ánnna yù panuppál da ta pakkaragâ nayù baggi ra nga naráké.

## 13

*Yù Naporíán nga Taddán ni Pablo sù ira taga Korinto*

<sup>1</sup> Á mekatallu yù ángè ta gián naw sangaw nu et takayu tullúnán. Á nu ajjan yù mangikeká ta kabbulun na sangaw, á ammu naw yù taddán ni Namarò nga netúrâ, ta mówâk yù duá onu tallu nga tolay gapay nga massistigu ta kuruk yù kagian nayù mangikeká.\*

<sup>2</sup> Á sù ngaw mekaruá nga pattúlluk ku nikayu, sinaddánák ku yù ira nakaliwâ ngaw ánnna sikayu ngámin. Á kunangane pidduák ku má nga kagian pángè ku umay. Nu arád da paga nilikurán yù narákè nga akka-akkuád da, á sangaw nu lubbekâ sù gián naw, pággangak ku ira.

<sup>3</sup> Á gapu ta ikáyâ naw yù panákkilalán naw ta kuruk nga si Apu Kesu Kiristu yù nanullà nikán, á yá ipamakuruk ku nikayu ta pággangat takayu sangaw megapu sù pakáwayyá ni Apu Kesu Kiristu. Ta ari makapi si Apu, nu ari galâ makáwayyá nga manuddu nikayu.

<sup>4</sup> Á mássiki nu kunnay ta nakapi si Apu Kesu sù pangipátâ da kuna ta kurù, á matolay galâ megapu sù pakáwayyá ni Namarò. Á sikami nga minángngilayalayâ nga sinullà na, makapi kami gapay nga kunnay kâ Apu Kesu, megapu sù ketádde mi kuna. Ngam umay kami sangaw ta gián naw, á nu mówâk nga pággangam mi kayu nakuan, á masingan naw kami nga makáwayyá gapay, gapu ta mesipâ kami sù áttole ni Apu Kesu Kiristu megapu sù pakáwayyá ni Namarò.

<sup>5</sup> Á pasikkálán naw laguk yù nonò naw ánnna akka-akkuán naw, nu kuruk nga mangikatalà kayu kâ Apu Kesu. Á arán naw panò ammu ta ajjan nikayu si Apu Kesu Kiristu? Kuruk nga ajjan nikayu, nu ari kayu áppè mangikatalà.

<sup>6</sup> Á yá iddanamák ku, ta gapu ta mepasingan ta kuruk nga mangikatalà kayu kâ Apu Kesu, á kánnámmuán naw gapay laguk ta ajjan si Apu Kesu gapay nikami ánnna kuruk nga sinullà na kami ni Namarò nga mangilayalayâ kuna.

<sup>7</sup> Á yawe ipakimállà mi kâ Namarò, ta mepasingan sangaw nga nattukkákin yù narákè nga akkuán naw, tapè awán ta mówâk mi nga mamággáng nikayu. Ta yawe yù kuruk nga ikáyâ mi, ari ta mepasingan yù pakáwayyá mi, nu ari galâ ta akkuán naw yù napiá, mássiki nu ari mepasingan yù pakáwayyá mi nga mamággáng nikayu.

<sup>8</sup> Á nu akkuán naw lâ yù napiá, arám mi mówayyá nga ipasingan yù pakáwayyá mi nga mamággáng nikayu. Ta ari kami makkontará nikayu nu kurugan naw yù kuruk nga napiá, ta abbágám mi yù ira nga manguruk sù kuruk nga bilin ni Namarò.

<sup>9</sup> Á yá yù nga magayáyâ kami, nu awán ta mówâk mi nga mamággáng nikayu, mássiki nu mebiláng kami ta makapi. Ta ayatán kami galâ nu napiá lâ yù ángnguruk naw kâ Apu Kesu. Á yawe yù kuruk nga ikáyâ mi ánnna ipakimállà mi kâ Apu, ta mangáppípiá kayu.

<sup>10</sup> Á initúrâ ku yawe nikayu pángè ku umay, tapè arák ku mówâk nga ipasingan yù pakáwayyá nga mamággáng nikayu, sangaw nu lubbekâ sù gián naw. Ta iniyawâ na nikán

\* 13:1 Deuteronomio 19:15

ni Namarò yù pakáwayyâ, ari ta darálat takayu nu ari galâ tapè mábbágát takayu, tapè mapasigaggâ yù pangikatalà naw kuna.

<sup>11</sup> Á wáwwaḡ, yawe paga laguk yù kagiak ku nikayu ta kabalín na yaw túrâ ku. Ipe naw yù urà naw nga manuppál sù ngámin nga ipakuá ni Namarò nikayu. Á tángngagan naw yù taddák ku nikayu ánná pattatáddayan naw yù nonò naw, tapè ari kayu maddiráma. Magayáyâ kayu laguk nga mepagimammà. Á maggián laguk nikayu si Namarò, nga minángngiddù ánná mamagimammà nikayu.

<sup>12</sup> Á nu maggagammung kayu, ipasingan naw yù pakimore naw ánná yù ángngiddù naw sù ira kábulun naw, gapu ta mawwawági kayu kâ Apu Kesu Kiristu.

<sup>13</sup> Á yù ira ngámin nga kábuluk ku saw, kagiad da ta manonò da kayu, á parè bì ta napiá yù ággján naw.

<sup>14</sup> Á yawe ipakimállà ku kâ Namarò megapu nikayu, ta sigídá naw matagenà yù pangikállà ni Apu Kesu Kiristu ánná yù pangabbák na nikayu, á parè bì ta makkaká-iddù kayu megapu sù ángngiddù ni Namarò nikayu, ánná napiá yù ákkiwagi naw megapu sù Mangilin nga Ikararuá nga aijan nikayu.

## Yù Túrâ ni Pablo sù ira Manguruk nga taga Galasia

*Yù Meyannung sawe Túrâ*

Pangilayalayâ ni Pablo sù napiá nga dámak sù ira ari Kudio, aru yù ira nga nanguruk. Á ajian yù ira Kudio nga minay mangituddu nira ta mawák da tuppálan yù tunung ni Moyses, tapè mesipà ira sù ira tatole ni Namarò. Á yáyù nga initúrâ ni Pablo sù ira tatolay ta purubinsia na Galasia, tapè panolian na ira ta panguruk da sù napiá nga dámak. Á yawe yù kebalinán nayù napiá nga dámak, ta sittam ngámin, mássiki nu Kudio onu ari Kudio, meyigü ittam galâ megapu sù pangikatalà tam kâ Apu Kesu Kiristu, nga netapil megapu nittam.

Á si Namarò yù nanullà kâ Pablo ta umay mangilayalayâ sù ira ari Kudio. Á yù ira olu nga minángngilayalayâ nga naggián ta Jerusalem, magayáyâ ira megapu sù pangilayalayâ ni Pablo ta gián nayù ira ari Kudio. Á yáyù ipanonò ni Pablo sù ira taga Galasia, tapè ammu ra ta ajian yù pakáwayyâ na, áンna tángngagad da yù kagian na, marakè mekáttuay ira sù napiá nga dámak.

*Yù Mayán nayù Túrâ*

Táttádday lâ yù Napiá nga Dámak (1:1-10)

Yù Panullà ni Namarò kâ Pablo (1:11-24)

Yù Pakáwayyâ ni Pablo ánnâ yù ira Káruán nga Minángngilayalayâ (2:1-21)

Mesipà ittam kâ Namarò megapu galâ sù Pangikatalà tam kâ Apu Kesu Kiristu (3:1-14)

Yù Initabâ ni Namarò kâ Abramak ánnâ yù Tunung na (3:15-29)

Pataganatán na ittam ni Namarò (4:1-7)

Maburung si Pablo sù ira taga Galasia (4:8-20)

Yù Keyarigán nayù ira Duá nga Tarátu ni Namarò (4:21-31)

Napalubbâng ittam, tapè Makkakâ-iddù ittam (5:1-6:10)

Yù Kabalin nayù Túrâ (6:11-18)

<sup>1</sup> Sikán si Pablo, nga minángngilayalayâ. Á ari gemma tolay yù naggapuán nayù pakáwayyâ nga mangilayalayâ kâ Apu Kesu. Ngam yù ira nga nanullà nikán di Apu Kesu Kiristu ánnâ si Namarò nga Yáma na nga namaginnanolay kuna.

<sup>2</sup> Á sikami ánnâ yù ira ngámin saw nikánnga mangikatalà kâ Apu Kesu, mattúrâ kami nikayu nga wáwwagi mi nga maggagammung ta ngámin nga ili sù purubinsia na Galasia.

<sup>3</sup> Á parè bì ta napiá lâ yù ággigián naw ánnâ gawagawáyán naw, ánnâ magimammâ kayu, megapu ta pangikállâ da nikayu di Namarò nga Yáma tam kâ Apu Kesu Kiristu nga Yápu tam.

<sup>4</sup> Ta initapil ni Apu Kesu Kiristu yù baggi na megapu nittam, tapè ikáru na yù liwiliwâ tam, ánnâ iyígù na ittam, ta yáyù ure ni Namarò nga Yáma tam. Á gapu ta pagikáru ni Apu Kesu ta liwiliwâ tam, á pinakomá ni Namarò ittam, á kunnay ittam ta napalubbângin, tapè likuránát tamín yù ngaw narákè nga ággangnguá tam nga negagângay ta tolay ta dabbuno.

<sup>5</sup> Dayáwat tam laguk si Namarò, nga meparáyaw ta áddè ta áddè nga awán ta áddè na. Á mapalurò yaw. Ammán.

*Táttádday lâ yù Napiá nga Dámak*

<sup>6</sup> Mapállákà sù akka-akkuán naw, ta nabi kayu lâ paga nga nanguruk, á ngattá, ta likuránán nawin si Namarò, nga nagágál nikayu megapu sù allâ ni Apu Kesu Kiristu? Á tángngagan nawin yù tanakuán nga ituddu ra, nga kagiad da ta napiá nga dámak, ngam ari gemma.

<sup>7</sup> Ta awán gemma ta tanakuán nga napiá nga dámak, nu ari lâ yù kuruk nga inituddu mingin nikayu. Ngam ajian garè yù ira umay mamuruburion nikayu, á ikáyâ da nga patalián yù napiá nga dámak nga inituddu mi nga meyannung kâ Apu Kesu Kiristu.

<sup>8</sup> Ngam ari gemma mapatalián, á nu ajian yù mangilayalayâ ta tanakuán nga ari negittá sù inílayalayâ mi nikayu, á mokum yian. Mássiki nu sikami nakuan onu yù daroban nga naggapu ta lángi yù mangilayalayâ ta tanakuán, á ukuman ni Namarò.

<sup>9</sup> A yawe nga kinagi mi ngaw nikayu, pidduák ku má nga kagian, ta mássiki nu asinni yù tolay nga mangilayalayâ ta tanakuán, nga nerumá sù napiá nga dámak nga kinuruk naw ngaw megapu sù pangilayalayâ mi, á megagek yù tolay, ta pagikaruan ni Namarò ta impiernu.

<sup>10</sup> Á gapu ta kunnian yù pakkagi nikayu, awayyá naw panò nga makkagi ta alerak ku yù paddáyo nayù ira tatolay nikán? Ari! Ari gemma yù ira tatolay yù ikáyâ ku nga pagayáyatán

megapu sù pangilayalayâ ku, nu ari galâ si Namarò. Á nu alerak ku nakuan yù paddáyo nayù ira tatolay, aringakin laguk nakuan masserbi kâ Apu Kesu Kiristu.

### *Yù Panullà ni Namarò kâ Pablo*

11 Á wáwwagì, yaw ipakánnámmu nikayu, ta ari naggapu sù nonò na tolay yù napiá nga dámak nga ilayalayâ ku.

12 Á ari tolay yù nakagigiámmuák ku sù napiá nga dámak, ta awán gemma ta nangituddu nikán, nu ari galâ ta si Apu Kesu Kiristu yù nangipalappâ nikán.

13 Á narámak naw gemma yù ngaw kustombarè ta panuttul ku sù rilision na Kudio, ta jinigirigâ ku yù ira manguruk kâ Apu Kesu, á nerallà yù panigirigâ ku nira. Á inigagángé ngámín ira nga talamánan.

14 Á sikán yù kátannangán nayù ira kábuluk ku nga Kudio nga naggigiámmu sù rilisiód da, ta pinatuppál ku yù ngámín nga kustombare na Kudio nga inituddu nayù ira naggaká nikami.

15 Á gapu ta nepallà yù allà ni Namarò nikán, sinullà nangà sù ngaw aringà paga neyanâ, á inagálán nanga, tapè masserbingà kuna.

16 Á yáyù nga pinalappâ ni Namarò nikán si Apu Kesu nga Anâ na, tapè ek ku ilayalayâ sù ira makkakerumá nga ari Kudio. Á awán ta tolay nga nakitudduák ku.

17 Á mássiki yù ira napolu nga sinullà ni Namarò nga mangilayalayâ, aringà nakituddu nira. Aringà minay ta giád da ta Jerusalem, ngam naddaretiungâ nga nánaw nga minay napipaggián ta Arabia. Á pánò ta Arabia, nattolingà ta Damasku.

18 Á pappasá na talluragun, giminonà ta Jerusalem, ta minayà nakiammu kâ Eduru. Á duá ligguán lâ yù paggiák ku kuna.

19 Ngam arák ku nasingan yù ira káruán nga mapulu duá nga minángngilayalayâ, ngam si Ime lâ, nga urián ni Apu Kesu.

20 Á kuruk yawe ngámín itúrâ ku nikayu, á si Namarò yù massistígu ta aringà massiri.

21 Á ta pánò ta Jerusalem, minayà ta lugár na Siria áんな Silisia.

22 Á yù ira káruán nga manguruk kâ Apu Kesu nga maggián ta ili na Jerusalem áんな yù ira manguruk nga maggián ta purubinsia na Judiya, arád dangà paga nasingan.

23 Á narámk da lâ yù meyannung nikán, nga kud da, "Yane tolay nga nanigirigâ ngaw sù ira mangikatalâ kâ Apu Kesu, á kunangane, nabbabâwi ngin, á ilayalayâ na gapay ta máwák nayù ira tatolay nga mangikatalâ kâ Apu Kesu."

24 Á pakarámak da karannian, jináyo ra si Namarò megapu sù pabbabâwì áんな yù pangikatalâ ku kâ Apu Kesu.

## 2

### *Yù Pakiubobuk di Pablo sù ira Minángngilayalayâ*

1 Á mapulu ta appâ nga dagun yù napasá pángè ku má minay ta Jerusalem. Á sikami kâ Bernabe yù minay, á inipulù mi si Titò.

2 Á yá iniyángé, gapu ta inipalappâ ni Namarò nikán ta máwák ku nga umay, tapè ibukalâk ku sù ira kátannangán yù bilin na nga inilayalayâ ku sù ira ari Kudio. Á yù ira kátannangán lâ yù nakiubobugák ku, tapè pattatâddayam mi yù nonò mi ta meyannung sù ituddù, maraké awán ta serbi nayù tarabáku, nu arád da nakuan ikáyâ.

3 Á iniyangugi da yù ngámín nga ituddù, mássiki yù ituddù nga ari máwák nga tuppalán nayù ira ari Kudio yù tunung mi nga Kudio. Ta Gareko gemma si Titò nga kabbuluk ku, ngam arád da piuersá ta mappakugi.

4 Ngam yù ira appé makiwiágî, minay ira nakipaggammung nikami tán, tapè sisimád da kami. Á kagumánañ da kami nakuan, ta kugitad da nakuan si Titò, ta ipatuttul da nittam nakuan yù tunung na Kudio, tapè megaggak ittam nakuan nga kunnay ta aripan, mássiki nu kuruk nga napalubbâng ittamin megapu sù pangikatalâ tam kâ Apu Kesu Kiristu.

5 Á arám mi gemma bulubugá initulù nira, mássiki nu baddi lâ, tapè ari malannapán ta siri yù kuruk nga napiá nga dámak nga meyannung kâ Apu Kesu, nga ilayalayâ ku nikayu nga ari Kudio.

6 Á yù ira nakiubobugák ku ta Jerusalem, neparámak ira ta kátannangán, ngam arák ku ira inirumá, ta arán na ira gemma irumá ni Namarò. Á awán ta kinagi ra nga liwâ ku áんな arád da linnapán yù ituddù.

7 Ta nánnámmuád da ta sinullà nangà ni Namarò nga umay mangilayalayâ sù napiá nga dámak nga meyannung kâ Apu Kesu sù ira ari Kudio, ta kunnay ta panullà na gapay kâ

Eduru nga mangilayalayâ sù napiá nga dámak sù ira Kudio. Á yáyù nga inanugù da yù ngámin nga bilik ku.

<sup>8</sup> Á si Namarò yù mangabbák kâ Eduru sù pangilayalayâ na sù ira Kudio, ánnna aggina lâ yù mangabbák nikán gapay sù pangilayalayâ ku sù ira ari Kudio.

<sup>9</sup> Á di Ime kári Eduru kâ Kuan, nga kátannangád da, pakánnámmu ra ta si Namarò yù nanullà nikán, inalimánu ra kami kâ Bernabe, gapu ta magayáyâ ira ta mattatádday kami nga mattarabáku kâ Namarò. Á nattatádday yù nonò da ánnna yù nonò mi, ta sikami kâ Bernabe yù umay mangilayalayâ sù ira ari Kudio ánnna aggira yù umay mangilayalayâ sù ira Kudio.

<sup>10</sup> Á yù lâ inipanonò da nikami yù ángngabbák mi sù ira pobare nga manguruk kâ Apu, nga maggián ta Jerusalem, á ayatáná ta yáyù gemma gapay yù ikákáyâ ku nga akkuán.

### *Yù Paggammá ni Pablo kâ Eduru*

<sup>11</sup> Á paggiám mi ta ili na Antokia, minay gapay si Eduru ta Antokia, á ajjan yù kingnguá na nga ari napiá. Á yáyù gimmâ ta arubáng nayù ira tatolay.

<sup>12</sup> Á kunniaw yù kesimmu na. Ta kalalabbè ni Eduru ta Antokia, á napiá lâ yù kingnguá na, ta minay nakilálláng sù ira ari Kudio, nga wáwwagi tam megapu sù panguruk tam kâ Apu Kesu. Ngam labbè nayù ira Kudio nga jinok ni Ime, nga naggapu ta Jerusalem, á pinatalián ni Eduru yù kustombare na, á aringin napiá yù kingnguá na, ta aringin nakilálláng sù ira manguruk nga ari Kudio, gapu ta assing na sù ira Kudio nga taga Jerusalem, nga tumuttul sù kustombare na Kudio. Ta mepugik nga mepalálláng yù ira Kudio sù ira tatolay nga ari nakugi. Á kagiad da garè ta máwák nga mappakugì yù ira nga ari Kudio, nu ikáyâ da makitádday nira.

<sup>13</sup> Á yù ira káruán nga Kudio nga maggián ta Antokia, nga manguruk kâ Apu, pakasingad da sù kingnguá ni Eduru, mássiki nu ammu ra ta ari napiá, ngam pinárigád da gapay yù kingnguá na nga áppè pípiá, ta nattukkâ ira gapay nga nakilálláng sù ira ari Kudio. Á mássiki si Bernabe nga kapulú ku, á nekanâ nira gapay, ánnna aringin nakilálláng sù ira ari Kudio.

<sup>14</sup> Á pakasingak ku ta mekáttuay ira sù kuruk nga bilin ni Namarò nga inipalappâ na nittam nga meyannung sù kepattatádde tam, á nakiubobugâ kâ Eduru ta arubáng nayù ira ngámin nga manguruk. Á kinagi kuna, “Eduru, mássiki nu kuruk nga Kudio ka, ngam nilikuránám min gemma yù kustombare na Kudio, tapè mepattatádday ka gapay sù ira wáwwagi tam nga ari Kudio nga manguruk kâ Apu. Á ngattá laguk, ta ipatuttul mu nira yù kustombare tam nga Kudio nga nilikuránát tam?” kuk ku kâ Eduru.

### *Meyígù ittam nga Mesipà kâ Namarò megapu galâ sù Pangikatalà tam kâ Apu Kesu Kiristu*

<sup>15</sup> Á sikami, Kudio kami gemma, nga nakeyanatám mi yù kustombare mi nga Kudio. Á yáyù nga nerumá yù ággíam mi sù ággíán nayù ira ari Kudio. Á ibiláng mi ta nakaliwâ yù ira ari Kudio, gapu ta arád da ammu yù tunung mi ánnna yù kustombare mi nga Kudio.

<sup>16</sup> Ngam ammu mi gapay ta mapakomá yù ira ngámin nga tatolay ánnna mebiláng ira ta matunung ta arubáng ni Namarò megapu galâ sù pangikatalà da kâ Apu Kesu Kiristu. Á awán bulubugá ta tolay nga matunung megapu ta panuppál na sù tunung, ta awán gemma ta makatuppál sù tunung. Á yáyù nga sikami nga Kudio, ikatalà mingin gapay si Apu Kesu Kiristu, tapè pakomán na kami ni Namarò ánnna ibiláng na kami ta matunung ta arubáng na, megapu sù pangikatalà mi kâ Apu Kesu, ta awán bulubugá ta tolay nga mebiláng nga matunung ta arubáng ni Namarò megapu ta panuppál na sù tunung.

<sup>17</sup> Á sikami nga Kudio, gapu ta iddanamám mingin gapay ta mapakomá kami ánnna mebiláng kami ta matunung ta arubáng ni Namarò megapu sù kesipà mi kâ Apu Kesu Kiristu, á arám mingin laguk ikatalà yù panuppál mi sù tunung na Kudio, gapu ta sinákkilalám mingin ta kuruk nga nakaliwâ kami gapay ta kunnay nikayu nga ari Kudio, nga ari tumuttul sù tunung. Á mássiki nu nakaliwâ ittam ngámin, awayyá tam panò nga kagian ta si Apu Kesu Kiristu yù negapuánán nayù liwâ tam? Ari gemma!

<sup>18</sup> Ngam nu toliak ku nakuan yù tunung na Kudio nga nilikuránák kin ánnna ipatuttul ku nikayu gapay nakanu, á mepasigan ta maliwáká.

<sup>19</sup> Ta pamarubâ nga manuppál sù tunung, nánnámmuák ku ta nakaliwaták ku yù tunung, á kunnayà ta natayin megapu sù tunung, gapu ta mapagikáru nga matay yù ira nakaliwâ kuna.

Á yáyù nga arák kin tuttulan yù tunung, nu ari galâ si Namarò yù passerbiák ku, nga manotolay nikán megapu galâ sù allâ na.

<sup>20</sup> Ta nebáyuk si Apu Kesu ta kurù megapu nikán, á inikáru na yù ngámin nga liwiliwáku megapu sù pate na, tapè arán nangà pagikaruan ni Namarò. Á gapu ta pangikatalà ku kâ Apu Kesu Kiristu, netáddayà kuna. Á yáyù nga aringin sikán yù maguray sù akkuák ku, nu ari galá si Apu Kesu Kiristu, nga mepaggián nikán. Á ta katolè paga ta utun na dabbun, ikatalà ku yù Anâ ni Namarò, áんな itulù ku yù urè kuna, tapè palurotak ku yù ure na. Ta aggina yù mangiddù nikán, á initapil na yù baggi na megapu nikán.

<sup>21</sup> Á arák ku panakitán yù allà ni Namarò. Ta nu awayyá tam nakuan nga manuppál sù tunung, tapè ibiláng na ittam ni Namarò ta matunung ta arubáng na, á awán laguk nakuan ta serbi nayù pate ni Apu Kesu.

### 3

*Mesipà ittam kâ Namarò megapu galâ sù Pangikatalà tam kâ Apu Kesu Kiristu*

<sup>1</sup> Bay e! Sikayu, nga taga Galasia! Ngattá, ta kunnay ta magulapá kayu? Ngattá, ta makilogó kayu sù ira mamatuttl nikayu sù tunung na Kudio. Arán naw panò nánnámuúan yù inituddù nikayu, nga natay si Apu Kesu Kiristu ta kurù, tapè mári yù liwâ tam ngámin?

<sup>2</sup> Tabbaran naw bi laguk yawe iyabbû ku nikayu. Kunnasi yù pangalawâ naw sù Mangilin nga Ikararuá ni Namarò? Iniyawâ na panò ni Namarò nikayu megapu ta panuppál naw sù tunung na Kudio? Ari! Ammu naw ta ari gemma kunnian, ta iniyawâ na nikayu ni Namarò yù Mangilin nga Ikararuá na gapu ta gininná naw yù bilin na, áんな ikatalà nawin si Apu Kesu Kiristu.

<sup>3</sup> Napakáwanán kayu panò ta nonò! Napiá gemma yù pamegapu naw nga manguruk kâ Apu, ta inikatalà naw yù Mangilin nga Ikararuá ta mangabbák nikayu. Ngattá laguk, ta kagian naw ta makáwayyá kayu lápay nga manuppál sù tunung na Kudio?

<sup>4</sup> Á yù ngámin nga nesimmu nikayu áんな yù naparubán naw megapu sù pangikatalà naw kâ Apu, náttamán nawin panò, ta kunnay ta awán ta serbi na? Arák ku kurugan!

<sup>5</sup> Á kunnasi panò yù ángngabbák ni Namarò nikayu? Arán naw panò ammu? Abbágán na kayu megapu sù Mangilin nga Ikararuá na nga iniyawâ na nikayu megapu sù panguruk naw sù napiá nga dámak nga meyannung kâ Apu Kesu Kiristu. Á aru yù pinagaddátu na ta arubáng naw, nga ari gemma megapu ta panuppál naw sù tunung na Kudio, nu ari galá megapu sù pangikatalà naw kâ Apu Kesu Kiristu.

<sup>6</sup> Á ta ángngarigán, nonotan naw si Lákay Abrakam nga yù ngaw naggaká nikami nga Kudio. Ta aijan yù netúrâ nga meyannung kuna, nga kun na, "Inikatalà ni Abrakam si Namarò, á yáyù nga inibiláng ni Namarò ta matunung si Abrakam megapu sù pangikatalà na kuna."\*

<sup>7</sup> Á yáyù gapu na nga kánnámuúat tam laguk ta yù ira ngámin nga tatolay nga mangikatalà kâ Namarò, aggira yù ira ibiláng ni Namarò ta ánhâ ni Abrakam, nga mesipà gapay sù initabbaá na kâ Abrakam.

<sup>8</sup> Á netúrâ sù dán nga libru yù napiá nga dámak nga inipalappâ na ngaw ni Namarò kâ Abrakam, ta mássiki yù ira tatolay nga ari Kudio, nu ikatalà da si Namarò, ibiláng na ira ta napiá áんな matunung megapu sù pangikatalà da. Ta kunnian yù kinagi na ngaw ni Namarò kâ Abrakam, gári nga nabayággin Kinagi na, "Ikákkállà ku yù ira ngámin nga makkakerumá nga tatolay ta dabbuno megapu nikaw."†

<sup>9</sup> Á yáyù nga ikákkállà ni Namarò sittam ngámin nga mangikatalà kâ Apu Kesu, ta kunnay sù ángngikállà na kâ Abrakam megapu sù pangikatalà ni Abrakam kuna.

<sup>10</sup> Ngam mapagikáru yù ira ngámin nga kagiad da ta ibiláng na ira ni Namarò ta matunung megapu ta panuppál da sù tunung na Kudio. Ta pagikaruan ni Namarò ira, gapu ta awán ta tolay nga makatuppâl ta ngámin nga tunung. Á aijan yù dán nga netúrâ nga kun na, "Pagikaruan ni Namarò yù ira ngámin nga ari manuppál sù ngámin nga tunung nga netúrâ."‡ Á yù impiernu yù labbetád da.

<sup>11</sup> Á yáyù nga kánnámuúat tam laguk ta awán ta tolay nga mebiláng ni Namarò ta matunung áんな alawatan na megapu ta panuttul na sù tunung. Ta bibrirat tam yawe: "Yù ira tatolay nga mangikatalà kâ Namarò, aggira yù ibiláng ni Namarò ta matunung, megapu sù pangikatalà da. Á mesipà ira kâ Namarò, nga matolay ta áddè ta áddè."§

<sup>12</sup> Ngam awán bulubugá ta netúrâ sù tunung nga meyannung ta pangikatalà tam kâ Apu. Á bibrirat tam gapay, "Yù tolay nga makopù nga manuppál sù ngámin nga tunung, aggina yù matolay ta áddè ta áddè."\*

---

\* <sup>3:6</sup> Genesis 15:6   † <sup>3:8</sup> Genesis 12:3; 18:18   ‡ <sup>3:10</sup> Deuteronomio 27:26   § <sup>3:11</sup> Habakuk 2:4   \* <sup>3:12</sup> Lilitiko 18:5

<sup>13</sup> Á gapu ta awán ta tolay nga makatuppál sù ngámin nga tunung, á sittam ngámin nakuan yù pagíkaruan ni Namarò megapu sù liwiliwâ tam. Ngam si Apu Kesu Kiristu yù tali tam nga nagikáru ta liwâ tam ta pate na ta kurù, tapè iyígú na ittam nga mangikatalà kuna, ánnna melilli ittam sù pangigagek ni Namarò nittam. Ta aijan yù netûrâ, nga kun na, "Negagek yù tolay nga pinapáte ra, nga inibáyuk da ta káyú, ta yáyú panákkilalán ta pangigagek ni Namarò kuna."<sup>†</sup>

<sup>14</sup> Á natay si Apu Kesu Kiristu, nga nabbaluntáriu nga netapil megapu nittam, tapè mesipà kayu gapay nga ari Kudio sù pangikallâ ni Namarò kâ Abrakam. Á gapu ta pate ni Apu Kesu, sittam ngámin nga Kudio ánnna ari Kudio yù mangalawâ sù initabbá ni Namarò, nga Mangilin nga Ikararuá na, megapu sù pangikatalà tam kâ Apu Kesu Kiristu.

#### *Yù Initabbá ni Namarò kâ Abrakam ánnna yù Tunung na*

<sup>15</sup> Á ta ángngarigán, wáwwagì, nu aijan yù duá nga tolay nga mattarátu, á mappermá ira, tapè maláddá yù pattaratuád da, á awán ta makáwayyá nga mangari onu manguli kuna.

<sup>16</sup> Á ta pattarátu di Namarò kâ Abrakam, kinagi ni Namarò yù itabbá na. Ngam ari yù ira ngámin nga ginaká ni Abrakam yù katarátu ni Namarò, nu ari galâ yù táttádday nga gaká na, nga si Apu Kesu Kiristu.

<sup>17</sup> Á yawe yù kebalinán nayù pagángngarigák ku. Pangitabbá ni Namarò kâ Abrakam, nappasá yù appátágatú ta tallupulu nga dagun lage na inipetúrâ ni Namarò kâ Moyses yù tunung na Kudio. Ngam yù napasigaggâ nga tarátu ni Namarò kâ Abrakam, ari gemma mári megapu sù tunung na nga naporíán. Ta ari paga neyanâ yù tádday nga gaká ni Abrakam nga initabbá ni Namarò kuna.

<sup>18</sup> Á ta ángngarigán nu iyawâ na nittam nakuan ni Namarò yù áttole tam nga awán ta áddè na megapu ta panuppál tam sù tunung, á awán nakuan laguk ta serbi nayù pangitabbá na. Ngam mesipà si Abrakam kâ Namarò megapu sù pangitabbá na.

<sup>19</sup> Á anni laguk yù serbi nayù tunung? Iniyawâ ni Namarò yù tunung, tapè mánnámmuán nayù ira tatolay yù ngámin nga pakaliwatád da. Á naggián lâ yù tunung ta áddè ta labbè ni Apu Kesu, nga ginaká ni Abrakam nga katabbá ni Namarò. Á mepasingan ta makáwayyá yù pangitabbá ni Namarò ánné sù tunung, gapu ta jinok ni Namarò yù ira daroban na ta ed da iyawâ kâ Moyses yù tunung, á si Moyses yù nangipakánnámmu sù ira tatolay.

<sup>20</sup> Ngam ta pangitabbá ni Namarò kâ Abrakam, awán ta jinok ni Namarò nga pan-nakasimù na, ta si Namarò lápay yù nakkagi kâ Abrakam.

<sup>21</sup> Á kagiat tam panò ta patalián ni Namarò yù initabbá na megapu sù tunung na? Ari gemma! Ta nu matuppál tam nakuan yù tunung, tapè tolayan na ittam ni Namarò, á matunung ittam nakuan laguk megapu sù panuppál tam sù tunung.

<sup>22</sup> Ngam aijan yù netûrâ nga bilin ni Namarò, ta awán bulubugá ta tolay nga ari nalliwâ, gapu ta nakaliwâ yù ira ngámin nga tatolay ta dabbuno. Á yáyù nga máwák tam mangikatalà kâ Apu Kesu Kiristu, tapè iyawâ na nittam ni Namarò yù initabbá na, nga kepattole tam kuna, megapu galâ sù pangikatalà tam kâ Apu Kesu.

<sup>23</sup> Á sù ngaw lage na jimittál si Apu Kesu Kiristu nga pangikatalakán na tatolay, á kunnay ittam ta nebáluk nga napukù megapu sù tunung, ta áddè ta kepalappâ nayù pangikatalakát tam nga mangiyígù nittam.

<sup>24</sup> Á yù tunung yù kunnay ta manaron nittam áddè ta labbè ni Apu Kesu Kiristu. Á sù labbè ni Apu Kesu, aijarin yù awayyá tam nga mangikatalà kuna, tapè mapakomá ittam ánnna mebiláng ittam ta matunung megapu sù pangikatalà tam kuna.

<sup>25</sup> Á gapu ta pangikatalà tam kâ Apu Kesu, awánin ta máwák nga mattudduán ittam megapu sù tunung.

<sup>26</sup> Ta ánâ na ittamin ni Namarò megapu sù pangikatalà tam kâ Apu Kesu Kiristu.

<sup>27</sup> Á gapu ta narigú ittam, netádday ittam kâ Apu Kesu Kiristu, á yáyù nga kesipatát tam gapay yù nonò na ánnna yù napiá nga ággangnguá na.

<sup>28</sup> Á ari ittamin nerumá, mássiki nu Kudio onu ari Kudio, mássiki nu aripán ánnna yù yápu na, yù mattarabáku ánnna yù pattarabakuán na, mássiki nu laláki onu babay. Awán ta paddurúmán ni Namarò, gapu ta nepattatádday ittam ngámin kâ Apu Kesu Kiristu megapu sù pangikatalà tam kuna.

<sup>29</sup> Á gapu ta tatole na ittam ni Apu Kesu Kiristu, mebiláng ittam ta ginaká ni Abrakam, ánnna mesipà ittam gapay sù ngámin nga napiá nga initabbá ni Namarò ngaw kâ Abrakam.

## 4

*Pataganatán na ittam ni Namarò*

<sup>1</sup> Á ta ángngarigán nu aijan yù tolay nga maríku, á natay, á mabattáng laguk yù kukuá na sù anâ na. A mássiki nu kukuá nayù abbing yù ngámin nga kukuá nayù ngaw yáma na, ari nerumá yù ággíán nayù abbing sù ággíán na aripan nayù yáma na, áddè ta paddakal na.

<sup>2</sup> Ta abbing lâ paga, ánná aijan yù ira tatolay nga sinullà nayù yáma na nga manaron kuna ánná makkárgu ta kukuá na, áddè ta dagun nga sinullà nayù yáma na.

<sup>3</sup> Á kunnian gapay yù keyarigát tam, gapu ta kunnay ittam ta abbing lage tam nangikatalà kâ Apu Kesu, á kinuruk tam yù ngámin nga makkakerumá nga kustombare nayù ira naggaká nittam ánná yù ituddu nayù ira tatolay ta dabbuno nga meyannung sù ira anitu nga mangaripan nira.

<sup>4</sup> Á dattál nayù ággaw nga sinullà ni Namarò, jinok na yù Anâ na, nga minay ta dabbuno nga neyanâ ta babay. Á Kudio yù nakeyanatán na. Á natuppál na yù ngámin nga tunung ni Moyses,

<sup>5</sup> tapè palubbángan na ittam nga ari makatuppál sù tunung. Á gapu ta panuppál ni Apu Kesu sù tunung, yáyù awayyá ni Namarò nga pataganatán ittam nga mangikatalà kâ Apu Kesu.

<sup>6</sup> Á gapu ta ánâ na ittamin ni Namarò, jinok ni Namarò yù Mangilin nga Ikararuá nga aijan kâ Anâ na, ta maggián gapay nittam, tapè máwayyá tam nga makiyáma kâ Namarò, á “Ammò, Ammò,” kut tam nu makimállà ittam kuna.

<sup>7</sup> Á yáyù nga ari ittamin kun na aripan nu ari galâ yù ira ánâ ni Namarò. Á gapu ta ánâ ni Namarò ittamin, kesipatát tam gapay yù ngámin nga iniparán na sù anâ na.

*Maburung si Pablo sù ira taga Galasia*

<sup>8</sup> Á sù ngaw arán naw paga ammu si Namarò, siminuttul kayu sù ira sináddios nga ari makáwayyá, á kunnay kayu ta nakiaripan nira.

<sup>9</sup> Ngam kunangane, ammu nawin si Namarò, á kuk ku galâ nakuan ta ammu na kayu ni Namarò. Á ngattá, ta ikáyâ naw nga tolian yù ngaw kustombare naw nga meyannung sù passerbi naw sù ira anitu? Ammu nawin gemma ta awán ta serbi na! Ikáyâ naw panò ta makiaripan kayu mángin nira?

<sup>10</sup> Á ngattá, ta tolian naw nga ngilinan yù ággaw, yù bulán, ánná yù dagun?

<sup>11</sup> Nu kunnian yù akkuán naw, maburungà nikayu, marakè kengá lâ yù bannák ku nga mangituddu nikayu.

<sup>12</sup> Wáwwagi nga mangikatalà kâ Apu Kesu, yá ikomâ nikayu, ta párigán nawà, ta mássiki nu Kudiongà, aringakin makiaripan sù tunung na Kudio. Ta gapu ta pangikatalà ku kâ Apu Kesu, nepaggittángà nikayu nga ari Kudio nga mangikatalà kuna. Á awán bulubugá ta liwâ naw nikán, ta napiá yù ángngiddù naw nikán ta áddè ngaw paggiák ku nikayu.

<sup>13</sup> Á ammu naw ta nepaggiánà nikayu ngaw gapu ta natakikà, á yáyù olu nga pangilay-alayâ ku nikayu sù napiá nga dámak.

<sup>14</sup> Á mássiki nu naburung kayu ngaw megapu sù takì ku, arán nawà nikállirák, ánná arán nawà nilikuránán. Ngam pinaddulò nawà ta kunnay ta daroban ni Namarò nga naggapu ta lángì, á inálliuk nawà ta kunnay ta pangálliuk naw nakuan kâ Apu Kesu Kiristu, nu aggina yù umay nikayu.

<sup>15</sup> Ta ayatán kayu ngaw ta paggiák ku nikayu, á ammù tanu awayyá naw nakuan, linakkí naw nakuan yù matá naw, nga iniyawâ naw nakuan nikán, megapu sù ayâ naw ánná allà naw nikán, tapè masingak ku ta napiá. Á anni laguk yù nesimmu nikayu kunangane, ta napataliánin yù nonò naw nikán?

<sup>16</sup> Malussaw kayu nikán panò gapu sù kagiak ku nikayu nga kuruk? Parè bì nakuan ta ari.

<sup>17</sup> Á yù ira mamatuttul nikayu sù tunung, námmì yù ággubobuk da nikayu, ngam ari yù kapiánan naw yù nonopad da. Ta yá lâ ikáyâ da, nu likuránán naw yù inituddù nikayu, tapè aggira lâ yù tángngagan naw.

<sup>18</sup> Á mássiki nu aijanà onu awánà nikayu, napiá gemma nu tángngagan naw yù ira mangituddu nikayu, nu kuruk nga napiá yù ituddu ra.

<sup>19</sup> Sikayu nga kun na ánâ ku, mabagalà nikayu ta kunnay ta babay nga marigirigâ nga mappasíkál, áddè ta masingak ku yù kapasigaggà nayù ángngikatalà naw kâ Apu Kesu Kiristu, tapè mepaggítá yù nonò naw ta nonò na.

<sup>20</sup> Á parè bì ta aijanakin nakuan sù gián naw, tapè makiubobugà nikayu, ta arayyungà garè, á mabbábángà nu anni yù kagiak ku nakuan nikayu, tapè mábbágán kayu.

*Yù Keyarigán nayù ira Duá nga Tarátu ni Namarò*

<sup>21</sup> Á yawe bì yù iyabbú ku nikayu, sikayu nga manuppál nakuan sù itaddán nayù tunung na Kudio nga initúrâ ni Moyses. Ngattá, ta arán naw giinnán yù ngámin nga netúrâ? Arán naw panò ammu yù kagian na?

<sup>22</sup> Ta bibbirat tam yù netúrâ, nga ajian ngaw yù duá nga lálláki nga ánâ ni Abrakam. Á yù tádday yù anâ nayù aripan na. Á yù tádday yù anâ nayù atáwa na nga arán na aripan.

<sup>23</sup> Á negagángay lápay yù pabbussì nayù babay nga aripan ni Abrakam. Ngam yù atáwa na nga arán na aripan, ari nakuan nabbussi, nu ari galâ megapu sù pangitabbá ni Namarò kâ Abrakam, gapu ta lakalákay ánná bakabákà iren ta paganán nayù atáwa na.

<sup>24</sup> Á yù ira duá nga bábbay yù keyarigán nayù duá nga tarátu ni Namarò. Á si Agar yù tádday, nga aripan ni Abrakam nga taga Puddul na Saynay. Aggina yù keyarigán nayù tarátu ni Namarò nga netúrâ sù tunung nga iniyawâ na kári Moyses ánná yù ira Kudio ta keggá ra ta Puddul na Saynay. Á yù ira ngámin nga tatolay nga tumuttul sù tunung na Kudio, meyárik ira ta ginaká ni Agar. Á gapu ta aripan si Agar, á yáyù nga kunnay ira gapay ta aripan.

<sup>25</sup> Á yá kebalinán ni Agar yù Puddul na Saynay nga ajian ta dabbun na Arabia, ánná yù ili na Jerusalem gapay. Á yù ira Kudio nga maggián ta Jerusalem, kunnay ira ta aripan gapu ta passerbiád da yù itaddán nayù tunung.

<sup>26</sup> Ngam sittam, gapu ta ikatalà tam si Apu Kesu megapu sù bagu nga tarátu ni Namarò, á kunnay ittam ta napalubbángin. Á yáyù nga mesipà ittam sù bagu nga ili na Jerusalem nga ajian kunangan ta lángì. Á gapu ta arát tamin passerbián yù tunung, meyárik ittam sù ira ginaká ni Sara nga atáwa ni Abrakam nga arán na aripan.

<sup>27</sup> Á ajian yù netúrâ sù bilin ni Namarò nga kunniai:

“Sikaw nga babay nga nabbalá, magayáyâ ka, mässiki nu ari ka bulubugá naganâ!

Magagga-aggáy ka ta ayâ mu, mässiki nu ari ka nappasíkál.

Ta aru yù ira ginaká nayù babay nga nánawán nayù atáwa na,  
ánnè sù babay nga ajian yù atáwa na.”\*

<sup>28</sup> Á wáwwagi nga manguruk kâ Namarò, sittam yù ánâ ni Namarò megapu sù initabbá na. Á si Isak yù keyarigát tam, nga neyanâ ni Sara megapu galâ ta pangitabbá ni Namarò kâ Abrakam.

<sup>29</sup> Á si Ismael, nga yù ngaw abbing nga negagángay yù keyanâ na lápay kâ Abrakam, jinigirigâ na yù anâ ni Sara nga neyanâ megapu sù pakáwayyâ nayù Ikararuá ni Namarò. Á kunnay nira ngaw, kunnian gapay nittam kunangan, ta yù ira nga tumuttul sù tunung na Kudio, jigirigádat da sittam ngámin nga mesipà kâ Namarò megapu sù Ikararuá na.

<sup>30</sup> Ngam anni yù netúrâ nga kinagi ni Namarò kâ Abrakam? Á kinagi na, “Papanáwam mu yù ira masínâ nga aripam mu, ta ari mesipà yù anâ nayù aripam mu sù iyawâ mu sù anâ nayù atáwam nga arám mu aripan,”<sup>†</sup> kun ni Namarò.

<sup>31</sup> Á wáwwagi nga mangikatalà kâ Apu Kesu, yáyù nga ari yù anâ nayù aripan ni Abrakam yù keyarigát tam, nu ari galâ yù anâ nayù babay nga atáwa ni Abrakam nga arán na aripan.

## 5

*Si Apu Kesu Kiristu yù Mamalubbáng nittam tapè Makkaká-iddù ittam*

<sup>1</sup> Á gapu ta pangikatalà tam kâ Apu Kesu Kiristu, pinalubbáng na ittamin, tapè ari ittam makiaripan sù ira nga mamuersá nittam ta tuppálat tam yù itaddán nayù tunung ni Moyses. Ipsagiggâ naw laguk yù ángngikatalà naw kâ Apu Kesu, á ari kayu makiaripan nira.

<sup>2</sup> Á tángngagan naw ta napiá yù kagiak ku, ta sikán si Pablo nga makkagi nikayu. Nu mappakugi kayu nakuan gapu ta kagian naw ta alawatan na kayu ni Namarò megapu sù panuppál naw sù tunung, á awánin laguk bulubugá ta serbi nayù kingnguá ni Apu Kesu Kiristu megapu nikayu.

<sup>3</sup> Á kuruk yù itotoli nga kagian nikayu. Yù tolay nga mappakugì, máwák na paga nga tuppálan gapay yù ngámin nga káruán nga netúrâ nga tunung na Kudio.

<sup>4</sup> Á sikayu nga makkagi ta ibiláng na kayu ni Namarò ta matunung, gapu ta panuppál naw sù tunung, á nilikuránán nawin si Apu Kesu Kiristu, á nalipparán kayin nga nesinná sù iddù ni Namarò ánná allà na.

<sup>5</sup> Ngam sittam, gapu ta pangikatalà tam kâ Apu Kesu Kiristu, iddanamát tam yù pamakomá ni Namarò nittam ánná yù pangibiláng na nittam ta matunung, megapu sù pakáwayyâ nayù Ikararuá na nga mangabbák nittam.

\* 4:27 Isaya 54:1    † 4:30 Genesis 21:10

<sup>6</sup> Á gapu ta kepattatádde tam kâ Apu Kesu Kiristu, arán na ittam ni Namarò paddurúmán, mássiki nu nakugi onu ari nakugi. Á yá lâ ikáyâ ni Namarò, ta ikatalâ tam si Apu Kesu Kiristu, ánnna ipasingat tam yù panguruk tam kuna megapu sù pakkaká-iddù tam.

<sup>7</sup> Á sù ngaw, napiá gemma yù ángnguruk naw kâ Apu Kesu. Asinni panò yù ira mangigaggak nikayu, ta arán nawin kurugan yù kuruk nga netuddu nikayu?

<sup>8</sup> Ari gemma si Namarò yù mangigaggak nikayu, ta aggina yù magágál nikayu ta mangikatalâ kayu kâ Apu Kesu Kiristu.

<sup>9</sup> Mappalán kayu laguk sù ira mangituddu ta tanakuán, ta massamâ yù ituddu ra nga ari kuruk. Á ajan yù bunnaké nga keyarigán na: "Mássiki nu baddì lâ yù áppalappák na, nga nekiruk sù arená, ngam luppák ta napiá yù pán," kun na.

<sup>10</sup> Ngam aringà mabbábáng nikayu, ta ammù ta ari kayu mekáttuay sù inituddu nikayu, gapu ta kepattadde tam megapu sù pangikatalâ tam kâ Apu Kesu. Á yù mamuruburion nikayu megapu sù ituddu na nga ari kuruk, pagikaruuan ni Namarò sangaw, maguray lâ yù áaggián na.

<sup>11</sup> Á wáwwagì, aijan garè yù ira magistoriá ta ari dumá yù ituddu ra ánnna yù ituddu. Ta kagiad da ta ituddu paga kanu ta máwák nga makugì yù tolay, tapè ibiláng ni Namarò ta matunung. Á ari gemma kuruk! Ta nu kuruk nakuan, arád dangà nakuan jigirigátan nayù ira Kudio, mássiki nu ilayalayá ku gapay yù pate ni Apu Kesu ta kurù. Ngam yáyù gemma yù gapu na nga mapporay ira nikán ánnna jigirigátad dangà, gapu ta pangituddu ta arád da máwák nga tuttulan yù tunung ni Moyses.

<sup>12</sup> Á yù ira tatolay nga mamakolang nikayu, paguráyán naw lâ nu akkuád da ta baggi ra yù ipapílì da, mássiki nu kapunad da lápay yù baggi ra!

<sup>13</sup> Á wáwwagi, yáyù nga inagálán na kayu ni Namarò, tapè mapalubbáng kayu. Á yáyù nga ari kayín megaggak megapu sù ira nga mangituddu sù tunung na Kudio. Ngam arán naw laguk kagian ta ajan yù awayyá naw nga manuppál ta narákè nga karagatán naw. Ta yawe ipamalubbáng ni Namarò nittam, tapè makkaká-abbák ittam megapu ta pakkaká-iddù tam.

<sup>14</sup> Á matuppál yù ngámin nga tunung na Kudio, nu tuppálat tam yawe táddy nga taddán ni Apu, nga kun na, "Iddukan naw yù ira kábulun naw ta kunnay ta ángngiddù naw ta baggi naw."<sup>\*</sup>

<sup>15</sup> Ngam nu makkakáperang kayu ta ubobuk ánnna maddiráma kayu, á magimuguk kayu laguk, marakè mararál yù ákiwagi naw.

*Mekontará yù Karagatán nayù Baggi tam sù Karagatán nayù Mangilin nga Ikararuá*

<sup>16</sup> Á yawe laguk itabarang ku nikayu, ta tumulù kayu sù Mangilin nga Ikararuá, á tuppálán naw yù napiá nga ipakuá na nikayu, tapè arán naw akkuán yù narákè nga karagatán nayù baggi naw.

<sup>17</sup> Ta mekontará yù karagatán nayù baggi tam sù napiá nga ipakuá na nittam nayù Mangilin nga Ikararuá. Á yáyù nga kunnay ta maggerrá yù Mangilin nga Ikararuá ánnna yù karagatán nayù baggi tam, maraké akkuát tam yù maguray lâ nga ikáyâ tam nga akkuán.

<sup>18</sup> Ngam nu yù Mangilin nga Ikararuá yù sinulutát tam, napalubbáng ittam laguk sù pakáwayyá nayù ira taddán nayù tunung na Kudio.

<sup>19</sup> Á ammu tam gemma yù narákè: yù karagatán na baggi tam, yù mangarallaw ánnna yù makikarallaw, yù narákè nga nonotan na tolay ánnna yù narákè nga akkuán na nu arán na igaggak yù baggi na,

<sup>20</sup> yù makimoray ta sináddios, ánnna yù maganánitu, yù managánná ánnna yù massala-mangkeru, á yù malussaw ánnna yù maddiráma, yù mangabubu ánnna yù mapporay, yù mangukuk, yù makipeperang ta ubobuk, ánnna yù mamassisinná ta tatolay.

<sup>21</sup> Á yù mamassil, yù magillellarw, yù ira mattatáddy nga mappipissán, nga mappanà yù narákè nga nonò da, á aru paga yù narákè nga akkuán na tolay. Á yáyù nga itotoli nga kagian yù kinagikin nikayu, ta yù ira tatolay nga mangupù nga mangnguá karannian nga narákè, ari ira mesipà kâ Namarò sù pammagurayán na.

<sup>22</sup> Á yawe yù akka-akkuán nayù tolay nga tumulù sù pammagure nayù Ikararuá ni Namarò ta nonò na: Iddukan na yù ira kábulun na. Á magayáyâ lâ ánnna magimammà yù nonò na. Á attamán na lâ yù ira kábulun na. Á ikákkallà na ira, ánnna napiá lâ yù akkuán na nira. Á aggina yù pangikatalakán.

<sup>23</sup> Á tumulù ánnna ammu na mangigaggak ta baggi na. Á awán gemma ta taddán sù tunung nga mangipugik sù akkuán na nga kunnian.

\* 5:14 Libilitiko 19:18

<sup>24</sup> Á sittam ngámin nga netádday kâ Apu Kesu Kiristu, ibiláng tam ta kunnay ta nepátà yù narákè nga karagatát tam ta kurú ni Apu Kesu ta pate na, tapè arát tam akkuán yù narákè nga karagatát tam.

<sup>25</sup> Á gapu ta iniyawâ na nittam ni Namarò yù bagu nga áttolé tam megapu sù Ikararuá na, á tumulù ittam laguk sù pammagure nayù Ikararuá na, tapè matunung ánná napiá yù akkuát tam.

<sup>26</sup> Á ari ittam laguk mappeddaráyaw, ánná arát tamin paraparamán yù ira kábulut tam. Á ari ittamin makkakápassil.

## 6

### *Makkaká-abbák ittam*

<sup>1</sup> Á wáwwagi, nu ajjan yù kabbulut tam nga manguruk, nga melogò ánná malliwâ, á sittam laguk nga tumulù sù Mangilin nga Ikararuá yù umay makiubobuk kuna, tapè gammát tam ánná ituddu tam kuna yù napiá nga ángnguruk na. Á ta pakiubobuk tam kuna, ikákkállà tam, á alúnay yù ággubobuk tam kuna. Á magimuguk ittam, marakè mesimmuat tam gapay yù pakaliwatát tam.

<sup>2</sup> Á makkaká-abbák ittam, mássiki nu anni yù jigâ tam, tapè mapatuppál tam yù taddán ni Apu Kesu Kiristu, ta kinagi na ta makkaká-iddù ittam.

<sup>3</sup> Á nu ajjan yù tolay nga mappeddaráyaw, nga kagian na ta aggina yù kapiánán ánnè sù ira kábulun na, á ari gemma kuruk yù kagian na, á yáyù nga ilogò na galâ yù baggi na.

<sup>4</sup> Magimuguk ittam laguk nga katággitádday sù akkuán na, nu napiá onu ari. Ta magayáyâ ittam nu napiá yù akkuát tam. Ngam arát tam laguk ipagayáyâ yù kapiánán nga akkuát tam ánnè sù akkuán nayù ira kábulut tam.

<sup>5</sup> Ta sittam nga taggitádday, ajjan yù pakáwayyá na nga inikatalà ni Namarò kuna, á liwâ na lápay nu arán na tuppálan.

<sup>6</sup> Á yù ira tatolay nga matudduán sù bilin ni Namarò, iballe ra laguk yù ngámin nga napiá nga kukuá ra su tolay nga mangituddu nira, tapè ari makúrang yù awágan nayù mangituddu.

<sup>7</sup> Á ari gemma melogò si Namarò, á arát tam laguk ilogò yù baggi tam. Ta maguray lá yù imulá na tolay, yáyù lággapay yù apan na, nga bálà nayù bannák na.

<sup>8</sup> Á kunnian yù keyarigát tam. Ta nu tuppálat tam yù narákè nga karagatát tam, yá lâ bálà tam ta matay ittam nga umay ta impiernu, nga nesinná kâ Namarò ta áddè ta áddè. Ngam nu tumulù ittam sù Mangilin nga Ikararuá ánná tuppálat tam yù ipakuá na, á yá bálà tam yù kepattole tam kâ Namarò ta lángì ta áddè ta áddè.

<sup>9</sup> Á arát tam laguk ikalurâ nga akkuán yù napiá nga ipakuá ni Namarò nittam. Ta nu arát tam tukkatan yù napiá nga akkuát tam, á sù ággaw nga sinullà ni Namarò, alawatat tam yù bálà tam, nga iyawâ ni Namarò nittam.

<sup>10</sup> Á yáyù nga uputat tam laguk nga abbágán yù ira ngámin nga kábulut tam, ta keggá tam ta utun na dabbuno, talugáring sù ira wáwwagi tam nga mangikatalà kâ Namarò.

### *Yù Kabalin nayù Túrá*

<sup>11</sup> Á masingan naw yù káddakal nayù túrá ku ta pattúrá ku lápay sawe kagiak ku nikayu.

<sup>12</sup> Á yù ira tatolay nga mangagumán nakuan nikayu ta makugì kayu, yáyù lâ akkuád da gapu ta ikáyâ da yù paddáyo nayù ira kábulud da nga Kudio, ánná maganássing ira, marakè jírigirigátad da ira nu ilayalayâ da yù pamakomá ni Namarò ta tolay megapu sù pate ni Apu Kesu Kiristu ta kurú.

<sup>13</sup> Á mássiki nu nakugì ira, arád da gemma tuppálan yù ngámin nga tunung, ngam ikáyâ da ta makugì kayu nakuan, tapè ipappeddaráyo ra yù panguruk naw nira.

<sup>14</sup> Ngam sikán, awán ta dumá nga ipappeddaráyo, nu ari galâ yù pate ni Apu Kesu Kiristu nga Yápu tam, nga netapil ta kurú megapu nittam. Á gapu ta pate ni Apu Kesu ta kurú, aringâ mekanakanâ sù ikalakalángán nayù ira tatolay ta dabbuno nga makikontará kâ Namarò, ta inikikkítulák ku lá yù pangapá da nikán.

<sup>15</sup> Á maguray lá nu nakugì yù tolay onu ari, awán ta serbi na. Ngam máwák yù panguli ni Namarò sù ira tatolay nga mangikatalà kuna, tapè kunnay ira ta bagu nga naparò.

<sup>16</sup> Á ikákkállà ni Namarò yù ira ngámin nga manguruk sù inituddù saw, á pagimammatten na ira tapè napiá yù ággíad da, ta aggira yù kuruk nga tatole ni Namarò, nga Kudio ánná ari Kudio gapay.

17 Á mamegapu kunangane, awán nakuan ta tolay nga mamagabagal nikán. Ta aru yù pilâ ta baggi megapu sù pangilayalayâ ku kâ Apu Kesu Kiristu, nga pangipasinganán ta masserbingà kuna.

18 Á yá ipakimállà ku megapu nikayu, wáwwagi, ta ikákkállà na kayu ni Apu Kesu Kiristu. Ammán.

## Yù Túrâ ni Pablo sù ira Manguruk nga taga Epeso

### *Yù Meyannung sù Túrâ*

Ajjan yù ili na Epeso ta aggik na bebay sù purubinsia na Asia Minor. Á sù ngaw pattúrâ ni Pablo, yù ili na Epeso yù mekáppâ nga karakalán na ili sù pammagurayán nayù Sisar nga naggián ta Roma. Á neparámak ngaw yù ili na Epeso megapu sù aru nga tatolay nga maríku nga naggián ta ili, á aru gapay yù makkakerumá nga ipagayáyâ da, nepatalugáring ta ajjan yù sináttolay nga babay nga pakimorayád da nga mangngágán ta Artemi.

Naggián si Pablo ta Epeso ta tallu nga ragun, nga mangilayalayâ áんな mangituddu sù napiá nga dámak nga meyannung kâ Apu Kesu Kiristu (Kingnguá 19:1-41). Á aru yù ira tatolay nga nangikatalà kâ Apu megapu sù pangilayalayâ ni Pablo. Á pappasá na tallu ragun, nánaw si Pablo nga minay ta tanakuán nga lugár. Á ta pattúrâ na sawe tûrâ na, ajjan nga nebáluk si Pablo sù ili na Roma.

Á sawe tûrâ, ipakánnámmu ni Pablo yù aru nga meyannung kâ Apu Kesu Kiristu, nga mangiyígù nittam (1:3, 7-8, 20-21). Á ibukalán ni Pablo yù kebalinán nayù kepattatádde tam kâ Apu Kesu Kiristu (2:3-6). Á ipakánnámmu na gapay yù ketádde nayù ira Kudio áんな yù ira nga ari Kudio (2:14). Á sittam ngámin nga mangikatalà kâ Apu Kesu, yù meyárik ta bale ni Namarò, nga paggianán nayù Mangilin nga Ikararuá na (2:22). Á ipanonò na nittam yù kepattatádde tam kâ Apu Kesu, megapu sù kesipâ tam sù táttádday nga Mangilin nga Ikararuá. Á táttádday lâ si Namarò nga Yáma tam, áんな táttádday yù Yápu tam. Táttádday lâ yù ikatalâ tam, áんな táttádday yù kebalinán nayù karigù tam, megapu sù ketapil ni Apu Kesu (4:3-6).

### *Yù Mayán nayù Túrâ*

Yù Pamegapu nayù Túrâ (1:1-2)

Yù Allâ ni Namarò sù ira Mangikatalà, megapu sù Ketádde ra kâ Apu Kesu Kiristu (1:3-14)

Yù Ipakimállâ ni Pablo (1:15-23)

Mepattolay ittam kâ Apu Kesu Kiristu (2:1-22)

Si Pablo yù Mangilayalayâ nga Minay sù ira ari Kudio (3:1-13)

Yù Ipakimállâ ni Pablo nga Meyannung sù Ángngiddù ni Apu Kesu Kiristu nittam (3:14-21)

Yù Ketádde tam kâ Apu Kesu áんな yù Bagu nga Áttolé tam (4:1-6:9)

Yù Pakigerrá ni Satanas nittam (6:10-13)

Yù Meyárik ta Barawásí na Mengal áんな yù Ármas na (6:14-20)

Yù Kabalin nayù Túrâ (6:21-24)

<sup>1</sup> Sikán si Pablo, nga sinullâ ni Namarò ta umay mangilayalayâ kâ Apu Kesu Kiristu. Á makapattúrákâ laguk nikayu nga tatole ni Namarò nga taga Epeso, sikayu nga napasigaggâ yù ángngikatalà na kâ Apu Kesu.

<sup>2</sup> Á parè bì ta ikákkállâ da kayu di Namarò nga Yáma tam kâ Apu Kesu Kiristu nga Yápu tam, tapè mepagimammâ kayu, áんな napiá yù ággigián naw áんな gawagawáyán naw.

### *Yù Allâ ni Namarò sù ira Mangikatalà, megapu sù Ketádde ra kâ Apu Kesu Kiristu*

<sup>3</sup> Meparáyaw si Namarò, nga Yáma ni Apu Kesu Kiristu nga Yápu tam, ta pinattádde na ittam kâ Apu Kesu Kiristu megapu sù pakáwayyá nayù Mangilin nga Ikararuá. Á yáyù nga passipatán na ittam ni Namarò sù ngámin nga mannanáyun nga kapiánán nga ángngabbák na áんな alluárán na nga maggapu ta lángi.

<sup>4</sup> Ta mássiki sù lage na pamarò ni Namarò ta dabbuno, pinili na ittam tapè mepaggián ittam kuna, megapu sù ketádde tam kâ Apu Kesu Kiristu. Á pabbalinan na ittam ta tatole na, nga pareku nga napiá, nga awán ta pakaliwatát tam ta ánnunganán na, megapu sù ángngiddù na nittam.

<sup>5</sup> Á sù ngaw nga nabayák, ninonò ni Namarò yù pamataganâ na nittam. Á yáyù nga jinok na yù ánâ na ta dabbuno, nga si Apu Kesu Kiristu, ta umay magikáru ta liwiliwâ tam. Yáyù sinalákkuruk ni Namarò, tapè pabbalinan na ittam ta ánâ na, megapu sù kingnguá ni Apu Kesu.

<sup>6</sup> Dayáwat tam si Namarò megapu sù allâ na nittam nga makapállâ. Ta inisipâ na ittam sù Anâ na nga iddukan na.

<sup>7</sup> Aggina si Apu Kesu Kiristu, á pinalubbáng na ittamin megapu sù ketapil na megapu nittam. Á yù dága na yù inipappagá na megapu sù liwiliwâ tam. Á yáyù nga pakomán ni

Namarò ittam. Kukurugán nga makapállâ yù pangikállâ ni Namarò nittam, nga nakalò nga awán ta meyárik kuna.\*

<sup>8</sup> Á gapu ta kunnian yù pangikállâ ni Namarò nittam, nepallà yù ángngabbák na nittam, ta napiá yù sírik na, ánnna aggina yù makánnámmu ta ngámin.

<sup>9</sup> Á yáyù nga inipakánnámmu na nittam yù inilímak na ngaw, nga talákkurugan na nga ipakuá kâ Apu Kesu Kiristu.

<sup>10</sup> Á yawe yù talákkurugan na, ta sangaw nu duttálín yù pagáddekan na ággaw, á patatáddayan na kâ Apu Kesu Kiristu yù ngámin nga pinarò na nga aijan ta lángì ánnna dabbuno, tapè si Apu Kesu yù mammaguray ta ngámin.

<sup>11</sup> Á gapu ta palurotan ni Namarò yù ngámin nga talákkurugan na, piníli na kami nga Kudio, ta pabbalinan na kami ta tatole na, megapu sù ketáddé mi kâ Apu Kesu,

<sup>12</sup> tapè sikami nga Kudio yù mapolu nga magiddanáma kâ Apu Kesu Kiristu. Á yáyù nga sikami yù pangipasinganán ni Namarò sù allà na nga makapállâ, tapè meparáyw si Namarò megapu nikami.

<sup>13</sup> Á sikayu nga ari Kudio, pinabbalin na kayu gapay ni Namarò ta tatole na, megapu kâ Apu Kesu Kiristu. Ta gapu ta pakaginná naw sù kuruk nga bilin na, nga napiá nga dámak nga meyannung sù ángngiyígú na nittam, á kinuruk naw ánnna inikatalà naw gapay si Apu Kesu Kiristu. Á gapu ta pangikatalà naw kâ Apu Kesu, jinok ni Namarò ta umay maggián gapay nikayu yù Mangilin nga Ikararuá na, nga initabbá na, nga ámmárká na sù ira tatole na.

<sup>14</sup> Á megapu sù Mangilin nga Ikararuá nga aijan nittam, yáyù pakánnámmuát tam ta málawâ tam paga sangaw yù ngámin nga initabbá ni Namarò nga iyawâ na sù ira tatole na, sangaw nu paddulotan na ittam sù gián nga pinarán na megapu nittam. Dayáwat tam laguk si Namarò megapu sù allà na nittam nga makapállâ.

### *Yù Ipakimállâ ni Pablo*

<sup>15</sup> Á sigídángà nga makimállâ ánnna maddáyaw kâ Namarò megapu nikayu, gapu ta narámk ku yù ángngikatalà naw kâ Apu Kesu Kiristu ánnna yù ángngiddù naw sù ira ngámin nga kábulun naw nga tatole ni Namarò.

<sup>16</sup> Á aringà malurâ nga maddáyaw kâ Namarò megapu nikayu. Á ta ngámin nga pakimállâ ku, ipanonó takayu kuna.

<sup>17</sup> Ta si Namarò yù maráyaw nga Yáma tam, nga pakimorayán ni Apu Kesu Kiristu nga Yápu tam. Á yá ikomâ kâ Namarò, ta passírigan na kayu megapu sù Ikararuá na, ánnna ipakánnámmu na nikayu yù ngámin nga meyannung kuna ánnna yù ipakuá na nikayu, tapè napiá yù pakiyáma naw kuna.

<sup>18</sup> Á ipakimállâ ku gapay ta pannawagan na yù nonò naw, tapè kánnámmuán naw yù pabbalinán nayù pagágál na nittam, nga iddanamát tam, á tapè kánnámmuán naw gapay yù makapállâ nga kapiánan nga pangisipatán na sù ira tatole na.

<sup>19</sup> Á yawe gapay ikomâ, ta mánnámmuán naw lápay yù pakáwayyá ni Namarò nga aijan nga mangabbák nittam nga mangikatalà kuna, ta awán ta pagáddekan nayù pakáwayyá na, nga ámmagaddátu na nga makapállâ,

<sup>20</sup> nga mepasinan sù pamaginnanole na kâ Apu Kesu Kiristu ánnna yù pamagitubang na kuna ta jiwanán na. Á yù jiwanán ni Namarò yù ággitubangán nayù kotunán nga maráyaw ta lángi.

<sup>21</sup> Á si Apu Kesu yù kotunán nga makáwayyá nga awán ta kagittá na. Á aggina yù mammaguray sù ira ngámin nga makáwayyá ánnna mamagaddátu, nga masingan ánnna ari masingan. Á mammaguray si Apu Kesu ta dabbuno ánnna lángì kunangane ta áddè ta áddè.

<sup>22</sup> Ta pinatulù ni Namarò yù ngámin nga aijan, á sinullà na si Apu Kesu Kiristu nga mammaguray ta ngámin. Si Apu Kesu yù yápu tam, nga sinullà ni Namarò nga mammaguray nittam nga mangikatalà kuna.

<sup>23</sup> Á sittam nga mangikatalà kuna, kunnay ittam ta baggi na, gapu ta netáddy ittam kuna. Á ipakánnámmu na nittam yù nonò na ánnna yù ipakuá na nittam, tapè mapalurò yù ure na megapu nittam. Á aggina yù eggánga maggián nga manaron ta ngámin, tapè maggián yù ngámin megapu kuna.<sup>†</sup>

## 2

### *Mepattolay ittam kâ Apu Kesu Kiristu*

\* 1:7 Kolosi 1:14    † 1:23 Kolosi 1:17-18

<sup>1</sup> Á sù ngaw lage naw nanguruk kâ Namarò, kunnay kayu ta natayin nga nesinná kuna megapu ta liwiliwâ naw ánnâ yù pamotu naw kâ Namarò.

<sup>2</sup> Ta narákè garè yù kustombare naw ngaw, nga kunnay ta ággangnguá nayù ira tatolay nga ari nanguruk kâ Namarò. Á si Satanas yù sinuttul naw ngaw. Aggina yù narákè nga patul nga ari masingan, nga mammaguray sù ira narákè nga ari masingan. Á aggina gapay yù maddok sù ira tatolay nga ari manguruk kâ Namarò.

<sup>3</sup> Á mássiki sittam ngámin garè, naggigittá ittam ngaw sù ira ari manguruk kâ Namarò, ta kingnguá tam ngaw yù karagatát tam nga narákè. Á sinuttul tam yù narákè nga gustu na baggi tam ánnâ nonò tam. Á yáyù nga naggigittá ittam sù ira ngámin nga tatolay ngaw nga magiddi-iddak ta pamagikáru ni Namarò.

<sup>4</sup> Ngam si Namarò, nepallà yù allà na. Á mássiki nu mepángngà yù pamagikáru ni Namarò nittam, ikálà na ittam ánnâ iddukan na ittam, megapu sù makapállâ nga ángngiddù na nga awán ta áddè na.

<sup>5</sup> Á mássiki nu kunnay ittam ta natayin, nga nesinná kâ Namarò megapu ta liwiliwâ tam, inisipâ na ittam kâ Apu Kesu Kiristu sù pamaginnanole na, tapè mepattolay ittam kuna. Ta iniyígù na ittamin megapu galâ sù allà na nittam.\*

<sup>6</sup> Á initádde na ittam ni Namarò kâ Apu Kesu Kiristu, tapè paginnanolayan na ittam gapay ánnâ ipotun na ittam nga mepagitubang nga mepammaguray kâ Apu Kesu ta lángi.

<sup>7</sup> Á yáyù kingnguá ni Namarò, tapè sittam yù pangipasinganán na ta pangikállà na, ta ngámin nga ággaw nga maporián ta áddè ta áddè, megapu sù kingnguá ni Apu Kesu Kiristu.

<sup>8</sup> Á gapu ta pangikállà na nittam ni Namarò, iniyígù na ittamin, megapu sù pangikatalà tam kâ Apu Kesu, nga rigálu ni Namarò nittam.

<sup>9</sup> Á yá ipangiyígù na nittam megapu galâ sù allà na, nga ari gemma megapu sù akka-akkuát tam, maraké mappeddaráyaw ittam.

<sup>10</sup> Á si Namarò yù manguli sù nonò tam, megapu sù pangikatalà tam kâ Apu Kesu Kiristu, tapè palurotat tam yù napiá nga sinalákkuruk na ngaw nga ipakuá na nittam.

### *Nakkápiá ittam nga Kudio ánnâ yù ira ari Kudio*

<sup>11</sup> Á sikayu nga ari Kudio, nonopan naw yù ngaw áaggián naw, ta arán na kayu ngaw tatole ni Namarò. Á yù ira Kudio, nga nakugì ta kunnay ta kustombare ra, iniluddè da kayu, gapu ta ari kayu nakugì nga nesipà nira nga tatole ni Namarò. Ngam sinniálád da lâ yù baggi ra, nga awát ta serbi na, ta arád da garé likuránán yù narákè nga akkuád da.

<sup>12</sup> Á sikayu nga ari Kudio, nesinná kayu ngaw kâ Apu Kesu Kiristu, nga ari nakiyápu kuna. Á gapu ta ari kayu nebiláng nikami nga Kudio, nga ginaká ni Lákay Israel, á ari kayu nesipà sù tarátu ni Namarò ánnâ yù initabbá na sù ira tatole na. Á sinuttul naw ngaw yù ággangnguá nayù ira tatolay ta dabbuno, á arán naw ngaw iniddanamán yù pangikállà ni Namarò nikayu, gapu ta arán naw ngaw paga ammu si Namarò.

<sup>13</sup> Á mássiki nu ari kayu nakiyápu ngaw kâ Namarò ánnâ ari kayu ngaw nesipà nikami nga Kudio, napataliánin yù áaggián naw kunangane, ta nepattatáddyay kayin kâ Apu Kesu Kiristu ánnâ nesipà kayin nikami gapay, megapu sù dága ni Apu Kesu nga inipappágá na ta liwiliwâ tam ngámin.

<sup>14</sup> Á si Apu Kesu yù namakkápiá nittam ngámin, sittam nga Kudio ánnâ sikayu nga ari Kudio, á inirián na yù pakkakálusso tam, á pinattatádde na ittam, nga nepagimammà megapu kuna.

<sup>15</sup> Á inirián ni Apu Kesu yù pakáwayyá nayù tunung na Kudio ánnâ yù ira itaddán na ánnâ kustombare na, megapu ta pate na ta kurù, tapè pakomán na kami nga Kudio ta kunnay sù ámmakomá na gapay nikayu nga ari Kudio, megapu sù pangikatalà tam kâ Apu Kesu. Á yáyù nga sittam nga duánga naddumá nga tatolay ngaw, pinabbalin na ittam ta táttáddyay, nga kunnay ta bagu nga tatolay nga netáddyay kuna. Á yáyù nga nakkápiá ittamin.

<sup>16</sup> Á pinatukkâ ni Apu Kesu yù pakkakálusso tam. Á gapu ta netáddyay ittam kâ Apu Kesu, á pinakkápiá na ittam kâ Namarò, tapè alawatan ni Namarò ittam, nga Kudio ánnâ ari Kudio, megapu sù pate ni Apu Kesu ta kurù.

<sup>17</sup> Á yáyù iniyángé ni Apu Kesu Kiristu ta dabbuno, ta minay nangilayalayá sù awayyá tam nga mepakkápiá kâ Namarò. Á sittam ngámin yù pangilayalayatán na, sikayu nga ari Kudio nga arayyu ngaw kâ Namarò, ánnâ sikami nga Kudio gapay nga aranni kuna.

18 Á gapu ta pamakkápiá ni Apu Kesu nittam kâ Namarò, ajian yù awayyá tam ngámin nga Kudio áonna ari Kudio nga makiammò kâ Namarò nga Yáma tam, gapu ta kesipatát tam ngámin yù Ikararuá ni Namarò nga mangabbák nittam.

19 Á gapu ta pakkápiá naw kâ Namarò, sikayu nga ari Kudio, á ari kayu yù kunnay sù ira tatolay nga naggapu ta arayyu, nga tanakuán yù katatole ra. Ta mesipà kayu gapay sù ira ngámin nga mangikatalà kâ Namarò, á mättatáma ittamin ngámin kâ Namarò.

20 Á meyárik ittam ta bale ni Namarò nga paddayan na. Á yù ira ngaw ábbilinán ni Namarò áonna yù ira olu nga minángngilayalayâ nga sinudduán ni Apu Kesu, aggira yù kun na kallang nayù bale ni Namarò nga pinatáddak na. Á si Apu Kesu Kiristu yù meyárik sù batu nga panáddagán nayù balay.

21 Á pattatádday ni Apu Kesu yù ira ngámin nga mangikatalà kuna, nga kunnay ta melanán sù balay nga paddayan na, nga pamabbalin na ta mangilin nga bale ni Namarò nga nakástá nga mepángngà nga paggianán na.

22 Á sikayu gapay, gapu ta nepattatádday kayin kâ Apu Kesu, nesipà kayin gapay sù ira kárúan nga nelanná sù balay nga mepángngà nga paggianán nayù Mangilin nga Ikararuá ni Namarò.

### 3

*Si Pablo yù Mangilayalayâ nga Minay sù ira ari Kudio*

¹ Á yáyù gapu na sikayu nga ari Kudio yù ipakimállà ku. Á ajianà nga napukù ta ábbalurán, megapu ta pangilayalayâ ku nikayu nga ari Kudio ta meyannung kâ Apu Kesu Kiristu.

² Á narámak naw támma ta si Namarò yù nanullà nikán, á inikatalà na nikán yù pakáwayyâ nga mangipakánnámmu sù pangikállà na nikayu nga ari Kudio, tapè mesipà kayu gapay kâ Namarò.

³ Ta inipalappâ ni Namarò nikán yù nelímak ngaw nga meyannung sù talákkurugan na, á initúrákin sawe yù baddì nga meyannung kuna.

⁴ Á ta pabbibbiik naw sù initúrâ ku, mánnámmuán naw gapay yù inipalappâ ni Namarò nikánnga meyannung kâ Apu Kesu Kiristu.

⁵ Arán na ngaw inipakánnámmu ni Namarò sù ira ngaw naggaká nittam. Ngam kunnane ta keggá tam, minay yù Mangilin nga Ikararuá na nga mangipalappâ sù ira minángngilayalayâ nga sinullà ni Namarò áonna yù ira ábbilinán na.

⁶ Á yawe yù ipalappâ na kunangan, ta gapu ta pangikatalà naw kâ Apu Kesu Kiristu ta pakaginná naw sù napiá nga dámak, á ari lâ sikami nga Kudio yù alawatan ni Namarò, nu ari gapay sikayu nga ari Kudio. Á itádde na ittam kâ Apu Kesu Kiristu, tapè sittam ngámin yù kunnay ta baggi na, áonna naggigittá ittam gapay nga mesipà sù ngámin nga napiá nga initabba ni Namarò.\*

⁷ Á gapu ta pangikállà ni Namarò nikán, iniyawâ na nikán yù pakáwayyâ nga masserbi kuna, tapè umayá mangilayalayâ sù napiá nga dámak megapu sù pakáwayyá na áonna ángngabbák na nikán.

⁸ Á kunniaw yù pangikállà na nikán, ta mássiki nu sikán yù kagukárán ta ngámin nga tatole ni Namarò, á iniyawâ na nikán yù pakáwayyâ, tapè ilayalayâ ku nikayu nga ari Kudio yù nepallà nga ángngikállà na nittam, áonna yù ángngiddú na nittam, áonna yù alluárán na nittam nga awán ta kárik piá na, megapu kâ Apu Kesu Kiristu.

⁹ Á si Namarò nga namarò ta ngámin, aggina yù naddok nikán, ta ek ku ipakánnámmu sù ira ngámin nga tatolay yù eggá ta nonò na, nga inilímak na áddé ngaw, nga talákkurugan na enga akkuán.

¹⁰ Á sittam nga nepattatádday kâ Apu Kesu Kiristu megapu sù pangikatalà tam kuna, sittam yù pangipasinganán ni Namarò sù ngámin nga pinalurò na, megapu sù pangikállà na. Á yù ira makáwayyá nga ari masingan nga ajian ta lángì nga mammaguray sù ira daroban, pakasingad da sù ngámin nga pinalurò ni Namarò megapu nittam nga mangikatalà kuna, á kánnámmuád da ta ajian kâ Namarò yù monak nga makkakerumá nga sírik na nga makapállâ, nepatalugáring ta masingad da ta nepattatádday ittam, nga Kudio áonna ari Kudio, megapu sù pangikatalà tam kâ Namarò.

¹¹ Ta yáyù ninonò ni Namarò, nga talákkurugan na áddé ngaw lage na namarò ta dabbuno, á pinalurò nen yù ngámin nga ure na megapu kâ Apu Kesu Kiristu nga Yápu tam.

¹² Á gapu ta netádday ittam kâ Apu Kesu Kiristu, mappelò ittam nga makimállà kâ Namarò, ta ammu tam ta ginnán na yù ipakimállà tam kuna megapu sù pangikatalà tam kâ Apu Kesu.

\* 3:6 Kolosi 1:26-27

<sup>13</sup> Á yáyù nga kagiak ku nikayu ta ari kayu mapállâ nga maraddam, mássiki nu ajjanà nga marigirigâ ta ábbalurán, megapu sù pangabbák ku nikayu. Patattaman naw laguk yù nonò naw, ta ammu naw ta mabbalin ta kapiánán naw ánnâ yù karáyo naw yù ngámin nga jigâ nga attamák ku megapu nikayu.

*Yù Ipakimállâ ni Pablo nga Meyannung sù Ángngiddù ni Apu Kesu Kiristu nittam*

<sup>14</sup> Á mamalittúkagà nga maddáyaw kâ Namarò nga Yáma tam ta pakanonò ku sù pinalurò na megapu sù pangikállâ na nittam.

<sup>15</sup> Ta aggina yù paggapuán nayù áwwawágí nayù ira ngámin nga máttatáma nga ajjan ta lángi ánnâ dabbuno.

<sup>16</sup> Á yawe ipakimállâ ku kâ Namarò, ta pasikanan na kayu nga katággitáddy, megapu sù pakáwayyá na nga makapállâ, tapè mapasigaggâ yù ángngikatalâ naw kâ Apu Kesu megapu sù ángngabbák nayù Mangilin nga Ikararuá na nga maggián nikayu nga katággitáddy.

<sup>17</sup> Á yawe gapay ipakimállâ ku, ta itulù naw yù nonò naw kâ Apu Kesu Kiristu, tapè mepulù si Apu Kesu nikayu, nga mammaguray ta nonò naw, megapu sù pangikatalâ naw kuna. Á parè bì gapay ta mapasigaggâ yù ángngiddù naw kâ Apu, ánnâ mapasigaggâ gapay yù ángngiddù naw sù ira kábulun naw,

<sup>18</sup> tapè maparubán naw ánnâ kánnámmuán naw gapay yù makapállâ nga ángngiddù ni Apu Kesu Kiristu nittam ngámin nga tatole ni Namarò, nga napasigaggâ nga awán ta áddè na.

<sup>19</sup> Á parè bì ta kánnámmuán naw yù ángngiddù ni Apu Kesu Kiristu nittam, mássiki nu arát tam awáyyá nga kánnámmuán yù ngámin nga pagáddekan na, á parè bì ta matagenà naw yù ángngiddù na nittam ta kággágaw tâ áddè ta kesipâ tam sangaw kâ Namarò.

<sup>20</sup> Dayáwat tam si Namaro, ta aggina yù makáwayyá nga mamalurò ta aru ánnè sù ngámin nga manonò tam ánnâ ipakimállâ tam kuna, megapu sù makapállâ nga pakáwayyá nayù Mangilin nga Ikararuá na nga makipaggián nittam nga mangabbá.

<sup>21</sup> Á dayáwat tam si Namarò gapu ta pinattatádde na ittam megapu sù pangikatalâ tam kâ Apu Kesu Kiristu, á dayáwat tam si Namarò gapay megapu kâ Apu Kesu. Meparáyaw si Namarò ta áddè ta áddè! Ammán.

## 4

*Nepatttádday yù Nonò nayù ira nga Mangikatalâ kâ Apu Kesu*

<sup>1</sup> Á yawe laguk yù itabarang ku nikayu, sikán nga nabáluk megapu sù panguruk ku kâ Apu Kesu. Napiá nu akkuát tam yù napiá, nga kunnay ta mepángngâ sù ira tatolay nga inagálán ni Namarò ta tatole na.

<sup>2</sup> Á tumulutulù ittam ánnâ makkaká-allâ ittam. Á ari ittam mapporay, ngam makkakápasensiá ittam ánnâ makkakápakomá ittam megapu sù pakkaká-iddù tam.

<sup>3</sup> Á ipe tam yù urà tam nga ari ittam malurâ nga manuppál sù áwwawágí tam, gapu ta netáddy ittam megapu sù Mangilin nga Ikararuá, tapè mepagimammâ ittam.

<sup>4</sup> Á sittam nga netáddy kâ Apu Kesu Kiristu, yá keyarigát tam yù baggi na nga táttáddy lâ. Á táttáddy lággapay yù Ikararuá ni Namarò nga ajjan nittam. Á inagálán na ittam gapay sù táttáddy lâ nga iddanamát tam, nga kesipâ tam kâ Namarò, ta yáyù inipagágál na nittam.

<sup>5</sup> Á táttáddy lâ yù Yápu tam nga si Apu Kesu Kiristu, gapu ta aggina lâ yù ikatalâ tam nga táttáddy. Á mamittán lâ yù karigù tam, á táttáddy lâ yù gapu na, tapè mepasingan yù panguruk tam kâ Apu Kesu.

<sup>6</sup> Á táttáddy lâ si Namarò, nga Yáma tam ngámin nayù ira tatole na. Aggina yù kotunán nga mammaguray ta ngámin, nga manotolay ta ngámin, ánnâ mepaggián nittam nga mamalurò sù ngámin nga ure na megapu nittam.

*Makkakerumá yù Pakáwayyá tam*

<sup>7</sup> Á inisinek na nittam ni Apu Kesu Kiristu yù makkakerumá nga pakáwayyá tam, nga iniyawâ na nittam nga katággitáddy nga mepángngâ kuna, nga meyannung ta ikáyâ na.

<sup>8</sup> Á yáyù gemma yù kebalinán nayù kinagi na ngaw ni Namarò nga meyannung kâ Apu Kesu. Ajjan nga netúrá nga kunniaiw:

“Panoli na ta kotunán nga gián ta lángì, aru yù ira náppù nga ginápù na ánnâ inipulù na tapè masserbi ira kuna,  
á inisinek na sù ira tatole na nga katággitáddy ta dabbuno yù napiá nga makkakerumá nga pakáwayyá na.”\*

<sup>9</sup> Á asinni panò yù kagian na nga nattoli ta kotunán nga gián ta lángì, nu ari si Apu Kesu Kiristu nga napolu nga naggapu ta lángì, nga minuluk ta konagán nga gián ta dabbuno?

<sup>10</sup> Á aggina nga minuluk ta konagán nga gián ta dabbuno, aggina gapay yù nattoli ta kotunán nga gián ta lángì, tapè palurotan na yù pakáwayyá na nga manaron ta ngámin, ta aggina yù kotunán nga makáwayyá nga mammaguray ta ngámin nga eggá.

<sup>11</sup> Á danniaw yù inisinek ni Apu Kesu sù ira tatole na, nga makkakerumá nga pakáwayyá ra, ta sinullà na yù ira olu nga sinudduán na, nga iniddán na ta pakáwayyá ra nga mangipakánnámmu kuna. Á sinullà na yù ira ábbilinán na nga mangipakánnámmu sù nelímak nga ipalappá ni Namarò nira. Á sinullà na yù ira nga umay mappassapassiár ta arayyu nga lugár nga mangilayalayâ sù napiá nga dámak, tapè patuttulad da yù ira tatolay kâ Apu Kesu. Á sinullà na yù ira nataggatán nga iniddán na ta pakáwayyá ra nga manaron áんな manabarang sù ira tatole na, áんな sinullà na gapay yù ira mangituddu sù bilin na.

<sup>12</sup> Á yá ipangiyawâ na sù pakáwayyá tam, tapè maparán ittam ngámin nga makkaká-abbák. Á ta kunnian, makkakátabarang ittam, áんな mapasigaggà yù ángngikatalà tam kâ Apu Kesu Kiristu, sittam nga meyárik ta baggi na.

<sup>13</sup> Á mepattatáddyit tam laguk megapu ta pangikatalà tam, áんな malannapán yù pakánnámmu tam nga meyannung sù Aná ni Namarò. Á tulluâ ittam ta áddè ta pareku nga napiá yù nonò tam áんな ággangnguá tam, nga kunnay ta ággangnguá ni Apu Kesu Kiristu.

<sup>14</sup> Á nu napasigaggà yù ángngikatalà tam kâ Apu, ari ittamin yù kunnay ta abbing, nga mattá-iki-ikáyâ nga malogon nga tumutul ta makkakerumá nga ituddu nayù ira tatolay nga minángngilogò. Ta ajian garè yù ira áppè masírik, nga umay mangituddu, á ilogò da yù ira tudduád da megapu ta passirisiri ra.

<sup>15</sup> Ngam sittam, gapu ta pakkaká-iddù tam, ubobugat tam yù kuruk nga bilin ni Apu, tapè tulluâ ittam ta áddè ta paggiggítâ tam yù nonò tam áんな yù kustombare tam ta nonò ni Apu Kesu Kiristu áんな yù kustombare na. Ta meyárik si Apu Kesu ta ulu tam, nga mammaguray nittam.

<sup>16</sup> Á sittam nga makiyápu kuna, yá keyarigát tam yù baggi na, nga napiá yù áttutuppan ngayù ira tuláng na áんな yù ira ugâ na. Á nu akkuán nayù ira tuláng áんな ugâ yù ipakuá nayù yápu ra, tulluâ laguk yù baggi na nga massikan. Á kunnian yù ággját tam. Nu makkaká-iddù ittam áんな makkaká-abbák ittam, á mapasigaggà yù ángngikatalà tam.

#### *Napiá yù Nonò nayù ira Mangikatalà áんな yù Akkuád da*

<sup>17</sup> Á yawe laguk yù kagiak ku nikayu, nga ipakagi ni Apu Kesu nikán. Mawák nga arán nawin tuttulan yù kustombare nayù ira nga ari manguruk kâ Apu, ta awán ta serbi nayù nonotad da áんな yù akkuád da.

<sup>18</sup> Á kunnay ta kallà yù nonò da. Á ari ira mesipà sù bagu nga áttolay nga iyawâ ni Namarò sù ira mangikatalà kuna, gapu ta nataggâ yù ulu ra, áんな arád da kánnámmuán yù ure ni Namarò.

<sup>19</sup> Awán ta áppasirád da, áんな itulù da yù baggi ra ta narákè nga karagatád da. Á ari ira makáppak nga mangnguá ta makkakerumá nga narákè nga karagatád da.

<sup>20</sup> Ngam sikayu nga manguruk, ari kunnian yù ginigiámmu naw ta meyannung kâ Apu Kesu Kiristu!

<sup>21</sup> Ta naginná nawin yù meyannung kâ Apu Kesu, áんな netuddu nikayu yù kuruk nga bilin na, nga kurugan naw.

<sup>22</sup> Likurán naw laguk yù narákè nga karagatán na baggi naw áんな yù ngaw ággangnguá naw nga narákè, maraké melogò kayu megapu ta narákè nga karagatán naw, áんな mabbáli kayu ta narákè.

<sup>23</sup> Á tumulù kayu sù Mangilin nga Ikararuá, tapè moli yù nonò naw, megapu sù ángngabbák nayù Ikararuá ni Namarò nikayu,

<sup>24</sup> áんな moli gapay yù ággangnguá naw áんな yù ikáyâ naw, tapè mabbáli kayu ta tatolay nga pinarò ni Namarò ta kágappâ na, á mepasingan ta matunung kayu, áんな kuruk nga napiá yù nonò naw, nga kunnay kâ Apu Namarò, nga awán ta narákè kuna.

<sup>25</sup> Á sittam nga mawwawági megapu sù ángnguruk tam, yáyù nga tukkatat tam laguk yù passirisiri tam sù ira kábulut tam, á kagiat tam lâ yù kuruk, gapu ta nattatáddyit tam, nga kun na baggi ni Apu Kesu.

<sup>26</sup> Á nu mapporay ittam, palannáwat tam yù nonò tam, tapè arát tam akkuán yù narákè. Ari ittam maggián ta tangatangággaw nga mapporay,

<sup>27</sup> tapè awán ta awayyá ni Satanás nga kuríuan yù nonò tam.

<sup>28</sup> Á nu ajian nikayu yù tolay nga minákkokò, á tukkatan na yù pakkokò na, á malláppà laguk nga mattarabáku ta napiá, tapè ajian yù meywá na sù ira magáwák.

<sup>29</sup> Á ari ittam magubobuk sù narákè, ngam ubobugat tam lâ yù napiá nga mepángngà, tapè abbágát tam yù ira makaginná sù kagiat tam.

<sup>30</sup> Á arát tam paddaddaman yù nonò nayù Mangilin nga Ikararuá ni Namarò. Ta gapu ta maggián yù Ikararuá ni Namarò nittam nga katággitádday nga mangikatalà kâ Apu, aggina yù panákkilalán ta sittam yù tatole ni Namarò. Á gapu ta keggá na nittam, ammu tam ta kuruk nga palubbángan ni Namarò ittam, tapè mesipà ittam sù ira tatole na sangaw nu manoli si Apu Kesu ta dabbuno.

<sup>31</sup> Anugutan naw laguk yù pangabbák nayù Mangilin nga Ikararuá, tapè mári yù nakujujà nga nonò naw. Ari kayu mapporay, á ari kayu maddiráma. Arán naw pakkagigán yù ira kábulun naw, á arán naw ira lillíbatan. Á irián naw yù ngámin nga narákè nga nonò naw, nepatalugáríng yù lusso naw.

<sup>32</sup> Á makkaká-iddù ittam laguk áんな makkaká-allà ittam. Á makkakápakomá ittam gapay, nga kunnay ta pamakomá ni Namarò nittam, megapu kâ Apu Kesu Kiristu.

## 5

### *Yù Akkuán nayù ira Tatolay nga Nanawagán yù Nonò da*

<sup>1</sup> Á gapu ta ánâ na ittam ni Namarò nga iddukan na, á párigát tam laguk si Namarò nga Yáma tam.

<sup>2</sup> Á makkaká-iddù ittam, gapu ta iddukan na ittam ni Apu Kesu Kiristu. Á kunniae yù ángngiddù na nittam. Initapil na yù baggi na megapu nittam. Á kunnay ta nabanguk nga neyátáng kâ Namarò yù ketapil na.

<sup>3</sup> Á gapu ta tatole ni Namarò ittam, arát tam akkuán yù narákè nga karagatán na baggi tam onu mangarallaw onu magukkuk, áんな ari mepángngà nu ajjan níkayu yù magubobuk ta kunnian nga narákè, ta ari mepángngà sù ira tatole ni Namarò.

<sup>4</sup> Á ari gemma mepángngà nu narákè yù ággubobuk tam, onu ubobugat tam yù awán ta serbi na, onu ilapalapuk tam yù narákè. Ari kunnian laguk yù ággubobuk tam, ngam magubobuk ittam sù áddayo tam kâ Namarò, ta ari ittam makabalabáia kuna megapu sù pangikállà na nittam.

<sup>5</sup> Á ammu naw gemma ta ari mesipà sù pammagure ni Apu Kesu Kiristu áんな yù pammagure ni Namarò yù ira tatolay nga mangnuá ta narákè, áんな yù ira minánggarallaw, áんな yù ira nokkuk gapay. Ta arád da si Namarò pakimorayán, nu ari galâ nga pakimorayád da lâ yù baggi ra áんな yù karagatád da nga ukkuran, á kunnay ira sù ira makimoray ta sináddios.

<sup>6</sup> Á síkayu, ari kayu laguk makilogò sù ira tatolay nga makkagi ta ari kuruk nga narákè yù ira nga kunnian yù akka-akkuád da, ta dán nga naparán yù pore ni Namarò sù ira ngámin nga mamotu kuna áんな mangnuá ta narákè, á ukuman na ira sangaw.

<sup>7</sup> Ari kayu laguk makikábulun sù ira tatolay nga mangnuá ta narákè nga kunnian.

### *Si Apu yù Mamannawák ta Nonò tam*

<sup>8</sup> Á síkayu, sù ngaw, kunnay ta kallà yù nonò naw. Ngam kunangane, manawagánin yù nonò naw megapu sù pangikatalà naw kâ Apu Kesu Kiristu. Akkuán naw laguk yù napiá nga mepángngà sù ira ánâ ni Namarò nga mesipà sù nawák na.

<sup>9</sup> Ta yù tolay nga nanawagánin yù nonò na, sigidá nga makkagi ta kuruk, áんな matunung áんな napiá gapay yù ággangnuá na.

<sup>10</sup> Á gapu ta manawagánin yù nonò naw, talákkurugan naw laguk nga akkuán yù ammu naw nga ipagayáyá ni Namarò.

<sup>11</sup> Á ari kayu mepulupulù sù ira tatolay nga kun na kallà yù nonò da, gapu ta awán ta serbi nayù akkuád da. Ngam ipasingan naw yù napiá nga akkuán naw, tapè mepasingan ta narákè yù akka-akkuád da.

<sup>12</sup> Ta mappasirán kayu mássiki nu ubobugan naw lâ yù narákè nga akkuád da nga ilímak da, pappanganá nu akkuán naw nakuan.

<sup>13</sup> Ngam nu masingad da yù napiá nga akkuán naw, á matákkilalád da yù narákè nga akka-akkuád da, á manawagán yù nonò da gapay sangaw.

<sup>14</sup> Ta nu mánnámmuád da sangaw yù pakáwayyá ni Apu Kesu nga mamannawák ta nonò na tolay, áんな tumulù ira kuna, á pannawagan na gapay yù nonò da. Á ajjan yù netúrâ nga kunniauw:

“Sikaw nga kunnay ta nakkaturuk, mallukák ka laguk.

Gumikkáng ka, nga maggagu sù ira námmatay.

Ta pannawagan ni Apu Kesu Kiristu yù nonò mu.”

<sup>15</sup> Magimuguk ittam laguk, ta arát tam párigán yù akkuán nayù tolay nga ulapá. Akkuát tam lá yù napiá nga kunnay sù akka-akkuán nayù tolay nga masírik, nga nonotan na yù pabbalinán nayù akkuán na.

<sup>16</sup> Á arát tam lonán yù awayyá tam nga manuppál sù napiá nga ipagayáyá ni Namarò, nepatalugáring kunangane, ta aru garè yù ira mangnguá ta narákè.

<sup>17</sup> Á yáyù nga arát tam laguk párigán yù ággangnguá nayù ulapá, ngam kánnámmuát tam yù ure ní Apu, tapè tángngagat tam yù ipakuá na nittam.

<sup>18</sup> Á ari ittam laguk magillellaw. Ta ari gemma mábbágán yù tolay megapu ta pappissán na, nu ari galà ta darálan na yù baggi na. Ngam tumulù ittam sù Mangilin nga Ikararuá ni Namarò, tapè aggina yù mammaguray nittam.

<sup>19</sup> Á gapu ta pammagure nayù Mangilin nga Ikararuá ta nonò tam, nu makkaká-ubobuk ittam, ubobugat tam yù pagayáyá tam kâ Apu. Á ikansiot tam yù Salmo nga Kansion ni Patul Dabid áんな yù kansion nga meyannung ta allà ni Apu nittam áんな yù ángngiddù na. Á ipe tam yù urà tam nga maddáyaw kuna.

<sup>20</sup> Á gapu ta pangikatalà tam kâ Apu Kesu Kiristu nga Yápu tam, dayáwat tam si Namarò nga Yáma tam, ta awán ta awayyá tam nga mabbalabálà kuna. Dayáwat tam laguk ta kággággaw megapu sù ngámin nga mesimmu nittam, mássiki yù jigâ tam.

#### *Yù Meyannung sù ira Magatáwa*

<sup>21</sup> Á makkakátlù ittam, megapu sù pakimore tam kâ Apu Kesu Kiristu.

<sup>22</sup> Á sikayu nga bábbay nga aijan yù atáwa na, tumulù kayu sù atáwa naw, nga kunnay gapay ta áttulù naw kâ Apu.

<sup>23</sup> Ta yù laláki yù mammaguray sù atáwa na, nga kunnay ta mammaguray si Apu Kesu sù ira ngámin nga mangikatalà kuna. Ta sittam ngámin nga netádday kâ Apu yù kun na baggi na, á aggina lápay yù mangiyígú nittam.

<sup>24</sup> Á yù ira bábbay, tumulù ira laguk sù atáwa ra ta ngámin nga meyannung níra, nga kunnay nittam ngámin nga mangikatalà, nga tumulù gapay kâ Apu Kesu Kiristu.

<sup>25</sup> Á sikayu nga lálláki, iddukan naw yù ira atáwa naw ta kunnay sù ángngiddù ni Apu Kesu Kiristu nittam ngámin nga netádday kuna. Á kunniauw yù ángngiddù na nittam, ta initapil na yù baggi na megapu nittam,

<sup>26</sup> tapè tatole ni Namarò ittam. Á napakomá ngin yù liwâ tam. Á pinakarenuán na yù nonò tam, megapu ta panguruk tam sù bilin na, áんな megapu sù pakirigù tam ta danum, nga pangipasinganát tam ta panguruk tam kuna.

<sup>27</sup> Á yá ipamakarenu na nittam ni Apu Kesu, tapè alawatan na ittam, nga nakástá ta ánniganán na, nga kunnay ta pangalawâ nayù nobiu sù atawán na, tapè pareku nga napiá ittam nga awán bulubugá ta ipamaliwâ na nittam, sangaw nu en na ittam apan nga ilabbé na ta gián na.

<sup>28</sup> Á sikayu nga lálláki, yáyù nga iddukan naw yù ira atáwa naw ta kunnay ta ángngiddù naw ta baggi naw. Ta yù laláki nga mangiddù ta atáwa na, iddukan na gapay yù baggi na.

<sup>29</sup> Á awán gemma ta tolay nga lonán na yù baggi na, ngam pakanan na áんな iddukan na taping. Á kunnian gapay yù ángngiddù ni Apu Kesu Kiristu nittam nga mangikatalà kuna, <sup>30</sup> ta netádday ittam nga kun na baggi na.

<sup>31</sup> Á aijan yù dán nga netúrá nga bilin ni Namarò, nga kunniauw: "Nu mangatáwa yù tolay, yáyù gapu na nga panawán na yù ira darakal na, tapè umay metádday sù atáwa na. Á yù ira mangatáwa, kun na táttádday yù baggi ra."\*

<sup>32</sup> Á monak yù kagian na nga nelímak yù kebalinán na. Ngam ta urè, ubobugan na yù meyannung kâ Apu Kesu Kiristu áんな sittam nga netádday kuna megapu sù pangikatalà tam.

<sup>33</sup> Á yawe gapay yù kebalinán na. Sikayu nga lálláki nga eggá yù atáwa na, iddi-iddukan na yù atáwa na, nga kunnay ta ángngiddù na ta baggi na. Á sikayu nga bábbay nga eggá yù atáwa na, pakimorayán na yù atáwa na.

## 6

#### *Meyannung sù ira Ábbing áんな yù ira Darakal da*

<sup>1</sup> Á sikayu nga ábbing, kurugan naw yù kagian nayù ira darakal naw, gapu ta kunnian yù panguruk naw gapay kâ Apu Kesu nga Yápu tam, ta yáyù ipakuá ni Namarò nikayu.

\* 5:31 Genesis 2:24

<sup>2</sup> Á aijan yù taddán ni Namarò, nga olu nga taddán na nga eggá nga mepulù kuna yù napiá nga pabbalinán na nga initabbá ni Namarò sù ira nga manguruk. Ta kinagi ni Namarò, "Pakimorayán naw yù ira darakal naw,

<sup>3</sup> tapè napiá yù ággíán naw ánná matolay kayu ta nabayák ta utun na dabbun."\*

<sup>4</sup> Á sikayu nga aijan ánâ na, arán na ira papporayán ta mabayák, marakè mapappore na ira. Ngam tudduán naw ira ánná tabarangán naw ira ta meyannung sù napiá nga ipakuá ni Apu Kesu nittam.

#### *Meyannung sù ira Aripań ánná yù ira Yápu ra*

<sup>5</sup> Á sikayu nga aripan, pakimorayán naw yù ira yápu naw, á ipe naw yù urà naw nga manuppál sù ipakuá ra nikayu, tapè napiá yù ásserbi naw nira, nga kunnay ta si Apu Kesu Kiristu yù passerbián naw.

<sup>6</sup> Á akkuán naw yù ngámín nga ipakuá nayù pattarabakuán naw, mássiki nu arán na kayu masingan, gapu ta mebiláng kayu ta aripan ni Apu Kesu Kiristu. Yáyù nga máwák laguk nga ipe naw yù urà naw nga manuppál sù ngámín nga ipakuá nayù tolay nikayu, ta yáyù ure na gapay ni Namarò.

<sup>7</sup> Malláppà kayu laguk nga masserbi sù ira paggianán naw, nga kunnay ta ari tolay yù passerbián naw nu ari galâ si Apu Kesu.

<sup>8</sup> Á ammu tam gemma ta bálatan ni Apu Kesu yù tolay nga mangnguá ta napiá, mássiki nu aripan onu ari aripan.

<sup>9</sup> Á sikayu laguk nga aijan yù aripan na, á kunnay sù kinagì sù ira masserbi nikayu, kunnian gapay yù pakimore naw nira. Arán naw ira ananássingan, ta yù kuruk nga Yápu naw, nga aijan ta lángì, aggina galâ yù Yápu ra gapay, á awán gemma ta paddurumán na nga tolay.

#### *Yù Pakigerrá ni Satanas nittam*

<sup>10</sup> Á yawe yù maporián nga kagiak ku nikayu. Gapu ta nepattatáddy ittam kâ Apu Kesu Kiristu, ikatalà tam laguk ta mangabbák nittam, tapè mapasigaggà yù ángnguruk tam kuna. Ta aggina yù kasikanán nga makáwayyá, á pasikanan na ittam, megapu sù sikan na ánná pakáwayyá na.

<sup>11</sup> Á gapu ta kunnay ta makigerrá di Satanas nittam, á pinarán ni Namarò yù ángngabbák na nittam, nga kun na ármas ánná kalátak na mengal, nga iniyawâ na nittam. Ikatalà tam laguk si Namarò ánná iyuás tam yù kun na ármas nga iniyawâ na nittam, tapè arán ni Satanas ittam appútan, ánná ari ittam melogò, nu parubán na ittam ni Satanas nga sestemán.

<sup>12</sup> Ta ari tolay yù makigerrá nittam, nu ari galâ di Satanas ánná yù ira narákè nga anitu ánná dimoniu nga daroban na, ánná yù ira kárúán nga narákè nga makapangnguá nga ari masingan, nga aijan ta lángì. Aggira yù mammaguray sawe dabbuno sù ira tatolay nga kun na nakallà yù nonò na.

<sup>13</sup> Á yáyù nga alawatat tam laguk ngámín yù iniyawâ ni Namarò, nga kun na ármas na mengal ánná yù barawási na nga balayág, tapè dán nga naparán ittam, mássiki nu pappanatan ni Satanas yù narákè nga akka-akkuát tam yù kun na barawási nga balayág, nga nelippak ta gáko tam.

<sup>14</sup> Maggián ittam laguk nga dán nga naparán, tapè makáwayyá ittam nga manáddak nga ari máppù, nga kun na mengal nga umay makigerrá. Manáddak ittam laguk, á ari ittam massiri, ngam kagiat tam lâ yù kuruk, nga kun na barakà nga naláddá ta áwà tam. Á yù matunung nga nonò tam ánná yù napiá nga akka-akkuát tam yù kun na barawási nga balayág, nga nelippak ta gáko tam.

<sup>15</sup> Á kunnay ta nassapátù ittam, nu dán nga naparán ittam nga umay mangipakánnámmu sù bilin ni Namarò nga meyannung ta pamakkápiá na sù ira tatolay kuna, megapu sù kingnguá ni Apu Kesu.

<sup>16</sup> Á tangngalát tam yù melippak nittam nga kun na kalátak, nga yù napasigaggà nga ángngikatalà tam kâ Apu, tapè arán na ittam ni Satanas makanná ta pamuruburion na nittam. Ta gapu ta pangikatalà tam, á kunnay ta máddà tam yù ipána na nittam ni Satanas nga naggatang.

<sup>17</sup> Á alawatat tam yù ángngiyígù ni Namarò nittam nga kun na balayág nga taddung tam, tapè arán na ittam máwayyá ni Satanas nga pabbábangan. Á kurugat tam yù bilin ni Namarò,

\* 6:3 Deuteronomio 5:16

nga ipanonò nayù Mangilin nga Ikararuá nittam, nga kun na nataram nga bayunetá nga duá yù ngárak na.

<sup>18</sup> Á sigídá ittam laguk makimállà kâ Namarò, maguray lâ yù mesimmu nittam, ta abbágán na ittam ta meyannung ta ngámin nga máwák tam ánná akkuát tam. Ta abbágán na ittam nayù Mangilin nga Ikararuá ta pakimállà tam, á ipakánnámmu na nittam yù ure ni Namarò, tapè mepángngà yù ipakimállà tam. Á sittam laguk yù kunnay ta matturá, nga ari malurá nga makimállà, tapè tángngagat tam yù ipakimállà tam megapu sù ira ngámin nga kábulut tam nga tatole ni Namaro.

<sup>19</sup> Á sikayu, ipakimállà nawà gapay, ta abbágán nangà ni Namarò ánná ipakánnámmu na nikán nu kunnasi yù ággubobuk ku, tapè aringà maganássing, ngam mappelokà nga mangipakánnámmu sù monak nga bilin na nga nelímak ta nabayák, nga napiá nga dámak nga meyannung sù pakkápiá tam kâ Namarò megapu kâ Apu Kesu Kiristu.

<sup>20</sup> Ta jinok nangà ni Apu, nga pannakabaggi na, nga mangilayalayâ sù bilin na. Á yáyù nga pinukù dangà sawe ábbalurán, megapu sù pangilayalayâ ku. Á ipakimállà nawà laguk, tapè mappelokà nga mangilayalayâ sù bilin ni Namarò, nga kunnay ta ipakuá na nikán.

### *Yù Kabalin nayù Túrâ*

<sup>21</sup> Á gapu ta ammù ta ikáyâ naw marámak yù ággiák ku ánná ngámin nga nesimmu nikán, á yáyù nga umay si Tikiko nikayu, nga wagi tam nga iddukat tam, megapu sù pangikatalà na kâ Apu Kesu. Aggina yù pangikatalakán nga masserbi kâ Namarò, nga mangabbák nikán ta ngámin nga ipatarabáku ni Namarò nikán. Á ipakánnámmu na sangaw nikayu yù ngámin nga meyannung nikán.

<sup>22</sup> Á yáyù nga dobak ku ta umay ta gián naw, tapè marámak naw yù ngámin nga meyannung nikami saw ánná mabannáyán ánná mapattattam yù nonò naw.

<sup>23</sup> Á sikayu nga wáwwagì megapu sù ángnguruk tam, parè bì ta abbágád da kayu di Ammò Namarò kâ Apu Kesu Kiristu, tapè napasigaggà yù ángngikatalà naw. Á parè bì ta pagimammatađ da yù nonò naw, tapè napiá yù ággíán naw, ánná makkaká-iddù kayu.

<sup>24</sup> Á parè bì ta ikákkállà na kayu ni Namarò, sikayu ngámin nga mangiddù kâ Apu Kesu Kiristu nga Yápu tam ta áddè ta áddè.

## Yù Túrâ ni Pablo sù ira Manguruk nga Taga Pilippay

### *Yù Meyannung sawe Túrâ*

Yù ili na Pilippay yù olu nga labbetán ni Pablo sù ánge na pangilayalayâ ta purubinsia na Masidonia. Á aru yù ira tatolay tân nga nanguruk sù bilin ni Namarò. Aggira yù olu nga naggagammung ta káda Liggu, tapè makimoray ira kâ Namarò.

A ajjan si Pablo nga nebáluk ta pangitúrâ na sawe. Á keggá na ta karsel, arán na ammu nu mapalubbáng sangaw, onu mapapátay. Á ajjan yù ira mangilayalayâ nga mappeggung ánnna makikontará kâ Pablo gapu ta mangabubu ira kuna. Á ajjan gapay yù ira nga mangituddu, nga ituddu ra lá yù naggapu ta nonò da ánné sù kuruk nga bilin ni Namarò. Á pattúrâ ni Pablo, pinappalán na yù ira taga Pilippay, marakè melogò ira megapu nira (3:2-11).

Á mássiki nu ajjan si Pablo ta karsel, ari maraddam nu ari galâ magayáyâ, ta ajjan yù napiá nga iddanamán na megapu sù pangikatalà na kâ Apu Kesu. Á sinabarangán na yù ira tatolay ta magayáyâ ira gapay megapu sù pangikatalà da, ta yáyù ipakuá ni Namarò nittam (4:4-7).

### *Yù Mayán na yawe Túrâ*

Yù Paddios ni Pablo ánnna yù Ipakimállà na (1:1-11)

Yù Áaggián nayù ira nga Mangikatalà kâ Apu Kesu (1:12-30)

Párigáti tam yù Nonò ni Apu Kesu (2:1-18)

Yù Meyannung kári Timotio kâ Epaprudito (2:19-30)

Mangikatalà ittam kâ Apu Kesu (3:1-4:9)

Yù Pabbabalabálà ni Pablo sù ira Mangabbák kuna (4:10-23)

### *Yù Paddios ni Pablo sù ira Túratán na*

<sup>1</sup> Ajjan kami, di Pablo kâ Timotio, nga masserbi kâ Apu Kesu Kiristu. Á mattúrâ kami nikayu nga taga Pilippay, sikayu ngámin nga tatole ni Namarò nga mesipà kâ Apu Kesu Kiristu, ánnna yù ira kátannangán naw ánnna yù ira natullà nga mangabbák.

<sup>2</sup> Á parè bi ta ikákkallà da kayu di Namarò nga Yáma tam ánnna si Apu Kesu Kiristu nga Yápu tam, tapè napiá yù ággíán naw ánnna gawagawáyán naw.

### *Yù Pakimállà ni Pablo*

<sup>3</sup> Á ta ngámin nga pakonò ku nikayu, mepallà yù paddáyò kâ Namarò megapu nikayu.

<sup>4</sup> Á ta ngámin nga pakimállà ku megapu nikayu, magayáyákà nga maddáyaw kâ Namarò,

<sup>5</sup> gapu ta napiá yù ángngabbák naw nikán ta pangilayalayâ ku sù napiá nga dámak nga meyannung kâ Apu Kesu Kiristu. Ta inabbágán nawà ta áddè ngaw pamegapu naw nga manguruk, ta áddè kunangan.

<sup>6</sup> Á si Namarò yù mangipakuá nikayu ta napiá nga akkuán na, á ammù gemma ta uputan ni Namarò yù napiá nga tarabáku na nga pinegapuanán na ta nonò naw áddè ta kapalurò na sangaw nu duttál yù ággó na pattoli ni Apu Kesu Kiristu ta dabbuno.

<sup>7</sup> Á gapu ta nepallà yù ayâ ku nikayu, mepángngà ta nonopat takayu. Ta sikayu ngámin yù mesipà nikán sù ipatarabáku ni Namarò nikán, nga pangilayalayâ ku ta kuruk nga meyannung kâ Apu Kesu Kiristu áddè ngaw aringà paga nebáluk, á abbágán nawà paga kunangane gapay sù kebáluk ku.

<sup>8</sup> Á si Namarò yù makasistígu ta kuruk yù kagiak ku, ta nerallà yù daddam ku gapu ta ikáyâ takayu masingan, ta iddi-iddukat takayu ta kunnay sù ángngiddù ni Apu Kesu Kiristu nittam.

<sup>9</sup> Á yawe ipakimállà ku kâ Namarò, ta mapasigaggà yù pakkaká-iddù naw ánnna malan-napán yù kánnámuán naw nga kuruk nga meyannung kâ Namarò, tapè matákkilálán naw ánnna pilian naw lá yù napiá.

<sup>10</sup> Á nu matákkilálán naw yù napiá, á makáwayyá kayu nga mappíli sù kapiánán, á pareku nga napiá laguk yù nonò naw, á awán ta pakaliwatán naw. Á nu kumian yù akkuán naw, dán ná naparán kayu laguk sù ággaw nga pattoli ni Apu Kesu Kiristu, nga awán ta liwâ naw.

<sup>11</sup> Á parè lá ta mapaluro naw yù ngámin nga napiá nga ipakuá ni Apu Kesu Kiristu nikayu, megapu sù ángngabbák na nikayu, tapè maddáyaw yù ira tatolay kâ Namarò megapu sù napiá nga akkuán naw.

### *Yù Áaggián nayù ira nga Mangikatalà kâ Apu Kesu*

12 Á wáwwagi, ikáyâ ku nga ipakánnámmu nikayu ta napiá lâ yù pabbalinán nayù ngámin nga nesímmu nikán, mássiki yù jigâ ku ámma kebáluk ku saw, gapu ta nassamasamâ yù napiá nga dámak nga meyannung kâ Apu Kesu.

13 Á yù ira ngámin nga suddálú nga magguárdiá sù bale nayù gubinador ámma yù ira káruán nga tatolay gapay, ammu ren yù gapu na nga ipangibáluk da nikán, nga megapu lâ sù panguruk ku kâ Apu Kesu Kiristu.

14 Á yáyù nga mapasigaggâ yù pangikatalà da kâ Apu Kesu nayù ira káruán nga wáwwagi tam, gapu ta masingad da yù pagattam ku ta jigâ sawe ábbalurán, á matattam iren gapay nga ari maganássing nga mangilayalayâ sù bilin ni Namarò.

15 Á kuruk garè ta aijan gapay yù ira káruán nga mangilayalayâ sù meyannung kâ Apu Kesu Kiristu, nga ari megapu sù napiá nga nonò da, nu ari galâ megapu sù pangabubu ra ámma passil da nikán. Ngam aijan yù ira káruán nga mangilayalayâ, nga napiá lâ yù nonò da, ta kuruk nga ikáyâ da nga ipakánnámmu sù ira tatolay yù napiá nga dámak.

16 Á ilayalayâ da si Apu Kesu Kiristu megapu sù ángngiddù da kâ Apu ámma ángngiddù da nikán, ta ammu ra ta sinullâ nangâ ni Namarò nga pine na saw, tapè sikán yù manabbák sù ira marriríri sù bilin na.

17 Ngam yù ira káruán, áppè pípiá ira nga mangilayalayâ ta meyannung kâ Apu Kesu, tapè meparámak ira ámma tumuttul yù ira tatolay nira. Á ikáyâ da nakuan nga malannapán yù jigâ ku sawe ábbalurán megapu sù akkuád da.

18 Ngam sikán, attamák ku lâ. Ta magayáykâ galâ, gapu ta melayalayâ si Apu Kesu Kiristu, mássiki nu anni yù egga ta nonò nayù ira mangilayalayâ, nu napiá ira, onu áppè pípiá ira.

19 Á magayáykâ lállaguk, mássiki nu marigirigkâ, gapu ta ammù ta napiá lâ yù pabbalinán nayù ngámin nga mesímmu nikán, megapu sù ipakimállâ naw kâ Namarò ámma yù ángngabbák nayù Ikararuá ni Apu Kesu Kiristu nikán.

20 Á yawe yù kuruk nga ikáyâ ku ámma iddanamák ku, ta awán bulubugá ta akkuák ku nga kepasiránál ku ta ánnunganán ni Namarò. Á parè bì ta matattamâ nga kunnay ta kustombarè ngaw ta áddè kunangan, tapè meparáyaw si Apu Kesu Kiristu megapu nikán, mássiki nu matolayâ onu matayâ.

21 Á nu matolayâ, dayáwak ku si Apu Kesu Kiristu ámma palurotak ku yù napiá nga ipakuá na nikán. Á nu matolayâ, más napiá yù áaggiák ku, ta apan nangâ ta gián na.

22 Á nu sikán nakuan yù mappíli, arák ku ammu yù piliak ku, nu matolayâ onu matolayâ paga. Ta nu matolayâ, uputak ku paga yù tarabákù tapè magaru yù ira nga manguruk kâ Apu.

23 Á mabbábángâ nga mappíli, ta arák ku ammu yù piliak ku. Ta nu sikán lâ, karagaták ku yù pánò nga umay mepaggián kâ Apu Kesu Kiristu, ta yáyù kapiánán nga áaggiák ku.

24 Ngam nu nonopat takayu, ammù ta máwák naw nga maggiánâ lâ paga nikayu, tapè abbágát takayu.

25 Á yáyù nga ammù ta aringâ paga matay, gapu ta máwák nga maggiánâ nikayu nga mangabbák, tapè mangáppípiá yù ángnguruk naw ámma mappanâ yù pagayáyâ naw megapu sù pangikatalà naw kâ Apu Kesu.

26 Á sangaw nu manolingâ nikayu, yáyù nga mepallâ laguk yù pagayáyâ naw, ámma maddáywaw kayu kâ Apu Kesu Kiristu.

27 Á maguray lâ yù mesímmu, yawe yù máwák naw nga talákkurugan. Uputan naw nga akkuán yù kunnay ta mepongngâ nittam nga manguruk sù napiá nga dámak nga meyannung kâ Apu Kesu Kiristu. Á mássiki nu aringâ makatoli ta gián naw, á marámak ku laguk sangaw ta nattatádday yù nonò naw, ámma mapasigaggâ yù ángnguruk naw kâ Apu Kesu, á makkaká-abbák kayu nga mangipakánnámmu sù napiánga dámak, tapè aru yù ira makaginnâ nga manguruk gapay sù bilin ni Namarò.

28 Á arán naw laguk ikássing yù ira mangontará nikayu. Ta nu ari kayu maganássing, á yáyù nga matákkilalád da ta pagikaruan na ira ni Namarò sangaw. Á tákklilád da gapay ta sikayu yù iyígú ni Namarò nga mesipâ kuna ta áddè ta áddè.

29 Ta nepallâ yù allâ ni Namarò nikayu, á iniyawâ na nikayu yù awayyâ naw nga masserbi kuna, nga ari lâ megapu sù panguruk naw kâ Apu Kesu Kiristu, nu ari gapay ta magattam kayu ta jigâ megapu sù pangikatalà naw kuna.

30 Á nepaggítâ kayu nikán, nga magattam ta jigâ nga kunnay sù jigâ ku ngaw, nga nasingan naw nga inattamák ku ta keggâ nikayu. Á narámak nawin yù jigâ nga attamák ku kunangane ta keggâ sawe ábbalurán.

## 2

*Párigát tam yù Nonò ni Apu Kesu nga Tumulù ánnna Mangikatalà*

1 Á gapu ta kepattatádde tam kâ Apu Kesu Kiristu, aggina yù manabarang nittam. Á mabannáyán yù nonò tam megapu ta ángngiddù na nittam. Á napasigaggà yù áwwawági tam ánnna yù pakkaká-allà tam megapu sù kepulupulù nayù Mangilin nga Ikararuá nittam.

2 Á yáyù nga pattatáddyan naw laguk yù nonò naw ure now, á makkaká-iddù kayu. Á nu kunnian yù ággíán now, á nerallà yù pagayáyâ ku megapu nikayu.

3 Á arán naw akkuán yù narákè nga naggapu sù pangabubu naw onu pappeddaráyo naw. Ta napiá lâ nu makkakátlù ittam, á ibiláng tam ta napiá yù ira kábulut tam ánné ta baggi tam.

4 Á sittam nga katággitáddy, ari lâ yù kapiánán na yù nonotan na, nu ari gapay yù kapiánán nayù ira kábulut na.

5 Á párigát tam laguk yù nonò ni Apu Kesu Kiristu.

6 Ta si Apu Kesu Kiristu, aggina galâ si Namarò, ngam kunnay ta arán na tangngalán yù ággíán na.

7 Ta nánawán na ngámin yù kukuá na ánnna yù ággíán na, á neyaná ta tolay, á naparubán na yù ággíán na tolay, nga nebiláng ta aripan.

8 Á keggá ni Apu Kesu Kiristu ta dabbuno, nga kun na tolay yù ággíán na, initulù na yù baggi na sù ure ni Namarò,

á pinalurò na yù ngámin nga inipakuá ni Namarò kuna, mássiki yù pate na nga nepátâ ta kurù.

9 Á yáyù nga inipotun ni Namarò si Apu Kesu, á iningágán na ta Kotunán nga Makáwayyá ánnè sù ira ngámin nga eggá pakáwayyá na,

10 tapè mamalittúkak ira ta arubáng na ánnna maddayaráyaw ira kuna, aggíra ngámin nga pinarò na nga aijan ta lángì ánnna dabbuno

ánnna yù ira námmatay nga aijan ta unak na dabbuno.

11 Á makkagi ira, nga kud da,

"Si Apu Kesu Kiristu yù Yápu tam ngámin."

Á yáyù nga meparáyw gapay si Namarò nga Yáma tam.

*Si Namarò yù Mangabbák nittam ta Panguruk tam kuna*

12 Wáwwagì nga iddukak ku, gapu ta kunnian yù panguruk ni Apu Kesu Kiristu kâ Namarò, á máwák tam gapay nga manguruk sù Yápu tam. Á sù keggâ ngaw ta gián naw, kuruk nga napiá yù ángnguruk naw ta ngámin nga bilin ni Namarò nga inituddù nikayu. Á pappanganâ ta káwak ku ta gián naw kunangan, talákkurugan naw laguk nga tuppálan yù ángnguruk naw. Á pakimorayán naw si Namarò, ánnna uputan naw nga palurotan yù ngámin nga ipakuá na nikayu, tapè mánnámmuán naw yù ángngiyígù na ánnna ángngisipà na nikayu.

13 Ta si Namarò yù mepulupulù nittam, á aggina yù mangabbák nittam, ánnna iyawâ na nittam yù pakáwayyá tam nga makkagarágá ánnna mamalurò ta ngámin nga ikáyâ na.

14 Á yáyù nga akkuát tam laguk yù ngámin nga ipakuá ni Namarò nittam, nga ari matakì yù nonò tam nga maddagaragim, ánnna ari ittam manabbák kuna,

15 tapè awán ta pakaliwatát tam, á pareku nga napiá lâ yù nonò da, arát tam párigán yù narákè nga akkuád da, gapu ta ánnna na ittam ni Namaro, nga meyárik ta isingan nga mamanawák sù ira tatolay ta dabbuno.

16 Ta ipakánnámmu tam sù ira tatolay yù bilin ni Namarò, nga meyannung ta kesipà tam sù áttolé na nga awán ta áddè na. Á sikayu, nu uputan naw yù ángnguruk naw kâ Namarò, á sangaw nu duttál yù pamanunnù ni Apu Kesu Kiristu, magayáykà gapu ta ammù ta napiá yù pabbalinán nayù bannák ku nga mangipakánnámmu nikayu sù bilin ni Namarò.

17 Á yù panguruk naw kâ Namarò, yáyù meyárik ta pakimore nayù ira ngaw pári ta pangiyátáng da ta ayám kâ Namarò. Á magayáykà, mássiki nu matayà sangaw ánnna mebubbù yù dágà nga kun na melannà sù meyátáng\* nga panguruk naw, ta mepagayáykà laguk nikayu.

18 Á sikayu, magayáyâ kayu gapay nakuan nga mepagayáyâ nikán.

*Doban ni Pablo di Timotio kâ Epaprudito*

\* 2:17 Sù ngaw pangiyátáng nayù ira Kudio ta ayám kâ Apu Namarò, nelannà sù ira káruán nga neyátáng yù danum ánnna binaráyáng nga inibubbù da ta utun na.

<sup>19</sup> Á ajjan yù iddanamák ku, nu yáyù ure ni Apu Kesu, ta dobak ku sangaw si Timotio, tapé en na kayu tullúnán. Ta ikáyâ ku nga marámak nu kunnasi kayu, tapé mapálappawán yù nonò ku.

<sup>20</sup> Á awán ta kabbuluk ku nga kuruk nga mapattú nga mangabbák nikayu nu ari lâ si Timotio.

<sup>21</sup> Á yù ira ngámin nga káruán, yáyù lâ alerad da yù meyannung lâ ta baggi ra, nga ari yù meyannung kâ Apu Kesu Kiristu.

<sup>22</sup> Ngam si Timotio, á ammu nawin gemma ta napiá yù nonò na, gapu ta kunnay kami ta matáma nga nangipakánnámmu sù napiá nga dámak.

<sup>23</sup> Á yáyù nga ikáyâ ku nga doban ta umay ta gián naw, sangaw nu mánnámmuák ku yù mesímmu nikán saw.

<sup>24</sup> Á ikatalà ku kâ Apu ta sikán gapay sangaw yù umay ta gián naw.

<sup>25</sup> Á ninonò ku ta mawák ku galâ nga palabbetan nikayu kunangane si Epaprudito nga wagi tam. Á napiá ta nabbilinán naw, á jinok naw saw giák ku ta mangabbák nikán ta ngámin nga awágak ku. Á aggina gapay yù kabbuluk ku nga mattarabáku sù ipakuá ni Apu nikán.

<sup>26</sup> Ngam palabbetak ku lábbi nikayu, ta maraddam nikayu ánnna maburung, gapu ta narámak naw yù katakì na.

<sup>27</sup> Á kuruk nga natakì nga nagisassay natay. Á inikállà na kami ni Namarò, ta pinammapí na, marakè mappanà nakuan yù daddam ku.

<sup>28</sup> Á yáyù nga karagaták ku nga panolian ta gián naw, tapè magayáyâ kayu nga makasin-gan kuna. Á sikán, mapálappawán gapay yù nonò ku.

<sup>29</sup> Magayáyâ kayu laguk nga mamaddulò kuna, ta aggina yù wagi tam megapu sù ángngikatalà tam kâ Apu. Á pakimorayán naw yù ira ngámin nga tatolay nga kunnay kâ Epaprudito, nga napiá yù nonò da ánnna ággangnguá ra.

<sup>30</sup> Á ari mabbábâng si Epaprudito nga mangabbák nikán, gapu ta awán garè ta awayyá naw nga umay mangabbák nikán. Á kuruk nga nagisassay natay megapu ta pamalurò na sù inipakuá ni Apu Kesu Kiristu kuna ta pangabbák na nikán.

### 3

#### *Mangikatalà ittam kâ Apu Kesu tapè Mesipà ittam kâ Namarò*

<sup>1</sup> Á wáwwagì, kagiak ku paga nikayu ta magayáyâ kayu gapu ta nepattatádday kayu kâ Apu Kesu. Á aringà malurâ nga mangitotoli sù initúrâ ku ngaw nikayu, tapé dán nga naparán kayu.

<sup>2</sup> Mappalán kayu laguk, marakè melogò kayu sù ira massirisiri, ta kagumánad da kayu nakuan nga makkugi nga kunnay ta kustombare na Kudio, ta kagiad da ta sinniál nayù ira tatole ni Namarò. Arán naw ira kurukurugan.

<sup>3</sup> Ta ari yù kakugì na tolay yù kuruk nga sinniál ta tole ni Namarò, nu ari galâ yù keggá nayù Ikararuá ni Namarò kuna. Á kuruk nga tatole na ittam ni Namarò nga makimoray kuna megapu sù ángngabbák nayù Ikararuá na, sittam nga magayáyâ megapu sù ketádde tam kâ Apu Kesu Kiristu. Ta si Apu Kesu lâ yù ikatalà tam, nga paggapuán nayù kesipà tam kâ Namarò, nga ari megapu sù kakugì nayù baggi na tolay onu yù akkuán na.

<sup>4</sup> Á ta ángngarigán nu eggá yù awayyá na tolay nga ikatalà yù ággíán na ánnna kingnguá na, á ajjan laguk yù awayyâ nakuan. Awán ta tolay nga makáawayyâ nakuan nga makkagi ta alawatan ni Namarò megapu sù ággíán na ánnna kingnguá na, nu ari galâ sikán. Á nepatalugáring nikán, ta napiá yù ággíák ku ánnè sù ira ngámin nga mapeggung.

<sup>5</sup> Kebrungà gemma, ta Kebru<sup>\*</sup> yù ira darakal ku, nga ginaká ni Kákay Benjamin nga anâ ni Kákay Israel. Á nakugíkakin sù mekawalu nga ággò áddè ta keyanâ ku. Á ta meyannung sù tunung ni Moyses, pinalurò ku ngámin, ta nepattatádday sù ira Parisio, nga napiá yù ánnuppál da sù inituddu ni Moyses.

<sup>6</sup> Á gapu ta naláppakà nga manuppál sù rilision na Kudio, á jinigirigâ ku yù ira manguruk kâ Apu Kesu, gapu ta arád da tuttulan yù kustombare mi nga Kudio. Á sinuppál ku yù ngámin nga taddán nayù tunung ni Moyses, á awán ta kábuluk ku nga Kudio nga mamaliwâ nikán.

\* 3:5 Kebru di Kákay Israel ánnna yù ira mapulu duá nga ánnâ na nga lálláki, ánnna yù ira ngámin nga ginaká ra. Á mangrgágán ira gapay ta Kudio megapu kâ Juda, nga anâ ni Israel. Á si Juda yù naggaká kâ Patul Dabid, á pappasá na aru nga dagun, si Apu Kesu Kiristu gapay yù ginaká ni Juda.

<sup>7</sup> Ngam kunangane, gapu ta pangikatalà ku kâ Apu Kesu Kiristu, ibiláng kin ta awán ta serbi nayù ira kustombare nayù rilision na Kudio nga sinuppál ku ngaw, nga kinagi ngaw ta kapiánák ku.

<sup>8</sup> Ta awán ta kárik piá ni Apu Kesu Kiristu nga Yápù! Á yù kustombare nga sinuppál ku ngaw, ibiláng kin ta kunnay ta basúrá nga netabbà, á nilikuránák kin, tapè kánnámuák ku yù ngámin nga meyannung kâ Apu Kesu Kiristu nga Yápù. Á pinaguráyák ku ngámin yù pinalurò ku ngaw, tapè makiyápungâ kâ Apu Kesu Kiristu, áんな mepattatáddayà kuna.

<sup>9</sup> Á gapu ta netáddayà kâ Apu Kesu, ibiláng ni Namarò ta kuruk nga napiángâ áんな matunungâ, nga ari megapu ta panuppál ku sù tunung ni Moyses, nu ari galá megapu ta pangikatalà ku kâ Apu Kesu Kiristu. Ta si Namarò yù kuruk nga napiá áんな matunung, á pabbalinan na ittam ta napiá áんな matunung megapu ta pangikatalà tam kâ Apu Kesu Kiristu.

<sup>10</sup> Á yá lâ karagaták ku, ta mánnámuák ku si Apu Kesu Kiristu, áんな maparubák ku yù pakáwayyâ na nga mepasingan ta paginnanole na. Á karagaták ku ta attamák ku yù jígâ ku nga kunnay ta pagattam na ta jígâ, tapè tumulukâ kâ Namarò nga kunnay kuna, mássiki nu matayâ gapay nakuan ta kunnay ta pate na.

<sup>11</sup> Á yáyù iékâyâ ku, tapè paginnanolayan nangâ ni Namarò sangaw gapay, á mesipakâ kuna ta áddè ta áddè.

#### *Yù Napiá nga Nonò nga Párigát tam*

<sup>12</sup> Á arák ku gemma kagian ta kánnámuák ku ngámin yù meyannung kâ Apu Kesu, á arák ku kagian ta awán ta pakaliwaták ku. Ngam malláppakâ nga mamafurò sù ipakuá ni Apu Kesu nikán, ta yáyù nga inipagágál ni Apu Kesu Kiristu nikán, tapè kukuá nangâ.

<sup>13</sup> Á wáwwagi, ammù gemma ta arák ku paga pinalurò ngámin yù ipakuá na nikán. Ngam arák kin nonotan yù napasángin, ta ipé lâ yù urâ ku nga mamafurò ta ngámin nga ipakuá na lâ paga nikán.

<sup>14</sup> Á uputak ku nga balinan yù ngámin nga ituddu na, tapè málâ ku yù bálâ ku nga iyawâ ni Namarò nikán, megapu sù pangikatalà ku kâ Apu Kesu Kiristu. Ta yáyù gemma yù inipagágál ni Namarò nikán. Á yawe yù bálâ ku, ta mepattolayà nga mesipâ kâ Apu Kesu Kiristu ta lángi ta áddè ta áddè.

<sup>15</sup> Á wáwwagi, napiá nu kunnian yù nonotat tam ngámin, sittam nga similluá yù ángnguruk na. Á nu aijan nikayu yù tolay nga tanakuán yù ánonò na, á si Namarò yù mangipakánnámu sù kuruk kuna.

<sup>16</sup> Á yawe laguk yù akkuát tam. Ari ittam malurâ nga tumuttuttul sù kuruk nga netuddu nittam.

<sup>17</sup> Á wáwwagi, uputan naw kami nga párigán áんな yù ira nga masingan naw nga napiá yù ággangnguá ra nga kunnay ta inipasingam mi ngaw nikayu.

<sup>18</sup> Ta initotoli nga kinagi nikayu ta mappalán kayu, ta aru garè yù ira tatolay nga makkagi ta tatole ni Apu Kesu ira, ngam ipasingad da ta malussaw ira kâ Apu Kesu Kiristu áんな iluddè da yù pate na ta kurù, megapu sù narákè nga ággangnguá ra. Á makakulekâ ta pakanonò ku nira.

<sup>19</sup> Ta yù pangukum ni Namarò yù pappángetád da, gapu ta pakiyápuád da yù karagatán nayù baggi ra. Á yù narákè nga ipappasirád da nakuan, yáyù ipappeddaráyo ra. Á tágngagad da lâ yù aijan ta dabbuno.

<sup>20</sup> Ngam sittam nga mangikatalà kâ Apu Kesu Kiristu, aijan yù paggianát tam ta lángi ta gíán ni Namarò. Á iddi-iddagát tam si Apu Kesu, nga Yápu tam nga maggapu ta lángi nga umay mangiyígù nittam.

<sup>21</sup> Á panoli na ta dabbuno, ulian na yù ira baggi tam nga makapi áんな matay, tapè kunnay ira sù baggi na nga maddalingárang áんな ari matay. Á palurotan na yaw megapu sù makapállâ nga pakáwayyâ na nga mamatalù ta ngámin nga aijan, áんな mammaguray nira.

## 4

#### *Yù Panabarang ni Pablo sù ira Manguruk kâ Apu Kesu*

<sup>1</sup> Á wáwwagi, gapu ta aijan yù iddanamát tam kâ Apu Kesu, ari ittam laguk mabbábáng, tapè mapasigaggâ yù ángnguruk tam kuna. Á sikayu yù iddukak ku, á nepallâ yù daddam ku ta pakkaragâ ku nga masingan takayu. Ta sikayu yù ipagayáyâ ku megapu sù pangikatalà naw kâ Apu Kesu, á kunnay kayu ta bálâ ku megapu sù bannák na baggi ta pangituddù nikayu.

<sup>2</sup> Á sikayu, Eyodia kâ Sintiki, ikomâ nikayu bì ta makkápiá kayu ánná pattatáddayan naw yù nonò naw, gapu ta mawwagi kayu gemma megapu sù ángnguruk naw kâ Apu.

<sup>3</sup> Á sikaw gapay nga kuruk nga kopuk ku, abbágám mu bì yù ira duá nga bábbay, tapè makkápiá ira. Nepattarabáku ira kári Kiliminte ánná yù ira káruán nga kábuluk ku nga nangabbák nikán ta pangipakánnámmu mi sù napiá nga dámak nga meyannung kâ Apu Kesu. Á nelistá yù ngágad da sù libru ni Namarò, nga naketúratán nayù ira ngámin nga iniddán na ta mannanáyun nga inángá nga awán ta áddé na.

<sup>4</sup> Á magayáyâ kayu laguk megapu ta keppattatádde naw kâ Apu, sikayu nga manguruk kâ Apu. Á yáyù pidduák ku má nga kagian nikayu ta magayáyâ kayu.

<sup>5</sup> Á napiá nu masippà kayu nga mangikállà ta ngámin nga tatolay, gapu ta manoli sangaw yù Yápu tam.

<sup>6</sup> Á awán bulubugá ta ikaburung naw nuan, mássiki nu anni yù mesimmu. Ipakimállà naw kâ Namarò yù ngámin nga meyannung nikayu ánná yù máwák naw. Á kagian naw pagay kâ Namarò yù pagayáyâ naw ta ángngabbák na nikayu, ta yáyù ábbalabálà naw kuna.

<sup>7</sup> Á pagimmatman ni Namarò yù nonò naw megapu ta keppattatádde naw kâ Apu Kesu Kiristu, mássiki nu ari mánnámmuán yù ámmagimammà na, tapè mabannáyán yù nonò naw, ánná ari kayu maburung, maguray lâ yù mesimmu.

<sup>8</sup> Á wáwwagi, yawe yù maporián nga itabarang ku nikayu. Nonopan naw lâ yù napiá ánná maráyaw, nga kuruk ánná matunung, nga mekállà, nga naggapu ta napiá nga nonò. Á nonopan naw ánná ipatattam naw laguk ta nonò naw ngámin danniaw nga kapiánán, nga mepángngà nittam nga tatole ni Namarò.

<sup>9</sup> Á ngámin yù ginigiámmu naw nikán, nga inituddù nikayu, ánná yù naginná naw nga initaddák ku, ánná nasingan naw nga kingnguâ, yáyù laguk uputan naw nga párigán. Á mepulupulù nikayu laguk si Namarò, nga mamagimammà nittam.

### *Yù Pabbalabálà ni Pablo sù ira Mangabbák kuna*

<sup>10</sup> Á nepallà yù pagayáyâ ku, á dayáwak ku si Namarò, megapu sù initubbuk naw nikán. Ta mássiki nu nabayák nga arán nawà inabbágán, á kunangane inipasingan naw mángin yù pangikállà naw nikán. Á ammù ta arán nawà náttamán, ngam iniddagán naw lâ yù awayyá naw nga mangabbák nikán.

<sup>11</sup> Á arák ku kagian ta ajian yù máwák ku. Ta mapenámà nga mangikatalà kâ Apu, maguray lâ yù áaggiák ku.

<sup>12</sup> Á naparubák ku yù áaggián na pobare, ánná naparubák ku gapay yù áaggián na maríku. Á maguray lâ yù áaggiák ku, napenámà lâ sù ngámin, mássiki nu mabattugá onu mabisinà, mássiki nu aru yù kukuá onu nakúráng.

<sup>13</sup> Á ajian yù awayyá nga mamalurò sù ngámin nga ipakuá ni Namarò nikán, gapu ta mepulù nikán si Apu Kesu Kiristu nga mangabbák ánná mamassikan nikán.

<sup>14</sup> Á kuruk nga napiá yù pangikállà naw nikán, ta inabbágán nawà ta pajjigâ ku.

<sup>15</sup> Á sikayu nga taga Pilippay, ammu naw gemma ta sikayu yù olu nga sinudduák ku sù pamegapù nga mangipakánnámmu sù napiá nga dámak sù purubinsia naw nga Masidonia.\* Á nakakák-abbák ittam, ta sikayu lâ yù langiyawâ nikán sù máwák ku ta pánò ta Masidonia.

<sup>16</sup> Á paggiák ku paga ta ili na Tessalonika, sikayu lâ yù nangabbák nikán, ta sinubbutubburán nawà ta máwák ku.

<sup>17</sup> Á magayáyákà gemma ta pakálawâ ku sù initubbuk naw. Ngam yù kuruk nga ipagayáyâ ku yù báliá naw nga iyawâ ni Namarò nikayu megapu sù pangikállà naw nikán.

<sup>18</sup> Á kustu ngin yù ajian nikán, nga makatò ta ngámin nga máwák ku ánná masobará, gapu ta inalawâ kin yù initubbuk naw nga iniyángé ni Epaprudito nikán. Á kunnay ta bábbanguk nga iniyátang naw kâ Namarò yù keyarigán nayù iniyawâ naw nikán, á yáyù nga magayáyâ gapay si Namarò.

<sup>19</sup> Á si Namarò, nga makákkua ta ngámin nga napiá ánná nakástá, aggina yù mangiyawâ nikayu sù ngámin nga máwák naw megapu sù keppattatádde naw kâ Apu Kesu Kiristu.

<sup>20</sup> Á meparáyw si Namarò nga Yáma tam ta áddè ta áddè. Ammán!

### *Yù Maporián nga Kinagi ni Pablo*

<sup>21</sup> Á sikami ngámin sù ira kábuluk ku, nonotam mi sikayu ngámin nga wáwwagi mi nga nepattatáddy kâ Apu Kesu Kiristu.

\* <sup>4:15</sup> Kingnguá 16:12-40. Ubobugan ni Pablo yù olu nga ánge na ta Masidonia.

22 Á yù ira ngámin nga manguruk nga aijan saw ili na Roma, nepatalugáring sù ira nga masserbi sù palásiu ni Patul Sisar, nonopad da kayu gapay, nu kunnasi kayu.

23 Á parè bì ta iddi-iddukan na kayu ngámin ni Apu Kesu Kiristu nga Yápu tam. Áddè nen. Ammán.

## Yù Túrâ ni Pablo sù ira Manguruk nga taga Kolosi

*Yù Meyannung sawe Túrâ*

Dakal yù ili na Kolosi, nga ajjan sù purubinsia na Asia Minor. Á arayyu yù ili sù ili na Epeso, nga maddaggun duá batu ta límápulu nga kilometro yù kárayyu na. Ari nakáddè si Pablo ta ili na Kolosi. Ngam narámak ni Pablo yù napasigaggà nga ángngikatalà nayù ira tatolay nga naggián ta Kolosi, ta naginná ra yù bilin ni Namarò megapu sù pangilayalayâ ni Epapro. Aggina yù taga Kolosi, nga kabbulun ni Pablo ta keggá na ta ábbalurán, ta patturâ na sawe (1:7; 4:12-13; Pilemon 23).

Á yù ira káruán nga naggián ta Kolosi, nga mangikatalà kâ Apu Kesu, ari ira Kudio (1:27), ánnna makkakerumá yù kustumbare ra ánnna yù nonò da nga meyannung sù pakimore ra kâ Namarò. Kagiad da ta máwálk da makimoray sù ira daroban ni Namarò nga ari masingan. Á yáyù nga initúrâ ni Pablo yawe, tapè ipakánnámmu na nira si Apu Kesu Kiristu, nga mammaguray ta ngámin, tapè aggina lâ yù pakimorayád da. Á initúrâ ni Pablo yù kansion nga meyannung kâ Apu Kesu (1:15-20).

*Yù Mayán nayù Túrâ*

**Yù Pamegapu nayù Túrâ (1:1-2)**

**Yù Pabbalabálà di Pablo sù Pakimállà da kâ Namarò (1:3-8)**

**Yù Mepángngà nge Akkuán nayù ira Mangikatalà kâ Apu (1:9-14)**

**Si Apu Kesu Kiristu yù Kotunán (1:15-23)**

**Yù Passerbi ni Pablo sù ira Mangikatalà kâ Apu Kesu (1:24-2:5)**

**Si Apu Kesu yù Paggapuán nayu Pakáwayá tam (2:6-19)**

**Yù Kebalinán nayù Bagu nga Áttole tam nga Naggapu kâ Apu Kesu (2:20-4:6)**

**Pangiyabbû ni Pablo nu Kunnasi yù ira Kákkopun na (4:7-18)**

<sup>1</sup> Sikán si Pablo, nga minángngilayalayâ nga jinok ni Apu Kesu Kiristu megapu sù ure ni Namarò. Á si Timotio nga wagi tam yù mepulù nikán.

<sup>2</sup> Á mattúrâ kami nikayu nga tatole ni Namarò nga taga Kolosi, nga wáwwagi mi nga napasigaggà yù ángngikatalà da kâ Apu Kesu.

Á yawe ipakimállà mi, ta napiá lâ yù ággián naw ánnna yù gawagawáyán naw megapu sù allà na nikayu ni Namarò nga Yáma tam.

*Yù Pabbalabálà di Pablo sù Pakimállà da kâ Namarò*

<sup>3</sup> Á ta ngámin nga pakimállà mi megapu nikayu, sigídá kami mabbalabálà kâ Namarò, nga Yáma ni Apu Kesu Kiristu, nga Yápu tam,

<sup>4</sup> gapu ta narámak mi ta napasigaggà yù ángngikatalà naw kâ Apu Kesu Kiristu ánnna napiá yù ángngiddù naw sù ira ngámin nga kábultur tam nga manguruk kâ Namarò.

<sup>5</sup> Á napasigaggà yù ángnguruk naw megapu sù iddanamán naw, nga pinarán ni Namarò ta lángi megapu nikayu. Ta yáyù iddanamán naw áddè ngaw pakaginná naw sù kuruk nga bilin ni Namarò, nga napiá nga dámak nga meyannung kâ Apu Kesu.

<sup>6</sup> Á napiá yù pabbalínán nayù napiá nga dámak, ta massamâ ta tangapáddabbunán, á magaru yù ira manguruk kâ Apu Kesu. Á noli yù nonò da ta napiá nga nonò, ánnna ikákkállà da yù ira kábultur da. Á sikayu, kunnian gapay nikayu, ta napiá gapay yù akka-akkuán naw áddè sù pamegapu naw nga makaginná sù bilin ni Namarò ánnna nánnámmuán naw ánnna natagenà naw yù allà na ánnna ángngabbák na.

<sup>7</sup> Ta si Epapro gemma yù nangipakánnámmu nikayu, nga kabbulum mi nga iddukam mi. Aggina yù pangikatalakán ni Apu Kesu Kiristu, nga masserbi kuna, á jinok mi ngaw nga pannakabaggi mi nga umay mangituddu nikayu.

<sup>8</sup> Á iniparámak na nikami yù pakkaká-iddù naw nga naggapu galâ sù Mangilin nga Ikbaruá.

<sup>9</sup> Á áddè ngaw pakarámak mi sù ángnguruk naw, ari kami malurâ nga makimállà kâ Namarò megapu nikayu. Á yawe ipakimállà mi, ta ipakánnámmu na nikayu nayù Ikbaruá ni Namarò yù meyannung kâ Namarò ánnna yù sírik na, tapè kánnámmuán naw yù napiá nga ipakuá na nikayu ánnna yù ngámin nga ure na.

<sup>10</sup> Á kunnian, mapalurò naw yù ngámin nga mepángngà sù ira nga mangikatalà kâ Apu Kesu, ánnna magayáyâ si Apu megapu nikayu. Á mapiá laguk yù ngámin nga akka-akkuán naw ánnna mangáppípiá yù ákkiyápu naw kâ Namarò.

<sup>11</sup> Á yawe gapay ipakimállà mi, ta pasikanan na kayu ni Namarò megapu sù pakáwayyá na, ánnna abbágán na kayu megapu sù ámmagaddátu na nga makapállà, tapè meyattam naw yù ngámin, maguray lâ yù mesimmu nikayu, á mapasigaggà yù ángngikatalà naw kuna, ánnna magayáyâ kayu gapay.

<sup>12</sup> Á parè bì ta maddáyaw kayu laguk kâ Namarò nga Yáma tam, megapu sù panullà na nikayu ta tatole na, tapè kesipatán naw gapay yù iniparán ni Namarò sù pammagurayán na nga iyawâ na nittam nga tatole na, sittam nga nanawagán yù nonò na.

<sup>13</sup> Ta inillili na ittamin ni Namarò sù pammagure ni Satanas nga mammaguray sù ira nga kun na kallà yù nonò da. Á iniyángé ni Namarò ittam kâ Apu Kesu Kiristu, nga Anâ na nga iddukan na, tapè aggina yù mammaguray nittam.

<sup>14</sup> Á megapu sù pagikáru ni Apu Kesu Kiristu ta liwiliwâ tam, ari ittamin mapagikáru, ta napalubbâng ittamin, gapu ta pinakomá na ittam ni Namarò.

### *Si Apu Kesu Kiristu yù Kotunán*

<sup>15</sup> Si Apu Kesu Kiristu yù kagittá ánnna kágappà ni Namarò, nga paninganát tam kâ Namarò nga ari masingan.

Á si Apu Kesu yù Anâ ni Namarò, nga Kaká tam ngámin, nga kapiánán na ngámin.

<sup>16</sup> Á pinarò ni Apu Kesu yù ngámin nga naparò, yù ngámin nga ajjan ta lángì ánnna dabbuno, yù ngámin nga masingan

ánnna yù ngámin nga ari masingan.

### *Pinarò na yù ira daroban ni Namarò*

ánnna yù ira makkakerumá nga mamagaddátu ánnna makáwayyá ta lángì ánnna dabbuno.

Á ngámin danniaw ira, pinarò na ira ni Apu Kesu Kiristu.

Á naparò ira ngámin, tapè si Apu Kesu Kiristu yù passerbiád da.

<sup>17</sup> Dán nga ajjanin si Apu Kesu Kiristu nga Kotunán, gári sù ngaw awán paga ta naparò.

Á si Apu Kesu yù manangngal ta ngámin, tapè maggián lâ yù ngámin nga ari mewarawarâ.

<sup>18</sup> Á aggina yù mammaguray nittam, nga meyárik ta ulu tam, ta sittam nga mangikatalà kuna yù meyárik ta baggi na.

Á aggina yù paggapuán nayù bagu nga áttolé tam, ta aggina yù napolu nga naginnanolay nga ari ngin matay.

Á aggina yù kotunán ta ngámin, nga mammaguray ta ngámin.

<sup>19</sup> Á ayatán si Namarò, nga maggián sù baggi nayù Anâ na. Kuruk nga naggítta ira nga matáma.

<sup>20</sup> Á ayatán si Namarò gapay, ta si Apu Kesu yù mamakkápiá nittam ngámin kâ Namarò, megapu sù ketapil na ta kurù,

ánnna yù keyátang nayù dágâ na, nga mangari sù liwiliwâ tam ngámin. Yáyù gapu na nga ajjan yù awayyá tam ngámin nga makipakomá kâ Namarò, tapè mapattoli ittam kuna,

ánnna makkápiá yù ngámin nga pinarò na ta dabbuno ánnna lángì.

<sup>21</sup> Á sikayu gapay, sù ngaw, kunnay ta ikalusso naw si Namarò, megapu sù narákè nga nonò naw ánnna yù narákè nga ággangnguá naw.

<sup>22</sup> Ngam kunangane, nakkápiá kayin kâ Namarò, megapu sù ketapil nayù baggi nayù Anâ na ta kurù, nga pagikáru na ta liwiliwâ naw, tapè alawatan na kayu ni Namarò ta arubâng na sangaw, nga napiá nga tatole na nga mangilin, nga ari mappasirán gapu ta náringin yù liwiliwâ naw, ánnna awán bulubugá ta ípapaliwâ na nikayu.

<sup>23</sup> Ngam máwák nga uputat tam yù panguruk tam sù napiá nga dámak, tapè mapasigaggà yù ángngikatalà tam kâ Apu Kesu. Ari ittam laguk mekáttuay nga mapatuttul ta tanakuán nga ari kuruk. Ta awán ta tanakuán nga iddanamát tam, nu ari lâ yù napiá nga dámak, nga naginná naw gapay, nga nelayalayâ ta ngámin nga tatolay ta dabbuno. Á sikán gapay yù masserbi kâ Apu, nga mangilayalayâ sù bilin na.

<sup>24</sup> Á magayáyákà nga magattam ta jigâ ku ta kebáluk ku kunangane, gapu ta pangilayalayâ ku nikayu nga ari Kudio, tapè mapasigaggâ yù ángngikatalà naw. Á uputak ku nga attamán yù jigâ ku, tapè palurotak ku yù ngámin nga kinagi ni Apu Kesu Kiristu nga meyannung sù pagattam ku ta jigâ megapu sù ira ngámin nga mangikatalà kuna, nga meyárik ta baggi na.

<sup>25</sup> Ta sinullà nangà ni Namarò ta umayà manaron sù ira ngámin nga manguruk kuna, nepatalugáring nikayu nga ari Kudio, tapè ipakánnámmu nikayu yù ngámin nga bilin na.

<sup>26</sup> Á áddè ngaw gári, inilímak ni Namarò sù ira ngámin nga tatolay yù bilin na. Á kunangane inipalappâ na yù bilin na sù ira tatole na, aggira ngámin nga mangikatalà kuna.

<sup>27</sup> Ta ikáyâ ni Namarò nga ipakánnámmu sù ira tatole na yù inilímak na ngaw, nga kuruk nga makapállâ. Á sikayu gapay nga ari Kudio yù pangipakánnámmuán na. Á yawe yù makapállâ nga ipakánnámmu na, ta maggián si Apu Kesu Kiristu nikayu nga mangikatalà kuna. Á aggina yù paggapuán nayù iddanamán naw, nga kesipà naw kâ Namarò ta lángì ta áddè ta áddè.

<sup>28</sup> Á sikami nga mangilayalayâ, ilayalayâ mi lâ si Apu Kesu Kiristu. Á ituddu mi sù ira ngámin nga tatolay yù ngámin nga ammu mi nga meyannung kâ Apu Kesu Kiristu, tapè manguruk ira ánnna pareku nga napiá ira ta ánnninganán ni Namarò, nga napasigaggâ yù ángngikatalà da ánnna ángnguruk da kâ Apu Kesu.

<sup>29</sup> Á yáyù ipamannák ku ta baggi, tapè palurotak ku yù ipakuá ni Namarò nikán. Á abbágán nangâ ni Apu Kesu Kiristu, tapè mopù ku yù pangilayalayâ ku kuna, megapu galâ ta pakáwayyâ na.

## 2

### *Yù Burung ni Pablo Marakè Melogò yù ira taga Kolosi*

<sup>1</sup> Á ikáyâ ku nga ipakánnámmu yù burung ku nikayu nga taga Kolosi ánnna yù ira gapay nga taga Lodisia ánnna yù ira káruán nga kunnay nikayu nga ari paga nakasingan nikán. Á mappanâ yù ákkimállâ ku kâ Namarò megapu nikayu ngámin.

<sup>2</sup> Ta ipakimállâ ku kâ Apu ta mabannáyán yù nonò naw, á kuruk nga magayáyâ kayu nga mattatáddyâ ta kunnay sù ira mawwawági, megapu sù pakkaká-iddù naw. Á kunnian, ari kayu mabbábâng, gapu ta kánnámmuán naw ta napiá yù ngámin nga arán na ngaw inipalappâ ni Namarò nga meyannung kâ Apu Kesu Kiristu.

<sup>3</sup> Á si Apu Kesu Kiristu lâ yù makáwayyâ nga mangipakánnámmu sù napiá nga sírik ni Namarò ánnna yù kánninán nayù bilin na.

<sup>4</sup> Á kinagi yawe nikayu, tapè ari kayu melogò sù ira umay mangagumán nikayu megapu sù mámmi nga ubobuk da.

<sup>5</sup> Á mássiki nu awánâ nikayu, ngam kun na aijanâ nikayu, ta nononopat takayu. Á ayatánâ megapu sù napiá nga áwwawági naw ánnna yù napasigaggâ nga ángngikatalà naw kâ Apu Kesu Kiristu.

### *Si Apu Kesu yù Paggapuán nayù Pakáwayyâ tam*

<sup>6</sup> Á gapu ta pakiyápuát tam si Apu Kesu Kiristu, nga mangiyígù nittam, á máwák tam laguk nga tumulù ánnna mangikatalà kuna, ta aggina yù mangabbák nittam, tapè matuppál tam yù ipakuá na nittam ta kággággaw.

<sup>7</sup> Á yù ángnguruk tam kâ Apu, kunnay nakuan ta káyu nga nakapaggamù ta napiá, ta natudduán ittam sù kuruk nga bilin na. Tángngagat tam laguk yù netuddu nittam, tapè tulluá ittam nga mangáppípiá, nga napasigaggâ yù ángngikatalà tam kuna. Á merallà gapay laguk yù ábbabalála tam kâ Namarò, megapu sù allâ na nittam.

<sup>8</sup> Mappalán kayu laguk, tapè awán ta mangilogò nikayu. Ta aijan garè yù ira umay mangituddu nikayu, á ilogò da kayu nakuan megapu sù monak nga ággubobuk da. Ngam awán ta serbi na, ta ituddu ra lâ yù dán nga kustombare nayù ira ngaw naggaká nira, ánnna yù naggapu galâ sù nonò da nga meyannung sù rilisiod da. Á ari gemma kuruk yù ituddu ra, ta naggapu sù ira narákè nga ari masingan, nga ari naggapu kâ Apu Kesu Kiristu.

### *Si Apu Kesu yù Kun na Ulu tam*

<sup>9</sup> Á si Apu Kesu, mássiki nu nabbáli ta tolay, eggâ kuna yù ngámin nga nonò ni Namarò ánnna yù pakáwayyâ na, ta mepaggián si Namarò ta baggi ni Apu Kesu Kiristu.

<sup>10</sup> Á yáyù nga si Apu Kesu Kiristu yù kotunán nga makáwayyâ, nga mammaguray sù ira ngámin nga káruán nga mammaguray ánnna makáwayyâ, nga masingan ánnna ari masingan. Á sittam nga manguruk kâ Apu Kesu, awán ta tanakuán nga máwák tam, gapu ta netáddyâ ittam kâ Apu ánnna mesipà ittam kuna.

<sup>11</sup> Á addè ngaw gári, nakugì yù ira Kudio, nga panákkilálán ta aggira yù tatole ni Namarò. Ngam kunangane, mepasingan ta sittam nga netádday kâ Apu Kesu Kiristu yù tatole ni Namarò, nga ari megapu sù akkuán na tolay ta baggi na, nu ari galâ gapu ta inirián na nittam ni Apu Kesu Kiristu yù liwiliwâ tam ánná yù narákè nga nonopat tam ánná karagatá tam, megapu sù ketádde tam kuna.

<sup>12</sup> Á ta kariġù tam, á kunnay ittam ta natay, nga nepappetanam kâ Apu Kesu ta pate na. Á got tam nga maggagu ta danum, kunnay ta nepagínnanolay ittam kâ Apu Kesu, á bagu yù áttole tam megapu ta pangikatalà tam sù pakáwayyá ni Namarò, si Namarò nga namagínnanolay kâ Apu Kesu.

<sup>13</sup> Á sikayu nga ari Kudio, kunnay ta natay kayu ngaw, gapu ta nalliwâ kayu ánná awán bulubugá ta ammu naw nga meyannung sù napiá nga initabbá ni Namarò. Ngam kunangane, á kunnay ta nepagínnanolay kayu kâ Apu Kesu Kiristu, megapu sù pangikatalà naw kuna. Á inisipá na kayu ni Namarò sù áttole ni Apu Kesu Kiristu, ánná piñakomá na kayu ta ngámin nga liwiliwâ naw.

<sup>14</sup> Á lage na pate ni Apu Kesu, á mepángngà ta pagikaruan na ittam nakuan ni Namarò, gapu ta nakaliwatát tam yù tunung na nga inipetúrâ na kâ Moyses. Ngam arán na ittam pagikaruan ni Namarò, gapu ta inirián na yù pakáwayyá nayù tunung, nga kunnay ta inipatá na ira ta kurù, su ketapil ni Apu Kesu Kiristu megapu nittam. Ta nagikáru si Apu Kesu ta liwiliwâ tam megapu sù pate na ta kurù.

<sup>15</sup> Á ta pate na, nangappù si Apu Kesu Kiristu kári Satanas ánná yù ira narákè nga kábulun na nga anitu ánná yù ira áppè mamagaddátu nga ari masingan, á inirián ni Apu Kesu yù pakáwayyá ra. Á ta pagínnanole ni Apu Kesu, nepasingan yù pangappù na nira ta ánnunganán na ngámin nga ajjan.

<sup>16</sup> Á sikayu nga kopuk ku nga mangikatalà kâ Apu Kesu Kiristu, arán naw laguk kurugan yù kagian nayù ira nga mamatuttul nikayu sù kustombare ra. Ta kagumánañ da kayu nakuan ta kanniawan naw gapay yù kanniawad da nga kanan ánná inuman. Á kagiad da ta máwák naw nga ngilinan yù piéstá ra ánná yù kustombare ra nga meyannung sù lattuák na bulán ánná yù meyannung sù ággaw nga ággibannák da.

<sup>17</sup> Á ngámin danniaw nga kustombare nga netuddu ngaw, kunnay ira ta alinu, nga keyarigán nayù iddagád da nga umay. Á minayin si Apu Kesu Kiristu, nga namaluroò ta ngámin.

<sup>18</sup> Á yáyù ari kayu laguk manguruk sù ira áppè pípiá. Ta kagumánañ da kayu nakuan ta mappagukák kayu ánná makimoray kayu sù ira daroban ni Namarò. Á kagiad da ta aggira lápay yù makánnámmu, gapu ta ajjan kanu yù nappasingan nira. Ngam arán naw ira kurugan, ta mappeddaráyaw ira, á ari kuruk yù ituddu ra, nga naggapu galâ sù motun nga nonò da.

<sup>19</sup> Arán naw ira tuttulan, ta arád da gemma tuttulan si Apu Kesu, nga tuttulat tam. Ta si Apu Kesu yù mammaguray nittam, nga meyárik ta ulu tam, á meyárik ittam ta baggi na. Á gapu ta netádday ittam kuna, napiá yù ákkiwagi tam, ánná makkaká-iddù ittam, tapé mangáppípiá ittam nga tulluâ megapu sù ure ni Namarò.

### *Yù Kebalinán nayù Bagu nga Áttole tam nga Naggapu kâ Apu Kesu*

<sup>20</sup> Á sittam nga manguruk kâ Apu Kesu Kiristu, kunnay ittam ta nepulù kuna ta ánge na sù pate na ta kurù. Á yáyù nga arát tamin kurugan yù dán nga kustombare nayù ira tatolay nga meyannung sù rilisiód da. Á sikayu, ngattá laguk ta uputan naw paga nga kurugan yù kagian nayù ira tatolay nga ari manguruk kâ Apu? Anni má ta makitulù kayu nira?

<sup>21</sup> Á kanniaw yù kagiad da. “Arán naw siggeran! Arán naw kanan! Arán naw tangngalán!” kud da.

<sup>22</sup> Á ngámin dannian nga kanniawad da, pidde ni Namarò ira, tapé iyuśá tam ánná kanat tam áddè ta kapúnu ra. Ngattá laguk ta tángngagan naw yù ituddu ra nga kanniawad da, nga naggapu galâ ta nonò na tolay?

<sup>23</sup> Á yù ira nga mangituddu karanniauw, meparámak ira nga kunnay ta nasírik, gapu ta malláppà ira nga manuppál ta meyannung sù rilisiód da. Á kunnay ta tumulù ira ta ánnunganán nayù ira tatolay, ánná jígirigáyat da yù baggi ra. Ngam awán ta serbi nayù ngámin nga akkuád da, gapu ta ari megaggak yù narákè nga nonopad da ánná karagatád da.

<sup>1</sup> Á gapu ta naginnanolayin si Apu Kesu Kiristu, á sittam nga mangikatalà kuna, kunnay ittam ta nepaginnanolay kuna, ta iniyawâ na nittam yù bagu nga áttole tam nga awán ta áddè na. Á yáyù nga ipe tam yù urà tam nga palurotan yù napiá nga ikáyâ ni Apu Kesu Kiristu. Ta aijanin si Apu Kesu nga mammaguray ta lángi, nga nagitubang sù jiwanán ni Namarò, nga pagitubangán nayù kotunán nga maráyaw.

<sup>2</sup> Arát tam laguk nonopan yù aijan ta dabbuno, nu ari galâ yù ngámin nga aijan kâ Apu ta lángi, ta dannian yù mannanáyún.

<sup>3</sup> Á sittam nga mangikatalà kâ Apu, kunnay ittam ta natayin, á arát tamin karagatán yù aijan ta dabbuno. Ta aijanin yù bagu nga áttole tam nga arát tam paga masingan, nga napakappián kâ Apu Kesu Kiristu nga nepagitubang kâ Namarò ta lángi.

<sup>4</sup> Á si Apu Kesu Kiristu yù paggaguán nayù bagu nga áttole tam. Á sangaw nu umay nga mappasingan, mepappasingan ittam gapay kuna nga mesipà sù áddalingáráng na.

<sup>5</sup> Á wáwwagi nga mangikatalà kâ Apu Kesu, yáyù nga máwák nga ipuerá naw laguk yù jikkù nga ágganguá na tolay ta dabbuno. Á arán naw laguk párigán yù meruruk sù arán na atáwa. Á ipuerá naw ngámin yù Meyannung ta narákè nga karagatán naw. Á ari kayu magukkuk, gapu ta kunnay sù tolay nga makimoray ta sináddios yù magukkuk, nga pakimorayán na lâ yù kukuá na ánnna karagatán na nga kukuá.

<sup>6</sup> Á sangaw nu duttál yù pangukum ni Namarò, pagikaruan na yù ira mamotu kuna megapu karannian nga narákè nga ágganguá ra.

<sup>7</sup> Á kunnian gapay ngaw yù ágganguá naw sù ngaw kepattatádde naw sù ira ari mangruk kâ Apu.

<sup>8</sup> Ngam aringin mepángngà nga tolian naw yù ngaw ágganguá naw, gapu ta netáddyay kayin kâ Apu Kesu. Likuránán naw laguk yù ngámin dannian nga narákè nga akka-akkuán naw. Ari kayu makkakálussaw. Ari kayu makkakáporay onu mangigagángay. Ari kayu makkakálillibâ. Á arán naw pagubu-ubobugán ta narákè yù ira kábulun naw.

<sup>9</sup> Á ari kayu massirisiri sù ira kábulun naw, gapu ta arán nawin tángngagan yù dán nga nonò naw ánnna yù ngaw ágganguá naw nga narákè.

<sup>10</sup> Á aijanin yù bagu nga nonò tam nga pidde ni Namarò, nga sigídá na nga ulu-ulian, nga pabbalinan na ta pareku nga napiá áddè ta nepaggittá sù nonò na, tapè kuruk nga kánnámuún tam si Apu.

<sup>11</sup> Á gapu ta sittam ngámin nga mangikatalà kâ Apu Kesu yù iniddán ni Namarò ta bagu nga nonò tam, á arán na ittam irumá. Ta alawatan ni Namarò ittam ngámin nga netáddyay kâ Apu Kesu, mássiki yù Kudio ánnna yù ari Kudio, yù nakugi onu ari, yù naggigiámmu ánnna yù ari naggigiámmu, yù pobare nga aripan ánnna yù maddok kuna. Á si Apu Kesu Kiristu yù kotunán, á maggiáni nittam ánnna mepulupulù nittam ngámin nga mangruk kuna.

<sup>12</sup> Á sittam yù piníli ni Namarò, nga pabbalinan na ta mangilin nga tatole na nga masserbi kuna, á iddi-iddukan na ittam. Akkuát tam laguk yù napiá nga mepángngà ta bagu nga nonò tam nga naggapu kuna. Ikákkállà tam yù ira kábulut tam, á abbágát tam ira. Á ari ittam mappeddaráyaw, ngam tumulù ittam ánnna attamát tam lâ yù akkuán nayù ira kábulut tam.

<sup>13</sup> Á makkakápasensiá ittam, á nu aijan yù malliwâ nittam, pakomát tam laguk. Ta pinakomá na ittam ni Apu, á yáyù nga máwák tam gapay nga makkakápakomá.

<sup>14</sup> Á yawe yù más napiá nga ágganguá tam ánnè sù ira ngámin, ta makkaká-iddù ittam, nepatalugáring ta mapasigaggá yù ákkiwagi tam megapu sù pakkaká-iddù tam.

<sup>15</sup> Ta metáddyay ittam kâ Apu Kesu Kiristu, nga meyárik ta baggi na. Á si Apu Kesu Kiristu yù mammaguray ta nonò tam, ta yáyù ipágágál ni Namarò nittam, tapè magimammà ittam ánnna napiá yù ággigiáti tam, megapu sù pamimagure na. Á sigídá tam laguk dayáwan si Apu, ta ari ittam makabalabálà kuna megapu sù ángngiddù na nittam.

<sup>16</sup> Á gapu ta netáddyay ittam kâ Apu Kesu Kiristu, patattamat tam ta nonò tam yù bilin na, ánnna gigiámmuat tam yù napiá nga sírik na, tapè makkakátuddu ittam ta napiá ánnna makkakátabarang ittam gapay. Á makkansion ittam laguk kâ Apu. Makkansion ittam sù kansion nga mangngágan ta Salmo, nga initúrâ na ngaw ni Patul Dabid, nga áddáyo na kâ Apu. Á kansionat tam gapay yù ipanonò nayù Mangilin nga Ikararuá nittam, nga áddáyo tam ánnna ábbalabálà tam kâ Apu megapu sù ángngikállà na nittam.

<sup>17</sup> Á ipakimállà tam kâ Namarò ta abbágán na ittam ta ngámin nga akkuát tam ánnna pagubobuk tam, tapè napiá ánnna mepángngà sù Yápu tam yù ngámin nga ubobugat tam ánnna yù akka-akkuát tam. Ta sittam yù pannakabaggi ni Apu Kesu, nga mábbunán ta ngágan na. Á dayáwat tam laguk si Ammò Namarò megapu kâ Apu Kesu.

*Yù Itaddán ni Pablo sù ira Makkakábbalay*

<sup>18</sup> Á sikayu nga bábbay nga ajjan atáwa na, tumulù kayu laguk sù ira áttáwa naw, ta yáyù mepángngà nga akkuán nayù ira bábbay nga manguruk kâ Apu.

<sup>19</sup> Á sikayu nga kábuluk ku nga lálláki nga eggá atáwa na, iddi-iddukan naw yù atáwa naw, á arán naw ira jigirigátan.

<sup>20</sup> Á sikayu nga ábbing, arán naw potuán yù ira darakal naw, ngam tuppálan naw yù ngámin nga kagiad da, ta yáyù ipagayáyâ ni Apu Namarò.

<sup>21</sup> Á sikayu nga darakal da, arán naw talamánan yù ira ánâ naw, marakè mapakaraddam naw ira.

<sup>22</sup> Á sikayu nga makiaripan, tuppálan naw yù ngámin nga ipakuá nayù ira yápu naw. Á nu ajjan yù makasingan nikayu, ari kayu áppè lálláppà, ngam tuppálan naw yù ipakuá ra nikayu megapu sù napiá nga nonò naw, ánná megapu sù pakimore naw kâ Apu Kesus.

<sup>23</sup> Á maguray lâ nga tarabáku naw, ipe naw yù urà naw nga manuppál ta napiá, nga kunnay ta si Apu Namarò galâ yù passerbián naw, nga ari lâ yù tolay nga maddok nikayu.

<sup>24</sup> Ta si Apu Kesus Kiristu yù kuruk nga Yápu naw nga passerbián naw. Á ammu naw ta si Apu Kesus yù mabbálà nikayu sù napiá nga akkuán naw, á iyawâ na nikayu yù pinarán ni Namarò nga initabbá na sù ira tatole na.

<sup>25</sup> Á yù ira nga mangupù sù narákè nga akka-akkuád da, alawatad da yù bálà nayù narákè nga kingngúá ra sangaw nu panunnután ni Namarò yù ira tatolay. Ta awán ta tolay nga paddurúmán na.

**4**

<sup>1</sup> Á sikayu gapay nga ajjan aripan na, iddukan naw yù ira masserbi nikayu ánná iyawâ naw nira yù bálà nayù ásserbi ra, ta ammu naw ta ajjan gapay yù Yápu naw ta lángi nga passerbián naw, á iyawâ na gapay sangaw nikayu yù bálà nayù ásserbi naw.

*Yù Káruán nga Itabarang ni Pablo*

<sup>2</sup> Á sikayu ngámin nga manguruk kâ Apu, uputan naw laguk nga tángngagan yù pakimí-mállà naw. Á nonopan naw yù ikomá naw kâ Apu Namarò, ánná dayáwan naw si Apu megapu sù ngámin nga ángngikállà na nittam.

<sup>3</sup> Á ipakimállà naw kami gapay, á ikomá naw kâ Namarò ta iyawâ na nikami yù awayyá mí nga umay mangipakánnámmu sù bilin na nga nelímak ngaw ta nabayák, nga meyannung kâ Apu Kesus Kiristu. Yáyù gemma yù gapu na nga nebálugà saw, megapu ta pangilayalayá ku sù meyannung kuna.

<sup>4</sup> Á ipakimállà nawà laguk, ta abbágán nangà ni Namarò, tapè malitáw yù pangilayalayá ku sù bilin na, ánná kánnámmuán nayù ira tatolay yù ituddù nira.

<sup>5</sup> Á máwák naw gapay nga ipasingan yù napiá nga ággangngúá naw sù ira nga ari paga mangikatalà kâ Apu Kesus. Á nu ajjan yù awayyá naw, abbágán naw ira ánná ipakánnámmu naw nira yù bilin ni Namarò nga meyannung kâ Apu Kesus.

<sup>6</sup> Á ta pakiubobuk naw nira, ari kayu mappeddaráyaw, ngam napiá lâ yù ággubobuk naw, tapè ayatán yù ira tatolay nga makaginná sù kagian naw nira, á manguruk ira gapay ánná mangikatalà ira kâ Apu. Á nonopan naw ta napiá yù itabbák naw sù ira ngámin nga mangiyabbû nikayu.

*Yù Pangiyabbû ni Pablo nu Kunnasi yù ira Kákkopun na*

<sup>7</sup> Si Tikiko yù wagi tam nga iddukat tam, ánná kabbuluk ku gapay nga pangikatalakán nga masserbi kâ Apu, á napiá yù ángngabbák na nikán. Á iparámak na sangaw nikayu yù ngámin nga nesimmu nikán saw.

<sup>8</sup> Ta yáyù nga dobak ku ta umay ta gián naw, tapè kánnámmuán naw yù ngámin nga meyannung nikami, ánná mabannáyán yù nonò naw.

<sup>9</sup> Á si Onesimo nga kabbulun naw nga taga Kolosi yù pangikatalakán nga wagi tam nga iddukat tam. Á aggina yù mepulù kâ Tikiko nga umay ta gián naw. Á aggira duá yù mangiparámak nikayu sù ngámin nga nesimmu nikán.

<sup>10</sup> Á ajjan si Aristarko nga kabbuluk ku nga nebáluk. Á ikáyâ na nga iyabbû nu kunnasi kayu. Á si Markus gapay, nga kapittán ni Bernabe, iyabbû na nu kunnasi kayu. Á kinagì ngaw nikayu yù meyannung kâ Markus. Á nu lubbè sangaw ta gián naw, á paddulotan naw.

<sup>11</sup> Á si Kesus, nga abbúnad da gapay ta Justo, iyabbû na gapay nu kunnasi kayu. Á aggira lâ nga tallu yù kábuluk ku nga Kudio nga mepattarabáku nikán, nga mangiparámak sù bilin ni Namarò nga meyannung sù pammagure na, á mabannáyán yù nonò ku megapu nira.

12 Á si Epapro nga katangelián naw yù mangiyabbû gapay ta meyannung nikayu. Aggina gapay yù masserbi kâ Apu Kesu Kiristu, á ari malurâ nga makimi-imállâ kâ Namarò megapu nikayu. Á yawe ipakimállâ na, ta tulluâ yù nonò naw, áンna mapasigaggâ yù ángngikatalà naw kâ Apu, tapè kánnámmuán naw áンna palurotan naw yù ngámin nga ipakuá ni Namarò nikayu.

13 Á sistiguák ku ta kukurugán nga maláppâ nga mammalurò sù ipakuá ni Apu kuna, megapu nikayu áンna yù ira wáwwagi tam ta ili na Lodisia áンna ili na Kirapulis.

14 Á di Lukas, nga doktor nga iddukat tam, kâ Demas gapay, iyabbû da nu kunnasi kayu.

15 Á wáwwagi, kagian naw gapay sù ira wáwwagi tam ta Lodisia ta iyabbû ku nu kunnasi ira. Á iyabbû ku gapay nu kunnasi di Nimpá áンna yù ira káruán nga mangikatalà kâ Apu Kesu nga maggagammung ta bale ni Nimpá.

16 Á sangaw nu mabalin naw bibriran yawe túrâ ku, á itubbuk naw ta Lodisia, tapè bibrirad da gapay nayù ira mangikatalà kâ Apu nga maggagammung tán. Á kagian naw nira ta itubbuk da bì nikayu yù túrâ ku nira, tapè bibriran naw gapay.

17 Á kagian naw bì kâ Arkipo yù kinagì kuna, nga tángngagan na áンna palurotan na yù ipatarabáku ni Apu kuna.

18 Á sikán si Pablo nga nangitúrâ ta ngágak ku sawe pakáddekkán nayù túrâ. Á ipanonò ku nikayu ta aijanà paga ta ábbalurán, tapè ari kayu mattukkâ nga makimállâ megapu nikán. Á yawe ipakimállâ ku megapu nikayu, ta ikákkállâ na kayu ni Apu.

## Yù Olu nga Túrâ ni Pablo sù ira Manguruk nga taga Tessalonika

*Yù Meyannung sawe Túrâ ni Pablo*

Gári, netádday yù purubinsia na Masidonia sù ngaw páppatulán na Roma. Á Tessalonika yù karakalán na ili sù purubinsia na Masidonia, nga paggianán nayù ira mammaguray ta purubinsia. Á aranni ta ili na Pilippay yù ili na Tessalonika.

Á páno ri Pablo kári Silas ká Timotio ta Pilippay, nga mappassiár nga mangilayalayâ sù bilin ni Namarò, naddagâ ira ta Tessalonika, tapè mangilayalayâ ira sù ira tatolay tân nga ari manguruk, tapè jigirigátad da di Pablo. Á yáyù nga nánaw laguk di Pablo nga minay ta Korinto. Á manganánnuán, jinok ni Pablo si Timotio ta umay mattúllun sù ira manguruk nga maggián ta Tessalonika.

Á panoli ni Timotio ta gián ni Pablo ta Korinto, kinagi na yù ngámin nga meyannung sù ira manguruk nga maggián ta Tessalonika, nga jigâ da áんな yù napasigaggà nga ángngikatalà da kâ Apu Kesu, áんな yù ngámin nga akka-akkuád da ta pagiddak da sù pattoli ni Apu Kesu. Á yáyù nga initúrá ni Pablo yù itabarang na nira nga taga Tessalonika.

*Yù Mayán nayù Túrâ*

Yù Pangayâ ni Pablo megapu sù ira Manguruk nga taga Tessalonika (1:1-3:13)

Yù Napiá ña Ággangnguá tam nga Ipagayáyâ ni Namarò (4:1-12)

Yù Mesimmu sù ira Manguruk nga Námmatay (4:13-18)

Magiddak ittam ta Pattoli ni Apu Kesu (5:1-11)

Yù Maporián nga Itabbarang ni Pablo (5:12-28)

*Yù Pangayâ ni Pablo megapu sù ira Manguruk nga taga Tessalonika*

<sup>1</sup> Sikami nga mattúrá di Pablo kári Silas ká Timotio. Á túratám mi sikayu nga maggián ta ili na Tessalonika, nga wáwwagi mi megapu ta ángnguruk tam kári Namarò nga Yáma tam kâ Apu Kesu Kiristu nga Yápu tam. Á parè bi ta ikállà na kayu ni Apu tapè magimammà kayu, áんな napiá yù ággíán naw.

<sup>2</sup> Á sigídá mi kayu ipakimállà kâ Namarò, áんな maddáyaw kami kuna megapu nikayu ta ngámin nga pakimállà mi.

<sup>3</sup> Á paddáyo mi kâ Namarò nga Yáma tam, ipanonò mi kuna yù ngámin nga napiá nga akkuán naw megapu sù ángnguruk naw kâ Apu Kesu, áんな yù kaláppà naw nga mangabbák sù ira kábulun naw megapu sù ayâ naw kâ Namarò. Á ipanonò mi gapay kuna yù pagattam naw ta jigâ megapu sù napasigaggà nga ággiddanáma naw kâ Apu Kesu Kiristu nga Yápu tam.

*Yù Pangikatalà nayù ira taga Tessalonika*

<sup>4</sup> Wáwwagi mi, nga iddukan ni Namarò, ammu mi ta kuruk nga sikayu yù piníli na, gapu ta nanguruk kayin.

<sup>5</sup> Ta ari yù ubobuk na tolay yù naginná naw, nu ari galâ yù kuruk nga napiá nga dámak, nga inilayalayâ mi nikayu megapu sù pakáwayyá nayù Mangilin nga Ikararuá. Á ari kami mabbábáng ta pangilayalayâ mi nikayu, ta ammu mi ta makáwayyá yù ubobuk ni Namarò. Á sikayu, ammu naw yù napiá nga nonò mi nga inipasingam mi ta pakipaggiám mi nikayu, áんな yù napiá nga ángngabbák mi nikayu.

<sup>6</sup> Á panguruk naw sù bilin, pinárigán naw kami áんな pinárigán naw si Apu Kesu nga Yápu tam, mássiki nu narigirigâ kayu megapu sù panguruk naw. Á pinagayáyâ na kayu nayù Mangilin nga Ikararuá megapu sù bilin nga inalawâ naw.

<sup>7</sup> Á yáyù nga sikayu yù párigán nayù ira ngámin nga manguruk nga maggián ta purubinsia naw nga Masidonia áんな purubinsia na Akeya.

<sup>8</sup> Ta melayalayâ yù napiá nga bilin ni Apu Namarò ta ngámin nga lugár na Masidonia áんな Akeya megapu nikayu. Á ari lâ tân nga lugár, nu ari gapay ta nassamâ ta ngámin nga lugár yù dámak nga meyannung sù ángngikatalà naw kâ Namarò. Á yáyù nga awán laguk ta máwák mi nga makkagi.

9 Á ta ngámin nga angayám mi, ubobugan nayù ira tatolay yù napiá nga pangálliuk naw nikami ta ánge mi nikayu. Á iparámak da gapay yù pabbabáwi naw sù pakimore naw ta sináddios, tapè si Namarò lâ yù passerbián naw, nga kuruk nga táttáddy ngagáta áddè ta áddè.

10 Á ubobugad da gapay ta iddi-iddagán naw yù pattoli nayù Anâ ni Namarò nga maggapu ta lángi. Aggina si Apu Kesu nga pinaginnanole ni Namarò, á iyígù na ittam sangaw, tapè ari ittam mekanakanâ sù pangukum ni Namarò.

## 2

### *Yù Pangituddu ni Pablo ta Tessalonika*

1 Wáwwagi, ammu naw ta ajjan yù napiá nga nabbalinán nayù paggiám mi ngaw nikayu, ta inabbágám mi sikayu.

2 Á narámak naw gemma yù karigirigâ mi ta paggiám mi ta ili na Pilippay, nga pangngua ra nikami ánnna pakkakagi ra nikami tán. Ngam pinatattam na kami ni Namarò, tapè melayalayâ mi nikayu yù bilin na, mássiki nu nepallà yù pangontará ra nikami ta gián naw.

3 Á kuruk yù ituddu mi ta pangapâ mi nikayu ta mangikatalà kayu gapay kâ Apu Kesu, á awán ta narákè nga nonò mi. Á arám mi kayu inilogò ta meyannung sù kuruk.

4 Ngam ilayalayâ mi lâ yù ipelayalayâ na nikami ni Namarò, ta sinullà na kami nga ikatalà na ta mangilayalayâ sù napiá nga dámak. Á awán bulubugá ta pataliám mi, ta ari yù ira tatolay nga pagayáyatam mi, nu ari galâ si Namarò nga makánnámmu sù eggá ta nonò mi.

5 Á pangilayalayâ mi, ammu naw ta matunung yù ággubobuk mi. Ari áppé pípiá yù ággubobuk mi ánnna awán ta narákè nga nonò mi. Á ari kami mangukkuk, ánnna awán ta inilimak mi nikayu. Ngam ammu ni Namarò ta kuruk ngámin yù kinagi mi nikayu.

6 Á arám mi aleran yù ira tatolay nga maddáyaw nikami, mássiki nu sikayu onu tanakuán.

7 Á mássiki nu ajjan yù awayyá mi nakuan nga alawatan yù paddáyo naw nikami megapu sù pakáwayyá mi nga mangilayalayâ nga naggapu kâ Apu Kesu Kiristu, á arám mi inipotun yù baggi mi ánnè nikayu. Ngam ta keggá mi nikayu, inipasingam mi galâ yù ángngiddù mi nikayu, nga kunnay ta ánnaron na babay ta ánâ na.

8 Á gapu ta ángngiddù mi nikayu, ari lâ yù napiá nga dámak nga naggapu kâ Namarò yù ikáyâ mi nga kesipatán naw, ngam yù baggi mi gapay, nga dán nga naparán nga mabbaluntáriu nga metapil megapu nikayu.

9 Wáwwagi, nonopan nayù ángngiddù mi nikayu. Ta keggá mi nikayu, nattarabáku kami ánnna inattamám mi yù bannák mi ta ággaw ánnna gabi, tapè arám mi máwák nga makkiddaw nikayu, marakè malannapán yù jígâ naw megapu nikami ta pangilayalayâ mi nikayu sù bilin ni Namarò.

10 Á sikayu yù makasistígu ta kuruk nga napiá yù kustombare mi, ánnna ammu ni Namarò gapay. Á matunung yù ngámin nga kingnguá mi nikayu nga mangikatalà kâ Apu Kesu, á awán ta ikáru mi nikayu, nga awayyá naw nakuan nga mamaliwâ nikami.

11 Á keggá mi ta gián naw, ammu naw gapay ta kunnay kami ta napiá nga yáma sù ira ánâ na, ta sinudduám mi kayu, ánnna sinabarangám mi kayu nga katággítáddy.

12 Á jinudduál mi nikayu ta palurotan naw lâ yù napiá nga ipakuá ni Namarò nikayu, tapè meparáyw si Namarò megapu sù napiá nga akka-akkuán naw. Ta si Namarò yù nagágál nikayu, ta mesipâ kayu sù pammagure na ánnna paddalingárang nayù karáyo na.

13 Á sigídá kami gapay mabbalabálâ kâ Namarò megapu nikayu, gapu ta inalawâ naw yù bilin ni Namarò ta pakagímá naw sù pangilayalayâ mi. Á natákkilálán naw ta kuruk nga ubobuk ni Namarò, nga ari yù ubobuk na tolay. Á kinuruk nawin yù kuruk nga ubobuk ni Namarò, nga makáawayyá nga mangabbák nikayu nga manguruk, tapè mabbálí ta napiá yù nonò naw ánnna ággangnguá naw.

14 Á wáwwagi, mepárik kayin sù ira manguruk kâ Namarò ta purubinsia na Judiya, nga wáwwagi tam nga mangikatalà kâ Apu Kesu Kiristu. Ta inattamán naw gapay yù panigirigâ nayù ira ikáttolé naw ta gián naw, nga kunnay sù pagattam nayù ira taga Judiya ta panigirigâ nayù ira ikáttolé ra nga Kudio ta giád da.

15 Á yù ira Kudio, aggira yù namapáyat kâ Apu Kesu. Á yù ira ngaw naggaká nira yù namapáyat sù ira ngaw ábbilinán ni Namarò. Á yù ira Kudio kunangane, jígirigátad da kami nga minángngilayalayâ, á pinapáno ra kami nga ikáttolé ra ta giád da. Á ari gemma magayáyâ si Namarò sù akka-akkuád da, ta kontarád da yù ira ngámin nga tatolay.

<sup>16</sup> Ta molang da nu makiyígù yù ira ari Kudio kâ Namarò. Á yáyù nga jigirigátad da kami nga mangilayalayá sù ira ari Kudio. Á kunnian, lannalannapád da yù liwâ da nga ikáru ra. Á mapporayin si Namarò nira, á pagikaruan na ira sangaw ta impieru ta áddè ta áddè.

*Yù Pakkaragâ ni Pablo nga Mattúllun sù ira taga Tessalonika*

<sup>17</sup> Á sikami, wáwwagi, mássiki nu ari paga nabayák yù káwám mi nikayu, á maraddam kami nikayu, á sigidá lâ manonò mi sikayu. Á mapattû kami nga umay mattúllun nikayu.

<sup>18</sup> Á sikán, umayà lâ umay nakuan, ngam ajjan garè yù kegaggarak ku nga naggapu kâ Satanas.

<sup>19</sup> Á yawe yù ipakkaraçâ mi nga umay nikayu, ta sangaw nu duttál si Apu Kesu Kiristu ta dabbuno, á sikayu yù ipagayáyâ mi, ánnna sikayu yù gapu na nga iddanamám mi ta ari kami mepasiránán sangaw ta arubáng nayù Yápu tam, gapu ta mapasigaggâ yù panguruk naw.

<sup>20</sup> Á yáyù nga ayatán kami laguk, ta sikayu yù ipagayáyâ mi ánnna mepallà yù paddáyo mi kâ Apu megapu nikayu.

### 3

*Paddok ni Pablo kâ Timotio ta Mattúllun sù ira taga Tessalonika*

<sup>1</sup> Á gapu ta arám mi ngin meyattam yù daddam mi nikayu, ta arám mi ammu nu kunnasi kayu, á sikami duá kâ Silas, ninonò mi ta mabattáng kami lâ ta Atenas,

<sup>2</sup> tapè dobam mi ta gián naw si Timotio, nga wagi tam nga masserbi kâ Namarò, nga mangilayalayâ gapay sù napiá nga dámak nga meyannung kâ Apu Kesu Kiristu. Á yáyù nga jinok mi laguk si Timotio, nga umay manabarang nikayu, tapè mepasigaggâ yù ángngikatalà naw kâ Apu,

<sup>3</sup> ánnna arán naw likuránán yù napiá nga panguruk naw megapu sù panigirigâ da nikayu nayù ira ari manguruk. Ta ammu naw gemma ta máwák nga attamát tam yù jigâ nga umay nittam.

<sup>4</sup> Á paggiám mi paga nikayu, kinagi mi nikayu ta umay yù jigâ nga máwák nga attamát tam. Á masingan naw ta nesimmu ngin yù kunnian nga kinagi mi ngaw nikayu.

<sup>5</sup> Á pakarámak ku sù karigirigâ naw, arák ku meyattam yù burung ku nikayu. Á yáyù nga jinok ku si Timotio, ta en na kayu tullúnán, tapè ammù sangaw nu kunnasi yù ángnguruk naw. Ta maburungâ, marakè melogò kayu, á likuránán naw yù napiá nga ángnguruk naw, megapu ta pamarubá na nikayu ni Satanas. Á nu kunnian, kengá lâ nakuan yù bannák mi nga mangituddu nikayu.

*Yù Istoríán ni Timotio kâ Pablo*

<sup>6</sup> Á kunangane, limibbekin si Timotio nga naggapu sù gián naw, á napiá yù iniparámak na nga meyannung nikayu. Kinagi na ta napasigaggâ yù ángngikatalà naw kâ Apu Kesu ánnna napiá yù pakkaká-iddù naw. Á kinagi na gapay ta sigidá manononò naw kami, ánnna karagatán naw kami masingan gapay nga kunnay sù pakkaraçâ mi nga makasingan nikayu.

<sup>7</sup> Á wáwwagi, mássiki nu nepallà yù burung mi nikayu ánnna aru yù inattamám mi nga jigâ, á mabannáyán kami gapu ta pakarámak mi ta napiá lâ yù panguruk naw.

<sup>8</sup> Á napálappawánin yù nonò mi gapu ta ammu mi ngin ta napasigaggâ yù ángngikatalà naw kâ Apu Kesu.

<sup>9</sup> Á ari kami makabalabálà kâ Namarò sù nepallà nga pagayáyâ mi ta arubáng na megapu nikayu.

<sup>10</sup> Á sigidá kami makimi-imállà ta ággaw ánnna gabi, ta makkakásingan ittam, ánnna ajjan yù awayyâ mi nga mangabbák nikayu, tapè mapasigaggâ paga yù ángnguruk naw.

<sup>11</sup> Á parè bì ta anugutad da kami di Namarò nga Yáma tam ánnna si Apu Kesu Kiristu, tapè makatúllun kami nikayu sangaw.

<sup>12</sup> Á parè bì gapay ta pappanan ni Namarò yù pakkaká-iddù naw ánnna yù pangiddù naw gapay sù ira ngámin nga tatolay, nga kunnay ta ángngiddù mi nikayu.

<sup>13</sup> Á ta kunnian, parè bì ta pasikanan ni Apu Namarò yù nonò naw, tapè talákkurugan naw nga palurotan yù napiá nga ipakuá na nikayu, ánnna pareku nga napiá yù nonò naw, nga awán ta nakaliwatán naw ta arubáng ni Namarò nga Yáma tam, sangaw nu mattoli si Apu Kesu nga mepulù kuna yù ira ngámin nga tatole na.

### 4

*Yù Napiá nga Ággangnguá tam nga Ipagayáyâ ni Namarò*

<sup>1</sup> Á aijan lâ paga yù kagiam mi bì nikayu, wáwwagi. Gapu ta nattudduák kayin ta napiá nga akka-akkuát tam nga ipagayáyá ni Namarò nittam, kunnian gapay yù ággangnguá nawin. Á ikomá mi nikayu ta uputan naw yù napiá nga akkuán naw megapu sù pakáwayyá ni Apu Kesu. Á yáyù nga tabarangám mi sikayu, tapè mangáppípiá kayu.

<sup>2</sup> Á nonopan naw laguk yù taddám mi nikayu megapu sù pakáwayyá mi nga iniyawâ na kami ni Apu Kesu.

<sup>3</sup> Á yawe yù ure ni Namarò, ta palurotan naw yù ipakuá na nikayu, tapè mangilin kayu áんな ari kayu mekanâ ta liwâ. Ari kayu meruruk sù arán naw atáwa.

<sup>4</sup> Á sikayu nga lálláki, máwák naw nga napiá yù pangatáwa naw, áんな pakimorayán naw yù atáwa naw, tapè magayáyá si Namarò nikayu.

<sup>5</sup> Arán naw laguk akkuán yù gustu na baggi naw nga mamabay ta kunnay sù ira ari manguruk kâ Namarò.

<sup>6</sup> Arán naw durugan yù atáwa nayù kabbulun naw. Arán naw akkuán yaw nga narákè sù ira kábulun naw nga manguruk kâ Apu Kesu. Nonopan naw yù kinagi mi ngaw nikayu, ta si Apu Namarò yù mangibálà karannian nga narákè nga akkuán na tolay.

<sup>7</sup> Ta ari danniaw nga narákè yù ipakuá ni Namarò nittam. Ngam agálán na ittam ta akka-akkuát tam yù napiá, nga mepángngâ nittam nga mangilin nga tatole na.

<sup>8</sup> Á nu panakitán naw dannian nga ituddu mi, ari lâ sikami yù potuán naw, nu ari galâ si Namarò, nga mangiyawâ sù Mangilin nga Ikararuá na nikayu.

<sup>9</sup> Á ta Meyannung sù pangiddù naw sù ira wáwwagi naw megapu sù pangikatalà naw kâ Apu, á awán ta máwák mi nga itúrâ nikayu, ta sinudduán na kayu ni Namarò ta pakkaká-iddu naw.

<sup>10</sup> Á kuruk nga iddukan naw yù ira ngámin nga wáwwagi naw nga manguruk kâ Apu sù tangapurubinsia na Masidonia. Á tabarangám mi kayu laguk, wáwwagi, ta uputan naw yù pakkaká-iddu naw, tapè mangáppípiá kayu.

<sup>11</sup> Ari kayu makkakáburuburion. Ipe naw yù urà naw nga mepagimammâ sù ira kábulun naw. Á sikayu nga taggitáddyá, tángngagan na lápay yù Meyannung kuna. Á maláppâ kayu nga mattarabáku, tapè málâ naw yù ngámin nga máwák naw, ta kunnay sù pangitabarang mi ngaw nikayu.

<sup>12</sup> Maláppâ kayu laguk nga mattarabáku, tapè awán ta máwák nga kiddawan naw sù ira nga ari manguruk kâ Apu, á pakimorayád da kayu gapay.

### *Yù Mesimmu sù ira Manguruk nga Námmatay*

<sup>13</sup> Á wáwwagi, ikáyâ mi nga ipakánnámmu nikayu yù Meyannung sù ira ngaw manguruk nga námmatay, tapè ari kayu maraddam ta kunnay sù karaddam nayù ira ari manguruk, nga awán ta iddanamád da.

<sup>14</sup> Ta gapu ta manguruk ittam ta natayin si Apu Kesu áんな naginnanolayin, yáyù nga ammu tam ta paginnanolayan na sangaw ni Namarò yù ira námmatay nga mangikatalâ kâ Apu Kesu lage na pate ra. Á ipepulù na ira ni Namarò kâ Apu Kesu ta pattoli na sangaw ta dabbuno.

<sup>15</sup> Á yawe nga kagiam mi nikayu yù kinagi ni Apu Kesu nikami, ta sittam nga matolay paga ta pattoli na, ari ittam yù mapolu nga umay manápun kuna ta lángì, nu ari galâ yù ira námmatay.

<sup>16</sup> Á ta kunniawe yù kesimmu na, ta mappagukák si Apu Kesu nga maggagu ta lángì nga magágál sù ira manguruk kuna. Á makkatol gapay yù kátannangán nga daroban, áんな magamariung gapay yù pagamariungan ni Namarò. Á yù ira námmatay nga nangikatalâ kâ Apu Kesu Kistru lage ra natay, aggira yù mapolu nga maginnanolay.

<sup>17</sup> Á sittam nga manguruk nga matolay paga, ikáddagâ na ittam apan ni Namarò nga ipotun na ta kunam nga mepappupúlù nira, tapè dapunat tam si Apu ta lángì. Á yáyù nga mepattolay ittam nga mepulupulù kuna ta áddé ta áddé.

<sup>18</sup> Á yáyù nga makkaká-ubobuk kayu ta Meyannung sawe ira ubobuk, tapè mabannáyán yù nonò naw.

### *Magiddak ittam ta Pattoli ni Apu Kesu*

<sup>1</sup> Á wáwwagi, arám mi ngin máwák nga itúrâ nikayu yù Meyannung ta ággaw áんな oras nayù pattoli ni Apu Kesu sangaw nu umay mamanunnú ta tatolay.

<sup>2</sup> Ta ammu naw gemma ta ikáddagâ lâ duttál yù ággo na, nga kunnay sù dattál nayù makkokò ta gabi nga arát tam ammu.

<sup>3</sup> Á dattál nayù ággaw sangaw, á yù ira tatolay nga ari manguruk, kagiad da lâ sù ira kábulud da, "Napiá ngin yù ággít tam. Ari ittam maburung, ta awán bulubugá ta ikássing tam," kud da. Ngam ta pakkagi ra karanniaw, ikáddagâ lâ yù kokum da nga kunnay ta pappasíkál na babay nga maddaggun maganâ, á awán bulubugá ta makatálaw.

<sup>4</sup> Ngam sikayu, wáwwagi, ari kayu yù kun na tolay nga maggián ta kallà, á ari kayu makaddák ta dattál nayù ággaw nga pangukum ni Namarò, nga ikáddagâ lâ umay ta kun na makkokò.

<sup>5</sup> Ta kunnay kayin ta maggián ta nawák, ta dán nga naparán kayin megapu sù panguruk naw kâ Apu. Á sittam ngámin nga manguruk, ari ittam kunnay ta maggián ta kallà, nga kunnay sù ira nga ari manguruk.

<sup>6</sup> Ari ittam laguk mattalakák nga kunnay sù ággangnguá nayù ira ari manguruk. Kunnay ira ta makkaturuk, ngam máwák nga kunnay ittam ta makemmunaw nga magiddak. Magimuguk ittam laguk ánnna uputat tam yù napiá nga akkuát tam.

<sup>7</sup> Ta ari ittam kunnay sù ira nga arád da ammu si Apu Namarò, nga kun na kallà yù nonò da. Kunnay ira ta makkaturuk, nga awán ta papparád da ta labbè ni Apu. Á narákè lâ yù akkuád da nga kunnay ta minámmisssán nga magilellaw.

<sup>8</sup> Ngam dumá ittam nga manguruk kâ Apu, ta manawagáin yù nonò tam. Imugurát tam laguk yù akkuát tam, tapè palurotat tam lâ yù napiá. Á uputat tam yù ángngikatalà tam kâ Apu Kesu ánnna ángngiddú tam sù ira kábulut tam, nga meyárik ta balayáng nga barawási na suddálu, nga nelippak ta gáko na, tapè ari matáppù yù kunnay ta pinána ni Satanas. Á yù ággiddanáma tam sù pangiyigù ni Apu nittam, yáyù meyárik ta balayáng nga tadding na suddálu nga nelippak ta ulu tam, tapè ari ittam melogò nga tumulù sù mamalliwâ nittam.

<sup>9</sup> Ta arán na ittam sinullà ni Namarò ta ukuman na. Ngam agálán ni Namarò ittam, tapè ipeyígù na ittam kâ Apu Kesu Kiristu.

<sup>10</sup> Ta si Apu Kesu Kiristu yù netapil nga natay megapu nittam, tapè mepattolay ittam nga mepaggián kuna, mássiki nu matolay ittam paga onu natay ittamin ta pattoli na.

<sup>11</sup> Á yáyù nga uputan naw laguk yù akka-akkuán nawin nga pakkakátabarang naw ánnna pakkaká-abbák naw, tapè mabannáyán yù nonò naw ánnna mapasigaggà yù ángngikatalà naw.

### *Yù Maporián nga Itabarang ni Pablo*

<sup>12</sup> Wáwwagi, nga mangikatalà kâ Apu Kesu, yaw gapay ikomá mi nikayu, ta ikákkállà naw yù ira nga maláppà nga mangabbák ánnna mangituddu nikayu ta meyannung sù panuttul naw kâ Apu. Ta aggira yù sinullà ni Apu ta manaron ánnna manabarang nikayu.

<sup>13</sup> Pakimorayán naw ira ánnna iddi-iddukan naw ira ta napiá, gapu ta napiá yù ángngabbák da nikayu. Á pattatáddayan naw yù nonò naw, tapè ari kayu maddiráma, á magimammà kayu.

<sup>14</sup> Á itbarang mi nikayu gapay, wáwwagi, ta duduáran naw yù ira matalakák, tapè mattarabáku ira ta napiá. Á yù ira maburung, ipanonò naw nira yù ángngabbák ni Apu nira, tapè mabannáyán yù nonò da. Á abbágán naw yù ira nga makapi yù ángnguruk da, tapè ari ira melogò nga makitulù sù mamalliwâ nira. Attamán naw ira ngámin. Á ari kayu malurâ nga mangabbák nira.

<sup>15</sup> Magimuguk kayu ta arán naw bálatan ta narákè yù mangnuá ta narákè nikayu. Ngam apurán naw lâ nga akkuán yù napiá sù ira kábulun naw nga mangikatalà kâ Apu ánnna yù ira ngámin nga tatolay.

<sup>16</sup> Á magaya-ayáyâ kayu laguk, maguray lâ yù mesimmu.

<sup>17</sup> Á Anna makimi-imállà kayu gapay kâ Namarò.

<sup>18</sup> Á maguray lâ nga mesimmu nikayu, maddáyaw kayu lâ kâ Namarò, ta yáyù ure ni Namarò nga akkuán naw, gapu ta mepattatáddy kayin kâ Apu Kesu Kiristu.

<sup>19</sup> Arán naw laguk pakanítan yù pangituddu nayù Mangilin nga Ikararuá nikayu.

<sup>20</sup> Á arán naw iluddè yù ipeyubobuk ni Namarò sù ábbilinán na.

<sup>21</sup> Ngam pasikkálan naw lâ yù ngámin nga kagiad da, nu kukurugán nga naggapu kâ Namarò, onu ari. Á tángngagan naw lâ yù napiá.

<sup>22</sup> Á arayyuán naw yù ngámin makkakerumá nga narákè.

<sup>23</sup> Si Namarò yù mamagimammà nittam, á parè bì ta pakarenuán na yù nonò naw, tapè napiá nga tatole na kayu nga mangilin. Á parè bì ta taronán na yù nonò naw, ánnna yù ikararuá naw, ánnna yù baggi naw, tapè napiá yù ággián naw, ánnna napiá lâ yù akka-akkuán naw, á awán ta pakaliwatán naw sangaw nu manoli si Apu Kesu Kiristu ta dabbuno.

24 Ta mekatalà si Namarò. Á aggina yù magágál nittam ta umay ittam mangruk kuna. Á yáyù nga aggina yù mamalurò sù ngámin nga napiá nga meyannung nittam.

25 Á wáwwagi nga mangikatalà kâ Namarò, makimállà kayu gapay kâ Apu megapu nikami.

26 Á kagian naw sù ira ngámin nga wáwwagi tam nga maggián tán yù ayâ mi nira.

27 Á yawe yù itabarang ku nikayu megapu sù pakáwayyâ nga iniyawâ ni Apu Kesu nikán, ta bibbiran naw yawe túrâ mi sù ngámin ira nga wáwwagi tam.

28 Á parè bì ta sigídá matagenà naw yù pangikállà na nikayu ni Apu Kesu Kiristu.

Áddè na yû.

## **Yù Mekaruá nga Túrâ ni Pablo sù ira Manguruk nga taga Tessalonika**

*Yù Meyannung sawe Túrâ ni Pablo*

Pattúrâ ni Pablo sù ira manguruk nga taga Tessalonika, kinagi na yù pagayáyâ na nira megapu sù napasigaggà nga pangikatalà da kâ Apu Kesu. Á inipakánnámmu na nira yù kuruk nga kegapuánán nayù jigâ da nga makkakerumá, nga ari gapu ta pore ni Apu Namarò nira, nu ari galâ tapè mepasingan yù napasigaggà nga ángngikatalà da kâ Namarò, mássiki nu marigirigâ ira (1:5-6).

Á kinagi ni Pablo nira gapay ta mappalán ira sù ira kárúán nga umay nira nga mangitduu, ta ari kuruk yù kagiad da nga ajjan kanu nira yù túrâ ni Pablo nga makkagi ta nanolingu si Apu Kesu. Awán bulubugá ta kagiad da nga kuruk. Á ibukalán ni Pablo nira yù kuruk nga meyannung sù panoli ni Apu Kesu sangaw nu ággo na nga sinullà na lâ ni Namarò.

*Yù Mayán nayù Túrâ*

Yù Paddios ni Pablo áんな Pakimállà na (1:1-2)

Yù Matunung nga Pamanunnù ni Apu Kesu ta Panoli na (1:3-12)

Yù Panoli na sangaw ni Apu Kesu Kiristu ta Dabbuno (2:1-12)

Yù Ángngiddù ni Namarò nittam (2:13-17)

Makimállà ittam áんな Mattarabáku ittam (3:1-15)

Yù Naporíán nga Pakimállà ni Pablo (3:16-18)

<sup>1</sup> Sikami di Pablo kári Silas kâ Timotio. Á túratám mi sikayu nga tatole ni Namarò nga maggagammung ta ili na Tessalonika, sikayu nga wáwwagi mi megapu sù ángnguruk tam kári Namarò nga Yáma tam kâ Apu Kesu Kiristu.

<sup>2</sup> Á ipakimállà mi kári Namarò kâ Apu Kesu Kiristu, ta ikákkállà da kayu áんな pagimamatad da kayu, tapè napiá yù ággíán naw.

*Yù Matunung nga Pamanunnù ni Apu Kesu ta Panoli na*

<sup>3</sup> Á wáwwagi mi, máwák nga sigidá kami maddáyaw kâ Namarò megapu nikayu, nga kunnay ta mepángngà, gapu ta mangáppípiá yù ángngikatalà naw kâ Namarò áんな yù pakkaká-iddu naw.

<sup>4</sup> Á sikami lággapay, yáyù nga iráyo mi sikayu ta ngámin nga angayám mi sù ira ággagammungán nayù ira manguruk, á kagiad mi nira ta napasigaggà yù ángngikatalà naw, mássiki nu aru yù makkakerumá nga jigâ nga attamán naw áんな yù panigirigâ da nikayu nayù ira ari manguruk, megapu sù ángnguruk naw kâ Apu.

<sup>5</sup> Á yáyù nga mepasingan ta matunung yù ámmánnunnù ni Namarò, gapu ta attamán naw yù jigâ nga umay nikayu, tapè mepakánnámmu yù bilin ni Namarò nga meyannung sù pammagure na, á ibiláng na kayu ni Namarò ta tatole na nga mepángngà nga mesipà sù pammagure na.

<sup>6</sup> Á mepasingan ta matunung gapay yù ámmagikáru ni Namarò, ta ibiláng na ta mepángngà nga bálatan na ta jigâ yù ira nga manigirigâ nikayu.

<sup>7</sup> Á sikayu nga marigirigâ, patukkatan ni Namarò yù ngámin nga jigâ naw, áんな yù jigâ mi gapay, tapè mepagibannák ittam sangaw nu mattoli si Apu Kesu.

Ta ikáddagâ lâ umay si Apu Kesu nga maggapu ta lángi, áんな mepulupulù kuna yù ira makáwayyá nga daroban na.

<sup>8</sup> Á mappasingan ira nga mepulù ta gumággágâng nga api. Á pagikaruan ni Apu Kesu yù ira ngámin nga manaki nga makiyápu kâ Namarò áんな yù ira nga ari manguruk sù napiá naga dámak nga meyannung kâ Apu Kesu nga Yápu tam.

<sup>9</sup> Á yawe yù pamagikáru ni Apu Kesu nira, ta mannanáyun ira nga maparigâ, á mannanáyun yù kesinnâ ra kâ Namarò, á arád da bulubugá masingan yù dalíngáráng nayù makapállâ nga pakáwayyá na.

<sup>10</sup> Á mesimmu ngámin danniaw sangaw nu manoli si Apu Kesu, tapè meparáyaw megapu sù ira ngámin nga tatole na. Á mapállâ yù ira ngámin nga mangikatalà, ta pakasingad da kuna. Á sikayu gapay, mesipà kayu sù ira tatole na, gapu ta kinuruk naw yù kinagi mi nikayu nga meyannung kuna.

<sup>11</sup> Á yáyù nga sigidá kami makimállà kâ Namarò megapu nikayu, tapè pabbalinan na kayu ta mepángngà nga mepattatáddy kuna, ta yáyù gapu na nga inagálán na kayu.

Á ipakimállà mi gapay ta abbágán na kayu ni Namarò megapu sù pakáwayyá na, tapè mapalurò naw yù ngámin nga napiá nga ikáyâ naw nga akkuán megapu sù ángngikatalà naw kâ Apu Kesu.

<sup>12</sup> Á yáyù nga meparáyaw si Apu Kesu nga Yápu tam megapu nikayu. Á meparáyaw kayu gapay, gapu ta tatole na kayu. Á mapalurò ngámin danniaw megapu sù allà ni Namarò nittam áンna yù allà ni Apu Kesu Kiristu nittam.

## 2

### *Yù Panoli na sangaw ni Apu Kesu Kiristu ta Dabbuno*

<sup>1</sup> Á ajian yù kagiam mi nikayu, wáwwagi, ta meyannung sù panoli na sangaw ni Apu Kesu Kiristu áンna yù pangammung na nittam ta gián na.

<sup>2</sup> Ari kayu maburung, áンna ari kayu maburuburionán, nu marámak naw ta jmittálín yù ággo ni Apu Kesu áンna nanolingo. Ari kayu manguruk sù kagiad da. Ta nu kagiad da ta ajian yù ábbilinán ni Namarò nga nakkagi nira, á massiri ira lâ. Á nu kagiad da ta sikán yù nakkagi nira, onu kagiad da ta yáyù initúrâ ku, ari gemma kuruk yù kagiad da.

<sup>3</sup> Á mappalán kayu laguk tapè awán ta mangilogó nikayu, maguray lâ yù kagiad da. Ta mapolu bì nga aru yù ira tatolay nga mamotu kâ Namarò, lage nayù panoli ni Apu Kesu. Á mepalappâ laguk yù narákénga tolay nga mangontará kâ Namarò. Á potuán na yù bilin ni Namarò, ngam yù impiernu yù natullà nga labbetán na.

<sup>4</sup> A yane tolay, kontarán na áンna potuán na yù ngámin nga ingágad da ta dios áンna yù ngámin nga pakimorayád da. Á ipotun na yù baggi na ánné kâ Namarò, á umay magitubang sù mangilin nga kapilliá ni Namarò, nga makkagi ta aggina yù Namarò.

<sup>5</sup> Arán naw panò manonò ta yáyù gemma yù kinagi ngaw nikayu ta keggâ paga nikayu?

<sup>6</sup> Á ta meyannung ta dattál nayù tolay nga narákénga mangontará kâ Namarò, ammu nawin gemma ta ajian yù kegaggarán na. Ngam mepalappâ sangaw nu ággo na nga sinullà ni Namarò.

<sup>7</sup> Á mássiki nu ari paga mappasingan, ajianin ta dabbuno yù pakáwayyá na nga arát tam kánnámuán, nga mangilogó sù ira tatolay. Ngam megaggak áンna ari mepalappâ yù narákénga tolay, áddè ta kelillí nayù mangigaggak kuna.

<sup>8</sup> Á sangaw nu nelillikin yù mangigaggak, mepalappâ laguk yù narákénga tolay nga mangontará kâ Namarò. Ngam umay sangaw si Apu Kesu, á isù na, á matay yù narákénga tolay nga mangontará, á mararál megapu sù dalingárang ni Apu Kesu ta pappasingan na.

<sup>9</sup> Á sangaw nu duttái yù narákénga mangontará, ajian kuna yù pakáwayyá ni Satanas, á áppè mamagaddátu si Satanas ta aru nga makkakerumá nga makapállà nga akkuán na tapè ilogò na yù ira tatolay.

<sup>10</sup> Á aru yù ira tatolay nga melogò, á magawáwan ira, nga impiernu yù labbetád da, gapu ta manaki ira nga maginná sù kuruk nga bilin ni Namarò, tapè meyígù ira nakuan.

<sup>11</sup> Á gapu ta panakì da, táttájíán ni Namarò ira, tapè melogò ira megapu sù pangilogò ni Satanas, á kurugad da yù siri na.

<sup>12</sup> Á yáyù nga pagikaruan ni Namarò yù ira ngámin nga ari manguruk, gapu ta arád da kurugan yù kuruk, ngam ipagayáyâ da lâ yù pangnguá ra ta naráké.

### *Yù Ángngiddù ni Namarò nittam*

<sup>13</sup> Ngam sikayu, wáwwagi mi, nga iddukan nayù Yápu tam, mepángngà ta sigídá kami maddáyw kâ Namarò megapu nikayu, gapu ta sikayu yù piñíli ni Namarò lage na pinarò yù dabbuno, tapè meyígù kayu, megapu ta pamakarenu nayù Mangilin nga Ikararuá ta nonò naw áンna yù panguruk naw sù kuruk nga bilin na.

<sup>14</sup> Á yáyù ipagágál ni Namarò nikayu, tapè mesipà kayu nga meparáyaw kâ Apu Kesu Kiristu, megapu sù pangilayalayâ mi sù napiá nga dámak.

<sup>15</sup> Wáwwagi mi nga mangikatalà kâ Apu, ipasigaggà naw laguk yù ángnguruk naw kuna. Á tánggagan naw yù ngámin nga napiá nga kustombare nga inituddu mi nikayu ta keggâ mi nikayu áンna yù initúrâ mi gapay.

<sup>16</sup> Á parè bì ta ikákkallà na ittam di Apu Kesu Kiristu nga Yápu tam áンna si Namarò nga Yáma tam, nga mangiddù nittam. Mannanáyun yù pamanne ni Namarò nittam áンna yù pangikallà na nittam, ta iyawâ na nittam yù napiá nga iddanamát tam.

<sup>17</sup> Á yáyù nga ipakimállà mi sikayu kári Yápu tam áンna si Namarò nga Yáma tam, ta parè bì ta pabbannáyád da yù nonò naw, áンna abbágad da kayu, tapè napiá lâ yù ngámin nga akkuán naw áンna yù kagian naw.

**3***Makimállà ittam ánnna Matarabáku ittam*

<sup>1</sup> Á wáwwagi mi, ipakimállà naw kami gapay kâ Namarò, ta abbágán na kami ta pangilayalayâ mi, tapè massamâ yù bilin ni Apu sù ira ngámin nga tatolay, á manguruk ira ánnna makimoray ira gapay nga kunnay nikayu.

<sup>2</sup> Á yawe gapay ipakimállà naw, ta melilli kami sù ira narákè nga tatolay nga mangnguá nikami nakuan, ta ajian garè yù ira nga manakì nga manguruk sù ubobuk ni Namarò.

<sup>3</sup> Ngam mekatalà si Apu Kesu nga manaron nittam. Á taronán na kayu ánnna pasikanan na kayu, tapé arán na kayu appútan ni Satanás.

<sup>4</sup> Á gapu ta pangikatalà mi kâ Apu Kesu, ammu mi ta mekatalà kayu gapay nga manuppál sù ngámin nga kinagi mi nikayu, ánnna ari kayu malurâ nga mangupù sù taddám mi nikayu.

<sup>5</sup> Á sigidá mi ipakimállà gapay ta ipakánnámu ni Apu Kesu nikayu yù pangiddù ni Namarò nikayu, ánnna abbágán na kayu, tapè makkaká-iddù kayu gapay. Á parè bì ta ipanonò ni Apu Kesu Kiristu nikayu gapay yù ággattam na ta jígâ na, tapè mábbágán kayu gapay nga magattam ta jígâ naw nga kunnay sù pagattam na.

*Yù Kagian ni Pablo nga Meyannung sù ira Mattalakák*

<sup>6</sup> Á wáwwagi mi, taddánám mi kayu laguk megapu sù pakáwayyá mi nga naggapu kâ Apu Kesu Kiristu ta ari kayu mepulupulù sù ira kábulun naw nga mattalakák, nga ari manguruk sù inituddu mi nikayu.

<sup>7</sup> Ta ammu naw yù napiá nga ággangnguá mi nga inipasingam mi, tapè párigán naw kami. Ta ari kami gemma nattalakák ta keggá mi nikayu.

<sup>8</sup> Ari kami bulubugá nakkiddaw ta kanam mi nikayu. Á awán ta inâ mi nga arám mi pinagán, ánnna nattarabáku kami ta ággaw ánnna gabi, tapè ari malannapán yù jígâ naw megapu nikami.

<sup>9</sup> Á mepángngà gemma nga abbágán naw kami nakuan, gapu ta pangituddu mi nikayu, ngam awán bulubugá ta kiniddo mi nikayu, tapè ipasingam mi nikayu yù napiá nga párigán naw.

<sup>10</sup> Á keggá mi nikayu, yawe yù itaddám mi nikayu, “Nu ajian yù tolay nga manakì nga mattrabarabáku, arán naw pakanań.”

<sup>11</sup> Á narámak mi ta ajian garè nikayu yù ira nga magi-itubang lâ, nga ari bulubugá mattrabarabáku, ngam panunnutád da lâ yù akkuán nayù ira kábulud da.

<sup>12</sup> Á danniaw ira nga tatolay laguk yù tabarangám mi megapu sù pakáwayyá mi nga naggapu kâ Apu Kesu Kiristu, á taddánám mi ira ta magimammà ira nga mattratarabáku, tapè eggá nira lápay yù ipangâ da ta máwák da.

<sup>13</sup> Á wáwwagi mi, ari kayu bulubugá malurâ nga mangnguá sù napiá.

<sup>14</sup> Á nu ajan yù ira kábulun naw nga manakì nga manguruk sù kinagi mi sawe túrâ mi, tákkilalán naw ira, á ari kayu mepulupulù nira, tapè mepasiránán ira.

<sup>15</sup> Arán naw ira ibiláng ta ikalusso naw, ngam tabarangán naw ira lâ ta kunnay ta wagi naw.

*Yù Naporíán nga Ipakimállà ni Pablo*

<sup>16</sup> Si Apu Kesu yù paggapuán nayù napiá nga nonò nga magimammà. Á parè bì ta pagimammattan na yù nonò naw. Á maguray lâ yù mesimmu nikayu, parè bì ta sigidá nga mepulupulù yù Yápu tam nikayu ta ngámin nga angayán naw.

<sup>17</sup> Á sikán lápay yù mattúrâ sawe ngágak ku, nga panákkilalán ta ngámin nga itúrâ ku. Á kunniauw yù áttúrâ ku: Pablo.

<sup>18</sup> Á yawe ipakimállà ku, ta ikákkállà na kayu ngámin ni Apu Kesu Kiristu nga Yápu tam.

## Yù Olu nga Túrâ ni Pablo kâ Timotio

*Yù Meyannung sawe Túrâ ni Pablo*

Si Timotio yù bagitolay nga narángnganán ni Pablo ta pangilayalayâ na ta purubinsia na Asia Minor. Á Kudio yù yená ni Timotio, ngam Gareko yù yáma na. Á inibiláng ni Pablo ta kunnay ta anâ na si Timotio, gapu ta si Pablo yù nangituddu kuna sù panguruk na kâ Apu Kesu.

Á gapu ta kuruk nga mangikatalà si Timotio kâ Apu Kesu Kiristu, inapà ni Pablo ta mepulù kuna nga mangabbák, á minay ira ta ili na Epeso nga mangilayalayâ sù napiá nga dámak nga meyannung kâ Apu Kesu. Á ta páno ni Pablo ta Epeso nga umay ta purubinsia na Masidonia, bittáng na si Timotio ta Epeso ta manaron sù ira manguruknga naggagammung tán. Á pinappalán ni Pablo si Timotio ta meyannung sù ira mangituddu nga ari kuruk yù ituddu ra, á sinabarangán na ta gammán na ira.

*Yù Mayán na yawe Túrâ*

*Yù Pamegapu nayù Túrâ (1:1-2)*

*Yù Ituddu ni Pablo kâ Timotio nga Meyannung sù Pangituddu na (1:3-11)*

*Yù Pabbabalabálà ni Pablo kâ Namarò megapu sù Allà na (1:12-20)*

*Yù Meyannung ta Pakimállà tam kâ Namarò (2:1-15)*

*Yù ira Manaron sù ira Maggagammung nga Makimoray kâ Apu (3:1-16)*

*Yù Meyannung sù ira nga Mangituddu ta Siri (4:1-16)*

*Yù Ákkiwagi tam sù ira Kábulut tam nga Manguruk (5:1-16)*

*Yù Meyannung sù ira Karakalán nga Mammaguray sù ira Manguruk (5:17-6:2)*

*Mappalán ittam sù ira Mangituddu ta Ari Kuruk (6:3-10)*

*Yù Panabarang ni Pablo kâ Timotio (6:11-21)*

<sup>1</sup> Sikán si Pablo nga mattúrâ sawe. Sikán yù minángngilayalayâ sù napiá nga dámak nga meyannung kâ Apu Kesu Kiristu, gapu ta sinullà dangà di Namarò kâ Apu Kesu. Si Namarò yù mangiyígù nittam, á si Apu Kesu Kiristu yù iddanamát tam nga mattoli.

<sup>2</sup> Á mattúrákà nikaw, Timotio, nga anâ ku. Ta mebiláng ken ta kuruk nga anâ ku gapu ta sikán yù manabarang nikaw ta meyannung sù ángngikatalà mu kâ Apu Kesu. Á ipakimállà taka kári Namarò nga Yáma tam kâ Apu Kesu Kiristu nga Yápu tam, ta iddi-iddukad da ka. Á parè bi ta ikákkálà da ka gapay áンna pagimammata da ka, tapè napiá yù áaggiám mu.

*Yù Ituddu ni Pablo kâ Timotio nga Meyannung sù Pangituddu na*

<sup>3</sup> Á pidduák ku nga kagian yù kinágì nikaw ta pánò nga umay ta Masidonia, ta mabattáng ka bì ta Epeso, tapè gammám mu yù ira tatolay nga mangituddu sù tanakuán nga ari negittá sù kuruk nga inituddu.

<sup>4</sup> Á kagiam mu nira ta arád da tángngagan yù bídá ra nga meyannung sù ira ngaw mengal nga naggaká nira, ánná yù pangilistá ra ta ngágán nayù ira ngaw naggaká nira, ta ari ira mábbágán nga tumuttul kâ Namarò megapu karannian. Ta nu tángngagad da lâ yù bídá ra ánná pangilistá ra sù ira naggaká nira, yá lâ pabbalinán na ta makkakápereperang ira ta ubobuk ánná maddaráma ira. Ngam mábbágán ira galâ ta mapalurò sù ipakuá ni Namarò nira megapu sù ángngikatalà da kâ Apu Kesu.

<sup>5</sup> Á yawe yù napiá nga pabbalinán nayù ipetuddu mi nikaw, ta makkaká-iddù ira. Á mapalurò yù pakkaká-iddù da nu ari ira mabbábág sù ángngikatalà da kâ Apu, ánná aláppaw yù nonò da, gapu ta awán ta liwâ da nga nononopad da.

<sup>6</sup> Á aijjan garé yù ira tatolay nga manángngák ta bídá nga meyannung sù ira naggaká nira ánná yù pangilistá ra ta ngágad da, á nallikuránad den yù napiá nga metuddu nira, á tángngagad da lâ yù pappereperang da ta ubobuk, nga awán ta serbi na.

<sup>7</sup> Á gapu ta ikáyâ da ta meparáyaw ira sù ira kábulud da, á yáyù nga ikáyâ da mangituddu sù tunung nga inipetúrâ ni Namarò kâ Moyses. Ngam arád da garé kánnámuán yù ubobugad da ánná ituddu ra. Á mássiki nu arád da ammu yù kebalinán nayù tunung, ikáyâ da kagumánan yù ira tatolay.

<sup>8</sup> Á ammu tam gemma ta napiá yù tunung ni Namarò nga inipetúrâ na kâ Moyses, nu iyusá tam ta kunnay sù ikáyâ ni Namarò, tapè matákkilalát tam yù liwâ tam kâ Namarò nu kánnámuát tam yù tunung na.

<sup>9</sup> Á kánnámuát tam ta iniyawâ ni Namarò yù tunung, nga ari megapu ta paggammá ni Namarò sù ira napiá nga tatolay, nu ari galâ gapu ta gammán na yù ira nga ari tumulù

sù tunung, ánná yù ira mamotu nga ari maganássing kâ Namarò, nga ipagayáyâ da lâ yù palliwâ da, yù ira tatolay nga narákè yù nonò da, yù ira makkakagi kâri Namarò, yù ira mangibanabanù, yù ira mamapátay sù darakal da ánná yù ira ngámin nga mamapátay.

<sup>10</sup> Á gammán na gapay yù ira meruruk sù arád da atáwa ánná yù ira ngámin nga mangarallaw, yù ira makkokò ta tololay nga iláku ra, yù ira massiri ánná yù ira nga ari kuruk yù kagiad da ta passistigu ra, ánná yù ira ngámin nga manguguá ta mekontará sù napiá nga metuddu nira.

<sup>11</sup> Á yawe napiá nga metuddu yù napiá nga dámak nga ilayalayá ku, nga inikatalà na nikán ni Namarò, si Namarò nga maddalingárang nga maráyaw.

*Yù Pabbalabálà ni Pablo kâ Namarò megapu sù Allà na*

<sup>12</sup> Á mabbalabálakà kâ Apu Kesu Kiristu nga Yápu tam, gapu ta inikatalà nangà, á sinullà nangà ta masserbi kuna. Á pasikanan nangà, tapè palurotak ku yù ngámin nga ipakuá na nikán.

<sup>13</sup> Ta inagálán nangà, mássiki nu sikán garè yù ngaw nakkakagi kâ Apu Kesu, ánná jinigirág ku yù ira manguruk kuna, nga ibiláng na ta kunnay ta baggi na. Á inikállà nangà ni Apu Kesu, gapu ta arák ku kánnámuán yù kingnguá kuna, ánná aringà paga nanguruk kuna.

<sup>14</sup> Á mássiki nu kuruk nga narákè yù liwâ ku, ngam nepallà yù allà ni Apu Namarò nikán. Á inagálán nangà ta mangikatalà kâ Apu Kesu, tapè mábbágánà nga mangiddù sù ira kábuluk ku, ta kunnay sù ángngiddù ni Apu Kesu nittam.

<sup>15</sup> Á kuruk nga mekatalà yawe nga nakagi, ta "Minay si Apu Kesu Kiristu sawe dabbuno tapè iyígù na yù ira malliwâ." Á napiá nu manguruk yù ira ngámin nga tatolay kuna. Á sikán garè yù karáketán nayù ira ngámin nga malliwâ.

<sup>16</sup> Á yáyù gapu na nga inikállà nangà ni Namarò, sikán nga karáketán nga nalliwâ, tapè ipasingan ni Apu Kesu Kiristu yù pagáddekan nayù ángngikállà na sù ngámin nga tatolay nga umay paga nga manguruk kuna. Á yáyù gapu na nga pinakomá nangà, tapè ipakánnámu na sù ngámin nga tatolay yù ámmakomá na níra gapay, nu ikatalà da, tapè málâ da gapay yù áttolle ra nga awán ta áddè na.

<sup>17</sup> Dayáwat tam si Namarò nga Patul nga mammaguray ta ngámin ta áddè ta áddè. Awán ta kagittá na. Ari matay ánná ari masingan. Á aggina lâ yù pakimorayát tam ta áddè ta áddè. Ammán!

<sup>18</sup> Á Timotio nga anâ ku, yawe yù ipakuá nikaw nga kunnay sù kinagi ra ngaw nayù ira ábbilinán ni Namarò, nga inipalappâ ni Namarò nga meyannung ta panullà na nikaw, ta manuppái ka sù ipatarabáku na. Pataggatam mu laguk yù nonò mu ta kunnay sù napiá nga suddálu, tapè ari ka mappasirán nga maggammá sù ira tatolay nga mangituddu sù ari kuruk.

<sup>19</sup> Á tangngalám mu ta napiá yù ángngikatalà mu kâ Apu Kesu, nga kun na ármas nayù napiá nga suddálu. Á ilillì mu yù baggim sù ira malliwâ, tapè ari ka mekanakanâ sù narákè, ánná marenú nga aláppaw yù nonò mu. Ajjan garè yù ira tatolay nga pinaguráyâd da yù napiá nga ammu ra, gapu ta ikayá da yù narákè. Á ta kunnian, jinarál da yù ángnguruk da kâ Apu.

<sup>20</sup> Di Imenio kâ Alekanduru yù duá nga nekáttuy sù napiá nga ángnguruk da. Á initulù ku ira ta pakáwayyá ni Satanas, tapè mapággáng ira sangaw, á patukkatac da yù pakkakagi ra kâ Namarò.

## 2

*Yù Meyannung ta Pakimállà tam kâ Namarò*

<sup>1</sup> Á yawe yù mapolu nga kagiak ku, ta máwák nga ipakimállà tam kâ Namarò yù ira ngámin nga tatolay, ta abbágán na ira, ánná iyawâ na níra yù awágad da. Á dayáwat tam si Namarò ta pabbalabálà tam kuna megapu sù ira kábulut tam ánná yù ángngabbák na níra.

<sup>2</sup> Á ipakimállà tam gapay yù ira ngámin nga patul ánná yù ira ngámin nga makáwayyá nga mammaguray nittam, tapè napiá yù ággimammá tam sù giát tam, ánná napiá yù ákkwagi tam sù ira kábulut tam ta paggagammung tam nga makimoray kâ Apu Namarò.

<sup>3</sup> Ta napiá nu ipakimállà tam ta kunnian, ta magayáyâ nittam si Namarò, nga mangiyígù nittam.

<sup>4</sup> Á yawe yù karagatán ni Namarò, ta meyígù nakuan yù ira ngámin nga tatolay ánná kánnámuad da yù kuruk nga bilin na.

<sup>5</sup> Tádday lâ si Namarò, á tádday lâ yù tolay nga mamakkápiá sù ira tatolay kâ Namarò.

Aggina si Apu Kesu Kiristu, nga nabbáli ta tolay.

<sup>6</sup> Á initulù ni Apu Kesu yù baggi na,  
nga metapil megapu sù ira ngámin nga tatolay,  
tapè meyigú ira ngámin,  
nga ari mekanakanâ sangaw ta pangukum ni Namarò,  
ánnna mapakomá ira ta liwiliwâ da.

Á natay yù Anâ ni Namarò ta kurù,  
sù ággaw nga sinullà ni Namarò.

Yáyù pangipakánñámmu ni Namarò ta karagatán na  
ta meyigú yù ira ngámin nga tatolay ta dabbuno,  
tapè mesipà ira kuna ta lángi.

<sup>7</sup> Á yáyù gapu na nga sinullà nangâ ni Namarò ta mangilayalayâ sù kuruk nga bilin na, tapè tudduúku yù ira ngámin nga ari Kudio sù meyannung ta pangikatalà da kâ Apu Kesu. Á arák ku siri, ta kuruk yaw nga kagiak ku.

<sup>8</sup> Á yawe laguk yù karagaták ku ta meyannung sù ira manguruk nga maggagammung nga makimoray kâ Namarò ta ngámin nga lugár da. Mawák nga makimállà yù ira lálláki kâ Namarò, nga napiá lâ yù nonò da, ánnna ari ira mapporay, ánnna ari ira maddaráma.

<sup>9</sup> Á yù ira bábbay, mawák nga ari merallà yù ámmarawási ra. Ta napiá lâ nu mabbarawási ira ta mepángngâ nira, nga ari aru yù ámmakástá ra ta baggi ra ánnna duddù da, nga bulawán onu perlás, onu barawási nga nanginá.

<sup>10</sup> Ta yù napiá nga akkuád da, nga pangabbák da sù ira kábulud da, yáyù mepángngâ nga ámmakástá nayù ira bábbay nga manguruk kâ Namarò.

<sup>11</sup> Á ta paggagammung tam nga makituddu sù bilin ni Namarò, mawák nga tumulù yù ira bábbay ánnna magimammà ira, tapè tángngagad da ta napiá yù metuddu nira.

<sup>12</sup> Á sikán, arák ku anugutan ta babay yù mangituddu onu makáwayyá sù ira lálláki. Mawák nga magimammà nga magginná lâ yù ira bábbay.

<sup>13</sup> Á yáyù urè, gapu ta napolu nga pinarò ni Namarò yù laláki, nga si Lákay Adan. Á ta kabalín na namarò kâ Adan, pinarò na yù babay, nga si Abbò Eba.

<sup>14</sup> Uliotturu, ari gemma si Adan yù nelogò nu ari galâ si Eba. Á yáyù nga napolu si Eba nga nalliwâ.

<sup>15</sup> Á yá pabbalinán nayù liwâ da yù karigirigâ nayù ira bábbay ta paganâ da. Ngam abbágán na ira ni Apu Namarò, tapè meyigú ira, nu mapasíaggâ yù ángngikatalà da kâ Apu Kesu, á iddi-iddukad da yù ira kábulud da, ánnna marenu yù nonò da, ánnna napiá yù ággangnguá ra.

### 3

#### *Yù ira Manaron sù ira Maggagammung nga Makimoray kâ Apu*

<sup>1</sup> Kukurugán yawe nga nakagi ta meyannung sù ira maggagammung nga makimoray, ta napiá nu ikáyâ na tolay ta aggina yù natullà ta makáwayyá nga manaron sù ira kábulun na nga manguruk, ta yáyù napiá nga maráyaw nga ipatarabáku ra kuna.

<sup>2</sup> Á yáyù nga mawák nga napiá yù ággangnguá nayù tolay nga pilian naw ta manaron sù ira manguruk. Mawák nga awán bulubugá ta akkuán na nga kepasíráñán na. Á tádday lâ yù atáwa na. Á aggina gapay yù tolay nga pakimorayán nayù ira kábulun na, megapu sù napiá nga akkuán na. Á mawák nga ammu na mangigaggak ta nonò na ánnna baggi na. Mawák nga ammu na mamaddulò sù ira álliuk. Á mawák nga ammu na mangituddu sù bilin ni Namarò.

<sup>3</sup> Á pilian naw lâ yù ari magillellaw, nga ari minákkiramá, ngam minángngikállà ánnna masippâ, ánnna ari mokkuk.

<sup>4</sup> Á mawák nga tullatan naw lâ ta manaron yù tolay nga ammu na mangammung ta napiá sù atáwa na ánnna yù ira ánâ na, ánnna tudduán na yù ira ánâ na, tapè tumulù ira ánnna makimoray ira kuna.

<sup>5</sup> Ta makáwayyá panò nga manaron yù tolay sù ira kábulun na nga manguruk kâ Namarò, nu arán na ammu nga mammaguray sù ira ánâ na? Ari gemma!

<sup>6</sup> Á ari máyâ nu tullatan naw yù ira bagu nga manguruk ta manaron, marakè motun yù nonò da, ánnna mappeddáráyaw ira, á mekanâ ira sù pamagikáru ni Namarò kâ Satanas.

<sup>7</sup> Á mawák nga matákkilalán nayù ira ari manguruk ta napiá nga tatolay yù ira manaron, tapè ari ira mepasíráñán, ánnna arán na ira melogò ni Satanas.

#### *Yù Meyannung sù ira Mangabbák sù Manaron*

<sup>8</sup> Á yù ira tatolay nga mangabbák, nga mepasserbi sù ira manaron, mawák gapay nga talákkurugad da yù napiá nga akkuád da, ánná ari ira massiri. Á ari ira magillellaw, ánná ari ira mokkuk.

<sup>9</sup> Mawák nga napasigaggà yù ángngikatalà da sù bilin ni Namarò nga pinalappâ na nittam nga meyannung kâ Apu Kesu, ánná awán nakuan ta nakaliwatád da, tapè marenu yù nonò da.

<sup>10</sup> Á lage naw ira tullatan, mapolu bì nga pasikkálan naw ira, nu kuruk nga napiá yù ángnguruk da ánná ággangnguá ra. Á nu mepasingan ta napiá ira, nga awán ta ipappaliwâ naw nira, á mayâ ta tullatan naw ira ta mepasserbi sù toláy nga manaron, nga mangabbák sù ira kábulun naw nga magawák.

<sup>11</sup> Á yù ira bábbay gapay nga atáwa nayù ira mangabbák, mawák nga napiá ira gapay nga pakimorayán. Mawák nga ari ira mabbebbek ánná ari ira magillellaw, á matunung ánná mekatalà ira ta ngámin nga mepakuá nira.

<sup>12</sup> Á yù ira lálláki nga tullatan naw ta mangabbák, mawák nga tádday lâ yù atáwa ra. Á mawák nga taronád da ta napiá yù ira ánâ da ánná yù ira ngámin nga maggián ta bale ra.

<sup>13</sup> Ta yù ira mangabbák nga malappâ nga masserbi ta napiá, málâ da yù napiá nga áaggiád da, ta aggira yù pakimorayán nayù kábulud da, ánná mappelò ira nga makkagi sù pangikatalà da kâ Apu Kesu Kiristu.

#### *Yù Nelímak nga Pinalappâ ni Namarò*

<sup>14</sup> Á Timotio, ikáyâ ku ta et taka sangaw nakuan tullúnán. Ngam mattúrákà sawe itabarang ku nikaw,

<sup>15</sup> ta mässiki nu eggá yù kegaggarák ku sangaw, á ammum yù mepángngà nga akkuát tam, sittam ngámin nga kukuá ni Namarò nga mesipâ kuna. Ta sí Namarò yù matotolay ta áddè ta áddè, á sittam nga manguruk kâ Namarò yù mekatalà ta mangipakánnámmu sù kuruk nga bilin na, megapu sù napasigaggà nga panguruk tam.

<sup>16</sup> Á ammu tam ta kukurugán nga makapállâ yù metuddu nga meyannung ta pangikatalà tam kâ Apu Kesu, nga nelímak ngaw áddè ta pangipalappâ ni Namarò:

Naggapu si Apu Kesu Kiristu ta lángi, á minay ta dabbuno nga nabbáli ta toláy,  
nga mepasingan ta kuruk nga Anâ ni Namarò nga awán ta liwâ na,

gapu ta naginnanolay megapu sù pakáwayyá nayù Mangilin nga Ikararuá.

Á yù ira daroban ni Namarò, nasingad da si Apu Kesu.

A melayalayâ si Apu Kesu sù ira ngámin nga makkakerumá nga tatolay ta dabbuno.

Á ta ngámin nga páppatulán ta dabbuno, ajjan yù ira tatolay nga mangikatalà kuna.

Á inâ ni Namarò ta lángi, nga meparáyaw.

## 4

#### *Yù Meyannung sù ira nga Mangituddu ta Siri*

<sup>1</sup> Á daretiu yù kagian nayù Mangilin nga Ikararuá, nga ajjan yù ira tatolay nga pallikuránád da yù ángnguruk da kâ Apu Kesu sangaw nu aranni ngin yù pagádédekán na ággaw, á tángngagad da yù ituddu nayù ira maganáni, nga mangilogò nira. Á kurugad da yù ituddu nayù ira anitu.

<sup>2</sup> Á yù ira tatolay nga mangituddu sù ituddu nayù ira anitu nga ari kuruk, áppa-áppé pípiá ira. Á mapenám ira nga massirisiri, á yáyù nga aringin maburung yù nonò da, á arád da mánnaámmu yù napiá nga ikáyâ ni Namarò.

<sup>3</sup> Á kagiad da ta mepugik yù mangatáwa. Á kagiad da gapay ta ajjan yù kanan nga makanniaw, ngam ari kuruk yù kagiad da. Ta pinarò ni Namarò yù ngámin nga kanan. Á sittam nga mangikatalà kâ Namarò, nga makánnámmu sù kuruk, mayâ nga kanat tam yù ngámin, nu mabbalabálà ittam kâ Namarò megapu sù kanat tam.

<sup>4</sup> Á napiá yù ngámin nga makkakerumá nga kanan nga pinarò ni Namarò. Á arát tam nakuan ipuerá, ngam kumán ittam, ánná mabbalabálà ittam kâ Namarò megapu sù kanat tam.

<sup>5</sup> Ta mebiláng ta mepángngà yù kanat tam megapu sù ubobuk ni Namarò ánná yù pabbalabálà tam kuna.

#### *Yù Meyannung sù Napiá nga Tolay nga Masserbi kâ Namarò*

<sup>6</sup> Á nu yawe nga kinagi nikaw yù ituddum sù ira wáwwagi tam nga manguruk, á napiá ka nga masserbi kâ Apu Kesu Kiristu. Á mepasingan ta matudduán ken ta napiá, ánná mapasigaggà yù ángngikatalà mu, megapu sù napiá nga metuddu nga kurugam mu.

<sup>7</sup> Arám mu tángngagan yù pabbídá ra, ta siri ra lâ nga awán ta serbi ra kâ Namarò. Ngam tángngagam mu yù ipakuá ni Namarò nikaw.

<sup>8</sup> Á nonopam mu yù nakagi, nga kun na,

“Napiá nu pepenamat tam yù baggi tam ta narámmà nga tarabáku,  
tapè massikan yù baggi tam ta baddì.

Ngam más napiá nu pasikanat tam yù nonò tam nga manuppál sù ipakuá ni Namarò  
nittam,

ta yá pabbalinán na yù napiá nga áttole tam sawe dabbuno kunangane,  
ánná yù napiá gapay nga áttole tam ta lángì ta áddè ta áddè.”

<sup>9</sup> Ámekatalà yane nga nakagi, á napiá nakuán nu kurugan nayù ira ngámin nga tatolay.

<sup>10</sup> Á yáyù nga magattam ittam nga ari malurâ nga mamannák ta baggi tam nga mangipakánnámmu sù napiá nga dámak, gapu ta napasigaggà yù ággiddanáma tam kâ Namarò nga matotolay, nga mangiyigù sù ira ngámin nga makkakerumá nga tatolay, nepatalugáríng sù ira galâ nga mangikatalà kuna.

<sup>11</sup> Á yawe laguk yù ipakuá nikaw, ta ituddum sù ira ngámin nga tatolay yù ngámin nga kinagi nikaw, á tabarangám mu ira ta kurugad da ta napiá yù ngámin nga ituddum.

<sup>12</sup> Á magimuguk ka sù akkuám mu, tapè ari ka mappasirán nga manabarang nira, mássiki nu nábbing ka paga. Ipasingam mu nira yù napiá nga ággangnguám, tapè párigád da yù napiá nága ággubobuk mu, yù napiá nga akka-akkuám mu, yù ángngiddù mu nira, yù napasigaggà nága ángngikatalà mu kâ Namarò, ánná yù napiá nága nonò mu.

<sup>13</sup> Á ta paggagammung naw nga makimoray kâ Namarò, bibbiram mu yù bilin ni Namarò nira, á ilayalayá mu ánná ituddum nira yù kebalinán na. Á tabarangám mu ira gapay, tapè akkuád da yù napiá nága ituddum nira. Yáyù akkuám mu áddè ta labbè ku ta giám mu.

<sup>14</sup> Arám mu káttamán yù pakáwayáy nága iniyawá ni Namarò nikaw ta panullà da nikaw nayù ira ábbilinán ni Namarò, ánná pakkagi ra sù inipobobuk nayù Mangilin nga Ikararuá nira, ánná pangipotud da ta limá ra nikaw nayù ira karakalán nága manguruk.

<sup>15</sup> Tángngagam mu laguk yawe ngámin nága ipakuá nikaw, tapè masingan nayù ira ngámin nága tatolay yù pangáppípiá nayù ángnguruk mu.

<sup>16</sup> Imugurám mu yù boggim, á ari ka malurâ nága mangituddu sù kuruk nága bilin ni Apu. Uputam mu yù napiá nága ággangnguám ánná yù napiá nága pangituddum. Ta nu kunnian yù akkuám mu, meyígù ka nága mepaggián kâ Namarò ta áddè ta áddè. Á ari lâ sikaw yù meyígù, nu ari gapay ta mesipà yù ira ngámin nága magginná sù ituddum.

## 5

### *Yù Ákkiwagi tam sù ira Kábulut tam nága Manguruk*

<sup>1</sup> Á ta ángngarigán nu ajjan yù lakalákay nága malliwâ, á arám mu papporayán, ngam tabarangám mu lâ ta kun na yámam. Á yù ira nága nábbing ánné nikaw, tabarangám mu ira ta kun na kuruk nága uriám mu.

<sup>2</sup> Á yù ira bábbakabákà, ibiláng mu ira ta kun na yenám. Á yù ira bábbay, ibiláng mu ira ta mánang mu onu uriám mu, á imugurám mu yù nonò mu nira, á tabarangám mu ira gapay ta kun na kuruk nága wáwwagim.

<sup>3</sup> Á Timotio, napiá nu sikayu ngámin nága mangikatalà kâ Apu Kesu yù mangabbák sù ira kuruk nága bálu nága bábbay, nága awán bulubugá ta mangabbák nira.

<sup>4</sup> Á nu ajjan yù bálu nága ajjan yù ánâ na onu ápù na, tudduám mu yù ira ápù na ánná ánâ na, tapè aggira yù mangabbák kuna, tapè bálatad da gapay yù ánnaron na ngaw nira, ta mepángngá yaw ta ánninganán ni Namarò.

<sup>5</sup> Á yù kukurugán nága bálu nága awán bulubugá ta mangabbák kuna, si Namarò lâ yù iddanamán na, á uputan na yù pakimi-írnállà na ta ággaw ánná gabi.

<sup>6</sup> Ngam nu ajjan yù bálu nága nonopan na lâ yù ipagayáyá na, á mássiki nu matolay paga yù baggi na, ngam kunnay ta natayin.

<sup>7</sup> Á itaddám mu yawe nága kinagi sù ira ngámin nága manguruk, tapè napiá yù akkuád da.

<sup>8</sup> Ta mássiki yù ira ari manguruk kâ Apu, ammu ra mangabbák sù ira kábbale ra. Á yù tolay nága manguruk kâ Apu, nu arán na iddukan yù ira kanakanáyún na, nepatalugáríng sù ira ánâ na, á nallikuránán nen yù ángnguruk na, á naráké ánné sù ira ari manguruk.

<sup>9</sup> Á ta meyannung sù ira bálu nága abbágán naw, ilistá naw lâ yù bálu nága annamapulu onu matturù yù dagun na, nága namittán lâ yù pakiatáwa na.

<sup>10</sup> Á máwák gapay nága napiá yù ággangnguám na. Á ta ángngarigán, máwák nága napiá yù panuddu na ngaw sù ira ánâ na, ánná napiá yù pamaddulò na sù ira álliuk nága umay kuna,

ánnna ammu na mangikállà sù ira pobare ánnna yù ira marigirigâ, ánnna dán nga naparán nga mangnguá ta maguray lâ nga napiá, tapè mábbágán yù ira kábulun na.

<sup>11</sup> Á yù ira bálu nga nábbing paga, arán naw ira ilistá. Ta mássiki nu itabbá ra yù passerbi ra kâ Apu Kesus Kiristu, á ibabáwi ra galâ sangaw yù pangitabbá ra kâ Apu, nu gustu ra makiatáwa.

<sup>12</sup> Á nu kunnian, mapanunnután ira, gapu ta arád da palurotan yù napolu nga initabbá ra.

<sup>13</sup> Otturu, mattalakák ira gapay, á mappassapassiár ira ta bale nayù karúbá ra, á mabbebbek ira, ánnna ikiruk da yù baggi ra sù ari meyannung nira. Á ubu-ubobugad da yù ari mepángngá.

<sup>14</sup> Á yáyù nga itabarang ku laguk sù ira bálu nga nábbing paga ta pidduád da makiatáwa, tapè maganâ ira paga. Á taronád da yù ira ánnâ da ta napiá, tapè awán nittam ta ipappaliwâ nayù malussaw nittam.

<sup>15</sup> Ta ajjan garè yù ira bálu nga nallikuránád da yù panguruk da kâ Namarò, á si Satanas yù tuttulad da.

<sup>16</sup> Á itotoli nga kagian yù meyannung sù ira bálu. Nu ajjan yù tolay nga manguruk kâ Namarò, nga eggá yù ira kanakanáyun na nga bálu nga bábbay, á yane tolay laguk yù mangabbák nira, tapè ajjan yù awayyá nayù ira káruán nga manguruk nga mangabbák sù ira káruán nga bálu nga awán bulubugá ta kanakanáyud da nga mangabbák nira nakuan.

#### *Yù Meyannung sù ira Karakalán nga Mammaguray sù ira Manguruk*

<sup>17</sup> Á ta meyannung sù ira karakalán, nga napiá yù ámmagure ra sù ira kábulud da nga manguruk, á mepángngá ta pakimorayád da ira nayù ira tudduád da, ánnna patturutad da ta napiá gapay yù táddád da, nepatalugáring sù ira maláppà nga mangilayalayâ ánnna mangituddu sù ubobuk ni Namarò.

<sup>18</sup> Táddanán naw ira laguk ta napiá, ta yáyù kebalinán nayù dán nga netúrâ nga ubobuk ni Namarò nga kunniauw: “Arán naw babbaran yù simù nayù báka nga magaggi, tapè kumán nu gustu na.” Á ajjan gapay yù netúrâ nga kunniauw: “Mepángngá ta matáddanán yù mattarabáku.”

<sup>19</sup> Á ta ánggarigán nu ajjan yù tolay nga mangikeká sù táddy nga karakalán nga mammaguray sù ira manguruk, arán naw kurugan yù kagian nayù tolay nga mamaliwâ kuna nu awán ta duá onu tallu nga massistígu ta kuruk yù ipappaliwâ na.

<sup>20</sup> Á nu kuruk nga mangnguá ta narékâ nga arán na ibabáwi, á iyanubáng mu sù ira ngámin nga manguruk, á panunnutám mu, tapè masingan nayù ira ngámin, ánnna maganássing ira, á arád da sangaw párigán.

<sup>21</sup> Á nonopam mu ta ajjan di Namarò kári Apu Kesus Kiristu ánnna yù ira sinullà ni Namarò nga daroban na nga maningen nittam. Á ta ánnninganád da, yawe yù ipakuâ nikaw, ta palurotam mu yù ngámin nga itabarang ku nikaw, á arám mu irumá yù ira tatolay.

<sup>22</sup> Á panullà mu sù ira masserbi kâ Apu, arám mu tullatan yù tolay nga arám mu ammu. Arám mu iddâ nga ipotunán sù limám, tapè meddán ta pakáwayyá na nga masserbi kâ Apu, lagem bi mapolu nga innan yù ággangnguá nayù tolay, nu kuruk nga napiá nga tolay nga mepángngá ta masserbi kâ Apu. Ta nu malliwâ sangaw yù tolay nga sinullà mu, mappalán ka laguk, marakè mekanakanâ ka gapay sangaw sù pakaliwatán na. Imugurám mu yù baggim, tapè marenu yù nonò mu megapu sù napasigaggâ nga pangikatalà mu.

<sup>23</sup> Á ari lâ danum yù inumam mu, Timotio, ngam ámmínun ka gapay ta baddì nga binaráyáng, tapè moru yù takì nayù gutù mu ánnna yù ira káruán nga takì mu, ta makkarakatì ka garé.

<sup>24</sup> Á ta meyannung ta panullà mu sù ira nga masserbi kâ Apu ánnna yù ira kábulud da, nonopam mu ta ajjan yù ira tatolay nga awán ta awayyá ra nga mangilímak sù liwâ da, ta masingan nayù ira tatolay yù kingnguá ra, á ammu tam ta mapanunnután ira nga mapagikáru noka. Ngam ajjan yù ira káruán, nga ari lábbì mepakánnámmu yù pakaliwatad da, ngam mepalappâ lággapay noka.

<sup>25</sup> Á kunnay gapay sù ira tatolay nga napiá yù akkuád da, ta masingat tam yù napiá nga akkuád da. Á mássiki nu arát tam masingan, ari melímak, ta mepalappâ gapay sangaw yù napiá nga kingnguá ra.

<sup>1</sup> Á yawe yù itabarang ku nikayu nga aripan nga manguruk kâ Apu. Pakimorayán naw yù tolay nga passerbián naw, á tuppálan naw ta napiá yù ngámin nga ipakuá na nikayu, tapè awán ta makkakagi kâ Namarò ánnna awán ta mangiluddé sù ituddu tam nga meyannung kâ Apu Kesu megapu sù masingad da nga akka-akkuán nayù ira manguruk kâ Apu.

<sup>2</sup> Á sikayu nga makiaripan sù tolay nga manguruk, arán naw nakuan iluddé yù yápu naw, nu ari galâ ta maláppà kayu nga manuppái sù kagian na. Ta mawwawági kayu ánnna yù yápu naw megapu sù pangikatalà naw kâ Apu. Á máwák nga napiá laguk yù ásserbi naw sù tolay nga mangaripan nikayu, gapu ta aggina gapay yù tole ni Namarò nga iddukan na.

#### *Mappalán ittam sù ira Mangituddu ta Ari Kuruk*

Á yawe nga initúrâ ku nikaw, máwák nga ituddum danniaw laguk sù ira maggagam-mung. Á tabarangám mu ira, tapè kurugad da ta napiá yù ngámin nga kinagì.

<sup>3</sup> Á yù tolay nga mangituddu ta tanakuán, nga ari negittá sù napiá nga ituddu tam nga meyannung sù ángnguruk tam, potuán na yùmekatalà nga ubobuk ni Apu Kesu Kiristu nga Yápu tam.

<sup>4</sup> Á mappeddaráyaw yane tolay, ngam awán ta kánnámmuán na. Yá lâ eggá ta nonò na yù mamereperang ta ubobuk. Á yá lâ pabbalinán nayù pamereperang da ta ubobuk yù pakkaká-abubu ra, ánnna maddaráma ira, ánnna makkakálillibâ ira, ánnna mappanà yù narákè nga nonò da sù ira kábulud da.

<sup>5</sup> Á yáyù nga sigidá ira nga maddaráma ta ubobuk, á maddákekin yù nonò da, ánnna awánin ta awayyára nga makánnámmu sù kuruk nga bilin ni Namarò. Ta kagiad da garè ta málâda yù aru nga kukuára ánnna mabbáli ira ta maríku megapu ta panuttul da kâ Apu Kesu.

#### *Meyárik yù Ággíat tam ta Maríku*

<sup>6</sup> Á sittam nga kuruk nga tumuttuttul kâ Namarò, kuruk nga aijan yù málâ tam, nga ari yù kukuá tam, nu ari galâ yù napiá nga nonò tam nga magimammâ. Á kunnay ittam ta maríku nu magayáyá ittam ánnna bilángat tam ta kustungin yù eggá nittam, mássiki nu baddi.

<sup>7</sup> Ta awán gemma ta iniyáng tam sawe dabbuno ta keyanâ tam, á awán bulubugá ta mepulù tam ta páno tam sawe dabbuno sangaw nu matay ittam.

<sup>8</sup> Á nu aijan yù kanat tam ánnna gámì tam, magayáyá ittam laguk, ta kustungin ta baggi tam.

<sup>9</sup> Yù ira tatolay nga makkarakâ nga marríku, malogon ira garè nga metuluk ta pakali-watád da. Á melogò ira kâ Satanas, ta karagatád da yù aru nga narákè nga awán ta serbi na, nga manarál ta baggi ra, á yá lâ pabbalinád da yù kararál nayù áttole ra saw, á labbetád da lâ yù impiernu, nga paggianád da ta áddè ta áddè.

<sup>10</sup> Ta yù pamassil da ta kuártu yù paggapanuán nayù ngámin nga narákè nga akkuád da. Á aijan garè yù ira tatolay nga nallikuránád da yù ángnguruk da megapu sù pakkaragâ da nga mangukkuk ta kuártu. Á yáyù nga mabagabagal ira ánnna nepallâ yù daddam da, nga pabbalinán nayù kokkuk da.

#### *Yù Panabarang ni Pablo kâ Timotio*

<sup>11</sup> Ngam sikaw yù masserbi kâ Namarò. Arayyuam mu yù ira ngámin nga jikkù ánnna narákè yù akka-akkuád da. Á akkuám mu lâ yù napiá ánnna matunung, ánnna yù ngámin nga ipakuá ni Namarò nikaw. Ipasigaggâ mu yù ángngikatalà mu kâ Apu Kesu, á iddi-iddukan mu si Namarò ánnna yù ira kábulum mu. Ari ka malurâ nga manaron nira. Á attamám mu yù maguray lâ nga makuá nikaw, ánnna ipasingam mu ta masippâ ka sù ira kábulum mu.

<sup>12</sup> Á mássiki nu marigirigâ ka, palurotam mu yù ángnguruk mu kâ Namarò, tapè ari ka máppù sù jígâ ánnna narákè, ánnna málâ mu yù iniyawâ ni Namarò nikaw nga áttolem nga awán ta áddè na. Ta yáyù gapu na nga inagálán na ka ni Namarò, tapè mepattolay ka kuna. Á kinagim yù pangikatalà mu kâ Apu Kesu ta arubág na aru nga tatolay.

<sup>13</sup> Á aijan yù itabarang ku nikaw laguk ta ánnninganán di Namarò nga manotolay ta ngámin nga matolay ánnna si Apu Kesu Kiristu nga nassistigu ngaw ta kuruk nga meyannung kâ Namarò, ta keyarubág na kâ Gubinador Pontius Pilatto.

<sup>14</sup> Á yawe yù ipakuá nikaw, ta tángngagam mu ta napiá ánnna tuppálam mu yù ngámin nga itaddán ni Namarò, tapè awán ta tolay nga mamaliwâ nikaw sangaw nu mattoli saw si Apu Kesu Kiristu nga Yápu tam.

<sup>15</sup> Á sangaw nu duttál yù ággaw nga sinullâ ni Namarò,

panolian na si Apu Kesu Kiristu saw dabbuno.

Táttádday lâ si Namarò, nga maráyaw nga mammaguray.

Aggina yù Patul nayù ira ngámin nga patul,

ánnna yù Yápu nayù ira ngámin nga yápu.

16 Si Namarò lâ yù ari matay.

Á maggián sù gián nayù nawák,  
nga awán ta tolay nga makarakkì kuna.

Awán bulubugá ta tolay nga makasingan kuna, ta ari masingan.  
Meparáyaw si Namarò, nga makáwayyá nga mammaguray ta ngámin,  
nga awán ta áddè nayù pakáwayyá na! Mapaluro! Ammán!

*Yù Akkuád da nakuan nayù ira Maríku*

17 Á ta meyannung sù ira tatolay nga maríku, tabarangám mu ira ta ari ira mapped-daráyaw megapu sù kukuá ra ta dabbuno. Á taddánám mu ira gapay ta arád da ikatalà yù napiá nga ággiád da megapu sù aru nga kukuá ra, nga malogon nga meyawáwan sangaw. Ngam iddanamád da lâ nakuan si Namarò, ta aggina yù mangiyawâ nittam sù ngámin nga napiá nga máwák tam, tapè magayáyâ ittam.

18 Á ituddum bì nira ta akkuád da yù ngámin nga napiá nga awayyá ra, tapè mebiláng ira ta maríku lâ megapu sù napiá nga akka-akkuád da. Ari ira nakuan makkikkì, nu ari galâ dán nga naparán ira nga mangiyawâ sù ira magáwák, á patturutad da nakuan yù iyawâ da nira.

19 Á ta kunnian, mapakappián yù kuruk nga napiá nga ággiád da ta arubáng ni Namarò ta lángì, nga maláddá nga iddanamád da, nga ari metabbà. Á málâ da gapay yù kukturugán nga áttole ra, nga kepattole ra kâ Namarò nga awán ta áddè na.

20 Á sikaw, Timotio, magimuguk ka, á tángngagam mu yù pakáwayyám nga inikatalà ni Namarò nikaw, á ituddum ta napiá yù meyannung kâ Apu Kesu Kiristu. Á ari ka mepulù sù ira mamereperang ta ubobuk, ta ubobugad da lâ yù abbúnad da ta masírik. Ngam ari gemma masírik, ta awán ta serbi na.

21 Ajjan garè yù ira nga makkagi ta kánnámmuád da yù kagiad da nga masírik, á gapu ta tuttolad da yù neparámak ta masírik, yáyù nga nagawáwan iren, ta nekáttuay ira ta panguruk da sù kuruk nga meyannung kâ Apu Kesu.

Á yawe ipakimállà ku, ta parè bì ta ikákkállà na kayu ngámin ni Namarò.

Addè na yû.

## Yù Mekaruá nga Túrâ ni Pablo kâ Timotio

*Yù Meyannung sawe Túrâ ni Pablo*

Pattúrâ na ngaw ni Pablo, aijan nga nabayák nga nebáluk ta karsel sù ili na Roma, túrin ta lugár na Italia. Á naggián si Timotio ta ili na Epeso, nga mangituddu sù ira manguruk. Á ammu ni Pablo ta matay sangaw támma gapu ta pangilayalayâ na kâ Apu Kesu Kiristu.

Á sinabarangán ni Pablo kâ Timotio ta umárayyu sù ira bábbagitolay nga narékè yù ággangnguá ra. Á ipanonò ni Pablo gapay kâ Timotio yù pappalán na sù ira mamereperang ta ubobuk ta meyannung sù panguruk da kâ Apu Kesu. Á kinagi na kuna ta mássiki nu marigirigâ, attamán na lâ, ánnna talákkurugan na nga tuppálan yù pangilayalayâ na, tapè mapasigaggâ yù ángngikatalà na kâ Apu.

*Yù Mayán na yawe Túrâ*

*Yù Pamegapu nayù Túrâ (1:1-2)*

*Yù Pabbalabálà ni Pablo kâ Namarò megapu kâ Timotio (1:3-7)*

*Yù Meyannung sù Allà ni Namarò nittam (1:8-18)*

Máwák nga Attamát tam yù Jigâ nu Masserbi ittam kâ Apu Kesu Kiristu (2:1-13)

Taddánán ni Pablo si Timotio ta ari Mepappeperang ta Ubobuk (2:14-26)

Yù Ággangnguá nayù ira Tatolay ta Panguriánán nga Ággaw (3:1-9)

Mábbágán ittam megapu ta Pabbibbik tam sù Libru ni Namarò (3:10-17)

*Yù Maporián nga Itabarang ni Pablo (4:1-22)*

<sup>1</sup> Sikán si Pablo nga mattúrâ sawe. Sinullà nangà ni Apu Kesu Kiristu megapu sù ure ni Namarò. Á jinok nangà ni Apu Kesu ta umayà mangilayalayâ ta meyannung kuna ánnna yù áttole na nga awán ta áddé na, nga initabbá ni Namarò ta iyawâ na sù ira ngámin nga mangikatalà ánnna mepattatádday kâ Apu Kesu.

<sup>2</sup> Á itúrâ ku nikaw, Timotio, ta sikaw yù kunnay ta kuruk nga anâ ku nga iddukak ku megapu sù ángnguruk mu kári Namarò nga Yáma tam kâ Apu Kesu Kiristu nga Yápu tam. Á yawe ipakimállà ku megapu nikaw, ta iddi-iddukad da ka, ánnna ikállà da ka, á iyawâ da nikaw yù napiá nga ággiám mu ánnna yù napiá nga gawagawáyám mu, tapè magimammâ yù nonò mu.

*Yù Pabbalabálà ni Pablo kâ Namarò megapu kâ Timotio*

<sup>3</sup> Á pakanonò ku nikaw, Timotio, nerallà yù pabbalabálà ku kâ Namarò megapu nikaw. Ta si Namarò yù passeriáku, nga passeriáda gapay nayù ira naggaká nikán, á aringá mappasirán kâ Namarò, gapu ta napiá lâ yù ásserbì kuna. Á ta ngámin nga pakimállà ku kuna ta ággaw ánnna gabi, sikaw yù ipakimállà ku.

<sup>4</sup> Á maraddamá nikaw, ta manonò ku yù pakkulukulè mu sù pánò. Á merallà yù pakkaragá ku nga makasingan nikaw, tapè magayáykâ.

<sup>5</sup> Á dayáwak ku si Namarò ta pakanonò ku sù napiá nga ángngikatalà mu kâ Apu Kesu, nga negítâ sù napiá nga ángngikatalà nayù abbò mu, si Loyda, ánnna yù innò mu, si Yunis, nga mangituddu nikaw.

<sup>6</sup> Á yáyù nga ipanonò ku nikaw yù pakáwayyám nga iniyawâ ni Namarò nikaw, ta panámmi ku nikaw ánnna pakimállà ku kâ Namarò megapu nikaw. Malláppà ka laguk, á uputam mu nga tuppálan yù pakáwayyám nga mangilayalayâ, nga iniyawâ ni Namarò nikaw.

<sup>7</sup> Ta iniyawâ na nittam ni Namarò yù Mangilin nga Ikararuá na. Á arán na gemma ittam ananássingan nayù Mangilin nga Ikararuá, ngam pataggatan na yù nonò tam, tapè mappelò ittam nga mamalurò sù ipakuá na nittam. Á abbágán na ittam gapay nayù Ikararuá ni Namarò, tapè iddukat tam yù ira kábulut tam, ánnna gaggarát tam yù nonò tam ánnna baggi tam.

*Yù Meyannung sù Allà ni Namarò nittam*

<sup>8</sup> Ari ka laguk mappasirán nga makkagi sù ira tatolay ta meyannung kâ Apu Kesu Kiristu nga Yápu tam, mássiki nu uyoyungád da ka. Á ari ka mappasirán megapu sù kebáluk ku, ta nebálugá gemma megapu sù ángnguruk ku kâ Apu Kesu. Á mássiki nu mepajjigirigâ ka nikán, ituddum lâ yù bilin ni Namarò, ánnna attamám mu yù ballem nga jígâ, megapu sù pangabbák ni Namarò.

<sup>9</sup> Ta iniyígù ni Namarò ittam, á inagálán na ittam ta likuránát tam yù palliwâ tam, tapè tatole na ittam nga masserbi kuna ánnna napiá lâ yù akkuát tam.

Á nesipà ittam kâ Namarò, nga ari megapu sù akkuát tam,  
nu ari galâ megapu sù ure na nga mangikállà nittam.

Ta lage na namarò ta dabbuno, sinalákkuruk ni Namarò ta ikákkállà na ittam,  
ánnna pakomán na ittam megapu sù kingnguá ni Apu Kesu Kiristu.

10 Á jmittálin si Apu Kesu Kiristu, nga pangipasinganán ni Namarò sù allà na nittam.  
Aggina yù netapil megapu nittam, tapè iyígù na ittam.

Á yáyù nga aringin máwák nga magikáru ittam ta liwâ tam megapu ta pate tam,  
gapu ta aggina yù nagikáru, nga nangappù nga naginnanolayin.

Á inipakánnámmu na ta iyawâ na yù áttolé na nga awán ta áddè na  
sù ira ngámin nga mangikatalà kuna megapu sù panguruk da sù napiá nga dámak nga  
inipalappâ na.

11 Á sinullà nangà ni Namarò ta mangilayalayâ sù napiá nga dámak, á inikatalà na nikán  
yù pangituddù ta ngámin nga meyannung sù ángnguruk tam.

12 Á yáyù nga marigirigákà ta ábbalurán, megapu sù pangilayalayâ ku sù napiá nga dámak.  
Ngam aringà mappasirán, ta ammù yù Yápù nga ikatalà ku. Á ammù gapay ta aggina yù  
mekatalà, nga makáwayyâ nga manaron nikán ánnna yù ngámin nga inikatalà na nikán ta  
áddè ta panoli na ta pagáddekán na ággaw.

13 Á sikaw, tángngagam mu yù kukurugán nga ubobuk ni Namarò nga inituddù nikaw,  
á yáyù ituddum gapay sù ira kábulum mu. Ari ka malurâ nga mangikatalà kâ Apu Kesu  
Kiristu nga mangabbák nikaw, tapè mapasigaggâ yù ángnguruk mu kuna ánnna yù ángngiddù  
mu sù ira kábulum mu.

14 Á ipatattam mu ta nonò mu yù kuruk nga bilin ni Namarò nga inikatalà na nikaw. Á  
yù Mangilin nga Ikararuá ni Namarò yù mangabbák nikaw, ta aggina yù maggián nittam  
nga katágitáddy.

15 Á narámak mu támma ngin ta sinájjiád dangà nayù ngámin ira nga manguruk nga taga  
Asia, mássiki di Pigilo kâ Ermogines.

16 Ngam di Onesiporo ánnna yù ira nga maggián ta bale na, ipakimállà ku ira kâ Namarò,  
tapè ikállà na ira, gapu ta binannabannáyán nangà ni Onesiporo, ánnna ari nappasirán  
megapu sù kebáluk ku.

17 Á labbè na sawe ili na Roma, inala-alek nangà áddè ta pakálek na nikán.

18 Á sikaw gapay, ammum gemma yù napiá nga ángngabbák na ngaw nikán ta paggiák ku  
paga ta Epeso. Á parè bì kâ Apu ta ikállà na si Onesiporo sangaw nu umay si Apu saw nga  
mamanunnù ta tatolay ta pagáddekán na ággaw.

## 2

*Máwák nga Attamát tam yù Jigâ nu Masserbi ittam kâ Apu Kesu Kiristu*

1 Á sikaw, Timotio, nga anâ ku, ipasigaggâ mu yù ángngikatalà mu kâ Apu Kesu, ta aggina  
yù mangikállà nga mangabbák sù ira ngámin nga mangikatalà ánnna metáddy kuna.

2 Á yù naginnám nga inilayalayâ ku ta arubáng na aru nga tatolay, yáyù gapay ituddum  
sù ira tatolay nga pangikatalatán, tapè makáwayyâ ira gapay nga mangituddu sù ira káruán  
nga tatolay.

3 Á nu marigirigâ ka, attamám mu lá ta kun na pagattam na napiá nga suddálu. Ta meyárik  
ittam ta napiá nga suddálu, á si Apu Kesu Kiristu yù kapítát tam.

4 Á arán na tángngagan na suddálu yù tanakuán nga tarabáku, nu ari lá yù ipakuá nayù  
kapítán na, tapè magayáyâ yù kapítán na megapu sù akkuán na.

5 Á yù táddy nga keyarigát tam yù ira makipariká, nga magginná ta napiá sù tunung nayù  
ira maddok níra, gapu ta arád da awayyâ nga mangappù nu arád da kurugan ta napiá yù  
tunung nga meyannung ta pakipariká ra.

6 Á yù táddy paga nga keyarigát tam yù maláppà nga minákkomán. Á mepángngà ta aggina  
yù mapolu nga mangâ ta balle na, gapu ta kaláppà na nga mattarabáku.

7 Á nonopam mu ngámin yawe nga kinagi nikaw, tapè ipakánnámmu ni Apu nikaw yù  
ngámin nga kebalinán na.

8 Á nonopam mu gapay si Apu Kesu Kiristu ánnna yù napiá nga dámak nga meyannung  
kuna. Aggina yù ginaká ni Patul Dabid, á aggina yù naginnanolayin. Yane yù napiá nga  
dámak nga ilayalayâ ku.

9 Á gapu ta pangilayalayâ ku sawe bilin ni Namarò, attamák ku yù jigâ ku, nepatalugáring  
ta maggiánà lá paga nga nebáluk, nga kunnay ta tulisán. Á mássiki nu nebálugà, megapu sù  
pangilayalayâ ku, á massamâ yù ubobuk ni Namarò.

<sup>10</sup> Á yáyù nga attamák ku ngámin, tapè ipakánnámì si Apu Kesu Kiristu sù ngámin ira nga piníli ni Namarò, tapè manguruk ira gapay, á mepatattáddy ira kâ Apu Kesu, ánná meyígù ira nga mesipà nga mepattolay kuna ta áddè ta áddè.

<sup>11</sup> Kuruk yawe bilin nga netuddu nittam:

“Nu ibiláng ni Namarò ta nepappatay ittam kâ Apu Kesu,  
á gapu ta paginnanole na, maginnanolay ittam gapay,  
ánná mesipà ittam nga mepattolay kuna.

<sup>12</sup> Á nu arát tam malurá nga magattam  
ta jigâ nga duttál nittam kunangan,

ánná ipasigaggà tam lâ yù ángnguruk tam kâ Apu Kesu,  
á mepammaguray ittam kuna ta pammagure na sangaw ta dabbuno.

Ngam nu tåttájjiát tam,  
á tåttájjián na ittam gapay.

<sup>13</sup> Á mássiki nu ari ittam mekatalà,  
ngam mekatalà si Apu Kesu nga mamafurò sù ngámin nga kagian na,  
ta ari manguli yù nonò na.”

#### *Taddánán ni Pablo si Timotio ta ari Mappereperang ta Ubobuk*

<sup>14</sup> Ipanonò mu sù ira manguruk dannian nga kinagi. Á ta ánninanán ni Namarò, tabarangám mu ira ta ari ira makkakápereperang ta ubobuk nga meyannung ta makkakerumá nga kagian nayù ira tatolay. Ta awán ta napiá nga pabbalinán nayù ubobugad da. Á yù ira tatolay nga makaginná ta pereperang da, mabbábáng ira nga mekáttuuy ta pangikatalà da kâ Apu.

<sup>15</sup> Á malláppà ka laguk nga mangilayalayâ sù kukurugán nga ubobuk ni Namarò, tapè awán ta ipasirám mu, ánná magayáyâ si Namarò gapu ta napiá ánná matunung yù ángngituddum sù kuruk nga bilin na.

<sup>16</sup> Á mallillì ka sù ira magubobuk sù awán ta serbi na. Ta narákè yù pabbalinán nayù ubobugad da, á mappanà yù narákè nga akkuán nayù ira tatolay nga makaginná sù kagiad da.

<sup>17</sup> Á massamâ yù ubobuk da sù ira tatolay, ta kunnay sù passamâ na lutu ta baggi na tolay áddè ta pate na. Ajjan garè yù duánga mangituddu karannian, di Imenio kâ Pileto.

<sup>18</sup> Á talamánad da yù ángnguruk nayù ira káruán nga tatolay, gapu ta arád ta ituddu yù kuruk nga bilin ni Namarò. Ta kagiad da garè ta nappasá ngin yù paginnanole nayù ira námmatay, nga ari gemma kuruk. Á ajjan garè yù ira nga nanguruk nga mabbábágín sù ángnguruk da kâ Apu Kesu megapu sù pangituddu ra.

<sup>19</sup> Ngam sittam nga napasigaggà yù ángnguruk na, ari ittam mabbábág, ta maggián nga mannanáyún yù ubobuk ni Namarò, nga kunnay ta maláddá nga batu, nga panáddagán nayù ángnguruk tam. Á ajjan yù kinagi na nga netúrá nga kunniaw:

“Ammu ni Apu yù ira nga kukurugán nga tatole na.”

Á kinagi na gapay,

“Á yù ira ngámin nga makimállà kâ Apu Namarò,

nga makkagi ta aggina yù pakiyápuád da,

máwák nga pallikuránad da laguk yù narákè nga ággangnguá ra.”

<sup>20</sup> Á ta ángngarigán nu ajjan yù maríku nga maggián ta dakal nga balay, á aru yù aruátan na, nga buláwán, pinaláta, ánná káyú ánná dabbun. Á iyanuá na yù napadday ta buláwán ánná pinaláta nu ajjan yù álliuk na nga kamotunán. Ngam yù napadday ta káyú ánná dabbun, maguray lâ yù pangiyaruá na nira.

<sup>21</sup> Á dannian yù keyarigát tam, sittam nga manguruk. Ta nu tukkatat tam yù ággangnguá tam nga narákè, mangáppípiá ittam, nga mepárik sù aruátan nga buláwán. Á dán nga naparán ittam nga mepángngà ta pangiyaruá nayù Yápu tam ta ngámin nga napiá nga ipakuá na nittam.

<sup>22</sup> Ari ka laguk dukki sù ira bábbagitolay nga mangapà nikaw ta mangnguá ka ta narákè nga karagatád da nga akkuán. Á akkuán mu lâ yù napiá nga ikáyâ ni Apu. Ipasigaggà mu yù ángngikatalà mu kâ Apu, á iddi-iddukam mu yù ira kábulum mu. Á máwák nga masippà ka nga mepagimammà sù ira ngámin nga kuruk nga manguruk kâ Apu.

<sup>23</sup> Á ari ka mepappeperang ta ubobuk sù ira nga awán ta serbi nayù ubobugad da. Ta ammum gemma ta maddiráma ira sangaw, ta yáyù lâ pabbalinán nayù pakkakápereperang da ta ubobuk.

<sup>24</sup> Ta sittam nga masserbi kâ Apu, mawák nga ari ittam maddaráma ánná ari ittam meppapeperang ta ubobuk, ngam mangikállà ittam sù ira ngámin nga tatolay. Á gigiámmuat tam yù ubobuk ni Namarò ta napiá, tapè dán nga naparán ittam nga mangituddu sù ira tatolay, ánná napiá yù ángngituddu tam. Á attamát tam lâ yù mesimmu nittam.

<sup>25</sup> Á pangituddu tam, arát tam papporayán yù ira tatolay nga mattutubbák. Ngam masippà ittam ánná napiá lâ yù ággubobuk tam nira, abernu iddán na ira ni Namarò ta awayyá ra nga mabbabáwi ta liwâ da, tapè kánnámmuád da yù kuruk nga bilin ni Namarò.

<sup>26</sup> Á pakánnámmu ra sù kuruk nga bilin ni Namarò, makemmunaw ira, á tákkilalád da ta nelogò ira kâ Satanás nga namuersá nira. Á abbágán na ira laguk ni Namarò, tapè mattálaw ira kâ Satanás, á alawatan ni Namarò ira.

### 3

*Yù Ággangnguá nayù ira Tatolay ta Panguriánán nga Ággaw*

<sup>1</sup> Á mawák nga kánnámmuám mu yaw, ta sangaw nu maddaggunin yù pagáddekan na ággaw, aru yù jigirigâ nayù ira tatolay ta dabbuno.

<sup>2</sup> Ta yù ira tatolay nga ari manguruk, ayatad da lâ yù baggi ra ánná yù pirâ da. Mappeggung ira ánná mappeddaráyaw ira. Á pakkakagiád da yù ira kábulud da. Potuád da yù ira darakal da. Ari ira mabbabalabálà sù ira mangikállà nira. Á ari ira makimoray kâ Namarò.

<sup>3</sup> Awán ira ta ayá. Ari ira mamakomá. Mallillibâ ira sù ira kábulud da. Ari ira magammá, ta ari ira natudduán. Á kitaporay ira ánná malussaw ira ta ngámin nga napiá.

<sup>4</sup> Ari ira mekatalà. Daliborok ira, nga arád da garè nonopan yù pabbalinán nayù akka-akkuád da. Á motun yù nonò da, ta kagidi da ta aggira lâ yù makánnámmu. Á alerad da lâ yù ipagayyáda, ngam awán ta ayá da kâ Namarò.

<sup>5</sup> Á mepaggammung ira sù ira manguruk, ngam awán ta kebalinán nayù pakikultu ra gapu ta arád da likuránán yù narákè nga ággangnguá ra. Ari ka dukkurukkì karannian nga tatolay.

<sup>6</sup> Á aijan yù ira lálláki nga umay makikopun ta tatolay, tapè makatallung ira ta bale ra, á kagumánañ da yù ira bábbay. Á ilímak da yù nonò da, tapè ilogò da yù ira bábbay nga mattá-iki-ikáyâ megapu sù liwiliwâ da, nga ari magammá nga magalek ta karagatád da.

<sup>7</sup> Á maguray lâ yù umay mangituddu nira, á ginnád da lâ ginnán, ngam arád da bulubugá kánnámmuán yù kuruk.

<sup>8</sup> Á yù ira lálláki nga mangilogò nira, kunnay ira kári Jannes kâ Jambares, nga yù ngaw ira makikontará kâ Lákay Moyses. Á kunnay nira, ituddu ra gapay yù ari kuruk, á narákè yù nonò da, ánná áppé pípiá ira, nga ari kuruk nga mangikatalà kâ Apu Kesu.

<sup>9</sup> Ngam arád da mabalin yù akkuád da, ta tákkilalán nayù ira ngámin nga tatolay yù kolapá ra, sangaw nu mepalappâ yù liwâ da nga kunnay sù nesimmu ngaw kári Jannes kâ Jambares.

*Mábbágán ittam megapu ta Pabbibbik tam sù Libru ni Namarò*

<sup>10</sup> Ngam sikaw, Timotio, ammum yù ittuddu ánná yù ággangnguâ. Á ammum yù ikáyâ ku nga palurotan, ánná yù ángngikatalà ku kâ Namarò. Á nasingam mu ta attamák ku lâ yù akkuád nayù ira tatolay nikán, ánná yù ángngiddu ku nira, ta aringà bulubugá malurâ nga mangituddu nira.

<sup>11</sup> Á ammum gapay yù panigirigâ da nikán megapu sù pangilayalayâ ku, á inattamák ku lâ yù kingnguá ra nikán ta ili na Antokia, ánná yù ili na Ikonium, ánná yù ili na Listara. Jinigirigâ dangà sù ira ili, ngam iniyígú nangà ni Namarò.

<sup>12</sup> Á ari lâ sikán yù marigirigâ, ta marigirigâ gapay yù ngámin ira nga mepattatádday kâ Apu Kesu Kiristu, nga makkaragâ nga tumuttul kuna.

<sup>13</sup> Ngam yù ira tatolay nga narákè, ánná yù ira mangilogò, mappanà lâ mappanà ira nga mangnguá ta narákè, ta ilogò da yù ira kábulud da, á aggira lápay, melogò ira.

<sup>14</sup> Ngam sikaw, ari ka malurâ nga manguruk sù ginigíámmum, nga ammum ta kuruk nga pangikatalakám mu, ta ammum yù ira nangituddu nikaw.

<sup>15</sup> Ta natudduán ken sù netúrâ nga bilin ni Namarò áddè ngaw sù kabaddi mu. Á yù bilin ni Namarò yù gapu na nga kánnámmuám mu yù ángngiddu ni Namarò, ánná yù awayyám nga makiyígú kuna. Á yáyù nga inalawâ mu yù mannanáyun nga áttolem nga iniyawâ ni Namarò nikaw megapu sù pangikatalà mu kâ Apu Kesu Kiristu.

16 Á ngámin yù netúrâ nga bilin ni Namarò, inipetúrâ ni Namarò sù ira ábbilinán na, tapè mábbágán ittam nu bibrirat tam ánnâ nu ginnát tam. Á megapu sù ubobuk ni Namarò, kánnámuát tam yù meyannung kuna ánnâ yù ikáyâ na nga akkuát tam, ánnâ magammá ittam sù akkuát tam nga narákè, ánnâ matabarangán ittam sù napiá nga ipakuá ni Namarò nittam.

17 Á sittam nga tatole ni Namarò, nu kuruk nga manguruk ittam sù ubobuk na, á naparán ittam nga masserbi kuna, nga mamalurò sù ngámin nga napiá nga ipakuá na nittam.

## 4

### *Yù Maporián nga Itabarang ni Pablo*

1 Á sangaw nu manoli si Apu Kesu ta dabbuno nga mammaguray, aggina yù mamanunnù sù ira tatolay nga matolay paga ta dabbuno ánnâ yù ira námmatay. Á yáyù nga tabarangát taka laguk ta ánniganán ni Namarò ánnâ ánniganán ni Apu Kesu Kiristu,

2 ta mangilayalayâ ka sù ubobuk ni Namarò! Maggián ka lá nga naparán nga mangilayalayâ, mássiki nu arád da ikáyâ nayù ira tatolay, ánnâ mássiki nu marigirigâ ka. Gammám mu yù ira tatolay nga minálliwâ, á tudduám mu ira ta mawák nga mabbabáwî ira ánnâ likuránad da yù palliwâ da. Á tabarangám mu ira, tapè mapasigaggà yù ángngikatalà da kâ Apu Kesu. Á attamám mu yù ira tudduám mu, á ari ka malurâ nga mangituddu nira.

3 Ta duttál yù ággaw, nga molang nayù ira tatolay nga ginnán yù kuruk nga meyannung kâ Apu. Ta mattá-iki-ikáyâ ira, á apatad da lá yù ira ikáyâ da, aggira nga mangituddu ta gustu ra nga ginnán.

4 Á paguráyád da yù kuruk nga bilin ni Namarò, tapè ginniginnád da yù makkakerumá nga ubobugan nayù ira tatolay, nga awán ta serbi na.

5 Ngam sikaw, Timotio, gaggarám mu lâ yù nonò mu, á attamám mu lâ yù jigâ mu nga mesímmu nikaw. Mangilayalayâ ka sù napiá nga dámak nga meyannung kâ Apu Kesu, á palurotam mu yù ngámin nga ipakuá ni Namarò nikaw.

6 Á sikán, duttál sangaw yù ággaw nga páñò ta dabbuno. Ta maddaggunakin matay, á melabbekâ sangaw kâ Namarò, gapu ta aggina yù Yápù nga pakimorayák ku.

7 Napiá yù kingnguâ, á pinatuppál kin yù ngámin nga inipakuá ni Namarò nikán. Á mássiki nu marigirigákâ ta pangilayalayâ ku, napasigaggà yù ángngikatalà ku kâ Apu Kesu Kiristu, ánnâ arák ku bulubugá inuli yù kuruk nga bilin ni Namarò.

8 Á yáyù nga iddi-iddagák ku yù meyawâ nikánnga piâ ánnâ katunung ku, nga meyárik ta maráyw nga kuroná nga napakappián ta lángi, nga iyawâ na nikán ni Apu Kesu Kiristu sangaw nu ággaw nga panoli na. Ta si Apu Kesu yù mamanunnù nga matunung. Á ari lá sikán yù pangiyawatán na, nu ari gapay yù ira ngámin nga magayáyâ nga magiddak ta panoli na.

9 Á Timotio, umay ka lá umay saw giák ku!

10 Ta sinájjíán nangà ni Demas, á gustu na lá nga ala-alerañ yù ipagayáyâ nayù ira tatolay ta dabbuno. Á yáyù nga nánawán nangà, nga minay ta Tessalonika. Á si Karesenti, minay ta Galasia. Á minay si Titò ta Dalmasia.

11 Si Lukas lá yù kabbuluk ku saw.

Á si Markus, dagatam mu bi ta ipulù mu nga umay saw, ta dakal yù ángngabbák na nikán.

12 Á si Tikiko, jinok ku ta Epeso.

13 Á sangaw nu umay ka saw, dagatam mu yù ulà ku nga inibattáng ku ta gián ni Karpo ta Tarowas, ánnâ yù ira libru gapay, nepatalugáring sù ira túrâ, á arám mu ira káttamán.

14 Á si Alekanduru nga minábbattál ta baronsi, kitarákè yù kingnguâ na nga pangontará na nikán. Ngam si Namarò yù mamanunnù, á iyawâ na kuna yù bálâ nayù kingnguâ na nikán.

15 Mappalán ka lápay kâ Alekanduru, ta masikan yù pangontará na sù bilin ni Namarò nga ilayalayâ tam.

16 Á sù ngaw olu nga pamestígâra nikán ta ili na Roma ta arubáng nayù kues, awán bulubugá ta mangabbák nikán, nga massistigu nakuán sù kinagi. Ngámin nga kábúluk ku, sinájjíad dangà. Ngam makimállakâ kâ Namarò ta arán na ipekáru nira yù panájji ra nikán, ngam pakomán na ira lá.

17 Á mássiki nu awán nira ta mangabbák nikán, si Apu Kesu yù mangabbák nikán, á inabbágán nangà ta keyarubáng ku sù ira mangikekâ nga mangigagángay nikán. Á pinatattam ni Apu Kesu yù nonò ku ánnâ pinasikan na yù baggi nga mangilayalayâ sù napiá nga dámak nga meyannung kuna, tapè makaginná yù ira ngámin nga makkakerumá nga

tatolay nga ari Kudio. Á iniyígù nangà, tapè arád dangà ipamakán sù ira simaron nga ayám nga layon.

<sup>18</sup> Á sigídá nga iyígù nangà ni Apu Kesu, nga Yápù, maguray lâ yù narákè nga mesimmu nikán. Á apan nangà ta mesipà kuna ta lángì sù pammagurayán na. Parè bì ta meparáyaw si Namarò ta áddè ta áddè. Ammán!

<sup>19</sup> Á manonò ku di Persila kâ Akila, á iyabbû ku nu kunnasi ira. Á kunnasi gapay di Onesiporo ánná yù ira nga maggián ta bale na.

<sup>20</sup> Á si Erasto, naggián ta Korinto. Á bittáng ku si Taropimo ta Mileto gapu ta mataki.

<sup>21</sup> Á sikaw, umay ka lâ umay saw giák ku lage na ammián. Á di Ebulo kári Pudento, kâ Lino, ánná si Kalodia gapay, iyabbû da nu kunnasi ka. Á kunnian gapay sù ira ngámin nga wáwwagi tam ta ángnguruk tam kâ Apu Kesu, iyabbû da gapay nu kunnasi ka.

<sup>22</sup> Á parè bì ta mepulupulù nikaw si Apu Kesu Kiristu, ánná ikákkállà na sikayu ngámin. Áddè na yû.

## Yù Túrâ ni Pablo kâ Titò

*Yù Meyannung sawe Túrâ*

Si Titò yù ari Kudio nga nabbáli ta mangikatalà kâ Apu Kesu megapu sù pangilayalayâ ni Pablo. Á nepulupulù laguk kâ Pablo, ta inabbágán na ta pangilayalayâ na ánnâ pangituddu na. Á bittáng ni Pablo ta Karea nga mangabbák sù ira mangikatalà kâ Apu nga naggagammung tân.

Á bibrirat tam yù meyannung sù ángngabbák ni Titò kâ Pablo sù mekaruá nga túrâ ni Pablo sù ira manguruk nga taga Korinto ánnâ yù túrâ na sù ira nga taga Galasia (2 Korinto 2:13; 7:6, 13; 8:6, 16, 23; 12:18; ánnâ Galasia 2:3).

Á sawe túrâ, ipanonò ni Pablo kâ Titò yù napiá nga ággangnguá nga kepángngatán nayù ira manaron sù ira kábulud da nga mangikatalà kâ Namarò. Á kagian ni Pablo kâ Titò yù ángngituddu na sù ira lállakalákay, ánnâ yù ira bábbakákà gapay, tapè aggira yù mangituddu sù ira bábbay nga nataggatán ánnâ yù ira mámmagingánay. Á kagian ni Pablo gapay yù ángngituddu ni Titò sù ira bábbagitolay, ánnâ yù ira aripan. Á ipanonò na kâ Titò yù awayyá tam ngámin nga mammalurò sù napiá nga ikáyâ ni Namarò, megapu sù ángngabbák nayù Mangilin nga Ikararuá.

Á ipanonò ni Pablo gapay kâ Titò yù paggapuán nayù napiá nga dámak, ánnâ yù kebalinán nayù iddanamát tam (3:4-7).

*Yù Mayán na yawe Túrâ*

Yù Pamegapu nayù Túrâ ánnâ yù Pakimállà ni Pablo (1:1-4)

Yù Ággangnguá nga Mepángngà sù ira Natullà nga Manaron sù ira Mangikatalà (1:5-16)

Yù Metuddu sù ira Manguruk kâ Apu Kesu (2:1-15)

Yù Napiá nga Ággangnguá nayù ira Tatole ni Namarò (3:1-11)

Yù Maporián nga Itabarang ni Pablo kári Titò (3:12-15)

*Yù Pamegapu nayù Túrâ ánnâ yù Pakimállà ni Pablo*

<sup>1</sup> Sikán si Pablo nga mattúrâ nikaw, Titò. Sikán yù aripan ni Namarò, nga minángngilayalayâ nga sinullà ni Apu Kesu Kiristu ta mangilayalayâ kuna sù ira tatolay nga piníli ni Namarò, tapè mepasigaggà yù ángngikatalà da ánnâ malannalannapán yù ammu ra nga meyannung sù kuruk nga bilin ni Namarò.

<sup>2</sup> Á ipakánnámmù nira yù iddanamát tam, nga mannanáyún nga inángà nga awán ta áddè na, nga iyawâ ni Namarò sù ira tatole na megapu sù Anâ na. Ta yáyù initabbá na ngaw ni Namarò lage na namarò ta dabbuno. Á si Namarò ari bulubugá massiri.

<sup>3</sup> Á ta dattál nayù ággaw nga sinullà ni Namarò, inipalappâ na yù bilin na nga meyannung sù inángà na nga awán ta áddè na, nga iyawâ na nittam. Á ilayalayâ ku yù bilin na nga inikatalà na nikán, gapu ta jinok nangâ ni Namarò, si Namarò nga mangiyígú nittam.

<sup>4</sup> Á yawe yù itúrâ ku nikaw, Titò, ta sikaw yù ibiláng ku ta kun na kuruk nga anâ ku, megapu sù ángngikatalà ta kâ Apu Kesu. Á damágat taka, nu kunnasi ka, ta sigídá nga ipakimállà taka kári Namarò nga Yáma tam kâ Apu Kesu Kiristu nga mangiyígú nittam, ta ikállà da ka ánnâ iyawâ da nikaw yù napiá nga ággíam mu ánnâ yù napiá nga gawagawáyám mu.

*Yù Ággangnguá nga Mepángngà sù ira Natullà nga Manaron sù ira Mangikatalà*

<sup>5</sup> Á yawe yù gapu na nga bittáng taka ta Karea, Titò, tapè balinam mu yù arák ku nakuá nga tarabáku. Á sikaw bì yù manullà sù ira karakalán nga manaron sù ira manguruk nga aijan ta katággitáddy ngá ili. Tullatam mu yù ira natudduán sù ubobuk ni Namarò. Á nu piliam mu ira, nonopam mu yù ngámin nga initabarang ku nikaw nga meyannung sù kepángngatád da.

<sup>6</sup> Piliam mu lâ yù napiá nga tolay nga pakimorayán na ngámin, tapè awán ta ipamaliwâ da kuna. Táttáddy lâ yù atáwa na. Á yù ira ánâ na, mawák gapay nga mangikatalà ira kâ Apu, ánnâ kurugad da yù ira darakal da. Á nu narákè yù ággangnguá ra ánnâ potuád da yù ira darakal da, á arám mu tullatan yù yáma ra ta manaron sù ira manguruk.

<sup>7</sup> Á yù tolay nga manaron sù ira manguruk, yáyù ásserbi na kâ Namarò. Á mawák nga aggina yù tolay nga napiá lâ yù meparamak nga meyannung kuna, nga awán bulubugá ta ipamaliwâ da kuna. Mawák nga ari mappeddaráyaw, ánnâ ari malogon nga mapporay. Mawák nga ari magillellaw, ánnâ ari makiramá, ánnâ ari maddarogá.

<sup>8</sup> Ngam kunniaw galâ yù ággangnguá na. Mawák nga aggina yù magayáyâ nga mangálliuk, á napiá lâ yù nonò na ánnna mangikállâ sù ira kábulun na. Mawák nga aggina yù tolay nga matunung, nga mamafurò ta ngámin nga ipakuá ni Namarò kuna, ánnna gaggarán na yù nonò na ánnna yù baggi na.

<sup>9</sup> Á mawák nga kurugan na ta napiá yù kuruk nga bilin ni Namarò nga netuddu kuna, tapè makáwayyá gapay nga manabarang sù ira kábulun na ta meyannung sù kuruk nga bilin ni Namarò. Á ta kunnian, eggá yù awayyá na nga tabbagan yù ira nga makikontará sù kuruk sù ituddu na.

<sup>10</sup> Ajjan garé yù ira tatolay nga mamotu sù ira mangituddu nira, á arád da kurugan yù kuruk nga bilin nga metuddu nira, nepatalugáring sù ira kábulun naw nga Kudio nga mangikatalà kâ Apu Kesu, nga manuppái lâ paga ta kustombare na Kudio nga inituddu ni Moyses. Á ubu-ubobugad da yù awán ta passerbián na, á ilogò da yù ira kábulud da, megapu sù kagiad da.

<sup>11</sup> Mawák nga mapatukkâ ira sù ubu-ubobugad da, nga mamakkakáttuay sù napakáru nga pamiliá. Ta ituddu ra yù ari kuruk, nga arád da nakuan ituddu. Á yá lâ ipangituddu ra ta gustu ra matáddanán.

<sup>12</sup> Á mássiki yù ngaw táddyay nira nga taga Kreta, nga minállabbun nga neparámak, kinagi na yaw:

“Minássirisiri yù ira ngámin nga taga Kreta,  
á narákè ira nga kun na ayám nga mangnuá ta tolay.  
Á narullák ira, nga matalakák nga mattarabáku,” kun na.

<sup>13</sup> Kuruk yù kinagi na. Á yáyù nga gammám mu ira laguk, tapè mapasigaggà yù ángngikatalà da.

<sup>14</sup> Á gammám mu ira, tapè arád da tágngagan yù bídá nayù ira Kudio, nga ari kuruk, nga naggapu galâ ta nonò da. Gammám mu ira tapè arád da ginnán yù taddán nayù ira tatolay nga manaki sù kuruk nga bilin ni Namarò.

<sup>15</sup> Yù tolay nga napiá yù nonò na ánnna mangilin, napiá ta ánnninganán na yù ngámin nga naparò, ánnna awán ta narákè kuna. Ngam yù ira tatolay nga narákè, nga ari mangikatalà kâ Apu Kesu, awán ta ammu ra nga napiá, ta arád da ammu mappíli sù napiá, á jikkù yù ngámin nga meyannung nira, mássiki yù nonò da ánnna ággangnguá ra.

<sup>16</sup> Kagiad da ta si Namarò yù pakiyápuád da, ngam ari kuruk, ta mepasingan ta arád da kurugan yù bilin na, megapu sù narákè nga akka-akkuád da. Potuád da si Namarò, á gapu ta narákè yù nonò da, awán ta awayyá ra nga mangnuá ta bulubugá nga napiá.

## 2

### *Yù Metuddu sù ira Manguruk kâ Apu Kesu*

<sup>1</sup> Ngam sikaw, Titò, ituddum lâ yù kuruk nga bilin ni Namarò.

<sup>2</sup> Á yù ira lállakalákay, tabarangám mu ira ta gaggarád da yù nonò da ánnna baggi ra, tapè mepakimorayán ira ánnna mepasingan ta napasigaggà yù ángngikatalà da kâ Apu Kesu. Tabarangám mu ira ta ari ira magillellaw, ngam iddi-iddukad da yù ira kábulud da ánnna attamád da yù ngámin nga mesimmu nira.

<sup>3</sup> Á yù ira bábbakabákâ, kunnian gapay nira. Tabarangám mu ira, tapè napiá yù ággangnguá ra, ta kun na mepángngá sù ira tatole ni Namarò. Ari ira nakuan mabbébek. Ari ira gapay nakuan magillellaw. Ta aggira yù mangituddu sù napiá nga ággangnguá ra sù ira kábulud da nga bábbay nga nataggatán.

<sup>4</sup> Á mawák nga ituddu ra nira gapay yù napiá nga ángngiddù da ta atáwa ra ánnna yù ira ánnâ da.

<sup>5</sup> Á tabarangád da ira gapay ta gaggarád da yù nonò da ánnna baggi ra, á tuttulad da yù napiánga nonò. Á mawák gapay nga malláppâ ira nga magimemalay, nga minángngikállâ. Á tumulù ira sù atáwa ra. Ta nu napiá yù akka-akkuán nayù ira mangikatalà kâ Apu, awán ta awayyá nayù ira kárúán nga makkakagi sù bilin ni Namarò.

<sup>6</sup> Á kunnian gapay sù ira nataggatán nga lálláki ánnna yù ira bábbagitolay, tabarangám mu ira ta gaggarád da yù nonò da ánnna baggi ra.

<sup>7</sup> Á sikaw, Titò, ipasingam mu nira ta sikaw yù napiá nga párigád da, nga tolay nga napiá yù nonò da ánnna ággangnguá na. Á tágngagam mu yù pangituddum, ánnna ituddum lâ yù kuruk nga bilin ni Namarò.

<sup>8</sup> Ipasingam mu nira ta tolay ka nga napiá yù ággububuk mu, ánnna mekatalà yù kagiam mu, nga awán ta liwâ na, tapè mappasirán yù ira tatolay nga makikontará nikaw, ánnna awán ta ipamaliwâ da.

<sup>9</sup> Á yù ira makiaripan, tabarangám mu ira ta tumulù ira sù ira passerbiád da. Palurotad da laguk yù ngámin nga ipakuá ra nira, tapè magayáyâ yù ira yápu ra. Á arád da ira potuán.

<sup>10</sup> Á arád da kokotan yùmekatalà nira nayù yápu ra, ngam ipasingad da galâ yù napiá nga ásserbi ra nira, tapè mepakánnámmu ta kuruk nga mekatalà ira. Á yù ira ngámin nga tatolay naga makasingan sù napiá nga ággangnguá ra, tákklilád da lállaguk ta napiá ánná maráyaw yù metuddu nga meyannung kâ Namarò nga mangiyígù nittam.

### *Yù Pangikállà ni Namarò nittam ánná yù Bagu nga Áttolé tam*

<sup>11</sup> Mepalappâ yù pangikállà ni Namarò sù ira ngámin nga makkakerumá nga tatolay, ta iniyawâ na nira yù mangiyígù nira.

<sup>12</sup> Á megapu ta allà ni Namarò, ituddu na nittam yù pangipuerá tam sù arán na ikáyâ, tapè magaggarát tam yù nonò tam ánná baggi tam, ánná arát tam akkuán yù negagángay nga narákè nga akka-akkuán nayù ira tatolay nga ari manguruk. Á yáyù nga akkuát tam laguk yù napiá ánná palurotat tam yù ipakuá ni Namarò nittam ta keggá tam sawe dabbuno.

<sup>13</sup> Á ta pagiddi-iddak tam, iddanamát tam yù pappasingan nayù Yápu tam nga maddal-ingráng, nga mangiyígù nittam. Aggina si Apu Kesu Kiristu, nga kotunán nga mammagur-ray.

<sup>14</sup> Aggina yù nabbaluntáriu nga nangitapil ta baggi na, nga inipappágá na megapu nittam, nga pangari na sù liwiliwâ tam, tapè pabbalinan na ittam ta tatole na nga mangilin, naga maláppâ nga mamalurò sù napiá nga ipakuá na nittam.

<sup>15</sup> Á ituddum laguk nira dannian nga initúrâ ku, ta aijan yù pakáwayyám nga mangituddu nira. Á tabarangám mu ira, ánná gammám mu ira sù narákè nga akkuád da, tapè pakimorayád da ka nayù ira ngámin nga tatolay.

## 3

### *Yù Napiá nga Ággangnguá nayù ira Tatole ni Namarò*

<sup>1</sup> Á ipanonò mu yawe gapay sù ira manguruk. Mawák nga tumulù ira sù ira mammaguray ánná yù ira makáwayyá ta gubermente, á kurugad da yù tunung da. Á máwák nga dán nga naparán ira nga mangabbák nira nu ajan yù napiá nga ipakuá ra nira.

<sup>2</sup> Kagiam mu nira ta ari ira mallillibâ. Ari ira maddaráma, ngam mepasingan ta masippâ ira nga minángngikállà ta ngámin nga tatolay.

<sup>3</sup> Ta mássiki sittam ngámin, arát tam ngaw kánnámmuán yù ikáyâ ni Namarò, á ari ittam nanguruk. Pinotuát tam si Namarò, á nelogò ittam nga nepakkakáttuay kâ Namarò. Á kunnay ittam ta makiaripan sù narákè nga karagatán na baggi tam, ta narákè ánná jikkù yù ággangnguá tam ngaw ánná yù ipagayáyâ tam. Nangabubu ittam, ánná namassil ittam sù ira kábbulut tam. Á nakkakáporay ittam gapay, ánná nakkakálussaw ittam.

<sup>4</sup> Ngam nakikanakaná nittam si Namarò,

á jinok na si Apu Kesu ta dabbuno,

tapè ipakánnámmu na nittam yù pangayá ni Namarò ánná pangikállà na nittam.

Á iniyígù na ittam nga mangikatalà kuna.

<sup>5</sup> Á yá ipangiyígù na nittam, ari megapu sù napiá nga kingnguá tam,  
nu ari galâ megapu sù pangikállà na nittam.

Á pinakarenuán na ittam nayù Mangilin nga Ikararuá,  
tapè mári yù liwiliwâ tam.

Á iniyawâ na nittam yù bagu nga nonò tam,  
tapè makáwayyá ittam nga mamalurò sù napiá nga ipakuá na nittam.

<sup>6</sup> Ta iniyawâ na nittam ni Namarò yù Mangilin nga Ikararuá na,  
megapu kâ Apu Kesu Kiristu, nga mangiyígù nittam.

<sup>7</sup> Á yáyù nga mebiláng ittam ta matunung  
megapu sù allà na.

Á pinataganatán na ittam ta ánná na, á mesipà ittam kuna,  
ánná iniyawâ na nittam yù áttolé tam, nga awán ta addè na, nga iddanamát tam.

<sup>8</sup> Kuruk nga mekatalà yù kinagi.

Á yáyù nga karagaták ku ta danniaw yù ituddum ta napiá sù ira nga manguruk kâ Namarò, tapè ipe ra yù urà da nga manángngák sù napiá nga akka-akkuád da. Ta mangáppípiá yù ira ngámin nga tatolay megapu sawe napiá nga metuddu.

<sup>9</sup> Ari ka laguk mepappupulù sù ira makipappereperang ta ubobuk, ta awán ta serbi nayù pamereperang da ta meyannung sù ngágan nayù ira ngaw naggaká nira. Á ari

ka dukkurukkì sù ira makiramá nga makipappereperang ta ubobuk nga meyannung sù tunung ni Moyses, ta awán ta tolay nga mábbágán megapu sù ituddu ra.

<sup>10</sup> Á nu ajan yù tolay nga mamuruburion sù ira mangikatalà kâ Apu Kesu, á gammám mu. Á nu arán na ginnán yù kagiam mu, á pidduám mu nga gammán. Á nu arán na paga ginnán, á paguráyám mu laguk. Ari ka kuna dukkurukkikin.

<sup>11</sup> Ta ammum gemma ta narákè yù nonò na, ta mepasingan megapu sù akka-akkuán na nga ammu na ta narákè.

*Yù Maporián nga Itabarang ni Pablo kári Titò*

<sup>12</sup> Á talákkurugak ku nga doban sangaw si Artemas onu si Tikiko ta umay ta giám mu. Á tappi na sangaw, alistuám mu nga umay manápun nikán ta Nikapulis, ta yá urè ta maggiánà bi tán ta áddè ta pappasá na ammián.

<sup>13</sup> Á ta áddè ta awayyán, abbágám mu di Senu nga abugádu áンna yù kabbulun na, si Apolo, tapè ajan ngámin yù awágad da ta paggagannuâ da ta móñaw nga umay mangituddu.

<sup>14</sup> Á ituddum gapay sù ira kábulut tam yù napiá nga akkuád da. Mawák nga malláppà ira nga mattarabáku, tapè málâ da yù awágad da, áンna ajan yù awayyá ra gapay nga mangabbák sù ira kuruk nga magáwák. Á nu kunnian yù akkuád da, napiá laguk yù pabbalinán nayù kaláppà da.

<sup>15</sup> Yù ira ngámin nga kábuluk ku saw, iyabbû da nu kunnasi kayu. Kagiam mu gapay yù pangiyabbû mi sù ira mangayá nikami megapu sù pangikatalà tam kâ Apu. Á parè bì ta ikákkállà ni Namarò sikayu ngámin.

## Yù Túrâ ni Pablo kâ Pilemon

*Yù Meyannung sù Túrâ*

Si Pilemon yù maríku nga tolay, nga makákkua ta aripan nga mangngágan ta Onesimo. Á yù ili na Kolosi támma yù gián nayù bale ni Pilemon, nga paggagammungán nayù ira mangikatalà kâ Apu, ta mabibbik tam yù meyannung kâ Onesimo sù túrâ ni Pablo sù ira manguruk nga taga Kolosi (Kolosi 4:9). Á nattálaw garè si Onesimo.

Á nattúrâ si Pablo sawe ta keggá na ta ili na Roma, nga nebáluk ta karsel. Á initúrâ na yù ikomá na kâ Pilemon nga meyannung kâ Onesimo, nga aripan na nga nattálaw. Ta nesimmuán ni Onesimo si Pablo ta Roma, á inipakánnámmu ni Pablo kuna yù napiá nga dámak, nga bilin ni Namarò. Á pakaginná ni Onesimo, nanguruk ánnna nangikatalà kâ Apu Kesu, á napasigaggà yù ángngikatalà na. Á yáyù nga inabbágán ni Onesimo si Pablo ta keggá ni Pablo ta ábbalurán, ánnna nakikopun kâ Pablo ta napiá. Á kánnámmuát tam ta kuruk nga napiá gapay yù ákkopun di Pablo kâ Pilemon, megapu sù áaggián nayù túrâ na.

*Yù Mayán nayù Túrâ*

Yù Pamegapu nayù Túrâ (1-3)

Yù Ángngiddù ni Pilemon ánnna Ángngikatalà na (4-7)

Yù Ikomá ni Pablo kâ Pilemon nga Meyannung kâ Onesimo (8-22)

Ipakimállà ni Pablo yù ira Kákkopun na (23-25)

<sup>1</sup> Sikán si Pablo, nga nebáluk megapu sù ángnguruk ku kâ Apu Kesu Kiristu. Á ajjan saw gapay si Timotio, nga wagi tam megapu ta ángnguruk tam, nga maggián sawe ili nga mangabbák nikán. Á mattúrâ kami nikayu, Pilemon, nga kábulum mi nga iddukam mi, nga mattarabáku ta napiá nga mangabbák nikami ta pattarabáku mi.

<sup>2</sup> Á mattúrâ kami gapay kári Apia, nga babay nga kun na wagi mi, kâ Arkipo, nga kabbulum mi nga masserbi kâ Apu ta kun na napiá nga suddálú, ánnna yù ira ngámin nga manguruk gapay, nga maggagammung ta bale naw.

<sup>3</sup> Á yaw ipakimállà ku, ta ikákkállà da kayu di Namarò nga Yáma tam kâ Apu Kesu Kiristu, ánnna pagimammatac da kayu, tapè napiá yù áaggián naw ánnna gawagawáyán naw.

*Yù Ángngiddù ni Pilemon ánnna Ángngikatalà na*

<sup>4</sup> Á pakimállà ku kâ Namarò, sigidángà mabbalabálà kuna megapu nikaw, Pilemon.

<sup>5</sup> Á yaw ipabbalabálà ku, gapu ta narámak ku yù ángngiddù mu sù ira kábulum mu nga manguruk ánnna yù ángngikatalà mu kâ Apu Kesu Kiristu.

<sup>6</sup> Á ipakimállà ku ta paré bi ta kánnámmuán nayù ira kábulum mu yù ngámin nga napiá nga pabbalinán nayù ángngikatalà tam kâ Apu Kesu, megapu sù napiá nga pakkakátabarang naw ta meyannung sù panguruk naw.

<sup>7</sup> Á kopuk ku, magayáyákà ánnna mabannáyán yù nonò ku megapu sù ángngiddù mu, gapu ta mabannáyán gapay yù nonò nayù ira ngámin nga kábultur tam nga manguruk megapu sù ángngiddù mu.

*Yù Ikomá ni Pablo kâ Pilemon nga Meyannung kâ Onesimo*

<sup>8</sup> Á gapu ta nasingak ku yù ángngiddù mu, kopun, ajjan yù ikomâ nikaw. Á ajjan nakuan yù awayyá nga mappelò nga manaddán nikaw, megapu sù pakáwayyâ nga naggapu kâ Apu Kesu Kiristu.

<sup>9</sup> Ngam gapu ta pakkaká-iddu ta, á arát taka puersán. Á yáyù nga ikomâ lâ nikaw, ta ikállà mà bì, ta sikán si Pablo nga lakalákayin, nga nebáluk megapu sù ángnguruk ku kâ Apu Kesu Kiristu.

<sup>10</sup> Á yá ikomâ nikaw, ta ikákkállà mu si Onesimo, nga ibiláng ku ta anâ ku, gapu ta mangurugin kâ Apu Kesu megapu ta pangituddù kuna, ta kebáluk ku sawe karsel.

<sup>11</sup> Á ammù gemma ta awán garè ta ángngabbák na ngaw nikaw. Ngam kunangane, aggina yù mangabbák nga kunnay ta kebalinán nayù ngágan na, si Onesimo, ta sitta nga duá yù abbágán na, á napiángin yù ángngabbák na nitta.

<sup>12</sup> Á yáyù nga palabbetak ku laguk si Onesimo ta giám mu kunangane, á ipepulù ku yù ayâ ku kuna, ta maraddamà ta páno na.

<sup>13</sup> Á ikáyâ ku nakuan ta maggián si Onesimo nikán, ta keggá nga nebáluk paga sawe karsel megapu ta pangilayalayâ ku sù napiá nga dámak, tapè aggina nakuan yù mangabbák nikán ta pannakabaggim.

<sup>14</sup> Ngam arát taka puersán nga mangiyawâ sù aripam mu ta mangabbák nikán, nu arám mu anugutan. Ta ikáyâ ku ta mabbaluntáriu ka lápay nga mangikállà megapu sù urem.

<sup>15</sup> Á yawe mápugák yù ure ni Namarò kâ Onesimo, ta nesinná bì nikaw, nga nelabbè ta giák ku, tapè mapággág ánná manguruk kâ Apu. Á patoliak ku laguk nikaw, tapè alawatam mu sangaw nga maggián galâ nikaw ta áddè ta áddè.

<sup>16</sup> Á pangalawâ mu kuna, aringin nakuan nga kunnay ta aripam mu, nu ari galâ ta kunnay ta kopum mu nga iddukam mu. Ta aggina yù kopuk ku nga iddukak ku. Iddukam mu laguk ta kunnay ta kopum mu, ánná wagim gapay megapu sù ángngikatalà naw kâ Apu.

<sup>17</sup> Á nu ibiláng mà ta kopum mu, megapu sù ángngikatalà ta kâ Apu Kesu, á paddulotam mu laguk si Onesimo ta kunnay ta pamaddulò mu nikán.

<sup>18</sup> Á nu ajjan yù liwâ na nikaw, onu gatù na, ipekárûm lâ nikán.

<sup>19</sup> Á sikán si Pablo, nga mattúrâ saw lápay, á sikán yù mappagá ta gatù ni Onesimo. Á arák ku nakuan ipanonò nikaw yù gatù mu nikán, megapu sù keyígù mu, ánná yù pangalawâ mu sù bagu nga áttolem nga awán ta áddè na, ta kesipâ mu kâ Apu Kesu, megapu sù pangituddù nikaw.

<sup>20</sup> Kopun, parè bì ta ikállà mà, megapu sù ángngikatalà ta kâ Apu, ánná bannáyám mu yù nonò ku, megapu sù keppattatadde ta kâ Apu Kesu Kiristu.

<sup>21</sup> Á mappelokâ nga mattúrâ nikaw, ta ikatalà taka, ánná ammù ta palurotam mu yù ikomâ nikaw, nga malannapán paga megapu sù allà mu nikán.

<sup>22</sup> Á ajjan paga yù kiddawak ku nikaw, ta paránam mu bì yù paggianák ku gapay ta bale naw. Ta iddanamák ku yù pangikállà ni Namarò, nga pangiyawâ na nikayu sù ipakimállà naw kuna, tapè mapalubbángà sangaw nga melabbè nikayu.

#### *Ipakimállà ni Pablo yù ira Kákkopun na*

<sup>23</sup> Á si Epapro yù kabbuluk ku nga nebáluk sawe karsel gapay megapu sù ángnguruk na kâ Apu Kesu Kiristu. Á iyabbû na gapay nu kunnasi kayu.

<sup>24</sup> Á di Markus, kári Aristarko, ánná si Demas, á si Lukas gapay yù ira kábuluk ku nga masserbi kâ Namarò, á iyabbû da gapay nu kunnasi kayu.

<sup>25</sup> Á yawe ipakimállà ku, ta maggián lâ nikayu si Apu Kesu Kiristu nga mangabbák nikayu megapu sù allà na.

## Yù Túrâ sù ira Kebru

*Yù Meyannung sawe Túrâ*

Yù ira tatolay nga Kudio, mangngágán ira gapay ta Kebru, á Kebru yù ngágán nayù ággubuk da gapay. Á si Akup yù naggaká nira, nga ingágán ni Namarò ta Israel. Á mewarawarâ yù ira ginaká ni Israel ta tangapáddabbuno. Ngam kunangane, manoli ira ta dabbun nga iniyawâ na ngaw ni Namarò nira, nga mangngágán ta Israel.

Aru yù ira makkakerumá nga rilision ta dabbuno, á aru yù ira tatolay nga Kudio ánná ari Kudio nga nangiyabbû sù ira napolu nga manguruk kâ Apu Kesu Kiristu ta meyannung sù pallikuk da ta dán nga rilisiód da ánná panuttul da kâ Apu Kesu. Á iniyabbû da, nga kud da, "Anni panò yù kapiánán nayù ángnguruk nayù ira tatolay kâ Apu Kesu Kiristu ánné ta rilision nga makkakerumá?" Á yawe yù túrâ nayù manabbák karannian nga iniyabbû da, nepatalugáring sù pangiyabbû da nga kud da, "Anni yù kebalinán nayù kinagi ra, nga si Apu Kesu yù kátannangán nga pári tam?" Bibbiran naw Kebru 4:14-16.

*Yù Mayán na yawe Túrâ*

Si Apu Kesu yù Mangipakánnámmu sù Bilin ni Namarò (1:1-4)

Makáwayyá si Apu Kesu ánné sù ira Daroban ni Namarò (1:5-14)

Yù Napiá nga Ángngiyígù ni Namarò nittam (2:1-18)

Makáwayyá si Apu Kesu ánné kári Moyses kâ Josiuwa (3:1-4:13)

Si Apu Kesu yù Pári tam nga Mamakkápiá nittam kâ Namarò (4:14-7:28)

Yù Kapiánán nga Tarátu ni Namarò megapu kâ Apu Kesu (8:1-9:22)

Namittán lâ yù Ketapil ni Apu Kesu nga Keyatáng na megapu nittam (9:23-10:39)

Yù ira Tatolay nga Neparámak megapu sù Ángngikatalà da (11:1-40)

Yù Mepángngà nga Ángngikatalà tam kâ Ammò Namarò (12:1-13:19)

Yù Ipakimállà nayù Mattúrâ (13:20-25)

*Si Apu Kesu yù Mangipakánnámmu sù Bilin ni Namarò*

<sup>1</sup> Sù ngaw napolu nga ággaw, name-aru yù pangipakánnámmu ni Namarò sù bilin na sù ira ngaw Kebru nga naggaká nittam nga Kudio. Á aru yù makkakerumá nga ángngipakánnámmu ni Namarò sù bilin na, megapu sù ángngituddu nayù ira ngaw ábbilinán na.

<sup>2</sup> Ngam ta ággawo sù keggá tam, sinullà ni Namarò yù Anâ na ta mangipakánnámmu sù bilin na. Ta inipaparò ni Namarò sù Anâ na yù ngámin nga eggá, á aggina yù sinullà ni Namarò nga isipà na ta ngámin.

<sup>3</sup> Á yù Anâ ni Namarò yù pakasinganát tam sù dalingárang ni Namarò, ta naggittá yù pakáwayyá ra, yù nonò da, ánná yù akkuád da. Á mammaguray sù ngámin nga pinarò na megapu sù pakáwayyá nayù ubobuk na, nga ámmaqaddátu na. Á ta kabalin na nagikáru ta liwiliwâ tam, tapè mapakomá ittam, á nattoli sù gián na ta lángì, á nagitubangin sù jiwanán nayù Kotunán, tapè mepammaguray kuna.

<sup>4</sup> Ta pinabbalin ni Namarò ta kapiánán yù Anâ na ánné sù ira daroban na. Á ammu tam ta makáwayyá ánné nira, gapu ta aggina lâ yù kagian ni Namarò nga Anâ na.

*Makáwayyá Yù Anâ ni Namarò ánné sù ira Daroban na*

<sup>5</sup> Á awán sù ira daroban ni Namarò yù nakkagián na, nu ari lâ yù Anâ na yù nakkagián na ta kunniaw, "Sikaw yù Anâ ku,

á ággawo ipakánnámmukin ta sikán yù Yámam,"\* kun na.

Á ajjan paga yù kinagi ni Namarò ta meyannung sù Anâ na, nga arán na gemma bulubugá kinagi ta meyannung sù ira daroban na, nga kunniaw,

"Sikán yù Yáma na,  
á aggina yù Anâ ku,"† kun na.

<sup>6</sup> Á ta pampapáno ni Namarò sù Anâ na nga makáwayyá,‡ á jinok na ta umay ta dabbuno. Á kinagi na,

"Ngámin nga darobak ku, mama líttukak ira nga maddáyaw kuna," kun na.

<sup>7</sup> Á ta meyannung sù ira daroban ni Namarò, kinagi na,

\* **1:5** Salmo 2:7; Kinguguá 13:33    † **1:5** 2 Samuel 7:14    ‡ **1:6** Makáwayyá si Apu Kesu nga kunnay sù kaká nga anâ na tolay, nga manaron ta ngámin nga kukuá nayù yáma na.

“Masserbi nikán yù ira darobak ku,  
 nga pabbalinak ku ira ta kunnay ta paddák áンna api nga maggatang,  
 nga makáwayyá nga mamalurò sù ipakuâ nira,”<sup>§</sup> kun na.  
<sup>8</sup> Ngam yawe yù kinagi ni Namarò sù Anâ na,  
 “Sikaw yù Apu Namarò,  
 nga mammaguray ta áddè ta áddè nga awán ta áddè na.  
 Á napiá yù pammagurem sù ira tatolem,  
 ánná matunung yù pamanunnù mu sù ira ngámin.  
<sup>9</sup> Á ikáyâ mu lâ yù napiá ánná matunung nga akkuán nayù ira tatoley,  
 ngam arám mu ikáyâ yù narékè nga akkuád da.  
 Á yáyù nga sinullà taka, sikán nga Yápum nga pakimorayám mu,  
 tapè sikaw yù kotunán nga mammaguray,  
 nga magayáyâ ánná maráyaw ánné sù ira kábulum mu.”<sup>\*</sup>  
<sup>10</sup> Á yawe gapay kinagi ni Namarò sù Anâ na,  
 “Sikaw, Apu, yù namarò ta dabbuno ta pamegapu na ngámin,  
 ánná pinarò mu gapay yù lángì ánná ngámin nga eggá kuna.  
<sup>11</sup> Á lummà noka yù lángì ánná yù dabbuno.  
 Ngam sikaw, maggián ka lâ ta áddè ta áddè, nga ari manguli.  
 Maddán yù dabbuno ánná lángì nga kun na gámi.  
<sup>12</sup> Á lukutam mu ira nga kunnay ta gámi, ta mapatalián ira.  
 Ngam sikaw, ari ka maddán, á ari ka mapatalián,  
 ta maggián ka lâ nga ari manguli ta áddè ta áddè,  
 ta awán ta áddè nayù dagum mu,”<sup>†</sup> kun ni Namarò sù Anâ na.  
<sup>13</sup> Ngam awán bulubugá ta daroban ni Namarò nga nakkagián na sù kunniauw nga kinagi  
 na kâ Anâ na. Ta kinagi ni Namarò sù Anâ na,  
 “E ka bì magitubang ta jiwanák ku,  
 sù ággitubangán nayù kotunán nga maráyaw,  
 áddè ta appútak ku yù ira malussaw nikaw,”<sup>‡</sup> kun na.  
<sup>14</sup> Á yù ira daroban ni Namarò, asinni ira panò nu ari galâ yù ira ari masingan nga  
 masserbi kâ Namarò. Á doban na ira ta umay mangabbák nittam ngámin nga meyígù, nga  
 mesipà kâ Namarò ta áddè ta áddè.

## 2

### *Yù Napiá nga Ángngiyígù ni Namarò nittam*

<sup>1</sup> Á gapu ta yù Anâ ni Namarò yù mangipakánnámmu sù bilin ni Namarò, á yáyù nga  
 máwák tam nga tángngagan ta napiá yù ipakánnámmu na nittam, marakè mekáttuay ittam  
 sù kuruk nga bilin na.

<sup>2</sup> Á sù ngaw góri, inipeybobuk ni Namarò sù ira daroban na yù taddán na sù ira tatoley.\*  
 Á yù ira tatoley nga ari nanguruk, pinagikáru ni Namarò ira megapu ta liwâ da, gapu ta arád  
 da kinuruk yù kinagi nayù ira daroban na.

<sup>3</sup> Á sittam laguk, nu lonát tam yù bilin ni Namarò nga meyannung sù Anâ na nga  
 mangiyígú ta tatoley, á eggá panò yù tanakuán nga pakiyígutát tam? Awán! Ta si Apu  
 Kesu Kiristu yù napolu nga mangipakánnámmu ta meyannung sù pangiyígú na ta tatoley,  
 á ngámin ira nga nagginná kuna, aggira yù mangipakánnámmu nittam ta kuruk yù bilin na.

<sup>4</sup> Á si Namarò gapay, inipakánnámmu na lápay ta kuruk yù kinagi ra, megapu sù  
 inipakuá na nira nga aru nga makapallâ nga pinagaddátu ra. Á ta meyannung sù ure ni  
 Namarò, inisinek na nira yù makkakerumá nga pakáwayyá ra nga naggapu sù Mangilin  
 nga Ikararuá na, tapè ipasingan na ta kuruk yù bilin na nga kinagi ra.

### *Yù Magágál nittam ta Umay Makiyígù*

<sup>5</sup> Á ta meyannung sù bagu nga dabbun nga ubobugak ku nga duttál noka, ari gemma yù  
 ira daroban ni Namarò yù sinullà na nga mammaguray sù bagu nga dabbun.

<sup>6</sup> Ngam yù ira tatole ni Namarò yù sinullà na ta mammaguray, nga kunnay ta netúrâ sù  
 dán nga libru nga kunniauw:

“Á sikaw, Apu Namarò, yù Kotunán.

Á anni má panò ta manonò kami, nga tolay kami lâ?  
 Ta ikállà kami ánná arák kami káttamán.

§ 1:7 Salmo 104:4 \* 1:9 Salmo 45:6-7 † 1:12 Salmo 102:25-27 ‡ 1:13 Salmo 110:1; Kingnguá 2:34 \* 2:2

7 Á pinarò kami, nga nagukák lábbì yù pakáwayyá mi ánnè sù pakáwayyá nayù ira darobam mu,

ngam ipotuk kami sangaw nga meparáyaw, nga mesipà sù pammagurayám mu.

8 Á patulutam mu nikami yù ngámin nga pinarò mu,  
tapè mammaguray kami ta ngámin.”†

Á gapu ta kunnian yù netúrâ, á ammu tam ta ipammagure ni Namarò sù ira ngámin nga tatole na yù ngámin nga pinarò na, á kánmámmuát tam ta awán ta arát tam pammagurayán. Ngam arát tam paga masingan ta sittam nga tatolay yù mammaguray ta ngámin nga naparò, gapu ta ari paga jímittál yù ággó na.

9 Ngam yawe ammu tam nga jímittálín, ta si Apu Kesu yù namalurò karannian nga netúrâ. Ta aggina yù nabibì lâ nga napagukák ánnè sù ira daroban ni Namarò, tapè metapil nga matay ta kurù megapu nittam ngámin nga tatolay, gapu ta inikállà ni Namarò ittam. Á gapu ta ketapil ni Apu Kesu megapu nittam, yáyù nga aggina yù inipotun ni Namarò, nga maddalingáráng nga mammaguray nga meparáyaw!

10 Ta si Namarò gemma yù namarò ánnà mananggal ta ngámin, á meparáyaw megapu ta ngámin nga pinarò na. Á napiá ánnà mepángngà gemma ta jinok ni Namarò si Apu Kesu ta umay meyaná ta tolay ánnà mangiyangngà ta jígà, tapè aggina yù makáwayyá nga mangiyígù ta aru nga tatolay. Ta yáyù gemma yù ure ni Namarò, tapè pabbalinan na ta ánnà na yù aru nga tatolay, tapè mesipà ira sù Anâ na, nga meparáyaw.

11 Á si Apu Kesu yù namakarenu nittam nga mangikatalà kuna, tapè mangilin ittam, á tátádday lâ yù Yáma tam kâ Apu Kesu. Á yáyù nga ari mappasirán si Apu Kesu nga makkagi ta sittam yù wáwwagi na.

12 Á ammu tam ta kuruk nga wáwwagi na ittam gapu ta aijan yù netúrâ nga kinagi na kâ Yáma na, nga kunniauw,  
“Ammò, ipakánnámmu taka sù ira wáwwagi.

Á mepaggagammungà nira, nga makkansion nga maddáyaw nikaw,”‡ kun na.

13 Á netúrâ gapay yù kinagi ni Apu Kesu,  
“Ikatalà ku si Apu Namarò,” kun na.

Á kinagi na paga,  
“Ajjana saw ánnà yù ira wáwwagi nga ánnâ ni Namarò nga inikatalà na nikán,” kun na.

14 Á sittam nga kagian ni Apu Kesu ta ánnâ ni Namarò, tolay ittam lâ nga eggá baggi tam nga matay. Á yáyù nga nabbáli ta tolay gapay si Apu Kesu, nga kunnay nittam, á netapil nga natay ta kurù megapu nittam, tapè máppù si Satanás, nga aringin makáwayyá nga mangituluk sù ira tatolay ta pate ra nga awán ta áddé na.

15 Á inirían ni Apu Kesu yù assing tam ta pate tam megapu sù kingnguá na. Á pinalubbáng na ittam, nga kunnay ta nebáluk ngaw megapu sù assing tam ta pate tam.

16 Ta ari gemma yù ira daroban ni Namarò yù abbágán ni Apu Kesu, nu ari galá sittam nga tatole na, nga mebiláng ta ginaká ni Abrakam.

17 Á gapu ta sittam nga tatolay yù ikáyâ na nga abbágán, á máwák laguk nga nepaggittá nittam nga wáwwagi na nga marigirigâ. Á yáyù nga nabbalin ta kátannangán nga pári nga mangikállà ánnà pangikatalakán nga masserbi kâ Namarò megapu nittam, nga nangitapil sù baggi na ta pagikáru na ta liwiliwâ tam, tapè mapakomá ittam.

18 Á gapu ta inattamán ni Apu Kesu yù pamarubá ni Satanás kuna, á yáyù nga makáwayyá nga mangabbák nittam nu parubán nà ittam ni Satanás, tapè ari ittam makiappù kâ Satanás.

### 3

*Makáwayyá si Apu Kesu ánnè kâ Moyses*

1 Wáwwagi nga mangikatalà kâ Apu Kesu, mangilin kayu nga mesipà gapay sù pangapà ni Namarò sù ira nga pabbalinan na ta tatole na. Á nonotan naw laguk si Apu Kesu. Aggina yù jinok ni Namarò ta umay ta dabbuno, tapè ipakánnámmu na si Namarò nittam. Á aggina yù sinullà ni Namarò nga kátannangán nga pári, nga ikatalà tam ta mamakkápiá nittam kâ Namarò.

2 Á pinalurò ni Apu Kesu yù ngámin nga inipakuá nayù nanullà kuna, ta kunnay sù ngaw Kákay Moyses nga nangikatalakán ta passerbi na sù ira tatole ni Namarò. Ta si Kákay Moyses yù sinullà na ngaw ni Namarò nga nanaron sù ira tatole na, nga nebiláng ta pamiliá na. Á pinalurò ni Kákay Moyses gapay yù ngámin nga inipakuá ni Namarò kuna.

<sup>3</sup> Á maráyaw si Kákay Moyses, ngam más maráyaw si Apu Kesu ánnè kuna, nga kunnay ta maráyaw yù nabbalay ánnè sù balay nga pidde na.

<sup>4</sup> Á ta meyannung ta ngámin nga katággítáddy ngayábalay, ammu tam ta ajjan yù toláy ngayábalay kuna. Á si Namarò galá yù namarò ta ngámin nga eggá.

<sup>5</sup> Á nangikatalakán si Moyses, nga napiá yù passerbi na kâ Namarò, ta pinálurò na yù ngámin nga inipakuá ni Namarò kuna, megapu sù panaron na sù ira kábulun na nga nebiláng nga pamiliá ni Namarò. Á inipakánnámmu na nira yù meyannung sù ipalappâ ni Namarò nöka.

<sup>6</sup> Ngam si Apu Kesu Kiristu yù Anâ ni Namarò nga pangikatalakán na nga mammaguray sù ira tatole na nga mebiláng ta ánâ na. Á sittam yù ira ánâ na, nu napasigaggà yù ángngikatalà tam kâ Apu Kesu ánnna magayáyá ittam megapu sù pagiddanáma tam ta mesipà ittam kâ Namarò.

#### *Pappalánan na ittam ni Namarò*

<sup>7</sup> Á gapu ta tatole na ittam ni Namarò nu napasigaggà yù ángngikatalà tam, nonopat tam laguk yù inipetûrâ nayù Mangilin nga Ikararuá. Ta kinagi na,

“Á nu ággawo yù pakaginná naw sù bilin ni Namarò,

<sup>8</sup> arán naw laguk ikikkítulán yù ipakánnámmu na nikayu.

Arán naw potuán si Namarò nga kunnay sù ira ngaw naggaká nikayu,

nga namotu kâ Namarò sù keggá ra ta kalállammatán.”

<sup>9</sup> Á kinagi ni Namarò,

“Mássiki nu nasingad da yù pinagaddátù ta appátapulu nga dagun sù keggá ra ta kalállammatán,

á pinotuád dangá áddè ta arák ku ira kinalurâ megapu sù akka-akkuád da.\*

<sup>10</sup> Á yáyù nga napporayá ngaw nira, á kinagi,

‘Manaki yawé ira tatoley ngayábalay níkán, á ari ira matudduán.’

<sup>11</sup> Á gapu ta papporè nira, yáyù nga sinistiguáku ku ta kuruk yù kinagi nira:

‘Arát takayu bulubugá patallungan sù pamagibannagák ku nakuan nikayu,’ ”† kun ni Namarò.

<sup>12</sup> Á wáwwagì ta ángnguruk tam, magimuguk kayu laguk nga katággítáddy, ta pasikkálan na yù nonò na, marakè ajjan yù narákè nga nonò na, nga manaki nga manguruk ánnna mekáttuay kâ Namarò nga matotolay.

<sup>13</sup> Á makkakátabarang kayu laguk ta kággágaw ngayábalay naggaká nikayu, “Ággawo,” nga keggá na paga nayù awayyá naw ngayábalay naggaká nikayu, tapè mapasigaggà yù ángngikatalà naw, á awán nikayu yù melogò, nga mataggá yù ulu na megapu sù liwiliwâ na.

<sup>14</sup> Ta mesipà ittam kâ Apu Kesu Kiristu nu mapasigaggà yù ángngikatalà tam kuna ta áddè ta áddè, nga kunnay sù kapámmegapu tam nga mangikatalà kuna.

<sup>15</sup> Á yáyù kebalinán nayù dán nga netúrâ nga kunniauw,

“Á nu ággawo yù pakaginná naw sù bilin ni Namarò,  
arán naw ikikkítulán yù ipakánnámmu na nikayu.

Arán naw potuán si Namarò nga kunnay sù ira ngaw naggaká nikayu,  
nga namotu kâ Namarò sù keggá ra ta kalállammatán.”

<sup>16</sup> Á asinni panò yù ira ngaw ngayábalay naggaká nikayu, “Ággawo,” nu naginná ra yù bilin na?

Ari panò yù ira galá nga inipáno na ngaw ni Kákay Moyses ta Egipto? Aggira gemma!

<sup>17</sup> Aggira yù napporayán ni Namarò ta appátapulu nga dagun megapu sù liwiliwâ da, á natay ira ta kalállammatán.

<sup>18</sup> Á asinni yù ira ngayábalay naggaká nikayu, “Ággawo,” nu ari galá yù ira namotu kuna?

<sup>19</sup> Á yáyù ngayábalay naggaká nikayu, “Ággawo,” nu ari galá yù ira namotu kuna?

## 4

#### *Yù Pamagibannagán ni Namarò sù ira Tatole na*

<sup>1</sup> Á kunangan iyalawâ ni Namarò nittam yù awayyá tam ngayábalay naggaká nikayu, “Ággawo,” nu ari galá yù ira namotu kuna?

\* 3:9 Bibbiram yù meyannung sù kingnguá ra, Exodus 17:1-7, Nomero 14:1-13    † 3:11 Salmo 95:7-11

sù pamagibannagán na nittam. Á yáyù nga tángngagat tam laguk yù napiá nga dámak, tapè mesipà ittam sù initabbá na.

<sup>2</sup> Ta nelayalayákin nittam gapay yù napiá nga dámak, nga kunnay sù nelayalayá ngaw nira, ngam awán ta nammakapiád da sù bilin ni Apu, gapu ta arád da kinuruk.

<sup>3</sup> Á yáyù nga arán na ira pinatallung ni Namarò sù pamagibannagán na nira. Ngam sittam nga manguruk yù isipà ni Namarò sù pamagibannagán na nga pinarán na megapu nittam. Ta kinagi na ngaw ni Namarò, nga kun na,

“Á gapu ta papporé nira, yáyù nga sinistíguál ku ta kuruk yù kinagi nira:

“Arát takayu bulubugá patallungan sù pamagibannagák ku sù ira tatolé.”

Á kunnian yù kinagi ni Namarò, mássiki nu dán nga naparán yù pamagibannagán na sù ira tatole na áddè ngaw kapápparó na ta dabbuno.

<sup>4</sup> Á aijan yù dán nga netúrá nga kuniaw: “Á nagibannák si Namarò sù mekapitu nga ággaw, gapu ta nabalinin yù ngámin nga pinarò na.”\*

<sup>5</sup> Á mássiki nu dán nga naparán yù pamagibannagán ni Namarò ta tatolay, á kinagi na yù kuniaw,

“Arát takayu bulubugá patallungan sù pamagibannagák ku sù ira tatolé,” kun na.

<sup>6</sup> Á yáyù nga ammu tam ta naparán lâ paga kunangan yù pamagibannagán ni Namarò sù ira nga manguruk, gapu ta yù ira ngaw nga nakaginná sù napiá nga dámak, arán na ira pinatallung ni Namarò sù pamagibannagán na nira, gapu ta pinotuád da.

<sup>7</sup> Á yáyù nga sinullà ni Namarò yù tanakuán nga ággaw, nga iningágan na ta “ággawo,” kun na kâ Patul Dabid, nga awayyá nayù ira tatolay nga mesipà sù ira tatolay nga pagibannagan na. Á ammu tam yaw, ta aru yù dagun nga napasá áddè ngaw pangitarátu na kári Kákay Moyses ta áddè ta keggá ni Patul Dabid, á inipetúrá ni Namarò kâ Patul Dabid yù kinagi na, nga kuniaw,

“Á nu ággawo yù pakaginná naw sù bilin ni Namarò,

arán naw ikikkítulan yù ipakánnámmu na nikayu,” kun ni Namarò.

<sup>8</sup> Á gapu ta natay ta kalállammatán yù ira ngaw taga Israel nga ari nanguruk kâ Namarò, á si Josiuwa yù tali ni Moyses, nga nangiyángang sù ira ginaká ra ta lugár na Kaynan. Á nu Kaynan nakuan yù lugár nga inubobuk ni Namarò, á arán na nakuan sinullà yù tanakuán nga ággaw nga pangisipà na ta tatolay sù pamagibannagán na. Ngam ari lâ Kaynan yù pamagibannagán ni Namarò nga inubobuk na.

<sup>9</sup> Á yáyù nga iddanamát tam lâ paga yù pamagibannák ni Namarò nittam nga tatole na, nga kunnay sù ngaw pagibannák na ta kabalin na namarò ta dabbuno, ta pinatukkâ na yù pattarabáku na sù mekapitu nga ággaw.

<sup>10</sup> Á dattái nayù ággaw nga pamagibannák ni Namarò nittam, á sittam ngámin nga mesipà kuna, mattukkâ ittam nga mattarabáku gapay ta kunnay kâ Namarò ta kabalin na namarò.

<sup>11</sup> Á gapu ta iyala wá ni Namarò yù pamagibannagán na nittam, nga kunnay ta pangiyalawá na ngaw nira, ngam arád da nálá, á yáyù nga ipe tam laguk yù urà tam nga mangupù ta panguruk tam sù ubobuk ni Namarò, tapè ari ittam mepárik sù ira ngaw nga ari nakatallung sù pamagibannagán ni Namarò gapu ta pamotu ra kuna.

<sup>12</sup> Ta manotolay nga makáwayyá yù ubobuk ni Namarò, nga meyárik ta bayunetá nga kataramán, nga duá yù ngárák na. Ta makatáppù yù bayunetá ta baggi na tolay. Á kunnian gapay yù keyarigán nayù ubobuk ni Namarò, ta tappútán nayù bilin ni Namarò yù nonò tam ánná yù ure tam, á mepalappá yù ngámin nga nonopat tam nga karagatát tam ánná talákkurugat tam, nu napiá onu naráké.

<sup>13</sup> Á awán bulubugá ta pinarò ni Namarò nga makatuttù kuna, á awán ta melímak kuna, ta malappá yù ngámin nga pinarò na, á ammu na ngámin yù nonopat tam ánná masíngan na yù ngámin nga akkuát tam. Á aggina sangaw yù pakkagiát tam sù ngámin nga kingnguá tam.

*Si Apu Kesu yù Pári tam nga Mamakkápiá nittam kâ Namarò*

<sup>14</sup> Á si Apu Kesu Kiristu nga Aná ni Namarò yù kátannangán nga pári nga mamakkápiá nittam kâ Namarò. Á minayin ta lángi ta gián ni Namarò. Á yáyù nga ipasigaggá tam laguk yù ángngikatalà tam kâ Apu Kesu ánná uputat tam nga ipakánnámmu sù ira kâbulut tam.

<sup>15</sup> Ta yawe kátannangán nga pári yù pannakabaggi tam ta arubáng ni Namarò. Á ammu na ittam ikállà, gapu ta naparubána yù ággiát tam nga tatolay. Á ammu na gemma yù pakkapiyát tam. Ta iniparubá ni Satanás yù ngámin nga makkakerumá nga pamalliwá na

\* **4:4** Genesis 2:2

nakuan kâ Apu Kesu, nga kunnay ta pamarubá na nittam. Ngam si Apu Kesu, ari bulubugá nalliwâ.

<sup>16</sup> Á gapu ta ajjanin si Apu Kesu ta gián ni Namarò nga mamakkápiá nittam kâ Namarò, á mappelò ittam laguk nga makimállà kâ Namarò, tapè ikákkallà na ittam ánnna abbágán na ittam ta meyannung ta ngámin nga máwák tam ánnna jígâ tam.

## 5

<sup>1</sup> Á ngámin nga kátannangán nga pári na Kudio nga sinullà ni Namarò, natullà ira tapè alawatad da yù iyawâ nayù ira tatolay nga ayám, nga iyátáng da ta pannakabaggi nayù ira kábulud da ta arubáng ni Namarò, tapè pakomán ni Namarò ira ta líwiliwâ da.

<sup>2</sup> Á gapu ta tolay lâ yù pári, nga ajjan gapay yù pakkapiyán na, á yáyù nga ammu na mangikállà sù ira kábulun na nga tatolay nga nakaliwâ kâ Namarò, ta arád da ammu ngámin yù pakaliwátad da.

<sup>3</sup> Á gapu ta makaliwâ gapay yù pári, máwák na mangiyátáng gapay kâ Namarò megapu sù baggi na, pángè na mangiyátáng megapu sù ira kábulun na nga tatolay.

<sup>4</sup> Á ta meyannung sù kátannangán nga pári, awán gemma ta tolay nga massippil sù pakáwayyá na ánnna karáyo na. Ngam si Namarò galâ yù manullà ta tolay ta kátannangán nga pári, nga kunnay sù panullà na ngaw kâ Aron.

<sup>5</sup> Á kunnian gapay kâ Apu Kesu Kiristu. Arán na sinippil yù pakáwayyá ánnna karáyo nayù kátannangán nga pári. Si Namarò yù nanullà kuna ta kátannangán nga pári. Á kinagi ni Namarò kuna,  
“Sikaw yù Anâ ku,

á ta ággawo ipakánnámmukin ta sikán yù Yáمام,”\* kun na.

<sup>6</sup> Á ajjan netûrâ paga yù kinagi ni Namarò sù Anâ na,

“Á sikaw yù pári ta áddè ta áddè,

nga kunnay sù kapári nayù ngaw Patul Mellkisidek nga ari bulubugá mapatalián.”†

<sup>7</sup> Á keggá ni Apu Kesu ta dabbuno, nakimállà kâ Namarò, á nagaráyan ánnna nakkulè, ta mássiki nu matay, si Namarò yù makáwayyá nga mangiyígù kuna. Á gapu ta pakimoray ni Apu Kesu kâ Namarò, á yáyù nga gininná ni Namarò yù ipakimállà na.

<sup>8</sup> Á mássiki nu Anâ ni Namarò si Apu Kesu, ginigiámmu na yù kebalinán nayù panguruk na kâ Namarò megapu sù pangiyattam na ta jígâ.

<sup>9</sup> Á gapu ta pinalurò ni Apu Kesu yù ngámin nga inipakuá ni Namarò kuna, ánnna awán bulubugá ta liwâ na, nabbalin ta pareku nga mangiyígù sù ira ngámin nga tatolay nga manguruk kuna, tapè mesipà ira sù áttole na nga mannanáyun.

<sup>10</sup> Á napalurò yian gapu ta sinullà ni Namarò ta kotunán nga pári, nga kunnay sù ngaw Patul Melkisidek.

*Arát tam Likuránán yù Ángngikatalà tam kâ Apu*

<sup>11</sup> Á aru paga yù ikáyâ ku nga ipakánnámmu nikayu nga meyannung sù paggittád di Melkisidek kâ Apu Kesu, ngam marigâ nga mebukalán nikayu, ta nabbalin kayin nga kunnay ta kitul.

<sup>12</sup> Á napiá nakuan nu sikayu ngin yù mangituddu sù ira kábulun naw, ta nabayák kayin nga manguruk. Ngam máwák naw má nga mebukalán nikayu yù napopolu ngaw nga netuddu nikayu, nga ubobuk ni Namarò. Á yáyù nga kunnay kayu ta abbing nga massusu lá paga, nga ari paga makakán.

<sup>13</sup> Á yù ira nga kunnay ta massusu lá paga, arád da ammu mappíli sù napiá ánnna arád da kánnámmuán yù kebalinán nayù bilin ni Namarò.

<sup>14</sup> Ngam yù tolay noga meyárik sù makakán, tulluá megapu sù panguruk na, á kánnámmuán na yù monak nga metuddu kuna, gapu ta ipe na yù urà na nga mappíli sù napiá ánnna mangipuerá sù narákè.

## 6

*Yù Talluá nayù ira Manguruk kâ Namarò*

<sup>1</sup> Á gapu ta naggigiámmu ittamin sù olu nga netuddu nga meyannung sù panguruk tam kâ Apu Kesu Kiristu, gigiámmuat tam laguk yù ngámin nga meyannung sù pakáwayyá na, tapè tulluá yù nonò tam. Arát tam laguk itotoli nga gigiámmuan yù ammu tamin nga netuddu nga meyannung ta pabbabáwi tam ánnna pangikatalà tam kâ Apu, ánnna yù máwák tam nga tukkatan yù akka-akkuát tam nga awán ta serbi na.

\* 5:5 Salmo 2:7; Kebru 1:5    † 5:6 Salmo 110:4

<sup>2</sup> Á nánnámmuát tamin yù netuddu nga meyannung ta pakirigù tam, nga panákkilalán na napakarenuánin yù nonò tam. Á ammu tamin yù netuddu nga meyannung ta pangipotun na tolay ta limá na sù ulu nayù tolay nga sinullà ni Namarò, tapé ipakimállà na kâ Namarò ta abbágán na ta passerbi na kuna. Á ammu tamin yù netuddu nga meyannung sù pamaginnanole ni Namarò sù ira námmatay noká, ánná yù pamanunnú na sù ira tatolay ánná pamagikáru na sù ira mamotu kuna ta áddè ta áddè.

<sup>3</sup> Á yáyù nga gigíámmuat tam laguk yù ngámin nga bilin ni Namarò, nu anugutan ni Namaro, tapé fulluá yù ángnguruk tam ta kunnay ta ure na.

<sup>4</sup> Á yù ira tatolay nga nakaparubá sù allà ni Namarò nira, nu likuránad da yù ángngikatalà da kuna, ari ira bulubugá mapabbabáwi nga mapatoli kuna. Ta naparubád den yù ángngikállà ni Namarò nira ta pakaginnára sù napiá nga dámak, á nesipà ira gapay sù ángngabbák nayù Mangilin nga Ikararuá na.

<sup>5</sup> Á naparubád da gapay yù piá nayù bilin ni Namarò ánná yù ámmagaddátu na nga kunnay ta ipasingan na gapay noká nu duttál yù pagáddekan nga ággaw ánná yù bagu nga ággaw.

<sup>6</sup> Á gapu ta pinarubád da ngámin dannian ánná ammu ra yù pakáwayyá ni Apu Namarò, á nu likuránad da yù ángngikatalà da kâ Apu Kesu, á ari iren mapabbabáwi ta liwâ da, á ari iren mapatoli ta pangikatalà da kuna, gapu ta inipasiránad da yù Anâ ni Namarò ánná inipeluddè da ta arubáng nayù ira tatolay. Á ta kunnian, kunnay ta pidduád da nga ipátâ ta kuru yù Anâ ni Namarò.

<sup>7</sup> Á ta ángngarigán, nu ajjan yù napiá nga ákkomanán nga moranán, á mattubbu yù nemulá kuna ámina mabbungá ta napiá megapu sù allà ni Namarò kuna, á magayáyá yù makáddabbun megapu sù málâ na. Á kunnian yù keyarigán nayù tolay nga napasigaggá yù ángngikatalà na kâ Namarò, á bálatan na gapay ni Namarò ta napiá.

<sup>8</sup> Á ta ángngarigán, nu málâ na lâ nayù makáddabbun yù makkakerumá nga sí, á tuggian na sangaw. Á kunnian gapay sù ira tatolay nga arád da akkuán yù ikáyá ni Namarò, ta meyárik ira ta kasisítán, á yá lá palabbetád da yù impiernu, sangaw nu ukuman ni Namarò ira.

<sup>9</sup> Á wáwwagì nga iddukak ku, inubobuk ku yù pangukum ni Namarò sù ira nga mangnguáta narákè. Ngam ta meyannung nikayu, ammú gemma ta awán bulubugá ta mesimmu nikayu nga kunnay ta katuggi nayù kasisítán, gapu ta ikatalà nawin si Apu Kesu ta mangiyigù nikayu, á palurotan naw yù napiá nga ipakuá ni Namarò nikayu megapu sù packuruk naw kuna.

<sup>10</sup> Ta pareku nga matunung si Namarò, á kemámmatán na yù napiá nga akkuán naw. Á ammu na yù ayá naw kuna, ta ipasingan naw paga megapu sù ángngiddù naw sù ira kábulun naw nga manguruk kâ Apu.

<sup>11</sup> Á karagatám mi ta talákkurugan naw nga uputan yù napiá nga akkuán naw áddè ta pattoli ni Apu Kesu, tapé mapaluró yù ngámin nga iddanamat tam.

<sup>12</sup> Ari kayu laguk malurâ sù ángnguruk naw kâ Apu. Párigán naw galâ yù ira nga napasigaggá yù ángngikatalà da. Ta sittam nga napasigaggá yù ángngikatalà na yù iddán ni Namarò sù initabbá na.

#### *Kuruk nga Mapalurò yù Initabbá ni Namarò*

<sup>13</sup> Á makáwayyá si Namarò nga mamalurò sù initabbá na. Á ajjan yù initabbá na kâ Kákay Abrakam sù ngaw nga nabayágín. Á gapu ta awán ta tanakuán nga makáwayyá ánné kâ Namarò, nga massistigu sù kinagi na, á yáyù nga sinistiguán na galâ ni Namarò lápay ta kuruk yù kinagi na kâ Kákay Abrakam.

<sup>14</sup> Á kinagi na, “Á yawe yù itabbâ nikaw. Pagayáyatata taká megapu sù aru nga iyawâ ku nikaw nga pammakápiám mu, á pagaruak ku noka yù ira ginakám,”\* kun ni Namarò kuna.

<sup>15</sup> Á gapu ta nagattam nga nagiddak si Kákay Abrakam, nga napasigaggá yù pangikatalà na kâ Namarò, á nálâ ni Abrakam yù initabbá ni Namarò kuna.

<sup>16</sup> Á ajjan yù kustombare na tolay nga abbúnán na yù ngágan ni Apu ta pamakuruk na sù kagian na. Á kagian na, “Si Apu Namarò yù makasistigu ta kuruk yù kagiak ku,” kun na. Á ta kunnian, patukkatan na yù pakkaká-ubobuk da.

<sup>17</sup> Á gapu ta inikáyá ni Namarò nga ipakánnámmu ta kukurugán nga arán na bulubugá patalián yù sinalákkuruk na, á sinuttl na yù kustombare na tolay nga mamakuruk sù initabbá na, ta nassistigu si Namarò sù ngaw ira nga nangitabbán na.

\* **6:14** Genesis 22:15-17. Ta olu nga pangitabbá ni Namarò kâ Abrakam (Genesis 12:1-4), napasá 25 nga dagun lage na keyanâ ni Isak (Genesis 21:2-5). Á napasá má 60 nga dagun lage na keyanâ nayù ira ápù na, di Eso kâ Akup (Genesis 25:21-26).

<sup>18</sup> Á yáyù nga aijan yù duá nga pangurugát tam nga ari bulubugá moli, yù pangitabbá ni Namarò áonna yù passistígu na, ta ari bulubugá massiri si Namarò. Á sittam nga nakiyígú kuna, dudduárán na ittam ta ari ittam mabbábág, ngam mapasigaggà ittam laguk nga magiddanáma sù pinarán na megapu nittam.

<sup>19</sup> Á gapu ta napasigaggà yù ággiddanáma tam ta kesipà tam kâ Namarò, napaláddá yù áaggiát tam kuna. Ta si Apu Kesu yù pangikatalakát tam, nga minayin ta lángì sù mangilin nga gián ni Namarò.

<sup>20</sup> Aggina yù minay ta lángì nga napolu ánnè nittam. Ta aggina yù kotunán nga pári nga pannakabaggi tam, nga mamakkápiá nittam kâ Namarò. Á kunnay ta kapári ni Patul Melkisidek yù kapári ni Apu Kesu, nga ari bulubugá mapatalián ta áddè ta áddè.

## 7

### *Si Patul Melkisidek, nga Pári*

<sup>1</sup> Á yù ngaw Patul Melkisidek yù patul nga nammaguray ta ili na Salem, nga pári gapay nga pannakabaggi nayù ira tatolay ta arubág ngámin Kotunán na ngámin. Á panoli ni Kákay Abrakam ta gián na ta kabalin na nangappù ta appâ nga patul nga malussaw kuna, á en na jinápun ni Patul Melkisidek. Á namindision kâ Kákay Abrakam, ta inipakimállà na yù pangikállà ni Namarò kuna.

<sup>2</sup> Á iniyawâ na laguk ni Kákay Abrakam kâ Patul Melkisidek yù mekamapulu sù ngámin nga inâ na. Á yù kebalinán nayù ngagan ni Patul Melkisidek yù patul nga matunung, á matunung yù ngámin nga kingnguá na. Á yù páppatulán na yù dabbun na Salem. Á yù kebalinán na Salem yù lugár nga pagimamatán. Á yáyù nga neparámak si Patul Melkisidek ta napiá nga patul nga matunung áonna mamagimammá.\*

<sup>3</sup> Á awán ta nakagi nga meyannung sù ira darakal ni Patul Melkisidek. Awán ta netúrâ nga meyannung sù ira naggaká kuna onu yù ira ginaká na. Á ari bulubugá nánnámuún yù meyannung sù keyanâ na áonna pate na. Á yáyù nga maggián si Patul Melkisidek nga kunnay sù Anâ ni Namarò, nga pári ta áddè ta áddè.

<sup>4</sup> Nonopat tam laguk yù pakáwayyá ni Patul Melkisidek! Ta si Kákay Abrakam gapay, mássiki nu káke tam ngámin nga Kudio, iniyawâ na kâ Patul Melkisidek yù mekamapulu sù ngámin nga inâ na sù ira nakigerán na.

<sup>5</sup> Á yù ira ginaká ni Kákay Abrakam, aijan yù dán nga netúrâ nga tunung nga netuddu nira, ta iyawâ da yù mekamapulu sù ngámin nga pakkatole ra. Á yù ira páppári nga ginaká ni Libi yù pangiyawatád da, mássiki nu kanakanáyud da ira.

<sup>6</sup> Á si Patul Melkisidek, mássiki nu ari gemma ginaká ni Libi, aggina yù pangiyawatán ni Kákay Abrakam sù mekamapulu sù kukuá na. Á si Patul Melkisidek yù namindision, nga nakkiddaw kâ Namarò ta ikákkállà na si Kákay Abrakam, mássiki nu aggina yù nangitabbán ni Namarò.

<sup>7</sup> Á ammu tam gemma ta makáwayyá yù mamindision ánnè sù bindisionán na.

<sup>8</sup> Á ta meyannung sù ira páppári, nga ginaká nayù ngaw Libi, aggira yù mangalawâ sù mekamapulu sù ira kanakanáyud da nga Kudio. Á tatolay ira lá nga matay, nga mapatalián sangaw. Ngam aijan yù netúrâ nga meyannung kâ Patul Melkisidek, ta aggina yù pári nga matolotay ta áddè ta áddè.

<sup>9</sup> Á yù ngaw páppári nga ginaká ni Libi, inalawâ da yù mekamapulu sù ira tatolay. Ngam máyâ ta kagiat tam gapay ta kunnay ta nappagá si Libi sù mekamapulu kâ Patul Melkisidek megapu kâ Kákay Abrakam.

<sup>10</sup> Ta apù na ta siku ni Kákay Abrakam si Libi, nga ari paga neyanâ ta panápun nayù káke na kâ Patul Melkisidek. Á kunnay ta aijan si Libi paga ta baggi ni Kákay Abrakam ta pappagá ni Abrakam sù mekamapulu kâ Patul Melkisidek. Á yáyù nga mesipà si Libi sù kingnguá nayù káke na.

### *Yù Pári nga Kunnay kâ Patul Melkisidek*

<sup>11</sup> Á sù ngaw nga nabayák, inipetúrâ ni Namarò kâ Kákay Moyses yù tunung na Kudio. Á sinullà ni Namarò yù ira ginaká ni Libi, tapè aggira yù pári. Á si Aron yù olu nga ginaká ni Libi nga pári. Á nonopat tam yaw. Gapu ta ari kukurugán nga mapakkápiá yù ira tatolay kâ Namarò megapu sù kapári nayù ira ngaw ginaká ni Libi, á máwák nga duttál yù tanakuán nga pári, nga kunnay kâ Patul Melkisidek yù kapári na. Á yáyù nga sinalián na ira ni Namarò.

\* 7:2 Genesis 14:18-20

12 Á gapu ta sinalián ni Namarò yù ira páppári nga ginaká ni Libi, máwák gapay nga talián na yù tunung.

13 Á si Apu Kesu yù ubobugak ku, nga táli nayù ira páppári nga ginaká ni Libi. Á awán bulubugá ta pári nga naggapu sù ira naggaká kâ Apu Kesu, ta tanakuán gemma yù naggaká kuna.

14 Ta ammu tam ta ginaká ni Juda yù Yápu tam. Á si Kákay Moyses, awán bulubugá ta kinagi na nga meyannung ta pári nga naggapu sù ira ginaká ni Juda.

15 Á mepasingan ta pinatalián ni Namarò yù ira páppári nga ginaká ni Libi ánná yù dán nga tarátu na gapay nga meyannung sù katunung na tolay, nepatalugáring ta panullà ni Namarò sù tanakuán nga pári nga mannanáyun, nga kunnay kâ Patul Melkisidek yù kapári na.

16 Á ta katullà ni Apu Kesu ta pári, ari negapu sù tunung na Kudio nga meyannung sù ira naggaká kuna, nu ari galá negapu sù pakawayyá na, ta aggina yù matotolay ta áddè ta áddè.

17 Á aijan yù inipetúrâ ni Namarò nga meyannung kuna nga kunniauw:

“Sikaw yù pári ta áddè ta áddè,

nga kunnay sù kapári ni Patul Melkisidek nga ari bulubugá mapatalián.”

18 Á gapu ta awán ta tolay nga makatuppál sù tunung ni Moyses, á awán laguk ta tolay nga meyígù megapu kuna, á awán ta serbi na.<sup>†</sup> Á yáyù nga kánnámmuát tam laguk ta sinalián ni Namarò yù tunung ni Moyses,

19 gapu ta awán bulubugá ta tolay nga mabbalin ta pareku nga matunung megapu sù panguruk na sù tunung. Ngam aijan laguk yù kapiánán nga ággíat tam, ta más napiá yù iddanamát tam megapu kâ Apu Kesu, ánná mapelô ittamin kâ Namarò.

20 Á mánnámmuát tam ta más napiá yù kapári ni Apu Kesu, gapu ta panullà ni Namarò kâ Apu Kesu, á initabbá na kuna ta kukurugán nga mannanáyun yù kapári na. Ngam sù panullà na sù ira páppári nga ginaká ni Libi, awán ta initabbá na.

21 Á yawe yù initabbá ni Namarò ta panullà na kâ Apu Kesu, nga kunnay sù dán nga netúrá nga kunniauw,

“Sikán si Apu Namarò, á arák ku bulubugá ibabáwi yù talákkurugak ku. Á sistiguák ku ta kuruk yù kagiak ku,

‘Sikaw yù pári ta áddè ta áddè.’ ”

22 Á yáyù nga ammu tam ta si Apu Kesu yù namaláddá nga namalurò sù más napiá nga tarátu ni Namarò megapu nittam.

23 Á aijan paga yù táddy ngä kapiánán nayù kapári ni Apu Kesu. Ta mássiki nu aru yù ira ngaw páppári, ngam arád da awayyá nga mopù yù kapári ra, gapu ta matay ira nga mapatalián.

24 Ngam pári si Apu Kesu ta áddè ta áddè, nga ari bulubugá mapatalián, gapu ta aringin bulubugá matay.

25 Á yáyù nga si Apu Kesu yù makawayyá ngä mangiyígù sù ira ngámin nga tumulù naga makipakomá kâ Namarò megapu kuna. Ta sigga-inángà si Apu Kesu, nga pári nga matotolay ta áddè ta áddè, naga makimi-imállà kâ Namarò megapu sù ira ngámin nga mangikatalà kuna.

26 Á si Apu Kesu yù máwák tam nga pári, naga pannakabaggi tam ta arubáng ni Namarò, gapu ta aggina yù mangilin, naga pareku nga matunung, naga awán bulubugá ta liwâ na. Á yáyù nga kukurugán nga nerumá nittam, ta makaliwâ ittam, ngam pareku nga napiá lâ yù nonò na. Á inipotun ni Namarò si Apu Kesu, tapè aggina yù Kotunán nga meparáyw ta lángi.

27 Á nerumá gapay sù ira ngaw páppári, ta arán na máwák nga mangiyátang ta kággággaw. Á yù ira ngaw páppári, máwák da ngaw nga mangiyátang megapu sù liwâ da, lage ra mangiyátang gapay megapu sù liwâ nayù ira tatolay. Ngam si Apu Kesu, gapu ta awán bulubugá ta liwâ na, á mittán lâ yù pangiyátang na megapu nittam, tapè mári yu liwâ tam nga tatolay. Á arán na máwák naga pidduán yù pangiyátang na, ta yù baggi na yù iniyátang na megapu nittam, sù ketapil na ta kurù.

28 Á yù ira ginaká ni Libi naga natullà ta pári megapu sù tunung nayù ngaw Moyses, á tolay ira lâ yù nakaipi ánná nakaliwâ. Ngam megapu sù pangitabbá ni Namarò, sinullà na yù Aná na naga naporián sù tunung ta nabayák, naga namalurò ta ngámin nga ure nayù Yáma na, á nabbalin ta pári nga kapiánán, naga maggián ta áddè ta áddè.

<sup>†</sup> 7:18 Roma 8:3

**8**

*Yù Kapiánán nga Tarátu ni Namarò megapu kâ Apu Kesu*

<sup>1</sup> Á yawe yù kebalinán nayù kinagi, nga aijanin yù kotunán nga pári, nga pannakabaggi tam kâ Namarò, nga nepagitubangin ta jiwanán ni Namarò ta lángì, nga mepammaguray kâ Namarò nga makáwayyá.

<sup>2</sup> Á aggina yù pári nga masserbi kâ Namarò sù mangilin nga gián na ta lángì, nga kuruk nga bale ni Namarò. Ta yù ngaw bale na nga pakimorayán nayù ira tatolay kâ Namarò ta dabbuno, pidde ra lâ nayù ira tatolay, nga keyarigán nayù bale ni Namarò ta lángì. Ngam si Namarò nga Yápu tam yù nappadday sù bale na ta lángì.

<sup>3</sup> Á yù ira kátannangán nga pári ta dabbuno, natullà ira tapè iyátáng da kâ Namarò yù ayám nga iyawá nayù ira kábulud da. Á kunnian gapay kâ Apu Kesu, nga kotunán nga pári tam, ta aijan ngaw yù máwák na nga iyátáng.

<sup>4</sup> Á nu aijan si Apu Kesu paga nakuan ta dabbuno, ari gemma pári, ta aijan yù ira ginaká ni Libi nga natullà ta pári, nga mangiyátáng nakuan kâ Namarò sù ayám nga iyawá nayù ira tatolay, ta meyannung sù tunung ni Moyses.

<sup>5</sup> Á yù bale ni Namarò nga pidde ni Moyses ta kalállamatán, kunnay lâ ta alinu nayù eggá ta lángì nga inipasingan ni Namarò kuna. Á ta pappadde ni Moyses, kinagi ni Namarò kuna, "Imugurám mu yù áppadem, tapè pareku nga megitá yù paddayam mu sù inipasingak ku ngin nikaw ta keggám sù puddul,"\* kun na.

<sup>6</sup> Ngam aijanin si Apu Kesu Kiristu sù bale ni Namarò ta lángì, nga mamakkápiá ta tatolay kâ Namarò. Á más napiá yù kapári ni Apu Kesu ánnè sù kapári nayù ira Kudio ta dabbuno, ánná más napiá gapay yù bagu nga tarátu ni Namarò ánnè sù dán nga tarátu na, megapu sù kapiánán nga initabbá ni Namarò.

<sup>7</sup> Á ta ángngarigán, nu napalurò nakuan yù ure ni Namarò megapu sù napolu nga tarátu na, á arán na nakuan pinará yù mekarúá.

<sup>8</sup> Ngam arán na iníkáyá ni Namarò yù kingngikingnguá nayù ira ngaw tatolay nga simintull sù napolu nga tarátu na. Á yáyù nga kinagi ni Namarò, "Sikán si Namarò, á yawe yù kagiak ku.

Duttál yù tanakuán nga ággaw, á palurotak ku yù bagu nga tarátu sù ira tatolè nga ginaká ni Israel ánná yù ira ginaká ni Juda.

<sup>9</sup> Á ari megitá yù bagu nga tarátu sù ngaw tarátù, nga kinagi sù ira ngaw naggaká nira, ta pangipánò nira ta páppatulán na Egipto.

Ta yù ira ngaw naggaká nira, arád da garé sinuppál yù tarátù nira, á yáyù nga pinaguráyák ku ira," kun ni Apu Namarò.

<sup>10</sup> "Ngam yawe yù bagu nga tarátu sù ira ginaká ni Israel.

Duttál sangaw yù ággaw, á ipatattam ku ta nonò da yù tunung ku, tapè arád da káttamán. Á sikán laguk yù pakiyápuád da,

á aggira gapay yù tatolè.

<sup>11</sup> Á ta kesimmu na sangaw, ari iren laguk makkakátuddu.

Awán ta tolay nga makkagi ta kabbulun na, 'Máwák nga ammul si Apu,' gapu ta aggira ngámin, ammu rangá,

mássiki yù kagukábán áddé sù karakalán.

<sup>12</sup> Á ikákkállà ku ira ánná pakomák ku yù liwilivá da.

Á arák kin nonopan yù ngaw kingnguá ra nga narákè."†

<sup>13</sup> Á ta pakkagi ni Namarò ta meyannung sù bagu nga tarátu na, inibiláng na ta napasángin yù ásserbi nayù napolu. Á máringin sangaw yù dánin, nga awán ta passerbián na.

**9**

*Yù Pakimore nayù ira Tatolay kâ Namarò ta Keggá nayù Olu nga Tarátu*

<sup>1</sup> Á sù olu nga tarátu ni Namarò sù ira tatolay, kinagi ni Namarò nira yù taddán na nga meyannung sù pakimore ra kuna. Á inipapadde na gapay nira yù bale na, nga paggagammungád da ta pakimore ra kuna.

<sup>2</sup> Á yù tabbì na ayám yù pidde ra ta bale ni Namarò, nga duá yù lágum na. Á yù lágum nga pattallungád da, mangngágan ta Mangilin nga Gián. Á aijan ta lágum yù ánnáddagán na isíngan nga pitu yù pangá na, ánná yù lamesá nga pangipayyád da ta mangilin nga pán nga iyátáng da kâ Namarò.

\* 8:5 Exodus 25:40    † 8:12 Jeremia 31:31-34

<sup>3</sup> Á yù mekaruá nga lágum, nalipparán ta kortíná nga nakannak, á mangngágán ta yù Kangilinán nga Gián.

<sup>4</sup> Á ajian ta Kangilinán nga Gián yù napadday ta bulawán nga ánnuggiád da ta bábbanguk nga meyátáng. Á ajian gapay yù kakon, nga neparakkà ta lawán na ánná unak na yù bulawán. Á yù mayán nayù kakon yù duá nga dappik nga batu nga ajian netúrâ nira yù taddán ni Namarò nga meyannung sù tarátu na. Á ajian gapay sù kakon yù tagukuk ni Aron nga naddon ánná yù angáng nga bulawán nga napayyán ta manna, nga kanan nga naggapu ta lángi nga iniyawâ na ngaw ni Namarò sù ira tatolay ta keggá ra ta kalállamatán.

<sup>5</sup> Á ajian ta utun nayù kallak na kakon yù duá nga sináttolay, nga bulawán, nga nappyâ. Aggira yù keyarigán nayù ira maráyaw nga daroban ni Namarò nga mangngágán ta kerubim, nga mepulù kâ Namarò, nga panákkilálán ta keggá na tán ni Apu Namarò. Á yù ira sináttolay, napagarubáng ira, á nassonná yù payâ da ta utun nayù kallak na kakon nga bulawán, nga pangiyátangán nayù pári ta dága na ayám ta arubáng ni Namarò, tapè pakomán na yù liwiliwâ nayù ira tatolay. Á yáyù áddè nayù kagiak ku nga meyannung sù keyarigán na, ta arák ku mebukalán saw yù ngámínnga meyannung karannian.

<sup>6</sup> Á ta kabalín nayù ira páppári nga nangiparán ngámín karanniaw, tullung ira ta kággággaw sù olu nga lágum, tapè tuppálad da yù kapári ra.

<sup>7</sup> Ngam yù mekaruá nga lágum yù Kangilinán, á yù kátannangán nga pári lá yù makatalung tán, á mittán lá ta tangaragun yù tallung na. Á tallung na, máwák na nga ipulù yù dága na ayám nga iyátáng na kâ Namarò megapu sù liwiliwâ na ánná megapu sù liwiliwâ nayù ira tatolay gapay.

<sup>8</sup> Á gapu ta ari makatallung yù ira káruán nga pári sù Kangilinán nga Gián, á yáyù nga ipakánnámmu nayù Mangilin nga Ikararuá ta ari paga jimittál yù ággaw nga pakatallung nayù ira tatolay sù Kangilinán nga Gián ni Namarò, gapu ta ajian lá paga yù olu nga pattallungád da, nga lágum nga Mangilin.

<sup>9</sup> Á danniaw yù keyarigán nayù ággíat tam, ta mepasingan ta mássiki nu pígiá yù iyawâ nayù ira tatolay nga ayám nga meyátáng kâ Namarò, ari mári yù liwiliwâ da, gapu ta ari mapatunung yù nonò da.

<sup>10</sup> Ta yù tunung nga tuppálad da yù meyannung galâ ta kanad da ánná inumad da ánná áppakarenúra ta baggi ra. Á naggián lá dannian nga tunung nga meyannung sù eggánga masingan, áddè ta dattál nayù bagu nga tarátu.

### *Yù Dága ni Apu Kesu Kiristu*

<sup>11</sup> Á jimittálín si Apu Kesu Kiristu, nga kotunán nga pári, á pinalurò na yù ngámínnga meyannung sù bagu nga tarátu ni Namarò. Ta simillung sù kukurugánnga bale ni Namarò, ná arán na pidde na tolay, nga ari saw yù gián na nu ari galâ nga ajian ta lángi.

<sup>12</sup> Á namittán lá yù tallung ni Apu Kesu sù kuruk nga Kangilinán nga Gián, nga gián ni Namarò ta lángi. Á ari yù dága na kajjing ánná báka yù iniyátáng na, nu ari galâ yù dága na lápay, nga iniyawâ na sù pagikáru na ta liwiliwâ tam. Á nári ngin yù liwiliwâ tam ta áddètamegapu sù dága na.

<sup>13</sup> Á ta meyannung sù olu nga tarátu ni Namarò, nu támmítan nayù ira tatolay yù baggi na tolay onu ayám nga natay, onu tanakuán nga makálirák yù támmítad da, á mebiláng ira ta narapingán, nga ari mepángngà nga makímoray kâ Namarò. Ngam nu iwarí na nira nayù pári yù dága na kajjing ánná toro ánná yù abu na kígaw na báka nga neytáng, á megapu sù dága na ayám, mebiláng yù ira tatolay ta napakarenuánnga mepángngà nga makímoray kâ Namarò.

<sup>14</sup> Á pappanganâ sù dága ni Apu Kesu Kiristu, ta mapakarenuán yù nonò nayù ira tatolay megapu sù dága ni Apu, gapu ta awán bulubugá ta liwâna. Á imitapil na yù baggi na lápay, nga kunnay ta neytáng kâ Namarò, megapu sù ánggabbák nayù Mangilin nga Ikararuá. Á yáyù nga arát tamín uputan yù kunnay ta iniyátáng da ngaw nayù ira pári, nga ari gemma makári sù liwâna tatolay, gapu ta napakarenuán ittamin ánná napatunung yù nonò tam, megapu galâ sù dága ni Apu. Á ajianin yù awayyá tam nga masserbi kâ Namarò nga sigga-inángánga matotolay ta áddètata áddè.

<sup>15</sup> Á megapu sù pakáwayyá nayù dága ni Apu Kesu Kiristu, aggina yù makáwayyánga mammalurò sù bagu nga tarátu ni Namarò, tapè mesipà kâ Namarò yù ira tatolay nga agálánna, ánná málâ da yù mannanáyún nga initabbá na níra. Ta natay si Apu Kesu, nga nagikáru ta liwiliwâ tam, tapè meyígú ittam ánná arán na ittam pagikaruan ni Namarò megapu sù olu nga tarátu nga pakaliwatát tam.

<sup>16</sup> Á ta ángngarigán, ajjan yù tolay nga umay sù abugádu, á ipetúrâ na kuna yù tarátu na, ta nu matayin, á meyawâ yù kukuá na sù anâ na. Ngam máwák nga matay yù tolay lage na meyawâ yù kukuá na sù anâ na.

<sup>17</sup> Á ari gemma mapatuppál yù tarátu na, nu matolay paga yù tolay.

<sup>18</sup> Á mássiki yù olu nga tarátu ni Namarò, ari mapalurò nu awán ta ayám nga napárti tapè meyátang yù dágna.

<sup>19</sup> Á yáyù nga kunniaw yù kingnguá na ngaw ni Kákay Moyses. Binibbik na sù ira tatolay yù ngámin nga taddán ni Namarò nga netúrâ sù tunung na. Á kabalin na nabbibbik, inâ na yù dágna kígaw na báka ánnna kajjing, nga inikiruk na ta danum. Á inâ na yù pangá na káyú nga kisop nga nababbarán ta duddú na karneru nga nakolorán ta ujjojin, nga iniyusá na ta pangiwári na ta dágna sù ira tatolay ánnna yù libru gapay nga netúratán nayù tunung ni Namarò.

<sup>20</sup> Á ta pangiwári ni Moyses sù dágna, kinagi na nira, "Yawe dágna yù sinniál ta mapalurò yù tarátu ni Namarò nu kurugat tam yù taddán na,"\* kun na.

<sup>21</sup> Á kunnian gapay iniwári na yù dágna sù balay nga ákkimorayád da kâ Namarò, ánnna yù ira ngámin nga aruátan na nga iniyusá ra ta pakimore ra.

<sup>22</sup> Á ta meyannung sù tunung ni Namarò, mággé ngámin mapakarenuán megapu ta dágna. Á nu awán ta dágna nga neyátang, ari mapakomá yù liwiliwâ nayù ira tatolay.

#### *Namittán lâ yù Ketapil ni Apu Kesu nga Keyátang na megapu nittam*

<sup>23</sup> Á yù bale ni Namarò nga ajjan ta dabbuno ánnna yù aruátan na, danniaw yù meyárik sù kukurugán nga ajjan ta lángi. Á máwák nayù ngaw pári nga mangiyátang ta dágna ayám, tapè mapakarenuán ánnna mangilin danniawe nga iyuásá nayù ira tatolay ta pakimore ra. Ngam más napiá yù gián ni Namarò ta lángi ánnna yù aruátan na, á yáyù nga más napiá gapay yù neyátang sù gián na ta lángi.

<sup>24</sup> Á pangiyátang ni Apu Kesu Kiristu, arán na sillungán yù pidde na tolay, nga meyárik sù ajjan ta lángi. Ngam sillungán na galâ yù kukurugán nga gián ni Namarò ta lángi. Á maggiánin ta lángi nga makimi-imállà kâ Namarò megapu nittam.

<sup>25</sup> Á yù kátannangán nga pári nga Kudio, tullung sù Kangilinán nga Gián ta kádaragun nga mangipulù ta dágna ayám nga iyátang na. Ngam si Apu Kesu, ari name-aru yù pangiyátang na ta baggi na.

<sup>26</sup> Ta nu name-aru nakuan yù pangiyátang ni Apu Kesu, á ari nopù nakuan yù pagattam na ta pate na áddè ngaw sù kaparò na dabbuno ta áddè kunangan. Ngam namittán lâ yù keyanâ ni Apu Kesu ta tolay ta pamegapu nayù maporián nga ággaw, á namittán lâ yù pangitapil na sù baggi na, nga neyátang megapu nittam, tapè pakarenuán na ittam ánnna mári yù liwiliwâ tam.

<sup>27</sup> Á sittam ngámin nga tatolay, máwák nga mamittán ittam nga matay sangaw. Á sangaw nu duttál yù ággaw nga pamanunnù ni Namarò sù ira tatolay, á panunnután na ittam laguk.

<sup>28</sup> Á kunnian gapay kâ Apu Kesu Kiristu, nga namittán lâ nga natay, mássiki awán ta liwâ na, ta netapil yù baggi na megapu nittam, ta pagikáru na ta liwiliwâ tam ngámin nga tatolay. Á duttál má sangaw ta dabbuno si Apu Kesu, nga aringin matay nga magikáru ta liwâ tam, nu ari galâ umay nga mangiyígù nittam nga magiddi-iddak kuna, tapè mepaggián ittam kuna ta áddè ta áddè.

## 10

#### *Yù Pamakkápiá ni Apu Kesu nittam kâ Namarò*

<sup>1</sup> Á yù ngámin nga kustombare na pári nga Kudio nga meyannung sù tunung nga inipetúrâ na ngaw ni Namarò kâ Moyses, danniaw yù keyarigán nayù kukurugán nga kapári ni Apu Kesu Kiristu. Á yù iniyátang na pári nga Kudio yù keyarigán nayù baggi ni Apu Kesu nga neyátang megapu nittam. Á yáyù nga mássiki nu mangiyátang yù pári ta kádaragun, ari bulubugá mapatunung yù nonò nayù ira tatolay megapu sù pangiyátang na.

<sup>2</sup> Á ta ángngarigán, nu ajjan nakuan yù ira makimoray nga kukurugán nakuan nga náringin yù liwiliwâ da ánnna napakarenuán yù nonò da, á ari iren nakuan mappasirán, á ammu ra ta aráda máwák nga uputan yù pangiyátang da ta kádaragun.

<sup>3</sup> Ngam ari mári yù liwiliwâ da megapu sù iniyátang da. Yá lâ serbi na ta ipanonò na sù ira tatolay ta kádaragun ta ajjan paga yù liwiliwâ da.

<sup>4</sup> Ta ari bulubugá mári yù liwâ na tolay megapu sù dágna na toro ánnna kajjing.

<sup>5</sup> Á yáyù nga kinagi ni Apu Kesu Kiristu sù Yáma na, sù ngaw lage na páno ta lángi nga umay ta dabbuno, nga kun na,

“Arám mu gemma ikáyâ yù dága na ayám nga meyawâ nga meyátang nikaw, á yáyù nga iniparánám mà ta baggi.

<sup>6</sup> Ta ari ka magayáyâ sù meyátang nga baggi na ayám nga matuggi ánnna yù ayám nga meyátang megapu sù liwiliwâ na tatolay.

<sup>7</sup> Á yáyù nga kagiak ku nikaw ta aijanà saw, Apu Namarò, tapè palurotak ku yù ipakuám nikán,

nga kunnay ta netúrâ sù bilim mu nga meyannung nikán.”\*

<sup>8</sup> Á pakkagi ni Apu Kesu karannian, yá napolu nga kinagi na, ta arán na ikáyâ ni Namarò yù makkakerumá nga meyawâ ánnna meyátang kuna, á ari magayáyâ sù meyátang nga matuggi ánnna yù ayám nga meyátang megapu ta liwâ nayù ira tatolay, mássiki nu dannian yù iyátang nayù ira tatolay tapè tuppálad da yù metuddu megapu sù tunung.

<sup>9</sup> Á kabalín na nakkagi karannian, kinagi na laguk kâ Namarò, “Ajjanà saw, tapè palurotak ku yù ipakuám nikán,” kun na. Á yáyù kinagi na, gapu ta patalán ni Namarò yù pangiyátang nayù ira tatolay ta ayám, á yù keyátang ni Apu Kesu yù táli na.

<sup>10</sup> Á gapu ta pinalurò ni Apu Kesu Kiristu yù ngámin nga ure ni Namarò, á yáyù nga napakarenuán ittamin ta liwiliwâ tam, megapu sù pangiyátang ni Apu Kesu sù baggi na, nga mittán lâ ta áddè ta áddè.

<sup>11</sup> Á yù ira páppári nga Kudio, palurotad da yù pakimore ra kâ Namarò ta kággágaw, á mame-aru yù pangiyátang da, ngam ari bulubugá makári ta liwâ.

<sup>12</sup> Ngam si Apu Kesu Kiristu, iniyátang na yù baggi na, nga namittán lâ, nga mangari ta liwiliwâ tam ngámin ta áddè ta áddè. Á kabalín na pangiyátang, nagitubang ta jiwanán ni Namarò ta lángi, nga ággitubangán nayù kotunán nga maráyaw.

<sup>13</sup> Á maggián ta lángi nga magiddak áddè ta arán na ipeguppé ni Namarò kuna yù ira malussaw kuna.

<sup>14</sup> Ta megapu sù mittán lâ nga pangiyátang ni Apu Kesu, náríngin yù liwiliwâ nayù ira ngámin nga mangikatalà kuna ánnna pinakarenuán na yù nonò da, á pinabbalin na ira ta napiá ánnna mangilin nga tatole na ta áddè ta áddè.

<sup>15</sup> Á ipakánnámmu nayù Mangilin nga Ikararuá ta kuruk yian, ta inipetúrâ na ngaw yù kinagi ni Namarò nga kunnia:

<sup>16</sup> “Yawe yù tarátu sù ira tatolè sangaw nu duttál yù ággo na.

Ipatattam ku ta putu ra yù tunung ku.

Ipatalattâ ku ta nonò da yù itaddák ku,  
tapè arád da káttamán,” kun na.

<sup>17</sup> Á kinagi na gapay,

“Á arák kin bulubugá nonopan yù liwiliwâ da  
ánnna yù naráké nga kingngua’ ra.”

<sup>18</sup> Ta napakomángin yù ira ngámin nga liwiliwâ da, á yáyù nga awánin ta máwák da nga meyátang megapu ta liwiliwâ da.

*Si Apu Kesu yù Káttannangán nga Pári nga Masserbi kâ Namarò megapu nittam*

<sup>19</sup> Á wáwwagi nga mangikatalà kâ Apu Kesu, aijan yù awayyâ tam nga mappelò nga makimállâ ánnna makimoray kâ Namarò, nga kunnay ta makatallung sù kukurugán nga Kangilinán nga Gián na, megapu sù dága ni Apu Kesu, nga neyátang tapè mári yù liwiliwâ tam.

<sup>20</sup> Á yáyù pinalurò ni Apu Kesu ta pangitapil na sù baggi na ánnna paginnanole na, á kunnay ta binukatán na yù bagu nga áttallungát tam ta gián ni Namarò megapu sù pangiyátang na sù baggi na. Á yù keyarigán nayù baggi ni Apu Kesu yù kortíná nga nelippak sù ira tatolay sù Kangilinán nga Gián ta bale ni Namarò, nga napisil sù pate ni Apu Kesu.<sup>†</sup> Á gapu ta matolayin, simillung sù gián ni Namarò megapu nittam.

<sup>21</sup> Á aijanin si Apu Kesu nga kotunán nga pári nga namakkápiá nittam kâ Namarò, nga mammaguray nittam nga tatole na.

<sup>22</sup> Á yáyù nga mappelò ittam laguk nga makimoray kâ Namarò, á ari ittam mabbábâng. Á ipasigaggâ tam yù ángngikatalà tam kâ Namarò, ta mapálappawánin yù nonò tam, gapu ta napakomá ngin yù liwiliwâ tam megapu sù dága ni Apu Kesu. Á napakarenuán ittamin nga kun na narigù ta nalitáw nga danum.

\* 10:7 Salmo 40:6-8    † 10:20 Markus 15:38

<sup>23</sup> Á ipasigaggà tam yù pagiddanáma tam sù kesipà tam kâ Namarò ta áddè ta áddè. Ta mekatalà si Namarò ta mamalurò sù initabbá na nittam.

<sup>24</sup> Á makkakáruduúk ittam nga makkaká-iddù ánnna malláppà ittam nga mamalurò sù napiá nga ipakuá ni Namarò nittam.

<sup>25</sup> Á arát tam tukkatan yù paggagammung tam nga makimoray kâ Namarò, nga kunnay sù akkuán nayù ira káruán, nu ari galâ makkakápanonò ittam sù napiá nga ággangnguá tam, tapè mepasigaggà yù ángnguruk tam, nepatalugáring ta ammu tam ta mabíkin nga duttál yù ággaw nga pattoli ni Apu Kesu.

<sup>26</sup> Á ta ángngarigán nu ajjan yù tolay nga nánnámmuán na yù kuruk nga meyannung kâ Apu Kesu, ngam talákkurugan na galâ nga akkuán yù narákè, á awánin laguk ta tanakuán nga meyátáng nga makári nakuan ta liwâ na.

<sup>27</sup> Ngam yá lá iddanamán na yù makánnanássing nga pangukum ni Namarò, á labbetán nayù tolay yù ornu, nga katuggián nayù ira nga malussaw kâ Apu.

<sup>28</sup> Á ta meyannung sù tunung ni Namarò nga inipetúrâ na kâ Moyses, nu ajjan yù tolay nga nalliwâ, ánnna ajjan yù duá onu tallu nga nassistígu ta kuruk nga nalliwâ, á papatáyad da, nga awán ta mangikállà kuna.<sup>‡</sup>

<sup>29</sup> Á nu kunnian yù pamagikáru ra sù tolay nga ari nanguruk sù tunung ni Moyses, á pappanganâ lâ sangaw sù pamagikáru ni Namarò sù tolay nga mangiluddé kâ Apu Kesu, nga Aná ni Namarò! Ta negapu ta pangiluddè na kâ Apu Kesu, pakkakagián na yù Mangilin nga Ikararuá ni Namarò nga mangikállà nittam, ánnna ibiláng na ta awán ta serbi nayù dágá ni Apu Kesu, nga neyátáng sù pate na tapè mapalurò yù bagu nga tarátu ni Namarò, ánnna mapakarenúan ittam. Á merallà gemma yù pamagikáru ni Namarò kuna.

<sup>30</sup> Ta ammu tam si Namarò, ánnna ammu tam ta palurotan na yawe nga kinagi na: "Sikán yù mabbálà sù ira nga mangnuá ta narákè. Á iyawâ ku nira yù mepángngà nga bálà nayù liwiliwâ da," kun na. Á ajjan gapay yù dán nga netúrâ nga kunnia, "Si Apu Namarò yù mamanunnù sù ira tatole na."<sup>§</sup>

<sup>31</sup> Á si Namarò yù matotolay ta áddè ta áddè, á makánnanássing yù pamagikáru na sù ira makaliwâ.

<sup>32</sup> Á nonotan naw laguk yù áaggián naw ngaw ta kapámmegapu naw nga manguruk kâ Apu, nga nanawagánin yù nonò naw. Á mássiki nu jinigirigâ da kayu nayù ira nga ari nanguruk, inattamán naw ngámin, ánnna napasigaggà yù ángngikatalà naw kâ Apu.

<sup>33</sup> Á nu káruán, nakkakagiád da kayu nayù ira ari nanguruk, ánnna kingngikingnguá ra kayu ta arubáng na aru nga tatolay. Á nu káruán, jinigirigâ da gapay yù ira kábulun naw, á nabaluntáriu kayu nga nekanakanâ nira negapu sù pangikállà naw nira.

<sup>34</sup> Ta inikállà naw yù ira nga nebáluk megapu sù panguruk da kâ Apu. Á mássiki nu ginubâ nayù ira malussaw yù kukuá naw, á pinaguráyán naw, ta nagayáyâ kayu paga, gapu ta ammu naw ta ajjan yù kuruk nga napiá nga kukuá naw nga maggián ta lángi ta áddè ta áddè, nga ari bulubugá magubâ.

<sup>35</sup> Á gapu ta kunnian yù pagattam naw, arán nawin laguk pallikuránán yù pangikatalà naw kâ Apu, ta aru nga nakástá yù iyawâ ni Apu nga bálà nayù ira nga napasigaggà yù ángngikatalà da kuna.

<sup>36</sup> Á mawák nga mapasigaggà yù ángngikatalà tam ánnna magattam ittam lâ nu marigirigâ ittam, tapè palurotat tam yù ipakuá ni Namarò nittam, ánnna málâ tam yù napiá nga initabbá na.

<sup>37</sup> Ta ajjan yù netúrâ nga kunnia sù bilin ni Namarò:

"Á ari mabayák, á umay sangaw yù iddagán naw nga umay,

á arán na ipáppáná yù ánge na."<sup>\*</sup>

<sup>38</sup> Á yù ira tatolay nga ibiláng ku ta matunung megapu sù napasigaggà nga ángngikatalà da nikán,

tolayak ku ira ta áddè ta áddè.<sup>†</sup>

Ngam nu pallikuránad da yù pangikatalà da nikán megapu sù jigâ da,  
aringâ magayáyâ nira," kun ni Apu.

<sup>39</sup> Ngam sittam, wáwwagi, ari ittam negítta sù ira tatolay nga pallikuránad da yù pangikatalà da kâ Namarò, nga ukuman ni Namarò sangaw. Ta napasigaggà yù ángngikatalà tam kâ Namarò, á yáyù nga meyígù ittam, nga mesipà kuna.

## 11

*Yù ira Tatolay nga Neparámak megapu sù Ángngikatalà da*

<sup>1</sup> Á anni laguk yù kebalinán nayù pangikatalà tam kâ Namarò? Nu ikatalà tam si Namarò, ammu tam ta málawâ tam yù ngámin nga napiá nga initabbá ni Namarò nga iddanamát tam, ánná ammu tam ta kukurugán nga aijanin ngámin yù kinagi ni Namarò, mássiki dannian nga arát tam paga nasingan.

<sup>2</sup> Á yù ira ngaw o-olu nga tatolay, jináyo ni Namarò ira gapu ta pangikatalà da kuna.

<sup>3</sup> Á sittam gapay, gapu ta pangikatalà tam kâ Namarò, kánnámmuát tam ta pinarò na yù ngámin nga masingat tam megapu galâ sù pagubobuk na. Á yáyù nga ammu tam ta pinarò na yù ngámin nga masingat tam nga naggapu sù arát tam masingan.

<sup>4</sup> Á si Abel, nga yù ngaw mekaruá nga anâ ni Adan, inikatalà na gapay si Namarò. Á megapu sù pangikatalà na, iniyátáng na kâ Namarò yù napiá ánné sù iniyátáng ni Kain, nga kaká na. Á gapu ta pangikatalà ni Abel kâ Namarò, inibiláng ni Namarò ta matunung si Abel. Á yáyù nga inalawâ ni Namarò yù iniyátáng ni Abel kuna. Á mássiki nu nabayágín nga natay si Abel, aijan kunangane lá paga yù napiá nga ituddu na nittam megapu sù ángngikatalà na kâ Namarò.\*

<sup>5</sup> Á si Enok gapay yù ngaw mangikatalà kâ Namarò, á ari natay si Enok, gapu ta inâ ni Namarò ta lángì ta keggá na paga nga matolay. Á mássiki nu inalek nayù ira kábulun na ta dabbuno, arád da nélek, ta nepulù kâ Namarò ta lángì. Á lage na kálâ ni Enok ta lángì, neparámak ta ayatán si Namarò kuna.†

<sup>6</sup> Á ari gemma magayáyâ si Namarò sù tolay nga ari mangikatalà kuna. Á nu ikáyâ na tolay nga makimállâ kâ Namarò, á mawák na nga manguruk ta aijan si Namarò nga makaginná sù pakimállâ na, ánná mawák na gapay nga manguruk ta bálatan ni Namarò ta napiá yù ira nga magalek kuna.

<sup>7</sup> Á si Noe gapay ngaw, inikatalà na si Namarò. Á pinappalán ni Namarò si Noe, maraké mekanâ sù ira narákè nga tatolay nga ari nanguruk kâ Apu. Á kinagi ni Namarò kâ Noe ta duttál yù kalítù na dabbuno nga arád da paga bulubugá nasingan, á kinuruk ni Noe yù kinagi na. Á pidde na yù dakal nga barangay nga eggá aru nga lágum na nga kun na balay nga luttâ. Á ta kalítù na dabbuno, nalaggabán yù ira narákè nga tatolay, ngam neyígú di Noe ánná yù atáwa na, ánná yù ira tallu nga ánná na nga lálláki ánná yù ira atáwa ra. Walu ira ngámin. Á megapu sù pangikatalà ni Noe kâ Namarò, inipasiningan na ta matunung yù pamagikáru ni Namarò sù ira tatolay nga ari nanguruk kuna. Á mesipà gapay si Noe sù ira nga ikákkállâ ni Namarò ánná ibiláng na ta matunung megapu sù pangikatalà da.‡

<sup>8</sup> Á si Kákay Abrakam gapay ngaw, gapu ta pangikatalà na kâ Namarò, á kinuruk na yù kinagi ni Namarò nga máwan sù gián na nga umay ta tanakuán nga lugár nga iyawâ ni Namarò noka sù ira ginaká na. Á yáyù nga nánaw di Kákay Abrakam sù giád da, mássiki nu arád da ammu yù angayád da.

<sup>9</sup> Á gapu ta pangikatalà da, limibbè ira ta lugár nga kinagi ni Namarò, á nakipaggián ira tán nga kun na álliuk, nga nagala-alí gapu ta awán ta dabbud da. Á pidde ra ta bale ra yù tabbi na ayám. Á kunníú gapay sù ira ginaká ni Kákay Abrakam, di Isak, nga anâ na, kári Akup, nga apù na, ta kun na álliuk ira gapay nga nagala-alí nga nakipaggián tán sù bale ra nga napadday ta tabbi na ayám, gapu ta nesipà ira gapay sù napiá nga initabbá ni Namarò kâ Kákay Abrakam.

<sup>10</sup> Á inattamán na lá ni Kákay Abrakam yù pakipaggián na tán, mássiki nu awán ta nálâ na nga dabbun, gapu ta iniddanamán na yù mannanáyun nga paggianán na noká, nga ili nga sinálakkuruk ni Namarò, nga pidde na, nga maggián ta áddé ta áddé.§

<sup>11</sup> Á si Abbò Sara, nga atáwa ni Kákay Abrakam, inikatalà na gapay si Namarò. Á yáyù nga naganá si Abbò Sara, mássiki nu bakabákakin ta paganâ na, gapu ta si Namarò yù pangikatalakán na, nga mamaluró sù initabbá na.\*

<sup>12</sup> Á yáyù nga kitáru yù ira ginaká di Kákay Abrakam, mássiki nu kuruk nga lakalákay ánná bakabákà iren lage ra paganâ. Á minaru yù ira ginaká ra, nga ari mabiláng ta kunnay sù bituan ta lángì ánná dágâ ta aggik na bebab, megapu sù pangikatalà da kâ Apu Namarò.†

<sup>13</sup> Á ngámin danniau nga tatolay, natay ira ngaw nga nabayák, nga ari paga nangalawâ sù napiá nga initabbá ni Namarò níra, ngam napasigaggá yù ángngikatalà da. Ta nánnámmuád

---

\* **11:4** Genesis 4    † **11:5** Genesis 5:21-24    ‡ **11:7** Genesis 6:8-8:22    § **11:10** Genesis 12:1-4    \* **11:11** Genesis 21:1-2    † **11:12** Genesis 22:17

da ta palurotan ni Namarò yù initabbá na sangaw nu ággo na, mássiki nu mabayák paga yù pamalurò na. Á yáyù nga nagayáyâ ira, á ari ira nappasirán nga nakkagi ta ari yawe dabbuno yù kuruk nga paggianád da, ngam nakipaggián ira lâ nga kun na álliuk nga nappassapassiár lâ ta dabbuno.

<sup>14</sup> Á yù ira tatolay nga magubobuk ta kunnian, ipakánnámmu ra ta aijan yù iddanamád da nga kuruk nga paggianád da nga labbetád da sangaw ta lángi.

<sup>15</sup> Á di Kákay Abrakam, ta ángngarigán nu manonò da yù lugár nga nánawád da, á aijan yù awayyá ra nakuan nga mattoli. Ngam ari ira narraddam sù ili nga naggapuád da.

<sup>16</sup> Ta yá lâ kinaragatád da ta mesipà ira kâ Namarò sù kapiánán nga paggianád da ta lángi. Á gapu ta pangikatalà da, yáyù nga ari mappasirán si Namarò nga meparámak ta Yápu ra, á pinarán na yù ili aijan ta lángi ta paggianád da.

<sup>17</sup> Á ari nabbábáng si Kákay Abrakam nga mangikatalà kâ Namarò ta pamarubá ni Namarò kuna. Ta initabbá ni Namarò kâ Kákay Abrakam ta umaru yù ginaká na. Á gapu ta ikáyâ ni Namarò nga masingan nu napasigaggà yù ángngikatalà ni Abrakam kuna, yáyù nga inipeyátáng ni Namarò kuna si Isak nga anâ na. Á naparán si Kákay Abrakam nga mangiyátáng,

<sup>18</sup> mássiki nu kinagi ni Namarò ta si Isak yù paggapuán nayù aru nga ginaká na.

<sup>19</sup> Ta inikatalà ni Kákay Abrakam ta paginnolanoyan ni Namarò si Isak nu matay nakuan. Á yáyù nga neyárik si Isak ta kunnay ta pinaginnanole ni Namarò, ta natay nakuan, nu arán na inigaggak ni Namarò si Kákay Abrakam.<sup>‡</sup>

<sup>20</sup> Á si Isak, inikatalà na gapay si Namarò. Á megapu sù pangikatalà na, á lage na natay, kinagi na sù ira ánâ na, di Akup kâ Eso, yù pangikállâ ni Namarò nira ámma yù napiá nga initabbá ni Namarò nira nga málâ da noka.<sup>§</sup>

<sup>21</sup> Á si Akup, napiá gapay yù ángngikatalà na kâ Namarò. Á minay di Akup nakipaggián ta páppatulán na Egípto. Á megapu ta pangikatalà ni Akup kâ Namarò, á lage na natay, kinagi na sù ira duá nga ápù na nga ánâ ni Kusè yù pangikállâ ni Namarò ámma yù napiá nga initabbá na nira nga málâ da noka. Á sinangngalán na yù tagukuk na, á nakummak nga naddáywâ kâ Namarò.\*

<sup>22</sup> Á si Kusè, gapu ta pangikatalà na kâ Namarò, á lage na natay, kinagi na ta duttál noka yù páno ra ta Egípto nayù ira ginaká ni Akup, nga mangngágan gapay ta Israel. Á yáyù nga sinaddánán na ira ta ipáno ra yù tuláng na noka nu mánaw ira, tapè itanam da ta dabbun nga toliad da.<sup>†</sup>

<sup>23</sup> Á yù ira darakal ni Moyses, nga ginaká ni Israel, inikatalà da gapay si Namarò. Á yáyù nga ari ira maganássing nga makikontará sù narákè nga itaddán nayù patul na Egípto. Ta kinagi nayù patul sù ira manaron ta maganâ ta papatáyad da yù ira ngámin nga ánâ nayù ira Israel nga lálláki. Ngam ta keyanâ ni Moyses, inituttù nayù ira darakal na ta tallu nga bulán, ta ammu ra ta napiánga abbing.<sup>‡</sup>

<sup>24</sup> Á si Namarò yù pangikatalakán ni Moyses gapay. Á talluá ni Moyses, nánawán na yù napiánga ággíán na sù bale nayù parinsesa, nga ánâ nayù patul na Egípto, nga namarakal kuna. Ta arán na inikáyâ ni Moyses ta nebiláng ta ánâ nayù parinsesa,

<sup>25</sup> gapu ta nanakì nga nekanâ sù ira nga tángngagad da lâ yù narákè nga ipagayáyâ da, nga mabì lâ nga maddán. Á piníli ni Moyses yù kapiánán, nga kesipà na sù ira tatole ni Namarò, nga kagittá na nga ginaká ni Israel, mássiki nu narigirigâ ira.<sup>§</sup>

<sup>26</sup> Ta iniddanamán ni Moyses yù MakKiristu nga sinullà ni Namarò nga umay mamaguray noka. Á yáyù nga inibiláng ni Moyses ta más napiá nu attamán na galâ yù panigirigâ nayù ira Egípto kuna, ánne ta ketádde na nakuan sù ira maríku nga Egípto, gapu ta iniddagán na yù napiánga bállâ na nga iyawâ na noka ni Namarò kuna.

<sup>27</sup> Á gapu ta pangikatalà ni Moyses kâ Namarò, inipáno na yù ira Kudio sù lugár nayù ira Egípto, mássiki nu manakì yù patul ta páno ra. Á ari naganássing sù patul, gapu ta napasigaggà yù ángngikatalà na, nga kunnay ta nasingan na yù ari masingan, nga si Namarò nga nepulupulù níra.

<sup>28</sup> Á megapu sù pangikatalà ni Moyses kâ Namarò, kinuruk na yù kinagi ni Namarò, á pinapparán na yù ira ginaká ni Israel ta páno ra ta páppatulán na Egípto. Á kinagi na nira ta pártiad da yù kígaw, á ileruk da yù dágâ na ta utun na puertá na bale ra, tapè masingan nayù daroban ni Namarò, á arán na papatáyán yù ánâ da nga ginaká ni Israel, ta ánge na nga

<sup>‡</sup> 11:19 Genesis 22:1-19    § 11:20 Genesis 27:27-30    \* 11:21 Genesis 48:8-22    † 11:22 Genesis 50:24-25    ‡ 11:23 Exodus 1:7-2:2    § 11:25 Meyannung kâ Moyses, Exodus 2-14

papatáyan yù ira kaká nga lálláki nga ánâ nayù ira Egipto. Á dattál nayù daroban, nasingan na yù dága ta utun na puertá na bale ra, á sinalebarán na, á awán ta napapáte na nga ánâ nayù ira ginaká ni Israel.\*

<sup>29</sup> Á yù ira ginaká ni Israel, inikatalà da gapay si Namarò. Á megapu ta pangikatalà da, pinassinná ni Namarò yù danum na bebay nga mangngagan ta Uijojin, tapè aijan yù pappatalayád da nga namagá ta paddákì da nga umay ta dammáng. Á yù ira Egipto, nga nakkabáyu ánna nakkalesá, nga nanimmâ nira, nalaggabán ira ngámín ta paddákì da gapay nakuan, ta pinatoli nen ni Namarò yù danum ta negagángay nga gián na.<sup>†</sup>

<sup>30</sup> Á gapu ta pangikatalà nayù ira ginaká ni Israel kâ Namarò, kinuruk da yù kinagi ni Namarò nira, á nallakalakák ira nga nilelepuanán yù atannáng nga nakannak nga jijing nayù ili na Jeriku ta kággágaw ta áddè ta mekapitu nga ággaw. Á megapu ta pangikatalà da, níparabbâ ni Namarò yù jijing na ili, nga napadday ta darakal nga bátu, tapè makatallung ira.<sup>‡</sup>

<sup>31</sup> Á si Rakap, aggina yù ngaw nakikarallaw nga naggián ta ili na Jeriku. Ngam inikatalà na si Namarò, á pinaddulò na yù ira duá nga ginaká ni Israel nga jinok ni Josiuwa ta umay massísim. Á dattál na ággaw nga pangappù nayù ira ginaká ni Israel ta ili na Jeriku, neyígù di Rakap, nga ari nekanâ sù pate nayù ira ngámín katangeliád da, nga ari nanguruk kâ Namarò.<sup>§</sup>

<sup>32</sup> Á aru lâ paga yù arák ku garè matángngák nga istorián nga meyannung sù pangikatalà da kâ Namarò nayù ngaw ira káruán, nga kunnay kári Gidion,\* si Barak,<sup>†</sup> si Samson,<sup>‡</sup> si Jepti,<sup>§</sup> á si Patul Dabid,<sup>\*</sup> si Samuel,<sup>†</sup> ánna yù ira ngaw gapay nga ábbilán ni Namarò.

<sup>33</sup> Aru yù pinalurò da megapu sù pangikatalà da kâ Namarò. Ajjan yù ira ngaw nakigerrá ánna nangappù sù ira tanakuán nga páppatulán nga darakal. Ajjan yù ira ngaw nammaguray, nga natunung yù ámmagure ra sù páppatulád da. Ajjan yù ira ngaw nga nákkalawa sù napiá nga initabba ni Namarò nira. Ajjan yù ira ngaw nangappù sù ira layon, nga makánnanássing nga ayám, tapè arád da ira akkuán.<sup>‡</sup>

<sup>34</sup> Á aijan gapay yù ngaw ira nga nepay ta ornu, ngam ari ira natuggi, gapu ta inikatalà da si Namarò.<sup>§</sup> Á aijan yù ira ngaw nattálaw sù ira nga mamapátay nakuan nira. Ajjan yù ira ngaw nakapi, nga pinassikan ni Namarò megapu sù pangikatalà da kuna. Á aijan yù ira nagattam nga ari naganássing sù ira nga nakigerrá nira. Á megapu sù pangikatalà da kâ Namarò, pinatalù da nga pinatálaw yù aru nga suddálú nga nalussaw nira, nga naggapu ta tanakuán nga páppatulán.

<sup>35</sup> Á aijan yù ira bábbay nga nálawâ da yù ira iddukad da nga napaginnanolay, megapu sù napasigaggá nga pangikatalà da kâ Namarò.

Ngam aijan gapay ngaw yù ira káruán, nga nebáluk nga narigirigá áddè ta pate ra, megapu sù pangikatalà da kâ Namarò. Á inattamád da lâ, ta piníli ra yù pate ra ánne ta kapalubbáng da nakuan nu pallikuránád da yù ángngikatalà da, gapu ta iniddanamád da yù kapiánán nga áttole ra, sangaw nu paginnanolayan ni Namarò ira tapè mesipá ira kuna.

<sup>36</sup> Á aijan gapay yù ira nga neluddè nga nakkakagián ánna yù ira nga napalapaligá ánna yù ira nga negálù ta káwák nga nekarsel, megapu sù pangikatalà da kâ Namarò.

<sup>37</sup> Á aijan yù ira nga napayapayáng ta batu ta áddè ta pate ra, megapu ta pangikatalà da kâ Namarò. Á aijan yù ira nangikatalà kâ Apu nga nággagal nga nesinná yù baggi ra. Á aijan yù ira nga nabigibigarán nga natay ta bayunetá. Á aijan yù ira nga awán ta gámi da, nga nabbarawási ta tabbi na karnero ánna kajjing. Pobare ira nga awán bulubugá ta kukuára, á narigirigá ira ánna neluddè ira.

<sup>38</sup> Á napátlaw ira nga napuersá nga nagala-alì nga nallakalakák ta kalállamatán ánna puddul ta kun na simaron nga ayám. Á naggián ira ta kuebá ánna abbû na dabbun. Á ari mepángngà yawe dabbuno nga paggianád da, ta napiá ira ánne ta ngámín nga aijan ta dabbuno!

<sup>39</sup> Á danniaw ira ngámín ngaw nga nangikatalà kâ Namarò, ayatán si Namarò nira, á iniráyo na ira megapu sù ángngikatalà da kuna. Ngam arád da paga nálawâ yù initabba ni Namarò nira,

---

\* **11:28** Yáyù yù pamegapu nayù Piestá nayù Pattalebák na Daroban ni Namarò nga Mamapátay.      † **11:29** Exodus 14:13-31      ‡ **11:30** Josiuwa 6:1-25      § **11:31** Ime 2:25      \* **11:32** Uk-ukom 6:11-8:32      † **11:32** Uk-ukom 4:6-16  
‡ **11:32** Uk-ukom 16:23-31      § **11:32** Uk-ukom 11:32-33      \* **11:32** 1 Samuel 16:10-13; 17:31-51; yù libru nga 2 Samuel  
† **11:32** 1 Samuel 7:9-17      ‡ **11:33** Daniel 6:1-23      § **11:34** Daniel 3:8-30

<sup>40</sup> gapu ta ninonò ni Namarò yù kapiánán nga akkuán na. Ta arán na ikáyá ta aggira lâ yù pangiyawatán na nakuan sù initabbá na, nu ari galâ ta mesipà ittam gapay nira sangaw nu pabbalinan ni Namarò ta pareku nga napiá ánnna matunung yù ira ngámin nga mangikatalà kuna.

## 12

*Yù Mepángngà nga Ángngikatalà tam kâ Ammò Namarò*

<sup>1</sup> Á gapu ta aru yù kinagì nikayu ta meyannung sù ira ngaw mangikatalà kâ Namarò, nga massistígu ta kuruk ngamekatalà si Namarò nga mamalurò sù imitabbá na, á párigát tam laguk yù ángngikatalà da. Ipuerá tam yù ngámin nga mangigaggak nittam nakuan ta panguruk tam kâ Namarò, á pallikuránát tam yù naráké nga ággangnguá tam, tapè uputat tam nga palurotan yù ngámin nga ipakuá ni Namarò nittam.

<sup>2</sup> Á nonopat tam si Apu Kesu, ta aggina yù pangikatalakát tam nga mangiyígù nittam, gapu ta aggina yù namalurò sù ngámin nga inipakuá ni Namarò kuna nga meyannung ta bagu nga tarátu na. Ta inattamán na lâ ni Apu Kesu yù pangipátâ da kuna ta kurù ánnna pinaguráyán na yù pangipasirád da kuna, gapu ta yá lâ ninonò na yù pagayáyâ na sangaw nu natuppál nen yù ngámin nga inipakuá ni Namarò kuna. Á nagitubangin ta jiwanán ni Namarò ta lángi, nga ággitubangán nayù kotunán nga mammaguray.

<sup>3</sup> Nonopat tam laguk yù pagattam ni Apu Kesu sù ngámin nga kingnguá nayù ira naráké nga malussaw kuna, tapè mapasigaggá yù ángngikatalà tam, ánnna ari ittam malurâ nga mamalurò sù napiá nga ipakuá ni Namarò nittam.

<sup>4</sup> Ta mässiki nu marigirigá kayu gapay, awán paga ta natay megapu sù panaki na nga mangnguá ta naráké.

<sup>5</sup> Á arát tam laguk máttamán yù kinagi ni Namarò nittam ta pangabbún na nittam ta ánâ na. Ta panabarang na nittam, kinagi na nittam nga katággitáddy:

Ánâ ku, nu mówák nga tudduát takayu, tángngagan nawà,  
á ari kayu mapállâ nu gammát takayu.

<sup>6</sup> Ta tudduák ku yù ira ngámin nga iddukak ku, ánnna pággangak ku ira,

gapu ta aggira ibiláng ku ta ánâ ku,\* kun ni Apu.

<sup>7</sup> Á nu ajjan yù jígâ nga umay nittam, attamát tam lâ, ta tudduán na ittam ni Namarò nga ánâ na. Á eggá panô yù ánâ nga arán na tudduán nayù yáma na?

<sup>8</sup> Á nu arán na kayu nakuan tudduán ni Namarò, nga kunnay ta panuddu na sù ira ngámin nga ánâ na, á ari kayu laguk yù kukurugán nga ánâ na.

<sup>9</sup> Á yù ira yáma tam ta dabbuno, tudduád da ittam, á pakimorayát tam ira megapu sù panuddu ra nittam. Á nepatalugáring kâ Namarò nga Yáma tam ta láng! Tumulù ittam laguk kuna, tapè isipà na ittam sù áttole na ta áddè ta áddè.

<sup>10</sup> Á yù ira yáma tam ta dabbuno, nabi lâ yù panuddu ra nittam ta kabajjì tam, nga meyannung lággapay sù ure ra. Ngam si Namarò, nonopan na yù kapiánát tam, á yáyù nga tudduán na ittam, tapè mesipà ittam sù kangilin na.

<sup>11</sup> Á nu pággangan na ittam nayù yáma tam, ari ittam gemma magayáyâ megapu sù jígâ tam. Ngam nu attamát tam lâ yù panuddu ra nittam, á napiá yù pabbalinán na. Ta nu natudduán ittamin, á napiá ánnna matunung yù akkuát tam, á magimammâ yù nonò tam ánnna napiá yù áwwawági tam sù ira kábulut tam.

<sup>12</sup> Ari ittam mapállâ nga mamippippik megapu sù jígâ tam. Makkakáruduúk ittam laguk ta ipakimállâ tam kâ Namarò, ánnna ipe tam yù urà tam nga mamalurò sù napiá nga ipakuá ni Namarò nittam.

<sup>13</sup> Tuttulat tam yù napiá ánnna matunung, tapè ipasingat tam yù napiá nga párigán nayù ira kábulut tam. Ta nu kunnian yù akkuát tam, ari mabbábâng yù ira kábulut tam, ánnna ari ira mekáttuay ta pangikatalà da kâ Apu, nu ari galâ ta mepasigaggá yù ángngikatalà da.

*Magimuguk ittam nga ari Mekáttuay sù Panguruk tam kâ Apu*

<sup>14</sup> Á sikayu laguk, ipe naw yù urà naw nga ari makiramá sù ira kábulun naw, tapè napiá yù áwwawági naw. Á malápà kayu nga mangnguá lâ ta napiá ánnna matunung, tapè mepasigan ta kuruk nga metáddyay kayu gapay kâ Apu Kesu, ánnna mebiláng kayu ta mangilin. Ta mangilin gemma si Namarò, á arát tam masingan, nu ari ittam gapay mangilin megapu sù ketádè tam kâ Apu Kesu.

<sup>15</sup> Á magimuguk kayu, marakè aijjan nikayu yù mangiluddè sù pangikállâ ni Namarò kuna. Ta nu aijjan yù tolay nga namegapu nga tumuttuttul kâ Apu, nga malurâ sangaw,

á kunnay ta mapetán yù nonò na, á buruburionán na yù ira kábulun na, á aru sangaw yù mekanakaná sù naraké nga akka-akkuán na.

<sup>16</sup> Á magimuguk kayu gapay, tapè awán ta tádday nikayu nga meruruk sù arán na atáwa, áんな awán ta tolay nga mangiluddè sù mebiláng tā mangilin, nga kunnay sù kingnguá na ngaw ni Eso. Ta nilonán ni Eso yù awayyá na nga mangalawâ ta pabbindision nayù yáma na ta pangikállà ni Namarò kuna, gapu ta iniláku ni Eso ká Akup nga wagí na yù pakáwayyá na nga kaká. Á inipappágá na lá ni Akup yù tangatariaw nga kanan!†

<sup>17</sup> Á ammu tam gemma ta nabbabáwi si Eso ta palláku na ta pakáwayyá na nga kaká, ta ikáyâ na gemma mappabbindision kâ yáma na nakuan, ngam arán na awayyá, mássiki nu nakkulè, ta arán na gemma mapatoli yù kingnguá na.

<sup>18</sup> Arát tam laguk kalurá yù pangikatalà tam kâ Namarò, ta napiá yù bagu nga tarátu na nittam ánnè sù ngaw tarátu na sù ira ngaw Kudio nga naggaká nittam. Ta arán na nittam ipasingan yù kunnay ta inipasingan na ngaw sù ira ngaw nakimoray kuna ta garek na puddul, nga api nga gumággâggáng, áんな yù makánnanássing nga kallà áんな yù kunam áんな yù baggiu.

<sup>19</sup> Á naginná ra yù amariung nga nasikan áんな yù ngárál nga nagubobuk nira. Á pakaginná ra sù ubobuk na, nerallà yù assing da, á inipakimállà da ta arán na ira kobobuk.

<sup>20</sup> Ta arád da matuppál yù taddán na nira. Á gapu ta mangilin yù gián ni Namarò, kinagi na nira, “Ari kayu dukki sawe puddul, ta nu aijan yù makeguppè kuna, mássiki ayám naw, á payangan naw ta batu ta áddè ta pate na.”‡

<sup>21</sup> Á gapu ta makánnanássing yù nasingad da áんな naginná ra, á kinagi ni Moyses, “Mamippippigà ta assing ku,” kun na.

<sup>22</sup> Ngam sittam, nu umay ittam makimoray kâ Namarò, dumá yù áaggiát tam. Ta kunnay ta aijan ittam ta lángi nga dukki ta kuruk nga puddul na Sion, áんな yù bagu nga ili na Jerusalem nga aijan ta lángi, nga kuruk nga paggianán ni Namarò nga sigga-inângâ nga matolay ta áddè ta áddè. Á jiníribu yù ira daroban ni Namarò nga ari mabilang ngagammung tán nga magayáyâ.

<sup>23</sup> Á nesipà ittam gapay sù paggagammung nayù ira ngámin nga mangikatalà kâ Namarò, ta netádday ittam sù ira ngámin nga napakarenúánin ngaw, nga inibiláng ni Namarò ta tatole na nga matunung áんな pareku nga napiá. Á inibiláng ni Namarò ittam ngámin ta ánâ na, á nelistángin yù ngágat tam ta lángi. Á si Namarò yù keyarubangát tam, ta aggina yù mamanunnù ta ngámin nga tatolay.

<sup>24</sup> Á nesipà ittam kâ Apu Kesu, nga mamakkápiá nittam kâ Namarò, megapu sù bagu nga tarátu na nga pinalurò na. Á nesipà ittam sù napiá nga pabbalinán nayù dágá ni Apu Kesu nga neytántág megapu nittam, nga napiá ánnè sù pabbalinán nayù dágá ni Abel. Ta napakarenúán ittam, á náringin yù liwiliwâ tam, áんな íkállà na ittam ni Namarò, megapu sù dágá ni Apu Kesu. Ngam yá lâ pabbalinán nayù dágá ni Abel ta inibálà ni Namarò yù pate na sù namapátay kuna.§

<sup>25</sup> Magimuguk ittam laguk, ta tángngagat tam ta napiá yù bilin ni Namarò nittam. Ta pinagikáru ni Namarò yù ira ngaw tatolay nga ari nanguruk sù bilin na nga inipakagi na ngaw kâ Moyses. Á nepatalugáring nittam, ta merallà yù pamagikáru na nittam nu arát tam kurugan yù inipakagi na sù Ánâ na nga naggapu ta lángi.

<sup>26</sup> Á sù ngaw pagubobuk ni Namarò kâ Moyses ta puddul, á nagguyu yù dabbun megapu sù ngárál na. Á aijan paga yù initabbá na, ta kinagi na, “Pidduák ku paga sangaw nga pagguyuguyuan yù dabbuno, á ari lâ yù dabbuno, nu ari gapay yù eggá ta lángi,”\* kun na.

<sup>27</sup> Á yá kebalinán nayù kinagi na, nga pidduán na paga pagguyuguyuan yù dabbuno, ta irián na yù dán nga pinarò na nga masingat tam, tapè maggián lâ yù ari mári nga ari maddán ta áddè ta áddè.

<sup>28</sup> Dayáwat tam laguk si Namarò, gapu ta mesipà ittam kuna nga mepammaguray sù pammagurayán na, nga ari mári nga ari maddán ta áddè ta áddè. Á mapállà ittam nga tumulù áんな makimoray kâ Namarò, áんな palurotat tam yù ngámin nga ipakuá na nittam, tapè magayáyâ si Namarò megapu nittam.

<sup>29</sup> Ta mangilin si Namarò, nga makáwayyá nga mamagikáru nga kunnay ta ornu nga manuggi ta ngámin.

## 13

### Yù Passerbi tam kâ Namarò

† 12:16 Genesis 25:27-34

‡ 12:20 Exodus 19:9-13

§ 12:24 Genesis 4:8-11

\* 12:26 Haggai 2:6

<sup>1</sup> Á wáwwagi, uputat tam yù pakkaká-iddù tam, ta mawwawági ittam ngámin nga mangikatalà kâ Apu, megapu sù kepattatadé tam kuna.

<sup>2</sup> Á magimuguk ittam ta arát tam lonán yù pangilágum tam ta álliuk nga umay nittam. Paddulotat tam ira laguk, ta ajjan yù ira namaddulò ta álliuk nga arád da ammu ta daroban na ira ni Namarò.

<sup>3</sup> Á arát tam máttamán yù ira kábulut tam nga mangikatalà kâ Apu nga nebáluk. Ipakimállà tam ira áんな abbágát tam ira gapay ta kunnay ta ikáyâ tam nu sittam nakuan yù nebáluk gapay. Á yù ira marigirigâ, ikállà tam ira nga kunnay ta sittam gapay yù marigirigâ ta kunnay nira.

<sup>4</sup> Á ta meyannung sù kustombare tam nga mangatáwa, ngilinat tam yù napiá nga pangatáwa tam. Tuppálat tam laguk yù ngámin nga meyannung ta pangatáwa tam, áんな ari ittam meruruk sù arát tam atáwa. Ta si Namarò yù mamanunnù, á pagikaruan na yù ira meruruk ta tanakuán nga ari atáwa na áんな yù ira mangarallaw.

<sup>5</sup> Á magimuguk ittam ta arát tam karagatán yù kuártu áんな arát tam ukkugan yù kuártu, áんな yù kegatángán na. Magayáyá ittam lâ sù eggá nittam, ta kinagi ni Namarò nittam, "Arát takayu bulubugá panawán. Á arát takayu bulubugá táttájíján,"\* kun na.

<sup>6</sup> Á yáyù nga ari ittam mabbábáng, sittam nga katággitádday, nga makkagi ta kunniaiw: "Si Apu yù mangabbák nikán. Á yáyù nga aringà maganássing ta tatolay, maguray lâ yù akkuád da nikán."<sup>†</sup>

<sup>7</sup> Á nonopan naw yù ira ngaw nangituddu nikayu, nga nangipakánnámmu nikayu sù bilin ni Namarò. Á nonopan naw yù ngámin nga napiá nga pinalurò da, á párigán naw laguk yù ángngikatalà da kâ Apu.

<sup>8</sup> Ari bulubugá manguli si Apu Kesu Kiristu. Aggina galâ yù eggá ngaw, ta áddè kunnangane, ta áddè ta áddè.

<sup>9</sup> Á ari kayu laguk makilogò sù ira nga mangituddu ta tanakuán, tapè ari kayumekáttuay sù panguruk naw kâ Apu Kesu. Á ta ángngarigán, ajjan yù ira mangituddu ta manganniaw ta kanan. Ngam awán ta pakkapiánán na tolay megapu sù pangannio na ta kanan. Á mapasigaggâ yù ángngikatalà tam kâ Namarò megapu galâ sù pangiddù na áんな pangikállà na nittam.

<sup>10</sup> Á sittam nga mangikatalà kâ Apu Kesu Kiristu, ajjan yù neyátáng megapu nittam, tapè mapakomá yù liwiliwâ tam. Ngam ari mesipà yù ira páppári nga Kudio nga masserbi sù mangilin nga bale ni Namarò ta Jerusalem, ta arád da kurugan yù kuruk nga meyannung kâ Apu Kesu.

<sup>11</sup> Á pangiyátáng nayù ira kátannangán nga pári megapu sù liwiliwâ da, iyánge na yù dágá na ayám sù Kangilinán nga Gián sù bale ni Namarò. Ngam yù baggi nayù ira ayám nga napárti, iyánge ra ta lawán na ili, tapè tuggiad da ta lawán na ili sù gián nga ari mangilin.

<sup>12</sup> Á kunnian gapay yù pangiyangngâ ni Apu Kesu, ta natay ta lawán na ili sù gián nga ari mangilin, tapè pakarenuán na yù ira tatolay ta liwiliwâ da áんな pabbalinan na ira ta mangilin nga tatole na, megapu sù dágá na lápay.

<sup>13</sup> Á yáyù nga pallikuránát tam laguk yù kustombare na Kudio, á ikatalà tam galâ si Apu Kesu, nga neyátáng megapu nittam, tapè kunnay ta metádday ittam sù Yápu tam ta lawán na ili, nga mesipà sù keluddè na áんな karigirigâ na.

<sup>14</sup> Ta awán ta mannanáyun nga paggianát tam sawe dabbuno. Ngam iddagát tam yù dattál nayù mannanáyun nga ili nga paggianát tam kâ Namarò nga awán ta áddé na.

<sup>15</sup> Á gapu ta pangikatalà tam kâ Apu Kesu, aringin yù dágá na ayám nga napárti yù iyawâ tam kâ Namarò, nu ari galâ yù paddáyo tam kuna megapu kâ Apu Kesu. Á megapu sù paddáyo tam kuna, ipakimámmu tam sù ira kábulut tam ta si Apu Kesu yù Yápu tam. Yáyù passerbi tam kâ Namarò, nga kunnay sù ira mangiyátáng.

<sup>16</sup> Á ari ittam malurâ nga mangabbák sù ira kábulut tam, áんな makkakásipà ittam, ta yáyù gapay yù ásserbi tam kâ Namarò nga meyárik ta neyátáng kuna nga ipagayáyâ na.

<sup>17</sup> Á wáwwagi, tumulù kayu laguk sù ira nga mangituddu nikayu, nga mangikatalà kâ Namarò, á kurugan naw yù ituddu ra. Ta taronád da kayu ta napiá, tapè ari kayu mekáttuay sù pangikatalà naw kâ Apu. Á si Namarò yù maddok nira, á bisítán na ira sangaw nu kunnasi yù passerbi ra. Á nu napiá yù panguruk naw sù ituddu ra, á magayáyâ ira. Ngam nu arán naw kurugan yù ituddu ra, á maraddam ira megapu nikayu, á awán laguk ta pakkapiánán naw megapu nira.

\* 13:5 Deuteronomio 31:6    † 13:6 Salmo 118:6

<sup>18</sup> Á sikami, wáwwagi, yù ipakimi-imállà naw kâ Namarò. Aláppaw yù nonò mi, ta awán ta ammu mi nga pakaliwatám mi, á ikáyâ mi ta akka-akkuám mi lâ yù napiá ánnna matunung.

<sup>19</sup> Á dudduárat takayu ta ipakimállà nawà, nepatalugáring ta mabíkà nga makatoli nikayu.

*Yù Ipakimállà nayù Tolay nga Mattúrâ*

<sup>20</sup> Á itálà takayu kâ Namarò, nga mamagimammà ta nonò tam. Ta pinaginnanole ni Namarò si Apu Kesu, nga mangngágán ta Mináppárák nga Makáwayyá, gapu ta ipataron na kuna sittam nga mangikatalà kuna, nga kun na karneru na. Á napalurò yù mannanáyun nga tarátu ni Namarò nittam, megapu sù dága ni Apu Kesu.

<sup>21</sup> Á parè lâ ta abbágán na kayu ni Namarò ta ngámin nga akkuán naw, megapu kâ Apu Kesu Kiristu, tapè maláppà kayu nga mangnúua ta ngámin nga ipagayáyâ na, ánnna palurotan naw yù ngámin nga ipakuá na nikayu. Á meparáyaw laguk si Apu Kesu Kiristu ta áddè ta áddè.

*Yù Kabalin na yawe Túrâ*

<sup>22</sup> Á wáwwagi, ababbá lâ yawe túrâ ku, á ikomâ bì nikayu, ta tángngagan naw ta napiá yawe itabbarang ku nikayu.

<sup>23</sup> Á magayáyákà nga mangiparámak nikayu ta napalubbángin si Timotio, nga wagi tam. Á nu maratang nangà lage na pánò, á mappulù kami sangaw nu umayà mattúllun nikayu.

<sup>24</sup> Á kagian naw bì sù ira ngámin nga mangituddu nikayu ta manonò mi ira, ánnna yù ira ngámin nga kábulun naw, nga tatole ni Namarò. Á iyabbû mi lâ nu kunnasi ira ngámin. Á yù ira kákkoput tam nga taga Italia, kagiad da gapay nikayu ta manonò da kayu, á damágad da kayu gapay nu kunnasi kayu.

<sup>25</sup> Á parè lâ ta ikákkállà ni Namarò sikayu ngámin ta áddè ta áddè. Mapalurò. Ammán!

## Yù Túrâ ni Ime

*Yù Meyannung sawe Túrâ ni Ime*

Yù ira ngámin nga tatole ni Namarò yù túratán ni Ime, á nepatalugáring sù ira ngaw Kudio nga mewarawarâ sù ngámin nga purubinsia sù páppatulán na Roma. Á ibukalán ni Ime yù ipakuá ni Namarò nittam nga tatole na, tapè mepasingan yù pangikatalà tam kuna, ánnna matákkilalán nayù ira tatolay nga ari manguruk ta kuruk nga tatole ni Namarò ittam. Ta nu eggá yù pangikatalà tam kâ Apu, pabbalinán na ta napiá nga akka-akkuát tam ánnna napiá nga panguruk tam kâ Namarò.

Á si Ime yù mangngágán gapay ta Yakup sù ággubobuk na Gareko, ánnna mangngágán ta Santiagu sù ággubobuk na Iloko. Á ta ággubobuk na Ingles, mangngágán ta James, á ta Atta, Ime yù ngágán na.

*Yù Mayán nayù Túrâ*

Yù Meyannung sù ira Mangikatalà ánnna yù ira Mabbábáng (1:1-18)

Yù Pakagirná tam ánnna Panguruk tam sù Biliin ni Namarò (1:19-27)

Arát tam laguk Paddurúmán yù ira Tatolay (2:1-13)

Mepasingan yù Ángngikatalà tam megapu sù Akkuát tam (2:14-26)

Yù Pakáwayyá nayù Pagubobuk tam (3:1-18)

Yù ira Mangikatalà kâ Namarò ánnna yù ira Ari Manguruk (4:1-5:6)

Magattam ittam ánnna Makimállà ittam kâ Namarò (5:7-20)

<sup>1</sup> Sikán si Ime nga masserbi kári Namarò kâ Apu Kesu Kiristu nga Yápu tam. Á mattúrákà nikayu ngámin nga ginaká nayù ira mapulu duá nga ánâ ni Israel, sikayu nga mangikatalà kâ Apu Kesu, nga mewarawarâ ta ngámin nga makkakerumá nga lugár ta dabbuno.

*Yù Meyannung sù ira Mangikatalà ánnna yù ira Mabbábáng*

<sup>2</sup> Wáwwagi, mássiki nu mesimmuán naw sangaw yù makkakerumá nga jigâ, magayáyâ kayu.

<sup>3</sup> Ta ammu naw nu ajjan yù jigâ nga attamán naw, á maparubán kayu, tapè mepasigaggâ yù ángngikatalà naw kâ Namarò.\*

<sup>4</sup> Á máwák naw nga attamán yù makkakerumá nga jigâ, megapu sù mapasigaggâ nga ángngikatalà naw, tapè tulluâ kayu, nga napiá lâ yù ággangnuá naw, á awán ta pabbábáng naw.

<sup>5</sup> Á nu eggá nikayu yù tolay nga arán na ammu yù akkuán na ta meyannung sù ággíán na, á makimállà laguk kâ Namarò, tapè ipakánnámmu ni Namarò yù napiá nga ipakuá na kuna. Ta minángngikálâ si Namarò, á arán na ittam gammán, nu ari galâ nga abbágán na ittam ngámin nga makkiddaw kuna.

<sup>6</sup> Ngam ta pakimállà naw kâ Namarò, ikatalà naw ta mangabbák nikayu. Ari kayu mabbábáng, ta yù tolay nga mabbábáng, meyárik ta palung na bebay nga mepayák ta paddák.

<sup>7</sup> Á yù tolay nga kunnian nga mabbábáng, arán na nakuan kagian ta iddán ni Namarò.

<sup>8</sup> Ta mattá-iki-ikáyâ ánnna mabbábáng ta ngámin nga akkuán na, á yáyù nga ari mekatalà, á awán ta iyawâ ni Namarò kuna.

*Yù Meyannung sù ira Pobare ánnna yù ira Maríku*

<sup>9</sup> Á sikayu nga pobare nga mangikatalà kâ Apu Kesu Kiristu, magayáyâ kayu laguk, ta si Namarò yù mangalawâ nikayu, tapè mesipâ kayu kuna, mássiki nu iluddè da kayu nayù ira tatolay.

<sup>10</sup> Á sikayu nga maríku nga mangikatalà kâ Apu Kesu Kiristu, magayáyâ kayu laguk nu mapatulù na kayu ni Namarò. Ta meyárik yù maríku ta lappáw ta kakáddapán nga mabì lâ malelay.

<sup>11</sup> Ta nu mabbilák, á mabilagán yù lappáw, á mabì lâ malelay, á kengá lággapay yù kakástá na. Á kunnian gapay sù maríku. Mappukkawák nga mamagaru ta kukuá na, á mabì lâ matay ánnna panawán na ngámin.

*Yù Meyannung sù Paggapuán na Jigâ ánnna Naráké*

<sup>12</sup> Á nu attamát tam yù jigâ nga umay nittam, á pagayáyatan na ittam ni Namarò. Ta nu arát tam likuránán yù pangikatalà tam kâ Namarò nu marigirigâ ittam, á iyawâ na

\* 1:3 Roma 5:3-4; 1 Eduru 1:6-9

nittam yù bálà tam nga inángà nga awán ta áddè na, ta yáyù initabbá ni Namarò sù ira nga mangiddú kuna.

<sup>13</sup> Á mássiki nu marigirigâ ittam ta jígâ ánná narákè, arát tam awayyá nga kaqian ta si Namarò yù paggapuán nayù jígâ tam, onu si Namarò yù mangituddu nittam ta narákè. Awán bulubugá ta mangituddu ta narákè kâ Namarò, á arán na gapay ni Namarò ituddu yù narákè.

<sup>14</sup> Ngam marigirigâ ittam nga taggitáddy megapu sù narákè nga pakkaragâ na baggi na nga naggapu sù narákè nga nonò na.

<sup>15</sup> Á nu nononopat tam yù narákè nga karagatát tam, tulluâ yù narákè ta nonò tam, á yáyù nga akkuát tam laguk sangaw. Á nu uputan na tolay nga tuttulan yù narákè nga karagatán na, á matay sangaw ánná metabbà ta impiernu.

<sup>16</sup> Wáwwagi nga iddukak ku, ari kayu melogò! Ari si Namarò yù paggapuán na narákè nga karagatát tam.

<sup>17</sup> Si Namarò yù paggapuán na ngámin nga napiá ánná matunung. Á aggina yù mangiyawâ nittam ta ngámin nga napiá ánná nakástá. Pidde na yù ngámin nga maddal-ingaráng ta lángì megapu nittam, yù bilák, yù bulán, ánná yù bituan. Á manguli yù nawák da. Ngam si Namarò, ari manguli. Arán na ulian yù ángngiddù na ánná allà na nittam.

<sup>18</sup> Á gapu ta panalákkuruk na, pinabbalin na ittam ta tatole na megapu ta panguruk tam sù kuruk nga bilin na nga inipákánnámmu na nittam, tapè sittam yù kapiánán ta ngámin nga pinarò na.

### *Yù Pakaginná tam ánná Panguruk tam sù Bilin ni Namarò*

<sup>19</sup> Wáwwagi nga iddukak ku, nononotat tam yawe. Sittam nga taggitáddy, mapiá nakuan nu dán nga naparán nga magginná, ngam ari nakuan alisti nga tubbák ánná ari malogon nga mapporay.

<sup>20</sup> Ta yù tolay nga mapporay, arán na matuppál yù napiá ánná matunung nga ipakuá na nakuan ni Namarò kuna.

<sup>21</sup> Likuránán naw laguk ngámin nga jíkkù ánná narákè nga ággangnguá naw. Á tumulù kayu ánná alawatan naw yù bilin ni Namarò, tapè meyígù kayu.

<sup>22</sup> Á tuppálan naw laguk yù bilin ni Namarò! Ta nu arán naw palurotan yù bilin na nga naginná naw, á ilogò naw laguk yù baggi naw.

<sup>23</sup> Yù tolay nga ginnán na lâ yù ubobuk ni Namarò, ngam arán na kurugan, meyárik ta tolay nga magispeku, nga masiningan na yù mammang na nga narapingán.

<sup>24</sup> Á pallikuk na ta ispeku, máttamán na sangaw yù nasingan na. Á kunnian yù keyarigán nayù tolay nga ari manuppái sù gininná na nga ubobuk ni Namarò.

<sup>25</sup> Tángngagan naw laguk yù bilin ni Namarò nga makáwayyá nga mamalubbáng nikayu, á tuppálan naw yù kagian na. Ta ikállà na kayu ni Namarò ánná abbágán na kayu ta ngámin nga akka-akkuán naw, nu palurotan naw yù naginná naw nga bilin na.

<sup>26</sup> Yù tolay nga makkagi ta makimoray kâ Namarò, ngam arán na tukkatan yù pagubobuk na ta narákè, á ilogò na lâ yù baggi na. Á awán ta serbi nayù pakimore na kâ Namarò.

<sup>27</sup> Ta si Namarò yù Yáma tam nu kuruk nga makimoray ittam kuna. Á danniaw ira lâ yù ibiláng na ta kuruk nga tatole na nga kuruk nga makimoray kuna. Á manuppái ira sù napiá nga ipakuá na nira. Abbágád da yù ira ábbing nga ulilá ánná yù ira bábbay nga nabálu nga marigirigâ, ánná arád da párigán yù narákè nga ággangnguá nayù ira tatolay sawe dabbuno.

## 2

### *Arát tam laguk Paddirúmán yù ira Tatolay*

<sup>1</sup> Wáwwagi, nu kuruk nga mangikatalà kayu kâ Apu Kesu Kiristu nga Yápu tam nga Kotunán, arán naw laguk paddurúmán yù ira tatolay.

<sup>2</sup> Á ta ángngarigán, umay yù tolay nga maríku nga makipagammung nikayu, nga massákkaláng ta buláwán ánná nabbisti ta nanginá nga gámì, á aijan gapay yù umay nga pobare nga nabbarawási ta napisipisil.

<sup>3</sup> Á nu ángngarigán ta tángngagan naw lâ yù maríku, á kagian naw kuna, “E ka bi magitubang sawé kapiánán nga ággitubangám mi.” Á kagian naw sù pobare, “Manáddak ka tán,” onu “Magitubang ka ta daták ta likuk mi.”

<sup>4</sup> Á nu kunnian yù akkuán naw, narákè kayu, ta paddurúmán naw yù ira tatolay. Á meyárik kayu ta kues nga narákè yù nonò na.

<sup>5</sup> Wáwwagi nga iddukak ku, ginnán naw yù kagiak ku nikayu. Yù ira pobare ta dab-buno, aggira yù pinili ni Namarò tapè aggira yù mangikatalà kuna, ánná napasigaggà yù

ángngikatalà da. Á pabbalinan na ira ta tatole na, tapè mesipà ira sù pammagure na, ta yáyù initabbá na nga bálà da nga iyawâ na sù ira ngámin nga mangiddù kuna.

<sup>6</sup> Ngam sikayu, ipasiránán naw yù ira pobare. Á asinni panò yù ira manigirigâ nikayu nu ari galâ yù ira maríku? Asinni yù ira mangikekâ nikayu ta kues nu ari yù ira maríku?

<sup>7</sup> Á asinni panò yù ira makkagi ta narákè ta meyannung sù maráyaw nga ngágán ni Apu Kesu Kiristu nga Yápu tam? Aggira nga maríku!

<sup>8</sup> Á kuruk nga napiá yù akkuán naw nu tuppálan naw yù kapiánán nga tunung ni Namarò nga netúrâ, nga kun na,

“Iddukan naw yù ira ikáttole naw ta kunnay ta ángngiddù naw ta baggi naw.”\*

<sup>9</sup> Ngam nu paddurúmán naw yù ira tatolay gapu ta mariku yù tádday ánná pobare yù tádday, á mapagikárú kayu gapu ta nakaliwatán naw yù tunung ni Namarò.

<sup>10</sup> Ta mássiki nu tuppálan naw yù ngámin ira nga itaddán ni Namarò nga netúrâ sù tunung na, ngam táddyá lâ yù arán naw natuppál, á nakaliwatán naw yù tunung ni Namarò.

<sup>11</sup> Ta si Namarò yù nakkagi sù itaddán na, nga kun na, “Ari kayu makikarallaw.” Á aggina galâ yù nakkagi gapay, nga kun na, “Ari kayu mamapátay.”† Á nu ari kayu makikarallaw, ngam mamapátay kayu, á nalliwâ kayin, ta nakaliwatán naw yù tunung ni Namarò.

<sup>12</sup> Á yáyù nga máwák tam laguk nga ubobugan ánná akkuán yù napiá nga kunnay sù akkuán nayù ira tatole ni Namarò, nga mapanunnután megapu sù kapiánán nga tunung nga mamalubbáng nittam, tapè mesipà ittam sù allà ni Namarò.

<sup>13</sup> Ta sangaw nu panunnután ni Namarò yù ira tatolay, arán na ikállà yù toláy nga ari mangikállà sù ira ikáttole na. Ngam yù toláy nga mangikállà, aggina yù ikállà ni Namarò. Á yáyù nga ikákkállà naw laguk yù ira kábulun naw, tapè ikállà na kayu ni Namarò sangaw nu ággo na pamanunnù na. Ta minángngikállà si Namarò, mássiki nu mamanunnù.‡

### Mepasingan yù Ángngikatalà tam megapu sù Akkuát tam

<sup>14</sup> Wáwwagi, nu ajjan yù toláy nga makkagi ta manguruk kâ Apu Kesu, ngam narákè yù akkuán na, á awán ta serbi nayù ángnguruk na. Meyígù panò megapu sù kunnian nga ángnguruk na? Ari gemma. Ta ari kuruk nga manguruk nu awán ta napiá nga akkuán na tapè mepasingan yù ángnguruk na.

<sup>15</sup> Á ta ángngarigán nu eggá yù ira wáwwagi tam ta ángnguruk tam kâ Apu Kesu nga awán ta kanad da ánná gámì da,

<sup>16</sup> á kagiat tam nira, “Parè bì ta napiá yù ággíán naw ánná málek naw sangaw yù kanan naw ánná gámì naw.” Á nu kunnian yù kagiat tam nira, ngam arát tam ira abbágán ánná arát tam iyawâ nira yù máwák da, á awán bulubugá ta serbi nayù ángngikatalà tam.

<sup>17</sup> Á yáyù, nu ajjan yù toláy nga makkagi ta ikatalà na si Apu Kesu, ngam arán na akkuán yù napiá nga ipakuá ni Namarò kuna, á awán laguk ta serbi nayù ángngikatalà na.

<sup>18</sup> Á ta ángngarigán, ajjan yù toláy nga makkagi, nga kun na, “Paguráyat tam, ta makkakerumá yù ánnutul tam kâ Apu. Ta ajjan yù ira makkagi ta meyígù ira megapu ta pangikatalà da lâ kâ Apu Kesu, mássiki nu awán ta napiá nga akkuád da. Á ajjan gapay yù ira makkagi ta meyígù ira megapu sù napiá nga akkuád da.” Á yawe laguk yù kagiak ku. Á kunnasi yù pangipasingat tam ta pangikatalà tam kâ Apu, nu awán ta napiá nga akkuát tam? Á yáyù nga akkuák ku laguk yù napiá, tapè mepasingan yù pangikatalà ku kâ Apu.

<sup>19</sup> Á sikayu, kurugan naw gemma ta táttáddyá lâ si Namarò nga Yápu tam. Á napiá gemma ta manguruk kayu sù kuruk nga meyannung kâ Namarò. Á yù ira anitu, kurugad da gapay si Namarò, á mamippippik ira ta assing da kuna, ta ari ira meyígù.

<sup>20</sup> Á sikayu nga kunnay ta awán ta nonò na, arán naw panò kánnámmuán ta awán ta serbi na pangikatalà na toláy kâ Namarò nu arán na gapay akkuán yù napiá nga ikáyâ ni Namarò?

<sup>21</sup> Nononopan naw yù ngaw Kákay Abrakam. Ammu naw gemma ta inibiláng ni Namarò ta matunung si Kákay Abrakam megapu sù kingnguá na. Minay di Kákay Abrakam nga nakimoray kâ Namarò ta utun na puddul, tapè palurotan na yù kinagi ni Namarò. Á bináluk na si Isak nga anâ na, á pinnedá na ta utun nayù ángngiyátangán, tapè meyátang.§

<sup>22</sup> Á yáyù pangipasinganát tam ta metáddyá yù pangikatalà ni Kákay Abrakam kâ Namarò sù panguruk na sù kinagi ni Namarò kuna. Ta yù pabbalinán nayù pangikatalà ni Kákay Abrakam kâ Namarò yù pamalurò na sù kinagi ni Namarò kuna.

\* 2:8 Lilitiko 19:18    † 2:11 Exodus 20:13-14    ‡ 2:13 Meyannung ta allà ni Namarò nga mepulù ta pamanunnù na, Genesis 4:8-16    § 2:21 Genesis 22:1-19

23 Ákunnian, napalurò yù dán nga netûrâ nga ubobuk ni Namarò nga kunnian: "Si Kákay Abrakam, kinuruk na yù kinagi ni Namarò kuna. Ágapu ta pangikatalà na kuna, inibiláng ni Namarò ta napiá áんな matunung si Abrakam."\* Áyáyù nga narámak nayù ira tatolay ta si Abrakam yù kopun ni Namarò.

24 Ákunnian, wáwwagì, kánnámmuát tam ta ibiláng ni Namarò ta napiá áんな matunung ittam, nga ari megapu sù pakkagi tam sù pangikatalà tam kuna, nu ari galâ megapu sù napiá nga akkuát tam, nga kepasinganán nayù pangikatalà tam kuna.

25 Ákunnian gapay sù ngaw Bákò Rakab nga minákkikarallaw. Inibiláng ni Namarò ta matunung si Rakab gapu ta inipasingan na yù pangikatalà na kâ Namarò megapu sù kingngúna. Ta pinaddulò na yù ira duá nga gínaká ni Israel, nga suddálú nga minay massísim ta ili na, á inilammang na ira nga pinapánaw, á inituddu na nira yù tanakuán nga dálán, tapè melilli ira sù ira maggápù nira nakuan.

26 Áta ángngarigán, nu mesinná yù ikararuá na tolay ta baggi na nga aringin maginángà, á natayin. Ákunnian gapay sù pangikatalà tam kâ Apu Kesu. Nu arát tam akkuán yù napiá nga ipakuá ni Namarò nittam, ákunnay ta natayin yù pangikatalà tam, gapu ta awán ta palurotan na.

### 3

#### *Yù Pakáwayyá nayù Pagubobuk tam*

1 Wáwwagì, ari nakuan aru nikayu yù mabbalin ta mesturu nga mangituddu ta ubobuk ni Namarò, ta ammu naw ta mepallà yù ámmagikáru ni Namarò, nepatalugáríng nikamínga mesturu ánné sù ira tudduám mi, nu arám mi tuppálan yù napiá nga ituddu mi.

2 Á sittam ngámin, negagángay ta makaliwâ ittam. Ánu ajan yù tolay nga ammu na imugurán yù pagubobuk na, aggina yù similluâ nga awán ta pakaliwatán na, áんな ammu na mangigaggak ta baggi na.

3 Ámegaggak yù baggi tam megapu ta pangigaggak tam ta jilá tam. Ta ángngarigán, ipe tam yù búsal ta simù na kabáyu tapè kurugan na ittam, á awayyá tam laguk igaggak yù baggi na.

4 Áyù biray yù táddyay nga keyarigán na. Mássiki nu mallakay yù biray áんな masikan yù paddák nga mangipayák kuna, ngam baddi yù ulin na nga ángngigaggak nayù mamilotu sù biray áんな ipanunung na sù lakahakaran na.

5 Ákunnian gapay sù jilá na tolay, mássiki nu baddi, ngam kunnay ta mappeddaráyw nga makáwayyá megapu ta pagubobuk na. Ta makáwayyá yù tolay nga mamalurò ta aru nga napiá onu narákè megapu ta pagubobuk na. Áyáyù nga meyárik yù jilá tam ta baddi nga ulin nga makáwayyá nga mangigaggak ta dakal noga biray.

Áta ángngarigán, nonopan naw yù api nga baddi, á pígiá lâ tuggian na yù dakal nga kakayyuán!

6 Ákunnay ta api yù jilá tam, gapu ta mappanà yù narákè nga maggapu ta pagubobuk na. Ámassamâ yù karákè na ta nonò tam áんな baggi tam, á darálan na yù ággít tam. Ási Satanas yù paggappuán nayù narákè nga pagubobuk tam.

7 Makáwayyá yù tolay nga mamasippâ ta ngámin nga makkakerumá nga simaron nga ayám, mammánù, yù ira nga makkarakáray, áんな yù ira nga maggián ta bebay, á ajianin yù pinasippâ na.

8 Ngam awán bulubugá ta tolay nga matudduán na yù jilá na, tapè napiá lâ nakuan yù ubobugan na. Ari megaggak, nga dán nga naparán nga magubobuk ta narákè nga meyárik ta jitá nga akáppatay.

9 Ámegapu sù jilá tam, iyubobuk tam yù paddáyo tam kâ Ammò Namarò nga Yápu tam, áんな iyubobuk tam gapay yù pangigagek tam ta ikáttolé tam nga pinarò ni Namarò ta kágappâ na!

10 Táttáddyay lâ yù jilá tam, nga paggappuán nayù paddáyo tam kâ Namarò áんな yù pangigagek tam sù ira kábulut tam! Wáwwagì, ari máyâ! Arát tam nakuan akkuán yù kunnian!

11 Áta ángngarigán, mallatuá panò ta námmì nga danum áんな matábbál gapay yù táttáddyay nga panagabán? Ari gemma.

12 Ámabbungá panò ta niuk yù káyu nga bayábà? Ari gemma. Onu eggá panò yù lánù nga mabbungá ta bayábà? Awán! Áawán gapay ta manágak ta bebay. A ta kunnian gapay, ari mepángngà nittam nga manguruk kâ Namarò yù magubobuk ta narákè.

\* 2:23 Genesis 15:6; Roma 4:3

*Yù Napiá nga Sírik ni Namarò nga Ipakánnámmu na*

<sup>13</sup> Nu eggá nikayu yù masírik ánná kuruk nga makánnámmu, tumulù laguk, á ipasingan na yù napiá nga nonò na megapu sù napiá nga akka-akkuán na ánná napiá nga ággangnguá na.

<sup>14</sup> Ngam nu mangabubu kayu ánná mapassil, ari kayu laguk mappeddaráyaw nga makkagi ta masírik kayu, ánná ari kayu massiri, nga mangilímak ta kuruk.

<sup>15</sup> Ta nu narákè yù sírik naw, ari gemma maggapu kâ Namarò, nu ari galâ yù sírik nga gagángay ta nonò na tolay sawe dabbuno, nga maggapu kâ Satanas.

<sup>16</sup> Á nu ajjan yù ira nga mangabubu ánná mapassil, buruburionad da ngámin yù ira tatolay ánná akkuád da ngámin nga makkakerumá nga narákè.

<sup>17</sup> Ngam yù tolay nga kuruk nga masírik, nga eggá kuna yù napiá nga sírik nga naggapu kâ Namarò, á arán na nonopan yù narákè. Á magimammà yù nonò na, á aggina yù magattam nga masippà ánná tumulù. Á mangikállà sù ira ikáttole na, ánná abbágán na ira. Ari mabbábáng ánná ari mangirumá ta tolay, á ari ággippípiá.

<sup>18</sup> Á yù ira mamakkápiá sù ira kábulud da, meyárik ira ta mammulá ta napiá nga bukal, ánná málâ na sangaw yù napiá nga bungá ra. Ta nu pakkapiád da yù ira kábulud da, mammapiá yù áaggiád da, á napiá ánná matunung yù ngámin nga akkuád da.

## 4

*Yù ira Mangikatalà kâ Namarò ánná yù ira Ari Manguruk*

<sup>1</sup> Á ngattá, ta makkakákontará kayu? Anni panò yù kegapuánán nayù paddaráma naw, nu ari galâ megapu sù passil naw ánná narákè nga pakkaragâ naw nga nonopan naw.

<sup>2</sup> Ajjan yù ikáyâ naw nga apan, ngam arán naw málâ, á yáyú nga maguray lâ yù akkuán naw, tapè málâ naw, mássiki nu mamapátay kayu! Mapassil kayu! Ngam ari kayu makálâ ta passilan naw, á yáyú gapu na nga maddaráma kayu. Ngam arán naw málâ yù máwák naw, gapu ta arán naw kiddawan kâ Apu Namarò.

<sup>3</sup> Á mássiki nu makimállà kayu kâ Namarò, arán na iyawâ nikayu yù ipakimállà naw, gapu ta kiddawan naw galâ megapu sù narákè nga pakkaragâ nayù baggi naw.

<sup>4</sup> Tatolay nga ari mekalatâ! Arán naw panò ammu tanu karagatán naw yù ajjan sawe dabbuno, á kontarán naw si Namarò? Ta yù tolay nga makkaragâ ta narákè nga ajjan sawe dabbuno, aggina yù ikalusso ni Namarò.

<sup>5</sup> Á arán naw laguk kagian ta awán ta kebalinán nayù dán nga netúrâ nga ubobuk ni Namarò. Kinagi na,

“Maggián yù Mangilin nga Ikararuá ni Namarò sù ira tatolay na,  
á nakalò yù pakkaragâ na ta iddukat tam galâ si Apu Namarò.”

<sup>6</sup> Á nepallà yù pangikállà ni Namarò nittam, á uputan na ittam nga abbágán, tapè mepasigaggâ ánná matunung yù ángngikatalà tam kuna. Ta ajjan yù dán nga netúrâ nga ubobuk ni Namarò, nga kunniauw:

“Kontarán ni Namarò yù ira ngámin nga mappeddaráyaw,  
ngam ikállà na yù ira ngámin nga tumulù.”\*

<sup>7</sup> Tumulù kayu laguk kâ Namarò. Á kontarán naw si Satanas nga patul nayù ira anitu. Tanu kontarán naw si Satanas, panawán na kayu.

<sup>8</sup> Á dukki kayu kâ Namarò. Tanu dukki kayu kuna, dukki gapay nikayu. Á sikayu nga malliwâ, mabbabáwi kayu laguk, á likuránan naw yù liwiliwâ naw. Á sikayu nga mabbábáng sù panguruk naw kâ Namarò, ipasigaggâ naw yù ángnguruk naw kuna.

<sup>9</sup> Á parè bì ta makalò yù daddam naw megapu sù liwiliwâ naw, á makkulè kayu laguk. Ari kayu nakuán maggagálâ, ta mepongngâ ta maraddam kayu. Ari kayu laguk magayáyâ ngá mabbúyá, ngam maraddam kayu nga mappasirán.

<sup>10</sup> Nu tumulù kayu kâ Apu Namarò, ipotun na kayu nga meparáyaw.

*Ari ittam Makkakápanunnù, ta si Apu Namarò yù Mamanunnù*

<sup>11</sup> Wáwwagi nga mangiddù kâ Apu, ari kayu makkakálílibâ. Yù tolay nga lillíbatan na yù kabbulun na, á kunnay ta sippilan na yù pakáwayyá nayù mamanunnù. Á nu panunnután na yù ira kábulun na, kunnay ta lillíbatan na gapay yù napiá nga tunung ni Namarò nga ipamanunnù na nittam. Á nu mamanunnù kayu sù tunung, arán nawin gemma kurugan yù itaddán na, á arán nawin kurugan si Namarò.

<sup>12</sup> Si Apu Namarò lâ yù paggapuán nayù tunung, á aggina lâ yù makáwayyá nga mama-nunnù nittam. Á awán ta tanakuán nu ari lâ aggina yù makáwayyá nga mangiyígù ta tolay

\* 4:6 Proberbio 3:34

nga iyángé na ta lángì, onu mamagikáru ta tolay ta impiernu. Á yáyù nga awán ta pakáwayyá tam nga tatolay nga mamanunnù sù ira ikáttolé tam.

### *Ari ittam nakuan Mappeddaráyaw*

<sup>13</sup> Ginnán naw laguk yawe kagiak ku nikayu, sikayu nga makkagi ta kunniauw: “Sangaw nu ummá, onu sangaw nu tádday ággaw, umay kami ta tanakuán nga ili. Á maggián kami ta tangaragun, á makkompará kami, tapè aru sangaw yù ganánsiá mí.”

<sup>14</sup> Ngam arán naw nakuan kagian ta kunnian. Arát tam ammu yù mesimmu nittam sangaw nu ummá! Ta mabíbì ittam ta dabbuno, nga kun na angà nga duttál, á manganánnuán, lummakin.

<sup>15</sup> Yawe lá yù mepángngà nga kagiat tam nakuan, “Nu ure ni Namarò, á matolay ittam, á kunniaue yù akkuát tam.”

<sup>16</sup> Ngam sikayu, ngattá, ta mappeddaráyaw kayu? Ngattá, ta ipappeddaráyo naw yù akka-akkuán naw, ta naráké ngámín yù pappeddaráyo na tolay.

<sup>17</sup> Á nonopan naw yaw. Makaliwâ yù tolay nu arán na akkuán yù napiá nga ammu na nga akkuán na nakuan.

## 5

### *Sikayu nga Maríku, Imugurán naw yù Akkuán naw*

<sup>1</sup> Á sikayu nga maríku, ginnán naw laguk yù kagiak ku nikayu. Makkulukulé kayu nakuan ánnna makkalli kayu megapu sù jígá nga umay sangaw nikayu!

<sup>2</sup> Ta marúnù ngámín nga kukuá naw nga makkakerumá, ánnna mabobbotán yù ngámín nga gámì naw, nga kanan na ulak ánnna kimi.

<sup>3</sup> Á masináyán yù pirá naw nga buláwán ánnna pinaláta, gapu ta binuttul naw nga arán naw iniyusá ta mangabbák. Á yù kukuá naw nga masináyán, yáyù massistígu ta karáké naw. Yù binuttul naw nga kukuá naw yù kun na api nga kán lâkán ta baggi naw, ta inukkuk naw yù kukuá naw sù ira maporián nga ággaw nga pamanunnù ni Apu Namarò.

<sup>4</sup> Ginnán naw, sikayu nga eggá yù ákkomanán na! Jinarogà naw yù ira patarabakuan naw ta ákkomanán naw. Á nakaliwatáni naw yù ira nakigaták nikayu, ta arán naw ira sináddanán. Á si Namarò nga Kotunán, naginná na yù kinagi ra ta meyannung sù akka-akkuán naw.

<sup>5</sup> Á sikayu nga maríku, nonopan naw lá yù nanginá nga aruátan naw ta dabbuno ánnna yù ipabbúyá naw. Kunnay kayu ta báka nga matabá, nga arán na ammu ta pátiad da sangaw. Ta kagian naw ta awán ta awágan naw, á arán naw manonò yù pamanunnù ni Apu Namarò.

<sup>6</sup> Á iddâ naw lá jinigirág yù ira matunung nga tatolay nga ari nakaliwâ nikayu, á pinapáte naw ira, mássiki nu siminulù ira nikayu.

### *Máwák nga Magattam ittam*

<sup>7</sup> Á sikayu nga wáwwagi nga manguruk kâ Apu, magattam kayu lábbì nga magiddak ta labbè ni Apu ta dabbuno. Nonopan naw yù minákkomán. Magattam lá nga magiddak ta kagaták na amme na. Ta iddagán na bì yù mapolu nga urán ánnna yù maporián áddé ta kalutu na.

<sup>8</sup> Á sikayu, magattam kayu gapay nga magiddak lábbì. Ipasigaggà naw yù ángnguruk naw kâ Apu Kesu. Ta mabíkin, á duttál ta dabbuno.

<sup>9</sup> Ari kayu makkakápalíwâ, wáwwagi, tapè arán na kayu panunnután ni Apu. Ta aijanin yù umay mamanunnù, á mabi lá nga tullung, ta kun na tolay nga tullung ta puertá nga nabukatán.

<sup>10</sup> Wáwwagì, nonopan naw yù ira ngaw ábbilinán ni Namarò nga jinok na ta mangipakánámmu sù bilin na, tapè párigán naw ira. Ta inattamád da yù aru nga makkakerumá nga jígá ánnna pinalurò da yù inípakuá ni Namarò nira.

<sup>11</sup> Á ibiláng tam ta magayáyâ nga iddukan ni Namarò yù ngaw ira tatolay nga napasi-gaggà yù ángngikatalà da kâ Namarò, nga nagattam ta aru nga jígá, tapè palurotad da yù inípakuá ni Namarò nira. Narámkaw naw si Job, nga nagattam ta aru nga jígá, á ammu naw ta napiá lá yù ure ni Apu Namarò ta meyannung kuna, ta pinammapiá ni Apu yù áaggián ni Job. Ta minángngikállà si Namarò ánnna nepallà yù allà na sù ira tatole na.

<sup>12</sup> Wáwwagì, yawe yù kagiak ku nga importá nga arán naw máttamán. Ari kayu bulubugá mappagássingán, mássiki ta lángì onu dabbuno onu tanakuán nga pagássingán naw. Napiá lá nu kagian naw, “Wan,” nga awán ta pagássingán na, ta yáyù lá ikáyâ ni Namarò. Á napiá gapay nu kagian naw lá, “Ari,” nga awán ta pagássingán na, tapè arán na kayu panunnután ni Namarò.

### *Máwák nga Makimállà ittam kâ Apu Namarò*

<sup>13</sup> Á nu eggá nikayu yù tolay nga marigirigâ, makimállà lâ kâ Namarò. Á nu eggá nikayu yù magayayâ, á ikansion na yù paddáyo na kâ Namarò.

<sup>14</sup> Nu eggá nikayu yù mataki, ipágál na yù ira karakalán nayù ira manguruk, tapè ipakimállà da kâ Namarò áんな denuád da ta pannakabaggi ni Apu Kesu.

<sup>15</sup> Á ta pakimállà naw, nu kuruk nga ikatalà naw si Namarò, á pammapián na yù mataki. Á nu eggá gapay yù pakaliwatán na, á pakomán na.

<sup>16</sup> Á nu nakaliwâ kayu, makkakápalappâ kayu taliwâ naw, á ipakimállà naw yù ira kábulun naw, tapè mammapiá kayu. Ta nepallà yù pakáwayyá nayù pakimállà na tolay nga napiá áんな matunung.

<sup>17</sup> Kunnay kâ Elias nga ábbilinán na ngaw ni Namarò. Toley gemma lâ si Elias nga kagittá tam. Á nakimállà kâ Namarò ta ari bì magurán, á ari nagurán ta tallu ragun ta gadduá megapu sù pakimállà na.\*

<sup>18</sup> Á nakimállà si Elias má ta iyawâ ni Namarò yù urán, á nagurán áんな nattubbu áんな nabbungá yù inimulá nayù ira tatolay.

<sup>19</sup> Wáwwagi, nu eggá nikayu yù tolay nga nekáttuay ta pangikatalà na kâ Namarò áんな minárayyu sù kuruk nga bilin na, á máwák nga umay laguk yù tádday nikayu nga manabarang kuna, tapè mattoli nga manguruk kâ Apu.

<sup>20</sup> Á nonopan naw yawe. Nu ajjan yù tolay nga nalliwâ, nga ipetoli naw ta panguruk na kâ Apu Namarò, á mássiki nu kitáru yù liwiliwâ na, á mapakomá, á melilli yù ikararuá na sù pamagikáru ni Namarò. Áddè na yû.

---

\* **5:17** Meyannung sù pakimállà ni Elias, 1 dagiti Ar-ari (1 Patul) 17:1; 18:1-2, 42-45

## Yù Napolu nga Túrâ ni Eduru

*Yù Meyannung sawe Túrâ ni Eduru*

Yawe yù napolu nga túrâ ni Eduru sù ira mangikatalà kâ Apu Kesu, nga narigirigâ megapu sù ángnguruk da kâ Apu. Á ipanonò na nira yù pagattam ni Apu Kesu sù ketapil na megapu nira, tapè attamád da gapay yù jigâ da nga kunnay kuna. Ta negagángay ta jigirigátan nayù ira ari manguruk yù ira manguruk kâ Apu Kesu. Á sittam nga manguruk, nu attamát tam lâ yù balle tam nga jigâ nga kunnay sù pagattam ni Apu Kesu, á ajjan yù napiá nga iddanamát tam, nga kesipà tam kâ Apu ta lángi.

*Yù Mayán nayù Túrâ*

Yù Paddios ni Eduru áンna yù Ipakimállà na (1:1-2)

Yù Napiá nga Iddanamán nayù ira Manguruk kâ Apu (1:3-12)

Nágálán ittam tapè Palurotat tam lâ yù Napiá (1:13-25)

Yù Talluâ nayù ira Bagu nga Manguruk kâ Apu (2:1-8)

Yù Meyannung sù Ággangnguá nayù ira Tatole ni Namarò (2:9-25)

Yù Panabarang ni Eduru sù ira Magatáwa (3:1-7)

Magattam ittam ta Jigâ Mássiki nu Akkuát tam yù Napiá (3:8-4:19)

Yù Initaddán ni Eduru sù ira Karakalán (5:1-14)

<sup>1</sup> Sikán si Eduru, nga minángngilayalayâ nga jinok ni Apu Kesu Kiristu ta umay mangipakánnammu sù bilin na. Á mattúrákâ nikayu nga manguruk kâ Namarò, sikayu nga nababkkuí, nga nawwarawarâ, nga minay nakipaggián sù ira tatolay sù ira purubinsia na Pontu áンna Galasia, Kappadosia, Asia áンna Bisinia.

<sup>2</sup> Si Namarò nga Yáma tam, ninonò na kayu áddè ngaw lage naw neyanâ, á sinullà na kayu, tapè sikayu yù manguruk kâ Apu Kesu Kiristu áンna mapakomá kayu ta liwiliwâ naw, megapu sù dágâ ni Apu Kesu nga nallawán sù ketapil na ta kurù. Á iniyawâ ni Namarò nikayu yù Mangilin nga Ikaranuá na ta mangabbák nikayu, tapè mapakarenuán yù nonò naw, á mabbalin kayu ta napiá áンna mangilin nga tatole na.

Á yawe ipakimállà ku kâ Namarò, ta uputan na kayu nga ikákkállà, tapè napiá lâ yù ággigián naw áンna yù gawagawáyán naw.

*Yù Napiá nga Iddanamán nayù ira Manguruk kâ Apu*

<sup>3</sup> Dayáwt tam si Namarò, nga Yápu áンna Yáma ni Apu Kesu Kiristu nga Yápu tam. Ta gapu ta nepallà yù allâ na nittam, iniyawâ na nittam yù bagu nga áttolé tam megapu sù paginnanole ni Apu Kesu Kiristu. Á yáyù nga iddanamát tam yù pamaginnanole ni Namarò nittam áンna kesipâ tam sù áttolé na ta áddè ta áddè.

<sup>4</sup> Á iddanamát tam gapay yù iyawâ ni Namarò sangaw sù ira tatole na, nga pinakappián na ta lángi, nga ari marúnù onu maddán, áンna ari mapatalián.

<sup>5</sup> Á gapu ta pangikatalà tam kâ Apu Kesu, taronán ni Namarò ittam megapu sù pakáwayyá na, áddè ta iyígù na ittam sangaw nu pagáddekan na ággaw.

<sup>6</sup> Á gapu ta iddanamát tam yù pangisipà ni Namarò nittam, magayáyâ ittam laguk, mássiki nu marigirigâ ittam lábbì kunangane.

<sup>7</sup> Á nu maparubát tam yù jigâ, attamát tam lâ, tapè mepasingan ta napasigaggâ yù ángngikatalà tam kâ Apu Kesu. Á ta ángngarigán, ajjan yù buláwán, nga ari gemma mannanáyun, ngam mararál sangaw. Á lunágad da ta api, tapè mapakarenuán áンna mepasingan yù kapiánán na. Á kunnian, nu maparubát tam yù jigâ, mepasingan ta kuruk nga napasigaggâ yù ángngikatalà tam kâ Apu. Ta más napiá gemma ánné ta buláwán yù ángngikatalà tam kâ Apu. Á ta pattoli ni Apu Kesu Kiristu nga mammaguray ta dabbuno, mepotun nga mesipà ittam sù dalingráng na, áンna meparáyw ittam megapu sù ángngikatalà tam kuna.

<sup>8</sup> Á wáwwagi, mássiki nu arán naw paga nasingan si Apu Kesu, ngam iddukan naw. Á sittam ngámin nga manguruk kuna, mássiki nu arát tam masingan kunangane, á ikatalà tam. Á yáyù nga ayatán ittam, á nepallà yù pagayáyâ tam nga awán ta keyarigán na,

<sup>9</sup> gapu ta meyígù ittam nga mesipà kâ Namarò ta lángi ta áddè ta áddè, megapu sù ángngikatalà tam kâ Apu Kesu.

<sup>10</sup> Á yù ira ngaw ábbilinán ni Namarò, mássiki nu inipakagi ni Namarò nira yù pangikállà na áンna pangiyígù na nittam, á arád da nánnámmuán. Á kitaláppà ira nga mannonò nu kunnasi yù ángngiyígù ni Namarò nittam, tapè mesipà ittam sù mannanáyun nga áttolé na.

<sup>11</sup> Á aijan nira yù Mangilin nga Ikararuá ni Namarò, á inipakánnámmu na ngaw nira ta umay yù Mangiyígù noka, nga marigirigâ ánná matay, á ta kabalín na mangiyangngà, á mepotun nga meparáyaw. Á ninononò da nu asinni yù ubobugad da nga umay, ánná sangaw nu anni yù kapalurò na.

<sup>12</sup> Á inipakánnámmu ni Namarò nira ta ari mapalurò ta keggá ra yù inipakagi na nira, ngam ta keggá nayù ira tatolay nga tumubbâ nira noka, nga sittam kunangane. Á napalurokin, ta minayin nikayu yù ira mangilayalayâ sù napiá nga dámak megapu sù pakáwayyá nayù Mangilin nga Ikararuá nga naggapu ta lángi. A yù ira daroban ni Namarò ta lángi, karagatád da gapay gigiámmuan nu kunnasi yù ángngiyígù ni Namarò nittam.

*Nágálán ittam tapè Palurotat tam lá yù Napiá*

<sup>13</sup> Á gapu ta pangikállà ni Namarò nittam, imugurát tam laguk yù nonopat tam, á paránat tam laguk yù nonò tam, tapè dán nga naparán ittam nga manuppál sù napiá nga ipakuá ni Namarò nittam. Á iddanamát tam lá yù allà ni Namarò nga umay nittam ta pattoli na sangaw ni Apu Kesu Kiristu.

<sup>14</sup> Á sikayu gapay, gapu ta ánná na kayin ni Namarò, tuppálan naw laguk yù kagian na, tapè ánná na kayu nga manguruk. Arán nawin akkuán yù kinaragatán naw ngaw olu, lage naw nánnámmámuán yù kuruk nga bilin ni Namarò.

<sup>15</sup> Mangilin si Namarò, ánná matunung ánná napiá lá yù nonò na. Á gapu ta aggina yù nagágál nittam, tuppálat tam laguk yù ipakuá na nittam, tapè napiá gapay yù ngámin nga akka-akkuát tam, á mangilin ánná matunung ittam gapay nga kunnay kâ Yápu tam.

<sup>16</sup> Ta aijan yù netúrâ nga kinagi ni Namarò, nga kun na, “Tunungan naw yù nonò naw ta kunnay sù napiá nga nonò ku, ánná ari kayu malliwâ, tapè mangilin kayu nga kunnay nikán. Ta sikán yù mangilin nga matunung ánná napiá lá yù nonò ku, á awánà ta liwâ.”\*

<sup>17</sup> Á gapu ta abbúnat tam si Namarò ta “Ammò” sù pakimállà tam kuna, á pakimorayát tam laguk ta keggá tam sawe dabbuno. Ta matunung nga mamanunnù si Namarò. Á ta pamanunnù na sù ira ngámin nga tatolay, arán na ira írumá, ngam bálatan na ittam ngámin nga katággitáday ta meyannung sù akkuán na.

<sup>18</sup> Ta ammu tam yù inipappágá ni Apu Namarò ta pamalubbáng na nittam, tapè arát tamin tuttulan yù kustombare nga inituddu nayù ira ngaw naggaká nittam, nga awán ta serbi na. Á ari gemma marúnù yù inipappágá na nga kunnay ta buláwan onu pinaláta.

<sup>19</sup> Ta mannanáyun yù pinalurò na, gapu ta inipappágá na yù dága ni Apu Kesu Kiristu nga netapil ta pate na ta kurù megapu nittam. Aggina yù meyárik ta karneru nga napiá ánná marenu nga awán ta jíkkù ta baggi na, nga meyátáng kâ Namarò.

<sup>20</sup> Á lage na pamarò ni Namarò ta dabbuno, sinalákkuruk na ta doban na si Apu Kesu Kiristu, nga awán ta liwâ na, ta umay magikáru ta liwâ tam ngámin nga tatolay. Ngam kunangan lá yù kepalappâ na ta panguriánnánga ággaw, tapè mábbágán ittam.

<sup>21</sup> Á gapu ta ketapil ni Apu Kesu megapu nittam, ikatalá tam si Namarò. Á pinaginnanole ni Namarò si Apu Kesu ánná inipotun na ta lángi nga meparáyaw. Á yáyù nga napasíaggá yù ángngikatalá tam kâ Namarò ánná yù ággiddanáma tam ta paginnolanayan na ittam ánná ipotun na ittam gapay.

<sup>22</sup> Á gapu ta napakarenuánin yù nonò tam, megapu sù ángnguruk tam sù bilin ni Namarò, á ari ittam áppè aya-aya, ta makáwayyá ittam nga mangayâ sù ira kábolut tam nga manguruk. Á yáyù makkáká-iddù kayu laguk megapu sù napiá nga nonò naw.

<sup>23</sup> Ta kunnay kayin ta noli nga neyanâ. Á yù bagu nga áttolé naw, ari negittá sù napolu nga keyanâ naw ta tolay nga matay. Ta kunnay ta noli nga neyanâ yù tolay, nga neddán sù áttolé ni Namarò, nga ari bulubugá matay. Á iniyawâ na nikayu yù bagu nga áttolé naw megapu sù bilin na nga kinuruk naw, nga mannanáyun nga ari mapatalián.

<sup>24</sup> Á yáyù kebalinán nayù inipetúrâ na ngaw ni Namarò, nga kun na,  
“Kun na kaddà yù ira tatolay.

Á kun na lappo na kaddà yù keparáyo ra.

Ta mabì ira lá matay,

ta kun na kaddà nga malelay

ánná yù lappo na nga mapannâ.

<sup>25</sup> Ngam mannanáyun yù ubobuk ni Namarò,  
nga ari mapatalián ta áddè ta áddè.”†

Á yane ubobuk ni Namarò yù napiá nga dámak nga nelayalayâ nikayu.

## 2

*Yù Talluâ nayù ira Bagu nga Mangruk kâ Apu*

<sup>1</sup> Á gapu ta mangruk kayin sù bilin ni Namarò, á ari kayin laguk mangnguá ta narákè. Á ari kayu áppè pipiá. Ari kayu massiri onu mangilogò. Ari kayu mappassil onu mallillibâ.

<sup>2</sup> Á gapu ta iniyawâ na nikayu ni Namarò yù bagu nga áttole naw, á kunnay ta assítay nga kapángngiyanâ nga makkarakâ nga massusu, karagatán naw laguk nga bibriran ánnna ginnán yù bilin ni Namarò, tapè tulluâ yù ángnguruk naw kâ Namarò ánnna ipasigaggà naw yù ángngikatalâ naw kuna ta áddè te keyígù naw.

<sup>3</sup> Ta naparubán nawin gapay yù ángngikallâ ni Apu Kesu nittam.

*Yù Keyarigán nayù Batu nga Nanáddagán na Balay*

<sup>4</sup> Á dukkì ittam laguk kâ Apu Kesu, gapu ta aggina yù sigga-inángà nga manotelay nittam. Á yá keyarigán na yù batu nga inipuerá nayù ira tatolay, ngam kun na batu nga kapiánán nga iddukan ni Namarò, nga piníli na nga panáddagán na sù bale na nga paddayan na.

<sup>5</sup> Á pangikatalà tam kâ Apu Kesu, meppattatáddy ittam gapay kuna nga kunnay sù ira batu nga paddayan ni Namarò ta bale na. Ta sittam ngámin nga mangruk kuna yù meyárik ta bale na. Á pabbalinan na ittam gapay ta mangilin nga páppári nga masserbi kuna. Á yáyù nga makimoray ánnna maddáyaw ittam kâ Namarò. Á alawatan ni Namarò yù pakimore tam kuna ánnna yù paddáyo tam kuna, nga kunnay ta pangiyátang tam kuna, megapu sù keppattatádde tam kâ Apu Kesu Kiristu.\*

<sup>6</sup> Á aijan yù inipetúrá na ngaw ni Namarò nga kunniaue:

“Aijan yù piníli, nga ipè sù giák ku ta Sion,  
    nga kunnay sù batu nga kapiánán nga iddukak ku,  
    nga pamatáddagák ku sù balé.

Á yù ngámin nga tatolay nga mangikatalà kuna,  
    ari ira bulubugá mepasiránan.”†

<sup>7</sup> Á yáyù nga si Apu Kesu Kiristu yù kuruk nga ibiláng naw ta kapiánán nga máwák naw, sikayu nga mangikatalà kuna. Ngam yù ira nga manaki kuna, mepasiránán ira sangaw, ta aijan yù netúrá gapay nga sinalákkuruk na ngaw ni Namarò nga mesimmu nira, nga kunniaue:

“Yù batu nga nanakitád da,  
Aggina yù nabbalinin ta panáddagán nayù balay.”‡

<sup>8</sup> Á netúrá gapay yù kunniauw:

“Yane yù batu nga kesiddúkalán nayù ira tatolay,

    tapè mapalakak ira.”§

Á kunnay ta mesiddúkal ira gapu ta arád da kinuruk yù bilin ni Namarò. Á yáyù nga sinalákkuruk ni Namarò ta mabbalin ira ta kunnay ta mesiddúkal nga mapalakak.

*Yù Meyannung sù Ággangnguá nayù ira Tatole ni Namarò*

<sup>9</sup> Ngam sittam nga mangruk sù bilin ni Namarò, piníli na ittam nga sinullà na ta páppári na ittam nga masserbi kuna. Inagálán na ittam ta mangruk ittam kuna, á pinabbalin na ittam ta mangilin nga tatole na, tapè illili na ittam sù kallà, ánnna ituluk na ittam sù nawák na nga makapállâ. Á yáyù nga doban na ittam ta mangiparámak sù kapiánán na.

<sup>10</sup> Á sù ngaw, arán na ittam tatole ni Namarò, á arát tam ammu yù allà na. Ngam kunangane, tatole na ittam, á ikákkallâ na ittam.

<sup>11</sup> Wáwwagi nga iddukak ku, makipaggiát ittam ta mabì lá sawe dabbuno, ta ari saw yù paggianát tam, nu ari galâ yù aijan ta lángì nga pinarán ni Namarò megapu nittam. Á yáyù nga tabarangát takayu, ta arayyuán naw yù narákè nga karagatán na tatolay sawe dabbuno, nga mangontará ta nonò tam nga mangruk.

<sup>12</sup> Á uputat tam laguk nga akkuán lá yù napiá, tapè ipasingat tam yù napiá nga akkuát tam sù ira nga ari mangruk kâ Apu. Á mássiki nu lillibatad da ittam, á mabbabáwi ira sangaw, gapu ta masingad da yù napiá nga akka-akkuát tam. Á sangaw nu umay si Apu, á maddáyaw ira gapay kuna.

*Tumulù ittam sù ira Mammaguray*

\* 2:5 Ta meyannung sù meyátang kâ Namarò, bibriram mu Roma 12:1; Kebru 13:15      † 2:6 Isaya 28:16; Roma 9:33

‡ 2:7 Salmo 118:22; Lukas 20:17      § 2:8 Isaya 8:14; Roma 9:33

13 Á tumulù ittam laguk sù ira makáwayyá ta gubermente, tapè meparáyw si Apu Kesu. Á kurugat tam yù tunung nga kagiad da, nepatalugáring sù tunung nayù kátannangán nga mammaguray.

14 Á kurugat tam gapay yù gubinador, gapu ta aggina yù doban nayù kátannangán nga mammaguray ta umay mamággáng sù ira mangnuá ta narákè ánnna maddáyaw sù ira mangnuá ta napiá.

15 Ta yawe yù ure ni Namarò, ta akka-akkuán naw yù napiá nga ipakuá na nikayu, á pagimammattan naw yù ira nga magubobuk sù arád da ammu, nga awán ta kebalinán na, megapu sù napiá nga palurotan naw nga masingad da.

16 Á ari kayin laguk makiaripan ta narákè, gapu ta napalubbáng kayin, á tatole na kayu ni Namarò nga masserbi kuna. Á maguray lâ yù akkuán naw, á arán naw akkuán yù narákè, ngam tuppálan naw lâ yù napiá nga ipakuá ni Namarò nikayu, tapè mepasingan ta kuruk nga si Namarò lâ yù passerbián naw.

17 Makimoray kayu laguk ta ngámin nga tatolay. Iddukan naw yù ira wáwwagi tam ta ángnguruk tam kâ Apu. Makiyápu kayu kâ Namarò. Á makimoray kayu sù makáwayyá nga mammaguray.

#### *Magattam ittam ta Jigâ nga kunnay ta Pagattam ni Apu Kesu*

18 Á yawe yù kagiak ku nikayu nga aripan, ta napiá nu tumulù kayu sù ira passerbián naw, á pakimorayán naw ira, nga ari lâ yù ira masippà nga mangikállà, nu ari gapay yù ira mapporay.

19 Á napiá nu awán ta liwâ naw, ngam sigídá nga attamán naw lâ yù panigirigâ da nikayu nayù ira passerbián naw, gapu ta nononopan naw si Apu Namarò, ta yáyù nga ayatán si Apu Namarò nikayu.

20 Á ta ángngarigán nu malliwâ kayu, á mássiki nu attamán naw lâ yù panigirigâ nayù yápu naw nikayu megapu sù liwâ naw, á yáyù mepángngâ megapu sù liwâ naw, á ari kayu gemma meparáyw. Ngam nu akkuán naw lâ yù napiá, á attamán naw lâ nu iddâ da kayu lâ nga jigirigátan nayù ira passerbián naw, á magayáyâ si Namarò laguk megapu nikayu.

21 Á yáyù nga inipagágál ni Namarò nittam, ta attamát tam lâ yù jigâ nga umay nittam, nga kunnay ta pagattam ni Apu Kesu Kiristu, ta inattamán na yù panigirigâ da kuna sù ketapil na megapu nittam, tapè párigát tam yù napiá nga nonò na nga inituddu na.

22 Awán bulubugá ta nakaliwatán ni Apu Kesu Kiristu.

Á ari bulubugá nassiri.\*

23 Á sù panguyu-uyo ra kuna, arán na ira sibbák.

Á sù panigirigâ da kuna, arán na ira napporayán.

Ta iníkatalà na lâ si Namarò nga mamanunnù, nga matunung yù ámmannunnù na.

24 Á nabbaluntáriú si Apu Kesu nga nagikáru ta ngámin nga liwâ tam sù pate na ta kurù, tapè arát tamin akkuán yù narákè, ngam akkuát tam lâ yù napiá.

Á gapu ta kabigák na, napakomá ittam,

ánnna napammapiá yù áaggiát tam kâ Namarò.

25 Sù ngaw, kunnay ittam ta karneru nga magawa-awáwán.

Ngam nabbabáwi ittamin, á nattoli ittam nga tumuttuttul kâ Apu nga mináppárak nga manaron nittam ánnna mangiyígù nittam.

## 3

### *Yù Panabarang ni Eduru sù ira Magatáwa*

1 Á yawe gapay yù kagiak ku nikayu nga bábbay nga eggá yù atáwa na. Tumulù kayu nge katággítáddy sù atáwa na. Á nu ari paga nanguruk yù áttáwa naw sù bilin ni Namarò, á manguruk ira sangaw megapu sù napiá nga akkuán naw. Arán naw máwák nga tabarangán ira,

2 gapu ta masingad da yù napiá nga akka-akkuán naw ánnna yù pakimore naw kâ Namarò.

3 Á arán naw lâ nonopan yù ámmakástá naw ta baggi naw ánnna duddù naw, ánnna pabbisti naw ta nanginá nga gámi, ánnna paddusáriu naw ánnna passákkaláng naw ta bulawán.

4 Ngam yù kuruk nga pappakástá naw yù napiá nga nonò naw, nga mepasingan sù napiá nga ággangnuá naw. Ta yù kakástá naw nga mannanáyún yù ángngikállà naw ánnna tulù naw, nga kuruk nga napiá ta ánninanán ni Namarò.

5 Á ta kunnian gapay yù pappakástá nayù ngaw ira napiá nga bábbay nga nagiddanáma kâ Apu, ta napiá yù nonò da ánnna yù ággangnuá ra. Á siminulù ira gapay sù áttáwa ra.

\* 2:22 Isaya 53:9

<sup>6</sup> Á yù tádday si Sara ngaw, nga atáwa nayù ngaw Kákay Abrakam. Nakiyápu si Sara sù atáwa na, á gininná na yù kinagi na kuna. Á sikayu, mesipà kayu sù ira ginaká ni Sara, nu napiá lâ yù akkuán naw, á awán laguk bulubugá ta ikássing naw.

<sup>7</sup> Á kunnian gapay nikayu nga lálláki nga eggá atáwa na. Maggián kayu sù áttáwa naw, á ikákkállà naw ira, ta makapi ira ánnè nikayu. Á iddi-iddukan naw ira, ta naggigittá kayu nga iniddán ni Namarò ta áttole naw nga awán ta áddè na, megapu sù allà na nikayu. Ikákkállà naw laguk yù ira áttáwa naw, tapè ginnán ni Apu Namarò yù ipakimállà naw.

*Magattam ittam ta Jígá Mássiki nu Akkuát tam yù Napiá*

<sup>8</sup> Á yawe yù maporián nga kagiak ku nikayu. Mattatáddyay kayu laguk ta nonò naw. Á makkaká-ayâ kayu nga kunnay ta mawwawági, ánná mepaddaddam kayu sù ira marad-dam. Á makkaká-allà ánná makkakátulù kayu.

<sup>9</sup> Arán naw bálatan ta naráké yù mangnguá nikayu ta naráké. Arán naw papporayán yù mapporay, ngam ipakimállà naw ira, tapè ikállà ni Apu ira. Ta yáyù inipagágál ni Namarò nittam, ta ikállà tam yù ira kábulut tam, tapè ikállà na ittam gapay ni Namaró.

<sup>10</sup> Á yáyù gapay yù kinagi ni Namarò nittam, nga inipetúrá na ngaw:

“Nu ikáyâ naw ta magayáyâ kayu,  
ánná napiá yù ággíán naw,  
patukkatan naw laguk yù naráké nga pagubobuk naw,  
ánná ari kayu massiri.

<sup>11</sup> Pallikuránán naw yù naráké,  
á akkuán naw lâ yù napiá.

Uputan naw yù pakkakápiá naw sù ira kábulun naw,  
tapè mepagimammâ kayu.

<sup>12</sup> Ta taronán ni Namarò yù ira napiá nga tolay,  
á ginnán na yù ipakimállâ da kuna.

Ngam makikontará si Namarò sù ira nga mangnguá ta naráké.”\*

*Akkuát tam lâ yù Napiá, Mássiki nu Jigirigáttad da ittam*

<sup>13</sup> Á nu maláppà kayu, ánná napiá lâ yù akka-akkuán naw, eggá panò yù tolay nga manganni nikayu? Awán!

<sup>14</sup> Á ta ángngarigán, nu ajian yù mangnguá nikayu gapu ta napiá lâ yù akkuán naw, á paguráyán naw lâ. Ari kayu laguk maganássing nira, á ari kayu mabburung, gapu ta pagayáyatan na kayu ni Namarò.

<sup>15</sup> Á makimoray kayu kâ Apu Kesu Kiristu ánná pakiyápuán naw. Á nonopan naw yù kingnguá ni Apu megapu nikayu, tapè dán nga naparán kayu nga tubbák sù ira ari manguruk nu iyabbû da nikayu yù meyanung sù iddanamán naw kâ Apu.

<sup>16</sup> Á pakimorayán naw ira lâ, á alúnay lâ yù ákkitabkâb naw nira. Arán naw laguk akkuán yù ipapasirán naw, ta nu ajian yù ira mallillibâ nikayu megapu sù ángnguruk naw kâ Apu Kesu, aggira yù mepasiránán sangaw megapu sù napiá nga akkuán naw.

<sup>17</sup> Á más napiá nu attamát tam yù jígâ nga umay nittam megapu lâ sù napiá nga akkuát tam, nu yáyù ure ni Namarò, ánnè ta pagattam tam ta jígâ megapu ta pangnguá tam ta naráké.

<sup>18</sup> Ta nonopan naw si Apu Kesu Kiristu, nga awán bulubugá ta liwâ na,  
ngam inattamán na yù pate na ta kurù.

Á mittán lâ nga natay megapu nittam ngámin nga tatolay.

Á yáyù nga aringín bulubugá matay.

Ta kustu nen yù pagikáru na ta liwiluwâ tam,  
tapè pakkápiá na ittam kâ Namarò.

Aggina yù kuruk nga napiá ánná matunung,  
nga netapil megapu nittam ngámin nga nakaliwâ.

Á yù baggi na lâ yù natay,  
ngam matolay paga yù ikararuá na.

<sup>19</sup> Á minay yù ikararuá na sù gián nayù ira ikararuá nayù ira námmatay nga nebáluk, ta en na inilayalayâ yù bilin ni Namarò nira.

<sup>20</sup> Á yù ira námmatay, aggira yù ngaw ira nga ari nanguruk kâ Namarò ta keggá ri Lákay Noe. Á si Namarò, nabayák nga nagattam nga nagiddak sù ira tatolay, abernu manguruk ira. Á kabalín di Noe nga nappadday ta dakal nga barangay, baddì lâ yù ira nanguruk, nga

\* 3:12 Salmo 34:12-16

neyígù nga ari natay ta danum. Walu ira lâ nga nanguruk, nga simillung sù barangay, nga limittâ ta utun na danum ta kalítù na dabbuno.

<sup>21</sup> Á kunnay ta keyígù da, nga nelillî ta dakal nga danum, kunnian gapay yù keyarigán nayù keyígù tam. Ta makirigù ittam, nga panákkilalán ta keyígù tam. Á yù kebalinán na ari yù kapakarenu nayù baggi tam, ngam yù pangipasingat tam ta pabbabáwi tam ta liwiliwâ tam ánnâ yù kelilli tam sù pamagikárû ni Namarò. Á yáyù nga pinakomá na ittamin megapu sù paginnanole ni Apu Kesu Kiristu, á awán ta ipappasirát tam ta arubâng ni Namarò.

<sup>22</sup> Á nattoli si Apu Kesu ta lángì, nga nagitubang ta pagitubangán nayù maráyaw nga mammaguray nga ajian ta jiwanán ni Namarò. Á tumulù kuna yù ira ngámin nga daroban na ánnâ yù ira ngámin nga makáwayyá.

## 4

### *Ipasigaggà tam yù Pangikatalà tam kâ Apu Kesu Kiristu*

<sup>1</sup> Á gapu ta inattamán ni Apu Kesu yù panigirigâ da kuna ta keggá na ta dabbuno, á yáyù nga paránat tam yù nonò tam ta kunnay ta nonò na, tapè dán nga naparán ittam gapay nga magattam ta jígâ nga umay nittam. Ta yù tolay nga magattam ta jígâ, mepasingan ta panakitán na yù naráké ánnâ pinatukkâ na yù palliwâ na.

<sup>2</sup> Á ari ittam laguk akkuán yù naráké nga karagatán na baggi tam, nga negagángay ta tolay ta dabbuno. Ngam akkuát tam galâ yù ipakuá ni Namarò nittam ta keggá tam paga nga matolay.

<sup>3</sup> Kustu nem! Arán naw akkuán má yù naráké nga kunnay ta kingnguá naw ngaw lage naw nanguruk. Nakáppak kayin nga mangnguá ta kunnay ta kingngi-kingnguá naw ngaw sù ari kayu paga nanguruk kâ Apu. Ta kingnguá naw yù naráké nga kinaragatán naw, ánnâ arán naw garé inigaggak yù baggi naw ánnâ nonò naw. Á nagillellaw kayu, ánnâ pinatturù naw yù naráké nga kingnguá naw ánnâ pappabúyá naw. Á nakimorayán naw ngaw yù ira sináddios, mássiki nu pinappalán na kayu ni Namarò ta arán naw ira pakimorayán.

<sup>4</sup> Á kunangane, nánawán nawin yù ngámin nga naráké nga kustombare naw, á mapállâ sangaw yù ira kábulun naw, gapu ta ari kayu mepulupulu nira nga mamatturuturù sù akkuád da. Á yáyù nga uyu-uyawad da kayu.

<sup>5</sup> Ngam paguráyán naw lâ, ta meyarubâng ira sangaw kâ Namarò nga mamestigá nira, á máwâk nga tabbagad da, ta aggina yù naparán nga mamanunnù nittam ngámin nga matolay paga, ánnâ yù ira námmatay.

<sup>6</sup> Ta yáyù gapu na nga nelayalayâ ngaw yù napiá nga dámak nga meyannung kâ Apu sù ira námmatay, nga natayin yù baggi ra nga napanunnután nga kunnay sù pamanunnù ni Namarò ta ngámin nga tatolay ta meyannung sù kingnguá ra. Á nu manguruk ira, mepattolay ira kâ Namarò megapu sù Ikaranuá na.

### *Yù Ipuakuá ni Namarò nittam Lage na Pattoli ni Apu*

<sup>7</sup> Duttálín yù pagáddekan na ággaw. Á yáyù nga máwâk tam nga imugurán yù nonò tam ánnâ yù akkuát tam, tapè ajian yù awayyá tam nga makimállâ kâ Apu.

<sup>8</sup> Á yù olu nga akkuát tam laguk, makkaká-iddi-iddù ittam. Ta nu napasigaggà yù pakkaká-iddù tam, á pakomát tam laguk yù ira kábulut tam ta aru nga pakaliwatád da.

<sup>9</sup> Á napiá nu magayáyâ ittam nga mamaddulò sù ira nga umay ta bale tam, nga ari mabbábâng nga mangilágum nira.

<sup>10</sup> Á sittam nga katággítáddy yù iniddán ni Namarò ta pakáwayyá na. Á yáyù nga máwâk tam nga iyusá yù pakáwayyá tam ta pangabbák tam sù ira kábulut tam, nga kunnay tamekatalà nga masserbi kâ Namarò.

<sup>11</sup> Á ta ángngarigán, nu ajian nikayu yù tolay nga iniddán ni Namarò ta pakáwayyá na nga mangilayalayâ, á máwâk na laguk ilayalayâ ta napiá yù bilin ni Namarò. Onu yù tolay nga iniddán ni Namarò sù pakáwayyá na nga mangabbák, á iyusá na laguk yù sikan na baggi na nga neyawâ kuna ta pangabbák na sù ira kábulun na. Á maguray lâ yù ipakuá ni Namarò nittam, akkuát tam lâ ta napiá, tapè meparáyw si Namarò megapu kâ Apu Kesu Kiristu, nga maddalingárang nga kotunán nga mammaguray ta áddè ta áddè. Ammán.

### *Yù Pagattam tam ta Jígâ megapu ta Pangikatalà tam kâ Apu Kesu*

<sup>12</sup> Wáwwagi nga iddukak ku, ari kayu mapállâ sù jígâ nga umay nikayu. Ta negagángay ta marigirigâ ittam ngámin nga manguruk kâ Apu. Á máwâk nga maparubán tam yù jígâ, tapè mepasingan ta napasigaggà yù ángnguruk tam kâ Namarò.

<sup>13</sup> Ngam magayáyâ kayu nu attamán naw yù jigâ nga umay nikayu, gapu ta kunnay ta mesipâ kayin kâ Apu Kesu Kiristu sù pagattam na ta jigâ, tapè mepagayáyâ kayu gapay kuna, sangaw nu manoli, nga mangipalappâ sù paddalingárang na ánnna karáyo na.

<sup>14</sup> Á nu iluddè da kayu ánnna uyu-uyawad da kayu megapu ta ángnguruk naw kâ Apu Kesu Kiristu, magayáyâ kayu, ta yáyù panákkilalán ta ajjan nikayu yù Mangilin nga Ikararuú ni Namarò nga kotunán.

<sup>15</sup> Á nu attamán naw yù jigâ, ari nakuan megapu ta pangnguá naw ta narákè, nga kunnay ta mampatay, makkokò, onu mabbebbek.

<sup>16</sup> Ngam nu marigirigâ ittam megapu sù panguruk tam kâ Apu Kesu Kiristu, ari ittam mepasiránan. Dayawat tam galâ si Namarò gapu ta tatole na ittam.

<sup>17</sup> Á duttálín yù pamanunnù ni Namarò, nga mamegapu nittam nga tatole na nga manguruk kuna. Á nu sittam nga manguruk kuna yù mapolu nga panunnután na, anni panò yù mesimmu sù ira nga manakì nga manguruk sù napiá nga bilin na? Nerallà sangaw yù pamagikáru ni Namarò nira.

<sup>18</sup> Á kunnian yù kebalinán nayù netúrâ sù bilin ni Namarò, nga kun na,  
“Á nu marigirigâ yù ira napiá nga tatolay nga tumulù kâ Namarò, gapu ta pattuddu na nira,  
tapè meyígù ira,

á anni laguk yù mesimmu sù ira nga manakì kuna ánnna yù ira ari makimoray kuna?”\*

<sup>19</sup> Á yáyù nga sittam ngámin nga marigirigâ megapu sù ure ni Namarò, á magattam ittam laguk nga ari mapállâ. Á uputat tam yù napiá nga akkuát tam, ánnna ikatalà tam yù baggi tam kâ Apu nga namarò nittam, ta aggina yùmekatalà.

## 5

### *Yù Initaddán ni Eduru sù ira Karakalán*

<sup>1</sup> Á ajjan gapay yù kagiak ku nikayu nga karakalán. Ta sikán gapay yù kagittá naw nga karakalán, nga manaron sù ira káruán nga wáwwagi tam nga manguruk, nga kunnay ta mináppárak ta karneru. Á nasingak ku yù pangiyangngâ ni Apu Kesu Kiristu. Á sikán gapay yù tádday nga mesipâ kâ Apu Kesu sangaw nu mepalappâ nga maddalingárang nga maráyaw.

<sup>2</sup> Á yawe yù itabarang ku nikayu. Taronán naw laguk yù ira tatolay nga inikatalà ni Namarò nikayu, nga kunnay ta karneru na. Á napiá nu magayáyâ kayu nga manaron nira, nga ari napuersá, nga ari gapay megapu ta pakkaragâ naw ta ganánsiá naw. Ngam malláppâ kayu nga manaron nira megapu galâ sù ayâ naw nga masserbi kâ Namarò.

<sup>3</sup> Á sittam nga karakalán, ari ittam nakuan kitarok, ngam ipasingan tam sù ira taronát tam yù napiá nga nonò tam ánnna ággangnguá tam, tapè mapiá nu párigád da ittam.

<sup>4</sup> Á nu napiá ittam nga minánnaron, á sangaw nu mattoli yù Kotunán nga Minánnaron, alawatat tam yù mannanáyun nga ipabbalabálâ na nittam, ta mesipâ ittam kuna sù karáyo na ta áddè ta áddè.

<sup>5</sup> Á ajjan gapay yù kagiak ku nikayu nga urián. Tumulù kayu sù ira karakalán naw. Á mássiki sittam ngámin, makkákátulù ittam, gapu ta ajjan yù netúrâ sù bilin ni Namarò, nga kun na,

“Kontarán ni Namarò yù ira mappeddaráyaw.

Ngam ikákkállâ na yù ira tumulù.”\*

<sup>6</sup> Á sittam ngámin, tumulù ittam laguk kâ Namarò, tapè mepotun ittam sangaw nu duttál yù ággaw nga piníli na.

<sup>7</sup> Á ikatalà tam kâ Namarò yù ngámin nga ikaburung tam, ta aggina yù manaron nittam.

<sup>8</sup> Á mappalán kayu, ta ajjan si Satanas, nga ari magimammâ nga magala-alek ta awayyâ na nga mangnguá nittam, nga kunnay sù mabisin nga layon nga magalugù ta gábbuátan na nga kanan na.

<sup>9</sup> Á ari kayu laguk tumulù kâ Satanas, ngam ipasigaggâ naw yù ángngikatalà naw kâ Namarò. Ta ammu tam ta negittá yù jigâ tam sù jigâ nga attamán nayù ira káruán nga wáwwagi tam nga maggián sù ira makkakerumá nga lugár.

<sup>10</sup> Á mabì lá yù pangiyangngâ tam ta jigâ. Á pappasá na, pammapián ni Namarò yù ággí tam. Ta si Namarò yù minángngikállâ, á inagálán na ittam ta mepattatáddyit tam kâ Apu Kesu Kiristu, tapè mesipâ ittam gapay kâ Namarò, nga meparáyaw ta áddè ta áddè. Á yáyù nga abbágán na ittam ánnna passikanan na ittam, tapè mapasigaggâ yù ángnguruk tam kuna.

<sup>11</sup> Mammaguray si Namarò ta áddè ta áddè! Á mapalurò ngámin! Ammán.

<sup>12</sup> Á si Silas yù nangabbák nikán ta pattúrâ ku sawe ababbá nga túrâ ku nikayu. Aggina yù wagi tam nga mekatalà. Á nattúrákà nikayu, tapè tabarangát takayu, ta ipasigaggà naw yù ángngikatalà naw kâ Namarò, ta kuruk yawe nga kinagi nikayu nga meyannung su allà ánnna ángngabbák ni Namarò nittam.

<sup>13</sup> Á yù ira wáwwagi naw sawe Babilonia,<sup>†</sup> nga piníli na gapay ni Namarò, manonò da kayu ánnna iyabbû da nu kunnasi kayu gapay. Á kunnian gapay yù kagian ni Markus, nga anâ ku.

<sup>14</sup> Á makkaká-iddù kayu laguk. Á parè bì ta pagimammatan ni Namarò sikayu ngámin nga mepattatádday kâ Apu Kesu Kiristu, tapè napiá yù áaggián naw. Yáyù lâ yù áddè nayù kagiak ku.

---

<sup>†</sup> **5:13** Yù nelímak nga kebalinán na Babilonia támma yù ili na Roma.

## Yù Mekaruá nga Túrâ ni Eduru

*Yù Meyannung sawe Mekaruá nga Túrâ ni Eduru*

Yawe yù mekaruá nga túrâ ni Eduru sù ira ngámin nga manguruk kâ Apu Kesu, á kagian na nira ta mappalán ira sù ira mattá-ábbilinán áんな yù ira appé pípiá nga umay mangituddu ta tanakuán nga ari yù kuruk nga bilin ni Namarò, tapè ari ira melogò nga mangnuá ta naráké.

Á kagian na gapay yù itabbák da sù ira nga makkagi ta ari manoli si Apu Kesu, ta kukurugán nga manoli sangaw nu duttál yù ággaw nga sinullá ni Namarò, ngam ipappánná ni Namarò lâ nga iddagán yù pabbabáwi ra ta liwâ da nayù ira maporián nga umay mangikatalà kuna, tapè mesipà ira gapay kuna.

*Yù Mayán nayù Túrâ*

Yù Paddios ni Eduru áんな yù Pakimállà na (1:1-2)

Yù Ipakuá ni Namarò sù ira Manguruk kuna (1:3-15)

Yù Káráyo ni Apu Kesu Kiristu (1:16-21)

Yù Pamagikáru ni Namarò sù ira Mangituddu ta Siri (2:1-22)

Kuruk nga Manoli sangaw si Apu Kesu Kiristu (3:1-18)

<sup>1</sup> Sikán si Eduru, nga aripan ni Apu Kesu Kiristu, nga sinullá na ta umay mangilayalayâ sù bilin na. Á mattúrákà nikayu nga mangikatalà kâ Apu Kesu Kiristu, nga Yápu tam nga mangiyígù nittam, sikayu ngámin nga neddán ta ángngikatalà na nga negittá sù ángngikatalà mi, megapu sù katunung nayù Yápu tam.

<sup>2</sup> Á paré bì ta ikákkálà na kayu ni Namarò, áんな pagimammatten na yù nonò naw, tapè napiá yù ággigian naw áんな gagawagáyán naw, megapu sù pakánnámmu naw kári Namarò kâ Apu Kesu Kiristu nga Yápu tam.

*Yù Ipakuá ni Namarò sù ira Manguruk kuna*

<sup>3</sup> Á megapu sù pakáwayyá ni Namarò, iniyawâ na nittam yù ngámin nga máwák tam, tapè makáwayyá ittam mamalurò sù ngámin nga napiá nga ipakuá na nittam. Á abbágán na ittam gapu ta ikatalà tam si Apu Kesu Kiristu nga Yápu tam, nga magágál nittam ta manguruk kuna, tapè mesipà ittam sù karáyo na áんな yù kapiánán na.

<sup>4</sup> Á yáyù nga iniyawâ na nittam ni Namarò yù napiá nga initabbá na nittam, tapè mepagittá yù nonò tam sù napiá nga nonò na, áんな ari ittam laguk makagumán nga mangnuá ta naráké nga kunnay ta akkuán nayù ira nga ari manguruk megapu sù naráké nga karagatád da.

<sup>5</sup> Á gapu ta makáwayyá si Namarò nga mangabbák nittam, malláppà ittam laguk nga mamalurò sù napiá nga ipakuá ni Namarò nittam, tapè mepasinan yù ángngikatalà tam kuna megapu sù napiá nga akka-akkuát tam. Á malláppà ittam nga magginná sù bilin ni Namarò, tapè malannapán yù kánnámmuát tam áんな ammu tam gapay yù mappíli sù napiá.

<sup>6</sup> Á yawe gapay yù akkuát tam. Gaggarát tam yù nonò tam, tapè arát tam nononotan yù naráké nga karagatán na baggi tam. Ta nu itulù tam yù nonò tam kâ Namarò, mapasigaggá yù ángngikatalà tam kâ Apu Kesu, á mangáppípiá laguk yù ákkiyápu tam kuna.

<sup>7</sup> Á nu napiá yù ákkiyápu tam kâ Apu, ajan yù awayyá tam gapay nga makkák-ayâ áんな makkáká-iddù, sittam nga mawwawági megapu sù panguruk tam, á iddukát tam gapay yù ira ngámin nga ari paga manguruk.

<sup>8</sup> Á nu uputat tam yù kunnian nga napiá nga nonò tam áんな ággangnuá tam, á mepasinan ta napiá yù pabbalinán nayù ásserbi tam kâ Apu Kesu Kiristu, megapu sù pakánnámmu tam áんな pakiyápu tam kuna.

<sup>9</sup> Ngam yù tolay nga ari mangupù sù napiá nga kunnian, kunnay ta buling, ta arán na kánnámmuán yù napiá nga ituddu ni Apu, áんな náttamán na yù pamakomá ni Namarò sù liwâ na.

<sup>10</sup> Á yáyù, kákkopuk ku, malláppà ittam laguk nga mamalurò sù ngámin nga napiá, tapè mepasinan ta kuruk nga piníli ni Namarò ittam, áんな inagálán na ittam ta mabbáli ittam ta tatole na. Ta nu uputat tam yù napiá nga ipakuá na nittam, ari ittam mekanâ sù ira nga mangnuá ta naráké, áんな arát tam bulubugá melingun yù ákkiyápu tam kâ Apu Kesu.

<sup>11</sup> Á ta kunnian, ari ittam mepasiránán, ta ayatán si Namarò nga mamaddulò nittam sangaw sù mannanáyun nga pammagurayán ni Apu Kesu Kiristu nga Yápu tam nga mangiyígù nittam.

<sup>12</sup> Á yáyù nga talákkurugak ku nga sigídá nga ipanonò nikayu ngámin dannian nga kinagi nikayu, mássiki nu ammu nawin gemma, ánnna nápasigaggà yù ángnguruk naw sù napiá nga kánnámmuán naw.

<sup>13</sup> Á napiá ta urè nu uputak ku nga ipanonò nikayu dannian ta keggá nga matolay paga ta utun na dabbun.

<sup>14</sup> Ta ammù ta mabikakin matay, ta yáyù inipakánnámmu ni Apu Kesu Kiristu nikán.

<sup>15</sup> Á yáyù nga mattúrákà kunangan, á sangaw nu awánakin, ajian yù awayyá naw nga manonò yù ngámin nga inituddù nga meyannung sù panguruk tam.

### *Yù Karáyo ni Apu Kesu Kiristu*

<sup>16</sup> Á sikami nga kapulupulù na ngaw ni Apu Kesu Kiristu, inipakánnámmu mi nikayu yù pakáwayyá na ánnna yù panoli na sangaw ta dabbuno. Á yù inipakánnámmu mi, ari gemma bídá nga nonotam mi. Ngam kuruk nga nasingam mi lápay yù dalingáráng na.

<sup>17</sup> Ta ajian kami ngaw nga nepulù kâ Apu Kesu ta keggá na ta utun na puddul, ta pangipalappâyayá na ta karáyo na ánnna dalingáráng na. Á nagubobuk yù ngárál ni Namarò nga naggapu ta lángì, á kinagi na, "Yawe yù Aná ku, nga iddukak ku, á ayatána kuna," kun na.

<sup>18</sup> Á naginná mi yù kinagi nayù ngárál nga naggapu ta lángì, ta ajian kami nga nepulù kuna sù utun nayù mangilin nga puddul.\*

<sup>19</sup> Á gapu ta pakasingam mi sù dalingáráng na ánnna pakaginná mi sù ngárál ni Ammó Namarò, á yáyù nga nápasigaggà yù ángnguruk mi ta kuruk yù bilin ni Namarò nga inipetúrá na sù ira ngaw ábbilinán na. Sù ngaw nga nabayák lage na minay si Apu Kesu nga neyanâ, á kinagi ra yù ánge na nga mammaguray. Á napiá nu tángngagan naw laguk yù bilin ni Namaro, tapé manawagán yù nonò naw. Ta yù bilin na yù kunnay ta isingan nga maggatang sù nakallà nga gián ta áddè ta alippánnawák. Á sangaw nu umay si Apu Kesu, aggina yù mamannawák ta nonò naw, nga kunnay ta yù darámmagan nga luttuák ta alippánnawák.

<sup>20</sup> Á yawe laguk yù mapolu nga kánnámmuán naw. Awán ta tolay nga makánnámmu sù kebalinán nayù bilin ni Namarò nga iniyubobuk nayù ira ábbilinán na, nu awán ta ángngabbák ni Namarò kuna.

<sup>21</sup> Á awán bulubugá ta tolay nga makalabbun sù ari paga nesimmu. Á awán ta ábbilinán nga ninonò na lápay yù bilin na. Ngam yù Mangilin nga Ikararuá ni Namarò, inipakánnámmu na sù ira ábbilinán ni Namarò yù bilin na nga iniyubobuk da.

## 2

### *Yù Pamagikáru ni Namarò sù ira Mangituddu ta Siri*

<sup>1</sup> Á sù ngaw nga nabayák, jmittál gapay yù ira áppè ábbilinán nga arán na jinok ni Namarò. Á kunnian gapay sangaw, duttál nikayu yù ira tatolay nga makkagi ta aggira yù ábbilinán ni Namarò, ngam ari kuruk, ta massirisiri ira. Á ituddù ra yù ari kuruk, tapé dalárad da yù ángnguruk naw kâ Apu. Á panakitád da si Apu Kesu Kiristu nga Yápu ra nga nagikáru ta liwâda. Ngam ikáddagâ lâ sangaw yù pamagikáru ni Namarò nira.

<sup>2</sup> Á aru yù ira kábulun naw nga manguruk sù ira massiri, ánnna párigád da yù narákè nga ággangnguá ra. Á gapu ta masingan nayù ira káruán nga tatolay ta narákè yù akkuán nayù ira kábulun naw nga makkagi ta si Apu yù tuttulad da, á iluddè nayù ira káruán yù bilin nga meyannung kâ Apu, ta kagiad da garè ta yáyù gapu nayù narákè nga ággangnguá ra.

<sup>3</sup> Á gapu ta mokkuk ira ta kuártu, aru yù siri nga ituddu ra, tapé ilogò da kayu ánnna pagganánsiád da kayu. Ngam dán nga naparán yù pamagikáru ni Namarò nira, ta ammu na ngámin yù akka-akkuád da, á pagikaruan na ira sangaw nu duttál yù pamanunnù na nira.

<sup>4</sup> Á ammu tam ta kuruk nga mapalurò yù pamagikáru ni Namarò sù ira nga mangnuá ta narákè, ta mássiki yù ira ngaw daroban ni Namarò ta lángì nga nalliwâ, arán na ira inikállà, ta inipetabbâ na ira sù nálaranm nga abbû ta gián na impiernu, á napukù ira tán, sù nakallà nga gián, nga magiddak sù pangukum na nira.

<sup>5</sup> Á kunnian gapay sù ira ngaw tatolay nga namotu kâ Namarò ta keggá ra ngaw di Lákay Noe, ta arán na ira inikállà ni Namarò gapay. Ta jinok ni Namarò yù urán, á nagurán ta appátapulu nga ággaw, á nalítù yù ngámin nga dabbuno, á natay yù ira ngámin nga minálliwâ.

\* <sup>1:18</sup> Ta meyannung sù kesimmu na, bibbiram mu Mattiu 17:1-9; Markus 9:2-10; Lukas 9:28-36

Ngam si Noe, lage na kalítù na dabbuno, aggina yù nangilayalayâ sù kuruk nga bilin ni Apu Namarò. Á si Noe lâ ánnna yù ira pitu nga kábulun na yù iniyígù ni Namarò.

<sup>6</sup> Á arán na inikállà ni Namarò yù ngaw ira darakal nga ili na Sodoma ánnna Gomorra. Sinuggi ni Namarò yù ira ili ta pamagikáru na sù ira ngaw tatolay nga naggián tán. Á natábbunána ira ta abu, tapè ipasingan ni Namarò yù ámmagikáru na sù ira mamotu kuna, nga mangigagángay nga mangnguá ta narákè.

<sup>7</sup> Ngam si Lot, nga nakipaggián sù ira taga Sodoma ánnna taga Gomorra, inilillì ni Namarò ta pamagikáru na sù ira kelián na, gapu ta napiá nga tolay si Lot, nga naturá sù narákè nga kingnguá nayù ira kelián na, ánnna yù pamotu ra kâ Namarò ánnna yù jikkù nga ággangnguá ra.

<sup>8</sup> Ta napiá nga tolay si Lot, á ta pakipaggián na sù ira taga Sodoma ánnna taga Gomorra, á nabagabagal ta kággágaw megapu sù nasingan na ánnna naginná na nga narákè nga kingnguá nayù ira kelián na.

<sup>9</sup> Á gapu ta pangiyígù ni Namarò kári Noe ánnna yù pangiyígù na gapay ngaw kári Lot, á mepasingan ta makáwayyá si Namarò nga mangabbák, á iyígù na yù ira tatolay nga manguruk kuna nu marigirigâ ira. Á mepasingan gapay ta makáwayyá si Namarò nga mamukù ánnna mamagikáru sù ira narákè, áddé ta duttál yù pangukum na níra.

<sup>10</sup> Á nepatalugáring sù ira nga ari bulubugá nga makáppak ta narákè, ánnna yù ira nga mangiluddè sù makáwayyá nga mammaguray nira, á mappanà yù pamagikáru ni Namarò nira.

Á yù ira áppè ábbilinán nga mangituddu ta ari kuruk, mappeggung ira ánnna ari ira maganássing, á pakkakagiád da yù ira makáwayyá nga maddalingaráng nga maggián ta lángi.

<sup>11</sup> Ngam yù ira daroban ni Namarò, mássiki nu masikan ánnna makáwayyá ira ánnè sù ira áppè ábbilinán nga makkakagi nira, á arád da ira pakkakagián ta arubáng ni Namarò.

<sup>12</sup> Á yawe ira mattá-ábbilinán nga mangituddu sù ari kuruk, akkuád da lâ yù narákè nga negagángay nira, ánnna uyu-uyawad da yù arád da kánnámmuán. Meyárik ira ta simaron nga ayám nga awán ta nonò na, nga masikuatán sangaw. Á mapapátag ira gapay nga kunnay ta simaron nga ayám.

<sup>13</sup> Á iyangngà da laguk yù bálà nayù narákè nga kingnguá ra.

Danniaw ira nga mangilogò, ipagayáyâ da yù narákè nga akkuád da nga arád da kakáppak, mássiki nu ággaw. Á nu umay ira mepaggagammung nikayu nga mepakkákán, mepásiranán kayu megapu sù narákè nga akkuád da ánnna ibuyubuyá ra.

<sup>14</sup> Á awán ta nonotad da nu ari lâ yù ira bábbay nga masingad da, nga karagatád da ira karallawan, ta ari ira bulubugá makáppak. Á makikopun ira sù ira nga makapi yù ángnguruk da, tapè makagumán ira nga mepulù nira nga mekanakaná nga mangnguá ta narákè. Á kitakikkì ira nga kitokkuk. Ngam dán nga naparán yù pamagikáru ni Namarò nira!

<sup>15</sup> Á mássiki nu ammu ra ngaw yù kuruk nga bilin ni Namarò, á nekáttuay ira sù napiá nga netuddu nira, á nagawáwán ira. Pinárigád da yù kingnguá nayù ngaw ábbilinán ni Namarò, nga si Balam nga aná ni Biyor. Kinaragatán ni Balam yù kuártu nga iyawâ na patul kuna nu akkuán na yù narákè.

<sup>16</sup> Ngam jinok ni Namarò yù umay maggammá kâ Balam. Ta yù ayám na nga dongki nga nakkabayuán na, aggina yù naggammá kuna. Nagubobuk yù dongki ta ngárál na tolay, á gimmá na si Balam sù kaloku na.

<sup>17</sup> Á yù ira áppè ábbilinán, meyárik ira ta wek nga nábbatán, ta awán ta napiá nga naggapu nira. Á mattá-iki-ikáyâ ira gapay, nga kunnay ta angà nga ipayapayák na paddák. Á dán nga naparán yù paggianád da nga pinarán ni Namarò sù kakallatán nga gián.

<sup>18</sup> Á kitabángák ira nga mappeddaráyaw, ngam ubobugad da lâ yù awán ta serbi na. Á megapu sù negagángay nga karagatád da, yáyù nga kagumánad da ta mepulù nira yù ira bagu nga manguruk nga mággè ari melillì sù narákè nga akkuád da, tapè toliad da yù nilikuranád da.

<sup>19</sup> Ta itabbá ra nira ta arád da mówák nga manuppál sù tunung, ngam ajian yù awayyá ra nga akkuán yù maguray lâ nga ikáyâ da, gapu ta kunnay ta mapalubbáng ira. Ngam yù ira nga mangituddu ta kunnian, aggira yù kunnay ta aripan, gapu ta pakiaripanád da yù narákè nga karagatád da nga makapatulù nira, á awán ta awayyá ra nga mappíli sù napiá.

<sup>20</sup> Á yù tolay nga mangikatalà kâ Apu Kesu Kiristu nga mangiyígù nittam, nallikuránán nen yù narákè nga ággangnguá na. Á ta ángngarigán, nu tolian na galâ sangaw yù narákè nga ággangnguá na, á mappanà laguk yù narákè nga akkuán na ánnè sù napolu nga ággíán na lage na nangikatalà, gapu ta kánnámmuán na yù napiá, ngam sinoli na yù narákè.

<sup>21</sup> Á más napiá nakuan nu arán na narámak yù napiá nga ituddu ni Apu Kesu Kiristu, ánnè ta pallikuránán na yù mangilin nga taddán ni Namarò nga nepakánnámmu kuna.

<sup>22</sup> Á yù tolay nga kunnian yù akkuán na, aggina yù keyarigán nayù kuruk nga dán nga nakagi, nga kun na,

“Yù ítu nga magutá, tolian na nga kanan yù iniyutá na.

Á kunnay gapay sù bábi nga narigù, nga mattoli nga umay mallúráng ta lupè.”\*

### 3

#### *Kuruk nga Manoli sangaw si Apu Kesu Kiristu*

<sup>1</sup> Kákkipuk ku, nga iddukak ku, yawe yù mekaruá nga túrâ ku nikayu. Á kunnay sù napolu nga initúrâ ku, ipanonò ku nikayu mángin yù meyannung sù napiá nga ammu nawin, tapè nonotan naw lâ yù napiá.

<sup>2</sup> Á ikáyâ ku ta arán naw káttamán yù kinagi ra ngaw nayù ira ábbilinán ni Namarò. Á nonotan naw gapay yù taddán nayù Yápu tam nga mangiyígù nittam, nga inipakánnámmu ra nikayu nayù ira olu nga minángngilayalayâ nga sinullâ na.

<sup>3</sup> Á yewe yù mapolu nga mágwak naw nga kánnámmuán. Nu maddaggunin yù panguriánán na ággaw, duttál yù ira tatolay nga tumuttul ta narákè nga karagatán na baggi ra. Á uyu-uyawad da sikayu nga manguruk kâ Apu.

<sup>4</sup> Á arád da kurugan yù initabbá ni Namarò nga panoli ni Apu Kesu. Á panguyo ra nikayu, á kud da, “Iso gián ni Kesu Kiristu? Arán na panò ngaw initabbá ta manoli sangaw? Ngam ari paga nappasingan! Á natayin yù ira ngaw naggaká nittam, ngam ari napatalián yù ággigián na dabbuno ta áddè ngaw ta kaparò na ta áddè kunangane!” kud da.

<sup>5</sup> Á yáyù kagiad da gapu ta panakitád da yù pakáwayyá ni Namarò, á arád da nonotan yù pinalurò na ngaw ni Namarò megapu lâ sù pagubobuk na. Ta góri, lage na o-olu nga ággaw, nagubobuk si Namarò, á pinarò na yù lángi. Á pidde na yù dabbuno megapu sù danum, ta pinalattuák na yù dabbun nga naggapu ta danum megapu sù pagubobuk na.

<sup>6</sup> Á pamanunnù na ngaw ni Namarò sù ira ngaw tatolay, nagubobuk má, á inipalítù na yù danum ta dabbuno. Á natay yù ira ngaw tatolay sù kalítù na dabbuno.

<sup>7</sup> Á megapu sù panaddán ni Namarò, aijan paga yù lángi ánnà yù dabbuno, nga maggián nga magiddak áddè ta katuggi ra sangaw. Ta kinagi ni Namarò ta matuggi yù lángi ánnà yù dabbuno sangaw nu duttál yù pamanunnù na ánnà pangukum na sù ira tatolay nga ari makimoray kuna.

<sup>8</sup> Á sikayu nga kákkipuk ku nga iddukak ku, arán naw káttamán yawe nga ipanonò ku nikayu. Tangággaw yù kunnay ta maribu nga dagun ta panagenà ni Namarò, ánnà maribu nga dagun yù kunnay ta tangággaw.

<sup>9</sup> Á aijan yù ira manguyaw, nga kagiad da ta pinaguráyán ni Apu Kesu yù initabbá na, gapu ta nabayágìn, á ari paga nanoli. Ngam ari gemma kuruk nga nabayák si Apu nga mamalurò sù initabbá na. Ngam ipappánná na, gapu ta arán na ikáyâ ta magíkárú yù mássiki tádday ta impiernu, gapu ta ikáyâ na lâ ta mabbabáwi yù ira ngámin nga tatolay ta liwiliwâ da, tapè meyígù ira.

<sup>10</sup> Ngam kuruk nga manoli si Apu Kesu. Á ikáddagâ lâ yù panoli na, nga kunnay ta dattál nayù makkokó. Álummà yù lángi sù api, nga megiddán ta kitasikan nga gurù. Á malunák sù api ánnà lummà yù ngámin nga aijan ta lángi. Á megiddán gapay yù katuggi nayù dabbuno ánnà ngámin nga eggá kuna.

<sup>11</sup> Á gapu ta kunnian yù pagáddekan na ággaw ánnà yù lummà na ngámin nga masingat tam, á anni laguk yù akkuát tam nakuan? Mágwak nga pakimorayát tam si Apu Namarò, ánnà akkuát tam lâ yù napiá nga ipakuá na nittam.

<sup>12</sup> Á magiddak ittam nga mapattû nga makkaragâ sù ággaw nga panoli ni Apu. Á malláppà ittam nga mamalurò ta ngámin nga ipakuá na nittam, tapè mabi lâ nga manoli. Ta sangaw nu duttál yù ággaw nga panoli na, maggatang yù lángi ánnà malunák, á matuggi ta api yù ngámin.

<sup>13</sup> Ngam arát tam ikássing yù ággaw nga panoli na, ta iddanamát tam yù initabbá ni Namarò nittam, nga bagu nga lángi ánnà bagu nga dabbun nga kesipatát tam. Á matunung ánnà mapiá yù ngámin nga maggián tán, ta awán bulubugá ta jikkú onu narákè tán.

<sup>14</sup> Á kákkipuk ku, nga iddukak ku, gapu ta magiddak ittam sù panoli nayù Yápu tam, á malláppà kayu laguk nga mangnguá lâ sù napiá, maraké mepasiránán kayu ta arubáng na

sangaw nu lubbè, nu maratang na kayu nga malliwâ. Akkuán naw laguk yù napiá, tapè mapiá yù ággíán naw ánnna magimammà yù nonò naw.

<sup>15</sup> Á nonotan naw yaw, ta ipappánná na bì ni Apu yù ánge na, gapu ta ikáyâ na nu ajjan paga yù awayyá nayù ira tatolay nga mabbabáwi ta liwiliwâ da, tapè meyígù ira. Á si Pablo, nga wagi tam nga iddukat tam, kunnian gapay yù kinagi na sù túrâ na nikayu, ta yáyù yù kuruk nga inipakánnámmu ni Namarò gapay kuna.

<sup>16</sup> Á sù ira ngámin nga túrâ ni Pablo, kinagi na yù meyannung sù panoli ni Apu. Á marigâ nga mánnámmuán yù káruán nga kinagi ni Pablo. Á yù ira tatolay nga ari makánnámmu sù kuruk nga bilin ni Namarò, nga mabbábâng sù ángnguruk da, pataliád da garè yù kuruk nga kebalinán nayù ituddu ni Pablo, nga kunnay ta panáli ra gapay sù ira káruán nga inipetûrâ ni Namarò. Á mekanakanâ ira sù pamagikáru ni Namarò megapu sù akkuád da.

<sup>17</sup> Á sikayu nga kákkopuk ku nga iddukak ku, ammu nawin ta ajjan yù ira mangituddu, nga ari kuruk yù ituddu ra. Á mappalán kayu laguk nira. Ari kayu metáddy nira, marakè mekáttuay kayu sù napiá nga ángnguruk naw, á mabbábâng kayu ta meyannung sù ággíán naw kâ Namarò.

<sup>18</sup> Uputan naw lâ yù ákkiyápu naw kâ Apu Kesu Kiristu nga Yápu tam nga Mangiyígù nittam, tapè malannapán yù kánnámmuán naw nga meyannung sù pangikállâ na nikayu. Dayáwat tam si Apu Kesu kunangan, á parè bì ta meparáyaw ta áddé ta áddé! Ammán!

## Yù Olu nga Túrâ ni Kuan

### Yù Meyannung sù Túrâ

Yù nattûrâ sawe si Kuan, nga tádday sù ira mapulu duá nga sinudduán ni Apu Kesu. Á lakalákayin ta pattûrâ na sù ira tallu nga túrâ na. Á initubbuk na yawe túrâ na sù ira iddukan na nga mangikatalà kâ Namarò ta ngámín nga giád da. Á kinagi na nira ta magimuguk ira, maraké mesinná ira kâ Namarò, nu kurugad da yù kagian nayù ira mangituddu, nga ari kuruk yù ituddu ra.

Ta ajjan ngaw yù ira mappassapassiár nga mangituddu ta tanakuán nga ari kuruk, nga kunnay nga ajjan ta ággawo. Á kinagi ra ta narékè yù ngámín nga ajjan ta dabbuno. Á kinagi ra gapay ta ari kuruk nga tolay si Apu Kesu Kiristu, ánnna ari kuruk nga Anâ ni Namarò. Á kinagi ra ta arád da máwák nga mabbabáwi ta liwiliwâ da ánnna ari máwák nga makkaká-iddu ira, ta ajjan yù awayyá nayù ira tatolay nga katággitáddyay nga maguray lâ yù akkuán na.

Á yáyù gapu na nga initûrâ ni Kuan, tapè ipakánnámmu na yù kuruk, tapè awán ta tolay nga melogò. Á inibukalán na ta kuruk nga Anâ ni Namarò si Apu Kesu nga naggapu ta lángì, nga nabbáli ta tolay nga minay ta dabbuno. Á kinagi na gapay nittam ngámín nga tatolay nga mangiddù kâ Apu Namarò ta máwák tam nga akkuán yù napiá nga ipakuá ni Namarò nittam, nepatalugáring sù pakkaká-iddu tam.

### Yù Mayán nayù Túrâ

Yù Bilin nga Meyannung sù Manotolay (1:1-4)

Si Namarò yù Mamannawák ta Nonò tam (1:5-10)

Si Apu Kesu Kiristu yù Mamakkápia nittam kâ Namarò (2:1-6)

Yù Bagu nga Taddán ni Apu Kesu (2:7-11)

Yù Áaggián nayù ira Mangikatalà kâ Apu Kesu (2:12-17)

Mappalán ittam sù Mangontará kâ Apu Kesu Kiristu (2:18-29)

Ánnna ittam ni Namarò nga Mangikatalà kâ Apu Kesu (3:1-10)

Yawe yù Itaddán ni Apu Kesu: Makkaká-iddu kayu (3:11-18)

Mappelò kâ Namarò yù ira Pinabbalin na ta Ánnna na (3:19-24)

Yù Ari Masingan nga Makikontará kâ Namarò (4:1-6)

Sigga-iddu si Namarò (4:7-21)

Appútat tam yù Ngámín nga Mangontará kâ Namarò (5:1-5)

Yù Pangurugát tam ta Ánnna ni Namarò si Apu Kesu Kiristu (5:6-12)

Yù Mannanáyun nga Áttole tam nga Mangikatalà kâ Apu Kesu (5:13-21)

### Yù Bilin nga Meyannung sù Manotolay

<sup>1</sup> Itûrâ ku nikayu yù meyannung kâ Apu Kesu Kiristu, nga manotolay nga mangngágan ta Ubobuk ni Namarò.

Aggina yù pannakasimù ni Namarò nga mangipakánnámmu sù bilin na,  
nga paggapuán nayù mannanáyun nga áttole tam.

Egga nga mannanáyun áddè ngaw gári  
sù awán paga bulubugá ta naparò.

Á ipakánnámmu mi nikayu gapu ta nasingam mi  
ánnna naginná mi yù kinagi na ta keggá na ta dabbuno.

Á yù matá mi lápay yù ánnangam mi kuna,  
ánnna yù limá mi lápay yù ánnangngal mi kuna.

<sup>2</sup> Nappasingan nikami yù manotolay, nga nabbáli ta tolay. Á yáyù nga ilayalayâ mi, ánnna sistiguám mi ta kuruk nga aggina yù paggapuán nayù mannanáyun nga áttole tam. Naggián ngaw nga nepulupulù kâ Ammò Namarò, áddè ngaw lage na pamegapu na ngámín.

<sup>3</sup> Á kagiam mi nikayu yù nasingam mi ánnna naginná mi, tapè mesipà kayu nikami sù pakikopum mi kári Ammò Namarò nga Yáma tam ánnna si Apu Kesu Kiristu nga Anâ na.

<sup>4</sup> Á yáyù gapay yù ipattûrâ ku nikayu, tapè magayáyâ ittam.

### Si Namarò yù Mamannawák ta Nonò tam

<sup>5</sup> Á yawe yù bilin nga naginná mi nga meyannung kâ Apu Namarò, nga inipakánnámmu ni Apu Kesu nikami, á ilayalayâ mi nikayu. Si Namarò yù kun na nawák nga maddalingáráng, nga awán bulubugá ta kallà kuna, gapu ta awán bulubugá ta liwâ na onu narékè kuna.

<sup>6</sup> Á nu kagiat tam ta napiá yù ákkiyápu tam kâ Namarò, ngam narákè galâ yù akka-akkuát tam, massirisiri ittam, ánnna kunnay ittam ta naggián ta kallà, gapu ta arát tam akkuán yù napiá nga ituddu ni Namarò.

<sup>7</sup> Ngam nu tumulù ittam kâ Namarò, ánnna akka-akkuát tam yù napiá nga ituddu na, á mesipà ittam kuna, ánnna napiá gapay yù ákkoput tam sù ira kábulut tam nga manguruk. Á mapakarenuán ittam, ánnna mári yù liwiliwâ tam, megapu sù dága ni Apu Kesu Kiristu, nga Anâ ni Namarò.

<sup>8</sup> Á nu kagiat tam ta awán ta liwâ tam, ilogò tam galâ yù baggi tam, ánnna arát tam pinatattam ta nonò tam yù kuruk nga bilin ni Namarò.

<sup>9</sup> Á nu kagiat tam kâ Namarò yù liwiliwâ tam, ánnna likuránát tam yù narákè nga akkuát tam, á pakomán na ittam, ánnna pakarenuán na yù nonò tam. Ta matunung si Namarò, ánnna palurotan na yù ngámin nga initabbá na sù ira mangikatalà kuna.

<sup>10</sup> Á kinagi ni Namarò ta awán ta tolay nga ari malliwâ. Á nu kagiat tam ta awán bulubugá ta liwâ tam, á kunnay ta kagiat tam ta massiri si Namarò, á arát tam kinuruk yù bilin na.

## 2

### *Si Apu Kesu Kiristu yù Mamakkápiá nittam kâ Namarò*

<sup>1</sup> Sikayu nga kun na ánâ ku, itûrâ ku yawe nikayu, gapu ta ikáyâ ku ta ari kayu malliwâ. Á nu aijan yù malliwâ, ipanonò ku ta aijan yù mamakkápiá nittam kâ Ammò Namarò. Aggina si Apu Kesu Kiristu, nga napiá ánnna matunung.

<sup>2</sup> Awán bulubugá ta liwâ na, á initapil na yù baggi na, nga neyátang kâ Namarò megapu sù liwiliwâ tam, tapè pakomán na ittam ni Namarò. Á yá ipagikáru na, nga ari lâ megapu ta liwiliwâ tam, nu ari galâ megapu sù liwiliwâ nayù ira ngámin nga tatolay ta tangapáddabbunán.

<sup>3</sup> Á kunniaw yù panákkilalán ta kuruk nga ammu tam si Namarò, nu palurotat tam yù taddán na.

<sup>4</sup> Á yù tolay nga makkagi ta ammu na si Namarò, nu arán na kurugan yù taddán ni Namarò, á massiri galâ yane tolay, ánnna arán na pinatattam ta nonò na yù kuruk nga bilin ni Namarò.

<sup>5</sup> Ngam sittam nga manguruk sù bilin ni Namarò, mepasingan ta kukurugán nga iddukat tam, ánnna yáyù nga ammu tam ta kuruk nga nepattatáddy ittam nga mesipà kâ Namarò.

<sup>6</sup> Á yù tolay nga makkagi ta kuruk nga napiá yù ákkiyáma na kâ Namarò, á mówák nga ipasingan na yù napiá nga ággangnguá na nga kunnay sù napiá nga ággangnguá ni Apu Kesu Kiristu ta keggá na ta dabbuno.

### *Yù Bagu nga Taddán ni Apu Kesu*

<sup>7</sup> Kákkopuk ku nga iddukak ku, ari bagu yawe taddán ni Namarò nga itûrâ ku nikayu, ta dán nga ammu naw áddè ngaw kapámmegapu naw nga mangikatalà kâ Apu Kesu. Ta naginná naw ngaw yù taddán na nittam, nga mówák ta makkaká-iddù ittam.

<sup>8</sup> Á mássiki nu dán nga kinagi ni Namarò nittam yawe taddán, á kunnay ta bagu, gapu ta ipakánnámmu na nittam ni Apu Kesu Kiristu yù kuruk nga kebalinán na. Á sù ngaw lage tam mangikatalà kâ Apu Kesu Kiristu, á kunnay ta naggián ittam ta kallà. Ngam kunangane, nanawagánin yù nonò tam megapu sù pangikatalà tam kuna.

<sup>9</sup> Á yù tolay nga makkagi ta mesipà kâ Namarò gapu ta panguruk na sù bilin na, nu ikalusso na paga yù kabbulun na nga mangikatalà kâ Apu Kesu, á ari kuruk yù kagian na, ta ari paga nanawagán yù nonò na, ngam kunnay ta maggián paga ta kallà.

<sup>10</sup> Ngam yù tolay nga mangiddù sù ira kábulun na, aggina yù meyárik ta tolay nga maggián ta nawák, nga kunnay ta mallakalakák ta nawák, gapu ta kurugan na yù kuruk nga ipakánnámmu ni Namarò kuna. Á awán ta narákè nga akkuán na nga meyárik ta kesiddúkálan nayù ira kábulun na, nga paggapuán nayù palliwâ da.

<sup>11</sup> Ngam yù tolay nga ikalusso na yù kabbulun na, narákè yù akkuán na ánnna arán na ammu yù napiá. Á meyárik ta tolay nga maggián nga mallakalakák ta kallà, nga arán na ammu yù angayán na, gapu ta ari makasingan.

### *Yù Áaggián nayù ira Mangikatalà kâ Apu Kesu*

<sup>12</sup> Sikayu nga ánâ ku, makapattúrákâ nikayu gapu ta napakomá kayin ta liwiliwâ naw

megapu kâ Apu Kesu Kiristu, nga netapil megapu nittam.

<sup>13</sup> Á sikayu nga giriámán, makapattúrákâ nikayu gapu ta ammu nawin si Apu Kesu,

nga aijan ngaw gári sù awán paga bulubugá ta naparò.  
 Á sikayu nga bábbagitolay, makapattúrákà nikayu  
 gapu ta náppù nawin si Sátanas,  
 ta ammu naw manakì sù pamuruburion na nikayu.

<sup>14</sup> Á sikayu nga anâ ku, yawe itúrâ ku nikayu,  
 gapu ta makiyáma kayin kâ Ammò Namarò.

Á sikayu nga giriámán, yawe itúrâ ku nikayu,  
 gapu ta ammu nawin si Apu Kesu,  
 nga aijan ngaw gári sù awán paga bulubugá ta naparò.

Á sikayu nga bábbagitolay áんな yù ira nataggatán, yawe yù itúrâ ku nikayu,  
 gapu ta napasigaggà yù ángngikatalà naw kâ Apu Kesu,  
 ta pinatattam nawin ta nonò naw yù bilin ni Namarò.

Á gapu ta nonopan naw yù bilin ni Namarò,  
 yáyù nga inappu nawin si Sátanas,  
 ta arán naw kinuruk yù ituddu na nga narákè.

<sup>15</sup> Arán naw laguk karagatán nga akkuán yù mekontará kâ Namarò, áんな arán naw ukkurán yù magannagannuk nga aijan ta dabbuno nga meyannung sù ira ari manguruk kâ Namarò. Yù tolay nga makkarágâ karannian nga meyannung ta tatolay ta dabbuno, awán ta ángngiddù na kâ Ammò Namarò.

<sup>16</sup> Ngámìn dannian nga negagángay ta tatolay ta dabbuno, nga karagatád da, áんな yù masingad da nga ukkurad da, áんな yù ipappeddaráyo ra, ngámìn dannian ari gemma naggapu kâ Ammò Namarò, nu ari galâ naggapu sù narákè nga aijan ta dabbuno.

<sup>17</sup> Á mappasá sangaw yù ngámìn nga aijan ta dabbuno áんな yù ngámìn nga karagatán nayù ira tatolay nga masingad da ta dabbuno. Ngam yù ira nga mamalurò sù ipakuá ni Namarò nira, mesipà ira nga mepattolay kâ Namarò ta lángi ta áddè ta áddè.

#### *Mappalán ittam sù Mangontará kâ Apu Kesu Kiristu*

<sup>18</sup> Sikayu nga kun na ánâ ku, duttálín sangaw yù pagáddekan na ággaw, nga panoli ni Apu Kesu Kiristu. Á naginná naw ta umay yù mangontará nga massippil nakuan kâ Apu Kesu Kiristu. Á kunangane, aru ngin yù ira jmittál nga nangontará kâ Apu Kesu, á yáyù ammu tam ta duttálín yù pagáddekan nga ággaw áんな maddaggunin nga umay si Apu Kesu.

<sup>19</sup> Á yù ira tatolay nga nangontará kâ Apu Kesu, nakipaggammung ira ngaw nittam, ngam nánawád da ittam, gapu ta ari kuruk nga nepattatáddy yù nonò da ta nonò tam. Á nu kuruk nakuan nga nanguruk ira kâ Apu ta kunnay nittam, á naggián ira nittam nakuan. Ngam nánawád da ittam. Á yáyù nga mepasingan ta ari ira mesipà nittam nga mangikatalà kâ Apu.

<sup>20</sup> Ngam sikayu, ari kayu negittá nira, ta napakarenúán yù nonò naw, megapu sù Mangilin nga Ikararuá ni Namarò, nga iniyawá ni Apu Kesu nikayu, áんな kánnámmuán naw yù ngámìn nga bilin ni Namarò, gapu ta yù Mangilin nga Ikararuá yù mangipakánnámmu nikayu.

<sup>21</sup> Á yawe ipattúrâ ku nikayu, ari gapu ta arán naw ammu yù kuruk, nu ari galâ gapu ta ammu nawin yù kuruk áんな ammu naw gapay ta awán ta siri nga naggapu sù kuruk.

<sup>22</sup> Á massirisiri yù ira tatolay nga makkagi ta ari si Apu Kesu Kiristu yù mangiyígù nga sinullà ni Namarò ta mammaguray! Aggira yù mangontará kâ Apu Kesu Kiristu, ta panakitád da di Ammò Namarò áんな yù Anâ na.

<sup>23</sup> Ta nu panakitán na tolay yù Anâ ni Namarò, panakitán na gapay yù Yáma na. Ngam yù tolay nga mangipakánnámmu ta panguruk na áんな pangikatalà na kâ Apu Kesu nga Anâ ni Namarò, á aijan gapay kuna si Ammò Namarò nga Yáma ni Apu Kesu, nga kapulupulù na.

<sup>24</sup> Tángngagan naw laguk ta napiá yù ngámìn nga meyannung kâ Apu Kesu nga naginná naw áddè ngaw kapánginguruk naw, tapé mepatattam ta nonò naw. Ta nu nepatattam ta nonò naw yù bilin ni Namarò nga naginná naw áddè ngaw, á mannanáyun yù napiá nga ákkiyápu naw sù Anâ ni Namarò áんな yù Yáma na ta áddè ta áddè.

<sup>25</sup> Á yawe yù initabbá ni Apu Kesu Kiristu nittam, ta iyawâ na nittam yù mannanáyun nga áttole tam, tapé mesipà ittam nga mepattolay kuna ta áddè ta áddè.

<sup>26</sup> Á itúrâ ku nikayu yù meyannung sù ira tatolay nga ari kuruk yù ituddu ra, tapé mappalán kayu nira, ta parubád da kayu nga ilogò.

<sup>27</sup> Ngam maggiánin nikayu yù Mangilin nga Ikararuá nga jinok ni Apu Kesu nikayu, á inipakánnámmu na nikayu yù kuruk nga bilin ni Namarò nga meyannung sù Anâ na. Á yáyù nga arán naw awágan yù mangituddu nikayu, ta yù Mangilin nga Ikararuá yù mangituddu nikayu. Á inituddu nen yù meyannung ta ngámìn nga máwák naw nga

mánnámmuán. Á yù ngámin nga ituddu na, ari siri, nu ari galâ kuruk. Uputan naw laguk yù pakiyápu naw kâ Apu Kesu Kiristu, ta yáyù inituddu nayù Mangilin nga Ikararuá nikayu.

<sup>28</sup> Á sikayu nga kun na ánâ ku nga metádday kâ Apu Kesu, uputat tam laguk yù pakiyápu tam kuna, tapè mappelò ittam nga ari mappasirán ta arubáng na, sangaw nu manoli ta dabbuno.

<sup>29</sup> Á gapu ta ammu tam ta kuruk nga napiá ánnna matunung si Apu Kesu, yáyù nga ammu tam gapay ta yù ira ngámin nga matunung, nga napiá lâ yù akka-akkuád da, á kuruk nga ánâ ni Namarò ira.

### 3

*Ánâ na ittam ni Namarò nga Mangikatalà kâ Apu Kesu Kiristu*

<sup>1</sup> Nonopat tam yù ángngiddù ni Ammò Namarò nittam, ta pinabbalin na ittam ta ánâ na. Á kuruk nga ánâ na ittamin, nga mangikatalà kâ Apu Kesu Kiristu. Ngam yù ira tatolay nga ari manguruk kâ Apu Kesu Kiristu, arád da gapay kánnámmuán yù nonò tam, gapu ta arád da ammu si Ammò Namarò.

<sup>2</sup> Á kákkopuk ku nga iddukak ku, ánâ na ittamin ni Namarò, á arán na paga inipasingan yù pabbalinát tam sangaw. Ngam yawe ammu tam, ta sangaw nu manoli saw si Apu Kesu, nga mappasingan nittam, á mepaggittá ittam kuna, ta masingat tam yù kuruk nga ággian na.

<sup>3</sup> Á nu kunnian yù iddanamát tam, nallikuránát tam yù narákè nga ággangnguá tam, á nonopat tam ánnna akka-akkuát tam yù napiá lâ, gapu ta pareku nga napiá si Apu Kesu Kiristu.

<sup>4</sup> Ngámin ira nga ari napiá yù nonò na ánnna akkuán na, malliwâ ira sù tunung ni Namarò. Á yáyù nga minálliwâ ira gapu ta potuád da yù taddán ni Namarò.

<sup>5</sup> Á ammu tam ta minay saw dabbuno si Apu Kesu, nga netapil nga nagikáru ta liwiliwâ tam, tapè mapakomá ittam. Ngam si Apu Kesu, awán bulubugá ta liwâ na.

<sup>6</sup> Á yù tolay nga napasigaggá yù ángnguruk na kâ Apu Kesu, á ari malliwâ. Ngam yù tolay nga uputan na yù palliwâ na, arán na paga ammu si Apu Kesu Kiristu, ánnna arán na gapay kánnámmuán yù bílin nga meyannung kuna.

<sup>7</sup> Sikayu nga kun na ánâ ku, ari kayu makilogò, marakèmekáttuay kayu ta panguruk naw sù kuruk. Ta yù tolay nga napiá lâ yù akka-akkuán na, aggina yù napiá ánnna matunung nga kunnian kâ Apu Kesu.

<sup>8</sup> Á yù tolay nga ari napiá yù ággangnguá na, aggina yù nakitulù kâ Satanas, ta párigán na si Satanas, nga narákè yù ággangnguá na áddè ngaw kapámmegapu na ággaw. Á yáyù gapu na nga minay saw ta dabbuno yù Anâ ni Namarò, tapè irián na ngámin yù pakáwayá ni Satanas ánnna yù ikalángan na.

<sup>9</sup> Á yù ira tatolay nga kuruk nga ánâ ni Namarò, arád den uputan yù palliwâ da, gapu ta aijan nira yù napiá nga nonò nga naggapu kâ Namarò. Á gapu ta pinabbalin na ira ni Namarò ta ánâ na, arád den uputan yù palliwâ da.

<sup>10</sup> Á kunniauw yù panákkilalát tam sù ira tatolay nga mebiláng ta ánâ ni Namarò ánnna yù ira nga mebiláng ta ánâ ni Satanas. Ta ari gemma ánâ ni Namarò yù tolay nga ari matunung yù akka-akkuán na ánnna arán na iddukan yù ira ikáttolé na.

*Yawe yù Itaddán ni Apu Kesu: Makkaká-iddù Kayu*

<sup>11</sup> Á yawe yù bilin ni Apu Kesu nga naginná naw áddè ngaw kapángngikatalà naw kuna, ta makkaká-iddù ittam.

<sup>12</sup> Arát tam laguk párigán yù ngaw Kain, nga nakitulù kâ Satanas, á pinapáte na yù wagi na nga urián. Ta gapu ta narákè yù ággangnguá ni Kain, yáyù nga ikalusso na yù urián na, gapu ta napiá yù ággangnguá nayù urián na.\*

<sup>13</sup> Kákkopuk ku, ari kayu laguk mapállâ, nu ikalusso ra kayu gapay nayù ira ari manguruk kâ Namarò.

<sup>14</sup> Á sittam nga mangikatalà kâ Apu Kesu, ammu tam ta melilli ittam sù pamagikáru ni Namarò, á ari ittam mesinná kâ Namarò nga metabbà ta impiernu, nu ari galâ ta mesipà ittamin sù áttole ni Namarò. Á kánnámmuát tam ta kuruk nga mesipà ittam sù áttole na, gapu ta iddi-iddukat tam yù ira kábulut tam. Ngam yù tolay nga ari mangiddù ta kábulun na, ari mesipà sù áttole ni Namarò nga mannanáyun, ngam kunnay ta natayin, nga mesinná kuna ta áddè ta áddè.

<sup>15</sup> Á yù tolay nga malussaw ta kabbulun na, ibiláng ni Namarò ta negittá ta namapátag. Á ammu tam ta ari mesipà yù mamapátag sù áttole ni Namarò nga mannanáyun.

\* <sup>3:12</sup> Meyannung kári Kain kâ Abel, Genesis 4:1-8

<sup>16</sup> Á kánnámmuát tam yù kebalinán nayù ángngiddù ni Apu Kesu, megapu sù pate na ta kurù megapu nittam. Ta másiki nu awán ta liwâ na, initapil na yù baggi na, á nagikáru ta liwiliwâ tam, tapè ari sittam yù mapagikáru. Á yáyù nga máwák nga iddi-iddukat tam gapay yù ira kábulut tam nga mangikatalâ kâ Apu, másiki nu metapil ittam gapay nakuan ta pangabbák tam nira.

<sup>17</sup> Á nu ajjan yù tolay nga eggá kuna yù ngámin nga máwák na, á masingan na yù kabbulun na nga magáwák, ngam arán na kábbian ánná awán ta iyawâ na kuna, á awán laguk ta ángngiddù na sù kabbulun na. Á eggá panò yù ángngiddù na kâ Namarò? Awán!

<sup>18</sup> Á sikayu nga kun na ánâ ku, iddukat tam laguk yù ira kábulut tam, á arát tam lá kagian nira yù ángngiddù tam, nu arát tam gapay ipasingan ta kuruk nga iddukat tam ira megapu sù napiá nga akka-akkuát tam nga ángngabbák tam nira.

### *Mappelò kâ Namarò yù ira Pinabbalin na ta Ánnâ na*

<sup>19</sup> Á gapu ta kunnian laguk yù pakkaká-iddù tam, ammu tam ta kuruk nga ánâ ni Namarò ittam. Á yáyù nga magimammà yù nonò tam, ánná ari ittam mappasirán ta pakimállâ tam kâ Namarò.

<sup>20</sup> Á másiki nu mappasirán ittam nakuan kâ Namarò, megapu ta liwâ tam, á ammu ni Namarò yù ngámin. Ammu na yù liwâ tam lage tam kagian kuna, ánná makáwayyá nga mamakomá nittam. Á awán ta pagáddekan nayù ángngiddù na nittam.

<sup>21</sup> Kákkopuk ku nga iddukak ku, nu ari mabbábâng yù nonò tam ta meyannung sù pakiyápu tam kâ Namarò ánná yù allâ na nittam, á mappelò ittam laguk nga makimállâ kuna.

<sup>22</sup> Á iyawâ na nittam yù ipakimállâ tam, gapu ta kurugat tam yù taddán na ánná akkuát tam yù ipagayáyâ na.

<sup>23</sup> Á yawe yù taddán ni Namarò nittam, ta ikatalâ tam si Apu Kesu Kiristu nga Anâ na, ánná makkaká-iddù ittam ta kunnay sù initaddán ni Apu Kesu nittam.

<sup>24</sup> Á yù ira nga manguruk sù taddán ni Namarò, mepattolay ira kuna, ánná maggián si Namarò nira. Á ammu tam ta kuruk nga maggián si Namarò nittam, gapu ta ajjan nittam yù Mangilin nga Ikararuá ni Namarò nga pinapaggián na nittam.

## 4

### *Yù Ari Masingan nga Mangontará kâ Namarò*

<sup>1</sup> Kákkopuk ku nga iddukak ku, ari kayu laguk manguruk sù ira ngámin nga makkagi ta maddok nira yù Ikararuá ni Namarò, nga paggaguán nayù ituddu ra. Ngam ginnán naw nu kuruk yù ituddu ra. Ta aru garè yù ira áppé ábbilinán nga jmittálin ta ngámin nga lugár, nga tanakuán yù paggaguán nayù ituddu ra.

<sup>2</sup> Á kunniauw yù ánnákkilát tam sù ira tatolay nga eggá nira yù Mangilin nga Ikararuá. Yù ira mangituddu nga makkagi ta kuruk nga si Apu Kesu Kiristu yù sinullâ ni Namarò nga mammaguray, ánná kuruk nga minay ta dabbuno nga naggapu ta lángì, nga neyanâ ta tolay ánná kuruk nga tolay yù baggi na, á aggira yù masserbi kâ Namarò nga eggá nira yù Mangilin nga Ikararuá.

<sup>3</sup> Ngam yù ira makkagi ta ari kuruk nga tolay si Apu Kesu Kiristu, ánná ari naggapu kâ Namarò, á ammu tam ta magginná ira ta tanakuán nga ari yù Mangilin nga Ikararuá ni Namarò, gapu ta kagiad da yù naggapu sù mangontará kâ Apu Kesu Kiristu. Á narámak naw ta duttál ta dabbuno yù mangontará kâ Apu. Á kunangane, jmittálin ta dabbuno, á ari yù ira tatolay nga makitulù kuna.

<sup>4</sup> Á sikayu, nga kun na ánâ ku, sikayu yù ánâ ni Namarò. Á yáyù nga inappù nawin yù ira áppé ábbilinán, gapu ta makáwayyá yù Mangilin nga Ikararuá nga maggián nikayu, ánné sù ari masingan, nga ajjan nga maddok sù ira nga ari manguruk kâ Namarò.

<sup>5</sup> Á yù ira áppé ábbilinán, naggittá yù nonò da ta narékè nga nonò nayù ira tatolay nga ari manguruk kâ Namarò. Á yáyù nga ituddu ra yù meyannung ta dabbuno. Á yù ira tatolay nga ari manguruk kâ Namarò, tángagad da yù ituddu nayù ira áppé ábbilinán.

<sup>6</sup> Ngam sittam nga netádday kâ Namarò, ituddu tam yù kuruk nga bilin ni Namarò, á yù ira tatolay nga ammu ra si Namarò, ginniginnád da yù ituddu tam. Ngam yù ira tatolay nga ari manguruk kâ Namarò, arád da ginnán yù ituddu tam. Á kunnian nga tákkilát tam yù paggaguán nayù ituddu na tolay, nu naggapu sù Mangilin nga Ikararuá ni Namarò, onu naggapu galá sù ari masingan nga minássiri.

### *Sigga-iddù si Namarò*

7 Kákkopuk ku nga iddukak ku, makkaká-iddù ittam laguk. Ta si Namarò yù paggapuán nayù pakáwayyá tam nga makkaká-iddù, á yù tolay nga mangiddù sù ira kábulun na, aggina yù anâ ni Namarò ánnna ammu na si Namarò.

8 Á yù tolay nga ari mangiddù sù ira kábulun na, arán na ammu si Namarò. Ta sigga-iddù si Namarò.

9 Á inipasingan ni Namarò yù ángngiddù na nittam, gapu ta jinok na ta dabbuno si Apu Kesu Kiristu, nga Anâ na nga táttáddy, nga metapil megapu nittam, tapè mesipà ittam nga meppattolay kâ Namarò ta áddè ta áddè megapu kuna.

10 Á yáyù pangipasinganán nayù kuruk nga ángngiddù ni Namarò nittam, ta mássiki nu arát tam ngaw paga iniddù si Namarò lage tam nanguruk kuna, á sigga-iddù si Namarò nittam, á jinok na yù Anâ na, nga nagikáru ta liwâ tam ngámin, tapè mapakomá ittam megapu kuna.

11 Kákkopuk ku nga iddukak ku, gapu ta kunnian yù ángngiddù ni Namarò nittam, á máwák laguk nga makkaká-iddù ittam.

12 Á awán gemma ta tolay nga nakasingan kâ Namarò. Á mássiki nu arát tam masingan, nu makkaká-iddù ittam, á kuruk nga maggián si Namarò ta nonò tam, á mapasigaggâ yù pakkaká-iddù tam megapu kuna.

13 Á ammu tam ta kuruk nga netáddy ittam kâ Namarò ánnna maggián si Namarò nittam, gapu ta aijan nittam yù Mangilin nga Ikararuá ni Namarò nga pinapaggián na nittam.

14 Á sikami, nasingam mi yù Anâ ni Namarò, á yáyù nga sistiguám mi ta jinok ni Namarò yù Anâ na ta umay mangiyígù sù ira ngámin nga tatolay ta dabbuno, tapè ikatalà da, á ari ira metabbà ta impiernu.

15 Á yù tolay nga massistigu ta si Apu Kesu yù Anâ ni Namarò, aggina yù meppattolay kâ Namarò, ánnna maggián gapay si Namarò kuna.

16 Á ammu tamin ánnna ikatalà tamin yù pangiddù ni Namarò nittam. Ta sigga-iddù si Namarò. Á yù tolay nga napasigaggâ yù ángngiddù na kâ Namarò ánnna sù ira kábulun na, maggián lá kâ Namarò ánnna maggián gapay si Namarò kuna.

17 Á nu kuruk nga iddukat tam si Namarò ánnna yù ira kábulut tam, ari ittam mappasirán onu maganássing sangaw nu duttál yù pangukum ni Namarò ta tatolay, gapu ta aijan yù ángngiddù tam ta keggá tam paga ta dabbuno nga kunnay ta ángngiddù ni Apu Kesu.

18 Á nu kuruk nga iddukat tam si Namarò ánnna ikatalà tam yù ángngiddù na nittam, ari ittam maganássing kuna. Ta mári yù assing tam megapu sù ángngiddù na nittam. Á nu maganássing yù tolay kâ Namarò, mepasigan ta arán na paga iddukan, á ikássing na laguk yù iddagáu na sangaw nga pamagikáru ni Namarò kuna.

19 Á makáwayyá ittam nga mangiddù, gapu ta napolu si Namarò nga mangiddù nittam.

20 Á yù tolay nga makkagi ta aggina yù mangiddù kâ Namarò, ngam ikalusso na yù ikáttolé na, á aggina yù minássiri. Ta gapu ta awán ta ángngiddù na sù ikáttolé na nga masingan na, á awán gemma laguk ta ángngiddù na kâ Namarò nga arán na masingan.

21 Á yawe yù itaddán ni Namarò nittam, ta yù tolay nga mangiddù kâ Namarò, máwák na gapay nga iddukan yù ira ikáttolé na.

## 5

### *Appútat tam yù Ngámin nga Mangontará kâ Namarò*

1 Yù ngamin ira nga tatolay nga manguruk ta kuruk nga Anâ ni Namarò si Apu Kesu Kiristu, nga sinullà ni Namarò ta mammaguray, aggira yù ánâ ni Namarò. Á ngámin ira nga mangiddù kâ Ammò Namarò, á iddukad da gapay yù ira ánâ na. Á yáyù nga makkaká-iddù ittam, ta mawwawági ittamin qya pinabbalin ni Namarò ta ánâ na.

2 Á ammu tam ta iddukat tam yù ira ikáttolé tam nga ánâ ni Namarò, nu iddukat tam si Namarò ánnna kurugat tam yù taddán na.

3 Ta yáyù pangipasinganát tam sù ángngiddù tam kâ Namarò, nu kurugat tam yù taddán na, nga ari marigâ nga mapalurò.

4 Á sittam nga pinabbalin ni Namarò ta ánâ na, arán na ittam mapatulù nayù narákè, gapu ta máwayyá tam nga appútan yù ngámin nga aijan ta dabbuno nga mangontará kâ Namarò. Á kunnasi laguk panò yù pangappù tam, nu ari galâ megapu sù pangikatalà tam kâ Apu Kesu Kiristu nga mangabbák nittam!

5 Á awán ta mangappù sù narákè nga aijan ta dabbuno nga mangontará kâ Namarò, nu ari galâ yù tolay nga manguruk ta si Apu Kesu yù Anâ ni Namarò.

*Yù Pangurugát tam ta Anâ ni Namarò si Apu Kesu Kiristu*

<sup>6</sup> Á kuruk nga tolay si Apu Kesu Kiristu, ánnna kuruk nga Anâ ni Namarò gapay nga naggapu ta lángì. Á ammu tam ta kuruk yian, ta nepasingan megapu sù panigù ni Kuan kuna ta danum na Jordan. Á kurugat tam nga ari lâ megapu sù karigù na ta danum na Jordan, nu ari gapay megapu sù paddága na ta pate na ta kurù.\* Á yù Mangilin nga Ikararuá ni Namarò gapay yù manistígu ta si Apu Kesu yù Anâ ni Namarò, á kuruk gemma yù ngámin nga ipakánnámmu nayù Mangilin nga Ikararuá.

<sup>7</sup> Á yáyù nga aijan yù ira tallu nga pangurugát tam,

<sup>8</sup> yù Mangilin nga Ikararuá, ánnna yù karigù ni Apu Kesu ta danum na Jordan, ánnna yù paddága na ta pate na ta kurù. Á naggittá yù ipakánnámmu ra, nga kuruk nga Anâ ni Namarò si Apu Kesu Kiristu.

<sup>9</sup> Á kurugat tam gemma yù kagian nayù ira tatolay ta passistígu ra, á nepatalugáring sù kagian ni Namarò. Á sinistiguán ni Namarò ta si Apu Kesu yù Anâ na.

<sup>10</sup> Á yù ira nga mangikatalà sù Anâ ni Namarò, matagenà da ta nonò da yù passistígu nayù Mangilin nga Ikararuá ta kukurugán nga Anâ ni Namarò si Apu Kesu. Ngam yù ira nga ari manguruk sù kinagi ni Namarò nga meyannung sù Anâ na, á kunnay ta kagiad da ta massiri si Namarò, gapu ta arád da kurugan yù kagian ni Namarò nga meyannung sù Anâ na.

<sup>11</sup> Á sinistiguán ni Namarò ta iniyawâ na nittam yù mannanáyun nga áttole tam nga awán ta áddè na, á si Apu Kesu Kiristu nga Anâ ni Namarò yù paggappuán nayù mannanayun nga áttole tam.

<sup>12</sup> Á yáyù nga yù ira nga aijan nira yù Anâ ni Namarò megapu sù pangikatalà da kuna, aggira yù ira mepattolay kâ Namarò ta áddè ta áddè. Ngam yù ira nga ari mangikatalà sù Anâ ni Namarò, awán nira si Apu, á arád da málâ yù mannanáyun nga áttole ra.

#### *Yù Mannanáyun nga Áttole tam nga Mangikatalà kâ Apu Kesu*

<sup>13</sup> Á sikayu nga mangikatalà sù Anâ ni Namarò, yawe yù itúrâ ku nikayu, tapè ammu naw ta neddán kayin sù mannanáyun nga áttole naw, á mepattolay kayu kâ Namarò ta áddè ta áddè.

<sup>14</sup> Á gapu ta pangikatalà tam kâ Apu Kesu, mappelò ittam nga makimállà kâ Namarò. Á ammu tam ta ginnán na, nu tumulù ittam kuna ánnna ipakimállà tam lâ yù napiá nga ikáyâ na.

<sup>15</sup> Á nu ammu tam ta ginnán ni Namarò yù ipakimállà tam, ammu tam gapay ta málâ tam yù kiniddo tam kuna.

<sup>16</sup> Á ta ángngarigán, nu masingat tam yù kabbulut tam nga malliwâ, nga ari yù tádday nga liwâ nga pabbalinán na yù pate nayù malliwâ ánnna yù kesinnâ na kâ Namarò, á ipakimállà tam laguk kâ Namarò ta pakomán na ánnna iyawâ na kuna yù mannanáyun nga áttole na. Ngam aijan yù tádday nga liwâ nga ari mapakomá gapu ta mekanakanâ sù pangukum ni Namarò yù malliwâ ta kunnian. Á arák ku kagian ta ipakimállà tam yù tolay nga kunnian yù liwâ na.

<sup>17</sup> Á ngámin nga narákè nga akka-akkuán na tolay yù pakaliwatán na kâ Namarò. Ngam mapakomá yù káruán nga liwâ, nga ari yù tádday nga liwâ nga gapu na nga mekanakanâ sù pangukum ni Namarò ánnna mesinnâ kuna yù nalliwâ ta kunnian.

<sup>18</sup> Á ammu tam ta ari mangupù nga malliwâ yù ira tatolay nga pinabbalin ni Namarò ta ánnâ na, gapu ta si Apu Kesu nga Anâ ni Namarò yù manaron nira. Á yáyù nga ari ira makagumánnga malliwâ, á awán ta awayyá ni Satanas nga manganni nira.

<sup>19</sup> Á ammu tam ta ánnâ na ittam ni Namarò nga mangikatalà kâ Apu Kesu. Ngam yù ira ngámin nga ari mangikatalà kâ Apu Kesu, á si Satanas yù mammaguray nira.

<sup>20</sup> Á ammu tam gapay ta nabbáli ta tolay yù Anâ ni Namarò nga minay ta dabbuno, á inipakánnámmu na nittam yù kuruk, tapè ammu tam si Namarò, nga kuruk nga mepángngâ nga pakimorayát tam. Á nepattatádday ittamin kâ Namarò, gapu ta nepattatádday ittam kâ Apu Kesu nga Anâ na. Aggina yù kuruk nga manotolay, nga paggappuán nayù mannanáyun nga áttole tam.

<sup>21</sup> Á sikayu nga kun na ánâ ku, arán naw laguk tángngagan yù tanakuán nga ari mepángngâ nga pakimorayán.

## Yù Mekaruá nga Túrâ ni Kuan

*Yù Meyannung sù Túrâ*

Yawe yù mekaruá nga túrâ ni Kuan sù ira iddukan na nga masíná nga piníli ni Namarò. Á yù ira tatolay nga kuruk nga pattúratán na támma yù ira tangapaggammungán nga mangikatalà kâ Apu Kesu. Á tabarangán na ira ni Kuan ta makkaká-iddù ira ánná arád da kurugan yù kagian nayù ira mangituddu nga ari kuruk yù ituddu ra.

*Yù Mayán nayù Túrâ*

Yù Pamegapu nayù Túrâ 1-3

Yù Taddán ni Namarò nga Ari Bulubugá Mári 4-6

Mappalán ittam sù ira Minángngilogò 7-11

Yù Iddanamán ni Kuan nga Mattúllun nira 12-13

<sup>1</sup> Ajjawà nga lakalákay nga minánnaron sù ira mangikatalà kâ Apu Kesu. Á makapattúrákà nikayu nga kuruk nga iddukak ku, yù babay nga piníli ni Namarò, ánná yù ira ánâ na. Á ari lâ sikán yù mangiddù nikayu, nu ari gapay yù ira ngámin nga makánnámmu sù kuruk nga meyannung kâ Apu Kesu.

<sup>2</sup> Á makkaká-iddù ittam, gapu ta kánnámmuát tam yù kuruk nga bilin ni Namarò nga meyannung kâ Apu Kesu, nga napasigaggà ta nonò tam ta áddè ta áddè.

<sup>3</sup> Á paré bì ta ikákállâ da ittam di Ammò Namarò ánná si Apu Kesu Kiristu nga Anâ na, á abbágád da ittam, tapè magimammà yù nonò tam megapu ta panguruk tam sù kuruk nga bilin na ánná yù pakkaká-iddù tam.

*Yù Taddán ni Namarò nga Ari Bulubugá Mári*

<sup>4</sup> Á magayáykà ta pakarámak ku ta aijan yù ira ánâ mu nga napasigaggà yù panguruk da sù taddán ni Ammò Namarò nga Yáma tam, nga kunnay ta inibilin na nittam.

<sup>5</sup> Á kopuk ku, ari gemma bagu yù bilin ni Namarò nga itúrâ ku nikayu, ta dán nga ammu tam áddè ngaw sù pamegapu tam nga mangikatalà kuna. Á yáyù nga ikomâ laguk nikayu, ta makkaká-iddù kayu.\*

<sup>6</sup> Á yawe laguk yù akka-akkuát tam, tapè ipasingat tam yù pangiddù tam sù ira kábulut tam ánná yù pangiddù tam kâ Namarò. Máwák nga kurugat tam yù initaddán ni Namarò nittam. Á áddè ngaw kapámmegapu naw nga mangikatalà kuna, naginná naw yù initaddán na, ta makkaká-iddù ittam.

*Mappalán ittam sù ira Minángngilogò*

<sup>7</sup> Á manguruk ittam laguk sù taddán ni Namarò nittam, ta aru garè yù ira mappassapas-siár ta dabbuno, nga minángngilogò, nga mangituddu ta ari kuruk. Massirisiri ira, ta kagiad da ta ari kuruk nga nabbáli ta tolay si Apu Kesu Kiristu sù ánge na ta dabbuno. Á ngámin ira nga mangituddu ta kunnian, minángngilogò ira nga makitulù sù nonò nayù mangontará kâ Apu Kesu Kiristu.

<sup>8</sup> Magimuguk kayu laguk, marakè lonán naw yù kapiánán naw, nga pabbalinán nayù tarabáku tam nga mangipakánnámmu sù bilin ni Namarò nikayu. Ta napiá galâ nu málâ naw yù ngámin nga bálâ naw nga ikáyâ ni Namarò nga iyawâ nikayu.

<sup>9</sup> Á yù tolay nga mangituddu ta tanakuán nga ari yù inituddu ni Apu Kesu Kiristu, arán na ammu si Namarò. Ngam yù tolay nga napasigaggà yù pangikatalà na sù ituddu ni Apu Kesu Kiristu, maggián nga mepulupulù kuna si Ammò Namarò ánná yù Anâ na.

<sup>10</sup> Á nu aijan yù tolay nga umay nikayu, nga tanakuán yù ituddu na, nga ari negittá sù bilin ni Apu Kesu, á arán naw paddulotan ta bale naw. Ari kayu gapay maddios kuna. Arán naw iyabbû kuna nu kunnasi.

<sup>11</sup> Tanu maddios kayu kuna onu iyabbû naw nu kunnasi yù ággíán na, onu paddulotan naw ta bale naw, á mekanakanâ kayu sù narákè nga akka-akkuán na.

*Yù Iddanamán ni Kuan nga Mattúllun nira*

<sup>12</sup> Á aru paga yù kagiak ku nikayu nakuan, ngam arák kin itúrâ kunangane, ta iddagák ku yù awayyyâ nga umay sù gián naw. Ta et takayu tullúnán, tapè makkakásingan ittam nga makkaká-ubobuk, ánná kukurugán nga magayáyâ ittam gapu ta pakkakásingat tam mángin.

\* <sup>1:5</sup> Kuan 13:34; 15:12, 17

<sup>13</sup> Á yù ira áñâ nayù wagim nga piníli ni Namarò, ipetúrâ da nikán yù iyabbû da gapay nu kunnasi kayu, ta ikomá ra gapay kâ Apu ta parè bi ta napiá yù ággiañ naw. Yáyù áddé nayù kagiak ku.

## Yù Mekatallu nga Túrâ ni Kuan

*Yù Meyannung sù Túrâ*

Á yawe yù mekatallu nga túrâ ni Kuan. Á nattúratán na si Gayo nga kopun na nga minánnaron gapay sù tangapaggammungán nga mangikatalà.

Iráyo ni Kuan yù napiá nga ángngabbák ni Gayo sù ira minángngilayalayâ nga umay ta arayyu nga lugár nga mangituddu sù bilin ni Namarò. Á pappalánan na di Gayo ta meyannung sù ira tatolay nga mangituddu ta ari negittá sù bilin ni Namarò.

*Yù Mayán nayù Túrâ*

Yù Pamegapu nayù Túrâ 1-4

Napiá nu Makkaká-abbák ittam 5-8

Yù Narákè nga Kingnguá ni Diotripis 9-10

Yù Napiá nga Ággangnguá ni Dimitrio 11-12

Ikáyâ ni Kuan ta Makkásingan ira 13-15

<sup>1</sup> Ajjawà nga lakahálakay nga minánnaron sù ira mangikatalà kâ Apu Kesu. Á makapattúrákà nikaw, Gayo, nga kopuk ku nga kuruk nga iddukak ku.

<sup>2</sup> Kopuk ku nga iddukak ku, ipakimállà ku kâ Namarò ta parè bi ta iyawâ na nikaw yù napiá nga gawagawáyám mu ánná yù áaggiám mu, nga kunnay ta napiá nga nonò mu. Ta ammù ta kuruk nga napiá ánná napasigaggâ yù pangikatalà mu kâ Apu.

<sup>3</sup> Á magayáyákà ta pakarámak ku sù napiá nga akka-akkuám mu. Ta limibbè saw giák ku yù ira wáwwagi tam nga naggapu ta gián naw, a kinagi ra nikán ta uputam mu yù napiá nga akka-akkuám mu, ánná napasigaggâ yù panguruk mu sù inituddu ni Namarò nittam.

<sup>4</sup> Á awán ta kapiánán nga ipagayáyá ku, nu ari lâ yù pakarámak ku ta napasigaggâ yù panguruk nayù ira ánná ku sù kuruk nga bilin ni Namarò.

*Napiá nu Makkaká-abbák ittam*

<sup>5</sup> Kopuk ku nga iddukak ku, napiá yù pangabbák mu sù ira wáwwagi tam nga umay mappassiára ta gián naw, mássiki nu álliuk ira nga arám mu ngaw ammu lage ra limibbè.

<sup>6</sup> Á keggá ra saw giám mi, kinagi ra sù ira manguruk kâ Apu nga maggagammung saw yù napiá nga ángngiddù mu nira. Á napiá laguk nu uputam mu nga abbágán yù ira umay nga kunnay nira nga mangituddu ta meyannung kâ Apu. Á iyawâ mu nira yù máwák da ta páno ra sù gián naw, tapè umay ira mangituddu sù ira tatolay ta káruán nga lugár. Ta yáyù gemma mepángngâ nga ángngabbák tam sù ira nga masserbi kâ Namarò.

<sup>7</sup> Ta nánawád da yù giád da, tapè umay ira mangipakánnámu ta meyannung kâ Apu Kesu Kiristu, á arád da apan yù awágad da sù ira nga ari manguruk kâ Apu.

<sup>8</sup> Á yáyù nga sittam nga mangikatalà kâ Apu Kesu yù mangabbák nira, tapè mesipà ittam sù pattarabáku ra nga masserbi kâ Apu.

*Yù Narákè nga Kingnguá ni Diotripis*

<sup>9</sup> Á aijan yù initúrá ku ngaw sù ira manguruk kâ Apu nga maggián ta gián naw. Ngam si Diotripis, ikáyâ na ta aggina lâ yù kátannangád da, á manakì nga manguruk sù kinagi nira. Á pinotuán nangá, ánná arán na sinángngák yù túrâ ku.

<sup>10</sup> Á sangaw nu umayà ta gián naw, ipalappâ ku yù narákè nga akka-akkuán na, nga pallillibâ na nikán ánná yù passirisiri na. Ari makáppak sù narákè nga akkuán na, ta lannapán na paga. Arán na paddulotan yù ira wáwwagi tam nga álliuk nga umay ta gián naw, ánná ipugik na yù pangálliuk nayù ira nga ikáyâ da nga mangálliuk nira nakuan. Á nu potuád da yù kagian na ánná alliúgad da ira, á papanáwan na ira sù paggagammungád da.

*Yù Napiá nga Ággangnguá ni Dimitrio*

<sup>11</sup> Kopuk ku nga iddukak ku, arám mu párigán yù tolay nga mangnuá ta narákè, nu ari galâ yù tolay nga napiá yù ággangnguá na. Ta yù ira tatolay nga napiá yù ággangnguá ra, aggira yù ánná ni Namarò. Ngam yù tolay nga narákè yù ággangnguá na, arán na ammu si Namaro.

<sup>12</sup> Ta ángngarigán, aijan si Dimitrio. Aru yù ira tatolay nga makkagi ta napiá lâ yù nonò na, nga mepasingan megapu sù napiá nga ángnguruk na sù bilin ni Apu, ánná yù ngámin nga napiá nga akka-akkuán na. Á síkán gapay, kunnian yù passistígú ta meyannung kuna, ta aggina yù pangikatalakán, á ammu naw ta kuruk yù kagiak ku.

<sup>13</sup> Á aru lâ paga yù itúrâ ku nakuan nikaw, ngam arák ku itúrâ kunangane.

<sup>14</sup> Ta ari mabayák támma, á makkásingan itta, tapè makká-ubobuk itta ta napiá.

<sup>15</sup> Á parè bì ta magimammà yù nonò mu ánnna napiá yù ággiám mu. Ngámin nga kákkopum mu saw giák ku, ikáyâ da nga mepanonò ira nikaw, á iyabbû da nu kunnasi ka. Á sikaw, ipanonò mà bì gapay sù ira kákkoput ta nga katággitádday ta giám mu.

## Yù Túrâ ni Jud

*Yù Meyannung sù Túrâ*

Si Jud yù urián ni Ime. Á si Ime yù minánnaron sù ira taga Jerusalem nga mangikatalà kâ Apu Kesu, á aijjan gapay yù itúrâ ni Ime.

Á yawe túrâ ni Jud, initubruk na sù ira mangikatalà kâ Apu nga newarawarâ nga nakipaggián ta aru nga makkakerumá nga lugár. Á pappalánan na ira ta meyannung sù ira mangituddu nga ari kuruk yù ituddu ra, áんな narákè yù ággangnguá ra. Ngam sinullà ni Namarò yù ággaw nga pangukum na nira. Á kagian ni Jud sù ira manguruk kâ Apu ta uputad da yù panguruk da sù kuruk nga bilin ni Namarò, ta yáyù ipagayáyá ni Namarò.

*Yù Mayán nayù Túrâ*

Yù Pamegapu nayù Túrâ (1-2)

Pappalánan na ira sù ira nga Mangituddu ta ari Kuruk (3-4)

Yù Ággangnguá nayù ira Narákè áんな yù Pamagikáru ni Apu nira (5-18)

Yù Meyannung sù Napiá nga Ipakuá ni Namarò sù ira Tatole na (20-23)

Yù Pamindision ni Jud áんな Paddáyo na kâ Apu (24-25)

<sup>1</sup> Sikán si Jud, nga aripan ni Apu Kesu Kiristu, nga urián ni Ime. Á mattúrákà nikayu nga nagginná sù pagágál ni Apu Namarò ta mangikatalà kayu kâ Apu Kesu, sikayu nga iddukan ni Namarò nga Yáma tam, nga taronán ni Apu Kesu Kiristu.

<sup>2</sup> Á parè bì nakuan ta tagenatan naw yù ángngikállà ni Namarò nikayu áんな yù ángngiddù na nikayu ta kággágaw, tapè mangáppipiá yù ággigíán naw áんな yù pakkaká-iddù naw.

*Pappalánan na ira sù ira nga Mangituddu ta ari Kuruk*

<sup>3</sup> Wáwwagi nga iddukak ku, apurák ku nga mattúrá nikayu ta meyannung sù ángngiyígù ni Namarò nittam. Ngam aijjan yù tanakuán nga máwák nga itúrâ ku nikayu kunangan, ta máwák nga tabarangát takayu galá ta pasikkálan naw yù ángnguruk naw sù bilin ni Namarò nga inikatalà na nittam nga tatole na, tapè ari malannapán yù netuddu áんな ari mapatalián.

<sup>4</sup> Ta aijjan garè yù ira ari makimoray kâ Apu, nga minay nga nepattatádday nikayu. Á inilímak da nikayu yù nonò da. Ngam pinataliád da yù kuruk nga bilin ni Namarò nga meyannung sù ámmakomá na ta tatoley, á ituddu ra yù ari kuruk. Kagiad da ta paguráyán ni Namarò yù akkuát tam, gapu ta napakomá ittamin, mássiki nu akka-akkuát tam yù narákè nga karagatán na baggi tam. Á panakitád da si Apu Kesu Kiristu, nga Yápu tam nga táttádday. Ngam si Namarò, inipetúrâ na ngaw nga nabayágín yù ámmagikáru na nira sangaw nu duttál yù ággo na.

*Yù Ággangnguá nayù ira Narákè áんな yù Pamagikáru ni Apu nira*

<sup>5</sup> Á mássiki nu ammu nawin yawe nga kagiak ku, ikáyâ ku nga ipanonò nikayu yù pamagikáru ni Namarò sù ira manaki nga manguruk. Nonopan naw yù ira ngaw Kudio nga aripan nayù ira Egipto. Iniyígù ni Namarò ira, áんな inilillì na ira sù ira nga mangaripan nira, á pinapáno na ira ta lugár na Egipto. Á kabalin ni Namarò nangiyígù nira, ari ira nanguruk, á pinotuád da si Namarò. Á yáyù nga pinagikáru na laguk ni Namarò yù ira ngámin nga ari nanguruk kuna, á natay ira ngámin.

<sup>6</sup> Á yù ira daroban ni Namarò gapay, nilonád da yù pakáwayyá ra nga iniyawá ni Namarò nira, á nánawád da yù mepángngà nga paggianád da. Á yáyù nga pinukù ni Namarò ira nga nabálik ta káwák sù nakallà nga gián, ta addé te dattál na sangaw nayù mangilin nga ággaw nga pamagikáru na nira.

<sup>7</sup> Á mappalán ittam gapay, megapu sù nesimmu sù ira ngaw taga Sodoma áんな taga Gomorra áんな yù ira bárriu ra. Ta nepallà yù ákkikarallo ra, áんな ari ira nakáppak sù kingnguá ra nga narákè nga mekontará ta baggi ra. Á yáyù nga pinagikáru na ira ni Namarò, á sinuggí na yù ira ili ra, á natay ira ngámin, tapè ípasíngan ni Namarò nittam yù keyarigán nayù api nga ari máddà, nga ámmagikáru na sù ira mangnuá ta narákè.

<sup>8</sup> Á yù ira tatoley nga mamotu nga mepaggagammung nikayu, akka-akkuát da gapay yù kunnay sù kingnguá nayù ira ngaw tatoley nga nattatagenà ta ili na Sodoma. Kurugad da yù narákè nga karagatád da ta pattatagenà da, á manakì ira nga manguruk kâ Namarò. Á paddáketad da yù baggi ra, áんな potuád da yù ira ngámin nga makáwayyá ánnè nira, áんな pakkakagiád da gapay yù ira mangilin nga daroban ni Namarò.

<sup>9</sup> Ngam si Mikel, mássiki nu aggina yù kotunán nayù ira mangilin nga daroban nga maggián ta lángì, arán na ngaw si Satanas nakkakagián ta pamereperang na kuna ta ubobuk ta meyannung sù baggi ni Moyses. Ta kinagi na lâ ni Mikel kâ Satanas, “Si Namarò yù maggammá nikaw,” kun na.

<sup>10</sup> Ngam danniaw ira tatolay nga mepaggagammung nikayu, uyu-uyawad da yù ngámin nga arád da kánnámmuán, á akkuád da lâ yù negagángay nira ta kunnay ta ayám nga mangnuá lâ ta karagatán na baggi ra. Á yáyù ikararlá da.

<sup>11</sup> Awán iren! Mappanà sangaw yù ámmagikáru ni Namarò nira, ta pinárigád da yù ággangnguá nayù ngaw Kain,<sup>\*</sup> nga anâ ni Lákay Adam nga namotu kâ Apu. Á pinárigád da gapay yù kingnguá nayù ngaw Balam,<sup>†</sup> ta akkuád da lâ yù narákè, gapu ta ikáyâ da ukkuran yù kuártu. Á potuád da si Namarò gapay ta kunnay sù ngaw Korak<sup>‡</sup> ánná yù ira kábulun na, nga namotu kâ Moyses nga yù ngaw ábbilinán ni Namarò. Á yáyù nga pagikaruan ni Namarò ira sangaw, nga kunnay ta pamagikáru na kári Korak.

<sup>12</sup> Á danniaw ira, kitakikkì ira nga kitokkuk, á ari ira mappasirán kâ Namarò! Ari ira mepángngà nga mepaggagammung nikayu nga mepakkákán sù panaddamán naw ta pate ni Apu Kesu. Awán ta napiá nga akkuád da, nga kunnay ta jibbà nga ipayapayák na paddák, nga awán ta urán na. Á kunnay ira gapay ta káyú nga ari nabbungá sù bulán nga pabbungá na, á yáyù nga nabaddul, nga nalelay ánná nakatáng.

<sup>13</sup> Mepasingan yù narákè nga akka-akkuád da nga kunnay ta bugâ na palung na bebay. Awán ta serbi nayù akkuád da. Mappassapassiár ira nga mappasingan, nga kunnay ta bituan, ngam aijan yù dán nga naparán nga labbetád da, nga nakallà nga gián nga paggianád da ta áddé ta áddé.

<sup>14</sup> Á si Enok, nga yù ngaw mekapitu nga ginaká nga namegapu kâ Lákay Adan, á aijan yù kinagi na nga inipakánnámmu ni Namarò kuna nga meyannung karanniaw nga tatolay nga narákè. Kinagi na, “Ye! Umay sangaw si Apu, nga mepulù sù ira jinibu nga mangilin nga daroban na.

<sup>15</sup> Á panunnután na yù ira ngámin nga tatolay. Á pagikaruan na yù ira ngámin nga namotu kuna, gapu ta ari ira makimoray kuna, ánná gapu sù narákè nga kingngikingnguá ra, ánná gapu sù narákè nga pakkakagi ra ta pangontará ra kuna.” Yáyù initúrâ na ngaw ni Enok, nga meyannung karanniaw nga narákè nga tatolay nga mepaggagammung nikayu.

<sup>16</sup> Mináddagarágim ira nga minámmaliwâ. Akka-akkuád da yù narákè nga karagatád da. Á mappeddaráyaw ira nga nabángák yù ággubobuk da. Á áppè pípiá ira, nga mámmì yù ággubobuk da, tapè málâ da yù ikáyâ da lápay.

<sup>17</sup> Ngam sikayu nga wáwwagi nga iddukak ku, nonopan naw yù kinagi nayù ira mapulu duá nga minángngilayalayá nga sinudduán ni Apu Kesu Kiristu, nga Yápu tam.

<sup>18</sup> Ta kinagi ra, “Sangaw nu duttál yù ira kaporianán nga ággaw, á duttál gapay yù ira tatolay nga manguyaw kâ Apu Namarò ánná yù ngámin nga napiá, á akka-akkuád da yù narákè nga karagatád da,” kud da.

<sup>19</sup> Á danniaw ira nga kinagi ra, minay iren ta gián naw, nga mamuruburion ánná mamassisinná nikayu. A nonopad da ánná akkuád da lâ yù negagángay sù ira tatolay sawe dabbuno nga ari makimoray kâ Namarò. Á ari gemma mepulù nira yù Mangilin nga Ikararuá.

#### *Yù Meyannung sù Napiá nga Ipakuá ni Namarò sù ira Tatolay na*

<sup>20</sup> Ngam sikayu, wáwwagi, nga iddukak ku, patattaman naw ta nonò naw yù bilin ni Namarò nga metuddu nikayu, tapè mapasigaggà yù pangikatalà naw kâ Apu Kesu. Á ta pakimállâ naw, ikomá naw yù ipanonò na nikayu nayù Mangilin nga Ikararuá.

<sup>21</sup> Á magattam kayu nga magiddak sù panoli ni Apu Kesu Kiristu, á ipasigaggà naw yù ákkiyápu naw kuna, tapè matagenà naw yù ángngiddù ni Namarò, áddé ta kesipà naw kâ Apu Kesu ánná pangiyawá na nikayu sù mannanáyun nga áttole na, megapu sù allâ na.

<sup>22</sup> Á aijan yù ira kábulun naw nga mabbábáng. Ikákkállâ naw ira, á tabarangán naw ira, tapè mapasigaggà yù pangikatalà da.

<sup>23</sup> Á ipakánnámmu naw yù napiá nga meyannung kâ Apu Kesu Kiristu sù ira tatolay nga mágge mapagikáru, tapè mabbabáwi ira ánná mangikatalà ira kâ Apu. Ta nu mangikatalà ira kâ Apu, meyígù ira, á kunnay ira laguk ta mágge metuppá, nga ginuru naw nga inilillí sù api. Á yù ira káruán nga kitarákè yù akkuád da, ikállâ naw ira gapay, ngam mappalán kayu, marakè mekanakanâ kayu sù narákè nga akkuád da.

\* **1:11** Meyannung kâ Kain: Genesis 4:1-8; 1 Kuan 3:12. † **1:11** Meyannung kâ Balam: Nomero 22-24; 31:16; 2 Eduru 2:15-16. ‡ **1:11** Meyannung kâ Korak: Nomero 16:1-35.

*Yù Pamindision ni Jud áんな Paddáyo na kâ Apu*

<sup>24</sup> Dayáwat tam si Namarò! Aggina lâ yù makáwayyá nga manaron nittam, tapè ari ittam mekanakanâ sù narákè nga akka-akkuán nayù ira ari manguruk. Si Namarò lâ yù makári ta liwiliwâ tam, tapè marenu ittamin. Á sangaw nu iyángé na ittam ta gián na, awán ta masingan na nga liwâ tam, á mepallà laguk yù pagayáyâ tam ta arubáng na.

<sup>25</sup> Meparáyaw si Namarò, nga mangiyigù nittam, megapu sù ketapil ni Apu Kesu Kiristu nga Yápu tam. Si Namarò lâ yù mepángngà nga pakimorayát tam. Aggina yù táttádday nga kotunán nga mammaguray, nga maddalingárang áんな makáwayyá ta áddè ngaw gári lage na keggá na ággaw, ta áddè noka nga awán ta pagáddekán. Ammán!

## Yù Nepalappâ ni Apu Kesu Kiristu kâ Kuan

### *Yù Meyannung sawe Libru*

Si Kuan yù nattûrâ sawe libru, á initûrâ na gapay yù libru nga Napiá nga Dámak, áんな yù ira tallu nga baddi nga túrâ. Á aggina yù sinudduán ni Apu Kesu, nga iddukan na, nga mebiláng sù ira mapulu duá. Á pamegapu na yawe libru, ibukalán ni Kuan yù initûrâ na sawe libru nga meyannung sù nasingan na ta lángi, áんな yù bilin áんな kingnguá ni Apu Kesu Kiristu (1:1-3). Á kagian na gapay yù meyannung ta baggi na áんな yù keggá na ta Pugu na Patmus, á ipakánnámmu na laguk yù inipasingan nayù Mangilin nga Ikararuá ni Namarò kuna ta keggá na tán (1:9-11).

Á ipakánnámmu ni Kuan yù meyannung sù naráké nga ajjan ta dabbuno kunangane, áんな yù jigâ nga attamán nayù ira manguruk kâ Apu áんな yù pate nayù ira kárúán megapu sù pangnguá nayù ira naráké nira. Á ipakánnámmu na ta si Apu Kesu yù Yápu nga mammaguray ta ngámin, nga mangappù sù ngámin nga naráké nga mangontarâ kâ Namarò, sangaw nu duttál yù ággaw nga pamanunnù ni Namarò áんな pangukum na nira. Á ipakánnámmu ni Kuan gapay yù mesimmu noka, nga napiá nga makapállâ yù pabbálâ ni Namarò sù ira ngámin nga tatolay nga napasigaggâ yù ángngikatalà da kuna, nepatalugáring sù ira tatolay nga mekatalà nga mamalurò sù ipakuá na nira ta áddè ta pate ra (1:19).

Á pabbibbik tam sù libru, máwák nga nonopat tam ta mattutubbâ nga magistoriá si Kuan ta nasingan na nga panákkilalán ta jigâ nga mesimmu sangaw áんな yù napiá nga mesimmu paga noka ta kabalin na ággo na jigâ, tapè mabannáyán yù nonò tam.

Á sittam ngámin nga mangikatalâ kâ Apu Kesu, mábbágán ittam megapu sù pabbibbik tam sawe libru, pappanganâ ta kagian na yù napiá nga ággít tam ta kesipâ tam kâ Namarò sangaw nu kabalin na mamaígikáru sù naráké (21:3-4). A yáyù nga mabannáyán laguk yù nonò tam áんな mapatattam ittam, ta yáyù iddanamát tam.

### *Yù Mayán nayù Libru*

- Paddios ni Kuan áんな Paddáyo na kâ Apu Namarò (1:1-8)
- Yù Pappasingan ni Apu Kesu Kiristu nga Naginnanolayin (1:9-20)
- Yù Bilin ni Apu sù ira Tatolay ta Pitu nga Ággagammungâd da (2:1-3:22)
- Yù Mesimmu paga Sangaw nu Duttál yù Ággo na (4:1-22:21)
- Yù Pakimore ra kâ Apu ta Lángi (4:1-11)
- Yù Papel nga Nalukù nga Pitu yù Neparakkâ kuna áんな yù Kígaw na Karneru (5:1-14)
- Yù Naggapu sù Papel nga Nalukù nga Pitu yù Neparakkâ kuna (6:1-17)
- Yù 144,000 nga Ginakâ ni Israel nga Sinullâ ni Namarò ta Tatole na (7:1-17)
- Yù Mekapitu nga Neparakkâ áんな yù Pitu nga Amariung (8:1-11:19)
- Yù Mallakay nga Kagang áんな yù Duá nga Ayám nga Makánnanássing (12:1-13:18)
- Yù Pangikállâ ni Namarò sù ira Mangikatalâ kuna, áんな yù Pamagikáru na sù ira Ari Manguruk kuna (14:1-15:8)
- Yù 144,000 nga Tatolay nga Kábulun nayù Kígaw nga Karneru (14:1-5)
- Yù Inílayalayá nayù ira Tallu nga Daroban (14:6-13)
- Yù Meyárik ta Paggaták áんな Pappusik ta Dabbuno (14:14-20)
- Yù ira Pitu nga Jigâ nga Maporián (15:1-8)
- Yù ira Pitu nga Malukung nga Napannu ta Pore ni Namarò (16:1-21)
- Yù Pangappù ni Namarò sù ira Malussaw kuna ta Dabbuno (17:1-18:24)
- Yù Meyannung sù Naráké nga Babay nga Makkabáyu ta Ayám (17:1-18)
- Yù Kararál nayù Ili nga Meyárik ta Ili na Babilonia (18:1-24)
- Meparáyaw si Namarò ta Lángi (19:1-21)
- Yù 1,000 nga Dagun nga Pammagure ni Apu Kesu Kiristu ta Dabbuno (20:1-6)
- Yù Kepayáng ni Satanas ta Impiernu (20:7-10)
- Yù Pamanunnù ni Namarò sù ira Námmatay (20:11-15)
- Yù Bagu nga Lángi áんな yù Bagu nga Dabbun (21:1-8)
- Yù Bagu nga Ili na Jerusalem (21:9-22:5)
- Mattoli si Apu Kesu Kiristu sangaw (22:6-21)

\* Netûrâ saw yù meyannung sù mesimmu sangaw nu mabi,\* nga inipalappâ ni Namarò kâ Apu Kesu Kiristu. Inibilin ni Namarò kâ Apu Kesu, tapè ipakánnámmu na sù ira

masserbi kuna. Á yáyù nga jinok na laguk ni Apu Kesu yù daroban na ta umay nga mangipakánnámmu nikán. Á sikán si Kuan nga masserbi kuna.

<sup>2</sup> Á sinistiguák ku yù ngámin nga nasingák ku nga meyannung sù bilin ni Namarò áんな yù ngámin nga kinagi ni Apu Kesu Kiristu nikán áんな yù kingnguá na.

<sup>3</sup> Á pagayáyatán ni Namarò sikayu ngámin nga mabbibbik sawe libru nga meyannung sù mesimmu sangaw áんな yù ira nga magginná ta pabbibbik naw kuna, sikayu ngámin nga manángngák nga manguruk sù kagian na yawe túrâ. Ta ari mabayák, á mesimmu ngámin nga netúrá saw.<sup>†</sup>

*Paddios ni Kuan áんな Paddáyo na kâ Apu Namarò*

<sup>4</sup> Sikán si Kuan, á mattúráká nikayu nga tatole ni Namarò, nga makimoray kuna sù ira pitu ngá ággagammungán ta purubinsia na Asia.

Parè bì ta ikállà na kayu ni Namarò

áんな iyawâna nikayu yù napiá nga nonò naw, tapè magimammà kayu.

Si Namarò yù Eggá kunangan,

nga awán ta pamegapu na áんな awán ta pagáddekan na.

Á parè bì ta ikállà na kayu gapay nayù Ikararuá ni Namarò,

áんな paggimammattan na kayu.

Maggián yù Ikararuá na ta arubáng nayù ággitubangán ni Namarò,

nga eggá kuna yù pitu nga pakáwayyá na nga makkakerumá.

<sup>5</sup> Á parè bì ta ikállà na kayu gapay ni Apu Kesu Kiristu,

á pagimammattan na kayu.

Si Apu Kesu Kiristu yù mekatalà

nga mangipakánnámmu ta meyannung kâ Namarò.

Si Apu Kesu Kiristu yù napolu nga naginnanolay nga naggapu sù ira námmatay.

Aggina yù Kotunán nga Patul nga mammaguray sù ira tatolay nga mammaguray ta dabbuno.

Dayáwat tam laguk si Apu Kesu Kiristu. Aggina yù mangiddù nittam.

Á initapil na yù baggi na megapu nittam.

Á pinalubbâng na ittam,

megapu sù dâga na nga mangari sù liwiliwâ tam.

<sup>6</sup> Á inisipà na ittam sù pammagure na,

tapè mammaguray ittam gapay.

Á pinabbalin na ittam ta páppári,

nga masserbi kâ Namarò nga Yáma na.

Parè bì ta meparáyaw si Apu Kesu Kiristu ta áddè ta áddè.

Aggina yù kotunán nga mammaguray ta áddè ta áddè.

Mapalurò. Ammán.

<sup>7</sup> Á ginán naw ta napiá, ta manoli sangaw si Apu Kesu Kiristu,

nga masingan nga mappángè ta dabbuno, nga mepulù ta kunam.

Á yù ira ngámin nga tatolay, masingad da ta kunam,

mássiki yù ira ngámin nga namíká kuna.

Á yù ira ngámin nga makkakerumá nga tatolay ta dabuno, nga ari manguruk kuna,

maraddam ira nga makkulé ta assing da, gapu ta duttál yù pamagikáru na nira.

Kuruk nga mapalurò yaw. Ammán.

<sup>8</sup> Á yawe yù kagian ni Apu Namarò, "Sikán yù Namarò ta ngámin nga ajjan áんな yù Mamabbalin ta ngámin."<sup>‡</sup> Sikán yù Eggá kunangan, nga awán ta pamegapu na áんな awán ta pagáddekan na, yù Makáwayyá ta ngámin," kun na.

*Yú Pappasingan ni Apu Kesu Kiristu nga Naginnanolayin*

<sup>9</sup> Sikán si Kuan nga wagi naw megapu sù panguruk tam kâ Apu Kesu. Á gapu ta kepatatádde tam kâ Apu Kesu, mepagittá ittam nga mangiyangngà ta jigâ. Á magattam ittam lâ, gapu ta mesipâ ittam gapay kâ Apu Kesu sù pammagure na. Á jinigirigâ dangá nayù ira ari manguruk, á pinapáno rangâ nga inipeyángay ta pugu na Patmus, gapu ta pangilayalayâ ku sù bilin ni Namarò áんな yù kuruk nga meyannung kâ Apu Kesu.

<sup>10</sup> Á tádday nga ággo na Liggu<sup>§</sup>, á kunnay ta sinangngalán nangà nayù Ikararuá ni

<sup>†</sup> 1:3 Abbágán na ittam nayù Mangilin nga Ikararuá, tapè kánnámmuát tam yù kebalinán yù bibbirat tam: 1 Korinto 2:10-16; 1 Kuan 2:27; Nepalappâ 19:10.    <sup>‡</sup> 1:8 Ta ággubuk na Gareko, "Sikán yù mangngágan ta Alpa áんな Omega."

Á **Alpa** yù purmero nga letra nayù abakada na Gareko, áんな **Omega** yù kaporianán nga letra.    <sup>§</sup> 1:10 Liggu yù mangngágan gapay ta Ággo ni Apu, ta yáyù ággaw nga paginnanole na.

Namarò, á kunnayà ta mattatagenà, á naginnâ ta likuk ku yù ngárál nga masikan, nga kunnay ta amariung.

<sup>11</sup> Á kinagi na nikán, "Itúrâ mu ta libru yù masingam mu, á itubbuk mu laguk sù ira tatolè nga makimoray nikán sù ira pitu nga ággagammungán sù ira ili na Epeso, Esmerna, Pergamu, Tiyatira, Sardis, Piladelpia, á ta ili na Lodisia gapay," kun na.

<sup>12</sup> Á pakaginnâ sù ngárál, nallipayà, tapè innak ku yù magubobuk nikán. Á nasingak ku pitu ira nga nanáddagán na isingan, nga bulawán.

<sup>13</sup> Á ta tangngá nayù ira pitu nga nanáddagán na isingan eggâ yù kun na tolay nga Kaká na ngámin na tatolay,\* nga nanáddak nga nabbarawási ta apaddu nga nakáddè ta takki na yù kapaddu na, á nebarakâ ta gáko na yù gámì nga bulawán.

<sup>14</sup> Á kitapuraw yù duddù na nga kun na kápâ. Á yù matá na, naggatang ta kun na api.

<sup>15</sup> Á nasiling yù takki na ta kun na baronsi nga nalunák ta api, nga napalinis ta napiá. Á kun na sarò na dakal nga bagi yù ngárál na.

<sup>16</sup> Á sinangngalán na ta jiwanán nga limá na yù pitu nga bituan. Á ajjan nga mallawán ta simù na yù kunnay sù bayunetá nga duá yù ngárak na nga nataram.<sup>†</sup> Á manawák yù mammang na nga kunnay ta paddalingárang na bilák ta tangngá na ággaw.

<sup>17</sup> Á pakasingak ku kâ Apu, á napalakagà ta arubáng na, nga kunnay ta natay. Á kimmâ nangâ sù jiwanán nga limá na, á kinagi na nikán, "Ari ka maganássing, ta sikán yaw. Sikán yù maggiánin sù awán paga ta naparò, á sikán yù maggián lâ paga ta kabalin na ngámin. Sikán yù Olu áんな yù Kaporianán.

<sup>18</sup> Sikán yù sigga-inángà nga matolay. Á sù ngaw, natayà. Ngam naginnanolayà, ta sikán yù Eggá, nga matolay ta áddé ta áddé. Sikán yù mammaguray sù ira ikararuá nga eggâ ta gián na námmatay, ta sikán yù manangngal ta ánnusi nayù paggianád da ta Kades.

<sup>19</sup> "Itúrâ mu laguk yù ngámin nga nasingam mu, áんな yù ipasingak ku nikaw nga keyarigán nayù eggâ kunangane áんな yù mesimmu paga sangaw nu duttál yù ággó na.

<sup>20</sup> Á kagiak ku laguk yù ari ngaw nepakánnámmu nga meyannung sù ira pitu nga bituan nga nasingam mu gangü ta jiwanán nga limâ. Sikán yù mallakalakák ta tangngá nayù ira pitu nga nanáddagán na isingan nga bulawán. Á ginnán naw yù kagiak ku nikayu.

<sup>2</sup> "Ammù gemma yù akka-akkuán naw. Ammù ta malláppâ kayu nga mattarabáku megapu nikán, áんな napasigaggâ kayu nga magattam, mássiki nu marigirigâ kayu. Á ammù ta ipuerá naw yù ira nga mangnguá ta narákè, á pinasikkál naw yù ira nga makkagi ta aggira yù minángngilayalayâ, nga ari kuruk, á natákkilalán naw ta massirisiri ira.

<sup>3</sup> Ammù ta napasigaggâ yù ángngikatalâ naw nikán, mássiki nu marigirigâ kayu megapu sù panguruk naw nikán, á ari kayu nalarâ.

<sup>4</sup> "Ngam ajian yù meyannung nikayu nga arák ku ikáyâ. Arán nawà iddukan ta kunnay sù ángngiddù naw ngaw ta kapángnguruk naw nikán, gapu ta arán nawin iddukan yù ira kábulun naw.

<sup>5</sup> Nononopan naw laguk yù ngaw napiá nga ángngiddù naw nikán. Pallikuránán naw yù liwiliwâ naw, á akkuán naw má yù kunnay sù napiá nga kingnguá naw ngaw. Nu arán naw ibabáwi yù liwiliwâ naw, umayà ta gián naw, á iriák ku yù nanáddagán na isingan naw sù gián na, á sikayu gemma yù kebalinán nayù nanáddagán na isingan nga iriák ku.

<sup>6</sup> Ngam ajian yù akkuán naw nga napiá, ta ikalusso naw yù narákè nga akka-akkuán nayù ira nga metáddy sù ira nga mangngágân ta Nikoletan, á ikalussò gapay yù narákè nga akka-akkuád da.

<sup>7</sup> "Nu egga talingá naw, ginnán naw yù kagian nayù Ikararuá ni Namarò sù ira maggagammung nga makimoray nikán. Sikayu nga ari tumulù kâ Satanas, sikayu yù mangappù sù narákè. Á alawatat takayu, tapè mepaggián kayu nga mepagayáyâ kâ

\* 1:13 Si Apu Kesus Kiristu yù Kaká na ngámin na tatolay. Innam mu 14:14 **futnot** † 1:16 Kebru 4:12

Namarò ta áddè ta áddè, á iyawâ ku nikayu yù awayyá naw nga kumán sù bungá na káyu nga ákkatole naw ta áddè ta áddè, nga eggâ ta nakástâ nga garden ni Namarò."

*Yù Bilin ni Apu sù ira Maggagammung ta Esmerna nga Marigirigâ*

<sup>8</sup> Á kinagi na gapay ni Apu nikán, "Itúrâ mu yawe, nga iyawâ mu sù manaron sù ira tatolè nga maggagammung ta Esmerna:

"Sikán yù naggiánin sù awán paga ta naparò, á sikán yù maggián lâ paga sù kabalín na ngámin. Sikán yù ngaw natay, nga naginnanolayin. Á yawe yù bilik ku nikayu.

<sup>9</sup> "Ammù gemma ta marigirigâ kayu ánnna pobare, ngam kunnay kayu ta maríku ta ánnninganán ni Namarò. Ammù ta lillibatad da kayu nayù ira nga makkagi ta Kudio ira, ngam ari ga. Ta ari ira mebiláng sù ira kuruk nga Kudio, gapu ta tumuttul ira kâ Satanás.

<sup>10</sup> "Ngam sikayu nga manguruk nikán, ari kayu maganássing sù jigâ ngá umay nikayu sangaw. Ta parubán na kayu ni Satanás, á ipekarsel na yù ira kárúán nikayu. Á marigirigâ kayu ta mapulu nga ággaw. Á mássiki nu papatáyad da kayu, uputan naw yù ángnguruk naw nikán. Ta nu napasigaggâ yù ángnguruk naw nikán, iyawâ ku nikayu yù meyárik ta kuroná naw, nga inángâ naw nga awán ta áddè na.

<sup>11</sup> "Nu eggâ yù talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray nikán. Sikayu nga ari tumulù kâ Satanás, sikayu yù mangappù sù narákè, á ari kayu mekanakanâ sù pangukum ni Namarò nga mangngáagan ta mekaruá nga patay."

*Yù Bilin ni Apu sù ira Maggagammung ta Pergamu nga Magginná sù Ari Kuruk*

<sup>12</sup> Á kinagi ni Apu gapay, "Itúrâ mu yawe, nga iyawâ mu sù manaron sù ira tatolè nga maggagammung ta Pergamu:

"Sikán yù makákkua sù bayunetá nga aijan yù duá ngárák na nga nataram. Á yawe yù bilik ku nikayu.

<sup>13</sup> Ammù gemma yù paggianán naw, ta makipaggian kayu sù ili nga paggianán nayù ira makiyápu kâ Satanás. Ngam sikayu, napasigaggâ yù ángnguruk naw nikán. Á ammù yù kingnguá nayù ira kelián naw kâ Antipas, nga yù ngaw napasigaggâ nga minángngilayalayâ sù bilik ku, ta ginápù da, á pinapáte ra. Á mássiki ta pamapáte ra kâ Antipas, arán naw nallikuránán yù panguruk naw nikán.

<sup>14</sup> "Ngam aijan lâ paga yù meyannung nikayu nga arák ku ikáyâ. Aijan nikayu yù ira tumuttul sù inituddu na ngaw ni Balam kâ Balak, ta inituddu na ngaw sù ira ginakâ ni Israel yù pakkákâd da ta meyátang sù ira sináddios ánnna yù keruruk da ta arâd da atáwa, tapè malliwâ ira.

<sup>15</sup> Á aijan nikayu gapay yù ira nga tumuttul sù ituddu nayù ira nga mangngáagan ta Nikoletan.

<sup>16</sup> Mabbabáwi kayu laguk, á pallikuránán naw yù liwâ naw. Nu arán naw ibabáwi yù liwâ naw, á umayâ sangaw nikayu, tapè gerrák ku yù ira nga mekanakanâ ta narákè. Á nagármasâ sù bayunetá nga mallawán ta simù ku, á yù kebalinán na yù ubobuk ni Namarò.

<sup>17</sup> "Nu eggâ talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray nikán. Sikayu nga ari tumulù kâ Satanás, sikayu yù mangappù sù narákè. Á iyawâ ku nikayu yù kanan nga mangngáagan ta manna,\* nga pinakappiák ku nga netuttù lâ paga. Á iyawâ ku gapay nikayu nga katággitádday yù puraw nga batu, nga eggâ nga netúrâ kuna yù bagu nga ngágan nayù nangalawâ kuna, nga awán ta makánnámu, nu ari galâ yù nangalawâ kuna."

*Yù Bilin ni Apu sù ira Maggagammung ta Tiyatira nga Nekanâ sù ira Mangnguá ta Narákè*

<sup>18</sup> Á kinagi na gapay, "Itúrâ mu yawe nga iyawâ mu sù manaron sù ira tatolè nga maggagammung ta Tiyatira:

"Sikán yù Anâ ni Namarò nga eggâ yù matá na nga naggatang ta kun na api, ánnna nassiling yù takki na ta kun na baronsi nga nalunák ta api, nga napalinis ta napiá. Á yawe yù bilik ku nikayu.

<sup>19</sup> Ammù gemma yù akka-akkuán naw. Ammù yù ángngiddù naw nikán, á ammù ta napasigaggâ yù ángnguruk naw nikán. Ammù yù ángngabbák naw sù ira kábulun naw. Á ammù yù ággattam naw sù jigâ. Á mangáppípiá kayu, ta aru yù napiá nga akka-akkuán naw ánné sù kingnguá naw ngaw.

\* <sup>2:17</sup> Manna yù kanan nga naggapu ta lángi nga iniyawâ ni Apu Namarò sù ira ginakâ ni Israel, nga kanad da ta panaron ni Moyses nira ta kalállamatán. Si Apu Kesu yù manotolay nittam, nga meyárik ta kanat tam. Bibbiran naw Kuan 6:33, 47-48, 54.

<sup>20</sup> Ngam aijan yù akkuán naw nga arák ku ikáyâ. Anugutan naw garè yù pangituddu nayù mattá-ábbilinán, nga meyárik sù ngaw babay nga mangngágan ta Jesabel, gapu ta negittá yù ággangnguá na sù kingnguá na ngaw ni Jesabel. Massirisiri, á kagian na ta sikán yù naddok kuna, tapè ilogò na yù ira tatolay nga masserbi nikán, á kagumánan na ira ta makaliwâ ira nga mangarallaw ánnâ kumán ta kanan nga neyátáng ta sináddios.

<sup>21</sup> Á nabayágîn nga iniddagák ku yù pabbabáwi na ta liwâ na, ngam molang na ikáyâ ibabáwi yù pakikarallo na.

<sup>22</sup> “Á yaw laguk yù akkuák ku. Pattakitak ku yù meyárik sù ngaw Jesabel. Á mesipà gapay nga marigirigâ yù ira ngámîn nga kinaruruk na, ta panigirigâ ku kuna, nu arád da ibabáwi yù akkuád da. Á magaráyan ira nga mangiyangngâ ta jígâ da.

<sup>23</sup> Á papatayah ku yù ira nga kun na ánâ na, nga simintuttu sù narákè nga ituddu na. Á yù ngámîn ira nga mangikalà nikán ta ngámîn nga ággagammungâda, kánnámmuád da laguk ta sikán yù makánnámmu sù nonò na ngámîn nga tatolay ánnâ yù karagatád da. Á bálatat takayu nga taggitáddyta mepángngâ sù kingnguá na.

<sup>24</sup> “Ngam sikayu nga kárúán ta Tiyatira, arán naw inalawâ yù narákè nga ituddu nayù meyárik ta Jesabel, á arán naw ginigiámmu yù ituddu ra nga kagiad da ta monak nga naggapu kâ Satanas. Á napiá ta arán naw ira tángngagan. Awánin ta ilannâ ku sù ipakuâ nikayu.

<sup>25</sup> Uputan naw lá yù napiá nga akka-akkuán naw ánnâ yù ángnguruk naw nikán ta áddè ta labbè ku.

<sup>26</sup> “Á sikayu nga taggitáddyta mangappu sù narákè, nga ari tumulù kâ Satanas, nga mapalurò sù napiá nga ipakuâ kuna ta áddè ta pate na, á iyawâ ku nikayu yù pakáwayyá na nong magmauray sù ira ngámîn nga makkakerumá nga tatolay ta dabbuno.

<sup>27</sup> Á awán ta makatubáng nikayu. Á yù ira tatolay nga mangnuá ta narákè, pággangan naw ira, á mepárik ira ta bângâ nga napakkâ gapu ta napalù ira ta baston naw nga balayáng. Ta sikán, inalawâ ku sù Yámâ yù pakáwayyá nga magmauray. Á yáyù nga isipà takayu.

<sup>28</sup> Á iyawâ ku gapay nikayu yù darámmagan.

<sup>29</sup> “Nu eggá talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray nikán.”

### 3

#### *Yù Bilin ni Apu sù ira Maggagammung ta Sardis nga Meyárik ta Natay*

<sup>1</sup> Á kinagi ni Apu gapay, “Itúrâ mu yawe, nga iyawâ mu sù manaron sù ira tatolè nga maggagammung ta Sardis:

“Eggá nikán yù Ikararuá ni Namarò nga pitu yù pakáwayyá na. Á sikán yù manangngal sù ira pitu nga bituan. Á yawe yù bilik ku nikayu.

“Ammù gemma yù akka-akkuán naw. Neparámak ta napiá yù panguruk naw nikán, nga kunnay ta matolay kayu, ngam ari kuruk, ta arán naw kurugan yù ituddù nikayu, á kunnay kayu ta natayin.

<sup>2</sup> Á arán naw garè matákkilál yù kuruk nga ággíán naw. Sikayu yù kunnay sù nakkaturuk. Arâ! Magímmunaw kayu laguk. Ipasigaggâ naw yù eggá paga nikayu nga ángnguruk naw nikán, marakè malurâ kayu nga manguruk nikán. Ta pinasikkál ku yù akka-akkuán naw, á awán paga ta máyâ sù ánniganán ni Namarò.

<sup>3</sup> Nonopan naw yù gininná naw nga inalawâ naw ngaw, á ipatattam naw laguk ta nonò naw. Á mabbabáwi kayu sù liwiliwâ naw. Nu ari kayu mallukák, tapè pallikuránán naw yù liwiliwâ naw, á ikáddagâ ku umay ta kunnay ta makkokò, ta arán naw ammu yù oras na dattál ku nikayu.

<sup>4</sup> “Ngam aijan paga yù ira baddì lá nikayu nga taga Sardis nga ari mekanakanâ sù narákè, á meyárik ira ta tolay nga ari narapingán yù gámì na. Á yáyù nga mepulupulù ira nikán, nga mabbarawási ta puraw, ta aggira yù mepángngâ nga kábuluk ku.

<sup>5</sup> Yù ira ngámîn nga ari tumulù kâ Satanas, mangappu ira sù narákè, á mabbarawási ira ta puraw. Á arák ku irián yù ngágad da sù libru nga naketúratán nayù ngágan nayù ira ngámîn nga tatolè, aggira nga iddák ku ta inángâ nga awán ta áddè na. Á ipakánnámmu yù ngágad da kári Ammó ku nga Namarò ánnâ yù ira daroban na, ánnâ kagiak ku kári Ammó ta aggira yù tatolè.

<sup>6</sup> “Nu eggá talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray nikán.”

*Yù Bilin ni Apu sù ira Maggagammung ta Piladelpia nga Sinullà na ta Mangipakánnámmu kuna*

<sup>7</sup> Á kinagi ni Apu gapay nikán, “Itúrâ mu yawe nga iyawâ mu sù manaron sù ira tatolè nga maggagammung ta Piladelpia:

“Sikán yù mangilin. Sikán yù pangikatalakán. Á sikán yù makáwayyá nga mammaguray ta ngámin, nga mangnguá ta maguray lâ nga ikáyâ ku, á awán ta makagammá nikán. Kunayà ta manangngal ta ánnusi sù pammagurayán ni Patul Dabid. Á nu bukaták ku, awán ta makelitù kuna. Á nu ilitù ku, awán gapay ta makabukâ kuna. Á yawe yù bilik ku nikayu.

<sup>8</sup> “Ammù gemma yù akka-akkuán naw, ta mássiki nu baddì sikayu nga maggagammung tán, ánná baddì lâ yù pakáwayyá naw, ngam kinuruk naw yù ubobuk ku, á arán naw inilímak yù ángngikatalà naw nikán. Á yáyù nga binukaták ku ta arubâng naw yù kun na puertá nga áttallangán naw, á awán ta makelitù kuna.

<sup>9</sup> Ginnán naw yaw. Ajjan nikayu yù ira Kudio nga massiri, ta kagiad da ta tatole ni Namarò ira gapu ta Kudio ira. Ngam ari kuruk yù kagiad da, gapu ta tumututtul ira kâ Satanás. Á puersák ku ira ta umay ira mamañittukâ ta arubâng naw, tapè kánnámmuád da ta sikayu yù iddi-iddukak ku.

<sup>10</sup> “Á gapu ta napasigaggâ yù ángnguruk naw sù kinagi nga meyannung ta pagattam naw ta jigâ naw, á yáyù nga iyígú takayu, tapè arán na kayu dattálan nayù jíga nga mesimmu sangaw. Ta duettál sangaw yù dakal nga jigâ ta dabbuno, tapè maparubá yù ira ngámin nga tatolay ánná mepasingan nu kunnasi yù nonò da megapu sù jíga.

<sup>11</sup> Á umayà sangaw. Tángngagan naw laguk yù kuruk nga metuddu nikayu ánná uputan naw yù napiá nga akkuán naw, tapè awán ta maggubâ sù bálâ naw, nga kun na kuroná naw nga iyawâ ku sù ira katággitáddyay nga mangappu ta naráké.

<sup>12</sup> Á ngámin ira nga mangappu ta naráké, patallungak ku ira sù bale ni Namarò ta lángi, á iyawâ ku nira yù maláddá nga paggianád da tán, á kunnay ira ta kallang na balay nga ari bulubugá meyalí. Á imárkâ nira yù ngágán ni Namarò nga pakimorayák ku ánná yù ngágán nayù ilí ni Namarò gapay, nga bagu nga Jerusalem, nga maggapu ta lángi nga umay ta dabbungo. Á imárkâ gapay nira yù bagu nga ngágak ku.

<sup>13</sup> “Nu eggâ talingâ naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray nikán.”

*Yù Bilin ni Apu sù ira Maggagammung ta Lodisia nga Mattalakák*

<sup>14</sup> Á kinagi ni Apu gapay nikán, “Itúrâ mu yawe nga iyawâ mu sù manaron sù ira tatolè nga maggagammung ta Lodisia:

“Sikán yù mangngágán ta Ammán! Sikán yù pangikatalakán nga mangipakánnámmu sù kuruk nga bilin ni Namarò. Á sikán yù paggapuán na ngámin nga pinarò ni Namarò. Á yawe yù bilik ku nikayu.

<sup>15</sup> “Ammù gemma yù akkuán naw. Mabbábâng kayu nga manguruk nikán. Ari kayin naláppâ nga tumuttul nikán. Meyárik kayu ta inuman nga ari kuruk nga malannaw, ngam ari gapay mapátu. Á nu kunnay kayu ta mapátu, á malláppâ kayu nakuan nga mangnguá sù ipakuâ nikayu, á napiá nakuan yù ángnguruk naw nikán. Á nu kunnay kayu ta malannaw, arán nawà nakuan ammu. Parè bi nakuan ta mappíli kayu nu kuruk nga manguruk kayu nikán, onu ari.

<sup>16</sup> Á gapu ta meyárik kayu ta danum nga mejo nalubbâ, arák ku ikáyâ yù kunnian, á yáyù nga kunnay ta ilúták takayu!

<sup>17</sup> Ta kagian naw ta napiá yù ággíán naw, gapu ta maríku kayu nga awán ta máwák naw. Ngam arán naw garé ammu yù kuruk nga ággíán naw, ta kábbi kayu nga makállállâ. Kuruk naga kunnay kayu ta kitapobare, nga buling, nga nagilongán!

<sup>18</sup> “Á yáyù nga taddánát takayu, ta e kayu nikán nga mangâ ta ángnguruk naw, ta sikán yù kunnay sù paggatángan naw ta napiá nga ángnguruk naw nga meyárik ta buláwan nga nalunák ta api, nga nalinis, tapè kuruk nga maríku kayu ta ánninanán ni Namarò nikayu. Á mangâ kayu sù meyárik ta puraw nga barawási naw, tapè ari kayu yù kun na nagilongán nga mappasirán. Á mangâ kayu sù meyárik ta uru nga ileruk naw ta matá naw, tapè makasingan kayu ta napiá.

<sup>19</sup> “Á yù ira nga ayatak ku, gammák ku ira, á pággangak ku ira, tapè mapággáng ira, nga napiá yù nonò da. Arà! Mabbabáwi kayu laguk. Pallikuránán naw yù liwiliwâ naw, á ipasigaggâ naw yù panguruk naw nikán.

<sup>20</sup> Á tángngagan naw yù kagiak ku, ta ajjanà nga kun na tolay nga maggián ta puertá nga mattottò nga magágál. Nu ajjan yù makaginná nikán, á bukatán na laguk yù puertá, á tullungà nga mepakkákán kuna.

<sup>21</sup> Yù ira nga mangappù ta narákè, iyawâ ku nira yù pakáwayyá ra nga mepagitubang nikán nga mepammaguray. Aggira yù kunnay nikán, ta sikán yù nangappù, á nepagitubangà sù Yámà nga mepammaguray.

<sup>22</sup> "Nu eggâ talingá naw, ginnán naw yù kagian nayù Ikararuá ni Namarò sù ira mangruk nga maggagammung nga makimoray nikán."

## 4

### *Yù Pakimore ra kâ Apu ta Lângî*

<sup>1</sup> Kabalik ku nga nattúrâ, sinánguk ku, á nasingak ku yù puertá nga nabukatán ta lángì. Á naginnâ má yù ngárál nga nagubobuk gangù nikán nga kun na amariung. Á kinagi na, "E ka bi saw, ta ipasingak ku nikaw yù mesimmu ta pappasá na yaw," kun na nikán.

<sup>2</sup> Á pagubobuk na, dagarágâ nga sinangngalan nangà nayù Ikararuá ni Namarò. Á nasingak ku ta lángì yù ággitubangán nayù mammaguray, nga eggâ yù nagitubang kuna.

<sup>3</sup> Á nasiling yù nagitubangán, nga naddalingárang ta malitáw nga kun na duá kaláse nga nanginá nga batu, nga jasper nga kun na api yù kulor na, áんな karnelia nga malitáw nga kun na bilák yù kulor na. Á nelepuán sù ággitubangán na yù kun na bullun nga nasiling ta kunnay sù ássiling nayù nanginá nga batu nga malitáw, nga mangngágân ta emaral, nga berdi yù kulor na.

<sup>4</sup> Á eggâ gapay nga nelepuán sù ággitubangán nayù mammaguray yù duápulu ta appâ nga ággitubangán nayù ira mepammaguray. Á nagitubang nira yù duápulu ta appâ nga lállakalákay nga nabbarawási ta puraw, nga nakuronán ta buláwán.

<sup>5</sup> Á naggapu sù tangngá nayù ággitubangán nayù mammaguray yù kilâ ánnâ yù alittúgaw nga sigídâ makkagakagi. Á ta arubâng nayù ággitubangán na eggâ yù pitu nga isingan nga naggatang. Aggira yù keyarigán nayù pitu nga pakáwayyá nayù Ikararuá ni Namarò.

<sup>6</sup> Á eggâ gapay ta arubâng nayù ággitubangán na yù kun na bebay nga nalinák, nga napadday ta bidduru, nga malinis ánnâ malitáw.

Á eggâ yù appâ nga makkakerumá nga naparò nga matolay nga nelepuán sù ággitubangán nayù mammaguray. Á aru yù ira matá ra ta ngámin nga baggi ra ta arubâng da ánnâ barâda.

<sup>7</sup> Á yù tádday nga naparò nga matolay yù kun na layon, nga simaron nga ayám. Á kun na toro yù mekaruá. Á yù mammang nayù mekatallu, kun na mammang na tolay. Á yù mekáppâ, kun na bukkaw nga makkayakayák.

<sup>8</sup> Á yù ira appâ nga makkakerumá nga naparò nga matolay, eggâ sù katággitádday yù annam nga payâ da, nga aru gapay yù matá ra ta utun ánnâ unak nayù payâ da. Á makkansion ira sù áddáyo ra kâ Namarò, nga ari mattukkâ ta ággaw ánnâ gabi. A yawe yù kansiod da:

"Mangilin! Mangilin! Mangilin si Apu Namarò,  
nga makáwayyá ta ngámin.

Aggina yù naggián áddé ngaw gári,  
nga maggián ta áddé kunangane,  
á maggián lâ paga ta áddé ta áddé."

<sup>9</sup> Á pakimore nayù ira appâ nga makkakerumá nga naparò nga matolay sù Eggâ nga nagitubang nga mammaguray nga matolay ta áddé ta áddé, á kansionad da yù áddáyo ra kuna ánnâ yù ábbalabálâ da kuna.

<sup>10</sup> Á pakkansiod da, megiddán nga makimoray yù ira duápulu ta appâ nga lállakalákay, nga mamalittúkak nga mallakak ta arubâng nayù Eggâ nga nagitubang nga mammaguray nga matolay ta áddé ta áddé. Á ta pakimore ra kuna, iriád da yù kuroná ra, nga ipe ra ta arubâng nayù Eggâ nga nagitubang nga mammaguray. Á yawe yù kagiad da kâ Apu ta pakkansiod da kuna:

<sup>11</sup> "Síkaw, Apu, yù Yápu mi nga Namarò nikami!  
Síkaw yù Eggâ nga kepángngatán nga pakimoreyám mi ánnâ paddáyawám mi,  
ta sikaw yù kotunán nga makáwayyá.  
Síkaw yù Namarò, á pinarò mu ngámin.  
Síkaw yù maguray ta parotam mu,  
á maggián ngámin yù pinarò mu megapu ta urem."

Yáyù kansiod da.

## 5

*Yù Papel nga Nalukù nga Pitu yù Neparakkà kuna áんな Yù Kígaw na Karneru*

<sup>1</sup> Á kabalin na yaw, nasingak ku ta lángì yù mammaguray nga nagitubang, nga sinangngalán na ta jiwanán nga limá na yù papel nga nalukù, nga nassiddúa nga ábbagán nga natúratán. Á ajjan yù pitu nga neparakkà kuna, tapè ari mabullarán.

<sup>2</sup> Á nasingak ku yù masikan nga daroban ni Namarò, nga makkátol ta masikan. Á inikátol na, "Asinni yù makáwayyá nga mangari ta neparakkà sù papel nga nalukù, tapè mabullarán na?" kun na.

<sup>3</sup> Ngam awán bulubugá ta makáwayyá nga mangari sù ira neparakkà, mássiki yù ira ajjan ta lángi, onu dabbuno, onu ta unak na dabbuno sù gián na námmatay, tapè masingan na nakuan yù ajjan ta unak na.

<sup>4</sup> Á nakkulukulekà ta daddam ku gapu ta awán ta nálek da nga makáwayyá nga mangullák sù papel nga nalukù, tapè masingan na nakuan yù ajjan ta unak.

<sup>5</sup> Á ta pakkulukulé ku, kinagi nayù tádday nga lakalákay nikán, "Ari ka makkulé, ta innam mu. Makáwayyá si Apu Kesu nga mangari sù ira pitu nga neparakkà, tapè mabullarán yù papel nga nalukù, gapu ta aggina yù nangappù sù naráké. Aggina yù ginaká ni Patul Dabid na ingágad da gapay ta Layon nga naggapu sù ira ginaká ni Juda."

<sup>6</sup> Á nasingak ku laguk yù Kígaw na karneru nga nanáddak sù tangngá ra, ta arubáng nayù ággitubangán nayù mammaguray, nga nalepuán sù ira appâ nga makkakerumá nga naparò nga matolay áんな yù ira duápulu ta appâ nga lállakalákay. Á yù Kígaw, kunnay ta napapátay ngaw. Á pitu yù tágguk na áんな pitu yù matá na, nga keyarigán nayù Ikararuá ni Namarò nga jinok na ta ngámínnga pagáddekan na dabbuno.

<sup>7</sup> Á jimíkki yù Kígaw sù nagitubang nga mammaguray, á inâ na yù nalukù nga papel nga sinangngalán nayù mammaguray sù jiwanán nga limá na.

<sup>8</sup> Á pangâ nayù Kígaw sù papel, namalittúkak nga nallakak yù ira appâ nga makkakerumá nga naparò nga matolay áணna yù ira duápulu ta appâ nga lállakalákay, nga makimoray ta arubáng nayù Kígaw. Á yù ira lállakalákay, sinangngalád da nga katággítáddyay yù árpá na áணna yù malukung nga buláwán nga ajjan kuna yù api nga magatátû ta nabanguk. Á yù kebalinán nayù atû yù ipakimállà nayù ira tatole ni Namarò.

<sup>9</sup> Á nakkansion ira laguk ta bagu nga kansion, nga kud da,  
"Sikaw, Apu, yù makáwayyá nga mangâ sù nalukù nga papel.  
Sikaw yù makáwayyá nga mangari sù neparakkà kuna,  
gapu ta netapil ngaw yù baggim.

Á yù dágam yù nepappágá megapu sù ira tatolay nga makkakerumá yù ággubobuk da, nga maggapu ta ngámínnga lugár,  
tapè kukuá ni Namarò ira.

<sup>10</sup> Á inisipà mu ira sù pammagurem,  
tapè masserbi ira kâ Namarò nga Yápu tam,  
nga kunnay sù passerbi nayù pári.

Á mammaguray ira ta dabbuno."  
Yáyù kinagi nayù ira lállakalákay áணna yù ira appâ nga naparò nga matolay sù pakkansiod da.

<sup>11</sup> Á paningak ku paga, naginnâ laguk yù ngárál nayù aru nga daroban ni Namarò. Jinibíribu ira nga ari mabiláng, nga nelepuán sù ággitubangán nayù mammaguray áணna yù ira appâ nga makkakerumá nga naparò nga matolay áணna yù ira lállakalákay.

<sup>12</sup> Á nakkansion yù ira daroban, nga iniyássikad da yù ngárál da ta pakkansiod da, nga kud da,

"Yù Kígaw nga netapil yù kepángngatán nga pakimorayát tam.  
Aggina yù kotunán nga mammaguray,  
nga maríku nga makákkua ta ngámín.

Á makánnámmu ta ngámín, nga monak yù sírik na.  
Aggina yù kasikanán nga makáwayyá!  
Mepángngà ta aggina yù dayáwat tam.  
Meparáyaw laguk yù Kígaw!"

<sup>13</sup> Á naginnâ yù pakkansion nayù ira ngámin nga naparò, ngámin ira nga maggián ta lángi, ngámin nga maggián ta dabbuno ánnna unak na dabbuno sù gián nayù ira námmatay, ánnna ngámin nga maggián ta bebay. Á nakkansion ira ngámin, á kinagi ra,

"Meparáyaw yù nagitubang nga mammaguray, ánnna yù Kígaw.

Dayáwat tam ira ta áddè ta áddè!

Aggira yù pakimorayát tam, nga maráyaw nga maddalingáráng!

Aggira yù kotunán nga makáwayyá, nga mammaguray ta áddè ta áddè!"

<sup>14</sup> Á yù ira appâ nga makkakerumá nga naparò nga matolay, kinagi ra, "Ammán!" Á namalittúkak nga nallakak yù ira lállakalákay, nga makimoray sù Kígaw ánnna yù nagitubang nga mammaguray.

## 6

### *Yù Naggapu sù Papel nga Nalukù nga Pitu yù Neparakkà kuna*

<sup>1</sup> Á ta paningak ku, nasingak ku yù Kígaw, nga inirián na yù tádday sù ira pitu nga neparakkà sù papel nga nalukù, ánnna naginnâ yù kinagi nayù tádday sù ira appâ nga makkakerumá nga naparò nga matolay, nga kunnay ta alittúgaw yù ngárál na. Á inikátol na nga kinagi, "Umay ka saw!"

<sup>2</sup> Á iningak ku, á inikáddagâ lâ limittuák yù puraw nga kabáyu, nga ajjan yù nakkabáyu kuna nga manangngal ta butuk. Á neddán ta kuroná na, ta aggina yù makáwayyá nga mangappù. Á nánav ta umay mangappù má sù ira mangontará kuna.

<sup>3</sup> Á paningak ku sù Kígaw, á nasingak ku ta inirián na má yù mekaruá sù ira neparakkà, á naginnâ yù ngárál nayù mekaruá nga naparò nga matolay nga nakkatol, á kinagi na, "Umay ka saw!"

<sup>4</sup> Á limittuák yù tádday nga kabáyu nga ujjojin. Á neddán yù nakkabáyu ta bayunetá nga dakal, á neyanugù ta umay mamuruburon sù ngámin ira nga tatolay ta dabbuno, tapé awán ta ággimammâ da, á makkakápatay ira.

<sup>5</sup> Á paningak ku paga sù Kígaw, inirián na má yù mekatallu sù ira neparakkà, á naginnâ yù ngárál nayù mekatallu nga naparò nga matolay nga nakkatol, nga kinagi na, "Umay ka saw!" Á iningak ku, á inikáddagâ lâ limittuák yù ngisi nga kabáyu. Á nanangngal yù nakkabáyu ta ákkílo.

<sup>6</sup> Á naginnâ yù magubobuk nga arák ku ammu yù kuruk nga paggapuán na, nga kunnay ta naggapu sù tangngá nayù ira appâ nga makkakerumá nga naparò nga matolay, á kinagi na, "Duttál yù bisin ta dabbuno, á yáyù nga mediá nga baggâ yù táddán na tolay ta tangággaw. Onu tallu mediá nga mangi yù táddán ta tangággaw. Ngam ari manginá yù pagá na denu onu binaráyáng!"

<sup>7</sup> Á paningak ku sù Kígaw, inirián na má yù mekáppâ sù ira neparakkà, á naginnâ yù ngárál nayù mekáppâ nga naparò nga matolay, á kinagi na, "Umay ka saw!"

<sup>8</sup> Á paningak ku, á ikáddagâ lâ limittuák yù kabáyu nga nappulupulásâ. Á si Patay yù ngágan nayù nakkabáyu kuna, á ajjan yù tumuttul kuna, nga mangngágan ta Kades, nga paggianán na námmatay. Á neddán yù ira duá ta pakáwayyá ra nga mamapátay ta pakkáppâ nayù ira tatolay ta dabbuno. Á ajjan nira yù appâ nga ipamapáte ra, yù gerrá, yù bisin, yù tulágan, ánnna yù ira simaron nga ayám.

<sup>9</sup> Á ta pangari nayù Kígaw sù mekalímá sù ira neparakkà, á nasingak ku, á ajjan ta silárung nayù ángngiyátagán yù ira ikararuá nayù ira napapátay, nga natay gapu ta panguruk da ta bilin ni Namarò ánnna pangituddu ra sù kuruk nga meyannung kâ Apu Kesu Kiristu.

<sup>10</sup> Á nakkatol ira ta masikan, á kinagi ra, "Sikaw, Apu, yù mammaguray nga makáwayyá ta ngámin. Sikaw yù mangilin nga pangikatalakán. Á kunnasi yù kabayák mu paga lagem panunntún ánnna pággangan yù ira tatolay nga maggián ta dabbuno gapu ta pamapáte ra nikami?" kud da.

<sup>11</sup> Á neddán ira nga taggitáddyta puraw nga barawási na nga apaddu. Á nakagi nira ta magibannák ira lábbi paga áddè ta pate nayù ira kábulud da nga makiaripan kâ Apu, nga mapapátyay gapay ta kunnay nira.

<sup>12</sup> Á pangari nayù Kígaw sù mekánnam sù ira neparakkà, á nasingak ku, á nallunik ta masikan. Á nangngisì yù bilák ta kun na gámì nga langgústi. Á nagujjin yù bulán nga kun na kulor na dága.

<sup>13</sup> Á napannâ yù ira bituan ta dabbuno nga kunnay ta kapannâ na bungá na kayu nga busirâ nu mabbaggiu.

14 Á limimmâ yù lágì nga kunnay ta papel nga malukù. Á neyalì yù ngámin nga puddul áんな pugu sù giád da.

15 Á nattálaw laguk yù ira ngámin nga tatolay, yù ira patul áんな yù ira mammaguray, yù ira kotunán na suddálú, yù ira maríku, yù ira makáwayyá, áんな yù ira ngámin nga tatolay, mássiki nu aripan onu ari aripan, minay ira ngámin nattuttù ta kueba áんな silisilárung na batu ta puddupuddul.

16 Á nakkatakatalira, á kinagi ra sù ira puddul áんな batu, "Maddabbâ kayu ta matábbunán kami, tapè arán na kami masingan nayù mammaguray nga nagitubang ta lágì, á melillì kami sù pangukum na nikami nayù Kígaw!"\*

17 Ta jímittálín yù makánnanássing nga ággo nayù pore ra, á ukumad da kami, á awán nikami yù makatubáng kuna!" kud da.

## 7

*Yù 144,000 nga Ginaká ni Israel nga Sinullà ni Namarò ta Tatole na*

1 Pappásá na, ajian laguk yù appâ nga daroban ni Namarò nga nasingak ku nga manáddak sù ira aruk na paggapuán nayù ira appâ nga paddák ta dabbuno, nga mangigaggak sù ira appâ nga paddák, tapè ari mapaddirán yù dabbuno, yù bebay, onu yù káyu.

2 Á nasingak ku yù táddy nga daroban, nga lussáng ta kun na bilák nga naggapu ta állassangán na. Á sinangngalán na yù ámmárkâ nayù Namarò nga matolay. Á kinatolán na yù ira appâ nga daroban nga ajian yù neyawâ nira nga pakáwayyá ra nga mangnúta dabbuno áんな bebay.

3 Á kinagi na nira, "Arán naw lábbi akkuán yù dabbuno, bebay, áんな káyu, ta mapolu bì markák ku yù mukâ nayù ira makiaripan kâ Namarò nga Yápu tam," kun na.

4 Á naginnâ yù biláng nayù ira namárkán na, á magatù ta appátapulu ta appâ nga ribu ira, nga ginaká nayù ira mapulu duá nga áñâ ni Israel.

5 Namárkán yù mapulu duá ribu nga tatolay, nga ginaká nayù ira katággítáddy sù ira mapulu duá nga áñâ ni Israel:

Mapulu duá nga ribu yù namarkán nga naggapu sù ira ginaká ni Juda,

mapulu duá nga ribu nga naggapu sù ira ginaká ni Ruben,

mapulu duá nga ribu nga naggapu sù ira ginaká ni Gad,

<sup>6</sup>mapulu duá nga ribu nga naggapu sù ira ginaká ni Aser,

mapulu duá nga ribu nga naggapu sù ira ginaká ni Neptali,

mapulu duá nga ribu nga naggapu sù ira ginaká ni Manasse,

<sup>7</sup>mapulu duá nga ribu nga naggapu sù ira ginaká ni Simion,

mapulu duá nga ribu nga naggapu sù ira ginaká ni Libi,

mapulu duá nga ribu nga naggapu sù ira ginaká ni Issakar,

<sup>8</sup>mapulu duá nga ribu nga naggapu sù ira ginaká ni Sabulon,

mapulu duá nga ribu nga naggapu sù ira ginaká ni Kusé,

áんな mapulu duá nga ribu nga naggapu sù ira ginaká ni Benjamin.

*Yù Ngámìn ira nga Makkakerumá nga Tatolay nga Ari Mebiláng*

9 Á nasingak ku laguk yù magaru nga tatolay nga ari mabiláng. Naggapu ira ta ngámin nga lugár, nga makkakerumá yù ággubobuk da. Nanáddak ira ta arubáng nayù nagitubang nga mammaguray áんな yù Kígaw. Á nabbarawási ira ta puraw nga apaddu. Á sinangngalád da yù palákkay, ta jináyo ra yù nagitubang nga mammaguray áんな yù Kígaw.

10 Á nakkatalira, á kinagi ra,

"Dayáwat tam si Apu Namarò nga Yápu tam nga nagitubang nga mammaguray, áんな dayáwat tam gapay yù mangngágan ta Kígaw.

Aggira lâ yù makáwayyá nga mangiyígù nittam, tapè ari ittam mapanunnután megapu sù liwiliwâ tam!" kud da.

11 Á yù ira ngámin nga daroban ni Namarò, nanáddak ira gapay, á nelepuanád da yù nagitubang nga mammaguray áんな yù ira lállakalákay áんな yù ira appâ nga makkakerumá nga naparò nga matolay. Á nakimoray ira nga namalittúkak nga nallakak ta arubáng nayù nagitubang nga mammaguray.

12 Á kinagi ra,

"Ammán! Kuruk nga mapalurò ngámin.

Meparáyw si Namarò!

Aggina yù pakimorayát tam ta áddè ta áddè.

\* **6:16** Ajjan yù kunniaw nga kinagi ni Apu Kesu sù túrâ ni Lukas 23:29-30.

Aggina yù kotunán nga masírik,  
nga makánnámmu ta ngámin.

Kagiat tam kuna yù pagayáyâ tam megapu sù ángngiddù na nittam,  
ta ari ittam makabalabálà kuna.

Dayáwat tam yù Namarò nittam ta áddè ta áddè.

Aggina yù mammaguray nga makáwayyá ta ngámin!

Ammán!" kud da.

<sup>13</sup>Kabalid da nakkagi karannia, minay nga nepagubobuk nikán yù tádday nga lakalákay,  
á kinagi na nikán, "Asinni yù ira nabbarawási ta puraw? Á sisaw naggapuád da?" kun na  
nikán.

<sup>14</sup>"Á ammù nikaw, Apu!" kuk ku kuna.

Á kinagi na laguk nikán,

"Aggira yù naggapu sù dákai nga jígâ.

Á binábbalád da yù barawási ra sù dágâ nayù Kígaw,  
á nappuraw iren.

<sup>15</sup>Á yáyù nga maggián ira ta arubáng nayù ággitubangán ni Namarò,  
nga makimoraya kuna sù mangilin nga bale na ta ággaw ánná gabi.

Á manaron si Namarò níra, ta aggina yù kapulupulù da.

<sup>16</sup>Ari iren mabisin ta áddè ta áddè,

á ari iren mapangál.

Ari ira bulubugá mabilagán.

Á ari ira bulubugá mapatuán.

<sup>17</sup>Á yù Kígaw nga maggián ta tangngá nayù ággitubangán nayù mammaguray,  
aggina yù meyárik ta minápparák nga manaron níra.

Á ituluk na ira sù wek nga ari bulubugá mábbatán,

tapè makenum ira sù danum nga áttole ra kâ Namarò ta áddè ta áddè.

Á punatán ni Namarò yù ngámin nga kalullúá ra,

tapè ari iren makkulé."

Yáyù kinagi nayù lakalákay nikán.

## 8

### *Yù Mekapitu nga Naporián sù ira Neparakkâ*

<sup>1</sup>Á inirián na laguk nayù Kígaw yù naporián sù ira pitu nga neparakkâ sù papel nga nalukù. Pangari na kuna, nagimammà yù ira ngámin nga aijan ta lángì ta gadduá na oras.

<sup>2</sup>Á pappásá na, nasingak ku laguk yù ira pitu nga daroban ni Namarò nga nanáddak ta arubáng na, á neyawâ níra nga katággítádday yù amariung na.

<sup>3</sup>Á minay gapay yù tádday nga daroban nga mananggal ta pála nga buláwán, nga áttuggián ta pulbus nga bábbanguk, á aijan yù mayán na nga natuggi, nga magatátû ta nabanguk. Á minay nanáddak yù daroban ta arubáng nayù ángngiyátangán nga buláwán. Á neyawâ kuna yù aru nga pulbus nga bábbanguk, nga inikiruk na sù ira ipakimállà nayù ira tatole ni Namarò, tapè meyátáng sù ángngiyátangán nga buláwán ta arubáng nayù ággitubangán.

<sup>4</sup>Á nagatátû yù bábbanguk nga naggián sù pála nga sinanggalán nayù daroban nga nanáddak ta arubáng ni Namarò, á nepulù ta atû yù ipakimállà nayù ira tatole ni Namarò.

<sup>5</sup>Á en na laguk nayù daroban initággò yù pála na sù bágâ na api nga naggapu sù ángngiyátangán, á inipayáng na yù api ta dabbuno. Á ikáddagâ naggurugurù ta masikan nga nagalittúgaw, ánnna nakkilikilâ, ánnna nullunik.

### *Yù ira Pitu nga Amariung*

<sup>6</sup>Kabalin na, mapparaparán laguk yù ira pitu nga daroban nga magamariung.

<sup>7</sup>Á napolu nga nagamariung yù tádday. Pagamariung na, nagurán ta yelo nga kun na batu, nga nakirugán ta api ánnna dágâ, nga napannâ ta dabbuno. Á yáyù nga natuggi yù pakkállu na káyú ánnna ngámin nga kaddà ta pakkállu nayù dabbuno. Awán ta nabunâ nga kaddà, mássiki tangapun.

<sup>8</sup>Á nagamariung laguk yù mekaruá nga daroban. Á pagamariung na, aijan yù kun na mallakay nga puddul nga natuggi, nga kunnay ta nepayáng ta bebay. Á nabbalin ta dágâ yù pakkállu na bebay.

<sup>9</sup>Á yáyù nga natay yù pakkállu nayù matolay ta bebay, á nararál yù pakkállu nayù ira barangay.

10 Á nagamariung laguk yù mekatallu nga daroban. Á ikáddagâ napannâ yù dakal nga bituan, nga naggatang ta kun na tulu, nga naggapu ta lángi. Á nappannátán na yù pakkállu na danum ánnâ wek.

11 Á mangngágân yù bituan ta Napè, á nabbalin ta napè yù pakkállu nayù danum. Á natay yù aru nga tatolay gapu ta ininum da yù danum nga napè.

12 Á nagamariung laguk yù mekáppâ nga daroban. Pagamariung na, nakanná yù pakkállu na bilák, ánnâ yù pakkállu na bulán, ánnâ yù pakkállu na bituan. Á yáyù nga nári yù pakkállu nayù nawák da, á aringin nanawák yù pakkállu na ággaw ánnâ yù pakkállu na gabi gapay.

13 Á pappasá na, iningak ku, á aijan yù bukkaw nga makkayakayák ta utun na lángi. Á naginnâ yù pakkatol na nga nasikan, á kinagi na, "Makállállà yù ira tatolay nga maggián ta dabbuno! Makállállà ira megapu sù mesímmu nga makánnanássing! Makállállà ira sangaw sù pagamariung nayù ira tallu nga maporián nga magamariung!" kun na.

## 9

### *Yù Mekálímá nga Magamariung nga Dattál nayù Olu nga Makánnanássing nga Jigâ*

1 Á nagamariung yù mekalímá nga daroban. Á pagamariung na, nasingak ku yù Meyárik ta bituan nga napannâ ta dabbuno nga kunnay ta bituan nga naggapu ta lángi. Á neyawâ kuna yù ánnúsi nayù puertá nga áttallungán sù ábbalurán, nga abbû nga awán ta áddé na kálaram na.

2 Á binukatán na yù puertá nayù abbû, á nagatátû nga kun na naggapu ta dakal nga ornu. Á nakkallà yù bilák ánnâ ággaw megapu sù atû nga nallawán nga naggapu sù abbû.

3 Á nallawánnga mepulû sù atû nga naggapu sù abbû yù aru nga apássing. Á naddappâ ira ta dabbuno. Á neyawâ nira yù pakáwayyá ra nga manigirigâ sù ira tatolay, nga kunnay ta siluk na asisípi.

4 Ngam nataddánán yù ira apássing ta arád da bulubugá nga akkuán yù nemulá, káyu, kaddâ, onu ngámín nga mattubbu ta dabbuno. Ngam akkuád da lâ yù ira tatolay nga ari namárkán yù mukâ da ta sinníni Namarò.

5 Awán ta awayyá ra nga mamapáte ta tatolay, ngam makáwayyá ira nga manigirigâ nira ta límá nga bulán. Á panigirigâ da sù ira tatolay, maganutù yù kun na siluk da ta kunnay ta ágganutù nayù siluk na asisípi.

6 Á keggá nayù ira apássing ta límá nga bulán, ikáyâ nayù ira tatolay nga papatáyan yù baggi ra lápay, ngam arád da awayyá.

7 Á yù ira apássing, ta ánninanák ku, kun na kabáyu ira nga naparán nga makigerrá. Á aijan ta ulu ra yù kun na kuroná nga bulawán. Á kun na mammang na tolay yù mammang da.

8 Á apaddu yù duddù da ta kun na duddù na babay, á yù ngipad da, kun na ngipan na layon, nga makánnanássing nga simaron nga ayám.

9 Á aijan ta góko ra yù kun na kalátak nga balayáng. Á maggurugurù yù áppayáppâ nayù payâ da ta kun na gurùna aru nga kalesá nga guggúnán na kabáyu nga umay makigerrá.

10 Á yù ipù da, maniluk ira ta kunnay ta siluk na asisípi, ta aijan ta ipù da yù ángnganguára sù ira tatolay ta límá nga bulán.

11 Á yù patul da yù daroban nga manangngal ta ánnúsi sù puertá nayù abbû, nga awán ta áddé na kálaram na. Á Abaddon yù ngágán na ta Kebru, nga ággubobuk nayù ira Kudio, á abbúnán nayù ira Gareko ta Appollion, á Manarál yù kebalinán nayù ngágán na.

12 Pappasá na yaw, yáyù kabalin nayù olu nga makánnanássing nga jígâ nga mesímmu ta dabbuno. Ngam ginnán naw, ta aijan paga duá nga makánnanássing nga umay ta kabalin na yaw.

### *Yù Mekánnam nga Magamariung ta Dattál nayù Mekaruá nga Jigâ*

13 Á nagamariung yù mekánnam nga daroban. Á naginnâ yù ngárâl nga naggapu sù appâ nga túkù nayù ángngiyátangán nga bulawán ta arubâng ni Namarò.

14 Á nagubobuk yù ngárâl, á kinagi na sù mekánnam nga daroban nga nagamariung, nga kun na, "Palubbângam mu yù ira appâ nga daroban nga nabáluk ta aggik na dakal nga danum na Uparetis," kun na.

15 Á en na laguk pinalubbâng sù ira appâ nga daroban, nga dán nga naparán nga magiddak sù dattál nayù dagun na, bulán na, ággo na, ánnâ oras na nga sinullà ni Namarò ta umay ira mamapátya ta pakkállu na tatolay ta dabbuno.

<sup>16</sup> Á naginnâ yù biláng nayù ira suddálú ra nga nakkabáyu, á mamemapuluribu nga duápuluribu ira. Kunniáne yù biláng na 200,000,000.

<sup>17</sup> Á ta ánninanák ku sù ira kabáyu áンna yù ira makkabáyu nira, nalipparán yù gáko ra ta balayáng nga nakkulor ta ujjojjin nga kun na kulor na api áンna ngisi nga asul ta kun na kulor nayù nanginá nga batu nga mangngágán ta sapiro, áンna ngilá gapay ta kun na kulor na asupri. Á kun na ulu na layon yù ulu nayù ira kabáyu. Á nallawán ta simù da yù api áンna atû, áンna asupri nga matuggi.

<sup>18</sup> Á yáyù nga natay yù pakkállu na tatolay ta dabbuno, megapu sù tallu nga ipate ra nga nallawán ta simù da yù áмmapáte ra ta tatolay. Á kun na iráw yù ipù da, nga eggá ulu ra nga ángnguá ra sù ira tatolay.

<sup>19</sup> Ta aijan ta simù da áンna ipù da yù áмmapáte ra ta tatolay. Á kun na iráw yù ipù da, nga eggá ulu ra nga ángnguá ra sù ira tatolay.

<sup>20</sup> Á yù ira nabuná nga tatolay nga ari natay megapu sù tallu nga jigâ nga naggapu sù ira kabáyu, arád da inibabáwi yù narákè nga akka-akkuád da. Á arád da gapay nilikuránán yù pakimore ra ta anitu áンna dimoniu, áンna yù pakimore ra ta sináddios, nga pidde ra ta buláwán, pirâ, baronsi, batu, áンna káyu, nga ari makasingan, nga ari makaginná, nga ari makalakák.

<sup>21</sup> Á arád da gapay inibabáwi yù pamapáte ra áンna yù paganánitu ra, yù pangarallo ra áンna yù pakkokò da.

## 10

### *Yù Daroban áンna yù Baddì nga Papel nga Nollák*

<sup>1</sup> Á pappásá na, iningak ku laguk, á nasingak ku má yù tanakuán nga daroban nga masikan nga umay ta dabbuno nga naggapu ta lángi. Nagulà ta kunam, á neputápù sù ulu na yù bullun. Á naddalingáráng yù mammang na ta kun na bilák. Á kunnay ta kallang nga naggatang yù takki na.

<sup>2</sup> Á sinangngalán na yù baddì nga papel nga nollák.

Á pakották nayù daroban ta dabbuno, nanáddak nga pine na yù jiwanán nga takki na ta bebay áンna yù jímigi nga takki na ta dabbun.

<sup>3</sup> Á nakkatol ta nasikan, nga kunnay ta paggararang na layon. Á pakkatol na, nameppitu nga nagaítíttúgaw.

<sup>4</sup> Á pakaginnâ sù alittúgaw, mattúrákà nakuan sù kinagi nayù alittúgaw. Ngam naginnâ yù ngárál nga naggapu ta lángi, á kinagi na nikán, "Ilímak mu yù kinagi nayù pitu nga alittúgaw. Arám mu itúrâ," kun na nikán.

<sup>5</sup> Á yù daroban nga nasingak ku nga nanáddak ta bebay áンna dabbun, initáyák na ta utun yù jiwanán nga límá na.

<sup>6</sup> Á nappagássingán ta kuruk yù kagian na ta arubáng ni Namarò, si Namarò nga maggián ta áddè ta áddè, nga namarò ta lángi áンna dabbuno, bebay, áンna ngámin nga mayád da. Á kinagi nayù daroban, "Awánin ta kegaggárang nayù sinalákkuruk ni Namarò nga akkuán na.

<sup>7</sup> Ta sangaw nu magamariung yù mékapitu nga daroban, yáyù pamalurò ni Namarò sù ngámin nga nelímak ngaw góri, nga inipakánnámu na lâ ni Namarò sù ira ngaw ábbilinán na nga makiaripan kuna," kun nayù daroban.

<sup>8</sup> Á nagubobuk mángin nikán yù ngárál nga naginnâ nga nagubobuk nga naggapu ta lángi. Á kinagi na, "Ará! Em mu bi apan yù papel nga nollák nga sinangngalán nayù daroban nga nanáddak ta bebay áンna dabbun."

<sup>9</sup> Á kinuruk ku laguk. Jimikkikà sù daroban, á kinagi kuna ta iyawâ na nikán yù baddì nga papel nga nollák. Á kinagi na nikán, "Apam mu, á kanam mu. Á ta pakkákám mu, námmì ta kun na issi ta simù mu, ngam mabbalin ta mapé te gutù mu," kun na.

<sup>10</sup> Á inâ ku laguk ta limá nayù daroban yù baddì nga papel, á kinák ku. Á kuruk nga námmì ta kun na issi ta simù ku. Ngam ta kabalik ku kiminán kuna, napé yù gutù ku.

<sup>11</sup> Á kinagi na laguk nikán, "Máwák nga mangilayalayâ ka paga sù inipalappâ ni Namarò nga mesimmu paga sù ira makkakerumá nga tatolay ta ngámin nga lugár da, yù ira nga makkakerumá yù ággubobuk da áンna yù ira patul da."

## 11

### *Yù ira Duá nga Massistígu ta Meyannung kâ Namarò*

<sup>1</sup> Á aijan laguk yù nangiyawâ nikán ta ággukuk nga kun na tagukuk. Á kinagi na nikán, "Ará! E ken, ta gukuram mu yù mangilin nga kapilliá ni Namarò áンna yù ángngiyátangán. Á bilángam mu gapay yù ira tatolay nga makimoray kâ Namarò ta mangilin nga kapilliá na.

<sup>2</sup> Ngam arám mu gukuran yù nammuák nayù kapilliá. Paguráyám mu, ta neyawâ yù nammuák sù ira tatolay nga ari manguruk kâ Namarò, tapè maggián ira nga maguray lâ yù akkuád da sù mangilin nga ili ni Namarò ta appátapulu ta duá nga bulán.

<sup>3</sup> Á dobak ku yù ira duá nga ábbilinák ku, ta mangilayalayâ ira karannian nga bulán, nga naggittá ta maribu ta duá gatù ta annampulu nga ággaw. Á nabbarawási ira ta langgústi, nga pangipasinganád da ta daddam da megapu sù naráké nga akkuán nayù ira tatolay nga ari mabbabáwi. Á iyawâ ku nira yù pakáwayyá ra nga mangilayalayâ sù ipalappâ ku nira,” kun na.

<sup>4</sup> Á yù keyarigán nayù ira duá nga ábbilinán ni Namarò yù duá nga káyu nga olibos ánná yù duá nga isingan nga nanáddak ta arubáng ni Namarò nga Yápu tam nga mammaguray ta ngámin nga dabbuno.

<sup>5</sup> Á nu eggá yù mangnuá nakuan nira, á mallawán nga naggapu ta simù da yù api, á matuggi yù ira nga manganni nira nakuan. Yáyù ipate nayù ngámin ira nga mangnuá nakuan nira.

<sup>6</sup> Á makáwayyá ira nga mangilitù ta lángi, tapè ari magurán sù ngámin ira nga ággaw nga pangilayalayâ da sù bilin ni Namarò. Á awayyá ra gapay nga pabbalinan ta dága yù ira danum ánná jígirigátan yù ira tatolay ta makkakerumá nga tulágan ta maguray lâ nga ággaw nga ikáyá da.

<sup>7</sup> Á ta kabalid da mangilayalayâ nayù ira duá sù bilin ni Namarò, umay yù ayám nga simaron, nga mallawán nga naggapu ta abbû nga awán ta addè na kálaran na, á umay makigerrá nira. Á appútan na ira, á papatáyan na ira.

<sup>8</sup> Á maggián lâ yù baggi ra nga natay ta kalsáda sù dakal nga ili nga nepátkán na ngaw nayù Yápu ra ta kurù. Meyárik yane ili sù ira ngaw ili na Sodoma ánná Egipto, nga ari kuruk nga ngágan na, ngam yù keyarigán na lá, gapu ta naggittá yù naráké nga akkuán nayù ira tatolay nga maggián sù dakal nga ili sù kingnguá nayù ira ngaw tatolay nga naggián ta Sodoma ánná Egipto.

<sup>9</sup> Á tallu ta gadduá nga ággaw yù paggiád da tán nayù baggi nayù ira duá nga natay. Á yù ira ngámin nga tatolay ta ngámin nga lugár, nga makkakerumá yù ággubobuk da, girawad da yù baggi nayù ira natay, á arád da anugutan yù ketanam da.

<sup>10</sup> Á yù ira ngámin nga tatolay nga maggián ta dabbuno, mappiestá ira nga magayáyâ, á makkakálímù ira gapay gapu ta pagayáyâ da megapu sù pate nayù ira duá nga ábbilinán ni Namarò nga nanigirigá nira.

<sup>11</sup> Á appasá na tallu ta gadduá nga ággaw, tullung sù baggi nayù ira duá nga natay yù inángà nga maggupu kâ Namarò, á maginnanolay ira, á gumikkáng ira. Á yù ira nga makasingan nira, mepallà yù assing da.

<sup>12</sup> Á yù ira duá nga naginnanolay, maginná ra yù ngárál nga nasikan nga maggupu ta lángi, á kagian na nira, “Umay kayu bì saw ta utun!” Á ta paningan nayù ira malussaw nira, umay ira ta lángi, nga mattakay ta kunam.

<sup>13</sup> Á pakáddè da ta lángi, dagarágâ mallunik tán nga ili ta nasikan, á mararál yù pakkamapulu nayù ili, á mámmatay yù pituribú nga tatolay megapu sù lunik. Á yù ira nabuná, maganássing ira, á dayáwad da si Namarò nga maggián ta lángi.

<sup>14</sup> Pappasá na yaw, yáyù kabalin nayù mekaruá nga makánnanássing nga jígâ nga mesímu ta dabbuno. Á duttál ta mabi lá yù mekatallu nga makánnanássing nga mesímu má ta dabbuno.

*Yù Mekapitu nga Magamariung nga Dattal nayù Mekatallu nga Makánnanássing nga Jígâ*

<sup>15</sup> Á nagamariung yù mekapitu nga daroban, á ajian yù ngárál ta lángi nga nagubobuk ta nasikan. Á kinagi na,

“Jimittálín ta dabbuno kunangan yù pammagure ri Apu Namarò nga Yápu tam  
ká Apu Kesu Kiristu, nga yù Patul nga piníli ni Apu Namarò ta mammaguray ta dabbuno.

Á aggina yù mammaguray ta addè ta addè, nga awán ta addè na!”

<sup>16</sup> Á yù ira duápulu ta appâ nga lállakalákay, nga magitubang ta nakástá nga ággitubangád da ta arubáng ni Namarò, namalittúkak ira nga nallakak nga makimoray kuna.

<sup>17</sup> Á kinagi ra,

“Apu Namarò, sikaw yù makáwayyá ta ngámin,  
nga Egga nga naggián addè ngaw, nga Egga kunangan.

Á maddáyw kami nikaw,

ta arí kami makabalabálà nikaw,

ta inipasingam mu yù pamagaddátum nga makapállâ,  
á pinegapuanám min yù pammagurem ta dabbuno.

18 Á kitaporay yù ira makkakerumá nga tatolay nga ari manguruk nikaw,  
ngam jmittálín yù porem nira.

Á kunangane duttálín yù pamanunnù mu sù ira námmatay.

Á duttálín yù pamalabálà mu sù ira aripam mu, nga ábbilinám mu,  
áんな yù ira ngámin nga tatolem nga dakal yù pakáwayyá ra,  
áんな yù ira nga baddi yù pakáwayyá ra,  
aggira ngámin nga makimoray nikaw.

Á duttálín yù paddarál mu sù ira ngámin nga manarál ta dabbuno."\*

Yáyù kinagi nayù ira lállakalákay.

19 Á nasingak ku laguk ta nabukatán yù mangilin nga kapilliá ni Namarò ta lángì, á  
nasingak ku gapay ta unak na yù kakon nga napayyán ta netúrâ nga tarátu ni Namarò sù  
ira tatole na. Á nakkilikilâ áんな aijan yù kitasikan nga gurù, á nagala-alittúgaw ta nasikan.  
Á nallunik, áんな nagurán ta aru nga yelo nga narámmà nga kun na batu.

## 12

*Yù Babay áんな yù Mallakay nga Kagang*

1 Á kabalin na, aijan laguk yù makapállâ nga limittuák ta lángì, nga keyarigán nayù bilin  
ni Namarò. Aijan yù babay nga nabbarawási ta bilák, nga nanáddak sù bulán. Á aijan yù  
kuroná ta ulu na, nga eggá yù mapulu duá nga bituan kuna.

2 Á mabussi yù babay, á mággè maganâ, áんな nakkalli sù jigâ na ta pappasíká na.\*

3 Á aijan yù táddy má nga makapállâ nga nepasingan ta lángì. Nasingak ku yù mallakay  
nga kagang, nga ujoojin yù kolor na. Á eggá yù pitu nga ulu na áんな yù mapulu nga tágguk  
na.† Á nakkuronán gapay yù ira pitu nga ulu na ta kunnay ta patul.

4 Á inibaddû na yù ipù na, á nakanná na yù pakkállu nayù bituan ta lángì, á pinnâ na  
ira ta dabbuno. Á minay nanáddak ta arubáng nayù babay nga maganâ, ta iddagán na yù  
pallawán nayù abbing, tapè kanan na.

5 Á naganâ yù babay ta abbing nga laláki. Á nelilli yù abbing nga neyángngay ta utun ta  
pammagurayán ni Namarò ta lángì, ta aggina yù initabbá ni Namarò nga mammaguray ta  
ngámin nga makkakerumá nga tatolay, nga awán ta makatubáng kuna.‡

6 Á nattálaw yù babay nga minay ta kalállammatán, ta aijan tán yù paggianán na nga  
pinaráñ ni Namarò, tapè iddukan ná yù babay ta maribu ta duá gatù ta annamapulu nga  
ággaw.

*Nakigerrá di Mikel nga Daroban ni Namarò sù Kagang áんな yù ira Daroban na*

7 Á aijan yù ira nakigerrá ta lángì. Ta di Mikel nga makáwayyá nga daroban ni Namarò  
áんな yù ira kábulun na nga daroban, nakigerrá ira sù mallakay nga kagang áんな yù ira  
kábulun na nga narákè nga daroban.

8 Á náppù yù kagang áんな yù ira kábulun na nga daroban. Á napapáno ira ta lángì, ta  
awánnin ta awayyá ra nga maggián tán.

9 Á nepayáng ira ta dabbuno, aggira ngámin áんな yù mallakay nga kagang. Aggina galâ yù  
iráw nga nappasingan ngaw gári, nga nábbún gapay ta Diáblu áんな Satanas,§ nga mangilogò  
ta ngámin nga tatolay ta dabbuno.

10 Kabalin na, naginná yù ngárál ta lángì, nga nakkatol ta nasikan, á kinagi na,  
"Jmittálín yù pangiyígù ni Namarò sù ira tatole na.

Á inipasingan ni Namarò yù pakáwayyá na,  
áんな namegapu ngin yù pammagure ni Namarò nga Yápu tam.

Á si Apu Kesu Kiristu, nga sinullà ni Namarò,  
inipasingan na gapay yù pakáwayyá na nga mammaguray.  
Ta náppù si Satanas, nga yù ngaw mamalapaliwâ sù ira nga kunnay ta wáwwagi tam ta  
dabbuno megapu sù panguruk da.

Sù ngaw, sigídá nga mamaliwâ nira ta ággaw áんな gabi  
ta arubáng ni Namarò nga Yápu tam.

\* 11:18 2 Eduru 3:10    \* 12:2 Yù babay nga mabussi yù keyarigáda támma nayù ira Kudio nga ginaká ni Israel, ta  
kinagi ni Pablo ta naggapu si Apu Kesu Kiristu sù ira Kudio. Innam mu Roma 9:4-5.    † 12:3 Daniel 7:23-28; Nepalappâ  
17:7-12    ‡ 12:5 Salmo (Kansion) 2:1-12    § 12:9 Aggina gapay si Lusiper. Innam mu Isaya 14:12-17.

Á pinapáno ni Namarò ta lángì.

<sup>11</sup> Á yù ira nga kunnay ta wáwwagi tam megapu ta panguruk da,  
nangappù ira kâ Satanas megapu sù dâga nayù Kígaw  
nga nebubbù sù ketapil na ta kurù.

Á nangappù ira gapay megapu sù bilin ni Namarò  
nga ipakánnámmu ra sù ira tatolay,  
ta napasigaggâ yù ángnguruk da kâ Apu Kesu,  
mássiki nu yáyù ipate ra.

<sup>12</sup> Á magayáyâ kayu laguk, sikayu ngámin nga maggián ta lángì,  
gapu ta náppù si Satanas,  
á nepayáng ta dabbuno nga naggapu ta lángì.

Ngam kâbbi kayu, sikayu nga maggián ta dabbuno!  
Makállallà kayu, ta minay si Satanas nikayu.

Á nepallà yù pore na gapu ta ammu na ta mabì lákin yù awayyá na  
nga mangnguá sù ira tatolay ta dabbuno,  
ta darálan ni Apu sangaw."

### *Yù Panimmâ nayù Mallakay nga Kagang sù Babay*

<sup>13</sup> Á ta pakánnámmu nayù mallakay nga kagang ta kepayáng na ta dabbuno, á sinimmâ  
na yù babay nga naganâ ta abbing nga laláki.

<sup>14</sup> Ngam iniyawâ ni Namarò sù babay yù duá nga dakal nga payâ nayù dakal nga bukkaw,  
tapè makkayák nga mattálaw nga umay sù naparán nga paggianán na ta kalállammatán. Á  
ta kunnian, melilli yù babay sù dán nga iráw, nga yù kagang, á si Namarò yù manaron sù  
babuny ta keggá na tân ta tallu ragun ta gadduá.

<sup>15</sup> Á yù iráw, pinalaŵan na ta simù na yù danum nga kunnay ta dakal nga danum nga  
magagi, tapè meburuk nakuan yù babay.\*

<sup>16</sup> Ngam yù dabbun yù mangabbák sù babay, ta naggakki yù dabbun, á sillan na yù  
danum nga naggapu ta simù nayù mallakay nga kagang.

<sup>17</sup> Á nappanà yù pore nayù mallakay nga kagang sù babay, á minay nakigerrá sù ira ánâ  
na nga nabuná, nga keyarigán nayù ira ngámin nga manguruk sù kagian ni Namarò ánna  
mangipakánnámmu ta meyannung kâ Apu Kesu megapu sù napiá nga pagubobuk da ánna  
yù napiá nga ággangnguá ra.

<sup>18</sup> Á nanáddak yù mallakay nga kagang sù karagátán ta aggik na bebay.

## 13

### *Yù Meyannung sù Ayám nga Maggapu ta Bebay*

<sup>1</sup> Á nasingak ku laguk, á ajjan yù limituák nga naggapu sù danum na bebay nga kun na  
ayám nga makánnanássing. Á pitu yù ulu na ánna mapulu yù tágguk na. Á nakuronán yù  
taggitáddy ngá tággu na. Á ajjan netúrâ sù katággitáddy ngá ulu na yù narákè nga ngágan  
na, nga pangibanabanù na kâ Namarò.

<sup>2</sup> Á yawe ayám nga nasingak ku yù kun na dakal nga kusá nga mangngágan ta lepardo. Á  
yù takki na yù kun na takki na dakal nga simaron nga ayám nga mangngágan ta beyar.  
Á yù simù na, kun na simù na layon. Á yù mallakay nga kagang, iniyawâ na kuna yù  
ámmagaddátu na ánna yù pammagurayán na, ánna yù makapállâ nga pakáwayyá na.

<sup>3</sup> Á yù táddy ngá ulu nayù ayám, yù kun na natay ta bigák. Ngam napammapiángin yù  
bigák na. Á yáyù ngá mapállâ yù ngámin ira nga tatolay ta dabbuno, á siminuttu ira kuna.

<sup>4</sup> Á nakimoray yù ira tatolay sù mallakay nga kagang megapu sù makapállâ nga  
pakáwayyá na nga iniyawâ na sù ayám. Á nakimoray ira gapay sù ayám, ta kinagi ra, "Eggá  
panò kagittá na? Asinni panò makatubáng kuna?" kud da.

<sup>5</sup> Á inanugù ni Namarò ta mammaguray yù ayám ta appátapulu ta duá nga bulán, nga  
maguray lâ yù akkuán na. Á neyawâ sù ayám yù awayyá na nga magubobuk, á meyanugù  
yù pangibanabanù na kâ Apu, á napalaláki yù ággubobuk nayù ayám.

<sup>6</sup> Á inibananbanù na di Namarò ánna yù ngámin nga meyannung kuna, yù ngágan ni  
Namarò, yù gián na ta lángì, ánna yù ira ngámin nga mesipà kâ Namarò nga maggián ta  
lángi.

\* <sup>12:15</sup> Salmo (Kansion) 124:1-8

<sup>7</sup> Á neyawâ sù ayám yù pakáwayyá na nga makigerrá sù ira tatole ni Namarò, á meyanugù ta appútan na ira. Á neyawâ kuna gapay yù pakáwayyá na nga mammaguray sù ira ngámin nga makkakerumá nga tatolay, nga makkakerumá yù ággubobuk da, ta ngámin nga ili ra.

<sup>8</sup> Á yù ira ngámin nga maggián ta dabbuno, makimoray ira sù narákè nga ayám, yù ira lâ nga ari netúrâ yù ngágad da sù libru nayù Kígaw nga netapil. Yane libru yù nangitúratán ta ngagan nayù ira ngámin nga tatole ni Namarò nga mepaggián kuna ta áddè ta áddè, ta inipetúrâ ni Namarò yù ngágad da sù ngaw lage na namarò ta dabbuno.

<sup>9</sup> Nu eggâ yù talingá naw, ginnán naw yaw:

<sup>10</sup> Yù tolay nga natullà ta mebluk, á mebluk laguk.

Á yù tolay nga natullà makattak ta bayunetá, á makattak laguk nga matay.

Á yáyù nga nágalán ittam nga tatole ni Namarò ta ipasigaggà tam yù ángnguruk tam ánnna matattam ittam, mássiki nu anni yù mesimmu nittam.

#### *Yù Mekaruá nga Ayám nga Mallawán nga Naggapu ta Dabbun*

<sup>11</sup> Á nasingak ku laguk yù tanakuán nga ayám nga nallawán nga naggapu ta unak na dabbun. Á duá yù tágguk na nga kun na tágguk na kígaw na karneru, ngam yù ággubobuk na yù kunnay sù ággubobuk na mallakay nga kagang.

<sup>12</sup> Á masserbi yù mekaruá nga ayám sù olu nga ayám, ta iyawâ nayù olu nga ayám sù mekaruá yù ngámin nga pakáwayyá na, gapu ta pannakabaggi nayù olu yù mekaruá. Á puersán na yù ira ngámin nga tatolay ta dabbuno ta makimoray ira sù olu nga ayám nga napammapiá yù bigák na nga inipate na.

<sup>13</sup> Á aru yù makapállâ nga pagaddátuan nayù mekaruá nga ayám ta panigan nayù ira ngámin nga tatolay, nepatalugáríng ta pagukában na ta dabbuno yù apínga naggapu ta lángi.

<sup>14</sup> Á ilogò na yù ira tatolay nga maggián ta dabbuno megapu sù ira pagaddátuan na nga ipakuá nayù olu nga ayám kuna ta arubáng na. Á yù mekaruá nga ayám, ipapadde na sù ira tatolay yù siná-ayám nga kágappà nayù olu nga ayám nga nabigarán ngam matolay paga.

<sup>15</sup> Á meyanugù sù mekaruá nga ayám yù awayyá na nga iddán ta inángà yù siná-ayám nga pidde ra ta kágappà nayù olu nga ayám, tapè makobobuk ánnna ipapapáte na yù ira tatolay nga ari makimoray kuna.

<sup>16</sup> Á yù mekaruá nga ayám, puersán na nga márkan yù ira tatolay ta jiwanán nga limá ra onu yù mukâ da, aggira ngámin nga dakal yù pakáwayyá ra onu baddì, yù ira ngámin nga maríku onu pobare, ánnna yù ira aripan onu ari aripan.

<sup>17</sup> Á awán ta awayyá na tatolay nga malláku onu gumátáng nu ari ira namárkán sù ngágan nayù olu nga ayám onu yù numeru na, nga sinniál nayù ngágan na.

<sup>18</sup> Á sikayu nga tatolay nga makánnámmu, bilángan naw laguk nakuan yù kebalinán nayù numeru nayù ayám, nga sinniál na ngágan na tolay, tapè ammu naw yù ngágan na. Á annam nga gatù ta annamapulu ta annam yù numeru na.

## 14

#### *Yù Kígaw na Karneru ánnna yù 144,000 nga Tatolay nga Kábulun na*

<sup>1</sup> Á kabalin na, iningak ku, á nasingak ku yù Kígaw na Karneru nga manáddak ta puddul na Sion. Á nepulù kuna yù magatù ta appátapulu ta appâ ta ribu nga tatolay nga kábulun na. Á aggira, nattúratán yù mulkâ da sù ngágan nayù Kígaw ánnna yù ngágan nayù Yáma na.

<sup>2</sup> Á naginnâ yù kagi nga naggapu ta lángi, nga kunnay ta gurù na dakal nga bagi, onu kunnay sù misakan nga alittúgaw, onu kunnay gapay sù kagi na aru nga magárpá.

<sup>3</sup> Á nanáddak nga makkansion yù ira magatù ta appátapulu ta appâ ta ribu nga tatolay ta bagu nga kansion ta arubáng nayù ággitubangán nayù mammaguray, ánnna yù ira appâ nga naparò nga matolay nga makkakerumá, ánnna yù ira lállakalákay. Á awán ta makagigíámmu sù kansiod da, nu ari lâ yù ira magatù ta appátapulu ta appâ ta ribu nga tatolay, nga iniyígù nayù Kígaw ánnna inilillì na nga naggapu ta dabbuno.

<sup>4</sup> Á bábbagitolay ira nga ari nalliwâ kâ Apu ta meyannung ta bábbay, nga napasigaggà yù ángnguruk da kuna, á tumuttuttul ira sù Kígaw, maguray lâ yù angayán na. Á aggira yù iniyígù ni Apu, nga napolu nga nesinná sù ira tatolay, nga meywâ kári Namarò ánnna yù Kígaw.

<sup>5</sup> Á ari ira bulubugá massiri, á awán ta nakaliwatád da.

#### *Yù Inilayalayâ nayù ira Tallu nga Daroban*

<sup>6</sup> Á kabalin na, nasingak ku laguk yù táddy ngá daroban nga makkayák ta tangngá na lángi, á en na ilayalayâ yù napiá nga dámak nga mannanáyun, nga ari bulubugá moli

áんな ari mapatalián ta áddè ta áddè. Á inilayalayâ na sù ira ngámin nga makkakerumá nga tatolay nga maggián ta makkakerumá nga lugár ta dabbuno, nga makkakerumá yù ággubuk da.

<sup>7</sup> Á iniyássikan nayù daroban yù ubobuk na, á kinagi na nira, "Dayáwan naw si Namarò! Á ipasingan naw yù pakimore naw kuna, ta jmittálín yù pamanunnù na ta tatolay. Makimoray kayu kuna, ta aggina yù Namarò ta lángì áんな dabbuno, bebay, áんな ngámin nga latuá na wek," kun nayù daroban.

<sup>8</sup> Á ta likuk nayù napolu nga daroban, nappasingan laguk yù mekaruá. Á kinagi na, "Nattalamánin yù ili na Babilonia<sup>\*</sup> nga neparámak ta ngámin nga dabbuno. Ta yù ira tatolay nga naggián tân, kunnay ira ta babay nga magillellaw áんな makikarallaw, gapu ta inipápáyâ da yù ira ngámin nga makkakerumá nga tatolay ta dabbuno, tapé kagumánañ da ira ta tuttulad da gapay yù narákè nga ággangnguá ra. Á yáyù nga nararálin yù dakal nga ili," kun nayù mekaruá nga daroban.

<sup>9</sup> Á páno nayù ira duá nga daroban nga napolu, jmittál nga naporián laguk yù mekatallu nga daroban, á iniyássikan na yù ngárál na, á kinagi na, "Yawe yù mesímu sù ira tatolay nga makimoray sù ayám áんな yù siná-ayám nga kagittá na, aggira ngámin nga namárkán ta márka nayù ayám ta muká da onu límá ra.

<sup>10</sup> Mapuersá ira nga mapenum ta binaráyáng nga awán ta nekiruk kuna, nga keyarigán nayù pore ni Namarò. Ta majjigirigâ ira ta api áんな asupri nga matuggi, ta paniganán nayù ira mangilin nga daroban ni Namarò áんな yù Kígaw.

<sup>11</sup> Á yù ira nga makimoray sù ayám áんな yù siná-ayám nga kagittá na, nga namárkán sù márka nayù ngágan nayù ayám, á majjigirigâ ira ta ággaw onu gabí. Á maggatang yù api áんな magata-atátu ta áddè ta áddè, á ari ira bulubugá makebannák ta takí da sù api ta áddè ta áddè, gapu ta nakimoray ira sù ayám áんな yù siná-ayám," kun nayù mekatallu nga daroban.

<sup>12</sup> Á gapu ta kunnian yù mesímu sù ira nga ari manguruk kâ Apu, á sikayu nga tatole ni Namarò, máwák nga manguruk kayu sù taddán na, áんな palurotan naw yù ipakuá na nikayu, á nepatalugáring ta attamán naw lâ yù mesímu nikayu nga jigâ, áんな ipasigaggâ naw yù ángngikatalà naw kâ Apu Kesu.

<sup>13</sup> Á kabalin na magububuk yù mekatallu nga daroban, naginnâ laguk yù ngárál nga naggapu ta lángì, á kinagi na, "Itúrâ mu yawe. Mamegapu ngin kunangan, á yù ira tatolay nga matay nga napsigaggâ yù ángngikatalà da kâ Apu Kesu, pagayáyan ni Namarò ira," kun na. "Wan," kun nayù Mangilin nga Ikararuá, "á kuruk nga magayáyâ ira, ta makebannák iren sù tarabáku ra, á mepulupulù nira yù napiá nga kingnguá ra áんな napiá nga nonò da, ta málâ da yù bálâ nayù napiá nga kingnguá ra!"

#### *Yù Meyárik ta Paggaták áんな Pappusik ta Dabbuno*

<sup>14</sup> Á pakaginnâ sù ngárál nga naggapu ta lángì, imingak ku má laguk, á nasingak ku yù puraw nga kunam. Á nagitubang sù kunam yù kun na tolay nga Kakâ na ngámin na tatolay,† naga nakuronán yù ulu na ta bulawán. Á sinangngalán na yù gápas nga nataram.

<sup>15</sup> Á nallawán yù táddy nga daroban nga naggapu sù mangilin nga bale ni Namarò. Á iniyássikan na yù ngárál na, á nakkatol sù nagitubang ta kunam, á kinagi na, "Arakin! E ka bi maggaták, ta jmittálín yù paggaták mu ta dabbuno. Gatabam mu laguk yù ira tatolay ta dabbuno, nga kunnay ta nalutu nga kámmayán," kun na.

<sup>16</sup> Á yù nagitubang ta kunam, ginaták na, á nagaták yù ngámin ta dabbuno.

<sup>17</sup> Á nasingak ku yù táddy nga daroban nga nallawán nga naggapu sù mangilin nga kapilliá ta lángì. Á sinangngalán na gapay yù nataram nga gápas.

<sup>18</sup> Á jmittál laguk yù táddy nga daroban nga makáwayyá sù api ta ánnuggián ta meyátáng, á nakkatol ta nasikan sù táddy nga daroban nga manangngal ta nataram nga gápas. Á kinagi na kuna, "Iyusám yù gápas mu, ta gatabam mu yù bungá na úbas, ta nalutu gapay yù ngámin nga úbas," kun na.

<sup>19</sup> Á inilayâ na laguk nayù daroban yù gápas na ta dabbuno, á ginaták na yù ngámin ta dabbuno, á inipayáy na yù ngámin nga ginaták na sù dakal nga áppaggalán. Á yáyù keyarigán nayù mesímu sù ira tatolay nga ari manguruk kâ Apu, megapu sù pore ni Namarò sù ira ngámin nga mamotu kuna.

\* <sup>14:8</sup> Yù nelímak nga kebalinán na Babilonia támma yù ili na Roma. † <sup>14:14</sup> Innam mu 1:13 **futnot**; Mattiu 9:6; Markus 2:28; Lukas 12:40; 22:69; Kuan 6:17; 8:18

<sup>20</sup> Á napaggal yù ngámin nga ginaták na ta dakal nga abbû ta lawán na ili. Á nallawán yù dágâ nga maggapu ta abbû nga magagî ta áddè ta matturù ta tallu gatù nga kilometro yù káravyu na, á áddè ta tangngak na kabáyu yù kálaram na.

## 15

*Yù ira Pitu nga Jigâ nga Maporián*

<sup>1</sup> Á kabalín na, nasingak ku ta lángì yù tanakuán nga makapállâ, nga keyarigán nayù mesimmu. Nasingak ku yù pitu nga daroban, á iniyângé ra yù pitu nga ánnigirigâ da sù ira tatolay ta dabbuno. Yawe ira pitu nga ánnigirigâ yù kaporianán nga jígâ nga duttál sù ira tatolay ta dabbuno, megapu sù pore ni Namarò nira. Á ta pappasá nayù ira pitu nga jígâ, yáyú kabalin nayù pangukum ni Namarò ta tatolay ta dabbuno.

<sup>2</sup> Á nasingak ku yù kun na nalínák nga bebay nga napadday ta bidduru nga nakirugán ta api. Á ajjan nga nanáddak tán yù ira tatolay nga nangappù sù ayám, gapu ta ari ira nakimoray kuna, á ari ira nakimoray sù siná-ayám. Á ari ira nappamárká ta numeru, nga sinniál na ngágan na. Á sinangngalád da yù árpá ra nga iniyawâ ni Namarò nira.

<sup>3</sup> Á inikansiod da yù kansion ni Moyses, nga aripan ni Namarò, ánná yù kansion nayù Kígaw, nga kunniaw:

"Apu Namarò, nga Yápu mi,  
sikaw yù makáwayyá ta ngámin!  
Makapállâ yù ngámin nga akkuám mu!"

Sikaw yù Patul nga mammaguray ta ngámin nga makkakerumá nga áppatulán.

Á pareku nga matunung yù ngámin nga akka-akkuám mu.

<sup>4</sup> Apu, awán ta ari makimoray nikaw!

Awán ta ari maddáyaw nikaw!

Ta sikaw yù mangilin nga awán ta kagittá na.

Á yù ira ngámin nga tatolay nga naggapu ta ngámin nga makkakerumá nga áppatulán,  
umay ira ngámin makimoray nikaw.

Ta sikaw yù makáwayyá nga mamanunnù,  
nga mepasingan ta matunung lâ yù ámmanunnù na."

Yáyú kansiod da.

<sup>5</sup> Á kabalid da nakkansion, nasingak ku laguk ta nabukatán yù kangilinán nga lágum ta unak nayù mangilin nga bale ni Namarò ta lángì, nga paggianán nayù netûrâ nga taddán ni Namarò.

<sup>6</sup> Á yù ira pitu nga daroban, nga eggá nira nga katággitáddy yù ánnigirigâ na sù ira tatolay, nallawán ira nga naggapu sù bale ni Namarò. Nabbarawási ira ta puraw nga gámì, nga malínis ánná masiling, á nabbarakâ ira ta bulawán ta gáko ra.

<sup>7</sup> Á yù mekáppâ sù ira makkakerumá nga naparò nga matolay, en na inisinek sù ira pitu nga daroban yù pitu nga malukung nga bulawán, nga napannu ta pore ni Namarò nga matolay ta áddè ta áddè.

<sup>8</sup> Á napannu yù mangilin nga bale ni Namarò ta atû, megapu sù dalingárang na ánná yù kangilin na ánná yù pakáwayyá na. Á awán ta makatallung sù mangilin nga bale na, áddè ta kabalin nayù pitu nga jígâ nga iniyângé nayù ira pitu nga daroban.

## 16

*Yù ira Pitu nga Malukung nga Napannu ta Pore ni Namarò*

<sup>1</sup> Á manganánnuán, naginnâ laguk yù ngárál nga naggapu sù mangilin nga kapilliá, nga bale ni Namarò ta lángì. A nagubobuk ta nasikan, á kinágí na sù ira pitu nga daroban, "En nawin ibubbù ta dabbuno yù mayán nayù ira pitu nga malukung nga napannu ta pore ni Namarò," kun na.

<sup>2</sup> Á minay yù napolu nga daroban, á inibubbù na ta dabbuno yù mayán nayù sinangngalán na nga malukung. Á yù ira tatolay nga namárkán ta sinniál nayù ayám, nga nakimoray sù siná-ayám, dagarágâ ira nga nabbutubutáli ta kitabuyù nga makála-álrák.

<sup>3</sup> Á kabalin na, minay laguk yù mekaruá nga daroban, á inibubbù na ta bebay yù mayán nayù sinangngalán na nga malukung. Á nabbáli yù bebay ta kun na dágâ na natay nga tolay, á natay ngámin yù ajjan ta bebay.

<sup>4</sup> Á kabalin na, minay laguk yù mekatallu nga daroban, á inibubbù na sù ira danum ánná latuâ na wek yù mayán nayù sinangngalán na nga malukung, á nabbáli ta dágâ yù ngámin nga danum.

<sup>5</sup> Á naginnâ yù kinagi nayù daroban nga manaron ta danum. Kinagi na,  
“Apu Namarò, sikaw yù mangilin nga Eggâ áddè ngaw gári, ta áddè kunangane.  
Á matunung yawe pamanunnù mu sù ira tatolay.  
<sup>6</sup> Ta yù ira tatolay ta dabbuno, pinapáte ra yù ira tattolem ánnâ yù ira ábbilinám mu.  
Á yáyù nga ipenum mu nira yù dágâ, ta yáyù gemma yù kepángngatád da!” kun na.  
<sup>7</sup> Á naginnâ yù ngárál nga naggapu ta ánnuggián ta meyátâng, á kinagi na,  
“Apu Namarò, sikaw yù makáwayyá ta ngámin.

Á matunung yù ámmanunnù mu ta tolay.  
Kuruk nga mepángngà yù pamagikárum ta tatolay,” kun na.

<sup>8</sup> Á kabalín na magubobuk karannian, minay laguk yùmekáppâ nga daroban, á inibubbù  
na ta bilák yù mayán nayù sinangngalán na nga malukung. Á yáyù nga neyawâ sù bilák yù  
pakáwayyá na nga manuggi ta tatolay ta kunnay ta api.

<sup>9</sup> Á natuggi yù ira ngámin nga tatolay, á inibanabanù da si Namarò nga makáwayyá sù ira  
jigâ, megapu sù ira jigâ nga jimittál nira. Ngam ari ira nabbabáwi ta liwiliwâ da, á arád da  
jináyaw si Apu Namarò.

<sup>10</sup> Á kabalín na, minay laguk yùmekalimá nga daroban, á inibubbù na yù mayán nayù  
sinangngalán na nga malukung sù pagitubangán nayù ayám nga mammaguray, á nakkallâ  
yù pammagurayán nayù ayám. Á yù ira tatolay, nangngirítád da yù jilâ ra megapu sù  
pangiyangngâ da ta ágganutù na baggi ra.

<sup>11</sup> Á gapu ta maganánutù yù butáli ra ánnâ lutu ra, inibanabanù da si Namarò nga maggián  
ta lángi. Á ari ira nabbabáwi sù narákè nga akka-akkuád da.

<sup>12</sup> Á pangnguá nayù ira tatolay paga ta narákè, minay laguk yùmekánnam nga daroban,  
á inibubbù na yù mayán nayù sinangngalán na nga malukung sù dakal nga danum na  
mangngáagan ta Uparetis, á nábbatán yù danum áddè ta namagá yù dabbun, tapé maparán  
nga pallakarán nayù ira mammaguray ánnâ yù ira suddálu ra nga maggapu túrin ta  
állassangán.

<sup>13</sup> Á nasingak ku yù tallu nga narákè nga anitu, nga kunnay ta tukayâ ta ánnunganák ku. Á  
yù tádday nga anitu, naggapu ta simù nayù mallakay nga kagang. Á yù mekarúá nga anitu,  
naggapu ta simù nayù makánnanássing nga ayám. Á yù mekatallu nga anitu, naggapu ta  
simù nayù mattá-ábbilinán.\*

<sup>14</sup> Á yù ira tallu nga anitu, dimoniu ira nga daroban ni Satanas, á mappagaddátu ira ta  
makapállâ. Á umay ira ta ngámin nga páppatulán ta tangapáddabbunán, á pattatáddayad da  
yù ira ngámin nga mammaguray ta dabbuno, tapé umay ira makigerrá kâ Namarò nga  
Makáwayyá ta Ngámin, sù ággaw nga sinullâ ni Namarò nga pamalurò na ta ngámin nga  
sinalákkuruk na.

<sup>15</sup> Nonopan naw laguk yù kinagi ni Apu Kesu Kiristu, nga kun na, “Ginnán naw yù kagiak  
ku! Ikáddagâ ku lâ umay nga kun na makkokò! Á magayáyâ yù tolay nga magiddi-iddak  
nikán, ánnâ ari mepasirán sangaw nu lubbekâ, gapu ta napasigaggâ yù ángngikatalâ na  
nikán. Meyárik sù napiá nga suddálu, nga matturá nga magguárdiá, nga naparán ánnâ  
nabarawási, tapé ari makaddák nga magilongán ánnâ ari mepasirán ta labbè nayù kapitán  
na.”

<sup>16</sup> Á yù ira tallu nga dimoniu, pinaggagammung da yù ira mammaguray ánnâ yù ira  
suddálu ra sù gián nga ingágán nayù ira Kudio ta Armageddon, ta ággubobuk na Kebru.

<sup>17</sup> Á ta kabalín na yaw, á minay laguk yùmekapitu nga daroban, á inibubbù na sù paddák  
yù mayán nayù sinangngalán na nga malukung. Á naginnâ yù nasikan nga ngárál nga  
naggapu sù ággitubangán nayù mammaguray nga ajian ta mangilin nga kapilliá, nga bale  
ni Namarò ta lángi, á kinagi na, “Netuppálin!” kun na.

<sup>18</sup> Á naginnâ yù nasikan nga naggurugurù, á naklikilikâ ánnâ naga littúgaw ta nasikan, á  
nallunik nga nasikan. Á yane lunik yù kasikanán nga awán paga ta kagittá na áddè ngaw  
gári lage na kaparò na tolay ta áddè kunangane.

<sup>19</sup> Á naggakki yù dabbun nayù dakal nga ili na Babilonia ta tallu sinná. Á narabbâ nga  
nararál yù ngámin ira káruán nga ili ta dabbuno. Á arán na náttamán ni Namarò yù ira  
tatolay ta ili na Babilonia, ta pinuersá na ira nga pinenum ta kun na binaráyâng nga mapé  
nga ajian ta passuelu na nga napannu, nga keyarigán nayù nerallâ nga pore na nira.

<sup>20</sup> Á limimmâ yù ira ngámin nga pugu ánnâ puddul.

\* <sup>16:13</sup> Yù mattá-ábbilinán, aggina galâ yùmekáruá nga ayám nga naggapu ta dabbun, nga nebukalán ta 13:11-16.

<sup>21</sup> Á napannâ ta dabbuno nga naggapu ta lángì yù káddakalán nga yelo nga kun na batu. Á yù karámmâ nayù katággítâday yù límápu lu nga kilo. Á napannátán yù ira tatolay. Á yáyù nga inibabanabanu ña si Namarò, megapu sù kapannâ nayù káddakalán nga yelo, nga nerallâ nga makánnanássing.

## 17

*Yù Meyannung sù Narákè nga Babay nga Makkabáyu ta Ayám*

<sup>1</sup> Á kabalin na, jimikki laguk nikán yù mekapitu nga daroban nga kabbulun nayù ira annam nga manangngal ta malukung nga bulawán. Á kinagi na nikán, “Arà! Et ten, ta ipasingak ku nikaw yù ángngukum ni Namarò sù neparámak nga babay nga makikarallaw, nga magitubang nga mammaguray ta gián nayù aru nga danum.”\*

<sup>2</sup> Aggina yù kinarallo nayù ira ngámin nga patul ta dabbuno. Á yù ira ngámin nga tatolay gapay ta dabbuno, kunnay ira ta pinagillelo na megapu sù narákè nga ipakuá na nira,” kun nayù daroban.

<sup>3</sup> Á kabalin na nepagubobuk nikán, inâ nangâ nayù daroban, á iniyânge nangâ ta kalállamatán, megapu sù ángngabbák nayù Ikararuá ni Namarò. Á nasingak ku laguk yù babay nga makkabáyu sù ayám nga ujjojin nga makánnanássing nga pitu yù ulu na áんな mapulu yù tágguk na. Á natúratán yù ngámin nga baggi nayù ayám ta aru nga ngágán nga pangiluddé na kâ Namarò.

<sup>4</sup> Á yù babay, nabbísti ta asul áんな ujjojin nga kunnay ta barawási na rená, á naddusáriu, nagaritù, napporselas, áんな nassákkaláng ta bulawán áんな makkakerumá nga nanginá nga batu áんな perlás. Á sinangngalán na yù passuelu nga bulawán, nga napannu sù narákè nga kingngikingnguá na nga makapasirán.

<sup>5</sup> Á aijan nga netúrâ ta mukâ na yù ngágán nga nelímak yù kebalinán na. Kunniawe yù túrâ ta mukâ na:  
“Yù ili na Babilonia,  
nga paggapuán na ngámin nga mangarallaw  
áんな ngámin nga mangnguá ta narákè  
nga makála-álrák ta dabbuno.”

<sup>6</sup> Á nasingak ku yù babay, nga nellaw sù dága nayù ira tatole ni Namarò áんな yù dága nayù ira nga napapátay megapu sù ángngikatalà da kâ Apu Kesu.

Á pakasingak ku sù babay, mapálkákà kuna.

<sup>7</sup> Á kinagi na laguk nayù daroban nikán, “Ngattá, ta mapállâ ka! Kagiak ku bì nikaw yù kebalinán nayù babay áんな yù ayám nga nakkabáyuán na, nga pitu yù ulu na áんな mapulu yù tágguk na.

<sup>8</sup> Yù ayám nga nasingam mu, aggina yù ayám nga aijan ngaw, ngam awánin kunangane. Á sangaw, mallawán nga maggapu sù abbû nga awán ta áddé nayù kálaran na. Ngam mokum galâ nga maddaretiu ta impiernu. Á aijan ta lángì yù libru nga nangilistán ta ngágán nayù ira ngámin nga tatole ni Namarò nga mepattolay áんな mesipâ kâ Namarò ta áddé ta áddé. Á netúrâ sù libru yù ngágad da ta áddé ngaw gári lage na kaparò na dabbuno. Á yù ira tatolay nga ari netúrâ yù ngágad da sù libru, mapállâ ira ta pakasingad da sù ayám nga aijan ngaw, ngam awánin kunangan, á mappasingan má ngin.”

<sup>9</sup> Á kinagi na laguk nayù daroban paga, “Yù ira tatolay nga makánnammu, aggira lâ yù makáwayyá nga makanonò sù kebalinán nayù nasingam mu nga babay áんな yù ayám nga pagitungbangán na, nga pitu yù ulu na. Á yù kebalinán nayù pitu nga ulu na yù pitu nga puddul, nga gián nayù dakal nga ili. Á aijan gapay yù tanakuán nga kebalinán na, nga pitu ira nga patul nga mammaguray.

<sup>10</sup> Á natayin yù límá sù ira pitu nga patul. Á aijanin yù mekánnam nga mammaguray kunangane. Á ari paga jímittál yù mekapitu. Á sangaw nu duttál yù mekapitu, á mabi lâ yù pammagure na.

<sup>11</sup> Á yù ayám nga naggián ngaw, nga awánin kunangane, aggina yù ngaw tâddy sù ira pitu, á sangaw nu duttál má, aggina yù mekawalu nga mammaguray, nga meyágay lâ ta kokum na ta impiernu.

<sup>12</sup> “Á yù ira mapulu nga tágguk nayù ayám nga nasingam mu, aggira yù keyarigán nayù mapulu nga patul nga ari paga jímittál. Á meyawâ nira yù pakáwayyá ra nga mepammaguray sù ayám. Ngam ta tangoras lâ yù pammagure ra.

\* 17:1 Jeremia 51:12-13

<sup>13</sup> Á gapu ta mattatádday ira ta nonò da, itulù da yù pakáwayyá ra ánnâ sikad da sù makánnanássing nga ayám.<sup>†</sup>

<sup>14</sup> Á gerrád da sangaw yù Kígaw. Ngam yù Kígaw ánnâ yù ira tatolay nga mepulupulù kuna, appútad da yù ira makigerrá sù Kígaw, ta aggina yù Yápu nayù ira ngámin nga yápu ánnâ yù Patul nayù ira ngámin nga patul. Á yù ira tatolay nga mepulupulù sù Kígaw, aggira yùmekatalà nga inagálán na, nga piníli na ta mangikatalà kuna, nga napasigaggà yù ángngikatalà da.

<sup>15</sup> Á kinagi na gapay nayù daroban nikán, "Yù aru nga danum nga nasingam mu sù gián nayù pagitubangán nayù makikarallaw, yáyù keyarigán nayù aru nga tatolay nga maggapu ta ngámin nga ili ta dabbuno, nga makkakerumá yù ággubobuk da.

<sup>16</sup> Á yù ira mapulu nga patul nga kebalinán nayù mapulu nga tágguk nga nasingam mu, ánnâ yù makánnanássing nga ayám, ikalusso ra laguk yù babay. Á apad da ngámin yù kukuá na áddè ta awán ta nabuná kuna, á natájjián nga awán bulubugá ta barawási na. Á kunnay ta kanad da yù pattak na, ta talamánad da ánnâ tuggiad da.

<sup>17</sup> Á dannian yù mesimmu, gapu ta si Namarò yù namattatádday ta nonò nayù ira patul, tapè tumulù ira sù ayám, á itulù da sù ayám yù pakáwayyá ra nga mammaguray. Á mammaguray yù ayám áddè ta kapaluro na ngámin nayù kinagi ni Namarò.

<sup>18</sup> Á yù kebalinán nayù babay nga nasingam mu yù dakal nga ili nga neparámak, nga eggá yù pakáwayyá na nga mammaguray sù ira ngámin nga patul ta dabbuno." Yáyù kinagi nayù daroban nikán.

## 18

*Yù Kararál nayù Ili nga Meyárik ta Ili na Babilonia*

<sup>1</sup> Kabalin na, á nasingak ku laguk yù tanakuán nga daroban nga umay nga naggapu ta lángì nga dakal yù pakáwayyá na, á nanawagán ta napiá yù ngámin tangapáddabbunán megapu sù dalingárang na.

<sup>2</sup> Á nakkatol yù daroban ta masikan, á kinagi na,  
"Nararálin yù dakal nga ili na Babilonia! Nararálin!  
Á nabbalin ta paggianán nayù ira dimoniu ánnâ anitu  
ánnâ yù ira ngámin nga narákè nga ari masingan.

Á maggián gapay tán yù ira ngámin nga makkakerumá nga maraping nga mammánù nga makála-álrírak.

<sup>3</sup> Yáyù nesimmu sù dakal nga ili ánnâ ngámin nga naggián tán,  
gapu ta inikanakaná da yù ira ngámin nga tatolay ta dabbuno sù narákè nga ággangnguá ra.

Meyárik ira ta narákè nga babay nga makikarallaw,  
nga mamagillellaw sù ira ngámin nga kábulun na.  
Ngámin nga mammaguray ta dabbuno, kunnay ta neruruk ira kuna.  
Ngámin ira nga minállaku nga maggián ta makkakerumá nga lugár,  
narríku ira megapu sù pakkarakágâ na ánnâ kokkuk na,"  
kun nayù daroban nga maddalingárang.

<sup>4</sup> Á naginnâ laguk yù tanakuán nga ngárál nga naggapu ta lángì, á kinagi na,  
"Sikayu nga tatolé, mánaw kayu tán!

Pattalawán naw yù ili nga meyárik ta makikarallaw,  
tapè ari kayu mepakkirkruk sù liwiliwá nayù ira tatole nga maggián tán,  
maraké mekanakaná kayu gapay sù pamagikáù nira.

<sup>5</sup> Ta kitáru garé nga kunnay ta nabuttul yù liwiliwâ da nga metunù ta lángi.  
Á arán na gemma máttamán ni Namarò yù narákè nga kingngikingnguá ra.

<sup>6</sup> Á kunnay ta panigirigâ da sù ira kábulud da, kunnian yù makuá nira.  
Á mappanà yù mebálà nira.

Kunnay ta inípenum da ta tatolay yù napè,  
á yáyù nga mamiddúá yù mepenum nira nga napè.  
Mamiddúá yù mebálà nira ánnè sù narákè nga kingngikingnguá ra.

<sup>7</sup> Kitokkuk yù ira tatolay nga maggián sù dakal nga ili,  
á inipappalaláki ra yù ngámin nga kukuá ra.

Á yáyù nga mebálà nira yù jígâ ánnâ daddam,  
gapu ta motun yù nono da, á kagiad da,  
'Yù dakal nga ili mi, nakástá nga meyárik ta rená nga mammaguray,

<sup>†</sup> 17:13 Innam mu 17:3 ánnâ 12:3

ngá ari bulubugá mabálú nga maraddam ánná marigirigâ'

<sup>8</sup> Á yáyù nga mesimmu nira ta tangággaw yù ngámin nga jigâ.

Majjigirigâ ira ta makkakerumá nga tulágan, ánná maparaddam ira, ánná mabisin ira,  
ánná matuggi gapay ta api yù dakal nga ili ra,

gapu ta makáwayyá si Apu Namarò nga mamanunnù nira."

Yáyù kinagi nayù ngárál.

<sup>9</sup> Á yù ira mammaguray ta dabbuno, nga nepattáddy sù ira nga maggián sù ili nga  
mangnguá ta narákè, maraddam ira nga makkulè ta pakerípâ da sù atû nga maggagu sù  
ili nga matuggi.

<sup>10</sup> Á maggián ira ta arayyu, á irípâ da yù ili, ta maganássing ira nga dukkì sù ili, marakè  
mekanakanâ ira sù jigâ na. Á kagiad da,

"Bay ey! Kábbi yù dakal nga ili na Babilonia!

Nabalín ta tangoras yù kokum na,"

kun nayù ira mammaguray ta dabbuno.

<sup>11</sup> Á yù ira minálláku nga ajjan ta tangapáddabbunán, maraddam ira, á makkulè ira  
megagu sù kararál nayù ili, gapu ta awánin ta gumátáng ta iláku ra.

<sup>12</sup> Awánin ta gumátáng ta buláwán, pinaláta, nanginá nga batu, onu perlás. Awánin ta  
gumátáng ta nanginá nga gámì nga makkakerumá, mássiki asul onu ujjojjin, onu seda.  
Awánin ta gumátáng ta makkakerumá nga káyu nga mabanguk onu yù pidde ra ta tong  
na elepánte ánná makkakerumá nga nanginá nga káyu, baronsi, balayáng, onu batu nga  
mangngágan ta márbal.

<sup>13</sup> Awán gapay ta gumátáng ta kanelá, onu yù makkakerumá nga rikádu, onu pulbus nga  
bábbanguk nga kunnay ta mírra ánná yù tuggiad da nga mabanguk. Awán ta gumátáng ta  
binaráyáng, denu, arená, onu baggá, báka onu karneru, kabáyu onu kalesá. Awánin gapay  
ta gumátáng ta tatolay nga aripanad da.

<sup>14</sup> Á yù ira minálláku, kagiad da,

"Awán ta awayyá naw nga gumátáng sù karagatán naw nga makkakerumá nga bungá nga  
káyu nga naggagu ta arayyu ánná yù makkakerumá nga kanan nga aleran naw.

Limimmà yù ngámin nga áppakástá naw nga makkakerumá nga nanginá, á ari bulubugá  
metoli nikayu!"

<sup>15</sup> Á yù ira minálláku, nga narríku ta palláku ra tán nga ili sù makkakerumá nga inukkuk  
nayù ira tatolay, maggián ira ta arayyu, nga maganássing sù jigâ nayù ira tatolay. Á  
maraddam ira, ánná makkulè ira.

<sup>16</sup> Á iyássikad da yù ngárál da, á kagiad da,

"Bay ey! Kábbi! Makállállà yù dakal nga ili nga neparámak!

Nakástá nga kunnay ta babay nga nabbarawási ta nanginá nga gámì, nga asul ánná  
ujjojin,

nga nadodusáriu, nga nagaritù, nga nassákkaláng, nga napporselas ta buláwán ánná  
nanginá nga batu ánná perlás!

<sup>17</sup> Ta limimmà yù ngámin nga nakástá nga karíku na,

á ta tangoras lâ yù kabalin nayù kararál na!" kud da.

Á ngámin yù ira nga mepttarabáku ta barangay ánná biray ta bebay, yù ira kapitád da, á  
yù ira mangabbák nira, ánná yù ira minálláku, naggián ira ta arayyu nga makerípâ sù ili.

<sup>18</sup> Á maraddam ira ta pakerípâ da ta atû nga maggagu sù katuggi nayù ili. Á makkatol  
ira, á kagiad da,

Egga panò áddè ngaw ta áddè kunangan yù ili nga kegittán na?" kud da.

<sup>19</sup> Á payyád da ta kápþu yù ulu ra. Á makkulè ira ta daddam da. Á katolad da, á kud da,

"Bay ey! Kábbi yù dakal nga ili!

Yù ngámin nga makákkua ta dakal nga barangay ánná biray ta bebay,  
narríku ira megagu sù karíku na.

Bay ey! Ta awánin ta nabuná sù ili.

Ta tangoras lâ, nabalinin yù kararál na ngámin yù karíku na!" kud da.

<sup>20</sup> Á magayáyâ kayu laguk, sikayu nga maggián ta lángì!

Magayáyâ kayu, sikayu ngámin nga tatole ni Namarò,

ánná sikayu nga piníli na nga minánggilayalâyâ,

ánná sikayu ngámin nga ábbilinán ni Namarò!

Ta kunnian yù pangukum ni Namarò sù ira tatolay sù dakal nga ili.

Á kunnian yù pamagikáru na nira, ánná pangibálà na nira sù kingngikingnguá ra nikayu!

<sup>21</sup> Á kabalín na, minay laguk yù masikan nga daroban, á inâ na yù dakal nga batu, nga kunnay sù mallakay nga batu nga ággilingán, á inipayáng na ta bebay. Á kinagi na, “Kunniaw yù kararál nayù dakal nga ili na Babilonia.

Lummà, nga aringin bulubugá masingan!

<sup>22</sup> Á awán ta maginná tán nga ili nga magárpá, onu yù makkansion, yù mappaláwatá, onu yù magamariung.

Á awán ta málek nga mattarabáku nga mappadday ta makkakerumá.

Á awán gapay ta kagi nayù ira mabbáyu onu maggiling.

<sup>23</sup> Awán bulubugá ta nawák na isingan sù gián na ili.

Awán ta tannuk nayù ira tatolay nga makibodá.

Yáyù pamagikáru ni Namarò sù ira tatolay nga naggián ta dakal nga ili na Babilonia, gapu ta naráki yù ággangnguá ra.

Ta yù ira minálláku nga naggián ta ili, makáwayyá ira, á karíkuán ira ta tangapáddabbunán.

Á massirisiri ira, á yáyù pangilogò da sù ira ngámin nga tatolay ta dabbuno megapu sù ássalamangká ra.

<sup>24</sup> Á pagikuaran ni Namarò yù dakal nga ili na Babilonia, gapu ta tán nga ili ra yù namapatayád da

sù ira ngámin nga ábbilinán ni Namarò,

ánná yù ira tatole na,

aggira ngámin nga napapátay ta dabbuno,” kun nayù daroban.

## 19

### *Meparáyaw si Namarò ta Lángì*

<sup>1</sup> Á kabalín na, naginná yù kunnay ta aru nga ngárál nga makkatol ta lángì. Á kinagi ra, “Alefúyái! Maddáyw ittam kâ Namarò!

Aggina yù mangiyígù nittam. Aggina yù kotunán nga makáwayyá ta ngámin.

<sup>2</sup> Á kuruk nga mepángngà ánná matunung yù ámmanunnú ni Namarò.

Á pinanunnután ni Namarò yù ili nga meyárik sù babay nga neparámak, nga mamalliwá sù ira tatolay ta dabbuno megapu sù naráké nga ággangnguá na.

Á pinagikáru ni Namarò yù ili gapu ta pampapáte na sù ira masserbi kuna,” kud da.

<sup>3</sup> Á pinidduá ra nakkatol, á kinagi ra,

“Alefúyái! Maddáyw ittam kâ Namarò!

Magatáti yù dakal nga ili nga matuggi ta áddè ta áddè” kud da.

<sup>4</sup> Á namalittúkak laguk nga nallakak yù ira duápulu ta appâ nga lállakalákay ánná yù ira appâ nga makkakerumá nga naparò nga matolay, á nakimoray ira kâ Namarò nga nagitubang nga mammaguray. Á kinagi ra, “Ammán! Alefúyái! Maddáyw ittam kâ Namarò!”

### *Yù Meyannung sù Pabbodá nayù Kíga*

<sup>5</sup> Á nakkatol yù ngárál nga naggapu sù ággitubangán nayù mammaguray, á kinagi na, “Sikayu ngámin nga makiaripan kâ Namarò, nga maríku ánná pobare, nga makimoray kuna,

dayáwan naw si Namarò nga Yápu tam,” kun na.

<sup>6</sup> Á naginná laguk yù kunnay ta aru nga tatolay nga makkatol, nga kunnay ta gurù na dakal nga bagi ánná yù gurù na masikan nga alittúgaw. Á kinagi ra,

“Alefúyái! Maddáyw ittam kâ Apu Namarò nga Yápu tam. Ta mammagurayin si Apu Namarò, nga kotunánnga makáwayyá ta ngámin!

<sup>7</sup> Mepagayáyâ ittam laguk, á mappabúyá ittam!

Á dayáwat tam si Namarò!

Ta jmittálín yù ággaw nga pangâ nayù Yápu tam sù ira tatole na,  
aggira ngámin nga mangikatalà kuna,  
nga meyárik ta nobiá na.

Ta aggina yù mangngágan ta Kíga na Karneru,  
á yù ággaw nga pangâ na sù ira tatole na yù meyárik ta pabbodá na,  
tapè mesipà ira kuna.

Á yù ira mangikatalà, nga meyárik ta nobiá na, naparán iren.

<sup>8</sup> Á mabbarawási ira ta kitapuraw nga gámì,  
nga narenu nga nasiling.”

Á yù kebalinán nayù puraw nga gámì yù napiá nga kingngikingnguá nayù ira tatole ni Namarò.

<sup>9</sup> Á nepagubobuk nikán yù daroban, á kinagi na nikán, "Itúrâ mu yawe. Kagiam mu, 'Magayáyá yù ira ngámin nga nápatán ta umay ira mepallálláng sù pabbodá nayù Kígaw,'" kun na. Á kinagi na paga nikán, "Danniaw yù kuruk nga ubobuk ni Namarò."

<sup>10</sup> Á kabalín nayù daroban nepagubobuk nikán, namalittúkagà ta arubáng na, tapè makimorayà kuna nakuan. Ngam gimmá nangà, á kinagi na nikán, "Arám mu akkuán yù kunnian. Arám mà pakimorayán. Si Namarò lâ yù pakimorayám mu. Ta sikán gapay yù masserbi kâ Namarò, nga kunnay nikaw ánná yù ira kábulum mu nga mangikatalà sù kuruk nga inipakánnámmu ni Apu Kesu. Á yù kuruk nga bilin ni Apu Kesu, yáyù inipakánnámmu nayù ira ngámin nga ábbilinán ni Namarò megapu sù pakáwayyá nayù Ikararuá na."

### *Yù Meyannung sù Makkabáyu ta Puraw*

<sup>11</sup> Á kabalín nayù daroban nagubobuk, nasingak ku laguk ta nabukatán yù lángi, á aijan yù puraw nga kabáyu! Á yù nakkabáyu kuna, aggina yù mangngágán ta Kukurugán nga Pangikatalakán, gapu ta matunung yù ámmanunnù na, á matunung gapay yù pakigerrá na sù ira malussaw kuna.

<sup>12</sup> Á maggatang yù matá na ta kun na api. Á aru yù kuroná na ta ulu na. Á netúrâ ta baggi na yù ngágán na nga awán ta makánnámmu sù kebalinán na, ngam aggina lâ yù makánnámmu.

<sup>13</sup> Á yù nakkabáyu ta puraw, nabbarawási ta gámì nga napayyán ta dága. Á nepakánnámmu ta aggina yù ingágad da ta Ubobuk ni Namarò.

<sup>14</sup> Á nepulù kuna yù kitáru ira nga tumuttul kuna, nga naggapu ta lángi, nga nakkabáyu gapay ta puraw nga kunnay ta suddálú na. Á nabbarawási ira ta puraw nga gámì nga narenu.

<sup>15</sup> Á aggina nga ingágad da ta Ubobuk ni Namarò, aijan kuna yù bayunetá na nga nataram, nga mallawán ta simù na, nga ákkibákál na sù ira ngámin nga makkakerumá nga tatolay ta ngámin nga lugár da ta dabbuno. Á aggina yù mangappù nira, á mammaguray nira, ta awán ta makatubáng kuna. Á kunnay ta balayáng yù baston na, nga keyarigán nayù pakáwayyá na, ta mapalurò yù ngámin nga kagian na. Á pággangan na yù ira makkakerumá nga tatolay megapu sù pore ni Namarò nga Makáwayyá ta Ngámin. Á kunnay ta mangibatabatay nga mamaggal ta úbas sù áppaggalán na, kunnian yù keyarigán nayù ámmággáng na nira.

<sup>16</sup> Á netúrâ sù barawási na ánná alangáng na yù ngágán na nga kunniawe:  
"Yù Patul na ngámin nayù ira patul ánná yù Yápu na ngámin nayù ira yápu."

<sup>17</sup> Á paningak ku má, nasingak ku laguk yù daroban nga nanáddak ta lángi sù padalingárang na bilák. Á nakkatol ta nasikan, á kinagi na ta ngámin nga mammánù nga makkayakayák ta utun, "E kayu maggagammung, tapè kumán kayu sù ipamakán ni Namarò nikayu!"

<sup>18</sup> Makkákán kayu ta pattak nayù patul, yù pattak na kapitán ánná mengal, ánná yù pattak na kabáyu ánná yù ira nakkabáyu nira, ánná yù pattak nayù ira ngámin nga tatolay, nga aripan onu ari aripan, maríku onu pobare," kun nayù daroban.

<sup>19</sup> Á kabalín na pakkatol nayù daroban, nasingak ku yù makánnanássing nga ayám nga naggapu ngaw ta bebay, ánná yù ira patul ta dabbuno ánná yù ira kitáru nga suddálú ra nga naggagammung, tapè makigerrá ira sù nakkabáyu ta puraw ánná yù ira suddálú na nga nakkabáyu.

<sup>20</sup> Ngam nagápù yù makánnanássing nga ayám ánná yù mattá-ábbilinán nga nepulù kuna. Aggina galâ yù mattá-ábbilinán\* nga nappagaddátu ta makapállâ nga inipakuá nayù ayám kuna, nga pangilogó na sù ira namárkán sù márka nayù ayám ánná yù ira nakimoray sù siná-ayám nga kagittá na. Á nepayáng yù ayám ánná yù mattá-ábbilinán, nga matolay lâ paga, sù api nga gumággáng nga asupri. Á kitálawa nga kun na bebay yù api.

<sup>21</sup> Á napapátyay yù ira ngámin nga suddálú ra, megapu sù bayunetá nga mallawán ta simù nayù nakkabáyu ta puraw. Á yù ira ngámin nga mammánù, kinád da yù pattak da ta áddè ta arád da kabattuk!

## 20

### *Yù Maribu nga Dagun nga Pammagure ni Apu Kesu Kiristu ta Dabbuno*

<sup>1</sup> Á kabalín na, á nasingak ku laguk yù tádday nga daroban nga mappagapagukák nga naggapu ta lángi. Á sinangngalán na yù dakal nga káwák ánná yù ánnúsi nayù kallak nayù abbû nga awán ta áddè na kálaran na.

<sup>2</sup> Á ginápù nayù daroban yù dakal nga kagang. Aggina galá si Satanas, nga mangngágán gapay ta Diáblu, nga dán nga iráw nga nappasingan ngaw nga mangilogò. Á paggápù nayù daroban kuna, bináluk na, tapè ari mapalubbáng ta áddè ta pappasá na maribu nga dagun.

<sup>3</sup> Á kabalin nayù daroban namáluk kuna, inipayág na sù abbû, á kinallabán na yù abbû, á initúsi na. Á naggián lâ nga nabáluk si Satanas, tapè arán nen ilogò yù ira tatolay ta ngámín nga áppatulán ta dabbuno ta áddè ta pappasá nayù maribu nga dagun. Á ta kabalin nayù maribu nga dagun, máwák nga mapalubbáng, ngam mabi lâ yù paggián na ta lawán.

<sup>4</sup> Á paningak ku má, nasingak ku laguk yù ira nga nagitubang ta aru nga ággitubangán nayù ira makáwayyá, á neddán ira ta pakáwayyá ra nga mamanunnù. Á nasingak ku gapay yù ikararuá nayù ira tatolay nga napapátay megapu sù panguruk da ánná pangipakánnámmu ra sù meyannung kâ Apu Kesu ánná yù ubobuk ni Namarò. Aggira yù pinutulán nayù ira malussaw kâ Apu gapu ta ari ira makimoray sù ayám ánná yù sináyám nga kagittá na. Á ari ira namárkán ta márka nayù ayám ta mukâ da onu limá ra. Á maginnanolay ira, tapè mepammaguray ira kâ Apu Kesu Kiristu ta maribu nga dagun.

<sup>5</sup> Á yù kapaginnanole ra yù mapolu nga pamaginnanole ni Namarò sù ira tatolay nga naggapu sù ira námmatay. Ngam yù ira káruán nga námmatay, ari ira mepaginnanole áddè ta kabalin nayù maribu nga dagun.

<sup>6</sup> Á yù ira ngámín nga mesipà sù mapolu nga pamaginnanole ni Namarò, aggira yù tatole na nga mangilin, á mepagayyá ira kâ Namarò, ta ari ira mekanâ sù mekaruá nga patay nayù ira tatolay.\* Á natullà ira nga mappári nga masserbi kári Namarò kâ Apu Kesu Kiristu. Á mepammaguray ira kâ Apu Kesu Kiristu ta dabbuno ta maribu nga dagun.

#### *Yù Kepayág ni Satanas ta Impiernu*

<sup>7</sup> Á pappasá nayù maribu nga dagun nga pammagure ni Apu Kesu Kiristu ta dabbuno, á mapalubbáng laguk si Satanas sù nebalurán na.

<sup>8</sup> Á mallawán nga umay mangilogò sù ira tatolay ta dabbuno sù ira áppatulán nga mangngágán ta Gog ánná Magog. Á paggagammungan ni Satanas yù ira tatolay, tapè umay ira makigerrá kâ Namarò. Á kitáru yù ira suddálú ra nga umay makigerrá kâ Namarò, nga ari mebiláng nga kunnay ta dágâ ta aggik na bebay.

<sup>9</sup> Á mammartiá ira nga umay, á massallabád da yù dabbun, á lepuanád da yù paggianán nayù ira tatole ni Namarò ánná yù ili na nga iddukan na. Ngam mappanná yù api nga kunnay ta magurán nga maggapu ta lángi, á matuggi ira nga matay.

<sup>10</sup> Á si Satanas nga mangilogò nira, mepayág sù api nga gumággáng nga asupri, nga kitálawa nga kun na bebay yù kálawa na, nga netabbatán sù ayám gapay ánná yù mattá-ábbilinán, nga napolu nga nepayág ta api. Á marigirigátán ira tán nga maggaráyán ta ággaw ánná gabi ta áddè ta áddé.

#### *Yù Pamanunnù ni Namarò sù ira Námmatay*

<sup>11</sup> Á paningak ku má, nasingak ku laguk yù dakal nga puraw nga ággitubangán nayù makáwayyá. Á aijan yù nagitubang tán nga mammaguray. Á yù dabbuno ánná lángi, limimmà ira nga kunnay ta nattálaw ta arubáng nayù mammaguray, á awánin ta paggianád da.

<sup>12</sup> Á nasingak ku yù ngámín ira nga námmatay, yù ira ngaw makáwayyá ánná yù ira ngaw ari makáwayyá. Á nanáddak ira ngámín ta arubáng nayù mammaguray. Á nabukatán yù ira libru, ánná yù libru gapay nga netúratán ta ngágán nayù ira mesipà kâ Namarò nga mepattolay kuna ta áddè ta áddè. Á mapanunnután yù ira námmatay ta meyannung sù kingnguá ra, ta aijan netúrâ sù ira libru yù ngámín nga kingnguá ra ta keggá ra ta dabbun.

<sup>13</sup> Á yù ira nga nanáddak ta arubáng nayù mammaguray, aijan nira yù ira nga nalagabán ngaw ta bebay, ánná yù ira námmatay nga naggapu ta gián nayù ira námmatay nga mangngágán ta Kades. Á napanunnután ira ngámín nga taggitáddy ta meyannung sù kingnguá na.

<sup>14</sup> Á yù ira námmatay, nga ari netúrâ yù ngágad da sù libru nga netúratán nayù ngágán nayù ira mesipà kâ Namarò nga mepattolay kuna, nepayág ira sù api nga kun na bebay

\* <sup>20:6</sup> Á yù kebalinán nayù mekaruá nga pate nayù ira tatolay yù kesinná ra kâ Namarò ta áddè ta áddè. Innam mu 20:14.

yù káláwa na. Á yù kepayáng da ta api, yáyù mangágán ta mekaruá nga pate ra, ta mesinná ira kâ Namarò ta áddè ta áddè.

<sup>15</sup> Aggira yù nepayáng sù kitáláwa nga api nga ari bulubugá máddà, nga ari netúrâ yù ngágad da sù libru nga netúratán nayù ngágán nayù ira mesipâ kâ Namarò nga mepattolay ta áddè ta áddè.

## 21

*Yù Bagu nga Lángì ánná yù Bagu nga Dabbun*

<sup>1</sup> Kabalin na, nasingak ku laguk yù bagu nga lángì ánná yù bagu nga dabbun, ta nappasá yù napolu nga lángì ánná yù napolu nga dabbun. Á awánin gapay ta bebay.

<sup>2</sup> Á nasingak ku yù mangilin nga ili ni Namarò, nga mangágán ta Bagu nga Jerusalem, nga mappagukák nga naggapu kâ Namarò ta lángi. Á nakástá yù ili na nga kunnay ta nobiá nga nabibisti ta nakástá, nga naparán nga magiddak sù tappi nayù mangatáwa kuna.

<sup>3</sup> Á naginná laguk yù nakkatol ta masikan nga naggapu ta ággitubangán nayù mammaguray, á kinagi na, “Ajjanin yù paggianán ni Namarò sù ira tatolay. Á mepaggián si Namarò níra, á aggira yù ira tatole na. Á si Namarò lápay yù mepulupulù nira.

<sup>4</sup> Á punatán ni Namarò yù matá nayù ira tatolay ta kalulúa ra, ta ari ira bulubugá matay onu maraddam onu makkulè, á awán ta mataki onu marigirigâ, gapu ta limimmakin yù ngaw dabbun, á nappasá ngin yù ngaw ággíad da,” kun na.

<sup>5</sup> Á yù nagitubang nga mammaguray, kinagi na laguk nikán, “Innam mu! Pabbaguak ku ngámin,” kun na. Á kinagi na gapay nikán, “Itúrâ mu yawe, ta kuruk yù ira ubobuk ku ngamekatalà,” kun na.

<sup>6</sup> Á kinagi na paga nikán, “Netuppálin! Sikán yù mangngágán ta Alpa ánná Omega, ta sikán yù namarò ta ngámin, á sikán yù mamabbalin ta ngámin.\* Á iyawâ ku sù ira mapangál yù danum nga arád da pagán, nga maggapu ta latuá na wek nga ipakkatole nayù ira tatolay ta áddè ta áddè.

<sup>7</sup> Yáyù iyawâ ku sù ira tatolay nga mangappù ta narákè megapu sù panguruk da nikán. Á sikán lâ yù Yápu ra, á aggira lâ yù ánâ ku.

<sup>8</sup> “Ngám yù ira manukkalak nga manguruk nikán, nga nilikuránád da yù ángnguruk da nikán gapu ta assing da sù ira malussaw nikán, á yù ira nga ari mekatalà, á yù ira ngámin nga jikkù yù akka-akkuáda ánná yù ira mampábatay, yù ira mangarallaw, yù ira mináganganáitu, yù ira makimoray ta sináddios, ánná yù ira ngámin nga massiri, á metabbà ira sù api nga gumággáng nga asupri nga kitáláwa nga kun na bebay, á yáyù paggianád da ta áddè ta áddè. Yáyù kebalinán nayù mekaruá nga patay,”<sup>†</sup> kun na.

*Yù Bagu nga Ili na Jerusalem*

<sup>9</sup> Á kabalin ni Apu nagubobuk karannian, minay laguk nga jimikkì nikán yù mekapitu nga daroban, nga kabbulun nayù ira daroban nga manangngal sù ira pitu nga malukung nga napannu sù pitu nga kaporianán nga jíga. Á kinagi nayù daroban nikán, “E ka bì nga mepulù nikán, ta ipasingak ku nikaw yù nobiá nga atáwa nayù Kigaw,” kun na. Yáyù keyarigán nayù kepattádde nayù ira tatole na kuna.

<sup>10</sup> Á kabalin na nagubobuk, á kunnay ta sinangngalán nangâ nayù Mangilin nga Ikararuá, á yù daroban, iniyánge nangâ laguk ta atannáng nga puddul. Á inipasingan na nikán yù mangilin nga ili ni Namarò, nga ili na Jerusalem nga mappagukák nga naggapu kâ Namarò ta lángi.

<sup>11</sup> Naddalangáráng yù ili megapu sù dalingáráng ni Namarò. Á nasiling gapay ta kunnay sù ássiling nayù nanginá nga batu nga jasper, nga malitáw ta kun na bidduru ánná kun na api yù kular na.

<sup>12</sup> Á nálitukán yù ili ta nakannak nga jijing nga atannáng, nga eggá kuna yù mapulu duá nga puertá, nga guárdián na mapulu duá nga daroban. Á netúrâ sù ira puertá yù ngágan nayù ira mapulu duá nga ánâ ni Israel.

<sup>13</sup> Á ajjan tallu nga puertá ta állassangán, á tallu gapay yù puertá ta ammiánán, á tallu gapay ta abagátán, ánná tallu gapay ta állammarán.

<sup>14</sup> Á mapulu duá gapay yù makkakerumá nga batu nga panáddagán nayù jijing. Á ajjan nga netúrâ sù ira katággítáday nga batu yù ngágan nayù ira mapulu duá nga minángngilayalayá nga sinudduán nayù Kigaw.

\* **21:6** Onu, “Sikán yù pamegapuán ánná yù pagáddekan na ngámin.” † **21:8** Innam mu 20:6 **futnot.**

<sup>15</sup> Á yù daroban nga nepagubobuk nikán, sinangngalán na yù ággukuk nga bulawán, tapè gukuran na yù ili ánnna yù ira nakannak nga jijjing nga nelepuán sù ili ánnna yù ira puertá na.

<sup>16</sup> Á kunnay ta pareku nga kuadrádu yù ággíán nayù ili, nga naggigittá yù ira kátannang na, yù kálawa na, ánnna yù kápaddu na. Á paggukuk nayù daroban sù ili, mapulu duá nga ribu (12,000) ta ággukuk na yù kálawa na, nga mággè duáribu ta appáttagatù (2,400) nga kilometro.<sup>‡</sup> Á kunníú gapay yù kápaddu na ánnna yù kátannáng na.

<sup>17</sup> Á ginukuk na gapay nayù daroban yù jijjing nga nelepuán sù ili, á magatù appátapulu appâ (144) nga ággukuk nayù daroban yù kátannáng na, nga mággè pitupulu duá (72) nga metro, gapu ta mággè naggittá ira nga ággukuk nayù daroban ánnna yù gadduá nga metro tam nga tatolay.

<sup>18</sup> Á yù jijjing nayù alitù, napadday ta nanginá nga batu nga jasper. Á dipuru bulawán yù ili, nga malitáw ta kun na bidduru.

<sup>19</sup> Á yù ira mapulu duá nga panáddagán nayù jijjing, nakástá ira, nga napayyán ta makkakerumá nga batu nga nanginá nga nasiling. Á yawe yù ira mapulu duá nga batu nga makkakerumá yù kolor da, nga panáddagán nayù jijjing. Yù olu nga panáddagán yù batu nga jasper, nga malitáw ta kun na bidduru ánnna kun na api yù kolor na. Á sapiro nga asul yù mekaruá. Á kalkeroni yù mekatallu, nga makkakerumá yù kolor na. Á emaral yù mekáppâ, nga malitáw nga berdi.

<sup>20</sup> Á sardonika yù mekalímá, nga puraw ánnna ujjojjin. Á karnelia yù mekánnam, nga ujjojjin. Á kirisolito yù mekapitu, nga malitáw nga ngilá. Á berilo nga malitáw nga berdi yù mekawalu. Á yù mekasiám, topasio, nga kun na malitáw nga bulawán. Á kirisoprasio yù mekamapulu, nga kun na náta nga bulawán nga malitáw yù kolor na. Á asinto yù mekamapulu tádday, nga ngisi nga asul, á amatista yù mekamapulu duá, nga malitáw nga ujjojjin nga asul.

<sup>21</sup> Á yù mapulu duá nga puertá nayù alitù nga nelepuán ta ili, á tangaperlás yù ira taggitáddyay. Á yù kalsáda nayù ili, dipuru bulawán, nga malitáw ta kun na bidduru.

### *Yù Áaggiát tam ta Bagu nga Ili na Jerusalem*

<sup>22</sup> Á awán ta nasingak ku nga kapilliá sù ili, ta arád da mówák yù kapilliá, gapu ta ajjan tán si Apu Namarò nga makáwayyá ta ngámin, ánnna yù Kígaw, á aggira yù pakimorayán nayù ira ngámin nga tatolay tane ili.

<sup>23</sup> Á arád da mówák yù nawák na bílák onu bulán sù ili, gapu ta maddalingárang nga manawák yù ili megapu sù dalingárang ni Namarò ánnna yù nawák nayù Kígaw.

<sup>24</sup> Á manawágán yù ira ngámin nga tatolay ta pallakák da ta dabbuno megapu sù dalingárang nayù ili. Á yù ira ngámin nga patul ta dabbuno, ituluk da yù kapiánad da sù ili.

<sup>25</sup> Ta maggián lâ nga nabukatán yù ira puertá nayù ili, gapu ta ari ira melitù nu ággaw, á awán ta gabi tân.

<sup>26</sup> Á yù ngámin ira nga makkakerumá nga tatolay, ed da ituluk sù ili yù ngámin nga kukuára nga nakástá ánnna yù kapiánán nga ajjan nira.

<sup>27</sup> Ngam awán bulubugá ta makatallung sù ili nu ari narenu ta ánninanán ni Apu. Ari makatallung yù ira nga makála-álirák yù akka-akkuád da onu yù ira massiri. Ngam makatallung lâ sù ili yù ira tatolay nga netúrá yù ngágad da sù libru nayù Kígaw, nga netúratán ta ngágan nayù ira tatolay nga mesipà sù Kígaw nga mepattolay kuna ta áddè ta áddè.

## 22

### *Yù Danum nga Kepattole tam kâ Apu ta Áddè ta Áddè*

<sup>1</sup> Á paningak ku sù ili, inipasingan na laguk nayù daroban nikán yù danum nga ipakkatole na tolay ta áddè ta áddè. Á malitáw yù danum, nga massiling ta kun na bidduru. Á magagi yù danum nga naggapu sù ággitubangá di Namarò ánnna yù Kígaw.

<sup>2</sup> Á magagi yù danum sù tangngá na kalsáda nayù ili, á eggá nga massiddammáng yù káyu nga mabbungá ta ipakkatole tam ta áddè ta áddè. Á mamemapulu duá yù pabbungá nayù káyu ta tangaragun, ta mapulu duá nga makkakerumá nga bungá na. Á moru yù ira ngámin nga makkakerumá nga tatolay ta dabbuno megapu sù don nayù káyu, tapè mammapiá ira.

<sup>‡</sup> **21:16** Ta mággè naggittá ira nga tangággukuk nayù daroban ánnna límá nga kilometro, nga ággukuk tam.

<sup>3</sup> Á awán bulubugá ta igagek ni Namarò sù bagu nga ili nga kunnay sù ngaw pangigagek na ta dabbuno,<sup>\*</sup> ta maggián tán di Namarò áんな yù Kígaw nga nagitubang nga mammagray. Á yù ira ngámin nga tatolay ta ili, masserbi ira kâ Namarò áんな makimoray ira kuna.

<sup>4</sup> Á masingad da yù mammang na, á netûrâ yù ngágán na ta mukâ da.

<sup>5</sup> Á awán ta gabi sù ili. Arád da bulubugá máwák yù isingan onu nawák nayù bilák, gapu ta si Apu Namarò yù mamannawák nira. Á mepammagray ira kâ Namarò ta áddè ta áddè.

### *Manoli si Apu Kesu Kiristu sangaw*

<sup>6</sup> Á kabalín nayù daroban mangipasingan sù ili, kinagi na laguk nikán, “Kuruk nga mekatalà ngámin danniaw nga ubobuk ni Namarò. Ta ipepúlù ni Namarò sù ira ábbilinán na yù Ikararuá na. Á si Namarò nga mangiyawâ sù Ikararuá na, aggina galâ yù maddok nikán nga daroban na, ta ek ku ipasingan nikayu nga masserbi kuna yù mesimmu sangaw nu mabi.”

<sup>7</sup> Á yawe yù kinagi ni Apu Kesu, “Ginnán naw laguk yù kagiak ku. Manolingà sangaw nu mabi! Mapagayáyâ yù ira ngámin nga tatolay nga manguruk sù bilik ku nga netûrâ sawe nga meyannung sù mesimmu sangaw,” kun na.

<sup>8</sup> Á sikán si Kuan, nga nakaginná áんな nakasingan sù ngámin nga initûrâ ku saw. Á kabalku ku nakaginná áんな nakasingan, á namalittúkagà ta arubâng nayù daroban nga nangipakánnámmu nikán karannian, tapè pakimorayák ku nakan.

<sup>9</sup> Ngam gimmá nangâ, á kinagi na nikán, “Arám mà pakimorayán, ta masserbingà kâ Namarò gapay, nga kunnay nikayu áんな yù ira wáwwagim nga ábbilinán na áんな yù ira ngámin nga manguruk sù netûrâ sawe libru. Si Namarò lâ yù pakimorayát tam!” kun na.

<sup>10</sup> Á kinagi na paga nayù daroban nikán, “Arám mu ilímak yù inipalappâ ku nikaw nga mesimmu, nga netûrâ sawe libru, ta mabíkin yù dattál na.

<sup>11</sup> Á dattál na ággó na, á yù ira nga mangnguá ta narákè, akka-akkuád da lâ paga yù narákè, áんな yù ira nga jikkù yù akkuád da, akka-akkuád da lággapay yù jikkù. Ngam yù ira mangilin nga tatole ni Namarò, nga napiá áんな matunung lâ yù akkuád da, á tuppálad da lâ paga yù ngámin nga napiá nga ipakuá ni Namarò nira.”

<sup>12</sup> Á kinagi ni Apu Kesu, “Ginnán naw yù kagiak ku. Manolingà sangaw nu mabi, á mepulù nikán yù ibálâ ku sù ira tatolay nga katággitáddyay ta mepongngâ sù kingnguá na.

<sup>13</sup> Sikán yù mangngágan ta Alpa áんな Omega, ta sikán yù napolu áんな yù maporián. Sikán yù namarò ta ngámin, á sikán gapay yù mamabalin ta ngámin.”<sup>†</sup>

<sup>14</sup> Á yù ira tatolay nga napakarenuán, pagayáyatan ni Namarò ira gapu ta kunnay ta binábbalád den yù gámì da, nga sinniál ta napakomángin yù liwiliwâ da. Á meyawâ nira yù awayyá ra nga tollung ta puertá nayù ili áんな yù awayyá ra nga kumán ta bungá nayù káyú nga ipakkatole ra ta áddè ta áddè.

<sup>15</sup> Ngam yù ira narákè nga tatolay, ari ira makatallung sù ili. Ngámin yù ira maganáni, yù ira mangarallaw, yù ira mamapáyat, yù ira makimoray ta sináddios, yù ira ngámin nga massiri áんな yù ira áppé pípiá, maggián ira lâ ta lawán, ta ari ira makatallung sù ili.

<sup>16</sup> Á kinagi ni Apu Kesu Kiristu, “Sikán si Kesu! Á jinok ku yù darobak ku ta gián naw, ta en na ipakánnámmu nikayu ngámin danniaw, tapè umay kayu mangipakánnámmu sù ira ngámin nga makkakerumá nga maggagammung nga mangikatalà nikán. Sikán yù ginaká ni Patul Dabid. Sikán yù mangngágan ta Darámmagan, nga bituan nga maddalingárang ta alippánnawák, nga keyarigák ku,” kun ni Apu Kesu.

<sup>17</sup> Á yù Mangilin nga Ikararuá, agálán na, nga kun na, “Umay ka!” Á yù ira ngámin nga mangikatalà kâ Apu Kesu, nga meyárik sù nobiá nayù Kígaw, agálád da gapay, nga kud da, “Umay ka!” Á sikayu ngámin nga taggitáddyay nga magginná sù bilin na yawe libru, kagian na, “Umay ka!”

Á sikayu ngámin nga kunnay ta mapangál, umay kayu laguk mangikatalà kâ Apu Kesu! Sikayu nga makkarakágâ sù danum nga ipakkatole tam ta áddè ta áddè, umay kayu makiyígú kâ Apu Kesu, tapè makálâ kayu ta inuman naw, nga awán ta pagá na!

<sup>18</sup> Á sikán si Kuan. Á pappalának ku sikayu ngámin nga magginná sù inipalappâ ni Namarò nikán nga initûrâ ku sawe libru. Taddánat takayu ta arán naw lannapán yawe netûrâ, ta nu ajjan yù tolay nga lannapán na yawe libru, á lannapán na gapay ni Namarò yù jigirigâ nga ikáru na kuna nga kunnay sù netûrâ sawe libru.

\* 22:3 Genesis 3:17-19; Roma 8:20-21    † 22:13 Innam mu 21:6 **futnot.**

<sup>19</sup> Á nu ajjan yù mangari sù ubobuk nga netúrâ sawe libru nga meyannung sù mesimmu sangaw, arán na gapay iyawâ ni Namarô kuna yù balle na sù bungá nayù káyu nga ipakka-tole tam ta áddè ta áddè. Á ari mesipà sù mangilin nga ili ni Namarò nga inipakánnámmu na nittam sawe libru.

<sup>20</sup> Á si Apu Kesu yù massistígu ta kuruk yù ngámin nga netúrâ sawe libru. Á kagian na, “Á manolingà sangaw nu mabì,” kun na. “Ammán, Apu! Mabì ka lá umay!” kut tam kuna laguk.

<sup>21</sup> Á yawe yù ipakimállà ku kâ Apu Kesu, ta parè bì ta ikákkállà na kayu ngámin nga mangikatalà kuna. Mapalurò! Ammán! Áddè nen.